



Didza' cubi rucá'ana tsahui'

Rincón Zapotec New Testament



Contents

YUGU' SALMO	1
DIDZA' DXI'PA BUZÚAJĚ' MATEO	101
DIDZA' DXI'PA BUZÚAJĚ' MARCOS	158
DIDZA' DXI'PA BUZÚAJĚ' LUCAS	193
DIDZA' DXI'PA BUZÚAJĚ' JUAN	251
LE GULUNĚ' BÖNNI' GUBÁZ NASÓL-LĚ'Ě CRISTO	293
DIDZA' GUSÓL-LĚ'Ě PABLO YÖDZÖ ROMA	347
DIDZA' ZÍ'ALÖ GUSÓL-LĚ'Ě PABLO YÖDZÖ CORINTO	370
DIDZA' BUROPI GUSÓL-LĚ'Ě PABLO YÖDZÖ CORINTO	392
DIDZA' GUSÓL-LĚ'Ě PABLO LUYÚ GALACIA	406
DIDZA' GUSÓL-LĚ'Ě PABLO YÖDZÖ ÉFESO	415
DIDZA' GUSÓL-LĚ'Ě PABLO YÖDZÖ FILIPOS	423
DIDZA' GUSÓL-LĚ'Ě PABLO YÖDZÖ COLOSAS	428
DIDZA' ZÍ'ALÖ GUSÓL-LĚ'Ě PABLO YÖDZÖ TESALÓNICA	434
DIDZA' BUROPI GUSÓL-LĚ'Ě PABLO YÖDZÖ TESALÓNICA	439
DIDZA' ZÍ'ALÖ GUSÓL-LĚ'Ě PABLO QUEĚBI' BI' TIMOTEO	442
DIDZA' BUROPI GUSÓL-LĚ'Ě PABLO QUEĚBI' BI' TIMOTEO	449
DIDZA' GUSÓL-LĚ'Ě PABLO QUEĚBI' BI' TITO	454
DIDZA' GUSÓL-LĚ'Ě PABLO QUEĚ' FILEMÓN	457
DIDZA' RUZÉAJNI' YUGU' BÖNACHI HEBREO	459
LE BUZÚAJĚ' LU GUICH SANTIAGO	476
DÍDZA'DO' ZÍ'ALÖ BUZÚAJĚ' PEDRO	482
DÍDZA'DO' BUROPI BUZÚAJĚ' PEDRO	488
DÍDZA'DO' ZÍ'ALÖ BUZÚAJĚ' JUAN	492
DÍDZA'DO' BUROPI BUZÚAJĚ' JUAN	497
DÍDZA'DO' BUNNI BUZÚAJĚ' JUAN	498
DÍDZA'DO' BUZÚAJĚ' JUDAS	499
LE BULUÍ'INĚ' DIOS JUAN	501



Didza' cubi rucá'ana tsahui'

New Testament in Zapotec, Rincón (MX:zar:Zapotec, Rincón)

Language: Zapotec, Rincón

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2009 Wycliffe Bible Translators, Inc.

Copyright © 2009 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

2edfbaf5-dd9e-5e9c-acb1-bede935cc134

ISBN: 978-1-5313-0744-8

YUGU' SALMO

1 Bica' ba bönni' biti' runë' ca naca le ta'gú'u yöl-la' lë' nupa tu'cá'ana Dios, en biti' ridálenë' tsözxón nupa tun dul-la', en biti' runë' tsözxón le tun nupa ta'z'f' quidza' Dios.

² Le raza ládxxë'ë nácagaca xibá naguixjë' Xanru', en ca nácagaca xibá na' rëla, en te dza rulaba ládxxë'ë.

³ Bönni' ni náquië' ca tu yaga dxe' ga naca ra' nisa, le ribía sizxóni cate' ridxín dza que, en biti' ca' rizóa gubá'ayisö. Yúgu'të le runë' ta'rúaj dxi'a.

⁴ Biti' raca caní quégaca nupa tuá' dö'. Nácagaca ca bëbu zxe café ruá' le bö'.

⁵ Que lë ni na' biti' ulu'rúajë' tsahui' bönni' tu'ë dö' cate' Dios uchi'a usöröë' quégaquië', en biti' ila'cu'ë bönni' dul-la' ga tu'dubë' bönni' tsahui'.

⁶ Rapa chi'ë Xanru' Dios nöza ga ta'dë' bönni' tsahui' na', pero uniti tsaz nu ridá gapa ta'dá nupa tuá' dö'.

2 ¿Bizx que tu'tsatsa bönachi yugu' yödzo

en tu'pá'a nítisö le ilúngaca?

² Bönni' ta'nná bë'ë luyú ta'dá'baguë'ë Dios.

Tun tuz xtídza'gaca nupa dë lu ná'agaca para ila'dá'baga' Xanru', en Nu na' nabó cazë' para inná bë'ë,

³ ta'nná: "Uzxuzxaj uquínnajru' le ta'nná bë'enë' rë'u, en chú'unaru' yugu' le tu'zenë' bach rë'u."

⁴ Dios na' zoë' yehua' yubá uzxídxisë'. Xanru' Dios utitaj cazë' léguequi.

⁵ Ní'irö lu yöl-la' rilé queë' gü'ilenë' léguequi didza',

en lu yöl-la' ridzá'a queë' uzenë' bach léguequi.

⁶ Innë': "Nuzóa caza' bönni' nabó caza' xilatjë' ga inná bë'ë.

Inná bë'ë lu Gu'fa Sión, le naca gu'fa lá'ayi quia'."

⁷ Quíxjöi'ida' lib'ili' didza' nuzóë' tsaz Dios.

Xanru' Dios gudxi cazë' neda': "Li' nacu' Zx'ina'.

Na'a dza nuzóa caza' Li'.

⁸ Gunábini neda', ate' guna' ga ilequi quiu' yugu' yödzo.

Guequi ca' quiu' idútë yödzoiliö.

⁹ Quitsju' léguequi len tu xiyaga guíë.

Uzxuzxju' léguequi ca run nu rilá'a tu zx-iga' yó'öna."

¹⁰ Que lë ni na', lib'ili' na' rinná bë'ëli', guli'tséajni'i.

Guli'sedi cuinli', nülöli' ruchi'a rusöröli' le raca luyú.

¹¹ Lu yöl-la' ba'a ladxi' queéli' guli'gún xichinë' Xanru'.

Lu yöl-la' rizzizi queéli' buli'sí' xibë'.

¹² Guli'gún bal Zx'inë' Dios para cabí ilétenë',

en para cabí udxi queéli' la' nöza.

La' ilentë yöl-la' rilé queë'.

¡Bica' ba yúgu'të nupa tu'zxöni ladxi' Lë'!

3 Xan, chinayangacada' nupa ta'lë neda'.

Zián nupa ta'dá'baga' neda'.

² Zián nupa ta'nnë quia', ta'nná:

"Biti' usölë' Dios lë'."

³ Pero Li', Xan, run chí'tica'su' neda'.

Nacu' yöl-la' ba quia', en Nu rutipa neda'.

⁴ Bë'a zidzaj didza', bulidza'-në' Xanru', ate' Lë' biyönnë' chi'a ga na' zoë' lataj lá'ayi queë'.

⁵ Neda' rata', en rasía',

ate' rubana', tu' nazóntica'së' Xanru' Dios neda'.

⁶ Biti' gádxida' gayuá' gayuá' bönachi, nupa na' nagú'ugaca neda' lé'ajlö.

⁷ ¡Guyasa, Xan! ¡Busölá neda', Dios quia'!

Budxía huë' xága'gaca nupa tu'dí'i neda',
en buquínajda' nupa nácagaca xihui'.

⁸Xan, rusólá cazu' bönachi quiu'.

Ben ga gaca dxi'a quégaca bönachi quiu'.
¡Ca' gaca!

4 Bubí'i didza' cate' rulidza' Li', Dios.
Nacu' Nu ruchi'a rusóro le raca quia'.
Cate' guró'a böniga, bida cazu' Li' ga
zoa', en gúcalenu' neda'.

Ruhuéchi' ladxi' neda', en ruzé nagu' le
rinábida' Li'.

²Rnné' Dios: "Libí'ili', bönachi, ¿gáca'xte
ulidza dítajli' neda'?"

¿Gáca'xte caz idxí'ili' le cabí nazaca', en
güf'i ládxi'li' le cabí naca?"

³Gulí'tsöjné nabó cazé' Xanru' nu radxi
Lé',

ate' riyönné' neda' cate' rulidza'-né'.

⁴Gulí'gadxi Lé', en bíti'rö gunli' dul-la'.
Gulí'sá' ladxi' ca naca lé ni cate' déli' ga
ráta'li', en guli'sóa dxisó.

⁵Gulí'cú'u lahué' Xanru' le naca dxi'a,
en bulí'zxöni ladxi' Lé'.

⁶Zián nupa ta'nná: "¿Nuzxi caz gun ga
gaca dxi'a queéru'?"

Lu yöl-la' dxi'i ladxi' quiu' buyú netu',
Xan.

⁷Runu' ga rudzéjade'eröda'
ca tu'dzeja nupa tu'zí' xibé zxa' za
guixzi yu, en xisi lubá uva.

⁸Cate' rata', la' rásitia' lu yöl-la' riböza
dxi ladxi' quia',
tu' run cazu' Li', Xan, ga riböza' dxi'a
tsáhui'do'.

5 Ruzé nagu' didza' ruá'a, Xan.
Buyú ca rinnéda' ládxa'a lu yöl-la'
ruhuí'ini quia'.

²Dios quia', Nu rinná be'e neda', ruzé
nagu' cate' rinábida' Li'
gácalenu' neda', na' güf'ilena' Li' didza'.

³Yugu' zila yönnu' chí'a.
Zílado' idxina' lo', en cöza' didza' ubi'u.

⁴Nacu' Li' Dios biti' raza ládxi'u le cabí
naca,

en biti' ru'u lataj ibiga' ga zu' nu ruá' dö'.

⁵Biti' ru'u lataj nupa tun ba rahui
ila'dxín lo',

en biti' rilé'enu' dxi'a nupa nácagaca
xihui'.

⁶Rusunítu' dërö nupa ta'zí' ye'e
luzé'eguequi,
en biti' rilé'enu' dxi'a nupa tuti bönachi,
en ta'zí' yé'.

⁷Gaca tsu'a neda' lu yu'u lidxu', tu'
nadxí'ide'enu' neda'.

Lu yöl-la' ba'a ladxi' quia' tsu'a ga naca
yudo' lá'ayi quiu', en tseaj ládxa'a
Li'.

⁸Tu' nacuá' zían nupa ta'lé neda', bu-
luí' neda' le naca dxi'a ré'ënu' guna',
Xan.

Busédi neda' para gaca guna' ca ré'ënu'
Li'.

⁹Biti' gaca nu tseajlé' didza' tu'f'i nupa
na' ta'lé neda'.

Nácagaca xihui' icja ládxi'do'guequi.
Naca ruá'agaca ca tu yeru ba nayalaj,
en lu yöl-la' rizi' yé' quéguequi tu'f'i yulaj
didza'.

¹⁰Ben léguequi xiguia', Dios.

Ben ga biti' udxín xtídza'guequi.
Gurú'una léguequi tu' túntica'só dul-la',
en tu' ta'dá'baga' xtídz'u.

¹¹Ulu'dzeja nupa tu'zxöni ladxi' Li'.
Lu yöl-la' rudzeja quéguequi gúl-lagaca
quiu' tu' rácalenu' léguequi.

Tu'zí' xibó' nupa nadxí'igaca Li'.

¹²Run cazu' Li' ga raca dxi'a quégaca
nupa tun ca rna xtídz'u, Xan.

Lu yöl-la' dxi'i ladxi' quiu' run chí'u
léguequi.

6 Biti' uzenu' bach neda' lu yöl-la' rilé
quiu', Xan.

Biti' gunu' neda' xiguia' lu yöl-la' ridzá'a
quiu'.

²Buéchi' ladxi' neda', Xan, tu' rudú
ládxa'a.

Bun neda', Xan, tu' riguf'i rizáca'a.

³Rö'ö böniga idúté le naca'.

¿Gáca'xte caz gaca caní, Xan?

⁴Gudá dusóló' neda', Xan.

Tu' nadxí'inu' neda', busölá neda' lu yöl-la' guti.

⁵ Lu lataj chul-la cuntu nu tsöjné Li'.

Cuntu nu zoa ni' nu gaca cu'u Li' yöl-la' ba.

⁶ Rudú ládxa'a tu' rinnética'sö ládxa'a.

Yugu' dzö' ribisa le ráti'da' len nisa ribödxí quia'.

Rusubisa' xcúgua' len nisa ribödxí quia'.

⁷ RÖ'ö gui guiöj lahua' tu' ribódxítica'sa'.

Biti' gaca ilé'eda' tu' nózigaca nupa tu'dí' neda'.

⁸ Guli'cuíta ga zoa', lib'ili', ruá'ali' dö', tu' riyönné' Xanru' ribödxá' neda'.

⁹ Ruzé' nague' le rulidza', ráta'yua' lahué', en rubi'ë didza' cate' bi rinábida' Lë'.

¹⁰ Ulu'tuf'i nupa tu'dí' neda', en ila'bó' böniga.

Lu yöl-la' rutuf'i quéguequi ulu'biga' ga zoa'.

7 Ruzxöni ládxa'a Li', gácalenu' neda', Xana' Dios.

Busölá neda' lu ná'agaca nupa ta'bía no neda', en gúcalen neda'

² para cabí soa nu cuéaj neda' ca runba' bédxi guixi',

en para cabí usuniti neda' ga cuntu nu zoa gácalen neda'.

³ Xana' Dios, channö caní nuna':

Channö nabága'a xiguia',

⁴ o channö bubí'a dö' que nu gúcalen neda',

o channö bí'a dö' que nu bití' bi ben quia' lu bití' rilé'e neda' dxi'a,

⁵ bē' lataj soa regu' neda' nu na' bití' rilé'e neda' dxi'a, en ucul-la neda'.

Bē' lataj nu na' quin neda' lu yu,

en ucá'ana neda' cá'asö.

⁶ Lu yöl-la' rilé' quiu' guyasa, Xan.

Gudá'baga' nupa na' lu yöl-la' ridzá'a quéguequi tá'baga' neda'.

Guyasa, gúcalen neda' tu' nacu' Nu ruchí'a rusöró le raca quia'.

⁷ Ben ga ulu'dubi quiu' yúgu'té bönachi, en gunná be'e léguequi ga ni' zu' xitsá'terö.

⁸ Ruchi'a rusöróu' quéguequi yúgu'té bönachi, Xan.

Bubéaj neda' tsahui', Xan, tsca naca le tsahui' nuna', en tu' naca' idú tsahui'.

⁹ Ben ga udxi que le xihui' tun nupa tuá' dö',

pero buzóa tsutsu nupa tun le naca dxi'a, tu' nacu' Li' idú tsahui', Dios, en ruchí'a rusöróu'

le ta'zá' ládxi'gaca bönachi, en le ta'guín-naj ícaguequi.

¹⁰ Naca cazé' Dios Nu run chí'i neda'.

Rusölé' nupa nácagaca idú ladxi'.

¹¹ Dios ruchí'a rusöróe' queëru' ca naca le naca tsahui',

en richúgutica'sé' quégaca nupa tuá' dö'.

¹² Channö cabí ulu'bí'i ladxi' bönachi, utuché' guíe tuchi' queé'.

Chinucözé' uxiti' yaga queé'.

¹³ Chinupé'ë yugu' le rudí'iné' lu gudil-la, en nudxíé' lu du uxiti' yugu' yaga túchi'-do' zoa guí' láhuiguequi.

¹⁴ Buyútsöca', riguín-naj icjé' bönni' ru'ë dö' le xihui' guné'.

Rufí' ládxe'ë le naca dö', en rizí' yé'ë.

¹⁵ Nachó'öné' ga ré' tu yeru zxön ga nu ibixi,

pero lë cazé' yöjbixé' lu yeru na' guchó'öné'.

¹⁶ Budxín la' queé'zé' dö' na' bi'ë, en dxíé' hué' ca naca xiguia' nabágué'ë.

¹⁷ Guía'-né' Xanru': "Xclenu'" tu' náquié' tsahui',

en gul-la' yöl-la' ba que Lë' Xanru', Nu nayépisëtërö.

8 Xana' Dios,

bica' ba Lo' idüté yödzölió!

¡Xitsá'terö ca lúzxiba nayépisu' Li'!

² Túl-labi' bí'ido', enca' bí'i hué'ënido' yöl-la' zxön quiu'

sal-la' nacuá' nupa ta'dá'baga' Li'.

Uzóa dxíu' nupa na' bití' ta'lé'e Li' dxi'a, enca' nupa ta'dá'baga' Li'.

³ Cate' ruyúa' lúzxiba quiu', le nunu' len xibón na'zu',

enca' beu', en yugu' böla'j bení' nuzú'
xilátjaguequi,

⁴ ní'irò rnníá': ¿Bizxi caz bönni', tu' röjné
cazu' lè'?

¿Bizxi caz nu naca bönáchisö, tu' rufi
ládzu'u Li' nu na'?

⁵ Nunu' ga naquië' bönni' ia'lati' cuidi' ca
naca cazu' Li'.

Nuzú' queë' yöl-la' ba quiu', en yöl-la'
run bal ca

tu le néquini oro dxía icjè'.

⁶ Nunu' ga rinná bé'enë' yugu' le nun
cazu' Li'.

Yúgu'tè nuzú' xini'è lè'.

⁷ Nuzú' xini'è yúgu'tèba' bö'cu' zxila', en
yúgu'tèba' bédxi,

⁸ en lès caní nunu' ca' quégacaba'
biguínido',

en quégacaba' böla dzó'öba' nísado',
enca' quégacaba' yúgu'tèba' böa'
ta'dódiba' lu nísado'.

⁹ ¿Xana' Dios,
bica' ba lo' idútè yödzülió!

9 ¿Idú ládxa'a rigu'a Li' yöl-la' ba, Xan!
¿Usiyönda' bönachi ca naca yúgu'tè
yöl-la' huáca nunu'!

² ¿Udzéjada', en uzi'a xibó'!

¿Gul-la' yöl-la' ba que Lo', tu'
nayépisëtèru'!

³ ¿Ta'zxunnaj nupa ta'dá'baga' neda'!

¿Ta'dzó'ö, en tu'niti lo' Li',

⁴ tu' nubéaju' tsahui' le naca dxí'a runa'!
¿Rö'u ga rinná bë'u, en ruchi'a rusöróu'
queétu' ca naca le naca tsahui'!

⁵ Bulidza zi'u yugu' yödzo, en busunítu'
nupa tuá' dö'.

Tsaz busulu' lu guichi quiu' gapa gu-
la'zúaj láguequi.

⁶ Chigula'niti nupa gula'dá'baga' Li'.

Tsaz naguínna'jgaca gapa gula'cuá'.

Busunítu' yugu' yödzo gapa na'
gula'cuá',

ate' cuntu nu zoa röjné yugu' yödzo na'.

⁷ Zóatica'së' Xanru' Dios.

Naguixjè' tsaz lataj ga rö'è rinná bë'è en
ruchi'a rusöróë' quégaca bönachi.

⁸ Uchi'a usöróë' quégaca bönachi
yödzülió lu le naca tsahui'.

Uchi'a usöróë' quégaca yugu' yödzo lu le
nátatè.

⁹ Gun chi'ë Xanru' Dios nupa nácgaca
yechi'.

Gácalenë' léguequi cate' nu gun léguequi
zi'.

¹⁰ Ulu'zxöni ladxi' Li' nupa núnbë'gaca
Lo'.

Caní gaca, Xan, tu' cabí nusán ládzu'u
nupa tu'guilaj Li'.

¹¹ Guli'gul-la yöl-la' ba queë' Xanru', zoë'
ga na' nazí'i le Sión.

Buli'siyón bönachi yugu' yödzo ca naca
yugu' le nunë'.

¹² Biti' ral-la ládxe'ë nupa ta'guí'i ta'zaca'
cate' tu'lidza Lè',

tu' röjné léguequi Nu na' ruzi' lèbi nu ruti
bönachi.

¹³ Buéchi' ladxi' neda', Xan.

Buyú ca tun neda' zi' nupa tu'dí'i neda'.

Ruchisu' Li' neda' cate' chirequi gátia'

¹⁴ para gaca usiyönda' bönachi yöl-la' ba
quiu' Li'.

Ga naca ga nu tsaza yödzo quiu' nazí'i le
Sión,

udzéjada' tu' nusöló' neda'.

¹⁵ Yöjbixigaca bönachi yugu' yödzo lu
yeru gula'chó'öna ga tsöjbixigaca
luzé'éguequi.

Bila'röli ni'aguequi lu yöxaj bulu'cachi'
para ila'zón léguequi.

¹⁶ Chinunë' Xanru' Dios ga núnbë'gaca
bönachi Lè' tu' buchi'a busöróë'
quéguequi.

Lu lè na' nun nu ruá' dö' zön la' cuinsi.

¹⁷ Ila'yaza lataj chul-la nupa tuá' dö',
yúgu'tè nupa na' nal-la ládxi'gaca Dios.

¹⁸ Calëga tsaz ulu'gá'ana cá'asö nupa
ta'yadzaj ta'yudxi,

en biti' initi tsaz yöl-la' run löza quégaca
nupa nácgaca yechi'.

¹⁹ Guyasa, Xan.

Biti' gu'u lataj tsépisë' nu naca bönáchisö.

Buchi'a busöró quégaca bönachi yugu' yödzo.

²⁰ Buxós léguequi, Xan.

Ben ga ulu'únbë' le nácgaca, tu' nácgaca-casó bönachi.

10 ¿Bizx que zu' zi'tu', Xan?

¿Bizx que rucachi' lo' cate' bi raca quia'?

² Lu yöl-la' run ba rahui quégaca nupa tuá' dö'

ta'bía no nupa nácgaca yechi'.

Ben ga ila'zón du yalaj na' nucachi'gaca la' léguequisó.

³ Run ba zxön cuinë' bönni' ru'ë dö' ca naca le xihui' rizé ládxe'ë.

Bönni' ruhuídi'në' rulidza ditjé' luzé'ë, en ruzóë' Dios tsölá'aló.

⁴ Lu yöl-la' run ba zxön cuinë' bönni' huía' dö' biti' ru'í ládxe'ë Dios.

Rizá'asó ládxe'ë, rnnë': Biti' ca' zoa Dios.

⁵ Ruzi'ë xibé yúgu'të le runë'.

Biti' ca' réquibe'enë' zoë' Dios Nu ruchi'a rusöró quégaca bönachi.

Ruzóë' tsölá'aló nupa biti' ta'lé'e lë' dxi'a.

⁶ Ré' la' cuinsë': "Gatga ichíxida'.

Catu caz bi gaca quia'."

⁷ Didza' ru'ë nácgaca le rudxía dö', enca' le rizí' yë', en le rudidza' yudxi yugu' luzé'ë.

Ru'ítica'sé' didza' le cabí nácatë, en le naca xihui'.

⁸ Rucachi' cuinë' yugu' lu yödzo.

Bagáchi'só rútië' nupa biti' bi nabága'gaca.

Ruyúlanë' nu bi gaca gun que.

⁹ Ribözë' ga na' nucachi' cuinë' ca runba' bëdxi guixi'.

Ribözë' nu gaca sönë'.

Rizönë' bönni' yechi' lu du yalaj queë', en rá'ayöjë' lë' ga nagachi' queë'.

¹⁰ Riguinë' luyú nu na' nazönë'.

Zián nupa rucul-lë' len në'ë nal-la.

¹¹ Ré' la' cuinsë': "Nal-la ládxe'ë Dios.

Nucachi' lahuë', en biti' ca' rilé'enë' le runa'."

¹² ¡Guyasa, Xan!

¡Gulís no'o, Dios!

¡Biti' gal-la ládxe'u nupa ta'gu'í ta'zaca'!

¹³ ¿Bizx que bönni' na' ru'ë dö' nuzóë' Dios tsölá'aló?

Gudxé' la' cuinsë': Biti' uzi' lë' Dios neda'.

¹⁴ Li' bilé'e quézinu' lë ni, Xan.

Ru'í ládxe'u nu riguf'í rizáca', en nu risëbi ladxi',

en zóatica'su' gácalenu' léguequi.

Nu naca bayechi' rigú'u cuini lu no'o, Xan,

tu' zóatica'su' gácalenu' nu riyadza riyudxi.

¹⁵ Bugúa yöl-la' unná bë' quégaca nupa tuá' dö', en nácgaca xihui'.

Bub'í quéguequi ca naca xiguia' nabága'gaca.

¹⁶ Inná bé'tica'së' Xanru' Dios.

Nupa tu'béaj ícjaguequi Xanru' ulu'niti tsaz lu xiyú cazë'.

¹⁷ Ruzé' nagu', Xan, le ta'nábini Li' nupa nácgaca do' ladxi'.

Rutipu' ládxi'guequi, en ruzé' nagu' ch'íguequi.

¹⁸ Ruchi'a rusöró'u' quégaca nupa nácgaca uzëbi,

en nupa zoa nu ribía no léguequi,

para cabiró ulu'xósa bönachi yödzo'lió ni luzé'eguequi.

11 Ruzxóni ládxa'a Xanru' gácalenë' neda'.

¿Naru' gufëtso' neda':

"Buzúnnaj lu gu'á ca runba' biguínido"?"

² Buyútsöca', zóngaca nupa tuá' dö' yaga uxiti'.

Nuzóagaca yágado' lahui tuchi' lu du rusé,

para ilútië' bagáchi'só nupa nácgaca dxi'a.

³ Channó ila'guínnaj yugu' le tu'zóa tsutsu le naca dxi'a,

¿bizxi caz gaca gun nu naca tsahui'?

⁴ ¿Zoa cazë' Xanru' yudo' lá'ayi queë'!

Yehua' yubá zoa ga rö'ë rinná bë'ë Xanru' Dios.

Ril'é'e guiój lahuë' para uyüë' le tun bönachi.

⁵ Rizí' b'ë'ë Xanru' nu naca tsahui'.

Biti' ril'é'enë' dxi'a nu ruá' dö', en nu raza ladxi' ta'dá'baga' yúlahui'.

⁶ Gunë' ga sáca'gaca nupa tuá' dö' le usuniti léguequi.

Ubi'ë quéguequi guf', en le ruquéla' guf', en tu bö' régui.

⁷ Caní gunë' Xanru' tu' náquië' tsahui', en nadxí'inë' le naca tsahui'.

Nupa tun le nácatë' ila'l'é'e lahuë'.

12 Busölá neda', Xan, tu' cabirö zoa nitú nu naca dxi'a, en bití' gaca nu idzöli nitú nu run ca rnna xtídza'a.

² Ta'zí' ye'e yúgu'të bönachi luzé'guequi.

Lu yöl-la' rizí' yë' quéguequi tu'ílen luzé'guequi didza' yúlajdo'.

³ Xan, buzóa dxisö nupa na' tu'í didza' yúlajdo',

en buzaga' ru'igaca nupa tun ba zxön cuínguequi.

⁴ Ta'nná: "Gü'iru' didza' ca rizësö ládxi'ru',

ate' cuntu nu tá'baga' rë'u.

¿Nuzxi caz inná be'e rë'u ca naca didza' ru'iru'?"

⁵ Rnnë' Xanru': "Na'a guída' tu' nacuá' nupa tun zí' nupa ta'yadzaj ta'yudxi, ate' rinnë ládxi'gaca nupa ni tu' zoa nu ribía no léguequi.

Ca ta'zësö ládxi'gaca, la' guídatea' dusölá' léguequi."

⁶ Huáca uzxöni ládxi'ru' didza' ru'ë Xanru'.

Nácagaca ca guië plata ba nequi, le nudxi'a gadxi luzuí tu lu guf' lálë'e.

⁷ Li' caz, Xan, gun chi'u léguequi, en usöló' léguequi lu ná'agaca nupa tuá' dö' na'a dza.

⁸ Gátitës nacuá' nupa tuá' dö', cate' tun zxön bönachi le ruá' dö'.

13 ¿Gáca'xte caz gal-la ládxi'u neda', Xan?

¿Naru' tsaz gal-la ládxi'u neda'?

¿Gáca'xte caz ucache' cuinu' lahua'?

² ¿Gáca'xte caz gun bayudxi guá' ilena' le réquida' zí'?

¿Gáca'xte caz hu'ínida' rëla, en te dza?

¿Gáca'xte caz ucúl-lágaca neda' nupa ta'dá'baga' neda'?

³ Buyú neda', Xan, en bubí'i didza'.

Butipa ládxa'a para cabí gátia'.

⁴ Ní'irö bití' gaca ila'nná nupa ta'dá'baga' neda', bití' ila'nná: "Bucúl-laru' lë'."

Bití' gaca ulu'dzeja tu' nótjada' ládxa'a neda'.

⁵ Neda' ruzxöni ládxa'a yöl-la' dxi'i ladxi' quiu'.

Rudzéjada' tu' rusöló' neda'.

⁶ Gul-la' queë' Xanru',

tu' benë' quia' le naca dxi'a.

14 Lu icja ládxi'da'ahuë' rnnë' bön-ni' tu' canóz, rnnë': Bití' zoa caz Dios.

Nachixi nanítigaquië' bönni' caní, en tunë' le cabí ril'é'enë' dxi'a Dios.

Cuntu nu zoa nu run le naca dxi'a.

² Ga zoë' Dios yehua' yubá buyúë' luyú ni ga nacuá' bönachi

para il'é'enë' channö zoa nu réajni'i, nu na' riguilaj Dios.

³ Yúgu'të' nadódigaquië' tsölá'alö.

Nachixi nanítigaquië' tu tuë'.

Cuntu nu zoa nu run le naca dxi'a, nitú bönachi.

⁴ ¿Naru' cabí ta'yéajni'i nupa tuá' dö'?

Le tun nupa na' naca tsca tagu bönachi quia' ca nu ragu yöta.

Bití' ca' tu'lidza neda', Xángaca bönachi.

⁵ Lu yöl-la' radxi ridzöbi quéguequi ta'zxizi

tu' ta'l'é'e Xanru' Dios, en zóalenë' bönachi tsahui'.

⁶ Tu'titaj xtídza'gaca nupa nácagaca yechi',

pero nupa ni tu'zxöni ladxi' gácalenë' Xanru' léguequi.

⁷ Raca ládxa'a irúaj Sión Nu usölá bönachi Israel.

Cate' gunë' Xanru' ga ulu'dxín bönachi queë' nadzúngaca xilátjaguequi, ulu'dzeja zxi'ini xi'sóë' Jacob, bönachi Israel, en ulu'zi' xibé' Dios.

15 ¿Nuzxi caz bönachi tsöjsóa xilatju', Xan?

¿Nuzxi caz tsöjsóa ga naca lá'ayi quiu'?
² Nu na' naca idú ladxí', en run le naca tsahuí', en lu icja ládxi'da'ahui ruf'i didza' le nácatë.

³ Nu na' bití' rizí' quidza' bönachi, en bití' ruá' dö' que luzé'e, en bití' ruzé' naga nu rizí' quidza' luzé'e.

⁴ Nu na' bití' run bal nu ruá' dö', pero run bal nupa tun zxon Dios, en sal-la' bi uniti cate' chinún xtídza', bití' ca' rutsá' didza' na'.

⁵ Nu na' bití' rizí' icja dumí cate' runödzej dumí que tu chí'ido'sö, en bití' rizí' dumí para sí' yë' ca naca le nun nu bití' nabaga' xiguia'.

Nu na' run yúgu'të le caní bití' ca' idzá' xilataj.

16 Ben chí'i neda', Dios, tu' ruzxöni ládxa'a Li'.

² Lu icja ládxi'da'ahua' gudxa'-në' Xanru':

"Li' nacu' Xana'.

Bití'rö bi zoa quia' le naca dxi'a, pero tuzu' Li'."

³ Riyaza ládxi'lena' nupa nátagaca queë' Dios luyú ni,

en nupa nátagaca idú ladxí'.

⁴ Ila'yán le ila'guí'i ila'zaca' nupa ta'yéaj ladxí' yugu' dios izá'a.

Bití' ca' cu'a láhuiguequi rön ca tun bönachi na',

en bití' ulídza' lágaca dios na'.

⁵ Náquië' Xanru' Dios Nu nabánida', en Nu ruzi'a xibé.

⁶ Li', Xan, nuzú' xilatja'.

Lataj na' nuzú' quia' naca le ruzi'a xibé, en lachi naca lataj na' nequi quia'.

⁷ Gul-la' yöl-la' ba queë' Xanru', Nu rigú'u yöl-la' neda' le naca tsahuí',

ga ridxintë ruzéajni'inë' neda' cate' ni' rasia'.

⁸ Chinuna' ga zóatica'së' Xanru' lahua'.

Tu' zoë' cuita' bití' bi utsá' neda'.

⁹ Que lë ni na' budzeja ládxa'a, en buzí' xibé ládxi'da'ahua',

ate' gun löza le naca' cate' igácha'a yeru ba,

¹⁰ tu' cabí uca'anu' neda' lataj chul-la, en bití' gu'u lataj uniti nu nequi quez quiu'.

¹¹ Nunu' ga núnbë'a nöza iché' neda' ga soa' ibana'.

Ga zu' Li' gata' quia' yöl-la' rudzeja idú, ate' cuitu' Li' uzf'tica'sa' xibó'.

17 Ruzé nagu' neda', Xan. Lu le naca tsahuí' quia' rulídza' Li'.

Bë' ladxí' le rinábida' Li' tu' cabí ca' rizí' yë'a.

² Buchi'a busöró quia'

tu' runu' Li' le naca tsahuí'.

³ Núnbë'u Li' le yu'u ládxi'da'ahua'. Ruyú' neda' chí'i dzó'ölö.

Guzxí' bë'u neda', ate' burúaja' tsahuí'.

Bití' ca' ruá'a didza' le cabí naca idú dxi'a.

⁴ Runa' ca rinná bë' xibá quiu', en bití' ca' ruá'a dö' ca tun bal-la bönachi.

⁵ Ridática'sa' la' nöza tsahuí' quiu', en bití' ca' ridöda' tsölá'alö.

⁶ Rulídza' Li', Dios, tu' rubí'u didza'.

Ruzé nagu' yugu' didza' ruá'a.

⁷ Buluf'i lahui yöl-la' dxi'i ladxí' quiu'.

Rusölá cazu' nupa tu'zxöni ladxí' Li'

lu ná'agaca nupa ta'dá'baga' léguequi.

⁸ Ben chí'i neda' ca run chí'u la' guiöj lo cazu'.

Bucachi' neda' cuitu' Li' ca runba' böra, rucáchi'gacaba' bórado' zxan xílabá',

⁹ para cabí bi ilún quia' nupa tuá' dö', nupa na' ta'lë neda', en nagú'ugaca neda' lé'ajlö.

¹⁰ Biti' ca' zóalen léguequi yöl-la' ruhuéchi' ladxi',
ate' tuí'i didza' lu yöl-la' run ba zxön cuínguequi.

¹¹ Gáti'tës ga ridöda' ta'gú'u neda' lé'ajlö, en té'eni ila'guín neda' luyú.

¹² Nácagaquié' ca yugu' bēdxi guíxi'do'. Té'ēnē' ulu'sunítie' neda'.

Nácagaquié' ca yugu' bēdxi guixi'.

Nucachi' cuíngaqiē' para ila'zönē' neda'.

¹³ Gudá, Xan, gudá'baga' nupa ta'lé neda', en bucul-la léguequi.

Busölá neda' lu ná'agaca nupa tuá' dö', ugunu' dxin gufé tuchi' quiu'.

¹⁴ Lu yöl-la' huáca zxön quiu' busölá neda', Xan,

lu ná'agaca nupa tu'zí' xibé na'a dza, nupa na' nuhuólaj nudz'é'egaca yöl-la' tsahui' quiu'.

Nayángacabi' xzi'inigaquié',

ate' tu'cá'ané' lu ná'agacabi' le dē sizxöni quégaquié'.

¹⁵ pero neda' ilé'eda' lo' tu' naca' tsahui', en tsaza ládxa'a gaca' ca nacu' Li' cate' ubana'.

18 ¡Nadxí'ide'eda' Li', Xan!
¡Li' rutipa cazu' ládxa'a!

² Ruzöé' Xanru' neda' tsutsu, en rapa chi'ē neda', en rusölé' neda'.

Náquié' Dios quia', en Nu rutipa ládxa'a, ate' ruzxöni ládxa'a Lē'.

Rácalenē' neda' lu gudil-la: Rusölé' neda', en rizönē' neda'.

³ Rulidza'-nē' Xanru' Nu ral-la' cú'uru' yöl-la' ba,

ate' usölé' neda' lu ná'agaca nupa tu'dí'i neda'.

⁴ Ia'láti'sö la' gútia',

ate' yöjbaga' neda' le usuniti neda', le ben ga gúdxida'.

⁵ Ia'láti'sö la' yöjtsu'a lataj chul-la que yöl-la' guti,

tu' la' gútitia'.

⁶ Lu le guca quia' bulidza'-nē' Xanru'.

Bulidza'-nē' Dios quia' para gácalenē' neda'.

Ga na' zoé' lataj lá'ayi queé' biyönnē' chi'a.

Buzé' nagué' le gunabi yúdxida' Lē'.

⁷ Ní'irö gudödi budó' xzu', en guzxizi luyú.

Guzxízida' xilfbigaca yugu' gu'a sibi.

Guzxízigaca tu' gulénē' Lē'.

⁸ Birúaj dzön xzínē',

ate' birúaj guí' ru'é le buzegui le dē idú gásibi'ilé',

ate' buguela' guí' yugu' bo' yalaj.

⁹ Bené' ga bótaj lúzxiba, en bótajē' Lē' cazé',

ate' guzóa xzan ni'ē le naca chul-la.

¹⁰ Gudödē' lu bö'ös dxíē' tu le nayé'pisē nazí'i le querubín.

Carelö gudödē' tu lu bö' budunu'.

¹¹ Busubaga' cuiné' le naca chúl-lasö.

Lē na' naca böaj gasaj le riché'lē'e nisa.

¹² Lu le rēpi yösa queé' lu böaj gasaj na' bila'rúaj bo' yalaj, en guió'j bögui' yöla sunna.

¹³ Gunné' guziú' que chi'ē Xanru' lúzxiba xitsá'.

Biyón chi'ē Dios nayé'pisētēre',

lu dzön, en yugu' lu bo' yalaj, en lu guió'j bögui' yöla sunna.

¹⁴ Gusól-lē'ē yugu' yaga lahui tuchi' queé', en bēsílásiē' nupa na' tu'dí'i neda'.

Gusól-lē'ē yugu' yösa queé' yugu' le bulu'cul-la léguequi.

¹⁵ Ní'irö bilá' lahui le zoa xzan nísado',

ate' bilá' lahui xilibi yödzölió,

cate' buzenu' bach nupa biti' ta'lé'e Li' dxi'a, Xan,

en lu yöl-la' rilé quiu' bulidza zi'u léguequi.

¹⁶ Bötjē' zaca' xitsá'alö, en gudélē'ē neda'.

Bubéajē' neda' lu nisa zili.

¹⁷ Busölé' neda' lu na' nu biti' rilé'e neda' dxi'a, en nál-latērö,

enca' lu ná'agaca nupa tu'dí' neda', en
nál-lágacatë' ca neda'.

¹⁸ Cate' ni' chizóa inítia' gula'zóa régu'ë
neda',

pero Xanru' gúcalenë' neda'.

¹⁹ Bubéajë' neda', en buzóë' neda' tu lu
lataj zxon.

Busölë' neda' tu' guyaza ládxë'ë neda'.

²⁰ Bubi'ë Xanru' quia' tsa le tsahui'
naca',

en benë' quia' le naca dxi'a tu' cabí nabá-
ga'a xigua',

²¹ tu' runa' ca naca le rusédinë' Xanru'
neda',

en biti' ca' ridá'baga'a Lë'.

²² Runa' ca ta'nná xibá nunë' Xanru',
en biti' ridá'baga'a le rinná bë' naguixjë'
Lë'.

²³ Biti' bi le naca dö' nabága'a lahuë' Lë',
ate' ben chi'a le innía' para cabí gu'a dö'.

²⁴ Que lë ni na' bubi'ë Xanru' quia' tsa
le tsahui' naca',

en tu' cabí nabága'a xigua' lahuë' Lë'.

²⁵ Ruhuéchi' ládxu'u nupa tu'huechi'
ladxi' luzé'eguequi,

en nacu' idú dxi'a len nupa náagaca idú
dxi'a.

²⁶ Rulu'í cuinu' idú ladxi' len nupa náca-
gaca idú ladxi',

pero ridá'bagu'u nupa ta'dá'baga'
xtídz'u.

²⁷ Rusöló' nupa ta'gu'í ta'zaca',
pero ruzótju' nupa tun ba rahui.

²⁸ Ruquéla' cazu' gu' quia', Xana' Dios,
en rigú'u quia' bení' cate' ridá' ga chul-la.

²⁹ Lu yöl-la' huáca queë' Dios rucul-la'
bönni' guizxi yu rójáquië' gudil-la.

Tu' zóalenë' Dios quia' neda',
rixítia' ribixa' lu zö'ö run chi'i léguequi.

³⁰ Idú dxi'a náagaca le runë' Dios.

Nurúaj tsahui' xtídzë'ë.

Rapa chi'ë yúgu'të nupa ta'nábini Lë' gá-
calenë' léguequi.

³¹ ¡Tuzë' Xanru' náquië' Dios!

¡Tuzë' Dios rapa chi'ë rë'u!

³² Dios ni ruzalë' neda',

en runë' ga naca' idú ládx'a'a.

³³ Runë' ga náagaca ni'a ca ní'agacaba'
bidxina' guixi',

en ruzóë' neda' yugu' lu gu'á zxon.

³⁴ Rusédinë' neda' para gaca tseja' gudil-
la,

en para gaca uguna' dxin uxiti' yaga
néquini gufë bronce.

³⁵ Lu yöl-la' rusólá quiu' run chi'u neda'.
Len no'ó nál-la rizönu' neda',

en lu yöl-la' dxi'i ladxi' quiu' nunu' ga
nayépisëtëra'.

³⁶ Ruchi'u nöza ga ral-la' töda',

en runu' ga biti' cuila'.

³⁷ Guzóa régu'a nupa tu'dí' neda', en
bucul-la' léguequi.

Biti' buécja' ga bidxintë busunítia'
léguequi.

³⁸ Gudina' léguequi luyú, ate' biti' guca
ulu'huóása.

Gula'dzó'ö zxan ni'a.

³⁹ Benu' neda' nál-la para tseja' gudil-la,
en benu' ga bucul-la' nupa gula'dá'baga'
neda'.

⁴⁰ Benu' ga bulu'zxunnaj lahua' nupa
biti' ta'lé'e neda' dxi'a,

ate' busunítia' nupa na' bulu'dí' neda'.

⁴¹ Bulu'lidza nu gácalen léguequi,
pero cuntu nu zoa usólá léguequi.

Bulu'lidza ca' Xanru', pero biti' bubi'ë
didza'.

⁴² Buzzuzxja' léguequi ca bëchtö yu
naché' lu bö'ös.

Buliba' léguequi ca ruliba' guna' la' nöza.

⁴³ Busöló' neda' lu ná'agaca nupa
ta'dá'baga',

en nunu' ga rinná bé'eda' bönachi zían
yödzo.

Tun ca rnna xtídz'a'a bönachi biti' nún-
bë'a zí'aló.

⁴⁴ Cate' ta'yöni neda', la' tun ca rnna
xtídz'a'a.

Tadxi neda' bönachi zían yugu' yödzo
izá'a.

⁴⁵ Ta'cuidi' ladxi', en lu yöl-la' rizxizi
quéguequi

ta'ru'aj yugu' lu yödzö tsutsu quéguequi.

⁴⁶ ¿Zoë' nabanë' Xanru'!

¿Yöl-la' ba Nu na' run chi'i neda'!

¿Guli'gún zxön Dios Nu rusölá neda'!

⁴⁷ Náquië' Dios Nu rizi' la nupa tu'dfi neda',

en runë' ga tadxi bönachi guixzi yu neda'.

⁴⁸ Rusölë' neda' lu ná'agaca nupa biti' ta'lé'e neda' dxi'a.

Le nácatë runë' ga rucul-la' nupa ta'dá'baga' neda',

en rusölë' neda' lu na' bönni' ridzá'a.

⁴⁹ Que lë ni na' guía' Li': Xclenu' Xan, ló-gaca bönachi zían yödzö,

en gul-la' yöl-la' ba que Lo' La'ayi.

⁵⁰ Rusölá cazë' Xanru' bönni' rinná bë'ë uláz queë',

en nadxi'ítica'së' nu na' nabó cazë',

nu na' naca David, en yugu' zxi'ini xi'sóë' ga idxinrö dza udxi.

19 Yugu' le nacué' lúzxiba tu'luf'i lo yöl-la' zxön queë' Dios, ate' yugu' le raca lu bö'ös ná'agaca bë' le nunë'.

² Yugu' dza tu'zéajni'i,

en yugu' dzö' tu'luf'i lo yöl-la' réajni'i.

³ Biti' zoa didza' tu'i, en biti' riyón tu le ta'nná.

Biti' riyón chí'iguequi.

⁴ Le tu'zéajni'i ridxín ga naguéla'të luyú, en le tu'sedi ridxín idútë yödzölió.

Ga na' nacué' nuzóë' Dios xilataj gubidza,

⁵ le naca ca tu bönni' utsaga në'ë rirúajë' yu'u,

en naca ca' ca tu bönni' nál-la rudzéjanë' cate' zéajë' carelö lu huitaj.

⁶ Ga naguela' lúzxiba rilén gubidza,

en ridödi ga ridxintë ga ribía.

Biti' bi zoa le cabí rutsë'e gubidza na'.

⁷ Tsahui' naca ca rinná bë'ë Xanru', en run ga huóaca ládxi'ru'.

Idútë li naca didza' nuzóë' Xanru', le run ga réajni'i nu naca nöxaj ladxi'.

⁸ Tsahui' ná'agaca xibá queë' Xanru', le tun ga rudzeja ládxi'ru'.

Ná'agaca idú dxi'a le gunná bë'ë Xanru', en ta'gú'u bení' icja ládxi'do'oru'.

⁹ Dxi'ado' naca gádxiru'-në' Xanru', para sóatica'siru'.

Idú li naca ca ruchi'a rusöróë' Xanru' bönachi, en idú tsahui'.

¹⁰ Nazáca'gacatëro didza' na' ca oro, enca' ca oro ba nequi.

Ná'gacatëro zxixi ca bidxina' buz, en ca le zxixi queéba'.

¹¹ Didza' na' tu'zéajni'i neda', huen dxin queë'.

Uzi'tëro xibé nu run ca rnna xtídzë'ë na'.

¹² ¿Nuzxi caz gaca inóz channö richixi rinigui?

Busölá neda' lu dul-la' nuna' le cabí gúquibe'eda' bena'.

¹³ Ben chi'i neda' para cabí udödi cuina' lu dul-la',

para cabí inná be'e neda' lë na' naca dul-la'.

Ní'irö ugá'ana' tsahui', en biti' ibága'a xiguia'.

¹⁴ Ben ga ilaca didza' ruá'a, en le rizá ládxa'a ca raza ládxi'u Li'.

Nacu' Xana' ruzú' neda' tsutsu, en ruhuóá'au' neda'.

20 Rinábida'-në' Xanru' uzé naguë' li' cate' idxín dza qui'i sacu'u.

Dios queë' Jacob gácalenë' li'.

² Rinábida'-në' isól-lë'ë le gácalen li' le irúaj lataj lá'ayi queë'.

Lë na' irúaj Sión gun ga gacu' tsutsu.

³ Rinábida'-në' tsöjnenë' yúgu'të le gulú'u queë',

en si' lu në'ë le buzégui'u lahuë'.

⁴ Rinábida'-në' gunné' quiu' tsca naca le rizé ládxi'u,

en gunë' ga gácatë yúgu'të le rizá ládxi'u.

⁵ Udzéjatu' cate' usölë' li',

en uchísatu' le gaca bë' rulidztu'-në' Dios queéru'.

Rinábida'-ně' Xanru' gunně' quiu'
yúgu'tě le rinábinu' Lě'.

⁶ Na'a nōzda' rusólě' Xanru' nu nabó
cazě'.

Riyōnně' nu na' nabóě' ga ni' zoě' yehua'
yubá la'ayi queě'.

Isól-lě'ě yōl-la' huáca idú queě' le usólá
nu na'.

⁷ Nacuá' nupa tu'zxōni ladxi' yugu' car-
reta que gudil-la,
ate' nacuá' bōnachi yúbölö tu'zxōni
ladxi' yugu' böa',
pero rě'u ruzxōni lādxi'ru' Lě' Xanru'
Dios.

⁸ Ta'cuídi'ně' nupa na', en ta'dzō'ě,
pero rě'u ni zúru', en zóaru' tsutsu.

⁹ Busólá netu', Xan, tu' nacu' Nu rinná
be'e netu'.

Rinábitu' Li' uzě' nagu' netu' cate'
ulídzatu' Li'.

21 Rudzėjaně' bōnni' rinná bě'ě tu'
zóalen lě' yōl-la' huáca quiu' Li',
Xan.

Tu' busóló' lě', yénni'tērö rudzėjaně'.

² Bunödžju' queě' le rizě lādxe'ě.

Biti' gudá'bagu'u le gunábině' Li'.

³ Tu' raza lādxi'u lě' ruzú' queě' yugu' le
naca dxi'a.

Nudxiú' icjě' tu le néquini oro idú.

⁴ Gunábině' Li' gu'u queě' yōl-la' na'bán,
ate' bě'u le queě'.

Nunu' ga sóatica'sě' ibaně' yugu' dza si'
zaca.

⁵ Zxōntě naca yōl-la' zxōn queě' tu'
nusóló' lě'.

Nunu' lě' bal, en nunu' ga nayėpisě'.

⁶ Zóatica'sö le naca dxi'a nuzú' queě'.

Runu' ga rudzėjade'eně' tu' zóalenu' lě'.

⁷ Caní raca queě' bōnni' na' rinná bě'ě tu'
ruzxōni lādxe'ě Xanru'.

Biti' bi utsá' lě' tu' ruhuéchi' lādxe'ě Dios
nayėpisětě' lě'.

⁸ Huadeli' no'o ga nacuá' yúgu'tě nupa
ta'dá'bagu' Li'.

Huadeli' no'o iběla ga nacuá' nupa tu'dfi
Li'.

⁹ Cate' idxín dza usiúdxu' léguequi gaca
quéguequi ca tu guí' ruzegui bla'do'.

Usunítu' léguequi, Xan, lu yōl-la' rilé
quiu',

ate' tsėguiguequi tu lu guí' zxōn.

¹⁰ Ucuítu' yugu' zxí'ini xi'sóagaca nupa
na' luyú ni,

en ubéaju' yugu' zxí'iniguequi lādžagaca
bōnachi.

¹¹ Caní gunu' tu' gulě'ėniguequině' ilu'ě
dō' quiu'.

Gulún xtídzá'gaquiě' bi iluně', pero biti'
gaca iluně' ca rna xtídzá'gaquiě',

¹² tu' gunu' Li' ga ulu'zxúnnejě'.

Ichisu' uxiti' yaga quiu', en gunu' légue-
qui huě'.

¹³ Len yōl-la' huáca quiu', Xan, uxicju' lu
gudil-la.

Gúl-latu', en cú'utu' yōl-la' ba que yōl-la'
huáca quiu'.

22 Dios quia', Dios quia', ¿bizx que
nusán no'o neda'?

¿Bizx que biti' riyōnnu' le rinněda' lādxi-
a'a, en biti' rácalenu' neda'?

² Dios quia', idú dza rulidza' Li', pero biti'
bi didza' rubi'u.

Idú yěla rulidza', en biti' ca' rasia'.

³ Lá'ayi nacu' Li'.

Zu' ga riyōn yōl-la' ba ta'gú'u bōnachi Is-
rael Li'.

⁴ Bulu'zxōni lādxe'ě xuz xtó'otu' Li'.

Bulu'zxōni lādxe'ě Li', ate' busóló'
légaquiě'.

⁵ Bulu'lidzě' Li', ate' gúcalenu' légaquiě'.

Bulu'zxōni lādxe'ě Li', en biti'
bulu'tuf'ině'.

⁶ Naca' neda' ca tuba' bēla guna', en
calęga bōnni'.

Tu'dfi bōnachi neda', en tu'cá'ana neda'
cá'asö.

⁷ Yúgu'tě nupa ta'lé'e neda' tu'titaj neda'.
Ta'salaj ru'iguequi lu yōl-la' rutitaj, en
tu'tá' ícjaguequi, ta'nná:

⁸ "Lě' buzxōni lādxe'ě Xanru' para usölě'
lě'.

Xanru' usölél' lè' channö tsaza láchxë'ë
lè'."

⁹ Nacu' Li' Nu guléaj neda' lé'ënu xiná'a.
Benu' ga ruzxöni láchxa'a Li'
cate' ni' gúdxa'a luchú'unu xiná'a.

¹⁰ Nagá'ana' lu no'o Li' ga gudéla'tè
gulja'.

Ga gudéla'tè buzóanu xiná'a neda' nacu'
Dios quia'.

¹¹ Biti' su' zi'tu' ga ni zoa', tu' zoa gagu le
gun neda' zi',

ate' cúnturö nu zoa nu gácalen neda'.

¹² Gula'gu'ë neda' lé'ajlò ca tunba' yugu'
bèdxi.

Ca yugu' bèdxi que yödzö Basán gula'bía
di'è neda'.

¹³ Ta'salaj ruá'agaquiè' lahua' neda'
ca runba' bèdxi guixi', ridunba', en
ribódxia'aba'.

¹⁴ Nuhuóáca' ca nisa nalalaj luyú, ate'
nazángaca bëch dxita quia'.

Nuhuóáca láchxi'da'ahua' ca bidxina' buz
la lu lè'a.

¹⁵ Nacuidi' yöl-la' huáca quia' ca tu rö'ö
nalá'a,

ate' da' lúdxaxa' chichja'.

Nuzú' neda' lu bëchtö yu que yöl-la' guti.

¹⁶ Ta'gu'ë neda' lé'ajlò ca tunba' yugu'
bö'cu'.

Nagú'ugaquiè' neda' lé'ajlò bönni' tu'è
dö'.

Nuzóagaquiè' yeru blaga na'a, en ni'a.

¹⁷ Nalá'gaca yúgu'tè dxita néquinida'.

Ta'né'ë neda', en tu'yú yénniè' neda'.

¹⁸ Ta'guísiè' zxa' que queégaquiè',
en tu'yúé' le gaca bë' lahui lari' rixóa
cúdza'a.

¹⁹ Biti' gá'anu' zi'tu', Xan.

Gúcalentè neda', Li', Nu naca yöl-la'
huáca quia'.

²⁰ Busölá neda' lu guié' tuchi'.

Busölá yöl-la' na'bán quia' lu ruá'aga-
caba' bö'cu'.

²¹ Busölá neda' lu ruá'agacaba' bèdxi
guixi',

en lu lúzugacaba' bèdxi gú'una.

Li' riyón quézinu' chi'a.

²² Usiyönda' yugu' böchi' luzá'a ca naca
Lo'.

Gatsaj láhui'lö ga na' tu'dubi bönachi lo'
cu'a Li' yöl-la' ba.

²³ ¡Guli'cu'ë Xanru' yöl-la' ba, libí'ili' na'
rádxili'-nè'!

¡Guli'gun zxön Lè', yúgu'téli' zxf'ini
xi'sóè' Jacob!

¡Guli'gadxi Lè', yúgu'téli' zxf'ini xi'sóè'
Israel!

²⁴ Caní ral-la' gunli' tu' cabí buca'anè'
cá'asö,

en biti' budí'inè' nupa gula'gufi
gula'zaca',

en biti' bucachi' lahuè' para cabí ilé'enè'
lé'guequi,

pero cate' bulu'lidza Lè', biyönnè'
lé'guequi.

²⁵ Cu'a Li' yöl-la' ba ga tu'dubi bönachi
guixzi yu lo'.

Lógaca nupa tadxi Li' usudxina' le guzxi'
lu na'a guna' quiu'.

²⁶ Ilágugaca nupa nácagaca nöxaj ladxi',
en ulu'huölaj ulu'dzè'e.

Nupa ta'guilaj Xanru', en ta'gú'u Lè' yöl-
la' ba ulu'zítica'sö xibé'.

²⁷ Bönachi idútè yödzölió tsöjné'gaca
Xanru', en ulu'huóáca queé'.

Bönachi yúgu'tè yödzö luyú ila'gú'u Lè'
yöl-la' ba.

²⁸ Caní gaca tu' dè lu në'ë Xanru' inná
bé'ë.

Inná bé'enè' yúgu'tè bönachi luyú.

²⁹ Yúgu'tè nupa dè lu ná'agaca luyú ni
ilágugaca, en ila'gú'u Lè' yöl-la' ba.

Yúgu'tè nupa ila'niti ulu'zechu zxf'igaca
lahuè' Lè',

nupa na' biti' ca' gaca ilún chi'i yöl-la'
na'bán qué'guequi.

³⁰ Zxf'ini xi'sóali' ilún xichinè'.

Ila'guixjö' lè ni ca naca queé' Xanru' para
ila'yöni nupa tsöjsétégaca luyú ni.

³¹ Ilidè', en ulu'lu'finè' lahui náquiè' Xan-
ru' tsahui'.

Ulu'siyönnë' ca' nupa ral-la' ilalaj ca naca yugu' le benë' Lë'.

23 Ruyú cazë' Xanru' Dios neda' ca tu nu ruyú bö'cu' zxila'.

Biti' bi riyádzjada'.

²Runë' ga ruzí' ládxa'a ca túngacaba' bö'cu' zxila' tu'zí' ládxi'ba' gapa dë-da' le iláguba'.

Ga naca ra' nisa rizá' tsahui' ládxi'do' richë'ë neda'.

³Runë' ga ruhuóáca ládxa'a.

Richë'ë neda' ga naca nõza tsahui' tu' nadxf'inë' neda'.

⁴Sal-la' ridá' ga zoa bönadxi gátia', biti' bi gádxida' tu' zóalen cazu' neda', Dios.

Len xiyaga quiu', en no'o rutipu' ládxa'a.

⁵Ga nacua' nupa ta'zóa regu' neda', ni' rucú'u quia' le gahua'.

Rigú'u icja' le za rilá' zxixi, en ruliru' le guf'jada'.

⁶Le nácatë dusóalengaca neda' le naca dxi'a,

en yöl-la' dxi'i ladxi' queë' yúgu'të dza soa' ibana',

ate' lu yu'u lidxë' Xanru' sóatica'sa'.

24 Nequi queë' Xanru' Dios luyú ni, en yúgu'të le dë lahui.

Nequi queë' yödzólió, en yúgu'të nupa nacua' ni'.

²Naguixjë' le lahui nísado' rō'ō zxánilō, en nuzóë' xilibi luyú ga rë' zzan nísado'.

³¿Nuzxi caz bönni' dë lu në'ë cuenë' guf'a lá'ayi queë' Xanru'?

¿Nuzxi caz gaca tsaza lu lataj lá'ayi queë'?

⁴Huáca bönni' na' naca dxi'a ca runë', en ca rizá' ládxi'ë,

bönni' na' biti' runë' bal budó' guiój budó' yaga,

en biti' rizí' yë'ë cate' rizí' lu në'ë bi gunë'.

⁵Gunë' Xanru' ga gaca dxi'a queë' bönni' na'.

Caní gunné' Dios, Nu rusólá lë', en náquië' tsahui'.

⁶Caní nácgaca nupa ta'dxín lahuë' Dios, nupa na' ta'biga' lahuë' Dios quégaca zxf'ini xi'sóë' Jacob.

⁷Gulí'salaj ga nu riyaza yödzö la'ayi.

Gulí'salaj ga nu riyaza xilatjë' Dios le nuzóë' tsaz,

ate' tsázië' Bönni' unná bë' nayépisëtë'.

⁸¿Nuzxi caz Bönni' unná bë' nayépisëtë' na'?

Náquië' Xanru' nál-latë'ë, en nápatë'ë yöl-la' huáca,

Lë', Xanru', Nu rideli' lu gudil-la.

⁹Gulí'salaj ga nu riyaza yödzö la'ayi.

Gulí'salaj ga nu riyaza xilatjë' Dios le nuzóë' tsaz,

ate' tsázië' Bönni' unná bë' nayépisëtë'.

¹⁰¿Nuzxi caz Bönni' unná bë' nayépisëtë' na'?

Náquië' Xanru' Dios quéguequi ni'a në'ë guixzi yu.

Lë' náquië' Bönni' unná bë' nayépisëtë' na'.

25 Idú ládxa'a rulidza' Li', Xan.

²Ruzxöni ládxa'a Li', Dios quia'.

Ben ga cabí utuf'ida',

en cabí ulu'dzeja nupa biti' ta'lé'e neda' dxi'a.

³Biti' ila'bó' böniga nupa tun löza Li', pero ulu'tuf'i nupa ta'dá'baga' xtídzú'u.

⁴Bulu'í' neda' le ré'ënu' guna', Xan,

en buzéajni' neda' le raza ládxi'u Li'.

⁵Busedi neda' para guna' ca naca le naca idütë li quiu'.

Tu' nacu' Dios, Nu rusólá neda'

gúntica'sa' löza Li'.

⁶Yöjné ca naca yöl-la' dxi'i ladxi' quiu', Xan,

en yöl-la' ruhuéchi' ladxi' quiu', yugu' le nacua'tica'só.

⁷Buniti lo neda' ca naca dul-la' bena',

en le gudá'baga'a Li' cate' ni' zoa' iz cuidi' quia'.

Lu yöl-la' ruhuéchi' ladxi' quiu',

en yöl-la' dxi'i ladxi' quiu' yöjné neda', Xan.

⁸Náquië' Xanru' dxi'a tsahui', en li ladxi'.

Que lë ni na' rulu'ínë' nupa tun dul-la'
le ral-la' ilún.

⁹Ca naca le naca tsahui' riché'ë Dios
nupa nácgaca nõxaj ladxi',
en rulu'ínë' nupa nácgaca do' ladxi' le
ré'ënë' ilún.

¹⁰Lu yöl-la' ruhuéchi' ladxi' queë', en
yöl-la' rusudxín didza' queë',
riché'ë Xanru' nupa tun ca rinná bë' xibá
naguixjë',
en ca naca didza' rucá'ana tsahui' nunë'.

¹¹Tu' nacu' dxi'i ladxi', Xan,
buniti lo neda' ca naca dul-la' nuna', le
naca dul-la' zxön.

¹²Nupa tun bal Xanru'
ulu'í quézinë' léguequi le naca dxi'a le
ral-la' ilún.

¹³Ulu'zi' xibé le naca dxi'a gunnë'
quéguequi,
ate' guequi quégacabi' xzi'ini xi'sóague-
qui luyú ni.

¹⁴Xanru' zóaléntica'së' nupa tun ca rnna
xtídzë'ë,
en ruzéajni'inë' léguequi ca naca didza'
rucá'ana tsahui' nunë'.

¹⁵Ruyútica'sa' guidé' Xanru' gácalenë'
neda',
tu' usölé' neda' lu na' nu ré'ëni sön neda'.

¹⁶Buécja quia', Xan, en buéchi' ladxi'
neda',
tu' zoa' tuza', en nacu'ídi'da'.

¹⁷Nayán le tu'qu'í tu'saca' neda'.
Busölá neda' lu le ruúbi ruguf'i
ládxi'da'ahua'.

¹⁸Buyú ca riguf'i rizáca'a, en rudú
ládxa'a.

Buniti lo neda' ca naca yugu' dul-la'
nabága'a.

¹⁹Buyú ca nayán nupa tun neda' zi'.
Buyú ca tu'df'i neda'.

²⁰Ben chi'i neda', en busölá neda'.
Biti' gu'u lataj utuf'ida' tu' ruzxöni lád-
xa'a Li'.

²¹Ben ga ilún chi'i neda' le naca idú
ladxi',
en le naca li ladxi', tu' runa' löza Li'.

²²Buá'au' bönachi Israel,
Dios lu yugu' le raca quéguequi.

26 Guléaj neda' tsahui', Xan, tu'
runa' le naca dxi'a,
en idú ládxa'a ruzxöni ládxa'a Li'.

²Buyú lu icja ládxi'da'ahua', Xan, en
guzf' bë' neda'.

Buyú le rizá' ládxa'a, en le ribequi icja',
³tu' riché' yöl-la' dxi'i ladxi' quiu' neda',
ate' runa' ca naca le naca iduté li quiu'.

⁴Biti' runa' tsözxón nupa ta'zi' yë',
en biti' ridálëna' nupa tu'luf'isö cuñgue-
qui tsahui'.

⁵Biti' raza ládxa'a udúbilëna' nupa tuá'
dö',
en biti' guna' tuz didza' len nupa náca-
gaca xihui'.

⁶Richisa na'a lo' Li', Dios, cabí dxía dö'
na'a,
en idú ládxa'a ribíga'a lo bucugu quiu',
Xan,

⁷para gul-la' le guía' Li': "Xclenu"
en usiyönda' bönachi ca nácgaca le
zxön nunu'.

⁸Nadxf'ida' yu'u lidxu' ga na' zu', Xan,
enca' lataj ga na' yu'u bení lá'ayi quiu'.

⁹Biti' usunf'iu' neda' tsözxón len nupa
tun dul-la',
en biti' gútiu' neda' len nupa tuti
bönachi,

¹⁰nupa na' ta'yaza ladxi' tuá' dö',
en nacuá'tica'sö ila'guixzaj dumí para
ulu'rúaj tsahui'.

¹¹Gúntica'sa' neda' le naca dxi'a.
Buzá' ladxi' quia', en buá'uö neda'.

¹²Nuzóë' Dios neda' ga zoa' tsutsu ladja
bönachi guixzi yu
nudúbigaca queë' para cu'a-në' yöl-la' ba
Xanru'.

27 Náquië' Xanru' Dios ben' quia',
en Nu rusölá neda'.

¿Nuzxi caz ral-la' gádxida'?

Rapa chi'ë Xanru' Dios caz yöl-la' na'bán
quia'.

¿Nuzxi caz gaca gun ga gadxi idzóbida'?

²Cate' gula'dá'baga' neda' nupa tuá' dö'
para iluti neda',
nupa na' bití' ta'lé'e neda' dxi'a, en tu'df'i
neda',
yöjchégu'gaca, en yöjbíxigaca.

³Sal-la' ila'dá'baga' neda' bönachi guizxi
yu,
bití' ca' tsaza yöl-la' radxi ládxi'da'ahua'.
Sal-la' ila'df'l-lalen bönachi neda',
naca' neda' tsutsu ladxí'.

⁴Tu le rinaba' lahuë' Xanru' Dios, lë na'
güf'i ládxi'sa',
le naca para sóatica'sa' lidxë' Xanru'
yúgu'të dza soa' ibana',
para gaca uyúa' yöl-la' lachi queë' Xanru'
Dios,
en para sa' ládxa'a ca naca queë' lu yu'u
lá'ayi queë'.

⁵Cate' idxín dza soa bönadxi quia',
ucáchë'ë Lë' neda' lu yu'u lidxë'.
Ga nagachi' lu yu'u lidxë' ucáchë'ë neda'.
Uzóë' neda' tsutsu ca tu lu guiójt'o.

⁶Gunë' ga ucul-la' nupa tu'df'i neda',
ate' lu yöl-la' rudzeja quia' códxi'atica'sa'
cate' bi unödza' queë' lu yu'u lidxë'.
¡Gul-la' queë'! ¡Ön, gul-la' queë' Xanru'
yöl-la' ba!

⁷Buzé' nagu', Xan, cate' ulidza' Li'.
Buzá' ladxí' quia', en bubí' didza' ca
naca le inábida' Li'.

⁸Cate' Li' gudxu' neda': "Buguilaj neda'",
idú ládxa'a bubí'a didza', gunnía': Uguil-
ja' Li', Xan.

⁹Bití' ucachi' lo' lahua' neda'.
Bití' ta'bagu'u neda' lu yöl-la' rilé quiu'.
Li' nacu' Nu rácalen neda'.
Bití' ucá'anu' neda', en bití' usán no'o
neda'.

Nacu' Dios, Nu rusólá neda'.
¹⁰Huáca ulu'sán ládxe'ë xuz xiná'a
neda',
pero uzí' cazë' Xanru' Dios neda'.

¹¹Busedi neda' para guna' ca ré'ënu' Li',
Xan.

Buluf'i neda' para guna' le naca tsahui',
tu' nacua' nupa ta'dá'baga' neda'.

¹²Bití' usanu' neda' lu ná'agaca nupa bití'
ta'lé'e neda' dxi'a
para cabí ilún quia' le té'ëni.
Ta'dá'baga' neda' nupa ta'z'í' yë',
en nupa té'ëni iluá' dö' quia'.

¹³Guzxí' lu në'ë Xanru' Dios gunë' ga
ilé'eda' le naca dxi'a,
en le naca tsahui' queë' ga nacua' nupa
nabángaca.

La'tu' cabí réajlë'a lë ni, chibóaj ládxa'a.
¹⁴¡Gulí'gún lözë' Xanru'!
¡Gulí'gaca tsutsu, en bulí'tipa ládxi'li'!
¡Ön, gulí'gún lözë' Xanru'!

28 Rulidza' Li', Xan.
Nacu' Guiójt' le ruzóa neda' tsutsu.
Ruzé' nagu' chí'a, tu' channö usayju' ru'u,
gaca' ca tu bönni' razië' lataj chul-la.

²Ruzé' nagu' le rulidza' Li' cate' rinábida'
Li' gácalenu' neda',
cate' richisa' na'a zaca' Lataj Lá'ayi ga na'
zu'.

³Bití' ichë'u neda' tsözxón len nupa tuá'
dö',
en tsözxón len nupa nácgaca xihui',
nupa na' tu'f'i didza' dxi'a lahui' lógaca
dzaga yu'u quéguequi,
pero yu'u ládxi'do'guequi le cabí naca
tsahui'.

⁴Bubí' quéguequi tsca naca le tun, en
tsca naca dö' ru'f'igaca.
Bubí' quéguequi tsca naca le tun
né'eguequi.

Bubí' quéguequi tsca ral-la' gaca
quéguequi.

⁵Caní gaca quéguequi tu' cabí tun bal le
nunë' Xanru',
en bití' tun bal le nun në'ë.
Uquínajë' léguequi, en bití' ca' uchisë'
léguequi.

⁶¡Yöl-la' ba Xanru',
tu' riyönnë' cate' rinábida' Lë' gácalenë'
neda'!

⁷Xanru' caz náquië' yöl-la' huáca quia',
en le run chí'i neda'.

Ruzxöni ládxa'a Lë', ate' rácalenë' neda'.
Que lë ni na' ruzí' xibé' ládxi'da'ahua',

ate' gul-la' le guía' Lè: "Xclenu'."

⁸ Naca cazë Xanru' yöl-la' huáca quéguequi bönachi queë', en náquië' ca' Nu run chi'i Bönni' na' bubéajë' quez queë' para inná bë'ë.

⁹ Busólá bönachi quiu', Dios, en ben ga gaca dxi'a quéguequi nupa néquiguequi quiu'.

Ben chi'i léguequi ca run tu nu ruyú bö'cu' zxila', en guché'tica'sö léguequi.

29 ¡Guli'cu'ë yöl-la' ba Xanru', libf'ili', nácali' zxf'inigaquië' bönni' nayépisëgaquië'!

¡Guli'cu'ë yöl-la' ba Xanru', en guli'guíë': "Napu' yöl-la' huáca idú!"

² ¡Guli'cu'ë yöl-la' ba Xanru' le ral-la' gata' que Lë' tu' náquië' lá'ayi!

¡Guli'gún bal Xanru', tu' naca lachi le naca lá'ayi queë'!

³ Riyón chi'ë Xanru' lu nísado'.

Riyón chi'ë Xanru' nayépisë' ca riyón guziú' rinné.

Riyón chi'ë Xanru' lu nísado'.

⁴ Nál-latëro naca chi'ë Xanru'.

Nayépisëtëro chi'ë Xanru'.

⁵ Chi'ë Xanru' rilá'a yugu' yaga zxön.

Ön, chi'ë Xanru' riguitsaj yugu' yaga lu gu'a Líbano.

⁶ Runë' Xanru' ga ta'xiti' gu'a ca tunba' bédxido'.

Ta'xiti' gu'a Líbano, en gu'a Sirión ca tunba' bédx gu'a.

⁷ Chi'ë Xanru' run ga rëpi yösa.

⁸ Ruxizi chi'ë Xanru' la' guixi' ga dë lataj. Ruxizi chi'ë Xanru' la' guixi' naz'i le Cades.

⁹ Chi'ë Xanru' run ga ta'béquiaba' bidxina' guixi' böa' hué'enido' quégacaba', en run ga ta'guinnaj yúgu'të laga' dxía-gaca yugu' yaga.

Lu yudo' queë' tu'i didza' yúgu'të le nacua', ta'nná: "¡Yöl-la' ba Lë'!"

¹⁰ Gurö'ë gunná bë'ë Xanru' cate' guró'ö nisa lu idútë yödzölió.

Ön, rö'ë rinná bë'tica'së' Xanru'.

¹¹ Rutipë' Xanru' ládxi'do'gaca bönachi queë'.

Gunë' Xanru' ga gaca dxi'a quégaca bönachi queë',

en gunë' ga ila'böza dxi'a tsáhui'do'.

30 Guna' Li' zxön, Xan, tu' buchisu' Li' neda', en biti' bë'u lataj bi ilún quia' nupa biti' ta'lé'e neda' dxi'a.

² Rigu'a Li' yöl-la' ba, Xana' Dios, tu' bulidza' Li' gácalenu' neda', ate' bunu' neda'.

³ Bubéaju' yöl-la' na'bán quia' lu yeru ba, Xan.

Runu' ga zoa' nabana', para cabí tsu'a lataj chul-la ga dzö'ö nupa nátigaca.

⁴ ¡Guli'gul-la yöl-la' ba queë' Xanru', libf'ili' néquili' quez queë'!

¡Guli'guíë': "Xclenu'" ca naca Lë' le naca lá'ayi!

⁵ Tu chf'isö rilenë',

pero ruzá ládxi'tica'së' queéru'.

Channö códxiru' tu yëla,

lu yöl-la' rudzeja queéru' códxi'aru' itó yu.

⁶ Cate' guca dxi'a quia', nf'irö gunniá:

"Gatga bi utsá neda'."

⁷ Tu' buzá ládxi'u quia', Xan, buzú' neda' ga zoa' tsutsu,

en cate' bucachi' lo', guró'a böniga.

⁸ Bulidza' Li', Xan,

en gúta'yua' lo'.

⁹ ¡Bizxi xibé uzi'tso' channö gátia', en tsöjtsázia'

lataj chul-la ga dzö'ö nupa nátigaca?

¿Naru' huácatsö cu'a Li' yöl-la' ba channö huóaca' bëchtö yu?

¿Naru' huácatsö ulu'a lo le naca idú quiu'?

¹⁰ Ruzé' nagu', Xan, en ruzá' ládxi'u quia'.

Gúcalen neda', Xan.

¹¹ Bu'finida', ate' benu' ga buyá'a lu yöl-la' rudzeja quia'.

Bugú' lari' cá'asö gúcu'a', en bugacu' neda' le ruzi'a xibé.

¹² Bil-la bö' naca caza' yöl-la' ba quiu', en bití' soa dxisö.

Guiética'sa' Li': "Xclenu", Xana' Dios.

31 Ruzxöni ládxa'a Li', Xan.

Bití' gu'u lataj utuf'ida'.

Tu' nacu' tsahui', busólá neda'.

² Ruzé nagu' quia', en rusóló' neda'.

Gacu' ca tu guiójt'o ga soa' tsutsu, en ca tu ga soa' dxi'a tsáhuí'do' lu gudilla.

³ Nacu' Li' guiójt'o ga zoa' tsutsu, en le run chí'i neda'.

Para gaca yöl-la' ba que Lo' guché' neda', en buluf'i neda' le dxi'a guna'.

⁴ Ubéaju' neda' lu du yalaj nucáchi'-gaquie' bönni' tu'ë dö',

tu' nacu' Li' yöl-la' nál-la quia'.

⁵ Rigu'a lu no'o bö' naca caza'.

Böá'au' neda', Xan, Dios idú.

⁶ Bití' rilé'eda' dxi'a nupa tun zxön budó' guiójt budó' yaga,

pero neda' ruzxöni ládxa'a Li', Xan.

⁷ Udzejada', en uzi'a xibé yöl-la' dxi'i ladxi' quiu',

tu' bilé'e quézinu' le gudí'i guzácaca'a.

Nöz quézinu' yugu' le raca quia'.

⁸ Bití' bucá'anu' neda' lu na' nu bití' rilé'e neda' dxi'a,

pero nuzú' neda' tu lataj ga zoa' tsutsu.

⁹ Buzá' ladxi' quia', Xan, tu' zoa tu le raca quia'.

Lu yöl-la' ruhuf'ini quia' ribödxá', en rudú ládxa'a.

¹⁰ Riyechi' dza quia' tu' ruhuf'inide'eda', en tu' rinné ládxa'a, en riyechi' iz quia'.

Rudú ládxa'a tu' nözi dö' nu'a,

ate' nadxita idútë le naca'.

¹¹ Tu' nözi le gulún nupa ta'dá'baga' neda'

naca' tu le run gadxi yugu' dzaga yu'u quia',

ate' nupa núnbë'gaca neda' tadxi neda'.

Nupa ta'lé'e neda' la' nöza ta'zxunnaj ga rizá'a.

¹² Nál-la ládxi'gaca neda' ca nál-la ládxi'gaca nupa chinátigaca.

Naca' ca tu rö'ö nayuzxaj naguinnaj.

¹³ Biyönda' didza' zi' ta'nné bönachi zían quia' bagáchi'sö.

Gátitës zoa le run gadxi neda'.

Tun xtídza'gaca bi ilún quia'.

Ta'zá' ládxi'gaca nacxi iluti neda',

¹⁴ pero neda' ruzxöni ládxa'a Li', Xan.

Rnnía' nacu' Dios quia'.

¹⁵ Yú'ugaca lu no'o yúgu'të dza soa' ibana'.

Busólá neda' lu ná'agaca nupa bití' ta'lé'e neda' dxi'a,

en lu ná'agaca nupa ta'zóa regu' neda'.

¹⁶ Lu yöl-la' ruzá' ladxi' quiu' buyú neda', huen dxin quiu'.

Lu yöl-la' dxi'i ladxi' quiu' busólá neda'.

¹⁷ Bití' gu'u lataj utuf'ida', Xan, tu' rulidza' Li'.

Ben ga ulu'tuf'i nupa tuá' dö'.

Ben ga ila'cuá' dxisö lu yeru ba.

¹⁸ Ben ga bití' gaca bi inná nu rizí' yë',

nu na' rinné zi' queë' bönni' tsahui',

en run ba zxön cuini, en rulidza ditaj luzé'e.

¹⁹ ¡Bica' zxön yöl-la' dxi'i ladxi' quiu',

lë na' napu' para gácalenu' nupa tadxi Li'!

Runu' caní' quégaca nupa tu'zxöni ladxi' Li'

lógaca nupa tun ba zxön cuíniguequi.

²⁰ Rucáchu'u légaquie' ga na' zu' bagáchi'sö,

ga bití' gaca idxín nu bönni' xihui'.

Run chí'u légaquie' bagáchi'sö ga bití' gaca idxín didza' bizxaj.

²¹ ¡Yöl-la' ba Xanru' Dios,

tu' buluf'iné' neda' ca nadxf'iné' neda' cate' ni' zoa' tu yödzö

ga nagú'ugaquie' lé'ajlö bönni' tu'tíl-lalené' neda'!

²² Lu yöl-la' radxi ridzöbi quia' gunnía': "Ilútië neda' lo' Li', Xan",

pero biyönnu' le gunábida' Li', cate' ni' bulidza' Li'.

²³ ¡Guli'dxi'i-në' Xanru', lib'ili' néquili' queë'!

Rapa chi'ë Xanru' nupa ta'yéajlé' Lë',
en rubi'ë ca sa'yéaj queë' bönni' run ba
zxön cuinë'.

²⁴ ¡Guli'gaca tsutsu, en buli'tipa ládxi'li',
yúgu'téli' na' runli' löza Xanru' Dios!

32 ¡Bica' ba bönni' na' Dios buniti
lahuë' lë' ca naca dö' bi'ë,
en bugüë' dul-la' queë'!

² ¡Bica' ba bönni' na' Dios rnnë' biti'
nabáguë'ë xigua',
en biti' zóalen lë' yöl-la' rizí' yë'!

³ Cate' guzóa' dxisö ca naca dul-la' quia',
budú ládxa'a tu' gunné'tica'sö ládxa'a.

⁴ Rëla, en te dza buqufí busácu'u neda',
Dios.

Budú ládxa'a ca raca cate' rö' bóchila.

⁵ Ní'irö guxóalëpa' dul-la' nabága'a lo'
Li',

en biti' bucácha'a le xihui' bena'.

Gunná': "Ixóalëpa' dö' bi'a lahuë'
Xana",

ate' buniti lo' neda' ca naca xigua'
gubága'a.

⁶ Que lë ni na', núti'tës nu nunbë' Li',
Dios, ral-la' ulidza Li'

cate' dë lataj güf'ilen Li' didza'.

Cate' rö' nisa bach luyú ni, biti' ca' ideli'
idxín ga zoa nu na'.

⁷ Li' nacu' ga gaca ucachí' cuina' cate' zoa
bönadxi quia'.

Li' caz gun chi'u neda' para cabí bi gaca
quia'.

⁸ Li' gunu' ga gúl-latica'sa' quiu' Li' tu'
rusólö' neda'.

Rnnë' Dios: "Neda' uzéajni'ida' li', en
ulu'ida' li' le ral-la' gunu'.

Usédida' li', en uyútica'sa' li'.

⁹ Biti' gacu' ca tu böa' o tu mula cabí
ta'yéajni'iba'.

Ral-la' cu'u gufé en du rú'ugacaba' para
inná bé'enu' lé'gacaba'."

Channö cabí gunu' caní, biti' ca' ilunba'
ca ré'enu'.

¹⁰ Zían le tun ga tu'huí'iniguequi nupa
tuá' dö',

pero bönni' ruzxöni ládxë'ë Xanru'
ilé'enë' yöl-la' dxi'i ladxi' queë'.

¹¹ Buli'dzéjalënë' Xanru', en buli'sí' xibé',
libí'ili' nácali' tsahui' lahuë' Lë'.

Lu yöl-la' rudzeja queéli' guli'códxia',
libí'ili' nácali' idú dxi'a.

33 Lu yöl-la' rudzeja queéli' guli'gul-
la lahuë' Xanru',
libí'ili' nácali' tsahui' lahuë' Lë'.

Nupa ná'cagaca tsahui' ral-la' ila'gú'u Lë'
yöl-la' ba.

² Guli'gué' Lë': "Xclenu", quínnili' lë'e
bihuél-la.

Guli'gul-la yöl-la' ba queë', quínnili' le zë
chi du que.

³ Guli'gul-la queë' tu le rul-la cubi.

Guli'quinnaj dxí'ado', en lu yöl-la'
rudzeja queéli' guli'códxia'.

⁴ Xtídzë'ë Xanru' naca idú tsahui',
ate' idú ládxë'ë runë' yúgu'të bi runë'.

⁵ Nadxí'inë' le naca dxi'a, en le naca
tsahui'.

Nalá' lahui yöl-la' dxi'i ladxi' queë' Xan-
ru' idútë yödzölió.

⁶ Len didza' bé'ësë' Xanru', benë' lúzxiba,
en benë' yúgu'të bö'lej bení' len bö' rirúaj
ru'ë.

⁷ Rutubë' nisa rö'ö nísado' para gaca ca
tu gu'á.

Napa chi'ë nisa rö'ö zili ga na' nupé'ë
xilataj.

⁸ Yúgu'të bönachi ral-la' ila'dxí'i Xanru'.
Bönachi idútë yödzölió ral-la' ila'cuá'
nöxaj lahuë' Lë'.

⁹ Bé'ësë' didza' Xanru', ate' la' gúcatë ca
na' gunné'.

¹⁰ Gunná' bë'ë, ate' guca tsutsu le nunë'.
Runë' Xanru' ga tu'huó'aca cá'asö didza'
túngaca bönachi yugu' yödzö.

Runë' ga biti' ilaca le té'ëni ilúngaca
bönachi.

¹¹ Sóatica'sö tsutsu didza' nunë' Xanru'.
Le rizá' ládxë'ë ulu'gá'anatica'sö qué'gue-
qui zxi'ini xi'sóaru'.

¹² Bica' bágaca bönachi yödzö na' náquië' Xanru' cazë' Dios queguequi, bönachi na' nabó cazë' Dios para ilaca quez queë'.

¹³ Zoa cazë' Xanru' yehua' yubá, ruyúë' ga zóaru'. Rilé'ené' le tun yúgu'të bönachi nacua' idútë yödzölió.

¹⁴ Ga na' zoa cazë' ruyúë' idú gásibi'iló, en rilé'ené' yúgu'të nupa nacua' idútë yödzölió ni.

¹⁵ Nun cazë' Lë' ládxi'do'gaca yúgu'tëguequi. Réajni' quezinë' ca naca yúgu'të le túngaca.

¹⁶ Biti' ca' ulé' bönni' unná bë' nacua' queë' bönni' guizxi yu rójáquië' gudil-la.

Biti' ulé' bönni' zoë' gudil-la tu' nál-latërë'.

¹⁷ Biti' nazaca' gunru' löza böa' para idéli'ru' lu gudil-la, tu' cabí gaca usölabá' nu bönni' tu' nál-latëröba'.

¹⁸ Buli'yú, ruyútica'së' Xanru' nupa tadxi Lë', nupa na' tun löza yöl-la' dxi'i ladxi' queë',

¹⁹ para usölé' léguequi lu yöl-la' guti, en para ugahuë' léguequi cate' tsu'u gubín.

²⁰ Idú ládxi'ru' runru' löza Lë' Xanru'. Rácalen cazë' rë'u, en rapa chi'ë rë'u.

²¹ Rudzeja ládxi'lenru' Lë', en uzxöni ládxi'ru' Lë', tu' náquië' lá'ayi.

²² Lu yöl-la' dxi'i ladxi' quiu' gúcalen netu', Xan, tu' runtu' löza Li'.

34 ¡Innética'sa' queë' Xanru' náquië' dxi'a!

¡Cú'utica'sa' Lë' yöl-la' ba!

² Bö' naca caza' gun zxön Xanru'.

Nupa nácacaca nöxaj ladxi' ila'yöni lë ni, en ulu'dzeja.

³ Guli'güi' zxonë' Xanru' tsözxón len neda', en tsözxón usiyönru' bönachi ca naca Lë' La'ayi.

⁴ Bulidza'-në' Xanru', ate' bubi'ë didza' quia', en busölé' neda' lu yugu' le gúdxida'.

⁵ Nupa nácacaca queë' bila'dxín lahuë', en bulu'zi' xibë'.

Bíti'rö caz ulu'tufi' nupa na'.

⁶ Bulidza'-në' Xanru', ate' biyönnë' quia' neda', bönni' yechi',

en busölé' neda' lu yúgu'të le guca quia'.

⁷ Gubáz lá'ayi que ya'abá queë' Xanru' tapa chi'ë nupa tadxi Lë', en tu'sölé' léguequi lu yúgu'të le raca queguequi.

⁸ Guli'sí' bë'ë, ate' inózili' náquië' Xanru' dxi'a.

¡Bica' ba bönni' ruzxöni ládxi'ë Lë'!

⁹ Guli'gadxi Xanru', lib'ili' nácali' quez queë',

tu' cabí bi ila'yadzaj nupa tadxi Lë'.

¹⁰ Ta'yadzaj ta'yúdxiba' bëdxi guixi', en ta'dunba',

pero nupa tu'lidza Xanru' biti' ca' ta'yadzaj le naca dxi'a.

¹¹ Guli'dá lib'ili', bí'ido', en buli'zé' ná-gali' xtídzá'a.

Uzéajni'ida' lib'ili' para gádxili'-në' Xanru'.

¹² ¡Nuzxi caz bönni' ré'ënë' soë' ibanë', en ré'ënë' soë' iz zían para uzi'ë xibé le naca dxi'a?

¹³ Ben chi'í lúdxu'u para cabí gu'u didza' xihui',

en para cabí si' yé'enu' luzó'o.

¹⁴ Bucá'ana le cabí naca tsahui', en ben le naca dxi'a.

Bë' ladxi' cözu' dxi'a tsáhui'do', en ben bayudxi gunu' yugu' lë ni.

¹⁵ Ruyútica'së' Xanru' nupa nácacaca tsahui',

en riyón quezinë' cate' tu'lidza Lë'.

¹⁶ Uzáguë'ë Xanru' xinózgaca nupa tuá' dö',

en gunë' ga cuntu nu tsöjné léguequi.
¹⁷ Nupa nácgaca tsahui' tu'lidza Xanru',
 ate' riyönnë' quéguequi,
 en rusölë' léguequi lu yugu' le raca
 quéguequi.
¹⁸ Xanru' zóalen cazë' nupa tu'hu'ini
 ladxi',
 en rusölë' nupa nácgaca nöxaj ladxi'.
¹⁹ Zían le rigufi rizáque'ë bönni' tsahui',
 pero Xanru' rusölë' lë' lu yúgu'të lë na'.
²⁰ Xanru' rapa chi'ë yúgu'të dxita yu'ë,
 ate' biti' gatsaj nitú dxita queë'.
²¹ Le xihui' run nu ruá' dö' gun ga gati nu
 na',
 ate' ila'baga' xiguia' nupa biti' ta'lé'e dx-
 i'a le naca tsahui'.
²² Xanru' caz ruhuóá'uë' bö' nácgaca
 caz huen dxin queë',
 ate' biti' irugu que nitú nupa na' tu'zxöni
 ladxi' Lë'.

Tu le bil-lë' David

35 Xana' Dios, gudá'baga' nupa biti'
 ta'lé'e neda' dxi'a.
 Butíl-lalen nupa ta'díl-lalen neda'.
² Guzxón le gun chi'i neda' lu gudil-la,
 en gudá gácalenu' neda'.
³ Guzxón yaga tuchi' quiu' para uzagu'u
 xinózguequi nupa ta'zóa regu' neda'.
 Gudxi bö' naca caza' nacu' Li' Nu rusöla
 neda'.
⁴ Ben ga ulu'tuf'i, en ulu'gá'ana cá'asö
 nupa té'ëni iluti neda'.
 Ben ga ulu'huécaj, en ulu'gá'ana cá'asö
 nupa té'ëni iluf'i dö' quia'.
⁵ Ben ga ilaca ca bëbu zxe café zeaj lu
 bö'ös,
 en ben ga ulaguë' gubáz lá'ayi que ya'abá
 quiu' léguequi.
⁶ Ben ga gaca chul-la nöza yú'ugaca, en
 ga cuflagaca,
 ate' soa régu'ë gubáz lá'ayi quiu'
 léguequi.
⁷ Bulu'cáchi' du yalaj le sön neda', en biti'
 bi nuna' quéguequi.

Gula'chó'öna yeru ga tsöjbixa', en biti' bi
 nuna' quéguequi.
⁸ Ben ga idxín quéguequi tsárido'os le
 usuniti léguequi,
 en ben ga du yalaj na' bulu'cáchi' sön la'
 cuínguequi quez.
 Ben ga ila'bixi lu yeru na' gula'chó'öna.
⁹ Udzeja ládxi'lana'-në' Xanru',
 en uzi'a xibë yöl-la' rusöla queë'.
¹⁰ Ila'nná dxita néquinida': "Xan, ¿nuzxi
 caz naca ca nacu' Li'?"
 Rusöló' nu rigufi rizáca' lu na' nu nál-
 latëro ca le.
 Rusöló' nu rigufi rizáca', en riyadzaj
 riyudxi lu na' bönni' ribanë' le nequi
 que."
¹¹ Ta'dá'baguë'ë bönni' xihui' neda', en
 ta'nnë' quia'.
 Ta'nabi yúdxinë' neda' ca naca yugu' le
 cabí nözda'.
¹² Tu'bi'ë quia' le naca dö' cate' runa' le
 naca dxi'a,
 ate' ruhu'ínide'e ládxa'a.
¹³ Pero neda' gúcuá' lari' cá'asö cate'
 guláquië' huë'.
 Bena' gubasa, en busaca' zi' bö' naca
 caza',
 en uláz quéguequi bulidza'-në' Dios zían
 luzuú.
¹⁴ Bu'ínide'eda' tsca guca luzá'a o bi'i
 böchi' caza' nu na' guca huë'.
 Gurödxí yecha'a ca hu'ínide'eda'
 channö gátinu xiná' caza',
¹⁵ pero cate' guchixi guníguída' neda',
 bulu'dzéjade'e, en bulu'dubi
 tsözxón.
 Yugu' bönni' na' bulu'cá'anë' neda'
 cá'asö bulu'dübë' para ilunë' ga cö'a
 baguí'i.
 Yugu' bönni' na' biti' núnbë'a gulúnnati-
 ca'së' neda'.
¹⁶ Bulu'saca' zi'ë neda', en bulu'titjë'
 quia'.
 Lu yöl-la' rilé quégaquië' neda' gulagu
 zxea láyi'gaquië'.

17 Xan, ¿gáca'xte caz uyú iná'asu' le tuné'?

Busölá neda' lu dö' tu'ë quia'.

Busölá neda' lu ná'agaquié' bönni' na' nácagaquié' ca yugu' bédxi guixi'.

18 Guía' Li': "Xclenu'" lógaca bönachi zían ulu'dúbigaca quiu'.

Cu'a Li' yöl-la' ba ga nudúbigaca zianté bönachi.

19 Biti' gu'u lataj ulu'dzeja nupa ta'dá'ba-ga' neda', en ta'z'f' yé',

en biti' gu'u lataj ulu'titaj quia', nupa na' tu'df'i neda', en biti' bi nuna' quéguequi.

20 Catu caz tu'f'i didza' le gun ga soa dxisó didza' bizxaj.

Lu yöl-la' rizí' yé' quéguequi ta'nné qué-gaca nupa ta'bó' dxi'a tsáhui'do' yödölió ni.

21 Bulu'salaj ru'f'iguequi, en gula'nné quia', gula'nná:

"¡Ön, bilé'e quézitu' le nuné'!"

22 ¡Bilé'e quézinu' Li' lë ni, Xan! ¡Biti' su' dxisó!

¡Biti' ucá'anú' neda', Xan!

23 ¡Guyasa, Xan! ¡Busubán ládxi'u, Xan, para uchi'a usóróu' quia'!

¡Gúcalen neda', Xana' Dios!

24 ¡Tu' nacu' tsahui', buchi'a busóró quia', Xana' Dios!

¡Biti' gu'u léguequi lataj ulu'dzeja ní'a que le raca quia'!

25 ¡Biti' gu'u léguequi lataj ila'nná:

"Ön, bidéli'ru' le guzé ládxi'ru'!"

¡Biti' gu'u lataj ila'nná: "Chibucúl-laru' lë"!"

26 ¡Ben ga ulu'tu'f'i, en ulu'gá'ana cá'asó nupa tu'dzeja cate' ruhu'f'inida'!

¡Ben ga ulu'tu'f'i, en ulu'gá'ana cá'asó nupa ta'dá'baga' neda'!

27 ¡Ben ga ila'bóbdxi'a lu yöl-la' rudzeja quéguequi,

en ulu'z'f' xibé nupa tu'f'i ládxi'gaca urúa-ja' tsahui'!

¡Bé' lataj ila'nnática'só: "Nayépisëtëré Xanru' Dios,

tu' raza ládxi'ë guné' ga gaca dxi'a qué-gaca huen dxin queé'!"

28 Nf'irö guna' ba nalí quiu', innía': "¡Nacu' tsahui'!"

en cu'a Li' yöl-la' ba idú dza.

36 Le naca xihui' ru'f'ilen bönni' nucá'ané' Dios lu icja ládxi'da'ahué'.

Biti' ca' rádxiné' Dios.

2 Tu' run ba zxön cuiné'

réquiné' biti' nóziné' Dios nabágué'ë lë' dul-la', en biti' ichúguié' Dios queé'.

3 Ru'ë didza' xihui', en rizí' yé'ë.

Biti' réajni'iné', en biti' runé' le naca dxi'a.

4 Cate' ní' dé' lu le ráti'né' rizá' ládxi'ë ca naca le xihui' guné'.

Ru'f'i ládxi'ë guné' le cabí naca dxi'a,

en biti' rusané' runé' le naca xihui'.

5 Zxóntëró ca yehua' yubá naca yöl-la' dxi'i ladxi' quiu', Xan,

ate' gúntica'su' ca rnna xtídz'u, tsca zoa yehua' yubá.

6 Naca tsutsu le tsahui' nacu' ca nácagaca tsutsu yugu' gu'a' zxön quiu'.

Ca ruchi'a rusóróu' naca ca naca nísado', tu' cabí gaca nu gúnbë'e le.

Run chí'i cazu' bönachi, en yugu böa' guixi', Xan.

7 Nazáca'tëró yöl-la' dxi'i ladxi' quiu', Dios.

Run chí'u yúgu'té bönachi ca runba' yö-jede, run ch'í'ba' yugu' bórado' zxan xílaba'.

8 Tu'huölaj tu'dzé'e bönachi quiu' le nayánda' lu yu'u lidxu',

ate' ruguí'ju' léguequi le naca yöl-la' dxi'i ladxi' quiu'.

9 Yúgu'té le nacua' nabánigaca Li'.

Tu' naca cazu' bení' rilé'etu' bení'.

10 Bidxi'ítica'só nupa núnbë'gaca Li',

en ben le naca dxi'a quégaca nupa náca-gaca tsahui'.

11 Biti' gu'u lataj bi ilún quia' nupa tun ba zxön cuínguequi,

en biti' gu'u nupa tuá' dö' lataj ulu'laga'
neda'.

¹²Nadzó'ögaca nupa tuá' dö'.

Déguequi luyú, en biti' ca' gaca
ulu'huöása.

37 Biti' ubi ugu'í ládxi'do'oli' tu'
tu'z'í'gaca xibé nupa tuá' dö'.

Biti' uzxé'eli' nupa biti' tun le naca dxi'a.
²Huadódité quéguequi ca raca que guixi'
nacuadi,

en udxi quéguequi ca raca quégaca guíx-
i'do' narúgagaca.

³Buli'zxöni ládxi'ë Xanru', en guli'gún le
naca dxi'a.

Buli'gá'ana luyú queë', en guli'cóz dxi'a
tsáhui'do'.

⁴Buli'sí' xibé' Xanru',
ate' gunné' queéli' le rizé ládxi'li'.

⁵Buli'dödi cuinli' lu në'ë Xanru'.
Buli'zxöni ládxi'ë Lë', ate' gunë' le gá-
calen lib'íli'.

⁶Gun cazë' Lë' ga urúajli' tsahui', en gá-
cali' ca bení',
en cate' uchi'a usöröë' queéli', gaca
queéli' ca lahui' dza.

⁷Guli'sóa dxisö lahuë' Xanru', en
guli'cóza le gunë'.

Biti' cuéqui ícjali' tu' nözi bönni' ruzi'ë
xibé,

bönni' na' ru'ë dö'.

⁸Bíti'rö leli', en buli'sán yöl-la' ridzá'a.

Biti' ubi ugu'í ládxi'do'oli' tu' gun lë ni
ga guá'ali' dö'.

⁹Dios caz uzáguë'ë xinózguequi nupa
tuá' dö',

pero nupa tu'zxöni ladxi' Xanru', guequi
quéguequi luyú.

¹⁰Ia'láti'sö xidzé, en bíti'rö soë' bönni'
na' ru'ë dö'.

Uguiljali' xilatjë', pero bíti'rö soë' ni'.

¹¹Nupa nácgaca nöxaj ladxi', guequi
quéguequi luyú,

ate' ulu'z'í' xibé yöl-la' tsahui' que.

¹²Tun didza' nupa tuá' dö' bi ilúngaca
quégaca nupa nácgaca tsahui',

en lu yöl-la' rilé quéguequi tagu zxea
láyi'guequi.

¹³Ruzxidxi cazë' Xanru' quéguequi,
tu' rilé'enë' dza udxi quéguequi.

¹⁴Nupa tuá' dö' chigula'béaj guíë tuchi'
quéguequi,

en nuá'gaca uxiti' yaga quéguequi
para ulu'xicja nupa ta'zaca' zi', en
ta'yadzaj ta'yudxi,

en para iluti nupa tun le naca dxi'a.

¹⁵Guíë tuchi' quéguequi ila'chiza la'
ládxi'do'guesisö,

ate' ila'guítsaj uxiti' yaga quéguequi.

¹⁶Dxi'atëro le do' desö queë' bönni'
tsahui'

ca le zían dë queë' bönni' ru'ë dö'.

¹⁷Huayúzjagaca ná'agaca nupa tuá'
dö',

pero Xanru' caz rácalenë' nupa nácgaca
tsahui'.

¹⁸Rufi' ladxi' cazë' Xanru' nupa biti' bi
xiguia' nabága'gaca,

ate' guéquitica'sö xiyúgaca quéguequi.

¹⁹Biti' ca' ulu'tuí' cate' idxín dza biti'
gaca dxi'a,

en cate' tsu'u gubín, gáta'dëra le
ilágugaca.

²⁰Ulu'niti tsaz nupa tuá' dö',

ate' nupa biti' ta'lé'e dxi'a Xanru' ilaca ca
yöl-la' lachi que guixi'.

La' tóditë quéguequi, en ilaca ca dzön le
rinítitë.

²¹Ta'nábini nu bi gunna quéguequi tu
ch'ísö, pero biti' ca' ulu'b'í'i lë na'.

Nu naca tsahui' ruzá ladxi' quéguequi, en
runödzej quéguequi.

²²Gaca luyú quégaca nupa run lá'ayë'
Xanru',

pero ila'niti tsaz nupa rudxié' Lë' dö'.

²³Le runë' bönni' dxi'a naca le nuluf'inë'
Xanru' lë',

ate' raza ládxi'ë Lë' le runë' bönni' na'.

²⁴Cate' röjtsö'ë, biti' ca' röjtsö'ë tsaz,

tu' röjzönë' Xanru' caz bönni' na'.

²⁵Guca' ra'bando', pero na'a nagula',

en catu caz bilé'eda' nusán në'ë Dios bön-
ni' tsahui',
en catu caz bilé'eda' riyadzaj le ilágubi'
zxí'inë'.

²⁶ Yugu' dza ruzá' ládxe'ë bönni' tsahui'
quéguequi luzé'ë
en runödzejë' le ta'nábini lë' unödzejë' tu
chí'isö,
Nácagacabi' zxí'ini xi'sóë' tu le run ga
raca dxi'a queéru'.

²⁷ Buli'cá'ana le cabí nácatë, en guli'gún
le naca dxi'a.

Channö caní gunli', sóali' tsaz,

²⁸ tu' nadxí'inë' Xanru' nu run le naca
tsahui',
en catu caz usán në'ë nupa néquiguequi
quez queë'.

Gun chí'tica'së' léguequi,
pero usunítie' zxí'ini xi'sóagaca nupa tuá'
dö'.

²⁹ Guequi luyú quégaca nupa nácagaca
tsahui',
ate' ila'cuá'tica'sö luyú na'.

³⁰ Ru'ë bönni' tsahui' didza' le napa yöl-
la' réajni'i,
ate' raca yöl-la' ruchi'a rusörö ní'a que
didza' na' ru'ë.

³¹ Yu'u icja ládxi'da'ahuë' le gunná bë'ë
Dios.

Que lë ni na' catu caz ichixi iníguinë'.

³² Ruyuda' nu ruá' dö' le runë' bönni'
tsahui',
en riguilaj nacxi gaca guti lë'.

³³ Xanru' biti' gu'ë nu na' lataj bi gun
queë' bönni' tsahui' na',
en biti' gu'ë lataj irugu queë' cate' nu
uchi'a usörö queë'.

³⁴ Buli'zxöni ládxe'ë Xanru', en guli'gún
ca ré'enë' gunli',
ate' uchisë' lib'i'ili' para guequi queéli'
luyú.

Cate' udxi quégaca nupa tuá' dö', hualé'e
quézili' le.

³⁵ Bilé'eda'-në' bönni' huía' dö'.

Gúquië' ca tu yaga zxön, en buzi'de'enë'
xibé.

³⁶ Nf'irö gudödi queë', en bíti'rö zoë'.
Yöjdilja' lë', pero biti' ca' guca udzólida'
lë'.

³⁷ Buli'yú ca náquië' bönni' tsahui'.
Cuntu nu gaca bi inné queë',
tu' ila'cuá'abi' zxí'ini xi'sóë' bönni' zxön
ladxi'.

³⁸ Ulu'niti tsaz nupa tu'cá'ana le gunná
bë'ë Dios.

Usiúdxë' Xanru' yugu' zxí'ini xi'sóagaca
nupa tuá' dö',

³⁹ pero rusölá cazë' nupa nácagaca
tsahui'.

Rutipë' ládxi'guequi cate' bi raca
quéguequi.

⁴⁰ Rácalenë' léguequi, en rusölé'
léguequi.

Rubéajë' léguequi lu ná'agaca nupa tuá'
dö', en rusölé' léguequi,
tu' tu'zxöni ládxi'guequi Lë'.

38 Biti' ilenu' neda', Xan, en biti'
uzenu' neda' bach.

Biti' gunu' neda' xiguia' lu yöl-la' rilé
qui'.

² Ben zí'u neda', en budxíu' neda' huë'.

Nuzötju' neda' len no'ö.

³ Yu'a yödzhöhuë' zxön tu' rilenu' neda'.

Dxía huë' idütë le naca' tu' nözi dul-la'
nabága'a.

⁴ Xiguia' nabága'a naca ca tu nísado' ga
ruchicja' nisa.

Naca ca tu yua' zí'i nabága'a neda'.

⁵ Tu' bena' yugu' le cabí naca dxi'a,
dxía huë' le rilá' siguti, en rudzu'.

⁶ Narecji' cúdza'a, en nagá'ana' cá'asö.
Idú dza ruhu'f'inide'eda'.

⁷ Idütë le naca' yú'uda'a xilá,
ate' nazxí xipéla'a.

⁸ Rudú ládxa'a, en ricuídi'da'.

Rinnëda' ládxa'a tu' ruúbi ruguf'i
ládxi'da'ahua'.

⁹ Nöz quézinu' Li', Xan, le rizé ládxa'a,
en riyönnu' le rinnética'sö ládxa'a.

¹⁰ Richunchu ládxi'da'ahua', en ricuídi'
ládxa'a,

ga ridxintë richul-la guiój lahua'.

¹¹ Bítirö ta'dzaga neda' yugu' luzá'a, en yugu' bócha'a, tu' nözi xihué'a, ate' tu'biga' di'a dza quia' ga zoa'.

¹² Nupa té'ëni iluti neda' ta'bequi le ila'zón neda',

ate' nupa té'ëni ulu'cul-la neda' tun xtídza'guequi nacxi ulu'suniti neda'.

Idú dza ta'bequi ícjaguequi bi ilún quia'.

¹³ Naca' ca tu bönni' nacódzué', en bítirö riyönda'.

Naca' ca tu bönni' narugu lúdxë'ë, en bití' risaljé' ru'ë.

¹⁴ Naca' ca tu bönni' bítirö riyönnë',

en que lë ni na' bití' bi didza' rubi'ë.

¹⁵ Tuzu' Li' ruzxöni ládxa'a, Xan.

Ubf'i cazu' didza', Xana' Dios.

¹⁶ Bití' gu'u lataj ulu'dzeja ni'a que le raca quia'.

Bití' gu'u lataj ilún ba zxön cuínguequi tu' nagá'ana' cá'asö.

¹⁷ Chizóa' tsöjbixa',

en zóaléntica'sö xihué'a neda'.

¹⁸ Que lë ni na' rixóalëpa' xiguia' nabága'a,

en risébida' ládxa'a tu' nözi dul-la' nabága'a.

¹⁹ Nacuá' dxi'a, en nál-lagaca nupa téqui neda' zi'.

Nayánda' nupa tu'df'i neda', en bití' bi nuna' quéguequi.

²⁰ Ta'dá'baga' neda' nupa tu'bf'i le cabí naca dxi'a que nu run le naca dxi'a.

Caní tun tu' ruf'i ládxa'a guna' le naca dxi'a.

²¹ Bití' usán no'o neda', Xan.

Bití' ubigu' ga zoa', Dios quia'.

²² Gudáchi gácalenu' neda', Xan,

tu' naca cazu' Li' Nu rusólá neda'.

39 Gunnía': Gun chí'i cuina' ca naca le runa',

en bití' guna' dul-la' ca naca didza' ruá'a.

Bití' bi didza' gu'a

cate' nacua' nupa tuá' dö' gal-la' ga zoa'.

² Guzóa' dxisö, en bití' bë'a didza' ga bidxintë

bití' gunnía' le naca dxi'a, pero biyali' xihué'a.

³ Bubi buguí' ládxi'da'ahua',

en cate' guzá' ládxa'a que, guyegui gulá ládxi'da'ahua'.

Que lë ni na' gunábida'-në' Xanru', gunnía':

⁴ Xan, ¿gáca'xte caz soa' ibana'?

Bulu'í neda' tscá iz soa' ibana'.

Ben ga inözda' channö chizóa' caz gátia'.

⁵ Nabábasö dza nuzú' quia' soa' ibana'.

Yugu' iz soa' ibana' bití' bi zeaj naca lo' Li'.

Le nácatë bití' bi nácatë yúgu'të bö-nachi nacua' luyú ni.

⁶ Nácatëso ca tu zxul-la rigú'u böaj.

Nítisö tu'úbi tu'gu'í ládxi'do'guequi, en tun dxin.

Tu'tubi yöl-la' tsahui', pero bití' nózguequi nuzxi guequi que.

⁷ ¿Bizxi caz gaca guna' löza, Xan?

Ruzxöni ládxa'a Li'.

⁸ Busólá neda' lu xiguia' nabága'a,

en bití' gu'u lataj ulu'titaj quia' nupa nácatë canöz.

⁹ Soa' dxisö, en bití' bi didza' gu'a,

tu' ben cazu' Li' ga riguí' rizáca'a lë ni.

¹⁰ Bítirö gunu' neda' xiguia'.

Chizóa' gátia' tu' rusaca' zi'u neda'.

¹¹ Runu'-në' xiguia' bönni' dul-la', en ruzenu' lë' bach.

Ca tu'töba' bélado' que le yú'uba', rusunítu' le ruf'i ládxi'ë bönni' na'.

Bití' bi naca cazë bönni' dul-la' na'.

¹² Buzé' nagu' le ruidza' Li', Xan, en le rinábida' Li'.

Bití' su' dxisö cate' ribödxa' lo' Li',

en bití' gaca' ca tu bönni' zi'tu' lo' Li',

en ca tu bönni' ridasë' ca guláquië' xuz xtó'otu'.

¹³ Benna neda' lataj idipa ládxa'a

zí'alö ca uzá'a yödzölió ni, en bítirö soa'.

40 Lu yöl-la' riböza zxön ladxi' quia' gulöza' gácalenë' Xanru' neda'.

Ní'irö buzé' naguë' quia', en biyönnë' le bulidza'-në'.

²Bubéajë' neda' ca tu lu yeru ga rë', en lu guna' zili.

Buzóë' neda' tu lu guiójt'o, en guléquië' neda' tsutsu.

³Busédinë' neda' tu le cubi le rul-la' le naca yöl-la' ba queë' Dios queëru'.

Zián nupa ila'lé'eni læ ni, en ilún Lë' zxon,

ate' ulu'zxonì ladxi'-në' Xanru'.

⁴Bica' ba bönni' ruzxonì lãdxë'ë Xanru'.

Biti' runë' tsózxón nu run ba zxon cuini, nu na' run zxon yugu' dios núngaca bönachi.

⁵Ziántërö naca le nunu' queé'tu', Xana' Dios, yugu' le tun ga rubánitu'.

Ziántërö le yu'u icja lãdxi'do'o ca naca le gunu' queé'tu'.

Biti' ca' gaca nu ulaba lo' Li' tsa nácagaca.

Channö gué'ënda' nu usiyönda' tsa nácagaca,

nayántërö tsa le gaca ulaba'.

⁶Biti' ré'ënu' gútigaca'-ba' böa' guixi' lo', en calëga bi cu'a lo'.

Biti' rinabu' uzégui'gaca'-ba' böa' bëdxi lo',

en calëga tu le guna' lo' para ugúa dul-la',

pero gusalju' naga' para yönda' le guío' neda'.

⁷Que læ ni na' gunnía': Ni zoa caza' neda' quiu'.

Lu guichi lá'ayi quiu' nazúaj caz ca naca quia'.

⁸Raza lãdxa'a runa' ca ré'ënu' Li', Dios quia'.

Nagu'a icja lãdxi'da'ahua' xibá naguixju' Li'.

⁹Ga tu'dubi bönachi guizxi yu quiu', Xan,

busiyönda' léguequi nacu' tsahui'.

Biti' ca' guzóa' dxisö.

Nöz quézinu' læ ni, Xan.

¹⁰Biti' bucáchi'za' icja lãdxi'da'ahua' ca ruúnu' tsahui' bönachi.

Bulu'a lahui ca runu' ca rmo', en ca rusöló' bönachi.

Ga nudúbigaca bönachi quiu' biti' guzóa' dxisö,

pero bë'a didza' ca nacu' dxi'i ladxi', en ca ru'u didza' le nácatë.

¹¹Biti' ugú' quia' yöl-la' dxi'i ladxi' quiu', Xan.

Yöl-la' dxi'i ladxi' quiu', en ca runu' ca rma xtídz'u ilún ch'ítica'sö neda'.

¹²Zián le raca quia' nagú'ugaca neda' lé'ajlò, le cabí gaca nu ulaba.

Nabága'a yugu' dö' bi'a, en biti'rö gaca ilé'eda'.

Nayanrö ca guitsa' icja', ate' rudú lãdxa'a.

¹³¡Busölá neda', Xan!

¡Gudáchi gácalenu' neda', Xan!

¹⁴Ben ga ulu'tuf'i, en ila'bó' baguf'i

nupa na' té'ëni ulu'suniti neda'.

Ben ga ulu'huécaj, en ulu'gá'ana cá'asö nupa na' té'ëni gaca quia' le cabí naca

dxia'.

¹⁵Ben ga ulu'dú lãdxi'gaca tu nabíxigaca

nupa na' tu'titaj neda', ta'nná: "¡Buyút-söca' le raca queë'!"

¹⁶Ben ga ulu'dzeja, en ulu'zí' xibó' yúgu'të nupa tu'guilaj Li'.

Ben ga ila'nnática'sö nupa ta'dxí'i yöl-la' rusölá quiu',

ila'nná: "Nayépsëtërë' Xanru'."

¹⁷Nacuídí'da', en biti' bi gaca guna',

pero ru'f'i ladxi' cazu' Li' neda', Xan.

Naca cazu' Nu rácalen neda', en Nu rusölá neda'.

Biti' tsenu' guídu' quia', Dios quia'.

41 Bica' ba bönni' ru'f'i lãdxë'ë nupa nácagaca yechi'.

Xanru' gácalen cazë' bönni' na' cate' bi gaca queë'.

²Xanru' Dios gun chi'ë læ', en gunë' ga soë' ibanë'.

Gunë' ca' ga uzi'ë xibé xiyú cazë'.

Biti' usán në'ë læ' lu ná'agaca nupa biti' ta'lé'e læ' dxi'a.

³Xanru' utipë' láchxë'ë bönni' na' cate' ré'enë'.

Uchisé' lë' lu da'a le ráti'në', en gunë' ga soë' dxi'a.

⁴Gunnía': Bena' dul-la' lo' Li', Xan.

Buéchi' ladxi' neda', en bun neda'.

⁵Nupa biti' ta'lé'e neda' dxi'a ta'nné' quia', ta'nná:

“¿Bátaxi gátie', en huáca gal-la láchxi'-gaca bönachi lë'?”

⁶Channö' uduyúgaquie' neda', ta'z'í yë'ë.

Ta'gúë' didza' ca naca le raca quia', en cate' ta'rúajë', tu'siyönnë' bönachi.

⁷Tu'dubi nupa biti' ta'lé'e neda' dxi'a, en ta'nné' quia'.

Ta'zá' láchxi'gaca zían le naca dö' le ilún quia'.

⁸Ta'nné' quia', ta'nná: “Yu'ë yödzhüé' le guti lë'.

Bíti'rö caz huöásë' ga na' dë' lu le denë'.”

⁹Lësca' caní benë' böchi' luzá'a ruzxöni láchxa'a-në'.

Bönni' gudágulenë' neda' tsözxón ridá'baguë'ë neda'.

¹⁰Buéchi' ladxi' neda', Xan, en bun neda',

ate' ubí'i caza' quégaca nupa na' biti' ta'lé'e neda' dxi'a.

¹¹Gácabe'eda' raza láchxu'u neda',

tu' cabí ulu'xicja neda' nupa biti' ta'lé'e neda' dxi'a.

¹²Gáclen cazu' neda' tu' runa' le naca dxi'a.

Gunu' ga sóatica'sa' lo' Li'.

¹³¡Yöl-la' ba Xanru', Dios quégaca bönachi Israel!

¡Gulí'cu'ë yöl-la' ba na'a dza, en yugu' dza si' zaca!

¡Ca' gaca!

¡Ön, ca' gaca!

42 Ca rizé' láchxi'ba' bidxina' guixi' nisa yégudo',

lësca' caní rizé' láchxa'a Li', Dios.

²Ribidxi láchxa'a Li' cazu', Dios.

¿Bátaxi udxina' ga dë' quia', en tsu'a le yúbölö yudo' lá'ayi quiu'?

³Rëla, en te dza ribödxa', en biti' bi rahua'.

Yugu' dza nacua' nupa ta'nábini neda', ta'nná: “¿Gazxi caz zoa Dios quiu'?”

⁴Risébi láchxa'a cate' röjneda' ca guca z'íalö,

cate' guzá'lëna' bönachi guizxi yu, en yöjnörüa' láhuilöguequi ra' yu'u queë' Dios.

Lu yöl-la' rudzeja queé'tu' bíl-latu', en guyéaj láchxi'tu'-në' Xanru', en bentu' laní.

⁵¿Bizx que risébida' láchxa'a, en bizx que rö'a böniga?

Uzxöni láchxa'a-në' Xanru' Dios, tu' huadxín dza cu'a-në' yöl-la' ba le yúbölö.

Náquië' Nu rusölá neda', en náquië' Dios quia'.

⁶Risébida' láchxa'a, Dios quia'.

Que lë' ni na' tsöjneda' Li' tsanni ni zoa', ridá' rizxúnna' ra' yegu Jordán,

en tsanni ni ridá' lu guí'a Hermón, en lu guí'a Mizar.

⁷Ca tu guziú' rinné' lu nísado', en ca bö ru'í tu budoá' nísado' queë' Dios,

caní rinné' ladxi' bö' naca caza' lu yöl-la' risébi ladxi'.

⁸Rinábida'-në' Xanru' huéchi' láchxë'ë neda' yugu' dza.

Yugu' dzö' rul-la' yöl-la' ba queë' Lë', en rulidza' Dios, ru'ílena'-në' didza', Nu na' runna quia' yöl-la' na'bán.

⁹Guía'-në' Dios, Nu ruzóa neda' tsutsu, innía': ¿Bizx que nál-la láchxu'u neda'?

¿Bizx que run bayúdx quí'i sáca'tica'sa' lu ná'agaca nupa biti' ta'lé'e neda' dxi'a?

¹⁰Rutsaba yúgu'të dxita yu'a tu' tu'didza' yudxi neda'.

Yugu' dza ta'nábini neda', ta'nná: “¿Gazxi caz zoa Dios quiu'?”

¹¹¿Bizx que risébida' láchxa'a, en bizx que rö'a böniga?

Uzxöni láchxa'a-në' Xanru' Dios,

tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

43 Guléaj neda' tsahui', Dios, en bë' didza' uláz quia' lógaca bönachi tuá' dö' quia'.

Busölá neda' lu na' nu rizí' yë', en bití' naca tsahui'.

² Li' cazu' nacu' Dios, Nu rutipa ládxa'a. ¿Bixz que nusán no'o neda'?

¿Bixz que ruhuf'inida' tu' ta'bía no neda' nupa tu'df'i neda'?

³ Gusól-la' quia' bení' quiu', en le naca idútë li quiu' para ulu'luf'i neda' nöza.

Ben ga ila'ché' neda' ga naca lá'ayi quiu', ga na' zoa cazu' Li'.

⁴ Tsu'a ra' bucugu queë' Dios.

Ibíga'a lahuë' Dios, Nu run ga rudzëjade'eda'.

Gúl-lalena' bihuël-la, cu'a Li' yöl-la' ba, Dios, nacu' Dios quia'.

⁵ ¿Bixz que risëbida' ládxa'a, en bixz que rö'a böniga?

Uzxöni ládxa'a-në' Xanru' Dios, tu' huadxín dza cu'a-në' yöl-la' ba le yúbölö,

tu' náquië' Nu rusölá neda', en náquië' Dios quia'.

44 Biyón quëzitu' le, Dios.

Bulu'siyönnë' netu' xuz xtó'otu' ca naca yugu' le zxön benu' dza ni'te, cate' ni' gula'cu'ë légaquië' luyú ni.

² Bulaga cazu' Li' bönachi yugu' yödzo izá'a,

en bucuásu' légaquië' luyú ni.

Busaca' zi'u bönachi izá'a na', en gurú'unu' léguequi.

³ Bití' gula'déli'në' xuz xtó'otu' luyú ni rá-casö quégaquië',

en bití' bulu'sölá la' cuíngacasë', pero ben cazu' Li' lë na' len yöl-la' huáca zxön quiu',

en lu yöl-la' zxön que le naca cazu', ate' bulú'u lahui ca nadxí'inu' légaquië'.

⁴ Naca cazu' Li' Dios quia', en Nu rinná be'e neda'.

Busölá bönachi quiu', yugu' zxf'ini xi'sóë' Jacob.

⁵ Uguntu' dxin yöl-la' huáca quiu', uxíc-jatu' nupa ta'dá'baga' netu', ate' tu' zóalen cazu' netu', ucúl-latu' nupa bití' ta'lé'e netu' dxi'a.

⁶ Bití' uzxöni ládxa'a uxiti' yaga quia', en bití' uzxöni ládxa'a guié tuchi' quia' para ilácalen neda',

⁷ tu' rusölá cazu' Li' netu' lu ná'agaca nupa bití' ta'lé'e netu' dxi'a, en ruzötju' nupa tu'df'i netu'.

⁸ Cú'utica'stu' Li' yöl-la' ba, en guítica'stu' Li': "Xclenu'."

⁹ Pero na'a nusán no'o netu', Dios, en bë'u lataj nu buxícja netu'.

Bítí'rö réajlenu' bönni' queëtu' röjáquië' gudil-la.

¹⁰ Benu' ga buzúnna'netu' lógaca nupa ta'díl-lalen netu',

ate' gula'güë' yugu' le nequi queëtu'.

¹¹ Bë'u lataj gulútië' ziantu' ca nu rúti-gacaba' bö'cu' zxila'.

Bësilásiu' netu' lád'agaca yödzo izá'a.

¹² Naca tsca bëti'u netu', en láti'do'os guzxi'u.

Bití' ca' buzi'u xibé tsca guzxi'u.

¹³ Bönachi yugu' dzaga yödzo queëtu' bila'lé'e lë na' benu' queëtu',

ate' tu'cá'ana netu' cá'asö, en tu'titaj netu'.

¹⁴ Benu' ga tu'didza' yudxi bönachi yugu' yödzo netu'.

Tu'tá íc'aguequi lu yöl-la' rucá'ana netu' cá'asö.

¹⁵ Yugu' dza rutuí'ida' ca raca queëtu', en rö'a böniga lu yöl-la' rutuí'i quia',

¹⁶ tu' riyönda' nupa tu'didza' yudxi neda', en tu'cá'ana neda' cá'asö,

nupa na' bití' ta'lé'e neda' dxi'a, en tu'df'i neda'.

¹⁷ Guca queëtu' yúgu'të lë ni sal-la' bití' nál-la ládxi'tu' Li',

en biti' nucá'anatu' didza' dzaga bénlenu' netu'.

¹⁸ Biti' ca' böaj ládxi'tu' ca réajlë'ëtu' Li', en biti' gudá'baga'tu' le bulu'ínu' netu' guntu'.

¹⁹ pero nusán na' casu' netu' ladaj nupa nácagaca ca yugu' böa' gui'a sínia', en nucá'anu' netu' ga chizóa tseajtsázatu' lataj chul-la.

²⁰ La'tu' gul-la ládxi'tu' Li', Dios queé'tu', o la'tu' guyéaj ládxi'tu' tu dios izá'a,

²¹ la' gáquibe'etënu' lë ni, Dios, tu' nöz quézinu' le rizá' ládxi'tu'.

²² Tu' néquitu' quiu' Li' zóatica'sö nu guti netu'.

Nactu' ca yugu' bö'cu' zxlá'do' lo nu guti légacaba'.

²³ ¡Bubán, Xan! ¿Bizx que rásitso' Li'?

¡Guyasa! ¡Biti' usán no'o netu' chadía chacanna!

²⁴ ¿Bizx que nucachi' lo' lotu' netu'?

¿Naru' nál-la ládxi'u ca raca queé'tu', en ca riguí' rizáca'tu'?

²⁵ Naguíngaquië' netu' luyú.

Nadínitu' lu bëchtö yu.

²⁶ ¡Gudáchi gácalenu' netu',

en lu yöl-la' dxi'i ladxi' quiu' busölá netu'!

45 Rizá' ládxa'a tu le naca dxi'a.

Ru'a didza' que le runë' bönni' rinná bë'ë.

Naca lúdxa'a ca le ruzúajlenë' bönni' nabé'ede'enë' ru'ë didza'.

² Nácateru' Li' lachi ca yúgu'të bönachi.

Nabé'ede'enu' ru'u didza'.

Que lë ni na' nunë' Dios gaca dxi'a quiu' chadía chacanna.

³ Bega' lë'u guië tuchi' quiu', bönni' nayépisë',

lu yöl-la' lachi quiu', en lu yöl-la' unná bë' quiu'.

⁴ Lu yöl-la' unná bë' quiu' idéli'nu' lu gudil-la,

ugunu' dxin le naca idütë li, en yöl-la' nözaj ladxi', en le naca tsahui'.

Yöl-la' huáca zxön quiu' gun ga ilá' lahui yugu' le zxóntërö.

⁵ Natúchi'gacada' yaga lahui tuchi' quiu'. Bönachi yugu' yödzö zi'tu' ta'dzó'ö lo', nupa na' ta'díl-lalen li'.

Yugu' yaga lahui tuchi' quiu' nachóza'-gaca ládxi'do'guequi.

⁶ ¡Chadía chacanna naguixju' ga rö'u rinná bë'u, Dios!

¡Ca naca le naca tsahui' rinná bé'enu' bönachi quiu'!

⁷ Nadxi'ínu' le naca tsahui', en biti' rilë'enu' dxi'a le biti' nácate.

Que lë ni na' Dios quiu' nabó cazë' li'.

Nachízirë' icja ládxi'do'o yöl-la' rudzeja ca le nápagaca ia'zica'rö bönachi.

⁸ Rilá' zxixi lari' nacu' len zi' mirra, en zi' áloe, en zi' casia.

Tunë' bönni' huil-la ga rudzëjanu' lu yu'u lidxu' zxön.

⁹ Yugu' nigula zxi'inigaquië' bönni' ta'nná bë'ë

nútsa'gacabi' bi'i nigula nacuá'abi' lidxu'.

Nigula quiu' rinná bé'enu' zuínu' cuitu' ibëla,

en nácunu le nazí'i biquitaj oro nazaca'.

¹⁰ Bë' ladxi' neda', nigúlado'.

Bë' ladxi' neda', en biyón xtídza'a.

Gul-la ladxi' bönachi yödzö quiu', en yugu' di'a dza quiu'.

¹¹ Ní'irö së ládxe'ë bönni' rinná bë'ë yöl-la' lachi quiu'.

Buzóa zxiibu' lahuë' tu' náquië' xanu'.

¹² Ní'irö bönachi yödzö Tiro ila'dxín lo' nuá'gaca le nazáca'da' le ilunna quiu'.

Yugu' bönni' ta'lë'enë' yöl-la' tsahui' ila'nábinë' li' bi unödzu' quégaquië'.

¹³ Yugu' bi'i nigula queë' bönni' rinná bë'ë zóagacabi' lidxe', en nácaterö-gacabi' lachi.

Lari' nácubi' nadíalén du oro.

¹⁴ Ila'ché'ë-bi' lahuë' bönni' rinná bë'ë, nácubi' lari' nazáca'da'.

Ila'dabi' yugu' bi'i nigula ra'bando' cúdzi'löbi',
ate' ila'ché'ë légacabi' lahuë' bönni' na' rinná bé'ë.

¹⁵ Lu yöl-la' rudzeja, en lu yöl-la' ruzi' xibé quégacabi' ila'dxinbi',
en ila'yázabi' yu'u lidxë' bönni' na' rinná bé'ë.

¹⁶ Ila'cuá'abi' bi'i bönni' quiu' uláz quégaquië' xuz xto'o.

Gunu' ga ila'nná bé'ëbi' idútë yödzölió.

¹⁷ Gunu' ga tsöjnégacatica'sö bönachi ca nacu' Li'.

Que lë ni na' yúgu'të bönachi ilé li' "Xclenu" yugu' dza si' zaca.

46 ¡Náquië' Dios Nu run chi'i rë'u, en Nu ruzóa rë'u tsutsu!

¡Zóatica'së' gácalenë' rë'u cate' bi raca queéru'!

² Que lë ni na' biti' gádxiru' sal-la' izxizi idútë yödzölió,

en ila'niti yugu' gu'fa lu nísado',

³ en sal-la' chasa idxía, en tsu'u bö nísado' na',

en ila'zxizi gu'ado' tu' nözi le raca.

⁴ Zoa tu yegu le run ga tu'dzeja nupa nacuá' ladzë' Dios,

ga na' rö'ö yudo' lá'ayi ga zoë' Dios nayépisëtëre'.

⁵ Zoa cazë' Dios yödzö na', le catu caz initi.

Cate' ni' soa itó yu gácalenë' nupa nacuá' ni'.

⁶ Tadxi ta'dzöbi bönachi yugu' yödzö,

ate' ta'bó' baguf'i nupa ta'nná bé',

tu' ru'ë didza' Dios, ate' riniti luyú ni.

⁷ Xanru' nayépisëtëre' zóalen cazë' rë'u.

Dios quégaca xzi'ini xi'sóë' Jacob rapa chi'ë rë'u.

⁸ Guli'dá ilé'eli' le nunë' Xanru'.

Buli'yú ca nusunítië' luyú ni.

⁹ Ruzóa dxíë' gudil-la rácagaca idútë yödzölió.

Ríguitsjë' yugu' uxiti' yaga,

en rusunítië' yugu' yaga lahui tuchi' que gudil-la.

Ruzégui'ë yugu' carreta que gudil-la tu lu guí' zxon.

¹⁰ Rnnë': "Guli'sóa dxisö, ate' guéquibe'eli' naca caza' Dios.

Nayépisëtëra' yugu' lu yödzö, en lu idútë yödzölió."

¹¹ Xanru' nayépisëtëre' zóalen cazë' rë'u.

Dios quégaca xzi'ini xi'sóë' Jacob rapa chi'ë rë'u.

47 ¡Lu yöl-la' rudzeja queéli' guli'capa' ná'ali', bönachi yúgu'të yödzö!

¡Guli'cu'ë yöl-la' ba Dios, len yugu' le rúllalenli'!

² Ral-la' gunru' bal Xanru' Dios nayépisëtëre'.

Náquië' Nu rinná bé' idútë yödzölió.

³ Benë' ga bidéli'ru' yugu' lu bönachi izá'a.

Benë' ga rinná be'eru' yugu' yödzö.

⁴ Guró cazë' luyú ga ni nuzóë' rë'u.

Naca tu luyú lachi quégaca xzi'ini xi'sóë' Jacob, nupa na' nadxi' quézinë'.

⁵ Len yöl-la' ba zxon ribenë' Dios ga rö'ë rinná bé'ë.

Le zían le tu'cödxë' cate' ribenë' Xanru' ni'.

⁶ ¡Guli'gul-la yöl-la' ba queë' Dios! ¡Guli'gul-la!

¡Guli'gul-la yöl-la' ba queë' Bönni' rinná bé'enë' rë'u! ¡Guli'gul-la!

⁷ ¡Rinná bé'ë Dios idútë yödzölió ni!

¡Idú ládxi'li' guli'gul-la yöl-la' ba queë'!

⁸ ¡Zoa cazë' Dios lataj lá'ayi queë' ga rö'ë rinná bé'ë!

¡Rinná bé'enë' bönachi yúgu'të yödzö!

⁹ Tu'dubi nupa ta'nná be'e yugu' yödzö tsözxón len bönachi queë' Dios queë' Abraham.

¹⁰ ¡Nequi queë' Dios yöl-la' zxon quégaca yúgu'të yödzö nacuá' yödzölió!

¡Nayépisëtëre' Lë'!

48 Nayépisëtëre' Xanru', ate' run bayudxi cú'uru'-në' yöl-la' ba idú ládxi'ru'

ga zoa lu yödzo queë' Dios queëru' le zoa lu gu'a lá'ayi queë'.

²Lachi, en sibi naca gu'a lá'ayi na', ate' raza ládxi'gaca bönachi idútë yödzölió ca naca.

Caní naca gu'a Sión le rö'ö tsölá'alö ga za' bö' ziaga.

Lu yödzö na' dë ga zoa Bönni' Unná Bë' nayépisë'.

³Rulu'ë lahui Dios sóaru' tsutsu cuitë' Lë' ga zoa lu yu'u lidxë'.

⁴Gula'dá'baga' nupa ta'nná bë' lu yu ni, en gula'bígui'ë ra' yödzö lá'ayi na'.

⁵Cate' bila'lé'enë' yödzö na' bulu'báininë'.

Gula'bö'ë böniga, en la' bulu'zxúnnajtë'.

⁶Ra' yödzö na' gula'zxízië'.

Gula'zaca' zi'ë ca raza queënu nigula chizóa uzóanu-bi' bí'ido'.

⁷Risól-lë'ë Dios tu bö' budunu', le rusuniti yugu' barco zxön que yödzö Tarsis.

⁸Biyönru' ca nápagaca le zxön benë' Dios,

ate' na'a rilé'e quéziru' le runë',

lu yödzö lá'ayi queë' Dios quégaca ni'a në'ë guizxi yu,

en náquië' ca' Dios queëru'.

Tsaz naguixjé' yödzö na'.

⁹Ga zoa lu yudo' quiu', Dios, röjnetu' ca naca yöl-la' dxi'i ladxi' quiu'.

¹⁰Ca nayépisëtëro Lo', Dios, ca' ta'gú'u Li' yöl-la' ba bönachi idútë yödzölió.

Ca naca le naca tsahui' rinná bë'u.

¹¹Ulu'dzeja bönachi nacua' yödzö Sión. Ulu'zfi'nu xibé nigula xfi'ini xi'sóë' Judá tu' ruchi'a rusöróu' netu' ca naca le naca tsahui'.

¹²Guli'dá idú gásibi'ilö ga dë yödzö Sión, en buli'laba yugu' yu'u sibi tun chi'i yödzö na'.

¹³Buli'yú ca naca zö'ö run chi'i yödzö na',

en buli'yú ca' le nuzóagaca le tsutsu,

para gaca quíxjöi'ili' xfi'ini xi'sóali' ca náquië' Dios zxön ni.

¹⁴Tsaz náquië' Dios queëru', na'a dza, en dza si' zaca.

Ulu'inë' rë'u nöza tödi gátiru'.

49 Guli'yöni lë ni, lib'ili', bönachi yúgu'të yödzö.

Buli'zé nágali', lib'ili', zóali' idútë yödzölió.

²Lib'ili', nayépsëtëroli', en lib'ili', nácali' cá'asö.

Lib'ili', dë yöl-la' tsahui' queéli', en lib'ili', nácali' yechi'.

³Tsöjsá ládxa'a ca naca le nápagaca yöl-la' réajni',

en gu'a didza' le nápagaca yöl-la' raza yenni'.

⁴Güfi ládxa'a ca naca tu le rucudzu' didza',

en quíxjö'a ca nápagaca tsanni quinnia' lë'e bihuël-la.

⁵Biti' bi rádxida' cate' ridxín bi raza quia',

cate' ta'gu'ë neda' lé'ajlö bönni' tuá' dö' biti' ta'lé'enë' neda' dxi'a.

⁶Tu'zxöni ládxe'ë bönni' na' yöl-la' tsahui' quégaquië',

en tun ba zxön cuíngaquië' ca nápagaca le dë quégaquië'.

⁷Biti' gaca huóá'uë' la' cuinsë' nitúë' bönni' na'.

Biti' gaca bi unödzjé' queë' Dios le gun ga usölé' lë',

⁸tu' naca zxöntëro le huóá'u yöl-la' na'bán que nu bönni',

ate' catu caz gaca nu bönni' quizxjé' ca naca,

⁹para idéli'në' sóatica'së' ibanë',

en cabí tsázië' yeru ba ga yú'ugaquië' bönni' nati.

¹⁰Rilé'enë' tatië' ca' bönni' ta'yéajni'inë', en ta'nitië' tuz ca tati nupa biti' bi nózi-

gaca, en nupa biti' ta'yéajni'i,

ate' tu'cá'anë' yöl-la' tsahui' quégaquië' le ulu'zi' xibé bönachi yúbölö.

11 Téquinë' ila'cuá'tica'sö lédxigaquië'
bönni' na',
ate' tsaz ila'cu'ë ni',
ate' ta'gu'ë lágaca xiyúgaquië' ca naca la'
lágacasë'.

12 Pero yöl-la' ba zxön napë' bönni' na'
biti' gun ga sóatica'së'.

Gati cazë' ca tátiba' böa' guixi'.

13 Cani' naca le gaca quégaquië' bönni'
ni' tu'zxöni lédxë'ë yöl-la' tsahui'
quégaquië',

enca' quégaca xzi'ini xi'sóagaquië',
yugu' bi'i na' ta'yaza lédxi'gacabi' didza'
gulu'ë xúzgacabi' na'.

14 Ilátië' ca tátiba' bö'cu' zxila',
ate' yöl-la' guti gaca quégaquië' ca tu nu
uyú bö'cu' zxila'.

Yugu' bönni' tsahui' ila'nná bé'enë' lé-
gaquië' cate' itó yu zila.

Ila'niti le guta' quégaquië', ate' ila'cuá'ti-
ca'së' lataj chul-la ga dzö'ö nupa
nátigaca.

15 Huöá'u cazë' Dios yöl-la' na'bán quia'
lu yöl-la' guti,
tu' ichë'ë neda' ga tsöjsóalena' Lë'.

16 Biti' gádxinu' cate' idéli'në' nu bönni'
yöl-la' tsahui' zxön,

en cate' xön yöl-la' lachi que yu'u lidxë',

17 tu' cabí bi u'ë cate' gátië',
en biti' tséajlen lë' yöl-la' lachi que le
guta' queë'.

18 Sal-la' cate' ni' zoë' nabanë' buzí xibé
bö' naca cazë',

ate' gula'gú'u bönachi lë' yöl-la' ba cate'
bidéli'në' yöl-la' tsahui' na'.

19 Tsázië' ga na' dzö'ë xuz xtá'ahuë',
en bíti'rö ilé'enë' bení'.

20 Náquië' bönni' napë' yöl-la' zxön, pero
riyádzjanë' yöl-la' réajni'i,
ca böa' guixi' tati cázaba'.

50 Ru'ë didza' Xanru' Dios
nayépisëtëre'.

Nutubë' dëro nupa nacua' yödzölió ga
naguéla'të ga rilén gubidza ga ridx-
intë ga ribía.

2 Lu yödzö Sión rigu'ë Dios bení'.

Napa yödzö na' yöl-la' lachi idú.

3 Zë'ë Dios queëru', en biti' soë' dxisö.

Tsöjnöru lahuë' tu guí' zxön,
ate' tsecja tu bö' budunu' idú gasib'ilë'.

4 Ulidzë' lúzxiba xitsá', enca' luyú
cate' uchi'a usöröë' quégaca bönachi
queë'.

5 Rnnë' Dios: "Guli'túbi nupa néquigue-
qui quez quia',

nupa na' gulunlen neda' didza' dzaga,
en bulu'lalaj rön lahua' le ben tsutsu
didza' dzaga na'."

6 Naca bë' náquië' tsahui' Dios lúzxiba
xitsá',

tu' uchi'a usöröë' Dios bönachi queë'.

7 Rnnë': "Buli'zë nágali', bönachi quia',
ate' gu'a didza'.

Buli'zë nágali', bönachi Israel, ate'
uzégua' lib'i'li' didza'.

Naca caza' Dios.

Ön, naca' Dios queéli'.

8 Biti' uzégua' lib'i'li' didza' ca naca le
rúnnali' quia',

en calëga ca nácagacaba' böa' bédxi
ruzégui'li'-ba' lahua'.

9 Biti' riquinda'-ba' bédxi queéli',
en calëga chivo biguiú' nacua'aba'
queéli',

10 tu' néquigacaba' quia' yúgu'tëba' böa'
guixi',

enca' böa'-bédxi nacua'aba' lu gayuá'
gayuá' guf'ado'.

11 Néquigacaba' ca' quia' yúgu'tëba' böa'
zoa xíligacaba',

enca' yúgu'të le zoa nabán la' guixi'.

12 La'tu' riduna' biti' guía' ca' lib'i'li',
tu' nequi quia' yödzölió, enca' yúgu'të le
nacua' ni'.

13 ¿Naru' gágutsa' xipéla'gacaba' bédxi,
o guí'jatsa' xichóngacaba' chivo?"

14 Le ral-la' unódzjali' queë' Dios naca
yöl-la' rë Lë': "Xclenu'"

ate' ral-la' gunli' lahuë' Dios
nayépisëtëre' ca naca le guzxi' lu
ná'ali' gunli'.

¹⁵ Rnnë' ca': "Ral-la' ulídzali' neda' cate' bi gaca queé'li'.

Gácalen caza' libí'ili', ate' gunli' neda' bal."

¹⁶ Dios rë' bönni' huí'a' dö', rnnë':

"¿Bizx que ru'u didza' ca nácgaca xibá naguixja'?

¿Bizx que ru'u didza' ca naca didza' dzaga núnlena' bönachi?

¹⁷ Biti' runnu' lataj usédida' li',

pero rucá'anú' cá'asó didza' ruá'a.

¹⁸ Cate' rilé'enu'-në' bönni' gubán rá-calenu' lë',

en runu' tsözxón nupa ta'guitsaj xibá que yöl-la' nutsaga na'.

¹⁹ Zóatica'su' gu'u didza' xihui',

en ruí'tica'su' didza' biti' nácatë.

²⁰ Zóatica'su' uzéguii'-në' böchi' cazu',

en rudidza' yudxu' böchi'-zan cazu'.

²¹ Caní' benu', ate' biti' bi gunní'a',

ate' gúquinu' naca' ca naca cazu' li',

pero na'a uzéguia' li' didza', en ulu'a lahui le nunu'.

²² Buli'zë' nágali' didza' ni, núlöli' ruzóali' neda' tsölá'alö.

Channö cabí, usunítia' libí'ili', ate' cuntú nu gaca usölá libí'ili'.

²³ Nu rë' neda': Xclenu', runna quia' le run neda' bal,

ate' nu run ca rnna xtídz'a, usölá caza' nu na'."

51 Dios quia', buzá' ladxi' quia' tsca naca yöl-la' dxi'i ladxi' zxön quiu',

en tsca naca le zían le ruzá' ládxi'u quia', bugúa yugu' le gudá'baga'a lo' Li'.

² Buguíbitica'sö neda' tsca naca dö' bi'a.

Buchi'a neda' lu dul-la' nuna'.

³ Nöz quézida' le gudá'baga'a, en röjnétiqui'sida' yugu' dul-la' nuna'.

⁴ Lo' Li' cazu' bena' dul-la',

en lo' Li' ca' bi'a dö'.

Naca bë' nacu' tsahui' cate' ru'u didza', en idú dxi'a, en tsahui' nacu' cate' ruchí'a rusöröu' queétu'.

⁵ Buyútsöca', nabága'a dö' cate' gusi lotë gulja',

en lu dul-la' zoa caza' cate' buzóanu xiná'a neda'.

⁶ Ré'ënu' soa le naca idútë li icja ládxi'do'otu'.

Guchiza icja ládxi'da'ahua' yöl-la' réajni'i.

⁷ Buchi'a neda' len le ruchí'aninu', ate' gaca' dxi'a.

Buguibi neda', ate' huóaca' zxíla'do'os.

⁸ Ben ga yönda' le naché' yöl-la' ruzí' xibé, en yöl-la' rudzeja,

para huóaca ládxa'a lu le raca quia' tu' benu' ga réquibe'eda' nabága'a dul-la'.

⁹ Biti' uyú' yugu' dul-la' nuna',

en busulu yúgu'të le naca dö' nabága'a.

¹⁰ Dios quia', bun dxi'a ládxi'da'ahua',

en guchiza neda' tu bö' cubi le nuzú' tsutsu.

¹¹ Biti' ucuftu' neda' ga zoa' lo' Li',

en biti' ugú' Dios Bö' Lá'ayi quiu' Nu zóalen neda'.

¹² Bunna quia' yöl-la' rudzeja que yöl-la' rusölá quiu',

en ben ga guna' ca rnna xtídz'u idú ládxa'a.

¹³ Ní'irö usédida' nupa ta'guitsaj xibá quiu' ca nácgaca le ré'ënu' ilúngaca,

ate' yugu' bönni' dul-la' ulu'huécja quiu'.

¹⁴ Dios quia', benna neda' lataj cabí ibá-ga'a xiguia'.

Naca cazu' Dios, Nu rusölá neda'.

Lu yöl-la' rudzeja quia' gul-la' ca naca cazu' tsahui'.

¹⁵ Xana' Dios, gusalaj ruá'a,

ate' usiyönda' bönachi yöl-la' ba quiu'.

¹⁶ La'tu' raza ládxi'u-ba' böa'-bëdxi gútitu'-ba' lo', la' gúntea' caní.

Biti' raza ládxi'u-ba' nu böa' uzégui'tu'-ba' lo'.

¹⁷ Le ré'ënë' Dios le naca ca tu le cú'uru' lahuë'

naca bö' naca cáziru' le nõtaj nagula
ladxi'.

Dios quia', biti' ucá'anu' cá'asö
ládxi'do'otu'

le ruhu'ini ladxi', en le naca nõxaj ladxi'.

¹⁸ Lu yöl-la' ruzá' ladxi' quiu' ben le naca
dxi'a

quégaca bönachi yödzo Sión.

Buchisa zö'ö le run chí'i yödzo Jerusalén.

¹⁹ Nf'irö tsaza ládxi'u yugu' le cú'utu' lo'
le naca idú dxi'a,

yugu' böa' guíxi'do' gútitu'-ba' lo',

en yugu' böa'-bédxido' uzégui'tu'-ba' lo'.

Nf'irö ilútié'-ba' yugu' bédxi biguiú'do',

en ila'gu'ë-ba' lu bucugu quiu'.

52 ¿Bizx que run ba zxon cuinu' ni'a
que dö' ru'u, bönni' nál-la?

Zóatica'sö yöl-la' dxi'i ladxi' queé' Dios.

² Len lúdxu'u rúnleni' luzó'o didza' para
usunítu' bönachi.

Naca lúdxu'u, bönni' rizí' yé', ca tu guíé
tuchi'.

³ Nadxi'irönu' le naca dö' ca nadxi'inu' le
naca dxi'a,

en nadxi'irönu' le cabí nácaté ca
nadxi'inu' le naca idúté li.

⁴ Nadxi'inu' yúgu'té didza' tun ditaj
bönachi,

li' na', bönni' rizí' yé'ë.

⁵ Tsaz uzõtaj cazé' Dios li'.

Söné' li', en ubéajé' li' lu yu'u lidxu',

en ucuíté' li' ga nacua' nupa nabángaca.

⁶ Yugu' bönni' tsahui' ila'lé'ené' lè ni, en
iládxiné' Dios.

Ulu'zixdxe' queé' bönni' na' rizí' yé'ë,
ila'né':

⁷ "¡Buli'yútsöca! Bönni' ni biti' gú'unné'
uzxöni ládxe'ë Dios,

pero buzxöni ládxe'ë yöl-la' tsahui'
queé',

en le zían le guzé ládxe'ë le cabí bi
nazaca'."

⁸ Naca' neda' ca tu yaga olivo ya'a le rö'
ra' yu'u lidxe' Dios.

Uzxöni ládxa'a yöl-la' dxi'i ladxi' queé'
Dios yugu' iz si' zaca.

⁹ Guíética'sa' Li': "Xclenu'" tu' ben casu'
Li' ga naca caní,

ate' guna' löza Lo' le naca dxi'a lógaca
nupa néquiguequi quez quiu'.

53 Ta'zá' ládxe'ë bönni' canóz,
ta'nné':

"Biti' ca' zoé' Dios."

Nácagaquié' xihui' bönni' caní, en nún-
gaquié' le nácatèro xihui'.

Cuntu nu bönni' zoé' runé' le naca dxi'a.

² Ga na' zoé' Dios yehua' yubá ruyúé'
gátitès,

en rilé'ené' bönachi nacua' idúté
yödzoilió,

para inóziné' channö zoa nu réajni',

o channö zoé' nu bönni' ru'fi ládxe'ë
Dios.

³ Yúgu'té bönachi söjáquié' ga yúbölö.

Yúgu'té' nácagaquié' xihui'.

Cuntu nu zoa run le naca dxi'a, nitúé'
bönni'.

⁴ ¿Naru' cabí nápagaquié' yöl-la' réajni'i
bönni' na' tu'é dö'?

Tu'sunítu' bönachi quia' ca tu nu ragu
yöta,

en biti' ca' tu'lidzé' neda'.

⁵ Tadxi ta'dzóbíné' bönni' caní, en biti' bi
nuna' quégaquié'.

Caní raca tu' rusunítu' Dios caz nupa
ta'díl-lalen lib'ili'.

Gunli' ga ulu'tu'íné' tu' chigurú'uné'
Dios légaquié'.

⁶ Raca ládxi'ru' irúaj Sión Nu usölá bö-
nachi Israel.

Cate' uchisa cazé' Dios bönachi queé'
nadzúngaca,

ulu'dzeja xzí'ini xí'sóé' Jacob, en ulu'zí'
xibé bönachi Israel.

54 Busölá neda', Dios, para gaca yöl-
la' ba que Lo'.

Len yöl-la' huáca quiu' guléaj neda'
tsahui'.

² Ruzé' nagu' le rulidza' Li', Dios.

Ruzé' nagu' didza' ru'á'a.

³ Ta'díl-lalen bönni' zítu' neda',

tu' té'éné' bönni' zidzaj ilútié' neda'.

Biti' ca' tádxinē' Dios.

⁴ Buli'yútsöca', naca cazē' Dios Nu rá-calen neda'.

Ruzóē' tsutsu Xanru' yöl-la' na'bán quia'.

⁵ Ubi'ē' quégaca nupa ta'díl-lalen neda' le usuniti léguequi.

Tu' runu' ca rna xtídzu'u, Dios, busuniti léguequi.

⁶ Idú ládxa'a gútia'-ba' böa'-bēdxi lo'.

Guía' Li': "Xclenu'" Xan, tu' naca dxi'a Lo'.

⁷ Busölá cazu' Li' neda' lu yugu' le guca quia',

ate' rilé'eda' zeaj nanítitica'sö nupa ta'díl-lalen neda'.

55 Ruzé' nagu' le rulidza' Li', Dios, en bití' tá'bagu' le rinábida' Li'.

² Ruzé' nagu' neda', en rubí'u didza'.

Rulidza yúdxida' Li', en rö'a böniga

³ ni'a que chí'ē' bönni' bití' rilé'enē' neda' dxi'a,

en tu' tu'tsá' neda' nupa tuá' dö', en tu'saca' zí' neda',

en lu yöl-la' rilé' quéguequi ta'bía no neda'.

⁴ Réqui zí' ládxi'da'ahua',

ate' yöl-la' radxi que yöl-la' guti röjtsaza ládxi'da'ahua'.

⁵ Chigula'yaza yöl-la' radxi, en yöl-la' rizxizi neda',

ate' nabaga' yöl-la' radxi ridzöbi neda'.

⁶ Gunnía': "Gaca ládxa'a gata' quia' xílaba' gu'dödo',

para gaca töda' lu bö'ös, en idxina' tu lataj ga gaca uzí' ládxa'a.

⁷ Raca ládxa'a tseja' zí'tu',

en tsöjsóa' la' guixi' ga dē' lataj.

⁸ Uyija' carelö tu lataj ga tsöjsóa' tsutsu, para cabí' bi gun quia' le naca ca bö' budunu'."

⁹ Busuniti légaquiē', Xan, en buxí' ruá'agaquiē',

tu' bilé'eda' ta'dil-lē', en tu'tsatsē' lu yödzo.

¹⁰ Rēla, en te dza ta'dödē' nöza lu yödzo.

Tu'ē' dö', en tunē' le xihui' idú gásibi'ilö yödzo.

¹¹ Tu'sunítie' le nacua' ni'.

Tu'saca' zí'ē' bönachi, en ta'zí' yē'ē' la' nöza que yödz.

¹² Calēga bönni' bití' rilé'enē' neda' dxi'a nu rudidza' yudxi neda',

tu' huáca guá' ilena' le gunē',

en calēga bönni' rudfínē' neda' nu ridfí-lalen neda',

tu' huáca ucachi' cuina' lahuē',

¹³ pero nacu' lí', tu bönni' ca neda'.

Nacu' böchi' luzá'a, en nacu' tuz len neda'.

¹⁴ Lu yöl-la' dxi'i ladxí' queéru' gúcaru' tuz.

Ladaj bönachi zían gudarú', en bidxinru' lidxē' Dios.

¹⁵ Xana' Dios, bē' yöl-la' guti lataj idxín quégaquiē' bagáchi'sö.

Ben ga tsöjtsázagaquiē' nabángaquiē' lataj chul-la ga nacua' nupa nátigaca,

tu' yu'u le xihui' lídxigaquiē', en lu yu'u ca' gapa tu'dubē'.

¹⁶ Pero neda' ulidza'-nē' Dios,

ate' usólá cazē' Xanru' neda'.

¹⁷ Chí'i dzó'ölö, en zílado', en gatsaj dza ulidza yúdxida' Lē',

en inné' ládxa'a lahuē', ate' yön cazē' chí'a.

¹⁸ Huóá'uē' yöl-la' na'bán quia' lu na' nupa ta'díl-lalen neda'

en uzóē' neda' lataj ga cöza' dxi'a tsáhuí'do',

tu' nayánda' nupa ta'díl-lalen neda'.

¹⁹ Huayón quézinē' Dios, en ubi'ē' quégaquiē'.

Rö'ē' rinná bē'tica'sē' Lē'.

Caní gunē' Dios tu' cabí' tu'sanē' ca tunē', en bití' tádxinē' Dios.

²⁰ Bönni' ru'ē' dö' ribía nahuē' nu riböza dxi'a tsáhuí'do',

en rucá'anē' cá'asö didza' dzaga nunē'.

²¹ Bē'ē' didza' yúlado',

pero yu'u icja ládxi'da'ahuë' yöl-la'
ridzá'a.

Bë'ë didza' zxíxido',

pero didza' na' bë'ë gulaca ca gufé tuchi'.

²² Gulú'u le nabágu'u lu në'ë Xanru', ate'
utipa cazë' ládxi'u.

Biti' gu'ë lataj iguínna' tsaz nu naca
tsahui'.

²³ Chú'unë' bönni' tu'ë dö' na' lataj chul-
la

ga nacuá' nupa nátigaca ga na'
ila'nftigaquië'.

Biti' ila'cuá' gatsaj tsca ral-la' ila'cu'ë
nabángaquië' bönni' tutië' bönachi,
en bönni' ta'z'f' yë'ë.

Pero neda' uzxöni ládxa'a Li'.

56 Buéchi' ladxí' neda', Dios, tu'
ta'dá'baga' bönachi neda'.

Yugu' dza nupa tu'df'i neda' ta'bía no
neda'.

² Yugu' dza nupa biti' ta'lé'e neda' dxi'a
tuá' dö' quia'.

Zián nupa ta'díl-lalen neda' lu yöl-la' run
ba zxön cuínguequi.

³ Cate' radxi ridzóbida', uzxöni ládxa'a
Xanru'.

⁴ Ruzxöni ládxa'a-në' Dios, en rigu'a yöl-
la' ba xtídzë'ë.

Ruzxöni ládxa'a-në', en biti' bi gádxida'.

¿Bizxi caz gaca ilún quia' bönachi?

⁵ Yugu' dza tun nigui neda' nupa biti'
ta'lé'e neda' dxi'a.

Ta'zá' ládxi'tica'sö nacxi iluá' dö' quia'.

⁶ Tu'dubë' ga nagáchi'sö, en tu'yúlanë'
yúgu'të le runa',

para gata' quégaquië' lataj ilútië' neda'.

⁷ Bubi'ë quégaquië', Dios, ca naca dö'
tu'ë,

en lu yöl-la' rilé quiu' busuniti légaquië'.

⁸ Nöz quézinu' Li' ca rö'a böniga.

Nurixu' Li' nisa ribödxí quia'.

¿Naru' cabí nuzú' léguequi lu guichi
quiu'?

⁹ Cate' ulidza' Li', la' dza ná'asö
ulu'huéjca gúz cúdzu'lö nupa tu'df'i
neda'.

Nöz quézida' rácalen cazu' neda', Dios.

¹⁰ Ruzxöni ládxa'a-në' Dios, en rigu'a
yöl-la' ba xtídzë'ë.

Ruzxöni ládxa'a-në' Xanru', en rigu'a yöl-
la' ba xtídzë'ë.

¹¹ Ruzxöni ládxa'a-në', en biti' bi
gádxida'.

¿Bizxi caz gaca ilún bönachi quia'?

¹² ¿Gonna' quiu', Dios yugu' le guzxf' lu
na'a!

¿Cu'a Li' yöl-la' ba!

¹³ Busölö' neda' lu yöl-la' guti, en nuzú'
neda' tsutsu.

Ridá caza' lo' Li', Xantu' Dios, lu bení'
ru'u quégaca nupa nabángaca.

57 ¿Buéchi' ladxí' neda', Dios!

¿Buéchi' ladxí' neda' tu' ruzxöni
ládxa'a Li' gun chí'u neda'!

Guxóa no'o neda' ca runba' böra run
chí'igacaba' bórado' zcan xílaba',

ga idxinrö tödi bönadxi raca quia'.

² Rulidza'-në' Dios nayépisëtë'rë'.

Náquië' Dios Nu run ga raca dxi'a quia'.

³ Ga zoa cazë' yehua' yubá ubi'ë didza',
en usölé' neda'.

Usölé' neda' lu na' nu ribía no neda'.

Lu yöl-la' dxi'i ladxí' queë', en yöl-la' idú
ladxí' queë' gácalenë' neda'.

⁴ Naca quia' tsca zoa' lád'jagacaba' bëdxí
guixi'.

Yugu' bönni' zidzaj nagú'ugaquië' neda'
lé'ajlö.

Nácagaca láyi'gaquië' ca yugu' yaga
tuchi' que gudil-la,

ate' nácagaca lúdxí'gaquië' ca yugu' gufé
tuchi'.

⁵ Dios quia', buluf'i lahui lúxziba yöl-la'
zxön quiu',

en yödzülió ni buluf'i lahui yöl-la' bení'
quiu'.

⁶ Nupa tu'df'i neda' nucáchi'gaca du yalaj
le sön neda'.

Rudú ládxa'a tu' rö'a böniga.

Gula'chó'önë' yeru ga tsöjbixa' neda',
pero gula'bixë' la' légacasë' lu yeru na'.

⁷ ¿Chinabá'a quia', Dios!

¡Chinabá'a quia'!

¡Gul-la' quiu', en cu'a Li' yöl-la' ba!

⁸ ¡Bubán, bö' naca caza'!

¡Guli'bán arpa, en bihuël-la!

¡Zíladó' ubana',

⁹ en gul-la' quiu' Li', Xan, ladaj bönachi yugu' yödzö!

¡Cu'a Li' yöl-la' ba lógaca yúgu'të bönachi!

¹⁰ Zxóntëro naca yöl-la' ruhuéchi' ladxí' quiu', le ridxintë yehua' yubá, ate' ridxintë yöl-la' idú ladxí' quiu' lúzx-iba xitsá'.

¹¹ Dios quia', buluf'i lahui lúzxiba yöl-la' zxön quiu', en yödzölió ni buluf'i lahui yöl-la' bení' quiu'.

58 ¿Naru' ru'ili' didza' idútë li, lib'ili' na', rinná bé'ëli'?

¿Naru' ruchi'a rusöröli' ca naca le naca tsahui'?

² ¡Biti' ca'! Rizá' ladxí'li' yugu' le xihui', en rusaca' z'ili' bönachi len yugu' le cabí' nácatë runli'.

³ Ta'dódi tsölá'alö nupa tuá' dö' ga gudéla'të gúl'jagaca.

Ta'z'í' yë' ga gudéla'të bulu'cuá'anu xiná'aguequi léguequi.

⁴ Yu'u ru'iguequi le naché' yöl-la' guti ca le dxía láyi'gacaba' bëla sínia'.

Nácagaca ca tuba' bëla sínia' nacódzuba',

⁵ bëla na' bití' riyönba' chí'ë bönni' gudzá',

o le rul-lë' bönni' runë' gudzá'.

⁶ ¡Dios quia'! ¡Buzxuzxaj láyi'gaquië'!

¡Guladzu' yugu' layi' tuchi' quégaquië' nácagaca ca layi' tuchi' quégacaba' bëdxi guixi'!

⁷ ¡Ben ga ila'nítië' ca raca que nisa yegu gubó'o cate' ruhu'í!

¡Ben ga ila'cuádië' ca raca que guixi' rö'ö la' nöza!

⁸ ¡Ben ga ila'nítië' ca yugu' bóruhuinna tu'unaba' lu gubidza,

o ca tubi' bí'ido' nuzóanu-bi' nigula z'í'alö ca ral-la' gál'jabi', en chinátitëbi'!

⁹ Zí'alö ca gaca utsë'e yusu' tu gu' zxön, ugúë' Dios légaquië' lu yöl-la' ridzá'a queë',

bönni' nabángaquië', en bönni' chizóa ilátië'.

¹⁰ Ulu'dzeja nupa nácagaca tsahui' cate' ila'lë'e

uzí' lëbë' Dios bönni' tu'ë dö' na'.

Ulu'zxinë' len ná'agaquië' xichóngaca nupa na' tuá' dö'.

¹¹ Ila'nná bönachi: "Le nácatë zoa le rubi'ë Dios quégaca nupa nácagaca tsahui'.

Le nácatë zoë' Dios Nu ruchi'a rusörö quégaca nupa nacué' yödzölió."

59 Busölá neda', Dios, lu ná'agaca nupa ta'zóa regu' neda'.

Buzóa neda' tsutsu ga bití' gaca ila'dxín nupa ta'díl-lalen neda'.

² Busölá neda' lu ná'agaca nupa tuá' dö', en guléaj neda' lu ná'agaca nupa tuti bönachi.

³ Buyútsöca', ta'bó' nísie' neda' para ilútië' neda'.

Ta'zóa régu'ë bönni' zidzaj neda', calëga tu' gudá'baga'a légaquië', o tu' ben z'í'a légaquië', Xan,

⁴ en calëga tu' bëtia' bönachi, pero ta'zë'ë carelö para tíl-lalen' neda'.

Gudá gácalenu' neda', ate' ilé'enu' naca caní.

⁵ Xantu' Dios quégaca ni'a no'o guizxi yu, en Dios quégaca bönachi Israel, gudá dujenu' xiguia' bönachi yúgu'të yödzö.

Biti' uzá' ladxu'u quégaca nupa tuá' dö' lu yöl-la' rizí' yë' quéguequi.

⁶ Tu'dxinë' chí'i dzó'ölö, ta'bödxi yeché'ë ca runba' bö'cu' ragu yéchi'ba' beo', ate' ta'dödë' idú gásibi'ilö yödzö.

⁷ Buyútsöca', didza' tu'ë nácagaca ca le rébigaquië'.

Nácagaca didza' tu'ë ca yugu' guíë tuchi'. Ta'nnë: "¿Nuzxi caz yöni'?"

⁸Ruzxidxu' ca naca le tunë', Xan.
Rutitju' ca naca le tun bönachi yúgu'të
yödzo.

⁹Tu' nal-la cazu' Li' guna' löza Li'.
Nacu' Dios Nu run chi'i neda'.

¹⁰Tu' náquië' Dios quia' dxi'i ladxi', dut-
ságuië' neda'.

Uxícja cazë' Dios nupa ta'díl-lalen neda'.

¹¹Biti' gútiu' nupa na' tuá' dö' para cabí
ilal-la ladxi' bönachi ladza'.

Lu yöl-la' huáca zxön quiu' bésilasi nupa
tuá' dö', en buzötaj léguequi luyú.

Naca cazu' Xantu', Nu run chi'i netu'.

¹²Ben ga sön légaquië' yöl-la' run ba
zxön cúngaquië'

tu' nözi dul-la' tunë' ca tu'isë' didza',
enca' tu' tu'dxië' dö' luzá'agaquië', en
ta'z'f' yë'ë.

¹³Lu yöl-la' rilé quiu' busuniti légaquië'.
Busuniti légaquië' tsaz para cabí
ila'cuá'arë',

en para iléquibe'e bönachi Dios caz rinná
bé'enë' zxf'ini xi'sóë' Jacob,
ga ridxintë idútë yödzölió.

¹⁴Tu'dxinë' chi'i dzó'ölö, ta'bödxi
yeché'ë ca runba' bö'cu' ragu
yéchi'ba' beo',

ate' ta'dödë' idú gásibi'ilö yödzo.

¹⁵Ta'dé' ta'guiljé' le ilahuë',

ate' ta'bödxi'ë channö cabí ulu'huölaj
ulu'dzé'enë'.

¹⁶Gul-la' neda' ca naca yöl-la' huáca
zxön quiu'.

Yugu' zila gul-la' lu yöl-la' rudzeja quia'
ca naca yöl-la' dxi'i ladxi' quiu',

tu' naca cazu' Li' Nu run chi'i neda',
en nacu' Nu rácalen neda' cate' bi raca
quia'.

¹⁷¿Naca cazu' Li' Nu rutipa ládxa'a!
¿Gul-la' quiu' yöl-la' ba,

tu' nacu' Li' Nu run chi'i neda', Dios, en
Nu nadxf'i neda'!

60 Nusán no'o netu', Dios, en
nuzötju' netu'.

Buécja queé'tu' na'a, en gúcalen netu'.

²Ben cazu' ga gudödi budó' zxu', en
guyalaj luyú.

Bun luyú ni tu' chizóa iguínna.

³Sizxöni busaca' zi'u bönachi quiu'.

Le guca queé'tu' guca tsa bugui'ju' netu'
xis uva nal-la

le ben ga yöjchégu'tu' ca tu bönni'
nazúdxinë'.

⁴Bunödzu' quégaca nupa tadxi Li' tu
lari' ulu'chisa,

le sójácalen cate' bi raca quéguequi,

⁵para ulu'lágaca nupa na' nadxf'i
quézínu'.

Len yöl-la' huáca zxön quiu' busölá netu',
en bub'fi didza' cate' rulidztu' Li'.

⁶Lu le naca lá'ayi queë' bë'ë didza' Dios,
gunné':

“Uzi'a xibé, en quísia' xiyúgaca bönachi
Siquem, en urixa' luyú dë cuita yegu
Sucot.

⁷Nequi quia' xiyúgaca bönachi Galaad,
enca' xiyúgaca zxf'ini xi'sóë'
Manasés.

Naca ca tu le rusubín icja' xiyúgaca
zxf'ini xi'sóë' Efraín.

Xiyúgaca zxf'ini xi'sóë' Judá naca ga
rinná bë'a.

⁸Xiyúgaca bönachi Moab naca ca tu ga
riguibi na'a,

ate' cu'a löla' uléaja' xiyúgaca bönachi
Edom.

Códxia' tu' uxícja' bönachi Filistea.”

⁹¿Nuzxi caz gaca iché' neda' lu yödzo
zoa zö'ö idú gásibi'ilö le run chi'i
yödzo na'?

¿Nuzxi caz iché' neda' lu xiyúgaca bö-
nachi Edom?

¹⁰¿Naru' cabí nusán ládxa'u netu', Dios?
¿Naru' cabí tséajlenu' bönni' queé'tu'
rójáquië' gudil-la'?

¹¹Gúcalen netu' cate' tíl-lalentu' nupa
ridíl-lalen netu',

tu' cabí gaca gácalen netu' nu naca
bönáchisö.

¹²Len yöl-la' huáca queë' Dios idéli'ru'
tu' uxícja cazë' Lë' nupa ta'díl-lalen netu'.

61 Ruzé nagu' le rulidza' Li', Dios.
Ruf'i ládXu'u le rinábida' Li'.

² Ga ni zoa' zí'tu' ga dē ladza' rulidza' Li' tu' rudú ládxa'a.

Guché' neda' ga zoa Nu na' naca ca tu guíójtó'o, Nu na' nál-latērö ca neda'.

³ Nacu' Li' Nu run chí'i neda'.

Nacu' Nu rácalen neda' cate' zoa nu ribía no neda'.

⁴ Bē' lataj sóatica'sa' ga zoa cazu' Li'.

Bē' lataj sóalena' Li', guna' neda' ca tunba' bórado' ta'yázaba' zXan xílaba' yōjede.

⁵ Biyón quézinu' Li' le guzXí' lu na'a guna' quiu' Li', Dios.

Benu' ga nequi quia' le runödZju' qué-gaca nupa tadxí Li'.

⁶ Gunu' ga soē' xidzé bönni' na' rinná bē'ē uláz quiu'.

Zián iz soē' ibanē'.

⁷ Sóatica'sē' lo' Li', Dios.

Bē' queē' yöl-la' dxi'i ladxi', en le naca idútē li, yugu' le ilún chí'i lē'.

⁸ ¿Gúl-latica'sa' yöl-la' ba que Lo', para gaca guna' tu tu dza le guzXí' lu na'a!

62 ¿Tuzē' Dios ruzxöni ládxa'a, en rizé ládxa'a Lē'!

¿Lē' cazē' rusölē' neda'!

² ¿Tuzē' Lē' rapa chí'ē neda', en rusölē' neda'!

¿Ruzóē' neda' tsutsu, ate' biti' gaca nu uzötaj neda'!

³ ¿Gáca'xte caz güf'i ládxi'li' ucúl-lali' neda'?

Ré'ēnisilí' uzótjali' neda' ca tu zö'ö chizóa iguinnaj,

o ca tu lē'aj yaga le chinatēbi.

⁴ Ré'ēnisilí' uzótjali' neda' ga ni tunē' neda' bal.

Ruzí'ili' xibé yugu' didza' biti' nácatē.

Ruf'ili' dxi'a didza' láchui'sö,

pero lu icja ládxi'do'oli' rudidza' yúdxili' neda'.

⁵ ¿Tuzē' Dios ruzxöni ládxa'a, en runa' löza Lē'!

⁶ ¿Tuzē' Lē' rapa chí'ē neda', en rusölē' neda'!

¿Ruzóē' neda' tsutsu, ate' biti' gaca nu uzötaj neda'!

⁷ ¿Tuzē' Dios rusölē' neda', en runē' ga naca' bica' ba!

¿Dios nuzóē' neda' tsutsu, en rapa chí'ē neda'!

⁸ Libí'ili', bönachi, bulí'zxöni ládXē'ē Dios yúgu'tē dza.

Bulí'siyönnē' yugu' le raca queéli', tu' run chí'i cazē' rē'u.

⁹ Le nácatē nácacaga yúgutē bönachi ca tu bö' ridódisö,

en biti' bi nazáca'gaca nupa na' nadéli'-gaca lataj lo.

Tu lu zXigóns biti' bi nál-lí'guequinē'.

Nácacagarē' dzá'asö ca tu bö' riguéla'siru'.

¹⁰ Biti' uzxöni ládxi'li' bi idéli'li' len yöl-la' nál-la queézili'.

Biti' uzí'ili' xibé le cuanlí'.

Channö gata' queéli' yöl-la' tsahui', biti' güf'i ládxi'li' le.

¹¹ Tu luzuísö bē'ē didza' Dios.

Chopa luzuí' biyönda' ca naca lē' ni rnna: "Nápatērē' Dios yöl-la' huáca,

¹² ate' zóatica'sö yöl-la' dxi'i ladxi' queē'."

Ubí'i cazu', Xan, quégaca bönachi tsca naca le núngaca.

63 Dios, nacu' Dios quia', ate' idú ládxa'a ruguilja' Li'.

Ribidxi ládxa'a Li', ate' idútē le naca' rizé ladxi' Li'.

Zoa' tu luyú bidxi ga ni rudú ládxa'a, ate' biti' bi dē nisa.

² Ben ga ilé'eda' Li' lu lataj ga na' zoa cazu',

para ilé'eda' yöl-la' huáca quiu', en yöl-la' bení' quiu'.

³ Tu' nácatērö dxi'a yöl-la' dxi'i ladxi' quiu' ca yöl-la' na'bán caz.

Que lē' ni na' cu'a Li' yöl-la' ba.

⁴ Guía' Li': "Xclenu'" tsanni ni zoa' nabana'.

Uchisa' na'a, en ulidza' Lo'.

⁵ Ruhuöläj rudzé'e icja ládxi'da'ahua' le nácatèrö dxi'a, ate' lu yöl-la' rudzeja quia' rigu'a Li' yöl-la' ba.

⁶ Rönjeda' Li' cate' déa' lu le ráti'da'.

⁷ Rizá' ládxa'a ca nacu' cate' rina'sa' yëla. Rácalen cazu' neda', en tu' run chi'u neda', lu yöl-la' rudzeja quia' rul-la' quiu'.

⁸ Nazón cazu' Li' bö' naca caza'.

Rizón cazu' Li' neda',

⁹ pero ila'yaza lataj chul-la nupa té'ëni iluti neda'.

¹⁰ Ilátigaca lu guíë tuchi'.

Ilágugaca bö'cu' zuga' léguequi.

¹¹ Nu rinná bë' uláz queë' Xanru' udzeja ladxi' lahuë' Dios.

Ulu'zif' xibé yúgu'të nupa tu'zxöni ladxi' Lë',

tu' usayaj cazë' Lë' ru'igaca nupa ta'zif' yë'.

64 Dios, buzé nagu' chi'a le rinabi yúdxida' Li',

para gun chi'u yöl-la' na'bán quia' tu' rádxi'da' bi gun nu ridíl-lalen neda'.

² Bucachi' neda' para cabí bi ilún quia' bagáchi'sö nupa tuá' dö',

en para cabí ila'bía di'ë neda' bönni' tu-tië' bönachi.

³ Nácagaca lúdxí'gaquië' ca yugu' guíë tuchi',

ate' nácagaca didza' zi' tu'ë ca yugu' yaga lahui tuchi'.

⁴ Bagáchi'sö tu'zé yugu' yaga lahui tuchi' na'

para ilunë' huë' nupa bití' bi nabága'gaca.

Tsárido'os tu'zé léguequi, en bití' bi tádxinë'.

⁵ Bití' ca' tu'cá'anë' le naca dö' té'ënë' ilunë'.

Tu'ë didza' ca gaca ulu'cá'hë'ë yugu' du yalaj quégaquië', ta'nné':

“¿Nuzzi caz gaca ilé'e yugu' du na'?”

⁶ Tunë' didza' ca naca le naca dö' ilunë', ta'nné': “Chinabá'a le gunru'.”

Tu'cáchi'gaquië' le ta'zá' ládxi'ë, en le ta'bequi icjë'.

⁷ Uzal-lë' Dios tu yaga lahui tuchi' le ideli' légaquië'.

Tsárido'os gunë' légaquië' huë'.

⁸ La' didza' tuf'isë' ilún ga tseajchégu'gaquië'.

Lu yöl-la' rubani quéguequi ulu'tá íc-jaguequi nupa ila'lé'e légaquië'.

⁹ Ní'irö yúgu'të bönachi iladxi Dios, en ulu'siyón luzé'eguequi ca naca le nunë' Dios,

en ila'zá' ládxi'gaca ca naca lë na' nunë'.

¹⁰ Nu bönni' tsahui' uzi'ë xibé' Xanru', en gunë' löza Lë'.

Yúgu'të nupa nácagaca idú ladxi' ulu'zif' xibé'.

65 Dios, nupa nacua' yödzo Sión ila'gú'u Li' yöl-la' ba,

en ilunna quiu' le gula'zif' lu né'eguequi,

² tu' riyón quézinu' Li' cate' tu'lidza Li',

ate' yúgu'të bönachi ila'dxin lo'.

³ Tun nigui neda' dul-la' nuna', pero runiti lo cazu' netu' ca naca le ridá'baga'tu' Li'.

⁴ Bica' ba nupa nabó cazu' quiu', en nulidzu' quiu',

para ila'cuá' yugu' lataj lá'ayi quiu'.

Huöläj udzé'etu' le nácagaca dxi'a yú'u-gaca lidxu',

enca' le yú'ugaca yudo' lá'ayi quiu'.

⁵ Tu' nacu' tsahui' rubi'u didza', en runu' yugu' le zxön le tácalen netu'.

Naca cazu' Dios Nu rusölá netu'.

Nupa nacua' idútë yödzo'lió ulu'zxöni ladxi' Li',

enca' nupa nacua' zi'tu' ia'tsölá'aló nísado'.

⁶ Len yöl-la' huáca quiu' nucú'u yugu' gu'á zxön,

le naca bé'gaca nál-latèrö cazu' Li'.

⁷ Ruzóa dxíu' le riyasa ridxía lu nísado', en le ru'u bö que.

Ruzóa dxíu' bönachi cate' tu'tsatsa.

⁸Bönachi idütë yödzülió tadxi Li' ni'a
quegaca le zxon nunu'.

Le run cazu' Li' tun ga tu'dzeja bönachi
idapa la'a yödzülió.

⁹Rufi lãdxu'u luyú, en risól-lu'u nisa
guiój.

Runu' ga ruhuóaca yu ya'a.

Nucú'u luyú na' yugu' yegu yúdzugaca
nisa zila,

le run ga dética'só zxa'a-za, tu' caní raza
lãdxu'u Li'.

¹⁰Risól-lu'u nisa guiój gapa dégaca na,
en rusubisu' gapa chinadúz.

Ruúnu' yúludo' luyú zidzaj, en runu' ga
ta'gula guixi' cuando'.

¹¹Runu' ga rulá' yödx yana' le nadúz
luyú ni tu iz tu iz,

en ga zóatica'só le ilë'aj ilágugaca
bönachi.

¹²Nacuá'aba' böa'-bëdxi la' guixi',
ate' tu'dzeja bönachi yugu' lu guí'ado'.

¹³Gapa naca lachi' nacuá'aba' bö'cu'
zxila',

ate' dxíada' zxa'a xtila la' yëla.

Lu yöl-la' rudzeja queguequi ta'bódxia,
en tul-la bönachi quiu'.

66 ;Guli'gui' zidzaj didza' lahuë'
Dios

lu yöl-la' rudzeja queéli' yúgu'tëli' zóali'
yödzülió!

²;Guli'gul-la ca naca yöl-la' ba que Lë'!

;Guli'cu'ë yöl-la' ba!

³Guli'guíë' Dios: "¡Zxöntëro nácagaca le
nunu'

tu' naca zxöntëro yöl-la' huáca quiu'!"

Nupa biti' ta'l'é'e Li' dxi'a ulu'lufi' cuini

ca nupa tun ca rnna xtídzu'u.

⁴Yúgu'të nupa nacua' yödzülió ilún Li'
zxön,

en ilúl-la yöl-la' ba quiu'.

Ilúl-la yöl-la' ba que Lo'.

⁵Guli'dá ilé'eli' yugu' le nunë' Dios.

Nayëpisëtëre' Dios lu le runë' quegaca
bönachi.

⁶Benë' ga böaca ca luyú bidxi ga dë
nísado'.

Gula'dödë' gatsaj lãhui'lö yegu, ta'zé'esö
n'agaquië'.

Ni' udzëjade'eru' ca náquië' Lë'.

⁷Len yöl-la' unná bë' queë' rinná
bé'tica'së'.

Ruyútica'së' bönachi yúgu'të yödzo.

Biti' ral-la' ilún ba zxon cuínguequi nupa
ta'dá'baga' xtídzë'ë.

⁸;Guli'gún zxonë' Dios queëtu', lib'ili'
bönachi yúgu'të yödzo,

en guli'cu'ë yöl-la' ba gátitës!

⁹;Run cazë' Lë' ga zóaru' nabanru',

en biti' ru'ë lataj cuila n'atu'!

¹⁰Guzxí' bë' cazu' netu', Dios.

Buchi'u netu' ca run nu ruchi'a guíë' plata
lu guí'.

¹¹Bë'u lataj bidzuntu' lu du yalaj.

Busubágu'u netu' tu yua' zi'i.

¹²Benu' ga gula'libë' icjtu' bönni'
dxíagaquië'-ba' böa'.

Gudóditu' lu guí', en lu nisa,

pero guché' cazu' netu' tu lataj ga bölaj
budzé'etu'.

¹³Tsu'a lidxu', en cu'a-ba' lo' böa'do'
uzégui'a-ba' lo'.

Guna' lo' Li' le guzxí' lu na'a guna',

¹⁴Ië na' bë'a didza' que,

le gunniá' cate' ni' rigufi' rizáca'a.

¹⁵Cu'a-ba' lo' Li' böa'-bëdxi renni'
uzégui'a-ba' lo',

tsözxon len dzön quegacaba' chivo
biguíú'.

Gútia'-ba' lo' yugu' bëdxi, en yugu' chivo
biguíú'.

¹⁶Guli'dá uzé nágali', yúgu'tëli' rádxili'-
në' Dios,

ate' usiyönda' lib'ili' yugu' le benë' le
gulácalen neda'.

¹⁷Len ruá' cuinsa' bulidza' Lë',

en bena' Lë' zxon len lúdx'a.

¹⁸Channö rucácha'a le naca dö' lu
lãdxi'da'ahua',

biti' yönnë' Xanru' Dios didza' gu'a,

¹⁹pero le nácatë biyönnë' Dios didza'
bë'a.

Buzé' naguë' cate' bulidza' Lë'.

20 ¡Yöl-la' ba Dios!

¡Biti' gudá'bagué'ë neda' cate' bulidza'-
në',

en biti' bugúë' yöl-la' nadxí'i queë' neda'!

67 Xantu' Dios, buzá' ladxi' queé'tu',
en ben ga gaca dxi'a queé'tu'.

Lu yöl-la' dxi'i ladxi' quiu' buyú netu',

² para gaca bë' le ré'ënu' guntu' yödzülió
ni,

en para ila'nözi bönachi yúgu'të yödzo
ca naca yöl-la' rusólá quiu'.

³ Ral-la' ila'gú'u bönachi Li' yöl-la' ba,
Dios.

Yúgu'të bönachi ral-la' ila'gú'u Li' yöl-la'
ba.

⁴ Ral-la' ulu'dzeja bönachi yúgu'të
yödzo,

en ilúl-la lu yöl-la' rudzeja quéguequi.

Tu' uchi'a usöró'u' bönachi ca naca le
naca tsahui',

⁵ ral-la' ila'gú'u Li' yöl-la' ba bönachi,
Dios.

Yúgu'të bönachi ral-la' ila'gú'u Li' yöl-la'
ba.

⁶ Yödxi yana' runödzej luyú ni.

Dios queéru' runë' ga raca dxi'a queéru'.

⁷ Runë' Dios ga raca dxi'a queéru',

para iladxi Lë' yúgu'të nupa nacuá'
yödzülió.

68 Raca ladxí'ru' chasë' Dios, en
usulásië' nupa ta'díl-lalen Lë',

en gunë' ga ulu'zxunnaj nupa biti' ta'lé'e
Lë' dxi'a.

² Ca rulaga tu bö' recja dzön, ca' bulaga
léguequi.

Ca na' ruúna' lu guf' quízxi'ba' buz,

ca' ila'niti nupa tuá' dö' lahuë' Dios.

³ Ulu'dzeja nupa nácacaca tsahui', en
ulu'zíf' xibé' Dios.

Lu yöl-la' rudzeja quéguequi ulu'zíf' xibé'.

⁴ ¡Guli'gul-la queë' Dios!

¡Guli'gul-la yöl-la' ba que Lë'!

Bulí'pá'a nöza ga tödë' gapa dë lataj.

¡Nazí'i lë' Xanru'!

¡Bulí'dzeja lahuë' Lë'!

⁵ Náquië' ca xúzcacabi' bi'i uzébidó',

enca' Nu ruchi'a rusöró' quégacanu
nigula uzébi.

Caní náquië' Dios ga na' zoë' lataj lá'ayi
queë'.

⁶ Rucu'ë Dios nupa nagá'anagaca
bayechi' tu yu'u.

Rubéajë' nupa nadzúngaca, en runë' ga
raca dxi'a quéguequi,

pero ulu'gá'ana tu luyú bidxi nupa
ta'dá'baga' Lë'.

⁷ Yöjnöru cazu' lógaca bönachi quiu',
Dios,

cate' guchë'u léguequi la' guixi' ga na' dë
lataj.

⁸ Gudödi budó' zxu' dza ni'.

Lësca' gula guiójsiu' lahuë' Dios.

Guzxizi guí'a Sinaí lahuë' Dios quégaca
bönachi Israel.

⁹ Benu' ga gulaj guiójsiu', Dios.

Benu' ga böáca ya'a xiyú' ga ni' guca yu
bidxi.

¹⁰ Yöjcuá' nupa néquiguequi quiu' luyú
na'.

Lu yöl-la' dxi'i ladxi' quiu', Dios,

bucözu' le gácalen nupa nácacaca yechi'
luyú na'.

¹¹ Bë' cazë' didza' Xanru' Dios.

Ta'guínsinu nigula zían didza' dxi'a queë',
ta'nnanu:

¹² "¡Ta'zxúnnajë'! ¡Ta'zxúnnajë' bönni'
ta'nná bë'ë,

enca' bönni' röjáquië' gudil-la guizxi yu
quégaquië'!"

Nigula gula'bózanu lídxigacanu
bulu'zíf'inu xibé le gutá' quégaquië'.

¹³ Sal-la' bucachi' loli' gapa tun chí'ili'
bö'cu' zxila',

gáculi' le naca lachi ca nácacacaba'
gu'dödo' néquiguequiniba' guíë
plata,

en xitúbigacaba' néquiguequini guíë oro.

¹⁴ Cate' bësilásië' Dios bönni' na' gu-
la'nná bë'ë lu guí'a Salmón,

benë' ga gula guió'j bögui' lu guí'a na'.

¹⁵ Nequi queë' Dios guí'a Basán.

Naca guí'a Basán na' tu guí'a xzön.

16 ¿Bixx que ruzxé'eli', yugu' guí'a zxon?
¿Bixx que ruzxé'eli' guí'a na' guzé ládxe'ë
Dios tsöjsóë' ga na'?

Le nácatë tsaz soë' Dios ni'.

17 Gayuá', en gayuá' nácagaca carreta
que gudil-la queë' Dios.

Rizé'ë Xanru' lu guí'a Sinaí ga na' tseajt-
sazië' lataj lá'ayi queë'.

18 Buëpu' yehua' yubá richë'u bönachi
zián gula'dzúngaca.

Nu'u yugu' le bulu'nódzaj bönachi quiu',
en le gulunna quiu' nupa ta'dá'baga' Li',
para tsöjsóë' Dios ni' tsaz.

19 ¡Yöl-la' ba Dios, Nu ruá' sua'ru' tu dza
tu dza!

¡Náquië' Dios Nu rusölá rë'u!

20 ¡Dios queëru' rusölé' rë'u!

¡Rusölé' Xanru' Dios rë'u lu yöl-la' guti!

21 Le nácatë Dios udxíë' huë' íc jagaca
nupa ta'dá'baga' Lë'.

Udxíë' huë' icjë' bönni' biti' gusanë' ca
naca dö' ru'ë.

22 Ru'ë didza' Xanru', rmnë': "Ubéaja'
léguequi lu guí'a Basán,
en ubéaja' léguequi lu nísado',

23 ate' ulíbili' léguequi ga idxintë irúaj
rön quéguequi,

ate' ilé'ajba' zxiculi' xichóngaca nupa
ta'dil-lalen libí'ili'."

24 Ta'lé'e yúgu'të bönachi nupa ta'dalen
Li', Dios.

Lu yöl-la' run Li' zxon ta'dá lu lataj
lá'ayi quiu', Dios quia', Nu rinná be'e
neda'.

25 Nupa tul-la, en nupa ta'guínnaj lé'e-
gaca bihuël-la, ta'dá ni',

ate' bi'i nigula ra'bando' tunbi' léguequi
tsözxón, ta'gápabi' lé'egaca guídido'.

26 Buli'lidzë' Dios dxi'a tsáhui'do' gapa
na' rudúbili' queë',

tu' náquië' Xanru', libí'ili' zxf'ini xi'sóë'
Israel.

27 Nacu'ë zxf'ini xi'sóë' Benjamín ga na',
bönni' gúcarë' cuidi', ate' ta'nná
bé'ë.

Bönni' lo quégaquië' zxf'ini xi'sóë' Judá
nútsa'gaquië' ládjagaquië',

enca' ládjagaquië' bönni' lo quégaquië'
zxf'ini xi'sóë' Zabulón, en Neftalí.

28 Buluf'i lahui yöl-la' huáca quiu', Dios.
Buluf'i lahui yöl-la' huáca quiu', Dios, tu'

chibenu' zián le gulácalen netu'.

29 Tu' dë yudo' quiu' lu yödzö Jerusalén,
bönni' ta'nná bé'ë ila'ché'ë ni' le ilunnë'
quiu'.

30 Buzë le bach bönachi yödzö na' náca-
gaca ca böa' guixi',

enca' bönachi yugu' yödzö nácagaca
ca yugu' bëdxi tsözxón len
zxf'iniguequi.

Tu'libi bönachi yechi' tu' ta'zé ládxi'gaca
dumí.

Bësilási nupa na' ta'yaza ladxi' rójaca
gudil-la.

31 Bönni' gubáz quégaca bönachi Egipto
ila'dxinë' lo'.

Bönni' Etiopía ila'chisa ná'agaquië' lo',
Dios.

32 ¡Guli'gul-la queë' Dios, bönachi
yúgu'të yödzö!

¡Guli'gul-la yöl-la' ba queë' Xanru'!

33 Rö'ë yehua' yubá xitsá'tërö, le zoa caz
dza ni'te.

Buli'yútsöca', ru'ë zidzaj didza', en naca
chí'ë ca guziú' rinnë.

34 ¡Guli'gún zxonë' Dios!

Yöl-la' nayépisë queë' rusubaga' bönachi
Israel.

Yöl-la' huáca zxon queë' nalá' lúzxiba
xitsá'.

35 Rubániru' ca nacu' Li', Dios, lu lataj
lá'ayi quiu'.

Runnu' quégaca bönachi quiu' yöl-la'
nal-la, en yöl-la' huáca.

Náquië' Dios quégaca bönachi Israel.

¡Yöl-la' ba Lë' Xanru' Dios!

69 Busölá neda', Xana' Dios,

tu' raca quia' tsa nabága'a nisa
ga ridxintë ruchicja' nisa.

² Raca quia' tsa ruhuötja' ga rë' lu guna',
en biti' zoa ga gaca uliba'.

Zoa' ca tu lu nisa zila, en chizóa uchicja' nisa.

³Rudú ládxa'a tu' rulidza' nu gácalen neda', ate' da' lubá'a.

Chirichul-la guiój lahua' tu' ruyúa' ga guídu' dusóló' neda'.

⁴Nayántêrö ca guitsa' icja' nupa biti' ta'lé'e neda' dxi'a, en biti' bi nuna' quéguequi.

Nál-lagaca nupa ta'díl-lalen neda', en té'ëni iluti neda',

en biti' bi nuna' quéguequi.

Tunê' bayúdx ubi'a dumí le cabí gulana'.

⁵Nöz quézinu' Li', Dios, yöl-la' canóz quía',

en biti' nagachi' lo' Li' dul-la' nuna'.

⁶Biti' gu'u lataj nupa tu'zxöni ladxi' Li' ulu'tuf'i ni'a quia' neda',

Xana' Dios nayépisëtêru'.

Biti' gu'u lataj nupa tun Li' zxön ila'gá'ana cá'asö ni'a quia',

Dios quégaca bönachi Israel.

⁷Tu' nadxi'ida' Li' tu'lidza ditjê' neda', en que lë ni na' rutuf'ida'.

⁸Naca' ca tu bönni' zi'tu' lógacabi' bi'i bócha'a,

en ca tu bönni' zi'tu' lógaquiê' di'a dza quia'.

⁹Tu' ru'fi ládxa'a yudo' quiu' régui rilá ládxi'da'ahua'.

Naca ca tu'lidza ditaj neda' nupa tu'lidza ditaj Li'.

¹⁰Ruzötaj cuina', en runa' gubasa,

en que lë ni na' tu'didza' yudxi neda'.

¹¹Rácu'a' lari' cá'asö ca run nu ribödx i yechi',

ate' tu'titaj neda'.

¹²Ta'nné' quia' yugu' la' nöza,

ate' nupa nazúdxigaca tul-la ca naca quia',

¹³pero neda' ulidza' Li', Xan.

Bubí'i didza', Dios, cate' idxín dza raza ládxi'u Li'

tu' nadxi'ide'enu' neda',

en tu' guzxi' lu no'o usóló' neda'.

¹⁴Guléaj neda' para cabí huötja' lu le naca ca guna'.

Ben ga ulá' lu ná'agaca nupa ta'díl-lalen neda',

en lu le naca ca nisa zila le chizóa ibaga' neda'.

¹⁵Biti' gu'u lataj ibaga' neda' lë na'.

Biti' gu'u lataj uchicja' lu le naca ca nísado',

enca' cabí huötja' tu lu yeru ba.

¹⁶Bubí'i didza', Xan, tu' nacu' dxi'i ladxi', en tu' ruhuéchi' ládxi'u neda', gudá quia'.

¹⁷Biti' ucachi' cuinu' lahua' neda', huen dxin quiu'.

¡Rö'a böniga! ¡Gudáchi gúcalen neda'!

¹⁸¡Gudá ga zoa' dusóló' neda'!

¡Ben ga ulá' lu ná'agaca nupa ta'díl-lalen neda'!

¹⁹Nöz quézinu' Li' ca tu'didza' yudxi neda',

en ca tu'lidza ditaj neda', en tu'cá'ana neda' cá'asö.

Rilé'e quézinu' yúgu'tê nupa biti' ta'lé'e neda' dxi'a.

²⁰Rudú ládxa'a tu' tu'didza' yudxi neda', en biti' bi gaca guna'.

Gulóza' nu huéchi' ladxi' neda', pero cuntú nu guzóa.

Gú'unida' nu huê tsahui' neda', pero cuntú nu bidzöli.

²¹Cate' guduna' bulu'gahuê' neda' tu le silá',

en cate' gubidxa' nisa, bulu'gui'jê' neda' nupe zi.

²²Ben ga huóaca laní quégaquiê' ca tu le sön légaquiê',

en ben ga huóaca le tu'zi'ë xibé ca tu le gun ga ila'chixi ila'níguinë'.

²³Ben ga ichul-la guiój lógaquiê' para cabirö ila'lé'enê'.

Ben ga ila'zéchutica'sö cúdzu'gaquiê' zxan yua' nuá'gaquiê'.

²⁴Busubaga' légaquiê' lu yöl-la' rilé quiu',

en bê' quégaquiê' yöl-la' ridzá'a quiu'.

²⁵ Ben ga cuntu nu soa ládzaqaquie',
en ga bití'rō nu soa lu yu'u lídxigaquie'.

²⁶ Ta'zóa régu'e nupa na' benu' léguequi
xigua'.

Tu'siyōnnē' ca ta'gu'í ta'zaca' nupa na'
nunu' léguequi huē'.

²⁷ Buzúaj lu guichi yugu' dul-la' tunē',
en bití' gu'u légaquie' lataj ila'déli'nē'
yōl-la' rusólá quiu'.

²⁸ Busulu lágaquie' nazúajgaca lu guichi
quégaca nupa nabángaca.

Bití' gu'u légaquie' lataj ila'bábalenē'
nupa nácgaca tsahui'.

²⁹ Neda' riguí' rizáca'a, en rudú ládxa'a.
Guchisa neda', Dios, en busólá neda'.

³⁰ ¡Cu'a-nē' yōl-la' ba Dios len tu le gul-
la'!

¡Guna' Lē' zxōn, en guía'-nē': "Xclenu"!

³¹ Chaza ládxe'ē Xanru' Dios lē ni
ca raza ládxe'ē-ba' böa'-bēdxi rútia'-ba'
lahuē',

o ca raza ládxe'ē-ba' tuba' bēdxi zxōn
chinagúlaba'.

³² Nupa ta'gu'í ta'zaca' ila'lé'eni lē ni, en
ulu'dzeja.

Ila'dipa ládxi'gaca nupa tu'guilaj Dios.

³³ Ruzé' naguē' Xanru' Dios nupa
ta'yadzaj ta'yudxi,
en bití' ral-la ládxe'ē bōnachi queē'
nadzúngaca.

³⁴ ¡Gulí'cu'ē yōl-la' ba Dios, lib'íli'
yehua' yubá, en luyú ni,
enca' nísado', en yúgu'tē le nacuá' tu tu
lataj na'!

³⁵ Usólá cazē' Dios bōnachi Sión,
en uchisē' yugu' yōdzō quégaca xzí'ini
xí'sóē' Judá.

Ila'cuá' bōnachi queē' ga na', ate' guequi
quéguequi luyú na'.

³⁶ Xzí'ini xí'sóagaquie' huen xichinē'
ila'zí'ibi' luyú na',
ate' ila'cuá'tica'sō ni' nupa nadxí'igaca
Lē'.

70 ¡Busólá neda', Dios!
¡Gudáchi gácalenu' neda', Xan!

² Ben ga ulu'tuí'i, en ila'bó' bōniga nupa
na' té'eni iluti neda'.

Ben ga ulu'huécja, en ulu'gá'ana cá'asō
nupa na' té'eni gaca bi gaca quia'.

³ Ben ga ulu'huécja lu yōl-la' rutuí'i
quéguequi

nupa na' tu'titaj neda', ta'nná: "Ja, ja."

⁴ Ben ga ulu'dzeja, en ulu'zí' xibó'
yúgu'tē nupa tu'guilaj Li'.

Ben ga iluf'itica'sō didza' nupa ta'dxf'i
yōl-la' rusólá quiu', ila'nná:

"¡Zxóntērō náquie' Dios!"

⁵ Neda' nacuídí'da', en bití' bi gaca guna'.

¡Gudáchi gácalenu' neda', Dios!

Nacu' Nu rácalen neda', en Nu rusólá
neda'.

¡Bití' ca' tsenu' guídu' quia', Xan!

71 Nuzóa cazu' neda' dxi'a tsáhui'do'
ga na' zu', Xan.

¡Bití' gu'u lataj utuí'da'!

² ¡Tu' nacu' tsahui' gúcalen neda', en
busólá neda'!

¡Buzé' nagu' neda', en busólá neda'!

³ Nacu' le uzóa neda' tsutsu,
en le gun chí'i neda' ga gaca ucachi'
cuina'.

Chigunná bé'enu' nu usólá neda' tu'
nacu' Nu ruzóa neda' tsutsu,
en Nu run chí'i neda'.

⁴ Dios quia', busólá neda' lu na' nu ruá'
dō',

en lu na' nu ridá'baga' Li', en run dzatsa.

⁵ Tuzu' Li' runa' löza, Xan.

Ruzxōni ládxa'a Li' ga gudéla'tē naca'
bf'ido'.

⁶ Ruzxōni ládxa'a Li' ga gudéla'tē gulja',
tu' guzóalen cazu' neda' cate' ni' buzóanu
xiná'a neda'.

¡Cú'utica'sa' Li' yōl-la' ba!

⁷ Zían nupa tu'bani ca naca quia',
tu' run chí'i cazu' Li' neda'.

⁸ ¡Rigú'utica'sa' Li' yōl-la' ba,

en tu dza tu dza rulu'a lahui yōl-la' ba
quiu'!

⁹ ¡Bití' usán no'o neda' na'a, ni naca' bōn-
ni' gula!

¡Biti' ucá'anu' neda' na'a cate' ni rudú
ládxa'a!

¹⁰ Tuí'i didza' nupa biti' ta'lé'e neda' dxi'a
ca gaca bi ilún quia',
ate' tun tuz xfidza'gaca nupa té'ëni iluti
neda'.

¹¹ Ta'nná: "¡Nusán nē'ë Dios lē'!
¡Gulí'dá sônru'-nē' tu' cuntu nu zoa gá-
calen lē'!"

¹² ¡Dios, biti' su' zi'tu' ga ni zoa!
¡Dios quia', gudáchi gácalenu' neda'!

¹³ Ben ga ulu'tuí'i, en ila'niti nupa té'ëni
iluti neda'.

Ben ga ulu'tuí'inē', en ila'bō'ë böniga
bönni' té'ënē' ilu'ë dö' quia'.

¹⁴ ¡Neda' gúntica'sa' löza Li',
en cú'utica'sa' Li' yöl-la' ba!

¹⁵ Idú dza usiyönda' bönachi nacu'
tsahui',
en rusöló' yúgu'tē bönachi.

Biti' nözda' bal-laxi luzuí busöló' neda'.

¹⁶ ¡Gu'a didza' ca nácgaca le zxön benu'
Li', Xana' Dios!

¡Usiyönda' bönachi tuzu' Li' nacu'
tsahui'!

¹⁷ Dios, rusédinu' neda' ga gudéla'tē ni'
naca' bí'ido',

ate' ga ridxintē na'a dza ruá'a didza' ca
nácgaca le zxön nunu'.

¹⁸ Na'a naca' bönni' gula, en
chinagucha'.

¡Biti' usán no'o neda', Dios!

Benna neda' lataj usiyönda' yugu' zxf'ini
xsoa' ca naca yöl-la' huáca quiu',

ate' quíxjöi'ida' nupa ilalaj ca naca yöl-
la' nál-la quiu'.

¹⁹ ¡Le tsahui' nacu', Dios, ridxintē
lúzxiba!

¡Nunu' Li' yugu' le zxóntērö!

¡Cúnturö nu zoa nu naca ca nacu' Li',
Dios!

²⁰ Gusöl-la' casu' quia' yugu' le guca
quia' le gulún neda' zi',

pero ruúnu' neda' tsutsu,
en le yúbölö uchisu' neda' para cabí
gátia'.

²¹ Gunu' ga tsépisea',
en huē tsahú'u neda' le yúbölö.

²² ¡Le nácatē cu'a Li' yöl-la' ba, en gul-la'
tu bihuél-la, Dios!

¡Gul-la' ca runu' ca rnno', en nacu' Nu
naca lá'ayi lógaca bönachi Israel!

²³ ¡Lu yöl-la' rudzeja quia' códxi'a cate'
gul-la' quiu',

en idú ládxa'a gul-la' tu' busöló' neda'!

²⁴ ¡Idú dza gu'a didza' ca nacu' tsahui'!

¡Tu'tuí'i, en ta'bó' baguf'i nupa gul'é'ëni
iluá' dö' quia'!

72 Dios, buzéajni'inē' bönni' rinná
bē'ë

para gaca uchi'a usöró'ë ca ruchí'a
rusöró'u Li'.

Ben ga ilácagacabi' tsahui' zxf'inē' ca
nacu' Li' tsahui'.

² Bē'ë lataj uchi'a usöró'ë quégaca bö-
nachi quiu' ca naca le naca tsahui',
enca' quégaca bönachi quiu' ta'guí'i
ta'zaca'.

³ Ben ga ila'cuá' dxi'a tsáhui'do' bönachi
quiu' yugu' lu guí'a,
en ilácagaca tsahui' yugu' lu guí'ado'.

⁴ Bē'ë lataj ubéajē' tsahui' nupa ta'guí'i
ta'zaca' ladaj bönachi quiu',
en usölé' yugu' zxf'inigaca nupa
ta'yadzaj ta'yudxi,

en ucul-lē' nu ribía no léguequi.

⁵ Ben ga iladxi bönachi quiu' Li' tsanni
ni' soa gubidza,
enca' tsanni ni' soa beo' ga idxintē dza
udxi.

⁶ Ben ga gáquiē' bönni' rinná bē'ë ca nisa
guíój ribixi lu guíxi'do',

en ca yugu' guíój gúpa'do' tu'subisa luyú.

⁷ Ben ga gaca dxi'a quégaca nupa náca-
gaca dxi'a yugu' dza inná bē'ë lē',
en ila'cuá' dxi'a tsáhui'do' ga idxintē
bíti'rö soa beo'.

⁸ Ben ga inná bē'ë idapa la'a yödzölió,
ga naguela' ra' yegu Eufates ga idxintē
idütē luyú.

⁹ Ben ga ulu'zechu zxf'bigaca lahuē' lē'
nupa nacuá' luyú bidxi,

en iladxi lë' nupa ta'díl-lalen lë'.

¹⁰ Ben ga ila'dxinë' lahuë' bönni' ta'nná bë'ë luyú Tarsis en yugu' lu yödzo, nuá'gaquië' yugu' le ulu'nödzjé' queë'.

Bönni' ta'nná bë'ë luyú Sabá, en luyú Seba ilá'dxinë' bi ulu'nödzjé' queë'.

¹¹ Ben ga ulu'zechu xzíbigaquië' lahuë' yúgu'të bönni' ta'nná bë'ë, en ilúngaca xichinë' bönachi yúgu'të yödzo.

¹² Usölé' nu riyadzaj riyudxi cate' ulidza lë',

enca' nu riguf'i rizaca', en nu biti' zoa nu gácalen nu na'.

¹³ Huéchi' ládxë'ë nupa nácgaca yechi', en nupa ta'yadzaj ta'yudxi, en gun chi'ë yöl-la' na'bán quégaca nupa nácgaca yechi'.

¹⁴ Usölé' léguequi lu ná'agaca nupa tun léguequi zí',

en lu ná'agaca nupa tuá' dö', en güf'i ládxë'ë léguequi cate' nu gué'ëni guti léguequi.

¹⁵ Soë' ibanë', ate' ilu'ágaca bönachi queë' oro que lu xiyúgaca bönachi Sabá.

Ben ga ulu'lidza Dios bönachi, ila'nábitica'só Li' gácalenu' lë'.

Ben ga ulu'lidza lë' dxi'a tsáhui'do' idú dza.

¹⁶ Ben ga unödzejada' xzoa' luyú queë', enca' yugu' lu guf'ado', le unödzej yödxi yana' xiyúë' ca run guf'a Líbano.

Ben ga ila'yán nupa nacuá' ladzë' ca rö'ö guíxi'do' lu xiyúë'.

¹⁷ Ben ga tsöjnégaca le lë' ga idxintë dza udxí.

Ben ga gaca yöl-la' ba que lë' tsanni ni' soa gubidza.

Ben ga ila'nabi bönachi Li' yúgu'të yödzo gunu' ga gaca dxi'a quéguequi ca benu' queë' lë'.

Ben ga ila'gú'u lë' yöl-la' ba bönachi yúgu'të yödzo.

¹⁸ ¡Yöl-la' ba Xanru' Dios, Dios quégaca bönachi Israel!

¡Tuzë' Lë' runë' le túngaca ga rubániru'!

¹⁹ ¡Yöl-la' ba Lë' le naca lachi ga idxintë dza udxí!

¡Rizé' ládxi'ru' ilí idútë yödzo'lió le naca bení' queë'!

¡Ca' gaca! ¡Ön, ca' gaca!

²⁰ Chibudxi le rinábida'-në' Dios neda', David, xz'ínë' Isaí.

73 Le nácatë runë' Dios ga raca dxi'a quégaca bönachi Israel, nupa na' naca dxi'a tsahui' ládxi'do'guequi.

² Ia'látis'ö guchixi guníguida'.

Ia'látis'ö tsöjdöda' tsölá'aló,

³ tu' buzzé'eda' nupa tun ba zxön cuínguequi,

en tu' dëda' yöl-la' tsahui' quégaca nupa tuá' dö'.

⁴ Biti' ca' téquinë' zi' bönni' tu'ë dö' na'.

Nácagaquië' tsutsu, en nacu'ë dxi'a.

⁵ Biti' ta'guf'i ta'záquë'ë ca ta'guf'i ta'zaca' ia'zica'rö bönachi.

Biti' ca' raca quégaquië' ca raca quégaca bönachi yúbölö.

⁶ Naca yöl-la' run ba zxön cuini quégaquië'

ca tu le néquini oro dxía ícjagaquië'.

Yöl-la' rutsatsa quégaquië' naca ca xzágaquië' nácugaquië'.

⁷ Tu'zi'ë xibé le ta'dödi bë'ë tē'aj tahuë', en ta'zá' ládxi'gaquië' quégaca le zían le ila'déli'në'.

⁸ Tu'titjë' ia'zica'rö bönachi,

en tu'ë didza' lu yöl-la' run ba zxön cuini quégaquië'.

Tun ba zxön cuíngaquequië',

en té'ënë' ila'bía nahuë' ia'zica'rö bönachi.

⁹ Ta'nné' queë' Dios zoë' yehua' yubá,

en tu'didza' yudxë' nupa nacuá' yödzo'lió.

¹⁰ Que lë ni na' ta'dá' bönachi queë' Dios légaquië',

en ta'yéajlë' didza' tu'ë.

11 Ta'nné: "Biti' ca' nóziné' Dios,
 en biti' ilé'e lë ni Nu na' zoa xitsá'alö."
 12 Caní nácaté nupa tuá' dö'.
 Dëda' yöl-la' tsahui' quéguequi, en
 ta'z'f'tica'só ia'lati'.
 13 ¿Naru' nítisö ben chi'i cuina' para
 gaca' dxi'a
 en para cabí íbága'a dul-la'?
 14 Dios, benu' ga gud'í guzácá'a idú
 dza.
 Yugu' zila benu' neda' zi'.
 15 La'tu' b'é'a didza' ca nácaté lë ni
 guzxf' y'é'eda' bönachi quiu'.
 16 Que lë ni na' b'é' ládxa'a tséajni'ida' lë
 ni,
 sal-la' gúcada' böniga
 17 ga bidxinté dza guyu'a yudo' quiu'
 en guyéajni'ida' ca gaca quégaca nupa
 tuá' dö'.
 18 Le nácaté nuzú' léguequi ga ta'chixi
 ta'nigui,
 en runu' ga ila'niti tsaz.
 19 La' ila'nítitë,
 en ila'yaza ga udxi quéguequi.
 20 Nácaté ca tu le rinetu' yëla le ridödi
 que cate' ritó yu.
 Cate' chasu', Xan, la' udóditeu' léguequi
 tsölá'alö.
 21 Cate' yöjdn' icja' le nácaté ca tu le
 silá',
 en guzá' ládxa'a yugu' le gúquida' zi',
 22 guca' tu' canóz, en biti' bi
 guyéajni'ida'.
 Guca' ca tuba' böa' guixi' lo' Li'.
 23 Zóaticá'sa' lo' Li',
 ate' rizón cazu' neda'.
 24 Rigú'u yól-lu'u neda' le rugú'u neda'
 nöza quiu',
 en ga údxitë uzi'u neda', en gunu' neda'
 bal.
 25 ¿Núzxirö zoa yehua' yubá nu gácalen
 neda'?
 ¡Tuzu' Li'!
 Tu' rácalenu' neda' cúnturö nu zoa
 yödzölió nu riquinda'.
 26 Ricuidi' le naca', en rudú ládxa'a.

Le ruzóa tsutsu ládxi'da'ahua',
 en le ruz'f'tica'sa' xibé naca cazu' Li', Xan.
 27 Le nácaté ila'niti nupa tu'cá'ana Li'.
 Usunítu' yúgu'të nupa tu'zóa Li'
 tsölá'alö.
 28 Raca dxi'a quia' cate' ribiga' ga zu' Li',
 Dios.
 ¡Naca cazu' Li', Xana' Dios, Nu run chi'i
 neda'
 para ulu'a lahui yúgu'të le nun cazu'!
74 Dios, ¿naru' tsaz nusán ládxi'u
 netu'?
 ¿Riléde'enu' netu', bö'cu' zxila' queé
 cazu'?
 2 Yöjné netu', bönachi tu'dubi quiu',
 nupa böá'u cazu' dza ni'te,
 nupa böá'u cazu' para gácatu' bönachi
 queé cazu'.
 Yöjné gu'a Sión, ga ni guzóa cazu' Li'.
 3 Gudá tödu' ga ni naguinnajdërö yödzö
 lá'ayi quiu'.
 Bulu'sunítidërö nupa gula'dá'baga' Li'
 yúgu'të le gula'cuá' lataj lá'ayi quiu'.
 4 Tu'tsatsa nupa na' gula'dá'baga' Li'
 idú gásibi'ilö ga ni budúbitu' quiu'.
 Nucua'gaquië' ni le naca bé'gaca
 nuxícjagaquië' yödzö lá'ayi quiu'.
 5 Nalá' lahui yödzö ni ca nalá' tu gu'a
 cate' nu gulú'u le bidín,
 en nurixi nu na' yugu' yaga gula'cuá' lu
 gu'a na'.
 6 Bulu'zxuzxjë' le nácaté lachi lu
 yödzö ni
 len yugu' gufé huága quégaquië', en
 yugu' yaga zidzaj.
 7 Bulu'zégui'ë idútë lataj lá'ayi quiu'.
 Nucá'anagaquië' cá'asö lataj ga benru'
 bal Lo'.
 8 Lu icja ládxi'do'gaquië' gula'né':
 "Nuxícjadërötu' bönachi ni."
 Idútë lu xiyutu' bulu'zégui'ë yúgu'të yu'u
 ga na' budúbitu' lo'.
 9 Bítirö caz rilé'etu' yugu' le bulu'subán
 ládxi'tu' gulísatu' lu xiyutu'.
 Bítirö zoa nu bönni' ru'ë didza' uláz
 quiu'.

Biti'rö zóalen netu' nu bönni' nózinë' gá-
ca'xte caz gaca caní queé'tu'.

¹⁰ Dios, ¿gáca'xte caz ulu'lidza ditaj netu'
nupa ta'díl-lalen netu'?

¿Gáca'xte caz ulu'cá'ana ditaj Lo' nupa
ta'dá'baga' Li'?

¹¹ ¿Naru' cabí gácalenu' netu'?

¿Bizx que nucáchu'u yöl-la' huáca zxön
quiu'?

¹² Rinná be'e quézinu' netu' Li', Dios, dza
ni'te quez,

en rusolá cazu' bönachi iduté yödzölió.

¹³ Len yöl-la' huáca zxön quiu' bubéaj
cazu' chopló nísado'.

Gulá'a cazu' ícjagacaba' böa' zxön
nacuá'aba' nísado'.

¹⁴ Bzxuzxja cazu' ícjagacaba' böa' sínia'
lëba' Leviatán.

Ben cazu' ga guláguba' yugu' böa' guixi'
xipéla'ba' böa' sínia' na'.

¹⁵ Gusalaj cazu' yugu' beaj nisa, en gapa
rálajda' nisa.

Busubidxi cazu' yugu' yegu nisa gu-
la'yúdzutica'sö nisa.

¹⁶ Nequi queë cazu' lahui' dza, en nequi
ca' quiu' chi'i dzó'ölö.

Ben cazu' Li' bení, enca' gubidza.

¹⁷ Naguixaj cazu' Li' yúgu'të buzá' nacuá'
yödzölió.

Nun cazu' Li' beo' la, en beo' ziaga.

¹⁸ Yöjné lë ni, Dios. Nupa ta'dá'baga' Li'
nucá'anagaca ditaj Lo',

ate' nupa nácaté canóz nucá'anagaca
cá'asö Lo'.

¹⁹ Biti' usán no'o nupa nadxí'inu' lu ná'a-
gaca nupa nácaté ca yugu' böa'
guixi' sínia'.

Biti' gal-la ládXu'u tsaz nupa néquigüe-
qui quiu', en ta'gu'í ta'zaca'.

²⁰ Yöjné didza' dzaga na' núnlenu' netu',
tu' nacuá' nupa tuti bönachi gapa naca
chul-la lu xiyutu'.

²¹ Biti' gu'u lataj ulu'gá'ana cá'asö nupa
nácaté bayechi'.

Ben ga ila'gú'u Li' yöl-la' ba nupa ta'gu'í
ta'zaca', en ta'yadzaj ta'yudxi.

²² ¿Guyasa, Dios, en ben ca rnna
xtídzu'u!

¿Ruzé nagu' ca rulidza ditjé' Li' bönni'
canóz idú dza!

²³ Biti' gal-la ládXu'u didza' zi' tu'í nupa
ta'dá'baga' Li'.

Yöl-la' dzatsa tun nupa tu'cá'ana Li'
cá'asö riyóntica'sö.

75 ¿Rétu' Li': "Xclenu', Dios"!

¿Rétu' Li': "Xclenu",

tu' zóatica'su' gal-la' ga zóatu'!

¿Tu'í didza' bönachi ca nácaté le zxön
nunu'!

² Rnnë' Dios: "Nuzóa' dza cate' uchi'a
usoróa' bönachi.

Uchi'a usoró caza' léguequi ca naca le
nácaté.

³ Tu'suniti yödzölió, en nupa nacuá' ni',
pero tsaz nuzóa caza' le."

⁴ Gudxa' nupa tun ba zxön cuínguequi,
gunnía': "Biti' gun ba zxön cuinli",

en gudxa' nupa tuá' dö: "Biti' huë tsahui'
cuinli'.

⁵ Biti' huë tsahui' cuinli',

en biti' güf'ili' didza' lu yöl-la' run ba
zxön cuinli'."

⁶ Calëga ga rilén gubidza, en calëga ga
ribía gubidza,

en calëga la' guixi' ga dë lataj irúaj le huë
tsahui' bönachi,

⁷ pero uchi'a usoró cazë' Dios bönachi.

Uzötjé' tuë' bönni', en uchisé' ia'tuté'.

⁸ Nuá' cazë' Xanru' lu nëë tu xziga'
yudzu xisa le ribía lubá uva le ribixi
rilëbi.

Chinugútsi'dërë' le, ate' rigu'ë le para
ilë'aj le nupa tuá' dö' yödzölió ni,

ate' ilë'jadërë' le silá' que.

⁹ Neda' usiyóntica'sa' bönachi lë ni,

en gul-la' yöl-la' ba queë' Dios queë'
Jacob.

¹⁰ Ugüë' yöl-la' unná bë' quégaca nupa
tuá' dö'.

Quíxjé' tsaz yöl-la' unná bë' quégaca
nupa nácaté tsahui'.

76 Zxí'ini xi'sóe' Judá núnbë'gaquië'
Dios.

Nayépisë le lë' ladaj bönachi Israel.

²Zoa caz lataj lá'ayi queë' lu yödzö
Jerusalen,

ate' nazí'i le Sión lataj ga na' zoa cazë'.

³Ni' guditsjë' yugu' yaga lahui tuchi' zoa
guí' láhuiguequi,

enca' yugu' guíë la, en yugu' le ta'díl-
lalen bönachi lu gudil-la.

⁴¡Yöl-la' ba Li', Dios!

¡Nayépisëtëru' ca yugu' guí'a zxön!

⁵Buxicju' bönni' nál-lagaquië'.

Gudödi yëla guió'j lógaquië' bönni'
röjáquië' gudil-la,

en biti' guca ila'chisa ná'agaquië'.

⁶Cate' Li', Dios queë' Jacob, gudíl-lalen
cazu' légaquië'

gulátiba' böa', ate' gulati ca' nupa dxía-
gaca légacaba'.

⁷Li' caz ral-la' gádxitu',

tu' cabí gaca nu soa lo' cate' ilenu'.

⁸Ga zu' Li' yehua' yubá gunnó' uchi'a
usöróu' bönachi.

Ní'irö guladxi nupa nacuá' lu yu, en gu-
la'cuá' dxisö,

⁹cate' guzuínë' Dios para uchi'a usöróë'
quégaca bönachi,

para usölë' nupa náacagaca nöxaj ladxi'
yödzölió ni.

¹⁰Sal-la' ta'léde'e bönachi, gaca yöl-la'
ba queë' Lë'.

Uzi'ë xibégaca nupa ulu'gá'ana
ládjaguequi.

¹¹Guli'sí' lu ná'alí' bi gunlí' lahuë' Xanru'
Dios,

en guli'gún ca na' innalí'.

Yúgu'të nupa nacuá' ga na' zoë' ral-la' bi
ulu'nödzaj queë',

tu' náquië' Nu ral-la' gádxiru'.

¹²Ubéaj cazë' bö' náacagaca caz nupa
nadéli'gaca lataj lo.

Bönni' ta'nná bë'ë luyú ni tádxinë' Lë'.

77 Rulidza'-në' Dios, en ruá'a zidzaj
didza'.

Rulidza'-në' Dios, ate' riyönnë' chí'a.

²Cate' bi guca quia' bulidza'-në' Dios.

Chi'i dzó'ölö guchisa na'a lahuë', en biti'
busana' rulidza'-në'.

Biti' guca nu huë tsahui' neda'.

³Cate' röjneda'-në' Dios, rö'a böniga.

Cate' rinnë ládxa'a, ní'irö rudú ládxa'a.

⁴Bubéaj cazu' yëla guió'j lahua'.

Tu' ribó'a böniga biti' gaca gu'a didza'.

⁵Chiguzá' ládxa'a ca guca dza ni'te,
ca guca yugu' iz chigula'dödi.

⁶Tsöjneda' le bulá' chí'i dzó'ölö,

en tsöjsá' ládxa'a ca naca que, ate'
rinábini cuina':

⁷¿Naru' tsaz nusán Xanru' neda'?

¿Naru' cabirö uzá' ládxe'ë quia'?

⁸¿Naru' cabirö gáquië' dxi'i ladxi'?

¿Naru' cabirö tsöjnenë' le guzxi' lu në'ë
gunë'?

⁹¿Naru' nál-la ládxe'ë Dios tu' cabirö
ruzá' ládxe'ë queëru'?

¿Naru' bíti'rö huéchi' ládxe'ë rë'u tu'
rilenë'?

¹⁰Ní'irö gudxi cuina': Raca caní quia' tu'
risëbida' ládxa'a,

en que lë ni na' réquida' nadzá' yöl-la'
unná bë' queë' Dios nayépisë'.

¹¹Tsöjneda' yugu' le nun cazu' Li',
Xantu'.

Tsöjneda' yugu' yöl-la' huáca benu' dza
ni'te.

¹²Sa' ládxa'a ca náacagaca le nunu',
en cuéqui icja' ca náacagaca le runu'.

¹³Naca lá'ayi ca run cazu' Li', Dios.

Cúnturö nu zoa naca dios ca nacu' Li',
Dios queëtu'.

¹⁴Naca cazu' Li' Dios, runu' yugu' yöl-la'
huáca zxön.

Bulú'u lahui yöl-la' huáca quiu' lógaca
bönachi yúgu'të yödzö.

¹⁵Len yöl-la' huáca zxön quiu' busöló'
bönachi quiu',

nupa náacagaca zxi'ini xi'sóagaquië' Ja-
cob, en José.

¹⁶Bila'lé'e yugu' nísado' Li', Dios.

Bila'lé'e yugu' nísado' Li', en gula'bó'
böniga.

Gula'zxízilë'e yugu' nísado'.

¹⁷ Bulu'lalaj böaj lúzxiba nisa.

Lúzxiba xitsá' gunnëda' guziú'.

Guyëpi yösa ca yugu' yaga lahui tuchi'.

¹⁸ Lu bö' budunu' biyón guziú' quiu' gunnëda'.

Yösa gula'yëpi bulu'zení' luyú.

Gudódida' budó' zxu', en guzxizi luyú.

¹⁹ Bilá' lahui nöza quiu' gatsaj láhui'lö nísado',

ate' guzóa nöza ga gudödu' gatsaj láhui'lö nisa zila.

Biti' nalá' lahui na'a ga na' bulibu'.

²⁰ Guché' cazu' bönachi quiu' ca runë' bönni' riché'e-ba' bö'cu' zxila' hué'ënido'.

Guché'u léguequi lu ná'agaquië' Moisés, en Aarón.

78 Buli'zé nágali' le uzéajni'ida' libí'ili', bönachi quia'.

Buli'zé nágali' didza' gu'a.

² Usalja' ruá'a, en ucúdz'u'a didza'.

Gu'a didza' tu le nagachi' dza ni'te quez,

³ tu didza' chibiyönru', en núnbë'ëru', le gulé' xuz xtó'oru' rë'u.

⁴ Biti' ucáchi'ru' didza' na' lógacabi' zxf'iniru'.

Usiyönru' yugu' zxf'ini xi'sóaru' yöl-la' ba queë' Xanru',

ca naca yöl-la' huáca queë', en yugu' le zxön benë'.

⁵ Gudixjé' tu didza' naca bë' queë' Jacob, en nuzóë' le rinná bë'ë quégaca bönachi Israel,

le gunná bé'enë' yugu' xuz xtó'oru'.

Ulu'zéajni'inë' zxf'inigaquië' ca naca,

⁶ para ilúnbë'gacabi' le, bi'i si' zá'gacabi', enca' bi'i si' iláljabi',

para ulu'lu'íbi' ca' zxf'inigacabi' ca naca lë na' gunná bë'ë Dios.

⁷ Ulu'zxöni ládxi'gacabi' Dios,

en biti' gal-la ládxi'gacabi' yugu' le nunë' Dios.

Ilunbi' ca nácgaca le gunná bë'ë,

⁸ en biti' ilácagacabi' ca guláquië' xuz xtó'ogacabi'.

Guláquië' zidzaj ladxi' tu'

gula'dá'baguë'ë xtídzë'ë Dios,

en biti' guláquië' nöxaj ladxi',

ate' lu icja ládxi'do'gaquië' biti' gula'yéajlë'ë Dios.

⁹ Yugu' zxi'ini xi'sóë' Efraín guluá'gaquië' yaga uxiti',

pero bulu'zxúnnajë' lu gudil-la.

¹⁰ Biti' gula'dá'gaquië' didza' dzaga Dios bënlenë' légaquië',

en biti' gulunë' ca naca le gunná bé'enë' légaquië'.

¹¹ Gulal-la ládxi'gaquië' yugu' le benë' Dios,

en yugu' yöl-la' huáca zxön benë' lógaquië'.

¹² Benë' Dios le gulún ga bulu'báninë' xuz xtó'ogaquië'

luyú Egipto, en luyú Zoán.

¹³ Gusaljé' nísado', en benë' ga gula'dödë' gatsaj láhui'lö nísado' na'.

Benë' ga guca nísado' na' ca yugu' gu'ado' tsölá'a huéaj.

¹⁴ Bulu'inë' légaquië' nöza lahui' dza, bugunë' dxin tu böaj,

ate' chi'i dzó'ölö bugunë' dxin tu böaj ruzení' ca guí'.

¹⁵ Bulé'ë tu guió'j ga naca la' guixi' ga dë lataj,

en bë'ë le gulé'ajë' le guca ca tu nísado'.

¹⁶ Gulé'ajë' nisa yegu le gulén lu guió'jto'o.

Benë' ga birúaj nisa ca tu yegu zxön lu guió'jto'o na'.

¹⁷ La' ní'sö gulunë' dul-la' lahuë' Lë', en gula'dá'baguë'ë Dios nayépisëtë're' la' guixi' na'.

¹⁸ Lu icja ládxi'do'gaquië' gula'zí' bë'ë Dios quégaquië',

cate' gula'nábinë' Lë' ugahuë' légaquië' ca gula'zësö ládxi'gaquië'.

¹⁹ Ní'irö gula'nné' queë' Dios, gula'nné': "¿Naru' huáca cu'ë Dios le gáguru' la' guixi' ni ga dë lataj?

²⁰ Buli'yútsöca', bë'ë guió'jto'o, ate' birúajda' nisa,

le guca ca nisa yegu gubó'o zxön.
 ¿Naru' huáca gunnë' ca' queëru' yöta gáguru'?

¿Naru' gaca ugahuë' bönachi queë' le naca bëla'?"

²¹ Biyönnë' Xanru' Dios didza' ni, en guléde'enë',
 ate' gulén' tu gu' le buzegui zían zxf'ini xi'sóë' Jacob,
 tu' guléde'enë' bönachi Israel,
²² tu' cabí gula'yéajlë'ë Dios,
 en biti' bulu'zxöni ládxi'gaquië' Lë' usölë' légaquië'.

²³ Gunná bé'enë' Lë' yugu' böaj lúzxiba, en gusaljë' yehua' yubá.
²⁴ Gusól-lë'ë yöta maná le ilahuë', en bugahuë' légaquië' la' huagu que yehua' yubá.
²⁵ Gulahuë' bönni' ni' yöta tahuë' gubáz que yehua' yubá.
 Gusól-lë'ë guizxi yu le ilahuë'.

²⁶ Benë' ga guyecja bö' birúaj ga rilén gubidza,
 ate' len yöl-la' huáca queë' gunná bé'enë' bö' recja
 le birúaj tsölá'alö ga ridödi gubidza beo' ziaga.

²⁷ Benë' ga böxaj bëla' ca bëchtö yu ládjalö ga na' nacu'ë,
 le naca böa' zoa xfligacaba' guró'öba' ca yuzxi dë tu ra' yegu zxön.

²⁸ Benë' ga böxjagacaba' gatsaj lálhui'lö ga na' nacu'ë,
 en ládjagaca yugu' yu'u guídido' quégaquië'.

²⁹ Ca' guca, gulahuë', en bulu'huóljaj gula'dzé'enë',
 tu' bë'ë quégaquië' le gula'zësö ládxi'gaquië'.

³⁰ Zí'alö ca budxi bulu'huóljaj gula'dzé'enë',
 tsanni ni' yu' ru'ágaquië' le tahuë',
³¹ gulénë' Dios légaquië',
 en bëtië' bál-lagaquië', bönni' nál-latërögaquië' ládjagaquië',

en bucul-lë' bönni' Israel nayépisëtërögaquië'.

³² Sal-la' guca caní, gulunrë' dul-la',
 en biti' gula'yéajlë'ë Lë' ni'a quégaca le zxön benë'.

³³ Que lë ni na' benë' ga böáca nítisö dxin gulunë',
 ate' lu yöl-la' radxi gula'zöë' yugu' lu iz quégaquië'.

³⁴ Cate' bëtië' zióngaquië', ní'irö bulu'lidzë' Lë'.
 Bulu'bí'i ládxi'gaquië', en yöjtá'gaquië' Dios.

³⁵ Ní'irö yöjnéguequinë' náquië' Dios Nu run chi'i légaquië',
 en náquië' Dios nayépisëtërë' Nu böá'uö légaquië'.

³⁶ Gula'zí' yé'enë' Lë' len didza' gulu'ë,
 tu' gulu'ë diza' biti' nácatë lahuë' Lë' len ruá'agaquië'.

³⁷ Biti' gudá'gaquië' Lë' idú ládxi'gaquië',
 en biti' gulunë' ca rnna didza' dzaga na' bënlenë' légaquië'.

³⁸ Tu' buéchi' ládxe'ë Dios légaquië',
 buniti lahuë' ca naca xiguia' gulunë', en biti' busunítie' légaquië'.
 Bubequi lahuë' quégaquië', en bíti'rö gulénë' légaquië',
 en biti' benë' ca sa'yéaj yöl-la' ridzá'a queë'.

³⁹ Ca' guca, yöjnenë' nácaagaquië' bönáchisö.
 Nácaagaquië' ca tu bö' recja le ridódisö,
 en biti' rudxín.

⁴⁰ Zían luzuí gula'dá'baguë'ë Lë' ga na' naca la' guixi',
 en bulu'suhuf'inë' Lë' lu yu bidxi na'.

⁴¹ Zían luzuí gula'zí' bë'ë Dios,
 en gulunë' zi' Dios Lá'ayi quégaca bönachi Israel.

⁴² Biti' yöjnéguequinë' yöl-la' huáca zxön queë',
 le bulu'e lahui dza ni' böá'uë' légaquië'
 lu ná'agaca nupa biti' bila'lé'e légaquië' dxi'a,

43 cate' ni' benë' le gulaca bë' luyú
 Egipto,
 en benë' yugu' yöl-la' huáca queë' luyú
 Zoán,
 44 cate' benë' ga böáca nisa rön yugu' lu
 yegu luyú Egipto,
 enca' nisa yugu' lu beaj quégaquië' para
 cabí guca ilé'ajë' le.
 45 Gusól-lë'ë ládjagaquië' bótsugayu
 guizxi yu,
 böa' gula'guídxiba' légaquië'.
 Gusól-lë'ë ca' riu bulu'sunítiba' le nequi
 quégaquië'.
 46 Budödë' le naz nuzóagaquië' lu ruá'a-
 gacaba' böchi' zu,
 ate' guláguba' böchi' zu na' le rö'ö yugu'
 la' yëla quégaquië'.
 47 Busunítie' yugu' lubá uva quégaquië'
 len nisa guió'j yöla sunna na',
 en busunítie' yugu' yaga higo quégaquië'
 len bögui'.
 48 Bétië'-ba' böa'-bëdxi quégaquië' len
 nisa guió'j yöla sunna na',
 en lu yösa gula'yëpi.
 49 Lu yöl-la' rilé queë' gusól-lë'ë que-
 gaquië' yugu' lë ni,
 en lu yöl-la' ridzá'a queë' busaca' zi'ë
 légaquië',
 en gusól-lë'ë quégaquië' gubáz que
 yehua' yubá para bulu'sunítie'
 légaquië'.
 50 Biti' bubequi lahuë' quégaquië' para
 cabirö lenë' légaquië',
 en bití' buniti lahuë' légaquië' para cabí
 ilátie'.
 Budödë' légaquië' lu yöl-la' guti,
 51 en bétië' yúgu'tëbi' bi'i bönni' lo que-
 gaquië' bönni' Egipto,
 yugu' bi'i bönni' lo quégaquië' zxf'ini
 xi'sóë' Ham.
 52 Guché'ë bönachi queë' ca yugu' bö'cu'
 zxíla'do',
 en buluf'inë' légaquië' nöza la' guixi' ga
 dë lataj.
 53 Guché'ë légaquië' lu në'ë para cabí bi
 iládxinë',

pero gubaga' nísado' nupa bití' bila'lé'e
 légaquië' dxi'a.
 54 Ca' guca, guché'ë légaquië' ga zoa luyú
 lá'ayi queë',
 luyú ni bidéli'në' uláz quégaquië' len yöl-
 la' huáca queë'.
 55 Buláguí'ë bönachi izá'a luyú ni lógaca
 bönachi queë',
 en burixë' que quéégaquië' xiyúgaquië'
 ga ila'cu'ë,
 en benë' ga gula'cu'ë bönachi Israel
 yugu' lu yu'u guídido'.
 56 Le yúbölö gula'zíf bë'ë Lë', en gu-
 la'dá'baguë'ë Dios nayépisëtë'rë',
 en bití' gulunë' yugu' le gunná bé'enë'
 légaquië'.
 57 Bulu'huóa ládxi'gaquië', en
 bulu'cá'anë' Lë' ca gulunë' xuz
 xtó'gaquië'.
 Gula'dödë' tsólá'alö ca run tu yaga lahui
 tuchi' bití' nácatë li.
 58 Gulún lenë' Lë' tu' gulunë' xilátja-
 gaca budó' guió'j budó' yaga yugu' lu
 gu'fa,
 en gulunë' ga budúli'në' légaquië' ni'a
 quégaca budó' na'.
 59 Cate' bilé'enë' lë ni Dios, guléde'enë',
 en bud'ínë' bönachi Israel.
 60 N'í'rö bucá'anë' xilatjé' lu yödzö Siló,
 ga na' guzóa yu'u lá'ayi queë' ládja-
 gaquië' bönni' ni'.
 61 Bë'ë lataj gula'ché'ë bönni' zi'tu'
 gu'fina lá'ayi queë',
 gu'fina na' buluf'i lahui yöl-la' zxön
 queë'.
 62 Budödë' bönachi queë' lu ná'agaca
 nupa bétigaca léguequi,
 63 en gúquinë' zi' nupa nácagaca quez
 queë'.
 Buzegui tu gu'f zxön yugu' bi'i bönni'
 quégaquië',
 ate' cuntu nu bugá'ana nu ulu'tsaga
 na'lenbi' yugu' bi'i nigula ra'bando'.
 64 Yugu' bixúz quégaquië' gulátie' lu gufé
 tuchi',

ate' biti' guca ila'bódxinu nigula uzēbi
quegaquiē'.

⁶⁵ Ní'irō gúquiē' Xanru' ca tu bōnni'
rubanē' lu yōl-la' rasi.

Gúquiē' ca bōnni' rejē' gudil-la gudōdi
bē'ē gu'ē xisi lubá uva nál-la.

⁶⁶ Bulágui'ē yugu' bōnni' gula'díl-lalenē'
bōnachi queē',

en tsárido'os burixē' légaquiē'.

⁶⁷ Lēasca' budōdē' tsólá'alō yugu' zxf'ini
xi'sóē' José,

en biti' gurōē' yugu' zxf'ini xi'sóē' Efraín.

⁶⁸ Gurōē' yugu' zxf'ini xi'sóē' Judá,

en yōdzō Sión le nadx'í quezínē' Lē'.

⁶⁹ Ní' benē' tu lataj lá'ayi queē' le naca ca
tu gu'á zxōn,

le zoa tsutsu ca yōdzóliō ni nuzóē' tsaz.

⁷⁰ Gurōē' ca' David, huen dxin queē',

en bubéajē' lē' ga na' zoē' ruyiē'-ba'
yugu' bō'cu' zxíla'do'.

⁷¹ Bubéajē' lē' ga na' rapa chí'ē-ba' yugu'
bō'cu' zxíla' guná',

nacuá'aba' bōa' huē'énido' quégacaba',

para gáquiē' nu uyú bōnachi queē', yugu'
zxf'ini xi'sóē' Jacob,

en bōnachi Israel, nupa na' nácagaca
quez queē'.

⁷² Ca' guca, idú lādxē'ē buyiē' David bō-
nachi na',

en lu yōl-la' rácada' queē' guchē'ē lé-
gaquiē' lu nē'ē.

79 Dios, nacuá' bōnachi izá'a lu
xiyúgaca bōnachi quiu'.

Nucá'anagaca cá'asō yudo' lá'ayi quiu',
en nusunítigaca yōdzō Jerusalén.

² Bulu'cá'anē' bōnachi quiu' nátigaca
luyú para iláguba' bíchulab
léguequi,

en bēla' rōn quégaca huen xichinu' ga
iláguba' bōa' guixi' le.

³ Bulu'laljē' xichóngaca bōnachi quiu' ca
nisa idútē lu yōdzō Jerusalén,

ate' cuntu nu bugá'ana nu ucache'
léguequi.

⁴ Bōnachi yugu' dzaga luyú queé'tu' tu'ti-
taj netu'.

Tu'zxidxē', en tu'didza' yudxi netu'.

⁵ ¿Naru' tsaz ilenu' netu', Xan?

¿Naru' sóatica'sō yōl-la' rilé quiu' ca tu
gu' ruzegui netu'?

⁶ Gulégaca bōnachi yugu' yōdzō zi'tu'
biti' tun Li' bal,

enca' bōnachi biti' tu'lidza Li'.

⁷ Bétigaca bōnachi quiu' nácagaca zxf'ini
xi'sóē' Jacob,

en nusunítigaca xiyutu' ga zoa cazu' Li'.

⁸ Biti' gunu' netu' xiguia' tu' nōzi dul-la'
gulunē' xuz xtó'otu'.

Buéchi' ladxí' netu' na'a, tu' rudú
lādxí'tu'.

⁹ Gúcalen netu', Dios, Nu rusólá netu',
para guntu' bal Lo'.

Busólá netu', en buniti lo netu' ca naca
dul-la' nabága'tu' para idx'ítu' Lo'.

¹⁰ ¿Bizx que ta'nabi bōnachi yugu' yōdzō
izá'a netu',

ta'nná: "Gázxité zoa Dios queé'li'?"

Bē' lataj ilé'etu', en ben ga gaca bē' ló-
gaca yúgu'tē bōnachi

rizí' lo' nupa tu'lalaj xichóngaca huen
xichinu'.

¹¹ Buzé' nagu' ca ta'nné' lādxí'gaca nupa
nadzúngaca.

Len yōl-la' huáca zxōn quiu' busólá nupa
na' narugu quéguequi ilátigaca,

¹² en bubí' quégaca bōnachi yugu' dzaga
yōdzō queé'tu'

ia'gadxi cō'lō ca' tsca naca didza' zi' gu-
la'nné' quiu' Li', Xan.

¹³ Netu', bōnachi quiu', enca' bō'cu' zxíla'
ruyú cazu' Li',

guíética'stu' Li': "Xclenu",

en cú'utica'stu' Li' yōl-la' ba na'a dza, en
dza si' zaca.

80 Ruzé' nagu' netu', Dios, Nu rapa
chí' bōnachi Israel.

Nacu' Nu ruyú yugu' zxf'ini xi'sóē' José
ca nu ruyú yugu' bō'cu' zxíla'.

Buzení' queé'tu', Li' na' rō'u rinná bē'u ga
nacuá'

nupa nál-lágacatērō quiu' légaca
querubín.

² Buluf'i yöl-la' huáca quiu' lógaca zxf'ini
xi'sóagaquié' Efraín, en Benjamín,
en Manasés.

Gudá queétu', en busólá netu'.

³ Ben ga huécjatu' quiu' Li', Dios.

Buluf'i netu' nadxf'inu' netu', ate' ulatu'.

⁴ Xantu' Dios quéguequi ni'a no'o guizxi
yu,

¿gáca'xte caz ilenu' netu', en biti' yönnu'
le rulidztu' Li'?

⁵ Rugagu' netu' nisa ribödxí queétu',
en rugui'ju' netu' sizxöni nisa ribödxí.

⁶ Nunu' ga bönachi dzaga yödzo queétu'
tu'zxidxi queétu',
ate' nupa biti' ta'lé'e netu' dxi'a tu'titaj
netu'.

⁷ Ben ga huécjatu' quiu' Li', Dios quégaca
ni'a no'o guizxi yu.

Buluf'i netu' nadxf'inu' netu', ate' ulatu'.

⁸ Guléaju' tu lubá uva le nácatu' netu'
luyú Egipto.

Bulagu' bönachi izá'a yugu' lu yödzo
luyú ni, en budó'o lubá na' ni.

⁹ Buchi'u lataj ga guzxón lubá na'.

Benu' ga ben luí ga rë', ate' bulí idútë
luyú ni.

¹⁰ Gulú'u zxul-la lubá na' yúgu'të lu
guí'ado',

ate' ni'a në'e gula'baga' yugu' guí'a zxon.

¹¹ Gula'tunna ni'a në'e ga bidxintë ra'
nísado',

enca' ga bidxintë ra' yegu Eufates.

¹² ¿Bizx que buquínnaju' yugu' lë'aj
gulún chi'i lubá na',

en ru'u lataj nupa ta'dódisö ta'bán le
ribía lubá uva na'?

¹³ Tu'líbigacaba' cuchi guixi' le,

ate' táguba' böa' guixi' le.

¹⁴ Buécja queétu', Dios quégaca ni'a no'o
guizxi yu.

Ga ni' zu' yehua' yubá buyú ca raca que
lubá quiu', en busólá netu'.

¹⁵ Gudá dusóló' lubá ni budá' cazu',
le naca ca tu lubá hué'ëni buxón cazu'
Li'.

¹⁶ Nupa biti' ta'lé'e netu' dxi'a gula'chugu
ni'a në'e lubá na', en bulu'quela' le
guí'.

Buyú ca tun, en lu yöl-la' rilé quiu'
busuniti léguequi.

¹⁷ Gúcalen bönni' na' guró cazu' quiu',
netu', bönachi na' nuzóa cazu' tsaz quiu'.

¹⁸ Caní gaca, bíti'rö ucá'anatu' Li'.

Bunna queétu' yöl-la' na'bán, ate' uzxöni
ládxi'tu' Lo'.

¹⁹ Ben ga huécjatu' quiu' Li', Dios qué-
gaca ni'a no'o guizxi yu.

Buluf'i netu' nadxf'inu' netu', ate' ulatu'.

81 Lu yöl-la' rudzeja queéli' guli'gul-
la queé' Dios.

Lë' náquié' yöl-la' nál-la queéli'.

Lu yöl-la' rudzeja queéli' guli'códxí'a
lahuë' Dios queé' Jacob.

² Guli'gul-la tu le gúl-lali', cápa'li' lë'e
guídido'.

Guli'quinnaj lé'egaca bihuël-la.

³ Guli'códxí luzu chivo cate' zoa beo'
hué'ëni,

en cate' zoa beo' nál-la, en cate' raca laní.

⁴ Lë ni naca tu xibá quégaca bönachi
Israel,

le naca tu le gunná bé'enë' Xanru' Dios
zxf'ini xi'sóë' Jacob.

⁵ Gudixjë' le para gaca tu le gun ba nalí
queé' lógaca zxf'ini xi'sóë' José,

le gudixjë' cate' gudödë' luyú Egipto,
ga ni' biyönda' didza' izá'a biti'
guyéajni'ida'.

⁶ Rnnë' Dios: "Gudúa' yua' zxoá
ya'zxicjagaquié',

en bucuíta' le nuá'gaquié' le bulu'subaga'
légaquié'

nupa biti' bila'lé'e légaquié' dxi'a.

⁷ Bulídzali' neda' cate' bi guca queéli',
ate' busólá libí'ili'.

Bubi'a didza' cate' bi gunábili' neda', ni'
nucachi' cuina' tu lu böaj gasaj.

Guzxf' bë'a libí'ili' ga zoa nisa na' lë
Meriba.

⁸ Bulí'zé nágali', libí'ili', bönachi quia',
ate' uxösa' libí'ili'.

Raca ládxa'a uzé nágali' neda', bönachi Israel.

⁹ Biti' ral-la' soa tu dios izá'a ga na' zóali', en biti' gunli' zxon tu dios quégaca bönachi zi'tu'.

¹⁰ Neda', Xanli', naca' Dios queéli'.

Guléaja' libí'ili' luyú Egipto.

Guli'salaj ruá'ali', ate' cu'a ruá'ali' le gáguli'.

¹¹ Biti' bulu'zé nágagaca bönachi quia' chi'a.

Biti' gulún bönachi Israel ca rna xtídz'a'a.

¹² Que lè ni na' busán ládxa'a léguequi para gulún ca sa'yéaj yöl-la' ridá'baga' quéguequi,

en para gulún ca gula'za'sö ládxi'gaca.

¹³ Guzá' ládxa'a ulu'zé nágagaca bönachi quia' xtídz'a'a, para ilún bönachi Israel ca ré'enda' neda'.

¹⁴ La'tu' ilún caní, uxicja caza' nupa biti' ta'lé'e léguequi dxi'a,

en tül-lalena' nupa ta'díl-lalen léguequi.

¹⁵ Ulu'lufi' cuínguequi nupa biti' ta'lé'e neda' dxi'a,

ca nupa tun ca rna xtídz'a'a,

pero tsaz guna' léguequi xigua'.

¹⁶ Lésca' ugahua' libí'ili', bönachi quia', zxa' xtila dxi'ado',

en guna' ga huölaj idzé'eli' le zxixi que buz, le irúaj lè'e guió'j."

82 Zuínè' Dios ladaj nupa tu'dubi queé' ni' yehua' yubá.

Ruchi'a rusöröè' nupa ta'nná bè'.

² Rnnè: "¿Gáca'xte caz uchi'a usöróli' quégaca bönachi

lu yöl-la' biti' naca tsahui' queéli'?

Caní naca tu' rubéajli' tsahui' nupa tuá' dö'.

³ Buli'béaj tsahui' nupa ta'cuidi', en yugu' bi'i uzébi.

Guli'gún le naca tsahui' quégaca nupa ta'gu'i ta'zaca',

en quégaca nupa ta'yadzaj ta'yudxi.

⁴ Buli'sölá nupa ta'cuidi', en nupa náca-gaca yechi'.

Buli'sölá léguequi lu ná'agaca nupa tuá' dö'.

⁵ Biti' nóziguequi, en biti' ta'yéajni'i.

Ta'dá ga chul-la.

Rizxizi xilibi yödzölió."

⁶ Rna caza' neda': "Nácali' ca yugu' dios.

Nácali' yúgu'tèli' zxf'inè' Dios nayépisètèrè',

⁷ pero gátili' ca tati bönachi,

en ibixili' lu gudil-la ca ta'bixi zxf'inè' bönni' lo."

⁸ Guyasa, Dios, en buchi'a busöró qué-gaca bönachi yödzölió ni,

tu' náca-gaca queé cazu' yúgu'tè yödzö bönachi.

83 Biti' ugá'anu' dxisö, Dios.

Biti' su' dxisö, Dios, en biti' usayaj ru'u,

² tu' tu'tsatsa nupa ta'dá'baga' Li',

ate' nupa biti' ta'lé'e Li' dxi'a tun ba zxon cuínguequi.

³ Tun tuz xtídz'a'guequi bi ilún quégaca bönachi queé cazu',

en tu'pá yugu' le ilún quégaca nupa nadxfi' quézinu', ta'nná:

⁴ "Guli'dá, usunítiru' léguequi para cabirö ilaca tu yödzö bönachi,

en para cúnturö nu tsöjné bönachi Israel."

⁵ Núngaca tuz xtídz'a'guequi.

Nuzöagaca tsutsu xtídz'a'guequi ta'dá'baga' Li'.

⁶ Yugu' bönni' Edom, en yugu' bönni' Ismael,

en yugu' bönni' Moab, en yugu' bönni' Agar,

⁷ en yugu' bönni' Gebal, en yugu' bönni' Amón, en yugu' bönni' Amalec,

en yugu' bönni' Filisteo, en yugu' bönni' Tiro,

⁸ enca' yugu' bönni' Asiria núngaquiè' légaquiè' tsözxón.

Rácalengaquié' yugu' bönni' xzí'ini
xi'sóé' Lot.

⁹ Ben quégaquié' ca benu' quégaca bö-
nachi Madián, nupa na' busunítu'
dërö,

en ca na' benu' queé' Sísara, en ca na'
benu' queé' Jabín ra' yegu Cisón,

¹⁰ nupa na' busunítu' lu yödözö Endor,
ate' gulaca ca xiqué'ëba' bëdxi luyú ni'.

¹¹ Ben quégaquié' bönni' lo quéguequi
ca benu' quégaquié' Oreb, en Zeb,
en ben quégaquié' bönni' ta'nná bé'ené'
léguequi

ca benu' quégaquié' Zeba, en Zalmuna,
¹² nupa na' gula'nná: "Ilequi queéru'
yugu' lataj gapa na' gulequi queé' Dios."

¹³ Dios quia', ben ga ilácagaquié' ca
bëchtö yu le riché' bö',
en ca bëbu zxe café le ruá' bö' budunu'.

¹⁴ Ca run tu guí' zxön, ruzegui' yugu'
yaga zxön,

o ca run tu guí', ruzegui' tu guí'a zxön,
¹⁵ gusí regu' léguequi tu lu bö' budunu',
en ben gadxi léguequi tu lu nisa guiójsiu'
zili.

¹⁶ Ben ga ulu'tuf'i
para ulu'guilaj Li', Xan.

¹⁷ Ben ga ulu'tuf'i, en ila'bó' tsaz böniga.
Ben ga ulu'gá'ana cá'asö, en tsaz ila'niti,

¹⁸ para iléquite'e nayépisëtëru' tuzu' Li'
idütë yödzölió

en ulu'zóa zxíbiguequi lo', Xantu' Dios.

84 ¡Bica' lachi gapa zoa cazu' Li',
Dios!

¡Nacu' Xángaca ni'a no'o guizxi yu!

² Rizé ládxa'a soa' lu yu'u lidxu', Xana'
Dios.

Lu yöl-la' rudzeja quia' idú ládxa'a rul-la'
quiu' Li', Dios ban.

³ Bidzóliba' biguínni chulf' lataj ga
nuzóaba' lídxiba',

en bidzóliba' xiguichi guziú' ga
budxíaba' xicá'aba',

ga na' rigú'uba' biguínnido' queéba',
gala' ga dë lu bucugu quiu' Li', Xángaca
ni'a no'o guizxi yu.

Nacu' Nu rinná be'e neda', en nacu' ca'
Dios quia'.

⁴ ¡Bica' ba nupa ta'yaza lu yu'u lidxu'!

¡Ta'gú'utica'sö Li' yöl-la' ba!

⁵ ¡Bica' ba bönni' nápagaquié' yöl-la' nál-
la le nequi queé' cazu',

en ta'zé ládxi'gaquié' ila'yu'ë nöza le
ridxín yödzö Sión!

⁶ Cate' ta'dödë' lu yu bidxi tunë' ga
ruhuóaca gapa ralaj nisa beaj.

Tun ga rizí' xibé yu bidxi na' yugu' nisa
guió'j ta'dxin bayón.

⁷ Lu yöl-la' huáca quégaquié' röjáquié',
en tu'zírönë' yöl-la' huáca.

Ta'dxinë' yúgu'tëgaquié' lo' Li', Dios, lu
yödzö Sión.

⁸ Ruzé nagu' le rulidza' Li', Dios, Xángaca
ni'a no'o guizxi yu.

Ruzé nagu' neda', Dios queé' Jacob.

⁹ Buyúé' bönni' rinná bé'enë' netu', Dios.
Buyúé' bönni' na' nabó cazu'.

¹⁰ Nacarö dxi'a soa' tu dza lu yu'u lidxu'
ca le soa' idú chi gayuá' dza ga
yúbölö.

Cóa' zí'alö gaca' huen dxin ga nu riyaza
yu'u lidxë' Dios

ca le soa caza' tu yu'u zxön ga biti' zoa
Dios.

¹¹ Náquié' Xanru' Dios ca gubidza, en le
rusubín rë'u.

Xanru' caz runnë' queéru' yöl-la' ruzá'
ladxi' queé', en yöl-la' zxön queé'.

Biti' ugüé' nitú le naca dxi'a gapa nacuá'
nupa tun le naca tsahui'.

¹² ¡Li', Xángaca ni'a no'o guizxi yu,
bica' ba bönni' ruzxöni ládxi'ë Li'!

85 Buzá' ládxi'u quégaca bönachi
quiu', Xantu' Dios.

Buchë'u Li' xzí'ini xi'sóé' Jacob
gula'dzunë'.

² Buniti lo' bönachi quiu' ca naca xiguia'
gula'baga'.

Bucáchu'u yugu' dul-la' gulúngaca.

³ Buzóa dxíu' yöl-la' rilé quiu'.

Bugú' yöl-la' ridzá'a quiu'.

⁴ Buzóa netu' xilátjatu' le yúbölö, Dios,
Nu rusölá netu',
en bíti'rö lenu' netu'.

⁵ ¿Naru' tsaz ilenu' netu'?

¿Naru' tsaz ilenu' yugu' xzí'ini xsoatu'?

⁶ ¿Naru' cabí usabanu' ládxi'tu' le
yúbölö,

para udzeja ládxi'lentu' Li' netu', bö-
nachi quiu'?

⁷ Lu yöl-la' dxi'i ladxi' quiu' gúcalen
netu',

en busölá netu', Xan.

⁸ Uzé naga' didza' gu'ë Xanru' Dios.

Le guíë' bönachi queë' gun ga gaca dxi'a
quéguequi,

nupa na' náca gaca quez queë',

pero run bayúdx bití' ulu'huóa
ládxi'gaca.

⁹ Le nácatë chizóë' usölé' nupa tun Lë'
bal,

para soa yöl-la' ba queë' luyú queé'tu'.

¹⁰ Dzágagaca yöl-la' dxi'i ladxi', en le
naca idútë li.

Tagu zxixi luzé'eguequi nu naca tsahui',
en nu riböza dxi'a tsáhui'do'.

¹¹ Luyú caz rilén le naca idútë li,
ate' yehua' yubá rirúaj le naca tsahui'.

¹² Le nácatë Xanru' unödzejë' queéru' le
naca dxi'a,

ate' xiyuru' unödzej le uláparu'.

¹³ Le naca tsahui' röjnöru lahuë' Xanru',
en gun ga soa nöza gáti'tës ga ulibë'.

86 Ruzé nagu', Xana' Dios, en rubí'u
didza',

tu' zoa nu rusaca' zi' neda', ate' riyadzaj
riyúdxida'.

² Ben chí'i bö' naca caza', Dios, tu' naca'
quiu' Li'.

Busölá neda', huen dxin quiu', Dios quia',
tu' ruzxöni ládxa'a Li'.

³ Buzá' ladxi' quia', Xan,
tu' rulidza' Li' idú dza.

⁴ Ben ga udzeja ládxa'a neda', huen dxin
quiu',

tu' rigu'a lu no'o bö' naca caza', Xan.

⁵ Nacu' dxi'a, Xan, en chizú' uniti lo' bö-
nachi quiu'.

Nadxí'tica'su' yúgu'të nupa tu'lidza Li'.

⁶ Ruzé nagu' le rulidza' Li', Xan,
en ruí'i ládxi'u gunu' yugu' le inábida'
lo'.

⁷ Cate' bi gaca quia' ulidza' Li',
tu' ubí'i cazu' didza' bi gunu' quia'.

⁸ Cúnturö nu zoa ládjagaca dios nu naca
ca nacu' Li', Xan,

en bití' zoa ia'tú nu run ca náca gaca le
runu' Li'.

⁹ Ila'dxín bönachi yúgu'të yödzö
naguixju' Li', Xana' Dios,

en ila'yéaj ládxi'gaca Li', en ilún zxön
Lo'.

¹⁰ Nayépisëtërosu' Li', en tuzu' Li' runu'
yugu' yöl-la' huáca zxön.

Tuzu' Li' nacu' Dios.

¹¹ Busëdi neda' ca naca le ré'ënu' guna',
Xan.

Guna' ca naca le naca idútë li naguixju'
Li'.

Ben ga gádxida' Lo' idú ládxa'a.

¹² Idú ládxa'a guía' Li': "Xclenu'", Xana'
Dios,

en guna' zxön Lo' yugu' iz si' zaca.

¹³ Nadxí'ide'enu' neda',

en chíbusóló' bö' naca caza' lu lataj chul-
la ga nacua' nupa chinátigaca.

¹⁴ Dios quia', nupa ta'dá'baga' neda'
ta'díl-lalen neda',

ate' yugu' bönni' zidzaj ladxi' té'ënë'
ilútië' neda',

yugu' bönni' na' bití' tunë' Li' bal.

¹⁵ Nacu' Dios ruhuéchi' ládxi'u netu',
Xan, en ruzá' ládxi'u queé'tu'.

Ridzenu' para ilenu' netu', en
nadxí'ide'enu' netu', en runu' ca
rna xtídzu'u.

¹⁶ Buyú neda', en buzá' ladxi' quia'.

Butipa ládxa'a neda', huen dxin quiu',

en busölá neda', xzí'ininu nigula huen
dxin quiu'.

¹⁷ Bulufí' neda' tu le gaca bë' gaca dxi'a
quia',

para ila'lé'e le nupa bití' ta'lé'e neda'
dxi'a.

Ulu'tuí'i, tu' gúcalenu' neda',
en buë tsahú'u neda', Xan.

87 Nuzóë' Dios xilibi zó'ö que yödzo
queë' lu gu'á lá'ayi.

²Nadxf'irönë' Xanru' lataj ga na' tu'chi'a
tu'sörö bönachi Sión
ca nadxf'inë' ia'zica'rö lataj gapa nacuá'
bönachi Israel.

³Zián le lachi ta'nná bönachi ca naca
yödzo na' nequi queë' Dios.

⁴Cate' ulidza' bönachi núnbë'gaca neda',
Dios,
ulidza' bönachi nníta'gaca Egipto, en
Babilonia.

Ca naca quégaca bönachi Filistea, en
Tiro, en Etiopía
innía' nabábagaca yödzo lá'ayi na'.

⁵Cate' gu'a didza' que yödzo Sión innía':
Bönachi ni, en bönachi izá'a ni nabába-
gaca le,

ate' neda', Dios nayépisëtë'rë', uzóa'
tsutsu yödzo na'.

⁶Cate' ulabë' Xanru' nupa nácagaca
queë' innë':

“Bönni' ni nababë' yödzo quia'.”

⁷Ní'irö iluf'i didza' nupa tul-la, en nupa
tu'cödxí gui, ila'ná:

“Ruzí'itu' xibé tuzi yödzo ni.”

88 Xana' Dios, Nu rusölá neda',
rulidza' Li' rëla, en te dza.

²Bë' lataj idxín lo' le rulidza' Li'.
Ruzé' nagu' le rinaba yúdxida' Li'.

³Ruúbi ruguf'i ládxi'da'ahua',
en chizóa tsöjtsázia' lataj chul-la.

⁴Chinabábalena' nupa chinátigaca.

Naca' ca tu bönni' nudú dërö ládxe'ë,

⁵en nagá'anë' cá'asö ladaj nupa
chinátigaca,

en ca nupa dégaca yeru ba,
nupa na' bíti'rö röjnenu',
en nusán no'ó léguequi.

⁶Nuzú' neda' tu lu yeru zila,
ga naca chul-la, en le nácada' zila.

⁷Rilenu' neda',

en rusaca' zi'u neda' tu lu nísado' quiu'.

⁸Nucuásu' yúgu'të nupa núnbë'a.

Nunu' neda' ca tu le ta'guti bönachi.

Nadzuna', en bití' gaca irúaja'.

⁹Tu' riguf'i rizáca'a nudú guiój lahua'.

Tu dza tu dza rulidza' Li', Xan.

Richisa na'a zaca' ga na' zu'.

¹⁰¿Naru' guntso' yugu' yöl-la' huáca
zxön

para gácalenu' nupa chinátigaca?

¿Naru' ulu'yasa nupa yú'ugaca lataj
chul-la,

en ila'gú'u Li' yöl-la' ba?

¹¹¿Naru' ulu'luf'i lahui yöl-la' dxi'i ladxi'
quiu'

nupa nagáchi'gaca yeru ba?

¿Naru' ulu'luf'i lahui nupa yú'ugaca lataj
chul-la

ca runu' ca rnna xtídz'u?

¹²¿Naru' gaca bë' le zxön runu' ga na'
naca chul-la?

¿Naru' gaca bë' nacu' tsahui' ga na' cuntu
nu bi röjné?

¹³Rulidza' Li' neda' para gácalenu' neda',
ate' yugu' zila ridxín lo' le rinábida' Li'.

¹⁴¿Bizx que nusán ládxi'u neda', Xan?

¿Bizx que rucachi' lo' lahua' neda'?

¹⁵Riguf'i rizáca'a, en chizóa gátia' ga
gudela' naca' bí'ido.

Réquida' zi' tu' ruxösu' neda', en rudú
ládxa'a.

¹⁶Nabága'a neda' yöl-la' rilé quiu',

ate' chizóa usuniti neda' le ruxösu' neda'.

¹⁷Idú dza naca quia' ca nabaga' neda'
nisa.

Nagú'ugaca neda' lé'ajllo yugu' nisa.

¹⁸Nucuásu' ga zoa' nu nadxf'i neda', en-
ca' luzá'a.

Zóalensö le naca chul-la neda'.

89 Gúl-latica'sa' ca naca yöl-la' dxi'i
ladxi' quiu', Xan.

Usiyönda' zxf'ini xsoatu' ca runu' ca rnna
xtídz'u.

²Gunnía': “Sóatica'sö yöl-la' dxi'i ladxi'
quiu'.

Tsaz naca bë' yehua' yubá ca runu' ca rna xtídz'u."

³Rnnë' Dios: "Naguixja' tsaz didza' dzaga núlnena' nupa nabó caza' quia'.

Bena' tsutsu xtídz'a'a ca guna' queë' David, huen dxin quia'.

⁴Gunní'a: Ucuá'a tsaz xzí'ini xi'sú'.

Guna' ga sóatica'sö nu inná bë' uláz quiu'."

⁵Nupa nacua' yehua' yubá quiu' ila'gú'u yöl-la' ba le nunu' le tun ga rubáni-tu', Xan.

Ga nudúbigaca nupa nácgaca quez quiu' ila'gú'u yöl-la' ba ca runu' ca rna xtídz'u.

⁶¿Nuzxi caz zoa ni' yehua' yubá naca ca nacu' Li', Xan?

¿Nuzxi caz zoa ladaj nupa nayépisëgaca naca ca nacu' Li', Xan?

⁷Nupa nácgaca lá'ayi tun Li' bal, Dios.

Ral-la' gúnrröru' Li' bal ca tun nupa nacua'len Li'.

⁸Dios, Xángaca ni'a no'o guixzi yu, ¿nuzxi caz naca ca nacu' Li', Xantu' nayépisëtërou'?

Naca bë' rúntica'su' ca rna xtídz'u.

⁹Rinná be'e quézinu' le riyasa ridxía que nísado'.

Cate' riyasa ridxía nísado', ruzóa cazu' le dxisö.

¹⁰Busuniti cazu' bönachi Egipto, ate' gulara ca nupa chinátigaca.

Bësilásiu' léguequi len no'o nál-la.

¹¹Nequi quiu' yehua' yubá, en nequi ca' quiu' luyú ni, tu' nuzóa cazu' léguequi.

¹²Naguixaj cazu' le dë tsölá'a ga za' bö' ziaga,

en le dë tsölá'a ga ridödi gubidza beo' ziaga.

Lu yöl-la' rudzeja quéguequi ta'bódxí'a guí'a Tabor,

en guí'a Hermón cate' ta'yöni Lo'.

¹³¡Nál-latëro naca no'o!

¡Nápatëro no'o yöl-la' huáca!

¡Nayépisëtëro no'o ibëla!

¹⁴Le naca dxi'a, en le naca tsahui' tun tsutsu le rinná bë'u.

Nacuá'len Li' yöl-la' dxi'i ladxi', en le naca idútë li.

¹⁵Bica' bágaca nupa ta'yöni didza' que yöl-la' rudzeja.

Ta'dá lu bení' que lo', Xantu' Dios.

¹⁶Idú dza tu'dzeja tu' zóalen Lo' léguequi,

en tu' zóalen léguequi le naca tsahui' quiu', le nayépisëtëro.

¹⁷Naca cazu' Li' yöl-la' zxon que yöl-la' huáca quéguequi,

en tu' ruzá' ládxu'u queëtu' nazxonnda' yöl-la' nál-la queëtu'.

¹⁸Nequi queë' Xanru' le run chi'i rë'u, ate' néquinë' queë' Dios bönni' rinná bë'enë' rë'u.

Dios na' náquië' lá'ayi ladaj bönachi Israel.

¹⁹Dza ni'te bé'lenu' nupa néquiguequi quiu' didza'

lu yugu' le bulufínu' léguequi, gunnó': "Gúcalena' tu nu nayépisëtëro.

Nuchisa' tu nu guró caza' quia' ladaj bönachi.

²⁰Budzólida'-në' David, huen dxin quia'. Gulu'a-në' le za le naca lá'ayi quia'.

²¹Len na' caza' naguixja' lë', ate' len na'a ca' utipa' ládxë'ë.

²²Biti' si' ye'e lë' nu rilé lë', en biti' usaca' zi' lë' nu ruá' dö'.

²³Uquínnaja' lahuë' nupa ta'díl-lalen lë', en gu'a nupa biti' ta'lé'e lë' dxi'a.

²⁴Sóalena' lë' lu yöl-la' run ca rna xtídz'a'a,

en lu yöl-la' dxi'i ladxi' quia',

ate' tu' ulidzë' La', uxöna' yöl-la' nál-la queë'.

²⁵Guna' ga inná bë'ë ga naguela' ra' nísado',

ga idxintë ra' yegu Eufrates.

²⁶Ulidzë' neda', innë': Li' nacu' Xuza', en Dios quia',

enca' Nu run chi'i neda', en Nu rusölá neda'.

²⁷ Gun caza' neda' ga gáquië' ca bi'i lo queë caza',

ate' tsépisëtëré' ca yugu' bönni' ta'nná bë'ë yödzölió.

²⁸ Lu yöl-la' dxi'i ladxi' quia' gun chí'iti-ca'sa' lë', en uzóa' tsaz queë' didza' dzaga quia'.

²⁹ Ucuá'a tsaz zxf'ini xi'sóë', ate' sóatica'só lataj ga inná bë'ë, tsca soa yehua' yubá.

³⁰ Channö ulu'cá'anë' zxf'ini xi'sóë' xibá quia',

en cabí ilunë' ca naca le buchi'a busöróa', ³¹ en channö ila'guitsjë' xibá que le gunná bë'a,

en cabí ilunë' ca nácagaca le gunná bë'eda' légaquië',

³² ní'irö guna' légaquië' xigua' ca sa'yéaj le ta'dödi bë' tunë',

en gu'a léguequi ca naca xigua' nabága'gaquië'.

³³ Pero biti' ugúa' queë' yöl-la' dxi'i ladxi' quia',

en biti' usana' guna' ca rnna le guzxi' lu na'a guna'.

³⁴ Biti' ucá'ana' cá'asö didza' dzaga nuna',

en biti' utsá'a didza' bë'a.

³⁵ Tu le nuzóa' tsutsu, en nuna' ba nalí que le naca lá'ayi quia'.

Biti' ca' si' yé'eda' David.

³⁶ Gunnía' ila'cuá'tica'së' zxf'ini xi'sóë', en ga rö'ë rinná bë'ë sóatica'sö lahua' ca gubidza.

³⁷ Naguixja' le tsaz ca nuzóa' tsaz beo', ate' nacuá'tica'sö lúzxiba le tun ba nalí."

³⁸ Pero nuzú' tsölá'alö, en nusán ládxu'u, en riléde'enu' nupa na' guró cazu' quiu'.

³⁹ Nuzú' tsölá'alö didza' dzaga bénlenu' huen dxin quiu'.

Nuzötju' luyú yöl-la' unná bë' queë'.

⁴⁰ Nuquínnaju' zö'ö gulún chi'i lë', en nusunítuu' yugu' lataj tsutsu queë'.

⁴¹ Yúgu'të nupa ta'dódisö ta'bán le nequi queë',

ate' bönni' dzaga yu'u queë' tu'cá'ana lë' cá'asö.

⁴² Nuchisu' nupa ta'dá'baga' lë', en runu' ga tu'dzeja nupa biti' ta'lé'e lë' dxi'a.

⁴³ Runu' ga biti' sequi' idéli'në' lu gudil-la,

ate' cuntu nu sequi' ucul-lë' lu gudil-lana'.

⁴⁴ Bugú' yöl-la' lachi queë', en nuzötju' yöl-la' unná bë' queë' lu yu.

⁴⁵ Benu' ga chinagulë' sal-la' ni zoë' iz cuidi',

en nunu' ga rutuf'inë'.

⁴⁶ ¿Gáca'xte caz gunu' caní, Xan?

¿Naru' tsaz nucachi' lo'?

¿Naru' gácativa'sö yöl-la' rilé quiu' ca tu gu' réguede'e?

⁴⁷ Yöjné nabábasö iz soa' ibana', en tu chí'isö nacuá' bönachi yödzölió ni.

⁴⁸ ¿Nuzxi caz bönni' gaca sóatica'së' ibanë', en cabí gátië'?

¿Naru' huáca usölá cuin cazë' lu yöl-la' unná bë' que lataj chul-la?

⁴⁹ ¿Gázxitë zoa yöl-la' dxi'i ladxi' quiu' guzóa zí'alö, Xan,

lë na' buzú' tsutsu xtídzuu' gunu' queë' David,

len yöl-la' run ca rnna xtídzuu'?

⁵⁰ Yöjné ca tu'cá'ana cá'asö netu', huen dxin quiu', Xan,

enca' ca tu'cá'ana neda' cá'asö bönachi zían yödzö izá'a.

⁵¹ Tu'cá'ana neda' cá'asö nupa biti' ta'lé'e Li' dxi'a, Xan.

Tu'cá'ana cá'asö yugu' le runa' neda', bönni' guró cazu' quiu'.

⁵² ¡Yöl-la' ba Xanru' Dios iz si' zaca!

¡Ca' gaca! ¡Ön, ca' gaca!

90 Naca cazu' Li', Xan, ca yu'u lidxa'.

² Zí'atëlö ca gulata' yugu' gu'a, o ca guta' yödzölió, ga naguela' cate' gusi lo ga idxintë dza udxí, tsaz naca cazu' Dios.

³Runu' ga tu'huóaca bönachi bëchtö yu cate' rnno':

“Guli'huóaca le néquinili', bönachi.”

⁴Quiu' Li' chi gayuá' iz nácagaca

ca dza neje le chigudödi que,

o ca tu chí'isö chí'i dzó'ölö.

⁵Bugacu' bönachi ca tu lu yegu gubó'o, ate' gúcgaca ca tu yëla rineru'.

Cate' naca zila zéaj naca ca tu guíxi'do' rilentë luyú.

⁶Cate' naca lahui' dza rizxón, en rö' ni'a në'e,

pero cate' chiral-la, ricuadi', en ridödi que.

⁷Rinfítitu' tu' rilenu' netu', ate' tu' ridzó'o ruúbi ruguf'itu'.

⁸Nuzú' lo' xigua' nabága'tu', en nubéaju' lu ben' quiu' dul-la' yu'u ládxi'do'otu'.

⁹Tu' riléde'enu' netu' ridödi quégaca dza queéту',

ate' chibú'u iz queéту' ca tu le rinné ládxi'tu'.

¹⁰Tsónnalalaj yu' chi ízisö zóatu' nabantu',

o channö nál-latu', huazóatu' idú tá-palalaj iz,

pero runtu' dxin bayudxi, en ruhu'finitu' yugu' iz na',

tu' ridödité quéguequi iz na', ate' uzá'atu'.

¹¹¿Nuzxi caz réajni'i tscá naca yöl-la' rilé quiu'?

¿Nuzxi caz nözi ca naca tsöbi yu'u nu na' rilenu'?

¹²Que lë ni na' busëdi netu' para guéquibe'etu' tscá gácagaca iz zóatu',

para gácatu' bönachi ta'yéajni'i lo' Li'.

¹³¿Gáca'xte caz biti' huéchi' ládxi'u netu', Xan?

Buéchi' ladxi' netu', yugu' huen dxin quiu'.

¹⁴Tu zila tu zila buluf'i netu' ca naca yöl-la' dxi'i ladxi' quiu',

para gúl-latu' lu yöl-la' rudzeja queéту', en uzí'itu' xibé yugu' dza na'.

¹⁵Ben ga udzėjatu' tscá chigulaca dza busaca' zi'u netu',

en tscá gulaca iz biti' guca dxi'a queéту'.

¹⁶Bulu'f'i netu', yugu' huen dxin quiu', ca naca le nunu',

en buluf'i zxi'initu' ca naca yöl-la' zxón quiu'.

¹⁷¿Buzá' ladxi' queéту', Xantu' Dios,

en ben ga írúaj dxi'a dxin runtu'!

¿Ön, ben ga gaca dxi'a lo' dxin runtu'!

91 Nu bönni' ruzxöni ládxi'ë Dios para gun chi'ë lë',

en rizi'ë Dios Nu napa idütë yöl-la' huáca, para gácalenë' lë',

²gaca guië Xanru': “Nacu' Nu run chi'i neda', en Nu ruzóa neda' tsutsu.

Nacu' Dios quia', ate' ruzxöni ládxi'a Li'.”

³Usölá cazë' Dios Li' lu du yalaj que nu rizón bönachi,

en lu yödzhué' le rusuniti.

⁴Usubáguë'ë li' ca rusubága'ba böra yugu' bórado' queéba',

ate' gaca chi'u lu në'ë ca raca quégacaba' bórado' zxan xílaba' yöjede.

Le run chi'i rë'u, en le ruzóa rë'u tsutsu naca yöl-la' run ca rnna xtídzë'ë

cheë'.

⁵Biti' gádxinu' le run gadxi bönachi chi'i dzó'ölö,

en biti' gádxinu' yaga lahui' tuchi' tu'sé bönachi lahui' dza,

⁶en biti' gádxinu' yödzhué' le rilén ga naca chul-la,

en biti' gádxinu' le naca xihui' le ruti bönachi lahui' dza.

⁷Ilátigaca chi gayuá' bönachi cuitu' li',

en ia'chí cö' chi gayuá' cuitu' ibëla,

pero biti' bi gaca quiu' li'.

⁸Le nácate' uyú iná'asu',

en ilé'enu' le rub'i quégaca nupa tuá' dö'.

⁹Tu' nuzú'-në' Xanru' Nu run chi'i li',

nuzú'-në Dios nayépisëtëre' Nu gácalen li',

¹⁰ bití' bi gaca quiu' le cabí naca dxi'a, en nitú le naché' yödzhüé' bití' tsu'u lidxu',

¹¹ tu' cu'u cazé' Dios lí' lu ná'agaquié' gubáz lá'ayi queé', para ilún chí'ë lí' gátí'tës ga ridó'.

¹² Lu ná'agaquié' ila'ché'ë lí', para cabí tsøjchégu'u guió'j.

¹³ Uléaj ulibu' bédxi guixi', en bëla sínia'. Usunu' lë'e labu' bédxi guíxi'do', en bëla xitsin'.

¹⁴ Rnnë' Dios: "Nadxi'inë' neda', ate' que lë ni na' usölá' lë'.

Uzóa'-në' tsaz xitsá'tërö tu' núnbë'ë La'.

¹⁵ Ulidzë' neda', ate' ubi'a didza'.

Sóalena' lë' cate' bi gaca queé'.

Usölá' lë', en guna' lë' bal.

¹⁶ Uzánda'a dza soé' ibané', en ulu'ida'-në' ca gaca usölá' lë'."

92 ¡Bica' tsahui' naca rigú'tutu' Lí' yöl-la' ba, Xan, en rúl-latu' le tun Lí' bal, Dios nayépisëtëre',

² en rusiyöntu' bönachi yugu' zila ca ruhuéchi' ládxi'u netu', en rulu'ítu' lahui yugu' dzó' ca runu' ca rna xtídzu'!

³ Rúl-latu' len yugu' bihuël-la, en rúl-latu' yugu' le lachi ca tul-la.

⁴ Le zxön nunu' Lí', Xan, run ga rudzëjatu',

ate' ruzi'tu' xibé le núngaca lu no'o.

⁵ Bica' zxön ná'agaca le nunu' Lí', Xan.

Zxóntërö le rizá' ládxi'u gunu'.

⁶ Zoa tu le cabí gaca inózinë' bönni' nazxi icjé',

en bití' gaca tséjni'inë' bönni' canóz le.

⁷ Nupa nucá'anagaca Dios ila'yán ca ta'yán guíxi'do',

en ulu'zí' xibé le tun nupa tuá' dö', pero ila'niti tsaz,

⁸ tu' nayépsëtëru' Lí' tsaz, Xan.

⁹ Naca bë' le gaca quégaca nupa bití' ta'lé'e Lí' dxi'a, Xan.

Naca bë' ila'niti nupa bití' ta'lé'e Lí' dxi'a. Ulu'gá'ana cá'asö yúgu'të nupa tuá' dö'.

¹⁰ Nunu' ga nácatëra' nal-la ca ná'caba' bédxi.

Nagú'u neda' le za le run ga rudzëjada'.

¹¹ Ilé'e quézida' cate' uxicju' nupa bití' ta'lé'e Lí' dxi'a,

en yönda' cate' ila'bödxi yechi' nupa tuá' dö', nupa na' ta'díl-lalen neda'.

¹² Ila'yán nupa ná'agaca tsahui' ca ta'yán yaga zina' ca'.

Ila'zxón ca ta'zxón yaga ró'gaca lu gu'fa Lí'bano.

¹³ Ná'agaca ca yaga nudá'gacu' ra' yu'u lidxu', Xan,

le ta'zxón lu lö'a lataj quiu', Dios queé'tu'.

¹⁴ Cate' ni' yú'ugaca iz zían ila'bía le zxixi quéguequi.

Ilá'agaca tsutsu, en ila'cuá'tica'sö ya'a.

¹⁵ Caní gaca para gaca bë' ná'quié' tsahui' Xanru', Nu run chí'i neda'.

Bití' bi zóalen Lë' le cabí naca tsahui'.

93 ¡Rinná bë'ë Xanru'!

¡Ná'cué' yöl-la' ba zxön queé'!

¡Ná'cué' zxé' Xanru', en nú'guié' lë'ë yöl-la' unná bë'!

¡Nuzóé' tsutsu yödzhölió, ate' bití' utá cuini!

² ¡Tsaz nuzú' tsutsu ga rö'u rinná bë'u, Xan,

en zóatica'su' Lí'!

³ Riyasa ridxía nisa yugu' lu nísado', Xan. Riyasa ridxía nisa, en ru'u bö que.

Riyasa ridxía nisa yugu' lu nísado', en yugu' lu yegu.

⁴ Xanru' Dios yehua' yubá nápatëre' yöl-la' unná bë'

ca bö ru'u lu nísado' le riyón ca guziú' rinné,

enca' ca le riyasa ridxía nisa lu nísado'.

⁵ Tsaz naguixju' xibá quiu', Xan,

ate' idú lá'ayi naca ga zoa cazu' Lí'.

Caní zóatica'sö na'a dza, en dza si' zaca. **94** Nacu' Dios, Xan, Nu ruzí' lëbi bönachi.

Bulu'í' cuinu', Dios, Nu ruzí' lëbi.

² Ruchi'a rusoró casu' yúgu'tè bönachi.
Guzé, ate' len yöl-la' huáca zxon quiu'
bubí' quégaca nupa tun ba zxon
cuínguequi.

³ ¿Gáca'xte caz ulu'z'í' xibé nupa
tu'cá'ana Li', Xan?

¿Gáca'xte caz ulu'z'í' xibé?

⁴ ¿Gáca'xte caz ilún ba zxon cuínguequi,
en ilu'í' didza' zi'?

¿Gáca'xte caz ilún ba zxon cuínguequi
ní'a que dö' tu'ágaca?

⁵ Tu'sunfítië' nupa néquiguequi quiu',
Xan.

Tu'saca' zi'ë nupa néquiguequi quez
quiu'.

⁶ Tútigaquië' nigula uzébi, enca' yugu'
bi'í' uzébidó',
en tunë' le naca xihui' ladaj bönachi
zi'tu'.

⁷ Ta'nné': "Biti' ilé'enë' Xángaquië' rë'u,
en biti' ru'í' ládxi'ë Dios queë' Jacob lë
ni."

⁸ Guli'tséajni'i, bönachi biti' nózguequi,
ate' lib'íli', bönachi catún bal, ¿bátaxi
tséajni'íli'?

⁹ Benë' Dios guídi nágaru'. ¿Naru' cabí
riyón quézinë'?

Benë' Dios guió'j loru'. ¿Naru' cabí rilé'e
quézinë'?

¹⁰ Ruzéajni'i quézinë' Dios bönachi
yúgu'tè yödzo.

¿Naru' cabí gunë' léguequi xiguia'?
Ruchiza cazë' icja ládxi'do'oru' yöl-la'
réajni'í.

¿Naru' cabí réquibe'enë' bi runli'?

¹¹ Nóz quézinë' Xanru' yugu' le ta'zá'
ládxi'gaca bönachi.

Nózinë' canóz naca le ta'zá' ládxi'gaca.

¹² Bica' ba bönni' na' ruzéajni'í quézinu'-
në', Xan,

en rusedi quézinu'-në' ca naca xibá
naguixju' Li'.

¹³ Gunu' ga uz' ládxi'ë cate' bi gaca
queë',
ga idxinrö dza tsú'ugaca yeru ba nupa
tuá' dö'.

¹⁴ Biti' usán në'ë Xanru' bönachi queë',
en biti' ucá'anë' nupa néquiguequi quez
queë'.

¹⁵ Ca naca le naca tsahui' uchi'a usöröë'
rë'u le yúbölö,
ate' ulu'z'í' xibé nupa nácgaca tsahui'.

¹⁶ ¿Nuzxi caz tíl-lalen nupa tuti bönachi
para gácalen neda'?

¿Nuzxi caz gácalen neda' cate' nacua'
nupa tuá' dö' quia'?

¹⁷ La'tu' cabí gúcalenë' Xanru' neda',
la' yójtú'utea' lataj chul-la que yöl-la'
guti.

¹⁸ Gunnía': "Chizóa' ibixa",
ate' lu yöl-la' dxi'í ladxi' quiu' guzxönu'
neda', Xan.

¹⁹ Cate' ruúbi rugu'í ládxi'da'ahua',
ruhué tsahú'u neda', en runu' ga
rudzējada'.

²⁰ Biti' ca' gunu' tsözxón nupa tu'chi'a
tu'soró netu' ca naca le cabí naca
tsahui',

nupa na' tu'béaj tsahui' le cabí naca
tsahui'.

²¹ Tu'dubë' tsözxón para ilútië' nupa
nácagaca tsahui',

en ta'chúguië' quégaca nupa biti' bi
nabága'gaca ilátigaca,

²² pero run chi'í cazë' Xanru' Dios neda'.
Nuzóë' neda' tsutsu, ate' ruzxóni ládxa'a
lë'.

²³ Ubi'ë quégaquië' ca naca dö' tu'ë,
en usunítië' légaquië' tu' nözi xiguia'
nabága'gaquië'.

Usunítië' dërö Xanru' Dios légaquië'.

95 Guli'dá, gúl-laru' queë' Xanru' lu
yöl-la' rudzeja queëru'.

Lu yöl-la' rudzeja queëru' códxi'aru' que
Nu na' naca ca tu guió'jto'o ga
nuláru'.

² Uyéajru' lahuë', en guiéru'-në':
"Xclenu'."

Lu yöl-la' rudzeja queëru' códxi'aru'
lahuë', gúl-laru' yugu' salmo.

³ Xanru' Dios náquië' Dios nayépisëtërë'.

Nápatērē' yöl-la' unná bē' ca yúgu'tē dios izá'a.

⁴ Lu na' cazē' yu'u le dē ga rē' zxan luyú, ate' néquiquequi ca' queē' guí'a sibi.

⁵ Nequi queē' nísado', tu' nun cazē' le, en len ná'asē' benē' luyú bidxi.

⁶ Guli'dá, gunru'-nē' zxön, en uzóa zxfbiru' lahuē'.

Uzóa zxfbiru' lahuē' Xanru' Nu ben rē'u.

⁷ Naca cazē' Lē' Dios queéru', ate' nácaru' bönachi rugagu cazē', en ca bö'cu' zxila' riché' cazē'-ba' lu nē'ē.

Rnna cazē' Dios: "Na'a, channö ré'énili' yónili' chí'a,

⁸ biti' gunli' zidzaj icja ládxi'do'oli' ca gulunē' xuz xtó'oli' lataj na' lē Meriba, en calēga ca gulunē' la' guixi' ga dē lataj lē Masa,

⁹ cate' ni' gula'zí' bē'ē xuz xtó'oli' neda'. Gula'zí' bē'ē neda' sal-la' bila'lé'enē' yugu' le bena'."

¹⁰ Idú choá' iz gúquida' zi' bönachi gula'cuá' dza ni', ate' gunniá': "Ta'chixi ta'níguinē' lu icja ládxi'do'gaquiē',

en biti' nózguequinē' le ré'ēnda' ilunē'."

¹¹ Que lē ni na' lu yöl-la' rilé quia' bena' tsutsu xtídza'a,

gunniá': "Biti' ca' ila'yáziē' ga ulu'zí' ládxi'ē tsözxön len neda'."

96 ¡Guli'gul-la queē' Xanru' tu le cubi!

¡Guli'gul-la queē' Xanru', yúgu'tēli' zóali' yödzölió!

² ¡Guli'gul-la queē' Xanru'! ¡Guli'gún zxön lē'!

Tu dza tu dza buli'siyón bönachi didza' dxi'a ca rusolé' rē'u.

³ Buli'siyón bönachi yúgu'tē yödzö yöl-la' ba queē'.

Buli'siyón yúgu'tē bönachi le nácgaca zxön nunē'.

⁴ Zxöntērö náquiē' Xanru', ate' runda' bayúdx cú'uru'-nē' yöl-la' ba.

Ral-la' gádxitēru' Lē' ca tadxi bönachi izá'a dios quéguequi.

⁵ Yugu' dios quégaca bönachi izá'a nácgacasö budó' guiój budó' yaga, pero Xanru' Dios nunē' lúzxiba xitsá'.

⁶ Nacuá' yöl-la' bení', en yöl-la' ba lahuē' Lē'.

Nacuá' yöl-la' huáca, en yöl-la' lachi ga zoa cazē'.

⁷ ¡Guli'cu'ē Xanru' yöl-la' ba, bönachi yúgu'tē yödzö!

¡Guli'cu'ē yöl-la' ba, en yöl-la' huáca!

⁸ ¡Guli'cu'ē Xanru' yöl-la' ba ni'a que Lē'!

¡Guli'guá' le unódzjali', en guli'dá lahuē'!

⁹ ¡Guli'gún Lē' zxön, náculi' le naca ba'a! ¡Guli'zxizi lahuē', bönachi idútē yödzölió!

¹⁰ Guli'nná lógaca bönachi yúgu'tē yödzö: "Rinná bē'ē Xanru'.

Naguixjē' tsaz luyú, ate' biti' utá cuini. Ca naca le naca tsahui' uchi'a usöröē' quégaca yúgu'tē bönachi."

¹¹ Ral-la' udzeja lúzxiba, en ulu'zí' xibé luyú.

Ral-la' códxi'a nísado', en ila'bödxi yúgu'tē le nacua' lu nísado'.

¹² Ral-la' udzeja guixi' caz, en yúgu'tē le nacua' la' guixi'.

Lu yöl-la' rudzeja quéguequi ilúl-la yaga

¹³ lahuē' Xanru', tu' sí' ulé'.

Guídē' duchi'a dusöröē' nupa nacua' yödzölió.

Ca naca le naca tsahui' uchi'a usöröē' quégaca yúgu'tē bönachi,

enca' quégaca bönachi yúgu'tē yödzö para ilunē' ca rnna xtídzē'ē.

97 ¡Rinná bē' cazē' Xanru' Dios!

¡Ral-la' ulu'dzeja bönachi idútē yödzölió!

Buli'sí' xibé', libí'ili' zóali' yúgu'tē yödzö izá'a.

² Ró'gaca böaj, en le chul-la idú gásibi'ilö ga na' zoē'.

Le naca dxi'a, en le naca tsahui' tu'zóa tsutsu le rinná bē'ē.

³ Rinöru tu guí' zxön lahuē', le uzegui' nupa ta'dá'baga' Lē'.

⁴ Tu'zení' le ta'yēpi yösa yödzölió.

Rilé'e luyú læ ni, en rizzizi.

⁵Tu'úna' gu'ado' ca ruún bidxina' buz lahuë' Xanru'.

Náquië' Xani idütë yödzölió.

⁶Lúzhiba xitsá' naca bë' náquië' tsahui', ate' ta'lé'e bönachi yúgu'të yödzö yöl-la' zxön queë'.

⁷Tu'tuf'i yúgu'të nupa tun zxön budó' guió'j budó' yaga,

nupa na' tun ba zxön cuínguequi ni'a quégaca budó' quéguequi na'.

Ulu'gá'ana cá'asö yúgu'të dios quégaca bönachi izá'a lahuë' Xanru'.

⁸Bila'yöni bönachi Sión, en bulu'dzeja, enca' yugu' zxf'ini xi'sóë' Judá.

Tu'dzéjanë' ca ruchi'a rusöróu' netu', Xan.

⁹Nayépisëtëro'cazu' Li', Xan, ca yúgu'të nupa nacua' yödzölió.

Nayépisëtëro'cazu' Li' ca yúgu'të dios quégaca bönachi izá'a.

¹⁰Núlöli' nadxf'ili'-në' Xanru', guli'guequi zi' le naca dö'.

Run chi'i cazë' bö' nácagaca caz nupa néquiguequi queë'.

Rusölé' léguequi lu ná'agaca nupa tuá' dö'.

¹¹Ruzen'f'itica'sö bení' queë' nupa náca-gaca tsahui',

ate' tu'z'f' xibé' nupa nácagaca dxi'a.

¹²¡Buli'sí' xibé' Xanru' núlöli' nácali' tsahui'!

¡Buli'subán ládxi'li' ca nunë' Dios Lá'ayi, en guli'cu'ë yöl-la' ba!

98 ¡Guli'gul-la queë' Xanru' tu le cubi,

tu' nunë' le tun ga rubániru'!

Len yöl-la' unná bë' zxön queë', en yöl-la' huáca lá'ayi queë' nadéli'në' lu gudil-la.

²Nunë' Xanru' ga naca bë' le nadéli'në'. Nulu'f'inë' bönachi yúgu'të yödzö náquië' tsahui'.

³Len yöl-la' dxi'i ladxi' queë', en yöl-la' li ladxi' queë'

benë' ca rnna xtídzë'ë le guzxf' lu në'ë gunë' quégaca bönachi Israel.

Bila'lé'e bönachi idütë yödzölió ca busölé' rë'u Dios queéru'.

⁴¡Lu yöl-la' rudzeja queéli' guli'gul-la queë' Xanru', yúgu'téli' zóali' yödzölió!

¡Idú ládxi'li' guli'cu'ë yöl-la' ba, en guli'gul-la queë' le naca lá'ayi!

⁵¡Guli'gul-la queë' Xanru' yugu' salmo, en guli'quinnaj yugu' bihuél-la!

¡Guli'quinnaj lé'egaca arpa, en guli'gul-la yöl-la' ba queë'!

⁶¡Guli'cödxí lúzugacaba' chivo, en lúzugacaba' bëdxi

lahuë' Xanru' Dios, Nu rinná bë'!

⁷¡Buli'lidza zidzaj, nísado', en yúgu'të le nacua' nisa na'!

¡Guli'gul-la yödzölió, en yúgu'të nupa nacua' ni'!

⁸¡Guli'capa' ná'ali', yugu' yegu, ate' lu yöl-la' rudzeja queéli' guli'gul-la lahuë' Xanru', lib'ili', gu'ado',

⁹tu' zë'ë duchi'a dusöróë' quégaca bönachi yödzölió!

Ca naca le naca tsahui' uchi'a usöróë' quéguequi,

en ca naca le naca dxi'a tsahui' inná bë'enë' yúgu'të bönachi.

99 ¡Rinná bë'ë Xanru' Dios! Ta'zxizi yúgu'të bönachi.

Rö'ë rinná bë'ë ladaj nupa nápagacatëro

yöl-la' huáca,

légaca Querubín, ate' rizzizi luyú.

²Nayépisëtëre' Xanru' lu yödzö Sión, ate' rinná bë'enë' bönachi yúgu'të yödzö izá'a.

³Ral-la' ila'gú'u Lë' yöl-la' ba yúgu'të bönachi,

tu' caní sa'yéaj, en le run ga runru' Lë' bal.

¡Lá'ayi náquië' Lë'!

⁴Nadxf'i quézinu' le naca tsahui', Li', Bönni' unná bë' nayépisë.

Tsaz naguixju' le naca dxi'a tsáhui'do',

en nuzú' quégaquië' zxf'ini xi'sóë' Jacob
le naca tsahui', en le naca idútë li.

⁵ ¡Guli'gún zxönë' Xanru' Dios!

Buli'zechu zxbili' lahuë' Lë' ga rö'ë rinná
bë'ë.

¡Lá'ayi náquië' Lë'!

⁶ Guláquië' Moisés, en Aarón bixúz
queë',

ate' benë' Samuel tsözxón nupa gula'yéaj
ládxi'gaca Lë'.

Bulu'lidzë' Xanru', ate' bub'fi cazë'
didza'.

⁷ Tu lu böaj bé'lenë' légaquië' didza'.

Gulunë' ca ta'nná bé' xibá queë', en yugu'
le gunná bé'enë' légaquië'.

⁸ Bubi'u didza' lógaca bönachi quiu',
Xantu' Dios.

Bulu'ínu' légaquië' nacu' Dios, en runiti
lo' bönachi,

pero rubi'u quégaquië' ca sa'yéaj dö' tu'ë.

⁹ ¡Guli'gún zxönë' Xanru' Dios!

¡Buli'zechu zxbili' lahui' lo gu'a lá'ayi
ga zoa cazë',

tu' náquië' lá'ayi Xanru' Dios!

100 ¡Lu yöl-la' rudzeja queéli'
guli'gul-la queë' Xanru',

lib'ili' zóali' idútë yödzólió!

² ¡Lu yöl-la' rudzeja queéli' guli'cu'ë yöl-
la' ba Xanru'!

¡Guli'dá lahuë' Lë', en lu yöl-la' rudzeja
queéli' guli'gul-la queë'!

³ ¡Guli'tsöjné' Xanru', náquië' Dios!

Buzá' cazë' rë'u, en calëga rácasó queëru'
zóaru'.

Nácaru' bönachi queë', en nácaru' ca
bö'cu' zxila' queë'.

⁴ Guli'tsaza zaca' ra' yu'u queë', guiéli'-
në': "Xclenu'."

Guli'tsaza gapa naca lö'a queë', cú'uli'-
në' yöl-la' ba.

Guli'guië': "Xclenu'", en guli'gunë' zxön.

⁵ ¡Náquië' dxi'a tsahui' Xanru' Dios, ate'
zóatica'sö yöl-la' dxi'i ladxi' queë'!

¡Zóatica'sö yöl-la' run ca rnna xtídzë'ë
queë'!

101 ¡Gul-la' ca runu' ca rnna
xtídzü'u, en ca nacu' tsahui'!

¡Gul-la' yöl-la' ba quiu' Li', Xan!

² Güf'i ládxa'a guna' le naca idú dxi'a.

¡Bátaxi huécju' quia' neda'?

Lu yu'u lidxa' guna' le naca idú ladxi'.

³ Biti' gu'a lataj sóalen neda' nitú le naca
xihui'.

Biti' rilé'eda' dxi'a le tun nupa tu'cá'ana
Li'.

Biti' ca' guna' léguequi tsözxón.

⁴ Biti' ca' gaca' chopa ladxi'.

Biti' ca' guna' le naca dö'.

⁵ Usunítia' dërö nu bönni' rinnë' que
luzë'ë balándo'os.

Biti' ca' guá' ilena' nu run ba zxön cuini.

⁶ Uyúa' dxi'a tsáhui'do' nupa tun ca
rnna xtídzá'guequi luyú ni, para
ila'cuá'len neda'.

Nu biti' bi xiguia' nabaga' huáca gun
xichina'.

⁷ Biti' ca' tsöjsóa lidxa' nu rizí' yë'.

Biti' gu'a lataj ugá'ana lahua' nu ru'fi
didza' le cabí naca.

⁸ Yugu' zila usunítia' yúgu'të nupa tuá'
dö' luyú ni,

para ucuita' lu yödzö queë' Xanru'
yúgu'të nupa tuti bönachi.

102 ¡Buzë' nagu' le rulidza' Li',
Xan!

¡Bë' lataj idxín lo' le rinaba yúdxida' Li'!

² Biti' ucache' cuinu' lahua' cate' bi
rusaca' zi' neda'.

Buzë' nagu' neda', en gudáchi ubi'u didza'
cate' rulidza' Li'.

³ Yöl-la' na'bán quia' ruúlu ca dzön,

ate' régui rilá lu dxita lu bin quia' ca tu
gu'.

⁴ Rudú ládxa'a ca raca que guixi' nabidxi,
en bítirö rizé ládxa'a bi gahua'.

⁵ Tu' rinnëda' ládxa'a nadxítalë'a.

⁶ Naca' ca tuba' biguínni zóaba' luyú
bidxi,

o ca tuba' cuturú dxíaba' tu lu yu'u
nadachi.

⁷ Nabéaj yëla guiój lahua',

ate' naca' ca tuba' biguínido' dxíaba'
túziba' ícjo'o yu'u.

⁸ Yugu' dza nupa biti' ta'lé'e neda' dxi'a
tu'didza' yudxi neda'.

Nupa tu'titaj neda' tu'gún dxin la' cate'
nu tu'dxía dö'.

⁹ Naca le rahua' ca dódo'sö,
en nutsi' nisa ribödxa' le rë'ja'.

¹⁰ Caní raca quia' tu' rilenú' neda', en
réquinu' neda' zí'.

Gulusu' neda', en gurú'unu' neda'
tsölá'alö.

¹¹ Naca yöl-la' na'bán quia' ca tu zxul-la
rilá' cate' ribía gubidza,

en rudú quia' ca raca que guixi' ricuádi.

¹² ¡Li', Xan, zóatica'su',
en zóaléntica'sö Lo' bönachi!

¹³ ¡Chasu', en huéchi' ládxu'u bönachi
yödzö Sión!

¡Chibidxín dza güfi' ládxu'u léguequi!

¡Ön, chibidxín dza na'!

¹⁴ Netu', huen dxin quiu', nadxí'itu'
yugu' guiój nacuá' lu zö'ö run chi'i
yödzö Sión,

en ru'í ládxí'tu' ga ridxinté bëchtö rö'ö
la' nöza que.

¹⁵ Bönachi yugu' yödzö izá'a iladxi Lë'
Xanru',

ate' nupa ta'nná bë' yödzölió iladxi yöl-
la' zxön queé'.

¹⁶ ¡Nuchisé' Xanru' caz yödzö Sión,
ate' uluf'i lahué' ni' lu yöl-la' zxön queé'!

¹⁷ Riyönné' le tu'lidza Lë' nupa ta'yadzaj
ta'yudxi.

Biti' ca' uzöé' tsölá'alö le tu'lidza yudxi
Lë'.

¹⁸ Buli'zúaj lë ni lu guichi para ulu'laba
zxí'ini xi'sóali' le,

ate' nupa si' ilalaj ila'gú'u Xanru' yöl-la'
ba.

¹⁹ Ga ni' ribözé' Xanru' xitsá' lu lataj
lá'ayi queé',

ga ni' zoé' Xanru' yehua' yubá, ruzé'
nagué'.

²⁰ Riyönné' le ta'nné' ladxi' nupa
nadzúngaca,

en usané' nupa narugu quéguequi
ilátigaca.

²¹ Soa nu usiyöni bönachi yödzö Sión ca
naca Lë' Xanru',

ate' ila'gú'u Lë' yöl-la' ba lu yödzö
Jerusalén,

²² cate' ulu'dubi tsözxön bönachi yugu'
yödzö izá'a,

en bönachi yugu' luyú,

ate' tsözxön ila'gú'u yöl-la' ba Xanru'.

²³ Bené' Xanru' ga gucuídi'da' la' nöza,
en nuné' ga soa' nabábasö dza.

²⁴ Gunnía': Dios quia', biti' gútiu' neda'
cate' ni zoa' gatsaj iza ral-la' soa' ibana'.

Zóatica'sö cazu' Li'.

²⁵ Dza ni'te gudixju' yödzölió,
ate' len na' cazu' benu' lúzxiba.

²⁶ Huadödi quéguequi, pero Li', tsaz
idi'u.

Ilexu' yúgu'téguequi ca riyexu' lari',

en ca tu lari' utubu' léguequi, en utsó'o
léguequi.

²⁷ Li', biti' ca' utsá' cuinu', en biti' ca'
guexu'.

²⁸ Zxí'inigaca huen dxin quiu' ila'böza
dxi'a tsáhu'i'do',

ate' ucú'u tsutsu zxí'ini xi'sóagaquié' lo'.

103 ¡Bil-la yöl-la' ba queé' Xanru',
li', bö' naca caza',

ate' idüté le naca', bil-la yöl-la' ba que
Lë' lá'ayi!

² ¡Bil-la yöl-la' ba queé' Xanru', li', bö'
naca caza',

en biti' gal-la ládxu'u yúgu'té le ruzi'u
xibé'!

³ Runiti lo cazé' neda' ca naca yúgu'té
dul-la' nabága'a,

en rugúé' yúgu'té xihué'a.

⁴ Ruhuóá'ué' neda' lu lataj chul-la,
en ruzá' ládxé'ë quia' yöl-la' dxi'i ladxi',

en yöl-la' ruhuéchi' ladxi'.

⁵ Rigu'é xinöza' yugu' le naca dxi'a,

lë na' run ga ruhuóaca' ca tu bönni' zoé'
iz cuidi' queé',

ca na' raca queéba' bisía'.

⁶ Runé' yugu' le naca dxi'a,

en ruchi'a rusöröë' quégaca yúgu'të nupa
zoa nu rusaca' léguequi zi'.

⁷ Buzéajni'inë' Moisés yugu' le gun cazë'
Lë',

en buluf'inë' bönachi Israel yugu' le zxön
runë'.

⁸ Xanru' ruhuéchi' ladxi' cazë' bönachi,
en ruzá' ládxë'ë quéguequi.

Biti' rilétenë', pero nadxf'itiqui'sinë'
léguequi.

⁹ Biti' ruzétiqui'sinë' rë'u le bach,
en biti' rilétiqui'sinë'.

¹⁰ Biti' runë' rë'u xiguia' ca sa'yéaj dö'
nuá'aru',
en biti' rubi'ë queëru' ca naca le xihui'
nabága'ru'.

¹¹ Naca caní tu' ca na' naca xitsá'tëro
lúzxiba ca luyú ni,
la' canísö naca zxön ca nadxf'inë' Xanru'
nupa tadxi Lë'.

¹² Tsca nácatëro zi'tu' ga rilén gubidza ga
ridxintë ga ribía,
la' canísö rucuitë' yugu' le ta'bága'ru' Lë'.

¹³ Ca na' ruhuéchi' ládxë'ë xúzgaca cáz-
abi' yugu' zxf'inë',

la' canísö ruhuéchi' ládxë'ë Xanru' nupa
tadxi Lë'.

¹⁴ Caní runë' tu' nózinë' le nácaru'.
Röjnenë' néquiniru' bëchtö yu.

¹⁵ Tsca nácgaca dza zóaru' nabanru',
nácagaca ca raca que xiyija gufxi'do'.

¹⁶ Cate' recaj bö', ruúlu runftisö xiyija
na',

en biti' naca bë' ga na' guzóa.

¹⁷ Xanru', tsaz nadxf'inë' nupa tadxi Lë',
en runë' quégaca zxf'iniguequi le naca
dxi'a.

¹⁸ Caní runë' quégaca nupa tun ca rnna
xtídzë'ë,
en quégaca nupa tun ca rinná bë' xibá
queë'.

¹⁹ Naguixjë' Xanru' xilatjë' yehua' yubá
ga na' rö'ë rinná bë'ë.

Rinná béenë' yúgu'të le dë.

²⁰ ¡Guli'cu'ë yöl-la' ba Xanru', libf'ili',
gubáz lá'ayi queë',

nápatëroli' yöl-la' huáca zxön, en runli'
ca rnna xtídzë'ë,

libf'ili' na' runli' ca rnna didza' ru'ë!

²¹ ¡Guli'cu'ë yöl-la' ba Xanru', libf'ili' ná-
cali' ni'a në'ë guizxi yu,

libf'ili', huen dxin queë' na', runli' ca
ré'ëni quézinë' Lë'!

²² ¡Guli'cu'ë yöl-la' ba Xanru', yúgu'tëli'
na' nucu'ë libf'ili',

libf'ili' zóali' yúgu'të lataj ga na' rinná
bë'ë Lë'!

¡Bil-la' yöl-la' ba queë' Xanru', li', bö'
naca caza'!

104 ¡Gulu'ë yöl-la' ba Xanru', li',
bö' naca caza'!

¡Nayépisëtëru' Li', Xana' Dios!

¡Zxo' nacu' naca yöl-la' zxön, en yöl-la'
ba!

² ¡Nusubaga' cuinu' bení' ca zxo' nacu
cazu',
ate' naguixaj cazu' lúzxiba ca tu lari'
zxön!

³ Naguixju' xilataj lidxu' lahui nisa dë
xitsá'alö.

Dxía cazu' lu böaj ca tu lu carreta, en
ridó' lu bö'ös.

⁴ Rugunu' dxin bö' raca ca tu gubáz
quiú',

enca' yugu' guí' ca huen dxin quiú'.

⁵ Nuzú' tsutsu luyú ni lu xilibi,
en biti' ca' gaca nu utsá' xilataj.

⁶ Gudixju' nisa zxön luyú ni ca tu lari'
nabaga' le,

ate' yöjbagá' nísado' na' yugu' guí'a.

⁷ Buzenu' le bach nisa na', ate' burúaj,
en cate' biyón chi'u, bayúdx buzxunnaj
nisa na'.

⁸ Gurén yugu' lu guí'a, en bötaj ga naca
ra' yegu,

ga bidxintë yöjsóa ga nupó'o que nisa
na'.

⁹ Gudixju' buzá' que nísado' ga biti' gaca
tödi.

Bíti'rö caz tseajbaga' nisa na' luyú bidxi.

¹⁰ Runu' ga ralaj beaj yugu' lë'e guí'ado',
enca' ga ta'dödi yegu ga ró'ögaca röga'.

11 Yudzu yugu' yegu na' nisa té'ajba' böa' guixi',

le rugúa yöl-la' ribídx quégacaba' burro ta'dásiba' la' guixi'.

12 Yugu' ra' yegu ró'ögaca yaga ga tu'dxiaba' biguínnido' xcá'agacaba', en túl-laba' yugu' lu ni'a né'eguequi.

13 Rigú'u nisa guiój quiiu' yugu' lu guí'a, en runu' ga tu'huöla tu'dzé'e yugu' le dzö'ö luyú.

14 Runu' ga rizxón yö le táguba' böa' bédx,

en yugu' cuan guixi' tu'gún dxin bönachi, le ilagu ni'a que le nudó'o luyú,

15 en xisi uva le run ga tudzeja ládxi'guequi,

en za olivo le ta'gú'u láhuiguequi lu yöl-la' ruzí' xibé quéguequi,

en yöta le nabániguequi.

16 Tu'zi' xibé nisa guiój yaga cedro dzö'ö lu guí'a Líbano,

yugu' yaga na' budó'o, Xantu'.

17 Ni' tu'dxiaba' biguínni xcá'agacaba', ate' tunba' biyúz lídxigacaba' ni'.

18 Nunu' Li' yugu' guí'a sibi ga dzó'öba' bdxina' guixi',

enca' yugu' zxan bulóaj gapa tapa chi'i cuíngacaba' bizxidxu'.

19 Benu' beo' le naca bē' yugu' beo' que iz,

ate' ribía gubidza ga ral-la' cuía.

20 Benu' chi'i dzó'ölö, en cate' naca chul-la

ta'rúajba' ta'daba' böa' guixi'.

21 Ta'bódxí'aba' bédxi guíxi'do', ta'zóa régu'ba' le ila'zónba'.

Tu'guflajba' le nuzóe' Dios iláguba'.

22 Cate' rilén gubidza tu'dxinba' lídxigacaba',

en röjóxagacaba' yugu' lu zxan bulóaj quégacaba'.

23 Ní'irö ta'rúaj bönachi sójaca huen dxin,

en tun caz dxin ga ridxintē ribía gubidza.

24 Xan, zióntērö yugu' le nunu' Li'.

Len yöl-la' réajni'i zxön quiiu' nunu' yúgu'tē.

Nalí luyú yödzölió ni yugu' le dxi'a nunu'.

25 Ni' zoa nisa nácatērö zxön, ga na' nacua'aba' böa' guizxi yu, böa' cuidi', enca' böa' zxön.

26 Ni' ta'dódi barco zxön, enca' böa' zxön lēba' leviatán, böa' na' nuzóa cazu'.

27 Yúgu'tēba' ta'bózaba' Li', cate' idxinrö ugagu' légacaba'.

28 Rugagu' légacaba', ate' táguba'.

Runódzju' le iláguba', ate' tu'huólaj ta'dzé'eba'.

29 Cate' ruhuecju' quiiu', tádxiba', en cate' ruzi'u bö' quiiu', tátiba', en ruhuóaca yu le néquinigacaba'.

30 Cate' rigú'u légacaba' bö', nabángacaba'.

Rucubu' yúgu'tē le nacua' yödzölió.

31 ¡Ral-la' gácatíca'sö yöl-la' ba queé' Xanru'!

¡Ral-la' ila'yaza ládxi'tíca'sö bönachi le nun cazē' Lē'!

32 Ruyúē' Xanru' luyú, ate' rizxizi.

Riganē' yugu' guí'a, ate' rirúaj dzön.

33 ¡Gul-la' queē' Xanru' yúgu'tē dza soa' ibana'!

¡Gul-la' yöl-la' ba queē' Dios tsanni ni zoa' nabana'!

34 ¡Zxixi naca le rizá' ládxa'a ca naca queē'!

¡Udzéjalenda'-nē' Xanru'!

35 Ila'nítiē' bönni' dul-la' nacu'ē yödzölió ni,

en bíti'rö ila'cuá' nupa tuá' dö'.

¡Gulú'u yöl-la' ba Xanru', li', bö' naca caza'!

¡Yöl-la' ba Lē' Xanru'!

105 ¡Guli'guíē' Xanru' Dios: "Xclenu'!"

¡Buli'lidzē' Lē'!

¡Buli'siyón bönachi ca nácacaca le benē'!

2 ¡Guli'gul-la queē'! ¡Guli'gul-la yöl-la' ba queē'!

¡Guli'güi' didza' ca náragaca le zxon
nuné'!

³ ¡Buli'sí' xibé Lè' lá'ayi!

Ral-la' ulu'dzeja ladxi' yúgu'tè nupa
ta'guilaj Xanru'.

⁴ Guli'guiljè' Xanru', enca' yöl-la' huáca
queé'.

Guli'güi' ládxi'tica'só idxinli' lahué'.

⁵ Guli'tsójné le náragaca zxon bené' Lè',
lè na' tun ga rubániru', enca' ca náragaca

didza' bē'è cate' buchi'a busöróè'
bönachi,

⁶ libí'ili', zxf'ini xi'sóè' Abraham, huen
dxin queé' Dios,

en libí'ili', zxf'ini xi'sóè' Jacob, nácali'
nupa guró cazé' queé'.

⁷ Lè' náquiè' Xanru' Dios.

Idútè yödzülió naca bē' ca buchi'a
busöróè' bönachi.

⁸ Rójnétiqúi'siné' didza' dzaga nuné',
didza' na' gunná bē'è ila'z'í' lu ná'a-
gaquiè' chi gayuá' cō' zxf'ini xi'sóè'
Abraham,

⁹ didza' dzaga na' bēnlené' Abraham,
le naca didza' na' bené' tsutsu Dios ca
guné' queé' Isaac.

¹⁰ Ní'irō bené' tsutsu didza' na' lahué'
Jacob,

le naca tu le rinná bē'ené' lè' guné',
para gaca quégaca bönachi Israel tu
didza' dzaga le zoa tsaz.

¹¹ Gunné': "Gonna' queé'li' xiyúgaca bö-
nachi Canaan,

le guequi tsaz queé'li', en quégaca zxf'ini
xi'sóali'."

¹² Caní gunné' Dios cate' ni' gula'cu'è
nabábagaquiè' bönni' Israel.

Tu chópasè' guláquiè', en guláquiè' bön-
ni' z'í'tu' luyú.

¹³ Gula'dé' tu ia'tú yödzü izá'a.

Bulu'zé'è tu ga nu gunná bē', en bi-
la'dxínè' ga nacuá' bönachi izá'a,

¹⁴ pero biti' bē'è lataj Dios nu usaca' z'
bönachi queé' na',

en buzené' le bach bönni' gula'nná bē'è
para gulácalenè' bönachi queé'.

¹⁵ Gunné': "Biti' bi gunli' quégaca bö-
nachi nabó caza' quia',
en biti' bi dö' guá'ali' quégaquiè' bönni'
tu'è didza' uláz quia'."

¹⁶ Bené' ga guyú'u gubín yödzülió,
en bené' ga biyadzaj yöta ilahué'.

¹⁷ Gusól-lè'è tubi' bi'i bönni', bi'i bidxin-
bi' ni' z'f'aló ca légaquiè',

tu' gulúti'è-bi' José para gácabi' bi'i
nadóo.

¹⁸ Gulúgui'è bönni' Egipto ní'abi' len du
gufé,

en bulu'dé'è yen ná'abi' bregui' gufé,

¹⁹ ga bidxintè dza budxín xtfídzè'è
Xanru',

tu' guzxf' bē'è Xanru' Dios José na'.

²⁰ Ní'irō gusól-lè'è bönni' gunná bē'è
luyú Egipto nu busán-bi'.

Bönni' na' gunná bē'ené' yödzü izá'a zían
busölé'-bi'.

²¹ Bené' ga gúcabi' xan yu'u queé',
ate' guta' lu ná'abi' yúgu'tè le dē queé'
bönni' na' rinná bē'è.

²² Guta' lu ná'abi' gulú'ubi' lidxi gufé
bönni' ta'nná bē'è tsca ré'eni
quézibi',

para busédibi' bönni' gula queé' yöl-la'
réajni'i.

²³ Ní'irō bila'dxín ca' bönachi Israel luyú
Egipto.

Caní guca, guzóè' Jacob lu xiyúgaca
zxf'ini xi'sóè' Ham.

²⁴ Bené' Dios ga gula'yántèrō bönachi
queé' luyú ni',

ate' guláquiè' zióntèrè' ca nupa gula'díl-
lalen légaquiè'.

²⁵ Bené' Dios ga guluné' zi' bönni' Egipto
bönachi queé'.

Lu yöl-la' banís quégaquiè' gula'z'
yé'ené' nupa na' náragaca huen
dxin queé' Lè'.

²⁶ Ní'irō gusól-lè'è Moisés, huen dxin
queé', lógaquiè',

enca' Aarón, bönni' na' nabó cazé' Lè'.

27 Gulunë' chopë' ni zían yöl-la' huáca
zxön queë' Dios lógaca bönachi
Egipto na'.

Gulunë' zían yöl-la' huáca que yehua'
yubá lu xiyúgaca xzí'ini xí'sóë' Ham.

28 Gusól-lë'ë Dios le naca chul-la, ate'
böáca chul-la lahui' dza,
en bití' guca ila'dá'baguë'ë xtídzë'ë.

29 Benë' ga nisa yegu nacua' lu yegu qué-
gaquië' böáca rön,
en benë' ga gulátiba' böla dzó'öba' yugu'
yegu na'.

30 Gula'yanba' riu lu xiyúgaquië',
ga bidxintë gula'yázaba' yu'u lidxë' bön-
ni' rinná bé'enë' légaquië'.

31 Bë'ë didza' Dios, ate' gulátsjaba' bót-
sugayu guizxi yu,
en gulátsjaba' ca' bó'iyudo' idútë lu
xiyúgaquië'.

32 Benë' ga guró'ö guió'j bögui' yöla
sunna uláz que nisa guió'j,
ate' böxaj ca' gu' lu xiyúgaquië'.

33 Guditsjé' yugu' lubá uva quégaquië',
en yugu' yaga higo,
en busunítië' yaga ró'gaca lu
xiyúgaquië'.

34 Bë'ë didza', ate' bila'dxinba' bóchi'zu
guizxi yu,
enca' bóchi'zu hué'enido', cuntu nu gaca
ulaba légacaba',

35 ate' guláguba' idútë guixi' cuan rö'ö lu
xiyúgaquië',
en guláguba' ca' idútë le naz nudá'a-
gaquië' lu xiyúgaquië'.

36 Benë' ga gulátibi' yúgu'tëbi' bi'i bönni'
lo idútë lu xiyúgaquië'.

Bi'i lo na' quégaquië' bönni' nál-la.

37 Ní'irö bubéajé' Dios yugu' bönni' Israel
luyú na', nuá'agaquië' dumí plata,
en oro,
ate' cuntu nu yöjchegu' nu nutsa'
légaquië'.

38 Bulu'dzeja bönachi Egipto cate' bu-
lu'zë'ë bönni' Israel lu xiyúgaquië',
ate' guladxí gula'dzöbi tu' nóziguequinë'
bönni' Israel na'.

39 Gusól-lë'ë Dios tu böaj le gulú'u bö-
nachi queë' zxul-la,
ate' chí' dzó'ölö gusól-lë'ë guí' le buzení'
quégaquië'.

40 Gula'nábinë' Lë', ate' gusól-lë'ë böra
guíxi'do' zían le ilahuë',
en benë' ga bulu'huólaj gula'dzé'enë'
yöta que yehua' yubá.

41 Bulu'ë lahui tu guió'jto'o, ate' gulalaj
nisa yégudo'.

Gudödi nisa na' luyú bidxi ni' ca tu nisa
yegu gubó'o.

42 Caní benë' Dios tu' yöjnenë' didza'
lá'ayi queë',
le guzí' lu në'ë gunë' queë' Abraham,
huen dxin queë'.

43 Bubéajé' bönachi queë' lu yöl-la'
rudzeja quéguequi,
ate' lu yöl-la' rudzeja quéguequi gu-
la'bódxí'a bönachi guró cazë' queë'.

44 Bunödzejé' xiyúgaca bönachi yugu'
yödzö izá'a quégaquië'.

Bulu'zi'ë xibé le ilá' luyú ni'a que dxin
gulún bönachi izá'a na'.

45 Caní benë' Dios para ilunë' ca rna le
gunná bé'enë' légaquië' ilunë',
en ilunë' ca rinná bé' xibá gudixjé' Lë'.
¡Guli'cu'ë yöl-la' ba Xanru'!

106 ¡Guli'cu'ë yöl-la' ba Xanru'!
¡Guli'guíë' Xanru': "Xclenu"
tu' náquië' idú dxi'a!

¡Zóatica'sö yöl-la' dxi'i ladxi' queë'!

² ¡Nuzxi caz gaca quixjö' ca nácgaca le
zxön nunë' Xanru',

en uluí' lahui ca naca yöl-la' ba queë'?

³ ¡Bica' ba nupa tun le naca tsahuí',
nupa na' túntica'sö le naca dxi'a!

⁴ Yöjné neda', Xan, cate' ruzá' ladxu'u
quégaca bönachi quiu'.

Buzá' ladxi' quia' yöl-la' rusólá quiu',

⁵ para gaca il'éda' gata' yöl-la' tsahuí'
quégaca nupa naró'cazu' quiu',

en para gaca udzéalenda' bönachi quiu'
cate' tu'dzeja,

en para gaca uzí'lana' xibé nupa
néquiguequi quiu'.

⁶ Nuntu' dul-la' ca gulunë' xuz xtó'otu'.
Biá'atu' dö', en bentu' le naca xihui'.

⁷ Cate' gula'cu'ë xuz xtó'otu' luyú Egipto,
biti' gula'yéajni'inë' le nácagaca zxön
benu'.

Biti' yöjnéguequinë' yugu' le benu' qué-
gaquië' lu yöl-la' dxi'i ladxi' quiu',
pero gula'dá'baguë'ë xtídz'u cate' gu-
la'cu'ë ra' nísado' lë Nísado' Xiná.

⁸ Busölé' Xanru' Dios légaquië' para gaca
bé' runë' ca rna xtídzë'ë,
en para ulu'e lahui yöl-la' huáca zxön
queë'.

⁹ Caní guca, buzenë' le bach Nísado' Xiná
na', ate' la' gubídxitë'.

Guchë'ë légaquië' ga rë'do' lu nísado' na',
ate' gula'dé' lu yu bidxi ga na' guró'ö
nisa.

¹⁰ Caní guca, busölé' légaquië' lu na' nu
na' benë' légaquië' zi',
en buá'uë' légaquië' lu na' nu na' gudíl-
lalen légaquië'.

¹¹ Ní'irö gubaga' nísado' na' nupa gula'sí
regu' légaquië'.

Cuntu nu bugá'ana nu bidzaga léguequi.

¹² Ní'irö gula'yéajlë' bönachi queë'
xtídzë'ë,
ate' gulul-la yöl-la' ba queë'.

¹³ Pero la' gulál-latë ládxi'gaquië' yugu'
le benë'.

Biti' gula'nábinë' Lë' uluf'inë' légaquië' le
ral-la' ilunë'.

¹⁴ Zián le gula'zé ládxe'ë cate' ni' gu-
la'cu'ë la' guixi' ga dë lataj,
en gula'zí' bë'ë Dios la' guixi' na'.

¹⁵ Ní'irö bë'ë Dios quégaquië' le gu-
la'nábinë' Lë',
pero gusól-lë'ë quégaquië' tu yödzöhué'
le bëti ziánagaquië'.

¹⁶ Cate' bulu'zxé'enë' Moisés ga ni' gu-
la'cu'ë tsözxön,
en bulu'zxé'enë' ca' Aarón, bönni' nubéa-
jë' Xanru' quez queë',

¹⁷ la' ná'asö gualaj luyú, en bucachi'
Datán.

Bucachi' ca' nupa gulún tsözxön Abiram.

¹⁸ Gulaj tu guí' zxön ga na'
nudúbigaquië',

en buzegui' nupa na' guluá' dö'.

¹⁹ Lu guí'a Horeb gulunë' tu bédxido'
néquiniba' oro,

en gula'yéaj ládxe'ë budó' oro na'.

²⁰ Caní guca bulu'cá'anë' Dios
nayépisëtë're',

para gula'yéaj ládxe'ë budó' oro le naca
ca tu bédxi ráguba' guixi'.

²¹ Gulal-la ládxe'ë Dios Nu busölá
légaquië'.

Lë' benë' zián le zxön le gulácalen lé-
gaquië' luyú Egipto.

²² Benë' zián le tun ga rubániru' lu xiyú-
gaca zxí'ini xi'sóe' Ham,

en zián le tun ga rádxiru' Lë' le benë' ra'
Nísado' Xiná.

²³ Que lë ni na' gunné' Dios usunítië' lé-
gaquië', ate' la' cá'asö gunë'

la'tu' cabí guzuínë' Moisés, bönni' rö
queë', lahuë' Lë',

en buzóa dxíë' yöl-la' rilé queë' para cabí
usunítië' légaquië'.

²⁴ Ní'irö biti' gulé'enë' ila'yázië' luyú dx-
i'a na' dë lógaquië'

tu' cabí gula'yéajlë'ë xtídzë'ë Dios.

²⁵ Gula'nnë' zi'ë queë' Dios gapa naca lu
yu'u guídi quégaquië',

en biti' bulu'zé náguië' chi'ë Xanru'.

²⁶ Que lë ni na' benë' tsutsu Dios xtídzë'ë
le bé'lenë' légaquië',

gunné' gunë' ga ilátië' ga na' naca la'
guixi' ga dë lataj.

²⁷ Gunnë' gunë' ga ilasi lásië' zxí'ini
xi'sóagaquië' ladaj zián yödzö izá'a,

en gúsië' légaquië' gapa nacuá' bönachi
zi'tu'.

²⁸ Ní'irö bulu'dödi cúngaquië' lu na'
budó' guíë lë Baal-peor,

en gulahuë' xipéla'gacaba' böa' guixi'
gulútië'-ba'

para gulunë' zxön yugu' dios nati.

²⁹ Ca' guca, gulún lenë' Dios ni'a que le
gulunë',

ate' gulén tu yödzhüé' zxon
ládjaguaié'.

³⁰ Ní'irö guzuiné' Finees, en bené' le raza
ládxe'ë Dios,

ate' guzóa dxi yödzhüé' zxon na'.

³¹ Buzóé' Dios queé' Finees na' náquié'
tsahui' ni'a que

lè na' bené' le nuzóé' tsaz ca naca queé'.

³² Lésca' gulún lené' Dios ga na' zoa nisa
lè Meriba,

ate' Dios guléné' Moisés tu' nözi lè na'
guluné'

³³ tu' gula'dá'baguë'ë xtidxë'ë Bö' Lá'ayi
queé',

ate' Moisés, lu yöl-la' ridzá'a queé', gun-
né lizé'.

³⁴ Biti' bulu'sunítié' bönachi tuá' dö' gu-
la'cuá' lu yu ni,

ca na' gunná bé'ené' Xanru' légaquié'
iluné'.

³⁵ Guluné' léguequi tsözxón

en bila'zédé' iluné' ca gulún bönachi na',

³⁶ ate' gula'yéaj ládxe'ë budó' guiój budó'
yaga quéguequi,

le guca quégaquié' ca tu du yalaj le
guzxón légaquié'.

³⁷ Gulútié'-bi' zxi'inigaquié' lógaca bö'
xihui',

yugu' bi'i bönni', en nigúlado',

³⁸ en bulu'laljé' xichóngaca nupa biti' bi
nabága'gaca

tu' bulu'laljé' xichóngacabi' bi'i
bönni' quégaquié', en bi'i nigula

quégaquié',

yugu' bi'i na' gulútié'-bi' lógaca budó'
guiój budó' yaga nacué' luyú

Canaán,
ate' gúcada' xihui' luyú ni tu' nözi rön na'
bulu'laljé'.

³⁹ Ca' guca, guláquié' xihui' ni'a que le
guluné'.

Guláquié' ca tu nigula udá dzaga tu' bu-
lu'cá'ané' Dios quégaquié'.

⁴⁰ Que lè ni na' guléde'ené' Xanru' Dios
bönachi queé',

en biti' bilé'ené' dxi'a nupa na' néquigue-
qui queé'.

⁴¹ Ní'irö budödé' légaquié' lu ná'agaca
bönachi zían yödzhó izá'a,

ate' nupa bulu'dfi' légaquié' gula'nná
be'e légaquié'.

⁴² Nupa na' biti' bila'lé'e légaquié' dxi'a
gulunda' légaquié' dxin,

en bulu'zicaj légaquié' lu yöl-la' unná
bé' quéguequi.

⁴³ Zían luzuf' gú'uné' Dios usölé'
légaquié',

pero gula'dá'baguë'ë le ré'ené' iluné',
ate' guzxóntèrö xigua' nabága'gaquié'.

⁴⁴ Bilé'ené' Dios yöl-la' bayechi'
quégaquié'

en biyönné' ta'bödxi yeché'ë.

⁴⁵ Yöjnené' didza' dzaga núnlené'
légaquié',

ate' bubequi lahué' quégaquié' tu'
nazxóntèrö yöl-la' dxi'i ladxi' queé'.

⁴⁶ Bené' Dios ga bulu'huéchi' ladxi'
légaquié'

nupa na' gula'ché' légaquié'
nadzúngaquié'.

⁴⁷ ¡Busólá netu', Xantu' Dios!

Guléaj netu' ládjagaca yödzhó izá'a
para gufétu' Li': "Xclenu'" ni'a que Lo'

lá'ayi,
en lu yöl-la' rudzeja zxon queétu' cú'utu'

Li' yöl-la' ba.

⁴⁸ ¡Yöl-la' ba Lè' Xanru', Dios quégaca
bönachi Israel

na'a dza, en yúgu'té dza si' zaca!
Ral-la' ila'nná yúgu'té bönachi: "¡Ca'

gaca!
¡Guli'cu'ë yöl-la' ba Xanru' Dios!"

107 ¡Guli'guié' Xanru': "Xclenu'"
tu' náquié' dxi'a,

en tu' zóatica'sö yöl-la' dxi'i ladxi' queé'!
² Ral-la' ila'nná caní nupa na' buá'ué'

Xanru',
nupa na' buá'ué' lu ná'agaca nupa gulún
léguequi zi',

³ en nubéajé' léguequi zían lu yödzhó
izá'a,

saca' ga rilén gubidza, en saca' ga ribía,
saca' ga za' bö' ziaga, en saca' ga ridödi
gubidza beo' ziaga.

⁴Bal-lé' gula'dé' nanítigaquié' la' guixi'
ga dë lataj,

en ga ni' biti' zoa nöza.

Biti' guca ulu'dzöliné' tu yödzo ga gaca
tsöjcu'ë.

⁵Gula'duné', en gula'bidxé' nisa,
en gudú ládxi'gaquié'.

⁶Ní'irö lu lë na' raca quégaquié' bu-
lu'lidzé' Xanru',
ate' busölé' légaquié' lu zían le gula'guf'i
gula'záquë'ë.

⁷Guché'ë légaquié' tu la' nöza tsahui',
en guché'ë légaquié' tu lu yödzo ga
tsöjcu'ë.

⁸Ral-la' ilé' Xanru': "Xclenu" tu'
nadxí'iné' légaquié',
en tu' bené' yugu' le zxön, gúcalené'
légaquié'.

⁹Rugui'jé' nupa ta'bidxi ladxi',
en rugahué' nupa ta'dún le nácagaca dx-
i'a queé'.

¹⁰Bal-lé' gula'cu'ë ga chul-la, en ga zoa
bönadxi ilátié'.

Gula'dzuné' yugu' lu du guíë, en gu-
la'guf'i gula'záquë'ë

¹¹tu' gula'dá'baguë'ë xtídzé'ë Xanru'
Dios,

en bulu'zóé' tsólá'alö le rigu'ë icja
ládxi'do'gaquié'.

¹²Tu' guluné' bayúdx dxin, gudú
ládxi'gaquié'.

Gula'dzö'ë lu yu zcan yua' nuá'agaquié',
ate' cuntu nu zoa gácalen légaquié'.

¹³Ní'irö lu lë na' raca quégaquié' bu-
lu'lidzé' Xanru',
ate' busölé' légaquié' lu zían le gula'guf'i
gula'záquë'ë.

¹⁴Bubéajé' légaquié' ga na' gula'cu'ë ga
chul-la,

en ga guzóa bönadxi ilátié',
ate' guditsjé' yugu' du guíë núga'gaquié'.

¹⁵Ral-la' ilé' Xanru': "Xclenu" tu'
nadxí'iné' légaquié',

en tu' bené' yugu' le zxön, gúcalené'
légaquié'.

¹⁶Ruquínnejé' le tá'baga' gapa nu riyaza
lidxi guíë le néquiniguequi guíë
bronce,

en ruzxuzxjé' yugu' vara néquiniguequi
guíë.

¹⁷Bal-lé' gula'guf'i gula'záquë'ë tu' gu-
la'dá'baguë'ë Dios,
en tu' nözi dö' gulu'ë.

¹⁸Gula'gúti'né' bíti'tës la' huagu,
en gula'zóa ilátié'.

¹⁹Ní'irö lu lë na' raca quégaquié' bu-
lu'lidzé' Xanru',
ate' busölé' légaquié' lu zían le gula'guf'i
gula'záquë'ë.

²⁰Gusól-lé'ë quégaquié' xtídzé'ë, en
buné' légaquié',
en busölé' légaquié' lu yöl-la' guti.

²¹Ral-la' ilé' Xanru': "Xclenu" tu'
nadxí'iné' légaquié',
en tu' bené' yugu' le zxön, gúcalené'
légaquié'.

²²Ral-la' ilé' Dios: "Xclenu", en bi
ulu'nödzjé' queé',
en lu yöl-la' rudzeja quégaquié' ilul-lé' ca
nácagaca le nuné'.

²³Bal-lé' gula'dödé' lahui nísado' yugu'
lu barco zxön,
en guluné' dxin yugu' lu nísado'.

²⁴Bila'lé'ené' yugu' le nuné' Xanru',
en yugu' le zxön nucu'ë lu nísado'.

²⁵Bé'ésé' didza', ate' guyecja bö'
budunu',
ate' guyasa gudxía nísado'.

²⁶Gula'yasa barco ca tu lu guf'ado' nisa,
en la' bötjaté' ga rö'ö röga' lu nisa na'.
Tu' guzóale'ë bönadxi ilátié' gudú
ládxi'gaquié'.

²⁷Gula'zxízié', en yöjchégu'gaquié' ca
bönni' ta'zúdxiné',
ate' nítisö guca yöl-la' rácada'
quégaquié'.

²⁸Ní'irö lu lë na' raca quégaquié' bu-
lu'lidzé' Xanru',

ate' busölé' légaquié' lu zían le gula'guf'i
gula'záquë'ë.

²⁹ Bené' Dios ga guzóa dxisö bö' budunu'
na' recja,

ate' guzóa dxi le rasa ridxía lu nísado'.

³⁰ Bulu'dzéjané' tu' guzóa dxi lu nísado',
en tu' guché'ë Dios légaquié' dxi'a
tsáhui'do' ga na' söjáquié'.

³¹ Ral-la' ilé' Xanru': "Xclenu" tu'
nadxí'iné' légaquié',
en tu' bené' yugu' le zxön, gúcalené'
légaquié'.

³² Ral-la' ulu'lu'ë lahui yöl-la' zxön queé'
ga nudúbigaca bönachi queé',
en ila'gu'ë Lé' yöl-la' ba ga nudúbigaquié'
bönni' gula tu'chi'a tu'söróé'.

³³ Runé' Xanru' Dios ga tu'huí'i dëro
yugu' yegu,
enca' yugu' beaj nisa.

³⁴ Ga naca yu ya'a runé' ga ruhuóaca yu
bidxi,

ni'a que le xihui' nabága'gaca nupa
nacuá' ni'.

³⁵ Ga naca yu bidxi runé' ga ruhuóaca yu
nabisa,

ate' rala'j nisa ga bití' bi nisa guzóa.

³⁶ Ni' ru'ë lataj ila'cuá' nupa ta'dún
para iluné' ni' yödzo ga ila'cu'ë.

³⁷ Tazé' yugu' le tazé', en tu'dé'ë yugu'
lubá uva,

yugu' le ta'bía yödxi yana'.

³⁸ Runé' Xanru' ga raca dxi'a quégaquié',
en ga ta'cuá'bi' zíanbi' bi'i quégaquié',
en runé' ga ta'yanba' böa' bédxi
quégaquié'.

³⁹ Cate' yugu' bönni' unná bē' zi'tu' tu'zx-
icjē' bönachi queé',

en tu'zötjē' léguequi,

en tu'saca' zi'ë léguequi, en tu'ë dö'
quéguequi,

⁴⁰ rucá'ané' Dios bönni' na' dē lu ná'a-
gaquié' cá'asó,

en runé' ga ta'dé' la' guixi' ga dē lataj, en
tu luyú bidxi.

⁴¹ Rusölé' yugu' bönni' yechi' lu le ta'guf'i
ta'záquë'ë,

en runé' ga ta'yanbi' zxi'inigaquié' ca
ta'yánba' bö'cu' zxi'la'do'.

⁴² Ta'lé'e lē ni nupa nácagaca tsahui', en
tu'dzeja,

pero bití' bi ta'nná nupa tuá' dö'.

⁴³ Nupa ta'yéajni'i ral-la' sa' ládxi'gaca ca
nácagaca lē ni,

ate' iléqui'be'e náquié' Xanru' Dios dxi'i
ladxi'.

108 ;Chinabá'a quia', Dios!
;Gul-la' quiu'! ;Ön, idú ládxa'a
gul-la' yöl-la' ba quiu'!

² ;Gulí'bán, libí'ili' riguínna'li' bihuél-la!
;Gúl-laru' cate' ni' ritó yu!

³ ;Guía' Li': "Xclenu" Xan, ládjagaca bö-
nachi yugu' yödzo izá'a!

;Gul-la' yöl-la' ba quiu' lógaca yúgu'tē
bönachi!

⁴ ;Zxöntëro naca yöl-la' dxi'i ladxi' quiu',
le ridxintē lúzxiba xitsá'!

⁵ Bulu'í' lahui lúzxiba yöl-la' zxön quiu',
Dios,

ate' lahui yödzo'lió ni bulu'í' lahui yöl-la'
bení' quiu',

⁶ para usöló' netu', bönachi quiu', nupa
nadxí'inu'.

Len yöl-la' huáca zxön quiu' busólá netu',
en bubí' didza'.

⁷ Lu lataj lá'ayi queé' bē'ë didza' Dios,
gunné':

"Uzi'a xibé, en quísia' xiyúgaca bönachi
Siquem,

en urixa' luyú dē cuiti yegu Sucot.

⁸ Nequi quia' xiyúgaca bönachi Galaad,
enca' xiyúgaca zxi'ini xi'sóé' Manasés.

Naca ca tu le rusubín icja' xiyúgaca
zxi'ini xi'sóé' Efraín.

Naca ga rinná bē'a xiyúgaca zxi'ini
xi'sóé' Judá.

⁹ Naca ca tu ga riguibi na'a xiyúgaca bö-
nachi Moab,

ate' lu xiyúgaca bönachi Edom chú'una'
löla'.

Códxí'a tu' uxicja' bönachi Filistea."

¹⁰ ;Nuzxi caz gaca iché' neda' lu yödzo

dë zö'ö idú gásibi'ilö le run chi'i yödzö na'?

¿Nuzxi caz gaca iché' neda' lu xiyúgaca bönachi Edom?

¹¹ ¿Naru' cabí nusán ládXu'u netu', Dios?

¿Naru' cabí tséajlenu' bönni' queé'tu' rójáquié' gudil-la?

¹² Gúcalen netu' cate' tíl-lalentu' nupa dutíl-lalen netu',

tu' naca dádušö gácalen netu' nu naca bönáchisö.

¹³ Len yöl-la' huáca queé' Dios idéli'ru' tu' uxicja cazé' Lë' nupa ta'díl-lalen rë'u.

109 Rigú'a Li' yöl-la' ba, Xana' Dios.

Biti' su' dxisö,

² tu' ta'nná quia' nupa tuá' dö', en ta'zi' yë'.

Lu yöl-la' rizi' yë' quéguequi tu'í didza' le tu'zegui' neda'.

³ Nagú'ugaca neda' lé'ajlö, en lu yöl-la' biti' rilé'e neda' dxi'a tu'iti-ca'sö didza'.

⁴ Sal-la' nadxí'ida' léguequi, tu'zegui' neda' didza',

pero neda' rulidza' Li'.

⁵ Bena' quéguequi le naca dxi'a, pero bu-lu'b'í quia' le naca dö'.

Nadxí'ida' léguequi, pero biti' ta'lé'e neda' dxi'a.

⁶ Buzóa tu bönni' huía' dö' para uchi'a usöröé' que nu na' biti' rilé'e neda' dxi'a.

Ben ga soa gagu nu uzegui' nu na' didza'.

⁷ Cate' nu uchi'a usörö bönni' na', biti' gu'u lataj urúajé' dxi'a.

Buyú le rinábiné' Li' tsca naca dul-la' nabáguë'ë.

⁸ Ben ga ilaca nabábasö dza soé' ibané'. Ben ga tsu'u nu yúbölö uláz queé'.

⁹ Ben ga ilácabi' zxf'iné' bi'i uzëbi, en ga gácanu nigula queé' nigula uzëbi.

¹⁰ Ben ga ila'dásöbi' zxf'iné' ila'nábibi' nu bi unödzej quégacabi'.

Ben ga ila'guíljabi' le ilágubi' zi'tu' ga zoa lídxigacabi' le nadachi.

¹¹ Ben ga ugúa nu bi benna lë' tu ch'ísö idütë le dë queé',

en ben ga ila'bané' bönni' zi'tu' le rulá' dxin runé'.

¹² Ben ga biti' soa nu huéchi' ladxi' lë', en biti' soa nu uzá' ladxi' quégacabi' zxf'iné' nácgacabi' bi'i uzëbi.

¹³ Ben ga udxí quégaca zxf'ini xi'sóé', en ga idxín dza bíti'rö soa nu si' la ca guzxf'i lë'.

¹⁴ Yöjnética'sö le xihui' gula'báguë'ë xuz xtá'ahuë', Xan,

en biti' gal-la ládXu'u dul-la' bennu xiné'ë.

¹⁵ Ben ga ila'cuá'tica'sö dul-la' na' lo' Li', Xan,

para cabirö nu soa yödzölió nu tsöjné lë'.

¹⁶ Biti' buéchi' ládXë'ë luzé'ë, pero gudxía nahuë' nupa gula'gu'í gula'zaca',

en nupa gula'yadzaj gula'yudxi, enca' nupa gula'sëbi ladxi', ate' bétie' léguequi.

¹⁷ Bidxf'iné' le rudxía luzé'ë dö'. Ben ga ulu'b'í ca' queé'.

Biti' raza ládXë'ë gaca dxi'a que luzé'ë. Ben ga biti' gaca dxi'a queé'.

¹⁸ Gulaca ca zXë' nácuë' didza' xihui' bë'ë,

ate' gula'yaza le nayá' nabané' ca nisa, en gula'yú'u ca' dxita queé' ca le za.

¹⁹ Ben ga ilaca queé' ca tu lari' rixóa cúdZë'ë,

en ca xipané' rúgui'ë lë'ë.

²⁰ Bubí'í caní quégaca nupa tu'zegui' neda' didza', Xan,

enca' quégaca nupa tu'í didza' zi' que bö' naca caza'.

²¹ Li', Xana' Dios, ben quia' le naca dxi'a para gaca bë' runu' ca rna xtídzú'u.

Tu' naca dxi'a yöl-la' dxi'í ladxi' quiu', busölá neda'.

²² Riguí'í rizáca'a, en riyadzaj riyúdxida', en raca zi' ládxi'da'ahua'.

²³ Ridödi quia' ca raca que tu zzul-la cate' ribía gubidza.

Naca' ca tuba' bóchi'zu, riché' bö' recja
lëba'.

²⁴ Ta'cuidi' zxiba' tu' runa' gubasa.

Nadxita', en bíti'rö rö'ö za lu bëla' rön
quia'.

²⁵ Nupa biti' ta'lé'e neda' dxi'a tu'titaj
neda'.

Cate' ta'lé'e neda', tu'tá ícaguequi.

²⁶ Gúcalen neda', Xana' Dios.

Lu yöl-la' dxi'i ladxi' quiu' busölá neda'.

²⁷ Ben ga iléquite'e rácalen cazu' neda'.

Nun cazu' Li' lë ni, Xan.

²⁸ Tu'dxía neda' dö', pero Li', ben ga gaca
dxi'a quia'.

Cate' ila'yasë', ulu'tuí'inë',
pero udzëjada' neda', huen dxin quiu'.

²⁹ Ben ga ulu'gá'ana cá'asö nupa tu'zegui'
neda' didza',

en ben ga gaca yöl-la' rutuf'i quéguequi
ca tu lari' nabaga' léguequi.

³⁰ Len ruá' cuina', zían luzuí guá'-në'
Xanru': "Xclenu",

en ladaj bönachi zían cu'a Lë' yöl-la' ba,
³¹ tu' zuínë' cuita lë'e ibëla nu riyadzaj
riyudxi

para usölë' nu na' lu ná'agaca nupa
tu'siúdxí bö' naca caz nu na'.

110 Xanru' Dios gudxë' Xana':
"Gurö'i cuita lë'a ibëla
cate' gunra' ga ulu'zëchu zxíbigaca lo'
nupa biti' ta'lé'e Li' dxi'a."

² Ga zoë' yödzo Sión gusól-lë'ë Xanru'
yöl-la' unná bë' quiu',

gunné': "Gunná be'e nupa biti' ta'lé'e Li'
dxi'a.

³ Ulu'dödi cuínguequi lu no'o bönachi
quiu'

cate' si'u yöl-la' unná bë' quiu'

tu' napu' yöl-la' lachi que le naca lá'ayi."
Ila'cuá' bi'i bönni' ga zu' ca ribó'ö buzén
zílado'.

⁴ Runë' tsutsu xtídzë'ë Xanru', en biti' ut-
së'ë le, rnnë':

"Tszac nacu' bixúz ca na' gúquië'
Melquisedec bixúz."

⁵ Zoa cazë' Xanru' cuita lë'u ibëla.

Ucul-lë' bönni' ta'nná bë'ë cate' idxín dza
usiúdxë' luyú.

⁶ Uchi'a usöröë' quégaca bönachi yúgu'të
yödzo izá'a,

ate' ilí yödzoilió len bëla' rön quéguequi.
Uzötjë' nupa ta'nná bë' zían lu yödzo
izá'a.

⁷ Guí'jë' nisa beaj ra' nöza,
en ni'a que lë ni huóaca lãdxë'ë.

111 ¡Guli'cu'ë yöl-la' ba Xanru'!
Idú lãdxa'a rea'-në' Xanru':
"Xclenu'."

Runa' caní tsaxzón len bönni' tsahui' zían
ga na' nudúbigaca bönachi queë'.

² Zxón nácgaca le nunë' Xanru'.

Yúgu'të nupa ta'yaza lãdxi'gaca lë na'
benë' tu'sëda ca nácgaca.

³ Idútë dxi'a nácgaca, en nayépisëtëro-
gaca le nunë' Lë',

ate' idiá'tica'sö le naca tsahui' queë'.

⁴ Chinunë' ga tsöjneru' yugu' le benë', le
tun ga rubániru'.

Náquië' Xanru' dxi'i ladxi', en ruí'
lãdxë'ë rë'u.

⁵ Rugahuë' nupa tadxi Lë'.

Röjnética'së' didza' dzaga núnlënë' bö-
nachi queë'.

⁶ Buzéajni'inë' bönachi queë' ca naca yöl-
la' huáca quégaca le nunë',

le benë' ga gula'déli'në' xiyúgaca bö-
nachi izá'a.

⁷ Tsahui', en idútë li nácgaca le núngaca
lu në'ë.

Nácgaca tsutsu yúgu'të xibá gunná bë'ë.

⁸ Rucuí'tica'së' tsutsu xibá queë',

en rusudxinë' léguequi lu le naca idútë
li, en le naca tsahui'.

⁹ Gusól-lë'ë Nu buá'uö bönachi queë'.

Tszac nuzóë' didza' dzaga nunë'.

Lá'ayi, en ba'a ladxi' naca Lë'.

¹⁰ Lu yöl-la' radxi queéru' Lë' risí loru'
ridéli'ru' yöl-la' réajni'i.

Yúgu'të nupa tun ca ta'nná bë' xibá queë'
nápagaca yöl-la' réajni'i.

Ila'cuá'tica'sö nupa ila'gú'u Lë' yöl-la' ba.

112 ĵGuli'cu'ë yöl-la' ba Xanru!
 ĵBica' ba bönni' na' rádxiñë'
 Xanru',

bönni' na' raza ládxe'ë runë' ca gunná
 bë'ë Dios!

² Tsépisëgaca zxf'ini xi'sóë' bönni' na'
 yödzölió ni.

Gáquië' bica' ba bönni' na' runë' le naca
 dxi'a.

³ Lu yu'u lidxe' gata' yöl-la' tsahui',
 ate' idí'a'tica'só le naca tsahui' runë'.

⁴ Gulén ben' ga ridé' bönni' tsahui' ga na'
 naca chul-la.

Ruzá' ládxe'ë que luzé'ë, en ruf'i ládxe'ë
 lë', en runë' le naca dxi'a.

⁵ Gaca dxi'a queë' bönni' ruzá' ládxe'ë
 que luzé'ë,

en runnë' que tu chí'só le riyadzaj que.
 Urúajë' dxi'a cate' nu uchi'a usöró queë'.

⁶ Catu caz gaca nu utsá' bönni' na',
 ate' sóatica'só nu tsöjné lë'.

⁷ Biti' gádxinë' cate' nu usiyöni lë' le cabí
 raca dxi'a.

Ridipa ládxe'ë tu' ruzxöni ládxe'ë Xanru'
 Dios.

⁸ Dios rutipë' ládxe'ë, ate' bití' gádxinë'
 cate' idxinrö dza ilé'enë' nuhuó'tjagaca
 nupa ta'díl-lalen lë'.

⁹ Idú ládxe'ë runödzejë' quégaca bönachi
 yechi'.

Idí'a'tica'só le naca dxi'a runë'.

Dios uchisë' lë' ga tsépisë'.

¹⁰ Ila'lé'e lë ni nupa tuá' dö', en ila'bó'
 baguf'isö.

Ilagu zxe láyi'gaca, en ila'niti
 cuínguequi.

Tsaz initi le ta'zé ládxi'gaca nupa tuá'
 dö'.

113 ĵGuli'cu'ë yöl-la' ba Xanru!
 ĵGuli'cu'ë yöl-la' ba, lib'ili'
 huen dxin queë' Xanru'!

ĵGuli'cú'u yöl-la' ba Lë' Xanru'!

² ĵCú'uru' yöl-la' ba Lë' Xanru',
 cate' risí lo na'a, en yugu' iz si' zaca!

³ ĵGa naguela' ga rilén gubidza ga ridx-
 intë ga ribía,

cú'uru' yöl-la' ba Lë' Xanru'!

⁴ ĵNayépisëtë'ë' Xanru' Dios ca yúgu'të
 yödzö izá'a!

ĵNazxóntërö yöl-la' zxön queë' ca naca
 lúzxiba!

⁵ ĵNuzxi caz zoa naca ca náquië' Xanru'
 Dios?

Rö'ë rinná bë'ë ga na' nayépisëtë'ë'.

⁶ Ruzótaj cuiné' para uyúé'

le dë lúzxiba, en le dë luyú ni.

⁷ Ruchisë' nupa nácgaca yechi', rubéajë'
 léguequi lu bëchtö yu.

Ruchisë' nupa ta'yadzaj, rubéajë' légue-
 qui lu dö bëbu.

⁸ Runë' ga ta'bö'len nupa ta'nná bë'.

Ta'bö'len nupa ta'nná be'e bönachi
 queë'.

⁹ Runë' ga zóanu nigula huödx yu'u
 lídxinu.

Rudzeja ládxi'nu tu' runë' ga nacuá'abi'
 zxf'ininu.

ĵGuli'cu'ë yöl-la' ba Xanru'!

114 Cate' bila'rúaj bönachi Israel
 luyú Egipto

bila'rúajë' zxf'ini xi'sóë' Judá ladaj nupa
 tu'í didza' izá'a.

² Zxf'ini xi'sóë' Judá guláquië' ca lidxe'
 Xanru' Dios,

ate' gulaca bönachi Israel nupa rinná
 bë'enë' Dios.

³ Lahuë' Dios bubiga' nísado',

ate' bub'i nisa yegu Jordán.

⁴ Gula'xiti' gu'fa zxön ca yugu' bö'cu' zx-
 ila' biguíú',

ate' gula'xiti' ca' gu'ado' ca yugu' bö'cu'
 zxf'la'do'.

⁵ ĵBi raca quiu', nísado', tu' rubigu'?

ĵBi raca quiu', yegu Jordán, tu' rub'i
 nisa quiu'?

⁶ ĵBi raca queéli', gu'fa zxön, tu' rixít'i'
 ca yugu' bö'cu' zxf'la' biguíú'?

ĵBi raca queéli', gu'ado', tu' rixít'i'
 ca yugu' bö'cu' zxf'la'do'?

⁷ Guzxizi lahuë' Xanru', yödzölió.

Guzxizi lahuë' Dios queë' Jacob.

⁸ Benë' Dios ga gulaj nisa tu lë'e
guiójt'o,
en benë' ga böaca le guca guiój jara tu
ga rilén nisa.

115 Calëga queétu', Xan, calëga
queétu',

pero que lo' gaca yöl-la' ba
tu' nacu' dxi'i ladxi', en le naca idútë li.

² ¿Bizx que ta'nná bönachi yugu' yödzö
izá'a:

“Gazxi caz zoë' Dios quégaquië”?

³ Zoë' Dios queéru' yehua' yubá.

Runë' le raza láchxë'ë gunë'.

⁴ Néquiguequini plata, en oro budó' qué-
gaca bönachi izá'a na',

yugu' le núngaca lu ni'a lu na' bönachi.

⁵ Nacuá' ruí'iguequi, pero bití' gaca ilu'í
didza'.

Nacuá' guiój lógaca, pero bití' gaca
ila'lé'e.

⁶ Nacuá' náagaca, pero bití' gaca
ila'yöni.

Nacuá' zxíniguequi, pero bití' gaca
ila'lé'e.

⁷ Nacuá' ná'agaca, pero bití' bi gaca
ila'gán.

Nacuá' n'agaca, pero bití' gaca ila'zá'.

Bití' gaca ilún bö lubá'agaca.

⁸ Nupa tun budó' guiój budó' yaga ilaca
ca náagaca budó' na',

núti'tës nu ruzxöni ladxi' budó' guiój
budó' yaga.

⁹ Libí'ili', bönachi Israel, buli'zxöni
láchxë'ë Xanru' Dios.

Rácalen cazë' libí'ili', en rapa chi'ë
libí'ili'.

¹⁰ Libí'ili', xzí'ini xi'sóë' Aarón, buli'zxöni
láchxë'ë Xanru' Dios.

Rácalen cazë' libí'ili', en rapa chi'ë
libí'ili'.

¹¹ Libí'ili' na' rádxili'-në' Dios, buli'zxöni
láchxë'ë Xanru' Dios.

Rácalen cazë' libí'ili', en rapa chi'ë
libí'ili'.

¹² Xanru' Dios ruí'í láchxë'ë rë'u, en gunë'
ga gaca dxi'a queéru'.

Gunë' ga gaca dxi'a quégaca bönachi
Israel.

Gunë' ga gaca dxi'a quégaca xzí'ini
xi'sóë' Aarón.

¹³ Gunë' ga gaca dxi'a quégaca nupa
tadxi Lë',

nupa na' náagaca cá'asó, en nupa na'
nayépisëgaca.

¹⁴ Gunë' Xanru' Dios ga tsan le nequi
queéli',

lë' na' nequi queéli', en le nequi quégaca
xzí'inili'.

¹⁵ Raca láchxa'a gunë' Xanru' ga gaca dx-
i'a queéli'.

Náquië' Nu ben lúzxiba, en luyú ni.

¹⁶ Nequi queë' Xanru' Dios lúzxiba xitsá',
pero nudödë' lu ná'agaca bönachi luyú
ni.

¹⁷ Nupa chinátigaca bití' gaca ila'gú'u
Xanru' yöl-la' ba,

en calëga nupa nacué' dxisó' lataj chul-la
que yöl-la' guti.

¹⁸ ¿Cú'uru' yöl-la' ba Xanru' Dios
na'a dza, en yúgu'të dza si' zaca!

¿Guli'cu'ë Xanru' yöl-la' ba!

116 Nadxí'ida'-në' Xanru' Dios, tu'
riyönnë'

le rulidza' Lë', en le rinábida'-në'.

² Ruzë' naguë' chi'a.

Que lë' ni na' ulidza' Lë' tsanni ni zoa'
nabana'.

³ Guzóa bönadxi quia' gátia',
en guyu'a tsöbi que lataj chul-la que yöl-
la' guti,

ate' gusëbi láchxa'a, en buf'inide'eda'
láchxa'a.

⁴ Ní'irö bulidza'-në' Xanru' Dios, gunnía':
“Ráta'yua' lo', Xan, usöló' neda'.”

⁵ Xanru' Dios ruzá' láchxë'ë queéru', en
náquië' tsahui'.

Dios queéru' ruí'í láchxë'ë rë'u.

⁶ Rapa chi'ë Xanru' nupa náagaca do'
ladxi'.

Bulu'xieja bönachi neda', ate' busölë'
neda'.

⁷ Buzí' ladxi' bö' naca caza',

tu' runë' Xanru' Dios ga raca dxi'a quia'.

⁸ Busölö' bö' naca caza', Xan, lu yöl-la' guti.

Benu' ga bufi' nisa ribödxi guió'j lahua', en ga bití'rö cuílagaca ni'a.

⁹ Ta'a lahuë' Xanru' Dios

ga nacua' nupa nabángaca.

¹⁰ Gueyájlë'a Lë' cate' gunnía':

"Zoa le rusaca' neda' zi'."

¹¹ Lu yöl-la' rö' böniga quia' gunnía':

"Ta'zi' yë' yúgu'të bönachi."

¹² ¿Bizxi caz gu'a-në' Xanru' Dios

ni'a que yugu' le runë' le ruzi'a xibé?

¹³ Si' lu na'a yöl-la' rusölá queë' Xanru',

en ulidza'-në' Xanru' Dios.

¹⁴ Ünöd'zja' queë' Xanru' le guzxi' lu na'a ünöd'zja'.

Raca ládxa'a gaca guna' caní lógaca yúgu'të bönachi queë'.

¹⁵ Rúndë"ë Xanru' bal

yöl-la' guti quégaca nupa néquiquequi quez queë'.

¹⁶ Le nácatë naca' huen dxin quiu', Xan.

Naca' huen dxin quiu', enca' zxi'ininu nigula huen dxin quiu'.

Busedxu' le biröli neda'.

¹⁷ Cu'a lo' le ünöd'zja' quiu', en guía' Li': "Xclenu",

en ulidza' Li', Xan.

¹⁸ Ünöd'zja' queë' Xanru' le guzxi' lu na'a ünöd'zja'.

Raca ládxa'a gaca guna' caní lógaca yúgu'të bönachi queë'.

¹⁹ Ga zoa lö'a que yu'u lidxë' Xanru',

lu yöd'zö Jerusalén guna' caní.

¡Guli'cu'ë yöl-la' ba Xanru' Dios!

117 ¡Guli'cu'ë yöl-la' ba Xanru' Dios, libí'ili', bönachi yúgu'të yöd'zö izá'a!

¡Guli'cu'ë yöl-la' ba yúgu'tëli',

² tu' buxönë' queëru' yöl-la' dxi'i ladxi' queë',

en zóatica'sö le naca idú ladxi' queë'!

¡Yöl-la' ba Lë'!

118 ¡Guli'guíë' Xanru': "Xclenu", tu' náquië' dxi'a!

¡Zóatica'sö yöl-la' dxi'i ladxi' queë'!

² Ral-la' ila'nná bönachi Israel:

"¡Zóatica'sö yöl-la' dxi'i ladxi' queë'!"

³ Ral-la' ila'nná zxi'ini xi'sóë' Aarón:

"¡Zóatica'sö yöl-la' dxi'i ladxi' queë'!"

⁴ Ral-la' ila'nná nupa tadxi Xanru' Dios:

"¡Zóatica'sö yöl-la' dxi'i ladxi' queë'!"

⁵ Cate' gudfi' guzácaca' bulidza'-në' Xanru',

ate' bubí'ë didza', en busölë' neda'.

⁶ Zoë' Xanru' cuita' neda', ate' bití' bi gádxida'.

¿Bizxi caz gaca ilún bönachi quia'?

⁷ Zoë' Xanru' cuita' neda' ladaj nupa tácalen neda'.

Que lë ni na' idéli'da' láhuigaca nupa bití' ta'lé'e neda' dxi'a.

⁸ Nácarö dxi'a uzxöni ládxa'a-në' Xanru', en bití' uzxöni ládxa'a nu naca bönáchisö.

⁹ Nácarö dxi'a uzxöni ládxa'a-në' Xanru', en bití' uzxöni ládxa'a nupa ta'nná bë'.

¹⁰ Bönachi yúgu'të yöd'zö izá'a gula'gú'u neda' lé'ajlö.

Len yöl-la' huáca queë' Xanru' buxicja' léguequi.

¹¹ Gula'gu'ë neda' lé'ajlö. Ön, gula'gu'ë neda' lé'ajlö,

pero len yöl-la' huáca queë' Xanru' buxicja' léguequi.

¹² Gula'gu'ë neda' lé'ajlö ca yugu' buzú rön,

pero gula'nítië' ca tu lu guí' guixi' yötsi' bidx.

Len yöl-la' huáca queë' Xanru' buxicja' léguequi.

¹³ Bulu'dxíguë'ë neda' ga bidxintë guzóa tsöjtsö'a,

pero gúcalenë' Xanru' neda'.

¹⁴ Naca cazë' Xanru' yöl-la' huáca quia', en le rul-la'.

Naca cazë' yöl-la' rusölá quia'.

¹⁵ Lu yu'u lídxigaca nupa nácacaca tsahui'

ru'u bö que nupa ta'bódxia' lu yöl-la' rudzeja quéguequi tu' nulágaca.

¡Runda' dxin në'ë ibëla Xanru!
¹⁶ ¡Nayépisëtë'rö në'ë ibëla Xanru!
 ¡Runda' dxin në'ë ibëla Xanru!
¹⁷ Biti' ca' gátia', pero soa' ibana',
 ate' usiyönda' bönachi le nunë' Xanru'.
¹⁸ Xanru' bëndë'ë neda' xiguaia',
 pero bití' budödë' neda' lu yöl-la' guti.
¹⁹ Guli'salaj quia' ga ta'yazë' bönni'
 tsahui'.
 Tsu'a ni', en guía'-në' Xanru': "Xclenu'."
²⁰ Naca lataj ni ga riyaza cazë' Xanru'
 Dios.
 Ila'yazë' ni bönni' tsahui'.
²¹ ¡Guía' Li': "Xclenu'" Xan, tu' bubí'u
 didza' quia',
 en tu' nacu' Nu rusölá neda'!
²² Zoa tu guiój bulu'zóë' tsölá'alö bönni'
 tu'cu'ë zö'ö.
 Na'a naca guiój na' guiój len squin zö'ö.
²³ Benë' Xanru' Dios ga naca caní.
 Naca tu le run ga rubániru'.
²⁴ Dza ni naca dza nunë' Xanru' Dios.
 Udzéjaru', en uzí'iru' xibë.
²⁵ Ráta'yutu' lo', Xan, usóló' netu'.
 Ráta'yutu' lo', Xan, gunu' ga gaca dxi'a
 queé'tu'.
²⁶ Bica' ba bönni' na' zë'ë uláz queë'
 Xanru'.
 Guntu' Li' zxön lu yu'u lidxë' Xanru'.
²⁷ Dios náquië' Xanru', ate' bennë'
 queé'ru' bení'.
 Buli'nödzej queë' Dios yugu' bëdxi ren-
 ni' uzégui'ru'-ba' lahuë' lu bucugu
 queë'.
²⁸ Naca cazu' Li' Dios quia', ate guía' Li':
 "Xclenu'."
 Naca cazu' Li' Dios quia', ate' guna' Li'
 zxön.
²⁹ ¡Guli'-guié' Xanru' Dios: "Xclenu'" tu'
 náquië' dxi'a!
 ¡Zóatica'sö yöl-la' dxi'i ladxi' queë'!

Le run le gunná bé'enë' Xanru' rë'u

119 ¡Bica' ba nupa nátagaca idú
 dxi'a tsáhui'do',

nupa na' tun ca rnna xibá naguixjë'
 Xanru'!
² ¡Bica' ba nupa tun ca nátagaca le benë'
 ba nalí,
 en idú ládxi'gaca ta'zé ladxi' Lë'!
³ Biti' bi le cabí naca tsahui' tun,
 pero tun ca nátagaca le nulu'ë lahui.
⁴ Nuzú' queé'tu' xibá quiu', Xan,
 para idú ládxi'tu' guntu' ca ta'nná.
⁵ Raca ládxa'a gúntica'sa' ca ral-la' guna',
 en guna' yugu' le gunná bë'u.
⁶ Ní'rö bití' ca' utuf'ida'
 channö gapa chi'a yugu' le gunná bë'u.
⁷ Lu yöl-la' ba'a ladxi' quia' guía' Li':
 "Xclenu'"
 cate' chinazi'a le buchí'a busöró'u le naca
 tsahui'.
⁸ Guna' ca ta'nná le gunná bë'u.
 Biti' usán no'o neda' tsaz.

Ral-la' gunru' ca gunné' Dios

⁹ ¡Nacxi gaca gunbi' tu bi'i bönni' ga
 ugá'ana tsahui' ládxi'do'obi'?
 Ral-la' gunbi' ca rnna xtídz'u'.
¹⁰ Idú ládxa'a rizé ládxa'a Li', Xan.
 Biti' gu'u lataj ucá'ana' yugu' le gunná
 bë'u.
¹¹ Lu icja ládxi'da'ahua' runa' ca rnna
 xtídz'u',
 para cabí guna' dul-la' lo' Li'.
¹² ¡Bica' xibó', Xan!
 Busedi neda' yugu' le gunná bë'u.
¹³ Len ruá' cuina' ru'a didza'
 ca nátagaca yúgu'të le rusedi quézinu'
 netu'.
¹⁴ Rudzējada' ca nátagaca le nunu' ba
 nalí
 ca nu rudzeja tu' dë yöl-la' tsahui' que.
¹⁵ Sa' ládxa'a ca nátagaca xibá quiu'
 en güf'i ládxa'a yugu' le nulú'u lahui.
¹⁶ Udzējada' ca nátagaca le gunná bë'u.
 Biti' gal-la ládxa'a xtídz'u'.

**Rudzéjade'eru' runru' le
rna cazë' Dios**

¹⁷ Ben ga gaca dxi'a quia' neda', huen dxin quiu', Xan, para soa' ibana', en guna' ca rna xtídz'u.

¹⁸ Gusalaj guió'j lahua' para gaca ilé'eda' le tun ga rubánitu' nazúajgaca lu xibá naguixju' Li'.

¹⁹ Zoa' yódzölió ca tu bönni' ridasö. Biti' ucachu'u yugu' xibá nunu' ga bití' gaca ilé'eda' léguequi.

²⁰ Yúgu'të dza ruhu'ini ládxa'a tu' rizé ládxa'a yugu' le nusédinu' netu' ca ral-la' guntu'.

²¹ Ruzenu' le bach nupa tun ba zxön cuínguequi, en nupa nudxiágaca dö',

nupa na' tu'zóa tsölá'alö yugu' xibá gunná bë'u.

²² Biti' gu'u lataj nu guequi neda' zi' o nu ucá'ana neda' cá'asö, tu' runa' ca ta'nná le nunu' ba nalí.

²³ Sal-la' ta'bó' nupa ta'nná bë', en ta'nné quia', rizá' ládxa'a neda', huen dxin quiu', ca nácgaca le gunná bë'u.

²⁴ Raza ládxa'a yugu' le nunu' ba nalí. Nácgaca le tu'zéajni'i neda'.

**Idú ládxi'ru' gunru'
ca gunná cazë' Dios**

²⁵ Nadinni lu yu bö' naca caza'.

Busubán ládxa'a, ugunu' dxin xtídz'u.

²⁶ Bulu'ida' Li' yugu' le nuna', ate' bubí'u didza'.

Busedi neda' yugu' le gunná bë'u.

²⁷ Buzéajni'i neda' ca nácgaca xibá quiu', ate' sa' ládxa'a ca nácgaca le nunu', le tun ga rubánitu'.

²⁸ Ribödxí bö' naca caza' tu' risébida' ládxa'a.

Butipa ládxa'a, ugunu' dxin xtídz'u.

²⁹ Ben ga bití' guna' le cabí sa'yéaj,

en buzá' ladxi' quia' xibá naguixju' Li'.

³⁰ Guró'a' le naca idútë li para guna' ca rna.

Nuzó'a' lahua' yugu' le nusédinu' netu'.

³¹ Nazí' lu na'a yugu' le nunu' liná' lo.

Biti' gu'u lataj bi gun ga utu'ida', Xan.

³² Guna' ca ta'nná xibá gunná bë'u, tu' rutipa cazu' ládxa'a.

Ré'ëniuru' tséajni'iru' xtídzë'ë Dios

³³ Busedi neda', Xan, ca ta'nná le gunná bë'u,

ate' gun chí'a léguequi ga idxinrö dza udxí.

³⁴ Benna quia' yöl-la' réajni'i para gun chí'a xibá quiu',

en para idú ládxa'a guna' ca ta'nná.

³⁵ Ben ga guna' ca ta'nná le gunná bë'u, tu' raza ládxa'a guna' ca ta'nná xibá na'.

³⁶ Ben ga güf'i ládxa'a yugu' le nunu' ba nalí,

para cabí güf'i ládxa'a yöl-la' ruhuidi'.

³⁷ Buchi'a guió'j lahua' para cabí uyúa' le cabí nazaca'.

Butipa ládxa'a para guna' le ulu'inu' netu'.

³⁸ Ben tsutsu didza' bé'lenu' neda', huen dxin quiu',

para gádxida' Li'.

³⁹ Bucuita ga zoa' nu rudidza' yudxi neda', lë na' rádxida'

tu' nácgaca dxi'a tsahui' le nusédinu' netu' ca guntu'.

⁴⁰ Buyútsöca', rizé ládxa'a yugu' xibá quiu'.

Busubán ládxa'a, ugunu' dxin le tsahui' quiu'.

Ruzxöni ládxi'ru' xtídzë'ë Dios

⁴¹ Lu yöl-la' dxi'i ladxi' quiu' buyú neda', Xan,

en busólá neda' ca rna xtídz'u gunu'.

⁴² Ubi'a didza' bi guía' nu run ga rutu'ida', innía':

“Ruzxöni ládxa'a xtídz'u”, Xan.

⁴³ Biti' ucuítu' tsaz didza' idútë li lu ru'a

tu' runa' löza yugu' le nusédinu' netu'.

⁴⁴ Gúntica'sa' ca ta'nná xibá naguixju' Li' yúgu'tè dza, en yúgu'tè iz si' zaca.

⁴⁵ Lu yöl-la' rusólá quiu' soa' ibana' tu' bē' ládxa'a guna' ca ta'nná bē' xibá quiu'.

⁴⁶ Gu'a didza' que le nunu' ba nalí ló-gaquié' bönni' ta'nná bē'ē en biti' ca' utuf'ida'.

⁴⁷ Tsaza ládxa'a yugu' xibá gunná bē'u, yugu' lē na' nadxf'ida'.

⁴⁸ Guna' ca' ca ta'nná xibá nunu', lē na' sē ládxa'a, en sa' ládxa'a ca nácagaca le gunná bē'u.

Zóatica'sō xtídzē'ē Dios

⁴⁹ Yöjné didza' na' bē'lenu' neda', huen dxin quiu',

tu' benu' ga runa' löza le.

⁵⁰ Didza' na' ruhué tsahui' neda' cate' riguf'i rizáca'a,

tu' tu'subán ládxa'a didza' bē'u.

⁵¹ Tu'títjal'e neda' nupa tun ba zxon cúnguequi,

pero biti' ca' usana' xibá naguixju' Li'.

⁵² Rójneda' yugu' le busédinu' netu' dza ni'te, Xan,

ate' lē na' ruhué tsahui' neda'.

⁵³ Lu yöl-la' ridzá'a quia' rō'a böniga ni'a quégaca nupa tuá' dō',

nupa na' tu'cá'ana xibá naguixju' Li'.

⁵⁴ Rul-la' ca nácagaca le gunná bē'u.

Zoa' ni ca tu bönni' ridé' zi'tu'.

⁵⁵ Chi'i dzó'ölö rójneda' Lo', Xan,

en run chi'a xibá naguixju' Li'.

⁵⁶ Nacuá'len neda' le ruzi'a xibé ate' runa' ca rnna yugu' xibá quiu'.

Raza ládxi'ru' xtídzē'ē Dios

⁵⁷ Nacu' Li', Xan, le ruzi'a xibé.

Chigunnía' guna' ca rnna xtídzu'u.

⁵⁸ Idú ládxa'a inábida' Li' sóalenu' neda'.

Buéchi' ladxi' neda' ca rnna xtídzu'u gunu'.

⁵⁹ Guzá' ládxa'a ca nácagaca le runa',

ate' bubfi' ládxa'a para guna' ca rnna le nunu' liná' lo.

⁶⁰ Béndá'a bayúdx, en biti' gudzedá' para guna' ca rinná bē' xibá quiu'.

⁶¹ Bónachi zían bónachi tuá' dō' gula'gú'u neda' lé'ajlō, pero biti' gul-la ládxa'a xibá naguixju' Li'.

⁶² Gulahuéla riyasa', en rigu'a Li' yöl-la' ba tu' nácagaca tsahui' yugu' le nusédinu' netu'.

⁶³ Runa' tsözxón nupa tadxi Li', enca' nupa tun ca rnna xibá quiu'.

⁶⁴ Ridxín idúté yödzölió yöl-la' dxi'i ladxi' quiu', Xan.

Busedi neda' yugu' le gunná bē'u.

Naca le saca' le gunná cazē' Dios

⁶⁵ Benu' quia' neda', huen dxin quiu', le naca dxi'a,

ca rnna xtídzu'u gunu', Xan.

⁶⁶ Busedi neda' yöl-la' réajni'i idú, en yöl-la' raca yenni',

tu' réajlé'a yugu' xibá gunná bē'u.

⁶⁷ Zí'alō cate' buzötju' neda' gudá' nanitia',

pero na'a runa' ca rnna xtídzu'u.

⁶⁸ Idú dxi'a tsahui' nacu', en runu' le naca dxi'a.

Busedi neda' yugu' le gunná bē'u.

⁶⁹ Nupa tun ba zxon cúnguequi ta'z'í yē ca naca quia',

pero idú ládxa'a guna' ca rnna xibá quiu'.

⁷⁰ Chul-la niti naca icja ládxi'do'guequi, pero raza ládxa'a neda' xibá naguixju' Li'.

⁷¹ Naca dxi'a buzötju' neda'

para bizédida' yugu' le gunná bē'u.

⁷² Nácagacarō dxi'a quia' xibá rinná bē'u ca nácagaca gayuá' gayuá'sō dumí oro, en plata.

Naca tsahui' le gunná cazē' Dios

⁷³ Len no'o benu' neda', en buzú' neda'.

Buzéajni'i neda' para gúnbë'a xibá gunná
bë'u.

⁷⁴Nupa tadxí Li' ila'lé'e neda', en
ulu'dzeja ládxi'guequi,
tu' runa' löza xtídzú'u.

⁷⁵Nözda' naca tsahui' ca ruchi'a rusöróu'
quia' neda', Xan,
ate' lu yöl-la' li ladxi' quiu' busaca' zi'u
neda'.

⁷⁶Na'a, lu yöl-la' dxi'i ladxi' quiu' buë
tsahui' neda',
ca rnna didza' chibé'lenu' neda', huen
dxin quiu'.

⁷⁷Gudá duhuechi' ládxi'u neda' para
soa' ibana',
tu' raza ládxa'a xibá naguixju' Li'.

⁷⁸Ben ga ulu'tuí' nupa tun ba zxön
cuínguequi,
tu' gula'nné quia', en bití' bi bena'
quéguequi,
pero neda' sa' ládxa'a ca naca xibá quiu'.

⁷⁹Ral-la' udxín quia' nupa tadxí Li',
nupa na' núnbë'gaca le nunu' ba nalí.

⁸⁰Ben ga udxín ca rnna le gunná bë'u,
para cabí utuí'ida'.

Runë' Dios ca rnna xtídzë'ë

⁸¹Rudú ládxa'a tu' riböza' yöl-la' rusöla'
quiu',
pero runa' löza xtídzú'u.

⁸²Chirequi ichul-la lahua' tu' rizëda'
ládxa'a xtídzú'u,
rnnía': "¿Bátaxi huë tsaú'u neda'?"

⁸³Caní raca tu' naxú'unida' ca tu buzudi
guídi nal-la' lahui guí',
pero catu caz gal-la ládxa'a yugu' le
gunná bë'u.

⁸⁴¿Bál-laxi dza soa' ibana' neda', huen
dxin quiu'?

¿Bátaxi usiúdxu' nupa ta'bía no neda'?

⁸⁵Nupa tun ba zxön cuínguequi gu-
la'chó'öna tu yeru ga tsöjbixa',
nupa na' bití' tun ca rnna xibá naguixju'
Li'.

⁸⁶Idútë li nácgaca yúgu'të xibá gunná
bë'u.

Lu yöl-la' rizi' yë' quéguequi ta'bía no
neda'.

¿Gúcalen neda'!

⁸⁷Gula'zóa ulu'sunítie' neda' lu yödzülió
ni,

pero bití' busán na'a xibá quiu'.

⁸⁸Lu yöl-la' dxi'i ladxi' quiu' busubán
ládxa'a,
para gapa chi'a le nunu' ba nalí len ruá'
cuinu'.

Réajlë'ëru' xtídzë'ë Xanru'

⁸⁹Rulidza' Li', Xan.

Tsaz naguixju' xtídzú'u yehua' yubá.

⁹⁰Gunu' ca rnna xtídzú'u quégaca bö-
nachi na'a dza, en yúgu'të dza si'
zaca.

Gudixaj cazu' yödzülió, ate' idía'tica'sö.

⁹¹Ni'a que le gunná bë'u nacua' caz
yúgu'të ga ridxintë na'a dza,
tu' tun xichinu' yúgu'të lë na'.

⁹²La'tu' cabí raza ládxa'a xibá naguixju'
Li',
chigunítia' lu le busaca' zi' neda'.

⁹³Catu caz gal-la ládxa'a yugu' xibá
quiu',
tu' busubanu' ládxa'a ni'a quéguequi.

⁹⁴Néquida' quiu'.

¿Busöla' neda', tu' ruf'i ládxa'a xibá quiu'!

⁹⁵Nupa tuá' dö' ta'bó' nisi neda' para
ulu'suniti neda',

pero neda' güi'f'i ládxa'a le nunu' ba nalí.

⁹⁶Chibilé'eda' ruúdxí que yúgu'të le naca
idútë yödzülió ni,
pero catu caz udxí que le gunná bë'u
guntu'.

Nadxí'iru' xtídzë'ë Xanru'

⁹⁷Nadxí'ide'eda' xibá naguixju' Li'.

Idú dza riza' ládxa'a ca naca que.

⁹⁸Réajni'iröda' ca nupa ta'dá'baga' neda'
tu' ruf'i ládxa'a yugu' le gunná bë'u, en
tu' dá'tica'sa' léguequi.

⁹⁹Réquibe'eröda' ca yúgu'të nupa tu'sedi
neda',
tu' riza' ládxa'a le nunu' ba nalí.

100 Réajni'iröda' ca yugu' bönni' gula,
tu' rapa chi'a xibá quiu'.
101 Gudapa chi'i cuina' para cabí guna' le
cabí naca tsahui',
en para guna' ca rnna xtídz'u.
102 Biti' ca' nucá'ana' yugu' le nusédinu'
netu',
le nusedi quézinu' neda'.
103 Bica' zxixi nácgaca xtídz'u.
Ön, nácgacarö zxixi ca le zxixi que buz.
104 Tu'zéajni'i xibá quiu' neda'.
Que læ ni na' réquida' zi' yúgu'tè le cabí
naca.

**Xtídzë'ë Dios ruzeni'
lu icja ládximo'oru'**

105 Ca tu beni' naca xtídz'u ga ridá',
en le ruzeni' nöza ga ral-la' töda'.
106 Guzxí' lu na'a bi guna', en nuna'
tsutsu xtídz'a.
Gapa chi'a le nusédinu' netu' le naca
tsahui'.
107 Zoa le rusaca' zi' neda'.
Busubán ládxa'a, Xan, ugunu' dxin
xtídz'u.
108 Guzxí' yöl-la' ba rigu'a Li' len ru'a,
Xan,
en buzéajni'i neda' yugu' le nusédinu'
netu'.
109 Zóatica'sö bönadxi gátia',
pero biti' ral-la ládxa'a xibá naguixju' Li'.
110 Nupa tuá' dö' bulu'zé tu du yalaj le
sön neda',
pero biti' bucá'ana' xibá quiu'.
111 Tsaz nazí' lu na'a le nunu' ba nalí,
ate' run ga rudzeja ládxa'a.
112 Ruí' ládxa'a gúntica'sa' ca ta'nná le
gunná bë'u.
Guna' caní ga idxintè dza udxi.

**Nagá'anaru' dxi'a ni'a
que xtídzë'ë Dios**

113 Réquida' zi' nupa nácgaca chopa
ladxi',
pero nadxf'ida' xibá naguixju' Li'.

114 Nacu' ca tu ga rucachi' cuina', en le
run chi'i neda'.
Runa' löza xtídz'u.
115 Guli'cuíta ga zoa', libí'ili' ruá'ali' dö',
tu' guna' ca ta'nná le gunná bë'ë Xana'
Dios.
116 Buzóa neda' tsutsu, ugunu' dxin
xtídz'u, ate' soa' ibana'.
Biti' gu'u lataj utuf'ida' ca naca le runa'
löza.
117 Buzóa neda' tsutsu, ate' ulá',
en güf'itica'sa' ládxa'a le gunná bë'u.
118 Nusán no'o yúgu'tè nupa nusángaca
le gunná bë'u,
tu' naca yöl-la' sina' quéguequi le cabí
nazaca'.
119 Ugú' nupa tuá' dö' luyú ni ca nu rugúa
bëbu.
Que læ ni na' nadxf'ida' le nunu' ba nalí.
120 Rizxizi idútè le nayá' nabana' tu'
rádxida' Li',
en rádxida' le gaca cate' usiúdxu'
bönachí.

Ral-la' gunru' ca rnna xtídzë'ë Dios

121 Bena' le naca tsahui', en le naca li.
Biti' usán no'o neda' lu ná'agaca nupa
tu'saca' zi' neda'.
122 Nacu' quia' neda', huen dxin quiu', le
naca bë' gaca dxi'a quia'.
Biti' gu'u lataj ulu'saca' zi' neda' nupa tun
ba zxön cuínguequi.
123 Richí guió'j lahua' tu' riböza' yöl-la'
rusölá quiu',
enca' didza' tsahui' quiu'.
124 Lu yöl-la' dxi'i ladxí' quiu' ben quia'
neda', huen dxin quiu',
ca ré'ëni quézinu' gunu'.
Busedi neda' yugu' le gunná bë'u.
125 Naca' huen dxin quiu'.
Benna quia' yöl-la' réajni'i para gaca
gúnbë'a le nunu' ba nalí.
126 Chibídxín dza bi gunu', Xan,
tu' gula'guítsjé' xibá naguixju' Li'.
127 Que læ ni na' nadxf'iröda' xibá
naguixju' Li' ca nadxf'ida' oro.

¡Ön, ca oro banéquini,
 128 en réquida' nácagacarö dxi'a xibá
 quiu' ca yúgu'tè le dè!
 Biti' rilé'eda' dxi'a yúgu'tè le cabí naca.

**Raca ládxi'ru' gunru'
 ca rnna xtídzë'ë Dios**

129 Run ga rubánida' le nunu' ba nalí.
 Que læ ni na' bö' naca caza' nazí' lu në'e
 le.

130 Cate' nalá' lahui xtídz'u, ruzení'
 queé'tu'.

Run ga ta'yéajni'i nupa nácagaca nöxaj
 ladxi'.

131 Gusalja' ru'a, en gunné ládxa'a,
 tu' guzé ládxa'a xibá gunná bë'u.

132 Buyú neda', en buzá' ladxi' quia',
 ca run cazu' quégaca nupa ta'dxf'i Li'.

133 Buzóa neda' tsutsu para guna' ca rnna
 xtídz'u.

Biti' gu'u lataj le naca xihui' inná be'e
 neda'.

134 Buá'u neda' lu na' nu rusaca' zi' neda',
 para gaca guna' ca naca xibá quiu'.

135 Ben ga gaca bë' nazí' lu no'o neda',
 huen dxin quiu',

en busedi neda' yugu' le gunná bë'u.

136 Raca nisa ribödxi guiój lahua' ca tu
 yegu gubó'o,

tu' cabí tun bönachi ca rinná bë' xibá
 quiu'.

Idutë li naca le rnna cazë' Xanru'

137 Nacu' Li' tsahui', Xan.

Dxi'a tsahui' naca le ruchí'a rusöró'u'
 queé'tu'.

138 Nugú'u lu na'tu' le nunu' ba nalí.

Naca tsahui', en tsaz zoa.

139 Tu' ribóza' le naca quiu' run ga régui
 rilá ládxi'da'ahua',

ate' gulal-la ladxi' xtídz'u nupa ta'dá'ba-
 ga' neda'.

140 Idú dxi'a tsahui' naca xtídz'u.

Que læ ni na' neda', huen dxin quiu',
 nadxí'ida' le.

141 Nöxaj ladxi' naca', ate' tu'cá'ana bö-
 nachi neda' cá'asö,
 pero bití' ral-la ládxa'a le gunná bë'u.

142 Zóatica'sö le naca tsahui' quiu',
 en idütë li naca xibá naguixju' Li'.

143 Ba bidxín le raca quia', en le rusaca'
 zi' neda',

pero raza ládxa'a xibá gunná bë'u.

144 Nácatica'sö tsahui' le nunu' ba nalí.

Buzéajni'i neda' para soa' ibana'.

**Ral-la' ulaba ládxi'ru'
 le gunná cazë' Dios**

145 Idú ládxa'a rulidza' Li'.

Bubí'i didza', Xan, ate' guna' ca naca le
 gunná bë'u.

146 Rulídzatica'sa' Li'.

Busölá neda', ate' guna' ca naca le nunu'
 ba nalí.

147 Riyasa' zí'alö ca ritó yu zila, en
 rulidza' Li' para gácalenu' neda'.

Ribóza' yugu' didza' gu'u.

148 Chi'i dzó'ölö rubéaja' yëla guiój
 lahua',

para ulaba ládxa'a ca naca xtídz'u.

149 Lu yöl-la' dxi'i ladxi' quiu' buzé nagu'
 chí'a.

Busubán ládxa'a, Xan, ca naca le nuséd-
 inu' netu'.

150 Ta'biga' nupa tuá' dö' ga zoa' para
 ila'bía no neda'.

Nucá'anagaca xibá naguixju' Li'.

151 Zu' gala' ga zoa', Xan,
 ate' idütë li naca le gunná bë'u.

152 Dza ni'te quez núnbë'a le nunu' ba
 nalí,

en nözda' tsaz nuzú' le.

Le gunná cazë' Dios run rë'u tsahui'

153 Buyú le rusaca' zi' neda', en busölá
 neda',

tu' cabí ral-la ládxa'a xibá naguixju' Li'.

154 Bubí'i didza' uláz quia', en buá'u
 neda'.

Busubán ládxa'a ca naca xtídz'u.

155 Zi'tu' zoa yöl-la' rusölá ga nacuá' nupa tuá' dö',
tu' cabí tu'i ládxi'gaca le gunná bē'u.
156 Zxóntērö naca yöl-la' ruhuéchi' ladxi' quiu', Xan.
Busubán ládxa'a ca naca le nusédinu' netu'.
157 Ziángaca nupa ta'bía no neda', en ta'dá'baga' neda',
pero bití' nucá'ana' le nunu' ba nalí.
158 Bití' rilé'eda' dxi'a nupa nucá'anagaca Li',
en bití' tun ca rnna xtídz'u.
159 Buyú ca nadxí'ida' xibá quiu', Xan.
Lu yöl-la' dxi'i ladxi' quiu' busubán ládxa'a.
160 Idútē li náacagaca yúgu'tē xtídz'u,
en tsaz nacuá' yúgu'tē le nusédinu' netu' le náacagaca tsahui'.

Ral-la' udödi cuinru' lu në'ē Dios

161 Ta'bía no neda' nupa ta'nná bē', en bití' bi bena' quéguequi,
pero runa' bal xtídz'u lu icja ládxi'da'ahua'.
162 Rudzéjalenda' xtídz'u,
ca rudzeja nu rudzöli tu yöl-la' tsahui' zxön.
163 Réquida' zi', en bití' rilé'eda' dxi'a le cabí nácatē,
pero nadxí'ida' xibá naguixju' Li'.
164 Gadxi luzuí tu dza rigu'a Li' yöl-la' ba, ni'a que le nusédinu' netu', le naca tsahui'.
165 Ta'böza dxi'a tsáhui'do' nupa nadxí'igaca xibá naguixju' Li',
en bití' bi run ga rójchégugaca.
166 Runa' löza yöl-la' rusölá quiu', Xan,
en runa' ca rnna xibá nunu'.
167 Yugu' le nunu' ba nalí tun chi'i bö' naca caza',
ate' nadxí'ide'eda' léguequi.
168 Runa' ca ta'nná xibá quiu', en yugu' le nunu' ba nalí
tu' rilé'e quézinu' yúgu'tē le runa'.

Rudzéjalenu' xtídzē'ē Dios

169 Ruzé nagu' le rulidza' Li', Xan.
Ruzéajni'i neda' ca rnna xtídz'u.
170 Ruzé nagu' le rinábida' Li',
en busölá neda' ca rnna xtídz'u gunu'.
171 Bē' neda' lataj cu'a Li' yöl-la' ba,
tu' rusédinu' neda' le gunná bē'u.
172 Bē' lataj gul-la lúdx'a'a ca naca xtídz'u,
tu' náacagaca tsahui' yúgu'tē xibá nunu'.
173 Guzóatē gácalenu' neda',
tu' nabó'a' xibá quiu'.
174 Rizé ládxa'a yöl-la' rusölá quiu', Xan,
en raza ládxa'a xibá naguixju' Li'.
175 Bē' lataj soa ibán bö' naca caza' para cu'a Li' yöl-la' ba,
en ben ga gácalen neda' le nusédinu' netu'.
176 Ridöda' tsölá'alö ca tuba' bö'cu' zxila' nanítiba'.
Gudá dudilju' neda', huen dxin quiu', tu' cabí ral-la ládxa'a xibá nunu'.

120 Cate' gud'i guxzáca'a bulidza'-nē' Xanru',
ate' Lē' bubi'ē didza'.

² Busölá bö' naca caza', Xan, lu na' nu rizí' yē',
en lu na' nu bití' run ca gunná caz.
³ ¿Bizxi gunē' quiu' Dios, en bizxi ubi'ē quiu', li' na' rizí' yē'u?
⁴ Ichizē' li' yugu' yaga lahui tuchi' que nu reaj gudil-la,
en cu'ē icju' bo' yalaj que ya' yórido'.
⁵ Bica' bayechi' neda' tu' zóasa' yödzö Mesec,
en zoa' tu lu yu'u guídí quégaca bönachi Cedar.
⁶ Xidzél'ē chiguzóa bö' naca caza'
len nupa tu'suniti yöl-la' riböza dxi'a tsáhui'do'.
⁷ Ré'ēnda' cöza' dxi'a tsáhui'do', pero cate' ruá'a didza'
té'ēnnē' ila'díl-lalen neda'.

121 Uchisa icja' uyúa' le raca yugu' lu gu'a.

¿Gazxi za' le gácalen neda'?

² Le gácalen neda' za' lu në'ë Xanru'.

Lë' benë' lúzxiba, en luyú.

³ Biti' gu'ë lataj cuilu' ga ridó'.

Biti' ca' gasi Nu na' run chi'i li'.

⁴ Buyútsóca', biti' ridódi yëla guiójj lahuë',

en biti' rásie', Lë' na' rapa chi'ë bönachi Israel.

⁵ Run chi'ë Xanru' Dios li'.

Zoë' Xanru' Dios cuitu' ibëla, rigü'ë li' zxul-la.

⁶ Biti' uzegui' gubidza li' lahui' dza, en biti' bi gun beo' quiu' chi'i dzó'ölö.

⁷ Gun chi'ë Xanru' Dios li' ga rizó'o, en ga rudxinu',

dza ni zóaru' na'a, en yugu' dza si' zaca.

⁸ Xanru' Dios gun chi'ë li' ga rizó'o, en ga rudxinu',

dza ni zóaru' na'a, en yugu' dza si' zaca.

122 Budzëjada' cate' gulë bönachi neda', gula'nná:

“Uyeajru' yu'u lidxë' Xanru' Dios.”

² Na'a zuíru' ni

ga nu riyaza yödzö Jerusalén.

³ Dxí'ado' gulunë' yödzö Jerusalén,

ate' naca lachi, en tuz ca röjlózgaca yu'u zxön que.

⁴ Ta'yaza yugu' có' bönachi queë' Xanru' ga ni

ca na' nusédinë' Dios bönachi Israel,

para ila'gú'u yöl-la' ba Xanru' Dios.

⁵ Ta'bó' nupa tu'chi'a tu'söró queëru' ga ni,

ga ta'bó' ta'nná bë' zxf'ini xi'sóë' David.

⁶ Guli'nábinë' Dios gunë' ga gaca dxi'a que Jerusalén,

en ga ulu'zí' xibé nupa ta'dxi'i yödzö ni yöl-la' tsahui'.

⁷ Dios gunë' ga ila'bóza dxi'a tsáhui'do' nupa nacua' yödzö ni,

en ga ulu'zí' xibé nupa ta'nná bë' yöl-la' tsahui'.

⁸ Tu' nadxí'ida' yugu' bócha'a, en yugu' böchi' luzá'a,

rníá': “Gaca yöl-la' ribóza dxi ladxi' lu yödzö ni.”

⁹ Tu' nadxí'ida' lidxë' Xanru' Dios,

rinábida'-në' gunë' ga gaca dxi'a que yödzö ni.

123 Uchisa lahua' uyúa' ga zu' Li', rö'u rinná bë'u yehua' yubá ni'.

² Ca runë' bönni' nadó'o, ruyúë' bi ulu'ë xanë',

ate' ruyubi' bi'i nigula nadó'o bi ulú'unu nigula xanbi',

lësca' caní ruyuru' rë'u bi ulu'ë Xanru' Dios,

ga idxinrö dza uzá' ládxë'ë queéru'.

³ Buzá' ladxi' queéту', Xan. Buzá' ladxi' queéту',

tu' nacua' nupa tu'cá'ana netu' cá'asö.

⁴ Rudú ládxí'tu' tu' tu'titaj netu' nupa tu'zí' xibé yúgu'të le dë,

en tu' tu'cá'ana netu' cá'asö nupa tun ba zxön cuínguequi.

124 “La'tu' cabí gúcalenë' Xanru' rë'u”,

ral-la' ila'nná bönachi Israel:

² “La'tu' cabí gúcalenë' Xanru' rë'u

cate' nupa biti' ta'lé'e rë'u dxi'a gula'díl-lalen rë'u,

³ la' gulútité rë'u

tu' gula'léde'e rë'u.

⁴ Guca queéru' ca la' usubága'të rë'u nisa, en la' uchícatëru' lu nisa na'.

⁵ La' uchícatëru' tu lu nisa zila.”

⁶ ¡Bica' lá'ayi Xanru' Dios

tu' cabí bi'ë lataj nupa biti' ta'lé'e rë'u dxi'a ulu'suniti rë'u!

⁷ Bularu' ca rulaba' biguínido' tu lu le zön lëba'.

Naróza' du yalaj, ate' nuláru'.

⁸ Le rácalen rë'u za' lu në'ë Xanru' Dios.

Lë' benë' lúzxiba, en lu yu.

125 Nupa tu'zxöni ládxí'gaca Xanru' Dios nácagaca ca guí'a Sión,

tu' cabí bi gaca utá guí'a na', pero tsaz zoa caz.

²Ca ró'gaca gu'fa idú gásibi'ilò yòdzò
Jerusalén,

la' canísò zoè' Xanru' Dios idú gásibi'ilò
bónachi queé',
na'a dza, en yúgu'tè dza si' zaca.

³Biti' ral-la' ila'nná bè' nupa tuá' dō' lu
xiyúgaca bōnachi tsahui',
para cabí iún ga ilu'è dō' bōnni' tsahui'
na'.

⁴Xan, ben ga gaca dxi'a quégaca nupa
nácagaca dxi'a,
en quégaca nupa idú ládxi'gaca tun ca
mna xtídzú'u.

⁵Nupa tu'dōdi cúnguequi lu le cabí
nácate',
ben léguequi xigua' tsōzxón len nupa
tuá' dō'.

Ben ga ila'cuá' bōnachi Israel dxi'a
tsáhui'do'.

126 Cate' Xanru' Dios buch'é'è bō-
nachi yòdzò Sión
nupa gula'dzún zi'tu', gúquiru' yélasò
rineru'.

²Ní'irò idú ládxi'ru' buzídxiru',
en lu yól-la' rudzeja queéru'
guródxí'aru'.

Ní'irò gulufi didza' bōnachi yugu' yòdzò
izá'a, gula'nná:

“Dios, Xángaquie', benè' le nácagaca
zxón, gúcalenè' légaquie'.”

³Xanru' Dios benè' le nácagaca zxón, gú-
calenè' rē'u,
ate' ruzí'iru' xibé'.

⁴Buché' netu', irúajtu' ga ni nadzuntu',
Xan,
para gácatu' ca nisa rudxín lu yegu
nuhuí'igaca.

⁵Lu yól-la' rudzeja ila'bódxí'a cate'
ila'lapa
nupa lu yól-la' ribódxí queéquequi
rójózagaca.

⁶Nu bōnni' lu yól-la' ribódxí rizé'è, nu'è
bínnedo' rójózè',
lu yól-la' rudzeja códxí'è cate' udxiné',
nu'è le nulapè'.

127 Channò cabí runè' tsutsu Xan-
ru' Dios tu yu'u,

nítisò tunè' dxin bōnni' tunè' yu'u na'.

Channò cabí run chi'è Xanru' Dios tu
yòdzò,

nítisò ruyúè' bōnni' na' yu'u lu nē'è
yòdzò na'.

²Nítisò naca rubanu' zílado', en rójoxu'
cate' chigúl-lada',
en ragu' le guzxi'u ni'a que le busaca' zi'
cuinu',

tu' runnè' Xanru' Dios que nu nadxí'inè'
cate' ni' rasi nu na'.

³Buli'yú, nácagacabi' zxf'iniru' le runnè'
Xanru' Dios queéru',
ate' b'í'ido' tu'cuá'anu nigula queéru'
nácagacabi' le rubi'è Xanru' Dios
queéru'.

⁴Ca nácagaca yaga lahui' tuchi' lu na' nu
bōnni' rejè' gudil-la
nácagacabi' zxf'inè' bōnni' zoè' iz cuidi'
queé'.

⁵Bica' ba bōnni' nacué'abi' queé'
ziántèrōbi'.

Biti' ca' utuí'inè' cate' ru'è didza'
láhui'gaquie'

bōnni' tu'chi'a tu'söróè' queé', en lógaca
nupa ta'díl-lalen lè'.

128 Bica' ba yúgu'tè nupa tadxi
Xanru' Dios,

nupa na' tun ca ré'èni quéziné' Lè'.

²Cate' gagu' le gata' quiu' ni'a que dxin
nun cazu',

uzi'u xibé lè na', en gaca dxi'a quiu'.

³Gácanu nigula quiu' ca tu lubá uva dxia
ga naca lō'a lidxu',
ate' ilácabi' zxf'inu' ca yugu' yaga
olívodo' ta'bó'ōbi' ga ni' ráguli'.

⁴Buli'yútsöca', caní gáquie' bica' ba
bōnni' na' rádxi'nè' Xanru' Dios.

⁵Xanru' Dios zoè' Sión gunè' ga gaca dx-
i'a quiu',

en gu'è li' lataj ilé'enu' le dxi'a gaca que
yòdzò Jerusalén
yúgu'tè dza su' ibanu'.

⁶Dios gu'ë li' lataj ilé'enu' yugu' xzí'ini xi'sú',
en gunë' ga ila'böza dxi'a tsáhui'do' bönachi Israel.

129 “Zian luzuí gula'bía no netu' ga gudela' nácatu' ra'bando”,
huáca ila'nná bönachi Israel:

²“Zian luzuí gula'bía no netu' ga gudela' nácatu' ra'bando',
pero biti' gula'deli' ulu'xicja netu'.

³Guca tsa bulu'gá'ana-ba' bédxi lu béla' cúdzu'tu',
en gulún tunna ga gudödi xiyágaba' bédxi quégaquië'.”

⁴Tsahui' náquië' Xanru' Dios.
Chinachúguë' du quégaca nupa tuá' dö' le gulúgui'ni netu'.

⁵Ben ga ulu'tuí'i, en ulu'huécja guz cúdzu'lö
yúgu'të nupa biti' ta'lé'e dxi'a netu', bönachi Sión.

⁶Ben ga ilácagaca ca guíxi'do' da' ícjo'olö yu'u,
le ribídxité cate' ni' naca hué'énido'.

⁷Biti' gaca ulí nē'e nu tsójchugu le,
en biti' gaca nu gachi tsólén guizxi que,

⁸en biti' ta'nná nupa ta'dödi ni':
“Rinábitu'-në' Xanru' Dios gunë' ga gaca dxi'a quiu'.

Lu Lë' Xanru' rinábitu' Lë' gunë' ga gaca dxi'a quiu'.”

130 Ga ni nótjada' rulidza' Li',
Xan.

²Ruzé' nagu' chi'a, Xana' Dios.

Ruzéda' nagu' le rinábita' Li'.

³La' nnaru' tsójnenu' xigua' nabága'-gaca bönachi,

¿nuzxi caz urúaj tsahui' lo', Xan?

⁴Runiti lo cazu' netu', Xan,

para guntu' Li' bal.

⁵Runa' löza Li', Xana' Dios. Run löza bö' naca caza' Li',

ate' runa' löza gaca ca rna xtídz'u.

⁶Bö' naca caza' runrö löza Li', Xan,
ca tunë' bönni' tapa chi'ë yödzo chi'i dzó'ölö ta'bözë' itó yu zila,

ca tunë' löza itó yu zila yugu' bönni' na'.

⁷Guli'gún löza Xanru' Dios, libí'ili', bönachi Israel,

tu' náquië' dxi'i ladxi' Xanru',

en ruhuá'uë' bönachi Israel.

⁸Xanru' Dios huóá'uë' bönachi Israel

lu yúgu'të xigua' nabága'gaca.

131 Biti' run ba xzón cuina', Xan,
en biti' rigú'u cuina' yöl-la' ba,
en biti' ulapa' na'a le nácataga xzón, en le nácataga böniga.

²Idú ládxa'a nuzóa cuina' nöxaj, en zoa' dxisö.

Ca runbi' bi'i hué'ëni ruzí' ládxi'bi' cuítanu xiná'abi',

ca' riböza bö' naca caza' lu icja ládxi'da'ahua'.

³¡Libí'ili', bönachi Israel, guli'gunë' löza Xanru' Dios

ga naguela' na'a dza, en yúgu'të dza si' zaca!

132 Rinábita' Li', Xan, uláz queë' David tsójnénu'
yúgu'të le gudí'i guzxaqué'ë,

²en ca benë' tsutsu xtídzë'ë, Xan, en guzxi' lu në'ë bi gunë' lo',

nacu' Nu nál-latëro láluigaquië' xzí'ini xi'sóë' Jacob, gunné':

³“Biti' ca' tsu'a lidxa',

en biti' gáta'a le ráti'da',

⁴en biti' gu'a lataj tódi yëla guióaj lahua',
en biti' utsudi' lahua',

⁵ga idxinrö dza ucöza' tu lataj ga soë' Xanru' Dios,

le gaca yu'u lidxi Nu na' nál-latëro láluigaquië' xzí'ini xi'sóë' Jacob.”

⁶Biyónitu' didza' que guí'ina lá'ayi queë' Dios cate' ni' zóatu' Efrata,

ate' budzólitu' le lu xiyúë' Jaar.

⁷Uyéajru' ga na' zoa cazë' Xanru' Dios.

Tseaj ládxi'ru'-në' ga naca xilibi ni'ë.

⁸Gudödi, Xan, ga na' soa cazu' Li'.

Gudá tsözxón len guí'ina lá'ayi que yöl-la' xzón quiu'.

⁹Ben ga sóalen le naca tsahui' yugu' bixúz quiu'

ca tu lari' ta'xóe' cúdzu'gaquië'.
Ben ga ilúl-la bönachi quiu' lu yöl-la'
rudzeja quéguequi.

¹⁰Uláz queë' David, huen dxin quiu',
rinábida' Li'

cabí uca'anu' bönni' na' guró'cazu' Li'.

¹¹Xanru' Dios benë' tsutsu xtídzë'ë bi
gunë' queë' David,
le naca idútë li, ate' Lë' biti' unítie'
xtídzë'ë na', gunné':

“Uzóa' tuë' xzí'ini xi'sú' xilatju' ga inná
bé'ëbi'.

¹²Channö ilunbi' xzí'ini xi'sú' ca rnna
didza' dzaga quia',
en le nuna' ba nalí para uzéajni'ida'
légacabi',
ila'nna bé'ëbi' ga rö'u rinná bë'u yúgu'të
dza si' zaca.”

¹³Xanru' Dios nabó'cazë' queë' yödzo
Sión.

Raca ládxë'ë gaca Sión ga soa cazë' Lë'.

¹⁴Rnnë': “Nácatica'sö lataj ni ga soa
caza' neda'.

Soa' ni tu' raca ládxa'a soa' ni.

¹⁵Guna' ga gátada' le ilágugaca bönachi
ni,

en guna' ga ulu'huólaj ila'dzé'e yöta xtila
nupa ta'yadzaj ta'yudxi lu yödzo ni.

¹⁶Guna' ga sóalen yöl-la' rusölá yugu'
bixúz quia'

ca tu lari' ila'xóa cúdzu'gaquië',
ate' ilúl-la bönachi quia' lu yöl-la'
rudzeja quéguequi.

¹⁷Guna' ni ga ilá' lahui yöl-la' unná bë'
queë' David.

Guna' ga sóatica'sö nu inná bë' xilatjë'
bönni' na' nabó'caza'.

¹⁸Guna' ga sóalen nupa biti' ta'lé'e lë' dx-
i'a yöl-la' rutuí'i

ca tu lari' ilácuguequi, pero tsëpi yösa
bení' de dxía' icjë'.”

133 Buli'yútsöca': ¡Bica' dxi'a
cate' nupa nácgaca böchi' luzë'e
ta'böza lu yöl-la' tuz quéguequi!

²Naca ca le za ta'gú'u ícjaguequi
bönachi,

le ridzún lu guitsa' láhuiguequi,
en bidzún lu guitsa' lúxue' Aarón,
le bidzún ga ridxintë lu yeni zxë'.

³Naca ca buzén le ridinni lu gu'a
Hermón,

en ca le ribö'a lu gu'a Sión,
tu' gunná bë'ë Xanru' gaca dxi'a queëru'
lu gu'a na',

en gata' yöl-la' na'bán idú queëru'.

134 ¡Buli'yútsöca'!
¡Guli'cu'ë Xanru' Dios yöl-la'
ba, yúgu'tëli' runli' xichinë' Xanru',
yúgu'tëli' na' zóali' yu'u lidxë' Xanru'
chi'i dzó'ölö!

²¡Guli'chisa ná'ali' ga zóali' lataj lá'ayi
queë',

en guli'nná dxi'a queë'!

³Xanru' Dios, zoa cazë' yödzo Sión,
gunë' ga gaca dxi'a queëli'.

Naca cazë' Nu ben yehua' yubá, en
yödzo'lió ni.

135 ¡Guli'cu'ë yöl-la' ba Xanru'
Dios!

¡Guli'cú'u yöl-la' ba La la'ayi queë' Xan-
ru' Dios!

¡Guli'cu'ë yöl-la' ba, libí'ili' runli' xich-
inë' Xanru',

²libí'ili' na' zu'lli' yu'u lidxë' Xanru',
ga na' zóali' lö'a que yu'u lidxë' Dios
queëru'!

³¡Guli'cu'ë yöl-la' ba Xanru' Dios tu'
náquië' dxi'a!

¡Guli'gul-la yöl-la' ba que La la'ayi queë',
tu' naca lachi!

⁴Nabó'cazë' Xanru' xzí'ini xi'sóe' Jacob
para ilaca quez queë'.

Guróe' bönachi Israel para ilequi queë'.

⁵Nözda' nayépisë' Xanru' Dios.

Nayépisëtërë' ca yugu' dios quégaca bö-
nachi izá'a.

⁶Run cazë' Xanru' ca riyaza ladxi' cazë'
yehua' yubá ni',

en luyú ni, en lu nísado', en znan lu yu.

⁷Runë' ga rö' böaj gátitës luyú ni,

en runë' ga rëpi yösa cate' ralaj guió'j.
Rubéajë' bö' recja ga rapa chi'ë le nequi
queë'.

⁸ Bëtië' yugu' bi'i bönni' zí'alö quégaca
bönachi Egipto,
zxf'inigaca bönachi, en böa' hué'ënido'
quégacaba' böa' guixi'.

⁹ Benë' yugu' yöl-la' huáca zxön le gulaca
bé' luyú Egipto,
yugu' lë na' gulaca queë' Faraón, en que-
gaca huen xichinë'.

¹⁰ Busunfië' Dios bönachi zían yödzö
izá'a,

en bëtië' bönni' lo ta'nná bë'ë.

¹¹ Bëtië' Sehón, bönni' gunná bé'enë' bö-
nachi Amorreo,

en Og, bönni' gunná bé'enë' bönachi
Basán,

en bönni' gula'nná bé'enë' bönachi
yödzö nacua' luyú Canaán.

¹² Budödë' xiyúgaquië' bönni' na'

lu ná'agaquië' bönni' Israel, bönachi
queë' cazë'.

¹³ Tsaz zoa caz Lo', Xan.

Ila'cuá'tica'sö nupa tsöjnégaca Li', Xan,

¹⁴ tu' uchi'a usöróu' bönachi queu', Xan-
tu' Dios,

en huéchi' ládXu'u nupa tun xichinu'.

¹⁵ Budó' quégaca bönachi yugu' yödzö
izá'a néquiniguequi

plata, en oro, yugu' le núngaca lu ni'a lu
ná'agaca bönachi.

¹⁶ Zóagaca ru'iguequi, pero biti' bi
didza' tuf'i.

Zóagaca guió'j lóguequi, pero biti' bi
ta'lé'e.

¹⁷ Zóagaca náagaca, pero biti' bi
ta'yöni,

en biti' ta'guela' bö' ru'igaca.

¹⁸ Nupa tun léguequi ilaca ca náagaca
budó' na',

en caní ilaca yúgu'të nupa tu'zxöni ladxi'
léguequi.

¹⁹ Libí'ili', bönachi Israel, guli'guíë' Xan-
ru' náquië' dxi'a.

Libí'ili', zxf'ini xi'sóë' Aarón, guli'guíë'
Xanru' náquië' dxi'a.

²⁰ Libí'ili', zxf'ini xi'sóë' Leví, guli'guíë'
Xanru' náquië' dxi'a.

Libí'ili', núlöli' rádxili'-në' Xanru',
guli'guíë' Xanru' náquië' dxi'a.

²¹ Núlöli' zóali' yödzö Sión ral-la' guiéli'-
në' Xanru' náquië' dxi'a,

tu' zoa cazë' Xanru' Dios yödzö
Jesusalén.

¡Guli'cu'ë yöl-la' ba Xanru'!

136 ¡Xclenë' Xanru' Dios tu'
náquië' dxi'a!

Zóatica'sö yöl-la' dxi'i ladxi' queë'.

² ¡Xclenë' Dios nayépisëtë're' ca yugu'
dios izá'a!

Zóatica'sö yöl-la' dxi'i ladxi' queë'.

³ ¡Xclenë' Xanru', nayépisëtë're' ca yugu'
xángaca bönachi!

Zóatica'sö yöl-la' dxi'i ladxi' queë'.

⁴ ¡Xclenë' Dios, tuzë' Lë' runë' yugu' yöl-
la' huáca zxön!

Zóatica'sö yöl-la' dxi'i ladxi' queë'.

⁵ ¡Xclenë' Dios, len yöl-la' rácada' queë'
benë' lúzXiba!

Zóatica'sö yöl-la' dxi'i ladxi' queë'.

⁶ ¡Xclenë' Dios, gudixjë' luyú láhuilö
nísado'!

Zóatica'sö yöl-la' dxi'i ladxi' queë'.

⁷ ¡Xclenë' Dios, benë' gubidza, en beo'!

Zóatica'sö yöl-la' dxi'i ladxi' queë'.

⁸ ¡Benë' Dios gubidza para tsení' lahui'
dza!

Zóatica'sö yöl-la' dxi'i ladxi' queë'.

⁹ ¡Benë' Dios beo', en yugu' böla'j para
ulu'zení' chi'i dzó'ölö!

Zóatica'sö yöl-la' dxi'i ladxi' queë'.

¹⁰ ¡Xclenë' Dios, bëtië' yugu' bi'i bönni'
lo quégaca bönachi Egipto!

Zóatica'sö yöl-la' dxi'i ladxi' queë'.

¹¹ ¡Bubéajë' bönachi Israel ladaj bönachi
Egipto na'!

Zóatica'sö yöl-la' dxi'i ladxi' queë'.

¹² ¡Len yöl-la' huáca zxön queë', en lu
yöl-la' nadxi'i queë' benë' caní!

Zóatica'sö yöl-la' dxi'i ladxi' queë'.

¹³ ¡Xclenë' Dios, bubéajë' choplö Nísado' Xiná!

Zóatica'sö yöl-la' dxi'i ladxi' queë'.

¹⁴ ¡Benë' ga gula'dödi bönachi Israel gat-saj láhui'lö nísado' na'!

Zóatica'sö yöl-la' dxi'i ladxi' queë'.

¹⁵ ¡Lu nísado' na' busunítië' Faraón, en bönni' queë' röjáquië' gudil-la!

Zóatica'sö yöl-la' dxi'i ladxi' queë'.

¹⁶ ¡Xclenë' Dios, guchë'ë bönachi queë' la' guixi' ga ni' naca yu bidxi!

Zóatica'sö yöl-la' dxi'i ladxi' queë'.

¹⁷ ¡Xclenë' Dios, bëtië' bönni' gula'nná bë'ë, guláquië' nal-la!

Zóatica'sö yöl-la' dxi'i ladxi' queë'.

¹⁸ ¡Bëtië' bönni' gula'nná bë'ë, dëda' lu ná'agaquië' yöl-la' unná bë'!

Zóatica'sö yöl-la' dxi'i ladxi' queë'.

¹⁹ ¡Bëtië' Sehón, bönni' gunná bé'enë' bönachi Amorreo!

Zóatica'sö yöl-la' dxi'i ladxi' queë'.

²⁰ ¡Bëtië' Og, bönni' gunná bé'enë' bönachi Basán!

Zóatica'sö yöl-la' dxi'i ladxi' queë'.

²¹ ¡Budödë' xiyúgaquië' lu ná'agaca bönachi queë'!

Zóatica'sö yöl-la' dxi'i ladxi' queë'.

²² ¡Budödë' le lu ná'agaca bönachi Israel, bönachi tun xichinë'!

Zóatica'sö yöl-la' dxi'i ladxi' queë'.

²³ ¡Yöjnenë' rë'u cate' ni' bugá'anaru' cá'asö!

Zóatica'sö yöl-la' dxi'i ladxi' queë'.

²⁴ ¡Busölë' rë'u lu ná'agaca nupa gula'díl-lalen rë'u!

Zóatica'sö yöl-la' dxi'i ladxi' queë'.

²⁵ ¡Rugahuë' yúgu'të bönachi!

Zóatica'sö yöl-la' dxi'i ladxi' queë'.

²⁶ ¡Xclenë' Dios, zoa cazë' yehua' yubá!

Zóatica'sö yöl-la' dxi'i ladxi' queë'.

137 Ra' yegu nacua' lu yu Babilonia guró'ötu', en gurödxí yéchi'tu', cate' yöjnetu' yödzö Sión.

² Lu yaga ró'gaca yugu' ra' yegu ni' bugála'tu' yugu' le rúl-lalentu'.

³ Caní bentu' tu' gula'nabi yudxi nupa gulachë' netu' nadzuntu' ni' gúl-latu'.

Nupa bulu'saca' zi' netu' gula'naba queë'tu' yöl-la' ruzxidxi, gula'nná:

“Guli'gul-la queë'tu' tu le rul-la que yödzö Sión.”

⁴ ¿Nacxi caz gaca gúl-latu' le rul-la queë' Xanru'

ga ni nadzuntu' tu lu yödzö izá'a?

⁵ Channö gal-la ládxa'a yödzö Jerusalén, rinábida'-në' Dios ugüë' yöl-la' raca que na'a ibëla.

⁶ Rinábida'-në' gunë' ga ta' lúdxa'a chichja'

channö cabí tsöjneda' ladza', en channö cabí huí zxönra' yödzö Jerusalén ca ia'tú le ruzí'ida' xibé.

⁷ Yöjné le gulunë' zxf'ini xi'sóë' Edom, Xan,

le gulunë' dza busiúdxu' yödzö Jerusalén,

ca na' gula'nnë': “Guli'quinnaj dëra.

Guli'quinnaj dëra ga idxintë xilibi zö'ö yödzö na'.”

⁸ Libí'ili', bönachi Babilonia, libí'ili' rusunítilli',

bica' ba nu ubí'i queé'li' ca na' benli' queë'tu'.

⁹ Bica' ba nu quela' yugu' bí'ido' queé'li'

en uzxuzxaj légcabi' yugu' lu guió'j.

138 Idú ládxa'a guía' Li', “Xclenu” Xan.

Gul-la' yöl-la' ba quiu' lógaca le tun zxön bönachi yugu' yödzö izá'a.

² Uzóa zxiba' saca' yudo' lá'ayi quiu', en guía' Li', “Xclenu”

ni'a que Lo', tu' nacu' dxi'i ladxi', en runu' ca rnna didza' bë'u,

tu' benu' ca naca lu xtídxu'u, en lu le naca ca nazí'i lo.

³ La' dza ná'asö cate' bulidza' Li', bubí'u didza'.

Tu' butipu' ládxa'a, guca' rugu ladxi'.

⁴ Yúgu'të bönni' ta'nná bë'ë ilé' Li': “Xclenu” Xan,

cate' ila'yönnë' didza' ru'u.

⁵ Ilul-lë' ca nátagaca le runë' Xanru' Dios,

tu' nácatëro zxon' yöl-la' ba queë' Xanru'.

⁶ Sal-la' nayépisëtëre' Xanru' Dios ru'í ládxe'ë nupa nátagaca cá'asö,

pero zi'tu' zí'tu'sö ruyúë' nupa tun ba zxon' cuínguequi.

⁷ Sal-la' ridá' ga zoa bönadxi quia', Li' utipa casu' ládxa'a.

Tíl-lalen casu' nupa ta'díl-lalen neda', ate' len yöl-la' huáca quiu' usóló' neda'.

⁸ Xanru' gun cazë' quia' ca chinuzóa cazë' gunë'.

Zóatica'sö yöl-la' dxi'í ladxi' quiu', Xan.

Biti' usán no'o le nun casu' len na' cuinu'.

139 Ruyú casu' le yu'u icja ládxi'-da'ahua', Xan, en nunbë' casu' neda'.

² Nöz quézinu' cate' ribö'a, en cate' riyasa'.

Nózinu' le rizá' ládxa'a ni' zu' zi'tu'.

³ Ruyú casu' neda' cate' bi runa', en cate' rasia',

en nózinu' yúgu'të le runa'.

⁴ Zí'atëlö ca bi didza' ru'a, chi nöz quézinu' bi inní'a, Xan.

⁵ Röjnöru casu' lahua', en za' casu' cúdza'a,

en naxóatica'sö no'o neda'.

⁶ Run ga rubánida' tu' nöz quézinu' Li'.

Biti' séqui'da' tséajni'ida' ca naca.

⁷ ¿Naru' huáca tseja' ga bití' idxín Bö quiu'?

¿Naru' huáca izxúnnaja' ga bití' zoa casu' Li'?

⁸ La'tu' huabena' lúzhiba, ni' soa casu' Li', en la'tu' huötja' lataj chul-la, ni' zoa casu' ca'.

⁹ La'tu' uyija' ga rilén gubidza, o la'tu' huadöda' ia'tsölá'alö nísado',

¹⁰ ni' caz ichë'u neda',

ate' len no'o ibëla sön casu' neda'.

¹¹ La'tu' inní'a: "Ucachi' neda' le naca chul-la",

en la'tu' huóaca chul-la bení' zóalen neda',

¹² bití' gaca chul-la lo' Li' lë na' naca chul-la quia',

pero chi'í dzó'ölö gaca quiu' ca lahui' dza.

Tuz ca nátagaca lo' Li' le naca chul-la, en le naca lahui' dza.

¹³ Nun casu' Li' le zoa icja ládxi'da'ahua'. Benu' ga guyá' lé'ënu xiná'a le naca caza'.

¹⁴ Guía' Li': "Xclenu" tu' run ga rubánida' ca nun casu' neda',

ate' rádxida' Li' tu' tun le nunu' ga rubánida',

ate' bö' naca caza' nözi caz naca caní.

¹⁵ Biti' bigachi' lo' le naca caza' cate' ni' si' galja',

cate' ni' yu'a lé'ënu xiná'a.

¹⁶ Bilé'e quézinu' neda' cate' ni' si' galja', tu' chinuzúajgaca lu guichi quiu'

yugu' dza ral-la' soa' ibana',

sal-la' bití' ridxini nitú dza na'.

¹⁷ Nazáca'tëro gaca quia' le rizá' ládxi'u, Dios.

Ziántëro nátagaca lë na' rizá' ládxi'u.

¹⁸ La'tu' huáca nu ulaba léguequi,

ilácagaca ziántëro ca nátagaca guiój yuzxi.

Cate' rubana', ni' zóalena' Li'.

¹⁹ Raca ládxa'a usunítíu' nupa tuá' dö', Dios.

Que lë ni na', guli'cuíta ga zoa', núlöli rútili' bönachi.

²⁰ Tu'í didza' zi' ca nacu' Li', Dios,

ate' nupa ta'dá'baga' Li' ta'nnë' liz que Lo'.

²¹ ¿Naru' cabí rileda' nupa ta'lé Li', Xan? ¿Naru' cabí ruzóa' tsölá'alö nupa ta'dá'baga' Li'?

²² Idú ládxa'a bití' rilé'eda' léguequi dxi'a.

Nuzóa' léguequi ca nupa ta'díl-lalen neda'.

²³ Buyú neda', Dios, en gúquibe'e le zoa icja ládxi'da'ahua'.

Guzxí' bē' neda', en gúquibe'e le rizá' ládxa'a.

²⁴Buyú channö zóalen neda' le naca dö', en buluf'i neda' nöza tsahui' quiu' zóatica'sö.

140 Busólá neda', Xan, lu ná'agaca nupa tuá' dö'.

Ben chi'i neda' para cabí bi ilunē' bönni' zi' quia'.

²Ta'zá' ládxe'ë le nácagaca xihui' ilunē', en tunē' ga ila'díl-lalen bönachi luzé'eguequi.

³Didza' tu'ë tun ga nácagaca lúdxí'-gaquiē' ca yugu' bëla sínia'.

Yu'u ruá'agaquiē' le naché' yöl-la' guti ca le dxía lu láyi'ba' bëla na'.

⁴Ben chi'i neda', Xan, para cabí bi ilunē' bönni' tu'ë dö' quia'.

Ben chi'i neda' para cabí bi ilunē' bönni' zidzaj quia',

bönni' na' té'ënē' ilunē' ga ichixi iníguida'.

⁵Nupa tun ba zxön cuínguequi nucáchi'-gaca le sön neda',

enca' du yalaj iröli neda'.

Nucáchi'gaca du yalaj ga ral-la' töda'.

Nucózagaca le ila'zón neda'.

⁶Gudxa'-nē' Xanru': "Nacu' Dios quia'.

Ruzé' nagu', Xan, yugu' le rinábida' Li'.

⁷Xana' Dios, naca cazu' Nu rusólá neda' len yöl-la' huáca quiu'.

Ben chi'i cazu' icja' cate' ni' zoa' lu gudilla.

⁸Biti' gu'u lataj, Xan, gaca quia' le ré'ënē' gunē' bönni' ru'ë dö'.

Biti' gu'u lē' lataj idéli'nē' le rizá' ládxe'ë, para cabí tsépisē'.

⁹Nacuá' nupa nagú'ugaca neda' lé'ajlō. Busubaga' ícjagaquiē' dö' té'ënē' ilu'ë quia'.

¹⁰Ben ga ila'bixaj bo' yalaj lahui ícjagaquiē'.

Bē' lataj tsöjtsázagaquiē' tu lu guí' zxön, en yugu' lu yeru zila ga biti' ila'zéqui'nē' ulu'rúajē'.

¹¹Biti' gu'u lataj soē' bönni' rizí' yē'ë luyú ni.

Ben ga udxín queē' bönni' zidzaj dö' ru'ë."

¹²Nözda' gunē' Xanru' ga ulu'rúaj tsahui' nupa ta'guí'i ta'zaca', en uchi'a usoróē' quégaca bönachi yechi'.

¹³Le nácate ilé Li': "Xclenu" nupa náca-gaca tsahui' tu' tu'lidza Lo'.

Ila'cuá' ga zoa cazu' Li' nupa nácagaca dxí'a.

141 Rulidza' Li', Xan. Gudáchi ga zoa'.

Ruzé' nagu' chi'a cate' rulidza' Li'.

²Buyú le rulidza' Li' ca dzön yalaj le ridxín lo',

en cate' richisa na'a, buzi' le ca tu böa'do' uzégui'a-ba' lo'.

³Ben chi'i ruá'a, Xan, en gudapa chi'i guídi ruá'a para cabí gu'a didza' zi'.

⁴Biti' gu'u lataj gaca ládxa'a le cabí nácate,

para cabí guna' le naca xihui'

len yugu' bönni' tutiē' bönachi.

Biti' gu'u lataj guna' léguequi tsözxön.

⁵Bē' lataj gu'ë neda' bönni' tsahui' lu yöl-la' nadxí'i queē'

para uzéajni'inē' neda'.

Le gunē' gaca quia' ca le za cu'ë icja'.

Biti' gu'u lataj tá'baga' icja' le ilún nupa tuá' dö'.

Rinábida' Li' uzagu' xinózguequi.

⁶Ila'ládzu'gaquiē' bönni' lo quéguequi lē'e gu'a guiój,

ate' iléquibe'e gulaca dxí'a didza' bë'a.

⁷Ca raca cate' nu rugá'ana-ba' bēdxi, en rulá'a yu,

ca' gaca que dxita yú'ugaquiē',

le gulásilasi ra' ba que xilátjagaca nupa nátigaca.

⁸Richisa lahua' ruyúa' ga zu' Li', Xantu' Dios.

Rucachi' cuina' ga na' zu'. Biti' usán no'o neda'.

⁹ Ben ga biti' tsöjbxixa' lu le sön neda', lë na' nucáchi'gaca, en ga biti' tsöjtsaza' lu du yalaj nucóza-gaca nupa tuá' dö'.

¹⁰ Bë' lataj ila'yaza la' cuíngacasö lu du yalaj bulu'cachi' nupa tuá' dö', pero benna lataj tódisa' neda' ga na' n-gachi' du yalaj na'.

142 Rulidza'-në' Xanru', ru'a zidzaj didza'.

Ráta'yua' lahuë' Xanru' uzá' láchxë'ë quia'.

² Rudöda' lahuë' yöl-la' rinaba yudxi quia',

en rusiyönda' Lë' le rácagaca quia'.

³ Cate' budú láchxa'a, gunözi quézinu' Li' le guca quia'.

La' nöza ga ridá' neda' bulu'cachi' le sön neda'.

⁴ Buyú cuita' ibëla tu' cuntu nu zoa nu ruí'i ladxi' neda'. Biti' bi zoa le gácalen neda'.

Cuntu nu run chi'i bö' naca caza'.

⁵ Guródxi'a lo' Li', Xan, gunnía':

Run chi'i cazu' neda' Li', en naca cazu' Nu rácalen neda' ladaj nupa nabángaca.

⁶ Ruzé' nagu' le rulidza' Li', tu' nagá'ana' cá'asö.

Busölá neda' lu ná'agaca nupa ta'zóa regu' neda',

tu' nácatërögaca nál-la ca neda'.

⁷ Guléaj bö' naca caza' lu yu'u lidxi gufé, para gaca guía' Li': "Xclenu" tu' rulidza' Lo'.

Nupa nácagaca tsahui' ulu'dubi idú gási-bi'ilö ga zoa',

tu' gunnu' sizxöni quia' le riquinda'.

143 Ruzé' nagu' le rulidza' Li', Xan. Ruzé' nagu' le rinabi yúdxida' Li'.

Tu' runu' ca rna didza' bë'u, en nacu' tsahui' gunnú'

² biti' ichë'u neda' lo' ga uchi'a usöróu' quia', huen dxin quiu'.

Cuntu nu zoa naca tsahui' lo' Li'.

³ Nu biti' rilé'e neda' dxi'a zoa regu' bö' naca caza'.

Nuzötjé' yöl-la' na'bán quia' lu yu.

Benë' ga zoa' lataj naca chul-la ca raca quégaca nupa gulati dza ni'te.

⁴ Que lë ni na' rudú láchxa'a, en rö'a böniga.

⁵ Rójneda' dza chigula'dödi.

Rizá' láchxa'a ca nácagaca le benu' Li'.

Ribequi icja' ca nácagaca le nun no'o.

⁶ Richisa na'a zaca' ga zu' Li'.

Rizé' láchxa'a Li' ca tu luyú bidxi rizé' ladxi' nisa guiój.

⁷ Bubí'të didza', Xan, tu' rudú láchxa'a.

Biti' ucachi' lo' lahua' neda', para cabí gaca' ca tu bönni' ru'ë lataj chul-la ga nacua' nupa nátigaca.

⁸ Ben ga yönda' yugu' zila ca naca yöl-la' dxi'i ladxi' quiu',

tu' ruzxöni láchxa'a Li'.

Busëdi neda' ca ral-la' guna',

tu' ruchisa' lo' Li' bö' naca caza'.

⁹ Busölá neda', Xan, lu ná'agaca nupa biti' ta'lé'e neda' dxi'a.

Nacu' Nu ruzóa neda' tsutsu.

¹⁰ Busedi neda' para guna' ca ré'ënu' Li', tu' naca cazu' Li' Dios quia'.

Bë' lataj iché' Bö' Lá'ayi quiu' neda' lu nöza tsahui'.

¹¹ Butipa láchxa'a, Xan, para gaca yöl-la' ba que Lo'.

Tu' nacu' tsahui' busölá neda' lu le raca quia'.

¹² Lu yöl-la' dxi'i ladxi' quiu' guchugu quégaca nupa biti' ta'lé'e neda' dxi'a.

Busuniti yúgu'të nupa tu'saca' zi' bö' naca caza',

tu' naca' huen dxin quiu'.

144 ¡Yöl-la' ba Lë', Xanru' Dios! ¡Náquië' ca tu guiój ga zoa' tsutsu!

Rutipë' na'a para gaca tseja' gudil-la,

en rutipë' ca' xibón na'a para gaca tíl-lalena' bönni' nácaquie' nál-la.

² Naca cazë' Xanru' yöl-la' dxi'i ladxi' quia',

enca' ca tu ga zoa' tsutsu lu gudil-la.
Rusölé' neda', en náquié' ca tu ga zoa'
tsaz.

Náquié' ca tu le run chi'i neda' lu gudil-
la, ate' rucachi' cuina' ga na' zoé'.

Runé' ga tun nupa rinná bé'eda' ca rnna
didza' ru'a.

³ ¡Bíxatè caz náquié' bönni' tu' runu' lé'
ba lá'ana, Xan?

¡Bíxatè caz náquié' bönni' tu' ru'f'i ladxi'
cazu' lé'?

⁴ Naca cazé' bönni' na' ca tu bö'do' recja,
ate' yugu' dza zoé' nabané' nácaga-
casó ca tu zxul-la le rigú'u tu böaj
ridódisó.

⁵ Buzötaj lúzxiba, en bдинne ni, Xan.
Gudán yugu' gu'á, ate' irúaj dzön
lé'eguequi.

⁶ Ben ga tsépi yösa quiu', en bésilasi
lé'guequi.

Busé yugu' yaga lahui tuchi', en ben ga
ila'bó' bagu'isó.

⁷ Bulí no'o ga na' zu' xitsá'aló.
Busölá neda', en guléaj neda' lu ná'agaca
bönachi zi'tu',

le gaca ca rubéaju' neda' lu nisa zila.

⁸ Ta'zi' yé' bönachi na',
ate' le cabí nácaté naca yöl-la' unná bé'
qué'guequi.

⁹ ¡Gul-la' quiu' Li', Dios, tu le cubi!
¡Gul-la' quiu' yöl-la' ba, en quínnia'
bihuél-la nuá' chi du que!

¹⁰ Rusölá casu' bönni' ta'nná bé'ë.
Busöló' David, huen dxin quiu', lu gufé
tuchi' queé' bönni' ru'è dö'.

¹¹ Gúcalen neda', en busölá neda' lu ná'a-
gaca bönachi zi'tu'.

Ta'zi' yé' bönachi na',
ate' le cabí nácaté naca yöl-la' unná bé'
qué'guequi.

¹² Ben ga ilácabi' bi'i bönni' queé'tu' ni
yu'ugacabi' iz cuidi'
ca yugu' yaga nazxóngaca,
en ben ga ilácabi' bi'i nigula queé'tu'
ca nácagaca ya'zxn que tu yu'u nazaca'.

¹³ Ben ga ilígaca yu'u queé'tu' xzoa' za
utúbitu',

en ben ga iláljaba' gayuá' gayuá'aba'
chíbodo',

en bö'cu' xzla'do' ga nucuá'atu'-ba'.

¹⁴ Ben ga ulu'cuá'aba' böa' hué'énido'
qué'gaca böa' guixi' queé'tu',

en ga biti' bi gaca qué'gacaba' bédxi zxn,
en bédxido' ca'.

Biti' gu'u lataj soa nu cödxí yechi' la'
nöza que ládztatu'.

¹⁵ ¡Bica' bágaca bönachi raca caní
qué'guequi!

¡Bica' bágaca bönachi na' Xanru' Dios
náquié' Dios qué'guequi!

145 ¡Guna' Li' zxn, Dios!
¡Nacu' Nu rinná be'e neda'!

¡Gádxítica'sa' Lo', Xana' Dios!

² ¡Tu dza tu dza cu'a Li' yöl-la' zxn,
en cú'utica'sa' Lo' yöl-la' ba!

³ ¡Nayé'pisëtèrè' Xanru' Dios, ate' cú'uru'-
né' yöl-la' ba!

¡Biti' ca' gaca gúnbè'èru' ca naca yöl-la'
zxn queé'!

⁴ Yúgu'tè bönachi ila'gú'u yöl-la' ba le
nun casu' Li',

para ulu'siyón xz'ínigaca,
en ulu'lu'f'i lahui le nácagaca zxn benu'.

⁵ Sa' ládxa'a ca naca yöl-la' zxn que yöl-
la' unná bé' quiu',

en ca nácagaca yöl-la' huáca zxn runu'.

⁶ Iluf'i didza' yúgu'tè bönachi ca naca
yöl-la' zxn
qué'gaca yöl-la' huáca runu'.

Usiyönda' bönachi ca naca yöl-la' zxn
quiu'.

⁷ Idú ládxi'gaca iluf'i didza' cate' tsöjné-
gaca yöl-la' dxi'i ladxi' zxn quiu'.

Lu yöl-la' rudzeja qué'guequi ila'bó'dxi'a
tu' nacu' tsahui'.

⁸ Xanru' Dios ruzá' ládxi'è queé'ru', en
ruhué'chi' ládxi'è rë'u.

Biti' ilética'sé', ate' zxóntèrö naca yöl-la'
dxi'i ladxi' queé'.

⁹ Runé' Xanru' Dios le naca dxi'a qué'gaca
yúgu'tè bönachi,

en ruhuéchi' láchxë'ë yúgu'të le nunë'.
¹⁰ Yúgu'të le nunu' ilé Li': "Xclenu" Xan,
 ate' nupa néquiguequi quez quiu' ilún Li'
 zxön.
¹¹ Ilu'í didza' ca naca yöl-la' zxön que le
 rinná bë'u,
 en ulu'luf'i lahui yöl-la' zxön quiu',
¹² para ulu'siyón bönachi ca nácagaca le
 zxön runu',
 en ca naca yöl-la' zxön que le rinná bë'u
 le nayëpisëtëro.
¹³ ¡Zóatica'sö le rinná bë'u,
 ate' idía'tica'sö yöl-la' unná bë' quiu'!
 ¡Lu le naca idú ladx' queë' runë' Dios ca
 rnágaca yúgu'të didza' ru'ë,
 en lu yöl-la' dxi'i ladx' queë' runë'
 yúgu'të le runë'!
¹⁴ ¡Röjzönë' Xanru' yúgu'të nupa
 röjtsó'ögaca,
 en ruchisë' yúgu'të nupa ndínnegaca!
¹⁵ ¡Yúgu'të bönachi tu'yú Li', Xan,
 ate' runödzu' le ilágugaca cate' ridxín
 dza que!
¹⁶ ¡Rusalaj cazu' no'o
 en rugagu' yúgu'të le nacué' nabángaca!
¹⁷ Náquië' tsahui' Xanru' Dios ca naca
 yúgu'të le runë'
 en náquië' ca' dxi'i ladx'í.
¹⁸ Zoë' Xanru' gala' ga nacué' yúgu'të
 nupa tu'lidza Lë',
 nupa na' tu'lidza Lë' idú láchx'íguequi.
¹⁹ Gunnë' le ta'zé láchx'í'gaca quégaca
 nupa tadxi Lë'.
 Riyönnë' cate' tu'lidza Lë', en rusölé'
 léguequi.
²⁰ Run chí'i cazë' Xanru' yúgu'të nupa
 nadx'í'gaca Lë',
 pero usunítie' nupa tuá' dö'.
²¹ Len ru'a cuina' cu'a-në' Xanru' yöl-la'
 ba,
 ate' yúgu'të bönachi ilúntica'sö Lë' zxön.
146 ¡Guli'cu'ë yöl-la' ba Xanru'!
 ¡Li', bö' naca caza', gulu'ë yöl-
 la' ba Xanru'!
² ¡Cu'a-në' Xana' yöl-la' ba tsanni ni zoa'
 nabana'!

¡Gul-la' yöl-la' ba queë' Dios quia' tsanni
 ni zoa bö' naca caza'!
³ Biti' uzxöni láchx'í'li' bönni' ta'nná bë'ë,
 en calëga bönni' tati cazë', bönni' bití' ca'
 gaca ulu'sölé' rë'u.
⁴ Rurúaj bö' yu'ë nu bönni', ate'
 ruhuóáquië' yu.
 La' dza ná'asö riniti le rizá' láchxë'ë gunë'.
⁵ Bica' ba bönni' rácalenë' Dios queë' Ja-
 cob lë',
 bönni' na' runë' löza Xanru' Dios.
⁶ Nunë' Xanru' Dios lúzxiba, en luyú ni,
 enca' nísado', en yúgu'të le nacué' yugu'
 lataj na'.
 Rúntica'së' Lë' ca rnna didza' bë'ë,
⁷ en ruchí'a rusoróë' nupa zoa nu rusaca'
 zí' léguequi.
 Rugagu' cazë' nupa ta'dún.
 Rusanë' Xanru' Dios nupa nadzúngaca.
⁸ Rusaljë' Xanru' Dios guió'j lógaca nupa
 nácagaca lo chul-la.
 Ruchisë' Xanru' Dios nupa nadzó'ögaca.
 Nadx'ínë' Xanru' Dios nupa nácagaca
 tsahui'.
⁹ Rapa chí'ë Xanru' Dios yugu' bönni'
 zí'tu'.
 Rácalenë'-bi' yugu' bí'i uzëbi, enca' yugu'
 nigula uzëbi,
 pero ruzaguë' xinó'zguequi nupa tuá' dö'.
¹⁰ Inná bë'tica'së' Xanru' Dios.
 Náquië' Dios queéli', bönachi Siön.
 ¡Guli'cu'ë yöl-la' ba Xanru'!
147 ¡Guli'cu'ë yöl-la' ba Xanru'!
 ¡Tsahui' naca gúl-laru' yöl-la'
 ba queë' Dios queëru'!
 ¡Naca lachi, en le ral-la' gunru', cú'uru'-
 në' yöl-la' ba!
² Runë' Xanru' Dios ga rizxón yödzo
 Jerusalén.
 Rutubë' bönni' Israel násilasigaquië'.
³ Ruúnë' bönni' nácagaquië' yechi' ladxí',
 en rudë'ë lari' ga dxí'agaquië' huë'.
⁴ Rulabë' tscá nacué' bölaj lúzxiba.
 Nucué' lágacaba' tu tuba' yúgu'të bölaj
 na'.

⁵ Nayépisetère' Xanru' Dios, en nál-latère'.

Ga rë'ë dzu réajni'inë' yúgu'të.

⁶ Xanru' Dios rácalenë' nupa ta'gu'fi ta'zaca'.

Ruzötjë' nupa tuá' dö' lu yu.

⁷ ;Guli'gul-la queë' Xanru' Dios, guiéli'në': "Xclenu"!

;Guli'gul-la yöl-la' ba queë' Xanru', quín-nil' lé'egaca bihuél-lado'!

⁸ Rigúisië' yugu' böaj lúzxiba, en risól-lë'ë nisa guiój luyú.

Runë' ga rilén yö yugu' lu gu'ado'.

⁹ Rugahuë' yugu' böa' guíxi'do', enca' bóiquiajdo' ta'bódxí'aba'.

¹⁰ Biti' raza ládxë'ë yöl-la' nál-la queéba' böa',

en biti' ruzi'ë xibé yöl-la' nál-la queë' bönni'.

¹¹ Raza ládxë'ë Xanru' Dios nupa tadxi Lë',

nupa na' tun löza yöl-la' dxi'i ladxi' queë'.

¹² ;Guli'cu'ë yöl-la' ba Xanru', lib'ili' zóali' Jerusalén!

;Guli'cu'ë yöl-la' ba Dios queéli', lib'ili' zóali' Sión!

¹³ Bucu'ë tsutsu le tu'bagá' gapa nu riyaza yödzö queéli',

en runë' ga raca dxi'a quégaca xzí'nili' ga na' zóali'.

¹⁴ Runë' ga ribózali' dxi'a tsáhuí'do',

en runë' ga ruhuölaj ridzé'eli' zxa' xtila dxí'atëro'.

¹⁵ Rinná bé'enë' yödzölió ni, ate' xtídzë'ë ridóditë gátí'tës.

¹⁶ Risól-lë'ë guiój bögui' ca zxila', en rigúisië' buzén ca dö.

¹⁷ Rigúisië' bögui' ca yugu' guiój ruaj.

¿Nuzxi caz gaca guá' ilén le naca ziaga queë'?

¹⁸ Risól-lë'ë xtídzë'ë, ate' ruúna' bögui' na'.

Runë' ga recja bö', ate' ruhuóaca nisa.

¹⁹ Ruí'ilenë' xzí'ini xi'sóë' Jacob didza',

en rigúixjë' xibá queë' para ilún bönachi Israel ca rnna.

²⁰ Biti' benë' caní ni'a quégaca bönachi ia'tú yödzö izá'a,

ate' biti' nózigaca ca nácgaca le gunná bë'ë.

;Guli'cu'ë yöl-la' ba Xanru'!

148 ;Guli'cu'ë yöl-la' ba Xanru'!

;Guli'cu'ë yöl-la' ba, lib'ili' zóali' yehua' yubá!

;Guli'cu'ë yöl-la' ba, lib'ili' zóali' xitsá'aló!

² ;Guli'cu'ë yöl-la' ba, lib'ili' gubáz lá'ayi queë'!

;Guli'cu'ë yöl-la' ba, lib'ili' tscali' dá'ali' Lë'!

³ ;Guli'cu'ë yöl-la' ba, lib'ili' gubidza, en beo'!

;Guli'cu'ë yöl-la' ba, lib'ili' böläj bení'!

⁴ ;Guli'cu'ë yöl-la' ba, lib'ili' zóali' zxaan lúzxiba!

;Guli'cu'ë yöl-la' ba, lib'ili' nisa, zxóali' láhuilö lúzxiba!

⁵ ;Guli'cu'ü yöl-la' ba La la'ayi queë' Xanru', yúgu'tëli',

tu' bé'ësë' didza', en canisö benë' lib'ili'!

⁶ Naguíxjë' tsaz lib'ili'.

Naguíxjë' xtídzë'ë le catu caz tödi que.

⁷ ;Guli'cu'ë yöl-la' ba Xanru' idútë yödzölió,

en lib'ili' böa' ridali' lu nísado', en nísado' caz,

⁸ en lib'ili' guí', en guiój bögui' yöla sunna, bögui', en böaj,

enca' li', bö' budunu', runu' ca rnna xtídzë'ë,

⁹ en lib'ili' yugu' gu'á, en yúgu'të gu'ado',

en lib'ili' yaga dxíagaca le ta'bía, en yugu' yaga dxi'a,

¹⁰ en lib'ili' böa' guixi', en böa' bëdxi,

böa' tá'ayöj lé'ëba' lu yu, en böa' zoa xílgacaba',

¹¹ enca' lib'ili' rinná bé'ëli' yödzölió, en bönachi yugu' yödzö izá'a,

yugu' zxf'inigaquië' bönni' ta'nná bē'ë,
 en bönni' ruchi'a rusöröli' yödžölió,
¹²enca' libí'ili' bi'i bönni', en bi'i
 nigúlado',

yugu' bönni' zxön, en yugu' b'í'ido'!

¹³¡Guli'cu'ü yöl-la' ba La la'ayi queë'
 Xanru'

tu' nayépisëtëro tuzë' Lë'!

¡Nayépisëtëro yöl-la' ba queë' ca luyú ni,
 en ca lúzxiba xitsá'!

¹⁴Nuchisë' tu le nuzóa tsutsu bönachi
 queë',

le naca yöl-la' ba ta'gú'u Lë' nupa
 néquiguequi queë',

yugu' zxf'ini xi'sóë' Israel, nupa na'
 nadxí'inë'.

¡Guli'cu'ë yöl-la' ba Xanru'!

149

¡Guli'cu'ë yöl-la' ba Xanru'!

¡Guli'gul-la queë' Xanru' Dios
 tu le cubi,

en guli'gul-la yöl-la' ba queë' ga nudúbi-
 gaca nupa néquiguequi quez queë'!

²Ral-la' ulu'z'í' xibé' Xanru' Dios bönachi
 Israel,

tu' náquië' Nu ben léguequi.

Ral-la' ulu'dzéjalen Dios nupa nacuá'
 Sión,

tu' náquië' Nu rinná be'e léguequi.

³Ral-la' ila'gú'u yöl-la' ba La la'ayi queë',
 en lu yöl-la' rudzeja ulu'yá'a lahuë'.

Ral-la' ilúl-la yöl-la' ba queë', ila'capa'
 lë'e guídi,

en ila'quínni lé'egaca bihuél-lado',

⁴tu' raza ládxë"ë Xanru' Dios bönachi
 queë'.

Uchisë' nupa ta'gu'í' ta'zaca', en usölé'
 léguequi.

⁵Nupa néquiguequi quez queë' ral-la'
 ulu'dzeja ládxi'gaca lu bení' queë'.

Lu yöl-la' rudzeja quéguequi ral-la' ilúl-
 la queë' cate' ni' dégaca lu le
 ráti'gaca.

⁶Yöl-la' ba queë' Xanru' Dios ral-la' sóat-
 ica'sö ru'í'iguequi,

en tu guíë tuchi' natuchi' iropa la'a lu
 ná'agaca,

⁷para ulu'z'í' lëbi bönachi yugu' yödžö
 izá'a,

en ilún xiguaia' bönachi izá'a na',

⁸para ilúguë"ë bregui' guíë ná'agaquië'
 bönni' ta'ná bé'enë' bönachi yödžö
 izá'a na',

en ulu'cu'ë bregui' guíë yen ná'agaquië'
 bönni' lo quégaquië',

⁹para ilunë' quéguequi ca nachuguë'
 Dios gaca quéguequi.

Naca lë ni le run bal nupa néquiguequi
 quez queë' Dios.

¡Guli'cu'ë yöl-la' ba Xanru'!

¡Guli'cu'ë yöl-la' ba Xanru'!

150

¡Guli'cu'ë yöl-la' ba Xanru'!

¡Guli'cu'ë yöl-la' ba Dios lu
 lataj lá'ayi queë'!

¡Guli'cu'ë yöl-la' ba ga dëda' lataj queë'!

²¡Guli'cu'ë yöl-la' ba ca ná'agaca le zxön
 nunë'!

¡Guli'cu'ë yöl-la' ba ca naca yöl-la' zxön
 queë'!

³¡Guli'cu'ë yöl-la' ba, ucódxili' lúzuga-
 caba' chivo!

¡Guli'cu'ë yöl-la' ba, quínnilí' lé'egaca
 bihuél-la ca'!

⁴¡Guli'cu'ë yöl-la' ba, cápa'li' lë'e guídi,
 en uya'ali'!

¡Guli'cu'ë yöl-la' ba, quínnilí' lé'egaca
 bihuél-la, en ucódxili' gui!

⁵¡Guli'cu'ë yöl-la' ba, utíl-lali' guíë lë'e
 luzé'e!

¡Guli'cu'ë yöl-la' ba, utíl-lali' guíë zxön
 lë'e luzé'e!

⁶¡Guli'cu'ë yöl-la' ba Xanru', tscali'
 rizí'ili' bö'!

¡Guli'cu'ë yöl-la' ba Xanru'!

DIDZA' DXI'A BUZÚAJĚ' MATEO

Yugu' xuz xině'e gudödi queë' Jesús

(Lc. 3:23-38)

1 Ni ruzúaja' lágaquië' xuz xině'e gudödi queë' Jesucristo. Nabábagaquië' David, enca' Abraham xuz gudödi queë'.

² Abraham gúquië' xuzë' Isaac.

Isaac gúquië' xuzë' Jacob.

Jacob gúquië' xúzgaquië' Judá, en yugu' bönni' bóchě'ë.

³ Judá gúquië' xúzgaquië' Fares, en Zara, ate' Tamar gúcanu xiná'agaquië'.

Fares gúquië' xuzë' Esrom.

Esrom gúquië' xuzë' Aram.

⁴ Aram gúquië' xuzë' Aminadab.

Aminadab gúquië' xuzë' Naasón.

Naasón gúquië' xuzë' Salmón.

⁵ Salmón gúquië' xuzë' Booz, ate' Rahab gúcanu xině'ë.

Booz gúquië' xuzë' Obed, ate' Rut gúcanu xině'ë.

Obed gúquië' xuzë' Isaf.

⁶ Isaf gúquië' xuzë' David.

David na' gúnná bé'enë' bönachi Israel, ate' butsaga ná'alénë'-nu nigula na' gúcanu z'f'alö nigula queë' Urías, ate' David, en nigula ni guláquië' xuz xině'ë Salomón.

⁷ Salomón gúquië' xuzë' Roboam.

Roboam gúquië' xuzë' Abías.

Abías gúquië' xuzë' Asa.

⁸ Asa gúquië' xuzë' Josafat.

Josafat gúquië' xuzë' Joram.

Joram gúquië' xuzë' Uzías.

⁹ Uzías gúquië' xuzë' Jotam.

Jotam gúquië' xuzë' Acaz.

Acaz gúquië' xuzë' Ezequías.

¹⁰ Ezequías gúquië' xuzë' Manasés.

Manasés gúquië' xuzë' Amón.

Amón gúquië' xuzë' Josías.

¹¹ Josías gúquië' xúzgaquië' Jeconías, en yugu' bönni' bóchě'ë.

Yugu' bönni' ni gula'cu'ë dza ni' cate' yugu' bönni' Babilonia gula'ché'ë bönachi Israel nadzúngaca lu xiyúgaquië'.

¹² Jeconías gúquië' xuzë' Salatiel.

Salatiel gúquië' xuzë' Zorobabel.

¹³ Zorobabel gúquië' xuzë' Abiud.

Abiud gúquië' xuzë' Eliaquim.

Eliaquim gúquië' xuzë' Azor.

¹⁴ Azor gúquië' xuzë' Sadoc.

Sadoc gúquië' xuzë' Aquim.

Aquim gúquië' xuzë' Eliud.

¹⁵ Eliud gúquië' xuzë' Eleazar.

Eleazar gúquië' xuzë' Matán.

Matán gúquië' xuzë' Jacob.

¹⁶ Jacob gúquië' xuzë' José.

José ni gúquië' bönni' queénu María, ate' María ni gúcanu xině'ë Jesús, lë' ca' Cristo, Bönni' na' tun löza bönachi judío guidë' idinná bé'enë' légaquië'.

¹⁷ Caní naca, gulaca chidá' cö' di'a dza ga gusí lo zoë' Abraham ga bidxintë zoë' David, ate' gulaca ca' ia'chidá' cö' di'a dza ga gusí lo zoë' David ga bidxintë dza yugu' bönni' Babilonia gula'ché'ë bönachi Israel nadzúngaca, ate' gulaca ca' ia'chidá' cö' di'a dza ga gusí lo dza ni' gula'ché'ë léguequi ga bidxintë dza guljë' Cristo.

Yugu' le guca cate' guljë' Jesucristo

(Lc. 2:1-7)

¹⁸ Caní guca cate' guljë' Jesucristo. Cate' ni' chinazí' lu ná'abi' María, xině'ë Jesucristo utsaga ná'alénbi' José, en z'fatëlö cate' si' utsaga ná'alénë'-bi', en cabí ne sóalénë'-bi', guyú'ubi' tubi' bí'ido' lě'ëbi' María na'. Guca caní ni'a que yöl-la' huáca queë' Dios Bö' Lá'ayi. ¹⁹ Náquië' José na', bönni' queë'bi' María, bönni' tsahui', pero biti' gú'unnë' uzéguië'-bi' didza' lógaca bönachi. Gú'unnë' ulá'alénë'-bi' bagáchi'sö. ²⁰ Tsanni ni' rizá' lădxë'ë José ca na' gunë', bulufi' lahuë' gubáz lá'ayi queë' Xanru' lahuë' José lu yëla béchigal, en gudxë' lë':

—José, xzí'ini xzi'sóë David. Biti' gádxinu' si'u-bi' María, para gácabi' nigula quiu', tu' yú'ubi' bi'i bónni'do' lé'ebi' ni'a que yól-la' huáca queë' Dios Bó' Lá'ayi. ²¹ Gáljabi' tubi' bi'i bónni'do' queébi', ate' gu'u labi' Jesús, tu' usólábi' bönachi queébi' lu dul-la' nabága'gaca.

²² Caní guca yúgu'tè lè ni para gaca lè na' gunné' Xanru' lu ru'è bönni' bē'è didza' uláz queë' Dios, gunné':

²³ Buli'yútsóca', tu nigula ra'bando', tsú'ubi' b'í'ido' lé'ebi', ate' gáljabi' tubi' bi'i bónni'do', ate' ilu'è labi' Emanuel.

Emanuel naca tu didza' hebreo le rnna: Len rē'u Dios.

²⁴ Cate' bubanē' José lu yēla bēchigal, benē' ca na' gudxē' gubáz lá'ayi queë' Xanru' lē', ate' guzxi'ē-bi' María, ate' gú-cabi' nigula queë'. ²⁵ Biti' guzóalenē'-bi' cate' bidxinrō dza chigúlajbi' bi'i bónni'do' queébi', bi'i z'í'alō queébi', ate' gulu'ē labi' Jesús.

Bönni' ta'yéajni'inē' ridiyúgaquiē' bí'ido' Jesús

2 Cate' gúljabí' Jesús lu yōdzō Belén, luyú Judea, rinná bē'ē Herodes luyú ni', ate' bila'dxinē' bönni' ta'yéajni'inē' Jerusalén, narúajgaquiē' tu yōdzō dē saca' ga rilén gubidza. ² Gula'nabē' bönni' ni, ta'nné':

—¿Gazxi zóabi' b'í'ido' na' ral-la' inná bé'ebi' bönachi judío, b'í'ido' na' si' gúljabí'? Cate' ni' zóatu' ga rilén gubidza bilé'etu'-ba' böljaj bení' naca bē' chigúlajbi', ate' za'tu' ni para tseaj lādxi'tu'-bi'.

³ Cate' gúquibe'enē' Herodes, bönni' rinná bē'ē, lē ni, guró'ödē' böniga, en lē-sca' caní gula'bó' böniga yúgu'tē bönachi nacua' Jerusalén. ⁴ Ní'irō Herodes na' bulidzē' yúgu'tē bixúz unná bē', len bönni' yudo' tu'sédinē', ate' gunábinē' légaquiē' gazxi ral-la' galjē' Cristo, bönni' na' tunē' löza bönni' judío ilá' lahuē' para inná bé'enē' légaquiē'. ⁵ Tē' lē':

—Lu yōdzō Belén luyú Judea. Caní naca tu' buzúajē' tu bönni' bē'ē didza' uláz queë' Dios le rnna caní:

⁶ Biti' nácarō cá'asō yōdzō Belén luyú Judá lahuē' Dios

ca nácagaca yōdzō gapa nacua' nupa ta'nná bē' luyú ni,

tu' irúajē' tu bönni' yōdzō Belén, en gáquiē' lo,

bönni' na' gun chi'ē bönachi Israel quia'.

⁷ Ní'irō Herodes bulidzē' bagáchi'sō bönni' ta'yéajni'inē' na', en gunábinē' légaquiē' para inózinē' dxi'a gáca'xte chiguca bulufi' lahui böljaj na' bila'lé'enē'. ⁸ Ní'irō gusól-lē'ē légaquiē' tsójáquiē' Belén. Rē' légaquiē':

—Guli'tséaj ni', en guli'tsójnaba dx-i'a nacxi naca queébi' b'í'ido' na'. Cate' chibidzólili'-bi', ididíxjōi'ili' neda', para tseja' ca' neda', tseaj lādxa'a-bi'.

⁹ Gudödi bila'yönnē' didza' bē'ē Herodes na', sójáquiē' bönni' ta'yéajni'inē' na', ate' böljaj na' bila'lé'enē' cate' ni' nacu'ē lādzaagaquiē' sójnóruba' lógaquiē' ga bidxintē yöjsóa ga na' dēbi' b'í'ido' na'. ¹⁰ Cate' bila'lé'enē' böljaj na', bulu'dzējade'enē'.

¹¹ Cate' gula'yáziē' yu'u, bila'lé'enē'-bi' bi'i bónni'do' na', zóalenbi'-nu María, xiná'abi'. Bulu'zóa xzíbigaquiē' lobi', en gula'yéaj lādxi'gaquiē'-bi'. Gudödi na' gula'saljē' yugu' yōxaj quégaquiē', ate' bulu'nōdzjē' queébi' oro, en yalaj, en nórído' rilá' zxi'xi que yaga mirra. ¹² Tu' chibuzéajni'inē' Dios légaquiē' lu yēla bēchigal para cabí tsójhuójquiē' ga zoē' Herodes na', que lē ni na' yójhuójquiē' lādzaagaquiē' nöza yúbölō.

José, en María, ta'ché'ē-bi' Jesús luyú Egipto

¹³ Gudödi bulu'zē'ē yugu' bönni' ta'yéajni'inē' ni', bulufi' lahuē' tuē' gubáz lá'ayi queë' Xanru' lu yēla bēchigal, ga na' dē' José, en rē' lē':

—Guyaschi. Guché'-bi' bí'ido' ni, enca' xiná'abi', ate' buzzunnaj ni. Guyéaj luyú Egipto, ate' ugá'anu' ni' cate' guiéra' lí' ia'tú. Caní gunu' tu' uguiljé' Herodes bí'ido' ni para gútié'-bi'.

¹⁴ Ní'iró guyasé' José, en ni' naca chí'i dzó'óló, guché'-bi' bí'ido' na', enca' xiná'abi', ate' yójáquié' luyú Egipto. ¹⁵ Bulu'gá'ané' ni' cate' gútiré' Herodes. Caní guca para gaca lè na' gunné' Xanru' Dios lu ru'é tu' bönni' bē'ē didza' uláz queé', gunné': "Ga naca luyú Egipto bulidza' Zxí'ina'."

Risól-lē'ē Herodes bönni' ilútié'-bi' bi'i hué'ēnido' nacuá'abi' yödzö Belén

¹⁶ Cate' gúquibe'ené' Herodes bití' guluné' bönni' ta'yéajni'iné' ca rnné', guléné', ate' gunná bé'ené' bönni' tsójáquié' ni' para ilútié'-bi' yúgu'tébi' bi'i bönni'do' nacuá'abi' yödzö Belén, en idú gásibi'iló ga dē Belén na', yugu' bí'ido' chiyú'ugacabi' chopa iz, en bí'ido' nahué'ēnigacaröbi'. Caní bené' ca busáquié' queé' Herodes na', tsa chiguca dza buluf'i lahui böljaj na', dza na' bulu'zéajni'iné' bönni' ta'yéajni'iné' na' lē'. ¹⁷ Caní guca, bidxín lē na' gunné' Jeremías, bönni' bē'ē didza' uláz queé' Dios, gunné':

¹⁸ Lu yödzö Ramá riyón chí'igaca nupa ta'bödxi, en nupa ta'bödxi yechi'. Raquel ribödxi nu ni'a quégacabi' zxf'ininu.

Bití' gaca nu hué' tsahui' lēnu, tu' chinátigacabi'.

¹⁹ Gudödi gútié' Herodes na', ní'iró buluf'i lahué' gubáz lá'ayi na' queé' Xanru' lu yēla béchigal lahué' José ga ni' zoé' luyú Egipto, ate' rē' lē':

²⁰ —Guyasa. Guché'-bi' bi'i bönni'do' ni, enca' xiná'abi', ate' böaj luyú Israel, tu' chigulátié' bönni' ni' gulé'ēnné' ilútié'-bi' bi'i bönni'do' ni.

²¹ Ní'iró guyasé' José, ate' guché'-bi' bi'i bönni'do' na', enca' xiná'abi',

ate' yöhuójqüié' luyú Israel. ²² Cate' gúquibe'ené' José rinná bē'ē Arquelao luyú Judea tu' chigútié' Herodes, xuzé' Arquelao na', que lē ni na' gúdxiné' José huóje' ni'. Cate' buzéajni'iné' Dios lē' lu yēla béchigal, guyijé' luyú Galilea. ²³ Cate' bidxiné' ni', yöjsóé' lu yödzö Nazaret. Caní guca para gaca lē na' gula'nné' yugu' bönni' gulu'é didza' uláz queé' Dios ca ral-la' gaca queé' Jesús, sí' Lē', Bönni' Nazaret.

Juan, bönni' ruquilé' bönachi nisa runé' libán lu lataj cá'asö

(Mr. 1:1-8; Lc. 3:1-9, 15-17; Jn. 1:19-28)

3 Yugu' lu dza ni' buluf'i lahué' Juan, bönni' na' buquilé' bönachi nisa, en runé' libán lu lataj cá'asö luyú Judea. ² Juan na' rnné':

—Buli'bí'i ládxi'li', tu' chizóa idxín dza idinná bē' Nu na' zoa yehua' yubá luyú ni.

³ Ca naca queé' Juan na', buzúajé' Isaías, bönni' bē'ē didza' uláz queé' Dios dza ni'tē, le rnna caní:

Riyón chí'ē bönni' rulidzē' lu lataj cá'asö, rnné':

"Buli'pá'a nōza para idxín Xanru' ga zóali'.

Guli'béaj li yugu' nōza lasi tödē' lu icja ládxi'do'oli'."

⁴ Nácüé' zxé' Juan lari' néquini lítsa'ba' böa', ate' núgué'ē lē'ē le néquini guídi. Rahué'-ba' böchi'zu, en re'jé' bidxindo' que buzdo'. ⁵ Yugu' bönni' yödz Jerusalén len bönachi narúajgaca idú luyú Judea, en idú gásibi'iló ga dē yegu Jordán bila'dxiné' ga zoé' Juan na'. ⁶ Cate' gula'xóalépé' dul-la' nabága'gaquié', Juan na' buquilé' légaquié' nisa lu yegu Jordán na'.

⁷ Cate' bilé'ené' Juan ta'dxiné' zían bönni' yudo' fariseo len yugu' bönni' yudo' saduceo ga zoé' para ila'dilé' nisa, gudxé' légaquié':

—Libí'ili, dí'a dza quégacaba' bëla sínia'. ¿Zoa nu buzéajni' libí'ili' para izxúnajli' yöl-la' rusiúdxí na' sí' gaca quégaca bönachi? ⁸ Gulí'gún le gaca bë' chibubí'i ládxi'li'. ⁹ Bití' cuéqui ícjali', bití' innali' nácali' tsahui' tu' naca Abraham xuz gudödi queé'li'. Rea' libí'ili', huáca guné' Dios ga ulu'huóaca yugu' guió'j nacua' ni dí'a dza queé' Abraham. ¹⁰ Chizóa ribóza guíe huága gaca para ichugu yugu' yaga le rulufi' ca gaca queé'li'. Yúgu'té yaga bití' ta'bía le naca dxi'a, irúgugaca, ate' ila'gu'è léguequi lu guí'. ¹¹ Le nácaté neda' ruquila' libí'ili' nisa lu nisa, núlöli' chibubí'i ládxi'li', pero Bönni' na' ral-la' guídé' cate' tödi quia' neda', Lè' guné' le ruluf'isö yöl-la' ridila nisa ni, uchízié' libí'ili' Dios Bö' Lá'ayi len guí' queé'. Bönni' ni nácatéré' lo ca neda', ate' neda' bití' naca' lesaca' ilecja' xiráchué' nudé'è. ¹² Zöné' lu në'è böcö' queé', le ulúbiné' ga ridxi'a zxoá' xtila queé'. Cu'è zxoá' xtila queé' lu yu'u ga ni' gun chí'è le, pero uzéguí'è bëbu que lu guí', ate' guí' na' bití' ca' ulu.

Ridile' nisa Jesús

(Mr. 1:9-11; Lc. 3:21-22)

¹³ Ní'irö buzé'è Jesús luyú Galilea, ate' bidxiné' ra' yegu Jordán ga na' zoé' Juan, para idilé' nisa lu në'è Juan na'. ¹⁴ Juan buzágué'è xinözé', en rë' Jesús:

—Neda' ral-la' idila' nisa lu no'o Li'. ¿Za'tso' Li' quia' neda'?

¹⁵ Bubi'è didza' Jesús, rë' lè':

—Benna lataj na'a, tu' caní ral-la' gunru' iduté le naca tsahui'.

Ní'irö Juan bë'è Lè' lataj. ¹⁶ Cate' chinadilé' Jesús nisa, la' burúajté' lu nisa. Ní'irö guyalaj lúzxiba lahué' Jesús, ate' bilé'ené' ruhuötjé' Dios Bö' Lá'ayi, en bidxiné' ga na' zoé', riné'è ca riná'aba' gudódo'. ¹⁷ Ní'irö biyón chí'i nu rufi' didza' yehua' yubá, rna:

—Bönni' ni náquié' Zxf'ina'. Nadxf'ida' Lè', en raza ládxa'a Lè'.

Ré'èni Satanás tu' xihui' ibaga' Jesús dul-la'

(Mr. 1:12-13; Lc. 4:1-13)

4 Ní'irö la' guché'té' Dios Bö' Lá'ayi Jesús lu lataj cá'asö para gata' lataj sí' bë' Satanás tu' xihui' Lè'.

² Idú choá' dza choá' yëla bití' bi gudahué' Jesús, ate' gudödi ni' riduné'.

³ Ní'irö tu' xihui', nu na' run ga tá'baga' bönachi dul-la', bidxín ga zoé' Jesús, en rë Lè':

—Channö nacu' idú Zxf'iné' Dios, gunná na'a ulu'huóaca guió'j nacua' ni yöta xtila.

⁴ Bubi'è didza' Jesús, rë' le:

—Nazúaj lu guichi lá'ayi le rna: “Calégasö yöta xtila nabánigaca bönachi, pero lésca' yúgu'té didza' ru'è Dios nabánigaca bönachi.”

⁵ Ní'irö tu' xihui' guché' Jesús lu yödzo lá'ayi Jerusalén, ate' budxía Lè' ga naca xitsá' ícjo'olö yudo'. ⁶ Ní'irö tu' xihui' rë Lè', rna:

—Channö nacu' Li' idú Zxf'iné' Dios, busuladzu' cuinu' ni, tu' nazúaj lu guichi lá'ayi le rna:

Dios isól-lé'è gubáz lá'ayi queé' para ilún chí'è Li',

ate' ulu'chisé' Li' lu ná'agaquié', para cabí tsójchégu'u guió'j, en cabí gunu' zi' ni'u.

⁷ Bubi'è didza' Jesús, rë' le:

—Ia'stú nazúaj lu guichi lá'ayi, le rë bönachi, rna: “Bití' ugunu' dxin Xanu' Dios.”

⁸ Ní'irö tu' xihui' guché' Jesús ga naca tu lu guí'a sibi, ate' ni' bulufi' Lè' yúgu'té yödzo nacua' yödzo'liö ni, en yúgu'té yöl-la' tsahui' quéguequi. ⁹ Ní'irö rë Lè':

—Yúgu'té lè ni udóda' lu no'o channö uzóa zxibu' lahua', en gunu' neda' zxön.

¹⁰ Jesús rë' le:

—Böaj quiu' lí', Satanás tu' xihui', tu' nazúaj lu guichi lá'ayi le rë netu',

rna: “Xanu’ Dios tseaj ládxu’u, en udödi cuinu’ lu na’ tuzé’ Lë’.”

¹¹ Ní’irö buzá’ Satanás tu’ xihui’ ga na’ zoé’ Jesús, ate’ gubáz lá’ayi queé’ Dios bila’dxiné’ ga zoé’, en gulácalené’ Lë’, en gula’gu’ë le gudahuë’.

**Risí lahuë’ Jesús runé’
libán luyú Galilea**

(Mr. 1:14-15; Lc. 4:14-15)

¹² Cate’ biyönnë’ Jesús nadzunë’ Juan lidxi gufé, guyijë’ luyú Galilea. ¹³ Buzé’ë yödzö Nazaret, ate’ yöjsóé’ lu yödzö Capernaum ga naca ra’ nísado’, lu buzá’ quégaca bönachi Zabulón, en bönachi Neftalí. ¹⁴ Caní guca, bidxín lë na’ gunné’ Isaías, bönni’ bë’ë didza’ uláz queé’ Dios, gunné’:

¹⁵ Luyú Zabulón, en luyú Neftalí, la’ nöza ra’ nísado’ ia’tsölá’a yegu Jordán saca’ ga rilén gubidza.

Luyú Galilea, ga nacua’ bönachi biti’ nácgaca judío.

¹⁶ Bönachi chul-la niti ni’ bila’lé’e bení’, ate’ bönni’ ni’ nácgaguié’ ca nupa chinátigaca, gulén quégaguié’ bení’.

¹⁷ Cate’ ní’irö gusí lahuë’ Jesús runé’ libán, en rë’ bönachi ni’:

—Buli’b’íi ládx’li’, tu’ chizóa idxín dza idinná bë’ Nu na’ zoa yehua’ yubá luyú ni.

**Jesús rulidzë’ tapë’ bönni’ uzxón
böla para tsöjtá’gaguié’ Lë’**

(Mr. 1:16-20; Lc. 5:1-11)

¹⁸ Cate’ gudé’ Jesús ra’ nísado’ que Galilea, bilé’enë’ chopë’ bönni’. Tuë’ lë’ Simón, en zoa ia’tú lë’ Pedro, ate’ dzáguié’ Andrés, bönni’ bóché’ë, lë’. Chopë’ ni ta’chiljé’ yöxaj böla quégaguié’ lu nísado’ na’ tu’ nácgaguié’ uzxón böla.

¹⁹ Jesús rë’ légaquié’:

—Guli’dutá’ neda’, ate’ guna’ ga iché’ëli’ bönachi quia’, gunli’ ca runli’ rizönlí’-ba’ böla.

²⁰ Chopë’ ni la’ bulu’cá’anatë’ yugu’ yöxaj böla quégaguié’, ate’ söjácalenë’ Jesús.

²¹ Cate’ gudödë’ Jesús ia’lati’ ní’llo, bilé’enë’ ia’chopë’ bönni’. Tuë’ lë’ Jacobo, ate’ dzáguié’ Juan, bönni’ bóché’ë lë’. Nácgaguié’ xzí’inë’ Zebedeo. Nacu’ë lë’e bárcodo’ dzágagaguié’ Zebedeo, xúz-gaguié’, en tu’únë’ yöxaj böla quégaguié’. Ní’irö Jesús bulidzë’ chopë’ ni para tsöjtá’gaguié’ Lë’. ²² La’ bulu’cá’anatë’ bárcodo’ na’, enca’ xúz-gaguié’, ate’ söjácalenë’ Jesús.

Jesús rusédinë’ bönachi zían

(Lc. 6:17-19)

²³ Gudé’ Jesús idú luyú Galilea, rusédinë’ bönachi gapa naca lu yu’u ga tu’dubë’ bönni’ judío, en tu’sëdë’ queé’ Dios. Bené’ libán ni’ que didza’ dxi’a ca si’ idinná bë’ë Dios luyú ni’, en bunë’ yúgu’të nupa te’e tsca naca yödzöhué’ té’eguequi. ²⁴ Guzë’ didza’ que yöl-la’ huáca queé’ Jesús, ate’ bila’yöni bönachi idú luyú Siria, ate’ dujuá’gaguié’ yúgu’të bönni’ té’enë’ zían yödzöhué’ que queé’gaguié’, en ta’gu’í ta’zaquié’, ga zoé’ Jesús. Dujuá’gaguié’ ca’ yugu’ bönni’ yú’ugaquié’ bö’ xihui’, en yugu’ bönni’ té’enë’ huë’ xjote’, en yugu’ bönni’ nacú’unigaguié’ bin ni’a ná’agaguié’, ate’ Jesús bunë’ yúgu’të bönni’ na’. ²⁵ Bönachi zían bila’rúajgaca luyú Galilea, en yugu’ yödzö Decápolis, en yödzö Jerusalén, enca’ luyú Judea, en yugu’ yödzö nacua’ ia’tsölá’alö yegu Jordán saca’ ga rilén gubidza, ate’ röjácalen Jesús.

Libán benë’ Jesús ga naca lu guí’ado’

(Lc. 6:20-23)

5 Cate’ bilé’enë’ Jesús bönachi zían söjácalen Lë’, ní’irö gurenë’ tu lu guí’ado’ ga naca xitsá’alö, ate’ gurö’ë lu guí’a ni’. Ní’irö bulu’dubë’ bönni’ usëda

queë' ga zoë'. ²Gusí lahuë' rusédinë' lé-gaquië', rnnë':

³—Bica' ba yugu' bönni' téquibe'enë' ta'yádzjanë' le naca queë' Dios, tu' nadéli'gaquië' lataj ga rinná bē'ë Bönni' na' zoë' yehua' yubá.

⁴'Bica' ba yugu' bönni' tu'hu'ini ládx-i'gaquië' tu' nabága'gaquië' dul-la', tu' huè tsahuë'ë Dios caz légaquië'.

⁵'Bica' ba yugu' bönni' nácagaquië' nōxaj ladxi' lahuë' Dios, tu' gata' qué-gaquië' luyú ni.

⁶'Bica' ba yugu' bönni' ta'z'é ládxi'-gaquië' le naca tsahui' lahuë' Dios, ate' raca quégaquië' ca raca quégaca nupa ta'dún, en ta'bidxi nisa, tu' gunë' Dios ga ulu'zi'ë xibé lë na' ta'z'é ládxi'gaquië'.

⁷'Bica' ba yugu' bönni' tu'huechi' ládxi'gaquië' luzá'agaquië', tu' huéchi' ládxë'ë Dios légaquië'.

⁸'Bica' ba yugu' bönni' naca tsahui' icja ládxi'do'gaquië', en biti' bi dul-la' nabága'gaquië', tu' ila'lé'enë' Dios.

⁹'Bica' ba yugu' bönni' ta'bequi dxíë' didza' bizxaj, tu' ila'zi' lágaquië' zxi'ini cazë' Dios.

¹⁰'Bica' ba yugu' bönni' ta'zaca' ta'gui'ë lu le ta'bía ládxi'gaca bōnachi légaquië' cate' tunë' le naca tsahui', tu' dë lataj quégaquië' ga rinná bē'ë Bönni' na' zoë' yehua' yubá.

¹¹'Bica' ba lib'ili' cate' tu'lidza bōnachi lib'ili' zi', en ta'bía ládxi'gaquië' lib'ili', ate' lu yōl-la' rizi' yë' ta'nné' queé'li' le xihui' tu' dá'ali' neda'. ¹²Bu-li'dzeja, en guli'chaza ládxi'li', tu' uzl-da'ali' xibé yehua' yubá. Ca raca queé'li', guca quégaquië' bönni' gulu'ë didza' uláz queë' Dios, en gula'cu'ë zí'atëlō ca lib'ili', tu' gula'bía ládxi'gaca ca' bōnachi légaquië'.

**Bōnachi dá'gaca Cristo ilaca
ca zōdi', en ca bení'**

(Mr. 9:50; Lc. 14:34-35)

¹³Gunné' ca' Jesús:

—Lib'ili' nácali' ca zōdi' luyú ni, pero channō initi zōdi' na' yōl-la' siná'a que, biti' gaca gunru' ga huóaca siná'a. Bítirō naca lesaca', pero chinaca tu le chū'unaru', ate' ulu'libi bōnachi le.

¹⁴'Lib'ili' nácali' ca bení' yōdzōlió ni para ulu'ili' lahui le naca queë' Dios. Ral-la' gácali' ca tu yōdzō rō'ō tu lu gu'á, tu' cabí gaca igachi' yōdzō na'.

¹⁵Cate' ruquéla'ru' guf', biti' rigú'uru' le tu zxan gu'ina, pero ruzóaru' le ga liná' para uzení' yúgu'të nupa nacua' lu yu'u. ¹⁶Ca na' run bení', ral-la' gunli' ca' lib'ili', gü'ili' lataj gaca bē' le nácali' ló-gaca yúgu'të bōnachi, para cate' ila'lé'e le naca tsahui' runli', ila'gú'u-në' Xúzili' Dios zoë' yehua' yubá yōl-la' ba.

**Rusédinë' Jesús que le gunná bē'ë
Dios lu nē'ë Moisés**

¹⁷Gunné' ca' Jesús:

—Biti' guéquili' bida' para usunfítia' yugu' le gunná bē'ë Moisés, o xibá na' bulu'sédinë' bönni' gulu'ë didza' uláz queë' Dios. Bida', caléga para usunfítia' yugu' lë na', pero para ulu'a lahui idútë le tu'sedi lë na'. ¹⁸Le nácatë rea' lib'ili'. Tsanni nacua' lúzxiba, en yōdzōlió ni, biti' tōdi cá'asō nitú dídza'do', en nitú le rinná bē' xibá na', cate' gácarō yúgu'të le ralla' gaca. ¹⁹Que lë ni na', núti'tës bönni' quitsjë' tu xibá cuídi'do'os le zoa lu xibá na', en usédinë' bōnachi para ilún caní, bönni' ni gácatërë' cuídi'do'os ca yúgu'të nupa ila'cuá' ga rinná bē' Bönni' na' zoë' yehua' yubá, pero núti'tës bönni' gunë' ca rinná bē' xibá na', en usédinë' bōnachi para ilún ca' caní, bönni' ni tsépisëtërë' ga rinná bē' Nu na' zoa yehua' yubá. ²⁰Rea' ca' lib'ili': Channō cabí gunli' le nácatërō tsahui' ca le tunë' bönni' yudo' usedi, enca' ca tunë' bönni' yudo' fariseo, biti' ca' tsú'uli' ga rinná bē'ë Dios yehua' yubá.

Rusédinē' Jesús ca naca que nu rilé luzé'e

(Lc. 12:57-59)

²¹ Gunné' ca' Jesús:

—Chibiyónili' ca gula'nné' bönni' guta' lu ná'agaquié' le gulé' xuz xtó'oli': "Biti' gútili' bönachi. Nu bönni' gútié' bönachi, nabágué'ë xíguia', ate' huadx-iné' ga uchi'a usóróé' Dios lé'." ²² Na'a, neda' rea' lib'íli': Nu bönni' rilené' böchi' luzé'ë, nabágué'ë xíguia' huadx-iné' ga uchi'a usóróé' Dios lé'. Lës-ca' caní, nu bönni' inné' zi'ë queé' böchi' luzé'ë nabágué'ë xíguia' ulu'chi'a ulu'sóróé' bönni' lo tu'chi'a tu'sóróé' lé', ate' nu bönni' guié' luzé'ë: "¡Böa' canóz!" nabágué'ë xíguia' tsójsu'ë lu gu' gabila.

²³ Caní naca, channö chizóa cu'u tu le unödzu' lu bucugu lá'ayi, ate' tsójnenu' ni' zoa bizx que rilené' böchi' luzó'o li', ²⁴ bucá'ana lé na' unödzu' lu bucugu ni', en böaj lidxu'. Zí'alö yöjca'ana tsahui' le benu' queé' böchi' luzó'o, ate' ní'irö gudá unödzu' lé na' nu'u.

²⁵ Channö zoa nu bönni' rinábiné' li' bi ubi'u queé', en iché'ë li' ga uchi'a usóróé' tu bönni' li', budzágaté tsahui' bönni' na' tsanni ni' yú'ulenu' lé' nöza, para cabí udödé' li' lahué' bönni' ruchí'a rusóróé', ate' bönni' ni udödé' li' lu në'ë bönni' rusayjé' lidxi gufé, ate' lé' cu'ë li' lidxi gufé na'. ²⁶ Le nácaté rea' li', bití' ca' uruju' ni' cate' idxinró dza quíxju' ga buité le ral-lu'u.

Rusédinē' Jesús ca naca que nu riguitsaj xibá que yöl-la' nutsaga na'

²⁷ Gunné' ca' Jesús:

—Chibiyónili' ca na' gula'nné': "Biti' gunu' dul-la' le riguitsaj xibá que yöl-la' nutsaga na'." ²⁸ Na'a, neda' rea' lib'íli': Núti'tés bönni' ruyúé' tu nigula len yöl-la' rizé ladxi' le ruá' dö', chibené' dul-la' len lënu lu icja ládxi'da'ahué'.

²⁹ Que lé ni na', channö guió'j lo' ibëla gun ga gunu' dul-la', guléaj le, en gurú'una le. Gácarö dxi'a quiu' unítíu' tu guió'j lo', en calëga idúteo' tsójsú'u lu gu' gabila. ³⁰ Channö no'o ibëla gun ga gunu' dul-la', guchugu le, en gurú'una le. Gácarö dxi'a quiu' unítíu' tu no'o, en calëga idúteo' tsójsú'u lu gu' gabila.

Rusédinē' Jesús ca naca que nu bönni' rulá'alené' nigula queé'

(Mt. 19:9; Mr. 10:11-12; Lc. 16:18)

³¹ Gunné' ca' Jesús:

—Lësca' gula'nné': "Núti'tés bönni' rusané'-nu nigula queé', ral-la' unödzejé' queénu tu guichi le rnna rulá'alené'-nu."

³² Na'a, neda' rea' lib'íli', channö zoé' nu bönni' rusané'-nu nigula queé', en bití' zoa le ruá' dö' runnu, guné' bönni' na' ga gunnu dul-la' le riguitsaj xibá que yöl-la' nutsaga na' channö utsaga ná'lennu bönni' yúbölö, ate' bönni' na' si'ë-nu nigula na', lësca' guné' dul-la' le riguitsaj xibá que yöl-la' nutsaga na'.

Rusédinē' Jesús ca naca que nu rurötaj La la'ayi queé' Dios

³³ Gunné' ca' Jesús:

—Lësca' biyónili' ca yugu' bönni' guta' lu ná'agaquié' gulé' xuz xtó'oli', gula'nné': "Biti' si' yé'u cate' run tsutsu xtídz'u ni'a queé' Dios, en ral-la' gunu' lahué' Xanru' Dios idúté lé na' run tsutsu xtídz'u ni'a queé' Lé'." ³⁴ Na'a, neda' rea' lib'íli', bití' ca' gun tsutsu xtídz'a'li'. Biti' gun tsutsu xtídz'a'li' ni'a que yehua' yubá, tu' naca ga rö'ë rinná bë'ë Dios. ³⁵ Biti' gun tsutsu xtídz'a'li' ni'a que luyú ni, tu' naca luyú ni ca xilibi ni'ë Dios, en calëga ni'a que Jerusalén, tu' naca ladzë Bönni' nayépisëtëré' rinná bë'ë. ³⁶ Biti' gun tsutsu xtídz'u ni'a que icju', tu' cabí gaca gunu' ga huóaca chiguichi o gasaj nitú guitsa' icju'. ³⁷ Ral-la' innásili': "Ön", o innásili': "Biti'", tu' naca que tu'

xihui' le nadödi bē' ca nácatagaca didza' ni.

**Rusédinē' Jesús ca naca que
nu ruzi' lēbi luzé'e**

(Lc. 6:29-30)

³⁸ Gunné' ca' Jesús:

—Chibiyónili' ca naca le gunná bē'ē Moisés, gunné': "Nu bi run que guiój lahui luzé'e, ubí'i ca' que, enca' nu bi run que layi' luzé'e, ubí'i ca' que."

³⁹ Na'a, neda' rea' libí'ili': Biti' tá'baga'li' nu guá' dö' queé'li', ate' channö nu capa' xagu' ibēla, bē' lataj capa' ca' ia'tú xagu' yógöla. ⁴⁰ Channö zoa nu gun ga uchi'a usöröe' tu bönni' li', en cuē' zxo', bē' ca' queē' lari' rixóa cúdzu'u. ⁴¹ Channö zoa nu gun bayudxi gu'u yua' que tu chi'i, guyéajlen nu na' chopa chi'i. ⁴² Nu bi rinábini li', bunödzej que, en nu bi gué'ēni gunnu' que tu chi'i, biti' tá'bagu'u lē na' inabi li'.

**Rusédinē' Jesús ca ral-la' idxí'iru'
nupa bití' ta'lé'e rē'u dxi'a**

(Lc. 6:27-28, 32-36)

⁴³ Gunné' ca' Jesús:

—Lēasca' caní biyónili' lē na' gula'n-né': "Ral-la' idxí'inu' nu nadxf'i li', en udí'inu' nu bití' rilé'e li' dxi'a." ⁴⁴ Na'a, neda' rea' libí'ili', guli'dxf'i nupa bití' ta'lé'e libí'ili' dxi'a. Guli'nábinē' Dios gácalenē' nupa tu'lidza libí'ili' zi'. Guli'gún le naca tsahui' quégaca nupa tu'dí'i libí'ili', en buli'lidzē' Dios inábili'-nē' gunē' ga gaca dxi'a quégaca nupa ta'n-né' queé'li', en tuá' dö' queé'li'. ⁴⁵ Channö gunli' caní, gácali' zxf'ini cazē' Xúziru' Dios, zoē' yehua' yubá, tu' runē' Lē' ga ruzení' gubidza queē' ga nacua' bönachi tsahui'. Risól-lē'ē tu nisa guiój lu yu quégaca bönachi tsahui', enca' lu yu quégaca bönachi bití' nácatagaca tsahui'. ⁴⁶ Channö nadxf'isili' bönni' nadxf'iguequinē' libí'ili', ¿nuzxi caz cu'u libí'ili' yöl-

la' ba? Lēasca' caní tunē' bönni' bití' nácatagaca tsahui' na', bönni' tu'quizxjē' uláz que yödzo zi'tu', nadxf'iguequinē' luzá'agaquiē'. ⁴⁷ Channö rugápalí' Dios tuzē' böchi' luzá'alí', ¿bizxi caz runli' le nácatērö dxi'a? Lēasca' caní tunē' bönni' bití' núnbē'gaquiē' Dios. ⁴⁸ Pero libí'ili', guli'gaca idú tsahui', ca na' náquiē' Xúziru' Dios, zoē' yehua' yubá, náquiē' idú tsahui'.

**Rusédinē' Jesús ca ral-la'
gácalenru' bönachi**

6 Gunné' ca' Jesús:

—Guli'gú' ládxi'li' gaca idú ca reaj ládxi'li'-nē' Dios. Biti' gúnsili' lē ni lógaca bönachi para ila'lé'e ca na' runli'. Channö runli' caní, bití' bi gunné' Xúziru' Dios zoē' yehua' yubá queé'li'. ² Cate' bi unödzej que nu bi riyadzaj, bití' gunu' ga ilá' lahui lē na' runu' ca tunē' bönni' tu'luf'isö tsahui' cúngaquiē' ga naca lu yu'u ga tu'dubē' bönni' judío, en tu'sedē' queē' Dios, enca' ga naca lu yé'eyi. Caní tunē' para ila'gú'u bönachi légaquiē' yöl-la' ba. Le nácatē' rea' libí'ili', cá'asö naca yöl-la' ba gata' quégaquiē'. ³ Pero li', cate' bi unödzej que nu bi riyadzaj, bití' ca' gu'u lataj nu inözi. ⁴ Na'a, lē na' unödzej, bagáchi'sö ral-la' unödzej, ate' Xúziru' Dios, Nu rilé'e ca na' runu' bagáchi'sö, Lē' ubi'ē quiu'.

**Rusédinē' Jesús ca
ral-la' ulídzaru'-nē' Dios**

(Lc. 11:2-4)

⁵ Gunné' ca' Jesús:

—Cate' ulídzali'-nē' Dios, bití' gunli' ca tunē' bönni' tu'luf'isö tsahui' cúngaquiē', tu' ta'yaza ládxi'gaquiē' ta'zuínē' tu'lidzē' Dios gapa naca lu yu'u ga tu'dubē' tu'sedē' bönni' judío queē' Dios, en gapa naca lu yé'eyi para ila'lé'e bönachi légaquiē'. Le nácatē' rea' libí'ili', cá'asö naca yöl-la' ba gata' quégaquiē'. ⁶ Pero libí'ili', cate' ulídzali'-nē' Dios guli'tsaza

lídxi'li, en buli'sayaj yu'u. Buli'lidzē' Dios inábili'-nē' Xúziru' Dios, zóalenē' libí'ili' ga na' zóali' queézili', ate' Xúziru' Dios, Nu rilé'e ca runli' bagáchi'sò, Lē' ubi'ē queéli'.

⁷Cate' ulídzali'-nē' Dios biti' gunli' la' yé'eyi la' lez ca na' tunē' bōnni' biti' nún-bē'gaquiē' Dios, tu' téquinē' huayōnnē' Dios légaquiē' tu' tu'lidzē' la' yé'eyi la' lez. ⁸Biti' gunli' ca na' tunē' légaquiē'. Xúziru' Dios, z'atēlō cate' si' inábali'-nē', chinóz quezínē' le riyadzaj queéli'. ⁹Que lē ni na', ral-la' ulídzali'-nē' Dios innali' caní:
Xuz netu', zu' yehua' yubá, gaca zxön
Lo'.

¹⁰Gudá inná bē'u luyú ni.

Ben ga gaca luyú ni ca raza ládxi'u Li' ca na' raza yehua' yubá.

¹¹Benna le gágutu' na'a dza.

¹²Buniti lo netu' le huiá' dō' bentu' Lo' Li'

ca runtu' netu', runiti lotu' nupa bi tun queétu'.

¹³Biti' gu'u lataj si' bē' tu' xihui' netu', pero busólá netu' lu na' nu ruá' dō'.

Nequi quiu' ga rinná bē'u, en yöl-la' unná bē', en yöl-la' ba.

Caní ré'ēnitu' gácatuca'sò. ¡Ca' gaca!

¹⁴Channō uniti loli' luzá'ali', nupa tuá' dō' queéli', uniti lahuē' Xúziru' Dios, zoē' yehua' yubá, libí'ili'. ¹⁵Channō cabí uniti loli' luzá'ali', biti' uniti lahuē' Xúziru' Dios libí'ili' ca naca dul-la' nabága'li'.

Rusédinē' Jesús ca ral-la' gunru' gubasa

¹⁶Gunné' ca' Jesús:

—Cate' gunli' gubasa, biti' gunli' bayechi' loli' ca tunē' bōnni' tu'lu'isō tsahui' cuíngaquiē', tu' tunē' bayechi' lógaquiē' para iléquibe'e bōnachi tunē' gubasa. Le nácatē rea' libí'ili', cá'asō naca yöl-la' ba gata' quégaquiē'.

¹⁷Libí'ili', cate' gunli' gubasa, buli'pá'a

ícjali', en guli'quibi loli', ¹⁸para cabí iléquibe'e bōnachi runli' gubasa. Bagáchi'sò ral-la' gunli' gubasa, ate' Xúziru' Dios, zóalenē' libí'ili' ga na' zóali' queézili', Lē' ubi'ē queéli'.

Yehua' yubá ral-la' utúbiru' yöl-la' tsahui' queéru'

(Lc. 12:33-34)

¹⁹Gunné' ca' Jesús:

—Biti' utúbili' yöl-la' tsahui' luyú ni, ga ni bélado' que tu'tōba' le, ate' raza ditaj, en ga ni ta'yaza gubán, ta'banē'.

²⁰Buli'tubi yöl-la' tsahui' yehua' yubá, ga ni' bélado' que biti' ulu'tōba' le, en biti' gaca ditaj, en ga ni' biti' ila'yáziē' bōnni' gubán, en biti' ila'banē'. ²¹Ga ni' dē yöl-la' tsahui' queéli', ni' güf'i ládxi'li' idxinli'.

Le rigú'u bení' icja ládxi'do'oru'

(Lc. 11:34-36)

²²Gunné' ca' Jesús:

—Guiój loru' naca ca tu le rigú'u bení' icja ládxi'do'oru'. Que lē ni na', channō guiój loli' naca tsahui', idútēli' tsépili' yōsa bení'. ²³Channō guiój loli' biti' naca tsahui', idútēli' nachúl-lali'. Que lē ni na', channō bení' zóalen libí'ili' nuhuóaca le naca chul-la, yēnni'tērō nachúl-lali'.

Dios, en dumí

(Lc. 16:13)

²⁴Gunné' ca' Jesús:

—Cuntu nu bōnni' gaca gunē' xichíngaquiē' chopa xanē', tu' uzóē' tuē' tsólá'alō, ate' ia'túē' na' idxí'inē', o ugá'analenē' tuē', ate' ia'túē' na' usán ládxi'ē. Biti' gaca gunli' xichinē' Dios, enca' dumí.

Dios rapa chi'ē nupa néquiguequi queē'

(Lc. 12:22-31)

²⁵Gunné' ca' Jesús:

—Ia'stú rea' libí'ili': Biti' ubi uguí'ili' ni'a que le gáguli' o ni'a que le guí'jali', yugu' le nabánili', o ni'a que lari' gáculi'. Nazáca'tèrö yöl-la' na'bán queéli' ca le gáguli', ate' nácaterö lesaca' le nácali' ca lari' gáculi'. ²⁶ Buli'yú ca raca quégacaba' biguínido' ta'daba' lúzxiba. Biti' bi taz tu'zóaba', en biti' tu'lápaba', en biti' tu'túbiba' ga bi ila'gú'uba' quégacaba', pero Xúziru' Dios zoë' yehua' yubá, rugagu cazë' légacaba'. Nazáca'tèröli' libí'ili' ca yugu' biguínido' na'. ²⁷ ¿Nuzxi caz bönni' nútsë'ë ládjali' gaca gunë' ga soë' ibanë' ia'túz dza tu' ruúbi ruguf'inë' para gaca caní queë'?

²⁸ ¿Bizx que ruúbi ruguf'ili' ni'a que le gáculi'? Buli'yútsöca' ca raca quégaca yöjdo' ró'gaca la' guixi' ca ta'zxón. Biti' tun dxin, en biti' tun du lari'. ²⁹ Neda' rea' libí'ili', Salomón, bönni' ni' gunná bë'ë, sal-la' gúta'da' yöl-la' tsahui' queë', lari' gúcuë' biti' gunná'tèrö lachi ca rinná'gaca yöjdo' na'. ³⁰ Dios caz runë' lachi yöj guíxi'do', le ró'gaca la' guixi', le nacué' na'a dza, ate' cuxó huidzaj ila'yegui lu guí. Channö caní ruí'í láchxë'ë yöj guíxi'do', runë' léguequi lachi, gúnda'arë' ca' queéli', sal-la' biti' réajlë'ëli'-në' idú láchxi'li'. ³¹ Que lë ni na', biti' ubi uguí'ili', en biti' innali': “¿Bizxi gágutsatu?” o “¿Bizxi guí'jat-satu?” o “¿Bizxi lari' gácutsatu?” ³² Bönachi yödzölió ni tu'úbi tu'gufi' ni'a que yúgu'të lë ni, pero zoë' Xúziru' yehua' yubá, ate' Lë' nózinë' naquínili' yúgu'të lë ni. ³³ Na'a, guli'gú'irö láchxi'li' inná bë'enë' Dios libí'ili', en gunli' le naca tsahui' lahuë' Lë', ate' Lë' cu'ë xinóza-li' yúgu'të lë ni. ³⁴ Que lë ni na', biti' ubi uguí'ili' ni'a que le ral-la' gaca cuxó huidzaj, tu' huáca gü'í láchxi'li' cuxó huidzaj le gaca queéli' dza na'. Tu tu dza ilaca le ral-la' gü'í láchxi'li' dza na'.

Biti' ral-la' ichugu bë'ëru' böchi' luzá'aru'

(Lc. 6:37-38, 41-42)

7 Gunnë' ca' Jesús:
—Biti' ichugu bë'ëli' böchi' luzá'ali', para cabí ichugu bë'ë Dios queéli', ² tu' ichugu bë'ë Lë' queéli' la' leze ca na' richugu bë'ëli' queë' böchi' luzá'ali', ate' ca na' rurixi rudódili' que luzá'ali', la' cá'asö urixi udödë' Dios queéli'. ³ ¿Bizx que ruyú' bébudo' yu'u guiój lahuë' böchi' luzó'o, en biti' réquibe'enu' yu'u le zxóntèrö guiój lo' li'? ⁴ ¿Gufëtso' böchi' luzó'o: “Gulóz, cueja' bébudo' yu'u guiój lo'”, ate' li', le zxóntèrö ca' yu'u guiój lo' li'? ⁵ Li', bönni' ruluí'isö tsahui' cuinu'. Guléaj zí'alö le zxön yu'u guiój lo' li', ate' n'irö ilé'enu' tsáhui'do' para gaca cueju' bébudo' yu'u guiój lahuë' böchi' luzó'o.

⁶ Biti' güf'ili' quégacaba' bö'cu' le naca lá'ayi, para cabí ulu'huécjaba', en iláguya'aba' libí'ili', en biti' chú'unali' le naca lesaca' queéli' láhuigacaba' cuchi, para cabí ulu'zadi' n'aba' le.

Guli'naba, guli'guilaj, en buli'lidza ra' yu'u

(Lc. 11:9-13; 6:31)

⁷ Gunnë' ca' Jesús:

—Guli'naba, ate' Dios gunnë' queéli'. Guli'guilaj, ate' gunnë' lataj idzöli queéli'. Buli'lidza ra' yu'u, ate' Lë' isaljë' queéli'. ⁸ Núti'tës bönni' rinabë', ridéli'në', ate' bönni' riguiljë', ridzöli queë', ate' bönni' rulidzë' ra' yu'u, ralaj queë'.

⁹ Channö zoë' nu bönni' ládjali' libí'ili', ate' zóabi' bi'í queë', channö inábibi' lë' yöta xtila, ¿naru' unödzjë'-bi' guiój? ¹⁰ Channö inábibi' lë' tuba' böla, ¿naru' unödzjë'-bi' bëla? ¹¹ Libí'ili' nácali' huiá' dö', pero nózili' unödzjali' zxí'inili' le naca tsahui'. Nácaterö löza,

Xúzili' zoë' yehua' yubá unödzej' nupa ta'nábini Lë' le naca dxí'a.

¹²Que lë ni na', ca na' ré'ënili' ilún bönachi queé'li', lësca' caní guli'gún que-gaquië'. Lë ni naca le rinná bë' xibá queë' Moisés, enca' le gula'nnë' bönni' gulu'ë didza' uláz queë' Dios.

Tu ga ral-la' tsú'uru' le naca tsúpi'do'

(Lc. 13:24)

¹³Gunné' ca' Jesús:

—Guli'tsáz ga nu riyaza le naca tsúpi'-do'. Blaga' naca ga nu riyaza, en yalaj naca nöza le rójácalenë' bönni' ga ni' ila'nítië', ate' ta'yázië' bönni' zían ni'. ¹⁴Tsúpi'do' naca ga nu riyaza, en lásido'os naca nöza le rójácalen bönachi ga ni' ila'deli' yöl-la' na'bán idú, ate' nabábasö nupa ta'dzöli le.

Le runru' naca bë' le nácaru'

(Lc. 6:43-45)

¹⁵Gunné' ca' Jesús:

—Guli'gún chi'i cuinli' para cabí ila'zi' yé'enë' bönni' ta'zi' yë'ë lib'ili', ta'nnë' tu'ë didza' uláz queë' Dios. Ila'dxinë' bönni' caní ga zóali', en ulu'lu'i cuín-gaquië' nōxaj lādxi'do' ca nácagacaba' bö'cu' zxlá'do', pero lu icja lādxi'do'-gaquië' nácagaquië' ca bö'cu' guí'a sí-nia'. ¹⁶Yugu' le tunë' ilaca bë' le náca-gaquië'. Biti' ruchíbiru' le ribía lubá uva lu yaga yōtsi', en bití' ruchíbiru' le ribía yaga higo lu guixi' legui lāsido'. ¹⁷Caní naca, yúgu'të yaga dxí'a ta'bía le naca dxí'a, ate' tu yaga cabí naca dxí'a ribía le cabí naca dxí'a. ¹⁸Yaga dxí'a na' bití' gaca cuía le cabí naca dxí'a, ate' yaga na' bití' naca dxí'a bití' gaca cuía le naca dxí'a. ¹⁹Yúgu'të yaga bití' ta'bía le naca dxí'a ila'rugu, ate' ila'gu'ë léguequi lu guí'. ²⁰Caní naca, yugu' le tunë' bönni' na' ilaca bë' le nácagaquië'.

Nupa biti' ila'yázië' ga rinná bë'ë Dios

(Lc. 13:25-27)

²¹Gunné' ca' Jesús:

—Zian nupa tē neda': "Xan, Xan", pero calëga yúgu'të' ila'yázië' ga rinná bë'ë Dios yehua' yubá. Ila'yázasë' ni' bönni' tunë' ca ré'ënë' Xuza' Dios, zoë' yehua' yubá. ²²Cate' idxín dza údxi que yödzülió ni, bönni' zían ilë' neda', ila'n-né': "Xan, Xan, bentu' libán que xtídzë'ë Dios, buguntu' dxin Lo', en buguntu' ca' dxin Lo' para bubéajtu' yugu' bö' xihui', en buguntu' ca' dxin Lo' bentu' zían yöl-la' huáca zxon." ²³Ní'irö neda' guí'a légaquië': "Biti' ca' núnbë'a lib'ili'. Guli'cuíta ga zoa', lib'ili' ruá'ali' dö'."

Chopa ca gaca udxíaru' xilibi zö'ö

(Lc. 6:47-49; Mr. 1:22)

²⁴Gunné' ca' Jesús:

—Ia'stú ca', nu bönni' riyönnë' xtídzá'a ni, en gunë' ca rna, bönni' ni náquië' ca tu bönni' réajni'inë', budxíë' lidxë' ga naca lu guió'j. ²⁵Cate' gulaj guió'j-siu', en guzxón yegu gubó'o, en guyecja bö', gudibi nisa cuita yu'u na', pero bití' gubixi, tu' dxía xilibi lu guió'j. ²⁶Na'a, nu bönni' riyönnë' xtídzá'a ni, en bití' runë' ca rna, bönni' ni náquië' ca tu bönni' bití' réajni'inë', budxíë' lidxë' lu yu dzöbi. ²⁷Cate' gulaj guió'jsiu', en guzxón yegu gubó'o, en guyecja bö', ní'irö gudá'a nisa cuita yu'u na', ate' gubixité, en tsaz biguinnaj.

²⁸Cate' Jesús budxi bé'lenë' légaquië' didza' ni, bulu'bani bönachi zían naca' ni' ca naca le rusédinë', ²⁹tu' rusédinë' légaquië' ca tu bönni' dë lu në'ë, en calëga ca tunë' bönni' yudo' usedi quégaquië'.

**Ruhuóaqüië' tu bönni' ré'enë'
huë' nudzu' ruzödi**

(Mr. 1:40-45; Lc. 5:12-16)

8 Cate' bö'tjë Jesús lu gu'fa na', söjácálen bönachi zían Lë'. ²Bidxinë' tu bönni' ré'enë' huë' nudzu' ruzödi ga zoë' Jesús, ate' buzóa zxi'bë' lahuë' Jesús, en rë' Lë':

—Xan, channö ré'ënu', huáca unu' neda'.

³Ní'irö Jesús la' bulitë në'ë, en gudanë' lë'. Rë' lë':

—Ré'ënda'. Huóácu' dxi'a.

La' bunítitë xihuë'ë bönni' huë' na'.

⁴Ní'irö Jesús gudxë' lë':

—Buyú, cuntu nu guío' caní, pero guyéaj, yöjlu'í cuinu' lahuë' bixúz, ate' yöjnodzaj le gunná bë'ë Moisés le uluf'i bönachi chibóácu'.

**Jesús ruúnë' bi'i huen dxin queë' tu
bönni' rinná bë'ë lu gudil-la**

(Lc. 7:1-10)

⁵Cate' guyázië' Jesús yödzö Capernaum, bidxinë' tu bönni' ga zoë', bönni' rinná bé'enë' tu gáyu'ë bönni' röjáquië' gudil-la, ate' gúta'yüë' lahuë' Jesús, ⁶en rë' Lë':

—Xan, bi'i huen dxin quia' dëbi' yu'u, ré'ebi' huë' nacú'unibi' bin, ate' riguf'i rizáca'da'abi'.

⁷Jesús rë' lë':

—Neda' guída' una'-bi'.

⁸Bubi'ë didza' bönni' na' rinná bé'enë' bönni' röjáquië' gudil-la, en rë' Jesús:

—Xan, biti' naca' zi tsáziu' lidxa', pero tsa innasu' quia', ate' huóácabi' bi'i huen dxin quia'. ⁹Lësca' neda', zoa nu rinná be'e neda', en nacu'ë ca' bönni' röjáquië' gudil-la rinná bé'egacada'-në'. Cate' rea'-në' tuë: “Guyéaj ni’”, rejë'. Cate' rea'-në' ia'túë: “Gudá ni’”, ridë'. Cate' rea'-në' bönni' huen dxin quia’: “Ben dxin ni’”, la' runtë' dxin na'.

¹⁰Cate' biyönnë' Jesús didza' ni, bubánië', ate' gudxë' bönni' söjácálenë' Lë', rnnë':

—Le nácatë rea' lib'íli', ga nacua' bönachi Israel, cuntu nu bönni' röjxéqui'da'-në' réajlë'ë neda' ca runë' bönni' ni. ¹¹Ia'stú rea' lib'íli': Ila'rúaj bönachi zían saca' ga rilén gubidza, en saca' ga ribía gubidza, ate' ila'bö'len tsözxón Abraham, en Isaac, en Jacob, yehua' yubá ni' ga rinná bë'ë Dios, ¹²pero yugu' bönni' na' guró cazë' Dios para ila'yázië' ga na' rinná bë'ë Lë', chú'unë' légaquië' ní'ilö ga na' naca chul-la, ate' ni' ila'bödxë', en ulu'til-la láyë'ë lu yöl-la' ruhu'íni quégaquië'.

¹³Ní'irö Jesús gudxë' bönni' na' rinná bé'enë' bönni' röjáquië' gudil-la, rnnë':

—Böaj lidxu'. Ca na' réajlë'u, ca' gaca quiu'.

La' ná'asö böácatëbi' bi'i huen dxin queë' na'.

**Jesús ruúnë' xiná'anu
nigula queë' Pedro**

(Mr. 1:29-31; Lc. 4:38-39)

¹⁴Bidxinë' Jesús lidxë' Pedro, ate' ni' bilé'enë'-nu xiná'anu nigula queë', dënu lu da'a, en yú'unu tu xilá. ¹⁵Gudanë' Jesús ná'anu, ate' la' burúajtë xilá na' yú'unu. Ní'irö böásanu, en bunódzjanu le gulahuë'.

Jesús ruúnë' zían nupa te'e

(Mr. 1:32-34; Lc. 4:40-41)

¹⁶Cate' chiridzó' dza na', dujuá'agaquië' zían bönni' yú'ugaca bö' xihui' légaquië' ga zoë' Jesús, ate' len yöl-la' rinnë'sö queë' bubéajë' yugu' bö' xihui' na', en bunë' ca' yúgu'të nupa te'e. ¹⁷Caní guca para gaca ca na' gunné' Isaías, bönni' bë'ë didza' uláz queë' Dios, gunné': “Lë' bu'ë yugu' le rizáca'ru', en bu'ë ca' yugu' yödzöhuë' queëru'.”

Nupa gulé'ëni tsójácalen Jesús

(Lc. 9:57-62)

¹⁸ Cate' bilé'ené' Jesús nacua' bönachi zían gásibi'ilé', gunná bé'ené' yugu' bönni' uséda queé' ila'dödé' ia'tsölá'a nísado' ni'. ¹⁹ Bidxiné' tu bönni' yudo' usedi ga na' zoé' Jesús, en rē' Lē':

—Bönni' Usedi, sá'lena' Li' gáti'tēs ga tseju'.

²⁰ Jesús rē' lē':

—Yugu' böza' nacua' zxan guió'j qué-gacaba', ate' yugu' biguinnido', nudxíagacaba' xicá'agacaba', pero neda', Bönni' Guljē' Bönachi, biti' dē ga quíxaj icja'.

²¹ Ia'túé' bönni', náquiē' bönni' uséda queé' Jesús, gudxē' Lē':

—Xan, benna neda' lataj huó'ja' ga idxinrō dza chibucácha'a-nē' xuzá'.

²² Jesús gudxē' lē':

—Gudá' neda'. Bē' lataj yugu' bönni' tati cazē' ulu'cáché'ē nupa ilátigaca quégaquiē'.

Jesús ribequi dxíē' bö' budunu'

(Mr. 4:35-41; Lc. 8:22-25)

²³ Gurenē' Jesús lē'e bárcodo', ate' dzágagaquiē' Lē' bönni' uséda queé'.

²⁴ Nf'irō guyecja bö' budunu' lu nísado' na', ate' riyasa ridxíada' nísado' na' ga bidxintē riyaza nisa lē'e bárcodo' na'. Dē' rásíē' Jesús lē'e barco na'. ²⁵ Nf'irō bila'dxinē' bönni' uséda queé' Jesús ga na' zoé', ate' bulu'subanē' Lē', en tē' Lē':

—Xan, busólá netu'. Chirigáchi'ru' lu nisa.

²⁶ Bubi'ē didza' Jesús, en rē' légaquiē':

—¿Bizx que rádxi'li'? Láti'do'os réajlē'ēli'-nē' Dios.

Nf'irō guyasē' Jesús, en bulidzē' bö' na' recja, en nísado' na', ate' la' gurō'ötē dxi.

²⁷ Bulu'báninē' bönni' na', ta'nné':

—¿Nuzxi caz bönni' ni? Ruf'isē' didza', ate' bö' recja, en nísado' tun ca rnnē'.

Yugu' bönni' Gadara yú'ugaca bö' xihui' légaquiē'

(Mr. 5:1-20; Lc. 8:26-39)

²⁸ Cate' bidxinē' Jesús ia'tsölá'a nísado' ga na' naca lu xiyú yōdzō Gadara, bila'rúajē' chopē' bönni' ga nacua' ba quégaca nupa nátigaca, dutságagaquiē' Jesús. Nácagaquiē' sínia', ate' cuntu nu gaca tōdi la' nōza ni'. ²⁹ La' guluf'itē' zidzaj didza' chopē' ni, ta'nné':

—¿Bizxi ral-la'tu' quiu', Jesús, Zxf'inē' Dios? ¿Naru' bidxintso' ni dusaca' z'iu netu' z'í'alō ca idxín dza queé'tu'?

³⁰ Ga ni' nacué' nacua'aba' cuchi zían ta'daba' táguba', nacua'aba' láti'do' ga naca z'í'tu'. ³¹ Gula'naba yechi' bö' xihui' na' Jesús, en tē' Lē':

—Channō ubéaju' netu', benna lataj tsöjtsú'ugacatu'-ba' cuchi zían ni'.

³² Nf'irō Jesús gudxē' léguequi:

—Guli'tséaj.

La' bila'rúajtē bö' xihui', en yōjcháza-gaca cuchi zían ni'.

Nf'irō yúgu'tēba' cuchi zían na' yōjbíxitēgacaba' ga naca lē'e guió'j, en yōjcházagacaba' lu nísado', ga ni' gula'yé'piba' nisa, en gulátiba'.

³³ Guládxinē' bönni' tu'yúé'-ba' cuchi na', ate' bulu'zxúnnejē'. Cate' bila'dxinē' lu yōdzō, gula'guíxjō'ē yúgu'tē lē na' guca quégaquiē' bönni' ni' gula'yú'u bö' xihui' légaquiē'. ³⁴ Nf'irō bila'rúaj bönachi lu yōdzō ni', yōjtságagaquiē' Jesús. Cate' bila'lé'enē' Lē', guláta'yue' lahuē' uzé'ē lu xiyúgaquiē' na'.

Jesús ruúnē' tu bönni' nacú'uniē' bin

(Mr. 2:1-12; Lc. 5:17-26)

9 Nf'irō bubenē' Jesús lē'e bárcodo', en gudödē' ia'tsölá'a nísado' ni', ate' budxinē' ga naca ladzē'. ² Ni' dujuá'-gaquiē' tu bönni' nacú'uniē' bin ga zoé' Jesús, xzoē' lu da'a yaga. Cate' bilé'enē' Jesús ca na' ta'yéajlē'ē bönni' ni' Lē', gudxē' bönni' na' nacú'uniē' bin, rnnē':

—Butipa ládxi'u, xzí'ina'do'. Chibuníti lahua' dul-la' nabágu'u.

³Nacu'ë ca' bönni' yudo' tu'sédiné' ni', ate' ta'nné' lu icja ládxi'do'gaquié', ta'n-né': "Didza' ru'ë bönni' ni ruzóa Dios tsölá'alö."

⁴Cate' réquibe'ené' Jesús le ta'zá' ládxi'gaquié', ré' légaquié':

—¿Bizx que rizá' ládxi'li' caní le cabí naca tsahui'? ⁵Biti' naca böniga nu guiésö bönni' ni: "Yugu' dul-la' nabágu'u chibuníti lahua'", pero naca böniga nu gun ga huóásë', en uzé'ené'. ⁶Na'a, uluf'ida' libí'ili' neda', Bönni' Guljé' Bönachi, dë lu na'a yöl-la' unná bë' uniti lahua' dul-la' luyú ni.

Ní'irö Jesús gudxé' bönni' na' nacú'u-nië' bin, rnné':

—Guyása. Buchisa da'a yaga quiu', en böaj lidxu'.

⁷Ní'irö la' guyásatë' bönni' na' nacú'u-nië' bin, en bóajë' lidxë'. ⁸Cate' bila'lé'ené' bönni' nacué' ni' lë ni, bulu'bánninë', ate' gula'gu'ë Dios yöl-la' ba tu' bunödzejë' yöl-la' huáca caní quégaca bönachi.

Jesús rulidzë' Mateo

(Mr. 2:13-17; Lc. 5:27-32)

⁹Cate' buzé'ë Jesús ni', bilé'ené' bönni' lë' Mateo, rö'ë ga na' ruquíxjé' uláz que yödzö zi'tu', ate' Jesús gudxé' lë':

—Gudá' neda'.

Ní'irö la' guyásatë' Mateo na', ate' sa'yéajlenë' Jesús.

¹⁰Ia'tú le guca, cate' ni' rö'ë Jesús rahuë' ga naca lidxë' Mateo, zían bönni' tu'quíxjé', en yugu' bönni' cá'asö bila'dxinë' ga zoë', ate' gula'bó'lenë' Jesús tsözxón len yugu' bönni' usëda queë'.

¹¹Cate' bönni' yudo' fariseo bila'lé'ené' lë ni, gula'nábinë' yugu' bönni' usëda queë' Jesús, ta'nné':

—¿Naru' bönni' rusédiné' libí'ili' rágu-lentsë' tsözxón bönni' tu'quíxjé', en iá'zica'rë' bönni' dul-la'?

¹²Cate' biyönnë' Jesús lë ni, ré' légaquié':

—Biti' naquíniguequinë' bönni' náca-gaquié' dxi'a nu un bönachi, pero bönni' té'ené' naquíniguequinë' nu un bönachi. ¹³Guli'tséaj, en buli'sëda le rnna lë na' nazúaj lu guichi lá'ayi, le rnna caní: "Rë'ënda' ulu'huéchi' ládxi'gaquié' bönni' luzá'agaquié', en calëga ilútië'-ba böa' bëdxi lu bucugu lá'ayi quia'." Bida' ni, calëga para ulídzagaca'-në' bönni' tsahui', pero bida' para ulídzagaca'-në' bönni' dul-la' para ulu'bí'i ládxi'gaquié'.

Rusédiné' Jesús ca ral-la' gunru' gubasa

(Mr. 2:18-22; Lc. 5:33-39)

¹⁴Ní'irö bönni' dá'gaquié' Juan, bönni' na' buquile' bönachi nisa, bila'dxinë' ga zoë' Jesús, ate' gula'nábinë' Lë', ta'nné':

—¿Bizx que na' netu', enca' yugu' bönni' yudo' fariseo, zían luzuí runtu' gubasa, pero yugu' bönni' usëda quiu' Li' bití' tunë' gubasa?

¹⁵Bubi'ë didza' Jesús, en ré' légaquié':

—¿Naru' huácatsö ila'sëbi ládxi'gaca nupa nacué' laní que yöl-la' rutsaga na' tsanni ni' bönni' rutsaga në'ë zóalenë' légaquié'? Za' dza cate' idúë' bönni' na' rutsaga në'ë ga nacué'. Dza ní'irö ilunë' gubasa.

¹⁶Bucúdzu'ë didza' Jesús, rnné':

—Cuntu nu un tu lari' tēbi len lari' cubi, tu' uxú'uni lari' cubi na' nugu'ë lari' tēbi na', ate' ichóza'rö lari' tēbi na'.

¹⁷Lë'sca' caní, cuntu nu bönni' rigué'ënë' xisi uva cubi tu lu buzudi guídi gula, tu' galaj ilëbi xisi uva cubi na', en uzxuzxaj buzudi guídi gula na', ate' gaca ditaj xisi uva na', ate' iníti ca' buzudi guídi na'. Rigá'aru' xisi uva cubi tu lu buzudi guídi cubi, ate' irópatë taca chí'i.

**Rubanbi' bi'i nigula queë' Jairo,
en ruhuöácanu tu nigula
gudannu lari' nácuë' Jesús**

(Mr. 5:21-43; Lc. 8:40-56)

¹⁸ Tsanni ni' Jesús ruí'ilenë' légaquië' didza' ni, tu bönni' rinná bé'enë' bönachi judío bidxinë' ga zoë', ate' buzóa zxibë' lahuë' Jesús, en rë' Lë':

—Bi'i nigúlado' quia' la' gútitébi'. Gudá ixóa no'o lëbi', ate' ubanbi'.

¹⁹ La' guzuítenë' Jesús, en sa'yéajlenë' lë'. Dzágagaquië' bönni' usëda queë' Lë'.

²⁰ Ní'irö bidxinnu tu nigula zaca' cúdzu'lë' Jesús, chiguca chinnu iz ré'enu, biti' ruhuí'i rön queénu que huë' qué-gaca cázanu nigula, ate' gudannu lari' nácuë' Jesús. ²¹ Caní bennu tu' rizá' ládxi' nu, rnnanu: Channö cansa' zxe', huöá-ca'. ²² Ní'irö buécjé' Jesús, en ruyúé' lënu, ate' rë'ë-nu:

—Butipa ládxi'u, zxf'ina'do'. Chiböá-cateu' tu' réajlë'u neda'.

La' ná'asö böácatënu.

²³ Cate' bidxinë' Jesús lidxë' bönni' unná bé' na', bilé'enë' nacu'ë ni' bönni' tu'cödxë' gui, en nupa ta'bödxi yechi'.

²⁴ Jesús rë' légaquië':

—Gulí'cuita ni, tu' cabí nátibi' bi'i nigúlado' ni. Rásisibi' na'.

Ní'irö nupa nacuá' ni' bulu'titaj Lë'.

²⁵ Cate' chinubéajë' Jesús bönachi na' ní'ilö, guyázië', en gudélë'ë ná'abi' bi'i nigula na', ate' la' guyásatëbi'. ²⁶ Guzë' didza' ca guca lë ni, ate' bila'yöni bönachi nacuá' idütë luyú na'.

**Jesús ruúnë' bönni'
nachul-la guiój lógaquië'**

²⁷ Cate' Jesús burúajë' ni', chopë' bönni' nachul-la guiój lógaquië' sójácalenë' Lë'. Tu'ë zidzaj didza', ta'nnë':

—Zxf'ini xi'sóë' David, buéchi' ladxi' netu'.

²⁸ Cate' bidxinë' Jesús ga naca lu yu'u, bila'dxinë' chopë' bönni' na' nachul-la

guiój lógaquië' ga zoë'. Jesús gunábinë' légaquië', rnnë':

—¿Ba réajlë'ëli' neda', huáca una' libí'ili'?

Légaquië' ta'nnë':

—Ön, Xan.

²⁹ Ní'irö Jesús gudanë' guiój lógaquië', ate' rnnë':

—Ca réajlë'ëli', ca' gaca queé'li'.

³⁰ La' böáljatë guiój lógaquië'. Ní'irö Jesús buzenë' bach légaquië', rnnë':

—Gulí'güf'itica'sö ládxi'li' cuntu nu in-özi lë ni.

³¹ Cate' bulu'rúajë' ni', la' bulu'zëtë' didza' idütë luyú ni' ca naca lë na' benë' Jesús.

Jesús ruúnë' tu bönni' biti' ru'ë didza'

³² Cate' Jesús, en yugu' bönni' usëda queë' bulu'rúajë' tu lu yu'u, bila'dxinë' bönni' ga zoë' Jesús naché'gaquië' lahuë' tu bönni' biti' ru'ë didza', tu' yu'u lë' bö' xihui'. ³³ Cate' bubéajë' Jesús bö' xihui' na', la' gunnëtë' bönni' na' biti' guca gu'ë didza'. Bulu'bánninë' bönni' nacu'ë ni', ta'nnë':

—Catu caz rilé'etu' le caní ladaj bönachi Israel.

³⁴ Ní'irö bönni' yudo' fariseo gula'nnë' queë' Jesús, ta'nnë':

—Bönni' ni rubéajë' yugu' bö' xihui', rugunë' dxin yöl-la' unná bé' que xán-gaca bö' xihui' na'.

Jesús ruhuéchi' ládxië'ë bönachi zían

³⁵ Gudë' Jesús idú gásibi'ilö gapa nacuá' yödzo zxon, en gapa nacuá' yödzoödo', ate' gapa naca lu yu'u ga tu'dubë' tu'sëdë' bönni' judío queë' Dios. Rusédinë' Jesús bönachi nacuá' ni', en runë' libán que didza' dxi'a ca rinná bé'ë Dios. Bunë' yúgu'të nupa bi ta'guí' ta'zaca' yugu' lu yödzo na'. ³⁶ Cate' Jesús bilé'enë' bönni' zían ni', buéchi' ládxië'ë légaquië', tu' ta'guí' ta'záquië', en nudú ládxi'gaquië' ca raca quéga-

caba' bö'cu' zxila' biti' zoa nu ruyú lé-gacaba'. ³⁷ Ní'irö Jesús rë' yugu' bönni' usëda queë', rnnë':

—Le nácatë dëda' yöla, pero nabábasö nupa tu'lapa. ³⁸ Que lë ni na', guli'gá-ta'yu lahuë' Dios, náquië' Xan yöla na', inábili'-në' isól-lë'ë bönni' huen dxin ulu'lapë' yöla queë'.

**Jesús ribôë' bönni'
ilácagaquië' gubáz queë'**

(Mr. 3:13-19; Lc. 6:12-16)

10 Ní'irö bulidzë' Jesús idxínnutë' bönni' usëda queë', en budödë' lu ná'agaquië' yöl-la' unná bë' para ulu'béajë' bö' xihui' yú'ugaca bönachi, en ulu'únë' yúgu'të nupa te'e, en yúgu'të nupa bi ta'gu'í ta'zaca'.

² Caní naca lágaquië' idxínnutë' gubáz na' nasól-lë'ë Jesús:

Simón, (lë' ca' Pedro),

Andrés, (bóché'ë Simón na'),

Jacobo, (zxí'inë' Zebedeo),

Juan, (bóché'ë Jacobo na'),

³ Felipe, Bartolomé, Tomás,

Mateo, (bönni' uquízxaj),

Jacobo, (zxí'inë' Alfeo),

Lebeo, (lë' ca' Tadeo),

⁴ Simón, (bönni' ru'í láchë'ë yödzö queë'),

Judas Iscariote, (bönni' udödë' Jesús lu ná'agaquië' bönni' ilútië' Lë').

**Jesús risól-lë'ë gubáz queë'
tsöjéngaquië' libán**

(Mr. 6:7-13; Lc. 9:1-6)

⁵ Ní'irö Jesús gusól-lë'ë idxínnutë' bönni' ni tsöjéngaquië' libán, ate' gunná bé'enë' légaquië', rnnë':

—Biti' tséajli' ga nacua' bönachi biti' nácgaca judío, en biti' tsú'uli' láchzagaca bönachi nacua' luyú Samaria. ⁶ Guli'tséaj ga nacua' bönachi Israel, nácgagaquië' ca bö'cu' zxíla'do' nanítigacaba'. ⁷ Guli't-söjén libán, innali': "Chibidxín gala' dza Dios, Nu na' zoa yehua' yubá, inná bë'ë

luyú ni." ⁸ Buli'ún nupa te'e. Buli'ún dx-i'a nupa te'e huë' nudzu' ruzödi. Buli'-subán nupa chinátigaca. Buli'béaj bö' xihui' yú'ugaca bönachi. Bénnasa' queé'li' yöl-la' unná bë' ni. Buli'gún dxin le, en biti' bi uquízxajli'.

⁹ Biti' bi guá'ali' lu buzudi queé'li', calëga dumí oro, en calëga dumí plata, en calëga dumí lásido'. ¹⁰ Biti' guá'ali' yöxaj yöta queé'li' le gáguli' la' nöza. Tuz lari' ixóa yenli', en biti' guá'ali' xiráchuli' o xiyaga queé'li', tu' idzöli quézínë' bönni' huen dxin le gahuë'.

¹¹ 'Gátitës yödzö zxön o yódzödo' ga idxinli', guli'naba nuzxi naca idú ladxi' lu yödzö ni', ate' ugá'anali' lidxi nu na' cate' gála'rö dza urúajli' yödzö na'.

¹² Cate' tsú'uli' tu lu yu'u, buli'gapa Dios bönachi nacua' lu yu'u na', inábili'-në' Dios unödzjë' quégaquië' le cuéqui dxi icja láchxi'do'gaquië'. ¹³ Channö bönachi nacua' lu yu'u ni' nácgaca lesaca', ugá'analen le ribequi dxi ladxi' na' léguequi, pero channö bönachi na' cabí nácgaca lesaca', inábali' cabí ugá'ana lë na' ribequi dxi ladxi' len léguequi. ¹⁴ Gátitës ga idxinli' ga bönachi ni' biti' ilún libí'ili' bal, en biti' ulu'zë' nagui xtídzali', buli'rúaj lu yu'u ni' o yödzö ni', ate' guli'cu'fi bëchtö da' lë'e lábali', le ulu'fi léguequi nabága'gaca xíguia'. ¹⁵ Le nácatë rea' libí'ili', cate' idxín dza ichúguië' Dios quégaca bönachi, ila'gu'í ila'zá-ca'rö bönachi yödzö na' ca ila'gu'í ila'zaca' bönachi gula'cuá' yödzö Sodoma, en yödzö Gomorra, nupa ni' busunítië' Dios.

**Nupa biti' ta'yéajlë' ulu'saca' zi'
nupa dá'gaca Cristo**

¹⁶ Gunnë' ca' Jesús:

—Buli'yútsöca', neda' risól-la'a libí'ili', ate' gácali' ca bö'cu' zxíla'do' ta'daba' ga dzó'öba' bö'cu' gu'a sínia'. Guli'gaca sina' ca nácgacacaba' sina' bëla sínia', pero guli'gaca ca' nöxaj ladxi' ca nácgacacaba' gu'dödo'. ¹⁷ Guli'gún chí'i cuinli'

quégaca bönachi, tu' ulu'dödë' lib'ili' lu ná'agaquië' bönni' yúlahui', en ila'guinë' lib'ili' gapa naca lu yu'u ga tu'dubë' tu'sëdë' bönni' judío queë' Dios. ¹⁸ Lësca' caní, ila'ché'ë lib'ili' lógaquië' bönni' lo, en lógaquië' bönni' ta'nná bë'ë, tu' dá'ali' neda'. Caní gaca para gaca gunli' ba nali' quia' lógaquië' bönni' ni', en lógaquië' bönni' bití' nácagaquië' judío. ¹⁹ N'irö cate' ulu'dödë' lib'ili' lu ná'agaquië' bönni' unná bë' na', bití' có'öli' böniga naxi innali', tu' ichizë' Dios icja ládxi'do'oli' didza' güf'ili', en ca innali' la' dza ná'asö. ²⁰ Calëga lib'isili' na' innali', pero Dios Bö' Lá'ayi, Nu na' risól-lë'ë Xúziru' Dios queé'li', Lë cazë' sóalënë' lib'ili', en gu'ë didza'.

²¹ 'Ila'cuá' bönachi ulu'dödi bóchi'guequi' lu ná'agaquië' bönni' ilútië' légaquië', en lësca' caní, bönni' nácagaquië' xuz ulu'dödë' zxf'inigaquië', ate' ila'cuá'abi' bi'i ila'dá'baga'bi' xúzgacabi', en ilunbi' ga ilátië' xúzgacabi' na'. ²² Yúgu'të bönachi ulu'zóa lib'ili' tsól'aló tu' dá'ali' neda', pero nu ugá'ana tsutsu ga idxinrö dza údxi, nu ni ulá. ²³ Cate' ulu'saca' zi' bönachi lib'ili' tu lu yödzö, buli'zxunnaj ni', ate' tséajli' ia'tú yödzö, tu' rea' lib'ili', huöda' neda', Bönni' Guljë' Bönachi, z'faló cate' údxi gunli' libán gapa nacua' yugu' yödzö quégaca bönachi Israel.

²⁴ 'Núti'tës bönni' náquië' bönni' usëda bití' nácarië' lo ca nu rusëdi lë', en lësca' caní, nu bönni' náquië' huen dxin bití' nácarië' lo ca xanë'. ²⁵ Nu na' naca bönni' usëda ral-la' udzëjanë' channö huadéli'në' gáquië' ca naca nu rusëdi lë', ate' bönni' huen dxin na' ral-la' udzëjanë' channö gáquië' ca naca xanë'. Channö ta'nnë' quia' neda', bönni' xan yu'u, ta'n-në' naca' Belzebú tu' xihui', ila'nnë' z'irë' quégaca bönachi tá'gaquië' neda'.

Nu ral-la' gádxiru'

(Lc. 12:2-9)

²⁶ Gunnë' ca' Jesús:

—Que lë ni na', bití' gádxili' bönachi. Hualá' lahui yúgu'të le raca bëdxi lán-do'os, ate' huáca bë' yúgu'të le nagachi'. ²⁷ Yugu' didza' ru'filena' lib'ili' ga naca chul-la, guli'quixjö' ga naca lu bení, ate' le rea' lib'ili' ga nagachi', guli'nnë' zidzaj ga naca lahui' lógaca bönachi. ²⁸ Bití' gádxili' nupa tuti le nácagaca caz bönachi, pero bití' gaca ulu'suniti bö' naca cázaru'. Guli'gadxi Dios, Bönni' na' gaca gútië' idütë le nácali', en chú'unë' bö' naca cázali' lu gu' gabila.

²⁹ 'Ta'dá'uba' chópaba' biguínido' len tu dumí lásido', pero bití' ibíxiba' tuba' lu yu channö cabí ru'ë Xúziru' Dios lataj gaca caní. ³⁰ Lësca' caní, nabábagaca yúgu'të guitsa' ícjali' lahuë' Dios. ³¹ Que lë ni na', bití' gádxili'. Ru'itërö ládxië' Dios lib'ili' ca ru'í ládxië'-ba' zianba' biguínido'.

Yugu' bönni' ta'z'í' lu ná'agaquië' Cristo lógaca bönachi

(Lc. 12:8-9)

³² Gunnë' ca' Jesús:

—Nu bönni' si' lu në'ë neda' lógaca bönachi, neda' si' lu na'a bönni' na' lahuë' Xuza' zoë' yehua' yubá. ³³ Bönni' ta'dá'baguë'ë lógaca bönachi, ila'nnë' bití' ta'dé'ë neda', lësca' caní neda' tá'bagá'a légaquië' lahuë' Xuza' zoë' yehua' yubá.

Jesús náquië' le run ga ila'rúaj choplö bönachi

(Lc. 12:51-53; 14:26-27)

³⁴ Gunnë' ca' Jesús:

—Bití' guéquili' za'a idigu'a le ribequi dxi bönachi yödzölió ni. Bití' za'a idigu'a le ribequi dxi, pero za'a idigu'a le gun ga ila'rúaj choplö bönachi. ³⁵ Za'a ni, ate' guna' ga ila'dá'baga' bönachi

xúzguequi, ate' yugu' nigula ila'dá'ba-ga'nu ca' xiná'agacanu. Lësca' caní, yugu' nigula xzoa' lídxigacanu ila'dá'ba-ga'nu xto' zxi'ininu. ³⁶Caní gaca, la' di'a dzasó quégaca bönachi ulu'saca' zi' luzé'guequi.

³⁷'Nu nadxí'irö xuz xiné'e ca nadxí'i neda', bití' naca bachi nu na' ta' neda', ate' nu nadxí'irö bi'i bönni' que o bi'i nigula que ca nadxí'i neda', bití' naca bachi nu na' ta' neda'. ³⁸Nu bití' si' lu në'e gaca ca tu bönni' söjté'ë lë'e yaga cruz, en ta' neda', bití' naca bachi guequi quia' neda'. ³⁹Nu ru'í' ladxi' gun chí'i yöl-la' na'bán que, uniti le, pero nu uniti yöl-la' na'bán que tu' da' neda', ulá nu na'.

Yugu' le ubi'ë Dios queéru'

(Mr. 9:41)

⁴⁰Gunné' ca' Jesús:

—Nu gun libí'ili' bal, neda' ca' gun bal, ate' nu na' gun neda' bal, gun bal ca' Dios Xuz nasól-lë'ë neda'. ⁴¹Nu gun bal tu bönni' ru'ë didza' uláz queë' Dios tu' ru'ë didza' uláz queë' Dios, huadeli' nu na' lu në'ë Dios la' leze na' idéli'në' bönni' ru'ë didza' uláz queë' Dios. Lësca' caní, nu gun bal tu bönni' tsahui' tu' náquië' bönni' tsahui', huadeli' nu na' lu në'ë Dios la' leze na' idéli'në' bönni' tsahui'. ⁴²Núti'tës nu unödzej queë' tu bönni'do' ni tu zxi'bíndo'os nisa tu' náquië' bönni' usëda quia' neda', le nácatë rea' libí'ili', bití' uniti nu na' le ral-la' si' lu në'ë Dios.

Ta'dxinë' bönni' nasól-lë'ë

Juan ga zoë' Jesús

(Lc. 7:18-35)

11 Cate' Jesús budxi buzéajni'inë' yugu' bönni' usëda queë', buzé'ë ni', sa'yéajë' röjsédinë' bönachi, en rö-jenë' libán yugu' lu ládzagaca bönachi na'.

²Juan, bönni' buquilë' bönachi nisa, ni' yu'ë lidxi gufé, ate' biyönnë' ca náca-

gaca le runë' Jesús. Ní'irö Juan na' gusól-lë'ë chopë' bönni' dá'gaquië' lë', ate' bi-la'dxinë' ga na' zoë' Jesús. ³Chopë' ni gula'nábinë' Jesús, të' Lë':

—¿Nacu' Li' Cristo, Bönni' na' ral-la' idxinë' yödzölió ni, o ral-la' cöztu' dza idxinë' ia'túë' bönni'?

⁴Bubi'ë didza' Jesús, rë' légaquië':

—Guli'tséaj tsöjtíxjöi'ili'-në' Juan lë ni riyónili', en rilé'eli'. ⁵Guli'tsöjödxe' ca raca, tu'l'é'nenë' bönni' guchul-la guió'j lógaquië', ate' tu'zé'ë bönni' bití' guca ila'dé'. Nuhuóácagaquië' bönni' güf'igue-quinë' huë' nudzu' ruzödi, ate' ta'yönnë' bönni' gula'códzuë'. Nnita' nabángaqüië' bönni' gulátie', ate' raca libán que didza' dxi'a lógaca bönachi yechi'. ⁶Bica' ba nu bönni' bití' gáquië' chopa ládxe'ë, bití' ubéaj ládxe'ë neda'.

⁷Cate' yugu' bönni' na' dá'gaquië' Juan bulu'zé'ë söjhuó'jgaquië', ní'irö gusi lahuë' Jesús ru'í'ilenë' bönachi nacuá' ni' didza' ca naca queë' Juan na'. Rë' légaquië':

—¿Bizxi gú'unili' ilé'eli' cate' ni' guyéajli' lu lataj cá'asó? ¿Naru' gú'unili' ilé'eli'-në' tu bönni' náquië' ca tu gui ruzecaj bö' recja le? ⁸Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' nácuë' lari' dxí'ado'? Nöz quézili' bönni' nácuagaquië' lari' dxí'ado' nacu'ë lídxigaquië' bönni' ta'nná bë'ë. ⁹Channö cabí, ¿bizxi gú'unili' ilé'eli'? ¿Naru' gú'unili' ilé'eli'-në' tu bönni' ru'ë didza' uláz queë' Dios? Ca' naca, réquida'. Rea' libí'ili', bilé'eli'-në' tu bönni' nácatë'ë lo ca ia'zica'rë' bönni' gulu'ë didza' uláz queë' Dios. ¹⁰Caní naca, tu' náquië' Juan bönni' na' ru'í' didza' le nazúaj lu guichi lá'ayi ca naca queë', le rnna: Buyú, risól-la'a bönni' gubáz quia', in-óruë' ca Li'.

Lë' upé'ë nöza ga tödu'.

¹¹Le nácatë rea' libí'ili'. Idütë yödzölió ni, cunttu nu zoa nácarö lo ca Juan, bön-

ni' ni' buquilé' bönachi nisa, pero nu naca cuídí'do'os ga rinná bē' Nu na' zoa yehua' yubá nácaterö lo ca Juan na'.

¹² 'Cate' ni' gusí lahué' buquilé' Juan bönachi nisa, ga ridxintē na'a dza, bayudxi túngaca bönachi para ta'yaza ga rinná bē'ē Bönni' na' zoē' yehua' yubá, ate' nupa tunsö bayudxi ta'deli' le. ¹³ Ga bidxintē dza na' blē'ē Juan, le rinná bē' xibá queē' Moisés, en le bulu'zúajē' lu guichi yúgu'tē bönni' gulu'ē didza' uláz queē' Dios gulufi' didza' ca rinná bē'ē Bönni' na' zoē' yehua' yubá. ¹⁴ Channö ré'enili' si' lu ná'ali' lē ni, ral-la' inózili' Juan na' náquiē' Elías, bönni' ni' bē'ē didza' uláz queē' Dios, bönni' na' Dios gunné' ral-la' ilá' lahué' leyúbölö dza ni zóaru' na'a. ¹⁵ Nu zoa nagui, en riyöni ral-la' uzé' nagui.

¹⁶ '¿Bizxi ubéqui'tseda' ca nácagaca bönachi nacua' dza ni zóaru' na'a? Nácagaquiē' ca yugu' bí'ido' ta'bó'öbi' lu yé'eyi. Zidzaj tu'lídzabi' luzá'agacabi', ¹⁷ ta'nabi': "Rucódxitu' queéli' gui. ¿Bizx que biti' ruyá'ali'? Rul-la yéchi'tu' queéli'. ¿Bizx que biti' ribödxí yéchi'li'?" ¹⁸ Caní nácali', tu' bidē' Juan, ate' tu' cabí giúfi' gudahué' ca ráguli' libí'ili', gunnéli' queē', gunnali': "Tu' xihui' dzágui lē'." ¹⁹ Ní'irö bidxina' neda', Bönni' Guljē' Bönachi, ate' re'aj rahua', ate' rnnēli' quia', rnnali': "Náquiē' bönni' huágulē'ē, en bönni' re'jē'. Náquiē' luzá'agaquiē' bönni' uquízaj, en ia'zica'rö huen dul-la'." Yöl-la' réajni'i queē' Dios naca bē' ni'a que le tun nupa ta'z'í' lu né'eguequi le.

**Le gaca que nu biti'
run ca rna xtídzē'ē Dios**

(Lc. 10:13-15)

²⁰ Ní'irö gusí lahué' Jesús ruzenē' bach bönachi nacua' yugu' yödzö gapa ni' benē' zían yöl-la' huáca, tu' cabí tu'bí'ini ládxi'guequi. ²¹ Gudxē' léguequi:

—Bica' bayechi' libí'ili', bönachi Corazín. Bica' bayechi' libí'ili', bönachi Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca bena' ga zóali', dza nítēlō ulu'bí'i ládxi'gaca bönachi yödzö Tiro, en yödzö Sidón na', en ilácugaca lari' tēbi, en ulu'dxía dō ícjaguequi, le ulu'lufi' tu'bí'i ládxi'gaca bönachi na'. ²² Na'a, neda' rea' libí'ili', cate' idxín dza ichúguiē' Dios quégaca bönachi, qu'í sáca'röli' libí'ili' ca ila'gu'í ila'zaca' bönachi yödzö Tiro, en yödzö Sidón, nupa na' busunítíē' Dios. ²³ Libí'ili', bönachi Capernaum, guca queéli' ca bidxintēli' ga nu riyaza yehua' yubá. Huótjali' lu gu' gabila. La'tu' gulaca yugu' yöl-la' huáca bena' ga zóali' lu yödzö Sodoma, ulu'gá'ana bönachi yödzö ni' ga ridxintē na'a dza. ²⁴ Na'a, neda' rea' libí'ili', cate' idxín dza ichúguiē' Dios quégaca bönachi, qu'í sáca'röli' libí'ili' ca ila'gu'í ila'zaca' bönachi Sodoma na'.

**Rnnē' Jesús: "Guli'dá
ga zoa', uzí' ládxi'li'"**

(Lc. 10:21-22)

²⁵ Dza na' bē'ē didza' Jesús, rnnē':

—Xuza', nacu' Xani yehua' yubá, en Xani luyú ni. Rigu'a Li' yöl-la' ba, tu' bucáchu'u lē ni, para cabí ila'lé'enē' bönni' ta'yéajni'ide'enē' le, pero buluf'ínu' nupa nácagaca ca yugu' bí'ido' le. ²⁶ Ca' gaca, Xuza', tu' caní guyaza ládxi'u Li'. ²⁷ Yúgu'tē nudödē' Xuza' lu na'a. Cuntu nu nunbē' neda', Zxf'inē' Dios, pero tuzē' Dios Xuz, en cuntu nu nunbē' Dios Xuz, pero tuza' neda', Zxf'inē' Dios, enca' nupa na' ré'enda' uluf'ida' léguequi Dios Xuz. ²⁸ Guli'dá ga zoa' yúgu'tēli' röjxéqui'li' tu' rúntica'sili' dxin que yöl-la' yudo', en nuá'ali' yua' zi'i quégaca xibá que, ate' neda' guna' ga uzí' ládxi'li'. ²⁹ Lu yöl-la' nöxaj ladxí' queéli' guli'gún xichina', gácali' ca bēdxí ta'z'í'iba' yugu' quégacaba'. Guli'sēda lu na'a neda', tu' naca' nöxaj

ladxi', en do' ladxi', ate' idzöli yöl-la' ruzí' ladxi' queé'li', le cuéqui dxi ládxi'li'.
³⁰ Yugu' na' ugu'a libí'ili', le naca le inná bé'eda' libí'ili', bití' naca böniga, ate' yua' ugu'a libí'ili' le naca le rusédida', dzá'-do'os naca.

**Ta'leçjè' do bönni' usèda
 queé' Jesús dza lá'ayi**

(Mr. 2:23-28; Lc. 6:1-5)

12 Dza ni', le naca dza lá'ayi qué-gaquiè' bönni' judío, gudödè' Jesús gapa dè yöla xzoa' xtila, ate' ta'-dunè' bönni' usèda queé', en gusí ló-gaquiè' ta'leçjè' do ga dxía xzoa' xtila, en tahuè' xzoa' xtila na'.² Cate' bila'lé'enè' bönni' yudo' fariseo lè ni, tè' Jesús:

—Buyítsöca', tunè' bönni' usèda quiu' le cabí ral-la' gunru' dza lá'ayi.

³ Ní'irö Jesús gudxè' légaquiè':

—¿Naru' cabí nulábanili' lu guichi lá'ayi bi benè' David cate' gudunè', ate' gula'dún ca' nupa gula'cuá'len lè'?
⁴ Guyu'è lu yu'u queé' Dios, en gudahuè' yugu' yöta xtila nagú'ugaquiè' lu bucugu lá'ayi, le cabí ral-la' gahuè' lè', en bití' ral-la' ilahuè' bönni' gula'cuá'lenè' lè', pero légacsè' bixúz dè lataj ilahuè' le.
⁵ ¿Naru' cabí nulábanili' le rinná bè' xibá queé' Moisés ca tunè' bixúz yugu' dza lá'ayi? Tunè' dxin lö'a yudo' yugu' dza lá'ayi, en bití' ta'báguè'è xíguia'.

⁶ Na'a, neda' rea' libí'ili', zoa' neda' ni, en naca' bönni' nácarè' lo ca yudo'.

⁷ Bití' réajni'ili' lè na' nazúaj lu guichi lá'ayi, le rnna: "Ré'ènda' huéchi' ládxi'li' luzá'ali', en calèga gútgacali'-ba' böa' bédxido' ruzégui'gacali'-ba' lu bucugu lá'ayi quia'." La'tu' réajni'ili' lè ni, bití' ichúguli' quégaca nupa bití' nabága'gaca xíguia'.
⁸ Ca' naca, tu' naca' neda', Bönni' Guljè' Bönachi, Xani dza lá'ayi.

Jesús ruúnè' tu bönni' narequi' në'è

(Mr. 3:1-6; Lc. 6:6-11)

⁹ Ní'irö buzé'è Jesús ni', ate' guyu'è lu yu'u ga tu'dubè' bönni' judío, en tu'sédè' queé' Dios.
¹⁰ Lu yu'u na' zoè' tu bönni' narequi' në'è, ate' tu' té'ènnè' bönni' judío unná bè' ila'dzölinè' bi ulu'zégui'è Jesús didza', que lè ni na' gula'nábinè' Lè', ta'nné':

—¿Naru' dè lataj unru' nu re'e cate' naca dza lá'ayi?

¹¹ Bubi'è didza' Jesús, rè' légaquiè':

—Nu bönni' nútsè'è ládjalí', channö zóaba' tuba' bö'cu' xzila' queé', en channö ibíxiba' lu yeru cate' naca dza lá'ayi, ¿naru' cabí tsöjxönè'-ba', en tsöjléajè'-ba'?
¹² Nazáca'tèrè' tu bönni' ca tuba' bö'cu' xzila'. Que lè ni na', dè lataj gunru' le naca dxi'a quégaca bönachi cate' naca dza lá'ayi.

¹³ Ní'irö Jesús gudxè' bönni' huè' na':

—Bulí no'o.

Cate' bulí në'è, la' böácatè dxi'a ca naca ia'tsólá'a në'è.

¹⁴ Ní'irö bulu'rúajè' bönni' yudo' fariseo na', ate' gulún xtídza'gaquiè' para gaca ilútiè' Jesús.

**Le gunné' tu bönni' bë'è didza' uláz
 queé' Dios ca ral-la' gaca queé' Jesús**

¹⁵ Cate' réquibe'enè' Jesús lè ni, buzé'è ni', ate' söjácalen bönachi zían Lè'. Jesús bunè' yúgu'tè nupa te'e ladaj bönachi na',
¹⁶ en gunná bé'enè' léguequi bití' usiyónguequi bönachi Nu náquiè'.
¹⁷ Caní gunné', para gaca lè na' gunné' Isaías, bönni' bë'è didza' uláz queé' Dios, gunné':

¹⁸ Bulí'yútsöca', Bönni' ni náquiè' Huen Dxin quia',

na' guró caza' neda' Lè'.

Nadxí'ida' Lè', en raza ládxa'a Lè'.

Ichiza' Lè' Bö' Lá'ayi.

Lè' usiyönnè' yúgu'tè bönachi ca guna', uchi'a usöróa' quéguequi.

¹⁹ Cuntu nu tíl-lalenë didza', en biti' ulidzë' zidzaj.

Cuntu nu yöni chi'ë ga naca zi'tu'.

²⁰ Tu guído' zoa bö biti' quitsjé' le, ate' guí' chizóa ulu, biti' usúluë' le, cate' uzóarë' le naca tsahui' queë'.

²¹ Yúgu'të bönachi ilún löza Lë'.

Ta'nnë' bönni' judío unná bë': "Dzaga Jesús tu' xihui'"

(Mr. 3:19-30; Lc. 11:14-23; 12:10)

²² Ní'irö dujuá'gaquië' tu bönni' ga zoë' Jesús, nachul-la lahuë', en biti' raca gu'ë didza', tu' yu'u bö' xihui' lë', ate' Jesús bunë' bönni' na'. Caní guca, ril'é'enë', en ru'ë didza' bönni' na' guchul-la lahuë', en biti' guca gu'ë didza'. ²³ Que lë ni na' bulu'bani yúgu'të bönachi nacua' ni', ta'nná:

—¿Naru' nácatsë' bönni' ni Zxí'ini Xi'sóë' David, Bönni' na' ral-la' guídë'?

²⁴ Cate' bila'yönnë' bönni' yudo' fariseo lë ni, ta'zá' ládxë'ë, ta'nnë': Bönni' ni rubéajë' yugu' bö' xihui' tu' dzaga Beelzebú tu' xihui', xángaca bö' xihui', Lë'.

²⁵ Réquibe'enë' Jesús lë na' ta'zá' ládx-i'gaquië', ate' rë' légaquië':

—Gátit'ës ga ta'nná bë' bönachi, channö bönachi ni' ila'rúaj choplö, en ila'díl-lalen luzé'eguequi, initi yöl-la' unná bë' qué'eguequi. Lësca' caní, channö ila'rúaj choplö bönachi nacua' tu yödzö o tu yu'u, en ila'dil-la, biti' gaca ila'día' bönachi nacua' yödzö na' o yu'u na'. ²⁶ Lësca' caní, channö ubéaj Satanás tu' xihui' la' luzé'esö, ate' yugu' bö' xihui' na' ila'díl-lalen la' léguequisö, ¿naru' idía' yöl-la' unná bë' que tu' xihui'? ²⁷ Rnnali' quia' rubéaja' yugu' bö' xihui' tu' dzaga Beelzebú tu' xihui' neda'. Channö runa' caní, ¿nuzxi dzaga nupa dá'gaca lib'íli' cate' tu'béaj yugu' bö' xihui'? Que lë ni na' le túngaca caz naca bë' nachíxili'. ²⁸ Na'a, channö neda' rubéaja' yugu' bö'

xihui' tu' zóalen yöl-la' huáca queë' Dios Bö' Lá'ayi neda', le nácate' chibidxín le rinná bë'ë Dios ga zóali'.

²⁹ ¿Naru' huácatsö nu bönni' tsu'ë lidxë' bönni' nal-la, en cuéajë' yöl-la' tsahui' dzö'ö lidxë' channö cabí gúguë'ë bönni' nal-la na' zí'alö? Ní'irö gaca tsu'ë, en ulatjë' lidxë' bönni' nal-la na'.

³⁰ Nu biti' run neda' tsözxón, ridá'bagá' neda', en nu biti' rutubi tsözxón len neda', rusilasi nu na'.

³¹ Que lë ni na' rea' lib'íli', ca naca yúgu'të dul-la' tun bönachi, en yugu' didza' xihui' ta'nná, uniti lahuë' Dios léguequi, pero nu bönni' inné' zi'ë queë' Dios Bö' Lá'ayi, biti' ca' uniti lahuë' Dios lë'. ³² Lësca' caní, nu bönni' inné' quia' neda', Bönni' Guljë' Bönachi, Dios uniti lahuë' lë', pero nu bönni' inné' queë' Dios Bö' Lá'ayi, biti' ca' uniti lahuë' Dios lë'. Biti' uniti lahuë' lë' dza ni zóaru' na'a, en biti' uniti lahuë' lë' dza si' za'.

Le runru' naca bë' le nácaru'

(Mt. 7:15-20; Lc. 6:43-45)

³³ Gunnë' ca' Jesús:

—Channö naca dxi'a tu yaga, cuía le naca dxi'a, pero channö naca cá'asö yaga na', cuía ca' le naca cá'asö. Caní naca, le ribía tu yaga naca bë' yaga na'. ³⁴ Lib'íli' nácali' di'a dza qué'gacaba' bëla sínia'. ¿Nacxi gaca güf'ili' dxi'a didza', channö cabí nácali' dxi'a? Ca naca le ta'zá' ládx-i'gaca bönachi, lësca' caní tu'í didza'. ³⁵ Tu bönni' tsahui' ru'ë didza' tsahui' tu' yu'u le naca tsahui' icja ládxi'da'ahuë', pero tu bönni' huiá' dö' ru'ë didza' biti' naca tsahui' tu' yu'u le cabí naca tsahui' icja ládxi'da'ahuë'. ³⁶ Que lë ni na' rea' lib'íli', cate' idxín dza ichúguie' Dios qué'gaca bönachi, uchi'a usöröë' tu tu bönni' ca naca yúgu'të didza' gula'nnazë' ca'. ³⁷ Ca naca didza' ru'u, uchi'a usöröë' li', ate' uruju' tsahui' o ibágu'u xíguia' ni'a que didza' na' bë'u.

**Ta'nábinē Jesús gunē le
gaca bē nu náquiē**

(Mr. 8:12; Lc. 11:29-32)

³⁸ Ní'irō bulu'bi'ē didza' yugu' bōn-
ni' judo' fariseo, en yugu' bōnni' judo'
tu'sédinē, en tē' Jesús:

—Bōnni' Usedi, ré'ēnitu' ilé'etu' tu le
gunu' le gaca bē' dē lu no'o yōl-la' unná
bē'.

³⁹ Bubi'ē didza' Jesús, en ré' légaquiē':

—Yugu' bōnni' tuá' dō' ni, biti' zoa
idú ládxi'do'gaquiē', ta'nábinē' neda' gu-
na' tu le gaca bē' nu naca'. Biti' bi le
gaca bē' ila'lé'enē, pero le naca bē'sō na'
ca guca queē' Jonás, bōnni' bē'ē didza'
uláz queē' Dios. ⁴⁰ Ca na' guca queē'
Jonás na', bugá'anē' lē'ēba' tu böla zxōn
idú tsonna dza tsonna yēla, lēasca' caní
gaca quia' neda', Bōnni' Guljē' Bōnachi,
tsonna dza tsonna yēla ugá'ana' zxan yu.

⁴¹ Ila'yasē' bōnni' gula'cu'ē yōdzō Nínive
dza ichúguiē' Dios quégaca bōnachi cate'
uchi'a usörōē' bōnachi nacua' dza ni
zóaru' na'a, atē' le gulunē' usubaga' bō-
nachi ni xíguia' tu' bulu'bi'i ládxi'gaquiē'
bōnni' Nínive na' cate' ni' busiyōnnē'
Jonás légaquiē' xtídzē'ē Dios, atē' na'a
zoa' ni neda', en nácatēra' lo ca Jonás
na'. ⁴² Lēasca' caní, nigula ni' gunná
bē'enu yōdzō dē saca' ga ridōdi gubidza
beo' ziaga chásanu dza ichúguiē' Dios
quégaca bōnachi cate' uchi'a usörōē' bō-
nachi nacua' dza ni zóaru' na'a, atē'
le bennu usubaga' légaquiē' xíguia', tu'
birúajnu nigula na' ga nácatērō zí'tu'
para yóninu didza' réajni'i bē'ē Salomón,
atē' na'a zoa' ni neda', en nácatēra' lo ca
Salomón na'.

Cate' rudxín tu bö' xihui' xilataj

(Lc. 11:24-26)

⁴³ Gunné' ca' Jesús:

—Cate' rirúaj tu bö' xihui' yu'u bōn-
ni', ridá gapa nabidxi, riguila'j ga uzí'
ladxi'. Channō cabí idzōli ga na' uzí'

ladxi', ⁴⁴ ní'irō inná: “Huōja' xilatja' ga
ni' birúaja'.” Cate' udxín ga ni' birúaj,
tsōjxaca' bōnni' na', náquiē' ca tu yu'u
nadachi', en nalúaj, en chinabá'a para
nu tsōjsóa ni'. ⁴⁵ Ní'irō tseaj, tsōjzxi' ia'-
gadxi bö' xihui' nácagacatērō xihui' ca
le, atē' ila'yaza yúgu'tē, en ila'cuá' icja
ládxida'ahuē' bōnni' na', atē' ga údxi
huayáli'tērō ca gaca queē' bōnni' na' ca
guca queē' zí'alō. Lēasca' caní gaca que-
gaca bōnachi tuá' dō' ni.

Xiné'ē Jesús, en yugu' bōnni' bóchē'ē

(Mr. 3:31-35; Lc. 8:19-21)

⁴⁶ Cate' ni' ru'ílenē' Jesús bōnachi
didza' ni, xiné'ē, en yugu' bōnni'
bóchē'ē bila'dxinē' ni'. Gula'cu'ē ló'alō,
en gulé'éniguequinē' ilu'ílenē' Jesús
didza'. ⁴⁷ Ní'irō tu bōnni' busiyōnnē'
Jesús, en ré' Lē':

—Buyútsōca', nacu'ē xinó'o, en yugu'
bōnni' bóchu'u ló'alō, en té'ēnnē'
ilu'ílenē' Li' didza'.

⁴⁸ Bubi'ē didza' Jesús, en ré' bōnni' na'
busiyōnnē' Lē' caní, rnnē':

—¿Nózili' nuzxi caz xiná'a, en nupxi
caz bōnni' bócha'a?

⁴⁹ Ní'irō bulí nē'ē, en bulu'e yugu' bōn-
ni' usēda queē', en rnnē':

—Bulí'yútsōca', bōnni' ni nácagaquiē'
ca xiná' caza', en yugu' bóchi' caza'.
⁵⁰ Núti'tēs nu run ca ré'ēni quézine' Xuza'
zoē' yehua' yubá, nu ni naca bi'i bóchi'
caza', en bi'i zan caza', en xiná' caza'.

**Rucúdzu'ē didza' Jesús ca
naca queē' tu bōnni' guz**

(Mr. 4:1-9; Lc. 8:4-8)

13 La' dza ní'isō birúajē' Jesús niu'
yu'u, atē' yōjchō'ē ra' nísado'.
² Tu' bila'dxín bōnachi zían ga zoē' Jesús,
gurenē' tu lē'e bárcodo', en gurō'ē ni',
atē' bōnachi zían na' gula'cuá' luyú bidxi
ra' nísado' na'. ³ Ní'irō Jesús bé'lenē'
légaquiē' didza', zían le busédinē' lé-
gaquiē'. Bucúdzu'ē didza', rnnē':

—Buli'yútsöca', birúajë' tu bönni' guz, söjësië' xisedo'. ⁴ Tsanni ni' söjësië', bal-la xisedo' na' gulasi ra' nöza, ate' bila'dxinba' biguínido', en gulé'ajba' xisedo' na'. ⁵ Gulasi ia'zica'rö xisedo' na' luyú ga rö'ö guió'j, ga na' rö'ö láti'sö yu, ate' la' gula'lentë, tu' cabí rö'öda' yu ni'. ⁶ Ní'irö cate' budzá'a gubidza, lë na' bësië' la' gula'cuáditë, en gula'bidxi, tu' cabí dë ga ilún luí. ⁷ Gula'lén ia'zica'rö xisedo' na' ga bulu'lén lubá yötsi', ate' gula'zxon lubá yötsi' na', en bila'röli lë na' bësië', en gulún ditaj le. ⁸ Gulasi ia'zica'rö xisedo' na' ga naca luyú bëbu, ate' bulu'nödzej. Bal-la lë na' bësië' bulu'nödzej ia'tú gayuá'tërö ca'. Ia'zica'rö bulu'nödzej ia'tsónnalalaj ca', ate' ia'zica'rö bulu'nödzej ia'chí uruá' ca'. ⁹ Nu zoa nagui, en riyöni, ral-la' uzé nagui.

**Le té'ëni ilún le
bucúdzu'ë Jesús didza'**

(Mr. 4:10-12; Lc. 8:9-10)

¹⁰ Ní'irö bila'dxinë' bönni' usëda queë' Jesús ga zoë', en gula'nábinë' Lë, ta'nnë':
—¿Bixz que ru'ílenu' bönachi didza' yugu' le rucúdzu'u didza'?

¹¹ Bubi'ë didza' Jesús, en rë' légaquië':

—Dios ru'ë lib'í'ili' lataj tséajni'ili' le nagachi' ca rinná bë'ë Lë' yehua' yubá, pero bönachi ni bití' té'ëni ila'yéajni'i.

¹² Nu si' xtídzë'ë, Dios unödzejë' que ia'lati', ate' gáta'da'arö que, pero nu bití' si' le, la's dui le dë que udúa. ¹³ Que lë ni na' ru'ílena' légaquië' didza' yugu' le rucúdzu'a didza', tu' tu'yúé' pero bití' ta'lé'enë'. Ta'yönnë' pero bití' tu'zé ná-gagaquië', en bití' ta'yéajni'inë'. ¹⁴ Caní raca quegaquië' para gaca ca na' gunné' Isaías, bönni' bë'ë didza' uláz queë' Dios, gunné':

Le nácatë yónili' pero bití' tséajni'ili'.

Uyuli' iná'ali' pero bití' il'é'eli'.

¹⁵ Caní raca tu' nazidi láchxi'do'gaca bönni' ni,
en bití' bi riyaza icja ná-gagaquië'.

Nadzudi' guió'j lógaquië',
para cabí ila'lé'enë' len guió'j lógaquië'
na'.

Bití' ulu'zé ná-gagaquië',
en bití' ulu'zéajni'i láchxi'gaquië',
en bití' ulu'huóáquië' quia' neda'
para gaca una' légaquië'.

¹⁶ Na'a, bica' ba lib'í'ili', tu' rilé'e
guió'j loli', en riyöni ná-gali'. ¹⁷ Le ná-
catë rea' lib'í'ili', zían bönni' gulu'ë
didza' uláz queë' Dios en yugu' bönni'
tsahui' gulé'ënnë' ila'lé'enë' le rilé'eli'
lib'í'ili' pero bití' bila'lé'enë' le. Gulé'ënnë'
ila'yönnë' le riyónili' lib'í'ili' pero bití'
bila'yönnë' le.

Riguíxjö'ë Jesús le bucúdzu'ë didza'

(Mr. 4:13-20; Lc. 8:11-15)

¹⁸ Gunné' ca' Jesús:

—Buli'zé ná-gali' ca naca le bucúdzu'a
didza' que bönni' guz. ¹⁹ Núti'tës nu
riyöni didza' ca rinná bë'ë Dios yehua'
yubá, en bití' réajni'i le, raca que didza'
riyöni nu na' ca guca que xisedo' na' gu-
lasi ra' nöza. La' za'të tu' xihui', en rugúa
didza' na' guyú'u icja láchxi'da'ahuë' bönni'
na'. ²⁰ Xisedo' na' gulasi luyú ga rö'ö
guió'j rulu'fi ca raca queë' bönni' riyönnë'
didza' na', en la' ruzëtë ná-guië' lu yöl-la'
rudzeja queë', ²¹ pero ca na' bití' ridía'
xisedo' na' tu' cabí dë ga gun luí, lësca'
caní raca queë' bönni' ni. Cate' idxín tu
le usaca' zi' lë', ate' ila'bía ná-gaca bö-
nachi lë' tu' nazi' lu në'ë didza' na', la'
gácatë chopa láchxë'ë. ²² Xisedo' na' gu-
lasi ga na' bulu'lén lubá yötsi' rulu'fi ca
raca queë' bönni' na' riyönnë' didza' na',
pero ru'fi láchxë'ë yugu' le dë yödzölió
ni, ate' nazi' yë'ë bönni' na', tu' ru'fi
láchxë'ë yugu' yöl-la' tsahui' que. Yugu'
lë ni ta'röli didza' na', en tun ga bití'
gun dxin lu icja láchxi'da'ahuë'. ²³ Xisedo'
na' gulasi luyú bëbu rulu'fi ca raca queë'
bönni' riyönnë' didza' na', en réajni'inë'
le, ate' run dxin didza' na' lu icja láchx-
i'da'ahuë'. Ná-cagaca bal-la bönachi ca

xisedo' na' bulu'nödzej ia'tú gayuá'tèrö ca'. Nácagaca ia'zica'rö bönachi ca xisedo' na' bulu'nödzej ia'tsónnalalaj ca', ate' nácagaca ia'zica'rö bönachi ca xisedo' na' bulu'nödzej ia'chí uruá' ca'.

Tu guíxi'do' cané le nalá' ca rilá' yöla xzoa' xtila

²⁴ Ia'tú le bucúdzu'ë didza' Jesús, ate' rë' légaquië':

—Ca gaca cate idxín ni le rinná bë'ë Dios yehua' yubá naca ca guca que xisedo' dxi'a le guzë' tu bönni' ga naca lu xiyúë'. ²⁵ Tsanni na' tasië' bönni' nacu'ë lidxë', bidxín tu nu biti' rilé'e xan yu'u na' dxi'a, ate' yöjöza lu xiyúë' xisedo' guíxi'do' cané le nalá' ca naca yöla xzoa' xtila, ate' böaj xilataj. ²⁶ Cate' gulén xzoa' xtila na', en guró'ö do que, ga na' dxía xui'i, ní'irö gulaca bë' guíxi'do' cané na'. ²⁷ Ní'irö bila'dxinë' bönni' huen dxin ga zoë' bönni' xan la' yöla na', en të' lë': "Xan, channö guzu' xisedo' dxi'a lu yu quiu', çnacxi guca gula'lén guíxi'do' cané na'?" ²⁸ Xan yu na' gudxë' légaquië', rn-në': "Tu bönni' biti' rilé'enë' neda' dxi'a benë' caní." Ní'irö gula'nábinë' huen dxin queë' lë', ta'nnë': "¿Ba ré'ënu' tséaj-tu' tsöjólajtu' guíxi'do' cané na'?" ²⁹ Xán-gaquië' rë' légaquië': "¡Biti' ca! Nadx ca' cate' iládzu'li' guíxi'do' cané na', iládzu'-lentëli' ca' yöla xzoa' xtila. ³⁰ Gácarö dx-i'a güf'ilí' lataj ila'zxongarö tsözxón cate' idxinrö dza tsöjtúbiru' le, ate' ní'irö guíá' nupa ulu'tubi le: Buli'tubi z'f'aló guíxi'do' cané na', en guli'guga' tsöjxili huéaj para uzégui'ru' le, ate' ní'irö utúbili' xzoa' xtila lu yu'u quia'."

Rucúdzu'ë didza' Jesús ca naca que xisé mostaza

(Mr. 4:30-32; Lc. 13:18-19)

³¹ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá, gaca ca raca que tu xisé

mostaza, le guzë' tu bönni' ga naca lu xiyúë'. ³² Le nácatë xisé mostaza na' ná-catë'rö cuidi' ca yúgu'të xisedo' ia'zica'rö, pero cate' chinadúz, rizxóntë'rö ca yúgu'të guixi' cuan, en rizxón ca naca tu yaga, ate' ta'dxinba' biguínno', en tun-ba' xicá'agacaba' lu ni'a në'e.

Rucúdzu'ë didza' Jesús que cúa zi que yöta xtila

(Lc. 13:20-21)

³³ Ia'tú le bucúdzu'ë didza' Jesús, ate' rë' légaquië':

—Ca gaca ga idxín le rinná bë'ë Dios yehua' yubá gaca ca le run cúa zi que yöta xtila, le buchíxinu tu nigula len tsonna libixi yöjza xzoa' xtila, ate' guyazxa idútë cúa na'.

Le ré'ëni gun le rucúdzu'ë didza' Jesús

(Mr. 4:33-34)

³⁴ Yúgu'të lë ni bucúdzu'ë didza' Jesús, le bé'lenë' bönachi nacua' ni' didza', en biti' bi didza' bé'lenë' légaquië' le cabí bucúdzu'ë didza'. ³⁵ Caní benë' para gaca lë na' buzúajë' lu guichi tu bönni' bë'ë didza' uláz queë' Dios, gunné':

Gu'a didza' yugu' le ucúdzu'a didza'. Innía' yugu' le nagachi' cate' ni' gusí lo si' guta' yödzölió.

Riguíxjö'ë Jesús le bucúdzu'ë didza' que guíxi'do' cané

³⁶ Ní'irö buzenë' Jesús bönachi nacua' ni' didza', en gusól-lë'ë légaquië', ate' guyu'ë yu'u. Ní'irö bila'dxinë' bönni' usëda queë' ga zoë', en të' Lë':

—Gudíxjö'i netu' le ré'ëni inná lë na' bucúdzu'u didza' que guíxi'do' cané le nalá' ca naca yöla xzoa' xtila.

³⁷ Bubi'ë didza' Jesús, ate' rë' légaquië':

—Bönni' razë' xisedo' dxi'a naca' neda', Bönni' Guljë' Bönachi. ³⁸ La' yöla na' naca yödzölió ni, ate' xisedo' dxi'a

na' tu'lu'í ca nácagaca nupa nabábagaca ga rinná bé'ë Dios. Guíxi'do' cané na' le nalá' ca naca yöla zxa' xtila tu'lu'í ca nácagaca nupa néquiquequi que tu' xihui'. ³⁹Nu na' bití' rilé'e dxi'a xan la' yëla na', en yöjza guíxi'do' cané na', tu' xihui' caz naca. Dza ulu'tubë' na' rulu'í ca gaca dza údxi que yödzölió ni, ate' nupa na' tu'tubi nácagaca gubáz lá'ayi queë' Dios. ⁴⁰Ca na' guca, bulu'tubë' guíxi'do' cané na', en bulu'zégui'ë le lu guí, lësca' caní gaca cate' údxi que yödzölió ni. ⁴¹Neda', Bönni' Guljé' Bönachi, isól-la'gaca'-në' gubáz lá'ayi quia', ate' ulu'béajé' ga rinná bé'ë Dios yúgu'të nupa tun ga tun dul-la' luzé'eguequi, enca' nupa tuá' dö'. ⁴²Yugu' gubáz lá'ayi na' ila'gu'ë bönni' tuá' dö' na' lu guí gabila. Ni' ila'bödxë', en ulu'tíl-la láyi'gaquië'. ⁴³Ní'iró ila'yëpi yösa bení' bönachi tsahui', en ilácagaquië' ca gubidza ga ni' rinná bé'ë Dios yehua' yubá. Nu zoa nagui, en riyöni ral-la' uzé' nagui.

Rucúdzu'ë didza' Jesús que tu yöl-la' tsahui' nagachi'

⁴⁴Lësca' caní bucúdzu'ë didza' Jesús, rnnë':

—Le rinná bé'ë Dios yehua' yubá naca ca tu yöl-la' tsahui' nagachi' tu la' yëla. Cate' bidzölinë' tu bönni' le, bucáchë'ë le leyúbölö ga na' bigachi', ate' lu yöl-la' rudzeja queë' guyijé', yöjëti'ë yúgu'të le dë queë' ate' gú'uë' la' yëla na' para gata' yöl-la' tsahui' na' queë'.

Rucúdzu'ë didza' Jesús que tu bugá le nazáca'da'

⁴⁵Gunné' ca' Jesús:

—Ca ral-la' së láchli'li' le rinná bé'ë Dios yehua' yubá naca ca benë' tu bönni' rá'uë', en ruúti'ë, en riguiljé' bugá nazáca'gaca. ⁴⁶Cate' bidzölinë' tu bugá le nazáca'da', guyijé', yöjëti'ë yúgu'të le dë queë', ate' gú'uë' bugá na'.

Rucúdzu'ë didza' Jesús que tu yöxaj böla

⁴⁷Lësca' caní gunné' Jesús:

—Ca gaca ga ridxín le rinná bé'ë Dios yehua' yubá, gaca ca run tu yöxaj böla le ta'chiljé' bönni' lu nísado', le röjxi' zían böla izá'a. ⁴⁸Cate' chibidzá' yöxaj na', bulu'béajé' le luyú bidxi ra' nísado' na', ate' gula'bö'ë ni', en gula'gu'ë-ba' yugu' böla dxi'a tu lu ga'böra, pero gula'rú'unë'-ba' yugu' böla cá'asö. ⁴⁹Lësca' caní gaca cate' údxi que yödzölió ni. Ila'rúajé' gubáz lá'ayi queë' Dios, ate' ulu'béajé' quez yugu' bönachi tsahui', ate' ulu'cuítii' légaquië' ladaj bönachi tuá' dö'.

⁵⁰Ní'iró ila'gu'ë bönachi tuá' dö' na' lu guí gabila. Ni' ila'bödxë', en ulu'tíl-la láyë'ë.

Yöl-la' tsahui' le naca gula, en le naca cubi

⁵¹Ní'iró Jesús gunábinë' yugu' bönni' usëda queë', rnnë':

—¿Ba réajni'ili' yúgu'të lë ni?

Bulu'bi'ë didza', té' Lë':

—Ön, Xan.

⁵²Jesús gudxë' légaquië':

—Cate' tu bönni' yudo' usedi chinazí' lu në'ë le rinná bé'ë Dios yehua' yubá, náquië' ca tu bönni' xan yu'u, rubéajé' ladaj yöl-la' tsahui' queë' le naca cubi, en le naca gula, le nácagaca tsahui' le ruzi'ë xibé.

Le benë' Jesús lu yödzö Nazaret

(Mr. 6:1-6; Lc. 4:16-30)

⁵³Cate' budxi bucúdzu'ë Jesús yugu' didza' ni, buzé'ë ni'. ⁵⁴Cate' budxinë' ladzë', busédinë' bönachi nacua' lu yu'u ga tu'dubë' bönni' judío, en tu'sëdë' queë' Dios, ate' bulu'bábinë', ta'nné':

—¿Gazxi caz guzëdë' bönni' ni yöl-la' réajni'i ni? ¿Nacxi caz naca, runë' yugu' yöl-la' huáca ni? ⁵⁵Náquië' bön-

ni' ni zxf'iné' bönni' gubëdxi yaga, ate' xiné'ë lënu María. Náquié' bóchi'gaquié' Jacobo, en José, en Simón, en Judas. ⁵⁶Lësca' nigula zané' nacua'lennu rë'u ni. ¿Gazxi caz guzëdë' yúgu'të lë ni?

⁵⁷Que lë ni na' gulaca chopa lãdxi'-gaquié', ate' bulu'cá'ané' Lë'. Ní'irö Jesús gudxë' légaquié':

—Yúgu'të bönachi tun bal tu bönni' ru'ë didza' uláz queé' Dios, pero bönachi uláz queé', en bönachi nacua' lidxë' biti' tun lë' bal.

⁵⁸Que lë ni na' biti' bené' Jesús zían yöl-la' huáca ni', tu' cabí ta'yéajlë'ë Lë'.

**Ca bëtgaquié' Juan, bönni'
buquilë' bönachi nisa**

(Mr. 6:14-29; Lc. 9:7-9)

14 Lu dza ni', biyönnë' Herodes, bönni' rinná bë'ë luyú Galilea, ca náacagaca yugu' yöl-la' huáca runé' Jesús. ²Herodes na' gudxë' yugu' ni'a në'ë, rnnë':

—Bönni' na' Juan, bönni' buquilë' bönachi nisa. Chibubanë' lu yöl-la' guti. Que lë ni na' dë lu në'ë yöl-la' huáca zön na'.

³Caní gunné' Herodes tu' gusól-lë'ë lë cazë' bönni' gula'zönë' Juan, en gulúgu'i'ë lë' du gufë, ate' gula'gu'ë lë' lidxi gufë tu' gú'uninu Herodías ilunë' caní. Herodías na' gúcanu nigula queé' Felipe, bóchë'ë Herodes na'. ⁴Caní bené' Herodes, tu' gudxë' Juan na' lë': "Biti' ralla' sóalenu'-nu."

⁵Que lë ni na' gú'unnë' Herodes gútié' Juan, pero gúdxinë' ila'dá'baga' bönachi lu yödzö ni' lë', tu' téquiguequi bönachi náquié' Juan na' tu bönni' ru'ë didza' uláz queé' Dios. ⁶Ní'irö cate' guca laní que dza guyé'ené' iz Herodes, birúajbi' bi'i nigula queénu Herodías na', en buyá'abi' lógaca nupa nacua' laní na', ate' guyaza lãdxë'ë Herodes le benbi'. ⁷Guzxi' lu në'ë Herodes, en bené' tsutsu xtídzë'ë unödzjé' queébi' bíti'tës

bi inábibi' lë'. ⁸Tu' chibusédinu-bi' zí'alö xiná'abi', gúdxibi' lë':

—Benna quia' na'a icjé' Juan, bönni' buquilë' bönachi nisa. Gulú'u le tu lu zxiga' zxön.

⁹Ní'irö bu'innë' Herodes, pero tu' chibené' tsutsu xtídzë'ë, en tu' bila'yöni nupa te'aj tãgulen lë', que lë ni na' gunná bë'ené' nu tsöjnödzaj icjé' Juan na' queébi'. ¹⁰Caní guca, gusól-lë'ë nu tsöjrxí yené' Juan ga ni' yu'ë lidxi gufë. ¹¹Bönni' na' nasól-lë'ë bu'ë icjé' Juan na', zxoá lu zxiga' zxön, ate' bunödzjé' le queébi' bi'i nigula na', ate' lëbi' buá'abi' le queénu xiná'abi'.

¹²Ní'irö bila'dxinë' bönni' gula'dé'ë Juan na', ate' bulu'ú'ë lë', en bulu'cáché'ë lë'. Gudödi ni', yöjtíxjöi'iguequiné' Jesús ca gulaca lë ni.

**Jesús rugahué' zíanrö ca
chi-un gayuá' bönachi**

(Mr. 6:30-44; Lc. 9:10-17; Jn. 6:1-14)

¹³Cate' réquibe'ené' Jesús lë ni, buzé'ë ni', ate' gurené' tu lë'e bárcodo', en sa'yéajé' la' queézé' tu lataj cá'asö. Cate' bila'yöni bönachi zéajé' ni', bila'rúaj yugu' yödzö ni', en yöjaca ga ni' idxiné' Jesús, ta'z'e n'áaguequi. ¹⁴Cate' burúajjé' Jesús lë'e barco, bilé'ené' nacua' bönachi zían ni', ate' buéchi' lãdxë'ë léguequi, en buné' nupa te'e, nútsa'gaca lãdjaguequi. ¹⁵Cate' chiridzó' dza na', bila'dxinë' yugu' bönni' usëda queé' Jesús ga zoë', en tē' Lë':

—Chiridzó' na'a, ate' cá'asö naca lataj ni. Busól-la' bönachi ni para tsöjaca gapa dë yödzödo' para gá'ugaca bi ilagu.

¹⁶Ní'irö Jesús gudxë' légaquié':

—Biti' run bayudxi tsójáquié'. Buli'nödzaj libí'ili' le ilahué'.

¹⁷Ní'irö tē' Lë':

—Gáyu'sö yöta xtila dë, en chópasöba' böla dëba' queétu' ni.

¹⁸Jesús rë' légaquié':

—Buli'dödi le lu na'a.

¹⁹ Ní'irö Jesús gunná bé'enë' bönachi na' ila'bó' ga yu'u daca'. Gudödi na' gudélë'ë gayu' yöta xtila na', en chó-paba' böla na', ate' guchisa lahuë', ruyüë' zaca' yehua' yubá. Gudxë' Dios: "Xclenu'." Ní'irö buzxuzxjë' yöta xtila na', en budödë' le lu ná'agaquië' bön-ni' usëda queë', ate' légaquië' gula'guísië' le lógaca bönachi zían na'. ²⁰ Gulahuë' yúgu'tégaquië', en bulu'huóljanë'. Ní'irö bulu'tubë' yugu' bizxaj nagá'anagaca, en bulu'líë' chinnu ga'böra. ²¹ Bönni' ni' gulahuë' guláquië' idú chi-un gáyu'ë, pero cuntú nu bulaba yugu' nigula, en bí'ido'.

Jesús rizë'e ni'ë lu nísado'

(Mr. 6:45-52; Jn. 6:16-21)

²² Ní'irö la' bentë' Jesús ga gula'benë' bönni' usëda queë' lë'e bárcodo', en tsójáquië', ila'nóruë' lahuë' Lë', para ila'dödë' ia'tsölá'a nísado' ni', tsanni na' uzenë' Lë' bönachi nacua' ni' didza'. ²³ Cate' chibusól-lë'ë Jesús bönachi na', gurenë' tu lu gu'ado' ga ni' yöjsóë' tuzë'. Ni' bulidzë' Dios. Cate' chigul-la, tuzë' zoë' ni'. ²⁴ Bárcodo' ga na' nacué' bönni' usëda queë' ridödi gatsaj láhui'lö nísado' na', ate' riyasa bárcodo' na' tu' riyasa ridxía nísado' na', ate' ruzaga' bö' recja barco na'. ²⁵ Gudödi guluhuëla, gubígui'ë Jesús gala' ga na' nacué', rizë'e ni'ë lu nísado'. ²⁶ Cate' yugu' bönni' usëda queë' bila'lë'enë' Lë', rizë'e ni'ë lu nísado', gula'bó'dë'ë böniga tu' tádxinë'. Gula'bó'dxi'ë, ta'nnë':

—Tu' ridasö na'.

²⁷ Ní'irö Jesús la' bulidztë' légaquië', rnnë':

—Buli'zxoní ládxi'li'. Neda' ni. Biti' gádxili'.

²⁸ Ní'irö bubí'ë didza' Pedro, rë' Jesús: —Xan, channö nacué' Li', gunná be'ë neda' guída' ga na' zu' lu nisa.

²⁹ Jesús gudxë' lë':

—Gudá.

Ní'irö bötjë' Pedro lë'e bárcodo' na', en guzë'e ni'ë lu nísado', sa'yéajë' ga na' zoë' Jesús. ³⁰ Ní'irö cate' bilé'enë' Pedro ca bö' na' recja rutá nisa, gúdxinë'. Ní'irö gusí lahuë' rötjë' lu nisa, ate' guró'dxi'ë. Bulidzë' Jesús, rnnë':

—Xan, busölá neda'.

³¹ Jesús la' bulitë në'ë. Buguélë'ë lë', en rë' lë':

—Látí'sö réajlë'u neda'. ¿Bizx que guca chopa ládxi'u?

³² Cate' bulu'benë' lë'e bárcodo' na', guró'ö dxi bö' na' recja. ³³ Ní'irö bönni' nacué' lë'e bárcodo' na' gula'yéaj ládxi'-gaquië' Jesús, ta'nnë':

—Le nácatë, Zxf'inë' Dios nacué'.

Jesús ruúnë' yugu' bönni' huë' nacué' yödzo Genesaret

(Mr. 6:53-56)

³⁴ Cate' chigula'dödë' ia'tsölá'a nísado' na', la' bila'dxintë' lu xiyú yödzo Genesaret. ³⁵ Cate' bulu'únbë'ë bönni' yödzo ni' Jesús, gula'sól-lë'ë didza' idütë luyú ni', ate' dujuá'gaquië' yúgu'të nupa te'e ga na' zoë' Jesús. ³⁶ Guláta'yue' lahuë' Jesús gu'ë légaquië' lataj ila'gan-së' ru'í lari' nácuë', ate' la' bulu'huócatë yúgu'të nupa na' bila'gán lari' na'.

Le tun ga bití' nácaru' tsahui' lahuë' Dios

(Mr. 7:1-23)

15 Ní'irö yugu' bönni' yudo' fariseo, en bönni' yudo' tu'sédinë', narúa-jgaquië' Jerusalén, bila'dxinë' ga zoë' Jesús, ate' të' Lë':

² —¿Bizx que tunë' bönni' usëda quiu' le ridödi bë' ca naca le nulaga loru' runru' ca gulunë' xuz xtó'oru'? Biti' ta'guíbi në'ë ca naca que yudo' cate' si' ilahuë'.

³ Bubi'ë didza' Jesús, en gunábinë' légaquië', rnnë':

—¿Bizx que libí'ili' ca' rucá'anali' cá'asö xibá queë' Dios para gunli' le nulaga loli' runli'? ⁴ Caní' raca, tu' gunná

bé'enë Dios libí'ili', gunné': "Ben bal xuz xino'o", en gunné' ca': "Nu inné zi' que xuz xinë'e, tsaz gati nu na'." ⁵ Pero libí'ili' rnnali': "Channö nu gufé xuz xinë'e: Biti' bi gaca gunna' quiu' tu' chiguzxi' lu na'a gunna' yúgu'të queë' Dios, ⁶ bíti'rö bi run bayudxi gun nu na' que xuz xinë'e." Caní runli', rucá'anali' cá'asö le gunná bë'ë Dios, para gunli' le nulaga loli' runli'. ⁷ Libí'ili', bönni' rulu'isö tsahui' cuinli', idú ca nácali' gudíxj'ö'ë Isafas, bönni' bë'ë didza' uláz queë' Dios, gunné':

⁸ Bönni' ni, len rú'agacsë' tunë' neda' bal, en calëga idú ládxi'gaquië'.

⁹ Nítisö naca le ta'yéaj ládxi'gaquië' neda', tu' tu'sédinë' yugu' le gula'nná bë' bönachi.

¹⁰ Ní'irö bulidzë' Jesús bönachi nacua' ni', en rë' léguequi:

—Buli'zé nágali' le guía' libí'ili', en guli'tséajni'i. ¹¹ Calëga le riyaza ru'ë nu bönni' run ga biti' náquië' tsahui' lahuë' Dios, pero le rirúaj ru'ë, lë ni run ga biti' náquië' tsahui' lahuë' Dios.

¹² Ní'irö yugu' bönni' usëda queë' Jesús gula'bígui'ë ga zoë', en të' Lë':

—¿Naru' nóztsenu' gula'lenë' yugu' bönni' yudo' fariseo cate' bila'yönnë' didza' ni bë'u?

¹³ Ní'irö bubí'ë didza' Jesús, en rë' légaquië':

—Yúgu'të le nadúz, le cabí guzë' Xuza' zoë' yehua' yubá, huadúl'jagaca idú luí.

¹⁴ Buli'cá'ana légaquië'. Chinachúl-la lógaquië', en ta'ché'ë nupa nachul-la lógaca. Channö tu bönni' lo chul-la iché'ë ia'túë' bönni' lo chul-la, iropë' ila'bixë' tu lu yeru.

¹⁵ Ní'irö bubí'ë didza' Pedro, en rë' Jesús:

—Buzéajni'i netu' lë ni rucúdz'u didza'.

¹⁶ Jesús rë' légaquië':

—¿Naru' cabí réajni'itseli' ca' libí'ili'?

¹⁷ ¿Naru' cabí réajni'itseli' riyaza lé'ëru?

yúgu'të le riyaza ruá'aru', ate' rurúaj lé'ëru'? ¹⁸ Na'a, le rirúaj rúa'ali', lu icja ládxi'do'oli' za', ate' lë ni run ga biti' nácali' tsahui' lahuë' Dios. ¹⁹ Caní raza, tu' ta'lén lu icja ládxi'do'oli' yugu' le rizá ládxi'li' le ruá' dö', le ilún ga gútili' bönachi, en le ilún ga quítjsjali' xibá que yöl-la' nutsaga na', en le ruá' dö' runli', en yugu' le rizé ládxi'li' cuanli', en yugu' le rinnëli' que luzá'ali' le cabí nocate, en yugu' le rinné xíhui'li'. ²⁰ Yugu' le caní tun ga biti' náquië' tu bönni' tsahui' lahuë' Dios, pero channö cabí nayari në'ë ca naca que yudo' cate' bi gahuë', biti' gun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mr. 7:24-30)

²¹ Ní'irö buzé'ë Jesús ni', en guyéajë' lu xiyú yödzo Tiro, en yödzo Sidón. ²² Tu nigula nabábanu luyú Canaán birúajnu yödzo ni', ate' bé'ënu zidzaj didza', rënu Jesús:

—Xan, zxi'ini xi'sóë' David, buéchi' ladxí' neda'. Bi'i nigúlado' quia' riguí'i rizáca'da'abi' tu' yu'u bö' xihui' lëbi'.

²³ Biti' bi didza' bubí'ë Jesús. Ní'irö gula'bígui'ë bönni' usëda queë' ga zoë', ate' gulé' Lë', ta'nnë':

—Busól-la'-nu, tu' zá'anu cúdzuru' ribódxi'anu.

²⁴ Ní'irö bubí'ë didza' Jesús, ate' rë'ënu:

—Dios nasól-lë'ë neda' gácalena' bönachi Israel, nupa nácgaca ca bö'cu' zxi'la'do' nanítigacaba'.

²⁵ Ní'irö gubíga'nu nigula na' ga zoë' Jesús, en guyéaj ládxi'nu Lë', ate' rënu Lë':

—Xan, gúcalen neda'.

²⁶ Bubi'ë didza' Jesús, rnnë':

—Biti' naca dxi'a ugúaru' yöta quéga-cabi' bí'ido', en chú'unaru' le lógacaba' bó'cu'do'.

²⁷ Ní'irö nigula na' rënu Jesús, rnnanu:

—Ön, Xan, pero táguba' bó'cu'do' na' le bizxaj tu'huóxaj ga tagu xángacaba'.

²⁸ Ní'irö bubí'ë didza' Jesús, rnnë':

—Nigúlado'. Idú naca ca réajlë'u neda'. Gaca quiu' ca ré'ënnu'.

La' ní'sö böácatebí' bí'i nigúlado' queénu.

Jesús ruúnë' zían nupa te'e

²⁹ Ní'irö buzé'ë Jesús ni', en gudödë' ga naca ra' nísado' que Galilea. Gurenë' tu lu gu'ado', ate' gurö'ë ni'. ³⁰ Bönachi zían dujuá'gaquië' nupa bití' guca ila'zá', en nupa nachul-la guíój lógaca, en nupa bití' guca ila'nnë', en nupa narugu ni'a né'eguequi, en ia'zica'rö zían nupa te'e, ate' gula'guíxaj léguequi xini'ë Jesús, ate' Lë' bunë' léguequi. ³¹ Bulu'bani bönachi ni' ca naca le benë' Jesús, tu' bila'lé'e tu'nnë nupa bití' guca ila'nnë', ate' nuhuóacagaca nupa gurugu ni'a né'eguequi, ate' tu'zá' nupa bití' guca ila'zá', ate' tu'lé'e nupa guchul-la lógaca. Que lë ni na' gula'gu'ë yöl-la' ba Dios quégaca bönachi Israel.

Jesús rugahuë' zíanrö ca choá' gayuá' bönachi

(Mr. 8:1-10)

³² Ní'irö Jesús bulidzë' yugu' bönni' usëda queë', en ré' légaquië':

—Ruhuechi' ládxa'a bönachi zían ni, tu' chiguca tsonna dza zá'lenguequi neda', en bití' bi dë le ilagu. Bití' ré'ënda' usól-la'gaca-në' tsöjhuóajgaquië' lídxi-gaquië' ta'dunsë' ca', nadxi ca' udú ládxi-gaquië' la' nöza.

³³ Ní'irö yugu' bönni' usëda queë' të' Lë', ta'nnë':

—¿Gazxi caz idzólitu' yöta xtila zían lu lataj cá'asö ni, le ugágutu' bönachi zían ni?

³⁴ Gunábinë' Jesús légaquië', rnnë':

—¿Bal-laxi yöta xtila dë queéli'?

Bulu'bi'ë didza', ta'nnë':

—Gadxi, ate' nabábasöba' böla cuidi' dëba' queé'tu' ni.

³⁵ Ní'irö Jesús gunná bé'enë' bönachi zían na' ila'bó' lu yu. ³⁶ Gudélë'ë gadxi yöta xtila na', en yugu' böla na', ate' gudxë' Dios: "Xclenu'." Ní'irö buzxuzxjë' iroptë na', en bunödzejë' quégaquië' bönni' usëda queë', ate' légaquië' gula'guísië' le lógaca bönachi zían na'. ³⁷ Gulahuë' yúgu'të', en bulu'huóljanë'. Gudödi ni' bulu'tubë' le bizxaj nagá'anagaca, ate' bulu'líë' gadxi ga'böra. ³⁸ Yugu' bönni' na' gulahuë' nácagaquië' choá' gáyu'ë, pero cuntu nu bulaba yugu' nigula, en bí'ido'. ³⁹ Ní'irö busöl-lë'ë Jesús bönachi na' tsöjhuóajgaquië' lídxi-gaquië', ate' gurenë' lë'e bárcodo' ni', en sa'yéaj-jë' lu xiyú yödzö Magdala.

Ta'nábinë' Jesús gunë' tu le gaca bë' nuzxi náquië'

(Mr. 8:11-13; Lc. 12:54-56)

16 Ní'irö yugu' bönni' yudo' fariseo len yugu' bönni' yudo' saduceo bila'dxinë' ga zoë' Jesús para ila'zí' bë'ë Lë', ate' gula'nábinë' Lë' gunë' tu le gaca bë' ga za' yöl-la' unná bë' queë'. ² Bubi'ë didza' Jesús, en ré' légaquië':

—Cate' ridzö', rnnali' caní: "Gun dxi'a cuxó, tu' rö'ö böaj xiná lúzxiba." ³ Cate' naca zílado', rnnali' caní: "Bití' gun dxi'a na'a dza tu' rö'ö böaj xiná, en ruchul-la lúzxiba." Libí'ili', bönni' rulu'isö tsahui' cuinli'. Raca innë' ya'ali' naca gun lúzxiba, pero bití' gaca tséajni'ili' le tu'sedi le taca dza ni zóaru' na'a. ⁴ Yugu' bönachi tuá' dö' ni, en bití' zoa idú ládxi'gaca ta'nábini neda' guna' tu le gaca bë' Nu naca', pero bití' bi le gaca bë' ila'lé'enë'. Ila'lé'esinë' lë na' guca bë' ca guca queë' Jonás, bönni' bë'ë didza' uláz queë' Dios.

Ní'irö Jesús bucá'anë' légaquië', söhuójë'.

**Le tu'sédinē' bönni' yudo'
naca ca cúa zi que yöta xtila**

(Mr. 8:14-21)

⁵ Cate' bila'dxinē' ia'tsólá'a nísado' ni', guléquibe'enē' bönni' usēda queē' Jesús gulál-la ládxi'gaquiē' ilu'è le ilahuē'.

⁶ Ní'irō Jesús gudxē' légaquiē':

—Buli'yútsöca'. Guli'gún chi'i cuinli' que le naca ca cúa zi que yöta xtila quégaquiē' bönni' yudo' fariseo, en quégaquiē' bönni' yudo' saduceo.

⁷ Ní'irō la' légacasē' gulún xtídza'-gaquiē' bönni' usēda queē', ta'nné':

—Rnnē' caní tu' cabí nuá'aru' yöta xtila.

⁸ Réquibe'enē' Jesús lē ni, ate' rē' légaquiē':

—¿Bixz que run xtídza'li' la' libí'isili' tu' cabí nuá'ali' yöta xtila? Láti'do'os réajlē'ēli' neda'. ⁹ ¿Naru' cabí réajni'it-seli', en biti' röjnétseli' ca guca quégaca gayu' yöta xtila ni', lē na' gulahuē' chi-un gáyú'ē bönni', ate' tscá xö ga'böra butúbili'? ¹⁰ ¿Naru' cabí röjnétseli' ca' ca guca quégaca gadxi yöta xtila ni', lē na' gulahuē' choá' gáyú'ē bönni', ate' tscá xö ga'böra butúbili'? ¹¹ ¿Naru' cabí réajni'ili'? Biti' bē'a didza' que yöta xtila cate' gudxa' libí'ili' gun chi'i cuinli' que le naca ca cúa zi que yöta xtila quégaquiē' bönni' yudo' fariseo, en quégaquiē' bönni' yudo' saduceo.

¹² Ní'irō gula'yéajni'inē' biti' gudxē' Jesús légaquiē' ilún chi'i cúingaquiē' que cúa zi que yöta xtila, pero ral-la' ilún chi'i cúingaquiē' que le tu'sédinē' yugu' bönni' yudo' fariseo, en yugu' bönni' yudo' saduceo.

Pedro rnnē' Jesús náquiē' Cristo

(Mr. 8:27-30; Lc. 9:18-21)

¹³ Cate' bidxinē' Jesús lu xiyú yödzö Cesarea, ga na' rinná bē'ē Filipo, gunábinē' yugu' bönni' usēda queē', rnnē':

—¿Bizxi ta'nná bönachi nu naca' neda', Bönni' Guljē' Bönachi?

¹⁴ Bulu'bi'ē didza', ta'nné':

—Bal-lē' ta'nné': "Juan nacu', bönni' ni' buquilé' bönachi nisa." Ia'zica'rē' ta'nné': "Elías nacu', bönni' ni' bē'ē didza' uláz queē' Dios dza ni'te." Ia'zica'rē' ta'nné': "Jeremías nacu', o ia'tú'ē bönni' bē'ē didza' uláz queē' Dios."

¹⁵ Ní'irō Jesús gudxē' légaquiē':

—Naru' libí'ili', ¿nuzxi rnnali' naca' neda'?

¹⁶ Bubi'ē didza' Simón Pedro, en rē' Lē':

—Li' nacu' Cristo, Zxf'inē' Dios ban.

¹⁷ Bubi'ē didza' Jesús, rē' lē':

—Bica' xibó' li', Simón, zxf'inē' Jonás, tu' cabí buluf'inē' nu bönni' li' lē ni. Xuza' zoē' yehua' yubá buluf'inē' li' lē ni. ¹⁸ Neda' rea' li', li' nacu' Pedro, ate' lu guió'j ni ucuá'a nupa ulu'dubi quia', ate' yöl-la' unná bē' que tu' xihui' biti' sequi' uzaga' xinó'zgaquiē'. ¹⁹ Gunna' quiu' yugu' zxf'ini gufé que lataj ga rinná bē' Nu zoa yehua' yubá. Le inná bē'u luyú ni, chigunná bē' ca' Nu na' zoa yehua' yubá, ate' le gu'u lataj gaca luyú ni, chibé' lataj gaca lē na' Nu na' zoa yehua' yubá ni'.

²⁰ Ní'irō Jesús gunná bē'enē' yugu' bönni' usēda queē' cuntu nu ilé'ē náquiē' Lē' Cristo.

Jesús riguíxjö'ē ca si' ilútiē' Lē'

(Mr. 8:31-9:1; Lc. 9:22-27)

²¹ La' dza nf'isö gusí lahuē' Jesús riguíxjöi'inē' yugu' bönni' usēda queē' run bayudxi tsejē' Jerusalén, ga ni' yugu' bixúz unná bē' en bönni' gula tu'zéajni'inē', en bönni' yudo' tu'sédinē' ulu'saca' zi'ē Lē', ate' nf'irō ilútiē' Lē', pero cate' gaca tsonna dza ubanē' lu yöl-la' guti. ²² Ní'irō Pedro guché'ē Jesús quez, en gusí lahuē' ridil-lē' Lē' didza', rnnē':

—Xan, biti' gu'ē Dios lataj. Biti' ca' gaca quiu' ca rnnó'.

²³ Ní'irō buécjē' Jesús, en rē' Pedro:

—Gucuita ga zoa'. Runu' ca run Satanás, tu' xihui'. Runu' ga gaca chopa lādxa'a tu' cabí naca le rizá' lādXu'u lí' ca rizá' lādXē'ē Dios, pero ca ta'za'sō lādxi'-gaca bōnachi.

²⁴ Ní'irō Jesús gudXē' yugu' bōnni' usēda queē', rnnē':

—Channō zoē' tu bōnni' ré'ēnē' tē'ē neda', ral-la' uzóē' tsólá'alō yugu' le ré'ēni quézínē', en gáquiē' ca tu bōnni' sa'yéajē' zeajtē'ē lē'e yaga cruz, ate' ní'irō gaca tē'ē neda'. ²⁵ Nu bōnni' gué'ēnnē' gun chí'ē yōl-la' na'bán queē', unítie' le, pero bōnni' unítie' yōl-la' na'bán queē' tu' dē'ē neda', gata' yōl-la' na'bán idú queē'. ²⁶ ¿Naru' uzi'tsē' xibé tu bōnni' channō utubē' yúgu'tē le dē yōdzólió ni pero unítie' yōl-la' na'bán idú queē'? Biti' bí gaca unōdzjē' tu bōnni' para gata' yōl-la' na'bán idú queē'. ²⁷ Caní rnnía', tu' huōda' neda', Bōnni' Guljē' Bōnachi, en idzaga yōl-la' unná bē' queē' Xuza' Dios neda', ate' idzágagaquiē' gubáz lá'ayi quia' neda'. Ní'irō ubi'a que queē' bōnachi tsa naca le núngaca. ²⁸ Le nácatē rea' lib'íli': "Biti' ca' ilátigaca bal-la nupa nacuá' ni cate' ila'lé'erō idinná bē'a neda', Bōnni' Guljē' Bōnachi."

Ridzá' ca nalá' lahuē' Jesús

(Mr. 9:2-13; Lc. 9:28-36)

17 Gudōdi xopa dza, Jesús gudélē'ē Pedro len Jacobo, en Juan, bóchē'ē Jacobo na', en guchē'ē légaquiē', ate' yójáquiē' quez tu lu guí'a sibi. ² Ní' bidzá' ca nalá' lahuē' Jesús lógaquiē'. Guyēpi yōsa bení' lahuē' Jesús ca ruzení' gubidza, ate' lari' nácuē' bōáca chiguíchido'os ca bení'. ³ Ní'irō bila'lé'enē' bōnni' usēda queē' bulufi' lógaquiē' Moisés, en Elías, ate' tu'ílenē' Jesús didza'. ⁴ Ní'irō Pedro rē' Jesús:

—Xan, naca dxi'a zóaru' ni. Channō ré'ēnu', guna' ni tsonna yu'u lága'do', tu

quiú', ia'tú queē' Moisés, en ia'tú queē' Elías.

⁵ Tsanni ni' ru'ē Pedro didza' ni, la' guró'ótē tu bōaj bení' le guzxóa légaquiē', ate' lu bōaj na' biyón chí'i nu rnaa:

—Bōnni' ni Zxí'ini caza'. Nādxí'ida'nē', en raza lādxa'a Lē'. Buli'zē' nágali' didza' gu'ē.

⁶ Cate' bila'yōnnē' bōnni' usēda queē' chí'i na', gula'dzō'ē gusurú'alō, en guladxi bila'dzōbinē'. ⁷ Ní'irō gubígui'ē Jesús ga na' nacu'ē, ate' gudanē' légaquiē', rnnē':

—Gulí'chasa. Biti' gádxili'.

⁸ Cate' gula'chisa lógaquiē', en bulu'yúé', cúnturō nu bila'lé'enē', pero tuzē' Jesús.

⁹ Cate' ni' tu'dínniē' lu guí'a na', Jesús gunná bē'enē' légaquiē', rnnē':

—Cuntu nu guíeli' ca guca lē ni bilé'eli' cate' ubanra' lu yōl-la' guti neda', Bōnni' Guljē' Bōnachi.

¹⁰ Ní'irō yugu' bōnni' usēda queē' gula'nábinē' Lē', ta'nnē':

—¿Bixz que ta'nnē' bōnni' yudo' usēdi run bayudxi ulufi' lahuē' Elías zí'alō ca ulufi' lahuē' Cristo?

¹¹ Bubi'ē didza' Jesús, rē' légaquiē':

—Le nácatē ulufi' lo cazē' zí'alō Elías, en ucá'anē' tsahui' yúgu'tē. ¹² Neda' rea' lib'íli': "Chibulufi' lahuē' Elías na', pero biti' bulu'únbē'ē lē', ate' yúgu'tē ca rnasō quégaquiē' gulunē' queē'." Lē'sca' caní ilunē' quia' neda', Bōnni' Guljē' Bōnachi, ulu'saca' zī'ē neda'.

¹³ Ní'irō gula'yéajni'inē' bōnni' usēda queē', bē'lenē' Jesús légaquiē' didza' ca guca queē' Juan, bōnni' na' buquilē' bōnachi nisa.

Ruúnē'-bi' Jesús tubi' bí'i bōnni' ré'ebi' xjote'

(Mr. 9:14-29; Lc. 9:37-43)

¹⁴ Cate' bila'dxinē' ga na' nacuá' bōnachi zían, gubígui'ē tu bōnni' ga zoē'

Jesús, ate' buzóa zxibë' lahuë' Lë', ¹⁵ en rë' Lë':

—Xan, buéchi' ladxi'-bi' bi'i bónni'do' quia', tu' ré'ebi' xjote', en riguí' rizáca'-da'abi', ate' zían luzuí' ridzó'öbi' lu gu' o lu nisa. ¹⁶ Chidiguá'a-bi' lógaquie' bónni' usëda quiu' pero biti' guca ulu'ünë'-bi'.

¹⁷ Ní'irö' didza' Jesús, rnnë':

—Libi'ili', bönachi cabí réajlë'ëli', en biti' nácali' tsahui'. ¿Gáca'xte caz ralla' sóalena' libí'ili' para tséajlë'ëli' neda'? ¿Gáca'xte caz ral-la' guá' ilena' queéli'? Gulí'diguá'-bi' quia' ni.

¹⁸ Ní'irö' Jesús buzenë' le bach bö' xihui' na' yu'u lëbi', ate' la' burúajtë lëbi', ate' la' ná'asö böacatébi' bi'i bónni'do' na'.

¹⁹ Ní'irö', yugu' bónni' usëda queë' Jesús gula'biguë'ë quez ga zoë', ate' gula'nábinë' Lë', ta'nnë':

—¿Bíxz que na' biti' guca ubéajtu' netu' bö' xihui' na'?

²⁰ Jesús rë' légaquie':

—Biti' guzxéqui'li' tu' cabí réajlë'ëli' Dios idú ládxi'li'. Le nácatë rea' libí'ili', sal-la' cuídísö naca yöl-la' réajlë' queéli' Dios, nácatë ca tu xisedo' mostaza, huáca guiéili' gu'ado' ni: “Gucuíta ni, en yöjsóa ní'ilo”, ate' la' icuítatë gu'ado' na'. Biti' bi' zoa le cabí gaca gunli' channö réajlë'ëli' Dios idú ládxi'li'. ²¹ Tu bö' xihui' caní gácasö ubéajli' channö ulídzali'-në' Dios, en gunli' gubasa.

Riguíxjö'ë Jesús leyúbölö ca si' ilútië' Lë'

(Mr. 9:30-32; Lc. 9:43-45)

²² Tsanni ni' ta'dé' luyú Galilea, Jesús gudxë' yugu' bónni' usëda queë', rnnë':

—Zoa nu udödi neda', Bónni' Guljë' Bönachi, lu ná'agaca bönachi. ²³ Ilútië' neda', pero cate' gaca tsonna dza Dios usubanë' neda'.

Ní'irö' bulu'hu'innë' bónni' usëda queë'.

Jesús riguíxjaj lazë' que yudo'

²⁴ Cate' bulu'dxinë' Jesús, en yugu' bónni' usëda queë' lu yödzö Capernaum, bila'dxinë' yugu' bónni' tu'quixxjë' bönachi lázagaca que yudo' ga zoë' Pedro, ate' të' lë':

—¿Naru' cabí quixxaj lazë' que yudo' bónni' rusédinë' libí'ili'?

²⁵ Bubi'ë didza' Pedro, rnnë':

—Ön, huaguixxjë'.

Cate' buázië' Pedro lu yu'u, Jesús la' bulidztë' lë', en rë' lë':

—¿Nacxi rusaca' quiu', Simón? Bónni' ta'nná bë'ë luyú ni, ¿nupxi tu'quixxjë' le riguíxjaj laz, en laxxaj que yu? ¿Naru' tu'quixxjë' bönachi uládz quegaquie' o bönachi izá'a?

²⁶ Bubi'ë didza' Pedro, rë' Lë':

—Bönachi izá'a tu'quixxjë'.

Ní'irö' Jesús rë' lë':

—Que lë ni na', biti' run bayudxi quixxaj laza' que yudo' tu' naca' Zxí'inë' Dios ca na' biti' bi' ta'guíxjaj nupa náca-gaca bönachi uládz queë' bónni' na' ruquixxjë'. ²⁷ Na'a, para cuntú nu gun leri', guyéaj ra' nísado', yöjzala' lu nisa le rizóninu'-ba' böla, ate' böla cueju'-ba' zí'alö, guzxí'i-ba'. Cate' isalju' ruá'aba', ni' idzölinu' tu' dumí lásido'. Guzxí'i le, ate' gudizxaj laza', en lazu'.

¿Núzxilö gaca lo?

(Mr. 9:33-37; Lc. 9:46-48)

18 La' dza ní'sö bila'dxinë' bónni' usëda queë' Jesús ga zoë', ate' gula'nábinë' Lë', ta'nnë':

—¿Núzxilë' bónni' ni gáquie' lo ga rinná bë'ë Dios yehua' yubá?

² Bulidzë'-bi' Jesús tubi' bi'i bónni'-do', ate' buzóë'-bi' gatsaj láhui'lö ga na' nacu'ë. ³ Ní'irö' rë' légaquie':

—Le nácatë rea' libí'ili', channö cabí huóacali' ca zeaj nácabí' bí'ido', biti' ca' tsú'uli' ga ni' rinná bë'ë Dios yehua' yubá. ⁴ Que lë ni na', nútí'tës nu gaca

nöxaj ladxi', en huóaca ca nácabi' b'ído' ni, nu ni gaca lo ga ni' rinná bē'ē Dios yehua' yubá. ⁵Núti'tēs nu gun bal tubi' b'ído' caní tu' néquibi' quia', neda' caz gun bal.

Le tun ga nu gun dul-la'

(Mr. 9:42-48; Lc. 17:1-2)

⁶Gunné' ca' Jesús:

—Nu gun ga gunbi' dul-la' tubi' b'ído' caní réajlē'ēbi' quia', gácarō dxi'a queē' bōnni' na' la'tu' ugalē'ē guiój riyétuni yaga yenē', ate' tsōjsuladzú cuinē' lu nísado'. ⁷Bica' bayechi' bōnachi yōdzōlió ni tun ga gun dul-la' luzé'eguequi. Nacuá'tica'sō le tun ga nu gun dul-la', pero bica' bayechi' nu run ga nu gun dul-la'.

⁸'Que lē ni na', channō gun no'o o ni'u ga gunu' dul-la', guchugu le, en gurú'una le. Gácarō dxi'a quiu' tsōjtsáziu' ga su' ibanu' biti' rizó'o o narugu ni'a no'o, en calēga nacua' chopa no'o, en chopa ni'u ate' tsōjtsáziu' lu gu' gabila le catu caz ulu. ⁹Channō gun guiój lo' ga gunu' dul-la', guléaj le, en gurú'una le. Gácarō dxi'a quiu' tsōjtsáziu' ga su' ibanu', zoa tuz guiój lo', en calēga nacua' chopa guiój lo', ate' tsōjtsáziu' lu gu' gabila.

Jesús rucúdzu'ē didza' que tu bö'cu' zxíla' nanítiba'

(Lc. 15:3-7)

¹⁰Gunné' ca' Jesús:

—Guli'gún chi'i cuinli' para cabi' uzóali'-bi' tsólá'alō tubi' b'ído' caní. Neda' rea' libí'ili', gubáz lá'ayi tapa chi'ē légacabi' nacua'tica'sē' lahuē' Xuza' zoē' yehua' yubá. ¹¹Bida' ni neda', Bōnni' Guljē' Bōnachi, para usólá' nu ni naniti.

¹²'¿Nacxi rusáca'li' queé'li'? Tu bōnni', nacua'aba' tu gayuá' bö'cu' zxi-la' queē', channō nítiba' tuba', ¿naru' cabi' ucá'anē'-ba' tápalalaj yu' chénnaba' na', ate' tsejē' gapa naca lu gu'a, para tsōjtiljē'-ba' bö'cu' zxíla'do' na' nanítiba'?

¹³Channō udzōlinē'-ba', le nácate' rea' libí'ili', udzéjarōnē' ni'a queé'ba' bö'cu' zxíla'do' na' ca gunē' quégacaba' ia'tá-palalaj yu' chénnaba' ni' biti' gula'nítiba'. ¹⁴Lēscá' caní, Xúziru' Dios, zoē' yehua' yubá, biti' ré'ēnē' nítibi' tubi' b'ído' caní.

Ca ral-la' uniti loru' böchi' luzá'aru'

(Lc. 17:3)

¹⁵Gunné' ca' Jesús:

—Channō böchi' luzó'o guá' dö' quiu', guyéajtsōca', en yōjcá'analenē' tsahui' la' libí'isili'. Channō uzé' náguiē' li', chibuguélu'u böchi' luzó'o. ¹⁶Channō cabi' uzé' náguiē' xtídzu'u, guché'ē ia'tú'ē o ia'chopē' bōnni' para urúaj li xtídzu'u lógaquiē' chopa tsonnē' bōnni', nupa gaca ilún ba nalí que xtídzá'li'. ¹⁷Channō cabi' uzé' náguiē' xtídzá'gaquiē', gudxi ca' bōnachi tu'dubi tu'sēdi queē' Dios, en channō cabi' uzé' náguiē' xtídzá'gaca bōnachi na', ní'irō bōnni' na' gáquiē' quiu' ca tu bōnni' biti' réajlē'ē Dios, en ca tu bōnni' ruquíxjē' uláz que yōdzō zi'tu'.

¹⁸'Le nácate' rea' libí'ili', yúgu'tē le inná bē'ēli' lu yōdzōlió ni, naca le chigunná bē'ē Dios yehua' yubá, ate' yúgu'tē le gü'ili' lataj lu yōdzōlió ni, naca le chibē'ē lataj Dios yehua' yubá.

¹⁹'Lēscá' caní rea' libí'ili', channō chópasili' gun tuz xtídzá'li' lu yōdzōlió ni ca naca tu le inábili'-nē' Dios, gunē' Xuz caza' Dios, zoē' yehua' yubá, lē na' rinábili'-nē'. ²⁰Ga nacua' chopa tsonna nupa ni nudúbigaca quia' neda', zoa caza' neda' gatsaj láhuilō ga na' nacu'ē.

²¹Ní'irō gubígui'ē Pedro ga zoē' Jesús, en gunábinnē' Lē', rnnē':

—Xan, ¿bál-laxitē luzuí ral-la' uniti lahua' böchi' luzá'a, nu na' ruá' dö' quia'? ¿Naru' gadxi luzuí?

²²Jesús rē' lē':

—Neda' rea' li', calēgasō gadxi luzuí, pero idú tsónnalalaj yu' chi cuía le naca gadxi luzuí.

**Jesús rucúdzu'ë didza' que tu bönni'
huen dxin biti' buniti lahuë' luzé'ë**

²³ Gunné' ca' Jesús:

—Ia'stú, ca gun Nu na' rinná bē' yehua' yubá naca ca benē' tu bönni' rinná bē'ë. Gú'unnē' ucá'analenē' tsahui' yugu' bönni' huen dxin queē'. ²⁴ Cate' gusí lahuë' rucá'analenē' légaquiē' tsahui', dujuá'gaquiē' ga zoē' tu bönni' ral-lē'ë queē' zían gayuá' dumí. ²⁵ Tu' cabí guca quíxjē', gunná bē'ë xanē' idó'ogaquiē' lē', en nigula queē', en yugu' bi'i queē', en yúgu'tē le dē queē', ate' n'irō gazxaj le ral-lē'ë queē' xanē' na'. ²⁶ N'irō bönni' huen dxin na' buzóa zxibē' lahuë' xanē', en gunábinē' lē', rnnē': "Xan, ben zxön ládxi'u neda'. Huaguíxaj caza' li' idutē." ²⁷ N'irō xanē' na' buéchi' ládxi'ë bönni' huen dxin queē' na', en buniti lahuë' lē' lē na' ral-lē'ë queē', ate' busanē' lē'. ²⁸ Cate' burúajē' bönni' huen dxin na', la' yójtšágatē' tu bönni' rúnlenē' lē' tsözxón dxin, ate' bönni' na' ral-lē'ë queē' láti'do'os dumí. N'irō guzxönē' lē', en guxzínnejē' yenē', ate' rē' lē': "Gudíx-jatē lē na' ral-lu'u quia'." ²⁹ N'irō luzé'ë na' buzóa zxibē' lahuë', en gunaba yeché'ë lahuë', rnnē': "Ben zxön ládxi'u neda'. Huaguíxaj caza' li' idutē." ³⁰ Biti' gú'unnē' bönni' huen dxin na', ate' yójlu'ë lē' lidxi gufē dza quíxjarē' lē na' ral-lē'ë queē'. ³¹ Cate' bila'lé'enē' lē ni ia'zícá'rē' huen dxin, bulu'hu'ínide'enē' ni'a queē', ate' yójtšjōi'iguequinē' xán-gaquiē' yúgu'tē lē na' guca. ³² N'irō xán-gaquiē' bulidzē' bönni' huen dxin na', ate' rē' lē': "Li', huen dxin catsahui'. Yúgu'tē dumí na' gúl-lu'u quia' buniti lahua' li'. Busúlua' lē na' gúl-lu'u quia' tu' gunaba yechu'u lahua'. ³³ ¿Naru' cabí ral-la' huéchi' ládxi'u ca' luzó'o ca na' bena' neda', buéchi' ládxi'a li'?" ³⁴ N'irō guléde'enē' xanē', en budödē' lē' lu ná'a-gaca nupa ulu'saca' zí lē' dza quíxjarē' idutē le ral-lē'ë queē'.

³⁵ N'irō rnnē' Jesús:

—Lēscá' caní gunē' Xuza' zoē' yehua' yubá queéli' channō cabí uniti loli' idú ládxi'li' yugu' böchi' luzá'ali'.

Nupa tu'lá'a yöl-la' nutsaga na'

(Mr. 10:1-12; Lc. 16:18)

19 Cate' budxi bē'ë Jesús yugu' didza' ni, buzé'ë luyú Galilea, ate' bidxinē' luyú Judea le dē ia'tsólá'a yegu Jordán saca' ga rilén gubidza. ² Bönachi zían sōjácálen Jesús, ate' bunē' léguequi ni'.

³ N'irō bila'dxinē' bal-lē' bönni' yudo' fariseo ga zoē' Jesús para ila'z'í bē'ë Lē', ate' gula'nábinē' Lē', ta'nnē':

—¿Naru' dē lataj bönni' nutsaga nē'ë usanē' nigula queē' tu' nözi bíti'tēs bi raza?

⁴ Bubi'ë didza' Jesús, rē' légaquiē':

—¿Naru' cabí nulábanili' le nazúaj lu guichi lá'ayi ca benē' Dios bönachi cate' si' benē' yödžölió? Bönni', en nigula benē' légaquiē'. ⁵ Caní gunné' Dios: "Que lē ni na', ral-la' usanē' tu bönni' xuz xinē'ë, ate' tsaz tsöjsóalenē'-nu nigula queē', ate' iropē' na' ulu'huóáquiē' tuz bönachi." ⁶ Caní naca, bíti'rō náca-gaquiē' chopē' pero tuz bönachi chin-uhoáquiē'. Que lē ni na', biti' ral-la' ulu'lé'ë bönni' nupa na' benē' Dios tuz.

⁷ N'irō bönni' yudo' na' gula'nábinē' Jesús, ta'nnē':

—¿Bíx que na' gunná bé'enē' Moisés légaquiē' le ruf'i lataj nu bönni' ünödžjē' tu guichi queēnu nigula queē' le rna nulá'a yöl-la' nutsaga na', ate' usanē'-nu nigula queē' na'?

⁸ Jesús rē' légaquiē':

—Caní benē' Moisés tu' nazidi icja ládxi'do'oli'. Bennē' libí'ili' lataj usanli'-nu nigula queéli', pero cate' gusí lo guta' guró'ö yödžölió, biti' guca caní. ⁹ Neda' rea' libí'ili', channō tu bönni' usanē'-nu nigula queē', en biti' gudálennu bönni' yúbölö, ate' utsaga ná'alēnē'-nu nigula

yúbölö, gunë' dul-la' le riguitsaj xibá que yöl-la' nutsaga na'. Lësca' caní, channö nu bönni' utsaga ná'alene'-nu nigula na', nusanë'-nu bönni' queënu, gunë' dul-la' le riguitsaj xibá que yöl-la' nutsaga na'.

¹⁰ Ní'irö yugu' bönni' usëda queë' Jesús gulé' Lë', ta'nnë':

—Channö caní naca queë' tu bönni' zóalene'-nu nigula queë', gácarö dxi'a queë' la'tu' cabí utsaga caz në'ë, ugá'anë' tuzë'.

¹¹ Bubi'ë didza' Jesús, rë' légaquië':

—Biti' gaca ila'zí' lu ná'agaca yúgu'të bönachi didza' ni, pero núpasö na' Dios ruzéajni'inë' léguequi. ¹² Nacu'ë bönni' bití' tu'tsaga ná'alengaquië' nigula tu' cabí nácaquië' idú bönni' biguiú', tu' gulaljë' ca', ate' ia'zica'rë' bönni' bití' tu'tsaga ná'alengaquië' nigula tu' buluzaga' bönachi xinózgaquië', ate' ia'zica'rë' bönni' bití' tu'tsaga ná'alengaquië' nigula para gaca ilunë' xichinë' Dios, Nu rinná bë' yehua' yubá. Nu sequi' sí' lu në'e didza' ni ral-la' sí' lu në'e le.

**Jesús rulidza
tsáhuë'ë-bi' yugu' bí'ido'**

(Mr. 10:13-16; Lc. 18:15-17)

¹³ Ní'irö yugu' xuz xiná'agacabi' bí'ido' dujuá'agaquië'-bi' ga zoë' Jesús para ixóa në'ë légacabi', en ulidzë' Dios ní'a quégacabi', ate' bönni' usëda queë' buluzáguí'ë xinózgaquië'. ¹⁴ Ní'irö Jesús rë' légaquië', rnnë':

—Guli'güf'i-bi' yugu' bí'ido' lataj ila'dxinbi' ga zoa', en bití' uzága'lí' xinózgaabi', tu' ila'zí' lataj nupa náca gaca ca yugu' bí'ido' caní ga ni rinná bë'ë Dios yehua' yubá.

¹⁵ Jesús guxóa në'ë légacabi', ate' ní'irö buzë'ë ni'.

**Tu bönni' unná bë' cuidi' dë
yöl-la' tsahui' queë'**

(Mr. 10:17-31; Lc. 18:18-30)

¹⁶ Tu bönni' ni zoë' iz cuidi' queë' buduyúë' Jesús, en rë' Lë':

—Bönni' Usedi idú tsahui'. ¿Bizxi le naca tsahui' ral-la' guna' para gata' yöl-la' na'bán idú quia'?

¹⁷ Bubi'ë didza' Jesús, rë' lë':

—¿Naru' nóztsenu' lë na' rno' quia', rno' naca' idú tsahui'? Cuntu nu bönni' náquië' idú tsahui'. Tuzë' Dios náquië' idú tsahui'. Channö ré'ënu' gata' yöl-la' na'bán idú quiu', ben ca rinná bë' xibá queë' Dios.

¹⁸ Ní'irö bönni' na' rë' Jesús, rnnë':

—¿Bízxilö xibá na'?

Jesús rë' lë':

—Xibá na' gunná bë'ë Moisés:

Biti' gútiu' bönachi.

Biti' gunu' dul-la' le riguitsaj xibá que yöl-la' nutsaga na'.

Biti' cuanu'.

Biti' inníó' que böchi' luzó'o le cabí nácate.

¹⁹ Ben bal xuz xinó'o.

Bidxí'i böchi' luzó'o ca nadxí'i cuinu'.

²⁰ Bönni' na' ni zoë' iz cuidi' queë' gudxë' Jesús, rnnë':

—Yúgu'të lë ni runa' ga gudela' naca' bí'ido'. ¿Naru' zoa ia'tú le ral-la' guna'?

²¹ Jesús rë' lë':

—Channö ré'ënu' gacu' tsahui', guyéaj, yöjjeti' le dë quiu', ate' dumí na' sí'u, bunödzej quégaca bönachi yechi'. Caní gata' yöl-la' tsahui' quiu' ní' yehua' yubá. Ní'irö gudá, gudá' neda'.

²² Cate' bönni' na' ni zoë' iz cuidi' queë' biyönnë' didza' ni, söhuóje' ruhu'innë' tu' dëda' yöl-la' tsahui' queë'.

²³ Ní'irö Jesús gudxë' yugu' bönni' usëda queë', rnnë':

—Le nácatë rea' libí'ili', böniga naca tsázië' nu bönni' dë yöl-la' tsahui' queë' ga rinná bë'ë Dios yehua' yubá. ²⁴ Ia'stú

rea' lib'ili', nácarö böniga tsázië' tu bönni' dë yöl-la' tsahui' queë' ga ni' rinná bë'ë Dios ca tódiba' böa' lu nagui yötsi'.

²⁵ Cate' bila'yönnë' yugu' bönni' usëda queë' didza' ni, bulu'bánnë, ta'nnë':

—¿Nuzxi caz gaca ulá, channö?

²⁶ Jesús buyúë' légaquië', en rë' légaquië':

—Biti' gaca ilún bönachi lë ni, pero Dios huáca gunë' yúgu'të.

²⁷ Nf'irö bubí'ë didza' Pedro, en rë' Jesús:

—Buyútsöca', netu' chibucá'anatu' yúgu'të, en zá'lentú' Li'. ¿Bízxirö gata' queé'tu'?

²⁸ Jesús rë' légaquië':

—Le nácatë rea' lib'ili', dza ni' cate' ucubi yödzölió, atë' cö'a inná bë'a neda', Bönni' Guljé' Bönachi, ga ni' gácatëra' lo, lësca' lib'ili' zá'lenli' neda' na'a, có'öli' chinnu lataj ga inná bé'ëli', en uchi'a usöröli' quégaca idxinnu cö'të yödzö quégaca zxf'ini xisóë' Israel. ²⁹ Nu bönni' rucá'anë' lidxë', o yugu' bóchë'ë, o yugu' zanë', o xuzë', o xinë'ë, o nigula queë', o yugu' zxf'inë', o yugu' xiyúë', para gunë' xichina', bönni' ni si'ë ia'tú gáyua'tërö ca' queë', en gata' ca' yölla' na'bán idú queë'. ³⁰ Zían nupa náca-gaca lo na'a, ulu'gá'ana cá'asö, atë' nupa nagá'anagaca cá'asö na'a, hualácagaca lo.

Rucúdzu'ë didza' Jesús ca tunë' bönni' huen dxin

20 Gunnë' ca' Jesús:

—Ca gun Bönni' na' rinná bë'ë yehua' yubá naca ca benë' tu bönni' xan yu'u. Birúajë' zílado', yöjdiljë' yugu' bönni' ilunë' dxin ga naca lu xiyúë' ga na' nadúzgaca lubá uva. ² Cate' chibugá'analënë' tsahui' yugu' bönni' huen dxin na', quíxjë' légaquië' tu dumí lazxaj que tu dza, gusól-lë'ë légaquië' ilunë' dxin ga naca lu xiyúë'. ³ Cate' burúajë' idú xsila, bilë'enë' ia'zica'rë'

bönni' nacua'asë' ca' ga naca lu yé'ëyi. ⁴ Rë' légaquië': "Gulí'tséaj ca' lib'ili' ga naca lu xiyúá, atë' quíxjja' lib'ili' le naca tsahui'." La' yöjácatë' ca' légaquië'.

⁵ Burúajë' bönni' xan yu'u na' leyúbölö idú huagubidza, enca' idú xihuó udzó', en la' tuz ca benë', gusól-lë'ë yugu' bönni' yöjxáquië' lu xiyúë'.

⁶ Burúajë' ca' cate' ni' zoa ia'láti'do'os gubidza, en yöjxáquië' ia'zica'rë' bönni' nacua'asë' ca' ni', atë' rë' légaquië': "¿Bizx que zóat-sali' ni cá'asö idú dza, bití' bi dxin runli'?" ⁷ Yugu' bönni' na' të' lë', ta'nnë':

"Cuntu nu benna xichintu'." Nf'irö rë' légaquië':

"Gulí'tséaj ca' lib'ili' ga naca lu xiyúá, atë' quíxjja' lib'ili' le naca tsahui'." ⁸ Cate' chizóa gal-la, bönni' xan yu na' rë' bönni' yu'u lu në'ë yugu' huen dxin na', rnnë':

"Bulidza yugu' bönni' huen dxin na', atë' gu'u lázxjagaquië'. Quíxjju' zí'alö yugu' bönni' na' bila'dxinë' yöjsetë. Udxí na' quíxjju' yugu' bönni' na' bila'dxinë' zí'atëlö."

⁹ Nf'irö bila'dxinë' bönni' yöjéngaquië' dxin cate' ni' zoa ia'láti'do'os gubidza, en gula'zi'ë tu tuhuéajë' dumí lazxaj que tu dza.

¹⁰ Cate' bila'dxinë' bönni' yöjéngaquië' dxin zí'atëlö, guléquinë' huazí'gaquië' ia'lati', pero lësca' gula'zi'ë tu tuhuéajë' dumí lazxaj que tu dza.

¹¹ Cate' gula'zi'ë le, gula'nnë'dë'ë queë' bönni' xan yu'u na', ¹² ta'nnë': "Yugu' bönni' ni bila'dxinë' ga yöjsetë, tu chf'isö gulunë' dxin, en tuz ca gudí'fzxjatso' légaquië' ca netu', atë' netu' ni bentu' dxin idú dza, en gúguida'atu' gubidza."

¹³ Bubi'ë didza' xan yu na', en rë' tuë': "Bócha'a, bití' bi runa' quiu' le cabí naca tsahui'.

¿Naru' cabí bugá'ana tsáhui'ru' si'u tu dumí lazxaj que tu dza? ¹⁴ Guzxí' lazxju', en böaj lidxu'. Neda' ré'ënda' quíxjja' bönni' ni yöjenë' dxin ga yöjsetë la' leze ca na' riguíxjja' li'.

¹⁵ ¿Naru' cabí dë lu na'a guna' ca ré'ënda' len le nequi quia'?

¿Naru' ruzxé'etsenu'-në' luzó'o tu' rún-nada'a queë'?" ¹⁶ Caní naca, bal-lë' bön-

ni', tu'cá'ana bönachi légaquië' cá'asö, ilácagaquië' lo, ate' ia'zica'rë' bönni', nácagaquië' lo na'a, ulu'gá'anë' cá'asö. Zián nupa nulidza', pero nabábasö nupa narógaca.

**Riguíxjö'ë Jesús
leyúbölö ca si' ilútië' Lë'**

(Mr. 10:32-34; Lc. 18:31-34)

¹⁷ Cate' ni' yu'ë Jesús nõza, sa'yéajë' Jerusalén, guchë'ë quez idxínnutë' bönni' usëda queë', en rë' légaquië':

¹⁸ —Buli'yútsöca', ribenru' zéajru' Jerusalén, ate' ni' soa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usëdi, ate' ila'chúguië' quia' gátia'. ¹⁹ Ulu'dödë' neda' lu ná'agaquië' bönni' zi'tu' para ulu'titjë' neda'. Ila'guinë' neda', en ulu'dé'ë neda' lë'e yaga cruz, pero cate' gaca tsonna dza, Dios usubanë' neda' lu yöl-la' guti.

**Le gunábanu xiná'agaquië'
Jacobo, en Juan**

(Mr. 10:35-45)

²⁰ Ní'irö bidxinnu xiná'agaquië' Jacobo, en Juan, yugu' zxf'inë' Zebedeo, ga zoë' Jesús, dzágagaquië'-nu chopë' ni, ate' buzóa zxi'binu lahuë' Jesús, en gunábinu Lë' tu le uzá' lãdxë'ë queënu.

²¹ Jesús gunábinë'-nu, rnnë':

—¿Bizxi ré'ënu'?

Rënu Lë':

—Gunná bë' có'öbi' tubi' zxf'ina' ni cuita lë'u ibëla, en ia'tubi' có'öbi' cuita lë'u yógöla ga ni' inná bë'u.

²² Bubi'ë didza' Jesús, rë' légaquië':

—Biti' nózili' le rinábali'. ¿Naru' huáca guá' ilenli' le qui'i saca' neda', en idílali' nisa ca idila' neda' nisa, gátia'?

Të' Lë':

—Huácatu'.

²³ Ní'irö Jesús rë' légaquië':

—Le nácatë' le ral-la' qui'i saca'a neda', gaca ca' queé'li', en le ral-la' idila' neda'

nisa, gátia', idílali' ca' nisa lib'ili', pero que có'öli' cuita lë'a ibëla o cuita lë'a yógöla, bití' dë' lu na'a nu gu'a que, pero gata' quégaca nupa ni' chinupé'ë Xuza' quéguequi.

²⁴ Cate' ia'chíë' bönni' usëda queë' Jesús bila'yönnë' lë' ni, gula'lenë'. ²⁵ Ní'irö Jesús bulidzë' légaquië', rnnë':

—Nözquézili' ca tunë' yugu' bönni' ta'nná bé'enë' bönachi izá'a, ridödité' bë' ta'nná bé'enë' légaquië', ate' nupa ni' nácagacarö lo ta'nná be'e la' luzé'eguequisö. ²⁶ Biti' gaca caní queéli'. Núti'tës-löli' lib'ili' nu ré'ëni gaca zxon ga zóali', nu ni ral-la' gun dxin que ia'zica'röli'. ²⁷ Lësca' caní, núti'tës-löli' lib'ili' nu gué'ëni gaca lo, ral-la' gaca ca tu bönni' nadó'o que ia'zica'röli'. ²⁸ Lësca' neda', Bönni' Guljë' Bönachi, bida' ni, calëga para nu gun xichina', pero para guna' xichíngaca bönachi, en udöda' yöl-la' na'bán quia', le quízxjada' ni'a quégaca bönachi zián para ulu'lágaca.

**Ruüñë' Jesús chopë' bönni'
nachul-la lógaquië'**

(Mr. 10:46-52; Lc. 18:35-43)

²⁹ Cate' ni' tu'rúajë' yödzö Jericó, bönachi zián sójácalen Jesús. ³⁰ Nacu'ë chopë' bönni' nachul-la lógaquië' ni', ró'gaquië' ra' nõza. Cate' bila'yönnë' ridödë' Jesús ni', gulu'ë zidzaj didza', ta'nnë':

—Xan, zxf'ini xi'sóë' David, buéchi' ladxi' netu'.

³¹ Bönachi zián nacuá' ni' gulé' légaquië' ila'cu'ë dxisö, pero zidzajrö gulu'ë didza', ta'nnë':

—Xan, zxf'ini xi'sóë' David, buéchi' ladxi' netu'.

³² Ní'irö guzé' ribözë' Jesús, en bulidzë' légaquië', ate' gunábinë' légaquië', rnnë':

—¿Bizxi ré'ënilí' guna' queé'li'?

³³ Të' Jesús:

—Xan, ré'ënitú' gunu' ga huóálaj guió'j lotu'.

³⁴Ní'irö Jesús buéchi' ládxë'é lé-gaquië', ate' gudanë' guió'j lógaquië'. La' bôáljatëgaca guió'j lógaquië', ate' yó'já-calenë' Jesús.

Rídxinë' Jesús yódzö

Jerusalén len yöl-la' ba zxon

(Mr. 11:1-11; Lc. 19:28-40; Jn. 12:12-19)

21 Cate' bila'dxingalë' yódzö Jerusalén, en ni' nacu'ë ga dë yódzö Betfagé ga na' zoa Gu'fa Yaga Olivo, ní'irö gusól-lë'é Jesús chopë' bönni' usëda queë', ²ate' rë' légaquië':

—Guli'tséajtsöca' yódzödo' ni' ca dódilö ga ni zóaru', ate' la' tsöjxáca'tëli'-ba' tuba' burro guná' nága'ba', ate' dzaga léba' tuba' burro biguiú'do'. Guli'tsöjsexi-ba', en iché'ëli'-ba' quia' ni. ³Channö nu bi gufé lib'ili', guli'guíë nu na': "Xanru' riquinnë'-ba'." Ní'irö isól-lë'é légacaba' quia'.

⁴Caní guca para gaca lë na' buzúajë' lu guichi bönni' bë'é didza' uláz queë' Dios, gunné':

⁵Guli'guíë nupa nacuá' yódzö Sión, Buli'yútsöca', zë'é Bönni' inná bé'enë' lib'ili'.

Lu yöl-la' nöxaj ladxí' queë' dxíë'-ba' tuba' burro.

Dxfé' cúdzu'ba' búrrodo' nácaba' zxf'ini-ba' böa' ruá'aba' yua'.

⁶Ní'irö bönni' usëda queë' yó'jáquië' ni', ate' gulunë' ca na' gunná bé'enë' Jesús légaquië'. ⁷Gula'ché'ë-ba' burro guná' na', en burro biguiú'do' na', ate' bulu'dxië' cúdzu'gacaba' yugu' lari' guitsa' quégaquië', ate' gudxië' Jesús lahui' lari' na'. ⁸Nacuá' ca' bönachi zían ni', ate' gula'chilaj yugu' lari' ta'xóa cúdzu'guequi la' nöza. Ia'zica'rë' bulu'chibë' zin le bulu'zxóë' ga naca la' nöza. ⁹Gulufi zidzaj didza' bönachi na' nanórugaca, en nupa na' sójácalen Jesús, ta'nná:

—¡Yöl-la' ba Lë', zxf'ini xi'sóë' David! ¡Bica' ba nu ni za' ni'a que Lë' Xanru'! ¡Yöl-la' ba Dios!

¹⁰Cate' guyázië' Jesús yódzö Jerusalén, bulu'dzatsa yúgu'të bönachi lu yódzö na', ate' zían nupa gulé luzé'eguequi, ta'nná:

—¿Nuzxi caz bönni' ni?

¹¹Ia'bal-la bönachi ni' ta'nná:

—Nu ni Jesús, bönni' ru'ë didza' uláz queë' Dios, ate' naca ladzë' Nazaret luyú Galilea.

Jesús rulatjë' lö'a yudo'

(Mr. 11:15-19; Lc. 19:45-48; Jn. 2:13-22)

¹²Cate' guyázië' Jesús lö'a yudo' queë' Dios, buláguí'ë ní'ilö yúgu'të nupa tuti' to'o ga naca lö'a yudo' na'. Burixë' ca' yugu' blaga quégaquië' bönni' tu't-sé'ë dumí yódzö zi'tu', en yugu' le ta'bö'i nupa tuti' gu'dödo'. ¹³Rë' légaquië':

—Nazúaj lu guichi lá'ayi le rnna: "Lidxa' si'i le, yu'u ga nu ulidza Dios", pero lib'ili' chinunli' lataj ni ca naca yu'u lídxigaca gubán.

¹⁴Cate' ni' zoë' Jesús chila yudo', bal-lë' bönni' nachul-la lógaquië', en bönni' biti' raca ila'zë'ë bila'dxinë' ga na' zoë', ate' Lë' bunë' légaquië'. ¹⁵Gula'lenë' yugu' bixúz unná bë', en bönni' yudo' tu'sédinë' cate' bila'lë'enë' yugu' yöl-la' huáca ni runë' Jesús, en bila'yönnë' tu'fibi' bf'ido' zidzaj didza' ga naca chila yudo', ta'nnabi':

—¡Bica' ba Lë', zxf'ini xi'sóë' David!

¹⁶Ní'irö të' Jesús:

—¿Naru' cabí riyönnu' ca ta'nnabi' bi'i ni?

Bubi'ë didza' Jesús, rnnë':

—Ön, riyönda'. ¿Naru' catu caz nulábanili' le nazúaj lu guichi lá'ayi caní caz ral-la' gaca? Caní rnna: "Li' benu' ga yugu' bi'i cuidi', en yugu' bf'ido' ni' tádxí'bi' gulúl-labi' yöl-la' ba le naca idú'."

¹⁷ Ní'irò Jesús buca'ané' légaquié', ate' burúajé' Jerusalén. Guyijé' yödzo Beta-nia ga ni' bugá'ané' idú yéla.

Jesús rulidza zi'é yaga higo

(Mr. 11:12-14, 20-26)

¹⁸ Cate' za' rení', ate' ni' söhuóje' Jesús Jerusalén, riduné'. ¹⁹ Bilé'ené' tu yaga higo rö' gal-la' cuite nöza, ate' gubígui'é ga na' rö', pero biti' bi bidzóliné' lu yaga na'. Xilágui'sö dxíá. Ní'irò Jesús gudxé' le:

—Bíti'rö cuía le ribía quiu'.

La' gubídxité yaga higo na'. ²⁰ Cate' bila'lé'ené' bönni' uséda queé' lè ni, bulu'bábiné', ate' gula'nábiné' Jesús, ta'nné':

—¿Nacxi caz guca, gubídxité yaga ni?

²¹ Bubi'é didza' Jesús, ré' légaquié':

—Le nácaté rea' libí'ili', channö tséajlé'éli' Dios, en biti' gaca chopa ládxí'li', calégasö huáca gunlí' ca na' bena' que yaga ni, pero channö guié'li' gu'á ni: Gucuíta, en yöjsóa lu nísado', gaca ca na' innali'. ²² Lésca' caní, yúgu'té le inábali' cate' ulídzali'-né' Dios, channö huayéjlé'éli' gunné' Dios queé'li', huazí'ili' lè na' inábali'.

Yöl-la' unná bē' dē lu nē'ē Jesús

(Mr. 11:27-33; Lc. 20:1-8)

²³ Ní'irò guyázié' Jesús chila yudo', ate' tsanni ni' rusédiné' bönachi nacua' ni', bila'dxiné' yugu' bixúz unná bē' len bönni' gula tu'zéajni'iné' ga zoé', ate' gula'nábiné' Jesús, ta'nné':

—¿Bizxi yöl-la' unná bē' dē lu no'o, runtso' yugu' lè ni? ¿Nuzxi budödi lu no'o yöl-la' unná bē' ni?

²⁴ Bubi'é didza' Jesús, ré' légaquié':

—Lésca' neda' inábatsöqui'da' libí'ili' tu didza'. Channö quíxjöi'ili' neda' ca naca, neda' ca' guía' libí'ili' bizxi yöl-la' unná bē' dē lu na'a runa' caní. ²⁵ ¿Nuzxi caz gusól-la' Juan para buquilé' bö-

nachi nisa? ¿Naru' Dios gusól-lé'ē lē', o gula'sól-lé'ē yugu' bönni' lē'?

Ní'irò gula'sí lógaquié' bönni' yudo' na' ta'nné' la' légacasé':

—Channö innaru': Dios gusól-lé'ē lē', la' guié'té' ré'u: “¿Bizx que biti' guyéa-jlé'éli' lē'?” ²⁶ Na'a, channö innaru': Gula'sól-lé'ē yugu' bönni' lē', rádxiru' le ilún bönachi lu yödzo tu' ta'yéajlé'ē yúgu'té' Juan na' bē'ē didza' uláz queé' Dios.

²⁷ Que lè ni na' bulu'bi'ē didza', té' Jesús:

—Biti' nöztu'.

Jesús ré' légaquié':

—Neda' ca', biti' guía' libí'ili' bizxi yöl-la' unná bē' dē lu na'a runa' lè ni.

Rucúdzu'ē didza' Jesús ca gulunbi' chópabi' xzí'iné' tu bönni'

²⁸ Ní'irò Jesús gudxé' yugu' bönni' yudo' na':

—¿Nacxi rusáca'li' queé'li'? Guzóé' tu bönni' nacua'abi' chópabi' bi'i bönni' queé', ate' yöjödxe'-bi' tubi' bi'i queé' na', gunné': “Xzí'ina', guyéaj na'a tsö-jenu' dxin ga naca luyú quia' ga ró'-gaca lubá uva.” ²⁹ Bubí'ibi' didza' bi'i na', gúdxibi'-né': “Biti' ré'enda' tseja'.” Gudödi ni' bubí'í ládxí'bi', ate' yöjenbi' dxin. ³⁰ Ní'irò bönni' na' yöjödxe'-bi' ia'-tubi' bi'i queé' na', en la' tuz ca gunné', ate' bubí'ibi' didza' bi'i ni, gúdxibi'-né': “Huaca, Dad. Uyéaja'.” Biti' guyéajbi' bi'i ni. ³¹ ¿Núzxilöbi' bi'i chopa ni benbi' le guyaza ládxé'ē xúzi'bi'?

Bulu'bi'ē didza', té' Jesús:

—Bi'i zí'aló na'.

Ní'irò Jesús ré' légaquié':

—Le nácaté rea' libí'ili', ila'nórué' bönni' uquíxaj tuá' dö', en yugu' nigula udá dzaga ca libí'ili', ate' ila'yázié' ga ni' rinná bē'ē Dios. ³² Caní gaca, tu' bidé' Juan, bönni' buquilé' bönachi nisa, ga zóali', en busédiné' libí'ili' le naca tsahuí' ca ral-la' gunlí', ate' libí'ili' biti' guyéa-

jlé'ëli' lë', pero yugu' bönni' uquízxaj, en yugu' nigula udá dzaga gula'yéajlë'ë lë'. Sal-la' bilé'eli' lë ni, biti' bub'í ládxi'li' para tséajlë'ëli' lë'.

**Rucúdzu'ë didza' Jesús ca
béngaquië' bönni' huen dxin biti'
nácagaquië' tsahui'**

(Mr. 12:1-12; Lc. 20:9-19)

³³ Gunné' ca' Jesús:

—Buli'zé nágalí' ia'tú le ucúdzu'a didza'. Guzóë' tu bönni' xan yu'u, ate' bönni' ni budé'ë yugu' lubá uva luyú queë'. Guléquië' lë'aj que, en guchó'önë' tu lerui guió'j ga isié' xisi uva na'. Benë' ca' tu yu'u xitsá' ga gaca nu uyú idútë luyú queë'. Ní'irö budödë' luyú na' lu ná'agaquië' bönni' huen dxin, para ila'z-i'ë quégaquië' gatsaj huéaj, ate' sa'yéajë' yödzö zi'tu'.

³⁴ 'Cate' chibidxín dza ulu'chibë' yugu' lubá uva na', gusól-lë'ë bönni' xan luyú na' bal-lë' ni'a në'ë ga na' nacu'ë bönni' huen dxin ni' para ulu'zi'ë lu ná'agaquië' uláz queë'. ³⁵ Ní'irö gula'zönë' bönni' huen dxin na' yugu' ni'a në'ë na'. Gulunë' huë' tuë', en ia'túë' bëti-gaquië' lë', en ia'túë' bulu'ladxë' lë' guió'j. ³⁶ Leyúbölö bönni' xan luyú na' gusól-lë'ë ca' ia'zícá'rë' ni'a në'ë, ate' guláquië' zióntërë' ca nupa na' gusól-lë'ë zí'alö, ate' la' tuz ca gulunë' bönni' huen dxin ni' quégaquië'.

³⁷ 'Ga yöjsete, gusól-lë'ë ca' zxf'inë' ga na' nacu'ë. Guzá' ládxe'ë, rnnë': Hualunë' bal bi'i quia'. ³⁸ Cate' yugu' bönni' huen dxin na' bila'lé'enë'-bi' zxf'inë', la' gula'nnatë' la' légacasë': "Bi'i ni guequi queé'bi' luyú ni. Guli'dá, gútiru'-bi', ate' le ral-la' guequi queé'bi' guequi queé'ru'." ³⁹ Ní'irö gula'zönë'-bi', ate' bulu'béajë'-bi' ní'ilö luyú ga na' ró'gaca lubá uva, ate' bëti-gaquië'-bi' ni'.

⁴⁰ Ní'irö Jesús gunábinë' légaquië', gunnë':

—Cate' udxinë' bönni' xan luyú na', ¿nacxi gunë' quégaquië' bönni' huen dxin ni'?

⁴¹ Bulu'bi'ë didza' bönni' yudo' na', të' Jesús:

—Usunítië' bönni' tuá' dö' na', ate' luyú queë' na' udödë' lu ná'agaquië' ia'zícá'rë' bönni' huen dxin, bönni' ilu'ë lë' uláz queë' cate' idxín dza ulu'chibë' le.

⁴² Ní'irö Jesús gudxë' légaquië':

—¿Naru' catu caz nulábanilí' lë na' nazúaj lu guichi lá'ayi ca naca lë ni? Caní rna:

Guió'j na' gula'ru'unë' bönni' tu'cu'ë zö'ö, la' guió'j ná'asö chinaca guió'j len zö'ö. Lë cazë' Xanru' benë' ga naca caní, ate' naca tu le run ga rubániru'.

⁴³ 'Que lë ni na' rea' lib'í'ili', xilátjali' ga na' rinná bë'ë Dios idúa queé'li', en gata' quégaca bönachi ilún ca ral-la' gun nu nadelí' lataj ni'. ⁴⁴ Nu tsöjchegu' lu guió'j ni, la' cuinsi quitsaj, ate' channö guió'j ni tseajbaga' bönni' na', uzxuzxaj lë'.

⁴⁵ Cate' yugu' bixúz unná bë', en yugu' bönni' yudo' fariseo bila'yönnë' lë na' bucúdzu'ë didza' Jesús, téquibe'enë' bë'ë Jesús didza' ca naca quégaquië'. ⁴⁶ Gula'zóa gula'bö'ë ila'zönë' Jesús, pero guládxinë' bi ilún bönachi zióan nacuá' ni' tu' ta'yéajlë' náquië' Jesús bönni' ru'ë didza' uláz queë' Dios.

**Rucúdzu'ë didza' Jesús ca naca que
laní que yöl-la' rutsaga na'**

22 Jesús bé'lenë' légaquië' didza' leyúbölö, ate' bucúdzu'ë didza', rnnë':

²—Ca gaca quégaca nupa ila'yaza ga rinná bë'ë Dios yehua' yubá naca ca guca quégaca nupa bulidzë' tu bönni' rinná bë'ë cate' benë' laní que dza ut-saga ná'abi' bi'i bönni' queë'. ³ Gusól-lë'ë ni'a në'ë tsöjxí'gaquië' yugu' bönni' chinulidzë' para guídagaquië' laní queé'bi', pero biti' gulé'ënë' guídagaquië'. ⁴ Ní'irö gusól-lë'ë ia'zícá'rë' ni'a në'ë,

en gudxë légaquië: “Guli’tsöjódxitsöca’ nupa na’ chinulidza’, na’ guiéli légaquië: Buli’yútsöca’, chinupá’a la’ huagu. Chibétia’-ba’ yugu’ xpëdxa’, en yugu’ böa’ bëdxi renni’ quia’. Yúgu’të chinupá’a. Guli’dá, sóaru’ laní queébi’ bi’i bönni’ quia’ utsaga ná’abi’.” ⁵Yugu’ bönni’ na’ yöjldzagaquië’ biti’ gulunë’ légaquië’ bal, ate’ yöjáquië’ que queégaquië’. Tuë’ yöjenë’ dxin, en ia’túë’ guyijë’ tsöjö’u tsöjëti’ë. ⁶Ia’zica’re’ gula’zönë’ yugu’ ni’a në’ë na’, ate’ gulu’ë dö’ quegaquië’, en bëtgaquië’ légaquië’. ⁷Cate’ bönni’ na’ rinná bë’ë biyönnë’ lë ni, gulënë’, en gusól-lë’ë yugu’ bönni’ queë’ röjajúë’ gudil-la, ate’ bëti-gaquië’ yugu’ bönni’ hueti bönachi na’, en bulu’quélë’ë gu’ lądzagaquië’. ⁸Ní’irö bönni’ na’ rinná bë’ë gudxë’ yugu’ ni’a në’ë, gunné’: “Le nácatë chinupá’a que laní na’, pero yugu’ bönni’ bulidza’ biti’ guláquië’ lesaca’ guídagaquië’ laní quia’. ⁹Guli’tséajtsöca’ gapa naca la’ nöza, en buli’lidza yúgu’të nupa tsöjxácali’ ni’ para guídagaca laní queébi’ bi’i bönni’ quia’ utsaga ná’abi’.” ¹⁰Ní’irö bila’rúajë’ ni’a në’ë na’, söjajúë’ gapa naca la’ nöza, ate’ bulu’tubë’ yúgu’të nupa yöjxáca’gaquië’, yugu’ bönni’ dxi’a, en yugu’ bönni’ tuá’ dö’, ate’ ga na’ raca laní bilíró bönachi.

¹¹‘Cate’ guyázië’ bönni’ na’ rinná bë’ë para uyúë’ nupa ni’ nudúbigaca, bilé’enë’ tu bönni’ biti’ nácuë’ lari’ tsahui’ le bunödzejë’ quegaquië’ bönni’ nacu’ë laní na’. ¹²Ní’irö gudxë’ bönni’ na’: “Bönni’-do’, ¿zöatso’ ni, en biti’ nacu’ lari’ tsahui’ bunödzejä’ quégaca nupa nacua’ laní?” Bönni’ na’ busayaj ru’ë. ¹³Ní’irö bönni’ na’ rinná bë’ë gudxë’ nupa na’ tun xichinë’, gunné’: “Guli’guga’ ni’a në’ë bönni’ ni. Guli’tsöjchú’un-në’ ní’ilö ga na’ rö’ö chul-la. Ní’ cödxë’, en utíl-la láyë’ë, lu yöl-la’ ruhu’ini queë’.”

¹⁴Ní’irö Jesús gudxë’ légaquië’:

—Zian nupa nulidza’, pero nabábasö nupa ila’rógaca.

**Jesús ru’ë didza’ ca naca
le riguízxaj lázaru’**

(Mr. 12:13-17; Lc. 20:20-26)

¹⁵Ní’irö yugu’ bönni’ yudo’ fariseo na’ bulu’zë’ë ni’, ate’ gulún xtídza-gaquië’ ilunë’ ga bi innë’ Jesús para gaca ulu’zéguië’ Lë’ didza’. ¹⁶Para ilunë’ caní, gula’sól-lë’ë bal-lë’ bönni’ dá’gaquië’ légaquië’, len bönni’ dá’gaquië’ Herodes, ga zoë’ Jesús, nupa na’ gulé Jesús:

—Bönni’ Usedi, nöztu’ Li’ ru’u didza’ cátëze naca, en naca idútë li ca rusédinu’ ca naca queë’ Dios, en biti’ ru’i lądxu’u le ta’nná quiu’ bönachi, tu’ cabí ruchí’a rusöróu’ bönachi ca naca le ta’nnasö bönachi na’. ¹⁷Gudíxjöi’i netu’. ¿Nacxi runi li? ¿Naru’ run bayudxi, o biti’ run bayudxi quízxaj lastu’ queë’ César, bönni’ yödzö zi’tu’ na’ rinná bé’enë’ rë’u?

¹⁸Réquibe’enë’ Jesús té’ënnë’ ulu’béajë’ Lë’ didza’, ate’ gudxë’ légaquië’:

—Libi’ili’, bönni’ rulu’isö tsahui’ cuinli’, ¿bizx que ru’ili’ didza’ le ruzóa neda’ ra’ gu’a? ¹⁹Buli’lu’i neda’ dumí le riguízxaj lázali’.

Ní’irö bulu’lu’finë’ Lë’ tu dumí que yödzö Roma. ²⁰Jesús gunábinë’ légaquië’, rnnë’:

—¿Nuzxi lahui da’ ni, en nuzxi le nazúaj lë’e dumí ni?

²¹Të’ Lë’:

—Queë’ César na’.

Ní’irö Jesús gudxë’ légaquië’:

—Guli’guízxjë’ César le nequi queë’ César, ate’ Dios le nequi queë’ Dios.

²²Cate’ bila’yönnë’ lë ni, bulu’báninë’ ca naca didza’ tsahui’ bubí’ë Jesús, ate’ bulu’cá’anë’ Lë’, söhuóajtëgaquië’.

Ta'nabi yúdxinë' Jesús ca ulu'bán nupa chinátigaca

(Mr. 12:18-27; Lc. 20:27-40)

²³ La' dza ná'asó yugu' bönni' yudo' saduceo, bönni' na' ta'nné' biti' ulu'bán nupa chinátigaca, bila'dxiné' ga zoé' Jesús, ate' gula'nábiné' Lë', ²⁴ ta'nné':

—Bönni' Usedi, Moisés gunné': "Channö gátie' tu bönni' zóanu nigula queé', en cuntu nu bi'i zóabi' queé', ní'rö bi'i bóché'ë bönni' na' ral-la' utsaga ná'aleni'-nu nigula uzébi' queé', para cabí initi dí'a dza queé' bönni' bóchi'bi' na'." ²⁵ Gula'cuá'abi' gadxi bi'i bönni' ga zóatu', naca bóchi'gacabi'. Bi'i zí'alö na' butsaga ná'aleni'-nu nigula, ate' gútitebi'. Tu' cuntu nu bi'i queébi' zóabi', bi'i buropi na' butsaga ná'aleni'-nu nigula uzébi' queébi' bi'i bóchi'bi' na'. ²⁶ Lësca' caní guca queébi' bi'i buropi na', enca' queébi' bi'i bunni, en la' tuz ca guca quégacabi' igádxitebi', gulátibi' yúgu'tébi'. ²⁷ Ga búdxite gútinu ca' nigula na'. ²⁸ Cate' idxín dza ulu'bán nupa chinátigaca, ¿núzxilögacabi' bi'i gadxi ní' guéquinu nigula na' queébi', tu' bulu'tsaga ná'aleni'-nu yúgu'tébi' nigula na'?

²⁹ Ní'rö bubí'ë didza' Jesús, ate' rë' légaquié':

—Nachíxili' lib'ili' tu' cabí réajni'ili' le nazúaj lu guichi lá'ayi, en tu' cabí nún-bé'ëli' yöl-la' huáca queé' Dios. ³⁰ Cate' idxín dza ulu'bán nupa chinátigaca, bití'rö gaca yöl-la' rizóalen nigula, en biti' ulu'tsaga ná'agaquié', pero gáca-gaquié' ca ná'agaquié' gubáz lá'ayi queé' Dios nacu'ë yehua' yubá. ³¹ Ca na' ralla' ulu'bán nupa chinátigaca, ¿naru' cabí nulábanili' lë na' gudxi cazé' Dios lib'ili'? ³² Caní gunné': "Neda' naca' Dios queé' Abraham, en Dios queé' Isaac, en Dios queé' Jacob." Dios na' biti' náquié' Dios quégaca nupa nátigaca tsaz, pero

náquié' Dios quégaquié' bönni' ni nabán-gaquié' sal-la' gulátie'.

³³ Cate' bila'yöni bönachi nacuá' ní' didza' ni, bulu'bani ca naca lë na' ruséd-iné' Jesús léguequi.

Xibá queé' Dios le naca lo

(Mr. 12:28-34)

³⁴ Cate' guléquibe'ené' bönni' yudo' fariseo ca bené' Jesús, busayjé' ruá'agaquié' bönni' yudo' saduceo, ní'rö bulu'dubé' yúgu'té'. ³⁵ Tué' bönni' nút-sé'ë ládjagaquié', en nazéde' xibá queé' Moisés, gú'unné' si' bé'ë Jesús. ³⁶ Que lë ni na' gunábiné' Jesús, rnné':

—Bönni' Usedi, ¿bízxilö xibá queé' Dios naca lo?

³⁷ Jesús rë' lë':

—Idxi'inu' Xanu' Dios idú ládxi'u, en idú icja ládxi'do'o, enca' len idú yöl-la' réajni'i quiu'. ³⁸ Xibá ni naca lo, en nazá-ca'tëro. ³⁹ Xibá na' naca buropi, la' ca nácaté, en caní rna: "Idxi'inu' bóchi' luzó'o ca nadxi'i cuinu'." ⁴⁰ Chopa xibá ni ná'agaca ga röjlóz yúgu'té le rinná bé' xibá queé' Dios, en yúgu'té le bulu'séd-iné' bönni' gulu'ë didza' uláz queé' Dios.

¿Nuzxi xí'ini náquié' Cristo?

(Mr. 12:35-37; Lc. 20:41-44)

⁴¹ Tsanni ní' nacu'ë tsózxón bönni' yudo' fariseo na', Jesús gunábiné' légaquié', ⁴² rnné':

—¿Nacxi rusáca'li' queé'li' queé' Bönni' na' lë' Cristo? ¿Nuzxi xí'ini náquié'?

Bulu'bi'ë didza', ta'nné':

—Xí'ini xí'sóé' David náquié'.

⁴³ Ní'rö Jesús rë' légaquié':

—¿Bízx que na' lë cazé' David bulidzé' Lë', gunné': "Xana"? Caní gunné' cate' ní' bé'ë didza' uláz queé' Dios Bö' Lá'ayi, gunné':

⁴⁴ Xanru' Dios gudxé' Xana':

"Guró'ö cuita lë'a ibëla,

cate' gunra' ga ulu'zechu xí'ibigaca Lo' nupa tequi Li' zí'."

⁴⁵ Channö David na' gunné' queé' náquié' Xané', ¿nacxi caz naca, rnnali' náquié' xzí'ini xí'sóé' David na'?

⁴⁶ Cuntu nu guca ubí'i didza', ate' ga gusí lo dza na', cúnturö nu burugui bi inábini Lë'.

**Jesús ruzégui'ë yugu'
bönni' yudo' didza'**

(Mr. 12:38-40; Lc. 11:37-54; 20:45-47)

23 Ní'rö Jesús bé'lené' bönachi nacua' ni' len yugu' bönni' usédi queé' didza'. ² Rë' légaquié':

—Yugu' bönni' yudo' fariseo, en yugu' bönni' yudo' usedi nuhuóázagaquié' xilatjé' Moisés, en tu'sediné' bönachi. ³ Que læ ni na', guli'gún yúgu'té le ilé' libí'ili', pero biti' gunli' libí'ili' ca na' tuné' légaquié', tu' tu le ta'nné', en ia'tú le tuné'. ⁴ Le ta'nná bé'ené' bönachi naca ca tu yua' zí'i le cabí sequi' nu guá', ate' tu'gu'ë le ya'zxicjagaca bönachi, pero légaquié' biti' té'enné' ulu'tené' le, caléga len tuze xibón ná'agaquié'. ⁵ Yúgu'té le tuné', tuné' para ila'lé'e bönachi légaquié', tu' tuné' zxön le túgui'ë yen ná'agaquié', en ra' xigágaquié' ga na' nuzúajgaquié' tu le nazúaj lu guichi lá'ayi, en tu'tunné' luzxi lari' nácugaquié'. ⁶ Té'enné' ila'bö'ë ga naca lataj lo ga na' tu'dubé' tahué', enca' ga na' naca lataj lo lu yu'u ga tu'dubé' tu'sédé' queé' Dios. ⁷ Lësca' caní, té'enné' ulu'gapa bönachi légaquié' didza' ba zxön gapa naca lógaca bönachi, en té'enné' ilé' bönachi légaquié': "Padiux, bönni' usedi."

⁸ Pero libí'ili', biti' ral-la' gunli' ga nu guíé libí'ili': Bönni' Usedi, tu' zoa tuz Nu naca Bönni' Usedi queé'li', neda', Cristo, ate' yúgu'téli' nácali' bóchi'li' tuli' ia'tuli'. ⁹ Cuntu nu guié'li' luyú ni, biti' innali': Xuz, tu' zoa tuz Nu naca Xúzili', zoé' yehua' yubá. ¹⁰ Biti' gunli' ga nu guíé libí'ili': Xan, tu' zoa tuz Nu naca Xanli', neda', Cristo. ¹¹ Nu nutsa' ladjali' nu run xichinli' ia'zica'röli', nu ni na' gácarö lo

ga zóali'. ¹² Channö nu uzóa cuini lataj lo, cá'asö ugá'ana nu na', pero nu naca nöxaj ladxi', gaca lo.

¹³ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ruzága'li' nöza sójácalen bönachi para ila'dxin ga ni' rinná bé'ë Dios yehua' yubá. La' libí'isili' biti' sequi' tsú'uli', en biti' ruf'ili' lataj ila'yú'u nupa té'ëni ila'yú'u.

¹⁴ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Rugúali' yugu' lidxigacanu nigula uzé'bido', en para ulu'isö tsahui' cuinli', xidzé rulídzali'-né' Dios. Que læ ni na', zí'terö irugu queé'li' quí'í sáca'li'.

¹⁵ Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli'. Ridódili' idú lu nísado', en idú yödzölió ni para gunli' ga tseaj ládxé'ë tu bönni' Dios tsözxón len libí'ili', en cate' chiguzxéqui'li'-né', runli' ga nabága'rë' xigua' ca libí'ili', ate' tsöjtsu'ë lu guí gabila.

¹⁶ Bica' bayechi' libí'ili'. Nachul-la loli', ate' ré'ënilí ulu'í'ili' nöza bönachi. Caní naca queé'li' tu' rnnali': "Channö bi rizí' lu në'ë tu bönni' ni'a que yudo', biti' run bayudxi, pero channö runé' le ni'a que oro dzö'ö yudo', bayudxi gun." ¹⁷ Libí'ili', bönni' lo chul-la, en tu' caréajni'i. ¿Bízxilö nácáro lo? ¿Naru' oro na', o yudo' le run lá'ayi oro na'? ¹⁸ Lësca' caní rnnali': "Channö nu bönni' guné' le ni'a que bucugu lá'ayi, biti' gun bayudxi, pero channö guné' le ni'a que gun zxoa lahui, bayudxi gun." ¹⁹ Libí'ili', nazídili', en nachul-la loli'. ¿Bízxilö nácáro lo? ¿Naru' gun zxoa láhuisö, o bucugu lá'ayi na' run lá'ayi gun na'? ²⁰ Que læ ni na', channö nu bönni' runé' le ni'a que bucugu lá'ayi, runé' le ni'a que le, enca' ni'a que yúgu'té le zxóagaca láhuisö. ²¹ Lësca' caní, channö nu bönni' runé' le ni'a

que yudo', runë le ni'a que le, enca' ni'a queë' Dios, nun cazë xilatjë ni'. ²²Lësca' caní, channò nu bönni' runë le ni'a que yehua' yubá, runë le ni'a que lataj ga rö'ë rinná bë'ë Dios, enca' ni'a que Lë cazë' Dios rö'ë ni'.

²³'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isò tsahui' cuinli'. Caní naca queéli' tu' riguízxjali' que yudo' tu cò huéaj tu' chi cò le rizí'ili' que xòhuéaj, en que guixi' anís, en que comino la' huagu, pero rucá'anali' le nácarö lo le rinná bë' xibá queë' Dios, tu' cabí runli' le naca tsahui', en biti' ruhuéchi' ládxi'li' luzá'ali', en biti' réajlë'éli'-në' Dios. Yugu' lë ni run bayudxi gunli', en lës biti' ucá'anali' ia'zica'rö lë na' runli', le riguízxjali' que yudo'. ²⁴Libí'ili', nachul-la loli', en ré'ënili' ulu'í'ili' nöza bönachi. Ca na' runli' naca ca rudódili' bödzádzado' le ré'jali', rubéajgacali'-ba' bó'iyudo', pero ré'jali'-ba' böa' ta'bíë'-ba' bönni'.

²⁵'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isò tsahui' cuinli'. Nácali' ca zxíga'do' ré'jali', en yó'öna ráhuili'. Rigubili' le nuá' cuita lë'e, pero lu icja ládxi'do'oli' nalí yugu' le ribanli', en yugu' le ruá' dö' runli'. ²⁶Libí'ili', bönni' yudo' fariseo lo chul-la. Zí'alò guli'quibi le nuá' lu zxíga'do', en lu yó'öna, lë na' sa'yéaj gácali' tsahui' lu icja ládxi'do'oli', para gácali' ca' tsahui' cuita lë'éli'.

²⁷'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isò tsahui' cuinli'. Caní naca queéli' tu' nácali' ca yugu' yeru ba quégaca nupa chinátigaca, le náca-gaca chiguí'chido'os cuita lë'e, en le nácatë lachi nalá'gaca, pero nalí'gaca dxita quégaca nupa chinátigaca, enca' yúgu'të le siguti. ²⁸Lësca' caní nácali' libí'ili'. Le nácatë láchuisö rulu'í' cuinli' tsahui' ló-gaca bönachi, pero lu icja ládxi'do'oli'

nalilí' yugu' le rulu'isò tsahui' cuini, en le ruá' dö' runli'.

²⁹'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isò tsahui' cuinli'. Ruchísali' biquitaj que ba gapa nagáchi'-gaquië' bönni' gulu'ë didza' uláz queë' Dios, en ru'í'ili' biquitaj gapa nagáchi'-gaca bönachi tsahui'. ³⁰Lësca' caní rn-nali': "La'tu' zóatu' dza ni'te cate' gula'cu'ë xuz xtó'otu', biti' guntu' légaquië' tsözxón cate' gulútië' yugu' bönni' gulu'ë didza' uláz queë' Dios." ³¹Tu' rnnali' caní, la' libí'isili' runli' ba nalí nácali' zxí'ini xi'sóagaca nupa ni' bétigaca yugu' bönni' gulu'ë didza' uláz queë' Dios. ³²Caní naca, rusubaga' cuinli' xíguia' na' gula'báguië' xuz xtó'oli'.

³³'Libí'ili' na', nácali' ca yugu' bëla sínia', en di'a dza quégacaba' bëla sínia'. ¿Nacxi caz uláli' lu le usaca' zi' libí'ili' lu gu' gabila? ³⁴Que lë ni na', neda' isól-la'a queéli' yugu' bönni' ilu'ë didza' uláz queë' Dios, enca' yugu' bönni' ta'yéajni'inë', en yugu' bönni' usedi. Yugu' bönni' ni, bal-lë' gútili'-në', en ia'zica'rë' udá'ali' lë'e yaga cruz, en ia'zica'rë' quinli' gapa naca lu yu'u ga rudúbili' rusédali' queë' Dios, ate' ulágali' légaquië' tu ia'tú yödzö. ³⁵Caní gaca, ibá-gali' libí'ili' xíguia' que idútë rön quégaquië' bönni' tsahui' le gulalaj luyú, ga gudela' nu bëti Abel, bönni' tsahui', ga ridxintë nupa bétigaca Zacarías, zxí'inë' Berequías, bönni' na' bétili'-në' gatsaj láchui'lö ga dë yudo', en ga dë bucugu lá'ayi ga na' tu'zéguië' böa' bédxido' lahuë' Dios. ³⁶Le nácatë rea' libí'ili', yúgu'të lë ni ila'baga' bönachi nacua' dza ni zóaru' na'a.

**Jesús ribödxë' ni'a
que yödzö Jerusalén**

(Lc. 13:34-35)

³⁷Lësca' caní gunné' Jesús:

—Jerusalén, Jerusalén, libí'ili' na' rúti'gacali'-nē' bönni' tu'ē didza' uláz queē' Dios, en rulá'dxi'gacali' guió'j nupa nasól-lē'ē Dios. Zían luzuí' gú'unida' utuba' libí'ili' quia', ca runba' yō-jede, rutúbiba' bórado' queé'ba' zxan xíliba', pero biti' gú'unili'.³⁸ Buli'yútsō-ca', cá'asō ugá'ana yu'u lídxili'.³⁹ Caní gaca, tu' rea' libí'ili', na'a isí lo biti' ulé'eli' neda' cate' inná'róli': "Lá'ayi náquiē' Bönni' na' zē'ē uláz queē' Xanru'."

**Riguí'xjō'ē Jesús ca si'
ulu'quínna'jē' yudo'**

(Mr. 13:1-2; Lc. 21:5-6)

24 Birúajē' Jesús chila yudo', en tsanni ni' rizé'ē ni', gula'bígui'ē bönni' usēda queē' ga na' zoē', ate' bulu'lu'f'inē' Lē' ca nácagaca zō'ō nagú'u-gaca lē'a yudo'.² Bubi'ē didza' Jesús, ate' rē' légaquiē':

—¿Rilé'etseli' yúgu'tē lē ni? Le nácatē rea' libí'ili', biti' ca' ugá'ana guió'j naba-ga' luzé'e ni, le cabí iguínna'j.

**Le ilaca bē' chizóa idxín
dza údxi que yōdzólió**

(Mr. 13:3-23; Lc. 21:7-24; 17:22-24)

³ Cate' ni' rō'ē Jesús ga naca lu Gu'fa Yaga Olivo, bila'dxinē' bönni' usēda queē' ga na' zoē' queé'zē', en tē' Lē':

—Gudí'xjō'i' netu', ¿bátaxi ilaca lē ni, en bizxi gaca bē' dza huōdu', en dza údxi que yōdzólió ni?

⁴ Ní'irō bubi'ē didza' Jesús, ate' rē' légaquiē':

—Buli'yú para cabí nu si' ye'e libí'ili',⁵ tu' zá'gaquiē' zían bönni' légaquiē' ca lea' neda'. Ila'nnē' nácagaquiē' Cristo, en ila'z'í' yé'enē' bōnachi zían.⁶ Huayónili' raca gudil-la, en le ru'f'i didza' que gudil-la, pero biti' có'óli' bōniga, tu' ral-la' ilaca yúgu'tē lē ni, pero cabí ridxini dza údxi cate' ilácarō lē ni.⁷ Til-la tu yōdzō len ia'tú yōdzō, ate' tu ga nu rinná bē' len

ia'tú ga nu rinná bē'. Ilatsaj yōdzōhué' zxon, en gaca gubín, ate' zían lataj tōdi budó' zxu'.⁸ Yúgu'tē lē ni nácagaca le isí lógaca yugu' le ila'gu'f'i ila'zaca' bōnachi.

⁹ Ní'irō ulu'dōdi bōnachi libí'ili' lu na' nu usaca' z'í' libí'ili'. Yúgu'tē bōnachi ulu'd'f'i libí'ili' tu' dá'ali' neda', en ilú'tiē' bál-lali' libí'ili'.¹⁰ Cate' gaca caní, gaca chopa ládxi'gaca zían bōnachi, en ulu'cá'ana neda', ate' udōdi tu ia'tú luzé'e, en tu ia'tú udf'i luzé'e.¹¹ Ní'irō ulu'lu'f'i lógaquiē' zían bönni' ta'z'í' yē'ē. Ulu'lu'f'i cuín'gaquiē' ca yugu' bönni' tu'ē didza' uláz queē' Dios, en ila'z'í' yé'enē' bōnachi zían.¹² Iluá'ada' dō' bōnachi, ate' que lē ni na' bítirō ila'dx'i' bōchi' luzé'eguequi.¹³ Nu guequi tsaz queē' Dios ga idxintē dza údxi, nu ni ulá.¹⁴ Idú yōdzólió gaca libán que didza' dxi'a ca rinná bē'ē Dios para gaca ba nalí que lógaca yúgu'tē bōnachi izá'a, ate' ní'irō idxín dza údxi.

¹⁵⁻¹⁶ Nu ulaba lē ni ral-la' uzéa-jni'i ladxi'. Gunné' Daniel, bönni' bē'ē didza' uláz queē' Dios, gunné': "Tsaza le rud'f'inē' Dios lataj lá'ayi queē' Dios, lē na' rusuniti." Cate' ilé'eli' gaca caní, ní'irō nuli' zóali' luyú Judea ral-la' tsójxúnna'jli' saca' gu'ado'.¹⁷ Nu dxía ícjo'olō biti' gal-la' huōtaj tsójx'f' bi dē que lu yu'u, pero ral-la' izxúnna'jtē.¹⁸ Nu zoa la' guixi', biti' gal-la' huóaj tsójx'f' lari' que.¹⁹ Bica' bayechi' yugu' nigula si' ulu'zóanu b'f'ido' quégacanu, enca' nigula ni' tu'gá'dxi'nu-bi' b'f'ido' quégacanu cate' idxín dza ni'.²⁰ Buli'lidzē' Dios inábili'-nē' cabí idxín dza ni' izxúnna'jli' cate' raca beo' ziaga o cate' naca dza lá'ayi,²¹ tu' ila'gu'f'i ila'zaca'tērō bōnachi dza ni' ca gula'gu'f'i gula'zaca' bōnachi dza ni'te cate' si' guta' guró'ō yōdzólió, ga ridxintē na'a dza, en calēga dza zá'gaca biti' ila'gu'f'i ila'zaca' caní.²² Cate' idxín dza ni', channō Dios biti' cuéqui lahué' quégaquiē', cuntu nu ulá, pero

cuéqui lahué' quégaquié' dza ni', en gácalené' nupa guró cazé' Lë'.

²³ Ní'irö bití' tséajlë'ëli' channö nu idxín queé'li', en guié libí'ili': "Buli'yútsöca', ni zoé' Cristo", o inná: "Ni' zoé'." ²⁴ Ulu'lu'í lógaquié' zían bönni' ta'z'í yé'ë, en ila'nné' nácagaquié' Cristo, o ila'nné' tu'é didza' uláz queé' Dios. Iluné' le ilaca bé', en le ilún ga ulu'bani bö-nachi, ate' ila'z'í yé'ené' nupa guró cazé' Dios channö huala'zéqui'né'. ²⁵ Buli'yútsöca', chigudxi caza' libí'ili' yúgu'té lë ni z'atëlö ca si' ilaca. ²⁶ Que lë ni na', bití' irúajli' channö ila'dxín queé'li' nupa ilé libí'ili': "Buli'yútsöca', ni' zoé' Cristo lu lataj cá'asö." Lësca' caní, bití' tséajlë'ëli' channö ila'nná: "Buli'yútsöca', lu yu'u zoé'." ²⁷ Ca na' raca cate' rëpi yösa ga rilén gubidza, en ruzení' ga ribía gubidza, lësca' caní gaca cate' huöda' neda', Bönni' Guljé' Bönachi. ²⁸ Ilácaté caní, ca na' ta'nná bönachi: "Gátitës ga dë tu le nati, ni' ulu'dubi cázaba' bíchulab."

**Ca gaca cate' huödë'
Bönni' Guljé' Bönachi**

(Mr. 13:24-37; Lc. 21:25-33;
17:26-30, 34-36)

²⁹ Gunné' ca' Jesús:

—Tödi yugu' dza ni' cate' ila'gu'í ila'zaca' bönachi caní, ichul-la gubidza, ate' beo' bití' gunna bení' que. Ila'guín-najba' bölej lúzxiba, ate' ila'zxízi le nalá'gaca naca tsutsu lúzxiba. ³⁰ Ní'irö ilá' lahui lúzxiba le gaca bé' huöda' neda', Bönni' Guljé' Bönachi, ate' ila'bödxi yechi' yúgu'té bönachi yödzölió ni, cate' ila'lé'e neda', Bönni' Guljé' Bönachi, suzá'a lu böaj lúzxiba, dë lu na'a yöl-la' unná bé', en yöl-la' huáca zxön. ³¹ Ní'irö isól-la'gaca'né' gubáz lá'ayi quia'. Ulu'cödxé' zidzaj lúzuba' böa' guixi', ate' ulu'tubé' nupa nabóa' quia', nacua' idapa la'atë yödzölió, en yúgu'té lataj zxan lúzxiba.

³² 'Buli'zéajni' i ládxi'li' le rusedi libí'ili' le raca que yaga higo. Cate' ta'lén ni'a né'e yúludo', en chirubía xilagui' yúludo', inózili' chizóa idxín cusubá. ³³ Lësca' caní, cate' ilé'eli' taca yúgu'té lë ni, inózili' chizóa idxín dza údxi na', en chiridzaga lahui. ³⁴ Le nácaté rea' libí'ili', yúgu'té lë ni ilaca z'atëlö ca ilátigaca bönachi nacua' dza ni'. ³⁵ Huadödi quégaca lúzxiba, en luyú ni, pero yugu' xtídz'a'a bití' ila'dödi cá'asö.

³⁶ 'Cate' idxín dza ni' cuntu nu nözi. Bití' nózguequiné' gubáz lá'ayi queé' Dios nacué' yehua' yubá, en bití' nözda' neda', Zxí'iné' Dios, pero tuzé' Dios Xuz nóziné'.

³⁷ 'Ca na' guca dza cate' ni' zoé' Noé, lësca' caní gaca cate' huöda' neda', Bönni' Guljé' Bönachi. ³⁸ Yugu' dza ni' z'atëlö ca si' idxín nisa guiój le busuniti yödzölió, gulé'aj gulahué', bulu'tsaga ná'agaquié', en bulu'dödé' zxf'inigaquié' lu yöl-la' rutsaga na' ga bidxinté dza guyázié' Noé lë'e barco zxön ni' bené', ³⁹ en bití' gulé'quibe'ené' cate' bidxinté nisa guiój le busuniti yödzölió, ate' gula'nítie' yúgu'té'. Lësca' caní gaca cate' si' huöda' neda', Bönni' Guljé' Bönachi, cuntu nu gué'quibe'e. ⁴⁰ Dza huöda' ila'cu'é chopé' bönni' la' guixi'. Tué' uché'a-né' quia', ate' ia'tuté' ucá'ana'-né'. ⁴¹ Ila'cuá'anu chópanu nigula nacua'anu huétu. Tunu uché'a-nu quia', ate' ia'tunu ucá'ana'-nu.

⁴² 'Buli'subán ládxi'li' tu' cabí nózili' bizxi dza huöda' neda', Xanli'. ⁴³ Na'a, guli'tséajni' i lë ni. La'tu' nóziné' xan yu'u bizxi dza guídé' gubán, huané'ë yëla, en bití' gu'é lataj nu quidaj zö'ö para cuan le dzö'ö lidxé'. ⁴⁴ Que lë ni na', buli'subán ládxi'li' ca' libí'ili', tu' huöda' neda', Bönni' Guljé' Bönachi, tu dza bití' nuzóa icjali'.

**Bönni' huen dxin tsahui', en bönni'
huen dxin biti' náquië' tsahui'**

(Lc. 12:41-48)

⁴⁵ Gunné' ca' Jesús:

—¿Nuzxi caz bönni' huen dxin náquië' tsahui', en réajni'iné', bönni' huen dxin na', xané' cu'è lu në'è bönachi nacua' lidxé' para gu'è le ilágugaca cate' idxín dza? ⁴⁶Bica' ba bönni' huen dxin na' náquië' tsahui', bönni' na', cate' udx-iné' xané', uduxáquië' lë' caní runé' le nudödë' xané' lu në'è. ⁴⁷Le nácatë rea' lib'íli', yúgu'të le dë queë' xané', udödë' lu në'è bönni' huen dxin na' runé' caní. ⁴⁸Channö huóáquië' bönni' huen dxin queë' huiá' dö', en sa' ládxë'ë, inné': "Huadzené' xana', en biti' huódatië'", ⁴⁹en channö isí lahué' gundë' zi' bönni' túnlené' lë' tsözxón dxin, en isí lahué' ca' gu'áj gágulené' nupa ta'zudxi, ⁵⁰ní'irö huödë' xané' bönni' huen dxin na' tu dza cate' biti' zoë' ribözë', o tu yëla biti' réquiné'. ⁵¹Ní'irö xané' na' usaca' zí'dë'ë bönni' huen dxin na', en guné' ga gaca queë' ca na' ral-la' gaca quégaca nupa tu'luf'isö tsahui' cuínguequi. Ní'irö cödxí yeché'ë, en gagu zxea láyë'ë.

**Rucúdzü'ë didza' Jesús ca naca
quégacabi' chibi' bi'i nigula ra'bando'**

25 Gunné' ca' Jesús:
—Ca gaca quégaca nupa ila'yaza ga rinná bë'ë Dios yehua' yubá naca ca guca quégacabi' chibi' bi'i nigula ra'bando'. Gula'zí'ibi' le nuágaca gu' quégacabi', ate' bila'rúajbi' tsöjtságagacabi' bönni' utsaga në'ë. ²Gáyu'bi' nácagacabi' bi'i biti' ta'yéajni'ibi' ate' ia'gáyu'bi' nasína'gacabi'. ³Yugu' bi'i nigula biti' ta'yéajni'ibi' na' gula'zí'ibi' le nuágaca gu' quégacabi' pero biti' guluá'abi' ia'lati' za régui. ⁴Yugu' bi'i sina' na' guluá'abi' za régui lu bóga'do' quégacabi' len le nuágaca

gu' quégacabi'. ⁵Tu' gudzené' bönni' utsaga në'ë, gudödi yëla lógacabi', en gulásitëbi'. ⁶Cate' bidxín idú guluhuëla, biyón chi'i nu rinné zidzaj, rna: "¡Chizé'ë bönni' utsaga në'ë! ¡Guli'rúaj tsöjtságali'-në'!" ⁷Ní'irö gula'yásabi' yúgu'tëbi' bi'i nigula na', ate' bulu'pá'abi' le nuágaca gu' quégacabi'. ⁸Gulu'í'ibi' didza' bi'i biti' ta'yéajni'ibi' na', en gulëbi' yugu' bi'i sina' na': "Guli'gunna queëtu' láti'do' za régui queéli' tu' tu'úlu le nuágaca gu' queëtu' ni." ⁹Bulu'bí'ibi' didza' bi'i sina' na', gula'nnabi': "Biti' gaca, tu' cabí bi uga'ana queëtu', en queéli'. Guli'tséajtsöca' ga ridó'o za régui, tsöj'ó'uli' queéli'." ¹⁰Tsanni ni' söjácabi' söjxf'gacabi' le, bidxiné' bönni' utsaga në'ë. Yugu' bi'i na' nacua'abi' sina', en ta'bózbabi' lë' gula'yú'ulentëbi' lë' ga na' raca laní que utsaga na', ate' la' guyáyajtë yu'u. ¹¹Gudödi ni' ia'zica'röbi' bi'i nigula ra'bando' na' bila'dxinbi' ni', ate' bulu'lídzabi'-në', en gula'nnabi': "Xan, Xan, gusalaj queëtu'." ¹²Lë' bubí'ë didza', rnnë': "Le nácatë rea' lib'íli', biti' nözda' gazxi lib'íli'."

¹³Ní'irö Jesús gudxë' légaquië':

—Buli'subán ládxí'li', tu' cabí nözili' bizxi dza o bizxi yëla huöda' neda', Bönni' Guljé' Bönachi.

**Rucúdzü'ë didza' Jesús ca
naca que dumí zaca'**

¹⁴Gunné' ca' Jesús:

—Ca gun Nu na' rinná bë' yehua' yubá naca ca bené' tu bönni', chizóa tsejé' zí'tu'. Bulidzë' yugu' bönni' huen dxin queë' en gulu'ë yugu' le dë queë' lu ná'agaquië'.

¹⁵Tuë' bönni' huen dxin na', gulu'ë gayu' dumí nazaca' lu në'ë, ate' ia'túë' gulu'ë chopa dumí nazaca' lu në'ë. Ia'túë' gulu'ë tu dumí nazaca' lu në'ë. Tu tuë' gulu'ë lu në'ë tsca huéaj le ila'zéquí'në'. Ní'irö la' guzá'atë' ga naca zí'tu'. ¹⁶Guy-

ijë' bönni' huen dxin na' guzxi'ë gayu' dumí nazaca' na', en yójtíljalenë' le ia' gayu' dumí nazaca'.¹⁷ Lësca' caní, bönni' na' guzxi'ë chopa dumí na', yójtíljalenë' le ia'chopa ca'.¹⁸ Bönni' na' guzxi'ë tu dumí guyijë', en yóychó'önë' lu yu, ate' bucáchë'ë dumí queë' xanë' lu yu ni'.

¹⁹ Cate' chigudzé, budxinë' xángaquië' bönni' huen dxin na', ate' bucá'analenë' légaquië' tsahui'.²⁰ Ga gusí lo bidxin-të' bönni' na' guzxi'ë gayu' dumí nazaca' na', en sunu'ë ia'gayu' dumí ca', ate' rë' xanë': "Xan, gayu' dumí gulú'u lu na'a. Ni dë ia'gayu' dumí ca' yójtíljale-na' le."²¹ Xanë' na' rë' lë': "Naca dxi'a. Nacu' huen dxin tsahui'. Tsáhui'do' be-nu' cate' ni dë lu no'o láti'do'os. Na'a yénni'tërö cu'a lu no'o. Guyaza ga zoa', udzéalenu' neda'."²² Gudödi ni' bidxinë' ca' bönni' huen dxin na' guzxi'ë chopa dumí nazaca', ate' rnnë': "Xan, chopa dumí gulú'u lu na'a. Ni dë ia'chopa dumí ca' yójtíljale-na' le."²³ Ní'irö xanë' na' rë' lë': "Naca dxi'a. Nacu' huen dxin tsahui'. Tsáhui'do' benu' cate' ni dë lu no'o láti'do'os. Na'a, yénni'tërö cu'a lu no'o. Guyaza ga zoa', udzéalenu' neda'."²⁴ Ní'irö cate' bidxinë' bönni' huen dxin na' guzxi'ë tu dumí nazaca' na', rnnë': "Xan, nözda' nacu' bönni' bizxaj, tu' rulapu' ga bití' guzu', en rutubu' ga bití' guchilju'.²⁵ Que lë ni na' gúdxida' li', ate' guyija', yójcácha'a dumí quiu' lu yu. Ni dë na'a le nequi quiu'."²⁶ Ní'irö bu-bi'ë didza' xanë', en rë' lë': "Nacu' huen dxin bití' naca tsahui', en xóhuëdi. Nöz quézinu' rulapa' ga bití' guza', en rutuba' ga bití' guchilja'.²⁷ Que lë ni na', gácarö dxi'a quiu' la'tu' bunödzu' dumí quia' lu ná'agaquië' bönni' ulu'gunë' le dxin, ila'guíljalenë' le ia'lati', para cate' huöda' neda', uzi'a le nequi quia' len icja ca'."²⁸ Ní'irö xanë' na' gudxë' nupa naca' ni': "Gulí'cúa dumí na' dë lu në'ë bönni' ni, en gulí'cú'u le lu në'ë bönni' na' dë queë' chi dumí."²⁹ Núti'tës nu

rugún tsahui' dxin le dë queë', zoa nu unödzej queë' ia'lati', ate' gáta'da' queë', pero nu na' bití' rugún tsahui' dxin le dë lu në'e, la's dui le dë queë' idúa.³⁰ Na'a, bönni' huen dxin bití' naca tsahui' ni, gulí'tsójchú'una-në' ní'lö ga naca chulla. Ní' cödxí yéché'ë, en gagu zxea láyë'ë.

Cristo uchi'a usöröë' quégaca bönachi

³¹ Gunnë' ca' Jesús:

—Cate' ni' huöda' neda', Bönni' Guljë' Bönachi, idinná bë'a, ate' dzágagaquië' neda' yúgu'të gubáz lá'ayi quia', ní'irö cö'a lataj tsahui' quia', ga na' uchi'a usöröa' quégaca bönachi.³² Ulu'dubi dërö lahua' neda' bönachi yödzülió ni, ate' ucu'a léguequi tsölá'a huéaj ca runë' bönni' uyú bö'cu' zxila', rucu'ë-ba' tsölá'a huéajba' yugu' chivo, en yugu' bö'cu' zxila'.³³ Yugu' bö'cu' zxila' na' ucu'ë-ba' cuita lë'ë ibëla, ate' yugu' chivo na' ucu'ë-ba' cuita lë'ë yógöla.³⁴ Ní'irö, neda', bönni' unná bë', guía' nupa naca' cuita lë'a ibëla, inná': "Gulí'dá ga zoa', lib'ili' bubéajë' Xuza' lib'ili' quez queë'. Nequi queéli' lataj ga na' rinná bë'ë, lë na' bupé'ë queéli' dza ni'te cate' ni' benë' yödzülió.³⁵ Caní nequi queéli' tu' guduna', ate' bénnali' le gudahua'. Gubidxa' nisa, ate' bénnali' le gu'a. Guca' ca tu bönni' ridá zi'tu', ate' gulú'uli' neda' lídxili'.³⁶ Biyadzaj le gácu'a, ate' bugáculi' neda' le ráculi'. Güf'ida', ate' buduyúli' neda'. Guyu'a lidxi guíë, ate' buduyúli' neda'."³⁷ Ní'irö ulu'bi'ë didza' bönni' tsahui' na', ilé' neda': "Xan, ¿bátaxi bilé'etu' Li' gudunu', ate' bugágutu' Li'? ¿Bátaxi gubidxu', ate' bénnatu' le gu'u? ³⁸ ¿Bátaxi bilé'etu' Li' gudó' zi'tu', ate' gulú'utu' Li' lídxitu'? ¿Bátaxi biyadzaj le gacu', ate' bugácutu' Li' le rácutu'? ³⁹ ¿Bátaxi bilé'etu' Li' güf'imu', o guyú'u lidxi guíë, ate' buduyútu' Li'?"⁴⁰ Ubi'a didza' neda', bönni' unná bë', ate' guía' légaquië': "Le nácatë rea' lib'ili', tu' benli' caní queë' nu bön-

ni' bócha'ado' ni, sal-la' náquië' bönni' cá'asö, quia' neda' caz benli' ca'."

⁴¹ Ní'irö guía' nupa nacua' cuita lë'a yógöla, innía': "Gulí'cuíta ga zoa', libí'ili' na' nabága'li' xíguia', tsöjtsázali' lu guí' na' bití' ulu, lë na' bupé'ë Dios ní'a que tu' xihui', en quéguequi gubáz dá'gaca le. ⁴² Caní gaca queé'li' tu' guduna', ate' bití' bénnali' le gahua'. Gubidxa' nisa, ate' bití' bénnali' le guí'ja'. ⁴³ Guca' ca bönni' ridé' zí'tu', ate' bití' gulú'uli' neda' lídxili'. Biyadzaj le gácu'a', ate' bití' bugáculi' neda' le ráculi'. Güf'ida', enca' guyu'a lidxi guíë, ate' bití' buduyúli' neda'." ⁴⁴ Ní'irö ila'nná ca' nupa na', ilé neda': "Xan, ¿bátaxi bilé'etu' Li' gudunu', o gubidxu', o gucu' ca bönni' ridé' zí'tu', o biyadzaj le gacu', o güf'inu', o guyú'u lidxi guíë, ate' bití' gúcalentu' Li'?" ⁴⁵ Ní'irö ubi'a didza' neda', bönni' unná bë, guía' légaquië': "Le nácatë rea' libí'ili', tu' cabí bi benli' que tu nu nutsa' ladaj nupa nacua' ni, sal-la' naca cá'asö nu na', bití' bi benli' quia' neda'." ⁴⁶ Ní'irö bönachi tuá' dö' na' la' tsöjtsázagacatë ga ní' ila'guí'i ila'záca'tica'sö, pero bönachi tsahui' ní' gata' yöl-la' na'bán idú quéguequi.

Tun xtídza'gaquië' bönni' yudo' ila'zönë' Jesús

(Mr. 14:1-2; Lc. 22:1-2; Jn. 11:45-53)

26 Cate' budxi bëë Jesús yugu' didza' ni, gudxë' yugu' bönni' usëda queë', ² rnnë':

—Nöz quézili' ia'chopa dza idxín Laní Pascua, ate' dza na' neda', Bönni' Guljë' Bönachi, ulu'dödë' neda' lu ná'agaca nupa ulu'dá' neda' lë'e yaga cruz.

³ Ní'irö bila'dxinë' yugu' bixúz unná bë' len yugu' bönni' yudo' usedi, en bönni' gula tu'zéajni'inë' bönachi judío, ate' bulu'dubë' ga naca lö'a lidxi bixúz lo, lë' Caifás. ⁴ Ní' gulún xtídza'gaquië' ila'zönë' Jesús, lu yöl-la' rizi' yë' quégaquië', para ilútië' Lë'. ⁵ Ta'nnë':

—Bití' gunru' lë ni dza laní, para cabí ila'dzatsa bönachi.

Tu nigula rigú'unu le rilá' zxixi icjë' Jesús

(Mr. 14:3-9; Jn. 12:1-8)

⁶ Cate' ní' zoë' Jesús lu yödzö Betania lu yu'u lidxë' Simón, bönni' na' güf'inë' huë' nudzu' ruzödi, ⁷ bidxinnu cúdzu'lë' Jesús tu nigula, nuá'anu tu bóga'do' néquini guió'j nazaca', en yudzu tu le rilá' zxixi le nazáca'da', ate' gulú'unu le icjë' Jesús cate' ní' rö'ë rahuë'. ⁸ Cate' bila'lé'enë' bönni' usëda queë' Jesús lë ni, gula'lenë', ta'nnë':

—¿Bizx que réqui ditaj lë ni? ⁹ Guca nu guti' lë ni, en si' dumí zían para gácalenru' yugu' bönachi yechi'.

¹⁰ Cate' biyönnë' Jesús lë ni, rë' légaquië':

—¿Bizx que rnnë'li' queénu nigula ni? Tsahui' naca le bennu quia'. ¹¹ Yugu' bönachi yechi' ila'cuá'lentica'sö libí'ili', pero neda' bití' ugá'analentica'sa' libí'ili'. ¹² Le bennu nigula ni, gulú'unu neda' le rilá' zxixi ni, naca le rupá'anu neda' para dza igácha'a yeru ba. ¹³ Le nácatë rea' libí'ili', gáti'tës luyú yödzölió ga gaca libán que didza' dxi'a ni, lësca' ila'guixjö' bönachi le bennu nigula ni quia' para nu tsöjné lënu.

Rizi' lu në'ë Judas udödë' Jesús lu ná'agaquië' bönni' unná bë'

(Mr. 14:10-11; Lc. 22:3-6)

¹⁴ Ní'irö guyijë' Judas Iscariote ga na' nacu'ë bixúz unná bë'. Náquië' bönni' dzáguie' chínnuë' na' dá'gaquië' Jesús, ¹⁵ ate' gudxë' légaquië':

—¿Bizxi gúnnali' quia' channö neda' udöda'-në' Jesús lu ná'ali'?

Bulu'gá'analenë' lë' tsahui' ilu'ë lë' chi uruá' dumí plata. ¹⁶ Ní'irö gusí lahuë' Judas na' risí ribö'ë udödë' Jesús lu ná'agaquië'.

**Le ráguru' le rusá' ládxi'ru'
ca gútië' Xanru'**

(Mr. 14:12-25; Lc. 22:7-23;

Jn. 13:21-30; 1Co. 11:23-26)

¹⁷ Cate' naca dza risí lo laní quégaquië' bönni' judío cate' tahuë' yöta xtila le cabí nazí'í cúa zi que, gula'bígú'í'ë bönni' usëda queë' Jesús ga zoë', en tè' Lé':

—¿Gazzi ré'ënu' tsöjpa'atu' queëru' para gáguru'-ba' bö'cu' xzfla'do' dzö' Laní Pascua?

¹⁸ Jesús ré' légaquië':

—Gulí'tséajtsóca' yödzo ni' ga na' zoë' tu bönni', en gulí'guíë': "Bönni' ruséd-inë' netu' rnnë': Chizá' gala' dza quia'. Lu yu'u lidxu' gágulengaca'-në' bönni' usëda quia' bö'cu' xzfla'do' dzö' Laní Pascua."

¹⁹ Ní'irö gulunë' bönni' usëda queë' ca na' gunná bé'enë' Jesús légaquië', ate' bulu'pé'ë le ilahuë' dzö' Laní Pascua.

²⁰ Cate' chigudzó' dza na', Jesús guró'lenë' idxinnutë' bönni' usëda queë' tahuë'. ²¹ Tsanni ni' tahuë', Jesús ré' légaquië':

—Le nácatë rea' libí'ili', tu nu nutsa' ladjali' ni udödi neda'.

²² Ní'irö bulu'huf'ini ládxi'gaquië', en gula'nábinë' Jesús tu tuë', ta'nnë':

—Xan, ¿naru' neda'?

²³ Bubi'ë didza' Jesús, rnnë':

—Bönni' ni runé' në'ë tsözxón len na'a lu yó'óna, bönni' ni udödë' neda'. ²⁴ Le nácatë neda', Bönni' Guljë' Bönachi, uyija' ga gátia' ca na' nazúaj lu guichi lá'ayi ca ral-la' gaca quia', pero bica' bayechi' nu na' udödi neda' gátia'. Gácarö dxi'a queë' bönni' na' la' cabí guljë'.

²⁵ Ní'irö bubi'ë didza' Judas, bönni' na' udödë' Jesús, rnnë':

—Bönni' Usedi, ¿naru' neda'?

Jesús ré' lé':

—Ön, lí' na'.

²⁶ Tsanni ni' tahuë', gudélë'ë Jesús yöta xtila, en gudxë' Dios: "Xclenu'."

Ní'irö buzxuzxjë' le, en bunödzejë' quégaquië' bönni' usëda queë', rnnë':

—Gulí'sí', gulí'gagu. Lë ni le naca caza'. Ca bena' que yöta xtila ni ruluf'í ca gaca que le naca caza'.

²⁷ Gudélë'ë ca' tu xziga'do', en gudxë' Dios: "Xclenu'." Ní'irö bunödzejë' ca' quégaquië', rnnë':

—Gulí'gui'aj yúgu'tëli'. ²⁸ Lë ni ruluf'í ca naca xichöna' le run tsutsu didza' cubi rucá'ana tsahuí'. Xichöna' na' ilalaj ní'a quégaca bönachi zían para gaca uniti lahuë' Dios yugu' dul-la' nabága'gaquië'. ²⁹ Rea' ca' libí'ili', bíti'rö guf'ja' xisi le ribía lubá uva ni cate' idxinrö dza ni' guf'jalena' libí'ili' tu le cubi ga ni' rinná bë'ë Xuza'.

**Jesús rnnë' innë' Pedro
biti' núnbë'ë Lé'**

(Mr. 14:26-31; Lc.

22:31-34; Jn. 13:36-38)

³⁰ Cate' budxi gulúl-lë' yöl-la' ba queë' Dios, yójáquië' lu Guf'a Yaga Olivo.

³¹ Ní'irö Jesús ré' légaquië':

—Yúgu'tëli' gaca chopá ládxi'li', en ucá'anali' neda' na'a dzö' ni, tu' nazúaj lu guichi lá'ayi ca gaca quia', le rnna: "Guna' ga gátie' Bönni' Uyú Bö'cu' Zx-ila', ate' ilásilasiba' bö'cu' xzila' na'."

³² Cate' ubana' lu yöl-la' guti, ní'irö tséaja' tsöjnröua' lolí' saca' luyú Galilea.

³³ Ní'irö bubi'ë didza' Pedro, en ré' Jesús:

—Sala' ilaca chopá ládxi'gaquië', en ulu'cá'anë' yúgu'të' Lí', neda' biti' gaca chopá ládxa'a, biti' ucá'ana' Lí'.

³⁴ Jesús gudxë' lé':

—Le nácatë rea' lí', na'a dzö' ni, cate' sí' códxilöba' böra, lí' innó' tsonna luzuí biti' núnbë'u neda'.

³⁵ Ní'irö Pedro gudxë' Jesús:

—Sal-la' gátilentea' Lí', biti' ca' inní'a' biti' núnbë'a Lí'.

Lësca' caní gula'nnë' yúgu'të bönni' usëda queë'.

Jesús rulidzë' Dios la' yëla Getsemaní

(Mr. 14:32-42; Lc. 22:39-46)

³⁶ Ní'irö Jesús bidxínlenë' légaquië' la' yëla Getsemaní, atë' gudxë' yugu' bönni' usëda queë' na', rnnë':

—Gulí'cö'tsöca' ni tsanni tséaja' ia'lati' ní'ilö, tsöjlidza'-në' Dios.

³⁷ Jesús guchë'ë Pedro len iropë' zxf'inë' Zebedeo, atë' gusí lahuë' ruhu'innë', en risëbi ládxxë'ë. ³⁸ Ní'irö Jesús gudxë' légaquië':

—Ruhuf'ini ládxa'a, en huáti caza' lu yöl-la' risëbi ladxí'. Gulí'gá'ana ni, en gulí'ná' yëla tsözxón len neda'.

³⁹ Gudödë' Jesús ia'láti'do' ní'ilö, atë' ni' biyéchuë'. Busudxín lahuë' lu yu, en bulidzë' Dios, gunné':

—Xuza', channö huáca, ben ga bití' gun bayudxi qui'i saca'a lë ni, calëga ca ré'ënda' neda', pero ca ré'ënu' Li' gunu'.

⁴⁰ Cate' budxinë' Jesús ga na' nacu'ë bönni' usëda queë', yöjxáquië' légaquië' tasië', atë' rë' Pedro:

—¿Naru' cabí gúcatsö iná'alenu' neda' tsözxón yëla tu ch'ído'? ⁴¹ Gulí'ná' yëla, en bulí'lidzë' Dios inábili'-në' gácalenë' lib'íli', para cabí giú'íli' Satanás tu' xihui' lataj si' bë' lib'íli' le xihui'. Bö' naca cázali' nasína'tica'sö, pero lu yöl-la' bönáchisö queé'li' nacuí'di'li'.

⁴² Ní'irö guyijë' Jesús le buropi luzuí, en bulidzë' Dios, rnnë':

—Xuz, channö cabí gaca gunu' ga bití' qui'i saca'a lë ni, ben ca raza ládxxu' Li'.

⁴³ Cate' bóajë', leyúbölö buduxaquië' légaquië' tasië' tu' nadódirö yëla guiój lógaquië'. ⁴⁴ Ní'irö bucá'anë' Jesús légaquië', atë' guyijë' leyúbölö, en bulidzë' Dios le bunní luzuí, atë' tuz ca gunné' z'íalö rnnë'. ⁴⁵ Leyúbölö bóajë' ga na' nacu'ë bönni' usëda queë', en rë' légaquië':

—¿Rásitsali' na'a, en ruzi'tsö ládxi'li'? Bulí'yútsöca', chibudzaga lo. Neda', Bönni' Guljë' Bönachi, chinadóda' lu

ná'agaquië' bönni' dul-la'. ⁴⁶ ¿Gulí'chasa, uyéajru'! Bulí'yútsöca', bönni' na' rudödë' neda' chibidxinë' ni.

Ta'chë'ë Jesús nadzunë'

(Mr. 14:43-50; Lc. 22:47-53; Jn. 18:2-11)

⁴⁷ Tsanni ni' ru'ë Jesús didza' ni, Judas, bönni' nabábalenë' idxínnutë' na', la' bidxintë' ni', atë' dzágagaquië' bönni' zían lë', nuá'agaquië' gufé tuchi', en yugu' yágado'. Yugu' bixúz unná bë', en bönni' gula tu'zéajni'inë' bönachi judío nasól-la'gaquië' légaquië'. ⁴⁸ Judas, bönni' na' rudödë' Jesús, chibuluf'inë' légaquië' tu le gunë' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. Gulí'sönë'.

⁴⁹ Ní'irö gubígui'ë Judas ga na' zoë' Jesús, rnnë':

—Padiux, Bönni' Usedi.

Ní'irö la' busudxín lotë' Lë'. ⁵⁰ Jesús rë' lë':

—Böcha'a, ¿bizxi huen zo'o ni?

Ní'irö gula'biguë'ë bönni' na', atë' gula'zönë' Jesús. ⁵¹ Tuë' bönni' dzáguië' Jesús gulecjë' gufé tuchi' queë', en benë' huë', guchúguië' guídi náguië' bönni' huen dxin queë' bixúz lo. ⁵² Jesús gudxë' lë':

—Bugú' gufé tuchi' quiu' lidxi. Yúgu'të nupa tu'dí'ini gufé tuchi', lu gufé tuchi' ilátigaca. ⁵³ ¿Naru' cabí nózinu' huáca ulidza' Xuza', atë' Lë' la' isól-la'të' zían-tërö ca chinnu cö' gubáz lá'ayi le naca zían gáyu'ë tu cö' huéaj? ⁵⁴ Channö guna' caní, ¿nacxi gaca udxín le nazúaj lu guichi lá'ayi, le rnna caní ral-la' gaca quia'?

⁵⁵ Ní'irö Jesús gudxë' yugu' bönni' ni':

—¿Birúajtsali' nuá'ali' gufé tuchi', en yágado' para sönli' neda' ca runlí rizónli'-në' gubán? Yugu' dza gurö'a loli' ga naca lu chila yudo', en busédigacada' bönachi, pero bití' guzxónli' neda'. ⁵⁶ Raca caní yúgu'të lë ni para udxín le

nazúaj lu guichi lá'ayi, ca na' gula'nné' bönni' gulu'ë didza' uláz queé' Dios.

Ní'irö yúgu'të bönni' usëda queé' Jesús bulu'cá'ané' Lë', en bulu'zúnna'jé' ni'.

Ridxiné' Jesús lógaquié' bönni' yudo'

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷Ní'irö yugu' bönni' na' zóngaqüé' Jesús gula'ché'ë Lë', ate' bila'dxiné' lahué' Caifás, bixúz lo, ga ni' nudúbigaquié' ca' yugu' bönni' yudo' usedi len bönni' gula tu'zéajni'iné'. ⁵⁸Pedro söjnháhué' Jesús zi'tu' zí'tu'sö, en bidxiné' ga naca lö'a lidxi bixúz lo na', para ilé'ené' nacxi utságuié' Jesús.

⁵⁹Yugu' bixúz unná bé' len bönni' gula tu'zéajni'iné', en bönni' yudo' tu'chi'a tu'söróé', bulu'guiljé' nu uzegui Jesús didza' sal-la' si' yé'ë bönni' na', para gaca ila'chúguié' queé' gátie'. ⁶⁰Cuntu nu bila'dzóliné' sal-la' bila'dxiné' bönni' zían, en gula'nné' queé' le cabí nácaté. Ga búdxité bila'dxiné' chopé' bönni', ate' lu yöl-la' rizi' yé' quégaquié' gula'nné' queé', ⁶¹ta'nné':

—Bönni' ni gunné': "Huaca uquínna'jé' yudo' queé' Dios, ate' uchisa' le ia'tsonna dzasö."

⁶²Ní'irö guzuiné' bixúz lo na', en rë' Jesús:

—¿Naru' cabí rubí'tso' didza'? ¿Bizxi caz lë ni ta'nné' bönni' ni quiu'?

⁶³Jesús biti' bi gunné'. Ní'irö bixúz lo gudxé' Lë':

—Ni'a queé' Xanru' Dios ban rinná bé'eda' Li' quíxjö'u le nácaté. Gudíxjö'i netu' channö nacu' Li' Cristo, Zxí'iné' Dios.

⁶⁴Jesús rë' lë':

—Ca na' rnno' naca'. Le nácaté rea' libí'ili', ilé'eli' neda', Bönni' Guljé' Bönachi, rö'a cuita lë'ë ibëla Dios, ga ni' dë lu na'a yöl-la' unná bé', ate' guída' lu böaj lúzxiba, en idxina' ga zóali'.

⁶⁵Ní'irö lu yöl-la' rilé queé' guchözé' bixúz lo lari' nácué', rnné':

—¿Gunné' zi'ë bönni' ni queé' Dios! ¿Núzxirö naquíniru' nu inné' queé' bönni' ni? Chibiyón quézili' didza' zi' bé'ë queé' Dios. ⁶⁶¿Nacxi rusáca'li' queé'li'?

Bulu'bi'ë didza', gula'nné':

—Nabágué'ë xíguia' gátie'.

⁶⁷Ní'irö bulu'chejé' zöxóna' lahué' Jesús, en gulu'ë dö' queé'. Gula'gápé'ë ru'ë Jesús ia'zica're', ⁶⁸en të' Lë':

—¿Nácatso' Li' Cristo? Gunné'ya'atsöca' na'a, ¿nuzxi na' gudapa' Li'?

Pedro rnné': "Biti' núnbë'a-në' Jesús"

(Mr. 14:66-72; Lc. 22:56-62; Jn. 18:15-18, 25-27)

⁶⁹Tsanni ni' gulaca lë na', rö'ë Pedro lö'alö, ate' bidxinnu tunu nigula huen dxin ga na' zoé', ate' rnnanu:

—Lësca' li' gudálenu' Jesús, bönni' Galilea na'.

⁷⁰Gudá'bagué'ë Pedro lógaca bönachi nacua' ni', rnné':

—Biti' nözda' nuzxi que na' ru'u didza'.

⁷¹Cate' birúajé' Pedro ga nu riyaza lö'a, bilé'enu-në' ia'tunu nigula, ate' gúdxinu nupa nacua' ni':

—Bönni' ni gudálené' ca' Jesús, bönni' Nazaret na'.

⁷²Leyúbölö gudá'bagué'ë Pedro, en buzötjé' Dios, rnné':

—Biti' ca' núnbë'a-në' bönni' ni.

⁷³Iá'láti'do'os gudzé, gula'biga' nupa nacua' ni' ga na' zoé' Pedro, en të' lë':

—Le nácaté li' nunu' ca' tsözxón légaquié' tu' naca bé'u yöl-la' ru'isö quiu' didza'.

⁷⁴Ní'irö gusí lahué' Pedro rudxía dö' cuiné', en ruzötjé' Dios, rnné':

—Biti' ca' núnbë'a-në' bönni' ni.

La' náasö guródxitéba' böra. ⁷⁵Ní'irö yöjnené' Pedro didza' gudxé' Jesús lë', gunné': Cate' si' códxilöba' böra, tsonna luzuí chigunno' biti' núnbë'u neda', ate' burúajé' Pedro ni', en guródxí yéchi'dé'ë.

Tu'dödë' Jesús lu në'ë Pilato*(Mr. 15:1; Lc. 23:1-2; Jn. 18:28-32)*

27 Cate' za' rení' dza na', gulún xtídza'gaquië' yúgu'të bixúz unná bë' len bönni' gula tu'zéajni'inë' bönni' judío para ilútië' Jesús. ²Gula'ché'ë Jesús náguë'ë, ate' bulu'dödë' Lë' lu në'ë Poncio Pilato, bönni' rinná bë'ë uláz que yödzö Roma.

Ratië' Judas

³Cate' chinózinë' Judas, bönni' na' budödë' Jesús lu ná'agaquië' bönni' yudo', narugu queë' Jesús gátië', bu'ín-në', ate' yöju'ë chi uruá' dumí plata na' lu ná'agaquië' bixúz unná bë', en yugu' bönni' gula na'. ⁴Rë' légaquië':

—Bena' dul-la' tu' budöda'-në' bönni' tsahui' gátië'.

Ní'irö të' lë':

—Biti' gun lë ni ga có'ötu' böniga. Le ben cazu' lí' na'.

⁵Ní'irö gurú'unë' Judas yugu' dumí plata na' ga naca chila yudo', ate' buzé'ë ni', en yöjsí yenë'.

⁶Bulu'zi'ë bixúz unná bë' yugu' dumí plata na', ta'nnë':

—Biti' sa'yéaj cú'uru' dumí ni ga rigú'uru' dumí que yudo', tu' naca lazxjë' tu bönni' ratië' bönachi.

⁷Ní'irö gulún xtídza'gaquië', ate' gulá'uinë' dumí na' tu la' yëla queë' tu bönni' huen rö'ö para gaca ga ila'gáchë'ë bönni' zi'tu'. ⁸Que lë ni na', ga ridxintë na'a dza nazí' le lataj na', La' Yëla Rön. ⁹Caní guca ca na' gunné' Jeremías, bönni' bë'ë didza' uláz queë' Dios, gunné': "Gula'guélë'ë chi uruá' dumí plata na', tsca le gula'zéqui'në' bönni' Israel Lë', ¹⁰ate' dumí na' gulá'uinë' la' yëla queë' tu bönni' huen rö'ö. Lë ni buluf'inë' Xana' neda'."

Ridxinë' Jesús lahuë' Pilato*(Mr. 15:2-5; Lc. 23:3-5; Jn. 18:33-38)*

¹¹Cate' bulu'sudxinë' Jesús lahuë' Pilato, bönni' na' rinná bë'ë uláz que yödzö Roma, bönni' ni gunábinë' Jesús, rë' Lë':

—¿Nacu' Li' Bönni' inná bé'enë' bönachi judío?

Jesús rë' lë':

—Ca nácasö rmo'.

¹²Cate' yugu' bixúz unná bë' len bönni' gula tu'zéajni'inë' bulu'zégui'ë Jesús didza', bití' bi didza' bubi'ë Jesús.

¹³Ní'irö Pilato rë' Jesús:

—¿Naru' cabí riyóntsenu' cate' xö le ta'nnë' quiu'?

¹⁴Jesús bití' bi didza' bubi'ë. Caní guca, bubáninë' bönni' unná bë' na'.

Rirugu queë' Jesús gátië'*(Mr. 15:6-20; Lc. 23:13-25;**Jn. 18:38-19:16)*

¹⁵Cate' naca dza Laní Pascua na', dë caz tu le runë' Pilato, bönni' unná bë' na', ca ta'naba bönachi rusanë' tuë' bönni' yu'ë lidxi guíë, núti'tës nu té'ëni usané'.

¹⁶Dza na' tu bönni' nabáguë'ë xíguia', lë' Barrabás, yu'ë lidxi guíë ni'. ¹⁷Cate' bulu'dubi bönachi zían ni', Pilato gunábinë' légaquië', rnnë': —¿Nuzxi ré'ënili' usana' queéli'? ¿Naru' Barrabás o Jesús, Bönni' na' lë' Cristo?

¹⁸Caní gunné' Pilato tu' réquibe'enë' bulu'dödë' bönni' yudo' Jesús lu në'ë tu' tu'zxé'enë' Lë'.

¹⁹Tsanni ni' rö'ë Pilato ga na' ruchí'a rusöróë', nigula queë' gusól-la'nu nu tsöjödxi lë', rnna:

—Biti' bi gunu' queë' bönni' tsahui' ni, tu' gúdxide'eda' guduyëla lu yëla béchi-gal tu' nózinë' Lë'.

²⁰Yugu' bixúz unná bë' len bönni' gula tu'zéajni'inë' gula'gú'u yól-lë'ë bönachi zían na' para ila'nabi Pilato usané' Barrabás na', ate' gútië' Jesús.

²¹ Leyúbölö bē'ē didza' bönni' unná bē' na', rē' légaquiē':

—¿Núzxilē' chopē' ni ré'ēnili' usana' nē' que'li'?

Gula'nné':

—Barrabás.

²² Ní'irō Pilato gunábinē' légaquiē', rnnē':

—¿Nacxi guna' queē' Jesús, bönni' na' lē' Cristo?

Yúgu'tē' ta'nné':

—¿Budé'ē lē'e yaga cruz!

²³ Ní'irō bönni' unná bē' na' rē' légaquiē':

—¿Bizxi dō' benē'?

Zídzajrō gulu'ē didza', ta'nné':

—¿Budé'ē lē'e yaga cruz!

²⁴ Cate' réquibe'enē' Pilato biti' birúaj xtídzē'ē, pero gula'dzátarō bōnachi, ní'irō gudélē'ē nisa, en gudibi nē'ē ló-gaquiē', rnnē':

—Biti' bi xíguia' nabága'a neda' tu' nōzi yōl-la' guti queē' bönni' tsahui' ni. Le gun cázali' lib'ili' lē ni.

²⁵ Bulu'b'i didza' yúgu'tē bōnachi ni', ta'nná:

—¿Yōl-la' guti queē' bönni' ni ibága'tu' netu', en ila'baga' ca' zxf'initu'!

²⁶ Ca' guca, Pilato busanē' Barrabás na' lu ná'agaquiē'. Ní'irō gunná bē'enē' bönni' rōjáquiē' gudil-la ila'guínē' Jesús, ate' gudōdi ni' budōdē' Lē' lu ná'agaquiē' para ulu'dé'ē Lē' lē'e yaga cruz.

²⁷ Yugu' bönni' rōjáquiē' gudil-la nacu'ē lu nē'ē bönni' unná bē' na' gula'ché'ē Jesús lu yu'u yúlahui' naz'i le pretorio, ate' ni' bulu'tubē' yúgu'tē bönni' rōjáquiē' gudil-la nacu'ē ni' ga na' zoē' Jesús. ²⁸ Ní'irō gula'lecjē' lari' nácuē' Jesús, en bulu'gácuē' Lē' tu lari' xiná chul-la, ca rácugaca nupa ta'nná bē'. ²⁹ Bulu'dxiē' icjē' tu le néquini ni'a nē'e yaga yōtsi' le naca ca le dxia icjē' bönni' rinná bē'ē, en bulu'zōē' tu guído' lu nē'ē ibēla le rulu'fi ca tu yaga que

bönni' yúlahui'. Ní'irō bulu'zóa zxibē' lahuē', en bulu'titjē' Lē', ta'nné':

—¿Bica' ba Li', rinná bē'enu' bōnachi judío!

³⁰ Ní'irō bulu'chejē' Lē' zxōna', ate' bulu'guélē'ē gui na', en gula'guínē' icjē'.

³¹ Gudōdi bulu'titjē' Jesús, gula'lecjē' lari' na' nácuē', ate' bulu'gácuē' Lē' lari' que cazē'. Ní'irō gula'ché'ē Lē' para tsōjdá'agaquiē' Lē' lē'e yaga cruz.

Tu'dé'ē Jesús lē'e yaga cruz

(Mr. 15:21-32; Lc.

23:26-43; Jn. 19:17-27)

³² Cate' ni' bila'rúajē' bönni' na', yōjxá-ca'gaquiē' Simón, tu bönni' Cirene, ate' gulunē' ga bi'ē yaga cruz queē' Jesús.

³³ Cate' bila'dxinē' lataj naz'fi le Gól-gota, le rnna lu didza' xidza', Lataj Que Böga' Ícjaru', ³⁴ bulu'gui'jē' Jesús nupi zi nuts'fi zxigala'aba' bōa' guixi'. Cate' buxfi ru'ē Jesús, biti' gú'unnē' gu'jē'.

³⁵ Cate' chinudá'agaquiē' Lē' lē'e yaga cruz, gula'guísiē' lari' nácuē', en bulu'quitjē' lahui le gaca bē' núzxilē' guequi queē'. Caní guca, budxín lē na' gunné' bönni' bē'ē didza' uláz queē' Dios, gunné': "Gula'guísiē' lari' nácuā', en bulu'quitjē' lahui le gaca bē'." ³⁶ Ní'irō gula'bō'ē ni', tu'yúē' Jesús. ³⁷ Lē'sca' bulu'zōē' lē'e yaga cruz ícjalē' Jesús tu didza' le riguixjō' le nabáguē'ē le rnna caní: "Bönni' ni Jesús, Bönni' rinná bē'enē' bōnachi judío."

³⁸ Ga ni' dé'ē Jesús, bulu'dé'ē ca' lé'e-gaca yaga cruz chopē' bönni' gubán. Tuē' bulu'dé'ē cuita lē'ē ibēla, en ia'túē' na' cuita lē'ē yógōla. ³⁹ Gula'dōdē' ni' yugu' bönni' bulu'lidza zi'ē Jesús, en bulu'tá íc-jagaquiē', tu'titjē' Lē', ⁴⁰ ta'nné':

—¿Ōn, Li' na' uquínnaju' yudo', ate' tsonna dzasō ca' uchísatso' le! ¿Busólá cuinu' na'a channō nacu' Li' Zxf'inē' Dios! ¿Bótjatsōca' lē'e yaga cruz na'!

⁴¹ Lē'sca' caní bulu'titjē' Lē' yugu' bixúz unná bē' len yugu' bönni' yudo' usedi,

en yugu' bönni' yudo' fariseo, len bönni' gula tu'zéajni'inë, ta'nnë':

⁴²—Yugu' nu yúbölö busölé' bönni' ni, pero biti' gaca usólá cuinë'. Channö náquié' Bönni' inná bé'ené' bönachi Israel, huójtatsöquié' na'a lë'e yaga cruz, ate' tséajlë'ëru' Lë'. ⁴³Lë' buzxöni ládxë'ë Dios. Dios usólá cazë' Lë' na'a channö raza ládxë'ë Lë', tu' gunné': "Zxf'inë' Dios naca'."

⁴⁴Lësca' caní yugu' bönni' gubán na' dá'gaquié' lé'egaca yaga cruz ga ni' dë'ë Jesús bulu'lidza zi'ë Lë'.

Ratië' Jesús

(Mr. 15:33-41; Lc.

23:44-49; Jn. 19:28-30)

⁴⁵Cate' bidxín huagubidza, guchul-la idútë yödzülió ga bidxintë idú ridödi xihuó. ⁴⁶Idú ridödi xihuó na', bë'ë zidzaj didza' Jesús, rnnë':

—Elí, Elí, ¿lama sabactani?

Didza' ni rnna lu didza' xidza': "Dios quia', Dios quia', ¿bizx que nubéaj ládx-u'u neda'?"

⁴⁷Cate' nupa nacua' ni' bila'yöni didza' ni, ta'nná:

—Bönni' ni rulidzë' Elías, bönni' ni' bë'ë didza' uláz queë' Dios.

⁴⁸La' guxítitë' tuë' bönni' nútsë'ë ládjagaquié', en gudélë'ë tu le bululu rizxupi nisa, ate' buxúpinë' le nupi zi, en buzóë' le tu lu gui, ate' butsåguié' le ru'ë Jesús para xupë'. ⁴⁹Ní'irö ia'zícá'rë' bönni' ni' ta'nnë':

—¡Gulózagarö! ¡Uyútsöca'ru' channö huidë' Elías usölé' Lë'!

⁵⁰Leyúbölö guródxí'ë zidzaj Jesús, ate' burúajtë bö' naca cazë', gútité'. ⁵¹La' ná'asö biróza'të lari' nal-la' lu yudo', birúaj choplö, le gudela' icjlö ga bidxintë xini'i. Ní'irö gudödi budó' xzu', en gula'lá'a guió. ⁵²Gula'yala'j yeru ba qué-gaca nupa chinátigaca, nupa ni' gula'yéajlë' Dios, ate' bulu'bán bönachi na'. ⁵³Gudödi bubanë' Jesús, bulu'rúa-

jë' bönni' na' yeru ba quégaquié', en gula'yázië' yödzü lá'ayi Jerusalén, ga ni' bila'lé'e bönachi zían légaquié'.

⁵⁴Ní'irö gúdxinë' bönni' na' rinná bé'ené' bönni' rójáquié' gudil-la, enca' yugu' bönni' rójáquié' gudil-la nacua'lenë' lë' tu'yúé' Jesús, ate' gunné':

—Le nácatë bönni' ni gúquié' Zxf'inë' Dios.

⁵⁵Zí'tu'sö gula'cuá'anu nigula zían tu'yunu Jesús, nigula na' gula'dálennu Jesús cate' ni' buzë'ë luyú Galilea, ate' gulunnu xichinë', gula'gú'unu le gulahuë'. ⁵⁶Lësca' María Magdalena, en María, xiná'agaquié' Jacobo, en José, nútsa'gacanu ládjagacanu, ate' zóanu ca' ni' xiná'agaquié' yugu' zxf'inë' Zebedeo.

Ta'gu'ë Jesús yeru ba le nadaj lë'e gu'á guió

(Mr. 15:42-47; Lc.

23:50-56; Jn. 19:38-42)

⁵⁷Cate' chiridzó' dza na', bidxinë' José, bönni' Arimatea, tu bönni' rilë'enë' yöl-la' tsahui' queë', en dë'ë ca' Jesús.

⁵⁸Bönni' ni yöjyúé' Pilato, en gunabë' lataj u'ë Jesús. Ní'irö Pilato gunná bë'ë ulu'nödzejë' queë' Jesús. ⁵⁹Guzxi'ë José Lë', en buchólinë' Lë' tu lari' nazaca'.

⁶⁰Ní'irö gulu'ë Lë' lu yeru ba cubi queë' le naguidjë' lë'e gu'á guió. Budë'ë tu guió bлага xzön ga nu riyaza yeru ba na', ate' söhuó. ⁶¹Gula'cuá'anu María Magdalena, en ia'tunu María ni', ró'gacanu ra' yeru ba na'.

Yugu' bönni' rójáquié' gudil-la tapa chi'ë ba queë' Jesús

⁶²Cate' za' rení' ia'tú dza, gudödi bulu'pë'ë que dza lá'ayi quégaquié' bönni' judío, bulu'dubë' yugu' bixúz unná bë', en yugu' bönni' yudo' fariseo ga zoë' Pilato. ⁶³Të' Pilato:

—Bönni', röjnetu' bi gunné' bönni' rizí' yë'ë na', cate' ni' zoë' nabanë', gunné': "Cate' gaca tsonna dza ubana' lu yöl-la'

guti.” ⁶⁴Que læ ni na’ gunná be’e nupa ilún chi’i ba ni’ ga idxintë dza bunny, para cabí idigaquië’ bönni’ usëda queë’ chi’i dzó’ölö, en ulu’béajë’ Lë’. Ní’irö ilé’ bönachi: “Bubanë’ Jesús lu yöl-la’ guti.” Channö caní gaca, didza’ cabí nácatë ni ilu’ë gúntërö huiá’ dö’ ca ben didza’ cabí nácatë na’ gulu’ë zí’alö.

⁶⁵Pilato gudxë’ légaquië’:

—Ni nacu’ë bönni’ röjáquië’ gudil-la. Guli’chéë’ queéli’. Guli’tséaj, guli’gún chi’i yeru ba na’ tsa séqui’li’ gunli’.

⁶⁶Ní’irö yöjáquië’ ni’, en bulu’sayjë’ dxi’a yeru ba na’, en bulu’dé’ë læ’e guiój na’ tu le gaca bë’ channö isalaj, atë’ bulu’cá’anë’ ni’ bönni’ röjáquië’ gudil-la ilún chi’ë le.

Rubanë’ Jesús lu yöl-la’ guti

(Mr. 16:1-8; Lc. 24:1-12; Jn. 20:1-10)

28 Cate’ chigudödi dza lá’ayi qué-gaquië’ bönni’ judío, en chizá’ rení’ dza domingo, yöjyúgacanu María Magdalena en ia’tunu María na’ yeru ba queë’ Jesús. ²Tsálido’os gudödi budó’ zxu’. Caní guca, tu’ böjtjë’ tuë’ gubáz lá’ayi queë’ Xanru’ narúajë’ yehua’ yubá. Bidxinë’ ra’ yeru ba na’, atë’ gudúë’ guiój blaga zxön na’, en gurö’ë lu guiój na’. ³Nalá’ lahui gubáz lá’ayi na’ ca yösa bení’, atë’ zxíla’do’os naca lari’ nácuë’. ⁴Cate’ yugu’ bönni’ na’ röjáquië’ gudil-la tapa chi’ë yeru ba na’ bila’lé’enë’ læ’, guládxinë’, en gula’zxízië’. Gula’dzö’ë lu yu, en guláquië’ ca bönni’ nati caz. ⁵Ní’irö gubáz lá’ayi na’ gudxë’ yugu’ nigula na’, rnnë’:

—Biti’ gádxili’. Nözda’ ruguíljali’-në’ Jesús, bönni’ na’ bulu’dé’ë læ’e yaga cruz. ⁶Biti’ zoë’ ni tu’ chibubanë’ ca na’ chigunná cazë’ Lë’. Guli’dá, uyuli’ ga ni’ gutë’ Xanru’. ⁷Guli’tséaj na’a, guli’tsöjödxi yugu’ bönni’ usëda queë’ chibubanë’ Jesús lu yöl-la’ guti, atë’ na’a Lë’ cazë’ inóruë’ loli’ saca’ luyú Galilea.

Ni’ ulé’eli’-në’. Chigudxa’ libí’ili’ le gulu’ë Dios lu na’a.

⁸Ní’irö la’ bulu’zá’tënu ra’ yeru ba na’, tádxinu, en tu’dzéjanu, atë’ carelö söjácanu söjtíxjöi’iguequinu yugu’ bönni’ usëda queë’. ⁹Tsanni ni’ söjácanu, Jesús yöjtságuië’ légaicanu, atë’ rë’ légaicanu:

—Padiux.

Ní’irö gula’bígá’nu ga zoë’ Jesús, en bulu’nída’nu ni’ë. Gula’yéaj ládxi’gacanu Lë’. ¹⁰Ní’irö Jesús rë’ légaicanu:

—Biti’ gádxili’. Guli’tséaj, guli’tsöjtíxjöi’i yugu’ bócha’a tsöjáquië’ saca’ luyú Galilea, atë’ ni’ ulu’lé’enë’ neda’.

Le gula’guíxjö’ë yugu’ bönni’ röjáquië’ gudil-la

¹¹Tsanni ni’ söjácanu nigula na’, yugu’ bönni’ na’ röjáquië’ gudil-la gulún chi’ë yeru ba na’ bulu’dxinë’ lu yödzö ni’, atë’ gula’guíxjöi’inë’ yugu’ bixúz unná bë’ yúgu’të læ na’ gulaca. ¹²Cate’ chibulu’tubë’ yugu’ bönni’ gula tu’zéajni’inë’, gulún xtídza’gaquië’. Ní’irö bulu’nödzejë’ dumí zían quégaquië’ bönni’ na’ röjáquië’ gudil-la. ¹³Të’ légaquië’:

—Caní innali’: “Bila’dxinë’ bönni’ usëda queë’ chi’i dzó’ölö, en bulu’béajë’ Lë’ tsanni ni’ rásitu’.” ¹⁴Channö huayönnë’ bönni’ rinná bë’ë læ ni, netu’ uzéajni’itu’ læ’, en guntu’ ga bití’ bi gunë’ queéli’.

¹⁵Ní’irö yugu’ bönni’ röjáquië’ gudil-la na’ gula’zi’ë dumí na’ atë’ yöjéngaqië’ ca na’ chinazédagaquië’. Caní guca, tu’zé’ bönni’ judío didza’ ni ga ridxintë na’a dza.

Jesús risól-lë’ë yugu’ bönni’ gubáz queë’

(Mr. 16:14-18; Lc. 24:36-49; Jn. 20:19-23)

¹⁶Ní’irö idxinéajtë’ bönni’ usëda queë’ Jesús yöjáquië’ luyú Galilea, atë’ bila’dxinë’ lu guí’ado’ na’ chibulu’í’inë’ Jesús

légaquië'. ¹⁷Cate' bulu'lé'enë' Jesús, gula'yéaj ladxí'gaquië' Lë', pero bal-lë' gulaca chopa ladxí'gaquië'. ¹⁸Ní'irö gubígui'ë Jesús ga na' nacu'ë, en rë' légaquië':

—Dios chinudödë' lu na'a yúgu'të yö'l-la' unná bë' yehua' yubá, en luyú ni. ¹⁹Que lë ni na', guli'tséaj, guli't-

söjsëdi yúgu'të bönachi idútë yödzölió. Buli'quíla légaquië' nisa, ugunli' dxin Lë' Dios Xuz, en Lë' Dios Zxí'ini, en Lë' Dios Bö' Lá'ayi. ²⁰Guli'sëdi légaquië' ilunë' yúgu'të lë na' gunná bé'eda' libí'ili'. Buli'yútsöca', neda' caz zóalena' libí'ili' yúgu'të dza ga idxinrö dza údxi que yödzölió. Ca' gaca.

**DIDZA' DXI'A
BUZÚAJĚ' MARCOS**

**Libán beně' Juan, bōnni'
buquilē' bōnachi nisa**

(Mt. 3:1-12; Lc. 3:1-9,
15-17; Jn. 1:19-28)

1 Caní gusí lo didza' dxi'a ca guca queë Jesucristo, Zxf'inē' Dios.

²Budxín lē na' buzúajē' lu guichi Isaiás, bōnni' bē'ē didza' uláz queë Dios, le gunné' Dios:

Buyútsōca', risól-la'a bōnni' gubáz quia', inóruē' Lo'.

Lē' upé'ē nōza ga tōdu'.

³Yōn chi'ē tu bōnni' ulidzē' zidzaj lu lataj cá'asō, inné':

"Buli'pá'a nōza para idxín Xanru' yichaj lázxdō'oli'.

Buli'béaj li yugu' nōza lasi ga tōdē'."

⁴Caní budxín, tu' ruquilē' Juan bōnachi nisa lu lataj cá'asō, en runē' libán para ila'dila bōnachi nisa, bōnni' na' bulu'bí'i lādxi'gaquiē' para uniti lahuē' Dios dul-la' nabága'gaquiē'. ⁵Bila'rúaj bōnachi zían yúgu'tē yōdzō luyú Judea, enca' yōdzō Jerusalén, en yōjáquiē' ga na' zoē' Juan, ate' Juan na' buquilē' lé-gaquiē' nisa lu yegu Jordán, bōnni' na' gula'xóalēp' dul-la' nabága'gaquiē'.

⁶Nácuē' Juan lari' néquini lítsa'ba' bōa', en núguē'ē lē'ē tu guídi. Rahuē'-ba' bóchi'zu, en re'jē' le zxixi que buzdo'.

⁷Runē' Juan libán, rnnē':

—Sí' zē'ē bōnni' tōdi na'a, náparē' yōl-la' unná bē' ca neda'. Biti' naca' neda' lesaca' yéchua', para ilecja' xiráchuē' nudé'ē. ⁸Neda' ruquila' libí'ili' nisa, pero Lē' gunē' le ruluf'isō yōl-la' ridila nisa ni, uchíziē' libí'ili' Dios Bō' Lá'ayi.

Ridilē' Jesús nisa

(Mt. 3:13-17; Lc. 3:21-22)

⁹Tu dza ni' birúajē' Jesús yōdzō Nazaret luyú Galilea, ate' Juan na' buquilē' Lē' nisa lu yegu Jordán. ¹⁰Cate' burúajē' Jesús lu nisa, la' ná'asō bilé'enē' guyalaj lúzxiba, en ruhuōtjē' Dios Bō' Lá'ayi, ruluf'i cuiné' ca tuba' gu'dōdo', en bidisóalenē' Lē'. ¹¹Biyón chi'i nu ruf'i didza' yehua' yubá, mna:

—Li' nacu' Zxf'ina'. Nadxí'ida' Li', en raza lādxa'a Li'.

**Ré'ēni tu' xihui' gun
ga ibáguē'ē Jesús dul-la'**

(Mt. 4:1-11; Lc. 4:1-13)

¹²Ní'irō Dios Bō' Lá'ayi guché'ē Jesús bayudxi lu lataj cá'asō. ¹³Guzóē' Jesús lataj cá'asō na' idú choá' dza, ate' gú'uni Satanás tu' xihui' gun ga ibáguē'ē Jesús dul-la'. Guzóē' Jesús ga ni' ta'daba' bōa' guixi' dzó'ōba' gu'ado'. Yugu' gubáz lá'ayi queë' Dios gulácalenē' Jesús, en gula'gu'ē le gudahuē'.

Rusédinē' Jesús bōnachi luyú Galilea

(Mt. 4:12-17; Lc. 4:14-15)

¹⁴Gudōdi gula'gu'ē Juan na' lidxi gufé, sa'yéajē' Jesús luyú Galilea. Runē' libán ni' que didza' dxi'a ca rinná bē'ē Dios.

¹⁵Caní rnnē':

—Chibidxín dza. Chizóa idinná bē'ē Dios. Buli'bí'i lādxi'li', en gulí'tséajlē' didza' dxi'a ni.

**Rulidzē' Jesús tapē'
bōnni' uzxón bōla**

(Mt. 4:18-22; Lc. 5:1-11)

¹⁶Tsanni ni' ridē' Jesús ra' nísado' luyú Galilea, bilé'enē' Simón len Andrés, bōnni' bóché'ē Simón na'. Nácagaquiē' uzxón bōla, en ta'chiljē' yōxaj bōla qué-gaquiē' lu nisa na'. ¹⁷Jesús gudxē' lé-gaquiē', rnnē':

—Guli'dutá' neda', ate' guna' ga iché'ëli' bönachi quia' neda', gunli' ca runli' rizönlí'-ba' böla.

¹⁸ La' bulu'cá'anatë' yöxaj quegaquië', en söjácalenë' Jesús.

¹⁹ Gudödë' Jesús ia'láti'do' ní'ilö, ate' bilé'enë' Jacobo, en Juan, yugu' xzí'inë' Zebedeo, nacu'ë lë'e bárcodo' quegaquië', tu'únë' yöxaj böla quegaquië'.

²⁰ Jesús la' bulidztë' légaquië', ate' bulu'cá'anë' xúzgaquië' Zebedeo, dzáguie' yugu' huen dxin queë' lë'e bárcodo' na', ate' söjácalenë' Jesús.

Tu bönni' yu'u lë' bö' xihui'

(Lc. 4:31-37)

²¹ Bila'dxinë' Jesús, en yugu' bönni' dá'gaquië' Lë' lu yödzö Capernaum. Cate' ni' naca dza lá'ayi quegaquië' bönni' judío, guyázië' Jesús yu'u ga tu'dubë' bönni' judío, en tu'sédë' queë' Dios, ate' gusi' lahuë' rusédinë' nupa nudúbigaca ni'. ²² Bulu'báninë' ca na' rusédinë' Jesús, tu' rusédinë' ca runë' tu bönni' dë lu në'ë, en calëga ca tunë' bönni' yudo' usëdi. ²³ Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sédë' queë' Dios, ate' guródxí'ë bönni' na', rnnë':

²⁴ —¿Bizxi rál-la'tu' quiu', Jesús, bönni' Nazaret? ¿Za'tsu' usunítu' netu'? Núnbë'a Li', nacu' Bönni' Lá'ayi queë' Dios.

²⁵ Jesús buzenë' le bach, rnnë':

—Busayaj ru'u, en burúaj lu bönni' ni.

²⁶ Ní'irö bö' xihui' na' buxízida' bönni' na' yu'u lë', ate' guródxí'a zidzaj, en la' burúajtë. ²⁷ Bulu'báninë' yúgu'të bönni' nacu'ë ni', ate' gula'nabi luzé'egaquië', ta'nnë':

—¿Bizxi caz lë ni? ¿Naru' nácatsö xibá cubi? ¿Len yöl-la' unná bë' rinná bé'enë' yugu' bö' xihui', ate' tun ca rnnë'!

²⁸ La' guzëtë didza' que yöl-la' huáca queë' Jesús, ate' bila'yöni bönachi idútë luyú Galilea na'.

Ruúnë' Jesús xiná'anu nigula queë' Pedro

(Mt. 8:14-15; Lc. 4:38-39)

²⁹ Ní'irö burúajë' Jesús lu yu'u ga na' tu'dubë' tu'sédë' queë' Dios, en la' guyéajlentë' Jacobo, en Juan, ate' bila'dxinë' lídxigaquië' Simón, en Andrés. ³⁰ Ni' dënu xiná'anu nigula queë' Pedro, yú'unu tu xilá. La' gula'guíxjöi'itenë' Jesús ca raca queënu. ³¹ Ní'irö gubíguie' Jesús, ate' gudélë'ë ná'anu, en guchisë'-nu. La' burúajtë tu xilá na' yú'unu, ate' bupá'anu le gulahuë'.

Ruúnë' Jesús zían nupa te'e

(Mt. 8:16-17; Lc. 4:40-41)

³² Cate' chiridzó', ca gudxía gubidza, la' dujuágacatë' yúgu'të nupa te'e, en yugu' bönni' yu'u légaquië' bö' xihui' ga zoë' Jesús. ³³ Yúgu'të bönachi lu yödzö bila'guíró ga nu riyaza yu'u ga na' zoë' Jesús. ³⁴ Jesús bunë' zían nupa te'e, naca zían yödzöhuë' té'enë'. Bubéajë' ca' zían bö' xihui' yú'ugaca bönachi na'. Biti' bë'ë lataj ila'nnë' bö' xihui' na' tu' núnbë'gaca Lë' Nu náquië'.

Runë' libán Jesús luyú Galilea

(Lc. 4:42-44)

³⁵ Zí'acado' guyasë' Jesús, ni' naca chul-la. Burúajë' yödzö na', en sa'yéajë' tu lataj cá'asö, ate' ni' bulidzë' Dios. ³⁶ Simón, en nupa nacuá'len lë' söjdfil-jagaquië' Jesús. ³⁷ Cate' yöjxáca'gaquië' Lë', té' Lë':

—Yúgu'të bönachi tu'guílaj Li'.

³⁸ Ní'irö Jesús gudxë' légaquië', rnnë':

—Uyéajru' yugu' dzaga yödzö, para guna' ca' libán ni'. Que lë ni na' birúajaja'.

³⁹ Caní guca, gudödë' Jesús idú luyú Galilea, runë' libán lu yu'u gapa tu'dubë' bönni' judío, tu'sédinë' queë' Dios, ate' rubéajë' bö' xihui' yú'ugaca bönachi.

Tu bönni' ré'enë' huë' nudzu' ruzödi*(Mt. 8:1-4; Lc. 5:12-16)*

⁴⁰ Tu bönni' ré'enë' huë' nudzu' ruzödi bidxinë' ga zoë' Jesús. Buzóa zxibë', en gúta'yue' lahuë', rnnë':

—Channö ré'ënu', huáca unu' neda'.

⁴¹ Jesús buéchi' ládxë'ë lë'. Bulí në'ë, gudanë' lë', en gudxë' lë':

—Ré'ënda'. Chinuhuóácu'.

⁴² Ca gunné' ca', la' bunítitë huë' ré'enë', en böáquië' dxí'ado'. ⁴³ Ní'irö Jesús buzenë' bach bönni' na', en la' busól-la'të' lë'. ⁴⁴ Caní gudxë' lë':

—Cuntu nu guío' ca bena' quiu', pero guyéaj, yöjlu'í' cuinu' lahuë' bixúz, en yöjnödzej para le böácanu' lí' que yudo' ca na' gunná bë'ë Moisés, lë na' uluf'í bö-nachi chinuhuóácu'.

⁴⁵ Burúajë' bönni' ni, en gusí lahuë' riguf'joi'inë' bönachi zían ca guca queë'. Tu' buzé' didza' ni, bí'ti'rö guca tsázië' Jesús yálajdo' tu lu yödzö, pero guzóasë' ní'ilö gapa naca lu lataj cá'asö. Bönachi yúgu'të yödzö bila'dxin ga na' zoë' Jesús.

Bönni' ré'enë' huë' nacú'unië' bin*(Mt. 9:1-8; Lc. 5:17-26)*

2 Cate' chigudödi chopa tsonna dza, buázië' Jesús yödzö Capernaum, ate' guzé' didza' zoë' yu'u. ² La' bulu'dúbitë bönachi zían ga na' zoë' Jesús, ga bidx-intë bí'ti'rö guzxe'qui' ila'cuá' ní', ni ra' yu'u, ate' Jesús benë' libán que xtídzë'ë lógaquië'. ³ Ní'irö bila'dxinë' ga na' zoë' Jesús tapë' bönni', nuá'agaquië' tu bönni' huë' nacú'unië' bin. ⁴ Biti' guca ila'dxinë' lahuë' Jesús tu' nacuá' bönachi zían ní'. Que lë ni na' gula'saljë' ícjo'olö ca dódilö ga zoë' Jesús. Cate' budxi bulu'dxíë' yeru na', ní' bulu'zötjë' le denë' bönni' huë' na'. ⁵ Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Zxi'ina', chibunít lahua' lí' ca naca dul-la' nabágu'u.

⁶ Ró'ogaquië' bal-lë' bönni' yudo' usedi ní'. Ta'zá' ládxi'gaquië', ta'nnë': ⁷ ¿Bizx que ru'ë caní didza' bönni' ní? Rucá'anë' cá'asö Dios. Cuntu nu bönni' gaca uniti lahuë' dul-la'. Tuzë' Dios gaca gunë' lë ni. ⁸ La' gúquibe'etenë' Jesús le ta'zá' ládxi'-gaquië', ate' gudxë' légaquië':

—¿Bizx que rizá' ládxi'lí' caní? ⁹ Biti' naca böniga nu guiéšö bönni' huë' ni chibuníti lo dul-la' nabáguë'ë, pero naca böniga nu gun ga huóásë', en u'ë le denë', en uzë'e ní'ë. ¹⁰ Guna' le gaca bë' neda', Bönni' Guljë' Bönachi, dë lu na'a luyú ni uniti lahua' dul-la' nabága'gaca bönachi.

Ní'irö Jesús gudxë' bönni' huë' na':

¹¹ —Lí' rea': Guyasa. Buá' le denu', en böaj lidxu'.

¹² La' guyásatë' bönni' huë' na', bu'ë le gúti'në', en burúajë' lógaca yúgu'të nupa nacuá' ní'. Bulu'báninë' yúgu'të', en gula'gu'ë Dios yöl-la' ba, ta'nnë':

—Catu caz rilé'etu' le caní.

Jesús rulidzë' Leví*(Mt. 9:9-13; Lc. 5:27-32)*

¹³ Burúajë' Jesús yödzö Capernaum, na' gudödë' leyúbölö ra' nísado'. Bulu'-dubi bönachi zían ga zoë' Jesús, ate' Lë' busédinë' légaquië'. ¹⁴ Cate' ridödë' Jesús ní', bilé'enë' Leví, zxi'inë' Alfeo, rö'ë ga ruquízxjë' uláz que yödzö zí'tu'. Jesús gudxë' lë':

—Gudá' neda'.

La' guyásatë' Leví na', sa'yéajlenë' Jesús.

¹⁵ Gudödi guca lë ni, rö'ë Jesús rahuë' lu yu'u lidxë' Leví na', ate' zían bönni' uquízxaj, en ia'bal-lë' bönni' cá'asö ró'ölengaqië' tsözxón Jesús, en yugu' bönni' usëda queë'. Caní guca, tu' rójaca bönachi zían len Jesús. ¹⁶ Cate' yugu' bönni' yudo' usedi, en yugu' bönni' yudo' fariseo, bila'lé'enë' Lë' rö'ë rágulenë' tsözxón yugu' bönni' uquízxaj, en ia'bal-lë' bönni' cá'asö, gulé' yugu' bönni' usëda queë' Jesús, ta'nnë':

—¿Bizxi caz runtsë? ¡Rë'aj rágulentse' yugu' bönni' uquixzaj, en ia'bal-lë' bönni' dul-la'!

¹⁷ Biyönnë' Jesús didza' ni tu'ë, en gudxë' légaquië':

—Nupa nacuá' dxi'a bití' naquíniguequi nu un bönachi, pero nupa te'e naquíniguequi nu un bönachi. Za'a neda', calëga dulídzagaca' bönachi tsahui', pero rulídzagaca' bönachi dul-la' para ulu'bf'i ládxi'gaca.

**Ru'ë Jesús didza' que
yöl-la' run gubasa**

(Mt. 9:14-17; Lc. 5:33-39)

¹⁸ Tu dza ni' tunë' gubasa bönni' dá-gaquië' Juan, en bönni' dá'gaquië' yugu' bönni' yudo' fariseo, ate' bila'dxín nupa gula'nabi Jesús, ta'nná:

—¿Bizx que tunë' gubasa bönni' dá-gaquië' Juan, en bönni' dá'gaquië' yugu' bönni' yudo' fariseo, pero bönni' dá-gaquië' Li' bití' tunë' gubasa?

¹⁹ Bubi'ë didza' Jesús, rë' légaquië':

—¿Naru' réquitseli' ilún gubasa nupa nacuá' laní queë' bönni' rutsaga në'ë tsanni ni' bönni' na' rutsaga në'ë zóalenë' légaquië'? Tsanni ni' bönni' na' rutsaga në'ë zóalenë' légaquië', bití' gaca ilunë' gubasa. ²⁰ Idxín dza cate' udúë' bönni' na' rutsaga në'ë, en bítí'rö sóalenë' légaquië', ate' dza ní'irö ilunë' gubasa.

²¹ 'Cuntu nu bönni' udé'ë tu lari' cúbido' lu lari' chinatëbi, tu' utsupi' lari' cubi na', en huachöza' lari' tëbi na', ate' huaróza'rö lari' tëbi na'. ²² Lësca' caní cuntu nu bönni' quë'ë xisi uva cubi lu buzudi bidxi néquini guídi, tu' gal-la xisi uva cubi na', en ulá'a buzudi bidxi na' néquini guídi, ate' ilalaj xisi uva na', en gaca ditaj buzudi néquini guídi. Xisi uva cubi lu buzudi néquini guídi cubi ral-la' cá'aru'.

**Bönni' dá'gaquië' Jesús
ta'lecjë' do dza lá'ayi**

(Mt. 12:1-8; Lc. 6:1-5)

²³ Tu dza lá'ayi quégaquië' bönni' judío, gudödë' Jesús gapa dë yöla xzoa' xtila, ate' bönni' usëda queë' gula'sí ló-gaquië' ta'lecjë' do ga dxía xzoa' xtila. ²⁴ Ní'irö bönni' yudo' fariseo gulé' Jesús, ta'nné':

—Buyútsöca'. ¿Bizx que tunë' bönni' dá'gaquië' Li' le cabí ral-la' gunru' dza lá'ayi?

²⁵ Jesús gudxë' légaquië':

—¿Naru' cabí nulábanili' ca benë' David cate' gudunë'? Biyadzaj le ilahuë' lë', en nupa nacuá'len lë' ²⁶ ate' guyazíë' lu yu'u queë' Dios cate' ni' náquië' bixúz lo Abiatar, en gudahuë' yöta xtila tu'cu'ë lahuë' Dios, lë na' bití' dë lataj nu gagu, pero tuz bixúz dë lataj ilahuë' le. Bë'ë ca' le ilahuë' bönni' nacuá'lenë' lë'.

²⁷ Ní'irö Jesús gudxë' légaquië':

—Dios benë' dza lá'ayi le ulu'z'í xibë bönachi, calëga benë' bönachi para ilún chí'i dza lá'ayi. ²⁸ Que lë ni na', neda', Bönni' Guljë' Bönachi, naca' Xani dza lá'ayi.

Ruúnë' Jesús tu bönni' narequi' në'ë

(Mt. 12:9-14; Lc. 6:6-11)

3 Leyúbölö guyu'ë Jesús tu lu yu'u ga tu'dubë' tu'sëdë' bönni' judío queë' Dios, ate' zoë' ca' ni' tu bönni' narequi' në'ë. ² Bönni' yudo' nacu'ë ni' tu'yúë' Jesús channö únë' bönni' na' dza lá'ayi, tu' té'ënnë' ulu'zégui'ë Lë' didza'. ³ Ní'irö Jesús gudxë' bönni' na' narequi' në'ë, rnnë':

—Guyasa, en guzuí lógaca bönachi ni.

⁴ Jesús gunábinë' bönachi ni', rnnë':

—¿Naru' dë lataj gunru' le naca dxi'a cate' naca dza lá'ayi o gunru' le ruá' dö'? ¿Naru' dë lataj gunru' ga ila'deli' bönachi yöl-la' na'bán o usunítiru' le?

Gula'cuá' dxisó bönachi ni'. ⁵Ní'iró len yöl-la' rilé queé', buyúé' Jesús bönachi na' nacua' gásibi'ilé'. Ruhuf'inné' tu' nácaquaié' zidi ladxí'. Gudxé' bönni' na' narequi' në'ë, rnné':

—Bulí no'ó.

Ní'iró bulí në'ë bönni' na', ate' böacaté dxf'ado' në'ë. ⁶Ní'iró bulu'rúajé' bönni' yudo' fariseo, ate' la' gulunté' tsözxón didza' len bönni' dá'gaquaié' Herodes bi iluné' queé' Jesús, para ilútié' Lë'.

Tu'dubi bönachi zían ra' nísado'

⁷Buzé'ë Jesús ni' tsözxón len bönni' dá'gaquaié' Lë', en bidxiné' ra' nísado', ate' sójacalen Lë' bönachi zían narúaj-gaca luyú Galilea, en luyú Judea. ⁸Bönachi zían narúajgaca Jerusalén, en luyú Idumea, en ia'tsölá'a yegu Jordán, en yugu' yödzo nacua' idú gásibi'iló ga nacua' yödzo Tiro, en yödzo Sidón bila'dxín ca' ga zoé' Jesús. Caní guluné', tu' bila'yönné' ca náca'gaca yugu' le zxon runé' Jesús. ⁹Que lë ni na' Jesús gunná bé'ené' bönni' dá'gaquaié' Lë' ulu'cózti-ca'sé' tu bárcodo' ga gaca cuené', para cabí ulu'quí bönachi zían na' Lë'. ¹⁰Caní guca tu' chibuné' zían nupa te'e, ate' bila'guíró bönachi zían na' ga zoé' para ila'gán Lë'. ¹¹Cate' bö' xihui' yú'ugaca bönachi bila'lé'e Jesús, bulu'dxiga' bönachi na' yú'ugaca xini'ë Jesús, ate' gula'bódxí'a, ta'nná:

—Nacu' Li' Zxf'iné' Dios.

¹²Jesús buzené' le bach bö' xihui' na', cabí ila'guixjö' nu náquie' Lë'.

Ribóé' Jesús chinnu bönni' ilácagaquaié' gubáz queé'

(Mt. 10:1-4; Lc. 6:12-16)

¹³Ní'iró gurené' Jesús tu lu gu'ado', ga ni' bulidzé' nupa ré'ëné'. Gula'bigué'ë bönni' ni gásibi'ilé'. ¹⁴Jesús bucu'ë chinnué' bönni' ni, para ila'cuá'lené' Lë', en para isól-lé'ë légaquaié' tsöjéngaquaié' libán. ¹⁵Budödé' lu ná'agaquaié' yöl-la'

huáca ulu'úné' nupa te'e, en ulu'béajé' bö' xihui' yú'ugaca bönachi. ¹⁶Caní náca'gaca lágaquaié':

Simón, (buzóé' Jesús ia'tú lë', Pedro), ¹⁷Jacobo,

Juan, (bönni' bóché'ë Jacobo, ate' náca'gaquaié' zxf'iné' Zebedeo. Chopé' ni, Jesús buzóé' ia'tú lágaquaié', Boanerges, le rna lu didza' xidza': Bönni' sínia' ca guziú'),

¹⁸Andrés, Felipe, Bartolomé, Mateo, Tomás,

Jacobo, (zxf'iné' Alfeo),

Tadeo,

Simón, (bönni' rufi' ladxé'ë yödzo queé'),

¹⁹Judas Iscariote, (bönni' udödé' Jesús lu ná'agaquaié' bönni' ilútié' Lë').

Yugu' bönni' yudo' ta'nné': "Tu' xihui' dzaga Jesús"

(Mt. 12:22-32; Lc. 11:14-23; 12:10)

Gudödi ni' Jesús len bönni' dá'gaquaié' Lë' bulu'dxiné' tu lu yu'u. ²⁰Leyúbölö bila'guíró bönachi zían ga zoé' Jesús, ate' bíti'ró guta' lataj bi ilahué' Jesús, en bönni' na' dá'gaquaié' Lë'. ²¹Cate' di'a dza queé' Jesús bila'yönné' ca raca queé', bila'dxiné' ni' para ulu'ché'ë Lë', ta'nné': Richixi icjé'.

²²Lësca' caní bönni' yudo' usedi, narúajgaquaié' Jerusalén gula'nné' queé', ta'nné':

—Dzaga Belzebú, xángaca bö' xihui' Lë', ate' len yöl-la' unná bë' que rubéajé' yugu' bö' xihui'.

²³Ní'iró Jesús bulidzé' yugu' bönni' yudo' usedi na', en bucúdzu'ë didza', rnné':

—¿Naru' ubéaj la' cuinsi Satanás tu' xihui'? ²⁴Channö ila'rúaj choplö bönachi tu yödzo, en ila'díl-lalen luzé'eguequi, bití' gaca idía' yödzo na'. ²⁵Lësca' caní channö ila'rúaj choplö bönachi nacua' tu yu'u, en ila'díl-lalen luzé'eguequi, bití' gaca ila'día' bönachi nacua' yu'u na'. ²⁶Que lë ni na', channö Satanás tu' xihui'

tá'baga' luzé'e, narúajgaca choplö bö' xihui'. Biti' gaca idía' yöl-la' unná bē' que, pero chizóa údxí que.

²⁷ 'Cuntu nu gaca tsu'u lidxē' tu bönni' nál-la, en cuéaj yöl-la' tsahui' queē' channō cabí gaga' zí'alō bönni' nál-la na', ate' n'í'rō sequi' cuéaj le dzö'ö lidxē'.

²⁸ 'Le nácatē rea' lib'íli': Dios gaca uniti lahuē' bönachi ca naca yúgu'tē dul-la' nabága'gaca, en ca naca yúgu'tē didza' schanní' ta'nná, ²⁹ pero nútí'tēs nu inné schanní' queē' Dios Bö' Lá'ayi, catu caz uniti lahuē' Dios nu na'. Tsaz nabaga' xígúia' nu na'.

³⁰ Caní gunné' Jesús tu' ta'nné' queē' bönni' yudo' usedi na', ta'nné':

—Tu' xihui' dzaga Lē'.

**Nu naca xiné'ë Jesús,
en bönni' bóchē'ë**

(Mt. 12:46-50; Lc. 8:19-21)

³¹ N'í'rō bila'dxinē' yugu' bönni' bóchē'ë Jesús, enca' xiné'ë ga zoē'. Gula'cu'ë ló'alō, en gula'sól-lē'ë nu tsöjlidza Jesús. ³² Bönachi zían na' ró'gaca cuitē' Jesús gulé Lē', ta'nná:

—Yugu' bönni' bóchu'u, enca' xinó'w nacu'ë ló'alō, tu'lidzē' Lí'.

³³ Bubi'ë didza' Jesús, gudxē' légaquiē':

—¿Nuzxi caz na' xiná'a, en nupxi caz yugu' bönni' bócha'a?

³⁴ N'í'rō buyúē' nupa na' ró'gaca gási-bi'ilē', rnnē':

—Buli'yútsöca'. Nupa ni nácgaca ca xiná'a, en yugu' bönni' bócha'a. ³⁵ Nu run ca ré'ënē' Dios, nu ni naca ca bi'i bócha'a, en bi'i zana' enca' xiná'a.

**Rucúdzü'ë didza' Jesús ca
naca queē' bönni' guz**

(Mt. 13:1-9; Lc. 8:4-8)

4 Leyúbölö gusí lahuē' Jesús rusédinē' bönachi ga naca ra' nísado'. Bulu'dubi bönachi zían ga zoē', ate' gurenē' Jesús tu lē'e bárcodo' zxa lu nisa na',

en gurö'ë ni', ate' yúgu'tē bönachi na' gula'cuá' luyú ra' nisa na'. ² Zían le busédinē' Jesús légaquiē', bucúdzü'ë didza'. Tsanni ni' rusédinē' légaquiē', rnnē':

³ —Guli'zé nágali' didza' ni. Birúajē' tu bönni' guz, sōjésiē' xisedo'. ⁴ Tsanni ni' rúsiē', gulasi bal-la xisedo' na' ra' nōza, ate' bila'dxinba' biguínmido', gulé'ajba' le. ⁵ Gulasi ia'bal-la xisedo' na' ga rö'ö guió'j ga bití' rö'ö yenni' yu. Bayón gula'lén xisedo' na' tu' cabí rö'ö yenni' yu. ⁶ N'í'rō cate' gulén gubidza, buquexu' le, ate' gubidxi, tu' cabí nun luí ga rē'. ⁷ Gulasi ia'bal-la xisedo' na' ga tu'lén lubá yötsi'. Cate' gula'lén xisedo' na', bulu'lén ca' lubá yötsi' na', en gula'röli le, ate' lē na' bēsiē' bití' bi bunödzej. ⁸ Gulasi ia'bal-la xisedo' na' ga naca luyú bëbu, ate' gula'zxón, en xitsá' ra' gula'bó'. Bulu'nödzej lē na' bēsiē'. Tu dxigu' xisedo' na' bēsiē' bunödzej ia'chí uruá' xisedo' ca'. Ia'tú bunödzej ia'tsónnalalaj ca', ate' ia'tú na' bunödzej ia'tú gayuá' ca'.

⁹ N'í'rō Jesús gudxē' légaquiē', rnnē':

—Nu zoa nagui, en riyöni ral-la' uzé nagui.

**Rigúixjō'ë Jesús bizz
que rucúdzü'ë didza'**

(Mt. 13:10-17; Lc. 8:9-10)

¹⁰ Cate' chibugá'anē' tuzē' Jesús, bila'dxín nupa dá'gaca Lē' ga zoē', nún-gaca tsözxón idxínnutē' bönni' uséda queē', ate' gula'nábinē' Lē' bi sa'yéaj lē na' bucúdzü'ë didza'. ¹¹ Jesús gudxē' légaquiē', rnnē':

—Libi'ili' nadéli'li' tséajni'ili' le nagachi' ca rinná bē'ë Dios, pero nupa na' bití' nácgaca tuz len rē'u, ru'ílēna' légaquiē' didza' yugu' le rucúdzü'a didza'. ¹² Caní runa' para gaca lē na' nazúaj lu guichi lá'ayi, rnna:

Ulu'yúē', en bití' ila'lé'enē'.

Ulu'zé nágagaquiē', en bití' ila'yéajni'inē'.

Biti' ulu'b'fí ládxi'gaquië' para gaca uniti lahua' légaquië' ca naca dul-la' nabága'gaquië'.

Riguíxjō'ë Jesús le bucúdzu'ë didza'
(Mt. 13:18-23; Lc. 8:11-15)

¹³ Jesús gudxë' ca' yugu' bönni' dá'gaquië' Lë', rnnë':

—¿Naru' cabí réajni'itseli' lë na' bucúdzu'a didza'? ¿Nacxi caz gaca tséajni'ili' ia'zica'rö le ucúdzu'a didza'? ¹⁴ Bönni' guz na' náquië' nu ruzé xtídzë'ë Dios.

¹⁵ 'Nácagaca bal-la bönachi ca xisedo' na' gulasi ra' nöza. Ta'yönnë' xtídzë'ë Dios, en ca ta'yónisinë' ca', la' za'të Satanás tu' xihui', en rigúa didza' na' bidxín lu icja ládxi'do'gaquië'.

¹⁶ 'Nácagaca ia'bal-la bönachi ca xisedo' na' gulasi ga rö'ö guiój. Ta'yönnë' didza' na', ate' len yöl-la' rudzeja quégaquië' ta'zi'ë le. ¹⁷ Biti' riyaza icja ládxi'do'gaquië', ate' tu ch'isö ta'dé'ë le. Cate' bi raca quégaquië', o zoa nu ribía ladxi' légaquië' tu' ta'dé'ë didza' na', la' tu'huóatë ládxi'gaquië'.

¹⁸ 'Nácagaca ia'bal-la bönachi ca xisedo' na' gulasi ga na' tu'lén lubá yöt-si'. Ta'yönnë' didza' na', ¹⁹ pero tufi ládxi'gaquië' le nácagaca que yödzölió ni. Nazí' yé'eguequinë' tu' nadx'iguequinë' yugu' yöl-la' tsahui', en ta'zé ládxi'gaquië' yugu' le dë. Ta'yaza icja ládxi'do'gaquië' yúgu'të lë ni, en tu'suniti didza' na', para cabí gun dxin lu icja ládxi'do'gaquië'.

²⁰ 'Nácagaca ia'bal-la bönachi ca xisedo' na' gulasi ga naca luyú bëbu. Ta'yönnë' didza' na', en ta'z'í lu ná'agaquië' le, ate' run dxin lu icja ládxi'do'gaquië'. Nácagaca bal-la bönachi caní ca xisedo' na' bulu'nödzaj ia'chí uruá' huéaj. Nácagaca ia'bal-lë' ca xisedo' na' bulu'nödzaj ia'tsónnalalaj ca', ate' nácagaca ia'bal-la bönachi ca xisedo' na' bulu'nödzaj ia'tú gayuá' ca'.

Rucúdzu'ë didza' Jesús que tu le rigú'u bení'

(Lc. 8:16-18)

²¹ Jesús gudxë' ca' bönni' dá'gaquië' Lë', rnnë':

—¿Naru' rigála'ru' guí', ate' rudúsi'ru' le tu guí'ina, o rigú'uru' le zxani le ráti'ru'? Biti' ca' runru' caní. Ruzóaru' guí' ga naca xitsá' ga cu'u bení'. ²² Yúgu'të le nagachi' ilá' lahui, ate' yúgu'të le raca balándo'os ila'ruáj ga liná'. ²³ Nu zoa nagui, en riyöni ral-la' uzé nagui.

²⁴ Gudxë' ca' légaquië':

—Gulí'güf ládxi'li' le riyónili'. Ca naca le ruríxili', la' leze urixë' Dios queéli', ate' gunné' queéli' ia'lati'. ²⁵ Nu nazí' le za' que, gu'ë que ia'lati', pero nu bití' nazí' le, la's dui le dë que, udúa.

Rucúdzu'ë didza' Jesús ca rizxón zxoá' xtila

²⁶ Gunné' ca' Jesús:

—Ca raca ni le rinná bë'ë Dios naca ca raca cate' ruchejé' tu bönni' zxoá' xtila lu yu. ²⁷ Chi'i dzó'ölö rásie', en riyasë' cate' za' rení'. Ta'lén zxoá' xtila na', en ta'zxón, pero bití' nózine' lë' nacxi raca ta'zxón. ²⁸ La' cuinsi luyú na' ruxón le nadúzgaca luyú na', z'f'aló xiyazi, n'irö za' do que, en tödi na' cuía xui'i nál-la lu do que. ²⁹ Cate' chinal-la xui'i na', la' tséajtë' tsójchibë' do na' tu' chibidxín dza uzi'ë xui'i.

Rucúdzu'ë didza' Jesús ca raca que xisé mostaza

(Mt. 13:31-32; Lc. 13:18-19)

³⁰ Gunné' ca' Jesús:

—¿Bizxi caz innaru' ca raca ni le rinná bë'ë Dios? ¿Bizxi ucúdzu'ru' didza' ca raca? ³¹ Raca ca raca que tu xisedo' mostaza. Cate' riyaza luyú naca tu xisedo' nácaterö cuidí' ca yúgu'të xisedo' dzó'ö luyú, ³² pero cate' chinadúz, rilén,

en rixxóntërö ca yúgu'të guixi' cuan ró'-gaca luyú. Tsca run yana' ni'a në'e, gaca ila'dxinba' biguinnido', en ulu'dxíaba' xi-cá'agacaba' lu zxul-la que.

**Ca rugunë' dxin Jesús
le rucúdzu'ë didza'**

(Mt. 13:34-35)

³³ Caní guca, busédinë' Jesús légaquië', en zíanrö ca' le bucúdzu'ë didza' tsca guca ila'yéajni'inë'.
³⁴ Yúgu'të didza' bé'lenë' bönachi bucúdzu'ë didza', ate' yúgu'të didza' ni buchila lá'anë', buzéajni'inë' légacasë' bönni' usëda queë'.

Jesús ribequi dxíë' bö' budunu'

(Mt. 8:23-27; Lc. 8:22-25)

³⁵ La' dza ná'asö, cate' ridzó', Jesús gudxë' yugu' bönni' dá'gaquië' Lë', rnnë':
—Tóditsöca'ru' ia'tsölá'a nísado' ni.

³⁶ Ní'irö bulu'lá'alënë' bönachi zían nacua' ni', ate' bulu'së'ë bárcodo' ga na' chizóasë' Jesús. Gula'cuá' ca' ni' ia'zíca'rö bárcodo' sójácalen légaquië'.

³⁷ Gusí lo recja bö' budunu' lu nisa na', ate' gudá'a nisa lë'e bárcodo' na'. Ca' guca, zeaj ridzá' nisa lë'e bárcodo' na'.

³⁸ Dë' rásië' Jesús lu xicúgüë' ga naca xit-sá'alö lë'e bárcodo' na', ate' bulu'subanë' Lë'. Të' Lë':

—¿Bönni' Usedi! ¿Naru' cabí ruf'i ládx-i'tso' netu'? ¿Huáti caztu' lu nisa ni!

³⁹ Ní'irö guyasë' Jesús, en gunná bé'enë' bö' na' recja, gunné':

—Guró'ö dxi.

Gudxë' ca' nisa na', gunné':

—Dxisö guzóa.

Guró'ö dxi bö' na' guyecja, en guzóa dxi lu nísado' na'.
⁴⁰ Ní'irö Jesús gudxë' yugu' bönni' dá'gaquië' Lë', rnnë':

—¿Bíx que radxi ridzóbili' caní? ¿Naru' cabí réajlë'ëli' Dios?

⁴¹ Ní' tádxinë' gulé luzé'ë tuë' ia'túë':

—¿Nuzxi caz bönni' ni? ¿Tun bö' recja, en nísado' ca rnna xtúdzë'ë!

Bönni' Gadara yu'u bö' xihui' lë'

(Mt. 8:28-34; Lc. 8:26-39)

5 Ní'irö bila'dxinë' Jesús, en yugu' bönni' dá'gaquië' Lë' ia'tsölá'a nísado' ga naca lu xiyúgaca bönachi Gadara. ²Cate' burúajë' Jesús lë'e bárcodo' na', tu bönni' rirúajë' znan bulóaj ga nacua' yeru ba la' dutságatë' Lë'. Bönni' ni yu'u bö' xihui' lë', ³ate' nun xilatjë' ga na' nacua' yeru ba. Cuntu nu guca guga' bönni' na', calëga len du guíë. ⁴Zían luzuí bulu'zóë' bregui' guíë yen në'ë, en ni'ë, en gulúguí'ë lë' du guíë. Yugu' du guíë na' bulé'ë, ate' bregui' guíë na' guditsjë'. Biti' rizéqui'në' nu bönni' inná bé'enë' lë'.
⁵Ridática'së' ribódxí'ë rëla, en tē dza ga na' nacua' yeru ba, en gapa naca lu guí'ado', run huë' cuinë' yugu' lu guíó'j dzö'ö ni'. ⁶Cate' bilé'enë' zë'ë zítu' Jesús, guxítí'ë guyijë' ga na' zë'ë, ate' buzóa zxibë' lahuë' Lë'. ⁷Bë'ë zidzaj didza', rë' Jesús:

—¿Bíxzi ral-la'a quiu' Jesús, Zxí'inë' Dios nayépisëtërë'? Ní'a queë' Xanru' Dios ráta'yua' lo', bití' usaca' zítu' neda'.

⁸ Caní gunné' bönni' na' tu' chigudxë' Jesús bö' xihui' na':

—Lí', bö' xihui', burúaj lu bönni' ni.

⁹ Jesús gunábinë' le, rnnë':

—¿Bi leu'?

Bubí' didza' le, gudxi Lë':

—Lea': Le Zían, tu' rö'ö ziantu'.

¹⁰ Gula'nabi yechi' yugu' bö' xihui' na' Jesús para cabí isól-lë'ë léguequi zítu' luyú ni'. ¹¹Nacua'aba' cuchi zían lu guí'ado' ní'isö, ta'daba' táguba' ni'. ¹²Gula'nabi yechi' bö' xihui' na' Jesús, ta'nná:

—Gusöl-la' netu' ga ni' dzó'öba' cuchi zían. Bë' netu' lataj tsójsú'ugacatu'-ba'.

¹³ La' bë'të' Jesús léguequi lataj, ate' bila'rúaj bö' xihui' na', en yójsú'ugaca cuchi zían na', ate' gula'xítí'ba' cuchi zían na', yójbíxigacaba' ga naca ra' guí'a, yójházagacaba' nísado'. Lu nísado' na'

gula'yépipa' nisa, gulátiba', en nácagacaba' ca galaj gayuá'aba'.

¹⁴Ní'irö bulu'zxunnaj nupa ni' gulún chí'i cuchi zián na'. Yójtíxjöi'iguequiné' bönachi lu yödzo ni', enca' bönachi nacua' la' guixi' ni'. Bila'rúaj bönachi lu yödzo, söjyúgaquie' bizxi na' guca ni'.

¹⁵Cate' bila'dxiné' ga ni' zoé' Jesús, bila'lé'ené' bönni' na' z'falö yú'ugaca bö' xihui' lé'. Bönni' ni rö'ë ni', nácué' lari', en zoé' dx'ado', ate' guladxi bönachi na'.

¹⁶Nupa na' bila'lé'e le bené' Jesús gula'guixjöi'i bönachi na' bila'rúaj lu yödzo ca na' guca queé' bönni' na' z'falö yú'ugaca bö' xihui' lé', enca' ca guca quégacaba' cuchi na'. ¹⁷Ní'irö gula'sí lógaca bönachi zián na' ta'ta'yu lahué' Jesús urúajé' lu xiyúguequi.

¹⁸Cate' bubené' Jesús lé'e bárcodo', bönni' na' z'falö yú'ugaca bö' xihui' zián lé', gúta'yué' lahué' Jesús gu'é lé' lataj tséajlené' Lë'. ¹⁹Jesús biti' bë'ë lé' lataj, pero gudxé' lé':

—Böaj lidxu'. Yójtíxjöi'i di'a dza quiu' yugu' le zxön bena' quiu' neda', naca' Xanu', en ca bena' buéchi' ládxa'a lí'.

²⁰Söhuóje' bönni' na', en ruzé' didza' yugu' yödzo Decápolis ca nácagaca le zxön bené' Jesús queé', ate' bulu'bani yugu'té bönachi nacua' yugu' yödzo ni'.

Bi'i nigula queé' Jairo, en nigula na' gudannu lari' nácué' Jesús

(Mt. 9:18-26; Lc. 8:40-56)

²¹Cate' budxiné' Jesús ia'tsölá'a nísado' na', ní'irö bulu'dubi bönachi zián ga na' zoé' ra' nísado'. ²²Bönni' lé' Jairo, bönni' rinná bë'ë lu yu'u ga tu'dubé' bönni' judío, en nazédé' queé' Dios, bidé' ga zoé' Jesús. Cate' bilé'ené' Jesús, buzóa zxibé' lahué', ²³en gúta'yué' lahué', rnné':

—Chiraqui gátibi' bi'i nigúlado' quia'. Gudá ixóa no'o lébi' para huóacabi', en biti' gátibi'.

²⁴Sa'yéajlené' Jesús lé', ate' bönachi zián söjácalen Jesús, tu'quirö Lë'. ²⁵Tu nigula, chinaca chinnu iz ré'enu, zóanu ca' ni'. Biti' ruhu'í rön queénu que hué' quégaca cázanu nigula. ²⁶Yenni' chigud'í guzxáca'nu lu ná'agaquie' zián bönni' tu'üné' bönachi. Nítisö chibütönu dëra le dé' queénu, tu' cabi' bi' gúcalen lénu, pero riyali' queénu. ²⁷Cate' biyóninu tu'í didza' bönachi ca naca queé' Jesús, gudódinu ládjalö bönachi zián na', en bidxinnu zaca' cúdzu'lé' Jesús, en gudannu lari' nácué'. ²⁸Caní bennu tu' rnanu: “Channö cansa' le nácué', huóaca'.” ²⁹La' bu'itë rön queénu, ate' réquibe'enu chibóacanu que le guca queénu.

³⁰La' gúquibe'etené' Jesús ben dxin yöl-la' huáca queé', ate' buécjé', ruyúé' bönachi zián na'. Rnné':

—¿Nuzxi na' gudán neda'?

³¹Ní'irö bönni' dá'gaquie' Lë' tē' Lë', ta'nné':

—Ril'é' quézinu' bönachi zián ni tu'quirö Li', en rnatso': “¿Nuzxi na' gudán neda'?”

³²Ruyúé' Jesús gásibi'ilé' para ilé'ené' nuzxi na' gudán Lë'. ³³Ní'irö nigula na' gubíga'nu lahué'. Rádxinu, en rizxizinu tu' chinózinu bi na' guca queénu, ate' buzóa zxfbinu lahué' Jesús, en gúdxinu Lë' idútë le nácatë. ³⁴Jesús rë'ë-nu:

—Nigúlado'. Chibóacu' tu' réajlé'u neda'. Böaj lidxu' idú ládxi'u. Tsaz nuhuóacu' que le guca quiu'.

³⁵Tsanni ni' ru'ë caní didza' Jesús, bönni' narúajgaquie' lidxé' bönni' na' rinná bë'ë lu yu'u ga tu'dubé' tu'sédé' queé' Dios bila'dxné' ni', en tē' bönni' na':

—Chigútibi' bi'i nigúlado' quiu'. Bítirö upíxjanu' Bönni' Usedi.

³⁶Biti' bë' ládxi'ë Jesús lé na' ta'nné', ate' gudxé' bönni' unná bë' na', rnné':

—Biti' gádxinu'. Guyéajlé'ësé' Dios.

³⁷Biti' bë'ë lataj Jesús tsójácalen Lë' ia'zica'rö bönachi, pero légacasé' Pe-

dro, en Jacobo, en Juan, bóchë'e Jacobo na'. ³⁸Cate' bidxinë' lidxë' bönni' na' rinná bë'e ga tu'dubë' tu'sëdë' queë' Dios, bilé'enë' raca dzatsa, enca' nupa ni' ta'bödxi, en nupa ta'bödxi yechi'. ³⁹Guyázië' Jesús, en gudxë' légaquië':

—¿Bizx que rutsátsali', en ribódxili' caní? Biti' náti'bi' bi'i nigúlado' ni. Rásisibi' na'.

⁴⁰Ní'irö bulu'titjë' Jesús, pero Lë' bubéajë' yúgu'të bönachi na' ní'ilo, ate' guchë'e xuz xiná'abi' bi'i nigúlado' na', enca' nupa nacua'len Lë', ate' guyázië' ga na' dëbi'. ⁴¹Gudélë'e ná'abi' bi'i nigúlado' na', en gudxë'-bi':

—Talita, cumi.

Didza' hebreo ni rna lu didza' xidza': Bi'i nigúlado', guyasa. ⁴²La' guyásatëbi' bi'i nigúlado' na', en buzé'ebi'. Chiyú'u-bi' chinnu iz. Bulu'bani nupa nacua' ni'. ⁴³Ní'irö Jesús gunná bé'enë' légaquië' cuntú nu ulu'siyönnë' lë na' guca. Gudxë' légaquië':

—Gulí'güü' le gágubi' bi'i nigúlado' ni.

Ridxinë' Jesús Nazaret, le naca ladzë'

(Mt. 13:53-58; Lc. 4:16-30)

6 Buzé'e Jesús ni', budxinë' ladzë', ate' yugu' bönni' dá'gaquië' Lë' sôjácálenë' Lë'. ²Cate' bidxín dza lá'ayi quégaquië' bönni' judío, gusí lahuë' Jesús rusédinë' bönachi ga na' tu'dubë' tu'sëdë' queë' Dios. Gula'cuá' bönachi zían ni' ta'yöni Lë'. Bulu'bani, ta'nná:

—¿Gazxi caz bizédë' bönni' ni yugu' lë ni? ¿Bizxi caz yöl-la' réajni'i ni nadé'li'në'? ¿Nacxi caz runë' le nácagaca bë' na' zá'gaca yehua' yubá? ³Náquië' bönni' ni gubëdxi yaga na', en zxi'ininu María. Náquië' bóchi'gaquië' Jacobo, en José, en Judas, en Simón. Nigula zanë' nacua'lennu ca' rë'u.

Que lë ni na' bulu'cá'anë' Lë' cá'asö. ⁴Ní'irö Jesús gudxë' légaquië', rnnë':

—Gátitës tunë' bal nu bönni' ru'e didza' uláz queë' Dios, pero bönachi uládz queë', en bönachi di'a dza queë', en bönachi nacua' lidxë' biti' tun lë' bal.

⁵Que lë ni na' biti' guca gunë' Jesús nitú yöl-la' huáca zxon ni'. Bunsë' nabábasö bönachi te'e cate' guxóca në'e léguequi. ⁶Bubáninë' Jesús tu' cabí ta'yéajlë' Lë'. Gudödi na' gudödë' yugu' yödzo' nacua' gásibi'ilo, rusédinë' bönachi ni'.

Risól-lë'e Jesús bönni' dá'gaquië' Lë' tsjöjéngaqüië' libán

(Mt. 10:5-15; Lc. 9:1-6)

⁷Ní'irö bulidzë' Jesús idxínnutë' bönni' dá'gaquië' Lë', en gusí lahuë' risól-lë'e légaquië' chopa huéajgaquië'. Budödë' lu ná'agaquië' yöl-la' unná bë' ulu'béajjë' yugu' bö' xihui' yú'ugaca bönachi. ⁸Gunná bé'enë' légaquië' biti' bi ilu'e la' nöza, calëga yöxaj, calëga yöta, en calëga dumí biti' ila'gu'e lu buzudi quégaquië', pero iluá'asë' xiyágado'. ⁹Ralla' ulu'dé'e xiráchugaquië', pero calëga chopa lari' ulu'xóca yéngaqüië'. ¹⁰Gudxë' ca' légaquië':

—Gátitës ga tsú'uli' tu yu'u, guli'sóca yu'u na' cate' uzá'aröli' yödzo na'.

¹¹Channö tsú'uli' tu yödzo ga biti' ilún bönachi lu yödzo na' libí'ili' bal, en biti' ulu'zë' nágagaquië' xtídzá'li', buli'rúaj ni', en buli'quinnaj bëchtö da' lë'e lábali'. Lë ni gaca bë' nabága'gaquië' xíguia'. Le nácatë rea' libí'ili', cate' idxín dza ichúguië' Dios quégaca bönachi, ila'gufi' ila'zá-ca'rö bönachi lu yödzo na' ca ila'gufi' ila'zaca' bönachi Sodoma, en Gomorra, yugu' yödzo na' busunítie' Dios.

¹²Ní'irö bila'rúajë' bönni' dá'gaquië' Lë', yöjéngaqüië' libán ca ral-la' ulu'bfi' ládxi'gaca bönachi. ¹³Bulu'béajjë' zían bö' xihui' yú'ugaca bönachi. Gula'gu'e le za zían nupa te'e, ate' bulu'huóaqüië'.

**Ca bétigaquié' Juan, bönni'
buquilé' bönachi nisa**

(Mt. 14:1-12; Lc. 9:7-9)

¹⁴ Biyönné' Herodes, bönni' unná bé', ca naca le runé' Jesús, tu' rizé didza' gátitès que yöl-la' huáca queé'. Bal-la bönachi ta'nná:

—Chibubané' Juan, bönni' ni' buquilé' bönachi nisa, lu yöl-la' guti. Que lè ni na' napé' yöl-la' huáca runé' yugu' lè ni.

¹⁵ Ia'bal-la bönachi ta'nná:

—Naquié' Elías, bönni' bé'è didza' uláz queé' Dios dza ni'te.

Ia'bal-la bönachi ta'nná:

—Naquié' bönni' ru'è didza' uláz queé' Dios ca guláquié' bönni' gulu'è didza' uláz queé' dza ni'te.

¹⁶ Cate' biyönné' Herodes yugu' lè ni, gunné':

—Naquié' Juan, bönni' na' burixa' yene'. Chibubané' lu yöl-la' guti.

¹⁷ Caní gunné' Herodes tu' gusól-lè'è lè cazé' bönni' yöjxóngaquié' Juan na', ate' gulúgui'è lè' du guíe' lu yu'u lidxi guíe'. Caní bené' Herodes tu' rilenu Herodías Juan na'. Nácanu nigula na' gúcanu nigula queé' Felipe, bóché'è Herodes na'. Herodes gudúé'-nu Herodías na', en butsa ná'alén'-nu. ¹⁸ Juan na' gudxé' Herodes:

—Biti' ral-la' sóalenu'-nu nigula queé' bóchu'u.

¹⁹ Que lè ni na' gusí guró'önu Herodías. Gú'uninu bi gunnu queé' Juan, tu' gú'uninu gútinu lè', pero bití' bi guxzéqui'nu ²⁰ tu' rádxiiné' Herodes Juan. Nóziné' náquié' Juan na' tsahui', en lá'ayi. Que lè ni na' gudapa chi'è lè', en buzé náguié' lè' idú lédxé'è sal-la' lè na' rnné' Juan ben ga guró'è böniga Herodes na'. ²¹ Ní'irö bidxín tu dza guxzéqui'nu Herodías na', le naca dza runé' Herodes laní que dza guyé'ené' iz. Bupé'è le ilé'aj ilahué' bönni' dè lu ná'agaquié' uláz queé', en bönni'

ta'nná bé'ené' bönni' röjáquié' gudil-la, enca' bönni' nácagaquié' lo luyú Galilea. ²² Guyázabi' bi'i nigula queénu Herodías ga na' t'éaj tahué', en buyá'abi' lógaquié'. Guyaza lédxé'è Herodes ca runbi', en gula'yaza lédxi'gaca ca' nupa t'éaj tágulen lè'. Ní'irö Herodes gudxé'-bi' bi'i nigula na', gunné':

—Gunaba bi ré'ènu' gunna' quiu', ate' guna' ca'.

²³ Bené' tsutsu xtídzé'è, gudxé'-bi':

—Ní'a queé' Xanru' Dios gunna' quiu' bíti'tès bi inabu' ga idxinté gatsaj ga rinná bé'a.

²⁴ Burúajbi' lèbi', ate' gunábabi' xiná'abi':

—¿Bizxi inábatsa'?

Lènu gúdxinu-bi':

—Icjé' Juan, bönni' buquilé' bönachi nisa, inabu'.

²⁵ La' buázatèbi' ga na' zoé' Herodes, en rëbi'-né':

—Rè'ènda' ixú' quia' na'a lu zxiga' zxön icjé' Juan, bönni' na' buquilé' bönachi nisa.

²⁶ Ní'irö bu'inné' Herodes, pero tu' buzötjé' Dios, en tu' bila'yöni ca' nupa tágulen lè', bití' gú'unné' initi xtídzé'è na' guxzí' lu në'è queébi'. ²⁷ Herodes la' gusól-la'té' tu bönni' rejé' gudil-la zoé' rapa chi'è, ate' gunná bé'ené' lè' tsójx-i'è icjé' Juan. ²⁸ Bönni' na' rejé' gudil-la guyijé' lidxi guíe', yöjrixé' yen Juan na', ate' bu'è icjé', nuxóé' le tu lu zxiga' zxön. Budödé' le lu ná'abi' bi'i nigula na', ate' lèbi' bunódzjabi' le queénu xiná'abi'.

²⁹ Cate' bönni' dá'gaquié' Juan na' bila'yönné' didza' chiguca lè na', bila'dx-iné' ni', en bulu'ú'è lè', ate' yöjčachi'-gaquié' lè' yeru ba.

**Rugahué' Jesús zíanró ca
chi-un gayuá' bönachi**

(Mt. 14:13-21; Lc. 9:10-17; Jn. 6:1-14)

³⁰ Gudödi ni' bulu'dubé' bönni' gubáz queé' Jesús ga zoé', en gula'guíxjöi'iné'

Lë' yúgu'të le gulunë', en yugu' le bulu'sédinë' bönachi. ³¹Nacuá' bönachi zían ni', nupa zá'gaca, en nupa sōjaca, ga bidxintë bítirō dë lataj ilahuë' Jesús, en yugu' bōnni' dá'gaquië' Lë'. Que lë ni na' Jesús gudxë' légaquië', rnnë':

—Gulí'dá. Uyéaj cázaru' ga naca lataj cá'asō, en uzí' lādxi'ru' tu chí'i.

³²La' légacase' yōjáquië' tu lë'e bárcodo', ate' bila'dxinë' tu lataj cá'asō. ³³Bila'lë'e bönachi zían légaquië' sōjáquië' ni', en núnbë'gaca Jesús. Que lë ni na' bōnni' yúgu'të yōdzō ni' carelō yōjáquië' ni'. Gula'zë'e ní'agaquië', ate' bila'dxinë' ni' zí'atëlō ca Jesús, en yugu' bōnni' dá'gaquië' Lë'. ³⁴Cate' burúajë' Jesús lë'e bárcodo' na', bilé'enë' bönachi zían na', ate' buéchi' lādxi'ë légaquië' tu' nácagaquië' ca bö'cu' zxlá'do' bití' zoa nu gapa chí'i légacaba'. Gusí lahuë' rusédinë' légaquië' le zían. ³⁵Cate' chiridzō' dza na', yugu' bōnni' dá'gaquië' Jesús bila'dxinë' ga zoë', en tē' Lë':

—Chiridzō', ate' lataj cá'asō naca ni.

³⁶Busöl-la' bönachi zían ni para tsōjaca yugu' yú'udo', en yugu' yōdzōdo' nacuá' gásibi'lō, tsōjō'ugaca yōta, tu' cabí bi dë ni le ilagu.

³⁷Bubi'ë didza' Jesús, gudxë' légaquië':

—Gulí'güf' libí'i cázali' le ilahuë'.

Gulé' Lë':

—¿Naru' tsōjō'utsatu' yōta xtila len lázxjatu' que idú xunu' beo', ate' güf'itu' le ilahuë'?

³⁸Jesús gudxë' légaquië':

—¿Bal-laxi yōta xtila dë queéli'? Gulí'tsōjyútsōca'.

Cate' chinóziguequinë', tē' Lë':

—Gáyu'sō yōta xtila dë, en chópasōba' bōla dëba'.

³⁹Ní'irō gunná bë'ë Jesús ilunë' ga ila'bō' bönachi zían na', ila'cuá' tu cō' huéajguequi ga naca lachi' lu daca'. ⁴⁰Gula'cu'ë tu cō' huéajgaquië', tu

gayuá' huéajgaquië', en chi-un huéajgaquië'. ⁴¹Ní'irō gudélë'ë Jesús igáyu'të yōta xtila na', en irópaba' bōla na'. Buyúë' zaca' lúzxiba, en gudxë' Dios: "Xclenu'." Ní'irō buzxuzxjë' yōta xtila na', en bë'ë quégaquië' bōnni' usëda queë' para ila'guísië' quégaca bönachi zían na'. Gudísië' ca' irópatëba' bōla na' quégaca yúgu'të bönachi na'. ⁴²Gulahuë' yúgu'të', en bulu'huóljanë'. ⁴³Ní'irō bulu'tubë' le bizxaj que yōta xtila na', en quégacaba' bōla, ate' chinnu ga'bōra bulu'lfë'. ⁴⁴Guláquië' ca chi-un gáyu'ë bōnni' na' gulahuë'.

Rizë'e ni'ë Jesús lu nísado'

(Mt. 14:22-27; Jn. 6:16-21)

⁴⁵La' bentë' Jesús ga gula'benë' yugu' bōnni' dá'gaquië' Lë' lë'e bárcodo', para ila'nóruë' lahuë', ila'dödë' lu nísado' na', para ila'dxinë' lu yōdzō Betsaida, tsanni ni' Lë' rusöl-lë' bönachi zían na' lídxiguequi. ⁴⁶Cate' chibudxi busöl-lë' légaquië', guyijë' tu lu gu'ado', ate' ni' ru'ílenë' Dios didza'. ⁴⁷Cate' chizá' ralla, zeaj bárcodo' na' gatsaj láchui'lō nísado', ate' zoë' Jesús tuzë' luyú bidxi na'. ⁴⁸Bilé'enë' Jesús légaquië', bōniga tu'sé'ë bárcodo' na' tu' recja bö' za' ga na' ta'dödë'. Gudōdi guluhuëla bidxinë' Jesús ga na' nacu'ë, rizë'e ni'ë lu nísado' na', ate' gú'unnë' tōdisë' ga na' nacu'ë. ⁴⁹Cate' bila'lë'enë' Lë' rizë'e ni'ë lu nísado', guléquinë' bixín na', ate' gula'bódxii'ë ⁵⁰tu' bila'lë'enë' yúgu'të' Lë', en guladxi gula'dzōbinë'. Ní'irō la' bulidztë' Jesús légaquië', rnnë':

—Bulí'tipa lādxi'li'. Neda' caz. Bití' gádxili'.

⁵¹Gurenë' Jesús lë'e bárcodo' ga na' nacu'ë, ate' guró'ō dxi bö' na' recja, ate' légaquië' gula'niti gula'tíqui'sinë' bulu'báninë'. ⁵²Bití' ta'yéajni'ininë' le rulu'íi lë na' benë' Jesús que yōta xtila na'. Ní' naca zidi icja lādxi'do'gaquië'.

**Ruúnë' Jesús nupa te'e
lu yödzo Genesaret**

(Mt. 14:34-36)

⁵³ Gula'dödë' Jesús, en yugu' bönni' dá'gaquië' Lë' ia'tsölá'a nísado', ate' bila'dxinë' ga naca lu xiyúgaca bönachi Genesaret. Bulu'dxíguë'ë bárcodo' luyú bidxi ni'. ⁵⁴ Cate' bulu'rúajë' lë'e bárcodo' na', la' bulu'únbë'të bönachi ni' Jesús. ⁵⁵ Gula'xiti' bönachi na', yójaca yúgu'të yódzödo' idú gásibi'ilö, en gula'sí ló-gaquië' dujuá'agaquië' yúgu'të nupa te'e ga zoë' Jesús, zxóagaca yugu' le dégue-quiní, ate' bila'dxinë' gátitës ta'yönnë' zoë' Jesús. ⁵⁶ Gátitës ga ridödë' Jesús, yugu' lu yódzödo', en yugu' yödzo zxön, en yugu' yú'udo', tu'cu'ë nupa te'e qué-gaquië' gapa naca la' nöza, en gapa naca lu yé'ëyi, en ta'tá'yuë' lahuë' Jesús gu'ë légaquië' lataj ila'gansë' luzxi lari' nácue'. Yúgu'të nupa na' bila'gán lari' nácue' bulu'huóacaté dxí'ado'.

**Le tun ga biti' nácagaca bönachi
tsahui' lahuë' Dios**

(Mt. 15:1-20)

7 N'firö bal-lë' bönni' yudo' fariseo len bal-lë' bönni' yudo' usedi narúaj-gaquië' Jerusalén, bulu'dubë' ga zoë' Jesús. ² Bönni' yudo' ni bila'lé'enë' bönni' usëda queë' Jesús tahuë' yöta, biti' nuchí'agaquië' ná'agaquië', lë na' rnna: Biti' nayárigaca ca nalébiguequinë' tunë' bönni' yudo' na'. Que lë ni na' gula'nnë' quégaquië'. ³ Yugu' bönni' yudo' fariseo na', en ia'zica'rö bönachi judío tunë' ca gulébiguequinë' gulunë' xuz xtó'ogaquië', ate' channö cabí ta'gu'fbi ná'agaquië' zían luzuí ca na' nalébigue-quinë' tunë', biti' ca' tahuë'. ⁴ Cate' tu'dx-inë' röjó'ugaquië' lu yé'ëyi, channö cabí ta'guibë' lë na' ca nalébiguequinë' tunë', biti' ca' tahuë'. Zíanrö ca' tunë', yugu' le nalébiguequinë' tunë'. Caní ta'guibë' zxi-ga' yó'óna, en yugu' zxi-ga' guíë, en yugu'

le táti'në'. ⁵ Que lë ni na' yugu' bönni' yudo' fariseo, en yugu' bönni' yudo' usedi gula'nábinë' Jesús, ta'nnë':

—¿Naru' cabí tunë' yugu' bönni' usëda quiu' ca gulébiguequinë' gulunë' xuz xtó'oru', pero tahuë' yöta biti' nuchí'agaquië' ná'agaquië'?

⁶ Bubi'ë didza' Jesús, rë' légaquië':

—Libí'ili', bönni' rulu'f'isö tsahui' cuin-li'. Nácaté le gudíxjö'ë Isafas, bönni' ni' bë'ë didza' uláz queë' Dios, ca naca queé'li'. Buzúajë' lu guichi, gunné': Yugu' bönni' ni, len rú'agacasë' tunë'

neda' bal,

calëga idú ládxi'gaquië'.

⁷ Níti'sö naca yöl-la' ba ta'gu'ë neda'

tu' tu'sëdinë' le ta'nná bë' bönachi, calëga xibá quia'.

⁸ Caní naca, tu' rucá'anali' le gunná bë'ë Dios, ate' runli' yugu' le nazi' láhuili' lu ná'agaca bönachi.

⁹ Gudxë' ca' légaquië':

—Idú ládxi'li' rucá'anali' cá'asö le gunná bë'ë Dios para gunli' ca naca le nulaga loli' runli'. ¹⁰ Moisés gunné' caní: “Ben bal xuz xinó'o.” Gunné' ca': “Nu ulidza zi' xuzi o xinë'e, guli'gútitë nu na'.” ¹¹⁻¹² Libí'ili' rnnali' caní: “Channö nu bönni' guíë' xuzë' o xinë'ë: Biti' gaca bi gunna' queé'li', tu' naca Corbán.” (Didza' ni rnna lu didza' xidza': Tu' nuzóa' quez queë' Dios yúgu'të.) N'firö rnnali': “Biti' run bayudxi bi gunë' bönni' na' quégaquië' xuz xinë'ë.” ¹³ Caní naca, rucá'anali' cá'asö xtídzë'ë Dios para gunli' le nulaga loli' runli', yugu' le rudódim' lu ná'agaca zxi'ini xi'sóali'. Zíanrö ca' le caní runli'.

¹⁴ N'firö Jesús bulidzë' bönni' zían na' nacu'ë ni', en rë' légaquië':

—Gulizé' nágali' didza' gu'a, yúgu'tëli', en guli'tséajni'i. ¹⁵ Biti' bi dë le riyaza nu bönni' le gaca gun ga biti' náquië' tsahui' lahuë' Dios, pero le rirúaj lë', lë ni gaca gun ga biti' náquië' tsahui' lahuë' Dios.

¹⁶ Channö zoa nágali', en riyónili', buli'zé nágali'.

¹⁷ Cate' Jesús bulá'alenë' bönachi zían na', guyu'ë tu yu'u, ate' yugu' bönni' usëda queë' gula'nábinë' Lé' ca naca lë na' bucúdzu'ë didza'. ¹⁸ Jesús gudxë' légaquië':

—¿Riyádzjatsö ca' queé'li' yöl-la' réajni'i? ¿Naru' cabí réajni'ili', yúgu'të le riyaza nu bönni', biti' gaca gun ga biti' náquië' tsahui' lahuë' Dios? ¹⁹ Naca caní tu' cabí riyaza icja ládxi'da'ahuë', pero lé'ësë' riyaza, ate' rurúaj lë'ë.

Tu' gunné' caní Jesús, buluf'inë' rë'u naca dxi'a yúgu'të le rë'aj ráguru'.

²⁰ Gunné' ca' Jesús:

—Le rirúaj lu bönni' run ga biti' náquië' tsahui' lahuë' Dios. ²¹ Caní naca, tu' ta'rúaj icja ládxi'do'gaquië' bönni' yugu' le ta'zá ládxi'gaquië' le naca xihui', yugu' le tun ga tunë' dul-la' ta'guitsjé' xibá que yöl-la' nutsaga na', en yugu' le ruá' dö'. Tun ga tútië' bönachi, ²² en ta'banë', en ta'zé ládxi'gaquië' le dë que luzá'agaquië', en tu'ë dö', en ta'z' yë'ë, en tu'zxë'ë, en ta'nná zi'ë que luzá'agaquië', en tun ba zxön cuíngaqië', en tunë' le canóz. ²³ Yúgu'të le xihui' caní ta'rúaj icja ládxi'da'ahuë' nu bönni', en tun ga biti' náquië' tsahui' lahuë' Dios.

Tu nigula izá'a réajlë'ënu Jesús

(Mt. 15:21-28)

²⁴ Buzé'ë Jesús ni', ate' bidxinë' gala' ga nacua' yödzö Tiro, en yödzö Sidón. Guyázië' tu yu'u ni', en gú'unnë' cunttu nu inözi, pero biti' ca' guca ucachi' cuinë'. ²⁵ Tu nigula zóabi' bi'i nigúlado' queénu, yu'u bö' xihui' lëbi', biyóninu didza' rizé ca naca queë' Jesús, ate' la' bídatënu ga zoë' Jesús, en buzóa zxfbinu xini'ë. ²⁶ Nigula ni biti' nácanu judío, pero nabábanu bönachi Sirofenicia. Gú-ta'yunu lahuë' Jesús ubéajë' bö' xihui' na' yu'u-bi' bi'i nigúlado' queénu. ²⁷ Ní'irö Jesús gudxë'-nu, rnnë':

—Bë' lataj ulu'huö'aj z'í'älö nupa náca-gaca ca zxf'ini xan yu'u, tu' cabí naca dxi'a ugúaru' yöta quégacabi' bi'i na', en chú'unaru' le lógacaba' bó'cu'do'.

²⁸ Bubí'inu didza' nigula na', gúdxinu Jesús:

—Ön, Xan, pero yugu' bó'cu'do' nacua'aba' zxani ga tágubi', táguba' le bizxaj tu'huó'aj ga na' tágubi'.

²⁹ Ní'irö Jesús gudxë'-nu, rnnë':

—Tu' gunnó' caní, huáca huó'aju'. Chiburúaj bö' xihui' na' guyu'u-bi' bi'i nigúlado' quiu'.

³⁰ Cate' budxinnu lídxinu, bilé'enu-bi' bi'i nigúlado' queénu na', dëbi' lu da'a, en chinurúaj bö' xihui' na' guyu'u lëbi'.

Jesús ruúnë' tu bönni' nacódzuë', en biti' gaca innë'

³¹ Burúajë' Jesús lataj na' nababa yödzö Tiro, ate' gudödë' gapa dë yödzö Sidón, en yugu' yödzö Decápolis, ate' bidxinë' ra' nísado' lu xiyú Galilea. ³² Bönachi ni' dujuá'gaca tuë' bönni' nacódzuë', en biti' raca innë' ga zoë' Jesús, ate' ta'ta'yu lahuë' Jesús ixóa në'ë lë'. ³³ Jesús bubéajë' lë' tsölá'alö lád-jagaca bönachi na', ate' bunë'ë xibón në'ë yeru náguië' bönni' na'. Gurú'unë' zxóna'do', en gudanë' lúdxë'ë. ³⁴ Ní'irö buyúë' lúzxibálö, en gunné ládxe'ë, rnnë':

—Efaa.

Didza' hebreo ni rnnu lu didza' xidza': Guyalaj.

³⁵ La' böáljatë náguië', en la' bugújtjatë lúdxë'ë, en gunnë'të dxi'ado'.

³⁶ Jesús gunná bé'enë' légaquië' cunttu nu ilé' ca', pero tsca gunná bé'enë' légaquië', bulu'zëtë're' ca' didza' que lë na' benë'. ³⁷ Bulu'bábinë', ta'nnë':

—Tsáhu'i'do' runë' yúgu'të. Runë' ga tu'yöni nupa gulaca cödzu, en ga tu'í didza' nupa biti' guca ila'nnë'.

**Rugahuë' Jesús zíanrö ca
choá' gayuá' bönachi**

(Mt. 15:32-39)

8 Yugu' dza na' bulu'dubi bönachi zían ga zoë' Jesús. Tu' cabí dë le ilágu-gaca, Jesús bulidzë' bönni' usëda queë', ate' bé'lenë' légaquië' didza'. ²Gudxë' légaquië':

—Ruhuechi' ládxa'a bönachi zían ni tu' chinaca tsonna dza nacua'len neda' ni, en bití' dë le ilágugaca. ³Channö usól-la'a léguequi lídxigaca ta'dunsö ca', huala'cuídi' la' nöza, tu' zá'gaca zi'tu' bál-lagaca.

⁴Bulu'bi'ë didza' bönni' usëda queë', të' Lë':

—¿Bizxi ugágutsaru' bönachi guizxi yu ni, ga ni naca lataj cá'asö?

⁵Gunábinë' Jesús légaquië', rnnë':

—¿Bál-laxi yöta xtila dë queé'li'?

Të' Lë':

—Gádxisö.

⁶Ní'irö Jesús gunná bé'enë' bönachi zían na' ila'bó' lu yu. Gudél'ë gadxi yöta xtila na', ate' gudxë' Dios: "Xclenu." Ní'irö buzuzxjé' léguequi, en bé'ë quegaquië' bönni' usëda queë' para ila'guísië' lógaca bönachi zían na'.

⁷Guta' ca' quegaquië' tu chópaba' böla cuidi'. Jesús gudxë' Dios: "Xclenu", ate' gunná bé'enë' légaquië' ila'guísië' ca' légacaba' lógaca bönachi. ⁸Gulagu yúgu'të bönachi na', en bulu'huólaj. Ní'irö bulu'tubë' le bizxaj nagá'anagaca, ate' gula'lí idú gadxi ga'böra. ⁹Bönachi na' gulagu gulaca idú ca choá' gayuá'gaca. Jesús busöl-lë' léguequi lídxigaca, ¹⁰ate' gurenë' lë'e bárcodo' tsözxón len yugu' bönni' usëda queë', ate' bila'dxinë' lu xiyúgaca bönachi Dalmanuta.

**Ta'nábinë' Jesús gunë' tu
le gaca bë' nuzxi náquië'**

(Mt. 16:1-4; Lc. 12:54-56)

¹¹Ní'irö bila'dxinë' bönni' yudo' fariseo ga zoë' Jesús, en gula'sí lógauquië' ta'díl-lalenë' Lë' didza'. Gulé'ënnë' ila'z'í bé'ë Jesús. Que lë ni na' gula'nábinë' Lë' gunë' tu le naca bë' za' yehua' yubá. ¹²Gunnëda' ládxe'ë Jesús, rnnë':

—¿Bizx que ta'nábitsö bönachi ni neda' guna' tu le naca bë' za' yehua' yubá? Le nácatë rea' lib'í'li', bití' ca' ilé'eli' tu le naca bë' za' yehua' yubá.

¹³Ní'irö bulá'alënë' légaquië'. Bubenë' lë'e bárcodo', en sa'yéajë' ia'tsölá'a nísado'.

**Le tu'sédinë' bönni' yudo'
naca ca cúa zi que yöta xtila**

(Mt. 16:5-12)

¹⁴Gulal-la ládxi'gaquië' bönni' usëda queë' Jesús ilu'ë bi ilahuë', ate' tuz yöta xtila dë lë'e bárcodo' na'. ¹⁵Ní'irö Jesús buzéajni'inë' légaquië', rnnë':

—Buli'yútsöca' queé'li'. Guli'gún chi'i cuinli' para cabí s'í'li' le naca ca cúa zi que yöta xtila quegaquië' bönni' yudo' fariseo, en queë' Herodes.

¹⁶Gula'sí lógauquië' tu'ë didza' bönni' usëda queë' la' légacasë', ta'nnë':

—Gunnë' caní tu' cabí dë yöta xtila gáguru'.

¹⁷Réquibe'enë' Jesús le ta'nnë', ate' rë' légaquië':

—¿Bizx que ru'í'li' caní didza' tu' cabí dë yöta xtila gáguru'? ¿Naru' cabí réajni'itseli', en bití' réquibe'itseli'? ¿Ni nácatsö zidi icja ládxi'do'oli'? ¹⁸¿Zóatsö guió'j loli', en bití' rilé'eli', en zóatsö guídi nágali', en bití' riyónili'? ¿Naru' cabí röjnétseli'? ¹⁹Cate' ni' buzuzxja' gayu' yöta xtila, ate' gulahuë' chi-un gáyu'ë bönni', ¿bál-laxi ga'böra bulili' le bizxaj butúbili'?

Gula'nnë':

—Chinnu.

²⁰ Gunné' ca' Jesús:

—Cate' ni' buzxuzxa' gadxi yöta xtila, ate' gulagu choá' gayuá' bönachi, ¿bál-laxi ga'böra bulili' le bizxaj butúbili'?

Gula'nné':

—Gadxi.

²¹ Ní'irö Jesús gudxé' légaquié':

—¿Naru' cabí réajni'itseli' na'a, bé'a didza' que le tu'sédiné' bönni' na'?

**Jesús ruúné' bönni'
Betsaida nachul-la lahué'**

²² Cate' Jesús, en bönni' dá'gaquié' Lë' bila'dxiné' yödzö Betsaida, bila'dxín ga zoé' Jesús nupa dujuá'gaquié' queé' tu bönni' nachul-la lahué'. Ta'tá'yué' lahué' cané' bönni' na'. ²³ Jesús gudélé'ë në'ë bönni' na' nachul-la lahué', ate' guché'ë lé' ní'lö ra' yödzö. Ní' budxíé' zxöna' guiój lahué', en guxóa në'ë lé'. Ní'irö gunábiné' lé', rnné':

—¿Ba rilé'enu' lati'?

²⁴ Buyúé' bönni' na' nachul-la lahué', rnné':

—Rilé'egacada' bönachi, nalá'gaca ca yugu' yaga, pero ta'dá bönachi na'.

²⁵ Leyúbölö guxóa në'ë Jesús guiój lahué', ate' buyúdé'ë bönni' na' nachul-la lahué', ate' böácate' dxí'ado' guiój lahué'. Na'a rilé'ené' dxí'ado' yúgu'të. ²⁶ Ní'irö Jesús gusól-lé'ë lé' lidxé', rnné':

—Biti' tsöjdödu' lahui' yödzö, en cuntu nu guío' le bena' nu zoa lu yödzö ni.

Rnné' Pedro: “Jesús náquié' Cristo”

(Mt. 16:13-20; Lc. 9:18-21)

²⁷ Gudödi na', bulu'zé'ë Jesús, en yugu' bönni' uséda queé' ni', ate' gula'dödé' yugu' yödzödo' nabábagaca Cesarea, ga na' rinná bé'ë Filipo. Tsanni ni' yú'u-gaquié' nöza, Jesús rinabi yudxé' yugu' bönni' uséda queé', rnné':

—¿Nuzxi ta'nná bönachi naca'?

²⁸ Bulu'bi'ë didza', ta'nné':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-la nacu' Elías, bönni' bé'ë didza' uláz queé' Dios dza ni'te. Ta'nná ia'bal-la nacu' bönni' yúbölö bé'ë didza' uláz queé' Dios dza ni'te.

²⁹ Ní'irö Jesús gunábiné' légaquié', rnné':

—Nazxi libí'ili', ¿nuzxi rnnali' naca'?

Bubi'ë didza' Pedro, rnné':

—Li' nacu' Cristo.

³⁰ Ní'irö Jesús gunná bé'ené' légaquié' cuntu nu ulu'siyönné' Nu náquié'.

Rigúixjö'ë Jesús ca si' ilútié' Lë'

(Mt. 16:21-28; Lc. 9:22-27)

³¹ Ní'irö gusí lahué' Jesús rusédiné' bönni' dá'gaquié' Lë', rnné':

—Run bayudxi qui'i saca'a neda', Bönni' Guljé' Bönachi. Bönni' gula tu'zéajni'iné', en yugu' bixúz unná bé', en bönni' yudo' tu'sédiné' ulu'zóé' neda' tsölá'alö. Ilútié' neda', pero cate' gaca tsonna dza ubana'.

³² Yálajsö bé'lené' légaquié' didza' ni. Ní'irö Pedro guché'ë Jesús tsölá'alö, en gusí lahué' ridil-lé' lé' didza'. ³³ Buécjé' Jesús, en buyúé' ia'zica'ré' bönni' uséda queé', ate' buzené' bach Pedro, rnné':

—Gucuita ga zoa'. Nacu' ca Satanás, tu' xihui'. Le riza' ládxu'u biti' za' lu në'ë Dios, pero ca ta'zá' ládxi'gaca bönachi naca.

³⁴ Ní'irö Jesús bulidzé' yugu' bönni' uséda queé', enca' bönachi nacua' ni', en gudxé' légaquié':

—Channö ré'ëné' nu bönni' tē'ë neda', ral-la' uzóé' tsölá'alö le ré'ëni quéziné', en gáquié' ca tu bönni' sa'yéajé' söjté'ë lé'e yaga cruz, ate' ní'irö huáca tē'ë neda'. ³⁵ Nu bönni' ruf'ida' ládxé'ë yöl-la' na'bán queé', unítié' le, pero nu bönni' unítié' yöl-la' na'bán queé' tu' dé'ë neda', o tu' dé'ë didza' dxí'a quia', udéli'né' bönni' ni yöl-la' na'bán queé'. ³⁶ ¿Naru' uzi'tsé' xibé tu bönni' channö utubé'

yúgu'tè le dë yödzölió ni, pero uniti cuinë'? ³⁷ Biti' bi gaca unödzej' tu bönni' le huóá'ui cuinë'. ³⁸ Channö zoë' nu bönni' rutuf'inë' quia' neda', en que xtídza'a lógaca bönachi ni nucá'anagaca Dios, en tun dul-la', lësca' caní neda', Bönni' Guljé' Bönachi, utuf'ida' queë' bönni' na' cate' guídalená' yöl-la' huáca zxön queë' Xuza', ate' dzágagaquié' gubáz lá'ayi neda'.

9 Jesús gudxé' ca' légaquié', rnnë':
—Le nácatè rea' libí'ili', nacua' ni nupa biti' ilátigaca cate' ila'lé'erö idinná bë'ë Dios luyú ni, en ilá' lahui yöl-la' huáca zxön queë'.

Ridzá'a ca riná' lahué' Jesús

(Mt. 17:1-13; Lc. 9:28-36)

² Cate' chigudödi xopa dza, Jesús guché'ë Pedro, en Jacobo, en Juan, ate' légacasë' yöjáquié' tu lu gu'á sibi. Ní' bidzá'a ca riná' lahué' Jesús lógaquié' yonnë' na'. ³ Guyëpi yösa bení' lari' nácue' Jesús, ate' guca chiguíchido'os. Zxíla'do'os guca, le cuntú nu ra' lari' yödzölió ni gaca gun chiguíchido'os ca guca lari' na'. ⁴ Bulu'luf'i lógaquié' Elías, en Moisés, tu'ílenë' Jesús didza'. ⁵ Ní'irö Pedro gudxé' Jesús:

—Bönni' Usedi, bica' ba rë'u zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

⁶ Caní gunné' Pedro tu' cabí nözínë' bi na' rnnë', tu' tádxiné' bönni' usëda queë' Jesús na'. ⁷ Ní'irö gurö'ö böaj le gulú'u zxul-la légaquié', ate' biyón chí'i nu ruf'i didza' lu böaj na', rnna:

—Bönni' ni Zxf'ina'. Nadxf'ida' Lë'. Bu-lí'zé nágali' Lë'.

⁸ La' bulu'yutë' pero cúnturö nu ta'lé'enë'. Tuzé' Jesús zóalenë' légaquié'.

⁹ Tsanni ni' yú'ugaquié' nöza, tu'dín-nië' lu gu'á sibi na', Jesús gunná bé'enë' légaquié' cuntú nu ulu'siyönnë' ca', lë na' bila'lé'enë', cate' ubanrë' lu yöl-la' guti

Lë', Bönni' Guljé' Bönachi. ¹⁰ Que lë ni na' gula'gú'usë' ícjagaquié' didza' ni bë'ë, ate' la' légacasë' ta'nabi yúdxiné' luzá'agaquié' bizxi sa'yéaj didza' na' bë'ë, gunné' ubanë' lu yöl-la' guti. ¹¹ Gula'nábinë' Jesús, ta'nnë':

—¿Bizx que ta'nnë' bönni' yudo' usedi run bayudxi guídë' Elías z'f'alö ca guídë' Cristo?

¹² Bubi'ë didza' Jesús, rnnë':

—Le nácatè guídë' Elías z'f'alö, en ucu'ë yúgu'tè ca ral-la' gaca. Na'a, ¿bizxi sa'yéaj le nazúaj lu guichi rnna run bayudxi qui'i sáquë'ë Bönni' Guljé' Bönachi, ate' cá'asö ulu'cá'ana bönachi Lë'? ¹³ Rea' libí'ili': Chibidë' Elías, ate' gulunë' queë' tsca gulé'ënnë', tsca nazúaj lu guichi lá'ayi ca ral-la' gaca queë'.

Jesús ruúnë'-bi' bi'i bönni' yu'u lëbi' bö' xihui'

(Mt. 17:14-21; Lc. 9:37-43)

¹⁴ Cate' ni' bulu'dxinë' Jesús, en bönni' dzágagaquié' Lë' ga na' nacu'ë ia'z'ica'rë' bönni' usëda queë' Jesús, bila'lé'enë' nacua' bönachi zían ni', ate' bönni' yudo' tu'sédinë' ta'díl-lalenë' yugu' bönni' usëda queë' na' didza'. ¹⁵ Cate' bönachi zían na' bila'lé'e Jesús, bulu'bani, en carelö zá'gaca ga na' zë'ë, dijódxigaca Lë': "Padiux."

¹⁶ Ní'irö Jesús gunábinë' yugu' bönni' usëda queë' na', rnnë':

—¿Bizxi didza' na' ridíl-lalenli légaquié'?

¹⁷ Bubi'ë didza' tu bönni' nútsë'ë ladaj bönachi zían na', rnnë':

—Bönni' Usedi, nachë'a-bi' bi'i bönni'do' quia' ni quiu', yu'u lëbi' bö' xihui' le run ga biti' raca innëbi'. ¹⁸ Cate' bö' xihui' na' ru'u lëbi', rurixi rutula lëbi' lu yu, ate' ribía bidxina' zidi' ruá'abi', en rutil-la láya'bi'. Que lë ni na' zeaj ridxítabi'. Gunábigacada'-në' bönni' usëda quiu' ulu'béajë' bö' xihui' na', pero biti' gula'zéqui'në'.

¹⁹ Bubi'ë didza' Jesús, rnnë':

—Libi'ili', bönni' cabí ta'yéajlë'ë. ¿Gá-ca'xte caz ral-la' sóalena' libí'ili'? ¿Gá-ca'xte caz ral-la' guá' ilena' queéli'? Gulí'diguá'-bi' quia' ni.

²⁰ Dujuá'agaquië'-bi' ga na' zoë' Jesús. Cate' bö' xihui' na' bilé'e Lë', la' buxízité lëbi'. Gudzö'öbi' lu yu, ate' burixi butula lëbi'. Ate' bidxía bidxina' zidi' ruá'abi'.

²¹ Ní'irö Jesús gunábinë' xúzibi' bi'i na', rnnë':

—¿Gáca'xi chiguca raca caní queébi'?

Rnnë' xúzibi' na':

—Ni' nácatëbi' bí'ido' ré'ebi' caní.

²² Zián luzuí rirú'una lëbi' lu guí', en lu nisa para guti lëbi'. Que lë ni na', channö racu' lati', buéchi' ladxí netu', gácalenu' netu'.

²³ Jesús gudxë' lë':

—Channö huáca tséajlë'u, yúgu'të huáca channö tséajlë'u Dios.

²⁴ La' bë'të' zidzaj didza' xúzibi' bi'i na', rnnë':

—¡Réajlë'a! ¡Gúcalen neda' para tséajlë'ëra' Lë'!

²⁵ Cate' bilé'enë' Jesús zá'gaca bönachi zían, tu'quí Lë', buzenë' bach bö' xihui' na', ré' le:

—Li', bö' xihui' runu' ga biti' raca inná, en biti' raca yöni bönachi, rinná bé'eda' lí' uruju' lu bi'i ni, en bítí'rö tsu'u lëbi'.

²⁶ Guródxi'a bö' xihui' na', en burixi butúlada' bi'i na'. Ní'irö burúajtë, en bucá'ana bi'i na' ca bi'i nati cázabi'. Ca' naca, gulufi' didza' bönachi zían ni', ta'nná:

—Chinátibi'.

²⁷ Ní'irö Jesús gudélë'ë ná'abi', en buchisë'-bi', ate' guzu'bi' bi'i na'.

²⁸ Ní'irö guyázië' Jesús tu yu'u, ate' la' légasasë' gula'nábinë' bönni' usëda queë' Lë', ta'nnë':

—¿Bíx que biti' guca ubéajtu' netu' bö' xihui' na'?

²⁹ Jesús gudxë' légaquië':

—Biti' gaca ubéajli' cá'asö bö' xihui' caní, pero tuz channö ulídzali'-në' Dios, en gunli' gubasa.

Jesús riguíxjö'ë leyúbölö ca si' ilútië' Lë'

(Mt. 17:22-23; Lc. 9:43-45)

³⁰ Cate' bulu'zë'ë Jesús, en yugu' bönni' dá'gaquië' Lë' ni', gula'dödë' luyú Galilea. Biti' ré'ënë' Jesús nu inözi ga na' zoë' ³¹ tu' rusédinë' yugu' bönni' usëda queë'. Ré' légaquië':

—Ulu'dödë' neda', Bönni' Guljë' Bönachi, lu ná'agaquië' bönni' ilútië' neda', pero tödi gátia', cate' gaca tsonna dza ubana'.

³² Biti' gula'yéajni'inë' didza' ni ré' légaquië', ate' tu' tádxinë', biti' bi gula'nábinë' Lë'.

Nu naca lo

(Mt. 18:1-5; Lc. 9:46-48)

³³ Ní'irö Jesús, en bönni' dá'gaquië' Lë' bila'dxinë' yödzo Capernaum, ate' tsanni ni' nacu'ë lu yu'u, Jesús gunábinë' légaquië', rnnë':

—¿Bíxí didza' na' gudíl-lalen luzá'ali' cate' ni' yú'uli' nöza?

³⁴ Légaquië' bulu'sayaj rú'ugaquië', tu' gula'díl-lalen luzá'agaquië' didza' la' nöza ni' núzxilögaquië' gáquië' bönni' lo.

³⁵ Ní'irö gurö'ë Jesús, en bulidzë' idxín-nutë' bönni' usëda queë'. Ré' légaquië':

—Nu ré'ëni gaca lo ral-la' gaca ca tu bönni' cuídí'sö, enca' ca ni'a ná'ali' yúgu'tëli'.

³⁶ Ní'irö Jesús gudélë'ë-bi' tubi' bí'ido', en buzóë'-bi' gatsaj láchui'lö ga na' nacu'ë. Ni' runidë'-bi', ré' légaquië':

³⁷ —Nu bönni' si' lu në'ë tu bí'ido' caní tu' néquibi' quia', si' lu në'ë ca' neda', ate' nu bönni' si' lu në'ë neda', calëga néda'sö si' lu në'ë, pero si' lu në'ë ca' Xuza', Bönni' na' nasól-lë'ë neda'.

Nu biti' ridá'baga' rë'u, rácalen rë'u

(Mt. 10:42; Lc. 9:49-50)

³⁸ Ní'irö Juan gudxë' Jesús:

—Bönni' Usedi, bilé'etu'-në' tu bönni' rubéajë' yugu' bö' xihui', rugunë' dxin lo'. Gunná bé'etu' lë' bí'ti'rö gunë' ca', tu' cabí dë'ë rë'u.

³⁹ Ní'irö Jesús gudxë' lë':

—Biti' inná bé'eli'-në', tu' channö zoë' nu bönni' runë' tu yöl-la' huáca le za' yehua' yubá, en rugunë' dxin La' neda', biti' ca' gaca bönni' na' inné' zi'ë quia'.
⁴⁰ Caní naca, nu biti' ridá'baga' rë'u, rácalen nu na' rë'u. ⁴¹ Nú'ti'tës nu gunna queé'li' tu xzíga'do' nisa gu'jali' tu' dá'ali' neda', Cristo, si'i caz nu na' le ral-la' gata' que.

Zoa bönadxi queéru' gunru' ga nu gun dul-la'

(Mt. 18:6-9; Lc. 17:1-2)

⁴² Gunné' ca' Jesús:

—Nú'ti'tës nu gun ga gunbi' dul-la' tubi' bí'ido' caní réajlë'ëbi' neda', gácarö dxi'a ugal-la' nu na' guichi riyëtu yaga yeni, en tsöjchú'una cuini lu nísado'.

⁴³ Channö tu no'o gun ga gunu' dul-la', guchugu le. Dxi'arö gaca quiu' tsöjtsáz-iu' ga su' ibanu' zoa tuz no'o, calëga zoa chopa no'o, ate' tsöjtsáz-iu' lu gu' gabila, ga ni' biti' ulu gu' que. ⁴⁴ Lataj ni' biti' ilátiba' buzuga' yú'ugacaba' nupa tsöjcuá' ni', ate' gu' na' biti' ca' ulu.

⁴⁵ Lësca' caní, channö tu ni'u gun ga gunu' dul-la', guchugu le. Gácarö dxi'a quiu', tsöjtsáz-iu' ga su' ibanu' zoa tuz ni'u, calëga zoa chopa ni'u, ate' tsöjtsáz-iu' lu gu' gabila, ga ni' biti' ulu gu' que.

⁴⁶ Lataj ni' biti' ilátiba' buzuga' yú'ugacaba' nupa tsöjcuá' ni', ate' gu' na' biti' ca' ulu. ⁴⁷ Lësca' caní, channö tu guió'j lo' gun ga gunu' dul-la', guléaj le. Gácarö dxi'a quiu' tsöjtsáz-iu' ga rinná bë'ë Dios zoa tuz guió'j lo', calëga zoa chopa guió'j lo', ate' tsöjtsáz-iu' lu gu' gabila. ⁴⁸ Lataj

ni' biti' ilátiba' buzuga' yú'ugacaba' nupa tsöjcuá' ni', ate' gu' na' biti' ca' ulu.

⁴⁹ Ruxi'iru' bëla' zödi', en rugála'ru' le ra' gu', para cabí gaca ditaj. Lë ni rusedi rë'u ca ulu'huóaca dxi'a yúgu'të bö-nachi. Lësca' caní, ré'ënë' Dios izxf'i zödi' yúgu'të böa' bédxido' tu'zégui'gaquië'-ba' lu bucugu lá'ayi queë'. ⁵⁰ Dxi'a naca zödi', pero channö initi yöl-la' siná'a que, ¿nacxi úniru' le siná'a? Gulí'gaca la' lib'isili' ca zödi' dxi'a, sóali' dxi'ado' tuli len ia'tuli'.

Rusédinë' Jesús que nu rulá' yöl-la' nutsaga na'

(Mt. 19:1-12; Lc. 16:18)

10 Buzé'ë Jesús yödzo Capernaum, ate' guyijë' luyú Judea, en gudödë' ia'tsölá'a yegu Jordán saca' ga rilén gubidza. Bulu'dubi leyúbölö bönachi zían ga zoë', ate' leyúbölö busédinë' légaquië' ca run cazë'. ² Ní'irö bila'dxinë' bönni' yudo' fariseo ga zoë' Jesús, ate' té'ënnë' ilunë' ga bi inné' Jesús para gaca ulu'zéguië' Lë' didza'. Gula'nábinë' Lë', ta'nné':

—¿Dë lataj bönni' nutsaga në'ë usanë'-nu nigula queë'?

³ Bubi'ë didza' Jesús, rnnë':

—¿Bizxi gunná bé'enë' Moisés lib'ili'?

⁴ Gula'nnë':

—Moisés bë'ë lataj nu bönni' uzúajë' lu guichi le rnna rulá'alenë'-nu nigula queë' na', ate' ní'irö usanë'-nu.

⁵ Bubi'ë didza' Jesús, rnnë':

—Gunná bé'enë' Moisés lib'ili' caní tu' naca zidi icja ládxi'do'oli', ⁶ pero cate' gusí lo rata' yödzülió, Dios benë' légaquië' bönni', en nigula. ⁷ Gunné': "Que lë ni na' ucá'anë' bönni' xuz xiné'ë, en tsöjsóalenë'-nu nigula queë', ⁸ ate' chopë' ni ulu'huóáquië' ca tuz bönachi." Que lë ni na' bí'ti'rö nácagaquië' chopë' pero tuz chinácagaquië'. ⁹ Que lë ni na' ca', nu naca bönachi biti' ral-la' ulá'a nupa na' chinutságuie' Dios.

¹⁰Cate' gula'yázië' yu'u, gula'nabi yúdxinë' bönni' usëda queë' Jesús ca naca didza' na' bë'ë. ¹¹Jesús gudxë' légaquië':

—Núti'tës bönni' ulá'alenë'-nu nigula queë', en utsaga ná'alenë'-nu nigula yúbölö, runë' dul-la' le riguitsaj xibá que yöl-la' nutsaga na' tu' rusubáguë'ë-nu dul-la' nigula na' guzóalenë'-nu z'á'alo.

¹²Lësca' caní channö tu nigula nutsaga ná'lennu bönni' usannu-në', en s'ínu-në' bönni' yúbölö, runnu ca' dul-la' le riguitsaj xibá que yöl-la' nutsaga na'.

**Jesús rulidza
tsáhuë'ë-bi' yugu' bí'ido'**

(Mt. 19:13-15; Lc. 18:15-17)

¹³Ní'irö bila'dxín bönachi ga zoë' Jesús dujuá'gaquië' bí'ido' quéguequi. Té'ëni ixóa në'ë légacabi', ate' gula'sí ló-gaquië' bönni' usëda queë' Jesús ta'dilla dídza'gaquië' nupa na' dujuá'agaca légacabi'. ¹⁴Cate' bilé'enë' Jesús lë ni, gulënë' légaquië', en gunné':

—Gulí'güi'-gácabi' bí'ido' lataj ila'dxinbi' quia'. Biti' uzá'aga'gacali'-bi', tu' gata' quégaca nupa ná'cagaca ca bí'ido' ni, lataj ga rinná bë'ë Dios. ¹⁵Le nácatë rea' libí'ili': Nu cabí si' lu në'e le rinná bë'ë Dios ca runbi' tu bí'ido', biti' ca' tsaza ga ni' rinná bë'ë.

¹⁶Ní'irö Jesús bunidë'-bi' yugu' bí'ido' na'. Guxóa në'ë légacabi', en bulidza tsáhuë'ë-bi'.

Bönni' cuidi' napë' yöl-la' tsahui'

(Mt. 19:16-30; Lc. 18:18-30)

¹⁷Cate' bu'ë Jesús nöza, carelö bidë' tu bönni', en buzóa zxibë' lahuë' Jesús, en gunábinë' Lë', rnnë':

—Bönni' Usedi idú dxi'a, ¿nacxi guna' para idéli'da' yöl-la' na'bán idú?

¹⁸Jesús gudxë' lë':

—¿Bixx que ru'u neda' didza', rmo': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a.

¹⁹Chinóz quézinu' yugu' le gunná bë'ë Dios, gunné':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innío' que luzó'o le cabí nácatë.

Biti' ucáchi'lanu'.

Ben bal xuz xinó'o.

²⁰Bubi'ë didza' bönni' na', rë' Jesús:

—Bönni' Usedi, yúgu'të lë ni run caza' cate' ni' nácatea' bí'ido'.

²¹Len yöl-la' dxi'i ladxi' queë', Jesús buyúë' lë', rnnë':

—Tu le riyadzaj quiu'. Guyéaj, yöjëti' yúgu'të le dë quiu', en bunödzej quégaca bönachi yechi' lë na' si'u, ate' gata' quiu' yöl-la' tsahui' yehua' yubá. Ní'irö huödu' quia', gacu' ca tu bönni' sa'yéajë' söjtë'ë lë'e yaga cruz, ate' to'o neda'.

²²Cate' biyönnë' didza' ni, buf'innë', ate' söhuójë' risëbi ládxi'ë tu' dëda' yöl-la' tsahui' queë'.

²³Ní'irö buyúë' Jesús gásibi'ilë', en gudxë' yugu' bönni' usëda queë':

—Böniga naca ila'yaza nupa ta'lé'e yöl-la' tsahui' ga rinná bë'ë Dios.

²⁴Bulu'bá'nanë' bönni' usëda queë' ca naca xtídzë'ë, ate' leyúbölö Jesús gudxë' légaquië':

—Libí'ili', zxf'ina'do', böniga naca ila'yázië' bönni' tu'zxöni ládxi'gaquië' yöl-la' tsahui' quégaquië' ga rinná bë'ë Dios. ²⁵Nácarö böniga tsázië' nu bönni' rilé'enë' yöl-la' tsahui' ga rinná bë'ë Dios, ca tódiba' böa' ta'bía-ba' bönachi lu nagui yötsi'.

²⁶Cate' bila'yönnë' didza' ni, bulu'bánitëronë' ca'. Ta'nnë' la' légacasë':

—¿Nuzxi caz gaca ulá, channö?

²⁷Buyúë' Jesús légaquië', rnnë':

—Biti' gaca gun bönachi lë ni, pero huáquië' Dios, tu' rizéqui'në' Dios yúgu'të.

²⁸Ní'irö Pedro gudxë' Lë':

—Xan, netu' nucá'anatu' yúgu'të, en dá'atu' Li'.

²⁹ Bubi'ë didza' Jesús, rnnë':

—Le nácatë rea' libí'ili', nu bönni' ucá'anë' lidxë', o bóchë'ë, o zanë', o xuzë', o xinë'ë, o nigula queë', o yugu' zxf'inë', o xiyúë', tu' runë' xichina' o tu' runë' libán que didza' dxi'a quia', ³⁰ bönni' ni huazí' queë' ia'tú gayuá'tërö ca' dza ni zóaru' na'a, yugu' lidxë', en yugu' bóchë'ë, en yugu' zanë', en yugu' xinë'ë, en yugu' zxf'inë', en yugu' xiyúë', en-ca' yugu' le ila'bía ládxi'gaca bönachi lë', atë' lu yödzölió si' za', gata' yöl-la' na'bán idú queë'. ³¹ Zián nupa nácatë' lo na'a, ilaca cuídi'sö ni', atë' nupa nácatë' lo na'a, ilaca lo ni'.

**Leyúbölö riguíxjö'ë
Jesús ca si' ilútië' Lë'**

(Mt. 20:17-19; Lc. 18:31-34)

³² Cate' ni' yú'ugaquië' nöza, ta'benë' söjáquië' Jerusalén, nanóruë' Jesús ló-gaquië' bönni' usëda queë'. Nanítigue-quinë', en lu yöl-la' rádxisö söjácálenë' Lë'. Leyúbölö Jesús guchë'ë quez idxín-nutë' na'. Gusí lahuë' ru'ílenë' légaquië' didza' ca naca le ral-la' gaca queë'. ³³ Rnnë':

—Ril'é quezili' ribenru' zéajru' Jerusalén ga ni' zoa nu udödi neda', Bönni' Guljë' Bönachi, lu ná'agaquië' bixúz unná bë', en lu ná'agaquië' bönni' yudo' usedi, atë' chúguië' quia' gátia', en ulu'dödë' neda' lu ná'agaquië' bönni' zítu'. ³⁴ Bönni' na' ulu'titjë' neda', en ilúndë'ë neda' zi'. Ulu'chejë' neda' zxöna'. Ní'irö ilútië' neda', pero cate' gaca tsonna dza ubana' lu yöl-la' guti.

**Jacobo en Juan ta'nábinë'
Jesús bi gunë' quegaquië'**

(Mt. 20:20-28)

³⁵ Ní'irö gula'biguë'ë Jacobo, en Juan, zxf'inë' Zebedeo, lahuë' Jesús, en të' Lë':

—Bönni' Usedi, ré'ënitú' gunu' queëtu' le inábatu'.

³⁶ Jesús gudxë' légaquië':

—¿Bizxi ré'ënilí' guna' queé'li'?

³⁷ Gulé' Lë':

—Cate' idxín dza cö'u ga inná bë'u, ben ga có'ötu' tutu' cuitu' ibëla, en ia'tutu' cuitu' yögöla.

³⁸ Ní'irö Jesús gudxë' légaquië':

—Biti' nózili' bi rinábali'. ¿Naru' huáca s'í'ili' le ral-la' si'a neda', le naca le qui'i saca'a? ¿Naru' huáca idí'fali' nisa ca idila' neda' nisa, gátia'?

³⁹ Bulu'bi'ë didza', ta'nnë':

—Huácatu'.

Jesús gudxë' légaquië':

—Le nácatë, le qui'i saca'a neda', s'í'ili' ca' libí'ili', en ca idila' neda' nisa, idí'fali' ca' nisa, ⁴⁰ pero bití' dë lu na'a cóa' nu cuía cuita' ibëla, en nu cuía cuita' yögöla. Dios unödzejë' quegaquië' bönni' chin-upé'ë quegaquië' yugu' lataj na'.

⁴¹ Cate' bila'yönnë' ia'chíë' bönni' usëda queë' Jesús didza' ni, gula'lenë' Jacobo, en Juan na'. ⁴² Ní'irö Jesús bulidzë' légaquië', rnnë':

—Nöz quezili' ca tun nupa ta'nná be'e yugu' yödzö, tu'zenë' bach bönachi, atë' nupa nácatë' lo ládjagaquië' ta'nná be'e luzé'eguequi. ⁴³ Biti' gaca caní queé'li', pero nu gué'ëni gaca zxon ga zóali', ral-la' gun xichinli' ia'zica'röli', ⁴⁴ atë' nútí'tëslöli' nu gué'ëni gaca lo ral-la' gaca ca bönni' huen dxin tsaz queé'li' yúgu'tëli'. ⁴⁵ Caní ral-la' gunli' tu' bida' ni neda', Bönni' Guljë' Bönachi, calëga para nu gun xichina', pero para guna' xichín-gaca bönachi, en udöda' yöl-la' na'bán quia' le huóá'uida' bönachi zián.

**Jesús ruúnë' Bartimeo,
bönni' lo chul-la**

(Mt. 20:29-34; Lc. 18:35-43)

⁴⁶ Ní'irö bila'dxinë' Jesús, en yugu' bönni' dá'gaquië' Lë' yödzö Jericó. Cate' ni' rurujë' Jesús yödzö ni, dzágaquië'

Lë' yugu' bönni' usëda queë', enca' bö-nachi zián. Ra' nöza ni' rö'ë tu bönni' nachul-la lahuë', lë' Bartimeo, xz'ine' Timeo. Rinabë' nu bi gúnna'sö queë'.⁴⁷ Cate' biyönnë' Bartimeo ridödë' Jesús, bönni' Nazaret, ni', gusí lahuë' ru'ë zidzaj didza', rnnë':

—¡Jesús, xz'ini xi'sóë' David! ¡Buéchi' ladxi' neda'!

⁴⁸ Nupa ta'dödi ni' gula'dil-la lë' didza'. Të' lë':

—Busayaj ru'u.

Ní'irö zidzajrö bulidzë', rnnë':

—¡Xz'ini xi'sóë' David! ¡Buéchi' ladxi' neda'!

⁴⁹ Ní'irö guzóë' dxisö Jesús, ribözë', ate' rë' légaquië':

—Buli'lidzë'.

Bulu'lidzë' bönni' na' nachul-la lahuë'. Të' lë':

—¡Butipa ládzu'u! ¡Guyaschi' ¡Rulidzë' li'!

⁵⁰ Ní'irö gurú'unë' tsölá'alö lari' naxóa yenë'. La' guyásatë', en bidë' ga na' zoë' Jesús. ⁵¹ Jesús gunábinë' lë', rnnë':

—¿Bizxi ré'ënu' guna' quiu'?

Bubi'ë didza' bönni' na' nachul-la lahuë', rnnë':

—Bönni' Usedi, ré'ënda' gunu' ga huóalaj guió'j lahua'.

⁵² Jesús gudxë' lë':

—Böaj lidxu'. Chinuhuóacu' tu' réa-jlë'u neda'.

La' böáljatë' guió'j lahuë', ate' sa'yéa-jlenë' Jesús.

Riyazië' Jesús yödzö Jerusalén

(Mt. 21:1-11; Lc. 19:28-40; Jn. 12:12-19)

11 Bila'dxinë' Jesús, en yugu' bönni' ni' dá'gaquië' Lë' gala' ga dë' Jerusalén, ga na' nacua' yödzö Betfagé, en yödzö Betania, en ga na' dë' ca' Gu'á Yaga Olivo. Ní'irö Jesús gusól-lë'ë chopë' bönni' usëda queë',² en rë' légaquië':

—Guli'tséaj lu yödzödo' dë' loru' ni', en cate' tsú'uli' ni', tsöjxáca'li'-ba' tuba'

búrrodo' nága'ba' ni', en cuntu nu ribíani lëba'. Guli'sedxi-ba', en guli'ché'-ba' quia' ni. ³ Channö nu bi gufé lib'ili' tu' runli' lë' ni, guli'guíë nu na': "Xanru' riquinnë'-ba', ate' la' usól-la'të'-ba' quiu'."

⁴ Ní'irö yöjáquië', en yöjxáca'gaquië'-ba' búrrodo' na', nága'ba' ra' nöza ga nu riyaza lö'a, ate' gula'sedxë'-ba'. ⁵ Nupa nacua' ni' tē légaquië':

—¿Bizxi ni runli'? ¿Bizx que risédxili'-ba' búrrodo' na'?

⁶ Bulu'bi'ë didza' bönni' usëda queë' Jesús, gulé' légaquië' ca na' chigudxi cazë' Jesús légaquië', ate' gulu'ë légaquië' lataj. ⁷ Ní'irö gula'ché'ë-ba' búrrodo' na' ga na' zoë' Jesús. Gula'xóë' lari' quégaquië' cúdzu'ba', ate' Jesús gudxíë'-ba'. ⁸ Zián bönni' nacu'ë ni' gula'chiljë' lari' quégaquië' gapa naca la' nöza. Ia'bal-la bönachi ni' gula'guí'saj zin le bulu'zxóa la' nöza.

⁹ Gula'sí lo nupa nanórugaca lahuë' Jesús, en nupa na' zá'gaca cúdzu'lë' tu'í zidzaj didza', ta'nnë':

—¡Yöl-la' ba! ¡Xanru' Dios gun lá'ayë' Bönni' zë'ë ni, nasól-lë'ë Dios Lë'!¹⁰ ¡Dios gun lá'ayë' Bönni' ni si' inná bë'ë, ca na' gunná bë'ë xuz xtó'oru' David! ¡Yöl-la' ba Dios!

¹¹ Caní guca, bidxinë' Jesús Jerusalén, ate' guyázië' lö'a yudo'. Cate' budxi buyüë' yúgu'të le nacua' idú gásibi'ilö ni', burúajë' zaca' yödzö Betania tu' chiridzö', ate' dzágagaquië' Lë' yugu' bönni' usëda queë'.

Jesús rulidza zi'ë tu yaga higo

(Mt. 21:18-19)

¹² Cate' za' rení ia'tú dza, ate' tu'rúajë' Jesús, en yugu' bönni' dá'gaquië' Lë' yödzö Betania, ridunë' Jesús. ¹³ Zi'-tu' bilé'enë' tu yaga higo dxía xilagui'. Gubígui'ë ga na' zoa yaga na' channö ut-söjxaquië' lati' le ribía. Cate' bidxinë' ni' bití' bi yöjxáquië' le ribía. Xilágui'sö dxía

tu' cabí ridxini dza cuía. ¹⁴ Ní'irö Jesús bulidzë' yaga na', rnnë':

—Bíti'rö nu gagu le ribía quiu'.

Yugu' bönni' usëda queë' bila'yönnë' didza' ni.

Jesús rulatjë' lö'a yudo'

(Mt. 21:12-17; Lc. 19:45-48; Jn. 2:13-22)

¹⁵ Cate' bila'dxinë' Jesús, en yugu' bönni' dá'gaquië' Lë', yödzö Jerusalén, guyázië' Jesús lö'a yudo', en gusí lahuë' rubéajë' ní'ilö nupa tuti', en nupa to'o lu lö'a yudo'. Burixë' yugu' blaga quégaca nupa tu'tsá' dumí izá'a, enca' yugu' ga ta'bó' nupa tuti' yugu' gu'dödo'. ¹⁶ Biti' ca' bë'ë lataj nu bi guá', uzóa nöza ga naca lö'a yudo'. ¹⁷ Busédinë' nupa nacua' ni', rnnë':

—Nazúaj lu guichi lá'ayi, rna: “Lidxa' si'i le, yu'u ga bönachi idütë yödzölió ulu'lidza Dios.” Libí'ili' chinunli' le ca naca lídxigaca gubán.

¹⁸ Cate' yugu' bixúz unná bë', en yugu' bönni' yudo' usedi bila'yönnë' didza' ni, gula'sí lógaquië' tu'guiljë' nacxi ilútië' Jesús, pero tu' tádxinë' le ilún bönachi, bití' bi gulunë' queë', tu' tu'bani yúgu'të bönachi ca naca le rusédinë' Jesús. ¹⁹ Cate' chiridzó' burúajë' Jesús lu yödzö na'.

Ribidxi yaga higo bulidza zi'ë Jesús

(Mt. 21:20-22)

²⁰ Cate' za' rení' ia'tú dza, gula'dödë' Jesús, en yugu' bönni' dá'gaquië' Lë' ga zoa yaga higo na' bulidza zi'ë Jesús, en bila'lé'enë' le, chinabidxi idú luí. ²¹ Ní'irö yöjnenë' Pedro bi guca, ate' gudxë' Jesús:

—Bönni' Usedi, buyútsöca'. Chinabidxi yaga higo ni bulidza zi'u néaje.

²² Bubi'ë didza' Jesús, rë' légaquië':

—Guli'tseajlë' Dios. ²³ Le nácatë rea' libí'ili', channö nu bönni' guíë' gu'ado' ni: “Gucuíta ni, yöjsóa lu nísado”, en bití' gaca chopa ládxë'ë bönni' na', pero

idú ládxë'ë tseajlë'ë gunë' Dios ca na' rnnë', ca' gaca. ²⁴ Que lë ni na' rea' libí'ili': Yúgu'të le inábali' cate' ulídza'li-në' Dios, guli'tséajlë' chibennë' Dios queé'li' lë na' rinábali', ate' gunnë' queé'li'. ²⁵ Cate' ní' rulídza'li-në' Dios, channö zoa nu rileli' nu bi ben queé'li', bulí'niti lo nu na', para uniti lahuë' ca' libí'ili' Xúzili' na' zoë' yehua' yubá ca naca dul-la' nabága'li'. ²⁶ Channö cabí uniti loli' bönachi, bití' uniti lahuë' Xúzili' zoë' yehua' yubá libí'ili' dul-la' nabága'li'.

Yöl-la' unná bë' dë lu në'ë Jesús

(Mt. 21:23-27; Lc. 20:1-8)

²⁷ Ní'irö Jesús, en yugu' bönni' dá'gaquië' Lë' yöjhuó'gaquië' Jerusalén. Cate' ní' ridé' Jesús ga naca chila yudo', bila'dxinë' yugu' bixúz unná bë', en yugu' bönni' yudo' usedi, en bönni' gula tu'zéajni'inë', ga zoë'. ²⁸ Gula'nábinë' Jesús, ta'nnë':

—¿Bizxi yöl-la' unná bë' dë lu no'o runu' yugu' lë ni? ¿Nuzxi caz budödi lu no'o yöl-la' unná bë' gunu' caní?

²⁹ Bubi'ë didza' Jesús, rë' légaquië':

—Neda' ca' inábida' libí'ili' tu didza'. Channö ubí'ili' quia' didza', ní'irö guía' libí'ili' bi yöl-la' unná bë' rúnida' yugu' lë ni. ³⁰ ¿Nuzxi budödi lu në'ë Juan uquilë' bönachi nisa? ¿Naru' Dios o bönachi? Guli'nnátsöca'.

³¹ Gula'sí lógaquië' tun xtídza'gaquië' la' légasasë', ta'nnë':

—Channö innaru' Dios gusól-lë'ë lë', guíë' rë'u: “¿Bizx que bití' guyéajlë'ëli' lë'?” ³² ¿Naru' gufëtsaru'-në': Gula'sól-lë'ë bönni' lë'?

Caní ta'zá' ládxi'gaquië' tu' tádxinë' le ilún bönachi zían nacua' ni' tu' téquiguequi yúgu'të bönachi na' bë'ë didza' Juan na' uláz queë' Dios. ³³ Que lë ni na' gulë' Jesús:

—Bití' nöztu'.

Ní'irö Jesús gudxë' légaquië':

—Neda' ca' biti' quíxjoi'ida' lib'ili' bi yöl-la' unná bē' dē lu na'a rúnida' yugu' lē ni.

Rucúdzu'ē didza' Jesús ca gaca quégaca huen dxin biti' nácagaca tsahui'

(Mt. 21:33-46; Lc. 20:9-19)

12 Ní'irō gusí lahuē' Jesús ru'ilenē' yugu' bōnni' dá'gaquiē' Lē' didza' yugu' le rucúdzu'ē didza', rnnē':

—Guzóē' tu bōnni', budē'ē lubá uva zían ga naca lu xiyúē'. Guléquiē' lē'a que, en guchó'ōnē' tu rōga' guióǵ ga isíē' xisi uva na'. Budxíē' tu yu'u gupa ga naca xit-sá' ga nu uyú xiyúē' na'.

Ní'irō budōdē' xiyúē' na' lu ná'agaquiē' huen dxin, ila'zi'ē gatsaj huéaj le unōdzaj, ate' guyijē' yōdzō zi'tu'. ²Cate' bidxín dza ulu'chibē' le ribía, gusól-lē'ē-bi' bi'i huen dxin tsōjxi'ibi' lu ná'agaquiē' huen dxin na' le ral-la' si'ē xanbi' que le gula'bía lubá uva na'. ³Ní'irō yugu' huen dxin na' gula'guélé'ē-bi' bi'i na', en gulundē'-bi' zi', ate' bulu'sól-lē'ē-bi' cá'asōbi'. ⁴Ní'irō bōnni' xan luyú na' gusól-lē'ē-bi' ia'tubi' bi'i huen dxin queē', ate' bi'i ni bulu'ladxē'-bi' guióǵ. Bulu'lē'ē ícjabi'. Gulu'ē dō' queēbi'. ⁵Ní'irō bōnni' xan luyú na' gusól-lē'ē-bi' ca' ia'tubi' bi'i huen dxin queē', ate' bi'i ni gulútiē'-bi'. Gusól-lē'ē-bi' ca' zíanrōbi', ate' bál-labi' gulúngacadē'-bi' zi', en ia'bál-labi' gulútigaquiē'-bi'.

⁶Cúnturō nu nagá'ana queē' xan luyú na'. Nagá'anasibi' zxf'inē', ate' nadxf'ide'enē'-bi'. Ga yōjsetē, gusól-lē'ē-bi' zxf'inē', rnnē': "Ilunē' bal zxf'ina'."

⁷Ní'irō yugu' bōnni' huen dxin na' gula'nnē' la' légcasē, ta'nnē': "Bi'i ni ral-la' guequi queēbi' luyú ni. Guli'dá, gútiru'-bi', ate' guequi queēru' luyú ni." ⁸Que lē ni na' gula'zōnē'-bi', en gulútiē'-bi'. Gula'rú'unē'-bi' ní'ilō ga dá'gaca lubá uva na'.

⁹Ní'irō Jesús gunábinē' bōnni' nacu'ē ni', rnnē':

—¿Nacxi gunē' bōnni' xan luyú na', channō? Huidē', en gútigaquiē' bōnni' huen dxin na', ate' udōdē' luyú na' lu ná'agaquiē' bōnni' yúbölō.

¹⁰¿Naru' cabí nulábanilí' lē na' nazúaj lu guichi lá'ayi? Caní rna:

Guióǵ na' gula'rú'unē' bōnni' tu'cu'ē zō'ō, na'a naca guióǵ len, squin zō'ō.

¹¹Xanru' Dios benē' ga naca caní ate' rubániru' ca naca lē ni ril'éru'.

¹²Ní'irō ta'zóa ta'bō'ē ila'zōnē' Jesús tu' téquibe'enē' bucúdzu'ē didza' ca naca quégaquiē', pero tádxinē' le ilún bōnachi zían nacua' ni', en que lē ni na' bulu'cá'anē' Lē', sōhuóǵgaquiē'.

Ca naca le ta'guíxaj lázagaca bōnachi

(Mt. 22:15-22; Lc. 20:20-26)

¹³Gudōdi lē ni yugu' bōnni' yudo' unná bē' na' gula'sól-lē'ē bal-lē' bōnni' yudo' fariseo len bōnni' dá'gaquiē' Herodes ga zoē' Jesús para ilunē' ga bi innē' para gaca ulu'zéguiē' Lē' didza'. ¹⁴Bila'dxinē' bōnni' ni ga na' zoē' Jesús, en tē' Lē':

—Bōnni' Usedi, nōzitu' ru'u didza' idútē li. Biti' ru'í lādXu'u bi ta'nnasō bōnachi, tu' cabí ruyusu' le tu'luf'isō cúnguequi bōnachi, pero rusédinu' ca nácatē le ré'ēnē' Dios ilún bōnachi. ¿Ru'í netu' lataj xibá queē' Moisés quíxaj laz-tu' le tu'quíxjē' uláz queē' César? ¿Naru' uguíxajtu' o biti' quíxajtu'?

¹⁵Réquibe'enē' Jesús tu'ē didza' lu yöl-la' riguílaj ladxi' quégaquiē', ate' ré' légaquiē':

—¿Bíx que rubéajli' neda' didza'? Guli'diguá'tsōca' tu dumí ridá para ilé'eda' le.

¹⁶Diguá'agaquiē' le, ate' Jesús gunábinē' légaquiē', rnnē':

—¿Nuzxi lahui da' lē'e ni, en nuzxi lē ni?

Bulu'bi'ë didza', ta'nnë':

—Queë' César na'.

¹⁷ Ní'irö Jesús gudxë légaquië', rnnë':

—Buli'nödzej queë' César le nequi queë' César, ate' queë' Dios le nequi queë' Dios.

Bulu'bánnë' ca naca didza' bubí'ë Jesús.

**Ca naca que yöl-la'
rubán lu yöl-la' guti**

(Mt. 22:23-33; Lc. 20:27-40)

¹⁸ Ní'irö bila'dxinë' bal-lë' bönni' yudo' saduceo ga zoë' Jesús. Bönni' ni ta'nnë' biti' ulu'bán nupa chinátigaca. Que lë ni na' gulé' Jesús, ta'nnë':

¹⁹ —Bönni' Usedi, Moisés nuzúajë' queëru' lu guichi channö gátie' tu bönni' biti' zoa bi'i queë', ate' ugá'ananu nigula queë', bi'i bóché'ë bönni' na' ral-la' utsaga ná'aleni'-nu, en uzóabi' bí'ido' gácabi' bi'i queébi' bóchi'bi'.
²⁰ Gula'cuá'abi' gádxibi' bi'i nacagacabi' bóchi'gacabi'. Bi'i huáca na' butsaga ná'aleni'-nu nigula, ate' gútibi', cuntu nu zoa bí'ido' queébi'.
²¹ Bi'i buropi na' butsaga ná'aleni'-nu nigula uzëbi na', ate' gútibi' ca', cuntu nu zoa bí'ido' queébi'. Lësca' caní guca queébi' bi'i bunny. ²² Caní guca, bulu'tsaga ná'aleni'-nu yúgu'tëbi', cuntu nu zoa bí'ido' quégacabi'. Ga yöjsetë, gútinu ca' nigula na'. ²³ Na'a, cate' ulu'bán nupa chinátigaca, ¿núzxilöbi' guéquinu nigula na' queébi', tu' bulu'tsaga ná'aleni'-nu igádxitëbi'?

²⁴ Bubi'ë didza' Jesús, rë' légaquië':
—Richíxili' tu' cabí núnbë'ëli' le nazúaj lu guichi lá'ayi, en biti' nózili' ca naca yöl-la' huáca queë' Dios.
²⁵ Cate' ulu'bán nupa chinátigaca, biti' ca' ulu'tsaga ná'agaquië', ate' yugu' bönni' biti' ila'cuá'lenë' nigula, pero ilácagaquië' ca nacagaquië' gubáz lá'ayi queë' Dios, nacu'ë yehua' yubá. ²⁶ Na'a, ca naca quégaca nupa chinátigaca

channö ulu'bán, ¿naru' cabí nulábanili' le buzúajë' lu guichi Moisés? Rufi didza' ca na' bulidzë' Dios lë' lu yaga yótsi'do' régui. Gudxë' lë': "Neda' naca' Dios queë' Abraham, en Dios queë' Isaac, en Dios queë' Jacob." Tu' gunné' caní quégaquië', naca bë' nabángaqüië' sal-la' gulátie' z'falö. ²⁷ Dios náquië' Dios quégaca nupa nabángaca, calëga quégaca nupa nátigaca tsaz. Richíxitëroli'.

Le naca lo le gunná bë'ë Dios

(Mt. 22:34-40)

²⁸ Bidë' ca' tu bönni' yudo' usedi ga zoë' Jesús. Biyönnë' ca na' gulu'ilenë' Jesús didza', en nózinë' dx'ado' bubí'ë Jesús didza'. Que lë ni na' gunábinë' Jesús, rnnë':

—¿Bízxilö le gunná bë'ë Dios nácatëro lo ca yúgu'të le gunná bë'ë?

²⁹ Bubi'ë didza' Jesús, rë' lë':

—Le gunná bë'ë le nácatëro lo ca yúgu'të naca lë na' rnna: "Gulí'yöni bönachi Israel. Xanru' Dios, tuzë' Lë' náquië' Xanru'. ³⁰ Ral-la' idx'ínu' Xanu' Dios idú ládxu'u, en lu idú icja ládxido'o, en lu idú yöl-la' réajni'i quiu', en lu idú yöl-la' huáca quiu'." Lë ni naca le gunná bë'ë le nácatëro lo. ³¹ Le gunná bë'ë le naca buropi, lébisö ca naca. Caní rnna: "Ral-la' idx'ínu' luzó'o ca nadx'i' cuinu'." Biti' ca' zoa ia'tú le gunná bë'ë le nácarö lo ca chopá ni gunná bë'ë.

³² Ní'irö bönni' yudo' usedi na' gudxë' Jesús, rnnë':

—Dx'ado' gunnö', Bönni' Usedi. Le nácatë rno'. Tuzë' náquië' Dios, en cún-turö nu zoa naca Dios. ³³ Para idx'iru'ne' Dios idú ládxiru', en lu idú yöl-la' réajni'i queëru', en lu idú icja ládxido'oru', en lu idú yöl-la' huáca queëru', en para idx'iru' luzá'aru' ca nadx'i' cuinru', nácarö lesaca' ca yúgu'të böa' bédxido' rútigacaru'-ba' lu bucugu lá'ayi queë'

Dios, enca' ca yúgu'të böa' bédxido' ruzégui'gacaru'-ba' lu bucugu na'.

³⁴ Cate' biyönnë' Jesús dxí'ado' rubi'ë didza' bönni' ni, n'irö gudxë' lë', rnnë':

—Ia'láti'sö riyadzaj quiu' gúnbë'u le rinná bë'ë Dios.

Cúnturö nu burugui bi inábini Jesús.

¿Nuzxi xzí'ini náquië' Cristo?

(Mt. 22:41-46; Lc. 20:41-44)

³⁵ Cate' ni' rusédinë' Jesús bönachi ga naca chila yudo', rnnë':

—¿Bizx que ta'nné' bönni' yudo' usedi náquië' Cristo xzí'ini xi'sóë' David? ³⁶ Lë cazë' David na' bë'ë didza', zóalenë' Dios Bö' Lá'ayi lë', gunné':

Xanru' Dios gudxë' Xana':

“Guró'ö cuita lë'a ibëla

cate' gunra' ga ulu'zóa zxfbigaca lo' nupa bití' ta'lé'e Li' dxi'a.”

³⁷ ¿Naru' nácatsë' Cristo xzí'ini xi'sóë' David channö lë cazë' David na' rnnë' queë' náquië' Xanë'?

Bönachi zían nacua' ni' tu'zé nágagaca Lë' gula'yaza ládxi'gaca didza' ni.

Jesús ruzégui'ë didza' bönni' yudo' tu'sédinë'

(Mt. 23:1-36; Lc. 11:37-54; 20:45-47)

³⁸ Ni' rusédinë' Jesús yugu' bönni' dá'gaquië' Lë', rë' légaquië':

—Guli'gún chi'i cuinli' quégaquië' bönni' yudo' tu'sédinë'. Ta'yaza ládxi'gaquië' ta'dé' nilö na'lö, nácugaquië' lari' tunna. Ta'yaza ládxi'gaquië' ca' tu'lidza tsahui' bönachi légaquië' gapa naca lu yé'ëyi. ³⁹ Ta'bö'ë yugu' lataj lo lu yu'u ga tu'dubë' tu'sëdë' queë' Dios, enca' gapa tu'dubë' tējaj tahuë'. ⁴⁰ Rugúa-gaquië' lídxigacanu nigula uzëbi, en para ulu'lu'isö tsahui' cuíngaquië', xidzé tu'lidzë' Dios. Bönni' ni, gúnda'rë' Dios légaquië' xíguia'.

Le bunódzjanu tu nigula uzébidu' queë' Dios

(Lc. 21:1-4)

⁴¹ Tsanni ni' rö'ë Jesús chila yudo' ga zoa gu'ina ga ta'gú'u bönachi dumí que yudó', ruyúë' ca tun bönachi ta'gú'u dumí lu gu'ina. Dumí zían ta'gu'ë bönni' dë yöl-la' tsahui' quégaquië'. ⁴² N'irö bidxinnu tu nigula yechi' uzébidu' ni', ate' gulú'unu chopa dumí lásido', le nazáca'gaca láti'do'os. ⁴³ N'irö bulidzë' Jesús yugu' bönni' usëda queë', en rë' légaquië':

—Le nácatë rea' lib'ili', nigula yechi' uzébidu' ni gulú'urönu ca yúgu'të nupa bi ta'gú'u lu gu'ina que yudo'. ⁴⁴ Yúgu'të bönni' ni ta'gu'ë que le nagá'anasö quégaquië', pero nigula ni, lu yöl-la' yéchi'do' queënu gulú'unu idútë la's dui tsca le dësö queënu, le ral-la' gáhuinu.

Riguíxjö'ë Jesús ca si' ulu'quínnajë' yudo'

(Mt. 24:1-2; Lc. 21:5-6)

13 Cate' burúajë' Jesús chila yudo', tuë' bönni' usëda queë' gudxë' Lë', rnnë':

—Bönni' Usedi, buyútsöca' náctiga yugu' yu'u zxön ni, en náctiga yugu' guió'j lë'e zö'ö quéguequi.

² Bubi'ë didza' Jesús, rë' lë':

—Rilé'enu' yugu' yu'u zxön ni, pero bití' ca' ugá'ana guió'j lahui luzé'e ni, tu' ulu'quínnaj bönachi léguequi.

Le ilaca bë' cate' si' údxi que yödzüliö

(Mt. 24:3-28; Lc. 21:7-24; 17:22-24)

³ N'irö yöjáquië' Jesús, en yugu' bönni' dá'gaquië' Lë' lu Gu'fa Yaga Olivo, gu'fa na' dë ca dódilö ra' yudo'. Cate' chirö'ë Jesús ni', la' légacasë' Pedro, en Jacobo, en Juan, en Andrés, gulé' Lë', ta'nné':

⁴ —Gudíxjö'i' netu' bátaxi ilaca lë ni. ¿Bizxi gaca bë' chizóa ilaca yúgu'të lë ni?

⁵Bubi'ë didza' Jesús, rusédinë' lé-gaquië', rnnë':

—Guli'gún chi'i cuinli' para cabí nu si' ye'e libí'ili'. ⁶Ila'lá' lahuë' zían bönni' si' lágaquië' ca lea' neda', ila'nné' náca-gaquië' Cristo. Caní ila'z'f' yé'ené' bönachi zían.

⁷Nf'irö cate' yónili' raca gudil-la nilö ná'alö, biti' gádxili'. Yúgu'të lë ni ral-la' ilaca, pero biti' ridxini dza údxi. ⁸Tu yödzo tfl-lalen ia'tú yödzo, en tu ga nu rinná bë' tsöjtfl-lalen ia'tú ga nu rinná bë'. Zían lataj tödi budó' xzu', en tsu'u gubín. Ila'tsatsa bönachi. Yugu' lë ni ilaca le isí lo ila'gu'f'i ila'zaca' bönachi dza ni'.

⁹Nf'irö guli'gún chi'i cuinli', tu' ulu'dödë' libí'ili' lu ná'agaquië' bönni' yúlahui'. Ila'guinë' libí'ili' gapa tu'dubë' tu'sëdë' queë' Dios bönni' judío. Idxinli' lógaquië' bönni' ta'nná bé'ené' libí'ili', en lógaquië' bönni' ta'nná bé'ené' yödzo zi'tu'. Ilunë' caní queéli' tu' dá'ali' neda', pero gunli' ba nalí quia' neda' ni'. ¹⁰Zí'alö ca idxín dza údxi, run bayudxi gaca libán que didza' dxi'a quia' lógaca bönachi idútë yödzölió. ¹¹Cate' ni' ila'ché'ë libí'ili', en ulu'dödë' libí'ili' lu ná'agaquië' bönni' yúlahui', biti' güf'i ládxi'li' bizxi innali'. La' dza nf'isö Dios gunné' queéli' didza' güf'ili', ate' lë ni innali'. Cate' ni' güf'ili' didza', calëga libí'isili' na' innali', pero Dios Bö' Lá'ayi inné'. ¹²Ulu'dödi bönachi la' bóchi'gacasö lu ná'agaquië' bönni' ilútië' légaquië'. Yugu' bönni' nacuá'abi' bi'i quégaquië' ulu'dödë' la' xzf'inigaca cazë' ca', ate' xzf'inigaquië' na' ulu'dódibi' la' xuz xiná'agaca cázabi' lu ná'agaquië' bönni' ilútië' légaquië'. ¹³Yúgu'të bönachi ulu'zóa libí'ili' tsölá'alö tu' dá'ali' neda', pero nülöli' guá' ilenli' lë na' ga idxinrö dza údxi, uláli'.

¹⁴Nupa tu'laba didza' ni ral-la' ila'yéa-jni'i. Buzúajë' lu guichi Daniel, bönni' ni' bë'ë didza' uláz queë' Dios, le rnna caní:

“Tsaz tu le xihui' le rucá'ana cané ga naca la'ayi.” Dza nf'irö ral-la' ila'zxun-naj nupa nacuá' luyú Judea, en tsójaca gapa naca lu gu'ado'. ¹⁵Nu zoa ícjo'olö dza ni' ral-la' izxúnnajtë, en biti' huötaj xzan yu'u para tsöjzxf' bi' dë que lu yu'u. ¹⁶Nu zoa la' guixi' ral-la' izxúnnajtë, en biti' huóaj tsöjzxf' lari' rixóa yeni. ¹⁷Bica' bayechi' yugu' nigula dza ni' nuá'agacanu-bi' bf'ido', enca' nigula tu'gádxí'nu-bi' bf'ido'. ¹⁸Buli'lidzë' Dios inábili'-né' cabí gun bayudxi izxúnnajlí' cate' raca beo' ziaga ca'. ¹⁹Yugu' dza ni' ila'gu'f'i ila'zaca'rö bönachi ca le guca z'atëlö cate' si' guta' yödzölió le benë' Dios ga ridxintë na'a dza, ate' dza zá-gaca biti' gaca caní. ²⁰La'tu' cabí nunë' Dios ga ulu'huóáca nabábasö yugu' dza ni', cuntu nu ulá, pero tu' nadxf'inë' nupa chiguró cazë', chinunë' queë' gunë' ga ulu'huóáca nabábasö yugu' dza ni'.

²¹Na'a, channö nu guíë libí'ili': “Buli'yútsöca, ni zoë' Cristo”, o inná: “Buli'yútsöca, ni' zoë'”, biti' ca' tséajlë'ëli' nu na'. ²²Ila'lá' lahuë' zían bönni' ila'z'f' yé'ené' bönachi. Ila'nné' náca-gaquië' Cristo, en ila'nné' náca-gaquië' bönni' tu'ë didza' uláz queë' Dios. Ulu'lu'f'inë' le ilaca bë', en ilunë' yugu' yöl-la' huáca zxön. Huala'z'f' yé'ené' ca' nupa guró cazë' Dios channö ila'zéquínë'. ²³Nf'irö libí'ili', guli'sóa ban ladxi'. Yúgu'të chigudxa' libí'ili' z'atëlö ca gaca.

Ca huödë' Bönni' Guljë' Bönachi

(Mt. 24:29-35, 42-44; Lc. 21:25-36)

²⁴Gunnë' ca' Jesús:

—Yugu' dza ni', tödi gaca dza na' ila'gu'f'i ila'zaca' caní bönachi, ichul-la gubidza, en biti' cu'u bení beo'. ²⁵Ila'guínnaj böläj lúzxiba, en ila'zxi-izi le nál-lagaca nalá'gaca lúzxiba na'. ²⁶Nf'irö ila'lé'eni neda', Bönni' Guljë' Bönachi, za'a lu böaj lúzxiba, napa' yöl-la' huáca zxön, en yöl-la' bení quia'. ²⁷Isó-la'gaca'-né' gubáz lá'ayi quia', ate' ulu'

tubë' bönachi guró caza' quia' nacuá' idapa la'a yödzolió, ga naguéla'të luyú bidxi, ga ridxintë ga naguela' lúzxiba.

²⁸'Guli'tséajni'i le rusedi yaga higo ni'. Cate' ta'lén ni'a në'e hué'énido', en rubía xilagui' yulu, nózili' chizóa idxín beo' cusubá. ²⁹Lësca' caní, cate' ilé'eli' taca lë ni, inózili' chizóa idxín dza údxi na', en chiridzaga lo. ³⁰Le nácatë rea' lib'ili', yúgu'të lë ni ilaca z'atëlö ca iláti-gaca nupa nacuá' dza na'. ³¹Huadödi que lúzxiba, en que luyú ni, pero xtídza'a catu caz tödi que.

³²'Cate' idxín dza ni' o rëla ni', cuntú nu nözi. Biti' nózguequinë' gubáz lá'ayi nacu'ë yehua' yubá, en bití' nözda' neda', Zxí'inë' Dios. Tuzë' Dios Xuz nóz-inë'. ³³Que lë ni na', buli'subán ládxi-i'li'. Guli'sóa sina', en buli'lidzë' Dios tu' cabí nózili' bizxi dza gaca lë ni. ³⁴Gaca ca raca cate' sa'yéajë' zi'tu' tu bönni'. Cate' chizóa uzé'ë lidxë', udödë' lu ná'agaquië' huen dxin queë' yugu' le dë queë'. Que queégaquië' gu'ë xichín-gaquië', en inná bë'ë soa ban ladxi' nu zoa huen chí'i ga nu riyaza. ³⁵Guli'sóa lib'ili' ban ladxi' tu' cabí nózili' bátaxi huödë' xan yu'u, cate' chiridzö', o gat-saj lahui' yëla, o cate' ribódxiba' böra, o zílado'. ³⁶Guli'gún caní, para cabí idixáquië' lib'ili' rásili' channö huödë' tsárido's. ³⁷Lë ni rea' lib'ili', rea' ca' yúgu'të bönachi: Guli'sóa ban ladxi'.

**Tun xtídza'gaquië' bönni'
yudo' ila'zönë' Jesús**

(Mt. 26:1-5; Lc. 22:1-2; Jn. 11:45-53)

14 Ia'chopa dza ca' gaca Laní Pas-cua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. Naca laní cate' tahuë' yöta xtila bití' nazí' cúa zi que. Ta'zóa ta'bö'ë yugu' bixúz unná bë', en bönni' yudo' tu'sédinë' ila'zönë' Jesús bagáchi'só para ilútië' Lë'. ²Ta'nnë':

—Biti' gaca sönru'-në' dza laní tu' ila't-satsa bönachi.

**Nigula rigú'unu le rilá'
zxixi icjë' Jesús**

(Mt. 26:6-13; Jn. 12:1-8)

³Zoë' Jesús yödzö Betania, lu yu'u lidxë' Simón, bönni' güf'inë' huë' nudzu' ruzödi. Tsanni ni' rö'ë rahuë' Jesús, guyázanu tu nigula, nuá'anu tu bóga'-do' néquini guiöj zaca', yudzu le rilá' zxixi que yöj susén lasí idú, le naza-ca' yenni'. Gulá'anu bóga'do' na', en gulú'unu le rilá' zxixi na' icjë' Jesús. ⁴Gula'lélanë' bal-lë' bönni' nacu'ë ni'. Ta'nnë' la' légacasë':

—¿Bizx que guca ditaj le zxixi na'?

⁵La'tu' nu guti' lë na', huazí' que ia'lati' ca lázxjaru' que tu iz para nu quisi le qué-gaca bönachi yechi'.

Gula'nnédë'ë queénu.

⁶Ní'irö Jesús bë'ë didza', rnnë':

—Guli'güf'i-nu lataj. ¿Bizx que rinnë' z'ili' queénu? Naca dxi'a le bennu quia'.

⁷Nacuá'lentica'sö bönachi yechi' lib'ili', en bátati'tës gué'enili', huáca gunli' dx-i'a quégaquië', pero neda' bití' sóatica'sa' ga zóali'. ⁸Tsca le guzxéqui'nu bennu nigula ni. Cate' gulú'unu le rilá' zxixi ni neda', bupá'anu neda' z'atëlö ca igácha'a yeru ba. ⁹Le nácatë rea' lib'ili', gáti'tës ga gaca libán que didza' dxi'a quia' idú yödzolió, soa nu quixjö' ca' lë ni bennu nigula ni quia'. Caní gaca para nu tsöjnë' lënu.

Rizí' lu në'ë Judas udödë' Jesús

(Mt. 26:14-16; Lc. 22:3-6)

¹⁰Ní'irö birúajë' Judas Iscariote, bön-ni' nabábalenë' chínnuë' na' dá'gaquië' Jesús. Guyijë' ga nacu'ë bixúz unná bë' para udödë' Jesús lu ná'agaquië'. ¹¹Cate' bila'yönnë' xtídze'ë Judas na', bulu'dzé-janë', ate' gula'zí' lu ná'agaquië' ilu'ë lë' dumí. Ní'irö gusí lahuë' Judas rizóa ribö'ë udödë' Jesús lu ná'agaquië'.

**Le rë'aj ráguru' rusbanneru'
ca gútië' Xanru'**

(Mt. 26:17-29; Lc. 22:7-23;
Jn. 13:21-30; 1Co. 11:23-26)

¹² Naca dza risí lo laní cate' tahuë' yöta xtila bití' nazí'i cúa zi que, dza na' tutië'-ba' bö'cu' zxíla'do' tahuë'-ba' dzö' Laní Pascua na', cate' tu'subanë' ca benë' Dios busölé' bönachi judío luyú Egipto. Ní'irö bönni' usëda queë' Jesús gula'nábinë' Lë', ta'nnë':

—¿Gazxi ré'ënu' tséajtu' tsöjpa'atu' le gáguru' xtsö' que Laní Pascua?

¹³ Ní'irö Jesús gusól-lë'ë chopë' bönni' usëda queë', en ré' légaquië':

—Guli'tséaj lu yödzo. Ní' huadzágali' tu bönni' nu'ë tu rö'ö nisa. Guli'tséajlenë'. ¹⁴ Ga na' tsázië', guli'gufé' xan yu'u na': "Rnnë' Bönni' Usedi: ¿Gazxi zoa yu'u ga na' gágulengaca'-në' bönni' usëda quia' xtsö' que Laní Pascua?"

¹⁵ Ní'irö uluf'inë' libí'ili' tu yu'u zxon ga naca buropi cuía ga chinabá'a. Buli'pá'a le gáguru' ni'.

¹⁶ Bila'rúajë' bönni' usëda queë' na', en bila'dxinë' lu yödzo, ate' yöjxáca'gaquië' yúgu'të ca na' chigudxë' légaquië' Jesús. Bulu'pë'ë le ilahuë' ni' que Laní Pascua.

¹⁷ Cate' chizá' ral-la, bidxinë' Jesús ni', dzágagaquië' idxínnutë' bönni' usëda queë' Lë'. ¹⁸ Tsanni ni' ró'ögaquië' tahuë', bë'ë didza' Jesús, rnnë':

—Le nácatë rea' libí'ili', zoa nu dzaga libí'ili', nu rágulen neda' tsözxón, nu udödi neda' lu ná'agaca bönachi.

¹⁹ Ní'irö bulu'huf'innë', en gula'sí lógaquië' tu tuë' të' Lë':

—¿Naru' neda'?

Ia'túé' ca' gunné':

—¿Naru' neda'?

²⁰ Bubi'ë didza' Jesús, rë' légaquië':

—Naca tu nu nutsa' ladaj chínnuli' ni, bönni' na' nunë'ë në'ë tsözxón len na'a lu yö'öna. ²¹ Tseja' ga gátia' neda', Bön-

ni' Guljë' Bönachi, ca na' nazúaj lu guichi lá'ayi ca gaca quia', pero bica' bayechi' bönni' na' udödë' neda' lu ná'agaquië' bönni' ilútië' neda'. Gácarö dxi'a queë' bönni' na' la'tu' cabí guljë'.

²² Tsanni ni' tahuë', gudélë'ë Jesús yöta xtila. Gudxë' Dios: "Xclenu'." Buzx-uzxjë' le, en bë'ë quégaquië', rnnë':

—Guli'gagu. Lë ni naca bëla' rön quia'.

²³ Gudélë'ë ca' tu zxíga'do', en gudxë' Dios: "Xclenu'." Ní'irö bë'ë quégaquië', ate' yúgu'të' gulé'ajë' le. ²⁴ Jesús rë' légaquië':

—Lë ni xichöna' le run tsutsu didza' cubi rucá'ana tsahui', le núnlenë' Dios bönachi. Rön ni ilalaj ni'a quégaca bönachi zían. ²⁵ Le nácatë rea' libí'ili', bíti'rö guí'ja' xisi uva ga idxinrö dza guí'ja' le cubi ga ni' rinná bë'ë Dios.

**Jesús rnnë' innë' Pedro
biti' núnbë'ë Lë'**

(Mt. 26:30-35; Lc.

22:31-34; Jn. 13:36-38)

²⁶ Gudödi gulúl-lë' yöl-la' ba, bila'rúajë' söjáquië' Guí'a Yaga Olivo. ²⁷ Ní'irö Jesús gudxë' légaquië', rnnë':

—Yúgu'téli' gaca chopa ládxi'li', ucá'anali' neda' na'a dzö', tu' nazúaj lu guichi lá'ayi, rna: "Gutia'-në' uyú bö'cu' zxíla', ate' ilásilasiba' bö'cu' zxíla' na'." ²⁸ Tödi ubana' lu yöl-la' guti, tseja' luyú Galilea zí'alö ca libí'ili'.

²⁹ Ní'irö Pedro gudxë' Jesús, rnnë':

—Sal-la' yúgu'të' ilaca chopa ládxi'gaquië', en ulu'cá'anë' Li', bití' ca' gaca chopa ládxa'a neda'.

³⁰ Jesús gudxë' lë', rnnë':

—Le nácatë rea' lí', la' dzö' nisö, sí códxilöba' böra le buropi luzuí, tsonna luzuí innó' bití' núnbë'u neda'.

³¹ Ní'irö Pedro buzötjë' Dios, rnnë':

—Sal-la' gátlientea' Lí' tsözxón, bití' ca' inní'a' bití' núnbë'a Lí'.

Lësca' caní gula'nnë' yúgu'të'.

Jesús rulidzë' Dios la' yëla Getsemaní

(Mt. 26:36-46; Lc. 22:39-46)

³² Ní'irö Jesús, en bönni' dá'gaquië' Lë' bila'dxinë' la' yëla Getsemaní, ate' Jesús gudxë' légaquië', rnnë':

—Guli'cö' ni, tsanni tseja' neda', tsöjlidza'-në' Dios.

³³ Jesús guchë'ë Pedro, en Jacobo, en Juan, ate' gusí lahuë' ridzöbinë', en risëbi lãdxë'ë. ³⁴ Gudxë' légaquië', rnnë':

—Huati caza' lu yöl-la' risëbi lãdxí'. Guli'cöz ni, en guli'ná' yëla.

³⁵ Ní'irö guzë'ë Jesús ia'láti'do', en busudxín lahuë' lu yu, bulidzë' Dios. Gunábinë' Lë', channö huáca, ucuítë' queë' le ral-la' qui'i sáque'ë dza na'. ³⁶ Ní' rulidzë' Dios, rnnë':

—Xúza'do', yúgu'të huáca gunu' Li'. Gucuíta lë na' ral-la' qui'i saca'a, pero calëga ca ré'ënda' neda', pero ca ré'ënu' Li', gunu'.

³⁷ Ní'irö bóajë' Jesús ga na' nacu'ë bönni' usëda queë', ate' yöjxáquië' légaquië' tasië'. Gudxë' Pedro:

—Simón, ¿rásitso'? ¿Naru' cabí rubéajtsot' yëla lo' tu chí'ido'? ³⁸ Guli'ná' yëla, en buli'lidzë' Dios, inábili'-në' para cabí gata' lataj tu' xihui' idilú'u yöl-la' libí'ili'. Le nácatë bö' naca cázali' zoa caz sina', pero lu yöl-la' bönáchisö queéli' ricuídi'li'.

³⁹ Ní'irö sa'yéajë' Jesús leyúbölö, rulidzë' Dios, en la' tuz ca gunné'. ⁴⁰ Cate' bóajë' leyúbölö ga na' nacu'ë, yöjxáquië' légaquië' tasië' tu' nadóditë yëla lógaquië'. Biti' nózguequinë' bizxi didza' ulu'bi'ë, le ilé' Lë'. ⁴¹ Cate' bóajë' le bunny luzuí ga na' nacu'ë, rë' légaquië':

—¿Rásitsali'? ¿Ruzi'tsa lãdxí'li'? ¡Tsa'ti' gaz! ¡Chibidxín dza! ¡Buli'yútsöca', Neda', Bönni' Guljë' Bönachi, chinadóda' lu ná'agaca bönachi dul-la'! ⁴² ¡Guli'chasa, uyéajru'!

¡Buli'yútsöca', chizë'ë bönni' na' udödë' neda' lu ná'agaca bönachi!

Ta'zönë' Jesús

(Mt. 26:47-56; Lc. 22:47-53; Jn. 18:2-11)

⁴³ Ní' ru'ë Jesús didza' ni, bidxinë' Judas, bönni' nabábalenë' chínnuë' na' dá'gaquië' Jesús, ate' zá'lengaquië' bönni' zían lë', nuá'agaquië' gufé tuchi', en yaga. Yugu' bixúz unná bë', en yugu' bönni' yudo' usedi, en bönni' gula tu'zëajni'inë' nasól-la'gaquië' légaquië'. ⁴⁴ Judas, bönni' na' rudödë' Jesús lu ná'agaquië' chinulu'f'inë' légaquië' tu le guné' le gaca bë' nu naca Jesús, gunné':

—Bönni' na' utsaga lahua'-në', Lë' na' Jesús. ¡Guli'sönë', en guli'ché'ë! ¡Guli'yútsöquië'!

⁴⁵ Cate' bidxinë' Judas ni', la' gubíga'të' ga na' zoë' Jesús, en gudxë' Lë':

—Bönni' Usedi, Bönni' Usedi.

Ní'irö busudxín lahuë' Jesús. ⁴⁶ Ní'irö gula'zönë' Jesús, en gula'ché'ë Lë' nadzunë'.

⁴⁷ Ní'irö tuë' bönni' ni' dë'ë Jesús guléajë' gufé tuchi', en benë'-bi' huë' bi'i huen dxin queë' bixúz lo. Guchúguië' gufdi nágabi'. ⁴⁸ Jesús gudxë' bönachi na', rnnë':

—¿Narúajtsali' nuá'ali' gufé tuchi', en yaga para sönli' neda', runli' ca runli' cate' rizönli'-në' gubán? ⁴⁹ Yugu' dza guzóalena' libí'ili' rusédigacada' bönachi ga naca chila yudo', ate' biti' guzönli' neda', pero raca caní para gaca le nazúaj lu guichi lá'ayi.

⁵⁰ Ní'irö yúgu'të bönni' usëda queë' Jesús bulu'cá'anë' Le', ta'zxúnnajë'.

Rizxúnnajbi' tubi' bi'i ra'bán

⁵¹ Zóabi' ca' ni' tubi' bi'i ra'bán sójno-bi' Jesús, nuxóasö cuinbi' tu lari' blaga'. Yugu' bönni' na' nachë'gaquië' Jesús gula'zönë'-bi' ⁵² pero busanbi' lari' na', en xiguídisöbi' buzxúnnajbi'.

**Ridxinë' Jesús lógaquië'
bönni' yúlahui' lo**

(Mt. 26:57-68; Lc. 22:54-55,
63-71; Jn. 18:12-14, 19-24)

⁵³ Gula'ché'e Jesús lahuë' bixúz lo, ate' bulu'dubë' ni' yúgu'të bixúz unná bë', en bönni' gula tu'zéajni'inë', en yugu' bönni' yudo' usedi. ⁵⁴ Pedro yöjnahué' Jesús zi'tu' zí'tu'só, en guyázië' lö'a lidxi bixúz lo na', en guró'ölenë' tsözxón yugu' ni'a në'ë bixúz lo na', rutsë'e cuinë' ra' guí.

⁵⁵ Yugu' bixúz unná bë' len yúgu'të bönni' yúlahui' lo bulu'guiljë' tu le ulu'-subáguië' Jesús para gaca ila'chúguië' queë' gátie' pero biti' bi bulu'dzólinë'. ⁵⁶ Bönni' zían gula'nnë' queë' Jesús le cabí nácatë, pero biti' yöjlózagaca le gula'nnë' queë'. ⁵⁷ Ní'irö gula'zuinë' yugu' bönni' gula'nnë' queë' Jesús le cabí nácatë, ta'nnë':

⁵⁸ —Netu' biyónitu' didza' bë'ë bönni' ni, gunné': “Uquínaja' yudo' ni, lé ni nequi lu ni'a lu na' bönachi, ate' tsonna dzasó uchisa' ia'tú le cabí nequi lu ni'a lu na' bönachi.”

⁵⁹ Lësca' lé ni, biti' yöjlózagaca xtídzagaquië'.

⁶⁰ Ní'irö guyasë' bixúz lo na' gatsaj láhui'lö bönachi nacua' ni', en gunábinë' Jesús, rnnë':

—¿Naru' cabí rubi'itso' didza'? ¿Bizxi na' ta'nnë' quiu' bönni' ni?

⁶¹ Jesús, dxisó zoë'. Biti' bi didza' rubi'ë. Gunábinë' Lë' leyúbölö bixúz lo na', rnnë':

—¿Naru' nacu' Li' Cristo, Zxí'inë' Dios Lá'ayi?

⁶² Bubi'ë didza' Jesús, rnnë':

—Naca'. Ilé'eli' neda', Bönni' Guljë' Bönachi, soa' cö'a cuitë' ibëla Dios napa cazë' yöl-la' huáca cate' ni' huöda' lu böaj lúzxiba.

⁶³ Ní'irö bixúz lo na', lu yöl-la' rilé queë' guchözë' lari' nácue', rnnë':

—¿Núzxirö naquíniru' nu quixjö'? ⁶⁴ ¿Riyón quézili' rucá'anë' Dios cá'asö len didza' ru'ë! ¿Nacxi rusáca'li' queéli'? Yúgu'të gula'chúguië' queë' gátie'.

⁶⁵ Ní'irö gula'sí lógaquië' bal-lë' tu'chejë' Jesús zxöna'. Bulu'sayjë' lahuë', en gulundë' Lë' zi', ta'nnë':

—Gunnë' yá'atsöca' nuzxi na' bë' Li'.

Yugu' bönni' ni'a në'ë bixúz lo gula'gápë'ë ru'ë Jesús.

Rnnë' Pedro biti' núnbë'ë Jesús

(Mt. 26:69-75; Lc. 22:56-62;
Jn. 18:15-18, 25-29)

⁶⁶ Cate' ni' zoë' Pedro lö'a zxan yu'u, bidxinbi' tubi' bi' nigula huen dxin queë' bixúz lo na' ga na' zoë'. ⁶⁷ Cate' bilé'ebi' Pedro, rö'ë rutsë'e cuinë' ra' guí, buyubi' lë', rnnabi':

—Do'ocá' li' Jesús, bönni' Nazaret na'.

⁶⁸ Gudá'baguië' Pedro, rnnë':

—Biti' núnbë'a-në', en biti' nözda' bizxi na' rmmo'.

Burúajë' Pedro yöjsóë' ga nu riyaza lö'a. Ní'irö guródxiba' böra. ⁶⁹ Buyubi' lë' leyúbölö bi' nigula huen dxin na', en gusí lobi' rëbi' nupa nacua' ni':

—Bönni' ni dzáguië' légaquië'.

⁷⁰ Leyúbölö gudá'baguië' Pedro. Ia'lati' gudzé nupa nacua' ni' të Pedro, ta'nná:

—Le nácatë dzagu' légaquië', tu' nacu' bönni' Galilea. Yöl-la' ru'isö quiu' didza' naca bë'u, tu' tuz ca ru'ili' didza'.

⁷¹ Gusí lahuë' Pedro rudxía dö' cuinë', en ruzötjë' Dios, rnnë':

—Biti' ca' núnbë'a-në' bönni' na' ru'ili' didza' ca naca queë'.

⁷² La' guródxitëba' böra le buropi luzuí. Ní'irö yöjnenë' Pedro didza' na' bë'ë Jesús, gudxë' lë': “Zi'alö códxiba' böra le buropi luzuí, tsonna luzuí in-nó' biti' núnbë'u neda'.” Cate' yöjnenë' didza' ni, gusí lahuë' ribódxidë'ë.

**Ridxinë' Jesús lahuë'
Pilato, bönni' rinná bé'ë**

(Mt. 27:1-2, 11-14; Lc.
23:1-5; Jn. 18:28-38)

15 Ni' naca zílado', yugu' bixúz unná bé' len bönni' gula tu'zéa-jni'inë', en yugu' bönni' yudo' usedi, en yúgu'të bönni' yúlahui' lo gulún xtídzagaquië'. Ní'irò gula'ché'ë Jesús náguë'ë, en bulu'dödë' Lë' lu në'ë Pilato, bönni' rinná bé'ë uláz que yödz Roma. ² Pilato gunábinë' Jesús, rnnë':

—¿Naru' nacu' Li' Bönni' inná bé'enë' bönachi judío?

Bubi'ë didza' Jesús, rnnë':

—Ca nácatë rmo'.

³ Yugu' bixúz unná bé' bulu'zéguië' Jesús didza' le zían. ⁴ Ní'irò Pilato gunábinë' Lë' leyúbölö, rnnë':

—¿Naru' cabí rubi'itso' didza'? Buzét-söca' nagu' cate' xö zían le ta'nné' quiu'.

⁵ Biti' bi didza' bubi'ë Jesús. Ca' guca, bubáninë' Pilato.

Ta'chúguië' queë' Jesús gátie'

(Mt. 27:15-31; Lc. 23:13-25;
Jn. 18:38–19:16)

⁶ Dë tu le runë' Pilato cate' raca laní na', rusanë' lu ná'agaca bönachi tu bönni' nadzunë' lidxi guíë, nútí'tës nu ta'n-aba. ⁷ Nadzunë' tu bönni' lë' Barrabás lidxi guíë, ate' dzágagaquië' lë' ia'bal-lë' luzé'ë, yugu' bönni' gulútië' bönachi cate' gula'dá'báguië' yúlahui'. ⁸ Cate' bila'dxín bönachi zían ni', gula'sí lógaquië' ta'nabë' lahuë' Pilato gunë' quégaquië' ca run cazë'. ⁹ Bubi'ë didza' Pilato, rnnë':

—¿Ré'ënili' usana'-në' queéli' Bönni' Inná Bé'enë' Bönachi Judío?

¹⁰ Caní gunné' Pilato tu' réquibe'enë' bulu'dödë' yugu' bixúz unná bé' Jesús lu në'ë tu' tu'zxé'enë' Lë'. ¹¹ Yugu' bixúz unná bé' na' gula'gu'ë xilá ládx-i'gaca bönachi zían na', para ila'n-abë' lahuë' Pilato usanë' lu ná'agaquië'

Barrabás. ¹² Ní'irò Pilato gunábinë' lé-gaquië' leyúbölö, rnnë':

—¿Bizxi ré'ënili' guna' queë' bönni' na' ru'íli' lë', Bönni' Inná Bé'enë' Bönachi Judío?

¹³ Gulu'ë zidzaj didza', ta'nné':

—¿Budé'ë lë'e yaga cruz!

¹⁴ Gunábinë' Pilato légaquië', rnnë':

—¿Bizxi caz dö' nu'ë?

Leyúbölö tu'ë zidzaj didza', ta'nné':

—¿Budé'ë lë'e yaga cruz!

¹⁵ Tu' gú'unnë' Pilato gunë' ga ila'yaza ládx'i'gaca bönachi zían na', busanë' Barrabás lu ná'agaquië'. Ní'irò gunná bé'enë' nu quin Jesús, ate' budödë' Lë' lu ná'agaquië' bönni' ulu'dé'ë Lë' lë'e yaga cruz.

¹⁶ Ní'irò yugu' bönni' rójáquië' gudil-la gula'ché'ë Jesús lö'a yúlahui', ate' bulu'tubë' luzá'agaquië' ni'. ¹⁷ Bulu'gácuë' Jesús tu lari' xiná gul-la, en gulunë' tu bregui' ni'a në'e yötsi', le bulu'dxíë' icjë'.

¹⁸ Ní'irò gula'sí lógaquië' tu'lidzë' Jesús, ta'nné':

—¿Yöl-la' ba li', rinná bé'enu' bönachi judío!

¹⁹ Gula'guínë' gui icjë', en bulu'chejë' Lë' zxöna'. Bulu'zóa xzíbigaquië' lahuë', en lu yöl-la' rutitaj gulunë' Lë' bal.

²⁰ Cate' budxi bulu'titjë' Lë', bulu'gúë' lari' xiná chul-la na' nácuë' ate' bulu'gácuë' Lë' lari' que cazë'. Ní'irò gula'ché'ë Lë' ní'lö yúlahui' na' para tsój-da'gaquië' Lë' lë'e yaga cruz.

Tu'dé'ë Jesús lë'e yaga cruz

(Mt. 27:32-44; Lc.

23:26-43; Jn. 19:17-27)

²¹ Gulunë' ga bi'ë tu bönni' Cirene yaga cruz queë' Jesús, ridódísë' ni' suzë'ë la' guixi'. Lë' Simón, xúzgcabi' Alejandro, en Rufo.

²² Gula'ché'ë Jesús lataj na' nazí'i le Gólgota, tu didza' hebreo le rnna lu didza' xidza', Lataj Que Böga' Ícjaru'.

²³ Gulu'ë le guf'jë' Jesús xisi uva nut-

si' nōri silá' que yaga mirra, pero Lē' bití' gu'ē le. ²⁴Ní'irō bulu'dé'ē Jesús lē'e yaga cruz, ate' gula'guísie' lari' nácue', le gula'zí' que queégaquiē' bōnni' na' rōjáquiē' gudil-la. Bulu'béajē' le gaca bē' para ila'nózinē' bízxilō idela' que queégaquiē'.

²⁵Naca idú xsila cate' bulu'dé'ē Lē' lē'e yaga cruz. ²⁶Didza' na' bulu'zōé' lē'e yaga cruz ícjale' Jesús ca naca le tu'quíē' Lē' rna caní: "Bōnni' Rinná Bé'enē' Bōnachi Judío." ²⁷Bulu'dá'lenē' Jesús tsōzxón lē'egaca yaga cruz chopē' gubán, tuē' cuita lē'ē ibēla, en ia'túē' cuita lē'ē yógōla. ²⁸Caní guca lē' na' nazúaj lu guichi lá'ayi, rna: Gubábalenē' bōnni' tuá' dō'.

²⁹Yugu' bōnni' ta'dōdē' ni' tu'lidza zi'ē Jesús, en tu'tá ícjagaquiē', ta'nné':

—¡Ōn! ¿Naru' uquínnajtso' yudo' queē' Dios, ate' tsonna dzasō uchísatsu' le? ³⁰¡Busölá' cuinu' na'a, en bōtaj lē'e yaga cruz na'!

³¹Lē'sca' caní yugu' bixúz unná bē', en yugu' bōnni' yudo' usedi tu'titjē' Lē'. Té' luzá'agaquiē' tuē' ia'túē':

—Bōnachi yúbölō busölé', pero bití' gaca usölá' cuiné'.

³²Ta'nné' ca':

—¡Ōn! ¿Nácatsu' Cristo, Bōnni' Inná Bé'enē' Bōnachi Israel? ¡Bōtjatsōca' na'a lē'e yaga cruz para ilé'etu', ate' tséajlē'ē-tu' Li'!

Yugu' bōnni' na' dá'gaquiē' tsōzxón len Lē' lē'egaca yaga cruz bulu'lidza zi'ē ca' Lē'.

Le guca cate' gútiē' Jesús

(Mt. 27:45-56; Lc.

23:44-49; Jn. 19:28-30)

³³Cate' bidxín idú huagubidza, guchul-la idütē yōdzōliō. Guca caní ga bidxintē idú ridōdi xihuó. ³⁴Idú ridōdi xihuó na' bē'ē Jesús zidzaj didza', rnné':

—Eloi, Eloi, ¿lama sabactani?

Didza' hebreo ni rna lu didza' xidza': Dios quia', Dios quia', ¿bizx que nubéaj lādxi'u neda'?

³⁵Yugu' bōnni' nacu'ē ni' bila'yōnnē' didza' ni, ate' ta'nné':

—Bulí'zētsōca' nágali'. Elías rulidzē'.

³⁶Ní'irō guxítí'ē tu bōnni' nútsē'ē lād-jagaquiē', en buxúpinē' nupi zi tu le bululu rē'aj nisa. Budé'ē le lahui gui, en bē'ē le xupē' Jesús, rnné':

—Cōztsōca'ru', uyuru' channō huidē' Elías uzōtjē' Lē'.

³⁷Guródxi'ē zidzaj Jesús, en la' gútitē'.

³⁸Birōza' lari' yōdx nala' lu yudo'. Birúaj choplō, gudela' icjlō, en birúajtē zxánilō. ³⁹Bōnni' na' rinná bé'enē' bōnni' rōjáquiē' gudil-la zuínē' lahuē' Jesús, en bilé'enē' ca na' guca guródxi'ē Jesús, en la' gútitē', ate' gunné':

—Le nácate' bōnni' ni gúquiē' Zxí'inē' Dios.

⁴⁰Nacuá'anu ca' ni' nigula, zí'tu'sō tu'yunu. Nútsa'gacanu lādjacacanu María Magdalena, en Salomé, en María, xiná'agacabi' Jacobo cuidí', en José.

⁴¹Nigula ni yōjácalennu Jesús cate' ni' gudé' luyó Galilea, en gulácalennu Lē', gula'gú'unu le gulahuē'. Nacuá'anu ca' ni' ia'bál-lanu nigula zían gula'zá'lennu Lē' lu yōdzō Jerusalén.

Ta'gu'ē Jesús yeru ba

(Mt. 27:57-61; Lc.

23:50-56; Jn. 19:38-42)

⁴²Chizá' ral-la, en naca dza tu'pé'ē, dza si' idxín dza lá'ayi quegaquiē' bōnni' judío. ⁴³Que lē' ni na' bidē' José, bōnni' yōdzō Arimatea, bōnni' lo lādjagaquiē' bōnni' yúlahui' lo. Ribözē' ca' dza idinná bē'ē Dios. Idú lādxi'ē guyáziē' ga na' zoē' Pilato, en gunábinē' lē' gu'ē lē' lataj u'ē Jesús. ⁴⁴Bubáninē' Pilato tu' gunné' chigútiē' Jesús, ate' bulidzē' bōnni' na' rinná bé'enē' bōnni' rōjáquiē' gudil-la para inábinē' lē' channō chinátiē' Jesús. ⁴⁵Cate' biyōnnē' ca na' gunné' bōnni' na'

rinná bé'ené' bönni' röjáquié' gudil-la, bé'ë José lataj u'ë Jesús. ⁴⁶Ní'irö José na' gú'ué' tu lari' xtila dxí'ado', ate' buzötjé' Jesús lë'e yaga cruz, en buchóliné' Lë' lari' na'. Ní'irö gulu'ë Lë' yeru ba nadaj lë'e guí'a guió'j. Budé'ë tu guió'j blaga zxon ga nu riyaza ba na'. ⁴⁷María Magdalena, en María, xiné'ë José tu'yunu ga na' ta'gu'ë Jesús.

Rubanë' Jesús lu yöl-la' guti

(Mt. 28:1-10; Lc. 24:1-12; Jn. 20:1-10)

16 Cate' chinadödi dza lá'ayi qué-gaca bönachi judío le naca dza gadxi, María Magdalena, en Salomé, en María, xiné'ë Jacobo, ta'z'f'inu yugu' le rilá' zxixi para tsöjlú'ugacanu Jesús. ²Ní' naca zílado' dza risí lo, yöjácunu ra' yeru ba queé'. Bila'dxinnu ni' cate' si' gulén gubidza. ³Gula'nábinu luzá'agacanu:

—¿Nuzxi cúatsö queéru' guió'j na' da' ga nu riyaza ba queé'?

⁴Cate' bila'dxinnu ni', bulu'yunu, en bila'lé'enu chinadúa guió'j na', ate' guió'j zxon naca. ⁵Gula'yú'unu yeru ba lë'e guí'a guió'j na', ate' ni' bila'lé'enu-bi' tubi' bi'i bönni' ra'bán, nácabi' gubáz lá'ayi queé' Dios. Ró'öbi' tsólá'a ibëla lu yeru ba na', nácubi' lari' tunna chiguíchido'os. Guládxide'enu. ⁶Ní'irö bi'i na' gúdxibi' légacanu, rnnabi':

—Bíti'rö gádxili'. Ruguí'lajli' Jesús, Bönni' Nazaret, Bönni' na' gudé'ë lë'e yaga cruz. Chibubanë'. Biti' zoé' ni. Buli'yú ga ni gula'gu'ë Lë'. ⁷Guli'tséaj na'a, guli'tsöjtíxjöi' ca' yugu' bönni' usëda queé', enca' Pedro. Guiéli' légaquié': "Tsejé' Jesús luyú Galilea zí'alö ca lib'ili'. Ni' ulé'eli'-në' ca na' chigudxi cazé' lib'ili'."

⁸Ní'irö bulu'rúajnu ni', bulu'zxúnna-jnu ra' yeru ba na' tu' ta'zxízinu lu yöl-la' radxi ridzöbi quégacanu. Cuntu nu gulënu ca' tu' tádxinu.

Rulu'í lahué' Jesús lonu María Magdalena

(Jn. 20:11-18)

⁹Cate' bubanë' Jesús zílado' dza na', bulu'í lahué' zí'alö lonu María Magdalena, nigula na' bubéajé' gadxi bö' xihui' gula'yú'u lënu. ¹⁰Guyéajnu yöjtíxjöi'inu nupa na' gula'dalen Jesús. Nupa ni ta'sëbi ládxi'gaca, en ta'bödxi yechi'. ¹¹Cate' bila'yöni didza' ru'f'inu, zoé' nabanë' Jesús, ate' bilé'e quézinu Lë', bití' gula'yéajlé' lënu.

Chopë' bönni' usëda queé' Jesús tu'lé'ené' Lë'

(Lc. 24:13-35)

¹²Gudödi na', nadzá'alö bulu'í lahué' Jesús lógaquié' chopë' bönni' usëda queé' yú'ugaquié' nöza, söjáquié' ga naca ladaj guixi'. ¹³Ní'irö bulu'dxiné', dutíxjöi'iguequiné' ia'z'íca'rë', ate' ni xtídzagaquié' bití' gula'yéajlé'ë.

Le rigu'ë Jesús lu ná'agaquié' bönni' gubáz queé'

(Mt. 28:16-20; Lc.

24:36-49; Jn. 20:19-23)

¹⁴Ga yöjseté, bulu'í lahué' Jesús lógaquié' idxinéajté' tsanni ni' ta'bö'ë tahué', ate' gudil-lë' légaquié' didza' tu' cabí ta'yéajlé'ë Lë', en tu' naca zidi icja ládxi'do'gaquié', tu' cabí gula'yéajlé'ë xtídzaga'gaca nupa na' bila'lé'e Lë' nubanë'. ¹⁵Ní'irö gudxë' légaquié', rnnë':

—Guli'tséaj idütë yödzölió tsöjenli' libán que didza' dxí'a lógaca yúgu'té bö-nachi. ¹⁶Nu tséajlé' neda', en idila nisa, ulá nu na', pero nu bití' tséajlé', irugu que gati nu na'. ¹⁷Le ilaca bé' ni iluné' bönni' ila'yéajlé'ë neda'. Ulu'guné' dxin La' neda', en ulu'béajé' yugu' bö' xihui' yú'ugaca bönachi, en ilu'ë didza' izá'a. ¹⁸Channö ila'zönë'-ba' bëla sínia' lu ná'agaquié', o channö ile'jé' le naché' yöl-la'

guti, biti' bi gun quégaquië'. Ila'xóa në'ë nupa te'e, ate' ulu'huöácatë.

Ruhuëpë' Jesús yehua' yubá

(Lc. 24:50-53; Hc. 1:6-11)

¹⁹ Cate' Xanru' budxi bé'lenë' légaquië' didza' ni, buchisë' Dios Lé' yehua' yubá

ga ni' gurö'ë cuitë' ibëla Lé'. ²⁰ Bila'ruájë' légaquië', yójéngaquië' libán yúgu'të yödzo. Gúcalenë' Xanru' légaquië', en benë' ga gulunë' le nácgaca bë' naca idútë li didza' tu'ë. Ca' naca.

DIDZA' DXI'A BUZÚAJĚ' LUCAS

Didza' rigu'ë Lucas lu ně'ë Teófilo

1 Zián nupa chigulún bayudxi ulu'zúaj lu guichi idútě le nácatě, le guca ga zóaru', ² ca na' bila'lé'e nupa ni' dza ni'te, ate' bulu'lufi rě'u, en bulu'zě didza' que. ³ Teófilo, bönni' tsáhu'i'do', runi neda' naca dxi'a uzúaja' quiu' lu guichi, ga ze lo dzö' yúgu'tě lě ni, tu' chibugulaj bubéquia' ga ze lo dzö' ca naca yúgu'tě lě na' guca dza ni'te. ⁴ Ruzúaja' quiu' lu guichi ni para inózinu' naca idútě li lě na' chinazědu'.

Rulu'fině' gubáz lá'ayi queě' Dios ca si' gálajbi' Juan, bönni' uquilě' bönachi nisa

⁵ Dza ni'te cate' gunná bě'ë Herodes luyú Judea, ni' zoě' tu bixúz lě' Zacarías. Nabábaleně' cö' bixúz, nazí'i le Cö' Queě' Abías. Elisabet, nigula queě' Zacarías na' nácanu ca' xzí'ini xi'sóě' Aarón, bönni' gúquiě' bixúz lo dza ni'te. ⁶ Nácagaquiě' Zacarías, en Elisabet tsahui' lahuě' Dios, ate' idú ládxi'gaquiě' tuně' ca rnna xtídzě'ë Dios, en le rinná bě' xibá queě'. Caní guca, cuntú nu guca bi inně' quégaquiě'. ⁷ Cuntú nu zoa bi'i quégaquiě', tu' nácanu Elisabet nigula huödx, ate' chinagúlagaqiě' irópatě'.

⁸ Guca beo' gul-la' uláz que cö' na' nabábaleně' Zacarías iluně' dxin lahuě' Dios, lu yöl-la' bixúz quégaquiě'. ⁹ Ca naca le nulaga lógaquiě' tuně' bixúz, gul-la' uláz queě' Zacarías guyáziě' lu lataj lá'ayi que yudo' para uzégui'ë yalaj lahuě' Xanru' Dios. ¹⁰ Tsanni ni' ruzégui'ë Zacarías na' yalaj, gula'cuá' yúgu'tě bönachi ní'ilö, tu'lidza Dios. ¹¹ La' náasö bulu'i lahuě' gubáz lá'ayi queě' Xanru' ga zoě' Zacarías na'. Zuíně' gubáz na' tsólá'a iběla bucugu lá'ayi ga na' régui yalaj. ¹² Cate' bilé'eně' Zacarías

gubáz lá'ayi na', gurö'ë böniga, en gudxi bidzöbině'. ¹³ Ní'irö gubáz lá'ayi na' gudxě' lě', gunné':

—Zacarías, biti' gádxinu', tu' chibiyöně' Dios le rinabu' lahuě', ate' Elisabet, nigula quiu', uzóanu-bi' tubi' bi'i bönni'do', ate' gu'u labi' Juan. ¹⁴ Gata' quiu' le uzi'u xibě, en udzějanu', ate' zián nupa ulu'dzeja ládxi'gaca cate' gálajbi' bí'ido' na', ¹⁵ tu' gácatěbi' xzön lahuě' Dios. Biti' guf'ajbi' xisi uva, en calěga tu le rusudxi bönachi, ate' sóaleně'-bi' Dios Bö' Lá'ayi cate' isí lo si' gálajbi'. ¹⁶ Guně' Juan ni ga ulu'huóaca zián bönachi Israel queě' Xanru'. ¹⁷ Inóruě' lě' ca Xanru', ate' ila'cuá'alen lě' Bö' na', en yöl-la' huáca na' gula'cuá'alen Elías, bönni' bě'ë didza' uláz queě' Dios dza ni'te. Caní guně' para úně' tuz nupa nácagaca xuz len xzí'ini-gaquiě', en uzéajni'ině' nupa ta'dá'baga' para ilácagaca tsahui', en ucözě' bönachi para ila'zi' lu né'eguequi Xanru'.

¹⁸ Zacarías gunábině' gubáz lá'ayi na', rnně':

—¿Bizxi gaca bě' para inözda' ilaca lě ni? Chinagúla' neda', en chinagúlanu ca' nigula quia'.

¹⁹ Bubi'ě didza' gubáz lá'ayi na', rnně':

—Neda' lea' Gabriel. Runa' dxin lahuě' Dios. Lě cazě' gusól-lě'ë neda' para güf'ilena' li' didza', en usiyönda' li' didza' dxi'a ni. ²⁰ Na'a, tu' cabí guyéajlě'u xtídz'a'a, icödz'u, en bíti'rö gaca innö' cate' gácarö lě ni. Yúgu'tě lě ni udxín cate' idxín dza que.

²¹ Tsanni ni' raca lě ni, nacuá' bönachi ní'ilö, ta'böza Zacarías, ate' tu'bani tu' ridzeně' xidzé ga na' zoě' lu lataj lá'ayi. ²² Cate' burúajě' Zacarías, biti' guca güf'ileně' légaquiě' didza', ate' guléquibe'eně' bilé'eně' tu le bulu'fině' Dios lě' lu lataj lá'ayi. Bulá'a bulu'isě' Zacarías, buzéajni'ině' légaquiě', tu' cabí raca inně'.

²³ Cate' bizá'a yugu' dza na' ralla' guně' dxin Zacarías lahuě' Dios,

ní'irò bóajë' lidxë'. ²⁴ Gudödi yugu' dza na' Elisabet, nigula queë' Zacarías na', biá'anu-bi' lé'ënu b'ído', ate' idú gayu' beo' bugá'anasinu ga zoa lídxigaquië'. Guzá' ládxí'nu, rnnanu: ²⁵ "Caní runë' Xanru' quia'. Ruzá' ládxë'ë quia' b'ído', en runë' ga bítí'rò utuf'ida' lógaca bönachi."

Riguíxjö'ë gubáz lá'ayi ca si' gálajbi' Jesús

²⁶ Cate' chiguca xopa beo', buluf'i lahuë' gubáz lá'ayi na', tu' gusól-lë'ë Dios lë cazë' Gabriel, tsejë' Nazaret, tu yödzo luyú Galilea. ²⁷ Dios gusól-lë'ë lë' ni' tsöjyüë'-bi' tubi' bi'i nigula ra'bando' lébi' María. Chinazí' lu ná'abi' María utsaga ná'aleni'-në' bönni' lë' José. Nababë' José di'a dza queë' David, bönni' gunná bé'enë' bönachi Israel dza ni'te. ²⁸ Cate' guyazië' Gabriel na' ga zóabi' María, gudxë'-bi':

—Padiux. Dios ruzá' ládxë'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

²⁹ Cate' bilé'ebi' María gubáz lá'ayi na', guró'öbi' böniga tu' nözi didza' na' bé'ë, en rubani ládxí'bi' nacxi sa'yéaj didza' na' bulidzë'-bi' gubáz lá'ayi na'. ³⁰ Ní'irò gubáz lá'ayi na' gudxë'-bi', rnnë':

—María, bití' gádxinu', tu' chibidéli'nu' le ruzá' ládxë'ë Dios quiu'. ³¹ Na'a, tsú'ubi' tubi' b'ído' lë'u, ate' uzú'-bi' tubi' bi'i bönni'do', ate' gu'u labi' Jesús. ³² Jesús ni tsépisëtë'rë, en si' Lë' Zxf'inë' Dios, Nu nayépisëtë'rö. Xanru' Dios gunë' ga inná bé'ë ca na' gunná bé'ë David, xuz gula gudödi queë'. ³³ Jesús na' inná bé'etica'sinë' bönachi Israel, ate' le inná bé'ë Lë' catu caz tödi que.

³⁴ Ní'irò María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóale-na' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayépisëtë'rö, sóalen li', le gaca ca tu zxul-la rigú'u böaj ga zu'. Que lë ni na' bi'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxf'inë' Dios. ³⁶ Cá'anqueze Elisabet, nigula di'a dza quiu', chinuá'anu-bi' lé'ënu tubi' bi'i bönni'do' sal-la' chinagúlanu. Gula'nnë' que'ënu: "Nácanu nigula huödx", pero chizéaj xopa beo' nuá'anu-bi' lé'ënu b'ído' na'. ³⁷ Bití' bi zoa le cabí séqui'në' Dios.

³⁸ Ní'irò María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irò la' buza'të' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'sö guyú'ubi' nöza María, ate' carelò sa'yéajbi' ga naca gu'ado', en bidxinbi' tu yödzo luyú Judea. ⁴⁰ Ní' guyázabi' lidxë' Zacarías, en gúdxibi'-nu Elisabet:

—Padiux.

⁴¹ Cate' biyóninu Elisabet didza' na' bé'ëbi' María, la' butátë cuinbi' bi'i hué'ëni'do' na' yú'ubi' lé'ënu, ate' bidisóalenë'-nu Dios Bö' Lá'ayi. ⁴² Ní'irò bé'ënu Elisabet zidzaj didza', rnnanu:

—¿Chinunë' Dios ga nácaru' li' bica' ba ca yúgu'të nigula, en chinunë' ca' ga nácabí' bica' ba b'ído' na' yú'ubi' lë'u! ⁴³ ¿Núzxitë neda', zá'anu xiné'ë Xana' quia'? ⁴⁴ Cate' biyönda' didza' bé'u, bulidzu' neda', lu yöl-la' rudzeja queë'bi' la' butátë cuinbi' bi'i hué'ëni'do' ni yú'ubi' lë'a. ⁴⁵ ¿Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

⁴⁶ Ní'irò gunabi' María:

¿Idútë le naca' rigú'u Xanru' yöl-la' ba,

⁴⁷ en rudzeja ládxi'léna'-né Dios, Nu rusólá neda'!

⁴⁸ ¡Dios caz buzá' ládxi'è quia' neda'!

Yu'a lu në'è, en tsaz naca' huen dxin queé'.

Na'a isí lo, ca naca quia' ila'nná:

Bica' ba nigula na'.

⁴⁹ ¡Zxóntèrò naca le benè' Dios unná bè' quia'!

¡Lá'ayi naca Lè'!

⁵⁰ Lè' ruhuéchi' ládxi'tica'sè' bönachi tadxi Lè'

na'a dza, en dza zá'gaca.

⁵¹ Yugu' yöl-la' huáca zxön chibenè' Lè'. Buzötjè' nupa gulún zxön yöl-la' réajni'i quéguequi.

⁵² Bugúè' yöl-la' unná bè' quégaca nupa gulaca lo, en benè' ga gulaca lo nupa gulaca nöxaj ladxí'.

⁵³ Benè' ga bulu'huólaj bulu'dzé'e nupa gula'dún, en bucá'anè' cá'asö nupa bila'lé'e yöl-la' tsahui'.

⁵⁴ Gúcalenè' bönachi Israel, nupa na' tun xichiné', tu' yöjnenè' légaquiè', en buéchi' ládxi'è légaquiè'.

⁵⁵ Benè' ca guzxi' lu në'è gunè' quégaquiè' xuz xtó'oru' enca' queé' Abraham, en quégaca di'a dza queé'.

⁵⁶ María bugá'analeni'-nu Elisabet idú ca tsonna beo', ate' gudödi ni' bóajbi' lídxibi'.

Le guca cate' gúlajbe' Juan, bönni' uquilè' bönachi nisa

⁵⁷ Cate' bidxín dza ral-la' sóabi' bí'ido' queénu Elisabet, buzóanu-bi' tubi' bí'i bönni'do'. ⁵⁸ Bila'yöni dzaga yu'u queénu, en yugu' di'a dza queénu ca na' guca, buéchi' ládxi'è-nu Dios, ate' bulu'dzéjalen lénu. ⁵⁹ Cate' chiguca xunu' dza zóabi' bí'ido' na', bila'dxinè' di'a dza queénu para ila'chúguié'

lu xipéla'bi' bí'i bönni'do' na' lé na' gaca bè' néquibi' queé' Dios, ate' té'én-nè' ilu'è labi' Zacarías ca na' lé' xúz-ibi'. ⁶⁰ Ní'irò bubí'ínu didza' Elisabet, xiná'abi', rnnanu:

—Calèga. Juan sí' labi'.

⁶¹ Gula'nábinè'-nu, ta'nné':

—¿Bizx que? Cuntu nu di'a dza quiu' lè' Juan.

⁶² Ní'irò bulu'lá' bulu'luf'isinè', gula'nábinè' xúzibi' nacxi ré'énè' gu'è labi'. ⁶³ Zacarías na' gunabè' tu blágado', ate' buzúajè' lahui caní: Juan lébi'. Bulu'bábinè' yúgu'tè'. ⁶⁴ La' ní'sö bóaljatè ru'è Zacarías na', en bugúitjatè lúdxè'è, ate' bè'è didza' le gulu'è Dios yöl-la' ba. ⁶⁵ Ní'irò guládxiné', en bulu'bábinè' yúgu'tè dzaga yu'u quégaquiè', ate' yúgu'tè yódzödo' nacuá' lu gu'fado' luyú Judea, guzé didza' ca guca lé ni. ⁶⁶ Gula'zá' ládxi'gaca yúgu'tè nupa bila'yöni ca na' guca, ta'nná: “¿Nacxi caz gá-cabi' bí'i bönni'do' ni? Le nácatè Xanru' zóalenè'-bi'.”

Didza' bè'è Zacarías uláz queé' Dios

⁶⁷ Ní'irò Dios Bö' Lá'ayi bidisóalenè' Zacarías, xúzibi' Juan, ate' bè'è didza' uláz queé' Dios, rnnè':

⁶⁸ ¡Yöl-la' ba Dios, Xángaca bönachi Israel

tu' buduyúè' rë'u, bönachi queé', en böá'uè' rë'u!

⁶⁹ ¡Gusól-lè'è queéru' Bönni' usólé' rë'u, len yöl-la' huáca zxön queé'!

Bönni' ni guljè' ládajgaca di'a dza queé' David,

huen dxin queé' Dios.

⁷⁰ ¡Dza ni'te guzxi' lu në'è gunè' ga gaca caní!

Raca ca na' gunné' lu ruá'agaquiè' bönni' gulu'è didza' uláz queé'.

⁷¹ Guzxi' lu në'è usólé' rë'u

lu ná'agaca nupa tequi rë'u zí,

enca' lu ná'agaca nupa biti' ta'lé'e rë'u dxi'a.

⁷² Guzxí' lu në'ë huéchi' láchxë'ë xuz gudödi queéru', en tsöjnenë' le guzxí' lu në'ë le naca lá'ayi.

⁷³ Lë ni benë' tsutsu xtídzë'ë, en guzxí' lu në'ë, le gunë' queë' Abraham, xuz gudödi queéru', le naca tu le ral-la' gunë' queéru' rë'u.

⁷⁴ Guzxí' lu në'ë usölë' rë'u lu ná'agaca nupa biti' ta'l'é'e rë'u dxi'a para cabirö gádxiru' gunru' xichinë' Lë',
⁷⁵ en para gácaru' ba'a ladxi', en idú dxi'a lahuë' Lë' yúgu'të dza sóaru' ibanru'.

⁷⁶ Lí', zxi'ina'do', si' lo' bönni' ru'ë didza' uláz queë' Dios unná bë' tu' tsöjnöru' ca Xanru' caz, en upó'o nöza ga tödë'.

⁷⁷ Gunu' ga ila'nözi bönachi queë' ca gaca ulu'lágaca, en ca na' uniti lahuë' Dios dul-la' nabága'gaca.

⁷⁸ Caní gaca, tu' ruhuéchi'da' láchxë'ë Dios rë'u, en runë' ga tsení' queéru' Bönni' na' náquië' bení' idú.

⁷⁹ Lë' uzení'ë quégaca nupa nacuá' gapa naca chul-la, en gapa nacuá' nupa chizóa ilátigaca para ugú'ë rë'u nöza ga cö'ö dxi láchxi'do'oru'.

⁸⁰ Guzxönbi' bi'i bönni'do' na', en bidipa láchxi'bi'. Guzóasibi' gapa naca lu lataj cá'asö cate' bidxinrö dza buluf'i lo-bi' lógaca bönachi Israel.

Le guca cate' gúlajbi' Jesús

(Mt. 1:18-25)

2 Lu dza na' gunná bë'ë Augusto César, bönni' Roma, ila'yaza lu guichi yúgu'të bönachi nacuá' yödzölió. ² Cate' gusí lo ta'yaza lu guichi caní, rinná bë'ë bönni' lë' Cirenio luyú Siria. ³ Yúgu'të bönachi yójaca yödzö que queé'guequi ga na' zeaj nababa para ila'yaza lu guichi. ⁴ Guzé'ë José yödzö Nazaret luyú

Galilea, sa'yéajë' luyú Judea, en bidxinë' yödzö Belén, ga ni' guljë' David, tu' guljë' José ládajgaca di'a dza queë' David na'.
⁵ Guyijë' José ni' para tsázië' lu guichi, ate' dzágabi'-në' María, bi'i nigula nazí' lu ná'abi' utsaga ná'aleni' lë', en chizóa sóabi' bf'ido' queé'bi'. ⁶ Cate' ni' nacu'ë lu yödzö Belén, bidxin dza sóabi' bf'ido' queé'bi'. ⁷ Buzóanu-bi' tubi' bi'i bönni'do', bi'i huáca queénu. Buchólinu-bi' yugu' lári'do', ate' gudíxjanu-bi' tu lu yú'udo' ga tun chi'i le táguba' böa' quégaca bönachi yú'ugaca nöza. Caní guca, tu' cabí bidzöli lataj ila'cu'ë lu yu'u ga ni' ta'dxín bönachi yú'ugaca nöza.

Tu'luf'i lahuë' gubáz lá'ayi queë' Dios ga nacu'ë bönni' tu'yúë'-ba' bö'cu' zxila'

⁸ Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa ch'ígaquië'-ba' chi'i dzó'ölö. ⁹ La' buluf'itë lahuë' gubáz lá'ayi queë' Xanru' ga na' nacu'ë. Yöl-la' bení' queë' Xanru' buzení' ga na' nacu'ë, ate' guládxinë'. ¹⁰ Ní'irö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' lib'ili' didza' le gun ga udzëjade'eli', le ulu'z'f ca' xibë yúgu'të bönachi. ¹¹ Na'a chigúla-jbi' lu ladzë' David Nu usölá lib'ili'. Nu ni naca Cristo, Xanru'. ¹² Lë ni gaca bë'ëbi'. Udzóli'bi' B'í'do' na', narólibi' yugu' lári'do', en dëbi' tu lu yú'udo' ga tun chi'i le táguba' böa' quégaca bönachi yú'ugaca nöza.

¹³ Ga na' zoë' gubáz lá'ayi na', tsáli-do'os bulu'luf'i lógaquië' zianró ca' gubáz lá'ayi queë' Dios, narúajgaquië' yehua' yubá, en ta'gu'ë Dios yöl-la' ba, ta'nnë':

¹⁴ Yöl-la' ba Dios zoë' xitsá', ate' luyú gaca le cuéqui dxi láchxi'do'gaquië' bönni' raza láchxë'ë Dios légaquië'!

¹⁵ Cate' bulu'zë'ë gubáz lá'ayi na' ga ni' nacu'ë, söjhuó'jgaquië' yehua' yubá,

ní'irö gulé luzé'ë tué' ia'túé' bönni' uyú bö'cu' xzila' na', ta'nné':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

¹⁶ La' yójacatië', ate' yójxáca'gaquië' María len José, enca' bí'ido' na', dëbi' tu lu yú'udo' ga tun chi'i le táguba' böa' quégaca bönachi yú'ugaca nõza. ¹⁷ Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queébi' bí'ido' na'. ¹⁸ Bulu'bani yúgu'të nupa bila'yöni didza' gulu'ë bönni' tu'yúé' bö'cu' xzila' na'. ¹⁹ María gulú'usö icja náganu didza' ni, ate' guzá ládxi'nu ca naca que. ²⁰ Söjhuójgaquië' bönni' na' tu'yúé'-ba' bö'cu' xzila', tunë' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipéla'bi' lë na' naca bë' néquibi' queë' Dios, ate' gulu'ë labi' Jesús ca na' chibé' cazë' labi' gubáz lá'ayi na' zí'alö cate' si' tsú'ubi' lé'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'ché'ë-bi' bí'ido' Jesús yödzo Jerusalén para ila'gu'ë-bi' lu në'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bönni'do' nácagacabi' bi'i zí'alö queënu xiná'agacabi', ulu'béajë'-bi' quez queë' Xanru' Dios." ²⁴ Que lë ni na' yójáquië' ni' para ilútië'-ba', en ila'gú'ë-ba' lahuë' Dios chópaba' gúgudo' o chópaba' budödu' ca na' rinná bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzo Jerusalén. Bönni' ni náquië' tsahui', en reaj ládxe'ë Dios. Ribözë' Bönni' na' isól-lë'ë Dios, Bönni' na' gácalenë'

bönachi Israel. Dios Bö' Lá'ayi zóalenë' Simeón na', ²⁶ en chibulu'finë' lë' biti' gátië' cate' ilé'erönë' Cristo, Bönni' na' isól-lë'ë Xanru' Dios. ²⁷ Bidxinë' Simeón na' chila yudo' tu' guché'ë Dios Bö' Lá'ayi lë' ni'. Cate' xuz xiná'abi' gula'ché'ë-bi' bí'ido' Jesús chila yudo' para ilunë' queébi' ca rinná bë' xibá na', ²⁸ ní'irö bunidë'-bi' Simeón na', en guyéaj ládxe'ë Dios, rnnë':

²⁹ Xana', na'a huáca gunnu' neda' lataj gátia', soa dxi ládxa'a tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usölá bönachi,

³¹ Nu na' ulú'u lahui lógaca yúgu'të bönachi.

³² Lëbi' nácabi' bení' le uzení' bönachi izá'a,

en nácabi' ca' bení' quégaca bönachi Israel quiu'.

³³ Bulu'báninë' José, en María, xiná'abi' bí'ido' Jesús, ca naca lë na' gunné' Simeón ca naca queébi' Jesús.

³⁴ Simeón na' gunábinë' Dios gunë' ga gaca dxi'a quégaquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi bönachi zían, ate' ulu'huóása bönachi zían ladaj bönachi Israel. Gácabi' tu le naca bë', ate' ila'nnë' bönachi queébi'. ³⁵ Gaca caní para ila'lá lahui le ta'zá ládxi'gaca bönachi zían. Yugu' lë ni ilaca quiu' ca tu guíë tuchi' le tsaza ládxi'do'o.

³⁶ Ana, nigula ru'ínu didza' uláz queë' Dios, zóanu ca' ni'. Nácanu zxí'inë' Fanuel, bönni' nababë' di'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', ³⁷ ate' bugáananu tuzi cate' bidxintë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládxi'nu-në'

Dios, runnu gubasa, en rulídzanu-né' Dios. ³⁸La' ná'asö bidxíntënu ni', rënu-né' Dios: "Xclenu." Gudíxjöi'ínu yúgu'të bönachi ca naca queébi' bí'ido' Jesús, bönachi na' nacua' Jerusalén, nupa ta'böza dza idxín Nu na' isó'l-lë'ë Dios para gácalen bönachi.

**Söjhuójgaquié' José, en
María yödzo Nazaret**

³⁹Gudödi guluné' José, en María yúgu'të le rinná bë' xibá queé' Xanru' Dios, yöjhuójgaquié' ládzaqaquié' Nazaret luyú Galilea. ⁴⁰Guzxönbi' bí'ido' Jesús, en bidipa ládxi'bi'. Guta' queébi' yöl-la' réajni'i, ate' zxön naca le ruzá' ládxi'ë queébi' Dios.

Rudxinbi' bí'ido' Jesús chila yudo'

⁴¹Yugu' iz röjáquié' xuz xiná'abi' Jesús Jerusalén cate' raca Laní Pascua, laní tu'subané' bönni' judío ca bené' Dios, bubéajé' xuz xtó'ogaquié' luyú Egipto. ⁴²Cate' chiyú'ubi' chinnu iz bi'i Jesús, yöjáquié' Jerusalén ca tun cazé' cate' raca laní na'. ⁴³Cate' gudödi laní, söjhuójgaquié', ate' bugá'anabi' bí'ido' Jesús Jerusalén, pero biti' téquibe'ené' José, en María, xiná'abi' Jesús. ⁴⁴Tu' téquiné' nútsa'bi' ladaj bönachi zían yú'ulengaca légaquié' nöza, tu dza nayá' gula'z'é. Ní'irö cate' bulu'guiljé'-bi' gapa nacua' di'a dza quégaquié', en gapa nacua' nupa núnbë'gaquié' ⁴⁵biti' bulu'dzöliné'-bi'. Que lë ni na' yöjhuójgaquié' Jerusalén, söjdljagaquié'-bi'.

⁴⁶Cate' chiguca dza bunny, bulu'dzöliné'-bi' ga naca chila yudo', ró'öbi' gatsaj láhui'lë' bönni' yudo' tu'sédiné'. Ruzé' nágabi' didza' tu'ë, en rinaba yúdxibi' légaquié'. ⁴⁷Bulu'bani yúgu'të nupa bila'yöni didza' bé'ëbi' ca naca yöl-la' réajni'i queébi', en ca nácagaca didza' bubí'ibi'. ⁴⁸Cate' bila'lé'ené'-bi' xuz xiná'abi',

bulu'bániné', ate' gúdxinu-bi' xiná'abi', rnnanu:

—Zxi'ina', ¿bizx que benu' caní queé-tu'? Buyútsöca', len yöl-la' ruúbi ruguf'i neda', en xuzu' buguúljatu' li'.

⁴⁹Ní'irö gúdxibi' Jesús légaquié', rnnabi':

—¿Bizx que buguúljali' neda'? ¿Naru' cabí nózili' run bayudxi guna' xichiné' Xuza'?

⁵⁰Biti' gula'yéajni'iné' xuz xiná'abi' didza' na' gúdxibi' légaquié'.

⁵¹Jesús bóajlenbi' légaquié', budxinbi' Nazaret, ate' benbi' ca rna xtídzagaquié' xuz xiná'abi'. María, xiná'abi' Jesús, gulú'usönu icja ládxi'do'onu yúgu'të lë ni. ⁵²Ráta'rö yöl-la' réajni'i queébi' bi'i Jesús, en rizxönbi'. Burúajbi' dxi'a lahué' Dios, en lógaca bönachi.

**Libán runé' Juan, bönni'
ruquilé' bönachi nisa**

(Mt. 3:1-12; Mr. 1:1-8; Jn. 1:19-28)

3 Cate' chiguca chinu iz rinná bé'ené' Tiberio César idütë yödzölió, rinná bë'ë Poncio Pilato luyú Judea, ate' Herodes rinná bë'ë ca' luyú Galilea. Felipe, bóché'ë Herodes na', rinná bë'ë luyú Iturea, en luyú Traconite, ate' Lisania rinná bë'ë luyú Abilinia. ²Yugu' dza na' nácagaquié' bixúz lo Anás, en Caifás, ate' la' ná'asö Dios bé'lené' Juan, zxi'iné' Zacarías, didza' cate' ni' zoé' Juan lu lataj cá'asö. ³Ridé' Juan ni yúgu'të lataj nacua' ra' yegu Jordán, runé' libán ca ral-la' ila'dila nisa nupa tu'bf'i ládxi'gaca para uniti lahué' Dios dul-la' nabága-gaca. ⁴Guca caní ca na' nazúaj lu guichi lá'ayi yugu' didza' bë'ë Isaías, bönni' bë'ë didza' uláz queé' Dios, rna:

Riyón chi'ë bönni' rulidzë' lu lataj cá'asö, rnné':

“Buli'pá'a nöza lu icja ládxi'do'oli' para idxín Xanru' queéli'.

Buli'béaj li yugu' nöza lasi ga tödë'.

⁵Ral-la' ulígaca yúgu'të gapa naca röga', en ulu'huóaca lachi' yúgu'të gu'fa sibi, en gu'ado'.

Ral-la' ulu'rúaj li nöza nayecja nab'igaca, ate' ulu'huóaca dxi'a nöza guiój.

⁶Ila'lé'eni yúgu'të bönachi Bönni' na' isól-lë'ë Dios, Nu usólá bönachi."

⁷Cate' bila'rúaj bönachi zían para ila'dila nisa lu në'ë Juan, lë' gudxë' légaquië':

—Libi'ili', di'a dza quégacaba' bëla sínia'. ¿Zoa nu buluf'i libí'ili' ral-la' izxúnajli' yöl-la' rusiúdxí si' gaca quégaca bönachi? ⁸Na'a, guli'gún le ilaca bë' chibubí'í ládxi'li', en bití' sa' ládxi'li', bití' innali': "Nácatu' tsahui' tu' nácatu' di'a dza queë' Abraham", tu' rea' libí'ili', huáca quelë'ë Dios yugu' guiój ni, en gunë' ga ulu'huóaca di'a dza queë' Abraham. ⁹Nácali' ca yugu' yaga. Chizóa riböza gufé huága para ichugu yugu' yaga. Yúgu'të yaga bití' ta'bía le naca dxi'a, ila'chúguië' yaga na', en ila'gu'ë léguequi lu gu'.

¹⁰Ní'irö bönachi nacua' ni' gula'nabi lë', ta'nná:

—¿Nacxi gúntsatu'?

¹¹Bubi'ë didza' Juan, rë' légaquië':

—Nu dë chopa cö' zxe ral-la' unödzej que nu bití' dë que, ate' nu dë le gagu, lësca' caní ral-la' quisi quégaca nupa bití' dë le ilágucaca.

¹²Bal-lë' bönni' tu'quixjë' lázagaca bönachi uláz que yödzö zí'tu' bila'dxinë' ca' ni' para ila'dilë' nisa, ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

¹³Juan gudxë' légaquië':

—Bití' uquízjaröli' tsca le chigunnë' bönni' yú'uli' lu në'ë.

¹⁴Bal-lë' bönni' rójáquië' gudil-la gula'nábinë' ca' lë', ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' bönachi para cúali' le dë quéguequi. Bíti'rö innëli' quégaca bönachi le cabí nácatë para gunli' ga ila'guizxaj libí'ili', pero guli'tsaza ládxi'li' tsca rázxcjali'.

¹⁵Ta'zá' ládxi'gaca bönachi na' ta'böza Bönni' na' ral-la' isól-lë'ë Dios, channö náquië' Juan na' Bönni' lë' Cristo. ¹⁶Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le ruluf'isö yöl-la' ridila nisa ni, ichízië' libí'ili' Dios Bö' Lá'ayi, en le naca gu' queë'. Bönni' ni náparë' yöl-la' unná bë' ca neda', ate' neda' bití' naca' lesaca' ilecja' le nudé'ë ni'e. ¹⁷Zönë' lu në'ë böcö' queë', ate' ulubë' ga rilubi zxoá' xtila queë', lë ni ruluf'i le gaca quégaca bönachi. Utubë' zxoá' xtila, en cu'ë le xilataj, pero bëbu que uzégui'ë lu gu' le catu caz ulu.

¹⁸Ca nácgaca didza' ni, en ia'zícara' rö zían didza' le guchízië' icja nágagaca bönachi, benë' libán Juan lógaquië' que didza' dxi'a. ¹⁹Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zían le ruá' dö. ²⁰Ní'irö benë' Herodes tu le nácarö huíá' dö', gulu'ë Juan na' lidxi gufé.

Ridíle' Jesús nisa

(Mt. 3:13-17; Mr. 1:9-11)

²¹Dza na' cate' cabí nadzunë' Juan lidxi gufé, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, gualaj lúzxiba, ²²ate' böjtjë' Dios Bö' Lá'ayi, bidxinë' ga na' zoë' Jesús. Buluf'i lahuë', rinë'ë ca riná' tuba' gu'dödo', ate' biyón chi'i Nu ru'fi didza' yehua' yubá, rnna:

—Li' nacu' Zxf'ina'. Nadxf'ida' Li', en raza ládxa'a Li'.

Yugu' xuz xinë'e gudödi queë' Jesús*(Mt. 1:1-17)*

²³ Cate' gusí lahuë' runë' xichinë' Jesús, yu'ë ca chi uruá' iz. Téquiguetqui bönachi náquië' zxf'inë' José. Jesús náquië' zxf'ini xi'sóë' Elí, nu na' náquië' xúzinu María, nigula queë' José na'.

²⁴ Elí na' gúquië' zxf'inë' Matat, nu ni guca zxf'inë' Leví, nu ni guca zxf'inë' Melqui, nu ni guca zxf'inë' Jana, nu ni guca zxf'inë' ia'tútë' José.

²⁵ José ni gúquië' zxf'inë' Matatías, nu ni guca zxf'inë' Amós, nu ni guca zxf'inë' Nahum, nu ni guca zxf'inë' Esli, nu ni guca zxf'inë' Nagai.

²⁶ Nagai na' gúquië' zxf'inë' Mat, nu ni guca zxf'inë' ia'tútë' Matatías, nu ni guca zxf'inë' Semei, nu ni guca zxf'inë' ia'tútë' José, nu ni guca zxf'inë' Judá.

²⁷ Judá na' gúquië' zxf'inë' Joana, nu ni guca zxf'inë' Resa, nu ni guca zxf'inë' Zorobabel, nu ni guca zxf'inë' Salatiel, nu ni guca zxf'inë' Neri.

²⁸ Neri na' gúquië' zxf'inë' ia'tútë' Melqui, nu ni guca zxf'inë' Adi, nu ni guca zxf'inë' Cosam, nu ni guca zxf'inë' Elmodam, nu ni guca zxf'inë' Er.

²⁹ Er na' gúquië' zxf'inë' Josué, nu ni guca zxf'inë' Eliezer, nu ni guca zxf'inë' Jorim, nu ni guca zxf'inë' ia'tútë' Matat.

³⁰ Matat na' gúquië' zxf'inë' Leví, nu ni guca zxf'inë' Simeón, nu ni guca zxf'inë' Judá, nu ni guca zxf'inë' ia'tútë' José, nu ni guca zxf'inë' Jonán, nu ni guca zxf'inë' Eliaquim.

³¹ Eliaquim na' gúquië' zxf'inë' Melea, nu ni guca zxf'inë' Mainán,

nu ni guca zxf'inë' Matata, nu ni guca zxf'inë' Natán.
³² Natán na' gúquië' zxf'inë' David, nu ni guca zxf'inë' Isaí, nu ni guca zxf'inë' Obed, nu ni guca zxf'inë' Booz, nu ni guca zxf'inë' Salmón, nu ni guca zxf'inë' Naasón.

³³ Naasón na' gúquië' zxf'inë' Aminadab, nu ni guca zxf'inë' Aram, nu ni guca zxf'inë' Esrom, nu ni guca zxf'inë' Fares, nu ni guca zxf'inë' ia'tútë' Judá.

³⁴ Judá na' gúquië' zxf'inë' Jacob, nu ni guca zxf'inë' Isaac, nu ni guca zxf'inë' Abraham, nu ni guca zxf'inë' Taré, nu ni guca zxf'inë' Nacor.

³⁵ Nacor na' gúquië' zxf'inë' Serug, nu ni guca zxf'inë' Ragau, nu ni guca zxf'inë' Peleg, nu ni guca zxf'inë' Heber, nu ni guca zxf'inë' Sala.

³⁶ Sala na' gúquië' zxf'inë' Cainán, nu ni guca zxf'inë' Arfaxad, nu ni guca zxf'inë' Sem, nu ni guca zxf'inë' Noé, nu ni guca zxf'inë' Lamec.

³⁷ Lamec na' gúquië' zxf'inë' Matusalén, nu ni guca zxf'inë' Enoc, nu ni guca zxf'inë' Jared, nu ni guca zxf'inë' Mahalalel, nu ni guca zxf'inë' ia'tútë' Cainán.

³⁸ Cainán na' gúquië' zxf'inë' Enós, nu ni guca zxf'inë' Set, nu ni guca zxf'inë' Adán, nu ni guca ca zxf'ini cazë' Dios.

**Satanás tu' xihui' ré'ëni
usubaga' Jesús dul-la'***(Mt. 4:1-11; Mr. 1:12-13)*

4 Buzé'ë Jesús ra' yegu Jordán, zóalenë' Dios Bö' Lá'ayi Lë', ate' Dios Bö' Lá'ayi na' guché'ë Jesús lu lataj cá'asö. ² Guzóë' Jesús ni' idú ca choá' dza, ate' gú'uni tu' xihui' usubaga' Jesús

dul-la'. Biti' bi gudahuë' Jesús yugu' dza na', ate' gudödi ni' ridunë'. ³Ní'irö tu' xihui' na' gudxi Jesús, rna:

—Channö naca cazu' Li' Zxí'inë' Dios, gunnátsöca' ulu'huóaca guió'j ni yöta xtila.

⁴Bubi'ë didza' Jesús, rë' le:

—Nazúaj lu guichi, rna: “Calégasö yöta xtila nabánigaca bönachi, pero nabánigaca ca' yúgu'të xtídzë'ë Dios.”

⁵Ní'irö guchë' tu' xihui' na' Jesús ga naca tu lu gu'fa sibi ate' tu ch'ído'osö buluf'i Lë' yúgu'të xilát'jagaca nupa ta'nná bë' yödzólió. ⁶Tu' xihui' na' rë Jesús, rna:

—Gunna' quiu' yúgu'të xilát'jagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu ré'ënisida' ruá'a que. ⁷Channö Li' uzóa zxibu' lahua', en gunu' neda' zxön, yúgu'të lë ni guequi quiu'.

⁸Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rna: “Xanu' Dios tseaj ládxu'u-në', en tuzë' Lë' gunu' xichinë'.”

⁹Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzu'tsöca' cuinu' ni ¹⁰tu' nazúaj lu guichi lá'ayi, rna: Dios isól-lë'ë gubáz lá'ayi queë, ilácalenë' Li'.

¹¹Lu ná'agaquië' ulu'chisé' Li' para cabí tsöjchégu'u guió'j, en biti' gunu' zí' ni'u.

¹²Bubi'ë didza' Jesús, rë' le:

—Nazúaj lu guichi lá'ayi le rë netu': “Biti' si' bë'u Xanu' Dios.”

¹³Cate' biti' budzöli tu' xihui' na' ia'tú le si' bë' Jesús, buzá' ga zoë' tu ch'ído'.

Risí lahuë' Jesús runë' xichinë' luyú Galilea

(Mt. 4:12-17; Mr. 1:14-15)

¹⁴Bóajë' Jesús luyú Galilea, dë lu në'ë yöl-la' huáca queë' Dios Bö' Lá'ayi. Guzé didza' ca naca queë', ate' bila'yöni bönachi nacua' yúgu'të yödzö idú gási-bi'ilö. ¹⁵Busédinë' Jesús bönachi gapa naca lu yu'u ga tu'dubë' tu'sëdë' bönni' judío queë' Dios, ate' yúgu'të bönachi gulún Lë' zxön.

Le benë' Jesús yödzö Nazaret, ga naca ladzë'

(Mt. 13:53-58; Mr. 6:1-6)

¹⁶Ní'irö budxinë' Jesús yödzö Nazaret ga ni' guzxönë'. Cate' bidxín dza lá'ayi quégaquië' bönni' judío, ca run cazë' Jesús, guyázië' lu yu'u ga tu'dubë' tu'sëdë' bönni' judío queë' Dios, ate' guzuínë' para ulabë' tu le nazúaj lu guichi lá'ayi. ¹⁷Bulu'dödë' lu në'ë Jesús guichi ga na' nazúaj didza' bë'ë Isafás, bönni' bë'ë didza' uláz queë' Dios. Cate' gusaljë' guichi na', budzólinë' ga nazúaj lu guichi le rna:

¹⁸Zóalenë' Bö' Lá'ayi queë' Xanru' neda' tu' nubéajë' neda' quez queë' para usiyönda' bönachi yechi' didza' dxi'a.

Gusól-lë'ë neda' para una' nupa raca zí' ládxi'do'guequi, en usiyönda' nupa nadzúngaca, ca gaca ulu'lágaca,

en úna' bönachi nachul-la lóguequi, en usölá' bönachi zoa nu run léguequi zí', ¹⁹en guna' libán que dza ruzá' ládxë'ë Xanru' Dios quégaca bönachi.

²⁰Ní'irö butubë' Jesús guichi na', en bugu'ë le lu në'ë bönni' rapa chi'ë yugu' guichi lá'ayi, ate' gurö'ë. Ní'irö yúgu'të nupa nudúbigaca lu yu'u na' gula'ná' Jesús. ²¹Gusí lahuë' Jesús rë' légaquië':

—Na'a dza ni zóali' lib'íli', rudxín caz le nazúaj lu guichi ni.

²² Yúgu'të' gula'nné' dxi'a queë', en bulu'báininé' ca naca didza' dxi'a ru'ë, ate' ta'nné':

—¿Naru' caléga bönni' ni zxf'iné' José?

²³ Jesús ré' légaquié', rnné':

—Nadxi huéli' neda' lë ni ta'nná bö-nachi, le rnna: “Li', bönni' ruún bö-nachi, bun cuinu'.” Lësca' caní huéli' neda': “Yugu' le biyónitu' benu' Capernaum, ben ca' ga ni naca ladzu'.”

²⁴ Gunné' ca' Jesús:

—Le nácatë rea' lib'ili', channö zoë' nu bönni' ru'ë didza' uláz queë' Dios, biti' tun bö-nachi uládz queë' lë' bal. ²⁵ Le nácatë rea' lib'ili', gula'cuá'anu zían nigula uzëbi luyú Israel yugu' dza ni' zoë' Elías, bönni' bë'ë didza' uláz queë' Dios, cate' ni' biti' gulaj guió'j idú ca tsonna iz yu' xopa beo', ate' guca gubín luyú na', ²⁶ pero Dios biti' gusól-lë'ë Elías na' ga nacua'anu nigula uzëbi nabábagacanu Israel, pero gusól-lë'ë lë' ga na' zóanu tu nigula uzëbi lu yödzö Sarepta, le nababa yödzö Sidón. ²⁷ Lësca' caní, gula'cuá' zían nupa te'e huë' nudzu' ruzödi luyú Israel dza ni' zoë' Eliseo, bönni' bë'ë didza' uláz queë' Dios, pero biti' böáquié' nu bönni' nútsé'ë ladaj bö-nachi Israel na', pero böáquié' tuzë' Naamán, bönni' nababë' luyú Siria.

²⁸ Cate' bila'yönné' didza' ni, gula'lené' yúgu'të bönni' nacué' lu yu'u ga na' tu'dubé' tu'sédé' queë' Dios. ²⁹ Ní'irö gula'yasë', en bulu'béajë' Jesús ní'ilö ra' yödzö. Gula'ché'ë Lë' ga naca lë'e gu'fa guió'j ga na' dë ládizagaquié' para ulu'suládzuë' Lë' ga naca lë'e gu'fa guió'j na'. ³⁰ Ní'irö gudödë' Jesús gatsaj láchui'lö ga na' nacué', söhuóajtë'.

Tu bönni' yu'u lë' bö' xihui'

(Mr. 1:21-28)

³¹ Ní'irö guyijë' Jesús yödzö Capernaum luyú Galilea, ate' busédinë' bö-nachi yugu' dza lá'ayi quégaquié' bönni' judío. ³² Bulu'báininé' ca naca le ruséd-

inë' Jesús légaquié', tu' bë'ë didza' ca tu bönni' dë lu në'ë yöl-la' unná bë'.

³³ Zóatë' ca' tu bönni' yu'u lë' bö' xihui' lu yu'u ga na' tu'dubé' tu'sédé' queë' Dios, ate' bë'ë zidzaj didza', ³⁴ rnné':

—¿Busán netu'! ¿Bizxi rála'tu' quiu', Jesús, bönni' Nazaret? ¿Naru' zo'o para usunítu' netu'? Núnbë'a Li' Nu nacu'. Bönni' Lá'ayi queë' Dios nacu'.

³⁵ Jesús buzené' le bach bö' xihui' na', en ré' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca bö-nachi nacua' ni'. Burúajtë lu bönni' na', en bítirö bi ben queë'.

³⁶ Bulu'báininé' yúgu'të', en gulu'ë didza' tuë' len ia'túë', ta'nné':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bé'ené' yugu' bö' xihui', ate' tu'rúajtë bö' xihui' na'.

³⁷ Guzë' didza' ca naca queë' Jesús, ate' bila'yöni bö-nachi yúgu'të yödzö idú gásibi'ilö.

**Ruúnë' Jesús xiná'anu
nigula queë' Pedro**

(Mt. 8:14-15; Mr. 1:29-31)

³⁸ Ní'irö guyasë' Jesús, en burúajjë' lu yu'u ga na' tu'dubé' tu'sédé' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' gulá'tayuë' lahuë' Jesús únë'-nu. ³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

Ruúnë' Jesús zían nupa te'e

(Mt. 8:16-17; Mr. 1:32-34)

⁴⁰ Cate' chiribía gubidza, yúgu'të nupa nacua'len léguequi nupa na' te'e que queé'güequi yödzhuë' bila'dxín ni', ate' dujuá'gaca léguequi ga na' zoë' Jesús. Lë' guxó'a në'ë nupa na' te'e, en bunë' léguequi. ⁴¹ Bulu'rúaj ca' zían bö' xihui' yú'u-

gaca bönachi te'e na'. Ta'bódxia bö' xihui' na', ta'nná:

—Li' nacu' xzí'inë Dios.

Ní'irö Jesús buzenë' le bach yugu' bö' xihui' na', en bití' bē'ë lataj ila'nná, tu' nóziguequi náquië' Cristo.

Runë' Jesús libán luyú Galilea

(Mr. 1:35-39)

⁴²Cate' za' rení' ia'tú dza, burúa-jë' Jesús Capernaum na', ate' guyijë' tu lataj cá'sö. Bila'dxín bönachi zían ni', tu'guflaj Jesús. Cate' bila'dxinë' ga na' zoë', gulé'ëniaguequinë' ulu'tsenë' Lë', para cabí uzé'ë ga na' nacu'ë. ⁴³Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zica'rö yödzö, tsöjena' ca' libán ni' que didza' dxi'a ca rinná bē'ë Dios. Que lë ni na' gusól-lë'ë neda' ni.

⁴⁴Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sedë' queë' Dios.

Ta'dzunba' böla zían

(Mt. 4:18-22; Mr. 1:16-20)

5 Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quída' bönachi zían Lë' para ila'yöni xtídzë'ë Dios. ²Ní'irö bilé'enë' Jesús chopa bárcodo', zxóagaca lu nísado' ga na' naca ra' yu bidxi, ate' narúaj-gaquië' bönni' uzxón böla lé'egaca bárcodo' na', en ta'guibë' yöxaj böla quégaquië'. ³Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'látí'do' zí'tu' ga naca ra' yu bidxi na'. Ní'irö gurö'ë Jesús lë'e bárcodo' na', en ró'ösë' ca' ni' rusédinë' bönachi zían nacuá' lu yu bidxi na'. ⁴Cate' budxi bē'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rō'ö zila, ate' ni' gulí'zalaj yöxaj böla queéli' para sönlí'-ba' böla.

⁵Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en bití' bi böla nazónitu'-ba', pero didza' quiu' izáljagara' yöxaj.

⁶Cate' chigula'zaljë' le, gula'zönë' zióntëröba' böla, ate' réquitiqui' iröza' yöxaj böla na'. ⁷Ní'irö bulu'lá'a bulu'luf'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huótaj bárcodo' na' lu nisa. ⁸Cate' bilé'enë' Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹Caní gunné' tu' radxi ridzóbinë' Pedro ni'a quégacaba' böla zían na' gula'zóngaqueië'-ba', en lësca' caní guca quégaca nupa nacuá'len lë'. ¹⁰Guladxi gula'dzóbinë' ca' Jacobo, en Juan, yugu' xzí'inë' Zebedeo, nupa ni nácagaca luzé'ë Simón Pedro na'. Ní'irö Jesús rë' Simón na', rnnë':

—Bití' gádxinu'. Na'a isí lo' ichë'u quia' bönachi ca runu' rizönu'-ba' böla.

¹¹Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' söjácalenë' Jesús.

Ruúnë' Jesús tu bönni' ré'enë' huë' nudzu' ruzödi

(Mt. 8:1-4; Mr. 1:40-45)

¹²Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en gúta'yue' lahuë', rnnë':

—Xan, channö ré'ënu', huáca unu' neda'.

¹³Ní'irö bulí nē'ë Jesús, en gudanë' lë'. Rë' lë':

—Ré'ënda'. Gacu' dxi'a.

La' gubídxitë huë' nudzu' queë' bön-ni' na'. ¹⁴Ní'irö Jesús gunná bé'enë' lë' cuntu nu guíë' ca'. Gudxë' lë':

—Guyéaj, yöjlu'í' cuinu' lahuë' bixúz, ate' yöjndözaj que yudo' le rulu'í' nuhuóácu' dxi'a ca gunná bé'ë Moisés, lë' na' ulu'í' légaquië' chibóácu'.

¹⁵Guzëtërö didza' que yöl-la' huáca queë' Jesús, ate' bulu'dubi bönachi zían ga na' zoë' para ila'yöni xtdzë'ë, en para ünë' léguequi, ugüë' yödzöhuë' té'eguequi. ¹⁶Ní'irö buzë'ë Jesús ni', en guyijë' tu lataj cá'asö, ate' ni' bulidzë' Dios.

**Ruúnë' Jesús tu bönni'
huë' nacú'unië' bin**

(Mt. 9:1-8; Mr. 2:1-12)

¹⁷Ia'tú dza, cate' ni' rusédinë' Jesús bönachi, ró'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bé' dë lu në'ë Jesús yöl-la' huáca queë' Xanru' Dios tu' ruúnë' bönachi te'e nacua' ni'. ¹⁸Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. ¹⁹Cate' biti' gula'dzólinë' nacxi ilunë', tu' nacua' bönachi zían ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bön-ni' huë' na', ate' gula'guixjë' lë' gatsaj láhui'lö bönachi ni' lahuë' Jesús. ²⁰Cate' gúquibe'enë' Jesús ca na' ta'yéajlë'ë Lë', gudxë' bönni' huë' na':

—Bönni', yugu' dul-la' nabágu'u chibuníti lahua'.

²¹Ní'irö gula'sí lógaquië' ta'zá' ládxi-i'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzë' Dios runiti lahuë' dul-la'.”

²²Réquibe'enë' Jesús le ta'zá' ládxi-gaquië', ate' rë' légaquië':

—¿Bizx que rizá' ládxi'li' caní? ²³Biti' naca böniga nu guiésö bönni' ni: “Yugu' dul-la' nabágu'u chibuníti lahua'”, pero naca böniga nu gun ga chasë', en së'e ni'ë. ²⁴Guna' ga inózili' dë lu na'a neda', Bönni' Guljë' Bönachi, yöl-la' unná bé' uniti lahua' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

²⁵La' guyásatë' bönni' huë' na' lógaquië', ate' bu'ë lë na' gúti'në', en söhuójë' lidxë', rigu'ë Dios yöl-la' ba. ²⁶Gula'nítitiqui'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

Jesús rulidzë' Leví

(Mt. 9:9-13; Mr. 2:13-17)

²⁷Gudödi gulaca yugu' lë ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquízxjë', ate' Jesús rë' lë':

—Gudá' neda'.

²⁸La' guyásatë' Leví, ate' bucá'anë' yúgu'të, en sa'yéajlenë' Jesús.

²⁹Gudödi ni' benë' Leví na' tu güf'i huagu queë' Jesús ga naca lu yu'u lidxë', ate' gula'cu'ë zían bönni' uquízxaj ni' len ia'bal-lë' bönni' ta'bó'lenë' légaquië' tahuë'. ³⁰Ní'irö bönni' yudo' tu'sédinë' len yugu' bönni' yudo' fariseo gula'n-né' quégaquië' bönni' usëda queë' Jesús, ta'nnë':

—¿Bizx que rë'aj rágulenli' yugu' bön-ni' uquízxaj, en ia'zica'rë' bönni' dul-la'?

³¹Bubi'ë didza' Jesús, rë' légaquië':

—Yugu' bönni' nacú'ë dxi'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. ³²Za'a, calëga ulídzagaca'në'

bönni' tsahui', pero za'a ulídzagaca'-në' bönni' dul-la' para ulu'bí'i ládxi'gaquië'.

**Ta'nábinë' Jesús ca naca
que yöl-la' run gubasa**

(Mt. 9:14-17; Mr. 2:18-22)

³³Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zían luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' tē'aj tahuë'?

³⁴Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'? ³⁵Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

³⁶Ní'irö bucúdzü'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udé'ë lë'e lari' tēbi. Channö gunë' caní, calé-gasö gaca ditaj lari' cubi na', pero lári'do' na' birúaj lë'e lari' cubi na' bití' tsöjlóza lari' tēbi na'. ³⁷Lësca' caní, cuntu nu bönni' rigué'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. ³⁸Que lë ni na' ral-la' cá'aru' xisi uva cubi lu buzudi guídi cubi, ate' iró-patë ilaca chí'i. ³⁹Channö zoa nu rē'aj xisi uva gula, bití' gué'ënitë gu'aj xisi uva cubi, tu' rna: "Nácarö sizxí' xisi uva gula na'."

**Bönni' usëda queë' Jesús
ta'lecjé' do xzoa' xtila dza lá'ayi**

(Mt. 12:1-8; Mr. 2:23-28)

6 Cate' naca tu dza lá'ayi quégaquië' bönni' judío, ridödë' Jesús gapa dë yöla xzoa' xtila, ate' bönni' usëda queë' ta'lecjé' do ga dxía xzoa' xtila.

Ta'zxúbi'ni ná'agaquië' le, en tahuë'. ²Ní'irö gula'nábinë' bönni' yudo' fariseo légaquië', ta'nnë':

—¿Bizx que runli' le cabí ral-la' gunru' dza lá'ayi?

³Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'? ⁴Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' bití' ral-la' gáguru', pero tuz bixúz dë lataj ilahuë', ate' gudahuë' David le, en bē'ë ca' quéguequi nupa nacuá'len lë'.

⁵Ní'irö Jesús gudxë' légaquië', rnnë':

—Neda', Bönni' Guljé' Bönachi, naca' xani dza lá'ayi.

Tu bönni' narequi' në'ë

(Mt. 12:9-14; Mr. 3:1-6)

⁶Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sëdë' queë' Dios, en buséd-inë' nupa nacuá' ni'. Zoë' ca' tu bönni' ni' narequi' në'ë ibëla. ⁷Yugu' bönni' yudo' tu'sëdinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. ⁸Réquibe'enë' Jesús le ta'zá' ládxi'gaquië', ate' gudxë' bönni' na' narequi' në'ë, rnnë':

—Guyasa. Guzuf gatsaj láhui'lö ni.

La' guyásatë' bönni' na', guzuínnë'. ⁹Ní'irö Jesús gudxë' yugu' bönni' yudo' na', rnnë':

—Unábitsöqui'da' lib'íli' tu didza'. ¿Naru' dë lataj cate' naca dza lá'ayi gunru' le naca dxí'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o uguáru' le?

¹⁰Ní'irö buyúë' Jesús yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí ně'ě bönni' na', ate' la' böäcatë ně'ě na'. ¹¹ Ní'irö gula'lenë' bönni' yudo' na', ate' gulún xtídza'gaquië' la' lé'gcasë' naxci bi ilunë' queë' Jesús.

**Ribõë' Jesús chínnuë' bönni'
ilácgauqië' gubáz queë'**

(Mt. 10:1-4; Mr. 3:13-19)

¹² Dza ni' guyijë' Jesús ga naca tu lu gu'ado'. Bulidzë' Dios ni', ate' idú yëla bé'lenë' Dios didza'. ¹³ Cate' za' rení', bulidzë' yugu' bönni' dá'gaquië' Lë', ate' guróë' chínnuë' para iláquië' gubáz queë'. ¹⁴ Bulidzë':

Simón, (lë' ca' Pedro),
Andrés, (bóchë'ë Pedro),
Jacobo, en Juan, en Felipe, en
Bartolomé,

¹⁵ Mateo, en Tomás,
Jacobo, (zxf'inë' Alfeo),
Simón, (bönni' ru'í ládë'ë yödzo queë'),

¹⁶ Judas, (bóchë'ë Jacobo),
en Judas Iscariote, (bönni' udödë' Jesús
lu ná'agaquië' bönni' ilútië' Lë').

Ruúnë' Jesús bönachi zían

(Mt. 4:23-25)

¹⁷ Jesús bótjalënë' yugu' bönni' gubáz queë' na' lu gu'ado' na', ate' bila'dxinë' tu ga naca lachi', ga ni' nacué' zíanrö ca' bönni' usëda queë', ate' nacué'len lé'gaquië' bönachi zían narúajgaca yúgu'të yödzo luyú Judea, en yödzo Jerusalén, en yugu' yödzo'do' dé'gaca ra' nísado' ga na' nacué' yödzo Tiro, en yödzo Sidón. Bila'dxín bönachi ni ga ni' para ulu'zé ná'gagaca xtídzë'ë Jesús, en ulu'huöáca lu yödzo'hué' té'eguequi. ¹⁸ Bulu'huöáquië' ca' bönni' ni' ta'gu'í ta'záquië' lu ná'agaca bö' xihui'. ¹⁹ Yúgu'të bönachi zían na' tu'í ládxi'gaca ila'gán Jesús tu' ruúnë' lé'guequi len yöl-la' huáca queë'.

**Nupa nácgaca bica' ba, en
nupa nácgaca bica' bayechi'**

(Mt. 5:1-12)

²⁰ Ní'irö buyúë' Jesús yugu' bönni' usëda queë' nacué' ni', en gudxë' lé'gaquië':

—Bica' ba lib'íli', réquibe'eli' riyadz-jali' le naca queë' Dios, tu' gata' queé'li' lataj ga rinná bé'ë Dios.

²¹ 'Bica' ba lib'íli' ridunli' le gunné' Dios queé'li', tu' huóljali'.

'Bica' ba lib'íli' ribódxili' tu' bi nadé'li' le naca tsahui', tu' huadxín dza uzxídxili'.

²² 'Bica' ba lib'íli', tu' za' dza cate' biti' ila'lé'e bönachi lib'íli' dxi'a, en ulu'béaj lib'íli' ga nacué', en ila'nné' zí' queé'li', en ulu'cá'ana cá'asö le naz'í lali' ca tu le naca xihui' tu' dá'ali' neda', Bönni' Guljë' Bönachi. ²³ Buli'sí' xibé dza na', en buli'dzeja, tu' naca zxon le guequi queé'li' yehua' yubá. Lësca' caní gulunë' xuz xtó'ogaca bönachi ni quégaquië' bönni' gulu'ë didza' uláz queë' Dios.

²⁴ 'Bica' bayechi' lib'íli', dë yöl-la' tsahui' queé'li', tu' chidé le ruz'íli' xibé.

²⁵ 'Bica' bayechi' lib'íli' nuhuólaj nudzé'eli' na'a, tu' huadunli'.

'Bica' bayechi' lib'íli' ruzxídxili na'a, tu' hu'ínili', en cödxí yéchi'li'.

²⁶ 'Bica' bayechi' lib'íli' ta'nné' yúgu'të bönachi dxi'a queé'li'. Lësca' caní gulunë' xuz xtó'oli', gula'nné' dxi'a qué'gaquië' bönni' gula'z'í yë'ë, gula'nné' nácgauqië' bönni' tu'ë didza' uláz queë' Dios.

**Ral-la' idxí'iru' nupa
biti' ta'lé'e rë'u dxi'a**

(Mt. 5:38-48; 7:12)

²⁷ Gunné' ca' Jesús:

—Lib'íli' zóali' ni, en riyónili' xtídz'a'a, rea' lib'íli': Guli'dxi'í nupa biti' ta'lé'e lib'íli' dxi'a. Guli'gún le naca dxi'a qué'gaca nupa tu'd'í lib'íli'. ²⁸ Guli'nabi

Dios gaca dxi'a quégaca nupa tua' dö' queéli', en buli'lidzë Dios inábili'-në' gácalenë' nupa ta'nné' zi' queéli'. ²⁹ Channö nu capa' tsölá'a xagu', buzé' ia'tsölá'a ca' xagu'. Channö nu cúa lari' naxóa cúdzu'u, bë' lataj cúa ca' xzo'. ³⁰ Núti'tës nu bi inaba le dë quiu', bunödzej que, ate' nu cúa le nequi quiu', biti' unabu' le. ³¹ Ca ré'ënili' ilún bönachi queéli', lësca' caní guli'gún quéguequi.

³² Channö nadxf'isili' nupa nadxf'i-gaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxf'inë' nupa nadxf'iguequi légaquie'. ³³ Channö runli' le naca dxi'a quégacasö nupa tun dxi'a queéli', ¿bizxi yöl-la' ba idéli'li'? Lësca' caní tunë' bönni' dul-la'. ³⁴ Channö runódzjali' quégaca nupa runli' löza ulu'bf'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzejë' quégaca nupa tun dul-la', tu' tunë' löza ulu'bf'i quégaquie' lë na' bulu'nödzejë'. ³⁵ Neda' rea' libí'ili': Guli'dxf'i nupa biti' ta'lé'e libí'ili' dxi'a, en guli'gún le naca dxi'a. Buli'nödzej quégaca bönachi sal-la' biti' runli' löza nu ub'i queéli'. Channö caní gunli', zxön naca le gata' queéli', ate' gácali' zxf'ini cazë' Dios, Nu nácatëro lo, tu' runë' Lé' le naca dxi'a quégaca bönachi biti' ta'yaza ládxi'-gaca, en quégaca bönachi tuá' dö'. ³⁶ Buli'huéchi' ládxi'li' bönachi ca na' runë' Xúzili' Dios, ruhuéchi' ládxe'ë yúgu'të bönachi.

**Biti' ral-la' ichugu
bé'ëru' que luzá'aru'**

(Mt. 7:1-5)

³⁷ Gunné' ca' Jesús:

—Biti' ichugu bé'ëli' que luzá'ali', ate' cuntu nu ichugu bë' queéli'. Biti' cuéaj bé'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ili'. ³⁸ Buli'nödzej que luzá'ali', ate' Dios gunné' queéli'. Ulu'nödzejë' queéli' le ulu'rixë' len tu

guf'ina ribixi le naca idú, le naguirö, en naguí gate ga rë', en zóatica' gubá. Ca naca le rurixili', la' cá'asö urixë' Dios ca' queéli'.

³⁹ Bucúdu'ë didza' Jesús, rë' légaquie':

—¿Naru' huácatsö nu bönni' lo chulla ichë'ë ia'tuté' bönni' lo chul-la? Biti' ca' gaca, tu' ila'bxë' iropë' tu lu yeru. ⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquie' ca naca nu na' rusëdi lë'.

⁴¹ ¿Bizx que ruyú' bébudo' yu'u guió'j lahuë' böchi' luzó'o, en biti' rilé'enu' le zxön yu'u guió'j lo cazu'? ⁴² ¿Naru' huácatsö guío'-në' böchi' luzó'o: “Bócha'a, benna lataj cueja' bébudo' yu'u guió'j lo”, en biti' rilé'enu' le zxön yu'u guió'j lo cazu'? Li', bönni' rulu'f'isö tsahui' cuinu', guléaj zí'alö le zxön yu'u guió'j lo cazu', ate' ní'irö ilé'enu' dxi'a para cueju' bébudo' yu'u guió'j lahuë' böchi' luzó'o.

Le runru' naca bë' le nácaru'

(Mt. 7:17-20; 12:34-35)

⁴³ Gunné' ca' Jesús:

—Tu yaga dxi'a biti' cuía le naca cá'asö. Lësca' caní, tu yaga gu'á biti' gaca cuía le naca dxi'a. ⁴⁴ Caní naca, le ribía tu yaga naca bë' ca naca yaga na'. Biti' ruchíbiru' le ribía yaga higo lu yaga yötsi', en calëga lu bisequi' yötsi' biti' ruchíbiru' le ribía lubá uva. ⁴⁵ Tu bönni' dxi'a ru'ë didza' dxi'a tu' yu'u le naca dxi'a icja ládxi'da'ahuë', ate' didza' xihui' ru'ë bönni' xihui' tu' yu'u icja ládxi'da'ahuë' le xihui'. Rinné ruá'aru' ca naca le yu'u icja ládxi'do'oru'.

Chopa ca gaca cuéquiru' xilibi yu'u

(Mt. 7:24-27)

⁴⁶ Gunné' ca' Jesús:

—¿Bizx que rulídzali' neda', rnnali': “Xantu', Xantu'”, pero biti' runli' ca rinná bé'eda' libí'ili'? ⁴⁷ Ulu'ida' libí'ili' ca naca nu na' za' quia', en riyöni

xtídza'a, en run ca rna xtídza'a. ⁴⁸Nu ni naca ca tu bönni', cate' benë lidxë', guchó'önë' ga rë', en guléquië' xilibi yu'u ga naca lu guió'j. Cate' bötaj yegu gubó'o, guchó'óna cuita yu'u na', pero biti' guca uquínaj le, tu' nulibi ga naca lu guió'j. ⁴⁹Na'a, nu riyóni xtídza'a, en biti' run ca rna, nu ni naca ca tu bönni' benë' lidxë' ga naca lu yu cá'asö. Biti' benë' xilibi. Cate' guchó'óna yegu gubó'o cuita yu'u na', la' biguínajtë, ate' gubixi dërö zö'ö que.

**Jesús ruúnë'-bi' bi'i huen dxin
queë' tu bönni' unná bë'**

(Mt. 8:5-13)

7 Cate' Jesús budxi bé'lenë' légaquië' didza' ni, guyázië' yödzo Capernaum. ²Lu yödzo ni' zoë' tu bönni' Roma rinná bé'enë' bönni' rójáquië' gudil-la. Zóabi' bi'i huen dxin queë' nadxi'ide'enë'-bi', ate' bi'i ni ré'ebi', en chirequi gátibi'. ³Cate' biyönnë' bönni' ni didza' tu'ë bönachi ca naca queë' Jesús, la' gusól-la'të' bal-lë' bönni' gula tu'zéajni'inë' bönni' judío ga na' zoë' Jesús, tsójóta'yugaquië' lahuë' Lë' guidé' uduhuénë'-bi' bi'i huen dxin queë' na' ré'ebi'. ⁴Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú ládxi'gaquië', ta'nnë':

—Náquië' lesaca' bönni' na' gunu' queë' lë ni, ⁵tu' runë' bal bönachi uládz queëru', en benë' tu yu'u queëru' ga rudúbiru' rusédaru' queë' Dios.

⁶Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusól-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': "Biti' uguí'inu', tu' cabí naca' lesaca' tsáziu' lidxa', ⁷en biti' naca' lesaca' guída' ga zu'. Que lë ni na' biti' burúguida' guída' ga zu'. Bé'ësö didza', ate' huóacatébi' bi'i huen dxin quia'. ⁸Neda' ca', zoa nu rinná be'e neda', ate' nacu'ë ca'

bönni' rójáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túte': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'."

⁹Cate' biyönnë' Jesús didza' ni, bubán-inë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' lib'ili', cuntu nu bönni' Israel biti' rójáqui'da'-në' réajlë'ë quia' ca réajlë'ë quia' bönni' ni.

¹⁰Cate' bulu'dxinë' bönni' na' gusól-lë'ë bönni' rinná bé'enë' bönni' rójáquië' gudil-la, gula'yázië' ga naca lu yu'u lidxë', en bila'lë'enë' chiböacabi' bi'i huen dxin na'.

**Jesús rusubanë'-bi' bi'i bönni'
queënu tu nigula uzëbi'**

¹¹Gudödi guca lë ni, sa'yéajë' Jesús yödzo Naín, ate' dzágagaquië' bönni' usëda queë' Lë', len bönachi zían. ¹²Cate' bidxinë' gala' ra' yödzo na', bilé'enë' yugu' bönni' nuá'agaquië'-bi' tubi' bi'i bönni' nati. Sójcáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zían bönachi uladza queënu nigula uzëbi na' sójacalen-nu. ¹³Cate' Xanru' bilé'enë'-nu, buéchi' ládxë'ë-nu, ate' gudxë'-nu:

—Bíti'rö cödxu'.

¹⁴Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunné':

—Bi'ido', li' rea', guyasa.

¹⁵Ní'irö bubanbi'. Guró'öbi' bi'i na' zí'alö nátibi', ate' gusí lobi' ru'í'ibi' didza'. Jesús budödë'-bi' lu ná'anu xiná'abi'. ¹⁶Cate' bönni' ni' bila'lë'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

¹⁷ Guzé didza' ca naca yöl-la' huáca queé' Jesús, ate' bila'yóni bönachi yúgu'té yödzo luyú Judea, en yúgu'té yödzo idú gásibi'ilö.

**Le rinabè' Juan, bönni'
buquilè' bönachi nisa**

(Mt. 11:2-19)

¹⁸ Bönni' dá'gaquié' Juan gula'guixjoi'iné' lè' yúgu'té lè ni runé' Jesús. Ni' yu'è Juan lidxi gufé, bulidzè' chopè' bönni' na' dá'gaquié' lè, ¹⁹ ate' gusól-lè'è légaquié' ga na' zoé' Jesús para ila'nábiné' Lè', ila'nné': "¿Nacu' Li' Cristo, bönni' ral-la' guidé', o naru' ral-la' cöztu'-né' bönni' yúbölö?" ²⁰ Cate' bila'dxiné' bönni' na' nasól-lè'è Juan ga na' zoé' Jesús, té' Lè':

—Juan, bönni' buquilè' bönachi nisa, nasól-lè'è netu' para inábitu' Li', in-natu': "¿Nacu' Li' Cristo, bönni' na' ral-la' guidé', o naru' ral-la' cöztu'-né' bönni' yúbölö?"

²¹ La' ná'asö ruúné' Jesús zían nupa te'e, yugu' bönni' hué', en bönni' yú'u-gaca légaquié' bö' xihui', ate' zían bönni' lo chul-la busaljé' guió'j lógaquié'. ²² Bubi'è didza' Jesús, ré' chopè' bönni' na' nasól-lè'è Juan, rnné':

—Guli'tséaj, guli'tsöjtjxjoi'i-né' Juan ca naca le bilé'eli', en le biyónili'. Tu'lé'ené' bönni' guchul-la lógaquié'. Tu'zé'è bönni' gulatsjé'. Nuhuóacagaquié' bönni' güfiguequiné' hué' nudzu' ruzödi. Tu'yónné' bönni' gula'códzué'. Nubángaquié' bönni' gulatié'. Ta'yónné' bönni' yechi' didza' dxi'a. ²³ Bica' ba nu biti' gaca chopa ladxi', ate' za'len neda' sal-la' biti' runa' ca réqui nu na' ral-la' guna'.

²⁴ Cate' bönni' na' gusól-lè'è Juan bulu'zé'è ni', gusi' lahué' Jesús rulu'finé' bönachi ni' ca naca queé' Juan na', rnné':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? ²⁵ ¿Bizxi caz birúa-

jli' yöjyuli'? ¿Naru' birúajli' yöjyuli'-né' tu bönni' nácué' lari' nazáca'de'e? Nöz quézili' nupa nácué'ca lari' nazáca'de'e, en tu'zi' xibé yöl-la' tsahui', nacua' lédxigaquié' bönni' ta'nná bé'è. ²⁶ ¿Bizxi caz birúajli' yöjyuli'? ¿Naru' birúajli' yöjyuli'-né' tu bönni' ru'è didza' uláz queé' Dios? Ön, rea' lib'ili', ate' nayépisètèrè' ca nu ru'fi didza' uláz queé' Dios. ²⁷ Náquié' Juan bönni' na' nazútaj lu guichi lá'ayi ca naca queé', rna: Buyútsöca', risól-la'a-né' gubáz quia', in-órué' ca Li'.

Bönni' ni uchi'è nöza ga tödu'.

²⁸ 'Neda' rea' lib'ili': Gapa nacua' bönachi, channö zoé' nu bönni' ru'è didza' uláz queé' Dios, biti' nácaré' lo ca Juan, bönni' na' buquilè' bönachi nisa, pero nu nácatèrö cuídi'sö ga rinná bé'è Dios nayépisètèrö ca Juan na'.

²⁹ Cate' bönachi ni', en bönni' tu'quixjé' lázagaca bönachi bila'yónné' didza' ni bé'è Juan, guléquibe'ené' le naca tsahui' lahué' Dios, en bila'dilé' nisa lu né'è Juan, ³⁰ pero yugu' bönni' yudo' fariseo, en bönni' yudo' tu'sédiné' xibá queé' Moisés biti' bila'dilé' nisa lu né'è Juan, ate' caní guca, bulu'cá'ané' cá'asö le gú'unné' Dios guné' quégaquié'.

³¹ Gunné' ca' Xanru':

—¿Nacxi uséqui'tseda' bönachi nacua' dza ni zóaru' na'a? ¿Nacxi caz nácué'ca? ³² Nácué'ca ca bí'ido' ta'guít-jabi'. Ta'bó'öbi' lu yé'eyi, en ta'bó'dx-i'abi'. Ta'nnabi' tubi' ia'tubi': "Rucódx-itu' queéli' gui, pero biti' ruyá'ali'. Rul-la yéchi'tu', pero biti' ribódxili'."

³³ Caní nácali' tu' bidé' Juan, bönni' buquilè' bönachi nisa, en biti' gudahué' yöta xtila, en biti' gu'è xisi uva, ate' rnnali' queé': "Tu' xihui' dzaga lé'." ³⁴ Cate' bida' neda', Bönni' Guljé' Bönachi, en ré'aj rahua', rnnali' quia': "Bönni' ni náquié' bönni' huágulè'è, en bönni' re'jé'. Náquié' luzá'agaquié' bönni' tu'quixjé', en ia'zica're' bönni' dul-la'."

³⁵ Rea' lib'i'ili': Naca bë' nupa nápagaca yöl-la' réajni'i queë' Dios ni'a que le túngaca.

**Le benë' Jesús lidxë' tu
bönni' yudo' fariseo**

³⁶ Tu bönni' yudo' fariseo bulidzë' Jesús gágulenë' lë' tsözxón, ate' guyáz-ië' Jesús lidxë' bönni' na', en gurö'ë rahuë'. ³⁷ Zóanu lu yödzo na' tu nigula udá dzaga, en cate' nózinu rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu bóga'do' néquini guiój nazaca' le yudzu tu le rilá' zixi. ³⁸ Cate' bidxinnu zaca' cúdzu'lë' Jesús, guró'önu xini'ë ribódxinu. Ní'irö gusí lonu rigú'unu nisa ribódxinu ni'ë Jesús, en ruzxinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zixi. ³⁹ Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquië'enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

⁴¹ Jesús rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazjé' que chopa iz, ate' ia'túë' na' ral-lë'ë queë' lazjé' que chopa beo'. ⁴² Tu' cabí dë quégaquië' dumí ulu'guízxjé' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxi'irönë' bönni' na' buniti lahuë' légaquië'?

⁴³ Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesús gudxë' lë':

—Le nácasö rno'.

⁴⁴ Ní'irö buécjë' Jesús, ate' ni' ruyúë'-nu nigula na', rë' Simón:

—¿Naru' rilé'enu' nigula ni? Guyázia' lidxu', ate' biti' bennu' quia' nisa quívida' ni'a, pero nigula ni gulú'unu ni'a nisa ribódxinu, en buzzinu ni'a len guitsa' ícjanu. ⁴⁵ Biti' butsaga lonu neda', pero cate' bidxíntea' lidxu', biti' ruzóa dxinu nigula ni, rutsaga lonu ni'a. ⁴⁶ Biti' gulú'u icja' le za, pero nigula ni gulú'unu ni'a lë na' rilá' zixi. ⁴⁷ Que lë ni na' rea' li', dul-la' zían gubága'nu nigula ni, chiguyú'u yöl-la' runiti lo quéguequi, ate' nadxf'ide'enu neda'. Nu na' Dios runiti lahuë' le láti'do'os, láti'do'os nadxf'i Dios nu na'.

⁴⁸ Ní'irö Jesús gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

⁴⁹ Yugu' bönni' na' ta'bó'lenë' Jesús tahuë' gula'sí lógaquië' të' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

⁵⁰ Ní'irö Jesús gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxi ládxu'u.

**Yugu' nigula tácalennu Jesús,
ta'gú'unu le tahuë'**

8 Gudödi gulaca lë ni, gudë' Jesús gapa nacuá' zían yödzo zxon, en yugu' yódzödo', ate' benë' libán ni', en bë'ë didza' que didza' dxi'a ca rinná bë'ë Dios, ate' idxínnutë' bönni' usëda queë' dzágagaquië' Lë'. ² Bál-lanu nigula bunë' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugúie' yugu' yödzo'huë' güf'iguequinu. Nútsa'nu ladjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. ³ Juana, nigula queë' Chuza, bönni' yu'u lu në'ë le dë lidxë' Herodes, nútsa'nu ca' ladjagacanu, ate' cá'anqueze Susana nútsa'nu ca' léga-

canu. Ta'gú'unu nigula ni, en zíanrönu ca', le tahuë' Jesús, en yugu' bönni' usëda queë'. Tu'nódzjanu le dë quégacanu.

Rucúdzu'ë didza' Jesús ca naca queë' bönni' guz

(Mt. 13:1-9; Mr. 4:1-9)

⁴ Bila'rúaj bönachi zían yugu' yödzo ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵—Birúajë' bönni' guz, søjésië' xisedo'. Cate' ni' søjésië', bulu'huöxaj bal-la xisedo' na' ga naca la' nöza, ate' bulu'libi bönachi léguequi. Bila'dxinba' ca' biguínido', en gulé'ajba' xisedo' na' dzö'ö la' nöza. ⁶Bulu'huöxaj ia'bal-la xisedo' na' lu yu ga rö'ö guió'j. Cate' gula'lén xisedo' na', la' gula'bídxitë tu' cabí nalupa' yu na'. ⁷Bulu'huöxaj ia'bal-la xisedo' na' ga bulu'lén lubá yötsi'. Tsözxón gula'zxón lubá yötsi' na', en xisedo' na', ate' lubá yötsi' na' bila'röli xisedo' na' gula'lén, en gulún ditaj léguequi. ⁸Bulu'huöxaj ia'bal-la xisedo' na' ga naca luyú bëbu. Cate' chigula'zxón, bulu'nödzaj. Tu dxigu' na' bunödzaj ia'tú gayuátërö xisedo' ca'.

Cate' budxi gunné' caní Jesús, bë'ë zidzaj didza', rnnë':

—¡Nu zoa nagui, en riyöni ral-la' uzé nagui!

Bizx que rucúdzu'ë Jesús didza'

(Mt. 13:10-17; Mr. 4:10-12)

⁹Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

¹⁰Jesús gudxë' légaquië':

—Dios ruzéajni'inë' libí'ili' le nagachi' ca rinná bë'ë Lë', pero ia'zíca'rö bönachi ni, ru'ílëna' léguequi didza' le rucúdzu'a didza' para cate' ulu'yúë', bití' ila'lé'enë', en cate' ila'yönnë', bití' ila'yéajni'inë'.

Rigúixjö'ë Jesús le rulu'í le bucúdzu'ë didza'

(Mt. 13:18-23; Mr. 4:13-20)

¹¹Gunnë' ca' Jesús:

—Caní naca le rulu'í lë na' bucúdzu'a didza'. Xisedo' na' naca xtdzë'ë Dios.

¹²Xisedo' na' bulu'huöxaj la' nöza tu'lufí ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládxi'do'gaquië', para cabí ila'yéajlë'ë, en cabí ulu'lé'.

¹³Xisedo' na' bulu'huöxaj lu yu ga rö'ö guió'j tu'lufí ca raca quégaquië' bönni' ta'yönnë' didza' na', en tu'dzéjanë' ta'z-i'ë le, pero nácagaquië' ca xisedo' na' bití' ben lui. Tu chí'isö ta'yéajlë'ë, tu' ridxín le rizí' bë' légaquië', ate' la' tu'huóatë ládxi'gaquië'.

¹⁴Xisedo' na' bulu'huöxaj ga bulu'lén lubá yötsi' tu'lufí ca raca quégaquië' bönni' ta'yönnë' didza' na', en cate' chibila'yönnë', yugu' le tu'í ládxi'gaquië' yödzo'lió ni, en yugu' yöl-la' tsahui' que, en yugu' le ta'yaza ládxi'gaquië' le taca ni, tun nigui légaquië', ate' bití' run dxin didza' na' lu icja ládxi'do'gaquië'.

¹⁵Xisedo' na' bulu'huöxaj ga naca luyú bëbu tu'lufí ca raca quégaquië' bönni', idú ládxi'gaquië' ta'yönnë' didza' na', en ta'gu'ë tsutsu le lu icja ládxi'do'gaquië', ate' lu yöl-la' riböza zxón ladxí' tunë' ca rna didza' na'.

Rucúdzu'ë didza' Jesús que le rigú'u bení' lídxiru'

(Mt. 4:21-25)

¹⁶Gunnë' ca' Jesús:

—Cuntu nu bönni' ruquelë'ë guí', ate' la' rudúsi'të' le gu'í'ina, en bití' rigu'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibë guí' na'. ¹⁷Ilá' lahui yúgu'të le nagachi', ate' gaca bë', ate' irúaj ga liná' yúgu'të le raca balándo'os.

¹⁸Que lë ni na', bulí'zé nágalí', tu' huadéli'në' ia'lati' bönni' ruzóë' tsutsu

icja láchxí'da'ahué' didza' riyönné', en huazi'ré' xtídzé'ë Dios, pero bönni' biti' ruzóé' tsutsu icja láchxí'da'ahué' didza' riyönné', huadúa didza' na' biyönné'.

Xiné'ë Jesús, en yugu' bönni' böché'ë

(Mt. 12:46-50; Mr. 3:31-35)

¹⁹ Ní'irö bila'dxiné' xiné'ë Jesús, en yugu' bönni' böché'ë ga na' zoé', pero biti' guca ila'bígué'ë gala' ga zoé' tu' nacua' bönachi zían ni'. ²⁰ Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Té'ënné' iluf'ilené' Lí didza'.

²¹ Bubi'ë didza' Jesús, ré' légaquié':

—Nupa ni ta'yöni xtídzé'ë Dios, en tun ca rnna, bönni' ni nacagaquié' ca xiná' caza', en yugu' bönni' böchi' caza'.

Jesús ribequi dxíé' bö' budunu'

(Mt. 8:23-27; Mr. 4:35-41)

²² Tu dza gurené' Jesús tu lé'e bárcodo', dzágagaquié' bönni' uséda queé' Lë', ate' Jesús ré' légaquié':

—Udóditsöca'ru' ia'tsölá'a nísado' ni.

Ní'irö sójácate'. ²³ Tsanni ni' ta'dödé' lu nísado' na', rásie' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' znan nisa, en zoa bönadxi quégaquié'. ²⁴ Ní'irö gula'bígué'ë ga dë' Jesús, en bulu'subané' Lë', ta'nné':

—¡Bönni' Usedi! ¡Bönni' Usedi! ¡Chirequi huó'tjaru' lu nisa!

Cate' bubané' Jesús, bulidzé' bö' na' recja, en nisa na' riyasa ridxiáda', ate' guzóa dxi bö' na' recja, en guró'o dxi lu nísado' na'. ²⁵ Ní'irö Jesús gudxé' yugu' bönni' uséda queé', rnné':

—¿Naru' cabí réajlé'ëli' Dios?

Guládxiné' légaquié', en tu'báininé'. Gulé luzá'agaquié' tué' ia'túé':

—¿Nuzxi caz bönni' ni? Rinná bé'ené' bö' recja, en nísado', ate' tun ca rnna xtídzé'ë.

**Tu bönni' yödzö
Gadara yu'u lé' bö' xihui'**

(Mt. 8:28-34; Mr. 5:1-20)

²⁶ Ní'irö bila'dxiné' lu xiyúgaquié' bönni' Gadara, le dë ia'tsölá'a nísado' ca dódilö ga dë luyú Galilea. ²⁷ Cate' birúajé' Jesús lé'e bárcodo' na' ga naca lu yu na', dutságuié' tu bönni' yödzö na' Lë'. Chigudzé yu'u bö' xihui' lé', ate' bítirö rácué' lari', en bítirö rizóé' lu yu'u, pero nun xilatjé' lu znan bulóaj ga nádjagaca yeru ba. ²⁸ Cate' bönni' na' yu'u bö' xihui' lé' bilé'ené' Jesús, guródxí'ë zidzaj, ate' buzóa zxibé' lahué' Jesús, en bé'ë zidzaj didza', rnné':

—¿Bizxi ral-la'a quiu', Jesús, Zxí'iné' Dios nayépisetéré'? Ráta'yua' lo' cabí usaca' zi'u neda'.

²⁹ Caní gunné' tu' chigunná bé'ené' Jesús bö' xihui' na' urúaj lu bönni' na'. Zían luzuí z'atélö burixi butúluda' bö' xihui' na' bönni' na', ate' yugu' bönni' yödzö ni' gulúguié' lé' du guié, en bulu'xéjané' bregui' guié ni'a në'ë, pero blé'ë yugu' du guié na', ate' bö' xihui' na' yu'u lé' guché' lé' lu lataj cá'asö. ³⁰ Ní'irö Jesús gunábiné' bö' xihui' na', rnné':

—¿Bi leu'?

Bö' xihui' na' gudxi Lë':

—Le Zían lea'.

Caní gunná tu' yú'ugaca bö' xihui' zían bönni' na'. ³¹ Ní'irö yugu' bö' xihui' na' guláta'yugaca lahué' Jesús cabí isól-lé'ë léguequi lataj chul-la quégaca nupa náti-gaca. ³² Nacuá'aba' ca' tu có'öba' cuchi zían ta'daba' táguba' lu guf'ado' ni', ate' bö' xihui' na' gula'naba yechi' Jesús gué' léguequi lataj tsöjtsú'ugaca cuchi zían na'. Jesús bé'ë léguequi lataj. ³³ Bulu'rúaj yugu' bö' xihui' lu bönni' na', en yöjtsú'ugaca cuchi zían na', ate' yöjácaba' cuchi zían na' ga naca tu lé'e guíój. Yöjbíxigacaba' lu nísado', ate' ni' gula'yé'piba' nisa, gulátiba'.

³⁴Cate' bila'lé'ené' bönni' tu'yúgaquié'-ba' cuchi zián na' ca na' guca quégacaba', guladxi gula'dzóbiné'. Bulu'zxúnajé' ni', ate' yójhuójgaquié' yójtíxjói'iguequiné' nupa nacua' yódzó na', en nupa nacua' la' guixi' ni'. ³⁵Ní'irö bila'rúajé' bönni' yódzó na', yójyúgaquié' lè na' guca. Cate' bila'dxiné' ga na' zoé' Jesús, bila'lé'ené' bönni' na' gula'yú'u bö' xihui' lè, rö'è xini'è Jesús. Nácué' lari', en dxí'ado' chizóé', ate' guládxiné'. ³⁶Nupa na' bila'lé'e lè na' guca gula'guíxjói'i légaquié' ca guca, böáquié' bönni' na' gula'yú'u bö' xihui' lè. ³⁷Ní'irö yúgu'tè bönachi zián na' quégaca yódzó nabábagaca Gadara na' guláta'yu lahué' Jesús urúajé' lu xiyúguequi, tu' tádxiné'. Bubené' Jesús lè'e bárcodo' na', en söhuóje'. ³⁸Bönni' na' bulu'rúaj bö' xihui' na' lè' gúta'yué' lahué' Jesús gu'é lè' lataj tséajlené' Lè' tsózxón. Gunná bé'ené' Jesús lè' ugá'ané' ni', rnné':

³⁹—Böaj lidxu'. Yójtíxjói'i bönachi uládz quiu' yugu' le zxön bené' Dios quiu'.

Böajé' bönni' na' lidxé', ate' buzé' didza' idú lu yódzó ni' ca naca le zxön bené' Jesús queé'.

Jesús ruúné'-bi' bi'i nigula queé' Jairo enca' nigula na' gudannu lari' nácué'

(Mt. 9:18-26; Mr. 5:21-43)

⁴⁰Cate' budxiné' Jesús ia'tsölá'a nísado' na', bulu'dzeja bönachi zián nacua' ni' ní'a queé' Lè', tu' ta'bóza Lè'. ⁴¹Ní'irö bidxiné' Jairo ga zoé' Jesús. Náquié' bönni' lo que yu'u ga tu'dubé' bönni' judío, en tu'sédé' queé' Dios. Biyéchué' xini'è Jesús, en gúta'yué' lahué' tseje' lidxé'. ⁴²Caní bené' tu' zóabi' tubi' bi'i nigula queé', chirequi gátibi'. Nácabi' bi'i la's dui queé', en yú'ubi' ca chinnu iz. Tsanni ni' sa'yéajé' Jesús, sönógaca tu'quirö bönachi zián Lè'.

⁴³Nútsa'nu tu nigula ladaj bönachi zián na', chiguca chinnu iz rigufi' rizá-ca'nu. Biti' ruhu'í rön queénu que hué' quégaca cázanu nigula, ate' chibutönu dëra le dë queénu, riguízxjanu nupa tu'ún bönachi, pero biti' guca nu bönni' úné'-nu. ⁴⁴Gubíga'nu zaca' cúdzu'lé' Jesús, en gudannu ru'í lari' nácué', ate' la' buf'itè hué' rön queénu.

⁴⁵Ní'irö Jesús gunábiné' nupa nacua' ni', rnné':

—¿Nuzxi na' gudán neda'?

Gula'dá'bagui'é yúgu'tè. Ní'irö Pedro, en nupa nacua'len lè' gulé' Lè', ta'nné':

—Bönni' Usedi, nacua' bönachi zián ni, tu'quirö Li', en tu'dxiga' Li', ate' ¿rnatso': "¿Nuzxi na' gudán neda'?"

⁴⁶Ní'irö Jesús gunné':

—Zoa nu gudán neda', tu' gúquibe'eda' birúaj yöl-la' huáca neda' le ruún bönachi.

⁴⁷Cate' réquibe'enu nigula na' nóz-iné' Jesús le bennu, ní'irö guzxízinu. Biyéchunu xini'è Jesús, en gudíxjói'ínu Lè' lógaca bönachi zián na' bizx que na' gudannu lari' nácué', en ca na' guca, la' böácaténu. ⁴⁸Ní'irö Jesús gudxé'-nu:

—Nigúlado', tu' réajlé'u neda' chibóacu'. Böaj lidxu', zoa dxi ládXu'u.

⁴⁹Cate' ni' ru'é Jesús didza' ni, bidxiné' tu bönni' ni', zé'è lidxé' bönni' lo na' que yu'u ga tu'dubé' tu'sédé' queé' Dios, ate' gudxé' bönni' lo na':

—Chigútibi' bi'i nigúlado' quiu'. Bítirö upízxjanu'-né' Bönni' Usedi.

⁵⁰Cate' biyönné' Jesús lè ni, bubí'è didza', ré' bönni' lo na':

—Biti' gádxinu'. Guyéajlé'ésö Dios. Huóacabi' bi'i nigúlado' quiu'.

⁵¹Cate' guyázié' Jesús yu'u na', biti' bé'è lataj nu tsázalen Lè', pero légacasé' Pedro, en Jacobo, en Juan, enca' xuz xiná'abi' nigúlado' na'. ⁵²Ta'bödxi nupa nacua' ni'. Ta'bödxi yeché'è ní'a queé'bi' bi'i nigúlado' na', ate' Jesús ré' légaquié', rnné':

—Bíti'rō códxili'. Biti' nátibi' nigúlado' ni. Rásisibi'.

⁵³Bulu'titjé' Lē' tu' nózguequinē' chinátibi'. ⁵⁴Ní'irō gudélē'ē Jesús ná'abi', en bē'ē zidzaj didza', rnnē':

—Bí'i nigúlado', guyaschi.

⁵⁵Ní'irō bu'u bō' naca cázabi', bubanbi', ate' la' guyásatēbi'. Jesús gunná bē'enē' légaquiē' ilu'ē le gágubi'. ⁵⁶Bulu'báninē' xuz xiná'abi', pero Jesús gunná bē'enē' légaquiē' cuntu nu ilé' ca na' guca.

**Risól-lē'ē Jesús bōnni' usēda
queē' tsójéngaquiē' libán**

(Mt. 10:5-15; Mr. 6:7-13)

9 Ní'irō butubē' Jesús idxínnutē' bōnni' usēda queē', ate' budōdē' lu ná'a-gaquiē' yōl-la' huáca, en yōl-la' unná bē' para ulu'béajē' bō' xihui' yú'ugaca bō-nachi, en ulu'únē' nupa te'e. ²Gusól-lē'ē légaquiē' tsójéngaquiē' libán ca rinná bē'ē Dios, en tsójhuéngaquiē' nupa te'e. ³Jesús gudxē' légaquiē':

—Biti' bi guá'ali' para la' nōza, calēga xiyágado', en calēga yōxaj, en calēga yōta, en calēga dumí, en biti' ixóa yenli' chopa lari'. ⁴Bíti'tēs yu'u ga tsú'uli', guli'sóa ni' cate' uzá'arōli' yōdzō na'. ⁵Gátitēs ga bití' ilún bōnachi lib'ili' bal, buli'rúaj yōdzō na', en guli'cu'bi bēchtō da' lē'e lálali', le uluf'i légaquiē' nagá'ana xíguia' nabága'gaquiē'.

⁶Ní'irō bila'rúajē' bōnni' usēda queē' na'. Gula'dōdē' yúgu'tē yōdzōdo', tunē' libán que didza' dxi'a, en tu'únē' nupa te'e yúgu'tē lu yōdzō na'.

**Ca gútiē' Juan, bōnni'
buquilē' bōnachi nisa**

(Mt. 14:1-12; Mr. 6:14-29)

⁷Biyōnnē' Herodes, bōnni' rinná bē'ē, ca naca yúgu'tē le runē' Jesús, ate' gurō'ē bōniga, tu' ta'nná bōnachi:

—Juan na' chibubanē' lu yōl-la' guti.

⁸Ia'bal-lē' ta'nnē':

—Chibulē'ē Elías, bōnni' na' bē'ē didza' uláz queē' Dios.

Ia'bal-lē' ta'nnē':

—Chibubanē' tu bōnni' bítsē'ē yugu' bōnni' gulu'ē didza' uláz queē' Dios dza ni'te.

⁹Herodes na' gunné':

—Juan na' burixa' yenē'. ¿Nuzzi caz bōnni' ni, riyōnda' queē' runē' yugu' lē ni?

Rizóa ribō'ē Herodes ilé'enē' Jesús.

**Rugahuē' Jesús
chi-un gayuá' bōnachi**

(Mt. 14:13-21; Mr. 6:30-44; Jn. 6:1-14)

¹⁰Cate' bulu'dxinē' bōnni' gubáz nasól-lē'ē Jesús ga zoē' Lē', bulu'siyōnnē' Lē' yúgu'tē le gulunē'. Ní'irō guché'ē Jesús légaquiē' quez. Yōjáquiē' tu lataj cá'asō lu xiyú yōdzō Betsaida.

¹¹Cate' chinóziguequi bōnachi lē ni, yōjnóguequi Lē', ate' Jesús benē' léguequi bal, en bē'lenē' léguequi didza' ca rinná bē'ē Dios, ate' bunē' nupa te'e.

¹²Cate' chizá' ral-la dza na', idxínnutē' bōnni' gubáz queē' Jesús gula'bíguē'ē ga zoē', en tē' Lē':

—Busól-la' bōnachi ni tsójaca gapa dē yōdzōdo', en gapa dē yú'udo' idú gásibi'ilō para tsójtíljagaquiē' gapa ulu'gá'anē', en bi ilahuē', tu' naca lataj cá'asō ga ni zóaru'.

¹³Ní'irō Jesús rē' légaquiē':

—Guli'gu'ē lib'ili' le ilahuē'.

Tē' Lē':

—Gáyu'sō yōta xtládo' dē, en chópasōba' bōla dēba' queētu', o ¿naru' huayéajtsatu' tsójó'outu' le ilágugaca bōnachi zían ni?

¹⁴Nacu'ē ca chi-un gáyu'ē bōnni' ga na'. Ní'irō Jesús gudxē' yugu' bōnni' usēda queē', rnnē':

—Guli'gún ga ila'bō'ē tu cō' huéajgaquiē', ilaca ca chi-un huéajgaquiē'.

¹⁵Caní gulunē', ate' gula'bō'ē yúgu'tē'.

¹⁶Ní'irō gudélē'ē Jesús gayu' yōta xtila

na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzuzxjé' léguequi, en bë'ë quégaquië' bönni' usëda queë' para ulu'cu'ë lógaca bönachi na'.¹⁷ Gulahuë' yúgu'të', en bulu'huóljanë'. Gudödi na' bulu'tubë' yugu' bizxaj bugá'ana, ate' bulu'líë' idú chinu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

¹⁸Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

¹⁹Bulu'bi'ë didza', ta'nnë':

—Ta'nná bal-la bönachi nacu' Juan, bönni' buquilé' bönachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

²⁰Ní'irö Jesús gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasól-lë'ë Dios.

Riguíxjö'ë Jesús ca si' ilútië' Lë'

(Mt. 16:20-28; Mr. 8:30-9:1)

²¹Ní'irö Jesús gúdxidë'ë légaquië', en gunná bé'enë' légaquië' cuntu nu ilé' Nu náquië' Lë'.²² Ní'irö rë' légaquië':

—Run bayudxi qui' saca'a neda', Bönni' Guljé' Bönachi, zían le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

²³Gudxë' ca' yúgu'të':

—Channö ré'enë' nu bönni' të'ë neda', ral-la' uzóë' tsólá'alö le dë' queë', en gáquië' ca tu bönni' sa'yéajé' söjté'ë lë'e yaga cruz, ate' ní'irö gaca të'ë

neda'.²⁴ Núti'tës bönni' ruí'i láchxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'.²⁵ Biti' bi uzi'ë xibé tu bönni' channö utubë' queë' yúgu'të' le dë' yödzülió ni, pero unítië' tsaz yöl-la' na'bán queë'.²⁶ Nu bönni' rutuf'inë' neda', en rutuf'inë' ca' xtída'a, lësca' neda', Bönni' Guljé' Bönachi, utuf'ida' bönni' na' cate' huöda' idinná bë'a, dzá-gagaca neda' yöl-la' zxön queë' Xuzá', en yöl-la' zxön quégaquië' gubáz lá'ayi queë' Dios.²⁷ Le nácatë' rea' libí'ili', nacuá' bal-lë' bönni' ni bití' ilátië' cate' ila'lé'erönë' dza idinná bë'ë Dios.

Ridzá' ca riná' lahuë' Jesús

(Mt. 17:1-8; Mr. 9:2-8)

²⁸Cate' bizá'a xunu' gubidza gudödi bë'ë Jesús yugu' didza' ni, ní'irö guché'ë Pedro, en Juan, en Jacobo, ate' gurenë' tu lu gu'ado', ga na' bulidzë' Dios.²⁹ Tsanni ni' ruí'ilenë' Dios didza', bidzá' ca riná' lahuë', ate' böáca chiguíchi-do'os lari' nácuë', en guyëpi yösa bení'.³⁰ Ní'irö bulu'luf'i lógaquië' chopë' bönni' ga zoë' Lë' tu'ílenë' Lë' didza'. Náca-gaquië' Moisés, en Elías.³¹ Chopë' ni gula'yëpë' yösa bení', ate' tu'ílenë' Jesús didza' ca si' uzé'ë yödzülió ni, gátíë' lu yödzü Jerusalén.³² Sal-la' chirácada' ilásië' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lë'.³³ Cate' bulu'zë'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

—Biti' réquibe'enë' Pedro bi na' rnnë'.³⁴ Tsanni ni' ru'ë didza' ni, la' guró'ötë böaj le bugacu légaquië', ate' guládxinë'

tu' nacu'ë lu böaj na'. ³⁵ Ní'irö biyón chi'i Nu ru'í didza' lu böaj na', rnna:

—Bönni' ni náquië' Zxí'ina'. Nadxí'ida' Lë'. Buli'zë nágali' didza' gu'ë.

³⁶ Cate' budxi bë' didza' chi'i na', tuzë' Jesús nagá'analenë' légaquië'. Ta'cuá' dxíë' bönni' usëda queë', ate' dza na' cuntu nu gulé' ca naca le bila'lé'enë'.

**Ruúnë' Jesús bi'i bönni'
yu'u bö' xihui' lëbi'**

(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huötjë' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zían dutságagaca Jesús. ³⁸ Ní'irö bë'ë zidzaj didza' tu bönni' nútsë'ë ladaj bönachi zían na'. Bulidzë' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' lëbi' le run ga ribódxi'abi', en ruxízida' lëbi'. Run ga ribía bidxina' zxóna' ru'á'abi', en rurixi rutúluda' lëbi', ate' catu caz rusán lëbi'.

⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zéquínë'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi íc-jali'. ¿Gáca'xte ral-la' sóalena' libí'ili', en guá' ilena' queé'li'? Dijua'a-bi' bi'i bönni' quiu' ni.

⁴² Cate' ni' zá'abi' ribíga'bi' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yöl-la' huáca zxön queë' Dios.

**Jesús ru'ë didza' leyúbölö
ca si' ila'zönë' Lë'**

(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxë' yugu' bönni' usëda queë', ⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

⁴⁵ Biti' gula'yéajni'inë' bönni' usëda queë' didza' ni, tu' cabí ru'ínë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

Nu naca lo

(Mt. 18:1-5; Mr. 9:33-37)

⁴⁶ Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo. ⁴⁷ Réquibe'enë' Jesús le ta'zá' ládxi'-gaquië', ate' gudélë'ë-bi' tubi' bí'ido', en buzóë'-bi' cuitë'. ⁴⁸ Ní'irö rë' légaquië':

—Núti'tës bönni' gunë' bal tu' bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasól-lë'ë neda'. Que lë ni na' bönni' nútsë'ë ladjali' nácarë' nöxaj ladxí, bönni' ni náquië' lo.

Nu biti' ridá'baga' rë'u, rácalen rë'u

(Mr. 9:38-40)

⁴⁹ Ní'irö Juan bulidzë' Jesús, rnnë':

—Bönni' Usedi, bilé'tu'-në' tu bönni' rugunë' dxin Lo' rubéajë' bö' xihui', ate' gunná bé'tu'-në' tu' cabí dë'ë rë'u.

⁵⁰ Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

Jesús ridil-lë' Jacobo, en Juan

⁵¹ Cate' chizá' gal-la' dza ral-la' gátíë' Jesús, en huëpë' yehua' yubá, benë' bayudxi tsejë' Jerusalén. ⁵² Gusól-lë'ë yugu' bönni' gubáz queë' ila'nóruë' ca Lë', ate' yójáquië' tu yódzödo' quégaca bönachi Samaria para tsöjpá'agaquië' ga ugá'anë' Jesús tu yëla. ⁵³ Yugu' bönni' yódzö na' biti' gulunë' Jesús bal tu' chinnaca queë' sa'yéajë' Jerusalén. ⁵⁴ Cate' Jacobo, en Juan, bönni' usëda queë' Jesús, bila'lé'enë' lë ni, të' Lë':

—Xan, ¿naru' inábatsöca'tu' huötaj guí' le za' yehua' yubá, en usuniti légaquié', guntu' ca na' bené' Elías?

⁵⁵ Buécjé' Jesús, en gudil-lé' légaquié', rnné':

—Biti' nózili' bizxi bö' dzágui libí'ili'.
⁵⁶ Bida' ni neda', Bönni' Guljé' Bönachi, caléga para usunítia' yöl-la' na'bán quégaca bönachi, pero bida' dusólá' bönachi.

Ní'irö yójáquié' yödzo yúbölö.

Nupa té'eni tsójácalen Jesús

(Mt. 8:19-22)

⁵⁷ Tsanni ni' yú'ugaquié' nōza Jesús, en yugu' bönni' dá'gaquié' Lé', bidxiné' tu bönni' yödzo Jerusalén, en ré' Jesús:

—Xan, ré'enda' sá'lena' Li' gáti'tés ga tseju'.

⁵⁸ Jesús ré' lé':

—Yúgu' böza', nacuá' zcan bulóaj qué-gacaba', ate' biguínido', dxíagaca xcá'a-gacaba', pero neda', Bönni' Guljé' Bönachi, biti' dé' quia' ga gáta'a uzi' ládxa'a.

⁵⁹ Ní'irö Jesús gudxé' tu bönni' yúbölö, rnné':

—Gudá' neda'.

Bönni' ni gudxé' Lé':

—Xan, benna neda' lataj huója' lidxa' ga idxinrö dza chibucácha'a-né' xuza'.

⁶⁰ Jesús gudxé' lé':

—Bé' lataj bönni' chizóa ilátie' ulu'cáché' nupa chinati quégaquié', pero lí', guyéaj, yójén libán ca inná bé'è Dios.

⁶¹ Ní'irö bidxiné' ia'túé' ca', en ré' Jesús:

—Xan, ré'enda' sá'lena' Li', pero benna neda' lataj tseja' tsójzégacada'-né' didza' dí'a dza quia'.

⁶² Jesús gudxé' lé':

—Núti'tés bönni' ru'fi ládxe'è le raca yödzoilió náquié' ca tu bönni' rugá'ané'-ba' bédxi, en ruyúé' zaca' cúdzu'lé'. Nu run caní biti' naca lesaca' tsaza ga rinná bé'è Dios.

Risól-lé'è Jesús tsónnalalaj yu' chié' bönni' tsójéngaqüé' libán

10 Gudödi gulaca yugu' lé ni, guróé' Xanru' ia'tsónnalalaj yu' chié' bönni' uséda queé', ate' gusól-lé'è légaquié' chopa huéajgaquié' para ila'nórué' ca Lé', en tsójáquié' yúgu'té yödzo, en yödzo' gapa chizóa tódé' Lé'.² Gudxé' légaquié':

—Le nácaté, dēda' dxin quia', le naca ca tu la' yēla zxon ga nu tsójlapa', pero nabábasö huen dxin quia' nacuá'. Que lé ni na', guli'gáta'yu lahué' Dios, náquié' Xan la' yēla na', isól-lé'è yugu' huen dxin ga naca la' yēla queé'.³ Guli'tséaj na'a. Buli'yútsöca', neda' risól-la'a libí'ili', ná-cali' ca yugu' bö'cu' zxila' sójácaba' ládja-gacaba' bö'cu' gu'a' sínia'.⁴ Biti' guá'ali' yöxaj dumí, en caléga buzudi yöta, en biti' guá'ali' ia'tú cö' xiráchuli', en biti' tseli' para gü'ílenli' bönachi didza' gapa naca la' nōza.⁵ Gáti'tés yu'u ga tsú'uli', innali': "Le ribequi dxi ladxi' gaca qué-gaca bönachi nacuá' yu'u ni."⁶ Channö zoa ni' nu bönni' si'è yöl-la' ribequi dxi ladxi', ugá'analen lé' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi' na' inábali'.⁷ Guli'gá'ana yu'u ga na' tsú'uli', en guli'gu'aj guli'gagu bi ilunné' queé'li', tu' udzöli quéziné' bönni' huen dxin le gahué'. Biti' tódili' yu'u yu'u.⁸ Gáti'tés yödzo ga tsú'uli', ate' ilún libí'ili' bal, guli'gagu le ulu'cu'è loli'.⁹ Buli'ún nupa te'e nacuá' yödzo na', en guli'gué' léguequi: "Chibidxín le rinná bé'è Dios ga zóali'."¹⁰ Gáti'tés yödzo ga tsú'uli', channö cabí ilún libí'ili' bal, guli'rúaj, tsöjsóali' la' nōza que yödzo na', en innali':¹¹ "Béchtö que ládzali' le da' lé'e lábatu' ruquínnahtu', le ru-lu'fi nabága'li' xíguia', pero ral-la' inózili' lé ni, chibidxín le rinná bé'è Dios ga zóali'."¹² Neda' rea' libí'ili', cate' idxín dza ichúguié' Dios quégaca bönachi,

ila'gu'í' ila'zaca'rö bönachi yödzo ni' ca ila'gu'í' ila'zaca' bönachi yödzo Sodoma, nupa ni' busuní'tië' Dios.

**Le gaca quégaca nupa
biti' ulu'bí'i ládxi'gaca**

(Mt. 11:20-24)

¹³ Gunné' ca' Jesús:

—Bica' bayechi' lib'í'ili', bönachi yödzo Corazín. Bica' bayechi' lib'í'ili', bönachi yödzo Betsaida. La'tu' gulaca lu yödzo Tiro, en lu yödzo Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxi'gaquië' bönni' ni', ate' ilácuë' lari' cá'asö, en ila'gu'ë dö íc-jagaquië', le ulu'ígaca chibulu'bí'i ládxi'gaquië'. ¹⁴ Que lë ni na', cate' idxín dza ichúguië' Dios quégaca bönachi, qu'í' sáca'röli' ca ila'gu'í' ila'záquië' bönni' yödzo Tiro, en yödzo Sidón. ¹⁵ Lib'í'ili', bönachi Capernaum. Réquili' tsázali' yehua' yubá. Huó'tjali' tsójtsázali' lataj chul-la quégaca nupa nátigaca.

¹⁶ Ní'irö Jesús gudxë' yugu' bönni' usëda queë', rnnë':

—Nu ruzé nagui lib'í'ili', ruzé nagui ca' neda', ate' nu rucá'ana lib'í'ili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasól-lë'ë neda'.

**Bönni' yójéngaquië' libán
tu'dxinë' ga zoë' Jesús**

¹⁷ Cate' tsónnalalaj yu' chië' bönni' na' gusól-lë'ë Jesús bulu'dxinë' ga zoë' Lë', bönni' na' yójéngaquië' libán, ta'nnë':

—Xan, tun bö' xihui' ca rnnatu' cate' ruguntu' dxin Lo'.

¹⁸ Jesús gudxë' légaquië':

—Neda' bilé'eda' Satanás tu' xihui', gubixi zxan lúzxi'ba ca run yösa, le riyaza luyú. ¹⁹ Buli'yútsöca', neda' nudöda' lu ná'ali' yöl-la' unná bë' para gaca sòngacali'-ba' bëla sínia', en xöjnó', en biti' bi gaca queé'li', ate' ucúl-lali' yöl-la' unná bë' que tu' xihui', nu biti' rilé'e rë'u

dxia'. ²⁰ Na'a, buli'dzeja, calé'gasö tu' tun bö' xihui' ca rnnali', pero tu' nuzúajgaca lali' lu guichi ni' yehua' yubá.

Rudzéjanë' Jesús

(Mt. 11:25-27; 13:16-17)

²¹ La' ní'sö rudzéjanë' Jesús, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero bulu'í'guequinu'-bi' b'í'do' ca naca. ¡Ca' gaca, Xuza', tu' caní guyaza ládxi'u!

²² Ní'irö gunné':

—Yúgu'të budödë' Xuza' lu na'a. Cuntu nu bönni' nózinë' Nu náquië' Zxí'inë' Dios, pero tuzë' Dios Xuz nózinë', ate' cuntu nu nözi Nu náquië' Dios Xuz, pero tuzë' Zxí'inë' nózinë', ate' inózi-gaca ca' nupa na' Zxí'inë' ré'ënë' ulu'ínë' léguequi Xuzë'.

²³ Ní'irö Jesús buyúë' yugu' bönni' usëda queë', en rë' légaquië':

—Bica' bágaca nupa ta'lé'e le rilé'eli' lib'í'ili', ²⁴ tu' rea' lib'í'ili': Zián bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero biti' bila'lé'enë' le. Gulé'ënnë' ila'yönnë' le riyónili', pero biti' bila'yönnë' le.

Tu bönni' Samaria, bönni' tsahui'

²⁵ Ní'irö guyasë' tu bönni' yudo' usedi, en para si' bë'ë Jesús, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

²⁶ Jesús rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

²⁷ Bubi'ë didza' bönni' na', rnnë':

—Caní rna: "Ídxí'inu' Xanu' Dios idú ládxi'u, en len idú icja ládxi'do'o, en len idú yöl-la' run quiu', en len idú yöl-la'

réajni' quiu', ate' idxí'inu' bönni' luzó'o ca nadxi'i cuinu'."

²⁸ Jesús rë' lë':

—Dxi'ado' bubi'u didza'. Ben caní, ate' gata' quiu' yöl-la' na'bán na'.

²⁹ Tu' gú'unnë' bönni' na' ubéaj dxi'a cuinë', rë' Jesús:

—¿Nuzxi na' bönni' luzá'a?

³⁰ Bubi'ë didza' Jesús, rë' lë':

—Buzé'ë tu bönni' Jerusalén, rudín-nië', sa'yéajë' yödzo Jericó. La' nöza ni' gula'zönë' gubán lë'. Gula'gúë' lari' nácuë', en gulunë' lë' huë'. Ní'irö bu-lu'zë'ë ni', en nucá'anagaquië' lë', chirati cazë'. ³¹ Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'aló gudödë'. ³² Gudödë' ca' ni' tu bönni' nababë' xzí'ini xi'sóë' Leví, yugu' bönni' na' tunë' dxin que yudo'. Cate' bilé'enë' lë', tsölá'aló ca' gudödë'. ³³ Lës-ca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxë'ë lë'. ³⁴ Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchólinë' le lari'. Ní'irö budxië' lë' cúdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. ³⁵ Cate' za' rení ia'tú dza, en chizóa uzé'ë bönni' Samaria na', guléajë' lázxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utóu' ia'lati' dumí, ubi'a neda' quiu' cate' huöda'."

³⁶ Na'a, ¿nacxi runi li'? ¿Núzxilë' bönni' yonna ni gúquië' bönni' luzé'ë bönni' na' gulu'ë dö' bönni' gubán queë'?

³⁷ Bubi'ë didza' bönni' yudo' usedi na', rë' Jesús:

—Bönni' na' buéchi' ládxë'ë lë'.

Ní'irö Jesús gudxë' lë':

—Guyéaj na'a, yójen ca' li'.

Le benë' Jesús lídxigacanu Marta, en María

³⁸ Ní'irö bu'ë nöza Jesús, ate' bidxinë' tu yódzödo' ga ni' tu nigula lënu Marta guché'ënu Lë' lídxinu. ³⁹ Marta ni zóanu nigula xzilanu lënu María, ate' María na' guró'ötënu ga naca xini'ë Jesús, en ruzë náganu xtídzë'ë. ⁴⁰ Marta na' bubi bugu'ínu, zían dxin runnu, ate' gubí-ga'nu ga na' zoë' Jesús, en rënu Lë':

—Xan, ¿naru' cabí ruí'í ládxi'tso' neda' tu' nucá'anabi' bi'i xzila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi rugu'íde'enu', en zían le ruí'í ládxu'u runu'. ⁴² Tuz le run bayudxi nu gun, ate' María ni guröbi' lë' na' nácatërö dxi'a, ate' lë' na' guröbi' bití' udúa queë'bi'.

Ca ral-la' ulídzaru'-në' Dios

(Mt. 6:9-15; 7:7-11)

11 Tu dza ni' Jesús rulídzë' Dios. Cate' budxi bé'lenë' Dios didza', tuë' bönni' usëda queë' rë' Lë', rnnë':

—Xan, busedi netu' ulídzatu'-në' Dios güf'ilentu'-në' didza', ca benë' Juan, busédinë' bönni' dá'gaquië' lë'.

² Ní'irö Jesús rë' légaquië':

—Cate' ulídzali'-në' Dios güf'ilenli'-në' didza', guli'ná:

Xuztu', zu' yehua' yubá, gá'ana xzön Lo'. Gudá inná bë'u.

Gaca ca raza ládxu'u Li' luyú ni, ca na' raza yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu' ca netu' ca' runiti lotu' nupa tua' dö' queé'tu'.

Bití' gu'u lataj si' bë' tu' xihui' netu', pero busölá netu' lu na' nu ruá' dö'.

⁵ Jesús rë' ca' légaquië':

—Channö zoë' nu bönni' ládjali', en zoë' böchi' luzé'ë, en channö huidë' ga

na' zoë' guluhuëla, ate' ulidzë' lë', innë': "Bócha'a, benna quia' tsonna yöta xtila ⁶tu' si' bidxinë' quia' böchi' luzá'a, zë'ë zítu', pero biti' bi dë le gu'a-në' gahuë'." ⁷¿Naru' ubi'ë didza' caní bön-ni' na' zoë' yu'u, guíë' lë': "Biti' utsó'o neda' tu' chinayayaj yu'u, en chidélengacabi' bi'i quia' neda', ate' biti' gaca chasa' bi gunna' quiu'?" ⁸Neda' rea' lib'ili': Sal-la' biti' chasë' bi unódzjë' queë' tu' náquië' böchi' luzë'ë, pero chasë', en unódzjë' queë' idutë le riquinnë' para cabirö upíxjanë' lë'. ⁹Que lë ni na' rea' lib'ili': Guli'naba, ate' Dios gunnë' queé'li'. Guli'quilaj, ate' idzöli queé'li'. Buli'lidza ra' yu'u, ate' tsalaj queé'li'. ¹⁰Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

¹¹'Channö zoë' nu bönni' ladjali', en náquië' xuz, ate' channö xzf'inë' inábibi' lë' yöta xtila, ¿naru' unódzjatsë' queé'bi' guió'j? Channö inábibi' lë' tuba' böla, ¿naru' unódzjatsë' queé'bi' bëla? ¹²Channö inábibi' lë' dxita que böra, ¿naru' unódzjatsë' queé'bi' xöjnó'? ¹³Caní naca, nácali' lib'ili' huiá' dö', pero nózili' unódzjali' quégacabi' xzf'inili' le naca dxi'a. Nácatë'rö löza Xúzili' zoë' yehua' yubá gunnë' queé'li' Dios Bö' Lá'ayi, nülöli' inábili' Lë'.

Ta'nnë' runë' dxin Jesús len yöl-la' huáca que tu' xihui'

(Mt. 12:22-30; Mr. 3:19-27)

¹⁴Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bön-nachi nacua' ni'. ¹⁵Bal-la bönachi nacua' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

¹⁶Ia'bal-la bönachi na' gulë'ëni ila'zi' bë' Jesús, ate' gula'nabi Lë' gunë'

tu le gaca bë' le za' yehua' yubá. ¹⁷Réquibe'enë' Jesús le ta'zá' ladxí'-gaquië', ate' rë' légaquië':

—Gátitës ga ta'nná be'e bönachi luzé'eguequi, channö ila'rúaj choplö la' léguequisö bönachi na', ila'niti. Channö ila'rúaj choplö bönachi nacua' tu yu'u, údx qué'eguequi. ¹⁸Lësca' caní raca que Satanás, tu' xihui', naz'í le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? ¹⁹Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna qué'gaca nupa dá'gaca lib'ili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. ²⁰Channö neda', len yöl-la' huáca queë' Dios rubéajgaca' bö' xihui', le nácatë' chibidxín le rinná bë'ë Dios ga zóali'.

²¹'Cate' tu bönni' nál-la dë lu në'ë le rud'í'inë', en rapa chi'ë lidxë', naca chi'i dërö le dë queë'. ²²Na'a, channö zë'ë ia'túë' bönni' nál-latërë' ca lë', en ucul-lë' lë', n'í'rö cuë' yúgu'të le rud'í'inë', lë na' ruzxöni ladxë'ë, ate' quisíë' le dë queë' bönni' na'.

²³'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' ruxdín xilataj

(Mt. 12:43-45)

²⁴Gunnë' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxí'. Channö cabí idzöli que, inná: "Huója' xilatja' ga ni' birúajaja'." ²⁵Cate' ruxdín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. ²⁶N'í'rö reaj, en röjxi' ia'gadxi bö' xihui', nácgacatë'rö xihui' ca le, ate' ta'yú'u bönni' na'. Na'a, le raca queë'

bönni' na' nayáli'tërö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj bönachi zían na' bé'ënu zidzaj didza', rnanu:

—Bica' ba nigula na' biá'anu Li' lé'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunné':

—Nácagacatërö bica' ba nupa ta'yöni xtídzë"ë Dios, en tun ca rna.

Ta'nábinë' Jesús gunë' le gaca bë' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' bönachi zían ga zoë' Jesús, gusí lahuë' ru'ë didza', rnnë':

—Ta'nába bönachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. ³⁰ Ca na' guca queë' Jonás, gúquië' tu le naca bë' lógaca bönachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lógaca bönachi dza ni zóaru' na'a. ³¹ Cate' idxín dza ichúguië' Dios quégaca bönachi ila'gu'í ila'zaca', en uchi'a usöröë' bönachi dza ni zóaru' na'a, Dios uchisë'-nu nigula gunná bé'enu bönachi dza ni'te luyú ni' dë tsólá'a ga ridödi gubidza beo' ziaga, ate' le bennu uluf'i nabága'gaca bönachi ni xíguia', tu' bídanu lënu, birúajnu ga naca zi'-tu' para uduzé naganu didza' réajni'i bë'ë Salomón, bönni' gunná bé'enë' bönachi Israel, pero na'a, zoa' neda' ni, en nayépisëtëra' ca Salomón na'. ³² Lësca' caní, Dios uchisë' bönni' gula'cu'ë yödzö Nínive cate' idxín dza ichugu bë'ë quégaca bönachi, en uchi'a usöröë' bönachi dza ni zóaru' na'a, ate' le gulunë' uluf'i nabága'gaca bönachi ni xíguia', tu' bulu'bí'i ládxi'gaquië' bönni' Nínive cate' bila'yönnë' libán benë' Jonás, ate' na'a

zoa' neda' ni, en nayépisëtëra' ca Jonás na'.

Le rigú'u bení' lu icja ládxi'do'oru'

(Mt. 5:15; 6:22-23)

³³ Gunné' ca' Jesús:

—Cate' nu ruquela' guí, biti' rigú'u le ga nagachi', en biti' rudusi' le gu'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guió'j loru' naca ca tu le rigú'u bení' lu icja ládxi'do'oru'. Channö guió'j lo' naca dx-i'a, idúteo' yudzu le naca bení', pero channö naca xihui' guió'j lo', idúteo' yudzu le naca chul-la. ³⁵ Ben chi'i cuinu' na'a, para cabí huóáca chul-la lë na' rigú'u bení' lu icja ládxi'do'o. ³⁶ Caní naca, channö idúteo' nalísinu' le naca bení', en biti' bi zóalen li' le chul-la, yúgu'të ilé'enu' dxi'a ca raca cate' ruzení' quiu' guí.

Jesús ruzégui'ë yugu' bönni' yudo' didza'

(Mt. 23:1-36; Mr.

12:38-40; Lc. 20:45-47)

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsójtágulenë' lë'. Cate' guyázië' Jesús lidxë' bönni' yudo' na', gurö'ë rahuë'.

³⁸ Cate' bönni' yudo' fariseo na' bilé'enë' Lë', bubáninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libí'ili', bönni' yudo' fariseo, rigu-ibi cuinli' ca rigufibili' láhuilögaca le ré'aji ráhuili', pero lu icja ládxi'do'oli' ruhuídli', en rizá' ládxi'li' le ruá' dö'. ⁴⁰ Libí'ili', bönni' biti' réajni'ili'. ¿Naru' cabí nózili', Nu ben le zoa láchuisö ben ca' le yu'u lé'elö? ⁴¹ Na'a, guli'gún gun le dë queé'li', ate' ní'irö huóáca dxi'a yúgu'të le dë queé'li'.

⁴² Bica' bayechi' libí'ili', bönni' yudo' fariseo. Rigú'zjali' que yudo' tu cö' huéaj tu' chi cö' le rizí'ili' que xóhuéaj, en que guixi' ruda, en quégaca guixi'

cuando', pero rudódisili' le naca tsahui', en yöl-la' nadxf'i queéli' Dios. Yugu' læ ni run bayudxi gunli', en biti' ucá'anali' ia'zica' læ na' runli'.

⁴³ 'Bica' bayechi' lib'ili', bönni' yudo' fariseo. Ré'ënili' có'öli' gapa naca lo lu yu'u ga rudúbili' rusédali' queé' Dios, en ré'ënili' ucu'lidza bönachi lib'ili' ba zxon gapa naca láhuilöguequi bönachi.

⁴⁴ 'Bica' bayechi' lib'ili', bönni' yudo' usedi, enca' lib'ili', bönni' yudo' fariseo, bönni' rulu'isö tsahui' cuinli', tu' nácali' ca nácagaca yeru ba quégaca nupa náti-gaca le cabí nalá'gaca, ate' ta'dá bönachi láhuigaca yeru ba na', en biti' téquibe'e.

⁴⁵ Ní'irö bubí'ë didza' tu bönni' yudo' usedi raquié' xibá queé' Moisés. Ré' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús ré' læ':

—Bica' bayechi' ca' lib'ili', bönni' yudo' usedi rácali' xibá queé' Moisés, tu' rusubága'gacali' bönachi tu yua' zi'i le cabí gaca nu guá', pero lib'ili' caléga láti'do'os biti' ruláhuili' le len ná'ali'.

⁴⁷ 'Bica' bayechi' lib'ili', tu' richísali' biquitaj quégaca ba ga nagáchi'gaquié' bönni' gulu'ë didza' uláz queé' Dios, ate' gulútié' xuz xtó'oli' légaquié'. ⁴⁸ Caní naca, runli' ba nalí runli' tuz le guluné' xuz xtó'oli' tu' gulútié' xuz xtó'oli' na' légaquié', ate' lib'ili' richísali' biquitaj quégaca ba ga nagáchi'gaquié'.

⁴⁹ 'Que læ ni na', lu yöl-la' réajni'i queé', Dios gunné' caní: "Isól-la'a queéli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lé' gútili', en ia'bal-lé' cuia na'li' légaquié'." ⁵⁰ Caní guné' Dios tu' uchi'a usöröé' quégaca bönachi dza ni zóaru' na'a, ni'a que rön quégaca yúgu'té bönni' gulu'ë didza' uláz queé', bönni' ni' bétigaca bönachi légaquié' cate' gusí lo rata' yödzölió, ⁵¹ ga gusí lo nu bëti Abel, ga bidxinté gulútié' Zacarías, bön-

ni' na' gulútié' gatsaj láhui'lö ga dë bu-cugu lá'ayi ga na' tu'zégui'gaquié'-ba' böa' bédxido' lahué' Dios, en ga dë lataj lá'ayi. Que læ ni na', rea' lib'ili', Dios uchúgué' quégaca bönachi dza ni zóaru' na'a, ni'a que rön quégaca yúgu'té bönni' na' gulútié' xuz xtó'oli' légaquié'.

⁵² 'Bica' bayechi' lib'ili', bönni' yudo' usedi, rácali' xibá queé' Moisés. La' lib'isili' dë lu ná'ali' xzí'ini gufé que lataj ga ta'dzöli bönachi yöl-la' réajni'i. Lib'ili' biti' riyázali', ate' ruzága'li xinózigaca nupa té'ëni ila'yaza.

⁵³ Cate' Jesús budxi bé'lené' légaquié' didza' ni, bönni' yudo' tu'sédiné', en yugu' bönni' yudo' fariseo gula'léde'ené' Lë', ate' gula'sí lógaquié' ta'naba yúdx-ide'ené' Lë' ca naca zían le taca, ⁵⁴ en tu'béajé' Lë' didza' para gaca ulu'zéguié' Lë' didza' ni'a que didza' ubi'ë.

Rusédiné' Jesús ca naca yöl-la' rulu'isö tsahui' cuini

12 La' dza na' bulu'dubi zían gayúa' bönachi ga zoé' Jesús ga bidxinté ta'rólisö luzé'eguequi bönachi na'. Ní'irö gusí lahué' Jesús ré' yugu' bönni' usëda queé' cazé', rnné':

—Gulí'gún chí'i cuinli' que le naca ca cúa zi que yöta xtila quégaquié' bönni' yudo' fariseo, le naca yöl-la' rulu'isö tsahui' cuini quégaquié'. ² Biti' bi dë le naca balánd'oos le cabí ilá' lahui, en biti' bi dë le nagachi' le cabí gaca bë'. ³ Que læ ni na', yúgu'té le chigunnáli' ga naca chul-la, ila'yöni bönachi ga naca lu bení, ate' didza' bé'ëli' bagáchi'sö ga guzóa lu yu'u nayayaj, gaca libán que ga naca lógaca bönachi.

Nu ral-la' gádxiru'

(Mt. 10:28-31)

⁴ Gunné' ca' Jesús:

—Bócha'ado', rea' lib'ili': Biti' gádxili' bönni' tútigaquié' bönachi, ate' tödi na' bíti'rö bi gaca iluné' quéguequi. ⁵ Ulu'i-

da' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queé'li', en tódi na' dè lu nē'è yöl-la' unná bē' chū'unē' libí'ili' lu gu' gabila. Ōn, rea' libí'ili', guli'gadxi Nu na'.

⁶ Túti'gaquiē'-ba' gáyu'ba' biguínido' len chopa dumí lásido'. Biti' ral-la ládxe'è-ba' Dios tu biguínido' na'. ⁷ Lës-ca' caní, yúgu'tē guitsa' ícjali' nabábaga-gaca lahuē' Dios. Que lē ni na', bití' gádxili'. Nazáca'tēröli' libí'ili' ca zianba' biguínido'.

Nupa ta'nnasö néquiquequi queē' Jesús

(Mt. 10:32-33; 12:32; 10:19-20)

⁸ Gunné' ca' Jesús:

—Rea' libí'ili': Yúgu'tē bönni' ta'nné' néquiquequiné' quia' neda' lógaca bönachi, lësca' neda', Bönni' Guljē' Bönachi, innía' néquiquequiné' quia' lógaquiē' gubáz lá'ayi queē' Dios, ⁹ ate' bönni' ta'dá'baguē'è néquiquequiné' quia' lógaca bönachi, lësca' neda' tá'baga'a néquiquequiné' quia' lógaquiē' gubáz lá'ayi queē' Dios.

¹⁰ Yúgu'tē nupa bi ila'nné' quia' neda', Bönni' Guljē' Bönachi, gaca uniti lahuē' Dios léguequi, pero nu inné' zi' queē' Dios Bō' Lá'ayi, bití' uniti lahuē' Dios nu na'.

¹¹ 'Cate' ila'ché'è libí'ili' gapa naca lu yu'u ga tu'dubē' bönni' judío, en tu'sédē' queē' Dios, en lógaquiē' bönni' ulu'chi'a ulu'söröé' libí'ili', en lógaquiē' bönni' dē lu ná'agaquiē', bití' ubi uguf'ili' nacxi gunli' o bizxi didza' ubí'ili', o bizxi innali'. ¹² La' dza ná'asö usédinē' Dios Bō' Lá'ayi libí'ili' le ral-la' innali'.

Huáca gun yöl-la' tsahui' queéru' ga gal-la ládxi'ru-nē' Dios

¹³ Tu bönni' nútsē'è ladaj bönachi zían na' rē' Jesús, rnnē':

—Bönni' Usedi, gudxē' bócha'a gunné' uláz quia' le guta' queē' xuztu'.

¹⁴ Jesús rē' lē':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dē queé'li'?

¹⁵ Ní'irö Jesús gudxē' bönachi nacua' ni', rnnē':

—Buli'yútsöca'. Guli'gún chi'i cuinli' para cabí uhuí'di'li'. Le uzi'è xibé nu bönni' bití' nácasö le zían le dē queē'.

¹⁶ Ní'irö Jesús bé'lenē' légaquiē' didza', bucúdzu'è didza', rnnē':

—Zoē' tu bönni' rilé'enē' yöl-la' tsahui' queē', ate' runódzjada' gulapa lu xiyúé'.

¹⁷ Ní'irö guzá' ládxe'è bönni' na', rnnē': “¿Nacxi guntsa'? Biti' dē ga gapa chí'a le rulá' quia'.”

¹⁸ Ní'irö rnnē': “Caní guna'. Uquínajgaca' yu'u ga rapa chí'a le rulá' quia', ate' guna' yugu' yu'u zxón-tērö ca', ate' gapa chí'a le rulá' quia' ni', len yugu' le dē quia'.”

¹⁹ Ní'irö gaca gufé cuina': Chidéda' quia' zían le chinutuba', le gáhuida' zían iz. Uzí' ládxa'a. Gu'aj gahua', en udzējada'.”

²⁰ Ní'irö Dios rē' lē': “Lí, bönni' bití' bi nózinē'. Na'a dzö gátíu'. Na'a, ¿nuzxi caz guequi que, lē na' chinutubu'?”

²¹ Caní raca queē' bönni' rutubē' la' queézē' yöl-la' tsahui', en bití' runē' le naca ca yöl-la' tsahui' lahuē' Dios.

Dios run chi'è yugu' bönachi queē'

(Mt. 6:25-34)

²² Gudödi ni' Jesús gudxē' yugu' bönni' uséda queē', rnnē':

—Que lē ni na' rea' libí'ili': Biti' ubi uguf'ili' ni'a que le gu'aj gáguli', lē na' nabánili', o ni'a que lari' gáculi'.

²³ Nácáro lesaca' yöl-la' na'bán queé'li' ca le ráguli', ate' nácáro lesaca' idú le nácali' ca lari' ráculi'.

²⁴ Buli'yutēz ca raca quégacaba' boíquiaj. Biti' tázaba', en bití' ta'lápaba', en bití' nacua' quégacaba' ga ilún chí'iba' le rulá' quégacaba', pero Dios rugahuē' légacaba'.

¿Naru' cabí nazáca'tēröli' libí'ili' ca yugu' biguínido'?

²⁵ ¿Nuzxi caz bönni' ládjali' gaca gunē' ga soē' ibanē' ia'tú chí'ido's

tu' ruúbi ruguí'i ládxi'da'ahué'? ²⁶ Que lë ni na', channö cabí gaca gunli' lë ni naca cuídí'sö, ¿bizx que ruúbi ruguí'ili' ni'a que le naca zxóntërö?

²⁷ 'Buli'yutéz ca ta'zxón yöjdo'. Biti' tun du lari', en biti' taba lari', pero rea' libí'ili', biti' gúcarö lachi le gúcué' Salomón ca nácagaca yöjdo' ni, sal-la' gúta'da' yöl-la' tsahui' queé'. ²⁸ Channö Dios runé' lachi yöj guíxi'do' rógaca na'a la' guixi', ate' cuxó huidzaj ila'gu'é léguequi lu guí', ¿naru' cabí guné' le nácarö dxi'a queé'li', libí'ili' na' biti' réajlë'éli' Dios idú ládxi'li'? ²⁹ Que lë ni na', biti' güf'i ládxi'li' le ral-la' gáguli', en le ral-la' guí'jali', en biti' ubi uguí'i ládxi'do'oli'. ³⁰ Yúgu'të lë ni ta'guilaj bönachi yödzülió ni, pero chinóz quéziné' Xúzili' Dios le riquínili'. ³¹ Guli'güf' ládxi'li' tsú'uli' ga rinná bë'é Dios, ate' yúgu'të lë ni cu'é xinöza queé'li'.

Yöl-la' tsahui' rigú'uru' yehua' yubá

(Mt. 6:19-21)

³² Gunné' ca' Jesús:

—Biti' gádxili', libí'ili' na' nácali' bö'cu' zxlá'do' quia'. Nabábasili' zóali', pero raza ládxe'é Xúzili' Dios gunné' queé'li' lataj tsú'uli' ga ni' rinná bë'é Lë'. ³³ Guli'guti' le dë queé'li', en buli'nödzej quegaca bönachi yechi'. Caní gaca, gunli' queé'li' yöxaj dumí le cabí gaca ditaj, en cú'uli' yöl-la' tsahui' na' yehua' yubá le biti' ubidxi udú, ga ni' biti' idxiné' bönni' gubán, en biti' usunítiba' böa'do' le. ³⁴ Ga ni' dë yöl-la' tsahui' queé'li', ni' güf'i ládxi'li' idxinli'.

Ral-la' sóaru' ban ladxi'

³⁵ Gunné' ca' Jesús:

—Guli'sóa sina', en guli'quela' guí' le uzení' queé'li'. ³⁶ Guli'gaca ca bönni' huen dxin ta'bözé' dza huödë' xángaquié', bönni' sa'yéajé' laní que yöl-la' rutsaga na', para cate' udxiné', en ulidzé', la' ila'sáljaté' queé' tsu'é. ³⁷ Bica'

bágaca huen dxin na' ila'cu'é ban ladxi' cate' huödë' xángaquié'. Le nácatë rea' libí'ili', up'a cuiné' xángaquié' na', ate' guné' ga ila'bözé' ga ilahué', ate' cu'é le ilahué'. ³⁸ Sal-la' huödë' cate' chiral-la o idú guluhuëla, channö idixáquié' légaquié' nacué' ban ladxi', bica' bágaca huen dxin na'. ³⁹ Lë ni ral-la' inózili'. La-tu' nóziné' xan yu'u bizxi dza huadxiné' bönni' gubán, usubán ládxe'é, en biti' gu'é lataj bönni' na' udxí'f' yeru lidxé', para cabí cuané' le dzö'ö lidxé'. ⁴⁰ Que lë ni na', guli'sóa ban ladxi' ca' libí'ili', tu' huöda' neda', Bönni' Guljé' Bönachi, tu dza biti' ribózali' neda'.

Bönni' huen dxin tsahui', en bönni' huen dxin biti' náquié' tsahui'

(Mt. 24:45-51)

⁴¹ Ní'irö Pedro gunábiné' Jesús, rnné':

—Xan, ¿naru' reo' nétu'sö lë ni rucúdz'u didza', o reo' ca' caní yúgu'të bönachi?

⁴² Rë' Xanru' lë':

—¿Nuzxi na' bönni' huen dxin tsahui', en réajni'iné', dë lu në'é uláz queé' xané'? Bönni' ni, xané' udödë' lu në'é lidxé' para cate' gála'rö ilahué' bönni' nacué' lidxé', gu'é que queégaquié' le ilahué'.

⁴³ Bica' ba bönni' huen dxin na' cate' huödë' xané', idixáquié' lë' runé' caní dxin na' nudödë' lu në'é.

⁴⁴ Le nácatë rea' libí'ili', udödë' xané' lu në'é bönni' huen dxin tsahui' na' idutë le dë queé'.

⁴⁵ Channö guéquiné' bönni' huen dxin na' huadzené' huödë' xané', ate' isí lahué' guí'aj gahué', en súdxiné', ⁴⁶ ní'irö huödë' xané' bönni' huen dxin na' cate' biti' ribözé' lë', en cate' biti' réquibe'ené', ate' usaca' zí'é bönni' huen dxin biti' náquié' tsahui' na', en ichúguié' queé' qui'i sáquié' ca narugu quegaquié' bönni' biti' ta'yéajlë'é.

⁴⁷ 'Bönni' huen dxin na' nóziné' le ré'ené' xané', en biti' zoé' sina', en biti'

runë' ca rnnë' xanë', bönni' ni, quínitërë' xanë' lë'. ⁴⁸ Channö cabí nózinë' tu bönni' huen dxin le ré'ënë' xanë', en gunë' le gun ga íbáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxë'ë lë' le zxön, le zxöntërö ca' unabë' xanë' lu në'ë bönni' huen dxin na'.

**Le náquië' Jesús gun
ga íla'rúaj choplö bönachi**

(Mt. 10:34-36)

⁴⁹ Gunnë' ca' Jesús:

—Bida' neda' dujéna' ga tsegui guí yödzölió ni, en caba ládxa'a chinaguéla' guí na'. ⁵⁰ Na'a, dë tu le ral-la' qui'i saca'a le naca ca tu le idíflida' nisa, ate' rö'a böniga ga idxintë gaca caní quia'. ⁵¹ ¿Naru' réquili' bida' dulequi dxía' le raca yödzölió ni? Rea' libí'ili': ¡Calëga! Bida' duléquia' le gun ga íla'rúaj choplö bönachi. ⁵² Na'a isí lo ulu'lá'alén luzé'eguequi gayu' bönachi nacua' tu yu'u. Tsonnë' íla'dá'baguë'ë chopë' nazí'igaquië' xtídza'a, ate' chopë' na' íla'dá'baguë'ë tsonnë' na'. ⁵³ Nu bönni' zóabi' bí'i bönni' queë' tá'baguë'ë zxf'inë' na', ate' bí'i bönni' na' tá'baga'bi' xúzibi'. Nígula zóabi' bí'i nígula queénu tá'baga'nu zxf'ininu na', ate' bí'i nígula na' tá'baga'bi' xiná'abi'. Nígula zóanu nígula zxoa' lídxinu tá'baga'nu zxoa' lídxinu na', ate' nígula zxoa' lídxinu na' tá'baga'nu xto' zxf'ininu.

Le nácgaca bë' le taca na'a dza

(Mt. 16:1-4; Mr. 8:11-13)

⁵⁴ Jesús gudxë' ca' bönachi zían nacua' ni', rnnë':

—Cate' rilé'eli' za' böaj saca' ga ribía gubidza, la' rnnátëli': “Hualaj guió'j”, ate' caní raca. ⁵⁵ Cate' recja bö' za' saca' ga ridödi gubidza beo' ziaga, rnnali':

“Udzá'a na'a”, ate' caní raca. ⁵⁶ Libí'ili', bönni' rulu'í'sö tsahui' cuinli'. Nózili' le rulu'í le raca lúzhiba, en le raca luyú ni, pero bití' réquibe'eli' le rulu'í le nácgaca bë' taca dza ni zóaru' na'a.

**Ral-la' ugá'analenru'
tsahui' nu rilé rë'u**

(Mt. 5:25-26)

⁵⁷ Gunnë' ca' Jesús:

—¿Bizx que bití' ruchi'a rusöröli' la' libí'isili' ca naca le naca tsahui'? ⁵⁸ Channö zoa nu bi unabi yudxi lí', ate' zéajli' idxinli' yúlahui', bë' ladxi' ugá'analenru' tsahui' nu na' tsanni ni' yú'uli' nöza, para cabí uzegui lí' lahuë' bönni' uchi'a usöröë' libí'ili', ate' bönni' uchi'a usöröë' na' udödë' lí' lu në'ë bönni' rusayjë' lidxi gufë, ate' bönni' na' rusayjë' lidxi gufë cu'ë lí' lidxi gufë na'. ⁵⁹ Rea' lí', bití' uruju' ni' cate' údxirö quízxju' yúgu'të dumí lásido' ral-lu'u que nu na'.

Run bayudxi ubí'i ládxi'ru'

13 La' dza ní'isö bila'dxinë' bönni' ta'guíxjöi'inë' Jesús ca benë' Pilato, bétie' bal-lë' bönni' Galilea, en guzxi'ë rön quégaquië', le bugútsi'në' xichóngacaba' böa' bëdxi chigulútië' lé-gacaba' para íla'gu'ë xichóngacaba' na' lahuë' Dios. ² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ía'zíca'rë' bönni' Galilea, tu' gula'gu'í gula'zaquië' caní? ³ Rea' libí'ili': ¡Calëga! Channö cabí ubí'i ládxi'lí', nítili' ca' yúgu'tëli'. ⁴ Lëasca' caní guca quégaquië' chizxunë' bönni' ni', yöjbaga' yu'u sibi na' nazí' le Siloé lé-gaquië', ate' gulátie'. ¿Naru' réquili' gula'bága'tërë' légaquië' xíguia' ca ía'zí-ca'rö bönachi nacua' Jerusalén? ⁵ Rea' libí'ili': ¡Calëga! Channö cabí ubí'i ládxi'lí', nítili' ca' yúgu'tëli'.

Rucúdzu'è didza' Jesús que yaga higo biti' bi ribía

⁶Ní'irö bucúdzu'è didza' Jesús, rë' légaquié':

—Zoé' tu bönni', zoa tu yaga higo nazé' ga naca lu xiyúé'. Rójtijé' le ribía yaga na', pero biti' bi ridzólné'. ⁷Ní'irö gudxé' bönni' runé' dxin lu xiyúé' na', rn-
né': "Chiguca tsonna iz rida' rududilja' le cuía yaga higo ni, en biti' bi ridzólni-
da'. Guchugu le. ¿Bizx que run nigui luyú ni?" ⁸Ní'irö bubí'è didza' bönni' huen dxin na', rë' lé: "Xan, bucá'anagarö le ia'tú ízatéz, ate' uzatsa' yu zxani, en cu'a bëbu zxani. ⁹Channö cuía yaga ni, gaca dxi'a, pero channö cabí bi cuía, ní'irö ichugu' le."

Ruúné' Jesús tu nigula ré'enu cate' naca dza lá'ayi

¹⁰Tu dza rusédiné' Jesús bönachi nacua' lu yu'u ga tu'dubé' bönni' judío, en tu'sédé' queé' Dios cate' naca dza lá'ayi quegaquié'. ¹¹Zóanu tu nigula ni' chiguca chixxunu' iz ré'enu, tu' yu'u lënu bö' xihui' run ga te'e bönachi, ate' nayé'chutica'sinu ridanu, en biti' ca' raca ulí cuinnu. ¹²Cate' bilé'ené'-nu Jesús, bulidzé'-nu, rnné':

—Nigúlado', chibóácu' que yödzöhué' quiu'.

¹³Ní'irö Jesús guxóa në'è lënu, ate' la' bulitë cuinnu, en gulú'unu-né' Dios yöl-la' ba. ¹⁴Ní'irö guléné' bönni' lo que yu'u ga na' tu'dubé' tu'sédé' queé' Dios. Rilené' tu' buné' Jesús nigula na' cate' naca dza lá'ayi. Bönni' lo na' gudxé' nupa nacua' ni', rnné':

—Xopa dza nacua' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

¹⁵Ní'irö bubí'è didza' Xanru', rnné':

—Libí'ili', bönni' rulu'isö tsahui' cuinli', ¿naru' cabí rusédxigacali'-ba' böa' bédxi que queé'li' ga na' dá'gacaba' cate'

naca dza lá'ayi, ate' tsöjuá'agacali'-ba' para ilé'ajba' nisa? ¹⁶Nácanu nigula ni xxi'ini xi'sóé' Abraham, ate' idú chixxunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

¹⁷Cate' bë'è didza' ni Jesús, bulu'-tu'íné' yúgu'té bönni' nacu'è ni' ta'lené' Lë', pero bulu'dzeja ia'zica'rö bönachi, yúgu'té nupa nacua' ni', tu' ta'lé'ené' yugu' le zxön runé' Jesús.

Rucúdzu'è didza' Jesús que xisedo' mostaza

(Mt. 13:31-32; Mr. 4:30-32)

¹⁸Ní'irö rnné' Jesús:

—¿Nacxi caz raca rizxón le rinná bë'è Dios, o bizxi uséqui'tseru' le? ¹⁹Raca ca raca que xisedo' mostaza, le guzxi'è tu bönni', ate' guzë' le ga naca lu xiyúé'. Guzxón yaga mostaza na', en guca ca tu yaga zxön, ate' bila'dxinba' biguinnido', gulunba' xcá'agacaba' lu ni'a në'e yaga mostaza na'.

Rucúdzu'è didza' Jesús que cúa zi que yöta xtila

(Mt. 13:33)

²⁰Lësca' caní rnné' Jesús:

—¿Bizxi caz uséqui'tseda' le rinná bë'è Dios? ²¹Naca ca cúa zi que yöta xtila, le guzxi'inu tu nigula, en bugútsi'nu tsonna cö' cúa yöta xtila, ate' guyazxaj idúté' cúa na'.

Tu ga tódiru' le naca guído'

(Mt. 7:13-14, 21-23)

²²Tsanni ni' yu'è nöza Jesús, sa'yéajé' Jerusalén, ridödé' yugu' yödzö zxön, en yugu' yödzödo', ate' rusédiné' bönachi nacua' gapa na'. ²³Tu bönni' zoé' ni' gunábiné' Jesús, rnné':

—Xan, ¿naru' nabábasö nupa ulu'lágaca?

Jesús rë' nupa nacua' ni', rnné':

24—Guli'güf'i ládxi'li' tsú'uli' saca' ga nu ridödi le naca guído', tu' rea' lib'í'li': Zían nupa ilé'ëni ila'yaza ni', pero biti' ila'zéqui'né'. 25 Tödi chasé' Xan yu'u, en usayjé' yu'u, isí loli' lib'í'li' na' zóali' ní'lö ulídzali'-né' ra' yu'u na', ate' guiéli'-né': "Xan, Xan, gusalaj queé'tu." Ní'irö ubi'ë didza' Lë', en gufé' lib'í'li': "Biti' nözda' nuzxi lib'í'li'." 26 Ní'irö isí loli' innali': "Güf'i gudágulentu' Li', ate' busédinu' gapa naca lu yé'eyi queé'tu." 27 Ní'irö gufé' lib'í'li': "Rea' lib'í'li', biti' nözda' gazxi bönachi lib'í'li'. Guli'cuíta ga zoa', yúgu'téli' ruá'ali' dö'." 28 Ní'irö cödxí yéchi'li', en gagu zxea láya'li' cate' ilé'egacali'-né' Abraham, en Isaac, en Jacob, en yúgu'té bönni' gulu'ë didza' uláz queé' Dios, nacu'ë ga ni' rinná bē'ë Dios, pero lib'í'li' sóali' ní'lö. 29 Ila'dxín bönachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahué' ga ni' rinná bē'ë Dios. 30 Ní'irö ilaca lo bal-la bönachi nácgaca cá'asö na'a, ate' ulu'gá'ana cá'asö bal-la nupa nácgaca lo na'a.

Ribödxí yeché'ë Jesús ni'a quégaca bönachi Jerusalén

(Mt. 23:37-39)

31 La' dza ní'sö bila'dxiné' bal-la bönni' yudo' fariseo ga zoé' Jesús en té' Lë':
—¡Burúaj! ¡Buzxunnaj ni! ¡Ré'ëné' Herodes gútié' Li'!

32 Jesús ré' légaquié':

—Guli'tséaj, guli'tsöjödxe' bönni' na' náquié' ca tuba' böza', innali': "Buyútsö-ca', rubéajgaca' bö' xihui', en ruúna' bönachi na'a, en cuxó, en cate' gaca lidzaj, údxi guna' dxin quia'." 33 Run bayudxi tséajlensa' ca' nöza na'a, en cuxó, en huidzaj, ate' idxina' Jerusalén, tu' túti-gaquié' bönni' tu'ë didza' uláz queé' Dios ni'.

34 'Lib'í'li', zóali' Jerusalén. Rútigacali'-né' bönni' tu'ë didza' uláz queé' Dios, en ruládxi'gacali'-né' guiój bönni' gubáz risól-lé'ë Dios ga zóali'. Cate' xö zían luzuí gú'unida' utuba' lib'í'li' quia' ca runba' yöjede, rutúbiba' bórado' queé'ba' zxan xíliba', pero biti' gú'unili'. 35 Buli'yútsöca', cá'asö ugá'ana lídxili', ate' rea' lib'í'li', bíti'rö ilé'eli' neda' cate' idxinrö dza innali': "Bica' ba Nu na' za' uláz queé' Xanru'."

Muñé' Jesús tu bönni' ré'ené' hué' gui

14 Cate' naca dza lá'ayi quégaquié' bönni' judío, guyu'ë Jesús lidxe' tu bönni' unná bē', bönni' yudo' fariseo. Rö'ë Jesús rahué', ate' nacu'ë bönni' yudo' fariseo ni' ta'né'ë Lë'. 2 Zoé' ca' tu bönni' ré'ené' hué' gui ga na' zoé' Jesús. 3 Ní'irö Jesús gunábiné' bönni' yudo' usedi táquié' xibá queé' Moisés, en yugu' bönni' yudo' fariseo, rnné':

—¿Naru' dē lataj unru' nu re'e cate' naca dza lá'ayi?

4 Légaquié' bulu'sayaj ruá'agaquié'. Ní'irö Jesús gudélé'ë bönni' hué' na', en buné' lé', ate' la' busól-la'té' lé'. 5 Ní'irö Jesús ré' yugu' bönni' yudo' na', rnné':

—Channö nu bönni' ládjali' nacuá'aba' queé' böa' bēdxi, ate' ibíxiba' tuba' lu yeru, ¿naru' cabí tsöjléajtē-ba', sal-la' naca dza lá'ayi?

6 Biti' bi didza' guca ulu'bi'ë ca naca lé ni.

Nu cö' lataj lo

7 Cate' bilé'ené' Jesús ca tuné' bönni' yudo' fariseo na', ta'bö'ë lataj lo ga na' ta'bö'ë tahué', ní'irö bucúdzu'ë didza', ate' ré' légaquié':

8—Cate' nu bönni' ulidzé' lí' guído' ga raca laní que yöl-la' rutsaga na', biti' cö'u lataj lo. Nadxi ca' nulidzé' ca' tu bönni' nácatéré' lo ca lí'. 9 Ní'irö bönni' na' bulidzé' lí' huidé' ga zu', en gufé'

li: “Bé’ lataj bönni’ ni cö’ë ga zu”, ate’ ní’irö lu yöl-la’ rutufi quiu’ tsöjchö’u zxánitëlö. ¹⁰ Que læ ni na’, cate’ nu bönni’ ulidzë’ li’, guyéaj yöjchó’ zxánitëlö, para cate’ idxinë’ bönni’ na’ bulidzë’ li’, huë’ li’: “Bócha’a, gudödi ia’lati’ nilö.” Ní’irö gácaru’ li’ lo lógaca nupa ta’bö’len li’ tsözxón. ¹¹ Nu run ba zxön cuini, ilunë’ ga huöta’ huöxaj, pero nu zoa nöxaj ladxí, ilunë’ ga gácarö lo nu na’.

¹² Jesús rë’ ca’ bönni’ na’ bulidzë’ Lë’, rnnë’:

—Cati’ gunu’ tu güf’i huagu o tu laní-do’, biti’ ulídzagacu’-në’ yugu’ böchi’ luzó’o, en yugu’ bönni’ bóchu’u, en yugu’ dí’a dza quiu’, en dzaga yu’u quiu’ ta’lé’enë’ yöl-la’ tsahui’ quégaquië’, tu’ ulu’lidzë’ ca’ li’, ate’ caní gaca, ub’i quiu’. ¹³ Cate’ gunu’ tu güf’i huagu, bulidza yugu’ bönachi yechi’, en nupa nabixi ni’a ná’agaca, en nupa biti’ raca sá’gaca, en yugu’ bönni’ lo chul-la. ¹⁴ Ní’irö gacu’ bica’ ba, tu’ cabí gaca bi ulu’bi’ë bönni’ caní quiu’, pero ub’i quiu’ cate’ idxín dza ulu’bán nupa gulún le naca tsahui’, en gulátigaca.

Rucúdzu’ë didza’ Jesús que tu laní zxön

¹⁵ Cate’ tu bönni’ rö’ë rágulenë’ Jesús biyönnë’ didza’ ni, rë’ Lë’:

—Bica’ ba nu gagu ga ni’ rinná bë’ë Dios.

¹⁶ Jesús rë’ læ’:

—Zoë’ tu bönni’ benë’ laní zxön, ate’ zían nupa bulidzë’. ¹⁷ Cate’ chinabá’a la’ huagu, gusól-lë’ë bönni’ huen dxin queë’ tsöjödxe’ nupa na’ chinulidzë’, gunné’: “¡Guli’dá! ¡Yúgu’të chinabá’a!” ¹⁸ Gula’sí lógaquië’ yúgu’të’ ta’nabë’ lataj cabí tsöjáquië’. Bönni’ zí’alö na’ rnnë’: “Si’ guzxi’a tu luyú, en runda’ bayudxi tsöjyúa’ le. Ráta’yua’ lo’ gunnu’ neda’ lataj.” ¹⁹ Ia’túë’ rnnë’: “Si’ guzxi’a gayu’ nózaba’ bëdxi, ate’ tsöjzxi’ bë’a légacaba’ ugúngaca’-ba’ dxin. Ráta’yua’ lo’ gunnu’

neda’ lataj.” ²⁰ Ia’túë’ rnnë’: “Si’ butsaga na’a, en que læ ni na’ biti’ gaca guí-da.” ²¹ Cate’ bóajë’ bönni’ huen dxin na’, yöjtíxjö’inë’ xanë’ yúgu’të læ ni. Ní’irö gulënë’ bönni’ xan yu’u na’, ate’ gudxë’ bönni’ huen dxin na’, rnnë’: “Guyéajtë na’a gapa naca lu yé’ëyi, en gapa naca la’ nöza que yödzo ni, ate’ ichë’u yugu’ bönachi yechi’ ni, en nupa nabixi ni’a ná’agaca, en nupa biti’ raca sá’gaca, en yugu’ bönni’ lo chul-la.” ²² Cate’ chinunë’ bönni’ huen dxin na’ caní, rnnë’: “Xan, chibena’ ca na’ gunná bé’enu’ neda’, ate’ ni dë’ lataj.” ²³ Ní’irö xanë’ gudxë’ bönni’ huen dxin na’, rnnë’: “Guyéaj gapa naca la’ nöza, en gapa naca nöza lasi, ate’ ben bayudxi guídigaca nupa nacuá’ ni’ para ilí lidxa’, ²⁴ tu’ rea’ libí’ili’: Biti’ gahuë’ que laní quia’ nitúë’ bönni’ ni’ bulidza’ zí’alö.”

Le sáca’ru’ cate’ zéajlenru’-në’ Cristo

²⁵ Yugu’ dza ni’ röjácalen Jesús bönachi zían, ate’ buécjé’ Jesús, en rë’ légaquië’:

²⁶ —Channö guídalenë’ neda’ tu bönni’, en biti’ idxí’irönë’ neda’ ca nadxí’inë’ xuz xinë’ë, en nigula queë’, en yugu’ zxf’inë’, en yugu’ bi’i bóchë’ë, en yugu’ bi’i zanë’, en yöl-la’ na’bán queë’, biti’ gaca gáquië’ bönni’ usëda quia’. ²⁷ Nu bönni’ biti’ gáquië’ ca tu bönni’ sa’yéajë’ söjtë’ë læ’e yaga cruz, ate’ të’ë neda’, biti’ gaca gáquië’ bönni’ usëda quia’. ²⁸ Channö zoë’ nu bönni’ ladaj libí’ili’ gué’ennë’ gunë’ tu yu’u zían cuía, çnaru’ cabí cö’ë zí’alö ulabë’ gáca’xi dumí ralla’ utóë’ para inózinë’ channö dë’ queë’ tsca le riquinnë’ para údxi gunë’ yu’u na’? ²⁹ Channö cabí gunë’ caní, en isí lahuë’ cuéquië’ xilibi yu’u na’, ate’ biti’ gaca údxi gunë’ yu’u na’, ní’irö ila’sí lógaca yúgu’të nupa ila’lé’e le ulu’titaj læ’, ³⁰ ila’nná: “Bönni’ ni gusí lahuë’ runë’ yu’u, pero biti’ guca údxi gunë’ le.” ³¹ Lë’sca’ caní, channö zoë’ nu bön-

ni' rinná bē'ē, en ral-la' tsejē' gudil-la tsōjtíl-lalenē' ia'túē' bōnni' rinná bē'ē, ζnaru' cabí cō'ē z'f'alō, en cuéqui icjē' channō séqui'nē' tsōjtíl-lalenē' bōnni' ni' nachē'ē galaj milē' bōnni', ate' lē' chi milsē' bōnni' nachē'ē? ³²Channō cabí séqui'nē', cate' ni' zoē' zī'tu' ia'túē' bōnni' na' rinná bē'ē, isól-lē'ē bōnni' gubáz queē', ate' inábinē' lē' nacxi ral-la' gunē' para ulu'dzáguiē' dxi'a. ³³Caní naca, channō zoē' nu bōnni' ladaj lib'ili' bití' ucá'anē' yúgu'tē le dē queē', bití' gaca gáquiē' bōnni' usēda quia'.

Zōdi' le naniti yōl-la' siná'a que

(Mt. 5:13; Mr. 9:50)

³⁴Gunnē' ca' Jesús:

—Dxi'a naca zōdi', pero channō initi yōl-la' siná'a que, ζnacxi gaca úniru' le siná'a? ³⁵Bítirō nazaca' zōdi' na', calēga para luyú, en calēga para ga rírú'uniru' bēbu, pero chú'unaru' le n'ílō. Nu zoa nagui, en riyōni, ral-la' uzē nagui nu na'.

Rucúdzu'ē didza' Jesús ca naca queēba' bō'cu' zxila' gunítiba'

(Mt. 18:10-14)

15 Bulu'dubē' yúgu'tē bōnni' tu'quízxjē' lázagaca bōnachi, en yugu' bōnni' cá'asō ga zoē' Jesús para ulu'zē náguiē' Lē'. ²Que lē ni na' yugu' bōnni' yudo' fariseo, en yugu' bōnni' yudo' usedi gula'nnē' queē' Jesús, ta'nnē':

—Bōnni' ni runē' bal yugu' bōnni' dul-la', en rágulenē' légaquiē'.

³Ní'irō bucúdzu'ē didza' Jesús, rē' légaquiē':

⁴—Channō zoē' tu bōnni' ladaj lib'ili', nacua'aba' queē' tu gayua'aba' bō'cu' zxila', en channō nítiba' tuba', ζnaru' cabí ucá'anē' ia'zica'rōba' tápalalaj yu' chēnnaba' na' ga naca lu lataj cá'asō, ate' tsejē' tsōjdiljē'-ba' bō'cu' zxila' na' nanítiba', cate' udzólirōnē'-ba'? ⁵Cate' udzólínē'-ba', lu yōl-la' rudzeja queē'

ixóē'-ba' ya' zxicjē', ⁶en cate' udxinē' lidxē' utubē' yugu' bōchi' luzé'ē, en yugu' dzaga yu'u queē', ate' guíē' légaquiē': “Bulí'dzējalen neda', tu' chibudzólida'-ba' bō'cu' zxila' quia' gunítiba'.” ⁷Rea' lib'ili': Lēasca' caní gácatērō yōl-la' rudzeja yehua' yubá ni'a queē' tuē' bōnni' dul-la' ubí'i lādxi'ē ca gaca quegaquiē' tápalalaj yu' chēnnē' bōnni' tsahui', bōnni' téquinē' bití' naquíniguequinē' ulu'bí'i lādxi'gaquiē'.

Rucúdzu'ē didza' Jesús que tu dumí guniti

⁸Rnnē' ca' Jesús:

—Channō zóanu tu nigula, dē queénu chi dumí plata, en channō initi tu dumí plata na', ζnaru' cabí uquéla'nu guí', ate' ulúanu yu'u, uguilaj yúdxinu le cate' udzólirōnu le? ⁹Cate' udzólínu le, utúbinu yugu' nigula luzá'anu, en yugu' nigula dzaga yu'u queénu, ate' guiénu légacanu: “Bulí'dzējalen neda', tu' chibudzólida' dumí plata na' guniti.” ¹⁰Rea' lib'ili': Lēasca' caní, ulu'dzējade'erōnē' gubáz lá'ayi queē' Dios ni'a queē' tuē' bōnni' dul-la' ubí'i lādxi'ē.

Rucúdzu'ē didza' Jesús queēbi' tu bi'i gunítibi'

¹¹Rnnē' ca' Jesús:

—Zoē' tu bōnni' nacua'abi' chópabi' bi'i bōnni' queē'. ¹²Bi'i cuidí' na' rēbi'nē' xúzibi': “Dad, benna quia' le dē quiu' le ral-la' guequi quia'.” Ní'irō xúzibi' na' gudísiē' quégacabi' le dē queē'. ¹³Nabábasō dza gudzé, bi'i cuidí' na' butúbibi' yúgu'tē, ate' guyéajbi' tu yōdzō zī'tu', ate' ni' butōbi' dērō le dē queēbi'. Le ruá' dō' benbi'. ¹⁴Cate' chibutōbi' dērō le dē queēbi', guca gubín lu yōdzō ga na' zóabi', ate' biyadzaj queēbi'. ¹⁵Ní'irō guyéajbi' yōsóabi' huen dxin queē' tu bōnni' lu yōdzō ni', ate' bōnni' na' gusól-lē'ē-bi' ga dē xiyúé' tsōjgágubi'-ba' yugu' cuchi queē'. ¹⁶Guca lādxi'bi'

gágubi' guixi' cá'so na' táguba' cuchi, pero cuntú nu bi bē' le gágubi'. ¹⁷Ní'irō bubí'i lādxi'bi', rñnabi': "Cate' xō bōn-ni' huen dxin nacu'ē lidxē' zuza', en dē-da' le tahuē', pero neda' ni huáti caza' yōl-la' ridún. ¹⁸Uzá'a ni, huōja' ga zoē' zuza', en tsōjōdxa'-nē': Dad, bena' dul-la' lahuē' Dios, zoē' yehua' yubá, en lo' li'. ¹⁹Bíti'rō naca' neda' lesaca' gaca' zxf'ínu'. Ben neda' ca bōnni' huen dxin quiu'." ²⁰Ní'irō guyú'ubi' nōza, sōhuóa-jbi' ga zoē' xúzibi'.

'Cate' ni' zóabi' zítu' suzá'abi', bilé'enē'-bi' xúzibi', en buéchi' lādxi'ē-bi'. Carelō yōjzxf'galē'-bi' xúzibi', en yōjnidē' yenbi', gudahuē'-bi' zxxi. ²¹Ní'irō zxf'inē' na' rēbi'-nē': "Dad, bena' dul-la' lahuē' Dios, zoē' yehua' yubá, en lo' li'. Bíti'rō naca' neda' lesaca' gaca' zxf'ínu'." ²²Ní'irō xúzibi' rē' yugu' bōnni' huen dxin queē', rñnē': "Gulí'tsōjléajtē lari' nazáca'tērō, en guli'gacu-bi'. Guli'cú'u le nazaca' xibón ná'abi', en buli'dá' huarache n'abi'. ²³Gulí'tsōjzxf'i-ba' bēdxi renni', ate' guli'guti-ba'. Gáguru'-ba', en gunru' laní, ²⁴tu' guca bi'i bōnni' quia' ni ca tu bi'i chinátibi', ate' bubanbi'. Gunítibi', ate' chibulá'abi' na'a." Ní'irō gula'sí lógaquiē' tu'dzéjanē'.

²⁵Tsanni ni' raca lē ni, zóabi' bi'i bōnni' z'f'alō queē' bōnni' na' la' guixi'. Cate' suzá'abi' rudxinbi' gala' ra' yu'u, riyónibi' raca huila, en raca huō'a lu yu'u na'. ²⁶Ní'irō bulífdzabi'-nē' tuē' bōnni' huen dxin zoē' ni', en gunábibi' lē' bizxi na' raca. ²⁷Bōnni' huen dxin na' rē'ē-bi': "Bi'i bóchu'u na' budxinbi', ate' gunná bē'ē zuzu' gulútiē'-ba' bēdxi renni', tu' budxinbi' lu nē'ē dxi'a tsáhui'-do'." ²⁸Ní'irō gulébi' bi'i z'f'alō na', en bití' gú'unibi' tsú'ubi' yu'u. Ní'irō birúajē' xúzibi', en gúta'yué' lobi' tsú'ubi'. ²⁹Bubí'ibi' didza' bi'i z'f'alō na', rēbi'-nē' xúzibi': "Nōz quézinu' cate' xō iz bena' dxin lo', en catu caz gudá'ba-

ga'a li', pero catu caz bennu' quia' tuba' bō'cu' zxf'la'do' para gú'f'ilena' xibē' yugu' luzá'a. ³⁰Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútiē'-ba' bēdxi renni' ni'a queébi'." ³¹Ní'irō xúzibi' rē'ē-bi', rñnē': "Zxf'ina', li' zóalen casu' neda' ate' yúgu'tē le dē quia', quiu' nequi. ³²Ben bayudxi gunru' laní, en udzējaru', tu' gúcabi' bi'i bóchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

Rucúdzu'ē didza' Jesús queē' bōnni' huen dxin bití' náquiē' tsahui'

16 Jesús rē' ca' yugu' bōnni' dá'-gaquiē' Lē', rñnē':

—Zoē' tu bōnni' dē yōl-la' tsahui' queē', en zoē' ca' queē' tuē' bōnni' huen dxin dē lu nē'ē uláz queē'. Bila'dxinē' yugu' bōnni' tu'zéguiē' bōnni' huen dxin na' lahuē' xanē', ta'nne' queē' rutōsē' le dē queē' xanē' na'. ²Ní'irō xan yu'u na' bulidzē' bōnni' huen dxin na', en rē' lē': "¿Bizxi didza' ni riyōnda' quiu'? Bulu'fi neda' le naca bē' dxin nunu', tu' cabirō gata' lu no'o uláz quia'." ³Ní'irō guzá' lādxi'ē' bōnni' huen dxin na', rñnē': ¿Nacxi guntsa'? Rubéajē' xana' neda' lataj lo ga runa' dxin. Biti' séqui'da' guna' dxin gú'una, en utuf'ida' inaba' nu bi gúnna'so quia'. ⁴Na'a nōzda' naca guna' para cate' ubéajē' neda' lataj lo ni, ila'cuá' nupa ulu'z'f' neda' lídxi'guequi. ⁵Ní'irō bōnni' huen dxin na' bulidzē' yugu' bōnni' bi tál-lē'ē queē' xanē', ate' rē' bōnni' z'f'alō: "¿Gáca'xi ral-lu'u queē' xana'?" ⁶Lē' rñnē': "Tu gayuá' rō'ō chugu le za ral-la'a." Bōnni' huen dxin lo na' rē' lē', rñnē': "Ni dē guichi ga nazúaj le ral-lu'u. Guró'otē ni, en buzúaj ia'tú lu guichi le inná chi-un rō'ō chugu ral-lu'u." ⁷Gudōdi ni' gunábinē' ia'túē', rñnē': "Nazxi li', ¿gáca'xi ral-lu'u?" Lē' rñnē': "Tu gayuá' da'a zxo'a' xtila'." Ní'irō

bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." ⁸ Réquibe'enë' xanë' na' sí-na'të benë' bönni' huen dxin biti' náquië' tsahui' na'. Caní naca, nácacagarë' sina' bönni' yödzölió ni lu le tunë' la' léga-casë', ca nácacaga bönachi ta'dalen Dios lu bení queë'.

⁹ 'Neda' rea' lib'íli': Guli'cózalen bönachi dxi'a, ugunli' dxin yöl-la' tsahui' dë queé'li' yödzölió ni, para cate' idxín dza ucá'anali' yugu' lë ni, ilunë' lib'íli' bal lataj ni' zóaticas'ó.

¹⁰ 'Nu rugún dxi'a dxin tu le cuídi'só dë lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídi'só dë lu në'e, biti' ugún dxi'a dxin tu le zxön gata' lu në'e. ¹¹ Que lë ni na', channö cabí rugunli' dxi'a dxin yöl-la' tsahui' dë queé'li' yödzölió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí rugunli' dxi'a dxin le dë lu ná'ali' le nequi que nu yúbölö, ¿nuzxi caz udödi lu ná'ali' le ral-la' guequi que quézili'?

¹³ 'Biti' gaca nitué' bönni' huen dxin gunë' xichíngaca chopaxanë', tu' udf'inë' tuë', en idxí'inë' ia'tué', o gunë' bal tuë', en uzóë' tsólá'alö ia'tué' na'. Biti' gaca gunli' xichinë' Dios, en gunli' ca' dxin para uz'íli' xibé yöl-la' tsahui' que yödzölió.

¹⁴ Bila'yönnë' bönni' yudo' fariseo didza' ni, ate' tu' nadxf'iguequinë' yöl-la' tsahui' quegaquië', que lë ni na' bulu'titjé' Jesús. ¹⁵ Ní'irö Jesús rë' légaquië':

—Lib'íli' rubéaj dxi'a cuinli' lógaca bönachi, pero nózinë' Dios le yu'u icja ládxi'do'oli', tu' naca lë na' tun zxön bönachi tu le ruzóë' Dios tsólá'alö.

Xibá queë' Moisés, en le rinná bë'ë Dios

¹⁶ Gunnë' ca' Jesús:

—Ga bidxintë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusi lo raca libán ca gaca nu tsaza ga rinná bë'ë Dios, ate' tun bayudxi yúgu'të bönachi ila'yaza ni'.

¹⁷ 'Sal-la' raca caní, gácarö ila'dödi que lúzxiba, en que luyú ni ca initi tu dídzas'ó nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

¹⁸ Gunnë' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queénu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdzu'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazá-ca'da', ate' yugu' dza rúnticasë' laní, ate' té'aj tahuë' le banéquiní. ²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzej queë', ate' hué'tézë' rō'ë ra' yu'u queë' bönni' na' rilé'enë' yöl-la' tsahui'. ²¹ Raca ládxe'ë bönni' yéchi'do' na' gahuë' le bizxaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lé'ëba' lu huë' queë' bönni' yéchi'do' na'. ²² Bidxín dza gútië' bönni' yéchi'do' na', ate' gubáz lá'ayi queë' Dios gula'ché'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáché'ë lë' yeru ba. ²³ Cate' ni' riguí'i rizáque'ë bönni' na' bilé'enë' yöl-la' tsahui', zoë' lataj quegaca nupa náti-gaca, guchisa lahuë', en bilé'enë' Abra-

ham zoë' zi'tu', en dzáguie' Lázaro na' lë'.
²⁴Ní'irö bē'ë zidzaj didza', rnnē: "Xuza', Abraham, buéchi' ladxi' neda'. Gusól-la' Lázaro quia' para usubisē' xibón nē'ë, en udusuhoálē' lúdx'a'a, tu' riguf'i rizá-ca'a lu gu' ni." ²⁵Abraham rē' lē', rnnē: "Zxí'ina', busá' ládXu'u ca guca quiu', buzi'u xibé' yöl-la' tsahui' tsanni ni' zu' nabanu', pero Lázaro ni, guca queē' yöl-la' yechi', ate' na'a, ruzí' zxonē' Lázaro ni, pero li' riguf'i rizácu'u. ²⁶Ia'stú, tu ra' guf'a sibi rō', le zoa gatsaj láchui'lō ga ni' zóali' libí'ili', en ga ni zóatu' netu'. Que lē ni na' nupa nacua' ni, en ilē'eni ila'dōdi ga zóali' libí'ili', bití' ca' gaca ilunē' ca', en bití' gaca ilida ni nupa nacua' ni.'" ²⁷Ní'irö bönni' na' bilé'enē' yöl-la' tsahui' rē' lē', rnnē: "Xuza' Abraham, rá-ta'yua' lo' isól-lu'u-nē' Lázaro tsejē' lidxē' xuzá', ²⁸tu' nacu'ë gáyu'ë bönni' bócha'a ni'. Gusól-lē'ë tsōjenē' liná' lo que le raca ni, para cabí guídigaquie' ca' lataj ga ni riguf'i rizáca'a." ²⁹Ní'irö Abraham rē' lē', rnnē: "Dē quégaquie' le buzúajē' lu guichi Moisés, en le bulu'zúajē' lu guichi bönni' gulu'ë didza' uláz queē' Dios. Yugu' didza' quégaquie' na' ral-la' ulu'zé náguie'." ³⁰Bubi'ë didza' bönni' na' bilé'enē' yöl-la' tsahui', rnnē: "Xuza' Abraham, bití' gaca caní, pero channö ubanē' tu bönni' lu yöl-la' guti, en tsejē' ga na' nacu'ë, ulu'bí'i ládxi'gaquie'." ³¹Abraham rē' lē', rnnē: "Channö cabí tu'zé náguie' didza' bē'ë Moisés, en le gula'nnē' bönni' gulu'ë didza' uláz queē' Dios, bití' ila'yéajlē'ë sal-la' nu ubán lu yöl-la' guti."

**Run bönadxi queéru'
gunru' ga nu gun dul-la'**

(Mt. 18:6-7, 21-22; Mr. 9:42)

17 Jesús rē' yugu' bönni' dá'gaquie'
Lē', rnnē:

—Nacua'tica'sö le tun ga ilún bönachi dul-la', pero bica' bayechi' bönni' na' runē' ga nu gun dul-la'. ²Dxi'arö gaca

queē' bönni' na' runē' caní, nu ugal-la' tu guioj' riyētu yaga yenē', en tsöjchú'una lē' lu nísado', cate'lō gunē' ga gun dul-la' nu bi'i néquibi' quia'. ³Gulí'gún chi'i cuinli'. Channö böchi' luzó'o gu'ë dö' quiu', buzéajni'i-nē', en channö ubí'i ládXē'ë, buniti lo lē'. ⁴Sal-la' gadxi luzuf' tu dza gu'ë dö' quiu', en gadxi luzuf' ca' guidē' ga zu', en gufē' li': "Rubí'i ládX-a'a", ral-la' uniti lo' lē'.

Yöl-la' huáca que le réajlē'ëru' Cristo

⁵Ní'irö yugu' bönni' gubáz queē' Xanru' tē' Lē', ta'nnē:

—Ben ga tséajlē'ërotu'-nē' Dios.

⁶Xanru' rē' légaquie', rnnē:

—La'tu' naca cuídísö yöl-la' réajlē' queéli' Dios, nácasö ca tu xisedo' mostaza, huáca guiéli' yaga zxon ni: "Gucuíta ni, en yöjsóa lu nísado", ate' gun yaga na' ca rnnali'.

Le ral-la' gun nu naca huen dxin

⁷Gunné' ca' Jesús:

—Channö zoë' tuē' bönni' ladaj libí'ili', en zoë' queē' tuē' bönni' nadó'o rugá'anē'-ba' bēdxi o rulapē', cate' údxi gunē' xichinē' xanē', ¿naru' huétsē' xanē' lē', innē: "Gudá, guró'ö gagu'?"

⁸¿Calèga! Caní guíe' lē': "Bupá'a le gahua'. Guzóa sina' cu'u le guf'aj gahua', ate' tódirö na' huáca guf'aj gagu' li'."

⁹¿Naru' huétsē' bönni' nadó'o queē' na': "Xclenu'", tu' benē' ca gunná bé'enē' lē'? Runi neda', bití' gunē' caní. ¹⁰Lésca' caní gaca queéli'. Cate' chinunli' yúgu'tē le gunná bé'enē' Dios libí'ili', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

**Chiē' bönni' té'enē'
huē' nudzu' ruzödi**

¹¹Tsanni ni' yu'ë Jesús nöza, sa'yéajjē' Jerusalén, ridödē' gapa dē yödzödo' nabábagaca luyú Samaria, en luyú

Galilea. ¹² Cate' guyázië' tu yódzödo', bila'rúajë' dutságagaquië' Lë' chië' bönni' té'enë' huë' nudzu' ruzödi, ate' gula'cu'ë zî'tu'sö, ¹³ en tu'ë zidzaj didza', ta'nné':

—¡Jesús, Bönni' Usedi! ¡Buéchi' ladxi' netu'!

¹⁴ Cate' bil'é'enë' Jesús légaquië', rë' légaquië':

—Guli'tséaj, guli'tsöjlu'fi cuinli' lógaca bixúz.

Tsanni ni' sôjáquië', bulu'huóáquië' dxi'a. ¹⁵ Ní'irö tuë' bönni' nútsë'ë ladjagaquië', cate' réquibe'enë' chinuhuóáquië' dxi'a, bóajë' ga na' zoë' Jesús, ruf'ítica'së' zidzaj didza', rigu'ë Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huóáquië' dxi'a chië' bönni'? ¿Gazxi nacu'á'tsë' ia'zica'rë' bönni' na'? ¹⁸ ¿Naru' cabí zoa nu huöda cu'u Dios yöl-la' ba, pero tuzë' bönni' zi'tu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

Ca idxín le rinná bë'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubí'ë didza', rë' légaquië':

—Ca idxín le rinná bë'ë Dios, biti' naca le il'é'eli'. ²¹ Cuntu nu gaca inná: "¡Ni bidxín!", o inná: "¡Ni' bidxín!" ¡Buli'yút-söca'! ¡Rinná bë'ë Dios lu icja ladxí'do'-gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' gué'ënili' il'é'eli' dza huöda' neda', Bönni' Guljë' Bönachi, pero biti' il'é'eli' le. ²³ Ila'cuá' nupa ilé lib'ili': "¡Ni zoë'!", o ila'nná: "¡Ni' zoë'!"

Biti' tséajli' ni', en biti' tséajlenli' légaquië'. ²⁴ Ca raca cate' rëpi yösa, ruzení' idá'alö lúzxiba, lësca' caní gaca cate' idxín dza huöda' neda', Bönni' Guljë' Bönachi. ²⁵ Zí'alö ca gaca lë ni, run bayudxi quí'í sáca'da', ate' bönachi dza ni zóaru' na'a ulu'cá'ana neda' cá'asö. ²⁶ Ca na' guca dza ni' zoë' Noé, lësca' caní gaca cate' idxín dza huöda' neda', Bönni' Guljë' Bönachi. ²⁷ Dza ni'te na' gulë'aj gulahuë'. Bulu'tsaga ná'agaquië', en bulu'dödë' zxf'inigaquië' lu yöl-la' rut-saga na' ga bidxintë dza guyázië' Noé lë'e barco zxon na' nazfi le arca, ate' bidxintë nisa guió'j usuniti yödzölió le busuniti yúgu'të'. ²⁸ Lësca' caní guca dza ni' zoë' Lot. Gulë'aj gulahuë'. Gulá'uë', en gulúti'ë. Gulazë' xiyúgaquië', en gulunë' yugu' yu'u quégaquië'. ²⁹ Cate' bidxín dza na' burúajë' Lot lu yödzö Sodoma, böxaj gu' ca tu nisa guió'j, enca' le ruzéguida' nazfi le azufre, ate' bulu'-suniti yúgu'të'. ³⁰ Lësca' caní gaca cate' idxín dza ulu'fi lahua' neda', Bönni' Guljë' Bönachi.

³¹ 'Cate' idxín dza na', channö zoë' tu bönni' ícjo'olö, en dzö'ö le dë queë' lu yu'u na', biti' ral-la' huötjë' tsöjzxi'ë le dë queë', ate' nu zoa la' guixi', lësca' caní, biti' ral-la' huöjë' lidxë'. ³² Guli'sá ladxí'li' ca guca queénu nigula queë' Lot. ³³ Nu bönni' ré'ënë' gun chi'ë yöl-la' na'bán queë', unítie' le, pero bönni' udödë' yöl-la' na'bán queë' ni'a quia', udélé'ë le.

³⁴ 'Rea' lib'ili': Cate' idxín rëla na', ila'cu'ë chopë' bönni' tsözzón ga tasië', ate' tuë' uduzxi'a-në', en ia'túë' ucá'ana' lë'. ³⁵ Ila'cuá'anu huëtu tsözzón chópanu nigula, ate' tunu uduzxi'a-nu, en ia'tunu ucá'ana'-nu. ³⁶ Ila'cu'ë chopë' bönni' la' guixi', ate' tuë' uduzxi'a-në', en ia'túë' ucá'ana' lë'.

³⁷ Cate' bila'yönnë' lë ni bönni' usëda queë' Jesús, gula'nábinë' Lë', ta'nné':

—Xan, ¿gazxi gaca lë ni?

Jesús rë légaquië’:

—Ga dë tu le nati, ni’ ulu’dubi quéziba’ bíchulab.

**Tu nigula uzëbi, en
bönni’ ruchi’a rusöröë’**

18 Ní’irö bucúdzu’ë didza’ Jesús, rë’ légaquië’ ca run bayudxi ulídzatica’siru’-në’ Dios, en biti’ gaca chopa ládxi’ru’. ²Rnnë’:

—Zoë’ tu bönni’ ruchi’a rusöröë’ tu yödzo, bönni’ biti’ rádxinë’ Dios, en biti’ runë’ nu bönni’ bal. ³La’ yödzo ná’asö zóanu tu nigula uzëbi, ate’ bidxinnu nigula ni ga zoë’ bönni’ ruchi’a rusöröë’ na’, rnnanu: “Buchi’a busörö le run quia’ nu ruá’ dö’ quia’.” ⁴Xidzé biti’ gú’unnë’ bi gunë’ queënu, pero gudödi ni’ guzá’ ládxe’ë, rnnë’: “Biti’ rádxida’-në’ Dios, en biti’ runa’ nu bönni’ bal, ⁵pero tu’ rupízxjanu nigula uzëbi ni neda’, que lë ni na’ uchi’a usöröa’-nu, para cabí guídatiaca’s-inu ni, en para cabí tödi bë’ upízxjanu neda’.”

⁶Ní’irö Xanru’ rë’ légaquië’, rnnë’:

—Gulí’zé nágali’ ca na’ gunné’ bönni’ ruchi’a rusöröë’ na’, bönni’ biti’ náquië’ tsahui’. ⁷¿Naru’ cabí uchi’a usöröë’ Dios bönachi guró cazë’ queë’, nupa na’ tu’lidza Lë’ rëla te dza? ¿Naru’ huadzét-senë’ gácalenë’ légaquië’? ⁸Rea’ lib’íli’: La’ uchi’a usörötenë’ légaquië’. Cate’ huöda’ neda’, Bönni’ Guljé’ Bönachi, ¿naru’ idzólida’ nupa ta’yéajlë’ neda’ luyú ni?

**Tu bönni’ yudo’ fariseo,
en tu bönni’ uquízxaj**

⁹Bucúdzu’ë didza’ Jesús ca naca quégaquië’ bönni’ tu’béaj tsahui’ cuín-gaquië’, en tu’cá’anë’ cá’asö ia’zica’rö bönachi. ¹⁰Gunnë’:

—Bila’dxinë’ chopë’ bönni’ ga naca chila yudo’ para ulu’lidzë’ Dios. Tuë’ bönni’ na’ náquië’ bönni’ yudo’ fariseo, ate’ ia’túë’ na’ náquië’ bönni’ ruquízxjé’

lázagaca bönachi. ¹¹Guzuínë’ bönni’ yudo’ fariseo na’, en caní bulidzë’ Dios, rnnë’: “Dios, rea’ Li’: Xclenu’, tu’ cabí naca’ ca nácaquië’ ia’zica’rë’ bönni’, nácaquië’ gubán, en biti’ nácaquië’ tsahui’. Ta’guitsjé’ xibá que yöl-la’ nut-saga na’. Lësca’ biti’ naca’ ca bönni’ uquízxaj ni. ¹²Neda’ runa’ gubasa chopa luzuí tu’ xunu’ dza huéaj, en runödzcja’ que yudo’ tu’ cö huéaj tu’ chi cö’ que yúgu’të le rata’ quia’.” ¹³Guzóazë’ zi-tu’ bönni’ uquízxaj na’, en biti’ böázxjanë’ ichisa lahuë’ uyúë’ lúzxiba, pero gudapë’ luchu’ë, rnnë’: “Dios, buéchi’ ládxi’ neda’, bönni’ dul-la’.” ¹⁴Neda’ rea’ lib’íli’: Bóajë’ lidxë’ bönni’ uquízxaj na’, nuhuóáquië’ tsahui’ lahuë’ Dios, calëga ia’túë’ bönni’ ni’. Núti’tës bönni’ run ba zxon cuinë’, gunë’ Dios ga huöta’ igulë’, pero nu bönni’ rizóë’ nöxaj ládxi’, gunë’ Dios ga gácarë’ lo.

**Jesús rulidza
tsáhuë’ë-bi’ yugu’ bí’ido’**

(Mt. 19:13-15; Mr. 10:13-16)

¹⁵Ní’irö bila’dxinë’ yugu’ bönni’, en nigula ga zoë’ Jesús, naché’gaquië’-bi’ yugu’ bí’ido’ quégaquië’ para ixóa në’ë Jesús légacabi’. Cate’ bila’lé’enë’ yugu’ bönni’ usëda queë’ Jesús lë ni, gula’dil-lë’ légaquië’. ¹⁶Ní’irö Jesús bulidzë’ yugu’ bönni’ dá’gaquië’ Lë’, rnnë’:

—Gulí’güf’i-bi’ lataj ila’dxinbi’ bí’ido’ ni ga zoa’. Biti’ uzága’li’ xinózagacabi’, tu’ gata’ quégaca nupa náca’gaca ca bi’i caní lataj ga rinná bë’ë Dios. ¹⁷Le nácatë rea’ lib’íli’: Nu cabí si’ lu në’e le rinná bë’ë Dios, ca runbi’ tubi’ bí’ido’, biti’ ca’ tsaza ga ni’ rinná bë’ë Lë’.

Tu bönni’ rilé’enë’ yöl-la’ tsahui’

(Mt. 19:16-30; Mr. 10:17-31)

¹⁸Tu bönni’ unná bë’ gunábinë’ Jesús, rnnë’:

—Bönni’ Usedi idú dxi’a. ¿Bizxi ral-la’ guna’ para idéli’da’ yöl-la’ na’bán idú?

19 Jesús rë' lë':

—¿Bíxq que rë'u neda': "Idú dxi'a"?
Cuntu nu bönni' náquië' idú dxi'a. Tuzë
Dios náquië' idú dxi'a. 20 Nöz quëzinu'
yugu' le gunná bë'ë Dios:

Biti' gunu' dul-la' le riguitsaj xibá que
yöl-la' nutsaga na'.

Biti' gútigacu' bönachi.

Biti' cuanu'.

Biti' innió' que luzó'o le cabí nácatë.

Ben bal xuz xinó'o.

21 Bönni' na' rë' Jesús, rnnë':

—Yúgu'të lë ni runa' ga gudela' naca'
b'ído'.

22 Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti'
yúgu'të le dë quiu', ate' lë na' si'u
bunödzej quégaca bönachi yechi', ate'
gata' quiu' yöl-la' tsahui' yehua' yubá.
Ní'irö gudá, gudá' neda'.

23 Cate' bönni' na' biyönnë' didza' ni,
ruhu'innë', tu' dëda' yöl-la' tsahui' queë'.

24 Cate' bilé'enë' Jesús ca na' ruhu'innë'
bönni' na', rnnë':

—¡Bica' böniga gaca, ila'yaza nupa
ta'lé'e yöl-la' tsahui' ga rinná bë'ë Dios!

25 Gácarö tódiba' böa' nagui yötsi', ca
tsázië' tu bönni' rilé'enë' yöl-la' tsahui' ga
rinná bë'ë Dios.

26 Ní'irö nupa bila'yöni didza' ni
gula'nná:

—¿Nuzxi caz gaca ulá, channö?

27 Jesús gudxë' légaquië':

—Le bití' gaca ilunë' bönni', huáca
gunë' Dios.

28 Ní'irö Pedro rë' Jesús:

—Buyútsöca', netu' nucá'anatu'
yúgu'të le dë queëtu', en dá'atu' Li'.

29 Ní'irö Jesús rë' légaquië':

—Le nácatë rea' lib'ili', nu bönni'
ucá'anë' lidxë', o xuz xinë', o yugu'
böchi' zanë', o nigula queë', o yugu'
zxí'inë', tu' ru'í ládxe'ë inná bë'ë Dios,
30 bönni' ni huazí'irë' dza ni zóaru' na'a,
ate' dza si' za' idéli'në' yöl-la' na'bán idú.

Jesús riguixjö'ë leyúbölö ca si' ilútië' Lë'

(Mt. 20:17-19; Mr. 10:32-34)

31 Jesús guché'ë quez queë' idxínnutë'
bönni' usëda queë', en rë' légaquië':

—Buli'yútsöca', ribenru' zéajru'
Jerusalén, ga ni' ilaca yúgu'të le
nazúajgaca lu guichi ca gula'nnë' bönni'
gulu'ë didza' uláz queë' Dios ca ral-la'
gaca quia' neda', Bönni' Guljé' Bönachi.
32 Yugu' bönni' Jerusalén ulu'dödë'
neda' lu ná'agaquië' bönni' zi'tu', ate'
ulu'titjé' neda', en ulu'lidza zi'ë neda',
en ulu'chejë' neda' zxöna'. 33 Ila'guinë'
neda', ate' tódirö ni' ilútië' neda', pero
cate' gaca tsonna dza ubana'.

34 Biti' gula'yéajni'inë' bönni' usëda
queë' didza' ni, en bití' guléquibe'enë' ca
sa'yéaj le ru'ílenë' légaquië' didza' que,
tu' naca le cabí sequi' ila'yéajni'inë'.

Jesús ruúnë' tu bönni' yödzo Jericó nachul-la lahuë'

(Mt. 20:29-34; Mr. 10:46-52)

35 Cate' chizóa idxinë' Jesús yödzo Jer-
icó, zoë' tu bönni' ni' nachul-la lahuë'.
Rö'ë ra' nöza rinabë' nu bi gúnnašö
queë'. 36 Bönni' ni' biyönnë' ta'dödi bö-
nachi zián ni', ate' gunabë' bizxi na' raca.
37 Bönachi ni' të lë':

—Jesús, bönni' Nazaret, ridödë' ni.

38 Ní'irö bönni' na' nachul-la lahuë'
bë'ë zidzaj didza', rnnë':

—¡Jesús, zxí'ini xi'sóë' David, buéchi'
ladxi' neda'!

39 Yugu' bönni' nanórugaquië' lahuë'
Jesús gula'dil-lë' bönni' na' nachul-la
lahuë' para usayaj ru'ë, pero lë' zídzejrö
bë'ë didza', rnnë':

—¡Zxí'ini xi'sóë' David, buéchi' ladxi'
neda'!

40 Ní'irö guzé' dxiz Jesús ribözë', ate'
gunná bé'enë' nu tsöjlidza lë' para idxinë'
lahuë'. Cate' bönni' na' nachul-la lahuë'

bidxinë' lahuë' Jesús, gunábinë' Jesús lë', rnnë':

⁴¹ —¿Bizxi ré'ënu' guna' quiu'?

Bönni' na' nachul-la lahuë' rnnë':

—Ré'ënida' huöálaj guió'j lahua'.

⁴² Jesús ré' lë':

—Chiböálaj guió'j lo'. Chiböácu' tu' réajlë'u neda'.

⁴³ La' ní'isö bul'é'tenë', ate' sa'yéa-jlenë' Jesús, rigu'ë Dios yöl-la' ba. Lësca' yúgu'të bönachi nacua' ni', en bila'lé'e lë na' guca gula'gú'u Dios yöl-la' ba.

Jesús, en Zaqueo

19 Ní'irö guyázië' Jesús yödzo Jericó, en ridödë' lu yödzo na'. ² Zoë' tu bönni' lë' Zaqueo ni', bönni' lo lád-jagaquië' bönni' uquízxaj, ate' dë yöl-la' tsahui' queë'. ³ Rufi ládxië' bönni' ni il'é'enë' Jesús, pero biti' guca queë' tu' nacua' bönachi zían ni', en náquië' bönni' ga ré'ëdo'. ⁴ Ní'irö carelö yöjnóruë' lógaca bönachi zían na', ate' yöjchenë' tu lu yaga para gaca il'é'enë' Jesús, tu' ral-la' tódë' ni'. ⁵ Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en ré' lë':

—Zaqueo, bótjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bótjatë' Zaqueo lu yaga, ate' lu yöl-la' rudzeja queë' guchë'ë Jesús lidxë'. ⁷ Cate' bila'lé'e bönachi nacua' ni' lë ni, gula'sí lógaquië' yúgu'të' ta'nnë' queë', ta'nnë':

—Guyázië' Jesús ugá'analenë' bönni' dul-la'.

⁸ Ní'irö guzuínë' Zaqueo, en ré' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquizzja' bönachi, ubi'a quégaca bönachi na' tapa có'tëlö ca'.

⁹ Jesús ré' lë':

—Na'a dza ni bidxín yöl-la' rusólá qué-gaca nupa nacua' yu'u ni, tu' nababë' bönni' ni dí'a dza queë' Abraham.

¹⁰ Bida' neda', Bönni' Guljë' Bönachi, ududilja', en udusólá' nupa nanítigaca.

Rucúdzu'ë didza' Jesús que chi cö' dumí

¹¹ Tsanni ni' ta'yönnë' didza' ni ru'ë Jesús, ré' légaquië' le rucúdzu'ë didza', tu' chizóa ila'dxinë' yödzo Jerusalén, ate' téquinë' chizóatë ilá' lahui le rinná bë'ë Dios. ¹² Caní rnnë' Jesús:

—Zoë' tu bönni' lo, sa'yéajë' tu yödzo zí'tu' para sí' lu në'ë yöl-la' unná bë', ate' ní'irö huödë'. ¹³ Cate' chizóa tsejë' ni' bulidzë' chië' bönni' huen dxin queë', en bë'ë que queégaquië' tu cö' huéaj dumí, ate' ré' légaquië': “Guli'guflajlen dumí ni tsanni huöda'.” ¹⁴ Yugu' bönni' uládz queë' biti' ta'l'é'enë' lë' dxí'a, ate' gula'sól-lë'ë yugu' gubáz quégaquië' ga ni' tsejë', ila'nnë': “Biti' ré'ënitü' inná bé'enë' bönni' ni netu'.” ¹⁵ Ní'irö guzxi' lu në'ë yöl-la' unná bë', ate' budxinë' ladzë'. Cate' bidxinë' ni' gunná bé'enë' nu tsöjlidza yugu' bönni' huen dxin na' budödë' lu ná'agaquië' dumí na', para in-ózinë' gáca'xi bulu'guflajlenë' le tu tuë'.

¹⁶ Cate' bönni' z'f'alö na' bidxinë' lahuë', rnnë': “Xan, tu cö' dumí quiu' na' chibén icja ia'chí cö' ca'.” ¹⁷ Xanë' na' ré' lë': “Tsahui' benu'. Nacu' huen dxin tsahui'. Tu' dx'fado' bugunu' dxin láti'do'os na' guta' lu no'o, na'a, guna' ga inná bé'enu' chi yödzo.” ¹⁸ Ní'irö bidxinë' ia'túë' bönni' huen dxin na' lahuë' lë', rnnë': “Xan, tu cö' dumí quiu' na' chibén icja ia'gayu' cö' ca'.” ¹⁹ Xanë' na' ré' ca' lë': “Inná bé'enu' gayu' yödzo.” ²⁰ Ní'irö bidxinë' ia'túë' lahuë' lë', rnnë': “Xan, ni dë tu cö' dumí quiu' na'. Ben chi'a le, butúlida' le lari'. ²¹ Caní bena' tu' rádxida' lí', tu' nacu' bönni' bizxaj. Runu' ca na' ta'nná bönachi: Ruzi'u le cabí buzú', en rula-pu' ga biti' guzu'.” ²² Ní'irö xanë' na' ré' lë': “Nacu' huen dxin biti' naca tsahui'. Ní'a que didza' bë'u uchi'a usöró'a lí'. ¿Réquibe'enu' naca' bönni' bizxaj: Ruz-

i'a le cabí buzóa', en rulapa' ga bití' guza'? ²³ Na'a, ¿bizx que bití' yójlú'u dumí quia' na' ga gun icja, para cate' huöda', uzi'a le idú len icja na'?" ²⁴ Ní'irö rë' nupa nacua' ni: "Gulí'cúa lu në'e dumí na', ate' gulí'gü'i queë' bönni' na' dë queë' chi cö' dumí." ²⁵ Légaquië' tē' lē: "Xan, chidé queë' chi cö' dumí." ²⁶ Ní'irö bubí'ë didza' xángaquië', rnnë': "Rea' libí'ili': Nu rugún dxi'a dxin le do' dë lu në'e, ulu'zxóni ládxi'gaca lē' ia'late', pero nu bití' rugún dxi'a dxin le do' dë lu në'e, ulu'béaj lu në'e lē na' guta' lu në'e. ²⁷ Ca naca quégaquië' bönni' ni bití' ta'lé'enē' neda' dxi'a, en bití' gulé'en-nē' inná bé'eda' légaquië', guli'tsójzxi' légaquië' para ídigaquië' ni, ate' guli'guti légaquië'."

**Len yöl-la' ba zxön razië'
Jesús yödzo Jerusalén**

(Mt. 21:1-11; Mr. 11:1-11; Jn. 12:12-19)

²⁸ Cate' budxi gunné' caní Jesús, buguelé'ë xinözë, sa'yéajë' zaca' yödzo Jerusalén. ²⁹ Cate' bila'dxinë' gala' ga nacua' yödzo Betfagé, en yödzo Betania, ga naca ra' gu'ado' nazí'i le Guí'a Yaga Olivo, gusól-lē'ë Jesús chopë' bönni' usëda queë', ³⁰ ate' rë' légaquië':

—Gulí'tséaj yódzödo' ni' ca dódilö ga zóaru', en cate' idxinlí' ni', tsójxáca'li'-ba' tuba' búrrodo' nága'ba' ni', búrrodo' na' cuntu nu ribíani lēba'. Gulí'sedxi-ba', en gulí'duché'-ba' quia' ni. ³¹ Channö zoa nu rinábini libí'ili', inná: "¿Bizx que risédxili'-ba'?", ubí'ili' didza' caní innali': "Xanru' riquinnë'-ba'."

³² Sójáquië' bönni' usëda queë' na' nasól-lē'ë, ate' yójxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' búrrodo' na', yugu' bönni' xamba' tē' légaquië':

—¿Bizx que risédxili'-ba' búrrodo' na'?

³⁴ Bulu'bi'ë didza', ta'nné':

—Xanru' riquinnë'-ba'.

³⁵ Gula'ché'ë-ba' ga na' zoë' Jesús. Cate' chigula'xóë' yugu' lari' tsölá'a quégaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'. ³⁶ Gapa ral-la' tödë' Jesús, gula'chiljé' lari' quégaquië' la' nöza. ³⁷ Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'tē bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enē' benë' Jesús. ³⁸ Ta'nné':

—¿Yöl-la' ba bönni' unná bē' ni zē'ë uláz queë' Xanru' Dios! ¡Yehua' yubá za' le ribequi dxi ládxi'ru'! ¡Yöl-la' ba Dios!

³⁹ Ní'irö yugu' bönni' yudo' fariseo nútsa'gaquië' ladaj bönachi zían ni' tē' Jesús, ta'nné':

—¿Bönni' Usedi, gudil-la yugu' bönni' usëda quiu'!

⁴⁰ Bubi'ë didza' Jesús, rē' légaquië':

—Rea' libí'ili': Channö ila'cuá' dxí'ë bönni' ni, yugu' guió'j hualufí' caz zidzaj didza'.

⁴¹ Cate' bidxinë' Jesús gala' ra' yödzo na', en rilé'enē' le, ní'irö ribödxë' que, ⁴² rnnë':

—Raca ládxa'a huanózili' na'a dza le gaca gun ga cuéqui dxi ládxi'li' lahuë' Dios, pero na'a chinagachi' queé'li', para cabí ilé'eli' le. ⁴³ Huala'dxin queé'li' dza cate' nupa bití' ta'lé'e libí'ili' dxi'a ila'bequi zö'ö idú gásibi'lö ga zóali', en ila'gú'u libí'ili' lé'alö, ate' yúgu'tē lataj idú gásibi'lö ilúnlenē' libí'ili' gudil-la. ⁴⁴ Ulu'quínna'j zö'ö run chi'i yödzo queé'li', en ilútië' nupa nacua' lu yödzo ni. Bití' ugá'ana guió'j lahui luzé'e. Yúgu'tē lē ni gaca queé'li' tu' cabí gúquibe'eli' dza bidë' Dios buduyúë' libí'ili'.

Rulajtjé' Jesús lö'a yudo'

(Mt. 21:12-17; Mr. 11:15-19; Jn. 2:13-22)

⁴⁵ Ní'irö guyázié' Jesús lö'a yudo', en gusí lahué' rubéajé' ní'ilö yúgu'té nupa tuti', en nupa to'o ga naca lö'a yudo'.

⁴⁶ Rë' légaquié':

—Nazúaj lu guichi lá'ayi, rna: “Lidxa' naca yu'ga ga ulu'lidza bönachi Dios”, pero libí'ili' chinunli' le ca tu lídxigaca bönni' gubán.

⁴⁷ Yugu' dza rusédiné' Jesús bönachi ga naca chila yudo', ate' gula'zóa gula'bö'è bixúz unná bë', len bönni' yudo' tu'sédiné', en yugu' bönni' lo que lu yödzo ilútié' Lë'. ⁴⁸ Biti' bulu'dzóliné' nacxi ilútié' Lë', tu' idú ládxi'gaca tu'zé náagaca yúgu'té bönachi xtídzé'.

Yöl-la' unná bë' dë lu në'ë Jesús

(Mt. 21:23-27; Mr. 11:27-33)

20 Tu dza, cate' ni' rusédiné' Jesús bönachi ga naca chila yudo', en rigu'xjö'è didza' dxi'a, bila'dxiné' yugu' bixúz unná bë', en bönni' yudo' tu'sédiné', len bönni' gula tu'zéajni'iné', ga na' zoë', ² ate' të' Jesús:

—Gudixjö'i netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

³ Bubi'è didza' Jesús, rë' légaquié':

—Inábida' ca' libí'ili' tu didza', ate' ubí'ili' innali'. ⁴ ¿Nuzxi gusól-la' Juan ruquilé' bönachi nisa? ¿Naru' Dios, o bönachi?

⁵ Gulún xtídzagaquié' la' légacasë' bönni' yudo' na', ta'nné':

—Channö innaru': Gusól-lë'è Dios lë', guíé' rë'u: “¿Bizx que biti' guyéajlë'ëli'në'?” ⁶ Channö guiéru'-në': Gula'sól-lë'è yugu' bönni' lë', bönachi lu yödzo ni ulu'laxi' rë'u guiój, tu' nóziguequi bë'è didza' Juan na' uláz queé' Dios.

⁷ Ní'irö bulu'bi'è didza', ta'nné':

—Biti' nöztu' nuzxi na' gusól-la' Juan.

⁸ Ní'irö Jesús rë' légaquié':

—Neda' ca' biti' guía' libí'ili' bi yöl-la' unná bë' rúnida' caní.

Yugu' bönni' huen dxin biti' nácagaquié' tsahui'

(Mt. 21:33-44; Mr. 12:1-11)

⁹ Ní'irö la' gusí lotë' Jesús ru'ilené' bönachi nacua' ni' didza'. Rucúdzu'è didza', rnné':

—Zoë' tu bönni' budé'ë yugu' lubá uva lu xiyúé', ate' budödë' luyú na' lu ná'agaquié' bönni' huen dxin para ilún gatsjé' len lë' le ulu'zi'è, ate' guyijé' zi'tu' ga ni' bugá'anë' xidzé. ¹⁰ Cate' bidxín dza ulu'chibë' uva luyú na', gusól-lë'è tué' bönni' gubáz queé' ga na' nacué' huen dxin na' para si'è uláz queé' que le ulu'zi'è, pero huen dxin na' gulúndë'è lë' zi', en bulu'sól-lë'è lë' cá'asö. ¹¹ Leyúbölö gusól-lë'è ia'túé' gubáz queé', ate' légaquié' gulúndë'è lë' ca' zi', en gulu'è dö' queé', ate' bulu'sól-lë'è lë' cá'asö. ¹² Leyúbölö gusól-lë'è quégaquié' bönni' bunni gubáz queé', ate' bulu'dxié' ca' lë' hué', en bulu'béajé' lë' ní'ilö luyú na'.

¹³ Ní'irö guzá' ládxë'è xani luyú na', gunné': “¿Nacxi guntsa'? Isól-la'a zxf'ini caza' nadxf'ida'-bi' quégaquié'. Cate' ila'lé'enë'-bi', nadxi ca' ilunë'-bi' bal.”

¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídzagaquié' la' légacasë', ta'nné': “Bi'i ni guequi queébi' luyú ni. Gulí'dá, gútiru'-bi', para guequi queéru' le ral-la' guequi queébi'.” ¹⁵ Bulu'béajé'-bi' ní'ilö luyú na', en gulútié'-bi'.

'Na'a, ¿nacxi caz gunë' xani luyú na' quégaquié'? ¹⁶ Guíde', en gútié' yugu' huen dxin na', ate' udödë' luyú queé' lu ná'agaca bönachi yúbölö.

Cate' bönachi nacua' ni' bila'yöni lë ni, gula'nné':

—¿Inná Dios biti' gaca caní!

¹⁷ Ní'irö buyúé' Jesús légaquié', rnné':

—¿Bixzi sa'yéaj lë na' nazúaj lu guichi lá'ayi, rnna:

Guióǵ na' gula'ru'unë' bönni' huen zö'ö, guióǵ ni chinaca guióǵlen squin zö'ö?

¹⁸Núti'tës nu ibixi lahui guióǵ ni, quitsaj nu na', ate' nu bönni' tsöjbága' guióǵ ni lë', uzxuzxaj lë'.

Ca naca dumí ta'guizzaj lázagaca bönachi

(Mt. 21:45-46; 22:15-22; Mr. 12:12-17)

¹⁹La' dza n'isö, yugu' bixúz unná bë' len bönni' yudo' tu'sédinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzu'ë didza', pero guládxinë' bi ilún bönachi zían nacua' ni'. ²⁰N'irö bulu'yúyenië' Jesús, en gula'sól-lë'ë yugu' bönni' para ulu'béajë' Lë' didza', bönni' ulu'luf'i cuín-gaquië' ca bönni' tsahui', para ilunë' ga bi innë' Jesús, para gaca ulu'dödë' Lë' lu në'ë bönni' rinná bé'enë' uláz queë' César. ²¹Para ilunë' caní, gula'nábinë' Jesús, ta'nnë':

—Bönni' Usedi, nöztu' rnno' le nácatë, en rusédinu' le nácatë, en biti' ruch'i'a rusöróu' ca naca le tu'luf'isö lahui bönachi, pero idútë li naca ca rusédinu' xibá queë' Dios. ²²Guđíxjöi'i netu'. ¿Naru' run bayudxi quizzaj laztu' queë' César, bönni' Roma rinná bë'ë, o cabi'?

²³Réquibe'enë' Jesús le té'ennë' ilunë' queë', ate' rë' légaquië':

—¿Bixz que rizi' bé'ëli' neda'? ²⁴Buli'luf'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bi'ë didza', ta'nnë':

—Queë' César na'.

²⁵N'irö Jesús rë' légaquië':

—Buli'nódzaj queë' César le nequi queë' César, ate' queë' Dios le nequi queë' Dios.

²⁶Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zían na', pero bulu'bán-

inë' ca naca didza' bubi'ë, ate' bulu'sayaj ruá'agaquië'.

Ca gaca quégaca nupa ulu'bán lu yöl-la' guti

(Mt. 22:23-33; Mr. 12:18-27)

²⁷N'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinë' ni', ate' gula'nábinë' Jesús, ta'nnë':

²⁸—Bönni' Usedi, Moisés buzúajë' queëru' lu guichi, le rnna: “Channö gátie' nu bönni', ate' ugá'ananu nigula queë', en channö cuntu nu zoa bi'i queë', n'irö bi'i bóchi'bi' ral-la' s'ibi'-nu nigula queë' na', para uzóabi' bi'i queëbi' bóchi'bi' na' gútibi'.” ²⁹Gula'cuá'abi' gadxi bi'i bönni' nácacacabi' bóchi'bi', ate' bi'i z'falö na' butsaga ná'alenbi' bi'i nigula, en gútibi', biti' zóabi' bi'i queébi'. ³⁰N'irö bi'i buropi na' butsaga ná'alenbi'-nu nigula na', ate' gútibi' ca' bi'i ni, biti' zóabi' bi'i queébi'. ³¹Butsaga ná'alenbi'-nu bi'i bunny na', ate' la' tuz ca gulunbi' igádxitëbi', ate' gulátibi', biti' zóabi' bi'i quégacabi'. ³²Ga búdxitë, gútinu ca' nigula na'. ³³Na'a, cate' ulu'bán nupa chinátigaca, ¿núzxilöbi' guéquinu nigula na' queébi', tu' bulu'tsaga ná'alenbi'-nu igádxitëbi'?

³⁴N'irö bubi'ë didza' Jesús, rë' légaquië':

—Tu'tsága ná'agaca bönachi dza ni zóaru' na'a, en tu'nödzjë'-bi' zxf'inigaquië' para ulu'tsaga ná'agacabi'. ³⁵Na'a, nupa nácacaca lesaca' ulu'bán lu yöl-la' guti, en tsöjcuá' yödzülió si' gata', biti' ilún yöl-la' rizóalen nigula, en biti' ulu'tsaga ná'agaca. ³⁶Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácacagacabi' gubáz lá'ayi queë' Dios, en ilácagaca zxf'ini cazë' Dios. ³⁷Ca na' ral-la' ulu'bán nupa chinátigaca, rulu'inë' rë'u Moisés caz ga na' nazúaj lu guichi ca naca que yaga yötsi' régui, ga ni'

ru'ë didza' Xanru', rnnë' náquië' Dios queë' Abraham, en Dios queë' Isaac, en Dios queë' Jacob. ³⁸Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të bönachi, sal-la' gulati luyú ni.

³⁹Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dx'fado' gunnó'.

⁴⁰Bítirö bulu'rúguinë' ila'nábinë' Lë' didza'.

¿Nuzxi zxf'ini náquië' Cristo?

(Mt. 22:41-46; Mr. 12:35-37)

⁴¹Ní'irö Jesús rë' légaquië':

—¿Nacxi caz na' ta'nnë': "Cristo náquië' zxf'inë' David"? ⁴²David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

"Gurö'i cuita lë'a ibëla

⁴³cate' gunra' ga ulu'zechu zxf'igaca lo nupa ta'dá'baga' Li'."

⁴⁴David caz na' gunné' queë' náquië' Xanë'. ¿Nacxi caz naca, rnnali' lib'ili' náquië' zxf'inë'?

Jesús ruzégui'ë diza' bönni' yudo' tu'sédinë'

(Mt. 23:1-36; Mr.

12:38-40; Lc. 11:37-54)

⁴⁵Tsanni ni' yúgu'të bönachi nacua' ni' tu'zé nágagaca Jesús, rë' yugu' bönni' usëda queë':

⁴⁶—Guli'gún chi'i cuinli' quégaquië' bönni' yudo' tu'sédinë', tu' ta'yaza ládx-i'gaquië' ta'dé' nácugaquië' lari' tunna, en té'ënnë' ulu'lidza bönachi légaquië' zxön gapa naca lu yé'ëyi, en ta'yaza ládx-i'gaquië' ca' ta'bö'ë lataj lo gapa tu'dubë' tu'sédë' queë' Dios, en gapa ta'bö'ë tahuë'. ⁴⁷Ta'gúë' lídxigacanu nigula uzébidó', ate' para ulu'lu'í tsahui' cuín-gaquië', xidzé tu'lidzë' Dios. Yugu' bön-

ni' ni, yénni'tërö gunë' Dios ga ila'gu'í ila'záquië'.

Gun le gulú'unu tu nigula yechi' lahuë' Dios

(Mr. 12:41-44)

21 Ga na' zoë' Jesús chila yudo', guchisa lahuë', en rilé'enë' yugu' bönni' dë yöl-la' tsahui' quégaquië', ta'gu'ë dumí lu gu'ina que dumí gun que yudo'. ²Bilé'enë' ca' tu nigula yechi' uzébidó', rigú'unu chopa dumí lásido', le nazáca'gaca láti'do'os. ³Rnnë' Jesús:

—Le nácatë rea' lib'ili', tu le zxón-tërö gulú'unu nigula yechi' uzébidó' ni ca ia'zica'rö bönachi na' ta'gu'ë dumí. ⁴Yúgu'të, tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queénu gulú'unu idütë le dë queénu, le ral-la' gáhuinu.

Rigúxjö'ë Jesús ca ulu'sunítië' yudo'

(Mt. 24:1-2; Mr. 13:1-2)

⁵Nacua' ni' nupa tu'í didza' ca naca que yudo' na', ca na' naz'i' biquitaj que, yugu' guió'j nazácalë'egaca, en yugu' gundo' nácagaca lachi, ate' Jesús rë' légaquië', rnnë':

⁶—Yúgu'të lë ni rilé'eli', huadxín dza cate' bítirö ugá'ana guió'j lahui luzé'e ni, tu' ulu'suníti bönachi yudo' ni.

Le ilaca bë' cate' si' idxín dza údxí

(Mt. 24:3-28; Mr. 13:2-23)

⁷Ní'irö gula'nábinë' Jesús, ta'nnë':

—Bönni' Usedi, ¿bátaxi gaca lë ni? ¿Bizxi gaca bë' chizóa gaca caní?

⁸Bubi'ë didza' Jesús, rnnë':

—Guli'gún chi'i cuinli', para cabí nu si' ye'e lib'ili', tu' ila'lá'gaquië' bönni' zían, en ila'z'í' lágauquië' ca lea' neda', ila'nnë' nácagaquië' Cristo, en ila'nnë': "Chizá' gala' dza údxí." Neda' rea' lib'ili': Biti' tséajlenli' légaquië'. ⁹Cate' yónili' raca gudil-la, en ta'dá'baga' bönachi yúlalui',

biti' gadxi idzóbili', tu' run bayudxi ilaca le caní, pero biti' zuftèni dza údxi.

¹⁰ Ní'irò rē' ca' légaquiē':

—Til-la tu yödzo len ia'tú yödzo, ate' bönachi tu ga nu rinná bē' ila'díl-lalen bönachi ia'tú ga nu rinná bē'. ¹¹ Tódigaca budó' xzu', ate' zían lataj gaca gubín, en ilatsaj yödzhueé' zxon. Ila'lá' lahui lúzxiba le ilún gadxi bönachi, en le ilaca bē'.

¹² Zí'atéló cate' si' ilaca lè ni, ila'zón bönachi lib'ili', en ila'bía ládxi'gaca lib'ili'. Ila'ché'è lib'ili' gapa tu'dubē' tu'sedē' queē' Dios para ilútiē' lib'ili', en ila'gu'è lib'ili' lidxi guíe. Ila'ché'è lib'ili' lógaquiē' bönni' ta'nná bē'è, en lógaquiē' bönni' lo, tu' dá'ali' neda'.

¹³ Gaca caní queé'li' para séqui'li' gunli' ba nalí quia' neda'. ¹⁴ Tsutsu guli'gún ládxi'li', para cabí cuéqui ícjali' z'f'aló nacxi innali' uláz queé'li', ¹⁵ tu' gunna' queé'li' didza' ub'ili', en yöl-la' réajni'i, para cabí gaca ulu'cul-lè lib'ili', en para cabí gaca bi ila'nné' que xtídza'li' bönni' ni' biti' ila'lé'enē' lib'ili' dxi'a'. ¹⁶ Ní'irò xuz quézili' ulu'dödē' lib'ili', en cá'an-queze yugu' bönni' böchi' quézili', en yugu' di'a dza que quézili', en yugu' böchi' luzé'e quézili', ate' ilútiē' bál-lali'. ¹⁷ Yúgu'tē bönachi ulu'zóa lib'ili' tsólá'aló tu' dá'ali' neda', ¹⁸ pero biti' initi nitú guitsa' ícjali'. ¹⁹ Channō ugá'anali' tsutsu, idéli'li' yöl-la' na'bán idú.

²⁰ 'Cate' ilé'eli' bönni' rōjáquiē' gudil-la nagú'ugaquiē' lē'a Jerusalén, inózili' chibidxín dza initi yödzo ni. ²¹ Ní'irò nupa nacua' luyú Judea ral-la' ila'zxunaj ni, en tsōjaca gapa naca gu'ado', ate' nupa nacua' lu yödzo ni ral-la' ila'rúaj ni, ate' nupa nacua' la' guixi', biti' ral-la' ulu'dxín lu yödzo ni. ²² Yugu' dza ni' Dios gunē' xíguia' nupa nacua' yödzo ni para gaca yúgu'tē le nazúaj lu guichi lá'ayi ca ral-la' gaca quégaquiē'. ²³ Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbí', en nigula tu'gádxí'nu-bi'

bí'ido', tu' ila'gu'i ila'záca'da' bönachi nacua' ni', ate' Dios gúndē'è bönachi ni' xíguia'. ²⁴ Ilátiē' zíanē' lu gudil-la na', ate' ila'ché'è ia'bal-lē' nadzúngaquiē' ga ila'dxinē' idútē yödzhólió, ate' yödzo Jerusalén ni, ulu'léaj ulu'libē' le bönni' zítu', cate' izá'aró dza quégaquiē'.

Le ilaca bē' si' huödē' Bönni' Guljē' Bönachi

(Mt. 24:29-35, 42-44; Mr. 13:24-37)

²⁵ Gunné' ca' Jesús:

—Ní'irò ila'cuá' le ilaca bē' lu gu-bidza, en lu beo', en yugu' lu bōlaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'. ²⁶ Ulu'dú ládxi'gaca lu yöl-la' radxi quéguequi tu' ila'zá' ládxi'gaca quégaca le ral-la' ilaca lu yödzhólió, en ila'zxizi le nalá'gaca lúzxiba. ²⁷ Ní'irò ila'lé'enē' neda', Bönni' Guljē' Bönachi, guída' lu böaj lúzxiba, dē lu na'a yöl-la' unná bē', ate' ilá' lahui yöl-la' zxon quia'. ²⁸ Cate' isí lo ilaca lè ni, buli'tipa ládxi'li', en guli'chisa loli', tu' chizóa udxina' neda', para huóá'ua' lib'ili'.

²⁹ Jesús gudxē' ca' légaquiē' tu le bucúdzu'è didza', rnnē':

—Buli'yútsöca' ca raca que yaga higo, en que bítitēs yaga yúbölö. ³⁰ Cate' rilé'eli' ta'lén ni'a nē'e hué'énido', nöz quézili' chizá' gala' cusu ba. ³¹ Lēsa' caní, cate' ilé'eli' chitaca yugu' lè ni, in-ózili' chizá' gala' dza idinná bē'è Dios luyú ni.

³² 'Le nácatē rea' lib'ili', biti' iláti-gaca bönachi ila'cuá' dza ni' cate' ilaca yúgu'tē lè ni. ³³ Ila'dödi que lúzxiba, en que luyú ni, pero xtídza'a, biti' tödi cá'asö, tu' idxín caz ca rnna.

³⁴ 'Guli'gún chi'i cuinli' para cabí güf'ili' lataj tsaza icja ládxi'do'oli' le gun ditaj lib'ili', lè na' naca yöl-la' rágulē'e, en yöl-la' rizudxi, en yöl-la' ruúbi ruguí'i, para cate' idxín dza ni', cabí sóali' niti

ladxi', ³⁵ en para cabí gaca queé'li' ca tu le rizón bönachi, ca naca le gaca quegaca yúgu'tè bönachi nacuá' idütè yödžolió. ³⁶ Que lè ni na', guli'sóa ban ladxi', en buli'lídzatica'sè' Dios, para gaca uláli' lu lè na' ral-la' ilaca, en para cabí utu'íli' cate' idxinli' lahua' neda', Bönni' Guljè' Bönachi.

³⁷ Lahui' dza rizóè' Jesús chila yudo', rahésiné' bönachi, ate' chi'i dzó'ölö rirúajè' ni', en rejè' lu gu'ado' naz'fi le Gu'á Yaga Olivo. ³⁸ Yugu' zila bila'dxín yúgu'tè bönachi ga zoè' Jesús chila yudo' para ulu'zé nágagaca xtídzè'è.

Tun xtídzagaquiè' ilútiè' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

22 Cate' chizóa idxín laní cate' tahuè' yóta xtila cabí naz'fi cúa zi que, naz'fi le Pascua laní na', ² bulu'dubè' yugu' bixúz unná bè' len bönni' yudo' tu'sédinè'. Ta'zóa ta'bó'è ilútiè' Jesús, pero bití' gula'zéqui'nè' tu' tádxinè' bi ilún bönachi.

³ Ní'irö Satanás tu' xihui' yójtšaga Judas. Judas lè' ca' Iscariote, en nababè' idxínnutè' gubáz nasól-lè'è Cristo. ⁴ Guyijè' Judas na', yójè'lenè' didza' yugu' bixúz unná bè', en bönni' dè lu ná'agaquiè' que yudo', nacxi gunè' para udödè' Jesús lu ná'agaquiè'. ⁵ Bulu'dzéjanè' bönni' yudo' na', en gula'z'í lu ná'agaquiè' ulu'nödžjè' queè' dumí. ⁶ Raza ládxè'è Judas lè ni, ate' rizóa ribö'è udödè' Jesús lu ná'agaquiè' bagáchi'sö.

Le ráguru' le rusá' ládxi'ru' ca gútiè' Xanru'

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidxín dza na' tahuè' yóta xtila cabí naz'fi cúa zi que, cate' ral-la' ilútiè'-ba' bö'cu' xzila' le tahuè' dzö' Laní Pascua.

⁸ Jesús gusól-lè'è Pedro, en Juan, rnnè':

—Guli'tséaj, guli'tsöjpa'a queéru' le gáguru' dzö' Laní Pascua.

⁹ Tè' Lè':

—¿Gazxi ré'ènu' tsöjpa'atu' queéru'?

¹⁰ Jesús ré' légaquiè', rnnè':

—Buli'yútsöca', cate' tsú'uli' lu yödžö ni, irúajè' tu bönni' dutságuiè' lib'íli', sójnu'è tu rö'ö nisa. Guli'tséajlenè' ga idxíntèli' yu'u ga tsáziè'. ¹¹ Guli'gufé' xan yu'u na': "Bönni' Usedi ré' lí: ¿Gazxi zoa yu'u laní ga gágulena' yugu' bönni' usèda quia' dzö' Laní Pascua?" ¹² Ní'irö ulu'ínè' lib'íli' tu yu'u xzön xitsá' ga ni' chinabá'a. Buli'pá'a ni' le gáguru'.

¹³ Ní'irö yójáquiè', en yójxaca'gaquiè' ca na' chigudxè' Jesús légaquiè', ate' bulu'pé'è ni' le ilahuè' dzö' Laní Pascua.

¹⁴ Cate' bidxín dzö' na', gurö'è Jesús ga ilahuè', ate' bönni' gubáz queè' na' gula'bó'lenè' Lè' tsözxón. ¹⁵ Ní'irö Jesús ré' légaquiè':

—Gúcada' ládxa'a gágulena' lib'íli' tsözxón xtsö' ni z'í'atèlö cate' si' qui'i saca'a, en gátia'. ¹⁶ Rea' lib'íli': Bítirö gahua' lè ni cate' idxinrö dza gaca le rulu'ísö xtsö' ni ga ni' rinná bè'è Dios.

¹⁷ Gudélè'è Jesús tu xzíga'do', en gudxè' Dios: "Xclenu'." Ní'irö ré' légaquiè':

—Guli'sí' lè ni, en guli'gu'aj lati' huéaj, ¹⁸ tu' rea' lib'íli': Bítirö gu'ja' xisi uva cate' idxinrö le rinná bè'è Dios.

¹⁹ Ní'irö gudélè'è yóta xtila, en gudxè' Dios: "Xclenu'." Gudödi ni' buzzuzxjè' le, en bè'è que queégaquiè', rnnè':

—Lè ni naca idütè le naca' le rudöda' uláz queé'li'. Guli'gún caní para usá' ládxi'li' neda'.

²⁰ Cate' budxi gulahuè', lèscá' caní bè'è didza' que xzíga'do' na', rnnè':

—Xzíga'do' ni rulu'í ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queé'li'.

²¹ Na'a, bönni' na' udödè' neda' lu ná'agaca bönachi rö'è rágulenè' neda' tsözxón. ²² Le nácatè huayija' ga ilútiè'

neda', Bönni' Guljē Bönachi, en gaca quia' ca na' nazúaj lu guichi lá'ayi ca ralla' gaca quia', pero bica' bayechi' bönni' na' udödē' neda'.

²³ Ní'irō gula'sí lógaquiē' ta'nábinē' Lē' tu tuē', ta'nnē':

—¿Núzxilōtu' nu gun caní'?

**Tu'í xtídza'gaquiē'
núzxilōgaquiē' gáquiē' lo**

²⁴ Ní'irō gulu'ē didza' la' légasasē' núzxilōgaquiē' idéli'nē' lataj lo. ²⁵ Jesús gudxē' légaquiē':

—Yugu' bönni' unná bē' tu'gunē' dxin yöl-la' unná bē' quégaquiē', ta'nná bē'enē' bönachi, ate' nupa ni dē lu ná'a-gaca yöl-la' unná bē', légaquiē' bönni' tácalen. ²⁶ Libí'ili' biti' ral-la' gunli' caní, pero nu naca lo ládjali' ral-la' gaca ca nu naca cuídí'tērō, ate' nu rinná bē' ral-la' gaca ca nu run dxin quéguequi luzé'e. ²⁷ ¿Núzxilō na' nácarō lo, nu na' rō'ō ragu, o nu rupá' la' huagu? ¿Naru' calēga nu na' rō'ō ragu nácarō lo? Neda' zóalena' libí'ili' ca nu rupá' la' huagu.

²⁸ Libí'ili' ni guzóalenli' neda' cate' ni' bi guca quia', yugu' le gula'zí' bē' neda'. ²⁹ Que lē ni na' udōda' lu ná'ali' tu ga inná bē'éli', ca na' benē' Xuza', budödē' lu na'a ga inná bē'a neda'. ³⁰ Caní guna' para gaca có'ōli', en gu'aj gáguleni' neda' ga ni' inná bē'a, ate' có'ōli' xilataj cázali' ga uchi'a usörōli' idxinnu có' xz'íni xi'sóé' Israel.

**Rnnē' Jesús innē' Pedro
biti' núnbē'ē Lē'**

(Mt. 26:31-35; Mr. 14:27-31; Jn. 13:36-38)

³¹ Gunnē' ca' caní Xanru':

—Simón, Simón. Buyútsōca'. Chigunaba Satanás tu' xihui' libí'ili', para urixi udōdi libí'ili' ca nu rurixi rudōdi zxoa' xtila, ³² pero chibulidza'-nē' Dios, en gunábida' Lē' gácalenē' li', para cabí údxi udú yöl-la' réajlē' quiu' neda'. Na'a, cate'

huóacu' quia', butipa ládxi'gaquiē' böchi' luzó'o.

³³ Pedro rē' Lē':

—Xan, chizóa' sá'lēna' Li', calégasō tseja' lidxi guíē', pero lēasca' gátilēna' Li'.

³⁴ Jesús rē' lē':

—Pedro, rea' li': Zí'alō códxiba' böra na'a, chigudá'bagu'u tsonna luzuí, innó' cabí núnbē'u neda'.

Le benē' Jesús cate' chizóa ilútiē' Lē'

³⁵ Jesús gunábinē' légaquiē', rnnē':

—Cati' gusól-la'a libí'ili' cabí nuá'ali' yōxaj yōta, en calēga buzudi dumí, en calēga chopa cō' xiráchuli', ¿naru' bi biyadzaj queéli'?

Légaquiē' ta'nnē':

—Biti' bi.

³⁶ Ní'irō rē' légaquiē':

—Na'a, nu dē yōxaj yōta que ral-la' guá' le, ate' lēasca' caní ral-la' gun nu dē que buzudi dumí, ate' nu biti' dē que guíē' tuchi' ral-la' guti' lari' rixóa yeni, en si' tu guíē' tuchi'. ³⁷ Rea' libí'ili': Run bayudxi gaca quia' lē na' nazúaj lu guichi lá'ayi, rnna: “Gulunē' queē' ca tunē' qué-gaca nupa tua' dō”, ate' ilaca yúgu'tē le nazúajgaca lu guichi ca ral-la' gaca quia'.

³⁸ Ní'irō légaquiē' ta'nnē':

—Xan, ni dē chopa guíē' tuchi'.

Lē' rē' légaquiē':

—Chinaca.

Jesús rulidzē' Dios la' yēla Getsemani

(Mt. 26:36-46; Mr. 14:32-42)

³⁹ Ní'irō birúajē' Jesús, en ca run cazē' sa'yéajē' lu Gu'á Yaga Olivo, ate' yugu' bönni' usēda queē' sōjácalenē' Lē'.

⁴⁰ Cate' bila'dxinē' ni', Jesús rē' légaquiē', rnnē':

—Buli'lídzē' Dios, inábili'-nē' cabí gata' lataj si' bē' tu' xihui' libí'ili'.

⁴¹ Ní'irō Jesús guzē'ē ga na' nacu'ē, en gudödē' ia'lati' tsca ga ridxín tu guiój rirú'uniru', ate' ni' buzóa zxibē', en rulidzē' Dios. ⁴² Rnnē':

—Xúz, channö ré'ënu', bucuása ga zoa' lë na' ral-la' quí'i saca'a, pero calëga ca ré'ënda' neda', pero ca ré'ënu' Li' gunu'.

⁴³ Ní'irö bulu'í lahué' gubáz lá'ayi queé' Dios, zë'é yehua' yubá, ate' butipë' ládxë'é Jesús. ⁴⁴ Lu yöl-la' risëbi ladxi' queé', idú ládxë'é Jesús bulidzë' Dios, ate' nisa yösa queé' guca ca rön raba' luyú.

⁴⁵ Cate' budxi bulidzë' Dios, guyasë', en bóajë' ga na' nacu'é bönni' usëda queé', ate' duxáquië' légaquië' tásië' tu' tu'hu'ínigaquië'. ⁴⁶ Ní'irö Jesús ré' légaquië':

—¿Rásitsali'? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ili'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

⁴⁷ Tsanni ni' ru'é didza' Jesús, la' bila'dxintë' bönni' zían ni', ate' Judas, bönni' na' nababë' idxínnuë' bönni' usëda queé' Jesús dzáguië' légaquië', ate' nanóruë' lógaquië' bönni' zían na'. Gubígui'ë ga zoë' Jesús para utsaga lahué' Lë'. ⁴⁸ Ní'irö Jesús ré' lë':

—Judas, ¿naru' rudóditso' caní neda', Bönni' Guljë' Bönachi, rutsaga lo' neda'?

⁴⁹ Cate' yugu' bönni' na' nacu'á'lenë' Jesús bila'lé'enë' ca na' raca queé' Lë', të' Lë':

—Xan, ¿naru' güf'itu' légaquië' gufé tuchi'?

⁵⁰ Tuë' bönni' usëda queé' Jesús benë' huë' guídi náguië' bönni' huen dxin queé' bixúz lo. Burixë' guídi náguië' ibëla.

⁵¹ Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. ⁵² Ní'irö ré' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na' biti' ta'lé'enë' Lë' dxi'a, rnnë':

—¿Narúajtsali' nu'á'ali' gufé tuchi', en yaga para sönli' neda' ca runli' rizönli'-në' gubán? ⁵³ Yugu' dza guzóalen caza' libí'ili' chila yudo', ate' biti' bi benli' quia', pero na'a chibidxín dza queé'li', le naca dza dë lu në'e nu na' zoa lataj chulla.

Rnnë' Pedro: "Biti' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'ché'ë Lë' ga na' bulu'sudxinë' Lë' lidxë' bixúz lo. Pedro yöjnahuë' Jesús zítu' zítu'sö. ⁵⁵ Cate' ni'a në'ë bixúz lo chigula'béquië' gu' lö'a lidxë' bixúz lo na', gula'bö'ë idú gásibi'ilö ra' gu' na', ate' Pedro guró'lenë' légaquië' tsözzón. ⁵⁶ Cate' tubi' bi'i nigula huen dxin bilé'ebi'-në' Pedro, ni' ró'ösë' ra' gu', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguië' Pedro, rnnë':

—Nigúla, biti' ca' núnbë'a-në' bönni' na'.

⁵⁸ Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'látis'ö gudzé, gunné' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

⁶⁰ Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'é didza' ni, la' guródx-itëba' böra. ⁶¹ Ní'irö buécjë' Xanru', en ruyúë' Pedro, ate' yöjnenë' Pedro xtídzë'é Xanru', ca na' gudxë' lë': "Zí'aló códxiba' böra na'a, li' chigudá'bagu'u tsonna luzuí, innó' biti' núnbë'u neda'." ⁶² Burúajë' Pedro ní'ilö, ate' rön caz guródxë'.

Tu'titjé' Jesús

(Mt. 26:67-68; Mr. 14:65)

⁶³ Yugu' bönni' na' nazõngaquié' Jesús bulu'titjé' Lë', ate' gula'guiné' Lë'.
⁶⁴ Ní'irõ bulu'sayjé' lahué' Jesús, ate' gula'gápé'ë lahué', en gula'nábiné' Lë', ta'nné':

—¡Gunnéya'atsöca! ¿Nuzxi na' guda-pa' Li'?

⁶⁵ Ziánrõ ca' gula'nné' queé' le gulu'é dö' queé'.

Ridxiné' Jesús lógaquié' bönni' yudo' tu'chi'a tu'söróé'

(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubé' bönni' gula tu'zéajni'iné' bönachi judío len yugu' bixúz unná bé', en bönni' yudo' tu'sédiné', ate' gula'ché'ë Jesús lógaquié' bönni' yudo' tu'chi'a tu'söróé', ate' gula'nábiné' Lë', ⁶⁷ ta'nné':

—Gudíxjõ'i netu'. ¿Naru' nactso' Li' Cristo?

Jesús rë' légaquié':

—Channõ guía' lib'íli' naca' Cristo, biti' tséajlë'ëli' neda', ⁶⁸ en channõ in-ábida' lib'íli' tu didza', biti' ub'íli' didza', en biti' usanlı' neda'. ⁶⁹ Na'a isí lo, neda', Bönni' Guljé' Bönachi, cõ'a cuita lë'ë ibëla Dios, nápatërë' yõl-la' unná bé'.

⁷⁰ Gula'nábiné' Lë' yúgu'të', ta'nné':

—¿Naru' nactso' Li' Zxí'iné' Dios?

Lë' gudxé' légaquié':

—Le nácasõ rnnali'.

⁷¹ Ní'irõ ta'nné':

—¿Núzxirõ naquíniru' nu gun ba nali queé'? La' ré'usõ chibiyóniru' didza' ru'ë.

Ridxiné' Jesús lahué' Pilato, bönni' rinná bé'ë uláz queé' César

(Mt. 27:1-2, 11-14; Mr. 15:1-5; Jn. 18:28-38)

23 Ní'irõ gulazuiné' yúgu'të bönni' zían ni', ate' gula'ché'ë Jesús

lahué' Pilato, ² ga ni' gula'sí lógaquié' tu'zéguié' Lë' didza', ta'nné':

—Bönni' ni, budzólitu' ca runé'. Runé' ga ta'dá'baga' bönachi uládz queé'tu' yúlahui', en ruzágué'ë xinózigaca nupa ta'guízaxj laz ruquízxjé' César, en rnné' lë cazé' náquié' Cristo, bönni' ral-la' inná bé'ë.

³ Ní'irõ Pilato gunábiné' Jesús, rnné':

—¿Naru' nacu' Li' nu inná be'e bönachi judío?

Bubi'ë didza' Jesús, rnné':

—Le nácasõ rnnõ'.

⁴ Ní'irõ Pilato gudxé' yugu' bixúz unná bé', en bönachi nacua' ni', rnné':

—Biti' bi rudzólida' le naca xíguia' nuné' bönni' ni.

⁵ Ní'irõ gulunrë' tsutsu xtídzagaquié', ta'nné':

—Runé' ga tu'tsatsa bönachi, en rusédiné' caní bönachi idú luyú Judea. Gusí lahué' bené' caní luyú Galilea ga ridxinté runé' ca' ni.

Ridxiné' Jesús lahué' Herodes, bönni' rinná bé'ë luyú Galilea

⁶ Cate' biyönné' Pilato didza' ni, tu'ë didza' que luyú Galilea, ní'irõ gunábiné' légaquié' channõ náquié' Jesús bönni' Galilea. ⁷ Cate' gunóziné' nababé' Jesús ga ni' rinná bé'ë Herodes, gusól-lë'ë Lë' lahué' Herodes na', tu' zoé' ca' Herodes Jerusalén yugu' dza na'. ⁸ Cate' Herodes na' bilé'ené' Jesús, budzéjané', tu' chiguca xidzé ré'ëné' ilé'ené' Lë' tu' chibiyönné' le zían ca naca queé' Jesús, en runé' löza ilé'ené' tu yõl-la' huáca guné'. ⁹ Ní'irõ Herodes gunábiné' Jesús le zían, pero Jesús biti' bi didza' bubí'ë. ¹⁰ Nacu'ë ca' ni' yugu' bixúz unná bé', len bönni' yudo' tu'sédiné', ate' bulu'zéguidé'ë Jesús didza'. ¹¹ Ní'irõ Herodes, en bönni' queé' rójáquié' gudilla bulu'cá'ané' Jesús cá'asõ, en para ulu'titjé' Lë', bulu'gacué' Lë' tu lari' naza-ca' ca rácué' tu bönni' unná bé', ate'

leyúbölö bulu'sudxinë' Lë' lahuë' Pilato.
¹²Dza na' bulu'dzáguië' dxi'a Pilato, en Herodes, tu' zí'aló gula'lé luzé'è tuë' ia'túë'.

Ta'chúguië' queë' Jesús gátië'

(Mt. 27:15-26; Mr. 15:6-15;

Jn. 18:39–19:16)

¹³Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzo, ¹⁴ate' rë' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzéguii'-në' didza'. ¹⁵Cate' gusól-la'a libí'ili' lahuë' Herodes, biti' bi budzólinë' le benë' bönni' ni le naca xíguia' nabáguë'ë para nu ichugu queë' gátië'. ¹⁶Na'a usaca' zi'a-në', ate' tödi na' usana'-në'.

¹⁷Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'. ¹⁸Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

¹⁹Nadzunë' Barrabás na' lidxi guíë tu' gudíl-lalenë' yúlahui' lu yödzo na', en tu' bëtië' bönachi. ²⁰Bulidzë' Pilato légaquië' leyúbölö, tu' ré'ënë' usanë' Jesús. ²¹Leyúbölö gulu'ë zidzaj didza', ta'nnë':

—¡Budé'ë lë'e yaga cruz! ¡Budé'ë lë'e yaga cruz!

²²Ní'irö Pilato gudxë' légaquië' le bunny luzuí, rnnë':

—¿Bixzi caz le ruá' dö' benë' bönni' ni? Biti' bi budzólida' nunë' le run ga nabáguë'ë xíguia' gátië'. Usaca' zi'a-në', ate' ní'irö usana'-në'.

²³Zidzajrö gulu'ë didza', ta'nabë' tē'ë Jesús lë'e yaga cruz. Tu' gula'bódx-i'ë yenni' yugu' bönni' na', en yugu' bixúz unná bë', gula'déli'në' gaca ca na' té'ënnë'. ²⁴Ní'irö Pilato guchúguië'

queë' Jesús, para gaca queë' ca na' ta'nabë'. ²⁵Busanë' quégaquië' bönni' na' nadzunë' lidxi guíë tu' gudíl-lalenë' yúlahui', en bëtië' bönachi, bönni' na' chígula'nabë', ate' budödë' Jesús para gaca queë' ca na' té'ënnë'.

Dë'ë Jesús lë'e yaga cruz

(Mt. 27:32-44; Mr.

15:21-32; Jn. 19:17-27)

²⁶Cate' ni' ta'ché'ë Jesús tsöjda'gaquië' Lë' lë'e yaga cruz, gula'zönë' Simón, bönni' yödzo Cirene, suzë'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cúdzulë' Jesús.

²⁷Bönachi zían, enca' yugu' nigula söjnógaca Jesús, ta'bódxinu nigula na', en ta'bódxu yéchi'nu queë' Lë'. ²⁸Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' códx-ili' quia' neda', pero guli'cödx que quézili', en quégacabi' zxf'inili' ²⁹tu' huadxín dza ila'nná: “Bica' bágaca yugu' nigula huödx, en nigula biti' guluá'anubi' bí'ido', en biti' bulu'gádxinu-bi' bí'ido'.” ³⁰Ní'irö ila'sí lógaca ila'nná bönachi, ilë' yugu' gu'a sibi: “Guli'dubága' netu'”, en ilë' ca' yugu' gu'ado: “Guli'cachi' netu'.” ³¹Channö caní tunë' quia' neda', naca' ca tu yaga ya'a, ¿naru' cabí ilüntërë' ca' queéli', nácali' ca yaga bidxi?

³²Gula'ché'ë ca' chopë' bönni' tuá' dö', para ilútië' légaquië' tsözxón len Jesús. ³³Cate' bila'dxinë' lataj nazí le Calavera, le rnna len didza' xidza' Lataj Que Böga' Ícjaru', bulu'dé'ë Jesús lë'e yaga cruz. Bulu'dé'ë ca' lé'egaca yaga cruz chopë' bönni' tuá' dö'. Tuë' bulu'dé'ë cuita lë'ë ibëla Jesús, en ia'túë' bulu'dé'ë cuita lë'ë yógöla. ³⁴Ní'irö Jesús rnnë':

—Xuz, buniti lo légaquië', tu' cabí nózguequinë' bi tunë'.

Bönni' rójaquië' gudil-la nacu'ë ni' bulu'lé'ë que queégaquië' le nácuë' Jesús,

en bulu'quitjé' le gaca bē' lahui. ³⁵Bönachi nacua' ni' tu'yú, en yugu' bönni' dē lu ná'agaquié' bulu'titjé' Jesús, ta'nné':

—Yugu' nu yúbölö busölé' bönni' ni. Na'a ral-la' usólá cuiné' channö náquié' Cristo, bönni' guró cazé' Dios.

³⁶Yugu' bönni' na' röjáquié' gudil-la bulu'titjé' ca' Jesús. Gula'bigué'ē ga na' zoé', en bulu'guijé' Lē' nupi zi, ³⁷ta'nné':

—Channö nacu' Li' bönni' inná bé'ené' bönachi judío, busólá cuinu'.

³⁸Da' ca' lē'e yaga cruz icjlé' Jesús tu le nazúaj lu guichi lu didza' griego, en lu didza' latín, en lu didza' hebreo, le rna caní: “Bönni' Rinná Bé'ené' Bönachi Judío.” ³⁹Tuē' bönni' huiá' dö' na' dē'e lē'e yaga cruz bulidza zi'ē Jesús, rnné':

—Channö nacu' Li' Cristo, busólá cuinu', enca' netu'.

⁴⁰Bubi'ē didza' ia'tué' bönni' huiá' dö' na', en gudil-lé' luzé'ē na', rnné':

—¿Naru' cabí rádxinu'-né' Dios? Lē'sca' lí' narugu quiu' gátu'. ⁴¹Le nácatē rē'u, le rál-la'sö gaca queéru' riguí' rizáca'ru', ca na' sa'yéaj dö' biá'aru', pero Bönni' ni, bití' bi dö' nu'ē.

⁴²Ní'irö bönni' ni rē' Jesús:

—Yöjné neda' cate' idxinu' ga ni' inná bē'u.

⁴³Jesús rē' lē':

—Le nácatē rea' lí', na'a dza ni sóalenu' neda' lataj lachi quia'.

Ratié' Jesús

(Mt. 27:45-56; Mr.

15:33-41; Jn. 19:28-30)

⁴⁴Cate' bidxín idú huagubidza, guchul-la iduté yödzölió ga bidxinrö idú ridödi xihuó. ⁴⁵Guchul-la gubidza, ate' lari' nal-la' lu yudo' biröza' chopa d'í'ilo.

⁴⁶Ní'irö bē'ē zidzaj didza' Jesús, rnné':

—Xuz, rigú'a lu no'o bö' naca caza'.

Cate' budxi gunné' caní, birúajtē bö' naca cazé', gútié'.

⁴⁷Cate' bönni' rinná bé'ené' bönni' röjáquié' gudil-la bilé'ené' ca na' guca, gulu'ē Dios yöl-la' ba, rnné':

—Le nácatē bönni' ni gúquié' bönni' tsahui'.

⁴⁸Cate' yúgu'tē bönni' nacu'ē ni' tu'yúé' bila'lé'ené' lē na' guca, yöjhuó-j-gaquié' yödzö, ta'gapa' luchú'ugaquié' tu' tu'bániné'. ⁴⁹Zí'tu'sö bulu'gá'ana yúgu'tē nupa ni' núnbé'gaca Jesús, en yugu' nigula na' yöjácalennu Lē' cate' ni' gudé' luyú Galilea, ate' tu'yúé' lē ni raca.

Rigáchē'ē Jesús yeru ba

(Mt. 27:57-61; Mr.

15:42-47; Jn. 19:38-42)

⁵⁰Zoé' ca' ni' tu bönni' yödzö Ari-matea que luyú Judea, lē' José. Bönni' ni náquié' dxi'a, en tsahui', en nabábalené' yugu' bönni' yudo' tu'chi'a tu'söróé'.

⁵¹Bití' bené' tuz nupa na' gula'chugu queé' Jesús gátie', tu' ribözé' ca' José ni le rinná bē'ē Dios. ⁵²Ní'irö guyijé' José na' lahué' Pilato, en gunabé' lataj u'ē Jesús. ⁵³Cate' chinuzötjé' Lē', buchóliné' Lē' lari', ate' gulu'ē Jesús yeru ba, le nadaj lē'e gu'á guió'j, ate' lu ba na', cuntu nu nagü'f'iguequiné'. ⁵⁴Dza na' naca dza tu'pé'ē que dza lá'ayi quégaquié' bönni' judío, tu' si' idxín dza na'.

⁵⁵Yöjácenu ca' ni' nigula na' gula'zá'lennu Jesús, cate' ni' gudé' luyú Galilea, ate' bila'lé'enu yeru ba na', en ca na guca, gula'gu'ē Lē' ni'. ⁵⁶Cate' yöjhuó'jgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí' ládxi'gacanu dza lá'ayi na' quégaquié' bönni' judío ca na' rinná bē' xibá queé' Dios.

Rubané' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

24 Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queé' Jesús. Nu'ágacanu yugu' le rilá' zxixi, lē

na' chinupá'agacanu, ate' dzágagacanu légacanu ia'bál-lanu nigula. ²Cate' bila'dxinnu ni', bila'lé'enu chinadúa guió'j na' gudá' ga nu riyaza yeru ba queé'. ³Cate' gula'yázanu yeru ba na', biti' bulu'dzólínu zoa Xanru' Jesús ni'. ⁴Cate' ni' ta'bó'ónu böniga ni'a que lè ni, chopè' bönni' nácagacuié' lari' rèpi yösa bení' la' bila'dxinté' ni', en gula'zuñé' ga na' nacua'anu. ⁵Ní'irö guládxinu, en bulu'zötaj ícagacanu, tu'yunu lu yu, ate' chopè' gubáz lá'ayi na' té' légacanu, ta'nné':

—¿Bizx que ruguflajli' nu zoa nabán xilataj nu nati? ⁶Biti' zoé' ni, tu' chibubané'. Guli'tsöjné lè na' chigudxi cazé' libí'ili' cate' ni' zoé' luyú Galilea. ⁷Gunné': "Run bayudxi nu udödi neda', Bönni' Guljé' Bönachi, lu ná'agaquié' bönni' dul-la', ate' ulu'dé'è neda' lè'e yaga cruz, ate' ubana' cate' gaca tsonna dza."

⁸Ní'irö yöjnégacanu didza' na' bë'è Jesús, ⁹ate' bulu'zá'anu ra' yeru ba na', yöjtíxjöi'iguequinu idxinéajté' bönni' gubáz queé' Cristo, en ia'zica'rè' ca', ca naca lè na' guca. ¹⁰Nigula na' yöjtíxjöi'iguequinu bönni' gubáz na' yugu' lè ni, nácagacanu María Magdalena, en Juana, en María, xiné'è Jacobo, en ia'bál-lanu nigula na' dzágagacanu légacanu. ¹¹Guléquiné' bönni' gubáz na' tu'ínu didza' chixi, en biti' gula'yéajlè'è légacanu.

¹²Ní'irö guyasé' Pedro, en carelò sa'yéajé' ra' yeru ba na'. Cate' buyúé' lu ba na', bilé'ené' yugu' lári'sö nacua' ni', ate' ní'irö bóajé' lidxé', rubániné' ca naca lè na' guca.

Le guca la' nöza ridxinté Emaús

(Mr. 16:12-13)

¹³La' dza ná'asö söjáquié' chopè', yú'ugaquié' nöza le ridxinté Emaús, le rō'ö ca chopa hora rizá'aru' Jerusalén. ¹⁴Yú'ugacasé' ca' nöza, tu'è didza' ca

naca yúgu'tè lè na' guca. ¹⁵Tsanni ni' yú'ugaquié' nöza, tu'è didza' la' légacase', gubígui'è gala' Lè cazé' Jesús, ate' gudálené' légaquié' tsözxón. ¹⁶Biti' bulu'únbé'è Lè' tu' naca ca tu le nabaga' guió'j lógaquié'. ¹⁷Ní'irö Jesús gunábiné' légaquié', rnné':

—¿Bizxi didza' na' ru'íli' la' libí'isili' yú'uli' nöza? ¿Bizx que na' ruhu'íinili'?

¹⁸Bubi'è didza' bönni' na' lè Cleofas, rē' Lè':

—¿Nácatsö' bönni' zi'tu' lu yödzö Jerusalén, en tuzu' li' biti' nózinu' lè na' guca néaje nasi ni'?

¹⁹Ní'irö Jesús rē' légaquié':

—¿Bizxi na' guca?

Tè' Lè':

—Lè na' guca queé' Jesús, bönni' Nazaret. Gúquié' bönni' bë'è didza' uláz queé' Dios, ate' len yöl-la' huáca zxon bené' dxin, en bë'è didza' lahué' Dios, en lógaca yúgu'tè bönachi. ²⁰Yugu' bixúz unná bë', len bönni' ta'nná bé'ené' netu' bulu'dödé' Lè', en guluné' ga nu guchugu queé' gátie', ate' bulu'dé'è Lè' lè'e yaga cruz. ²¹Netu' bentu' löza gúquié' Lè' bönni' na' ral-la' huóá'ue' bönachi Israel, pero na'a chiguca tsonna dza cate' gulaca lè ni. ²²Ia'stú, bál-lanu nigula nútsa'gacanu netu' gulunnu ga guró'ötu' böniga. Yöjácanu ra' yeru ba queé' cate' si' gulén gubidza na'a dza, ²³en cate' biti' bulu'dzólínu Lè', buduhuó'jgacanu, en gulénu netu' bila'lé'enu yugu' gubáz lá'ayi queé' Dios, nupa ni' gulé légacanu zoé' nabané' Jesús. ²⁴Ní'irö bal-lé' bönni' luzá'atu' yöjáquié' ra' yeru ba na', en bila'lé'ené' naca ca na' gula'nnanu nigula na', pero biti' bila'lé'ené' Jesús.

²⁵Ní'irö Jesús gudxé' légaquié':

—Libí'ili', bönni' biti' réajni'ininé'. Nazidi icja ládxí'do'oli' para cabí tséajlè'èli' yúgu'tè le gula'nné' bönni' gulu'è didza' uláz queé' Dios. ²⁶¿Naru' cabí ben bayudxi qui'i sáque'è Cristo yugu' lè ni, en tsázié' ga ni' tsépisètèrè'?

²⁷ Ní'irō gusí lahuë' Jesús riguíxjöi'inë' légaquië' yúgu'të le ru'í didza' ca naca queë' le nazúajgaca lu guichi lá'ayi, ca na' gusí lo bë'ë didza' Moisés ga bidxintë yugu' le gula'nnë' yúgu'të bönni' gulu'ë didza' uláz queë' Dios.

²⁸ Cate' bila'dxinë' yódzödo' ga na' sōjáquië', benë' Jesús ca tu bönni' zéajtërë' zi'tu'. ²⁹ Gulunë' bayudxi ugá'analënë' légaquië', ta'nnë':

—Bugá'analen netu', tu' chiridzō' na'a, en chizōa gal-la.

Ní'irō guyázië' Jesús yu'u, en bugá'analënë' légaquië'. ³⁰ Cate' ni' Jesús rō'ë rágulenë' légaquië', gudélë'ë yōta xtila, en gudxë' Dios: "Xclenu'." Ní'irō buzzuxjë' le, en bë'ë quégaquië'. ³¹ La' ní'sō bidúa lë na' gubaga' guiój lōgaquië', ate' bulu'únbë'ë Jesús, ate' Lë' buniti cuinë' lōgaquië'. ³² Ní'irō gulé luzë'ë tuë' ia'túë':

—¿Naru' cabí böála'tica' lādxi'do'oru' tsanni ni' ru'ílenë' rë'u didza' la' nōza, en cate' ni' ruchila lá'anië' le nazúaj lu guichi lá'ayi?

³³ La' ní'sō gula'zuinë' yōjhuójgaquië' Jerusalén, ate' yōjxáca'gaquië' nudúbigaquië' idxinéajtë' bönni' gubáz queë' Jesús, en nupa nacuá'len légaquië'. ³⁴ Ní'irō yugu' bönni' na' nacu'ë ni' gulë' chopë' na':

—Chibubán cazë' Xanru', en buluf'i lahuë', ate' bilé'enë' Simón Lë'.

³⁵ Ní'irō chopë' na' gula'guíxjö'ë ca na' guca quégaquië' la' nōza, en ca na' bulu'únbë'ë Jesús cate' ni' buzzuxjë' yōta xtila na'.

Bönni' usëda queë' Jesús tu'lé'enë' Lë'

(Mt. 28:16-20; Mr.

16:14-18; Jn. 20:19-23)

³⁶ Tsanni ni' tu'ë didza' ca nácgaca lë ni, la' yōjsóatë' Jesús gatsaj láhu'i'lō ga na' nacu'ë, ate' rë' légaquië':

—Gulí'sóa dxi lādxi'li'.

³⁷ Ní'irō guladxi gula'dzóbínë' tu' téquinë' bixín ta'lé'enë'. ³⁸ Jesús rë' légaquië':

—¿Bizx que rō'ōli' bōniga? ¿Bizx que rizá' lādxi'li' yugu' lë ni? ³⁹ Buli'yútsōca' na'a, en ni'a. Neda' caz ni. Gulí'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

⁴⁰ Ni' ru'fisë' ca' didza' ni, buluf'inë' légaquië' në'ë, en ni'ë. ⁴¹ Tu' tu'dzé-jaguequinë' biti' gula'yéajlë'ë, en gula'bō'ë baniga. Que lë ni na' Jesús gudxë' légaquië':

—¿Dë queéli' ni le gahua'?

⁴² Ní'irō bulu'nödzjë' queë' láti'do'oba' böla chinégui'ba', en tu quíxxi'ba' buz. ⁴³ Guzxi'ë Jesús le, en gudahuë' lōgaquië'. ⁴⁴ Ní'irō rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóale-na' libí'ili', gunnía': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi naz'fi le Yugu' Salmo, ca ral-la' gaca quia' neda'.

⁴⁵ Ní'irō buzéajni'inë' légaquië' lë na' nazúajgaca lu guichi lá'ayi. ⁴⁶ Rë' légaquië':

—Caní nazúaj lu guichi ca run bayudxi gaca queë' Cristo, qui' sáquë'ë, en ubanë' lu yöl-la' guti cate' gaca tsonna dza, ⁴⁷ ate' idütë yödzóliō ral-la' gaca libán ca naca quia' neda' para ulu'bf'i lādxi'gaca bōnachi para uniti lahuë' Dios dul-la' nabága'gaquië'. Lu yödzō Jerusalén isí lo gaca libán na' ⁴⁸ ate' libí' cázali' na' bilé'eli' yugu' lë ni ral-la' gunli' ba nalí que. ⁴⁹ Buli'yútsōca', isól-la'a queéli' le guzxi' lu në'ë Xuza' gunnë' queéli', pero buli'gá'anasō Jerusalén cate' idxinrō queéli' yöl-la' huáca na' za' yehua' yubá.

Ruhuëpë' Jesús yehua' yubá*(Mr. 16:19-20)*

⁵⁰ Ní'irö Jesús guché'ë yugu' bönni' dá'gaquië' Lë', söjáquië' yödzö Betania, ate' ni' guchisa në'ë, en bulidza tsáhuë'ë légaquië'. ⁵¹ Tsanni ni' rulidza tsáhui'së'

ca' légaquië', buzá'atë' ga na' nacu'ë, buëpë' yehua' yubá. ⁵² Gudödi gula'yéaj ládxi'gaquië' Lë', lu yöl-la' rudzeja qué-gaquië' yöjhuójgaquië' Jerusalén. ⁵³ Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

DIDZA' DXI'A BUZÚAJĚ' JUAN

Bönni' na' nazí'i lě Didza' gúlajě' bönachi

1 Cate' gusí lo, zí'atělö cate' sí' gata' yödzölió, ni' zoa cazě' Bönni' lě' Didza', ate' Bönni' na' náquiě' Didza' zóaleně' Dios, ate' Didza' na' naca caz Dios. ²Bönni' na' náquiě' Didza' zóaleně' Dios cate' ni' gusí lo sí' rata' yödzölió. ³Lu ně'ě Bönni' ni, Dios beně' yúgu'tě le dě, en biti' bi dě le nuně' Dios le cabí beně' lu ně'ě Bönni' na'. ⁴Dě caz queě' yöl-la' na'bán, ate' yöl-la' na'bán na' naca ca tu bení' le ruzení' lu icja ládxi'do'gaca bönachi. ⁵Ruzení' bení' na' ga naca chulla que dul-la', pero biti' ca' sequi' le chulla na' usulu bení' na'.

⁶Dios gusól-lě'ě ni tu bönni' lě' Juan. ⁷Bidě' bönni' ni para gáquiě' nu gun ba nalí. Bidě' para guně' ba nalí queě' Bönni' na' náquiě' bení', para tséjlě'gaca yúgu'tě bönachi Dios ni'a que lě na' runě' ba nalí. ⁸Biti' náquiě' Juan bení' na', pero bidě' para guně' ba nalí queě' Bönni' na' náquiě' bení'. ⁹Bönni' na' náquiě' bení' le naca idú ni' raziě' yödzölió ni, ate' ruzení'ě lu icja ládxi'do'gaca yúgu'tě bönachi.

¹⁰Bönni' na' náquiě' bení' bidxině' yödzölió ni, ate' lu ně'ě Lě' Dios beně' yödzölió ni, pero bönachi yödzölió biti' bulu'únbě'ě Lě'. ¹¹Bidxině' ga nequi queě', pero biti' ca' gula'z'í lu ná'agaquiě' Lě' bönni' nabábaleně'. ¹²Yúgu'tě bönni' gula'z'í lu ná'agaquiě' Lě', bönni' ni' gula'yéajlě'ě Jesús, Lě' beně' ga dě lu ná'agaquiě' ilácagaquiě' zxf'ině' Dios. ¹³Bönni' ni' nácagaquiě' zxf'ině' Dios, calěga tu' nácagaquiě' zxf'ině' nu bönni', en calěga tu' nálajgaquiě' ni'a que le rizě ládxe'ě nu bönni', o ni'a que tu le ré'ěneně' nu bönni', pero nácagaquiě' caní tu' naca le ré'ěni quezíně' Dios.

¹⁴Bönni' na' náquiě' Didza' guljě' bönachi, en tu ch'ísó guzóaleně' rě'u, idú dzágagaca Lě' le ruzá' ládxe'ě Dios queěru', en le naca idútě li. Bilé'etu' yöl-la' zxön queě', ate' yöl-la' zxön queě' na' naca le ru'í queěbi' bi'í la's dui que, Nu na' naca Xúzibi'. ¹⁵Juan na' beně' ba nalí queě' Bönni' na', en bě'ě zidzaj didza', rnně':

—Bönni' ni náquiě' Nu na' gudíxjō'a que, gunnía': Bönni' sí' zátělě' ca neda' nayěpisětěre' ca neda', tu' zoa cazě' Lě' zí'aló ca neda'.

¹⁶Le naca idú queě' buzí'uru' xibě yúgu'těru', lě na' buzá' ládxe'ě queěru' Dios, en zíanrö ca' le ruzá' ládxe'ě queěru'. ¹⁷Bidxín queěru' xibá queě' Dios lu ně'ě Moisés, pero le ruzá' ládxe'ě queěru' Dios, en le naca idútě li bila'dxín queěru' lu ně'ě Jesucristo. ¹⁸Catu caz nu bilé'e Dios, pero Lě', la's dui Zxf'ině' Dios, Bönni' na' nadxf'ide'eně' Dios Xuz, Bönni' ni na' beně' ga núnbě'ěru'-ně' Dios.

Le beně' ba nalí Juan, bönni' buquilě' bönachi nisa, ca náquiě' Jesús

(Mt. 3:1-12; Mr. 1:7-8; Lc. 3:1-17)

¹⁹Lě ni naca le beně' ba nalí Juan, cate' ni' bönni' judío unná bě' nacu'ě Jerusalén gula'sól-lě'ě yugu' bixúz, en bönni' nabábagaquiě' Leví, nupa ni nácagaca ni'a ná'agaquiě' bixúz, para ila'nábině' Juan na', ila'nně':

—¿Nuzxi bönni' lí'?

²⁰Yálajdo' bě'ě didza' Juan, en biti' gudá'baguiě', pero gudíxjō'ě catěz naca, rnně':

—Biti' naca' Cristo, Bönni' na' guzxf' lu ně'ě Dios isól-lě'ě queěru'.

²¹Ní'irö gula'nábině' lě' leyúbölö, tě' lě':

—¿Nuzxi caz lí'? ¿Naru' nacu' lí' Elías, bönni' bě'ě didza' uláz queě' Dios dza ni'tě'?

Gunně' Juan:

—Biti' naca'.

Ní'irö tē' lē':

—¿Naru' nacu' li' bönni' na' ral-la' guídē' gu'ē didza' uláz queē' Dios?

Bubi'ē didza' Juan, rnnē':

—Calēga neda'.

²² Ní'irö tē' lē':

—¿Nuzxi caz nacu'? Gudíxjö'i netu' para gaca usiyöntu' nupa gula'sól-la' netu'. ¿Bizxi rnno' li' nuzxi nacu'?

²³ Bubi'ē didza' Juan, rē' légaquiē':

—Neda' naca' bönni' na', nazúaj lu guichi lá'ayi ca naca queē', rna: Riyón chi'ni nu rulidza lu lataj cá'asö, rna: Buli'béaj li nöza para idxín Xanru' queé'li'. Caní gunné' Isaiás, bönni' na' bē'ē didza' uláz queē' Dios.

²⁴ Yugu' bönni' ni nácaquiē' bönni' yudo' fariseo nasól-la'gaquiē' bönni' judío unná bē'. ²⁵ Gula'nábinē' Juan, tē' lē':

—¿Bizx que ruquilu' bönachi nisa channö cabí nacu' li' Cristo, en biti' nacu' Elías, en calēga bönni' na' ral-la' guídē' gu'ē didza' uláz queē' Dios?

²⁶ Bubi'ē didza' Juan na', rē' légaquiē':

—Neda' ruquila' bönachi nisa lu nisa, pero gatsaj láhui'lö ga zóali' zoē' tu bönni' biti' núnbē'eli'-nē'. ²⁷ Bönni' ni náquiē' Bönni' na' si' zá'télē' ca neda', en nayépisētērē' ca neda', ate' biti' naca' neda' lesaca' ulecja' xiráchuē' nudé'ē.

²⁸ Yúgu'tē lē ni guca lu xiyú yödzö Betábara, ga naca ia'tsól'a yegu Jordán, zaca' ga rilén gubidza, ga ni' buquilē' Juan bönachi nisa.

Jesús náquiē' ca bö'cu' zxíla'do' tutiē'-ba' lahuē' Dios tu' nözi dul-la'

²⁹ Dza buropi ni' Juan bilé'enē' Jesús, zē'ē ga zoē', ate' rnnē':

—Buli'yútsöca'. Bönni' ni náquiē' bö'cu' zxíla'do' queē' Dios, gatiē' para ugúē' dul-la' nabága'gaca bönachi yödzölió. ³⁰ Lē' náquiē' bönni' na' gunnía' queē': "Si' zá'télē' ca neda' tu bönni', nayépisētērē' ca neda', tu' zoa

cazē' zí'alö ca neda'." ³¹ Neda' biti' bēnbē'a-nē' zí'alö, pero bida', ruquila' bönachi nisa para ilúnb'e bönachi Israel Lē'.

³² Benē' ba nalí Juan ca naca queē' Jesús, rnnē':

—Bilé'eda'-nē' Dios Bö' Lá'ayi, bö'tjē' birúajē' yehua' yubá, guné'ē ca riná'aba' gu'dödo', ate' bidxinē' ga zoē' Jesús, en bugá'analenē' Lē'. ³³ Biti' bēnbē'eda' Lē' zí'alö. Gudxi neda' Nu na' gusól-la' neda' para uquila' bönachi nisa, gunné': "Cate' ilé'enu'-nē' huö'tjē' Dios Bö' Lá'ayi, tsöjsóalenē' Bönni' na', en ugá'analenē' Lē', Bönni' ni gunē' le rulu'isö yöl-la' ridila nisa ni, uchiziē' bönachi Dios Bö' Lá'ayi." ³⁴ Na'a, chibilé'eda' lē na', en runa' ba nalí queē' Bönni' ni, náquiē' Zxí'inē' Dios.

Yugu' bönni' usēda zí'alö queē' Jesús

³⁵ Ia'tú dza ca', leyúbölö zoē' Juan ni', ate' nacua'lenē' lē' chopē' bönni' dá'gaquiē' lē'. ³⁶ Cate' Juan na' bilé'enē' Jesús, ridödē' ni', ní'irö gudxē' bönni' na' dá'gaquiē' lē', rnnē':

—Buli'yútsöca'. Ni' zoē' bönni' na' náquiē' bö'cu' zxíla'do' queē' Dios, gatiē' uláz quegaca bönachi dul-la'.

³⁷ Chopē' bönni' na' dá'gaquiē' Juan bila'yönnē' didza' ni bē'ē lē', ate' yöjnó-gaquiē' Jesús. ³⁸ Ní'irö buécjē' Jesús, en buyúē' chopē' ni söjnógaquiē' Lē', ate' rē' légaquiē':

—¿Bizxi riguljali'?

Tē' Lē':

—Bönni' Usedi, ¿gazxi zu'?

³⁹ Bubi'ē didza' Jesús, rē' légaquiē':

—Gulí'dá, uyulí'.

Ní'irö yöjácalenē' Lē', en bila'lé'enē' ga na' zoē', ate' bulu'gá'analenē' Lē' dza na', tu' chizá' ral-la.

⁴⁰ Andrés, bóchē'ē Simón Pedro, náquiē' tuē' bönni' chopē' ni' bila'yönnē' didza' bē'ē Juan, en yöjnógaquiē' Jesús.

⁴¹ Andrés na', zí'alò yòjdiljè' bönni' bóchë, lè' Simón, ate' rë' lè':

—Chibidzólitu'-nè' Mesías.

Mesías naca tu didza' hebreo le rnna lu didza' griego: Cristo, ate' lu didza' xidza': Bönni' nasól-lë'è Dios.

⁴² Ní'irò Andrés na' la' guchë'të' Simón ga na' zoë' Jesús. Cate' Jesús bilé'enë' lë', rë' lë':

—Lí' nacu' Simón, zxf'inë' Jonás. Na'a, si' lo' Cefas.

Cefas naca ca' tu didza' hebreo le rnna: Pedro, lu didza' xtila, ate' lu didza' xidza': Guió'j.

Jesús rulidzë' Felipe, en Natanael

⁴³ Cate' za' rení' ia'tú dza, gú'unnë' Jesús tsejè' luyú Galilea, ate' yójxáquië' Felipe, en rë' lë':

—Gudá' neda'.

⁴⁴ Náquië' Felipe bönni' yödzo Bet-saida, le naca ládzagaquië' Andrés, en Pedro. ⁴⁵ Felipe budzólinë' Natanael, en rë' lë':

—Chibidzólitu'-në' bönni' na' buzúajjè' Moisés ca naca queë' lu guichi lu xibá queë' Dios, ate' bulu'zúajjè' ca' ca naca queë' bönni' gulu'è didza' uláz queë' Dios. Bönni' ni Jesús, zxf'inë' José, bönni' yödzo Nazaret.

⁴⁶ Natanael rë' lë':

—¿Naru' hualá'tsö Nazaret tu le naca dxi'a?

Felipe rë' lë':

—Gudá uyú'.

⁴⁷ Cate' bilé'enë' Jesús zë'è Natanael na' ga zoë', rnnë':

—Buli'yú ni tu bönni' náquië' idú bönni' Israel, en bití' rnnasë' ca' bönni' ni.

⁴⁸ Ní'irò Natanael gunábinë' Jesús, rë' Lë':

—¿Naru' núnbë'tso' neda'?

Bubi'è didza' Jesús, rë' lë':

—Cate' si' ulídzatërë' Felipe lí', cate' ni' zu' zcan yaga higo, bilé'eda' lí'.

⁴⁹ Ní'irò bubí'è didza' Natanael, rë' Lë':

—Bönni' Usedi, Lí' nacu' Zxf'inë' Dios. Lí' nacu' Nu inná be'e bönachi Israel.

⁵⁰ Bubi'è didza' Jesús, rë' lë':

—¿Réajlë'tso' tu' gudxa' lí': Bilé'eda' lí' zcan yaga higo? Yugu' le zxóntërö ca lè ni hualé'enu'.

⁵¹ Lësca' caní rë' Jesús légaquië', rnnë':

—Le nácatë' rea' libí'ili', ilé'eli' nayalaj lúzxiba, en ta'benë', en tu'huójtjè' gubáz lá'ayi queë' Dios ga zoa' neda', Bönni' Guljè' Bönachi.

Laní que yöl-la' rutsaga na' le guca lu yödzo Caná

2 Cate' chiguca tsonna dza, guca laní que yöl-la' rutsaga na' lu yödzo Caná luyú Galilea, ate' zóanu xiné'è Jesús ni'.

² Lësca' zoa nu bulidza Jesús, en yugu' bönni' usëda queë' dijáquië' laní na'.

³ Cate' biyadzaj xisi uva ilé'ajjè', ní'irò xiné'è Jesús gúdxinu Lë', rnnanu:

—Bití'rö dë xisi uva ilé'ajjè'.

⁴ Bubi'è didza' Jesús, rë'è-nu:

—Nígúlado'. ¿Bizx que rulidzu' neda'? Bití' ca' ridxini dza ulu'a lahui yöl-la' huáca quia'.

⁵ Ní'irò xiné'è Jesús gúdxinu bönni' huen dxin ta'gu'è le tahuë', rnnanu:

—Gulí'gún yúgu'të le gufë' libí'ili'.

⁶ Nacuá' ni' xopa yusu' guió'j tu'gunë' dxin bönni' judío cate' tu'pá'a cuín-gaquië' ca nalébiguequinë' tunë', en rúdzugaca chopá tsonna rö'ö nisa tu tu yusu' na'. ⁷ Jesús gudxë' yugu' bönni' huen dxin na', rnnë':

—Bulí'lí yugu' yusu' ni nisa.

Bulu'lié' yugu' yusu' na' nisa. ⁸ Ní'irò Jesús rë' légaquië':

—Gulí'gachi' na'a, en guli'tsöjuá' lahuë' bönni' zoë' ra' yusu'.

Yöjuá'gaquië' na'. ⁹ Buyúë' bönni' na' zoë' ra' yusu' channö nazxf'i nisa na' nuhuóáca xisi uva, pero bití' réquibe'enë' gazxi za'. Nóziguequinë' bönni' huen dxin na' guláchë'è nisa na'. Ní'irò bönni'

na' zoë' ra' yusu' bulidzë' bönni' rutsaga në'ë, ¹⁰ en rë' lë':

—Zí'aló tu'nödzejë' yúgu'të bönni' xisi uva nácarö sizxí'i, en cate' chigulé'ajë' yenni', ní'irö tu'nödzejë' le cabí nazxí'i. Lí', ga bidxintë na'a ben chi'u xisi uva nácarö sizxí'i.

¹¹ Yöl-la' huáca naca bë' ni benë' Jesús lu yödzo Caná luyú Galilea naca le risí lo yugu' yöl-la' huáca gunë'. Caní guca, bulu'e lahui yöl-la' zxon queë', ate' gula'yéajlë' Lë' bönni' usëda queë'.

¹² Gudödi na' gуйijë' Jesús yödzo Capernaum, ate' dzágagaquië' xinë'ë, en yugu' bönni' bóché'ë, en yugu' bönni' usëda queë' Lë', ate' zían dza gula'cu'ë Capernaum na'.

Rulatjë' Jesús lö'a yudo', rubéajë' nupa tun le cabí ral-la' ilún ni'

(Mt. 21:12-13; Mr.

11:15-18; Lc. 19:45-46)

¹³ Cate' chizóa idxín Laní Pascua cate' tu'subanë' bönni' judío ca benë' Dios, ca na' bubéajë' xuz xtó'ogaquië' luyú Egipto, gуйijë' Jesús yödzo Jerusalén.

¹⁴ Lu yödzo na' yójxáquië' Jesús nacu'ë bönni' lö'a yudo' ga na' túti'ë-ba' yugu' bëdxi, en yugu' bö'cu' zxila', en yugu' gu'dödo', böa' bëdxi na' tútigaquië'-ba' lahuë' Dios. Ró'ogaquië' ca' ni' bönni' tu'tsë'ë dumí za' idútë yödzoilío. ¹⁵ Cate' bilé'enë' Jesús lë ni, buzalë' yugu' du lasi le quindë' bönachi na', ate' bulágui'ë yúgu'të nf'ilö lö'a yudo', en bulágui'ë-ba' ca' nf'ilö yugu' bö'cu' zxila', en yugu' bëdxi. Bësië' dumí quégaquië' bönni' na' tu'tsë'ë dumí lu yu, en burixë' yugu' blaga quégaquië'. ¹⁶ Ní'irö Jesús gudxë' bönni' na' túti'ë-ba' yugu' gu'dödo', rnnë':

—Guli'cúa yugu' lë ni. Biti' únili' lidxë' Xuza' tu yé'ëyi.

¹⁷ Ní'irö yójnéguequinë' bönni' usëda queë' Jesús le nazúaj lu guichi lá'ayi,

rnna: Tu' ru'í'ida' ládxa'a lidxu', régui rilá ládxi'da'ahua'.

¹⁸ Ní'irö bulu'bi'ë didza' bönni' judío unná bë' nacu'ë ni', të' Jesús:

—¿Bizxi yöl-la' huáca ulu'ínu' netu' le gaca bë' dë lu no'o runu' yugu' lë ni?

¹⁹ Bubi'ë didza' Jesús, rë' légaquië':

—Guli'quínnaj yudo' ni, ate' tsonna dzasö uchisa' le.

²⁰ Ní'irö të' Lë' bönni' judío, ta'nnë':

—Idú xopa-un iz guyá' yudo' ni, ate' Lí', ¿tsonna dzasö uchísatsö' le?

²¹ Yudo' na' bë'ë didza' que Jesús naca la' cuin cazë'. ²² Que lë ni na', cate' bubanë' Jesús lu yöl-la' guti, yójnéguequinë' bönni' usëda queë' Jesús ca na' gunné', ate' gula'yéajlë' le nazúaj lu guichi lá'ayi, enca' yugu' didza' bë'ë Jesús.

Jesús núnbë'ë yúgu'të bönachi

²³ Cate' ni' zoë' Jesús Jerusalén, cate' raca Laní Pascua na', gula'yéajlë' bönachi zían Lë', tu' bila'lé'enë' yugu' yöl-la' huáca runë'. ²⁴ Biti' buzxoní ládxe'ë Jesús légaquië', tu' nunbë' cazë' yúgu'të bönachi. ²⁵ Biti' naquínnë' Jesús nu quíxjói' Lë' ca nátagaca bönachi, tu' nöz quézinë' Lë' le yu'u icja ládxi'do'gaca bönachi.

Jesús, en Nicodemo

3 Nicodemo, tu bönni' yudo' fariseo, nabábalenë' yugu' bönni' judío unná bë'. ² Bidë' bönni' ni ga zoë' Jesús chi'i dzó'ölö, en rë' Lë':

—Bönni' Usedi. Réquibe'etu' nasól-lë'ë Dios Lí' para usédinu' netu'. Biti' séqui'në' tu bönni' gunë' yugu' yöl-la' huáca nátagaca bë' ca nátagaca le caní runu' Lí' channö cabí zóalenë' Dios lë'.

³ Bubi'ë didza' Jesús, rë' lë':

—Le nácatë rea' lí', nu cabí galaj leyúbölö, bití' ca' ilé'e lataj ga ni' rinná bë'ë Dios.

⁴ Nicodemo gunábinë' Lë', rnnë':

—¿Nacxi caz séqui'né' tu bönni' galjé' leyúbölö cate' chináquié' bönni' gula? ¿Naru' huácatsö tsu'é leyúbölö lé'enu xiné'ë, ate' galjé' ia'tú?

⁵ Bubi'ë didza' Jesús, ré' lé':

—Le nácaté rea' li'. Nu bönni' cabí galjé' ni'a que nisa, en ni'a queé' Dios Bó' Lá'ayi, bití' gaca tsázié' ga rinná bé'ë Dios. ⁶ Nu na' nalaj lu ni'a lu na' bönachi, bönáchisö naca, pero nu nalaj ni'a queé' Dios Bó' Lá'ayi, Bó' Lá'ayi nabani nu na'. ⁷ Bití' ubániu' tu' rea' li', run bayudxi galju' leyúbölö. ⁸ Gátí'tés recja bö', ate' riyönnu' rnné bö' na', pero bití' nózinu' gazxi za', o gazxi zeaj. Lësca' caní raca quégaca nupa náljagaca ni'a queé' Dios Bó' Lá'ayi.

⁹ Ní'irö Nicodemo gunábiné' Jesús, rnné':

—¿Nacxi caz gaca lé ni?

¹⁰ Bubi'ë didza' Jesús, ré' lé':

—¿Ruséditsenu' li' bönachi Israel, en bití' nózinu' yugu' lé ni? ¹¹ Le nácaté rea' li', le nöztu' ru'ítu' didza' que, en le bilé'etu' runtu' ba nalí que, pero bití' rizí' lu ná'alí' lé na' runtu' ba nalí. ¹² Channö cabí réajlé'ëli' neda' cate' ru'ílena' lib'íli' didza' ca naca le raca yödzölió ni, ¿nacxi caz gaca tséajlé'ëli' channö guía' lib'íli' le raca yehua' yubá?

¹³ Catu caz gurené' nu bönni' yehua' yubá, pero tuza' neda', Bönni' Guljé' Bönachi, bötja' birúaja' yehua' yubá, ate' zoa caza' ni' yehua' yubá. ¹⁴ Ca na' bené' Moisés lu lataj cá'asö, buchisé'ba' bëla néquiniba' guíé, budé'ë-ba' lé'e yaga, lësca' caní run bayudxi gaca quia' neda', Bönni' Guljé' Bönachi, ulu'chisé' neda' xitsá'. ¹⁵ Caní gaca quia', para cabí ila'niti yúgu'té nupa ila'yéajlé' neda', pero gata' quéguequi yöl-la' na'bán idú.

Dios nadxí'ide'ené' bönachi yödzölió

¹⁶ Tu' bidxí'ide'ené' Dios bönachi yödzölió, buzá' ládxé'ë quéguequi Zxf'iné' la' buduíné', para cabí ila'niti

yúgu'té nupa ila'yéajlé' Lé', pero gata' yöl-la' na'bán idú quéguequi. ¹⁷ Dios gusól-lé'ë Zxf'iné' yödzölió ni, calëga para ichúguié' quégaca bönachi yödzölió ni gátigaca, pero para ulu'lágaca bönachi yödzölió ni ni'a queé' Lé'.

¹⁸ Nu bönni' réajlé'ë Zxf'iné' Dios, bití' ca' narugu queé' inítié', pero bönni' na' bití' réajlé'ë Lé', chinarugu queé' gátíé', tu' cabí réajlé'ë Zxf'iné' Dios la' buduíné'. ¹⁹ Que lé ni na' chinarugu quégaca bönachi gátigaca, tu' bidxiné' Bönni' na' náquié' bení' yödzölió ni, pero gulunrö zxön bönachi ni le naca chulla que dul-la' ca guluné' zxön Bönni' na' náquié' bení', tu' nácagaca xihui' le tuné'. ²⁰ Yúgu'té bönni' tu'ë dö' bití' raza ládxí'gaquié' bení', en bití' rídigaquié' lu bení', para cabí ilá' lahui le tuné'. ²¹ Nu run le naca iduté li ridxín lu bení' para gaca bë' núngaca ni'a queé' Dios le run nu na'.

Juan, bönni' ruquilé' bönachi nisa, ru'ë didza' ca naca queé' Jesús

²² Gudödi na', Jesús guyéajlené' bönni' dá'gaquié' Lé', ate' bila'dxiné' luyú Judea, en guzóalené' légaquié' ni', ga na' tu'quilé' bönachi nisa. ²³ Lësca' ruquilé' Juan bönachi nisa ga nazí' le Enón, gala' ga dë yödzö Salim, tu' dë nisa zila lataj na', ate' ta'dxín bönachi ni', en ta'dila nisa. ²⁴ Raca caní zí'atélö cate' bití' idzuné' Juan na' lidxi guíé.

²⁵ Ní'irö gula'sí lógaquié' bal-lé' bönni' dá'gaquié' Juan ta'díl-lalené' yugu' bönni' judío didza' ca naca que yöl-la' ruchi'a cuini que yudo'. ²⁶ Bila'dxiné' ga zoé' Juan, en té' lé':

—Bönni' usedi. Buyútsöca'. Bönni' na' guzóalené' li' ia'tsölá'a yegu Jordán, bönni' na' benu' ba nalí queé', ruquilé' bönachi nisa, ate' ta'dxín yúgu'té bönachi ga zoé'.

²⁷ Ní'irö bubi'ë didza' Juan, ré' légaquié':

—Biti' bi dē lu nē'ē nu bōnni', channō cabí nudödē' Dios le lu nē'ē. ²⁸Biyón quézili' lē na' bena' ba nalí, gunnía': "Biti' naca' neda' Cristo", pero Dios nasól-lē'ē neda' para guía' bōnachi si' zē'ē Lē'. ²⁹Bōnni' na' rizi'ē-bi' bi'i nigula rutsaga ná'abi' náquiē' bōnni' rutsaga nē'ē, pero bōchi' luzē'ē bōnni' rutsaga nē'ē, en dzáguie' lē', ruzé' náquiē' didza' ru'ē, en rudzéjanē' tu' riyōnnē' didza' ru'ē bōnni' rutsaga nē'ē. Lē'sca' caní, rudzéjade'eda' neda' tu' raca lē ni caní. ³⁰Run bayudxi gácarē' zxon Cristo, pero neda', run bayudxi gácara' cuídi'sō.

Nu za' zaca' yehua' yubálō

³¹Gunné' ca' Juan:

—Bōnni' na' zē'ē zaca' xitsá'alō nayépisētēre' ca yúgu'tē bōnachi. Nu bōnni' náquiē' bōnachi yōdzolió ni, que yōdzolió ni náquiē', en ru'ē didza' que le raca yōdzolió ni, pero Bōnni' na' zē'ē zaca' yehua' yubálō nácatērē' lo ca yúgu'tē bōnachi. ³²Bōnni' na' runē' ba nalí que le bilé'enē', en le biyōnnē', pero cuntú nu rizi' lu nē'e le runē' ba nalí. ³³Núti'tēs bōnni' rizi' lu nē'ē lē na' runē' ba nalí, bōnni' ni rulu'ē lahui réajlē'ē naca idútē li didza' ru'ē Dios. ³⁴Bōnni' na' nasól-lē'ē Dios, didza' queē' Dios ru'ē, tu' nuzóadērē' Dios Bō' Lá'ayi queē' lu Bōnni' na'. ³⁵Dios Xuz nadx'ínē' Zxí'ínē', ate' yúgu'tē le dē chinudödē' lu nē'ē Zxí'ínē' na'. ³⁶Nu bōnni' réajlē'ē Dios Zxí'ini, dē yöl-la' na'bán idú queē', pero bōnni' na' biti' réajlē'ē Dios Zxí'ini, biti' idéli'nē' yöl-la' na'bán na', pero nabáguē'ē xíguia' lahuē' Dios.

Jesús ru'ílenē'-nu didza' tu nigula Samaria

4 Bila'yōnnē' bōnni' judo' fariseo ca na' dá'gaca Jesús zíanrō bōnachi ca dá'gaca Juan, ate' ruquilē' ca' nisa zíanrō bōnachi ca ruquilē' nisa Juan. ²Calēga Jesús caz ruquilē' bōnachi nisa, pero

bōnni' usēda queē' tu'quilē' bōnachi nisa. ³Cate' gúquibe'enē' Jesús lē ni, buzé'ē luyú Judea, ate' sa'yéajē' leyúbölō luyú Galilea.

⁴Ga ni' sa'yéajē', run bayudxi tōdē' luyú Samaria. ⁵Caní guca, bidxinē' Jesús tu yōdzōdo' luyú Samaria, naz'i le Sicar, gala' ga dē yu na' bunōdzjē' Jacob queébi' José, zxf'inē' Jacob na', dza ni'te. ⁶Lataj na' zoa tu yeru nisa nachó'onē' Jacobo na' ga rē'. Cate' bidxinē' Jesús ni', gurō'ē ra' yeru nisa na' tu' yōjxéqui'nē' yu'ē nōza. Guca idú huagubidza. ⁷Ní'irō bidxinnu tu nigula Samaria ni' para sí'ínu nisa. Jesús rē'ē-nu:

—Benna le guí'ja'.

⁸Tuzē' zoē' Jesús tu' chisójáquiē' bōnni' usēda queē' lu yōdzō sōjx'gaquiē' le ilahuē'. ⁹Ní'irō nigula Samaria na' rēnu Jesús, rnanu:

—¿Rinábitsenu' neda' le guí'ju', en nacu' bōnni' judío? Neda' ni naca' nigula Samaria.

Caní gunnánu tu' cabí ta'dzaga dxi'a bōnachi Samaria len bōnachi judío.

¹⁰Bubi'ē didza' Jesús, rē'ē-nu:

—La'tu' núnbē'u le runōdzjē' Dios, en Nuzxi na' rē li': "Benna le guí'ja'", li' inabu', ate' Lē' gunnē' quitu' nisa runna yöl-la' na'bán.

¹¹Ní'irō nigula na' rēnu Lē', rnanu:

—Bōnni', biti' nu'u le cuéaju' nisa, ate' yeru nisa ni, dxí'tērō rō'. ¿Gazxi dē nisa na' runna yöl-la' na'bán? ¹²¿Naru' nácatērōts'o' Li' zxon ca xúziru' gudōdi Jacob, bōnni' ni' bennē' queétu' yeru nisa ni, ga ni guzxi'ē nisa gu'ē, en gulé'ajbi' ca' zxf'inē', en gulé'ajba' ca' bōa' bēdxi queē'?

¹³Bubi'ē didza' Jesús, rē'ē-nu:

—Núti'tēs nu guí'aj nisa ni, leyúbölō ubidxi nisa, ¹⁴pero nu guí'aj nisa na' unōdzja' neda', bítirō ubidxi icja lādxi'da'ahuē', tu' unōdzja' queē' nisa na' gaca lu icja lādxi'da'ahuē' ca tu ga ralaj nisa, le guí'i yöl-la' na'bán idú queē'.

¹⁵ Ní'irö nigula na' rënu Lë', rnanu:

—Bönni', benna quia' nisa na', para cabirö ubidxa', en cabirö uduzxi'a nisa ni.

¹⁶ Jesús rë'ë-nu:

—Guyéaj, yöjlidzë' bönni' quiu', ate' huödu' ni.

¹⁷ Bub'ínu didza' nigula na', rënu Lë':

—Cuntu nu zoa bönni' quia'.

Ní'irö Jesús rë'ë-nu:

—Ca nácatë rno': "Cuntu nu zoa bönni' quia'", ¹⁸ tu' chiguzóalenu' gayu' bönni', ate' bönni' na' zóalenu'-në' na'a, biti' náquië' bönni' quiu'. Didza' ni ru'u, ca nácatë rno'.

¹⁹ Ní'irö nigula na' rënu Lë', rnanu:

—Bönni', runi neda' nacu' bönni' ru'ë didza' uláz queë' Dios. ²⁰ Xuz xtó'oru' guléquinë' Dios le bach lu gu'a ni, pero rnnali' lib'ili' Jerusalén naca ga ral-la' ilequi bönachi Dios le bach.

²¹ Jesús rë'ë-nu:

—Nigula, guyéajlë' neda'. Za' dza cate' tseaj láchxi'li'-në' Dios Xuz sal-la' biti' idisóali' gu'ado' ni, en biti' tsöjsóali' Jerusalén. ²² Lib'ili' reaj láchxi'li' Nu biti' núnbë'ëli', pero netu' núnbë'ëtu' Nu na' reaj láchxi'tu', tu' benë' queë' Dios ilá' lahui yöl-la' rusólá ni'a quégaquië' bönni' judío. ²³ Na'a, za' dza, en chiridxín dza na', cate' nupa le nácatë ta'yéaj láchxi'gaca Dios, ila'yéaj láchxi'gaca Lë', zóalenë' Dios Bö' Lá'ayi léguequi, en le naca idütë li, tu' ré'ënë' Dios Xuz ilácagaquië' queë' bönni' ila'yéaj láchxi'gacuië' Lë' caní. ²⁴ Dios náquië' Bö', ate' nupa ta'yéaj láchxi'gaca Lë', run bayudxi ila'yéaj láchxi'gaca Lë', zóalenë' Dios Bö' Lá'ayi léguequi, en le naca idütë li.

²⁵ Ní'irö nigula na' rënu Lë', rnanu:

—Nözda' ral-la' guídë' Mesías, Bönni' na' lë' Cristo. Cate' guídírë' Lë' quíxjöi'inë' rë'u yúgu'të.

²⁶ Jesús rë'ë-nu:

—Lë' cazë' ru'ilenë' li' didza'.

²⁷ La' ná'asö bulu'dxinë' bönni' usëda queë' Jesús, ate' bulu'bánninë' tu' ru'ilenë'-nu nigula didza', pero biti' burúguinë' nitúë' inábinë' Lë', cabí innë': "¿Bizxi rinábinu' lënu?" o: "¿Bizxi didza' ru'ilenü'-nu?" ²⁸ Ní'irö nigula na' bucá'ananu xichö'önu ni', ate' bóajnu la' yödzö, söjódxinu nupa nacua' ni', rnanu:

²⁹ —jGulí'dá, ilé'eli'-në' tu bönni' gudxë' neda' yúgu'të le chinuna! ¿Naru' cabí nácatsë' Lë' Cristo?

³⁰ Ní'irö bila'rúaj bönachi yödzö na', en bila'dxín ga zoë' Jesús.

³¹ Tsanni ni' söhuóajnu nigula na', bönni' usëda queë' Jesús gulunë' bayudxi, të' Lë':

—Bönni' Usedi, gudagu.

³² Jesús rë' légaquië':

—Dë tu le rahua', le cabí réquibe'eli'.

³³ Ní'irö gula'nabi luzá'agaquië' bönni' usëda queë' tuë' ia'túë', ta'nnë':

—¿Zoa nu chidiguá'tsö le gudahuë'?

³⁴ Ní'irö Jesús rë' légaquië':

—Le nabánida' naca guna' ca ré'ënë' Xuza' nasól-lë'ë neda', en údxi guna' xichinë'. ³⁵ Caní rnnali' lib'ili': "Ia'tapa beo' huadxín dza uláparu'." Neda' rea' lib'ili': Gulí'chisa loli' uyuli' bönachi nácagaca ca gapa nadúzgaca, le chinabídxigaca para tsöjláparu'. ³⁶ Bönni' na' rulapë' rizi'ë lazxjë', ate' lë na' rulapë' bönni' na', naca para gata' yöl-la' na'bán idú quégaca bönachi, para gaca ulu'dzeja tsözxón nu raza, en nu rulapa. ³⁷ Naca idütë li lë na' rnna caní: Tu nu raza, ate' ia'tú nu rulapa. ³⁸ Neda' gusól-la'a lib'ili' tsöjláparu' ga biti' gúza-li'. Gulún bönachi yúbölö dxin guláz, ate' lib'ili' ruzí'ili' xibé dxin na' núnagaquië'.

³⁹ Zían bönachi Samaria nacua' yödzö Sicar na' gula'yéajlë' Jesús ni'a que xtídzanu nigula na' bennu ba nalí queë', gunnánu: "Gudxë' neda' yúgu'të le chinuna'." ⁴⁰ Cate' bila'dxinë' bönni' Samaria ga ni' zoë' Jesús, guláta'yue' lahuë'

ugá'analenë' légaquië'. Jesús bugá'anë' ni' ia'chopa dza. ⁴¹Caní guca, ziantërë' ca' bönni' ni' gula'yéajlë'ë Jesús ni'a que didza' bë'ë. ⁴²Ní'irö bönni' ni' gulé'-nu nigula na', ta'nnë':

—Na'a réajlë'ëtu' Lë', calégasö ni'a que didza' bë'u lí', pero lësca' tu' biyóni-tu' netu' Lë', en nöztu' le nácatë bönni' ni náquië' Cristo, Nu rusölá bönachi yödzöliö.

**Ruúnë' Jesús zxi'inë'
tuë' bönni' dë lu në'ë**

⁴³Ia'chopa dza ca', buzë'ë Jesús luyú Samaria, en sa'yéajë' luyú Galilea. ⁴⁴Caní benë', tu' gudíxjö'ë Lë cazë' Jesús, gunné': "Bönachi uládz queë' nu bönni' ru'ë didza' uláz queë' Dios biti' tun lë' bal." ⁴⁵Cate' bidxinë' Jesús luyú Galilea, gulunë' bönni' Galilea na' Lë' bal tu' yöjáquië' ca' Jerusalén cate' guca Laní Pascua, en bila'lé'enë' le benë' Jesús ni'.

⁴⁶Ní'irö bóajë' Jesús yödzö Caná luyú Galilea, ga ni' benë' ga böáca nisa xisi uva. Lu yödzö Capernaum na' zoë' tu bönni' dë lu në'ë uláz queë' bönni' rinná bë'ë, ate' ré'ebi' bi'i bönni' queë' bönni' na' dë lu në'ë. ⁴⁷Cate' biyönnë' bönni' ni chibuzë'ë Jesús luyú Judea, en budxinë' luyú Galilea na', ní'irö guyijë' ga na' zoë' Jesús, en gúta'yue' lahuë' gufdë' lidxë', para uduhuénë'-bi' bi'i bönni' queë' na', tu' chirequi gátibi'. ⁴⁸Ní'irö Jesús rë' lë':

—Biti' ca' tséajlë'ëli' channö cabí ilé'eli' le nácatë bë', en yugu' yöl-la' huáca guna'.

⁴⁹Ní'irö bönni' na' dë lu në'ë uláz queë' bönni' rinná bë'ë gudxë' Jesús, rnnë':

—Bönni', gudía'të para cabí gátibi' bi'i quia'.

⁵⁰Ní'irö Jesús rë' lë':

—Böaj lidxu'. Nabanbi' bi'i quiu'.

Bönni' ni guyéajlë'ë didza' bë'ë Jesús, ate' söhuójë'. ⁵¹Tsanni ni' yu'ë nöza söhuójë', duzxi'gala'gaquië' lë' bönni'

huen dxin queë' ate' gula'guíxjö'i'inë' lë', ta'nnë':

—Nabanbi' bi'i quiu'.

⁵²Gunábinë' légaquië' bátaxi gusí lo ruhuóaca ládxi'bi'. Të' lë':

—Ba'ayi, idú huagubidza, burúaj xilá yú'ubi'.

⁵³Ní'irö gúquibe'enë' xúzibi' bi'i na', böácabi' cate' ni' bé'lenë' Jesús lë' didza', en gudxë' lë': "Nabanbi' bi'i quiu'." Que lë' ni na' guyéajlë'ë Jesús, ate' gula'yéajlë' ca' Lë' bönachi nacua' lidxë'.

⁵⁴Yöl-la' huáca ni naca le buropi benë' Jesús cate' ni' zoë' luyú Galilea, gudödi buzë'ë luyú Judea.

**Ruúnë' Jesús tu bönni' nacú'unië'
bin ga nazí'i le Betesda**

5 Gudödi guca lë ni, guca laní qué-gaquië' bönni' judío, ate' guyijë' Jesús Jerusalén. ²Lu yödzö na', gala' ga tu'ú'uba' bö'cu' zxila', dë tu le zxon yudzu nisa, nazí'i le Betesda lu didza' hebreo, en nacua' gayu' chila don que. ³Yugu' lu chila na' dégaquië' zían bönni' té'enë', bönni' nachul-la lógaquië', en bönni' biti' gaca sá'gaquië', en bönni' nacú'unigaquië' bin. Ta'bözë' bata utá cuini nisa na'. ⁴Caní raca, tu' ruhuójtjë' tu gubáz lá'ayi queë' Dios tu chí'i huéaj, en röjtsu'ë lu nisa na', en ruté' nisa na'. Huóacatë nu bönni' tsöjtsú'utië' lu nisa na' cate' rutá cuini ca naca bíti'tës yödzöhuë' raca queë'. ⁵Zoë' tu bönni' ni', chiguca chizxunu' uruá' iz ré'enë'. ⁶Cate' bilé'enë' Jesús dë' bönni' huë' na' ni', réquibe'enë' chiguca zían iz ré'enë', ate' gunábinë' lë', rnnë':

—¿Ba ré'ënu' huóacu'?

⁷Bubi'ë didza' bönni' huë' na', rë' Jesús:

—Bönni', cuntu nu zoa cu'u neda' lu nisa na' cate' rutá cuini. Tsanni sa'yéajja' neda', röjtsu'ë bönni' yúbölö zí'alö ca neda'.

⁸Jesús rë' lë':

—Guyaschi. Buá' le denu', en guz'é'e.

⁹La' böacaté' bönni' na', ate' bu'ë le gúti'në', en guz'é'ë. Dza na' raca caní naca dza lá'ayi quégaquië' bönni' judío. ¹⁰Ní'irö bönni' judío unná bë' gulé' bönni' na' nuhuóáquië', ta'nné':

—Dza lá'ayi naca na'a. Biti' ral-la' u'u le ráti'nu'.

¹¹Bubi'ë didza' bönni' na', rë' légaquië':

—Bönni' na' bunë' neda' gudxi cazë' neda', gunné': "Buá' le denu', en guz'é'e." Bönni' na' bunë' neda'.

¹²Ní'irö gula'nábinë' lë', ta'nné':

—¿Nuzxi na' gudxi caní li': "Buá' le denu', en guz'é'e"?

¹³Biti' nózinë' bönni' na' nuhuóáquië' nuzxi na', tu' chibuzé'ë Jesús lataj ni' tu' nacuá' bönachi zían ni'. ¹⁴Gudödi guca lë ni, Jesús yöjxáquië' bönni' na' ga naca chila yudo', ate' rë' lë':

—Buyútsöca'. Chibóacu'. Bítirö gunu' dul-la', para cabí gaca quiu' tu le nácarö zi' ca lë na' guca quiu'.

¹⁵Guyijë' bönni' na', yöjtíxjöi'inë' yugu' bönni' judío unná bë' Jesús na' bunë' lë'. ¹⁶Que lë ni na' bönni' judío unná bë' gula'bía ládxi'gaquië' Jesús, en gulé'ënnë' ilútië' Lë', tu' runë' yugu' lë ni cate' naca dza lá'ayi quégaquië'.

¹⁷Bubi'ë didza' Jesús, rë' légaquië':

—Xuza' ná'atë runë' dxin, ate' neda' ca' runa' dxin.

¹⁸Que lë ni na' gulé'ë'nirönë' bönni' judío unná bë' ilútië' Jesús, calégasö tu' guditsjë' xibá que dza lá'ayi quégaquië', pero lësca' tu' gunné' Dios caz náquië' Xuzë', ate' caní naca nun cuinë' ca náquië' Dios.

Yöl-la' unná bë' dë lu në'ë Zxí'inë' Dios

¹⁹Ní'irö bubí'ë didza' Jesús, rë' légaquië':

—Le nácatë rea' libí'ili'. Biti' bi gaca guna' neda', Zxí'inë' Dios, rácasö quia',

pero tuz lë na' rilé'eda' runë' Dios Xuz. Yúgu'të le runë' Dios Xuz, lësca' caní runa' neda', Zxí'inë'. ²⁰Dios Xuz nadxí'inë' neda', Zxí'inë', en rulu'í'inë' neda' yúgu'të le runë', ate' yugu' le zxon-tërö ca lë ni ulu'í'inë' neda', le ilún ga ubánili' libí'ili'. ²¹Ca na' runë' Dios Xuz, rusubanë' nupa nátigaca, en rugú'ë légaquië' yöl-la' na'bán, lësca' caní runa' neda', Zxí'inë', runödzcja' quégaca bönachi yöl-la' na'bán ca ré'ëni quézida'. ²²Cuntu nu ruchi'a rusöröë' Dios Xuz, pero chinudödë' lu na'a neda', Zxí'inë', yúgu'të yöl-la' unná bë' para uchi'a usóroa' bönachi. ²³Caní naca para ilún bal yúgu'të bönachi neda', Zxí'inë', ca na' tun bal Dios Xuz. Nu bití' run bal neda', Zxí'inë', bití' run bal Dios Xuz, nasól-lë'ë neda', Zxí'inë' na'.

²⁴'Le nácatë rea' libí'ili'. Bönni' na' riyönnë' didza' ruá'a, en réajlë'ë Dios Xuz na' nasól-lë'ë neda' dë yöl-la' na'bán idú queë', ate' bití' irugu queë'. Náquië' ca nu chinubán lu yöl-la' guti tu' chidé yöl-la' na'bán idú queë'. ²⁵Le nácatë rea' libí'ili', za' dza, en chiridxín dza na', cate' ila'yöni nupa chinátigaca chí'a neda', Zxí'inë' Dios, ate' nupa ila'yöni xtidza'a, en ilún ca rnna, huóáta' yöl-la' na'bán quéguequi. ²⁶Ca na' dë lu në'ë Dios Xuz unödzcjë' yöl-la' na'bán quégaca bönachi, lësca' caní benë' ga dë lu na'a neda', Zxí'inë', unödzcja' yöl-la' na'bán quégaca bönachi. ²⁷Lësca' caní budödë' lu na'a yöl-la' unná bë' uchi'a usóroa' bönachi, tu' naca' Bönni' Guljë' Bönachi. ²⁸Biti' ubánili' ca naca lë ni, tu' huadxín dza cate' yúgu'të nupa chinátigaca ila'yöni chí'a, ²⁹en ulu'rúaj yeru ba. Ulu'bán nupa na' gulún le naca tsahui', en huóáta' yöl-la' na'bán quéguequi, pero nupa na' gulún le bití' naca tsahui', ulu'bán, ate' irugu quéguequi ilátigaca tsaz.

Le naca bë' le náquië' Jesús

³⁰Gunné' ca' Jesús:

—Biti' bi gaca guna' la' néda'sö. Ca naca le riyönda' rë' Xuza' neda', caní ruchi'a rusöröa', ate' ca na' ruchi'a rusöröa' naca tsahui', tu' cabí runa' ca ré'énisida' neda', pero ca ré'ëni quézinë' Xuza' nasól-lë'ë neda', runa'. ³¹ Channö neda' runa' ba nalí que' la' cuin caza', biti' naca lesaca' lë na' runa' ba nalí. ³² Zoa Nu yúbölö Nu run ba nalí quia' neda', Lë' Xuza', ate' nözda' naca lesaca' le runë' ba nalí quia'. ³³ Libí'ili' gusól-la'li' bönni' yöjnábiguequinë' Juan, ate' lë na' benë' ba nalí quia' naca idütë li. ³⁴ Neda' biti' naquinda' nu bönni' gunë' ba nalí quia', pero ruá'a didza' caní para uláli'. ³⁵ Didza' bë'ë Juan na' gulaca ca tu guí' yöri, le guyegui, en buzení', ate' libí'ili', tu chí'isö guyaza ládxi'li' uzí'ili' xibé bení' queë'. ³⁶ Na'a, zoa le run ba nalí quia' neda' le nácarö idú li ladxe' ca lë na' benë' ba nalí quia' Juan. Yugu' le budödë' Dios Xuz lu na'a guna', la' leze na' runa', ate' yugu' lë na' runa', tun ba nalí quia', en nácgaca bë' gusól-lë'ë Dios Xuz neda'. ³⁷ Lë'sca' Dios Xuz nasól-lë'ë neda' runë' ba nalí quia'. Catu caz biyónili' chí'ë, en catu caz bilé'eli' lahuë', ³⁸ en cabí nazí' lu ná'ali' xtídzë'ë, tu' cabí réajlë'ëli' neda', Nu na' gusól-lë'ë. ³⁹ Rusédali' le nazúaj lu guichi lá'ayi, tu' réquili' huáta' yöl-la' na'bán idú queé'li' ní'a que lë na' nazúaj lu guichi lá'ayi, ate' lë na' nazúaj lu guichi run ba nalí quia' neda'. ⁴⁰ Biti' ré'ënili' guídali' quia' neda' para gata' yöl-la' na'bán queé'li'. ⁴¹ 'Biti' riguilja' yöl-la' ba le ila'gú'u bönachi neda'. ⁴² Neda' núnbë'a libí'ili', en nözda' biti' nadxi'ili'-në' Dios. ⁴³ Bidxi-na' ni uláz queë' Dios Xuz, ate' libí'ili' biti' rizi' lu ná'ali' neda', pero channö huadxín nu yúbölö nu guídi rácasö que, si' lu ná'ali' nu na'. ⁴⁴ ¿Nacxi caz gaca tséajlë'ëli' Dios channö rizí'ili' yöl-la' run zxon que luzá'ali' tuli' ia'tuli', en biti' riguíljali' yöl-la' run zxon na' za' lu në'ë la's dui Dios? ⁴⁵ Biti' uzóa ícjali' uzéguia'

libí'ili' didza' lahuë' Xuza'. Nu na' uzegui libí'ili' didza' naca lë cazë' Moisés, bönni' na' ruzxöni ládxi'li'-në', sal-la' gútië' dza ni'te. ⁴⁶ La'tu' réajlë'ëli'-në' Moisés, tséajlë'ëli' ca' neda', tu' buzúajë' Moisés lu guichi ca naca quia' neda'. ⁴⁷ Na'a, ¿nacxi caz gaca tséajlë'ëli' didza' ruá'a neda' channö cabí réajlë'ëli' yugu' le buzúajë' Moisés lu guichi?

Rugahuë' Jesús zíanrö ca chi-un gayuá' bönachi

(Mt. 14:13-21; Mr. 6:30-44; Lc. 9:10-17)

6 Gudödi guca lë ni, guyijë' Jesús ia't-sölá'a Nísado' Que Galilea, nazí'i le ca' Nísado' Queë' Tiberias. ² Bönachi zían yöjnógaca Jesús tu' bila'lë'e yugu' yöl-la' huáca benë', cate' bunë' bönni' té'enë'. ³ Ní'irö gurenë' Jesús, guyijë' ga naca tu lu guí'ado', ga ni' guró'olenë' yugu' bönni' usëda queë'. ⁴ Chizóa idxín Laní Pascua cate' tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁵ Cate' guchisa lahuë' Jesús, en bilé'enë' bönachi zían zá'gaca ga zoë', ní'irö rë' Felipe:

—¿Gazzi tsójó'uru' yöta xtila le ilágu-gaca bönachi zían ni?

⁶ Caní gunnë' Jesús para si' bë'ë Felipe na', tu' chinózinë' Lë' naca gunë'. ⁷ Bubi'ë didza' Felipe, rnnë':

—La'tu' sfí'uru' yöta xtila len lászjaru' que idú xuntu' beo', biti' guequi láti'do' huéaj le ilágugaca bönachi zían ni.

⁸ Ní'irö tu bönni' usëda queë' Jesús, lë' Andrés, bóchë'ë Simón Pedro, rë' Lë', rnnë':

⁹—Ni zóabi' tubi' bi'i bönni', nuá'abi' gayu' yöta xtila néquiguequini zxoá' cebada, en chópaba' böla cuídi'do'. ¿Naru' huéqui'tse ugagu le do' ni cate' xö bönachi?

¹⁰ Ní'irö Jesús rë' légaquië':

—Gulí'gún ga ila'bó' bönachi zían ni lu yu.

Lataj na', ró'öda' daca', ate' gula'bö'ë idú ca chi-un gáyu'ë bönni' ni'. ¹¹ Ní'irö gudélé'ë Jesús yugu' yöta xtila na'. Cate' chigudxé' Dios: "Xclenu'", gudísié' le quégaquié' bönni' uséda queé', ate' lé-gaquié' gula'guísié' le quégaca yúgu'té nupa na' ró'gaca lu daca' ni'. Lésca' caní guluné' quégacaba' böla cudí'do' na', ate' gulahué' tsa gulé'ënné' ilahué'. ¹² Cate' chibulu'huóljané', Jesús gudxé' yugu' bönni' uséda queé', gunné':

—Buli'túbi le bizxaj nagá'anagaca, para cabí ilaca ditaj.

¹³ Bulu'tubé' ca', ate' bulu'líe' chinnu ga'bórado' yugu' le bizxaj quégaca gayu' yöta xtila néquiguequini zxa' cebada na', le bulu'gá'ana quégaquié' bönni' na' gulahué'. ¹⁴ Cate' bila'lé'ené' bönni' ni' yöl-la' huáca na' bené' Jesús, ta'nné':

—Le nácaté bönni' ni náquié' bönni' na' ru'ë didza' uláz queé' Dios, bönni' na' ral-la' guídé' yödzölió ni.

¹⁵ Tu' réquibe'ené' Jesús té'ënné' ila'ché'ë Lé' bayudxi para iluné' ga inná bé'ené' légaquié', que lé ni na' buzé'ë ni', sa'yéajé' tuzé' tu lu guí'a.

Rizé'e ni'ë Jesús lu nísado'

(Mt. 14:22-27; Mr. 6:45-52)

¹⁶ Cate' chizá' ral-la, yójáquié' bönni' uséda queé' Jesús, ate' bila'dxiné' ra' nísado'. ¹⁷ Gula'bené' tu lé'e bárcodo' ni', en sójáquié' ta'dödé' lu nísado' na', para ulu'dxiné' Capernaum. Chinaca chul-la ate' Jesús biti' ridxíniné' ga na' nacu'ë. ¹⁸ Gusí lo recja bö' budunu' lu nísado' na', ate' riyasa ridxía nisa na'. ¹⁹ Cate' chibulu'sé'ë bárcodo' na', le guzá' le naca tsa rizá'aru' tu hórásö, ní'irö bila'lé'ené' Jesús rizé'e ni'ë lu nísado' na', en zé'ë ribígué'ë ga na' zeaj barco na', ate' guladxi gula'dzöbiné'. ²⁰ Ní'irö Jesús ré' légaquié':

—Neda' caz ni. Biti' gádxili'.

²¹ Ní'irö len yöl-la' rudzeja quégaquié' bulu'guélé'ë Lé' lé'e bárcodo' na', ate' la'

bidxinté bárcodo' na' lu yu bidxi ga ni' sójáquié'.

Bönachi zían tu'guilaj Jesús

²² Dza buropi ni', guléquibe'e bönachi zían na' nagá'anagaca ia'tsölá'a nísado' bidxín tuz bárcodo' ni', ate' Jesús biti' gurénlené' yugu' bönni' uséda queé' lé'e bárcodo' na', pero légacasé' na' yójáquié'. ²³ Ní'irö bila'rúaj ia'bal-la bárcodo' lu yödzö Tiberias, ate' bila'dxín tu lataj le dé gála'sö ga ni' gulahué' yöta xtila cate' ni' Xanru' Jesús gudxé' Dios: "Xclenu'" que. ²⁴ Tu' bila'lé'ené' biti'rö zoé' Jesús ni', en biti' nacu'ë bönni' uséda queé' ni', que lé ni na' gula'bené' lé'egaca bárcodo' na', ate' yójáquié' Capernaum, tu'guiljé' Jesús.

Náquié' Jesús yöta xtila nabánigaca tsaz bönachi

²⁵ Cate' bila'dxín bönachi zían na' ia'tsölá'a nísado' na', yójxáca'gaquié' Jesús, en té' Lé':

—Bönni' Usedi, ¿bátaxi bidxinu' ni?

²⁶ Bubi'ë didza' Jesús, ré' légaquié':

—Le nácaté rea' lib'íli': Ruguflajli' neda', caléga tu' bilé'eli' yugu' yöl-la' huáca bena', pero tu' gudáguli' yöta xtila ni', en bóljalí'. ²⁷ Gulí'gún dxin, caléga para s'íli' la' huagu ridödi que, pero para s'íli' la' huagu na' ugá'anatica'sö, en runna yöl-la' na'bán idú. Lé ni naca la' huagu neda', Bönni' Guljé' Bönachi, gunna' queéli', tu' bulu'ë lahui Xuza' Dios naca' Zxf'iné'.

²⁸ Ní'irö gula'nábiné' Lé', ta'nné':

—¿Bizxi run bayudxi guntu' para guntu' le raza ládxé'ë Dios?

²⁹ Bubi'ë didza' Jesús, ré' légaquié':

—Lé ni le raza ládxé'ë Dios, tséajlé'ëli' neda', naca' nu gusól-lé'ë Lé'.

³⁰ Ní'irö gula'nábiné' Lé', ta'nné':

—¿Bizxi le naca bé' runu', le ilé'etu' para tséajlé'ëtu' Li'? ¿Bizxi yöl-la' huáca runu'? ³¹ Gulahué' xuz gudödi queéru'

yöta xtila naz'í le maná lu lataj cá'asö, ca nazúaj lu guichi lá'ayi, rnna: "Yöta xtila que yehua' yubá Moisés bē'ē que-quéquiē, gulahuē'."

³² Bubi'ē didza' Jesús, rē légaquiē':

—Le nácatē rea' lib'íli': Calēga Moisés na' bennē' queéli' yöta xtila que yehua' yubá, pero Xuza' Dios runnē' queéli' yöta xtila le naca idú que yehua' yubá. ³³ Yöta xtila na' runnē' Dios quégaca bönachi naca' neda', lē na' birúaj yehua' yubá, en runödzej yöl-la' na'bán quégaca bönachi yödzölió ni.

³⁴ Ní'irö tē Lē':

—Xan, bénatica'sö queétu' yöta xtila na'.

³⁵ Jesús rē légaquiē':

—Neda' caz naca' yöta xtila nabánigaca tsaz bönachi. Nu za'len neda', huölaj udzé'e tsaz nu na' le naca queē' Dios, ate' nu tséajlē' neda', chin'aj tsaz le naca queē' Dios. ³⁶ Naca ca na' chigudxi caza' lib'íli': "Sal-la' rilé'eli' neda', biti' ca' réajlē'éli' neda'." ³⁷ Yúgu'tē nupa na' runnē' Xuza' quia', ídigaca quia', ate' nupa na' zaca quia', biti' usá'gaca'-nē'. ³⁸ Caní naca, tu' bötja' birúaja' yehua' yubá, calēga para guna' ca ré'enda' neda' caz, pero para guna' ca ré'ēnē' Dios Xuz, nasól-lē'ē neda'. ³⁹ Lē ni le ré'ēnē' Xuza' nasól-lē'ē neda', ré'ēnē' cabí unítia' nitú nupa na' bennē' quia', pero usubana' léguequi dza údxi. ⁴⁰ Lē ni le ré'ēnē' Dios Xuz nasól-lē'ē neda', ré'ēnē' gata' yöl-la' na'bán quéguequi, yúgu'tē nupa na' ila'lé'e neda', Zxf'inē', en ila'yéajlē' neda', ate' neda' usubana' léguequi dza údxi na'.

⁴¹ Ní'irö gula'nnē' queē' Jesús bönni' judío unná bē' tu' gunnē': "Neda' caz naca' yöta xtila na' bötaj, birúaj yehua' yubá." ⁴² Que lē ni na' ta'nnē':

—¿Naru' cabí bönni' ni Jesús, zxf'inē' José? Nunbē' cázaru' xuz xiné'ē. ¿Nacxi

caz naca na', rnnē' bönni' ni: "Bötja' birúaja' yehua' yubá"?

⁴³ Ní'irö bubi'ē didza' Jesús, rē légaquiē':

—Biti' innēli' quia' la' lib'íisili'. ⁴⁴ Biti' séqui'nē' nitúē' bönni' guídē' quia' channö cabí idigu'ē quia' Xuza' nasól-lē'ē neda' nu na', ate' neda' usubana' nu na' dza údxi. ⁴⁵ Nazúaj lu guichi lá'ayi ca gula'nnē' bönni' gulu'ē didza' uláz queē' Dios, le rnna caní: Dios usédinē' yúgu'tē bönachi. Que lē ni na', yúgu'tē bönni' ta'yönnē' chí'ē Xuza', en nazédagaquiē' lu nē'ē Lē' zá'gaquiē' quia'.

⁴⁶ 'Cuntu nu bönni' bilé'enē' Dios Xuz, pero tuzē' Bönni' na' birúajē' ga zoē' Dios. Bönni' ni rilé'e quézinē' Dios Xuz.

⁴⁷ Le nácatē rea' lib'íli': Núti'tēs bönni' réajlē'ē neda' dē yöl-la' na'bán idú queē'.

⁴⁸ Neda' caz naca' yöta xtila nabánigaca tsaz bönachi. ⁴⁹ Gulahuē' xuz xtó'oli' yöta xtila na' naz'í le maná lu lataj cá'asö, en cate' bizá'a dza quégaquiē' gulátie'. ⁵⁰ Neda' naca' yöta xtila ruhuötaj rirúaj yehua' yubá, ate' núti'tēs bönni' gahuē' le, biti' ca' gátie' bönni' na'.

⁵¹ Neda' caz naca' yöta xtila na' nabánigaca bönachi, le bötaj birúaj yehua' yubá, ate' channö núti'tēs bönni' gahuē' yöta xtila na', gaca bántica'sē' bönni' na'. Yöta xtila na' runödzej neda' naca xipéla'a, le runödzej para gata' yöl-la' na'bán quégaca bönachi yödzölió.

⁵² Ní'irö bönni' judío unná bē' gula'chixi luzá'agaquiē', ta'nnē':

—¿Naru' huácatsö bönni' ni gunnē' queéru' xipélē'ē le gáguru'?

⁵³ Que lē ni na' Jesús rē légaquiē':

—Le nácatē rea' lib'íli': Channö cabí gáguli' xipéla'a neda', Bönni' Guljē' Bönachi, en channö cabí gu'jali' xichöna', biti' ca' zóalen lib'íli' yöl-la' na'bán na'.

⁵⁴ Núti'tēs nu gagu xipéla'a, en gu'aj xichöna', dē que yöl-la' na'bán idú, ate' neda' usubana' nu na' dza údxi. ⁵⁵ Caní

gaca, tu' naca xipéla'a la' huagu idú, ate' xichöna' naca tu le naca idú para nu gu'aj le. ⁵⁶Núti'tès bönni' gahuë' xipéla'a, en gu'jè' xichöna', sóalenticas'è bönni' na' neda', ate' neda' sóalenticas'a' lè'. ⁵⁷Ca na' zoë' nabanë' Dios Xuz nasól-lè'è neda', ate' neda' nabánida' Lè', lësca' caní ibáninë' neda' núti'tès bönni' gahuë' neda'. ⁵⁸Lè ni yöta xtila bötaj birúaj yehua' yubá, en bití' naca ca yöta xtila na' nazí' le maná, lè na' gulahuë' xuz xtó'oli', en cate' bizá'a dza quégaquië', gulátië'. Núti'tès bönni' gahuë' yöta xtila ni sóatica'së' ibanë'.

⁵⁹Yugu' didza' ni b'è'è Jesús ga naca tu lu yu'u ga tu'dubë' bönni' judío, en tu'sëdë' queë' Dios, ate' guca lè ni tsanni ni' rusédinë' bönachi Capernaum.

Didza' rúnnagaca queëru' yöl-la' na'bán idú

⁶⁰Cate' bila'yönnë' didza' ni, zían bönni' usëda queë' Jesús gula'nnë' que, ta'nnë':

—Banígatë didza' ni. ¿Nuzxi caz gaca si' lu n'è'e le?

⁶¹Réquibe'enë' Jesús ta'nnë' bönni' usëda queë' que xtídzë'è, ate' gunábinë' légaquië', rnnë':

—¿Naru' run didza' ni libí'ili' zi'? ⁶²¿Nacxi caz gaca channö hualé'eli' neda', Bönni' Guljè' Bönachi, huëpa' huöja' ga ni' zoa' zí'alö? ⁶³Le naca queë' Dios Bö' Lá'ayi naca le runna yöl-la' na'bán queé'li'. Le naca béla'sö cuntú nu uzí' xibé. Didza' na' bé'lena' libí'ili' náca-gaca queë' Dios Bö' Lá'ayi, en rúnnagaca yöl-la' na'bán quégaca bönachi. ⁶⁴Na'a, bál-lalí' bití' réajlë'ëli'.

Gunnë' caní Jesús tu' nózinë' dza ni'te nupa na' bití' ta'yéajlë', enca' nu na' udödi Lè' lu ná'agaquië' bönni' ilútië' Lè'.

⁶⁵Que lè ni na' gunnë':

—Que lè ni na' chigudxi caza' libí'ili': Bití' séqui'në' nitúë' bönni' t'è'è neda' channö Dios Xuz cabí gu'è lè' lataj.

⁶⁶Dza na' gulaca chopa ládxi'gaquië' zían bönni' usëda queë', en bíti'rö gula'dálenë' Lè'. ⁶⁷Ní'irö Jesús gunábinë' idxínnutë' bönni' usëda queë' na', rë légaquië':

—¿Naru' ubíga'tsali' ca' libí'ili'?

⁶⁸Bubí'è didza' Pedro, rë' Lè':

—Xan, ¿nuzxi que tséajtu'? Li' napu' didza' rúnnagaca queé'tu' yöl-la' na'bán idú. ⁶⁹Netu' réajlë'ëtu' Li', en núnbë'ë-tu' Li', nacu' Cristo na' nasól-lè'è Dios, en nacu' ca' Xzí'inë' Dios ban.

⁷⁰Bubí'è didza' Jesús, rë' légaquië':

—Guró caza' libí'ili' chínnulí' ni, pero tuë' bönni' ládajli' libí'ili' dzaga tu' xihui' lè'.

⁷¹Didza' ni b'è'è Jesús ca naca queë' Judas Iscariote, xzí'inë' tu bönni' lè' Simón, tu' náquië' Judas bönni' na' udödë' Jesús lu ná'agaquië' bönni' ilútië' Lè', en nabábalenë' ia'chinéajë' bönni' usëda queë' Jesús.

Bönni' böchi' cazë' Jesús bití' ta'yéajlë'è Lè'

7 Gudödi guca lè ni ridé' Jesús luyú Galilea. Bití' gú'unnë' tsejë' luyú Judea tu' té'ënnë' bönni' judío unná b'è nacu'è ni' ilútië' Lè'. ²Dza ni' chizóa idxín laní quégaquië' bönni' judío cate' tu'subanë' ca gula'cu'è xuz xtó'ogaquië' zcan libín lága'do'. ³Que lè ni na' yugu' bönni' bóchë'è Jesús gulé' Lè', ta'nnë':

—Birúaj ni, en guyéaj luyú Judea para ila'lé'enë' ca' bönni' usëda quíu' nacu'è ni' yugu' yöl-la' huáca runu'. ⁴Channö ré'ënnë' nu bönni' ilúnb'ë bönachi lè', bití' runë' bagáchi'sö le runë'. Tu' runu' yugu' yöl-la' huáca caní, buluf'i cuinu' lógaca yúgu'të bönachi.

⁵Caní gula'nnë', tu' cabí ta'yéajlë'è bönni' bóchë'è Jesús Lè'. ⁶Ní'irö Jesús rë' légaquië':

—Bití' ridxini dza quia' para uluf'i lahua' lógaca bönachi, pero dza queé'li' tséajli' ni' chizóa caz. ⁷Bönachi yödzölió

ni bití' tu'zóa libí'ili' tsólá'aló, pero tu'zóa neda' tsólá'aló tu' runa' ba nalí' quégaquié', rnní'a' naca xihui' le tuné'.⁸ Gulí'tséaj libí'ili' laní na'. Bití' tseja' laní na' na'a tu' bití' ridxini dza quia'.

⁹Cate' chigudxé' légaquié' lè ni, bugá'ané' luyú Galilea.

Sa'yéajé' Jesús laní quégaca bönachi judío

¹⁰Gudödi söjáquié' bönni' bóché'ë Jesús laní na', nírö sa'yéajé' ca' Lè', calèga yálajdo', pero bagáchi'sö sa'yéajé'.¹¹ Ga na' raca laní na', bulu'guiljé' bönni' judío unná bè' Jesús, ta'nné':

—¿Gazxi zoé' bönni' na'?

¹²Bönachi zían ni' gulu'fida' didza' ca naca queé' Jesús. Bal-lè' ta'nné':

—Náquié' dxi'a.

Ia'bal-lè' ta'nné':

—Bití' náquié' dxi'a tu' rizí' yé'ené' bönachi.

¹³Bití' bè'ë nitúé' bönni' didza' yálajdo' ca naca queé' Jesús, tu' tadxi bönachi zían na' le iluné' yugu' bönni' judío unná bè'.

¹⁴Cate' chibidxín gatsaj laní na', blé'ë Jesús ra' yudo', en busédiné' bönachi nacua' ni'.¹⁵ Bulu'bánniné' bönni' judío, ta'nné':

—¿Nacxi caz naca, rácadé'ë bönni' ni, en bití' ca' nazédé' que yudo'?

¹⁶Bubi'ë didza' Jesús, rë' légaquié':

—Le rusédida' neda', calèga quia' naca, pero queé' Dios Xuz na' nasól-lè'ë neda'.¹⁷ Channö ré'ëné' nu bönni' guné' ca ré'ëné' Dios, huéquibe'ené' bönni' na' channö nequi queé' Dios le rusédida' bönachi o channö rácasö quia' ru'a'a didza'.¹⁸ Nu bönni' ru'ë didza' rácasö queé', runé' caní para ilún bal bönachi lè', pero Bönni' na' ré'ëné' ilún bönachi bal Nu nasól-la' lè', Bönni' ni ru'ë didza' iduté' li, en bití' ca' rizí' yé'ë.

¹⁹Moisés benné' queé'li' xibá queé' Dios, pero bití' runlí' ca rinná bè' xibá na'. ¿Bizx que rizóa ribó'öli' gútili' neda'?

²⁰Bulu'bí'i didza' bönachi zían na', tē Lè':

—Tu' xihui' dzaga li'. ¿Nuzxi caz rizóa ribó'ö guti lí'?

²¹Bubi'ë didza' Jesús, rë' légaquié':

—Tu yöl-la' huáca bena', ate' rubánili' yúgu'téli'.²² Le nácaté' Moisés benné' queé'li' lè na' narugu lu xipéla'li' le naca bè', pero calèga Moisés caz benné' queé'li' lè na', pero guzxi'ë le lu ná'agaquié' xuz xtá'ahué'. Na'a, sal-la' naca dza láyai, richúguli' lu xipéla'gacabi' bi'i bönni'do' lè na' naca bè' néquiguequibi' queé' Dios.²³ Channö ta'z'f'ibi' lu xipéla'gacabi' lè na' naca bè' cate' naca dza láyai, para cabí' quítsjali' xibá queé' Moisés, ¿naru' rilétseli' neda' tu' buna'né' tu bönni', ate' böáquié' dx'ado' cate' naca dza láyai? ²⁴Bití' ral-la' uchi'a usóro lízili' ca', pero buli'chi'a buli'sóro ca naca le naca iduté' li.

Rigúxjö'ë Jesús ga narúajé'

²⁵Nírö gulu'ë didza' bal-lè' bönni' nacu'ë Jerusalén, ta'nné':

—¿Naru' calèga bönni' ni Nu na' tu'guiljé' bönni' judío unná bè' para ilútié' Lè'? ²⁶Buli'yútsöca', yálajdo' ru'ë didza', en bití' bi tē Lè'. ¿Naru' téquibe'ené' bönni' ta'nná bé'ené' rë'u, le nácaté' bönni' ni náquié' Cristo, Nu na' ral-la' inná be'e rë'u? ²⁷Bönni' ni, nöz quéziru' gazxi bönni' Lè'. Cate' guidé' Cristo, cunttu nu inözi gazxi bönni' Lè'.

²⁸Ni' zoé' Jesús rusédiné' bönachi chila yudo', en cate' biyönné' didza' ni, nírö bè'ë zidzaj didza', rnné':

—¿Naru' núnbe'etseli' neda', en nözit-seli' gazxi bönni' neda'? Bida' ni, calèga rácasö quia', pero Dios caz nasól-lè'ë neda', ate' Lè', bití' núnb'ëli'-né' libí'ili'.²⁹ Neda' núnbe'eda'-né', tu' za'a queé' Lè', ate' Lè' cazé' nasól-lè'ë neda'.

³⁰ Ní'irö gulunë' bayudxi ila'zönë' Lë', pero cuntú nu guzxon' Lë', tu' cabí ridxini dza queë' tsu'ë lu ná'agaquië'. ³¹ Gula'yéajlë' zían bönachi ni' Lë', ta'nná:

—Cate' guidé' Cristo, ¿naru' gunë' zianró yöl-la' huáca ca le runë' bönni' ni'?

**Bönni' yudo' ta'sól-lë'ë
nupa ila'zón Jesús**

³² Bila'yönnë' bönni' yudo' fariseo yugu' didza' ni tufi bönachi ca naca queë' Jesús, ate' yugu' bixúz unná bë', en yugu' bönni' yudo' fariseo na' gula'sól-lë'ë ni'a ná'agaquië' para tsöjxongaquië' Lë'. ³³ Ní'irö Jesús gunné':

—Ia'tú chí'isö sóalena' libí'ili', ate' ní'irö huöja' ga zoë' Xuza' nasól-lë'ë neda'. ³⁴ Uguíljali' neda', pero bití' udzólili' neda'. Ga ni' tsöjsóa' neda' bití' gaca guídali' libí'ili'.

³⁵ Ní'irö të' luzá'agaquië' bönni' judío, ta'nnë':

—¿Gazxi tséajtsë' bönni' ni, ga ni' bití' udzóliru'-në'? ¿Naru' huayéajtsë' ga nacu'ë bönni' judío násilasigaquië' iduté yödzólió, en usédiné' yugu' bönni' zi'tu' ni'? ³⁶ ¿Bizxi ré'ëni inná didza' na' bë'ë: “Uguíljali' neda', pero bití' udzólili' neda'”, enca': “Ga ni' tsöjsóa' neda' bití' gaca guídali' libí'ili'”?

**Nisa yegu le runna
yöl-la' na'bán queéru'**

³⁷ Cate' ni' naca dza údxi que laní na', dza na' naca lo, guzuínë' Jesús, en bë'ë zidzaj didza', rnnë':

—Channö zoë' nu bönni' ribidxi icja ládxi'da'ahuë', ral-la' guidé' bönni' na' ga zoa', en gu'jé'. ³⁸ Nu bönni' réajlë'ë neda', gaca queë' ca na' nazúaj lu guichi lá'ayi, rnna: Lu icja ládxi'da'ahuë' bönni' na' ilén le naca ca nisa yegu, lë na' ulu'zí' xibé bönachi, gata' yöl-la' na'bán queguequi.

³⁹ Didza' ni bë'ë Jesús ca naca queë' Dios Bö' Lá'ayi, Nu ral-la' idisóalen bönni' na' ila'yéajlë'ë Jesús. Caní gunné' Jesús tu' cabí ridxíninë' Dios Bö' Lá'ayi, tu' cabí ruhuépinë' Jesús ga tsépisëtë're'.

Ta'rúaj choplö bönachi

⁴⁰ Cate' bila'yöni didza' ni, gula'nná bal-la bönachi zían na', ta'nná:

—Le nácatë Bönni' ni náquië' Bönni' na' ru'ë didza' uláz queë' Dios, Bönni' na' guzxi' lu në'ë Dios isól-lë'ë queéru'.

⁴¹ Ta'nnë' ia'bal-lë':

—Bönni' ni náquië' Cristo.

Ta'nná bal-la bönachi:

—¿Naru' irúajtsë' Cristo luyú Galilea?

⁴² Nazúaj lu guichi lá'ayi le rnna: “Cristo galjé' ladaj di'a dza queë' David, en gáquië' ca' bönni' Belén le guca ladzë' David na'.”

⁴³ Caní guca, bila'rúaj bönachi na' choplö tu' nózinë' Jesús. ⁴⁴ Té'ënnë' bal-lë' ila'zönë' Jesús, pero cuntú nu bi ben queë'.

Bití' ta'yéajlë'ë Jesús bönni' unná bë'

⁴⁵ Ní'irö bulu'dxinë' ni'a ná'agaquië' yugu' bixúz unná bë', en yugu' bönni' yudo' fariseo ga na' nacu'ë bönni' yudo' na', ate' légaquië' gulë' ni'a ná'agaquië' na', ta'nnë':

—¿Bizx que bití' diché'ëli'-në'?

⁴⁶ Bulu'bi'ë didza' ni'a ná'agaquië', ta'nnë':

—Cuntú nu bönni' ru'ë didza' ca ru'ë didza' Bönni' ni.

⁴⁷ Ní'irö bulu'bi'ë didza' bönni' yudo' fariseo na', ta'nnë':

—¿Naru' bé'tsali' lataj guzxi' yé'enë' ca' libí'ili'? ⁴⁸ ¿Naru' guyéajlë'tsë' Lë' nu bönni' unná bë' o nu bönni' yudo' fariseo? ⁴⁹ Libí'ili' dxíali' dö' tu' cabí rácali' xibá queë' Dios.

⁵⁰ Zoë' ca' Nicodemo ni', bönni' na' bidxinë' ga zoë' Jesús chí'i dzó'ölö, tu'

náquië' ca' bönni' yudo' fariseo, ate' rë' légaquië':

⁵¹—¿Naru' richúguru' queë' tu bönni' gátie' lu xibá queéru' channö cabí yóniru' lë' z'f'alo para inóziru' bi benë'?

⁵²Ní'irö bulu'bi'ë didza' ia'z'ica'rë' na', të' lë':

—¿Nácatso' ca' li' bönni' Galilea? Bulaba le nazúaj lu guichi lá'ayi, ate' uyú' catu caz birúaj nitúë' bönni' ru'ë didza' uláz queë' Dios luyú Galilea.

⁵³Ní'irö yöjhuó'jgaquië' lidxi que queégaquië'.

8 Guyijë' Jesús ga naca lu Gu'fa Yaga Olivo.

Nigula nagúitsjanu

xibá que yöl-la' nutsaga na'

²Cate' za' rení' budxinë' Jesús ra' yudo', ate' bila'dxín yúgu'të bönachi ga zoë'. Gurö'ë Jesús, rusédinë' légaquië'. ³Ní'irö yugu' bönni' yudo' usedi, en yugu' bönni' yudo' fariseo duchë'ëgaquië'-nu tu nigula ga zoë' Jesús, tu' gula'dzólinë'-nu ni' riguít-sjanu xibá que yöl-la' nutsaga na'. Bulu'sudxinë'-nu lógaca bönachi na' tu'zë nágagaca Jesús, ⁴ate' të' Lë':

—Bönni' Usedi, nigula ni guzxöntu'-nu ni' runnu dul-la' riguít-sjanu xibá que yöl-la' nutsaga na'. ⁵Lu xibá queë' Moisés, gunná bé'enë' netu' uládxí'tu'-nu guió'j nu nigula runnu caní, para gátinu. ¿Názxiga Li', nacxi rnno'?

⁶Caní gula'nnë' para ila'z'í' bë'ë Jesús para ila'z'équi'në' ulu'zéguië' Lë' didza'. Ní'irö biyéchuë' Jesús, ruyúë' lu yu, en ruzúajë' lu yu na' len xibón në'ë. ⁷Cate' gula'nábide'enë' Lë', ní'irö buzuínë' Jesús, en rë' légaquië':

—Núli' cabí nunli' dul-la' isí loli' uládxí'li'-nu guió'j.

⁸Leyúbölö biyéchuë' Jesús, ruyúë' lu yu, en bugué'lë'ë ruzúajë' leyúbölö lu yu na'. ⁹Cate' bila'yönnë' didza' ni, bulu'xösa ládxí'do'gaquië' légaquië', ate' bi-

la'rúajë' tu tuë'. Gula'sí lógaquië' bönni' gúlarö ga bidxintë bönni' cuidi'. Nagá'anë' Jesús ni', dzáganu nigula na' Lë' gatsaj láchui'lö nupa na' tu'zë nágagaca Lë'. ¹⁰Ní'irö buzuínë' Jesús leyúbölö, en cuntu nu bilé'enë' nu ruzegui lënu didza', pero tüzinu nigula na', ate' rë'ë-nu:

—Nigúla, ¿gazxi nacua' nupa na' bulu'zegui li' didza'? ¿Naru' cabí zoa nu bönni' richúguië' quiu'?

¹¹Lënu rnna:

—Cuntu nu caz, Xan.

Ní'irö Jesús rë'ë-nu:

—Lëzca' neda', biti' richuga' quiu'. Böaj lidxu', en bíti'rö gunu' dul-la'.

Náquië' Jesús bení'

quégaca bönachi yödzülió

¹²Leyúbölö Jesús bé'lenë' bönachi didza', rnnë':

—Neda' naca' bení' quégaca bönachi yödzülió. Nu bönni' zá'lenë' neda', biti' të' ga naca chul-la' que dul-la', pero tu bení' sóalen bönni' na' le uluf'i lë' naca gata' yöl-la' na'bán idú queë'.

¹³Ní'irö të' Lë' bönni' yudo' fariseo, ta'nnë':

—Li' runu' ba nalí que la' cuinsa'. Biti' naca lesaca' le runu' ba nalí. Nítisö naca.

¹⁴Bubi'ë didza' Jesús, rë' légaquië':

—Sal-la' runa' ba nalí que la' cuinsa', idútë li naca le runa' ba nalí, tu' nõzda' ga birúaja', en ga tseja', pero libí'ili' biti' nózili' gazxi za'a, en calëga gazxi tseja'.

¹⁵Libí'ili' ruchi'a rusöröl' ca nágagaca le taca yödzülió ni, pero neda', rácasö quia' cuntu nu bönni' ruchi'a rusöró'a' queë'. ¹⁶La'tu' uchi'a usöró'a', ca nácatë uchi'a usöró'a', tu' calëga néda'sö uchi'a usöró'a', pero Xuza' nasól-lë'ë neda' gunë' neda' tsözxón. ¹⁷Lësca' caní lu xibá queë' Moisés nazúaj lu guichi le rnna: Le tunë' ba nalí chopë' bönni', idútë li naca.

¹⁸Neda' runa' ba nalí que la' cuinsa', ate'

Xuza' nasól-lë'ë neda', runë' ca' ba nali' quia'.

¹⁹ Ní'irö bönni' yudo' fariseo na' gula'nábinë' Lë', ta'nnë':

—¿Gazxi zóatsë' Xuzu'?

Bubi'ë didza' Jesús, rë' légaquië':

—Biti' núnbë'ëli' neda', en biti' núnbë'ëli'-në' Xuza'. La'tu' núnbë'ëli' neda', lësca' Xuza' gúnbë'ëli'-në'.

²⁰ Yugu' didza' ni bë'ë Jesús cate' ni zoë' rusédinë' bönachi lu chila yudo', ga na' nacuá' gu'ina gapa ta'gu'ë gun que yudo', pero cunttu nu guzxón Lë', tu' cabí ridxini dza queë' tsu'ë lu ná'agaquië'.

Rnnë' Jesús: “Ga tseja' neda', biti' gaca guídali”

²¹ Leyúbölö Jesús rë' légaquië', rnnë':

—Uzá'a yödzölió ni, ate' ugufljali' nu usöla lib'ili', pero ugá'ana dul-la' nabá-ga'li', en gátili'. Ga tseja' neda', biti' gaca guídali'.

²² Ní'irö gulu'ë didza' bönni' judío unná bë', ta'nnë':

—¿Naru' guti cuinë'? Rnnë': “Ga tseja' neda', lib'ili' biti' gaca guídali'.”

²³ Jesús rë' légaquië':

—Lib'ili' nácali' que luyú dë cadx'iló ni, pero neda' za'a yehua' yubá xit-sá'. Lib'ili' nácali' bönachi yödzölió ni, pero neda' biti' naca' bönni' yödzölió ni.

²⁴ Que lë ni na' gudxa' lib'ili': Ugá'ana dul-la' nabá-ga'li', en gátili'. Channö cabí tséajlë'ëli' naca caza' Nu usöla, ugá'ana dul-la' nabá-ga'li', en gátili'.

²⁵ Ní'irö gula'nábinë' Lë', ta'nnë':

—¿Nuzxi caz nacu'?

Jesús rë' légaquië':

—Naca' la' leze ca na' chigudxa' lib'ili' dza ni'te. ²⁶ Zián le ral-la' guía' lib'ili', en uchi'a usöróa' le naca queé'li'. Didza' iduté li ru'ë Xuza' nasól-lë'ë neda', ate' didza' riyönda' ru'ë Lë', ru'ilená' bönachi yödzölió ni.

²⁷ Biti' gula'yéajni'inë' ru'ilenë' lé-gaquië' didza' ca naca queë' Dios Xuz.

²⁸ Que lë ni na' Jesús rë' légaquië':

—Cate' idxín dza uchísali' neda', Bönni' Guljé' Bönachi, gútili' neda', ní'irö guéquibe'eli' naca caza' Nu rusöla, en biti' bi runa' rácasö quia', pero ca na' rulu'f'inë' Xuza' neda', ca' ruá'a didza'.

²⁹ Xuza' nasól-lë'ë neda' zóalenë' neda'. Biti' nucá'anë' Xuza' neda' tuza', tu' rúntica'sa' le raza ládxë'ë Lë'.

³⁰ Cate' bë'ë Jesús didza' ni, bönni' zián gula'yéajlë'ë Lë'.

Nupa nácgaca xzí'inë' Dios, en nupa nadzúngaca lu na' dul-la'

³¹ Ní'irö Jesús gudxë' yugu' bönni' judío na' ta'yéajlë'ë Lë', rnnë':

—Channö gúntica'sili' ca rnna xtídza'a, gácali' idú bönni' usëda quia'.

³² Gúnbë'ëli' le naca iduté li, ate' le naca iduté li na' usöla lib'ili'.

³³ Bulu'bi'ë didza', të' Lë':

—Abraham naquie' xuz gudödi queë-tu', en cunttu nu ben netu' bönni' nadó'o-gaca. ¿Rnnatso': “Usöla lib'ili'”?

³⁴ Jesús rë' légaquië':

—Le nácatë rea' lib'ili': Yúgu'të nupa tun dul-la', nadzúngaca lu na' dul-la'.

³⁵ Nu naca bönni' nadó'o biti' ugá'anatica'sö lidxë' xan yu'u, pero nu naca xzí'inë' xan yu'u na' rugá'anatica'sö lidxi

nu na' naca xan yu'u. ³⁶ Caní naca, channö Nu na' naca Xzí'inë' Dios usöla lib'ili', le nácatë uláli'.

³⁷ Nözda' naquie' Abraham xuz gudödi queëli', pero rizóa ribó'öli' gútili' neda', tu' cabí nazí' lu ná'ali' xtídza'a. ³⁸ Neda' ruá'a didza' ca naca le bilé'eda' ga na' zoë' Xuza', pero lib'ili' runli' le biyónili' ga zoa xuz quezili'.

³⁹ Bulu'bi'ë didza', të' Lë':

—Abraham náquië' xuztu'.

Ní'irö Jesús rë' légaquië':

—La'tu' nácali' idú xzí'ini xi'sóë' Abraham, gunli' ca na' benë' Abraham.

⁴⁰ Na'a, rizóa ribó'óli' gútili' neda', sal-la' ruí'lena' libí'ili' didza' idútè li, didza' na' biyönda' bë'è Dios. Biti' benè Abraham caní. ⁴¹ Libí'ili' runli' ca run xuz quézili'.

Ní'irö të' Lè':

—Netu' bití' ca' nácatu' bi'i lando'. Tuzè' Dios náquiè' Xuztu'.

⁴² Ní'irö Jesús rë' légaquiè':

—La'tu' náquiè' Dios idú Xúzili', huadxi'ili' neda', tu' birúaja' neda' ga zoè' Dios, en bida' luyú ni, ate' caléga rácasö quia' bida', pero Dios caz gusól-lè'è neda'. ⁴³ ¿Bixz que bití' gaca tséajni'ili' didza' ruá'a? Naca tu' cabí ré'enili' uzé nágali' xtídz'a. ⁴⁴ Xuz quézili' naca tu' xihui'. Néquili' que tu' xihui', en ré'enili' gunli' le rizé ladxi' xúzili' na'. Dza ni'te naca tu' xihui' nu guti bönachi, en cabí nazi' lu në'e le naca idútè li, tu' cabí ruí' didza' idútè li. Cate' rizi' yè' tu' xihui', ca naca caz ruí' didza', tu' naca nu rizi' yè', en naca ca xúzgaca caz nupa ta'zi' yè'. ⁴⁵ Tu' ruá'a neda' didza' idútè li bití' réajlè'èli' neda'. ⁴⁶ ¿Núzxilöli' gaca usubága'li' neda' dul-la'? Channö ruá'a didza' idútè li, ¿bixz que bití' réajlè'èli' neda'? ⁴⁷ Nu naca queè' Dios, ruzé nagui xtídzè'è Dios, pero libí'ili', tu' cabí nácali' queè' Dios, bití' ruzé nágali' xtídzè'è.

Cristo zoa cazè' zí'atèlö ca Abraham

⁴⁸ Ní'irö bulu'bi'è didza' yugu' bönni' judío, të' Jesús:

—Catèz gunnatu' cate' gunnatu' nacu' bönni' Samaria, ate' dzaga tu' xihui' Lí'.

⁴⁹ Bubi'è didza' Jesús, rë' légaquiè':

—Biti' dzaga tu' xihui' neda'. Neda' runa' Xuza' bal, ate' libí'ili' ruzóali' neda' tsólá'alö. ⁵⁰ Biti' runa' zxön cuina'. Zoa Nu run zxön neda', ate' Lè' ruchi'a rusöröè' rë'u. ⁵¹ Le nácatè rea' libí'ili': Nu bönni' si' lu në'è xtídz'a, bití' ca' gátie' bönni' na'.

⁵² Ní'irö yugu' bönni' judío na' të' Lè', ta'nné':

—Na'a réquibe'etu' dzaga tu' xihui' Lí'. Abraham gútiè', ate' gulátiè' ca' bönni' gulu'è didza' uláz queè' Dios, pero Lí' rno': “Nu bönni' si' lu në'è xtídz'a, bití' ca' gátie' bönni' na'.” ⁵³ ¿Naru' nácatèröt-so' Lí' zxön ca xúziru' Abraham? Gútiè' lè', ate' gulátiè' ca' bönni' gulu'è didza' uláz queè' Dios. ¿Nuzxi caz run cuinu'?

⁵⁴ Bubi'è didza' Jesús, rë' légaquiè':

—Channö neda' guna' zxön cuina', yöl-la' zxön na' bití' bi' gaca. Xuza' runè' neda' zxön, ate' libí'ili' rnnali' náquiè' Dios queéli'. ⁵⁵ Libí'ili' bití' núnbè'èli'-nè' Dios Xuz, pero neda' núnbè'a-nè'. La'tu' innía': Biti' núnbè'a-nè', gaca' nu rizi' yè' ca na' nácali' libí'ili', rizi' yé'èli'. Na'a, le nácatè núnbè'a-nè', en nazi' lu na'a xtídzè'è. ⁵⁶ Xúzili' Abraham budzéjanè' tu' ral-la' ilé'enè' dza soa' yödzölió ni, en sal-la' gútiè' dza ni'te, bilé'enè' le, en budzéjade'enè'.

⁵⁷ Ní'irö yugu' bönni' judío na' të' Jesús, ta'nné':

—Biti' yu'í'nu' chi-un iz. ¿Naru' bilé'et-senu' Abraham?

⁵⁸ Jesús rë' légaquiè':

—Le nácatè rea' libí'ili': Zí'atèlö ca soè' Abraham, neda' zoa caza'.

⁵⁹ Ní'irö gula'guélè'è guió'j para ulu'ladxè' Jesús, pero Lè' bunítitè cuinè', en burúajè' lö'a yudo' na'. Gudödè' gatsaj lálhui'lö ga na' nacu'è, ate' söhuó'jè'.

Ruúnè' Jesús tu bönni' guljè' nachúl-latè lahuè'

9 Cate' gudödè' Jesús tu lataj, bilé'enè' tu bönni' ni' guljè' nachúl-latè lahuè'. ² Gula'nábinè' Jesús bönni' usèda queè', ta'nné':

—Bönni' Usedi, ¿nuzxi ben dul-la'? ¿Naru' bönni' ni o xuz xinè'è tu' guljè' nachúl-latè lahuè'?

³ Bubi'è didza' Jesús, rë' légaquiè':

—Biti' naca tu' benè' dul-la' bönni' ni, en caléga tu' gulunè' dul-la' xuz

xiné'ë, pero naca para ilá' lahui yöl-la' huáca queë' Dios ni'a queë' bönni' ni. ⁴Run bayudxi gunru' xichiné' Xuza' nasöl-lë'ë neda', tsanni ni naca ca lahui' dza. Huadxín dza gaca chul-la que yöl-la' guti, cate' cunttu nu gaca gun dxin. ⁵Tsanni ni zoa' yödzölió ni, naca' bení' quégaca bönachi yödzölió.

⁶Cate' Jesús budxi bë'ë didza' ni, gurú'unë' zxóna' lu yu, en benë' gúna'-do' len zxóna' na', ate' bugu'ë guna' na' guió'j lahuë' bönni' na' nachul-la lahuë'. ⁷Ní'irö rë' lë':

—Guyéaj yójtibi lo' lu beaj nisa nazí'i le Siloé.

Siloé naca tu didza' hebreo le rnna: Nasöl-la'.

Ní'irö bönni' na' nachul-la lahuë' guyi-jë' ni, yójtibi lahuë'. Cate' buzé'ë ni' chir-ilé'enë'. ⁸Ní'irö bulu'bani bönachi dzaga yu'u queë', en nupa ni' bila'lé'e lë' zí'atëlö cate' ni' nachul-la lahuë', ta'nná:

—¿Naru' calëga bönni' ni bönni' na' ribö'ë rinabë' nu bi unödzej queë'?

⁹Bal-lë' ta'nnë':

—Lë' na'.

Ia'bal-lë' ta'nnë':

—Calëga lë', pero ca rna' lahuë' bönni' na', rna' lahuë' ca' bönni' ni.

Lë' rnnë':

—Neda' na'.

¹⁰Ní'irö gula'nábinë' lë', ta'nnë':

—¿Nacxi caz guca, gualaj guió'j lo'?

¹¹Bubi'ë didza', rë' légaquië':

—Bönni' na' lë' Jesús benë' gúna'-do', ate' gudëbë' gúna'-do' na' guió'j lahua', en gudxë' neda': "Guyéaj ra' beaj nisa nazí'i le Siloé, yójtibi lo'." Guyija' ni', yójtibi lahua', ate' gualajtë guió'j lahua'.

¹²Ní'irö gula'nábinë' lë', ta'nnë':

—¿Gazxi zoë' bönni' na'?

Lë' rë' légaquië':

—Biti' nözda'.

Yugu' bönni' yudo' ta'náb yúdxiné' bönni' na' gualaj guió'j lahuë'

¹³Ní'irö gula'ché'ë bönni' na' zí'alö nachul-la lahuë', en bulu'sudxinë' lë' ló-gaquië' bönni' yudo' fariseo. ¹⁴Tu' naca dza lá'ayi quégauqië' cate' benë' Jesús gúna'-do' na', en gusaljë' guió'j lahuë' bönni' na' zí'alö nachul-la lahuë', ¹⁵que lë ni na' yugu' bönni' yudo' fariseo na' gula'nábinë' lë' leyúbölö nacxi guca gualaj guió'j lahuë'. Lë' gudxë' légaquië':

—Budxië' gúna'-do' guió'j lahua', ate' yójtiba' le, en rilé'eda'.

¹⁶Ní'irö gulu'ë didza' bal-lë' bönni' yudo' fariseo na', ta'nnë':

—Biti' nasöl-lë' Dios bönni' na', tu' cabí rapa chi'ë dza lá'ayi.

Ia'bal-lë' ta'nnë':

—¿Naru' huácatsö tu bönni' dul-la' gunë' yugu' yöl-la' huáca runë' bönni' na'?

Caní guca, bila'rúajë' choplö. ¹⁷Leyúbölö gula'nábinë' bönni' na' zí'alö nachul-la lahuë', ta'nnë':

—¿Bizxi rnno' li' queë' bönni' na', gusaljë' guió'j lo'?

Lë' rnnë':

—Náquië' bönni' ru'ë didza' uláz queë' Dios.

¹⁸Biti' gula'yéajlë'ë bönni' judío unná bë' na' guljë' nachúl-latë lahuë' bönni' na', en gualaj guió'j lahuë', cate' bulu'lídzarë' xuz xinë'ë bönni' na' gualaj guió'j lahuë', ¹⁹ate' gula'nábinë' légaquië', ta'nnë':

—¿Naru' náquië' bönni' ni zxf'inili', rnnali' guljë' nachúl-latë lahuë'? ¿Nacxi caz naca rilé'enë' na'a?

²⁰Bulu'bi'ë didza' xuz xinë'ë na', të' légaquië':

—Nóztu' bönni' ni náquië' zxf'initu', en guljë' nachúl-latë lahuë', ²¹pero nacxi guca, rilé'enë' na'a, biti' nöztu', en nuzxi na' gusalaj guió'j lahuë', biti' nöz-

tu'. Guli'nabi-në' lë', tu' chináquië' bönni' chinaca. Lë cazë' quíxjö'ë.

²²Caní gula'nnë' xuz xinë'ë bönni' na' z'falö nachul-la lahuë', tu' tádxinë' yugu' bönni' judío unná bë', tu' chigulún xtídza'gaquië' bönni' judío na' channö nu bönni' si' lu në'ë Jesús náquië' Cristo, tsaz ulu'béajë' bönni' na' lu yu'u ga tu'dubë' bönni' judío, en tu'sëdë' queë' Dios. ²³Que lë ni na' gula'nnë' xuz xinë'ë: "Guli'nabi-në' lë', tu' chináquië' bönni' chinaca."

²⁴Ní'irö yugu' bönni' judío unná bë' bulu'lidzë' leyúbölö bönni' na' z'falö nachul-la lahuë', ate' të' lë':

—Ni'a queë' Xanru' Dios gudixjö' le nácatë. Netu' réquibe'etu' bönni' na' náquië' bönni' dul-la'.

²⁵Ní'irö bubí'ë didza', rnnë':

—Channö náquië' bönni' dul-la' biti' nözda'. Tu le nözda'. Z'falö nachul-la lahua', ate' na'a rilé'eda'.

²⁶Gula'nábinë' lë' leyúbölö, ta'nnë':

—¿Bizxi benë' quiu'? ¿Nacxi benë' gusaljë' guió'j lo'?

²⁷Bubí'ë didza', rë' légaquië':

—Chigúdxí caza' lib'í'ili', pero biti' gú'unili' si' lu ná'alí' xtídza'a. ¿Bizx que na' ré'ënili' yónili' leyúbölö? ¿Naru' ré'ënili' tá'alí' ca' Lë'?

²⁸Ní'irö bulu'lidza zi'ë lë', ta'nnë':

—Lí' do'o Lë', pero netu' dá'atu' Moisés. ²⁹Netu' nöztu' Dios bé'lenë' Moisés didza', pero ca naca queë' bönni' ni, biti' nöztu' nuzxi caz gusöl-la' Lë'.

³⁰Ní'irö bubí'ë didza' bönni' na', rë' légaquië':

—Lë ni run ga rubánida'. Lib'í'ili' biti' nózili' nuzxi gusöl-la' bönni' ni, ate' Lë' gusaljë' guió'j lahua'. ³¹Nóziru' biti' riyönnë' Dios yugu' bönni' dul-la', pero channö reaj ládxë'ë tu bönni' Dios, en runë' ca ré'ënë' Lë', Dios riyönnë' bönni' ni. ³²Dza ni'te biti' riyón nu gunná channö nu bönni' gusaljë' guió'j lahuë' tu bönni' guljë' nachúl-latë lahuë'. ³³La'tu'

cabí náquië' bönni' ni queë' Dios, biti' bi gaca gunë'.

³⁴Ní'irö bulu'bi'ë didza', të' lë':

—Ca gulju' naca bë' nabágu'u dul-la'. ¿Naru' lí' ruséditsenu' netu'?

Ní'irö bulu'béajë' lë' ní'ilö.

Nupa nácgaca chul-la niti

³⁵Biyönnë' Jesús ca gulunë' bönni' judío unná bë', bulu'béajë' bönni' na' z'falö nachul-la lahuë'. Cate' budzáguë' lë', gudxë' lë':

—¿Ba réajlë'u Zxí'inë' Dios?

³⁶Bubí'ë didza' lë', rë' Jesús:

—¿Nuzxi na', Xan, para tséajlë'a Lë'?

³⁷Jesús rë' lë':

—Chibilé'enu' Lë', ate' neda' ni ru'í'le-na' lí' didza', naca' Zxí'inë' Dios.

³⁸Ní'irö bönni' na', gualaj guió'j lahuë', guyéaj ládxë'ë Jesús, en rë' Lë':

—Xan, réajlë'a Lí'.

³⁹Jesús rnnë':

—Para uchi'a usöró'a' bönachi bida' yödzölió ni, para ulu'lé'e nupa nachul-la nanítigaca, en ilaca ca nu nachul-la lahué nupa téquiguequi ta'lé'e.

⁴⁰Cate' yugu' bönni' yudo' fariseo na' nacué'lenë' Jesús bila'yönnë' didza' ni, ní'irö të' Lë':

—¿Naru' nachul-la nanítitsatu'?

⁴¹Bubí'ë didza' Jesús, rë' légaquië':

—La'náru' nachúl-lasö guió'j loli', biti' ibága'li' dul-la'. Na'a rnalí': "Rilé'etu'." Que lë ni na' nabága'li' dul-la'.

Rucúdzu'ë didza' Jesús que lë'a quégacaba' bö'cu' zxila'

10 Gunnë' ca' Jesús:
—Le nácatë rea' lib'í'ili': Nu bönni' biti' razie' saca' ga nu riyaza lë'a quégacaba' bö'cu' zxila', pero tsáz-ië' saca' ga yúbölö, bönni' ni náquië' gubán, en ribán cazë'. ²Nu bönni' raz-ië' saca' ga nu riyaza náquië' bönni' run chí'i cazë' bö'cu' zxila' na'. ³Para tsáz-ië' bönni' ni, risalaj nu zoa run chí'i

ga nu riyaza, ate' ta'yóniba' bö'cu' z-xila' na' chi'ë, en tu'únbë'ëba'-në'. Lë' rulidzë'-ba' que queé'ba' ca lé'gacaba', en rubéajë' yugu' bö'cu' z-xila' na'. ⁴Cate' chinubéajë'-ba' yúgu'téba' bö'cu' z-xila' néquigacaba' queë', röjnóruë' lógacaba', ate' bö'cu' z-xila' na' röjnógacaba' lë', tu' tu'únbë'ëba' chi'ë. ⁵Bönni' yúbölö bití' tsöj'nógacaba' lë', pero ulu'zxúnna-jba' queë', tu' cabí nún'bë'gacaba' chí'igacuië' bönni' yúbölö.

⁶Le rucudzu' didza' ni gudxë' Jesús lé-gacuië', pero bití' gula'yéajni'inë' lë na' rë' lé'gacuië'.

Náquië' Jesús ca bönni' rapa chi'ë-ba' bö'cu' z-xila'

⁷Ní'irö Jesús rë' lé'gacuië' leyúbölö, rnnë':

—Le nácatë rea' lib'í'ili': Neda' naca' ca tu ga ta'yázaba' bö'cu' z-xila'. ⁸Chigula'lé'ë zían bönni' gula'nné' ná'cagaquië' Cristo, pero yúgu'të bönni' na' bila'dx-inë' zí'alö ca neda', ná'cagaquië' gubán, en ta'bán cazë', ate' bití' bulu'zë' ná'gaba' bö'cu' z-xila' na' lé'gacuië'. ⁹Neda' naca' ca tu ga nu riyaza. Núti'tës bönni' tsázalënë' neda', ulé' bönni' na', en gáquië' ca tuba' bö'cu' z-xila' rázaba', en rurúajba', en ridzólí'ba' le ráguba'.

¹⁰'Za'zë' bönni' gubán para cuanë'-ba', en gútië'-ba', en usun'fí'ë'-ba'. Neda' bida' para gata' yöl-la' na'bán idú qué'gaca bö'nachi ná'cagaca ca bö'cu' z-xila' quia'. Le nácatë gata' qué'gacuië' yöl-la' na'bán idú na'. ¹¹Neda' run chí'igaca' bö'nachi quia' ca runë' bönni' na', lu yöl-la' dxi'i ladxí' queë' rapa chí'ë yugu' bö'cu' z-xila'. Bönni' na' rapa chí'ë-ba' bö'cu' z-xila' caní zoa cazë' udödë' yöl-la' na'bán queë' ní'a qué'gacaba' bö'cu' z-xila' queë'. ¹²Tu bönni' nazxjë' rapa chí'ë-ba' bö'cu' z-xila', cate' rilé'enë' zá'aba' bö'cu' gu'ía sínia', rucá'anë'-ba' bö'cu' z-xila' na', en

ruzxúnna-jë', ate' bö'cu' gu'ía sínia' na' rá'guya'aba' yugu' bö'cu' z-xila' na', en rusilásiba' lé'gacaba'. Caní runë' bönni' na' rapa chí'ë-ba' bö'cu' z-xila' tu' cabí ná'quië' idú nu run chí'i-ba' bö'cu' z-xila', ate' bití' néquigacaba' que cazë' bö'cu' z-xila' na'. ¹³Ruzxúnna-jë' bönni' nazxjë' na' tu' rapa chí'ë-ba' bö'cu' z-xila' na' para sí'isë' dumí, en bití' ru'í' ladxë'ë-ba' bö'cu' z-xila' na'.

¹⁴⁻¹⁵'Neda' naca' bönni', lu yöl-la' dx-i'i ladxí' quia' run chí'igaca'-ba' bö'cu' z-xila'. Ca na' nún'bë'ë Xuza' neda', ate' neda' nún'bë'a-në' Xuza', lësca' caní nún-be'egacada' bö'nachi quia' ná'cagaca ca bö'cu' z-xila' quia', en rudöda' yöl-la' na'bán quia' ní'a qué'gacaba' bö'cu' z-xila' na', ate' bö'cu' z-xila' na' néquigue-quiba' quia' nún'bë'gacaba' neda'. ¹⁶Lësca' nacua'á'aba' ia'zica'röba' bö'cu' z-xila' quia' bití' nabábagacaba' ni. Lësca' lé'gacaba' ral-la' tsöjxí'gaca'-ba'. Lé'gacaba' ulu'zë' ná'gaba' chí'a, en ilácaba' tuz len ia'zica'röba' bö'cu' z-xila' quia', ate' neda' caz gun chí'igaca'-ba'.

¹⁷'Que lë ni na' nadxí'inë' Xuza' neda', tu' rudöda' yöl-la' na'bán quia', gu'a lataj nu guti neda', ate' uzi'a le leyúbölö, ubana' lu yöl-la' guti. ¹⁸Cuntu nu bönni' sé'qui'në' gútië' neda', pero neda' rudödi caza' yöl-la' na'bán quia', gátia'. Dë lu na'a udöda' le, en dë lu na'a uzi'a le leyúbölö. Caní naca le gunná bé'enë' Xuza' neda'.

¹⁹Cate' yugu' bönni' judío bila'yönnë' didza' ni, leyúbölö bila'rúajë' choplö ca té'quinë' queë'. ²⁰Zíanë' ta'nné':

—Yu'u bö' xihui' Lë', en nachixi icjë'.
¿Bizx que ruzé' ná'gali' Lë'?

²¹Ia'bal-lë' ta'nné':

—Bití' ca' ru'ë caní didza' bönni' yu'u bö' xihui' lë'. ¿Naru' huacatsö bö' xihui' usalaj guí'oj ló'gacuië' bönni' nachul-la ló'gacuië'?

**Yugu' bönni' judío unná bē'
tu'zōē' Jesús tsölá'aló**

²²Raca beo' ziaga, en naca dza na' tunē' laní yōdzō Jerusalén, tu'subanē' ca gula'gu'ē yudo' quégaquiē' lu nē'ē Dios. ²³Ridē' Jesús ra' yudo' ga naca chila que, nazí' le Chila Queē' Salomón. ²⁴Yugu' bönni' judío unná bē' gula'gu'ē Jesús lé'aló, en tē' Lē':

—¿Bátaxi caz usanu' runu' ga rō'ōtu' böniga? Channō nacu' lí' Cristo, ca nácatē gudíxjōi' netu'.

²⁵Jesús rē' légaquiē':

—Chigudxi caza' libí'ili', pero biti' réajlē'ēli' neda'. Yugu' dxin runa' tu' dē lu na'a uláz queē' Xuza' nácatē bē' Nu naca'. ²⁶Libí'ili' biti' réajlē'ēli' neda', tu' cabí nabábalenli' nupa nácatē bō'cu' zxila' quia', ca na' chigudxi caza' libí'ili'. ²⁷Ta'yóniba' bō'cu' zxila' quia' chí'a, en tu'únbe'eba' neda', ate' neda' núnbe'egacada'-ba', ate' ridi-jácalenba' neda'. ²⁸Neda' runōdzja' yōlla' na'bán idú quégacaba', ate' biti' ca' ila'nítiba', ate' cuntu nu sequi' ubéaj lé-gacaba' lu na'a neda'. ²⁹Xuza' Dios ben-nē' quia' lé-gacaba', ate' Lē' nápatērē' yōlla' huáca ca yúgu'tē bönachi, ate' cuntu nu sequi' ubéaj lé-gacaba' lu nē'ē Xuza'.

³⁰Neda', en Dios Xuz, tuz nácatu'.

³¹Leyúbölö yugu' bönni' judío unná bē' na' bulu'guélē'ē guió'j ulu'ladxē' Jesús. ³²Jesús rē' légaquiē':

—Zían le naca dxi'a bena' loli' tu' dē lu na'a uláz queē' Xuza'. ¿Ní'a que bízxiló dxin dxi'a ni uládxí'li' neda' guió'j?

³³Bulu'bi'ē didza' bönni' judío unná bē' na', tē' Lē':

—Ní'a que dxin dxi'a biti' uládxí'tu' lí' guió'j, pero tu' cabí rnnió' dxi'a queē' Dios, tu' nacu' lí' bönáchisō, en run cuinu' Dios.

³⁴Bubi'ē didza' Jesús, rē' légaquiē':

—¿Naru' cabí nazúaj lu guichi lu xibá queéli' ca gunné' Dios, rnna: "Neda' rn-

nía': Nácali' yugu' dios"? ³⁵Nöz quéziru' le nazúaj lu guichi lá'ayi nazúaj tsaz. Lu guichi lá'ayi na' ru'í lágaquiē' dios, bönni' ní' Dios bé'lenē' légaquiē' didza'.

³⁶Dios bubéajē' neda' quez queē', en gusól-lē'ē neda' yōdzōlió ni. ¿Naru' rn-nátsali' quia': "Lí' biti' rnnió' dxi'a queē' Dios", tu' gunní'a': Zxí'inē' Dios naca'?

³⁷Channō cabí runa' dxin budōdē' Xuza' Dios lu na'a, biti' ral-la' tséajlē'ēli' neda'.

³⁸Channō runa' dxin budōdē' Dios lu na'a, sal-la' biti' réajlē'ēli' neda' caz, guli'tséajlē' le nácatē bē' dxin na' runa', para guéquiē'eli' náquiē' Dios Xuz tuz len neda', ate' neda' ca' naca' tuz len Xuza'.

³⁹Leyúbölö gula'zóa gula'bō'ē ila'zōnē' Jesús, pero Lē' bulé' lu ná'agaquiē'.

⁴⁰Ní'irō guyijē' Jesús leyúbölö ia't-sölá'a yegu Jordán, ga ní' buquilē' Juan bönachi nisa z'atēlō, ate' bugá'anē' Jesús ní'. ⁴¹Bila'dxín bönachi zían ga zoē' Jesús, ta'nná:

—Le nácatē biti' benē' Juan nitú yōl-la' huáca zxōn, pero yúgu'tē le gunné' Juan na' ca ral-la' gaca queē' bönni' ni, idútē li zeaj naca.

⁴²Que lē' ni na' gula'yéajlē'ē bönni' zían Jesús ga na' zoē'.

Le guca cate' gútiē' Lázaro

11 Dza ní' ré'enē' Lázaro, bönni' Bē-tania, le naca ládzagacanu María, en Marta. Nácanu Marta na' zxilánu María na'. ²Nácanu María na' nigula zanē' Lázaro, bönni' na' ré'enē', en nácanu ca' nigula na' gulú'unu le rilá' zxixi ní'ē Xanru', en buzxinu ní'ē len guitsa' íc-janu. ³Gula'sól-la'nu nigula zanē' Lázaro na' nu yōjōdx Jesús, gunná:

—Xan, buyútsōca', ré'enē' Lázaro, bönni' na' nadxí'inu'-nē'.

⁴Cate' biyōnnē' Jesús didza' ni, gudxē' nupa nacua' ní', rnnē':

—Yödzöhué' ni biti' naca le guti lë tsaz, pero naca para ilá' lahui yöl-la' zxön queé' Dios, ate' ni'a que yödzöhué' ni ilá' lahui ca' yöl-la' zxön quia' neda', Zxf'iné' Dios.

⁵ Jesús nadxí'iné' Marta, en nigula zxfílanu Marta na', en Lázaro na'. ⁶ Sal-la' nadxí'iné' Jesús légaquié', cate' biyön-né' ré'ené' Lázaro, bugá'ané' ga na' zoé' ia'chopa dza ca'. ⁷ Cate' bizá'a chopa dza na', Jesús gudxé' yugu' bönni' uséda queé', rnné':

—Uyéajru' leyúbölö luyú Judea.

⁸ Ní'irö yugu' bönni' uséda queé' té' Lë', ta'nné':

—Bönni' Usedi, si' gula'zóa gula'bö'ë bönni' judío unná bē' ni' ulu'ladxé' Li' guioj. ¿Naru' uyéajtso' leyúbölö ni'?

⁹ Bubi'ë didza' Jesús, ré' légaquié':

—Nacué' caz chinnu hora lahui' dza. Nu bönni' ridé' lahui' dza, biti' tsöjchégu'ë, tu' rilé'ené', tu' zóalen lë' bení' zoa yödzöliö ni. ¹⁰ Channö ridé' bönni' na' chí'i dzó'ölö, röjchégu'ë, tu' cabí zóalen bení' lë'.

¹¹ Cate' budxi bē'ë Jesús didza' ni, ní'irö gudxé' légaquié':

—Rásié' Lázaro, böchi' luzá'aru', ate' tseja' neda', en usubana'-né'.

¹² Ní'irö yugu' bönni' uséda queé' té' Lë', ta'nné':

—Xan, channö rásié', huóáquié'.

¹³ Gunné' caní Jesús tu' chigútié' Lázaro, pero légaquié' téquiné' gunné': Rásisē' Lázaro. ¹⁴ Ní'irö Jesús gudxé' légaquié' yálajdo', gunné':

—Chigútié' Lázaro. ¹⁵ Rudzējada' tu' cabí zoa' ni', tu' gaca na'a tu le uz'ili' xibé, le gun ga tséajlë'ëli' neda'. Uyéajru' na'a ga na' dē' Lázaro.

¹⁶ Ní'irö Tomás, bönni' na' tu'ë lë', Bönni' Bilidi' gudxé' ia'zica'rē' bönni' uséda queé' Jesús, rnné':

—Uyéajru' ca' rē'u, en gátilenru'-né'.

Náquié' Jesús Nu rusubán nupa chinátigaca, enca' Nu nabániru'

¹⁷⁻¹⁹ Dē yödzö Betania gála'sö ga dē Jerusalén na', le naca ca rizá'aru' tu hórátēz. Que lë ni na' chibila'dxiné' zían bönni' judío ga na' nacué'anu Marta, en María, en tu'hué tsáhué'ë légacanu tu' gútié' bönni' zángacanu. Cate' Jesús bidxiné' ni', biyönné' chiguca tapa dza yu'ë Lázaro na' yeru ba. ²⁰ Cate' biyön-inu Marta didza' zē'ë Jesús, ní'irö birúajnu yu'u, yöjtságanu Lë', pero María bugá'anunu yu'u na'. ²¹ Marta na' rēnu Jesús:

—Xan, la'tu' zu' ni, biti' gátié' bönni' zana'. ²² Lésca' na'a, nözda' yúgu'té le in-ábinu' Dios, Lë' gunné' quiu'.

²³ Jesús rē'ë-nu:

—Ubané' bönni' zanu'.

²⁴ Marta rēnu Lë':

—Nözda' ubané' cate' idxín dza údxi cate' ulu'bán nupa chinátigaca.

²⁵ Ní'irö Jesús rē'ë-nu:

—Naca caza' neda' Nu rusubán nupa chinátigaca, enca' Nu nabánigaca bö-nachi. Nu tséajlë' neda', sal-la' gati nu na', ubán caz, ²⁶ ate' yúgu'té bönni' nabángaquie', en ta'yéajlë'ë neda', biti' ca' ilátié' tsaz. ¿Réajlë'u lë ni?

²⁷ Marta rēnu Lë':

—Ön, Xan. Réajlë'a nacu' Li' Cristo, Zxf'iné' Dios, Bönni' na' guzxi' lu nē'ë Dios isól-lë'ë yödzöliö ni.

Ribödxé' Jesús tu' ru'i láchxé'ë nigula zané' Lázaro

²⁸ Cate' budxi bé'ënu Marta na' didza' ni, bóajnu yu'u, yöjlídzanu María, zxfílanu, ate' bagáchi'sö rēnu lënu:

—Bönni' Usedi zoé' ni, rulidzē' li'.

²⁹ Cate' biyöninu María didza' ni, la' guyástënu, zéajnu ga na' zoé' Jesús. ³⁰ Biti' ráziné' Jesús la' yödzödo' na', pero zóasē' ga na' yöjtságanu Marta Lë'. ³¹ Cate' yugu' bönni' judío na'

nacuá'lenë' María na', en tu'hué tsáhuë'ë-nu bila'lé'enë'-nu guyásanu, en birúajnu carelö ga naca lu yu'u, ní'irö yöjnógaquië'-nu, ta'nnë':

—Uyéajnu ra' yeru ba tsöjchódxinu ni'.

³²Ní'irö bidxinnu María ga na' zoë' Jesús. Cate' bilé'enu Lë', biyéchunu xini'ë, en rënu Lë':

—Xan, la'tu' zu' ni, biti' gátië' bönni' zana'.

³³Cate' bilé'enë' Jesús ribódxinu, en ta'bódxë' ca' bönni' judío na' dzágagaquië'-nu, ní'irö buf'innë', en gunnëda' ládxë'ë. ³⁴Rnnë':

—¿Gazxi bucáchi'li'-në'?

Të' Lë':

—Gudá uyú'.

³⁵Guródxë' Jesús. ³⁶Ní'irö gula'nnë' bönni' judío na', ta'nnë':

—Buli'yútsöca' ca naxf'ide'enë' lë'.

³⁷Bal-lë' ta'nnë':

—Bönni' ni benë' ga rilé'enë' bönni' na' zí'alö nachul-la lahuë'. ¿Naru' cabí gúcatsö gunë' ga biti' gátië' Lázaro?

Rubanë' Lázaro lu yöl-la' guti

³⁸Leyúbölö gunnëda' ládxë'ë Jesús, ate' bidxinë' ra' yeru ba na'. Ba na' naca tu yeru nadaj lë'e gu'fa guió'j, ate' da' tu guió'jta'a le nusayaj ga nu riyaza le.

³⁹Jesús gudxë' nupa nacua' ni', rnnë':

—Gulí'cúa guió'j ni.

Ní'irö Marta, nigula zanë' bönni' nati na', rënu Lë':

—Xan, chirilé'ë siguti tu' chiguca tapa dza nátië'.

⁴⁰Jesús rë'ë-nu:

—¿Naru' cabí chigudxi caza' li' channö réajlë'u, hualé'enu' yöl-la' zxön queë' Dios?

⁴¹Ní'irö gula'gúë' guió'jta'a na' nusayaj ga nu riyaza yeru ba ga na' yu'ë bönni' nati na'. Buyúë' Jesús zaca' lúzixibalö, rnnë':

—Xuza', rea' Li', xclenu' tu' riyönnu' neda'. ⁴²Neda' nözda' riyóntiqui'sinu' neda', pero ruá'a didza' ni para ulu'zí' xibé bönachi zían ni, en ila'yéajlë' Li' na' nasól-lu'u neda'.

⁴³Cate' budxi bë'ë Jesús didza' ni, zidzaj bulidzë', rnnë':

—Lázaro, burúaj nilö.

⁴⁴Burúajë' bönni' na' gúquië' bönni' nati lu yeru ba, naróligacarö ni'a në'ë yugu' lári'do', en nagachi' ca' lahuë' ia'tú lári'do'. Ní'irö Jesús rë' légaquië':

—Buli'li lari' na' naróli ni'a në'ë, en guli'gu'ë lataj së'ë.

Tun xtídzë'ë yugu' bönni' judío unná bë' ilútië' Jesús

(Mt. 26:1-5; Mr. 14:1-2; Lc. 22:1-2)

⁴⁵Ní'irö zían bönni' judío na' gula'yéajlë'ë Jesús, bönni' na' yöjácalenë' tsözxón María, en bila'lé'enë' lë na' benë' Lë'.

⁴⁶Bal-lë' yöjáquië' ga nacu'ë bönni' yudo' fariseo, en bulu'siyönnë' légaquië' ca na' benë' Jesús. ⁴⁷Ní'irö bönni' yudo' fariseo na' bulu'dúbilenë' tsözxón bönni' yudo' tu'chi'a tu'söróë', en yugu' bixúz unná bë', ta'nnë':

—¿Nacxi caz gunru'? Runë' bönni' ni zían yöl-la' huáca zxön. ⁴⁸Channö güf'isiru'-në' lataj gunë' ca ni run cazë', ila'yéajlë' yúgu'të bönachi Lë', ate' idi-jáquië' bönni' Roma ni, duquínnaj-gaquië' yudo' lá'ayi queéru', en yödzö queéru'.

⁴⁹Ní'irö bë'ë didza' Caifás, bixúz lo iz na', en dzáquië' légaquië', rë' légaquië':

—Libí'ili' biti' bi nózili', ⁵⁰en biti' réquibe'eli' run bayudxi gátië' tuë' bönni' ni'a quégaca bönachi, para cabí initi idú yödzö.

⁵¹Calëga rácasö queë' bë'ë didza' ni, pero tu' náquië' bixúz lo iz na', que lë ni na' bë'ë didza' uláz queë' Dios ca ral-la' gátië' Jesús ni'a quégaca bönachi yödzö na'. ⁵²Gátië' Jesús, calëgasö ni'a que yödzö na', pero gátië' ca' para utubë'

yugu' zxf'iné' Dios násilasigaquié', para ilácagaquié' tuz. ⁵³Caní guca, la' dza ná'asö gulún xtídza'gaquié' ilútié' Jesús. ⁵⁴Que lè ni na' bítirö gudé' Jesús yá-lajdo' gapa nacua' bönachi judío, pero buzé'è ni', sa'yéajé' tu lataj gala' ga naca lataj cá'asö, ate' bidxiné' yödzo Efraín, ga ni' bugá'ané', ate' dzágagaquié' bön-ni' uséda queé' Lè'.

⁵⁵Dza na' chizá' gala' Laní Pascua quégaquié' bönni' judío cate' tu'sub-ané' ca bené' Dios, bubéajé' bönachi queé' luyú Egipto. Bila'rúaj bönachi zían yugu' yödzo ni', ate' gula'bené', söjajúié' Jerusalén cate' si' idxín laní na' para tsöjpa'a cúngaquié' ca naca que yudo'. ⁵⁶Yugu' bönni' na' nacué' Jerusalén tu'guiljé' Jesús, en cate' ni' nacué' chila yudo', gula'nabi luzá'a-gaquié' tué' ia'túé', ta'nné':

—¿Bixzi rusáca'li'? ¿Huídatsé' laní, o bití' guídé'?

⁵⁷Chigula'nná bé'è yugu' bixúz unná bé', en yugu' bönni' yudo' fariseo channö nu nözi ga zoé' Jesús, ral-la' ududíxjöi'i légaquié' para gaca tsöjxóngaqüié' Lè'.

María rigú'unu le rilá' zxixi ni'è Jesús

(Mt. 26:6-13; Mr. 14:3-9)

12 Cate' ni' nagá'anagaca ia'xopa dza cate' idxín Laní Pascua cate' tu'subané' bönni' judío ca bené' Dios, bubéajé' bönachi queé' luyú Egipto, n'irö bidxiné' Jesús lu yödzo Betania, ga na' zoé' Lázaro, bönni' na' gútié', en bubané' lu yöl-la' guti. ²Gula'gu'è tu güfi' huagu ni' le gahué' Jesús. Gulú'unu María le ilahué', ate' nútsé'è Lázaro ladaj bönni' ró'ölangaquié' Jesús ga na' tahué'. ³N'irö gudéla'nu María ca tu gufé' le rilá' zxixi que yöj susén lasi idú, le nazáca'da', en gulú'unu le ni'è Jesús. Buzxinu ni'è len guitsa' ícjanu. Idúte lu yu'u na' guzé bö' zxixi. ⁴N'irö bé'è didza' tu bön-ni' uséda queé' Jesús, lè' Judas Iscariote, zxf'iné' tu bönni' lè' Simón, en náquié'

bönni' na' udödé' Jesús lu ná'agaquié' yugu' bönni' yudo', rnné':

⁵—¿Bixz que bití' gudó'o le rilá' z-xixi na', le nazaca' lázxjaru' que tu iz, ate' huáca nu quisí dumí na' quégaca bönachi yechi'?

⁶Gunné' caní, caléga tu' ru'fi láchxé'è bönachi yechi', pero tu' náquié' gubán, en lè cazé' nu'è buzudi dumí quégaquié', en rubéajlané' dumí na' tu'chejé' lu buzudi na'. ⁷N'irö Jesús rë' lè':

—Bé'è-nu lataj, tu' naca lè ni bennu tu le nabá'a para dza igácha'a. ⁸Yugu' bönachi yechi' ila'cuá'lentica'sö lib'ili', pero neda' bití' ugá'anatica'sa' ga zóali'.

Tun xtídza'gaquié' bönni' judío unná bé' ilútié' Lázaro

⁹Cate' bila'yönné' bönni' judío zoé' Jesús yöd Betania, bila'dxiné' zíané' ni', calégasö tu' zoé' Jesús ni', pero lésca' tu' té'enné' ila'lé'ené' Lázaro, bönni' na' busubané' Jesús lu yöl-la' guti. ¹⁰N'irö gulún xtídza'gaquié' yugu' bixúz unná bé', ilútié' ca' Lázaro, ¹¹tu' ta'yéajlé'è zían bönni' judío Jesús ni'a queé' Lázaro na', en chinulá'alengaquié' yugu' bixúz unná bé' na'.

Len yöl-la' ba zxön razié' Jesús Jerusalén

(Mt. 21:1-11; Mr. 11:1-11; Lc. 19:28-40)

¹²Bönachi zían bila'dxín Jerusalén dza Laní Pascua, ate' dza buropi na' ta'yöni zé'è Jesús ni'. ¹³N'irö gula'guítsjé' zin, en bila'rúajé' söjxf'gala'gaquié' Jesús, ate' gulu'è zidzaj didza', ta'nné':

—¡Yöl-la' ba Dios! ¡Yöl-la' ba Bönni' ni zé'è uláz queé' Xanru', para inná bé'ené' bönachi Israel!

¹⁴Budzóliné' Jesús tuba' búrrodo', ate' gudxié'-ba' ca na' nazúaj lu guichi lá'ayi, rnna:

¹⁵¡Bití' gádxili', lib'ili', zóali' yödzo Sión!

¡Buli'yútsöca', zë'ë Bönni' inná bé'enë' libí'ili'!

¡Dxié'-ba' tuba' búrrodo'!

¹⁶ Cate' ni' si' guca lë ni, biti' gula'yéa-jni'inë' bönni' usëda queë' Jesús, pero gudödi ni', cate' bubanë' Jesús lu yöl-la' guti, en buëpë' yehua' yubá queë', ní'irö yöjnéguëquinë' lë ni nazúaj lu guichi lá'ayi ca ral-la' gaca queë', ate' guca queë' caní.

¹⁷ Lëasca' yugu' bönni' na' gula'cuá'lenë' Jesús cate' ni' bulidzë' Lázaro, bönni' na' yu'ë yeru ba, en busubanë' lë' lu yöl-la' guti, gulunë' ba nalí queë'. ¹⁸ Que lë ni na' ca' bila'rúajë' bönni' yöjxf'gala'-gacuië' Jesús, tu' bila'yönnë' ca naca yöl-la' huáca ni benë' Lë'. ¹⁹ Ní'irö gula'nnë' la' léguasë' bönni' yudo' fariseo, ta'nnë':
—Chinaca bë' biti' bi séqui'ru' gunru'. Buli'yú ca dá'gaca yúgu'të bönachi Lë'.

Yugu' bönni' zi'tu' tu'guljë' Jesús

²⁰ Bal-lë' bönni' zi'tu' dzágagacuië' nupa na' bila'dxín Jerusalén dza Laní Pascua na' para ila'yéaj ládxi'gacuië' Dios. ²¹ Yugu' bönni' zi'tu' na' bila'dxinë' ga zoë' Felipe, bönni' Betsaida que luyú Galilea, ate' guláta'yue' lahuë', ta'nnë':
—Bönni', ré'ënitú' ilé'tu'-në' Jesús.

²² Guyijë' Felipe na', en yöjödxe' ca' Andrés. Ní'irö Andrés, en Felipe na' gulé' ca' Jesús. ²³ Bubi'ë didza' Jesús, rë' légaquie':

—Chizóa idxín dza gátia' neda', Bönni' Guljë' Bönachi, huöja' xilatja' yehua' yubá. ²⁴ Le nácatë rea' libí'ili': Ugá'ana cá'asö tu xisedo' channö cabí igachi' luyú, en údxi que. Channö údxi que xisedo' na', ate' ilén, yénni'tërö ünödzej. ²⁵ Nu bönni' ru'í ládxi'dë'ë yöl-la' na'bán queë', unfítië' le, tu' gátie' tsaz bönni' na'. Nu bönni' biti' ru'í ládxe'ë yöl-la' na'bán dë queë' yödzölió ni gun chí'ë le ga idx-inrö dza gata' yöl-la' na'bán idú queë'. ²⁶ Channö ré'ëne' nu bönni' gunë' xichi-na', ral-la' tē'ë neda' bönni' na', ate' ga ni'

tsöjsóa' neda', ni' tsöjsóë' ca' bönni' na' runë' xichina'. Channö runë' xichina' nu bönni', Xuza' Dios gunë' bal bönni' na'.

Rigúixjö'ë Jesús ca si' ilútië' Lë'

²⁷ Gunnë' ca' Jesús:

—Na'a rö'a böniga neda'. ¿Nacxi in-natsa'? ¿Naru' inní'a: Xuza', busölá neda' lu le gaca quia' na'a? Que lë ni na' bida', para guá' ilena' le ral-la' gaca quia' na'a. ²⁸ Xuza', ben ga ilá' lahui yöl-la' zxon' quiu'.

Ní'irö biyón chí'i Nu ru'í didza' yehua' yubá, rnna:

—Chibéna' ga nalá' lahui yöl-la' zxon' quia', ate' leyúbölö guna' ga ilá' lahui yöl-la' zxon' quia' na'.

²⁹ Bila'yöni bönachi zían nacuá' ni' chí'i ni, ate' ta'nná:

—Guziú' na' gunné.

Ia'bal-la bönachi na' ta'nná:

—Tu gubáz lá'ayi queë' Dios bé'lenë' Lë' didza'.

³⁰ Ní'irö bubi'ë didza' Jesús, rë' légaquie':

—Biyón chí'i ni, calëga para uzi'a xibé neda', pero para uzí'ili' xibé libí'ili'.

³¹ Chibidxín dza uchi'a usöróë' Dios bönachi yödzölió ni. Na'a chú'unë' Dios tu' xihui' ní'ilö, nu na' rinná be'e bönachi yödzölió ni. ³² Na'a, channö ilútië' bönni' neda', en ulu'chisë' neda' xitsá', guna' ga ulu'dubi yúgu'të bönachi ga zoa'.

³³ Didza' ni bë'ë Jesús naca bë' ca gátie'. ³⁴ Bönachi zían na' tē Jesús, ta'nná:

—Netu' biyónitu' nupa bulu'laba le rnna xibá queë' Dios, lë na' rnna: Sóatica'së' Cristo. ¿Nacxi caz naca, rnno' Lí': "Run bayudxi Bönni' Guljë' Bönachi, ulu'chisë' Lë' xitsá'?" ¿Nuzxi na' Bönni' Guljë' Bönachi?

³⁵ Ní'irö Jesús rë' légaquie':

—Ia'tú chí'ido'osö sóalena' neda' libí'ili', en naca' bení' queé'li'. Guli'tá tsanni ni zóalena' libí'ili', en zóalen

bení libí'ili', para cabí ichul-la íntili'. Nu bönni' ridé' ga chul-la niti bití' nózine' gazxi sa'yéajé'. ³⁶ Tsanni ni zóalena' libí'ili', naca' bení' queé'li'. Gulí'tséajlé' neda' naca' bení' queé'li' para ilé'eli' bení' na' naca idú.

Cate' Jesús budxi bē'ē didza' ni, yójhujé' yójcachi' lahué' lógaquié'.

Le run nigui bönachi judío, para cabí ila'yéajlé' Jesús

³⁷ Sal-la' bené' Jesús zían yöl-la' huáca lógaquié', bití' gula'yéajlé'ē Lē'. ³⁸ Caní guca lē na' buzúajé' Isaías lu guichi, bönni' na' bē'ē didza' uláz queé' Dios, gunné': Xan, ¿nuzxi caz guyéajlé' didza' bé'ētu? ¿Nuzxi caz buluf'iné' Xanru' yöl-la' huáca queé'?

³⁹ Caní guca, bití' guca ila'yéajlé'ē Jesús. Guca ca na' gunné' ca' Isaías:

⁴⁰ Dios bené' ga gula'chul-la gula'nítie', ate' guca zidi ládxi'do'gaquié' para cabí ila'lé'ené' len guiój lógaquié', en cabí ila'yéajni'iné' lu icja ládxi'do'gaquié'.

Bití' ulu'huoáquié' quia' para úngaca'né'.

⁴¹ Bē'ē Isaías didza' ni tu' bilé'ené' yöl-la' zxön queé' Cristo, en bē'ē didza' ca naca queé' Lē'. ⁴² Sal-la' raca caní, gula'yéajlé' bönachi zían Jesús, ga bidxinté gula'yéajlé'ē bal-lē' bönni' unná bē' Lē', pero tu' tádxinē' yugu' bönni' yudo' fariseo, bití' gulunē' ba nalí queé' yálajdo', para cabí ulu'béajé' légaquié' tsaz ga na' tu'dubē' tu'sédē' queé' Dios. ⁴³ Caní gulunē' tu' tunrē' zxön le tun bönachi légaquié' bal ca le runē' Dios légaquié' bal.

Ilún didza' bē'ē Jesús ga irugu quégaca bönachi ilátigaca

⁴⁴ Bē'ē zidzaj didza' Jesús, rmné':

—Nu bönni' réajlé'ē neda', calēga néda'só réajlé'ē, pero réajlé'ē ca' Xuza' nasól-lē'ē neda'. ⁴⁵ Lēasca' caní, nu bönni' rilé'ené' neda', rilé'ené' ca' Xuza' nasól-

lē'ē neda'. ⁴⁶ Neda' naca' bení', en bida' yödžölió ni, para cabí ulu'gá'ané' ga chul-la yúgu'tē bönni' ila'yéajlé'ē neda'.

⁴⁷ Channö riyönnē' nu bönni' xtídzá'a, en bití' runē' le bal, calēga neda' ichuga' queé' bönni' na' gátie', tu' bida' ni, calēga para ichuga' quégaca bönachi yödžölió ni, pero para usólá' bönachi yödžölió ni. ⁴⁸ Nu bönni' ruzóē' neda' tsólá'alö, en bití' rizí' lu nē'ē xtídzá'a, chizóa le ichugu queé' bönni' na'. Didza' na' chibé'lēna' libí'ili' naca tu le ichugu queé' bönni' na' dza údxi. ⁴⁹ Caní naca, ruá'a didza', calēga rácasö quia', pero Xuza' nasól-lē'ē neda' gudxē' neda' le ral-la' inía', enca' ca ral-la' gu'a didza'. ⁵⁰ Nözda' gunná bē'ē Dios caní para gata' yöl-la' na'bán idú quégaca bönachi. Caní naca, didza' na' ruá'a, ruá'a didza' ca na' Xuza' chigudxi cazē' neda'.

Jesús riguibē' ní'agaquié' bönni' uséda queé'

13 Ni' naca dza si' idxín Laní Pascua cate' tu'subanē' bönni' judío ca bené' Dios, bubéajé' bönachi queé' luyú Egipto. Nózine' Jesús chibidxín dza queé' gátie', cate' ral-la' uzé'ē yödžölió ni, en huójé' ga zoé' Xuzé'. Ca na' nadx'iné' bönachi queé' nacua' yödžölió ni, na'a nadx'iné' légaquié' ga idxintē gátie' uláz quégaquié'.

² Satanás tu' xihui' chinagú'u yöl-la' Judas Iscariote, zxf'iné' tu bönni' lē' Simón, para udödē' Jesús lu ná'agaca nupa iluti Lē'. ³ Nózine' Jesús ca naca, birúajé' ga zoé' Dios, en huójé' ca' ga na' zoé' Dios, ate' Dios Xuzé' chinudödē' lu nē'ē Lē' idütē yöl-la' unná bē' queé'. ⁴ Que lē ni na', cate' ni' tahué', guzuínē' Jesús, en gudúé' lari' rixóa yené'. Gudélē'ē tu lari' ruzxini ná'aru' le budé'ē lē'ē. ⁵ Ní'irö gudé'ē nisa tu lu zxi'ga' guíé, ate' gusí lahué' riguibē' ní'agaquié' bönni' uséda queé', en ruzxinē' ní'agaquié' len lari' na' da' lē'ē.

⁶ Cate' bidxinë' ga rō'ë Simón Pedro, Pedro na' rē' Lē':

—Xan, ¿naru' Li' quíbitso' ni'a?

⁷ Bubi'ë didza' Jesús, rē' lē':

—Lē' ni runa', biti' réajni'ininu' na'a, pero huadzé tséajni'inu'.

⁸ Ní'irō Pedro rē' Lē':

—Biti' ca' quíbi cazu' Li' ni'a.

Jesús rē' lē':

—Channō neda' biti' quiba' li', biti' ca' séqui'nu' gunu' neda' tsōzxón.

⁹ Ní'irō Simón Pedro rē' Lē':

—Xan, calégasō ni'a quibu', pero quibu' ca' na'a, en icja'.

¹⁰ Jesús rē' lē':

—Nu nayari, ní'asō run bayudxi tsari, tu' naca cazē dxi'a idutē', ate' libí'ili' nácali' dxi'a, pero calēga yúgu'tēli'.

¹¹ Gunné' caní Jesús: “Calēga yúgu'tēli' nácali' dxi'a”, tu' nōzine' nūlōgaquiē' na' udōdi Lē'.

¹² Gudōdi gudibē' Jesús ní'agaquiē', buguelé'ë lari' na' buxóa yenē'. Bubō'ë ga tahuē', ate' rē' légaquiē':

—¿Réajni'ili' lē' na' si' bena' queé'li'?

¹³ Libí'ili' rufí'ili' La': Bōnni' Usedi enca': Xan. Dxi'a naca ca rnnali', tu' caní naca'. ¹⁴ Na'a, channō neda' naca' Xanli', en Bōnni' Usedi queé'li', ate' gudiba' ní'ali', lēasca' caní ral-la' gunli' libí'ili', quíbili' ni'a luzá'ali' tuli' ia'tuli'. ¹⁵ Tu le bulu'ida' libí'ili' para gunli' libí'ili' ca na' bena' neda'. ¹⁶ Le nácatē rea' libí'ili': Biti' nayépisētēre' tu bōnni' huen dxin ca xanē', ate' bōnni' gubáz biti' nayépisētēre' ca nu nasól-la' lē'.

¹⁷ Channō réajni'ili' yúgu'tē lē' ni, bica' ba libí'ili' channō gunli' caní. ¹⁸ Didza' ni ruá'a biti' rea' yúgu'tēli'. Nōz quézida' nupa guró'caza' neda', pero run bayudxi gaca lē' na' nazúaj lu guichi lá'ayi, le rna: “Nu rágulen neda' tsōzxón, nu ni tá'baga' neda'.” ¹⁹ Na'a riguíxjōi'ida' libí'ili' zí'alō ca gaca, para cate' gaca caní, tséajl'ēli' zoa'caza' neda'. ²⁰ Le nácatē rea' libí'ili': Nu bōnni' gunē' bal

gubáz isól-la'a neda', neda' ca' gunē' bal, ate' nu bōnni' gunē' neda' bal, gunē' ca' bal Xuza', nasól-lē'ë neda'.

Riguíxjō'ë Jesús ca gunē' Judas, udōdē' Lē'

(Mt. 26:20-25; Mr. 14:17-21; Lc. 22:21-23)

²¹ Cate' Jesús budxi bē'ë didza' ni, buf'innē', ate' yáladjo' gunné':

—Le nácatē rea' libí'ili': Tu bōnni' nūt-sē'ë ládjali' udōdē' neda'.

²² Ní'irō bulu'yú lo luzá'agaquiē' tuē' ia'túē' bōnni' usēda queē', en gula'cu'ë bōniga, ate' ta'naba lādxi'gaquiē' nuzxi que na' gunné' Jesús caní. ²³ Tuē' bōnni' usēda queē' Jesús, bōnni' na' Jesús nadxí'inē' lē', zoē' cuita lē'ë. ²⁴ Simón Pedro bulá'a bulu'isē' bōnni' ni para inábinē' Jesús nuzxi que na' gunné' caní. ²⁵ Ní'irō bōnni' na' zoē' cuita lē'ë Jesús rē' Lē':

—Xan, ¿nuzxi na' ru'u didza' que?

²⁶ Bubi'ë didza' Jesús, rē' lē':

—Náquiē' bōnni' na' gu'a-nē' yōta xtila nabisa.

Ní'irō busubísiē' yōta xtila na', en bē'ë queē' Judas Iscariote, zxf'inē' tu bōnni' lē' Simón. ²⁷ Gudōdi gudahuē' Judas yōta xtila na', guyaza Satanás tu' xihui' icja lādxi'da'ahuē'. Ní'irō Jesús rē' lē':

—Lē' na' gunu', yōjentē na'a.

²⁸ Biti' ta'yéajni'inē' ia'zica'rē' bōnni' usēda queē' rō'ōgaquiē' tahuē' bizx que na' Jesús gudxē' lē' caní. ²⁹ Tu' nu'ë Judas buzudi dumí quégaquiē', téquinē' bal-lē' Jesús gudxē' lē': Yōxi' le gáguru' laní, o gunné': Bē' lati' quégaca bōnachi yechi'. ³⁰ Cate' budxi gudahuē' Judas yōta xtila na', en ni' naca chi'i dzó'ölō, la' birúajtē'.

Tu xibá cubi

³¹ Cate' chibirúajē' Judas na', ní'irō gunné' Jesús:

—Na'a chizóa ilá' lahui yöl-la' zxön quia' neda', Bönni' Guljé' Bönachi, en ilá' lahui ca' yöl-la' zxön queé' Dios. ³² Channö ilá' lahui yöl-la' zxön queé' Dios ni'a quia' neda', Zxf'iné', lësca' Lë cazé' Dios guné' ga ilá' lahui yöl-la' zxön quia' neda', Zxf'iné', en la' gunté' caní. ³³ Libf'ili', zxf'ina'do', ia'tú chf'isó zóale-na' libf'ili'. Ugufljali' neda', ate' ca na' chigúdxigaca'-né' bönni' judío, lësca' rea' libf'ili' na'a: Ga na' tseja' neda', biti' gaca guídali' rácasó queéli'. ³⁴ Rea' libf'ili' tu xibá cubi le rna caní: Guli'dxf'i luzá'ali' tuli' ia'tuli'. Ca na' neda' nadxf'ida' libf'ili', lësca' caní ral-la' idxf'ili' luzá'ali' tuli' ia'tuli'. ³⁵ Channö huadxf'i luzá'ali' tuli' ia'tuli', iléquibe'e yúgu'té bönachi dá'ali' neda'.

**Rnné' Jesús inné' Pedro
biti' núnb'è Lë'**

(Mt. 26:31-35; Mr.

14:27-31; Lc. 22:31-34)

³⁶ Ní'iró Simón Pedro gunábiné' Jesús, rnné':

—Xan, ¿gazxi caz tseju'?

Bubi'è didza' Jesús, rnné':

—Ga na' tseja' neda', biti' gaca sá'lenu' neda' na'a, pero huadzé guídu' ga tseja' neda'.

³⁷ Pedro rë' Lë':

—Xan, ¿bizx que biti' gaca sá'léna' Li' na'a? Chizóa' udöda' yöl-la' na'bán quia', gátia' tu' nadxf'ida' Li'.

³⁸ Bubi'è didza' Jesús, rë' lë':

—¿Naru' udödu' yöl-la' na'bán quiu' tu' nadxf'inu' neda'? Le nácaté rea' lí', zfalö ca códxiba' böra, lí' tá'bágu'u tsonna luzuí, innó' biti' núnb'è'u neda'.

**Náquié' Jesús nöza tséajlenru' para
idxinru' ga zoé' Dios Xuz**

14 Rnné' Jesús:
—Biti' cö'li' baniga lu icja ládx-i'do'oli'. Guli'tséajlé' Dios, en guli'tséajlé' ca' neda'. ² Lu yu'u lidxé' Xuza'

lataj zían nacué'. La'tu' cabí naca caní, neda' chigudxi caza' libf'ili'. Tseja' na'a, tsöjpá'a lataj queéli' ga tsöjsóali'. ³ Channö huayéaja', en tsöjpá'a lataj queéli' ga tsöjsóali', huöda' leyúbölö, ate' uché'a libf'ili' lataj quia', para ga na' tsöjsó'a neda', tsöjsóali' ca' libf'ili'. ⁴ Nöz quézili' ga ni' tseja', en núnb'è'li' ca' nöza.

⁵ Tomás rë' Lë':

—Xan, biti' nöztu' gazxi na' tseju'. ¿Nacxi caz gaca gúnb'è'tu' nöza?

⁶ Bubi'è didza' Jesús, rë' lë':

—Neda' naca caza' nöza, en naca' ca' le naca iduté li, en naca' ca' Nu nabánigaca bönachi. Ní'a quia' néda'só gaca nu idxín ga zoé' Dios Xuz. ⁷ La'tu' núnb'è'li' neda', Xuza' ca' núnb'è'li'-né'. Na'a, núnb'è'li'-né', en chibilé'li'-né'.

⁸ Ní'iró Felipe rë' Lë':

—Xan, buluf'i netu' Xuzu', ate' nácaté queé'tu'.

⁹ Bubi'è didza' Jesús, rë' lë':

—Felipe, xidzé chiguca zóalena' libf'ili'. ¿Naru' cabí núnb'è'tso' neda'? Nu bönni' ril'é'ené' neda', ril'é'ené' ca' Xuza'. ¿Rnnatso': "Buluf'i netu' Xuzu'?" ¹⁰ ¿Naru' cabí réajlé'u zóalen caza'-né' Xuza', ate' Xuza' zóalen cazé' neda'? Yugu' didza' ni ru'ílena' libf'ili', caléga rácasó quia' ruá'a didza' ni, pero Xuza' zóalen cazé' neda', Lë cazé' runé' dxin ni. ¹¹ Guli'tséajlé' neda', zóalen caza'-né' Xuza', ate' Xuza' zóalen cazé' neda'. Channö cabí gaca gunli' caní, guli'tséajlé' neda' ni'a quégaca dxin ni runa'. ¹² Le nácaté rea' libf'ili': Yugu' dxin ni runa' neda', lësca' guné' bönni' na' réajlé'è neda', ate' le zxönterö ca' guné' bönni' na' tu' huöja' ga zoé' Dios Xuz. ¹³ Yúgu'té le inábili' Dios Xuz, en ugunli' dxin La' neda', neda' guna' lë na' inábali', para ulu'a lahui neda', Zxf'iné', yöl-la' zxön queé' Dios Xuz. ¹⁴ Bítitës bi inábali', en ugunli' dxin La' neda', neda' guna' le.

Jesús isól-lë'ë Dios Bõ' Lá'ayi, para idisóalenë' bõnachi queë'

¹⁵Rnnë' ca' Jesús:

—Channõ nadxí'ili' neda', guli'gún le rea' libí'ili', ¹⁶ate' neda' gáta'yua' lahuë' Dios Xuz, ate' Lë' isól-lë'ë queéli' Nu yúbölö Nu gácalen libí'ili', Nu utipa ladxí'li', en sóalenta'sõ libí'ili'. Nu ni naca Dios Bõ' Lá'ayi, Nu ru'í didza' idútë li. ¹⁷Biti' gaca ulu'z'f' bõnachi yõdzölió ni xibé' Lë', tu' cabí gaca ila'lé'e Lë', en biti' gaca ilúnbe'e Lë'. Zóalen cazë' libí'ili', ate' soë' lu icja ladxí'-do'oli'. ¹⁸Biti' ucá'ana' libí'ili' ca yugu' bi'i uzé'bido'. Huöda' udusóalena' libí'ili'. ¹⁹Ia'tú ch'ído'osõ bítirõ ila'lé'e bõnachi yõdzölió ni neda', pero libí'ili' ulé'eli' neda'. Tu' zoa caza' nabana' neda', libí'ili' ca', tsaz sóali' ibanli'. ²⁰Dza ní'rõ cate' Dios Bõ' Lá'ayi na' idisóalenë' libí'ili', in-ó'z quézili' zóalen caza'-në' Xuza' Dios, ate' libí'ili' zóalenli' neda', ate' neda' ca' zóalen caza' libí'ili'. ²¹Nu bönni' rizí' lu në'ë xtídz'a'a, en runë' ca rnna, naca bë' nadxí'inë' neda'. Xuza' Dios idxí'inë' bönni' na' nadxí'inë' neda', ate' neda' idxí'ida'-në' bönni' na', en ulufi' lahua' lahuë'.

²²Judas rë' lë', pero caléga Judas Iscariote, rnnë':

—Xan, çnacxi caz gaca ulufi' lo' lotu' netu', en biti' ulufi' lo' lógaca bõnachi yõdzölió?

²³Bubi'ë didza' Jesús, rë' lë':

—Nu bönni' nadxí'inë' neda' gunë' ca rnna xtídz'a'a, ate' Xuza' Dios idxí'inë' bönni' na', ate' guídatu' idisóalentu'-në' bönni' na' lu icja ladxí'da'ahuë'. ²⁴Bõnni' na' biti' nadxí'inë' neda' biti' runë' ca rnna xtídz'a'a. Didza' na' biyónili' bë'a neda', calégasõ quia' na', pero naca queë' Dios Xuz nasól-lë'ë neda'.

²⁵Rë' caza' libí'ili' yugu' lë ni tsanni ni zóalena' libí'ili', ²⁶pero Dios Bõ' Lá'ayi gácalenë' libí'ili', en utipë' ladxí'li'. Xuza'

Dios isól-lë'ë Lë' queéli' tu' ugunli' dxin La' neda'. Usédinë' libí'ili' yúgu'të, en usé'ë ladxí'li' ca naca yúgu'të didza' na' chigudxa' libí'ili'.

²⁷Rucá'ana' queéli' le cuéqui dxi ladxí'li'. Runna' queéli' yöl-la' rë'õ dxi ladxí' quia'. Yöl-la' rë'õ dxi ladxí' na' runna' queéli' biti' naca ca le tunna queéli' bõnachi yõdzölió ni. Biti' ichixi icja ladxí'do'oli', en biti' gadxi idzóbili'. ²⁸Chibiyónili' ca na' chigudxa' libí'ili': Huöja', ate' huöda' udusóalena' libí'ili'. La'tu' nadxí'ili' neda', udzëjali' cate' ni' gudxa' libí'ili' huöja' ga zoë' Dios Xuz, tu' nayépisëtërë' Dios Xuz ca neda'. ²⁹Na'a, chigudxa' libí'ili' z'falö ca si' gaca, para cate' gaca caní, tséajlë'ëli' neda'.

³⁰⁻³¹'Bítirõ güf'ilena' libí'ili' didza' zían, tu' za' tu' xihui', nu rinná be'e bõnachi yõdzölió ni. Sal-la' biti' bi dë lu në'e bi gun quia' neda', ral-la' gaca caní para iléquibe'e bõnachi yõdzölió ni nadxí'ida'-në' Dios Xuz, en runa' ca na' chigudxë' neda' guna'. Guli'chasa, uzá'aru' ni.

Ca naca que lubá uva, en ni'a në'e lubá na'

15 Lësca' caní Jesús gudxë' légaquie':

—Naca' neda' ca tu lubá uva le naca idú dxi'a, ate' Xuza' náquie' ca bönni' guz gú'una rapa chi'ë lubá na'. ²Ugüë' yúgu'të ni'a në'e lubá na' naca' neda', le cabí bi ta'bía, ate' uchi'ë yúgu'të ni'a në'e na' ta'bía, para ila'bía ia'lati'. ³Libí'ili' chinácali' dxi'a ni'a que didza' na' chibé'lena' libí'ili'. ⁴Guli'dá'tica'sõ neda', ca na' neda' dá'tica'sa' ca' libí'ili'. Ca naca que ni'a në'e lubá na', biti' gaca bi cuía rácasõ que, channõ cabí dá'tica'sõ lubá na', lësca' caní naca queéli', biti' bi gaca gunli' channõ cabí tá'tica'sili' neda'.

⁵Naca' neda' ca lubá na', ate' libí'ili' nácali' ca ni'a në'e. Nu bönni' dá'tica'së' neda', ca na' neda' dá'tica'sa' lë', bõn-

ni' ni náquië' ca ni'a në'e lubá na' ribía yenni', tu' channö nulá'alenli' neda', biti' bi gaca gunli'. ⁶Nu bönni' biti' dá'ti-ca'së' neda', gaca queë' ca raca qué-gaca ni'a në'e lubá na' biti' nácacaga dx-i'a, ta'ru'unë' ni'a në'e na', ate' ila'bidxi. Cate' chinabídxigaca ni'a në'e na', ulu'tubë' léguequi, en ila'gu'ë léguequi lu guf', ate' tséguigaca.

⁷Channö tá'tica'sili' neda', en gunli' ca rnna xtídza'a, huáca inábali' bi gué'ënilí', ate' neda' guna' lë na' inábali'. ⁸Gunli' bal Xuza' Dios cate' gunli' xichinë', ate' gácali' ca ni'a në'e lubá na' ta'bia, en caní gaca bë' nácali' idú bönni' ta'dé'ë neda'. ⁹Ca na' nadxí'inë' Dios Xuz neda', lësca' caní nadxí'ida' libí'ili'. Guli'gúnti-ca'sö ca ral-la' gunë' bönni' nadxí'ida'-në'. ¹⁰Channö gunli' ca rea' libí'ili', gunli' ca ral-la' gunë' bönni' nadxí'ida'-në', ca na' neda' ca' runa' ca chigudxë' Xuza' Dios neda' guna', en rúntica'sa' le raza lãdxë'ë Lë', Bönni' na' nadxí'inë' neda'.

¹¹'Yugu' didza' ni rea' libí'ili' para udzëjalenli' tsözxón neda', en gaca idú ca na' udzëjali'. ¹²Lë ni naca le rea' libí'ili' gunli': Guli'dxf'i luzá'ali' tuli' ia'tuli', ca na' neda' ca' nadxí'ida' libí'ili'. ¹³Biti' gaca idxí'irönë' nu bönni' luzë'ë ca nu bönni' udödë' yöl-la' na'bán queë', gátië' para gácalenë' yugu' böchi' luzë'ë tu' nadxí'inë' légaquië'. ¹⁴Libí'ili' nácali' böchi' luzá'a channö gunli' ca na' chigudxa' libí'ili' gunli'. ¹⁵Biti'rö innía' queé'li' nácali' huen dxin quia', tu' cabí nózinë' bönni' huen dxin naca gunë' xanë'. Neda' chigunnía' queé'li' nácali' böchi' luzá'a, tu' chibena' ga nózili' yúgu'të le chigudxë' Xuza' neda' guna'. ¹⁶Calëga libí'ili' guröli' neda', pero neda' guró caza' libí'ili', en buzóa' libí'ili' para tsëajli' bi tsöjenli', ca na' tun ni'a në'e lubá na' ta'bia yenni', ate' ugá'anati-ca'sö lë na' gunli'. Caní gaca, Xuza' Dios gunnë' queé'li' yúgu'të le inábili' Lë', en ugunli' dxin La' neda'. ¹⁷Lë ni naca le

rea' libí'ili' gunli': Guli'dxf'i luzá'ali' tuli' ia'tuli'.

Bönachi yödzölió tu'zóa tsölá'alö Jesús, en nupa dá'gaca Lë'

¹⁸Gunnë' ca' Jesús:

—Channö bönachi yödzölió ni tu'zóa libí'ili' tsölá'alö, nözili' chibulu'zöë' neda' tsölá'alö zí'alö ca tu'zöë' libí'ili' tsölá'alö na'a. ¹⁹La'tu' nácali' tuz len bönachi yödzölió ni, huala'dxf'i bönachi yödzölió ni libí'ili' ca na' ta'dxf'i luzë'ëguequi, pero tu'zóa bönachi yödzölió ni libí'ili' tsölá'alö tu' cabí nácali' tuz len léguequi, tu' guró caza' neda' libí'ili', en guléaja' libí'ili' ladaj bönachi yödzölió ni. ²⁰Guli'tsöjné didza' na' chigudxa' libí'ili', gunnía': Biti' nayépisëtëre' nu bönni' huen dxin ca xanë'. Channö gula'bia lãdxigaca bönachi neda', ila'bia lãdxigaca ca' libí'ili'. Channö nacuá' nupa tun ca rnna xtídza'a, ilún ca' ca rnna xtídza'li' libí'ili'. ²¹Yúgu'të lë ni ilún bönachi queé'li' tu' dá'ali' neda', tu' cabí núnbë'gaca Dios Xuz nasól-lë'ë neda'.

²²'La'tu' cabí bida', en la'tu' cabí bé'le-na' légaquië' didza', biti' ila'báguë'ë dul-la', pero na'a tu' bida' ni, biti' bi gaca ila'nnë' que dul-la' nabága'gaquië' le ubéaj légaquië' dxí'a. ²³Nu bönni' ruzóë' neda' tsölá'alö, ruzóë' ca' Xuza' Dios tsölá'alö. ²⁴La'tu' cabí bena' yugu' yöl-la' huáca ga nacu'ë, yugu' le cuntú nu ben ca gulaca, biti' ila'báguë'ë dul-la'. Na'a, bila'lë'enë' yugu' lë na' bena', ate' tu'zöë' neda' tsölá'alö, en tu'zöë' ca' Xuza' tsölá'alö. ²⁵Caní raca, para gaca ca rnna xtídzë'ë Dios, le nazí' lu ná'agaquië', le rnna: Tu'zöë' neda' tsölá'alö, en biti' zoa bizx que.

²⁶'Cate' idxinë' Dios Bö' Lá'ayi, Bönni' ru'ë didza' idútë li, en gácalenë' libí'ili', utipë' lãdxí'li'. Isól-la'a Bönni' na' queé'li' uláz queë' Dios Xuz, ate' gunë' ba nalí quia' neda'. ²⁷Libí'ili' ca' gunli' ba nalí

quia', tu' zóalen cázali' neda' tsözxón dza ni'te.

16 Gunné' ca' Jesús:
—Yugu' didza' ni chigudxa' libí'ili', para cabí gaca chopa ládxi'li'.
² Yugu' bönni' judío ulu'béajé' libí'ili' tsaz ga tu'dubé' tu'sédé' queé' Dios, ate' idxín dza cate' nu bönni' gútié' libí'ili' guéquiné' dxin queé' Dios runé'.
³ Caní iluné', tu' cabí núnbé'gaquié' Dios Xuz, en cabí núnbé'gaquié' neda'.
⁴ Rea' libí'ili' yugu' didza' ni, para cate' idxín dza na', tsójnéli' didza' ni chigudxi caza' libí'ili'.

Le guné' Dios Bö' Lá'ayi

Gunné' ca' Jesús:

—Yugu' didza' ni biti' gudxa' libí'ili' dza ni'te, tu' ni' zóalen caza' libí'ili'.
⁵ Na'a huöja', tsöjsóalena'-né' Dios Xuz, nasól-lé'è neda'. Biti' inábili' neda' ni-tuli' libí'ili', biti' innali': ¿Gazxi tseju'?
⁶ Na'a, tu' rea' libí'ili' yugu' didza' ni, risébi ládxi'li'.
⁷ Neda' rea' libí'ili' le naca idúté li. Gácarö dxi'a queéli' huöja', tu' channö cabí huöja', biti' idisóalené' Dios Bö' Lá'ayi libí'ili', Bönni' na' gácalené' libí'ili', en utipé' ládxi'li', pero channö huöja', isól-la'a-né', na' idisóalené' libí'ili'.
⁸ Cate' guídé' Lè', guné' ga iléquibe'e bönachi yödzölió ni nabá-ga'gaca dul-la', en biti' núnbé'gaca le naca tsahui', ate' ichúguié' Dios quéguequi ilátigaca.
⁹ Nabága'gaquié' dul-la' tu' cabí ta'yéajlé'è neda'.
¹⁰ Biti' núnbé'gaquié' le naca tsahui' tu' ilútié' neda', ate' huöja' ga zoé' Dios Xuz, Bönni' na' náquié' tsahui', ate' bíti'rö ila'lé'ené' neda'.
¹¹ Ichúguié' Dios quégaquié' ilátie' tu' chiguchúguié' que tu' xihui' nu rinná be'e bönachi yödzölió ni.

¹² 'Ia'zica' zían didza' ré'ènda' güf'ile-na' libí'ili', pero biti' gaca tséajni'ili' na'a.
¹³ Cate' guídé' Dios Bö' Lá'ayi, Bönni' na' ru'é didza' idúté li, Lè' usediné' libí'ili' yúgu'té le naca idúté li na', tu' cabí gu'é

didza' rácasö queé', pero gu'é yúgu'té didza' na' yönné' ru'é Xuza', en guné' ga inózili' yúgu'té le ral-la' gaca.
¹⁴ Lè' guné' neda' bal, tu' si'é le nequi quia', en guné' ga inózili' le.
¹⁵ Yúgu'té le nequi queé' Dios Xuz nequi quia'. Que lè ni na' gunía' si'é le nequi quia', en guné' ga inózili' le.

Yöl-la' risébi ladxi' queéli' huóaca yöl-la' rudzeja

¹⁶ Gunné' ca' Jesús:

—Yetú ch'ido'osö, en bíti'rö ilé'eli' neda', ate' ia'tú ch'ido'osö ca' ulé'eli' neda', tu' huöja' ga zoé' Dios Xuz.

¹⁷ Ní'irö bönni' uséda queé' gulé luzá'agaquié' tué' ia'túé', ta'nné':

—¿Bizxi rnna didza' ni ré' rë'u? Rnné': "Ia'tú ch'ido'osö, en bíti'rö ilé'eli' neda', ate' ia'tú ch'ido'osö ca' ulé'eli' neda', en naca tu' huöja' ga zoé' Dios Xuz."

¹⁸ Ní'irö gula'nné':

—¿Bizxi caz ré'èni inná didza' ni, gunné': "Ia'tú ch'ido'osö"? Biti' réajni'itu' didza' ni ru'é.

¹⁹ Réquibe'ené' Jesús té'ènné' ila'nábiné' Lè', ate' ré' légaquié':

—¿Naru' rinábitsö luzá'ali' ca naca que didza' na' bé'a, gunnía': Ia'tú ch'ido'osö, en bíti'rö ilé'eli' neda', ate' ia'tú ch'ido'osö ca' ulé'eli' neda'?

²⁰ Le nácaté' rea' libí'ili': Códxili', en isébi ládxi'li', pero bönachi yödzölió ni ulu'dzeja cate' iluti neda'. Ní'irö sal-la' isébi ládxi'li', yöl-la' risébi ladxi' queéli' huóaca yöl-la' rudzeja cate' ulé'eli' neda'.
²¹ Tu nigula cate' chizóa gáljabí' bí'ido' queénu, riguí' rizáca'nu, tu' chibidxín dza queénu, pero cate' chizóabi' tubi' bí'i bönni'do' queénu, bíti'rö röjnenu lè na' butságanu, tu' rudzéjanu tu' chigúlajbí' tubi' bí'i bönni'do' yödzölió ni.
²² Lésca' caní raca queéli', risébi ládxi'li' na'a, pero huöda' uduyúa' libí'ili', ate' ní'irö udzeja

ládxi'li', ate' biti' séqui'né' nu bönni' ugúé' yöl-la' rudzeja queéli' na'.

²³Dza n'irö' biti' bi inábili' neda'. Le nácaté' rea' libí'ili': Yúgu'té' le inábili' Dios Xuz, en ugunli' dxin La' neda', Lë' gunné' queéli'. ²⁴Ga ridxinté' na'a dza biti' rugunli' dxin La' neda' cate' bi rinábili'-né' Dios Xuz. Guli'naba caní, ate' idéli'li' lë' na' inábali', para gaca idú yöl-la' rudzeja queéli'.

Ridéli'né' Jesucristo lu le raca yödzölió ni

²⁵Gunné' ca' Jesús:

—Yugu' lë' na' chibé'lena' libí'ili' didza' bucúdz'u' didza'. Huadxín dza cate' bítirö' güf'ilena' libí'ili' didza' le rucúdz'u' didza', pero yálajdo' güf'ilena' libí'ili' didza' ca naca queé' Dios Xuz. ²⁶⁻²⁷Dza na' inábili'-né' Dios, en ugunli' dxin La' neda', ate' rea' libí'ili', biti' gun bayudxi gáta'yua' lahué' Dios Xuz uláz queéli', tu' nadxí'iné' Lë' cazé' Dios Xuz libí'ili'. Nadxí'iné' libí'ili' tu' nadxí'ili' neda', en réajlë'éli' birúaja' ga zoé' Dios. ²⁸Birúaja' ga zoé' Dios Xuz, en bidxina' yödzölió ni. Ia'tú ca', ucá'ana' yödzölió ni, ate' huöja' ga zoé' Dios Xuz.

²⁹N'irö' yugu' bönni' uséda queé' gulé' Lë', ta'nné':

—Na'a ru'u didza' yálajdo', en bítirö' rucúdz'u' didza'. ³⁰Na'a réquibe'etu' nöz quezín'u' Li' yúgu'té, en biti' run bayudxi nu bi inabi yudxi Li', tu' rigúixjöi'inu' netu' le si' inábatu'. Que lë' ni na' réajlë'etu' birúaju' ga zoé' Dios.

³¹Bubi'é' didza' Jesús, ré' légaquié':

—¿Naru' réajlë'tsali' neda' na'a? ³²Bu-li'yú, huadxín dza, en chiridxín dza na', cate' gásilasili' que queéli', en ucá'anali' neda' tuza', pero biti' soa' tuza', tu' zóalen cazé' Dios Xuz neda'. ³³Yugu' didza' ni chigudxa' libí'ili' para cuéqui dxi ládxi'li', tu' nácali' quia' neda'. Lu yödzölió ni gaca queéli' le usaca' zi'

libí'ili', pero buli'tipa ládxi'li'. Neda' chibidé'li'da' lu le raca yödzölió ni.

Jesús rinábiné' Dios gácalené' nupa dá'gaca Lë'

17 Cate' budxi bé'ë Jesús yugu' didza' ni, guchisa lahué', ruyúé' yehua' yubálö, ate' rnné':

—Dios Xuz, chibidxín dza. Ben ga ilá' lahui yöl-la' zxon quia' neda', Zxf'inu', para gaca guna' ga ilá' lahui yöl-la' zxon quiu' Li'. ²Ben caní tu' chinudödu' lu na'a yöl-la' unná bé' para inná bé'eda' yúgu'té bönachi, en gu'a yöl-la' na'bán idú quégaca yúgu'té nupa na' chibennu' quia'. ³Lë' ni naca yöl-la' na'bán idú na', tu' núnbë'gaquié' Li', nacu' la's dui Dios idú, en tu' núnbë'gaquié' ca' neda', Jesucristo, ate' Li' nasól-lu'u neda'.

⁴Neda' chibena' ga nalá' lahui yöl-la' zxon quiu' yödzölió ni, en chibudxi bena' dxin na' budödu' lu na'a. ⁵Na'a, Xuz, ben ga ilá' lahui yöl-la' zxon napa' tsözxón len Li', para gaca quia' yöl-la' zxon guta' quia' tsözxón len Li' dza ni'te quez cate' si' gata' yödzölió.

⁶Chibulu'a lahui le nacu' Li' lógaquié' bönni' ni bennu' quia', nupa na' guró cazu' Li' ladaj bönachi yödzölió. Guléquiné' bönni' ni quiu', ate' bännagacu'-né' quia', ate' tuné' ca rnna xtídz'u'. ⁷Na'a nózguequiné' yúgu'té lë' na' bennu' quia' zá'gaca lu no'o Li', ⁸tu' chibudöda' lu ná'agaquié' didza' na' budödu' Li' lu na'a neda', ate' légaquié' nazí' lu ná'agaquié' le, en téquibe'ené' birúaja' ga zu' Li', ate' ta'yéajlë'ë Li' nasól-lu'u neda'.

⁹Neda' ráta'yua' Lo' gácalenu' légaquié'. Ráta'yua' Lo', calëga gácalenu' yúgu'té bönachi yödzölió, pero gácalengacu'-né' bönni' ni chibénnagacu'-né' quia', tu' néquiguequiné' quiu'. ¹⁰Yúgu'té nupa néquiguequi quia' néquiguequi ca' quiu', ate' nupa na' néquiguequi quiu'

néquiguequi ca' quia', ate' ca nácagaca nupa na' ruluí'i lahui yöl-la' zxön quia'.

¹¹Na'a, bíti'rö ugá'ana' yödzölió ni, pero yugu' bönni' ni ulu'gá'ané' yödzölió, ate' neda' udusóalena' Li'. Xuz Lá'ayi, len yöl-la' huáca quiu' ben chí'i nupa ni chibennu' quia', para ilácagaca tuz, ca na' nácaru' rë'u tuz. ¹²Cate' ni' guzóalena' légaquié' yödzölió ni, ben chí'igaca'-né', buguna' dxin yöl-la' huáca na' bennu' quia'. Nupa na' bennu' quia', ben chí'igaca'-né', ate' nitúé' bití' bunítia'-né', pero tuzé' bönni' na' náquié' ca xzí'ini tu' xihui', en narugu queé' gátie' tsaz. Caní raca ca nazúaj lu guichi lá'ayi.

¹³Na'a udusóalena' Li', ate' tsanni ni zoa' yödzölió ni, ruá'a yugu' didza' ni para gaca idú yöl-la' rudzeja quégaquié' ca na' raca quia' neda' yöl-la' rudzeja. ¹⁴Neda' chibudöda' lu ná'agaquié' xtídz'u, ate' bönachi yödzölió ni tu'zóa légaquié' tsólá'aló tu' cabí nácagaquié' tuz len léguequi, ca na' naca quia' neda', bití' naca' tuz len bönachi yödzölió ni. ¹⁵Ráta'yua' Lo', caléga cúagacu'-né' yödzölió ni, pero gun chí'igacu'-né', para cabí ila'dzuné' lu na' tu' xihui'. ¹⁶Bití' nácagaquié' tuz len bönachi yödzölió ni ca na' naca quia' neda', bití' naca' tuz len bönachi yödzölió. ¹⁷Guléaj quez quiu' légaquié', ugunu' dxin le naca idúté li. Le naca idúté li na' naca xtídz'u. ¹⁸Ca na' benú' Li', gusól-lu'u neda' ladaj bönachi yödzölió ni, lësca' caní runa' neda', risól-la'gaca'-né' ladaj bönachi yödzölió. ¹⁹Tu' nadxf'igacada'-né' rudödi cuina' quiu', para ulu'rúajé' ca' légaquié' quez quiu' tu' nazí' lu ná'agaquié' le naca idúté li.

²⁰Ráta'yua' Lo', caléga quégacasé' bönni' ni, pero lësca' quégaquié' bönni' ni' ila'yéajlé'è neda' ni'a que didza' ilu'è bönni' ni. ²¹Ráta'yua' Lo' gunu' ga ilácagaquié' tuz yúgu'té', en ilácagaquié' ca'

tuz len rë'u, ca na' nacu' Li', Xuza', nacu' tuz len neda', ate' neda' ca', naca' tuz len Li'. Caní ral-la' ilácagaquié' para ila'yéajlé' ia'zica'rö bönachi yödzölió ni, Li' caz gusól-lu'u neda'. ²²Yöl-la' zxön na' bennu' quia', neda' bë'a ca' quégaquié', para ilácagaquié' tuz, ca na' nácaru' tuz rë'u. ²³Li' nacu' tuz len neda', ate' neda' naca' tuz len légaquié', para gaca idú ca nácagaquié' tuz, en caní iléquite'e ia'zica'rö bönachi yödzölió ni, Li' caz gusól-lu'u neda', ate' nadxf'igacanu'-né' ca na' nadxf'inu' neda'.

²⁴Xúza'do', ré'ènda' ila'cuá'lené' neda' bönni' ni bénnagacu'-né' quia' ga na' tsöjsó'a, para ila'lé'ené' yöl-la' zxön na' bennu' quia' dza ni'te cate' si' gunu' yödzölió tu' nadxf'inu' neda'. ²⁵Xuza' tsahui', bönachi yödzölió ni bití' nún'bé'gaca Li', pero neda' nunbé' caza' Li', ate' yugu' bönni' ni chinóziguequiné' Li' caz gusól-lu'u neda'. ²⁶Bena' ga nóziguequiné' le nacu' Li', en gunra' ca' ga ila'nóziné' lë ni para ca na' nadxf'inu' Li' neda', lësca' caní ila'dxí'i luzá'agaquié', ate' gaca caza' tuz len légaquié'.

Ta'zöné' Jesús

(Mt. 26:47-56; Mr.

14:43-50; Lc. 22:47-53)

18 Cate' budxi bë'è Jesús yugu' didza' ni, birúajé' ni', ate' sa'yéajlené' yugu' bönni' uséda queé'. Gudödé' ia'tsólá'a yegu Cedrón, en bidxiné' ga ni' nacua' yaga olivo ca', ate' lataj ni guyáزالené' yugu' bönni' uséda queé'. ²Lësca' Judas, bönni' na' udödé' Jesús, nún'bé'è la' yëla na', tu' butubé' Jesús yugu' bönni' uséda queé' ni' zían luzuí. ³Ní'irö guché'è Judas tu' cö' bönni' rójáquié' gudil-la, en yugu' bönni' ni'a ná'agaquié' bixúz unná bë', en ni'a ná'agaquié' yugu' bönni' yudo' fariseo, ate' yójáquié' ga ni' zoé' Jesús, nuá'agaquié' yugu' guí' yöri, en yugu' le tu'df'iné'. ⁴Ní'irö, tu' nóziné' Jesús yúgu'té' le ral-

la' gaca queé', birúajé' ga ni' zoé', en rē légaquié':

—¿Nuzxi riguíljali'?

⁵ Bulu'bi'è didza', tē Lē':

—Jesús, bönni' Nazaret, riguíljatu'-nē'.

Jesús rē' légaquié':

—Neda' caz.

Judas, bönni' na' rudödē' Jesús lu ná'agaquié', zóalenē' légaquié'. ⁶ Cate' Jesús gudxé' légaquié': "Neda' caz", ní'irō bulu'bígué'è cusi xzanlō, en gula'dzō'è lu yu. ⁷ Jesús gunábinē' légaquié' leyúbölō, rnnē':

—¿Nuzxi riguíljali'?

Tē' Lē':

—Jesús, bönni' Nazaret, riguíljatu'-nē'.

⁸ Ní'irō bubí'è didza' Jesús, rnnē':

—Chigúdxá' libí'ili': Neda' caz.

Channō riguíljali' neda', guli'güf'-gáquié' lataj tsójhuó'jgaquié' bönni' ni.

⁹ Caní gunné' Jesús para idxín didza' na' bē'è, gunné': "Nupa ni bennu' quia', nitúé' bití' bunítia'-nē'." ¹⁰ Ní'irō, tu' nu'è Simón Pedro tu guíé' tuchi', gulecjé' le, en benté' hué' Malco, tu bönni' huen dxin queé' bixúz lo, guchúguié' guídi náguié' íbēla bönni' na'. ¹¹ Ní'irō Jesús rē' Pedro na':

—Bugú'u gufé' tuchi' quiu' lidxi. ¿Naru' cabí ral-la' quí'i saca'a lē na' chinunē' Xuza' ca gaca quia'?

Ridxinē' Jesús lahué' bixúz lo

(Mt. 26:57-58; Mr. 14:53-54; Lc. 22:54)

¹² Yugu' bönni' na' rōjáquié' gudíla, en bönni' na' nacu'è lu nē'è, enca' yugu' bönni' ní'a ná'agaquié' bönni' judío unná bē' gula'zōnē' Jesús, en gulúgui'è Lē'. ¹³ Ní'irō gula'ché'è Lē' zí'alō lahué' Anás, tu' náquié' xto' xzí'inē' Caifás, bönni' náquié' bixúz lo iz na'. ¹⁴ Náquié' Caifás bönni' na' buzéajni'inē' yugu' bönni' judío unná bē', bulu'ínē' légaquié'

dxí'arō gaca gátíé' tuzé' bönni', en calēga iníti idútē yōdzō quégaquié'.

Rnnē' Pedro: "Bití' núnbē'a-nē' Jesús"

(Mt. 26:69-70; Mr. 14:66-68; Lc. 22:55-57)

¹⁵ Simón Pedro, en ia'túé' bönni' usēda queé' Jesús yōjáquié' cúdzu'lē' Lē', sójnō-gaquié' Lē'. Bönni' usēda ni guyázalenē' Jesús lō'a que lidxi bixúz lo, tu' núnbē'è bixúz lo na' lē'. ¹⁶ Bugá'anē' Pedro ní'ilō ga nu riyaza lō'a na'. Que lē ni na' burúajé' bönni' usēda na' núnbē'è bixúz lo lē', ate' bé'lenē'-nu didza' nigula na' run chí'ínu ga nu riyaza lō'a na', ate' bené' ga guyázié' Pedro lō'a. ¹⁷ Ní'irō nigula na' run chí'ínu ga nu riyaza lō'a rēnu Pedro, rnnanu:

—¿Naru' cabí do'o ca' lí' bönni' ní'?

Bubí'è didza' Pedro, rnnē':

—Calēga neda'.

¹⁸ Tu' run ziaga, yugu' bönni' huen dxin, en yugu' bönni' ní'a ná'agaca bōnachi yudo' nabéquiagaquié' guí, ate' zúfquequiné' ra' guí na', en tu'tsē'e cuín-gaquié'. Lēsa' Pedro zúflenē' légaquié', rutsē'e cuiné'.

Bixúz lo rinabi yúdxinē' Jesús

(Mt. 26:59-66; Mr. 14:55-64; Lc. 22:66-71)

¹⁹ Ní'irō gunabi yúdxinē' bixúz lo Jesús para inózinē' nupxi dá'gaca Lē', en naxi naca le rusedinē' Jesús bōnachi. ²⁰ Bubi'è didza' Jesús, rē' lē':

—Lahui' lo bé'lēna' yúgu'tē bōnachi didza'. Buseditiquí'sida' légaquié' gapa naca lu yu'u ga tu'dubé' tu'sédé' queé' Dios, enca' chila yudo', ga ní' tu'dubé' yúgu'tē bönni' judío, en bití' bi didza' bē'a bagáchi'sō. ²¹ ¿Bizx que rinabi yúdxinu' neda'? Gunabi yudxi nupa ní' bila'yōni didza' bé'lēna' léguequi. Nózguequi quézinē' bönni' na' didza' na' bé'lēna' légaquié'.

²²Cate' budxi bē'ē Jesús didza' ni, tu bönni' ni'a ná'agaca bönachi yudo' gudápē'ē ru'ē Jesús, rnnē':

—¿Naru' caní rubí'tso' didza' lahuē' bixúz lo?

²³Bubi'ē didza' Jesús, rē' lē':

—Channö bití' gunní'a dxi'a, gudixjö' bízxilö didza' bē'a bití' naca dxi'a, en channö guca dxi'a didza' bē'a, ¿bizx que na' gudápu'u neda'?

²⁴Ní'irö Anás na' gusól-lē'ē Jesús náguē'ē, ate' bulu'sudxinē' Lē' lahuē' Caifás, bönni' náquiē' idú bixúz lo.

Leyúbölö rnnē' Pedro: "Bití' núnbē'a-nē' Jesús"

(Mt. 26:71-75; Mr.

14:69-72; Lc. 22:58-62)

²⁵Cate' ni' zuínē' Pedro ra' gu' rutsē'e cuinē', yugu' bönni' nacu'ē ni' gulé' lē', ta'nnē':

—¿Naru' cabí do'o ca' li' Jesús na'?

Gudá'baguiē' Pedro, rnnē':

—Calēga neda'.

²⁶Zoē' ni' tu bönni' huen dxin queē' bixúz lo, náquiē' dī'a dza queē' bönni' na' Pedro guchúguiē' guídí náguiē', ate' bönni' huen dxin na' rē' Pedro:

—¿Naru' cabí bilé'e quézida' li' la' yēla ni', dzagu'-nē' Jesús?

²⁷Leyúbölö gudá'baguiē' Pedro, ate' la' guródxitēba' böra.

Ridxinē' Jesús lahuē' Pilato

(Mt. 27:1-2, 11-14; Mr.

15:1-5; Lc. 23:1-5)

²⁸Ní'irö gula'ché'ē Jesús, en bulu'zē'ē lidxē' Caifás na', ate' bila'dxinē' yúlahui' queē' bönni' yu'u lu nē'ē uláz que yödz Roma, le nazí'i le Pretorio. Chizá' rení' dza na', ate' bití' gula'yáziē' yugu' bönni' judío yúlahui' na', tu' téquinē' ila'báguē'ē xíguia' channö ila'yáziē' ni', le gun ga bití' gaca ilahuē' xtsö' Laní Pascua, laní na' tu'subanē' ca benē' Dios, bubéajē' bönachi Israel luyú Egipto. ²⁹Ní'irö birúajē'

Pilato, bönni' na' yu'u lu nē'ē, en bidxinē' ga na' nacu'ē, ate' rē' légaquiē':

—¿Bizxi ruzégui'li'-nē' bönni' ni didza'?

³⁰Bulu'bi'ē didza', tē' lē':

—La'tu' cabí nu'ē bönni' ni dö', bití' udóditu'-nē' lo'.

³¹Ní'irö Pilato rē' légaquiē', rnnē':

—Libí'i cázali' guli'ché'ē, en bulí'chí'a bulí'soró Lē' ca rinná bē' xibá queéli'.

Yugu' bönni' judío tē' lē', ta'nnē':

—Bití' dē lu na'tu' nu gútitu'.

³²Caní guca para idxín xtídzē'ē Jesús, le bē'ē naca ral-la' gátíē'. ³³Ní'irö buáziē' Pilato yúlahui' na', ate' bulidzē' Jesús, en rē' Lē':

—¿Nacu' Li' Bönni' Rinná Bé'enē' Bönachi Judío?

³⁴Bubi'ē didza' Jesús, rē' lē':

—¿Naru' rácasö quiu' rno' caní, o gulé' bönachi li' caní ca naca quia'?

³⁵Pilato rē' Lē':

—¿Naru' réquitsenu' naca' judío? Yugu' bönni' uládz quiu', en yugu' bixúz unná bē' bulu'dödē' Li' lu na'a. ¿Bizxi caz benu'?

³⁶Ní'irö bubi'ē didza' Jesús, rē' lē':

—Rinná bē'a neda', pero calēga ca ta'nná bē' bönachi yödzölió ni. La'tu' rinná bē'a ca ta'nná bē' bönachi yödzölió, ila'dil-lē' bönni' dá'gaquiē' neda', para cabí ilu'ē lataj nu udódi neda' lu ná'agaquiē' bönni' judío. Ca rinná bē'a neda' bití' naca ca ta'nná bē' bönachi yödzölió ni.

³⁷Ní'irö Pilato rē' Lē':

—¿Nácatso' bönni' rinná bē'ē?

Bubi'ē didza' Jesús, rē' lē':

—Naca' ca na' rno'. Que lē ni na' bida' ga gulja' yödzölió ni, para guna' ba nalí que le naca idútē li. Yúgu'tē nupa ni tun le naca idútē li tu'zē ná'agaca didza' ruá'a.

³⁸Pilato rē' Lē':

—¿Bizxi na' le naca idútē li?

Ta'chúguië' queë' Jesús gátië'

(Mt. 27:15-31; Mr.
15:6-20; Lc. 23:13-25)

Cate' budxi gunné' Pilato caní, burúajë' leyúbölö ga na' nacu'ë bönni' judío unná bë' na', en rë' légaquië':

—Biti' bi dö' ridzólida' nu'ë bönni' ni. ³⁹Libí'ili' dë tu le nulaga loli' runli' cate' raca Laní Pascua ni, rinábili' neda' usana'-në' queéli' tuë' bönni' nadzunë'. ¿Rë'ënilí' usana'-në' queéli' Bönni' Rinná Bé'enë' Bönachi Judío?

⁴⁰Ní'irö yúgu'të' gulu'ë zidzaj didza' leyúbölö, ta'nnë':

—¿Calëga bönni' ni, pero Barrabás usanu'-në' queëtu'!

Barrabás na' náquië' gubán.

19 Ní'irö Pilato guché'ë Jesús, en benë' ga gula'guiné' yugu' bönni' rójáquië' gudil-la Lë'. ²Bönni' rójáquië' gudil-la na' gulunë' tu bregui' ni'a në'e yötsi', ate' bulu'dxië' le icjë' Jesús, en bulu'gácuë' Lë' tu lari' tunna xiná chul-la ca naca le tácuë' bönni' ta'nná bë'ë. ³Ní'irö gula'biguë'ë lahuë' Jesús, en të' Lë':

—¿Bica' bo' Li', Bönni' Rinná Bé'enë' Bönachi Judío!

Ní'irö gula'gápë'ë lahuë'.

⁴Ní'irö burúajë' Pilato, en rë' yugu' bönni' judío unná bë', rnnë':

—Buli'yú, rubéajaja'-në' loli' ni para in-ózili' bití' bi rudzólida' le naca dö' nu'ë bönni' ni.

⁵Ní'irö birúajë' Jesús, dxí'a icjë' bregui' ni'a në'e yötsi' na', en nácuë' lari' tunna xiná chul-la na'. Pilato rë' légaquië':

—Ni zoë' bönni' ni.

⁶Cate' yugu' bixúz unná bë', en yugu' bönni' ni'a ná'agaquië' bila'lé'enë' Jesús, zidzaj gulu'ë didza', ta'nnë':

—¿Budé'ë lë'e yaga cruz! ¿Budé'ë lë'e yaga cruz!

Pilato rë' légaquië':

—Libí'i cázali' guli'ché'ë, en guli't-söjdé'ë lë'e yaga cruz. Neda' bití' bi dö' budzólida' nu'ë bönni' ni.

⁷Ní'irö bönni' judío na' të' lë':

—Dë queëtu' tu xibá, ate' rinná bë' xibá queëtu' na' ral-la' gátië' bönni' ni tu' gunné' náquië' Zxí'inë' Dios.

⁸Cate' biyönnë' Pilato didza' ni, gúdxirönë'. ⁹Leyúbölö buázië' yúlahui' na', en rë' Jesús:

—¿Gázxitë bönni' Li'?

Biti' bi didza' bubi'ë Jesús.

¹⁰Ní'irö Pilato rë' Lë':

—¿Naru' cabí ubí'tso' didza', quíxjöi'inu' neda'? ¿Naru' cabí nózinu' dë lu na'a udá'a Li' lë'e yaga cruz, en dë lu na'a usana' Li'?

¹¹Bubi'ë didza' Jesús, rë' lë':

—Biti' bi dë lu no'o gunu' quia' la'tu' cabí nudödë' Dios yöl-la' unná bë' na' lu no'o. Que lë ni na', bönni' na' budödë' neda' lu no'o nabágarë' xíguia' ca li'.

¹²La' ní'isö rizóa ribö'ë Pilato usanë' Jesús, pero gulu'ë zidzaj didza' bönni' judío unná bë', ta'nnë':

—Channö usanu'-në' bönni' ni, bití' ridzagu'-në' dxi'a César, bönni' rinná bé'enë' idútë yödzólió. Nu bönni' run cuinë' bönni' rinná bë'ë, ridá'báguë'ë César na'.

¹³Cate' biyönnë' Pilato didza' ni, gunná bé'enë' nupa diguá'gaca Jesús, ate' gurö'ë xilatjë' ga ruchi'a rusöröë', lataj na' nazí' le Lö'a Ga Zxóagaca Guiójtá'a, en ca naca didza' hebreo nazí' le Gabata. ¹⁴La' dza ná'asö naca dza si' idxín Laní Pascua, en naca idú hua gu-bidza. Ní'irö Pilato gudxë' yugu' bönni' judío unná bë' na', rnnë':

—Ni zoë' bönni' rinná bé'enë' libí'ili'.

¹⁵Gulu'ë zidzaj didza', ta'nnë':

—¿Bétië! ¿Bétië! ¿Budé'ë lë'e yaga cruz!

Pilato rë' légaquië':

—¿Rinábítseli' neda' udá'a-në' lë'e yaga cruz bönni' rinná bé'enë' libí'ili'?

Bulu'bi'è didza' bixúz unná bē, ta'nné':

—Cúnturō nu zoa rinná be'e netu'.
Tuzē' César rinná bé'enē' netu'.

¹⁶ Que lē ni na' Pilato budōdē Jesús lu ná'agaquiē', para tsōjdá'agaquiē' Lē lē'e yaga cruz. Ní'irō gula'guélē'ē Jesús, en gula'ché'ē Lē ní'ilō.

Tu'dé'ē Jesús lē'e yaga cruz

(Mt. 27:32-44; Mr.
15:21-32; Lc. 23:26-43)

¹⁷ Birúajē' Jesús ní', nu'ē yaga cruz queē', sa'yéajē' lataj na' nazí'i le Lataj Que Böga' Ícjaru', en ca naca didza' hebreo nazí'i le Gólgota. ¹⁸ Bulu'dé'ē Jesús lē'e yaga cruz ní', ate' bulu'dá'lenē' Lē tsōzxón lē'egaca yaga cruz ia'chopē' bōnni'. Tsölá'a huéaj ta'dé'ē, ate' Jesús dé'ē gatsaj láhui'lō chopē' bōnni' na'. ¹⁹ Gusól-lē'ē Pilato tu bōnni' nu'ē le buzúajē' lu guichi le buzóē' lē'e yaga cruz icjlē' Jesús, le rna caní: "Jesús, Bōnni' Nazaret, Bōnni' Rinná Bé'enē' Bōnni' Judío." ²⁰ Bulu'labē' zían bōnni' judío didza' ni, tu' zoa ga na' bulu'dé'ē Jesús lē'e yaga cruz gála'sō ra' yōdzō, ate' didza' na' nuzúajē' len didza' hebreo, en len didza' griego, en len didza' latín. ²¹ Yugu' bixúz unná bē' quégaquiē' bōnni' judío tē' Pilato, ta'nné':

—Biti' uzúaju', "Bōnni' Rinná Bé'enē' Bōnni' Judío." Buzúaj caní: "Bōnni' ni gunné': Inná bé'eda' bōnni' judío."

²² Bubi'è didza' Pilato, rē' légaquiē':

—Le chinuzúaja', tsaz chinuzúaja'.

²³ Cate' yugu' bōnni' na' rōjáquiē' gudil-la budxi bulu'dé'ē Jesús lē'e yaga cruz, gula'guélē'ē lari' gúcuē'. Gula'béajē' tápalō, tu cō' huéaj guta' que queégaquiē'. Gula'guélē'ē ca' lari' guxóa yenē' Jesús, ate' lari' na' bití' nadía, pero naduba tuz ca naduba. ²⁴ Ní'irō yugu' bōnni' na' rōjáquiē' gudil-la gulé luzá'agaquiē' tuē' ia'túē', ta'nné':

—Biti' ichúguru' le, pero dxí'arō gaca uyuru' le gaca bē' para inóziru' nuzki guequi que.

Caní guca, budxín ca nazúaj lu guichi lá'ayi, le rna:

Gula'guísiē' que queégaquiē' lari' nacua', en que lari' quia' bulu'yúē' le naca bē'.

Caní gulunē' bōnni' na' rōjáquiē' gudil-la.

²⁵ Xiné'ē Jesús, en nigula zxfanu xiné'ē, en María, nigula queē' Cleofas, en María Magdalena gula'cuá'anu gala' ga na' dé'ē Jesús lē'e yaga cruz. ²⁶ Cate' Jesús bilé'enē'-nu xiné'ē, en bilé'enē' ca' zoē' ní' bōnni' usēda queē' na' nadxí'inē', gudxē'-nu xiné'ē:

—Na'a, na' zoē' zxf'inu'.

²⁷ Ní'irō gudxē' bōnni' usēda queē' na':

—Na' zóanu xinó'o.

Bōnni' usēda na' benē' ga yōjsóanu lidxē' la' dza ní'isō.

Le guca cate' gutiē' Jesús

(Mt. 27:45-56; Mr.
15:33-41; Lc. 23:44-49)

²⁸ Gudōdi ni, tu' nōzinē' Jesús yúgu'tē chibóa budzaga lahui, en para udxín le nazúaj lu guichi lá'ayi, gunné':

—Ribidxa' nisa.

²⁹ Dē ní' tu zxiga' yudzu nupi zi. Ní'irō yugu' bōnni' na' rōjáquiē' gudil-la bulu'guijē' nupi zi na' tu le bululu rizxupi nisa, ate' bulu'zōē' le tu lahui gui, en bulu'dé'ē le ru'ē Jesús para xupē'. ³⁰ Budxi gu'ē Jesús nupi zi na', gunné':

—Chinacatē.

Ní'irō buzótaj icjē'. Burúajtē bö' naca cazē', gútiē'.

Tu bōnni' reajē' gudil-la runé'ē yaga tuchi' cuita lē'ē Jesús

³¹ Ní'irō, tu' naca dza sí' idxín Laní Pascua na', en tu' cabí ral-la' ulu'gá'ana nupa nátigaca lē'egaca yaga cruz cate' naca dza lá'ayi quégaquiē', le naca tu dza lá'ayi zxōntē, que lē ni na' yugu' bōn-

ni' judío guláta'yue' lahuë' Pilato guíe' bönni' rójáquië' gudil-la tsöjtítsjagaquië' xiguichjagaquië' bönni' dá'gaquië' lé'e-gaca yaga cruz, en ulu'zötjé' légaquië' lé'egaca yaga cruz na'. ³²Que lé ni na' gula'bigué'ë bönni' rójáquië' gudil-la, ate' gula'guítsjé' xiguichjé' bönni' zí'aló, en lësca' caní guluné' queë' ia'túé' bönni' na' dáz'lené' Jesús lé'e yaga cruz. ³³Cate' bila'dxiné' ga na' dé'ë Jesús, en bila'lé'ené' chinátië', biti' gula'guítsjé' xiguichjé'.

³⁴Ní'irö tuë' bönni' na' reajé' gudil-la buné'ë yaga tuchi' cuita lé'ë Jesús, ate' la' birúajté rön, en nisa. ³⁵Neda', Juan, bilé'eda' lé ni, en runa' ba nalí que, ate' le runa' ba nalí naca idúté li. Nöz quézida' ruá'a didza' idúté li, para tséajlé'ëli' ca' libí'ili' ca naca queë' Jesús. ³⁶Gulaca yugu' lé ni para budxín le nazúaj lu guichi lá'ayi, le rnna: "Biti' gatsaj nitú dxita yu'ë." ³⁷Ia'tú le nazúaj ca' lu guichi rnna caní: "Ulu'yúé' bönni' na' bulu'né'ë lé' yaga tuchi'."

Tu'cáché'ë Jesús

(Mt. 27:57-61; Mr.

15:42-47; Lc. 23:50-56)

³⁸Gudödi guca yúgu'té lé ni, guijé' José, bönni' yödzö Arimatea, bönni' dé'ë Jesús, pero bagáchi'só tu' rádxiné' yugu' bönni' judío unná bë, ate' gunábiné' Pilato gu'ë lé' lataj u'ë Jesús. Pilato bë'ë lé' lataj. Ní'irö bidxiné' José ga na' dé'ë Jesús lé'e yaga cruz, ate' bu'ë Lé'. ³⁹Lësca' bidxiné' Nicodemo ni', bönni' na' guijé' zí'aló yöyúé' Jesús chí'i dzó'ölö, nu'ë tu le nutsí'i nöri silá' que mirra, en tu le rilá' zxixi, le naca ca tu gayuá' guíë. ⁴⁰Ní'irö José, en Nicodemo na' gula'gué'ë Jesús, en bulu'chóliné' Lé' yugu' lári'do', ate' gula'gu'ë láhuilö lé na' nutsí'i nöri silá' que mirra, en le rilá' zxixi. Guluné' ca nalé'biguequiné' tuné' bönni' judío cate' tu'cáché'ë tu bönni'

nati. ⁴¹Gala' ga na' bulu'dé'ë Jesús lé'e yaga cruz dé tu luyú ga zeaj da' yaga olivo, ate' gatsaj láhui'lö lataj na' zoa tu yeru ba cubi le nadaj lé'e gu'fa guíó, yeru ba na' cuntú nu ta'güí'iné'. ⁴²Lu yeru ba na' gula'gu'ë Jesús tu' dé gála'só yeru ba na', en tu' naca dza tu'pé'ë bönni' judío que Laní Pascua.

Rubané' Jesús lu yöl-la' guti

(Mt. 28:1-10; Mr. 16:1-8; Lc. 24:1-12)

20 Cate' chinaca zílado' dza domingo, en ni' naca chul-la, guyéajnu María Magdalena ra' yeru ba na', ate' bilé'enu chinadúa guíójta'a na' busayaj ga nu riyaza yeru ba na'. ²Ní'irö bóajnu carelö ga zoë' Simón Pedro, dzáguíë' lé' ia'túé' bönni' uséda, bönni' na' Jesús nadxf'iné' lé', ate' rënu légaquië'.

—Bulu'béajé' Xanru' yeru ba ni', en biti' nöztu' gazxi gula'gu'ë Lé'.

³Ní'irö bila'rúajé' Pedro, en ia'túé' bönni' uséda na', söjáquië' ra' yeru ba na'. ⁴Tsözxón ta'xíti'ë iropé', pero ia'túé' bönni' uséda na' guxíti'rë' carelö ca Pedro, ate' zí'aló lé' bidxiné' ra' yeru ba na'. ⁵Biyéchuë', en buyúé' lu yeru ba na', ate' bilé'ené' yugu' lári'do' na' bila'röliné' Jesús, nacuá' ni', pero biti' guyázië' yeru ba na'. ⁶Ní'irö bidxiné' Simón Pedro cúdzu'lé' ia'túé' bönni' uséda na', ate' guyázië' lé' yeru ba na', en bilé'ené' lári'do' na' nacuá' ni'. ⁷Lësca' bilé'ené' lári'do' na' gula'xóé' icjé' Jesús, biti' dëlen ia'zica'rö lári'do' na', pero tsölá'alö nudubi quez. ⁸Ní'irö guyázië' ca' ia'túé' bönni' uséda na' bidxiné' zí'aló ra' yeru ba na', en bilé'ené' ca na' naca, ate' guyéajlé'ë didza' bë'ë Jesús. ⁹Caní guca, tu' cabí ta'yéajni'ininé' le nazúaj lu guichi lá'ayi ca run bayudxi gaca queë' Jesús, ate' ubané' lu yöl-la' guti. ¹⁰Ní'irö iropé' bönni' uséda na' yöjhuó'jgaquië' lídxigaquië'.

**Rulu'í lahuë' Jesús
lonu María Magdalena**

(Mr. 16:9-11)

¹¹ Bugá'ananu María n'ílō ra' yeru ba na', ribódxinu. Tsanni ni' ribódxinu, biyéchunu, buyunu lu yeru ba na'.

¹² Bilé'enu chopé' gubáz lá'ayi queé' Dios ni', nácugaquié' lari' chiguichi. Ró'ogaquié' ni', tué' ícjalō ba na', en ia'túé' xini'álo ba na' ga ni' gula'gu'ë Jesús.

¹³ Yugu' gubáz lá'ayi na' tē' lēnu, ta'nné':
—Nigúlado', ¿bizx que ribödxu'?

Rēnu légaquié':

—Tu' bulu'ú'ë Xana', en bití' nözda' gazxi gula'gu'ë Lē'.

¹⁴ Cate' budxi gunnānu caní, buécjanu, en bilé'enu-nē' Jesús, zoé' ni', pero bití' réquibe'enu Jesús na'. ¹⁵ Ní'irō Jesús gudxé'-nu:

—Nigúlado', ¿bizx que ribödxu'?
¿Nuzxi ruguilju'?

Tu' réquinu náquié' Lē' bönni' rapa chi'ë latja na', rēnu Lē':

—Bönni', channō li' bu'u-nē', gudíxjōi' neda' gazxi gulú'u-nē', ate' neda' u'a-nē'.

¹⁶ Ní'irō Jesús gudxé'-nu:

—María.

Ní'irō buécjanu, en lu didza' hebreo rēnu Lē':

—Raboni.

Didza' ni rna: Bönni' Usedi quia'.

¹⁷ Jesús rē'ë-nu:

—Biti' canu' neda', tu' cabí ruhuépinida' ga zoé' Xuza'. Na'a, guyéaj ga nacué' böchi' luzá'a, ate' yōjōdxi-gáquié': "Caní rnnē' Jesús: Huëpa' ga zoé' Xuza', náquié' ca' Xúzili'. Náquié' Dios quia', en Dios queé'li'."

¹⁸ Ní'irō guyéajnu María Magdalena na', yōjtíxjōi'inu yugu' bönni' usēda queé' Jesús chibilé'enu-nē' Xanru', en naca didza' na' gudxé'-nu.

**Rulu'í lahuë' Jesús lógaquié'
bönni' usēda queé'**

(Mt. 28:16-20; Mr.

16:14-18; Lc. 24:36-49)

¹⁹ Cate' chigul-la la' dza ná'asō, le naca dza risí lo gadxi dza, nudúbigaquié' bönni' usēda queé' Jesús, ate' nayayaj yu'u ga na' nacué' tu' tádxinē' bönni' judío unná bē'. Ní'irō bulufi lahué' Jesús gatsaj láhui'lō ga na' nacué', en rē' légaquié':
—Guli'zóa dxi ládxi'li'.

²⁰ Cate' budxi gudxé' légaquié' didza' ni, buluf'inē' légaquié' nē'ë, en cuita lē'ë. Ní'irō tu'dzéjané' yugu' bönni' usēda na' tu' tu'lé'enē' Xanru'. ²¹ Ní'irō Jesús rē' légaquié' leyúbölō, rnnē':

—Guli'zóa dxi ládxi'li'. Ca benē' Xuza', gusól-lē'ë neda', lēscā caní risól-la'a lib'ili' tsōjenli' xichina'.

²² Cate' budxi gunné' caní, bulubē' lógaquié', en rē' légaquié':

—Guli'sí Dios Bō' Lá'ayi. ²³ Núti'tēs nu uniti loli', nu na' ben dul-la', chiyú'u yōlla' runiti lo que, ate' núti'tēs nu bití' uniti loli' le, ugá'ana dul-la' que nu na' nun dul-la'.

Biti' réajlë' Tomás

²⁴ Tomás bití' zóalenē' légaquié' cate' Jesús buduyüé' légaquié'. Náquié' Tomás tué' bönni' chínnuē' ni', en tu'ë ca' lē' Bönni' Bilidi'. ²⁵ Gudōdi ni' ia'zíca'rē' bönni' usēda na' gulé' Tomás, ta'nné':

—Chibilé'etu'-nē' Xanru'.

Tomás rē' légaquié':

—Channō cabí ilé'eda' nē'ë ga gunné' bididaj, en unē'a xibón na'a ga na' guné'gaca bididaj na', en unē'a na'a cuita lē'ë ga na' gunné' yaga tuchi', bití' ca' tséajlë'a.

²⁶ Cate' chigudōdi ia'xunu' dza, nudúbigaquié' bönni' usēda na' leyúbölō lu yu'u, ate' Tomás na' zóalenē' légaquié'. Sal-la' nayayaj yu'u ga na'

nacu'ë, buluf'i lahuë' Jesús gatsaj lálhul'lö ga na' nacu'ë, en rë' légaquië':

—Gulí'zóa dxi ládxi'li'.

²⁷ Ní'irö Jesús rë' Tomás na':

—Buné' xibón no'o ni, en buyú na'a ni. Buné' no'o cuita lë'a ni, en bíti'rö gaca chopá ládxi'u, pero guyéajlë' neda'.

²⁸ Ní'irö bubí'ë didza' Tomás, rë' Lë':

—Xána'do', en Dios quia'.

²⁹ Jesús rë' lë':

—Tomás, tu' bulé'enu' neda', réajlë'u. Bica' ba nupa ni' ila'yéajlë' neda' sal-la' bití' ila'lé'eni neda'.

Le ré'ëni gun didza' nazúaj lu guichi ni

³⁰ Benë' Jesús zianró ca' yöl-la' huáca lógaquië' bönni' usëda queë', le cabí nazúajgaca lu guichi ni. ³¹ Yugu' lë ni nuzúaja' lu guichi para tséajlë'ëli' náquië' Jesús Bönni' na' ru'ë Dios lë' Cristo, Zxf'inë' Dios, en cate' tséajlë'ëli', gata' queéli' yöl-la' na'bán idú tu' réajlë'ëli'-në'.

Rulu'í lahuë' Jesús lógaquië' gadxë' bönni' usëda queë'

21 Gudödi guca lë ni, leyúbölö buluf'i lahuë' Jesús lógaquië' bönni' usëda queë' ga naca ra' nísado' que Tiberias, ate' caní guca ca na' buluf'i lahuë' lógaquië'. ² Nudúbigaquië' Simón Pedro, en Tomás, bönni' na' tu'ë ca' lë' Bönni' Bilidi', en Natanael, bönni' yödzo Caná que luyú Galilea, en chopë' bönni' zxf'inë' Zebedeo, en ia'chopë' ca' bönni' usëda queë' Jesús. ³ Simón Pedro rë' légaquië':

—Tseaja' tsöjxöna'-ba' böla.

Të' lë' ia'zícá'rë', ta'nnë':

—Guntu' li' tsözxón.

Ní'irö yöjáquië', en gula'benë' tu lë'e bárcodo', ate' rëla ni' nituba' böla bití' gula'zönë'-ba'. ⁴ Cate' chizá' rení,

yöjsóë' Jesús luyú ra' nisa na', pero bití' téquibe'enë' bönni' usëda queë' Jesús Lë' na'. ⁵ Ní'irö Jesús rë' légaquië':

—Zxf'ina'do', ¿naru' cabí deba' lati' böla queéli'?

Bulu'bi'ë didza', të' Lë':

—Nituba'.

⁶ Ní'irö Jesús rë' légaquië':

—Gulí'chílaj yöxaj böla queéli' tsölá'a ibëla barco, ate' sóngacali'-ba'.

Ní'irö gula'chiljé' le, ate' bíti'rö guca ulu'béajé' le, tu' naguíraba' böla lë'e yöxaj böla na'. ⁷ Ní'irö bönni' usëda na' nadxf'inë' Jesús lë' rë' Pedro, rnnë':

—¡Xanru' na'!

Cate' biyönnë' Simón Pedro, “Xanru' na’”, böacué' lari' gúcuë', tu' nagúë' le zí'alö, ate' guyázië' lu nisa. ⁸ Bila'dxinë' ia'zícá'rë' bönni' usëda na', tu'sé'ë barco na', suná'ayöjgaquië' yöxaj ga na' dzó'öba' böla, tu' cabí naca zítu' ga dë luyú bidxi. Nácatë ca tu gayuá' löga' ní'aru'. ⁹ Cate' bila'dxinë' luyú bidxi na', bila'lé'enë' rö'ö tu guí' bo' yalaj ni', en zxóaba' tuba' böla lálhulö, en dë ca' yöta ni'. ¹⁰ Jesús rë' légaquië':

—Gulí'diguá'a-ba' ni böla na' si' guzxon'gacali'-ba'.

¹¹ Gurenë' Pedro lë'e barco na', ate' gú'uyöjé' yöxaj na' zaca' luyú bidxi, nalí'ró-ba' böla zxon, idú tu gayuá' yu' ch'ínu-unba'. Sal-la' nácacacaba' böla zían, bití' biröza' yöxaj na'. ¹² Ní'irö Jesús rë' légaquië':

—Gulí'dá gáguli'.

Bití' burúguinë' nitúë' bönni' usëda queë' na' inábinë' Lë', innë': “¿Nuzxi Lí'?” Nózguequi quézinë' náquië' Xanru'. ¹³ Ní'irö gubígu'ië' Jesús, en gudélé'ë yöta na', enca' böla na', ate' bë'ë quégaquië'.

¹⁴ Lë ni naca le bunny luzuí buluf'i lahuë' Jesús lógaquië' bönni' usëda queë' gudödi bubanë' lu yöl-la' guti.

Jesús ru'ilenë' Simón Pedro didza'

¹⁵ Cate' budxi gulahuë', Jesús rë' Simón Pedro:

—Simón, zxi'inë' Jonás, ¿naru' nadxi'irönu' neda' ca nadxi'iguequinë' bönni' ni neda'?

Bubi'ë didza' Pedro, rë' Lë':

—Ön, Xan. Li' nöz quëzinu' raza lãdx-a'a Li'.

Jesús rë' lë':

—Bugagu yugu' bö'cu' zxi'la'do' quia'.

¹⁶ Jesús rë' lë' le buropi luzuí, rnnë':

—Simón, zxi'inë' Jonás, ¿naru' nadxi'inu' neda'?

Bubi'ë didza' Pedro, rë' Lë':

—Ön, Xan. Li' nöz quëzinu' raza lãdx-a'a Li'.

Jesús rë' lë':

—Bugagu yugu' bö'cu' zxi'la' quia'.

¹⁷ Jesús rë' lë' le bunny luzuí:

—Simón, zxi'inë' Jonás, ¿raza lãdxu'u neda'?

Bu'iinnë' Pedro tu' le chibunny luzuí rinabi yúdxinë' lë', gunné': "¿Raza lãdxu'u neda'?" Bubi'ë didza' Pedro, rë' Lë':

—Xan, yúgu'të nöz quëzinu' Li'. Nöz-inu' raza lãdxa'a Li'.

Jesús rë' lë':

—Bugagu yugu' bö'cu' zxi'la' quia'.

¹⁸ Le nácatë rea' li', cate' ni' nacu' ra'bando', rácasö quiu' bugacu cuinu', en ca gunnásö quiu' gudó'. Cate' igulu', ulí no'ó, ate' nu yúbölö ugacu li' lari', en iché' li' ga ni' biti' gué'ënnu' tseaju'.

¹⁹ Yugu' didza' ni bë'ë Jesús naca bë' naca gátië' Pedro, tsöjtë'ë lë'e yaga cruz, para gaca yöl-la' ba queë' Dios. Cate' budxi gunné' caní Jesús, gunné' ca' ia'tú: —Gudá' neda'.

Ru'ë didza' Jesús ca gaca queë' bönni' usëda na' nadxi'inë'

²⁰ Buécjë' Pedro, en bilé'enë' söjnhuë' légaquië' bönni' usëda na' Jesús nadxi'inë' lë'. Náquië' bönni' usëda na' gurö'ë cuita lë'ë Jesús cate' ni' gulahuë', en gudxë' Jesús: "Xan, ¿nuzxi na' udödi Li'?" ²¹ Cate' Pedro bilé'enë' lë', rë' Jesús:

—Xan, ¿bizxi gunë' bönni' ni?

²² Jesús rë' lë':

—Channö ré'ënda' ugá'anë' bönni' ni ga idxinrö dza huöda', biti' ral-la' cö'u böniga. Gudá'a neda' li'.

²³ Guzë' didza' ni ga nacu'ë bóchi'ru' ta'yéajlë'ë Cristo. Téquinë' biti' gátië' bönni' usëda na'. Jesús biti' gudxë' lë' biti' gátië', pero caní gunné': "Channö ré'ënda' ugá'anë' bönni' ni ga idxinrö dza huöda', biti' ral-la' cö'u böniga."

²⁴ Bönni' usëda ni naca' neda', Juan. Runa' ba nalí quëguequi lë ni, en nuzúaja' yugu' lë ni lu guichi, ate' nózili' naca idútë li le runa' ba nalí.

²⁵ Zíanrö ca' le benë' Jesús. Channö nu uzúaj léguequi lu guichi tu tu, rusaca' quia' biti' guequi yödzölió ni ila'cuá' guichi na' ral-la' nu uzúaj. Ca' caz.

LE GULUNĒ' BÖNNI' GUBÁZ NASÓL-LĒ'Ē CRISTO

Los Hechos

Le guzxi' lu nĕ'ĕ Dios, isól-lĕ'ĕ Dios Bō' Lá'ayi

1 Cate' buzúaja' lu guichi z'falō, quiu' li', Teófilo, neda', Lucas, buzúaja' yúgu'tĕ le gusí lahuĕ' runĕ' Jesús, en rusédinĕ' ² ga bidxintĕ dza buĕpĕ' yehua' yubá. Cate' si' huĕpĕ' Jesús yehua' yubá, dzáguie' Dios Bō' Lá'ayi Lĕ', gunná bĕ'ĕ ca ral-la' ilunĕ' gubáz queĕ', yugu' bönni' na' guró cazĕ'. ³ Gudōdi gud'fi guzxaquíĕ'ĕ Jesús, gútiĕ'. Ní'irō bubanĕ', en buluf'i lahuĕ' lógaquíĕ' gubáz queĕ' na'. Buluf'inĕ' légaquíĕ' zían le gulaca bĕ' zoĕ' nabanĕ', le cabí gaca nu tá'baga'. Zían luzuí buluf'i lahuĕ' lógaquíĕ' idú ca choá' dza, en bé'lenĕ' légaquíĕ' didza' ca rinná bĕ'ĕ Dios.

⁴ Cate' ni' nacu'ĕ tsözxón, gunná bĕ'enĕ' légaquíĕ' cabí ulu'zĕ'ĕ Jerusalén. Jesús gudxĕ' légaquíĕ', rnnĕ':

—Gul'cóz ni' le guzxi' lu nĕ'ĕ Xuza' isól-lĕ'ĕ queĕlí' ca na' chibusiyón quézida' lib'ili'.

⁵ Gunnĕ' ca':

—Le nácatĕ Juan buquilĕ' bönachi nisa lu nisa. Na'a bití' tse xidzé gaca queĕlí' le rulu'fi yól-la' ridila nisa ni, idisóalenĕ' Dios Bō' Lá'ayi lib'ili'.

Ruhuĕpĕ' Jesús yehua' yubá

⁶ Ní'irō yugu' bönni' ta'yéajlĕ'ĕ Jesús, nudúbigaquíĕ' ni', gula'nábinĕ' Lĕ', ta'nnĕ':

—Xan, ¿naru' gunu' ga ila'nná bĕ' bönachi Israel leyúbölō dza ni zóaru' na'a?

⁷ Jesús gudxĕ' légaquíĕ':

—Bití' nequi queĕlí' inózili' bizxi dza o bizxi dzō' gunĕ' Dios Xuz le nuzóĕ' lu na' cazĕ'. ⁸ Sí'ili' yól-la' huáca cate'

guídĕ' Dios Bō' Lá'ayi idisóalenĕ' lib'ili'. Ní'irō gunli' ba nalí quia' neda' lu yōdzō Jerusalén, en idú luyú Judea, en luyú Samaria, en ga idxíntĕlí' idútĕ yōdzólió.

⁹ Cate' budxi bé'lenĕ' légaquíĕ' didza' ni, tsanni ni' tu'yusĕ' ca' Lĕ', la' buĕpĕ' xitsá' ga rō'ō tu böaj le bucache' Lĕ', ate' bití'rō bila'lĕ'enĕ' Lĕ'. ¹⁰ Tsanni ni' tu'yúĕ' lúzxibalō cate' ni' buĕpĕ' Jesús, bulu'luf'i lógaquíĕ' chopĕ' gubáz lá'ayi ga na' nacu'ĕ, nácuagaquíĕ' lari' chiguichido'os. ¹¹ Chopĕ' ni gulĕ' légaquíĕ', ta'nnĕ':

—Bönni' Galilea, ¿bizx que ruyuli' lúzxibalō? Lĕ' cazĕ' Jesús ni si' guzĕ'ĕ ga zóali', buĕpĕ' yehua' yubá, lĕsca' caní huödĕ' leyúbölō ca na' chibilé'eli'-nĕ' söhuójĕ' yehua' yubá.

Ta'bōĕ' Matías para tsáziĕ' xilatjĕ' Judas

¹² Ní'irō gula'zĕ'ĕ ga na' rō'ō gu'ado' na' naz'fi le Gu'fa Yaga Olivo, ate' yōjhuójgaquíĕ' Jerusalén. Gu'ado' ni dĕ' gála'sō ga dĕ' Jerusalén, tsca naz'f-gaquíĕ' lataj ta'zĕ'ĕ dza lá'ayi quégaquíĕ'. ¹³ Cate' bulu'dxinĕ' yōdzō ni', gula'benĕ' ga naca buropi cu'fa lu yu'u, ga ni' ta'cu'ĕ Pedro, en Jacobo, en Juan, en Andrés, en Felipe en Tomás, en Bartolomé, en Mateo, en Jacobo, zxf'inĕ' Alfeo, en Simón, bönni' na' ruf'i ládxĕ'ĕ ladzĕ', en Judas, bóchĕ'ĕ Jacobo. ¹⁴ Yúgu'tĕ bönni' ni tu'lidzĕ' Dios tsözxón, ate' yugu' bóchĕ'ĕ Jesús, en María, xinĕ'ĕ Jesús, en ia'zica'rōnu nigula ca' núngaquíĕ' légaquíĕ' tsözxón.

¹⁵ La' dza ná'asō guzuínĕ' Pedro gat-saj láhui'lō ga nacu'ĕ böchi' luzá'aru' na' ta'yéajlĕ'ĕ Cristo. Gulaca idú ca xópalalaj bönachi nupa nudúbigaca ni'. ¹⁶ Pedro gudxĕ' légaquíĕ', rnnĕ':

—Böchi' luzá'ado'. Ben bayudxi guca le nazúaj lu guichi lá'ayi, ca na' gunnĕ' Dios Bō' Lá'ayi dza ni'tĕ, le buzúajĕ' David lu guichi, ca guca queĕ' Ju-

das, bönni' na' guch'éë nupa ni' gula'zón Jesús. ¹⁷ Judas na' gubábalenë' rë'u, en bénlenë' rë'u tsözxón dxin ni. ¹⁸ Gula'z'í'ne' tu la' yëla lazxaj que dö' na' bi'é bönni' ni. Judas ni gubixë', en biröza' lë'é, ate' bila'rúaj yúgu'të le dzö'ö lë'é. ¹⁹ Cate' bila'yöni bönnachi nacua' Jerusalén lë ni, gulu'ë le la' yëla na' Acéldama, tu didza' hebreo le rnna lu didza' xidza': La' Yëla Rön. ²⁰ Caní guca queë' Judas, ca na' nazúaj lu guichi lá'ayi naz'í le Salmos, le rnna:
Ugá'ana cá'asö lidxë',
en biti' idzöli nu soa yu'u na'.

Rnna ca':

Nu yúbölö tsaza xilatjë'.

²¹⁻²² 'Run bayudxi na'a cöru'-në' tu bönni' gunë' rë'u tsözxón para gunë' ba nalí queë' Jesús, ca guca, bubanë' lu yöl-la' guti. Ral-la' gáquië' bönni' nabábalenë' bönni' ni' gula'cuá'lenë' rë'u dza ni'te cate' ni' Xanru' Jesús gudálenë' rë'u. Gula'sí lógaquië' nacua'lenë' rë'u cate' ni' buquilë' Juan bönnachi nisa, ga bidxintë dza buëpë' Jesús yehua' yubá, cate' buzé'ë ga zóaru'.

²³ Ní'irö bulu'lu'ë chopë', José, en Matías. José na' lë' ca' Barsabás, en zoa ia'tú lë' Justo. ²⁴ Ní'irö bulu'lidzë' Dios, ta'nnë':

—Xantu' Dios, nunbë' cazu' icja ládx-i'do'gaca yúgu'të bönnachi. Bulu'í netu' nulë' chopë' ni chiguró cazu' Li' ²⁵ para tsázië' lu dxin ni para gáquië' gubáz quiu'. Tsázië' xilatjë' Judas, bönni' ni' bunítie' xilatjë' tu' benë' dul-la', ate' guy-ijë' xilataj cazë' lataj chul-la.

²⁶ Ní'irö bulu'zúajë' yugu' lu guichi lágaquië', tu queë' José, en ia'tú queë' Matías. Bulu'gútsi'në' luzé'eguequi, en bulu'béajë' tu, ate' birúaj le nazúaj lë' Matías. Caní guca, Matías na' gubábalenë' ia'chinéajë' gubáz queë' Cristo.

Dios Bö' Lá'ayi ridisóalenë' légaquië'

2 Cate' chibidxín dza Pentecostés, nudúbigaquië' tsözxón yúgu'të bönni' ta'yéajlë'ë Cristo. ² Tsárido'os biyón bö le birúaj lúxriba, le biyón ca riyón cate' recja bö' budunu', ate' biyón iduté lu yu'u ga na' ró'ögaquië'. ³ Bulu'lu'í lahui yugu' bululu gu'ido' lu bö'ös lógaquië', ate' gula'guísi que queégaquië'. Bidisóalengaca tu tuë'. ⁴ Caní guca, Dios Bö' Lá'ayi bidisóalenë' yúgu'të', ate' gula'sí lógaquië' tu'ë didza' yúbölö, tsa naca le bë'ë Dios Bö' Lá'ayi que queë' gu'ë didza' yúbölö na'.

⁵ Nacu'ë zían bönni' judío yödzö Jerusalén dza na', nácagaquië' bönni' ta'yéaj ládxi'gaquië' Dios, en zá'gaquië' narúajgaquië' yúgu'të yödzö iduté yödzölió ni. ⁶ Cate' bila'yönnë' bö na', bulu'dubë' bönni' zían, ate' gula'bó'ë bönniga, tu' bila'yönnë', ca naca xtídza'gaquië' que queégaquië', tu'ë didza' bönni' na' ta'yéajlë'ë Cristo. ⁷ Gula'ná' badxë' yúgu'të', en bulu'bánninë, ta'nnë':

—Bulu'yútsöca'. ¿Naru' caléga bönni' Galilea yúgu'të bönni' ni tu'ë didza'? ⁸ ¿Nacxi caz naca riyóniru' tu'ë xtídza'ru' ca naca didza' ru'íru' tu turu'? ⁹ Rë'u ni nácaru' bönni' zían yödzö, bönni' narúajgaquië'

luyú Partia, en luyú Media, en luyú Elam,

en luyú Mesopotamia, en luyú Judea, en luyú Capadocia,

en luyú Ponto, en luyú Asia,

¹⁰ en luyú Frigia, en luyú Panfilia, en luyú Egipto,

en luyú Africa, ga nácarö zi'tu' ga dë luyú Cirene.

'Lësca' nacu'ë bönni' yödzö Roma ni. Bal-lë' nácagaquië' bönni' judío, en ia'bal-lë' nazí lu náagaquië' le ta'yéajlë'ë bönni' judío Dios. ¹¹ Lësca' nacu'ë ni yugu' bönni' narúajgaquië' Creta, en luyú Arabia. Riyóniru' tu'ë didza' ru'íru'

que queéru', ate' ta'guíxjò'ë yugu' le zxön benë' Dios, le tun ga rubániru'.

¹² Caní guca, bulu'báñinë yúgu'të', en gula'bó'ë böniga. Gulé luzá'agaquië' tuë' ia'tuté', ta'nné':

—¿Bizxi caz lë ni?

¹³ Bulu'titjë' bal-lë', ta'nné':

—¿Ta'zúdxinë'!

Libán benë' Pedro lógaca bönachi zían

¹⁴ Ní'irö Pedro guzuflenë' ia'chinéa-jë' gubáz na' nasól-lë'ë Cristo, ate' gusi lahuë' ru'ë zidzaj didza', rë' légaquië':

—¿Libí'ili', bönni' Judea, en yúgu'tëli' nacuá'ali' yödzo Jerusalén! ¿Lë ni ral-la' inózili'! ¿Buli'zé nágali' le guía' libí'ili'!

¹⁵ Netu' ni biti' rizúdxitu' ca na' réquili' libí'ili', tu' ni zóaru' si' gala' xsila, ate' cuntu nu rizudxi hora caní. ¹⁶ Lë ni naca le gunné' Joel, bönni' bë'ë didza' uláz queë' Dios, gunné':

¹⁷ Caní rnnë' Dios: Lë ni le gaca dza tsöjsétëgaca.

Isól-la'a Bö' Lá'ayi quia', tsöjsóalenë' yúgu'të bönachi.

Zxí'nili', bönni', en nigula, ilu'í'ibi' didza' uláz quia' neda'.

Yugu' bí'i ra'bán ila'lé'ebi' le ulu'a lahui, ate' yugu' bönni' gula ila'nenë' yëla.

¹⁸ Cate' idxín dza ni' quísia' Bö' Lá'ayi quia',

tsöjsóalenë' huen dxin quia', bönni', en nigula,

ate' ilu'ë didza' uláz quia' neda'.

¹⁹ Ulu'a lahui lúxhiba xitsá' le ilún ga ulu'bani bönachi,

ate' yödzólió ulu'a lahui le ilaca bë',

rön, en guí', en dzön ca böaj.

²⁰ Ichul-la gubidza, ate' gaca beo' xiná ca naca rön.

Caní gaca cate' idxín dza ni' chibulu'ë Dios.

Gaca dza ni' le catu caz rilé'eru'.

²¹ Ulu'lágaca yúgu'të nupa ni' ulu'lidza Lë' Xanru',

lu yöl-la' réajlë' quéguequi Lë'.

²² 'Buli'zé nágali' lë ni guía' libí'ili', bö-nachi Israel. Dios caz benë' bal Jesús, bönni' Nazaret ga zóali'. Dios bë'ë Lë' lataj benë' le tun ga rubániru', yugu' yöl-la' huáca, en le taca bë'. Yúgu'të lë na' benë' Dios lu në'ë Jesús, ca na' chinóz quézili'. ²³ Lësca' caní, Dios bë'ë lataj nu budödi Jesús lu ná'ali'. Caní guca, ca na' chigunná ládxe'ë Dios gunë', en ca naca le chibucözë' dza ni'te. Libí'í cázali' guzxönli'-në' Jesús, en bétili'-në' lu ná'agaquië' yugu' bönni' tuá' dö', bönni' gulútië' Lë' cate' ni' bulu'dá'gaquië' Lë' lë'e yaga cruz. ²⁴ Ní'irö Dios caz busubanë' Jesús na'. Bubéajë' Lë' lu yöl-la' guti, tu' cabí guca ugá'anë' tsaz lu yöl-la' guti na'. ²⁵ Ca naca lë ni, bë'ë didza' David uláz queë' Dios ca naca queë' Jesús, gunné':

Bilé'etiqui'sida'-në' Xanru', zoë' lahua'.

Lë' zoë' cuita lë'a ibëla, rizönë' neda',

para cabí gaca nu bi gun quia'.

²⁶ Que lë ni na' budzeja ládxa'a, ate' lu yöl-la' rudzeja quia' bil-la'.

Que lë ni na' guna' löza Lë'

cate' idxín dza gátia'.

²⁷ Xantu' Dios, nözda' biti' ucá'anu' neda' lataj chul-la ga nacuá' nupa nátigaca.

Biti' gu'u lataj initi idútë le naca'.

Naca' bönni' nadxf'i quézinu' Li'.

²⁸ Buzéajni'inu' neda' ca ral-la' guna'

para idéli'da' yöl-la' na'bán idü.

Gunu' ga udzëjada' tu' zóalen cazu' neda'.

²⁹ 'Na'a, libí'ili', bócha'a. Naca bë' gútië' xuz xtó'oru' David, en bigáchë'ë yeru ba, ate' ba queë' na' dë ga zóaru' ga ridxintë na'a dza. ³⁰ David na' bë'ë didza' uláz queë' Dios, en gunózinë'

benë' tsutsu Dios didza' le guzxf' lu në'ë queë', gunë' ga galjë' Cristo ladaj

dí'a dza queë' si' zá'gaca, ate' Cristo na' inná bë'ë xilatjë' David na'. ³¹ Tu'

bilé'enë' David lë ni zí'aló, bë'ë didza' ca guca, bubanë' Cristo, en ca guca, biti'

bugá'anë' lataj chul-la ga nacuá' nupa nátigaca, en biti' guniti le naca cazë'.

³²Dios busubanë' Jesús lu yöl-la' guti, ate' ca guca lë ni yúgu'tëtu' runtu' ba nalí que. ³³Caní guca, len yöl-la' huáca queë', Dios buchisë' Lë' xitsá' ga ni' nácatëre' zxon. Na'a, Cristo chigusól-lë'ë Dios Bó Lá'ayi ni, ate' raca ca na' guzxi' lu në'ë Dios gunë' lu në'ë Cristo, ate' Dios Bó Lá'ayi na' runë' yugu' lë ni rilé'eli', en riyónili'. ³⁴Biti' buëpë' David na' yehua' yubá, pero lë cazë' David na' gunné': Xanru' Dios gudxë' Xana':

Gurö'i cuita lë'a ibëla ga naca lo

³⁵cate' gunra' ga ulu'zechu zxfbigaca nupa ta'dá'baga' Li' lo' Li'.

³⁶'Na'a, bönachi Israel, ral-la' inózili' le nácatë. Dios benë' ga náquië' Lë cazë' Jesús ni Xanru', en Bönni' Rusólá, bönni' na' budá'ali'-në' lë'e yaga cruz.

³⁷Cate' yugu' bönni' ni' bila'yönnë' lë ni, gula'bö'ë böniga, ate' gulé' Pedro, en ia'zica'rë' bönni' gubáz queë' Cristo, ta'nnë':

—Bóchi'ru', ¿nacxi gúntsatu'?

³⁸Ní'irö Pedro gudxë' légaquië':

—Buli'bí'i ládxi'li', en guli'dila nisa tu tuli' lu Lë' Jesucristo para uniti lahuë' Dios dul-la' nabága'li', ate' Dios Bó Lá'ayi idisóalenë' libí'ili', Nu na' isól-lë'ë Dios. ³⁹Queéli' nequi le guzxi' lu në'ë Dios, en quégaca zxf'inili', enca' quégaca yúgu'të bönachi izá'a, yúgu'të bönni' ni' ulidzë' Xanru' Dios légaquië'.

⁴⁰Yugu' didza' ni, en ia'bal-la zían didza' benë' ba nalí Pedro, le guchizië' icja nágagaquië', gunné':

—Guli'gún ga uláli', irúajli' ládjegaca bönachi tuá' dö' nacuá' dza ni zóaru' na'a.

⁴¹Caní guca, gula'dila nisa nupa ni' gula'zi' lu në'eguequi didza' na' bë'ë Pedro. Dza na' ca chi uruá' gayuá' bönachi gulún légaquië' tuz. ⁴²Gulunë' yúgu'të idútë le bulu'sédinë' gubáz nasól-lë'ë Cristo légaquië'. Guláquië' tuz tuë' len

ia'túë', en gulahuë' tsözxón le rusá' ládxi-i'ru' ca gútië' Jesús, ate' gulunë' tsözxón, bulu'lidzë' Dios.

Ca tun bönachi queë' Cristo

⁴³Gulunë' gubáz queë' Cristo zían le run ga rubániru', en zían le taca bë', pero guladxi gula'dzöbi ia'zica'rö bönachi. ⁴⁴Yúgu'të nupa na' ta'yéa-jlë' Cristo gulaca tuz, ate' bulu'ún tuz yúgu'të le dë quéguequi. ⁴⁵Cate' bila'lé'enë' ta'yadzaj nupa nútsa'gaca lád-jagaquië', ní'irö yugu' bönni' bi dë qué-gaquië' gulúti'ë le, ate' gula'guísië' dumí na' que queégaca nupa ni' bi ta'yadzaj. ⁴⁶Bulu'dubë' tsözxón chila yudo' yugu' dza, ate' gulahuë' le rusá' ládxi'ru' ca gútië' Xanru'. Caní gulunë' gapa naca lu yu'u lídxigaquië'. Gulahuë' tsözxón, ate' bulu'dzéjanë', en gulaca idú ládxi-i'gaquië'. ⁴⁷Gula'gu'ë Dios yöl-la' ba, ate' yúgu'të bönachi gulún légaquië' bal. Buzanë' Xanru' nupa tu'dubi queë', nupa na' tu'lá tu tu dza.

Ruhuóáquië' tu bönni' biti' raca së'ë

3 Tu dza ni' gula'benë' Pedro, en Juan, sójáquië' tsözxón lu chila yudo', cate' tu'dubi bönachi tu'lidza Dios ni', le naca idú ridödi xihuó. ²Ga ni' ta'dödë' zoë' tu bönni' biti' raca së'ë dza ni'te ni' náquië' bí'ido'. Yugu' dza röjuá'gaquië' lë' ni', en ta'béquië' lë' ra' yudo' ga nazí' le Ra' Yu'u Lachi, para inábinë' nu bi unódz-jasö queë' ladaj nupa ni' ta'yaza lö'a yudo'. ³Bönni' ni, cate' bilé'enë' Pedro, en Juan, sójáquië' ta'yázië' lö'a yudo', gú-ta'yuë' lógaquië' bi ulu'nódzjasë' queë'. ⁴Ní'irö bulu'yúë' Pedro, en Juan lë', ate' Pedro gudxë' lë':

—Buyú netu'.

⁵Ní'irö bönni' na' buzëda' náguië' lé-gaquië' tu' runë' löza bi ulu'nódzjasë' queë'. ⁶Pedro gudxë' lë':

—Biti' dë dumí plata, dumí oro quia', pero le dësö quia' gunna' quiu'. Ni'a que

yöl-la' huáca que Lë' Jesucristo, bönni' Nazaret, guyasa, en guzë'e.

⁷Ní'irö gudélë'e Pedro në'e ibëla bönni' huë' na', en buchisë' lë', ate' la' böácatë ni'ë, en buguitaj bëchaj ni'ë bönni' na'. ⁸Ní'irö guzuínë' bönni' na', ate' guxítí'ë, en guzë'ë. Guyázalenë' tsözxón Pedro, en Juan, lö'a yudo', rizë'e ni'ë, en rixítí'ë, en rigu'ë Dios yöl-la' ba. ⁹Yúgu'të bönnachi nacuá' ni' ta'lë'e lë' rizë'e ni'ë, en rigu'ë Dios yöl-la' ba. ¹⁰Caní guca, guládxinë', en bulu'bánninë ca naca lë na' guca, tu' bulu'únbë'ë lë', náquië' bönni' na' ribö'ë ra' yudo' ga nazf'i le Ra' Yu'u Lachi, rinabë' nu bi unódzjasö queë'.

Didza' bë'ë Pedro chila yudo'

¹¹Tsanni ni' bönni' na' biti' guca së'ë, ate' böáquië', zönë' ná'agaquië' Pedro, en Juan, bulu'dubi yúgu'të bönnachi ga na' nacu'ë chila yudo' nazf'i le: Chila Queë' Salomón, ate' gula'ná' badxë'. ¹²Cate' bilé'enë' Pedro lë ni, gudxë' bönnachi na':

—Libí'ili', bönni' Israel, ¿bizx que rubánili' ca naca lë ni? ¿Bizx que ruyuli' netu', en réquitseli' nétu'sö buntu'-në' bönni' ni, en bentu' ga rizë'e ni'ë len yöl-la' huáca queéztu', o ni'a que le reaj ládxi'tu'-në' Dios? ¹³Naca lë ni le benë' Dios. Náquië' Dios que-gaquië' xuz gudödi queéru' Abraham, en Isaac, en Jacob. Lë cazë' bëntë're bal Jesús, Zxf'inë'. Jesús ni, libf'i cázali' bëtili'-në' lu ná'agaquië' bönni' ta'nná bé'enë' libf'ili'. Cate' gú'unnë' Pilato usanë' Jesús, gudá'baga'li'-në'. ¹⁴Buzóali' tsólá'alö Bönni' Tshui', en Lá'ayi, ate' gunábili'-në' Pilato usanë' queéli' tu bönni' rútië' bönnachi. ¹⁵Caní guca, bëtili'-në' Bönni' runna cazë' yöl-la' na'bán idú queéru'. Ní'irö Dios busubanë' Lë' lu yöl-la' guti, ate' ca naca lë ni runtu' ba nalí que. ¹⁶Tu' guyéajlë'ë bönni' ni Jesús, böáca ni'ë. Rilé'eli'-në', en núnbë'ëli'-në'.

Tu' réajlë'ë Jesús, Lë' bunë' dxí'ado' bönni' ni, ate' rilé'eli' yúgu'tëli' le nácatë na'.

¹⁷Na'a, bócha'a, nözda' benli' caní, bëtili'-në' Jesús tu' cabí guyéajni'ili', en biti' gula'yéajni'inë' bönni' ta'nná bé'enë' libf'ili'. ¹⁸Caní busudxinë' Dios didza' na' bë'ë zí'alö, le gula'nnë' bönni' gulu'ë didza' uláz queë' ca ra-la' qui'i sáquë'ë Cristo. ¹⁹Que lë ni na', buli'bfi ládxi'li', en buli'huóaca queë' Dios, para ugüë' dul-la' nabága'li', en gunë' ga huóaca ládxi'li'. ²⁰Ní'irö isól-lë'ë leyúbölö Jesús, Bönni' na' buzóë' dza ni'te para gáquië' Cristo, Bönni' Rö queë', Bönni' na' inná bé'enë' libf'ili'. ²¹Na'a, run bayudxi ugá'anë' yehua' yubá ni' cate' idxinrö dza uduhuénë' tshui' yúgu'të le raca, en gaca ca na' chigunná cazë' Dios, lë na' gula'nnë' bönni' gulu'ë didza' uláz queë', bönni' ni' gula'cu'ë dza ni'te. ²²Lësca' caní Moisés gudxë' xuz xtó'oru', gunné': "Xanru' Dios isól-lë'ë queéli' tu bönni' galjë' ládja-gaca di'a dza queéli'. Gáquië' bönni' gu'ë didza' uláz queë' Dios. Isól-lë'ë Lë' queéli' ca na' gusól-lë'ë neda'. Run bayudxi uzé' nágali'-në' ca naca yúgu'të le gufë' libf'ili'. ²³Yúgu'të nupa biti' ulu'zë' ná-gagaca bönni' ni' gu'ë didza' uláz queë' Dios ila'niti, en ulu'lá'alén bönnachi queë' Dios."

²⁴Ca naca dza ni zóaru' na'a, gula'guíxjö'ë yúgu'të bönni' gulu'ë didza' uláz queë' Dios ga gudéla'të zoë' Samuel, en gudödi ni'. ²⁵Libf'ili' nácali' zxf'ini xi'sóagaquië' bönni' gulu'ë didza' uláz queë' Dios, ate' nequi queéli' didza' rucá'ana tshui', le bënlenë' Dios xuz xtó'oru', cate' ni' gudxë' Abraham: "Ní'a que le gunë' zxf'ini xi'sú' ilaca bica' ba yúgu'të bönnachi yödzölió." ²⁶Cate' Dios busubanë' Zxf'inë' lu yöl-la' guti, gusól-lë'ë Lë' zí'alö queéli' para gunë' ga gácali' bica' ba, en ucá'anali' le cabí naca dxí'a runli'.

**Ta'dxinë' Pedro, en Juan lógaquië'
bönni' yudo' tu'chi'a tu'söröë'**

4 Tsanni ni' bönachi na' tu'ilenë' Pedro, en Juan, didza', yugu' bixúz judío, en yugu' bönni' yudo' saduceo, en bönni' ta'nná bé'enë' ni'a ná'agaquië' bönni' yudo', bila'dxinë' tsálido'os ga na' nacu'ë. ²Gula'lenë' bönni' ni tu' tu'sédinë' Pedro, en Juan, bönachi, en té' léguequi ulu'bán nupa chinátigaca tu' bubanë' Jesús. ³Nf'irö gula'zönë' Pedro, en Juan, ate' gula'gu'ë légaquië' lidxi guíë ga idxinrö dza yúbölö tu' chiridzó' dza na'. ⁴Zián nupa ni' bila'yöni didza' gulu'ë Pedro, en Juan, gula'yéajlë' Cristo. Na'a, yugu' bönni' bigu-iú'sö ta'yéajlë'ë Cristo ná'agaquië' idú chi-un gáyu'ë.

⁵Dza buropi ni', yugu' bönni' unná bé', en bönni' gula tu'zéajni'inë' bönachi judío, en yugu' bönni' yudo' usëdi, bulu'dubë' lu yödzo Jerusalén. ⁶Lësca' Anás, bixúz lo, en Caifás, en Juan, en Alejandro, enca' yúgu'të bönni' di'a dza quégaquië' bixúz lo bulu'dubë' ni'. ⁷Nf'irö duché'gaquië' Pedro, en Juan, ate' bulu'sudxinë' légaquië' gatsaj láhui'lö ga na' nacu'ë, en gula'nábinë' légaquië', ta'nnë':

—¿Bixzi yöl-la' unná bé' dë lu ná'ali' runli' lë ni? ¿Nuzxi budödi lu ná'ali' yöl-la' unná bé' ni?

⁸Nf'irö Pedro gudxë' légaquië', zóalenë' Dios Bö' Lá'ayi lë', rnnë':

—Libi'ili', nülöli' rinná bé'eli' netu', bönachi Israel, en libi'ili', bönni' gula. ⁹Na'a, ¿rinábitseli' netu' ca naca dxin dx-i'a bentu' queë' bönni' huë' ni, en nacxi guca, böáquië' bönni' ni? ¹⁰Riguíxjöi'itu' libi'ili' para ila'nözi yúgu'të bönachi Israel. Zoë' bönni' ni loli', nuhuóáquië' tu' ben dxin yöl-la' huáca queë' Jesucristo, bönni' Nazaret, Bönni' ni' budá'ali'-në' lë'e yaga cruz, pero Dios busubanë' Lë' lu yöl-la' guti. ¹¹Dios bé'ë didza' ca naca queë' Jesús ni, cate' ni' gunné': “Libi'ili',

bönni' rucuá'ali' zö'ö, gurú'unali' guió'j na', pero guró caza' neda' guió'j na' para gaca guió'jlen zö'ö.” ¹²Cúnturö nu zoa nu gaca usólá bönachi, tu' cabí zoa yödzüliö ni ia'túë' bönni' nuzóë' Dios, nu gaca usólá rë'u.

¹³Cate' bila'lé'enë' ná'agaquië' rugu ladxi' Pedro, en Juan, en gulé'quibe'enë' biti' nazédagaquië' que yudo', en ná'agaquië' bönni' cá'asö, bulu'bábinë', ate' yöjnéguequinë' Pedro, en Juan na', gula'cuá'lenë' Jesús. ¹⁴Lësca' bila'lé'enë' bönni' na' böáquië', zuínë' lógaquië', ate' biti' guca bi ila'nnë' quégaquië'. ¹⁵Nf'irö gula'nná bé'enë' nupa ulu'béaj légaquië' ló'alö yu'u ga na' nudúbigaquië', ate' gulún xtidzë'ë la' légacasë'. ¹⁶Gula'nnë':

—¿Nacxi gúntsaru' quégaquië' bönni' ni? Le nácatë' gulunë' tu le run ga tu'bani bönachi, ate' nózigaca yúgu'të bönachi nacuá' Jerusalén lë ni. Biti' gaca tá'bagaru' le. ¹⁷Na'a, para cabí sërö didza', en ila'yöni ziánrö ca' bönachi, uzeru' bach légaquië' para cabí ilu'ilenrë' bönachi didza' ca naca queë' Jesús na'.

¹⁸Nf'irö bulu'lidzë' Pedro, en Juan, ate' bulu'zenë' bach légaquië' para cabí ilu'ilenrë' bönachi didza', en para cabí ulu'sédinë' légaquië' ca naca queë' Jesús. ¹⁹Nf'irö bulu'bi'ë didza' Pedro, en Juan. Gulé' légaquië':

—Buli'chi'a buli'sörö libi'ili' channö naca tsahui' lahuë' Dios uzërö nágatu' xtí'dza'li' libi'ili' ca xtí'dzë'ë Dios. ²⁰¡Biti' gaca soa dxitu'! ¡Run bayudxi güf'itu' didza' que le bilé'etu', en le biyónitu'!

²¹Nf'irö yugu' bönni' yudo' tu'chi'a tu'söröë' bulu'zenë' bach légaquië', pero bulu'sanë' légaquië' tu' cabí gula'dzólinë' nacxi ilunë' légaquië' xíguia'. Cani gulunë' tu' guládxinë' le ilún bönachi lu yödzo ni', tu' ta'gú'u Dios yöl-la' ba ni'a que lë na' guca. ²²Bönni' na' böáquië', en guca queë' lë na' run ga rubániru', chiyú'urë' ca choá' iz.

Ta'nábinë' Dios gunë' ga ilácagaquië' rugu ladxi'

²³ Cate' bönni' yudo' bulu'sanë' Pedro, en Juan, bóajgaquië' ga na' nacu'ë luzá'agaquië', ate' bulu'siyönnë' légaquië' yúgu'të læ na' gula'nnë' yugu' bixúz unná bë', en bönni' gula tu'zéajni'inë' bönachi judío. ²⁴ Cate' bila'yönnë' læ ni, bulu'lidzë' Dios tsözxón, gula'nnë':

—Xantu' Dios, ¡zxöntëro nacu' Li'! ¡Li' nacu' Dios! ¡Benu' lúxiba! ¡Benu' luyú! ¡Benu' nísado'! ¡Benu' yúgu'të le nacuá' tu tu lataj na'! ²⁵ Uláz quiu' Li' bë'ë didza' David, bönni' huen dxin quiu', ni' zóalenë' Dios Bö' Lá'ayi læ', gunné':

¿Bizx que tun dzatsa bönachi, en ta'zá' ládxi'gaca le ruá' dö'?

²⁶ Yugu' bönni' ta'nná bë'ë yödzölió ni gulún dzatsë',

ate' guláquië' tuz bönni' unná bë'. Gula'dá'báguë'ë Xanru' Dios, enca' Cristo, bönni' guró cazë' Lë'.

²⁷ Le nácatë guláquië' tuz Herodes, en Poncio Pilato, en yugu' bönni' izá'a, en yugu' bönni' Israel lu yödzö ni. Gula'dá'báguë'ë Jesús, Zxí'inu' lá'ayi, Bönni' na' buzú' queëtu'. ²⁸ Gulunë' yúgu'të le bucözu' zí'atëlö, en guzxi' lu no'o, ate' guca ca na' benu' tsutsu xtídz'u'u ca ral-la' gaca. ²⁹ Na'a, Xantu', buyú le tu'zenë' bach netu', en ben ga gácatu' rugu ladxi', para güí'tu' xtídz'u'u, netu' bönni' huen dxin quiu'. ³⁰ Ben ga gaca úngacatu' nupa te'e, tu' sóalen yöl-la' huáca quiu' netu', en ben ga gaca gún-gacatu' le ilún ga ubánitu', en le ilaca bë'. Gaca caní tu' zóalenë' Jesús, Zxí'inu' lá'ayi, netu'. ¡Ca' gaca!

³¹ Cate' budxi bulu'lidzë' Dios, guzxi'zì lataj ga na' nacu'ë, ate' Dios Bö' Lá'ayi guzóalenë' yúgu'të, ate' len yöl-la' rugu ladxi' quégaquië' gulu'ë xtídzë'ë Dios.

Tu'únë' tuz le dë quégaquië'

³² Bönachi zían na' ta'yéajlë' Cristo, tuz ca ta'zá' ládxi'guequi, en tuz ca gulúngaca. Biti' gunné' nu bönni' nút-së'ë ládjagaquië' nequi queéze' le dë queë', pero bulu'únë' tuz le dë quégaquië'. ³³ Len yöl-la' huáca zön gula'guíxjö'ë gubáz na' nasól-lë'ë Xanru' Jesús ca bubanë' Lë', ate' le buzá' ládxi'ë Dios quégaquië' gúcalen yúgu'të'. ³⁴ Cuntu nu bi biyadzaj nu nutsa' lád-jagaquië'. Caní guca tu' yúgu'të bönni' zoa bi dë quégaquië', xiyúgaquië', o lídxigaquië', gulúti'ë le, ate' dumí que na' yöjuá'gaquië', ³⁵ en bulu'dödë' le lu ná'agaquië' gubáz na' nasól-lë'ë Cristo, ate' légaquië' gula'guísië' le que queé-gaca nupa bi biyadzaj quéguequi. ³⁶ Zoë' José ni, bönni' bulu'zóë' gubáz na' nasól-lë'ë Cristo ia'tú læ' Bernabé, le rnna lu didza' xidza', Bönni' Ruhué Tsáhuë'ë. Nabábalenë' zxi'ini xi'sóë Leví, en guljé' luyú Chipre. ³⁷ Béti'ë bönni' ni tu cö' xiyúë', ate' yöju'ë dumí que na', en budödë' le lu ná'agaquië' gubáz na' nasól-lë'ë Cristo.

Dul-la' gulunë' Ananías, en Safira

5 Tu bönni' yúbölö læ' Ananías, béti'ë tu cö' xiyúë'. Safira, nigula queë', bennu tsözxón læ'. ² Ananías na' bucachi' lanë' late' dumí que yu na', ate' nózinu ca' nigula queë'. Le bugá'anasö yöju'ë, en gulu'ë le lu ná'agaquië' gubáz nasól-lë'ë Cristo. Rnnë':

—Tsca nisö guzxi'a.

³ Pedro gudxë' læ':

—Ananías, ¿naru' guyázatsö Satanás tu' xihui' lu icja ládxi'do'o, en ben ga rizí' yé'enu' Dios Bö' Lá'ayi, ate' bu-cachi' lanu' late' dumí que xiyú' na'? ⁴ Tsanni ni' nagá'ana yu na' lu no'o, ¿naru' cabí nequi quez quiu'? Gudödi béti'u le, ¿naru' cabí dë caz lu no'o dumí que na'? ¿Bizx que guró'ö icju' gunu'

caní? Dios caz guzxi' yé'enu', calégasö bönachi.

⁵⁻⁶ Cate' biyönné' Ananías didza' ni, gudzö'ë, en gütité'. Ní'irö gula'bíga'tébi' bí'i ra'bán, ate' bulu'chólibi' lé' lari', en guluá'abi' lé', en yöjéachi'gacabi' lé'. Guladxi gula'dzöbi yúgu'té nupa ni' bila'yöni ca guca lé ni.

⁷ Ca tsonna hora gudödi ni', bidxinnu nigula queé' Ananías na' ni', en biti' nözinu lé na' guca queé' bönni' queénu.

⁸ Ní'irö Pedro gudxé'-nu:

—Gudíxjöi' neda'. ¿Naru' guzxi'ili' tscá nisö xiyuli' na'?

Gunnánu:

—Ön, tscá nisö guzxi'itu'.

⁹ Ní'irö Pedro gudxé'-nu:

—¿Bíx que ben tuz xtídzá'li' guzxi' bé' xíhú'li' Dios Bö' Lá'ayi? Buyútsöca'. Chizóa ulu'dxinbi' yugu' bí'i bulu'cáchi'bi'-né' bönni' quiu', ate' ulu'béajbi' ca' li'.

¹⁰ Ní'irö la' gudzó'ténu xini'ë Pedro, en gütiténu. Cate' gula'yázabi' bí'i ra'bán na', gula'lé'ebi'-nu chinátinu. Ní'irö bulu'béajbi'-nu, en yöjéachi'gacabi'-nu cuita lé'ë bönni' queénu. ¹¹ Que lé ni na' guladxi gula'dzöbi yúgu'té bönachi queé' Dios, ate' guladxi ca' yúgu'té nupa bila'yöni ca guca lé ni.

Tuné' bönni' gubáz nasól-lé'ë Cristo le taca bé'

¹² Guluné' bönni' gubáz na' nasól-lé'ë Cristo zían le taca bé', en zían yöl-la' huáca zxon lógaca bönachi lu yödzö. Yúgu'té' bulu'dübé' tsözxón ga naca chila yudo' naz'i le Chila Queé' Salomón.

¹³ Ladaj nupa ni' biti' ta'yéajlé' Cristo, cuntú nu burugui tsöjtá' légaquié', ate' bönachi lu yödzö ni' gulún légaquié' bal. ¹⁴ Ní'irö ia'bal-la bönachi zían ca' gula'yéajlé' Cristo, bönni', en nigula.

¹⁵ Cate' bila'lé'e bönachi yugu' le tuné' bönni' ni' ta'yéajlé'ë Cristo, yöjuá'agaca nupa te'e gapa naca la' nöza, ate' gu-

la'xóë' léguequi lu da'a yaga, en ia'bal-la lu dá'asö, para cate' tödë' ni' Pedro, tsa zxúl-lasö queé' cu'u zxul-la bal-la bönachi hué' na', para ulu'huóaca.

¹⁶ Lésca' bila'rúaj bönachi yugu' dzaga yödzö, en bila'dxín Jerusalén, nuá'agaca nupa te'e, en nupa ta'gu'í ta'zaca' tu' yú'ugaca bö' xihui' léguequi, ate' bulu'huóaca yúgu'té'guequi.

Bönni' yudo' ta'bía ládxi'gaquié' bönni' gubáz nasól-lé'ë Cristo

¹⁷ Que lé ni na' bixúz lo, en bönni' yudo' saduceo na' dá'gaquié' bixúz lo, bulu'zxé'ené' Pedro. ¹⁸ Ní'irö bixúz lo na', en bönni' na' dá'gaquié' lé' gula'zöné' gubáz na' nasól-lé'ë Cristo, ate' gula'gu'ë légaquié' lidxi guíë. ¹⁹ Ní'irö bidxiné' gubáz lá'ayi queé' Xanru' chí'i dzó'ölö, ate' gusaljé' lidxi guíë na', en bubéajé' légaquié'. ²⁰ Gubáz lá'ayi na' gudxé' légaquié', rnné':

—Gulí'tséaj, gulí'tsöjsóa chila yudo', en gulí'tsöjé'len bönachi ni' didza', quíxjöi'ili' légaquié' ca naca yöl-la' na'bán idú ni, en ca gaca ila'déliné' le.

²¹ Cate' bila'yönné' didza' ni ru'ë gubáz lá'ayi na', gula'yázié' chila yudo' cate' za' rení' zflado', en bulu'sédiné' bönachi.

La' ní'isö bulu'dübé' bixúz lo, en nupa nacué'len lé' tsözxón, len bönni' yudo' tu'chi'a tu'söróé', en bönni' gula tu'zéajni'iné' bönachi Israel, ate' gula'sól-lé'ë nupa tsöjaca lidxi guíë para tsöjxi'gaquié' yugu' gubáz na' nasól-lé'ë Cristo, tu' téquiné' ni' nacu'ë lidxi guíë na'.

²² Cate' ní'a ná'agaquié' bönni' yudo' na' bila'dxiné' ni', biti' yöjxáca'gaquié' légaquié' lu yu'u lidxi guíë na', ate' ní'irö bulu'huóajé' tsöjtíxjö'gaquié' ca'. ²³ Gulé' bönni' yudo' tu'chi'a tu'söróé' na', ta'nné':

—Le nácaté yöjxáca'tu' nayáyajté lidxi guíë, ate' nacuá' nupa tun chí'i ra' lidxi guíë na', pero cate' gusalajtu', cuntú nu yöjxáca'tu' lu yu'u na'.

²⁴ Cate' bixúz lo, en yugu' bixúz unná bé', en bönni' nacuá' lu në'ë ni'a ná'agaca bönachi yudo', bila'yönnë' didza' ni, gula'bó'dë'ë böniga tu' cabí nóziguequinë' bizxi guntë læ na' raca. ²⁵ Ní'irö bidxinë' tu bönni' ni', en gudíxjö'i'në' légaquië', rnnë':

—Buli'yútsöca'. Yugu' bönni' na' gulú'ugacali'-në' lidxi gufé nacu'ë chila yudo' tu'sédinë' bönachi.

²⁶ Ní'irö guyijë' bönni' na' rinná bé'enë' ni'a ná'agaca bönachi yudo', dzágagaquië' læ' ni'a ná'agaquië' na', ate' gula'ché'ë yugu' gubáz na' nasól-lë'ë Cristo, pero biti' bi gulunë' quégaquië', tu' guládxinë' ulu'ladxi bönachi nacuá' ni' légaquië' guió'j.

²⁷ Cate' chinaché'gaquië' yugu' gubáz na', bulu'sudxinë' légaquië' lógaquië' bönni' yudo' tu'chi'a tu'söröë' na', ate' bixúz lo gunábinë' légaquië', rnnë':

²⁸ —¿Naru' cabí gúdxida'atu' libí'ili' biti' usédili' bönachi ca naca queë' bönni' na'? Na'a, chigudísili' xibá ni idútë yödzo Jerusalén, en ré'ënilí' usubága'li' netu' xíguia' tu' nözi yöl-la' guti queë' bönni' na'.

²⁹ Ní'irö bulu'bi'ë didza' Pedro, en ia'zícá're' gubáz na' nasól-lë'ë Cristo, ta'nnë':

—Run bayudxi uzërö nágatu' xtídzë'ë Dios ca xtídzá'gaca bönachi. ³⁰ Libí'ili' bétili'-në' Jesús cate' ni' budá'ali'-në' læ'e yaga cruz, pero Dios quégaquië' xuz xtó'oru' busubanë' Lë'. ³¹ Jesús ni, Dios buzóa cazë' Lë' ga nayépisëtërë' cuita læ'ë ibëla, para gáquië' Bönni' Lo, en Bönni' Rusólá, en gunë' ga ulu'bf'i ládxi'gaca bönachi Israel, para gaca uniti lahuë' dulla' nabága'gaquië'. ³² Ca naca læ ni, runtu' netu' ba nalí que, ate' læsca' runë' Dios Bö' Lá'ayi ba nalí que, Bö' na' risól-lë'ë Dios quégaca nupa tun ca rna xtídzë'ë.

³³ Cate' bila'yönnë' bönni' yudo' tu'chi'a tu'söröë' na' læ ni, gula'lenë', en gulé'ënnë' ilútië' légaquië'. ³⁴ Ní'irö

guzuínë' tu bönni' yudo' ruchi'a rusöröë' lógaquië', læ Gamaliel, tu bönni' yudo' fariseo. Rácadë'ë bönni' ni xibá queë' Moisés, ate' yúgu'të bönachi tun læ' bal. Gudxë' nupa na' ulu'béaj yugu' gubáz na' nasól-lë'ë Cristo ló'alö tu chí'ido'. ³⁵ Ní'irö gudxë' bönni' yudo' tu'chi'a tu'söröë' na', gunné':

—Libí'ili', bönni' Israel, buli'yutëz queéli' ca naca le ré'ënilí' gunli' quégaquië' bönni' ni. ³⁶ Ral-la' tsójnéli' ca guca z'atëlö cate' si' idxín dza ni zóaru' na'a. Birúajë' Teudas, ate' ben cuinë' ca tu bönni' nayépisëtërë'. Guláquië' bönni' yójtá'gaquië' læ' idú tapa gáyu'ë bönni'. Yugu' bönni' rójáquië' gudil-la gulútië' læ', ate' gulásilasi yúgu'të nupa ni' yójtá'gaca læ', ate' gunítisö ca' yúgu'të le benë' bönni' na'. ³⁷ Gudödi guca læ ni, birúajë' ca' Judas, tu bönni' Galilea. Benë' caní cate' ni' gula'yú'u lu guichi bönachi ta'guíxaj lázagaquië', ate' yójtá'gaca bönachi zían læ'. Lësca' gulútië' bönni' ni, ate' gulásilasi yúgu'të nupa ni' yójtá'gaca læ'. ³⁸ Que læ ni na' rea' libí'ili': Guli'sán-gaquië' bönni' ni, en biti' bi gunli' quégaquië'. Channö naca quégacasö bönachi læ ni ta'nnë' o læ ni tunë', initi caz, ³⁹ pero channö naca queë' Dios, biti' gaca usunítíli' le. ¡Buli'yú cuinli' cabí tíl-lalenli'-në' Dios!

⁴⁰ Ní'irö gulunë' tuz didza' len læ'. Bulu'lidzë' yugu' gubáz na' nasól-lë'ë Cristo, ate' gula'guínë' légaquië', en bulu'zenë' légaquië' bach para cabirö iluf'ilenë' bönachi didza' ca naca queë' Jesús. Ní'irö bulu'sanë' légaquië'. ⁴¹ Bila'rúajë' gubáz na' nasól-lë'ë Cristo lógaquië' bönni' yudo' tu'chi'a tu'söröë' na'. Tu'dzéjanë' tu' bë'ë Dios légaquië' lataj gula'gu'fi gula'záquë'ë tu' dá'gaquië' Jesús. ⁴² Yugu' dza bulu'séditiqui'sinë' bönachi, en gulunë' libán queë' Jesucristo lu chila yudo', en gapa naca lu yu'u lídxigaca bönachi.

**Ta'bólë' gadxi bönni' para
ilácalenë' bönnachi queë' Cristo**

6 Dza ni', tu' gula'yán bönnachi ta'yéajlë' Cristo, yugu' bönni' judío tu'ë didza' griego gula'nnë' quégaquië' bönni' judío tu'ë didza' hebreo tu' nözi le raca cate' ta'guísië' le ilágunu nigula uzëbi, tu' cuntu nu rufi le ilágunu nigula uzëbi quégaquië' bönni' ni' tu'ë didza' griego. ²Ní'irö idxínnutë' bönni' gubáz na' nasól-lë'ë Cristo bulu'tubë' yúgu'të bönnachi ni' ta'yéajlë' Cristo, ate' të' légaquië':

—Biti' naca dxi'a soa dxitu', en cabí guntu' libán que xtídzë'ë Dios, para guntu' dxin cú'utu' le ilágugaca bönnachi. ³Que lë ni na', böchi' luzá'atu', guli'cö gadxë' bönni' ladjali', para ugú'uru' lu ná'agaquië' dxin ni. Yugu' bönni' na' run bayudxi ilácagaquië' bönni' tun yúgu'të bönnachi légaquië' bal, en náca-gaquië' bönni' ta'yéajni'i, en naca bë' Dios Bö' Lá'ayi zóalenë' légaquië'. ⁴Netu' ni ulídzatica'stu'-në' Dios, en uséditu' bönnachi xtídzë'ë Dios.

⁵Yúgu'të' gula'yaza ládxi'gaquië' didza' ni, ate' gula'bólë' Esteban, tu bönni' réajlë'ë Cristo idú ládxe'ë, en zóalenë' Dios Bö' Lá'ayi lë'. Lësca' gula'bólë' Felipe, en Prócoro, en Nicanor, en Timón, en Parmenas, en Nicolás, bönni' yödzö Antioquía, bönni' z'f'aló butsé'ë ca runë' para tseaj ládxe'ë Dios ca tunë' yugu' bönni' judío. ⁶Ní'irö bulu'sudxinë' bönni' na' gula'bólë' lógaquië' gubáz na' nasól-lë'ë Cristo. Yugu' bönni' gubáz na' gula'xóa ná'agaquië' légaquië', ni' tu'lidzë' Dios.

⁷Guzërö xtídzë'ë Xanru', ate' gula'yanda' bönnachi ta'yéajlë' Cristo nacua' Jerusalén. Lësca' zían bixúz judío gula'zi' lu ná'agaquië' le réajlë'ëru' Cristo.

Ta'zönë' Esteban

⁸Esteban na' benë' le tun ga rubániru', en yugu' le taca bë' lógaca bönnachi lu yödzö, zóalen yöl-la' huáca queë' Dios lë' le buzá' ládxe'ë queë'. ⁹Ní'irö gula'yasë' bal-lë' bönni' nabábagaquië' yu'ga tu'dubë' bönni' judío, en tu'sédë' queë' Dios, naz'fi le Yu'u Quégaquië' Bönni' Nadzángaquië'. Bönni' narúajgaquië' yödzö Cirene, en yödzö Alejandría, en luyú Cilicia, en luyú Asia, gulunë' légaquië' tsözxón. Bönni' ni gula'díl-lalenë' Esteban didza'. ¹⁰Biti' guca tá'baga-gaquië' didza' ru'ë Esteban na', tu' bë'ë didza' len yöl-la' réajni'i, tu' zóalenë' Dios Bö' Lá'ayi lë'. ¹¹Ní'irö gula'guíxjë' bönni' ila'zi' yë'ë, ila'nnë': "Netu' biyónitu' didza' ru'ë Esteban ni, rnnë' zi'ë queë' Moisés, en queë' Dios." ¹²Caní guca, bönni' ni gula'gu'ë xilá ládxi'gaca bönnachi, tsözxón len bönni' gula tu'zéajni'inë', en yugu' bönni' yudo' usëdi. Yúgu'të bönni' ni gula'bía di'ë Esteban na'. Gula'zönë' lë', en gula'ché'ë lë' lógaquië' bönni' yudo' tu'chi'a tu'söröë'. ¹³Lësca' bulu'cu'ë lógaquië' nupa gula'guíxjö' le cabí nácatë, bönni' na' gula'nnë':

—Biti' zoë' dxisö bönni' ni rnnë' zi'ë que yudo' lá'ayi ni, en que xibá queë' Dios. ¹⁴Biyónitu' didza' bë'ë bönni' ni ca gunë' Jesús, bönni' Nazaret, rnnë' usunítië' yudo' ni, en utsé'ë yugu' le nalébiru' runru', yugu' lë na' gunná bë'enë' Moisés rë'u.

¹⁵Ní'irö bönni' yudo' tu'chi'a tu'söröë', en yúgu'të nupa ró'gaca ni' bulu'yúë' Esteban, ate' bila'lé'enë' lahuë', rna' ca rna' lahuë' tu gubáz lá'ayi queë' Dios.

**Didza' bë'ë Esteban,
le gunné' uláz queë'**

7 Ní'irö bixúz lo gunábinë' Esteban na', rnnë':

—¿Naru' nácatë caní?

²Bubi'ë didza' Esteban, rnnë':

—Libí'ili', bönni' gula, en libí'ili', bócha'a. Buli'zé nágali' le guía' libí'ili'. Dios, Bönni' nayépisëtèrë', buluf'i lahuë' ga zoë' Abraham, xúziru' gudödi, cate' ni' zoë' luyú Mesopotamia, cate' si' tsöjsóë' yödzo Harán. ³Dios gudxë' lë: "Birúaj ladzu', en bulá'alen dí'a dza quiu', ate' guyéaj luyú ni' uluf'ida' li'." ⁴Ní'irö birúajë' Abraham luyú Mesopotamia le naca xiyúgaca bönachi Caldea, ate' yöjsóë' yödzo Harán. Lu yödzo ni' gútië' xuzë' Abraham na', ate' lë' buzé'ë ni', ate' Dios guché'ë lë' luyú ga ni' zóaru' na'a. ⁵Dios biti' bë'ë lë' lataj guequi queë' luyú ni. Calëga láti'sö bunödzejë' queë' ga soë' luyú ni, pero guzxi' lu në'ë Dios unödzejë' queë' luyú ni, ate' tödi gátie' Abraham guequi luyú ni quegaca zxf'ini xi'sóë', sal-la' biti' nacuf'inibi' bi'i queë'. ⁶Lësca' caní Dios gudxë' Abraham: "Tsöjajúie' zxf'ini xi'sú' lu xiyúgaca bönachi izá'a, ate' ni' ilácagaquie' ca bönachi zi'tu'. Ilunë' bönni' luyú ni' ga ilácagaquie' zxf'ini xi'sú' bönni' nadó'ogaquie'. Ulu'saca' zi'ë légaquie' idú ca tapa gayuá' iz." ⁷Lësca' Dios gudxë' lë: "Neda' uzötja' bönachi luyú ni', ga ni' ilácagaquie' zxf'ini xi'sú' bönni' nadó'ogaquie', ate' tödi ni' ulu'rúajë' ni', ate' ilunë' xichina' luyú ni." ⁸Dios bënlenë' Abraham tu didza' rucá'ana tsahui', en gunná bé'enë' lë' ichúguie' lu xipéla'gaquie' bönni' biguiú' nacu'ë lidxë' tu le gaca bë' nazí' lu ná'agaquie' didza' na' rucá'ana tsahui'. Gudödi ni' gúquie' Abraham xúzibi' bi'i Isaac, en cate' chigúquibi' xunu' gubidza, guchúguie' lu xipéla'bi' lë na' naca bë'. Isaac na', lësca' caní benë' queébi' bi'i Jacob, zxf'inë', en caní benë' ca' Jacob quegaca idxinnutëbi' bi'i bönni' queë', nupa ni' gulaca xuz xtó'ogaca idxinnu cö' bönachi Israel.

⁹Yugu' xuz xtó'oru' na', lu yölla' ruzxé' quegaquie', gulúti'ë-bi' bi'i

José, bóchi'gaquie', lu ná'agaquie' bönni' ni' gulúti'gaquie'-bi' luyú Egipto. Dios guzóalenë'-bi' bi'i José na' ¹⁰en busölé'-bi' lu le gulaca queébi'. Dios bë'ë-bi' yölla' réajni'i, le ben ga guyaza ládxë'ë-bi' Faraón, bönni' rinná bé'enë' bönachi Egipto, ate' Faraón na' budödë' lu ná'abi' bi'i José yölla' unná bë' para gunná bé'ë-bi' bönachi luyú Egipto, en yúgu'të bönachi nacua' lidxë' Faraón na'.

¹¹Ní'irö gúcada' gubín idú luyú Egipto, en luyú Canaan ni, ate' gula'gu'í gula'zaca' yúgu'të bönachi dza ni'. Biti' bidzöli le ilahuë' xuz xtó'oru'. ¹²Cate' biyönnë' Jacob dë zxoá' xtila luyú Egipto, gusól-lë'ë yugu' zxf'inë', bönni' ni' nácagaquie' xuz xtó'oru', luyú ni'. Caní guca le z'falö luzuí yöjáquie' ni'. ¹³Cate' le buropi luzuí yöjáquie' luyú Egipto, benë' José ga bulu'únbë'ë bóché'ë lë'. Caní guca, gunózinë' Faraón nupa nácagaca dí'a dza queë' José. ¹⁴Ní'irö gusól-lë'ë José didza', en benë' ga bidxinë' Jacob, xuzë', luyú Egipto, ate' dzágagaca dí'a dza queë' lë'. Gulaca idú tsónnalalaj yu' chinu bönachi. ¹⁵Caní guca, bidxinë' Jacob luyú Egipto, ga ni' gútië' lë', ate' gulátie' ca' xuz xtó'oru' luyú ni' cate' bizá'a dza que queégaquie'. ¹⁶Cate' gulátie' tu tu xuz xtó'oru', zxf'ini xi'sóagaquie' yöjuá'agaquie' légaquie' luyú Siquem, ate' ni' bulu'cáché'ë légaquie' yeru ba lu zxan bulóaj na' gú'uë' Abraham lu ná'agaca zxf'inë' Hemor, bönni' Siquem na'.

¹⁷Gudödi zían iz, cate' bidxín dza ralla' gaca le guzxi' lu në'ë Dios, lë na' benë' tsutsu xtídzë'ë gunë' queë' Abraham, gula'yán bönachi yugu' cö' Israel, ate' gulaca bönachi zían cate' ni' gula'cuá' luyú Egipto. ¹⁸Ní'irö guyázië' bönni' yúbölö gunná bë'ë luyú Egipto na', en catu caz biyönnë' ca naca le benë' José, gúcalenë' bönachi Egipto. ¹⁹Bönni' unná bë' na' bi'ë dö' quegaca bö-

nachi uládz queéru'. Busaca' zi'ë yugu' xuz xtó'oru' na', en bené' ga bulu'sané'-bi' bi'i bönni' hué'enido' que queé-gaquié', para ilátibi'. ²⁰ La' dza ní'isö gúl-jabi' ca' b'ído' Moisés, ate' Dios guyaza ládxé'ë-bi'. Xuz xiná'abi' bulu'sculé'-bi' lídxigaquié' idú ca tsonna beo'. ²¹ Cate' bidxín dza ulu'sané'-bi' xuz xiná'abi' para gátibi' b'ído' Moisés na', bidxinnu nigula xzí'iné' Faraón ga ni' bulu'cá'ané'-bi', ate' yöjzxi'inu-bi', en buscúlunu-bi' ca bi'i que cázanu. ²² Caní guca, bizéd-abi' bi'i Moisés yúgu'té le táquié' bönni' Egipto, en gúcatèröbi' xzön ca naca didza' bé'ëbi', en ca nácgaca le benbi'.

²³ Cate' Moisés na' chiyú'ubi' choá' iz, gunná ládxí'bi' tsöjyubi' bönachi uládz queébi', bönachi Israel. ²⁴ Cate' bidxinbi' ga na' nacué', bilé'ëbi'-nè tu bönni' Egipto, rusaca' zi'ë tu bönni' uládz queébi'. Ní'irö gúcalenbi'-nè bönni' uládz queébi' na', en bétibi'-nè bönni' Egipto na'. Caní guca, buzí labi' bi'i Moisés bönni' na' uláz queé' bönni' uládz queébi'. ²⁵ Gúquibi' Moisés huala'yéajni'iné' bönni' bóchi'bi' guné' Dios ga usólábi' lè cázabi' légaquié', pero légaquié' biti' gula'yéajni'iné'. ²⁶ Ia'tú dza ca' yöjxáca'bi' ia'chopë' bönni' Israel, ta'dil-lé', ate' gú'unibi' cuéqui dx-ibi' légaquié', en gúdxibi' légaquié': "Libí'ili', bóchi'li' naca. ¿Bizx que ruá'alí luzá'alí dö?" ²⁷ Ní'irö bönni' na' ru'ë dö' que luzé'ë budxígué'ë-bi' bi'i Moisés, gunné': "¿Núzxitè buzóa li' para inná bé'enu' netu', en uchi'a usöröu' le runtu'?" ²⁸ ¿Naru' ré'ëntsenu' gútiu' ca' neda' ca benu' néaje, bétiu'-nè bönni' Egipto na'?" ²⁹ Cate' Moisés biyónibi' didza' ni, buzúnnajbi' ni', en yöjsóabi' luyú Madián ga ni' guzóabi' ca tu bönni' zítu'. Luyú Madián na' butsga ná'aleni' nu nigula lu yödzö ni', ate' gúl'jagacabi' chópabi' bi'i bönni' queé'.

³⁰ Cate' chigudödi choá' iz zoé' ni', bulu'í lahué' tu gubáz lá'ayi queé' Dios ga

zoé' lu guí' que yaga yótsi'do' régui, ga ni' naca lu lataj cá'asö, le rö'ö ra' guí'a nazí'i le Sinái. ³¹ Cate' Moisés bilé'ené' guí' na', bubáininé', ate' gubígui'ë gala' para ilé'ené' dxi'a, ate' biyönné' chi'ë Xanru'. ³² Caní gudxé' Xanru' lè: "Neda' naca' Dios queégaquié' xuz xtó'o. Naca' Dios queé' Abraham, en Dios queé' Isaac, en Dios queé' Jacob." Ní'irö lu yölla' radxi queé', guzxízidé'ë Moisés, en bíti'rö burúguiné' uyúé'. ³³ Xanru' gudxé' lè: "Guléaj xirachu' nudó'o, tu' naca lá'ayi ga ni zu' tu' zoa caza' neda', Dios, ni. ³⁴ Le nácatè chibilé'eda' le ta'guí'i ta'zaca' bönachi quia' nacué' luyú Egipto, en chibiyönda' ta'bödxi yeche'. Bötja', zoa' ni para usólá' légaquié'. Gudá na'a, isól-la'a li' luyú Egipto."

³⁵ Sal-la' bönni' uládz queé' Moisés, bulu'cá'ané' lè cá'asö, gula'nné': "¿Núzxitè buzóa li' para inná bé'enu' netu', en uchi'a usöröu' le runtu'?" Dios gúsól-lé'ë lè' para gáquié' bönni' unná bé', en bönni' rusólá, ca na' gubáz lá'ayi na' queé' Dios gudxé' Moisés, cate' bulu'í lahué' lu yaga yótsi'do' régui ga na' zoé'. ³⁶ Moisés ni bubéajé' bönni' uládz queéru' luyú Egipto. Guca caní gudödi bené' le gulún ga bulu'bani bönachi ni', en le taca bé' bené' luyú ni'. Lësca' caní bené' lu nísado' nazí'i le Nísado' Xiná. Caní bené' lógaquié' idú ca choá' iz lu lataj cá'asö. ³⁷ Lè cazé' Moisés na' gudxé' bönachi Israel ni', gunné': "Xanru' Dios isól-lé'ë queéli' tu bönni' galjé' ladaj dí'a dza queéli', ate' gáquié' bönni' gu'ë didza' uláz queé' Dios. Isól-lé'ë lè' queéli' ca na' gúsól-lé'ë neda'. Lè cazé' run bayudxi uzé' nágali'-nè'." ³⁸ Lësca' lè cazé' Moisés na' guzóalené' bönachi nudúbigaca queé' Dios lu lataj cá'asö, ate' gudzáguié' gubáz lá'ayi queé' Dios lè', Nu na' bé'len lè' didza' lu guí'a Sinái na'. Moisés na' guzóalené' xuz xtó'oru', ate' Dios budödé' lu nè'ë xibá lá'ayi queé', le ruí' didza' ca gaca ila'deli' bö-

nachi yöl-la' na'bán, ate' budödë' Moisés xibá ni lu ná'agaca zxf'ini xi'sóagaquië' ga ridxintë queëru' rë'u.

³⁹Biti' gulé'ënnë' xuz xtó'oru' ilunë' ca rna xtádzë'ë Moisés, pero bulu'zóë' lë' tsólá'aló, en gulé'ënnë' tsójhuójgaquië' luyú Egipto. ⁴⁰Cate' ni' zoë' Moisés na' lu gu'á Sinaí na', légaquië' gulé' Aarón, böchë'ë Moisés na', gula'nnë': "Ré'ëni-tu' gunu' yugu' dios queëtu', tu budó' guíë', para tsójnórugaca lotu'. Biti' nöz-tu' bi guca queë' Moisés, bönni' na' nubéajë' netu' luyú Egipto." ⁴¹Ní'irö gulunë' tu budó' oro le naca ca tu bédxi-do', ate' gulútië'-ba' bö'cu' zxf'la'do', en gulú'ugaquië'-ba' lo budó' oro na', ate' gulunë' laní lo budó' na' núnagaquië'.

⁴²Que lë ni na' Dios buca'anë' légaquië', en guléaj ládxe'ë légaquië'. Ní'irö gula'yéaj ládxi'gaquië' yugu' le ta'yëpi lúzx-iba. Ca naca lë ni nazúaj lu guichi le gula'nnë' bönni' gulu'ë didza' uláz queë' Dios, le rna:

Lib'í'ili', bö'nachi Israel,
¿naru' gulú'ugacatsali'-ba' quia' neda'
böa' bédxi ni'
bétigacali'-ba', en buzégui'gacali'-ba',
lë na' benlí lu lataj cá'asö idú ca choá'
iz?

⁴³Biti' gulú'ugacali'-ba' quia' neda',
pero biá'ali' le nequi que Moloc, budó'
guió'j queé'li'.

Biá'ali' ca' tu le naca ca bö'la'j lúzxiba
nazí'i le Refán,
lë na' buzóali' ca dios queé'li'.
Yugu' budó' guió'j budó' yaga ni,
la' lib'í'isili' benlí para guyéaj ládxi'li'
léguequi.

Que lë ni na', ubéaja' lib'í'ili' lu xiyuli',
en ichë'a lib'í'ili' zí'tu'rö ga dë luyú
Babilonia.

⁴⁴'Cate' ni' gula'cu'ë xuz xtó'oru' lu
lataj cá'asö, guta' quégaquië' yu'u lari'
na' ga gulún chi'ë xibá queë' Dios, lë na'
naca bë' Dios caz zóalenë' légaquië'. Gu-
lunë' tu yu'u lari' na' ca na' Dios gunná

bé'enë' Moisés, cate' ni' gudxë' lë' gunë'
le ca naca lë na' bilé'enë', le bulu'ínë'
Dios lë' lu gu'á ni'. ⁴⁵Lësca' bulu'dödë'
yu'u lari' na' lu ná'agaquië' zxf'inigaquië'
ga bidxintë dza ni' gulu'ë xuz xtó'oru'
le luyú ni, cate' ni' dzáguië' Josué lé-
gaquië', ate' gula'gúë' xiyúgaca bö'nachi
izá'a, nupa ni' bulágui'ë Dios lógaquië'
xuz xtó'oru'. Caní gulunë' zían iz ga
bidxintë dza zoë' David. ⁴⁶Dios guyaza
ládxe'ë David na', ate' lë' gunábinë' Dios
gu'ë lë' lataj gunë' tu yu'u ga soë' Dios
queë' Jacob. ⁴⁷Biti' bë'ë Dios lë' lataj,
ate' Salomón, zxf'inë' David na' benë'
yu'u queë' Dios. ⁴⁸Caní benë' sal-la' bití'
zoë' Dios, Nu nácatë'rö lo, tu lu yudo'
núngaca bö'nachi. Ca naca lë ni gunné'
tu bönni' bë'ë didza' uláz queë' Dios,
gunné':

⁴⁹Yehua' yubá naca ga rö'a rinná bë'a,
ate' yödzólió naca xilibi ni'a.

Rnnë' Xanru': "¿Naru' gúntsali' tu yu'u ga
soa'?

¿Naru' zóatsö tu lataj ga ral-la' uzí'
ládxa'a?

⁵⁰¿Naru' cabí len na'a caza' bena'
yúgu'të lë ni?"

⁵¹Ní'irö Esteban na' gudxë' yugu' bö-ni'
yudo' tu'chi'a tu'sóröë' na', gunné':

—Lib'í'ili', bönni' zidi, bití' bi raza
icja ná'gali'. Nazidi icja ládxi'do'oli'
ca raca quégaca bö'nachi bití' núnbë'-
gaquië' Dios. Ridá'baga'tica'sili'-në' Dios
Bö' Lá'ayi. Ca na' gulunë' xuz xtó'oli',
runlí' ca' lib'í'ili'. ⁵²Gula'bía ládxi'gaquië'
xuz xtó'oli' na' yúgu'të bönni' ni' gulu'ë
didza' uláz queë' Dios. Lësca' gulútië'
bönni' ni' gula'guíxj'ö zí'aló ca ral-la'
guídë' Cristo, Bönni' Tsahui', ate' na'a,
cate' ni' bidxinë' Bönni' Tsahui' na', lib'í'
cázali' bétili'-në' lu ná'agaquië' bönni'
gulútië' Lë'. ⁵³Lib'í' cázali' dë lu ná'ali'
xibá queë' Dios, lë na' gubáz lá'ayi
queë' Dios bulu'dödë' lu ná'agaquië' xuz
xtó'oli', pero bití' runlí' ca rna.

Tútië' Esteban

⁵⁴ Cate' bönni' yudo' tu'chi'a tu'söröë' na' bila'yönnë' didza' ni, gula'léde'enë' Esteban, ate' lu yöl-la' rilé quégaquië' lë' gulagu xzéatica' láyë'ë. ⁵⁵ Ní'irö buyúë' Esteban na' lúzixibalö, ate' zóalenë' Dios Bö' Lá'ayi lë', bilé'enë' lataj bení' ga zoë' Dios, enca' Jesús, zuínë' cuita lë'ë ibëla Dios ga nayépisëtërë'. ⁵⁶ Ní'irö gunné':

—Buli'yútsöca'. Rilé'eda' nayalaj lúzixiba, ate' zuínë' Bönni' Guljë' Bönachi cuita lë'ë ibëla Dios.

⁵⁷ Ní'irö bönni' yudo' tu'chi'a tu'söröë' na' bulu'sayaj nágagaquië'. Gula'bódx-i'ë zidzaj, en tsözxón gula'bía di'ë Esteban na'. ⁵⁸ Bulu'béajë' lë' ní'ilö ra' yödzö na', ga ni' bulu'ladxë' lë' guió'j. Yugu' bönni' ni' tunë' ba nalí le tu'zéguië' Esteban didza' bulu'cu'ë lari' ta'xóa yéngaquië' xini'ë tu bönni' lë' Saulo cate' ni' bulu'ladxë' Esteban guió'j. ⁵⁹ Cate' ni' tu'ladxë' Esteban guió'j, lë' bulidzë' Dios, gunné':

—Xána' Jesús. Buzí' bö' naca caza'.

⁶⁰ Ní'irö biyéchuë', buzóa xzibë', en bë'ë zidzaj didza', gunné':

—¡Xan! ¡Biti' usubágu'u légaquië' dul-la' ni!

Cate' budxi bë'ë didza' ni, gútité'.

Saulo ribía ládxxë' bönachi queë' Cristo

8 ¹⁻³ Saulo benë' tsözxón yugu' bönni' ni' gulútië' Esteban.

La' ní'isö yugu' bönni' ta'yéaj ládxi'gaquië' Dios gulu'ágaquië' Esteban, ate' yöjçáchi'gaquië' lë'. Gula'bódxidë'ë ni'a queë'.

Dza na' yugu' bönni' judío cabí ta'yéajlë'ë Cristo gula'bía ládxi'da'gaquië' bönachi queë' Cristo nacua' Jerusalén. Lësca' Saulo gudxia ládxxë' bönachi queë' Cristo. Guyázië' gapa naca lu yu'u quégaquië', ate' guzxönë' yugu' bönni', en nigula, ate' gulu'ë légaquië' lidxi gufé.

Ní'irö gulásilasi ia'látisö cabí bidáchi-gaca yúgu'të bönachi queë' Cristo idú luyú Judea, en luyú Samaria, ate' lé-gacasë' gubáz na' nasól-lë'ë Cristo bulu'gá'anë' Jerusalén.

Raca libán que didza' dxi'a luyú Samaria

⁴ Yugu' bönni' na' gulásilasië' yöjjaquië' yúgu'të lataj, ate' gulunë' libán que didza' dxi'a. ⁵ Ní'irö Felipe, tu bönni' dzáguië' nupa na' gulásilasi, guyijë' luyú Samaria, ate' benë' libán ni' ca naca queë' Cristo. ⁶ Bulu'dubë' yugu' bönni' ni', ate' idú ládxi'gaquië' bulu'zé nágagaquië' didza' ru'ë Felipe na', tu' bila'yönnë' xtídzë'ë, en bila'lé'enë' yugu' le taca bë' runë'. ⁷ Caní guca, tu' benë' ga bulu'rúaj zían bö' xihui' yú'ugaca bönachi, ta'bódxia' zidzaj, ate' bulu'huóaca zían nupa te'e huë' nacú'uni bin, en nupa bití' guca sá'gaca. ⁸ Caní guca, bulu'dzeja bönachi yödzö ni'.

⁹ Zoë' Simón, tu bönni' zí'alö gúquië' bönni' udzá' uné ya'a lu yödzö na', bönni' guzxi' yé'enë' bönachi Samaria na', gunné' lë' cazë' náquië' bönni' nayépisëtërë'. ¹⁰ Yúgu'të bönachi bulu'zëda' nágagaca bönni' ni, ga riguela' yugu' bönni' cá'asó ga ridxintë yugu' bönni' lo, gula'nnë': "Bönni' ni dë lu në'ë yöl-la' huáca zxón queë' Dios." ¹¹ Caní guca, gulunë' lë' bal, tu' xidzé nazí' yé'enë' légaquië' len yöl-la' gudzá' uné ya'a queë'.

¹² Cate' gula'yéajlë'ë libán runë' Felipe que didza' dxi'a ca rinná bë'ë Dios, en ca naca queë' Jesucristo, ní'irö gula'dilë' nisa, bönni', en nigula. ¹³ Ní'irö guyéajlë'ë ca' Simón na', en bidilë' nisa, ate' gudáentica'së' tsözxón Felipe na'. Cate' bilé'enë' yugu' yöl-la' huáca zxón, en yugu' le taca bë' runë' Felipe, bubáninë' Simón na'.

¹⁴ Cate' yugu' gubáz na' nasól-lë'ë Cristo nacua' Jerusalén bila'yönnë' ca guca lë ni, chinazí' lu ná'agaca bö-

nachi luyú Samaria xtídzé'ë Dios, ní'irö gula'sól-lë'ë Pedro, en Juan ní'. ¹⁵ Cate' Pedro, en Juan na' bila'dxinë' ní', bulu'lidzë' Dios uláz quégaca bönachi ni' ta'yéajlë' Cristo para idisóalenë' Dios Bö' Lá'ayi léguequi. ¹⁶ Ga bidxintë dza na', bití' ridxíninë' Dios Bö' Lá'ayi quégaquië'. Nadílagacasé' nisa para iláca-gaquië' tuz len Xanru' Jesús. ¹⁷ Ní'irö Pedro, en Juan na', gula'xóa ná'agaquië' bönachi Samaria na'. Bulu'lidzë' Dios, ate' bidisóalenë' Dios Bö' Lá'ayi légaquië'.

¹⁸ Cate' bil'énenë' Simón, bönni' udzá' na', le guca cate' gubáz na' nasól-lë'ë Cristo gula'xóa ná'agaquië' bönachi ní', bidisóalenë' Dios Bö' Lá'ayi légaquië', gú'unne' quíxjé' légaquië' dumí, ¹⁹ ate' rë' légaquië':

—Benna ca' yöl-la' huáca ni quia', para cate' ixóa na'a nútí'tës bönachi, idisóalenë' Dios Bö' Lá'ayi nu na'.

²⁰ Ní'irö Pedro gudxë' lë', rnnë':

—Initi dumí quiu' tsözxón len lí', tu' réquinu' len dumí idéli'nu' yöl-la' huáca queë' Dios. ²¹ Bití' nacu' bachi gútsu'u lë ni, tu' dxía le naca ruá' dö' icja ládxi'do'o lahuë' Dios. ²² Bubi'i ládxi' ca naca huiá' dö' ni runu', en gúta'yu lahuë' Dios, nadxi ca' uniti lahuë' lí' ca naca lë ni rizá' ládxi'u. ²³ Réquibe'eda' nabágu'u xíguia', en nadzunu' lu yalaj que tu' xihui'.

²⁴ Ní'irö bubí'ë didza' Simón na', rë' légaquië':

—Buli'lidzë' Dios, gáta'yulí' lahuë' Xanru' ní'a quia' neda' para cabí gaca quia' nitú lë na' chigunnáli'.

²⁵ Cate' Pedro, en Juan na' budxi gulunë' ba nalí queë' Cristo lu yödzo ní', en bulu'siyönnë' légaquië' xtídzé'ë Dios, gulunë' ca' libán que didza' dxí'a yugu' lu ládza-gaquië' bönni' Samaria, ate' gudödi ní' yójhuójgaquië' Jerusalén.

Felipe, en tu bönni' Etiopía

²⁶ Ní'irö tu gubáz lá'ayi queë' Xanru' bé'lenë' Felipe didza', en gudxë' lë':

—Guyasa, en guyéaj saca' ga ridödi gubidza beo' ziaga. Idxinu' ga ní' nalá' nöza zeaj Jerusalén zeajté yödzo Gaza, nöza na' ridödi lu lataj cá'asö.

²⁷ Ní'irö guyu'ë nöza Felipe na', sa'yéajjé'. La' nöza ní' yójtságuie' tu bönni' Etiopía, náquië' bönni' huödx. Luyú Etiopía náquië' bönni' huen dxin lo queénu Candace, nigula na' rinná bé'enu bönachi Etiopía na', en yu'u lu në'ë yúgu'të yöl-la' tsahui' queénu dzö'ö lídxinu. Guyijé' Jerusalén bönni' ni para guyéaj ládxi'ë Dios. ²⁸ Na'a, söhuójjé' ladzë, rö'ë lu carreta queë', en rulabë' le nazúaj lu guichi ca gunné' Isaiás, bönni' bé'ë didza' uláz queë' Dios. ²⁹ Ní'irö Dios Bö' Lá'ayi gudxë' Felipe na':

—Gubíga' ga zeaj carreta na', en guyéajlen le.

³⁰ Cate' chigubíguë'ë Felipe ní', biyönnë' ru'ë didza' bönni' huödx na', rulabë' le nazúaj lu guichi ca gunné' Isaiás, ate' gudxë' lë':

—¿Naru' réajni'inu' lë na' rulabu'?

³¹ Bubi'ë didza' bönni' Etiopía na', gunné':

—¿Nacxi gaca tséajni'ida' channö cuntu nu zoa uzéajni'i neda'?

Ní'irö gúta'yuë' lahuë' Felipe cuenë', en có'lenë' lë' tsözxón lu carreta na'.

³² Lë na' nazúaj lu guichi rulabë', rna caní:

Ca bö'cu' zxíla'do',
gula'ché'ë Lë' para ilútië' Lë',
en ca bö'cu' zxíla'do',
bití' rnnëba' cate' nu richugu lítsa'ba',
ca' benë' Lë', bití' gusalaj ru'ë bi innë'.

³³ Bulu'cá'anë' Lë' cá'asö,
en bití' gulu'ë lataj nu uchi'a usóro Lë'.

¿Nuzxi caz gaca inözi xíguia' nabága'-
gaca bönachi uládz queë'?

La' légacasë' gulútië' Lë'.

³⁴Bönni' huödx na' gunábinë' Felipe, rë' lë':

—Ráta'yua' lo' quíxjöi'inu' neda'. ¿Nuzxi que gunné' caní bönni' na' bë'ë didza' uláz queë' Dios? ¿Naru' queë cazë', o que nu yúbölö?

³⁵Ní'irö la' didza' nisö buguélë'ë Felipe, en busiyönnë' lë' didza' dxi'a ca naca queë' Jesús. ³⁶Cate' ni' yú'ugaquië' nöza söjáquië', bila'dxinë' ga dë nisa, atë' bönni' huödx na' rë' Felipe, rnnë':

—Buyútsöca'. Ni dë nisa. ¿Naru' huácatsö idila' nisa?

³⁷Felipe gudxë' lë':

—Channö réajlë'u idú ládXu'u, huáca idilu' nisa.

Lë' bubí'ë didza', rnnë':

—Réajlë'a Jesucristo, náquië' Zxí'inë' Dios.

³⁸Ní'irö benë' ga guzóa dxisö carreta queë' na', atë' bulu'huöjtjë' irópatë', yöjt-sázagaquië' lu nisa. Ní'irö Felipe buquilë' bönni' huödx na' nisa. ³⁹Cate' bulu'rúajjë' lu nisa, Dios Bó' Lá'ayi buchë'ë Felipe, atë' bönni' huödx na' bíti'rö bilé'enë' lë'. Ní'irö buguélë'ë xinözë', söhuöjë' rudzé-janë'. ⁴⁰Cate' chiréquite'enë' Felipe, zoë' lu yödzö Azoto. Gudödë' yúgu'të yödzö ni', atë' benë' libán que didza' dxi'a, ga bidxintë' yödzö Cesarea.

Saulo ruhuóáquië' queë' Cristo

9 Ni' ruzenë' bach Saulo nupa ta'yéajlë' Xanru', gú'unnë' gútië' légaquië'. Para gunë' caní bidxinë' lahuë' bixúz lo, ²en gunábinë' lë' tu guichi unná bë', le tsöju'ë lógaquië' bönni' unná bë' qué-gaca yu'u gapa tu'dubë' bönni' judío, en tu'sedë' queë' Dios lu yödzö Damasco, atë' channö utsöjxáquië' yugu' bönni', en nigula ta'yéajlë' Jesús ni', gaca ichë'ë légaquië' nadzúngaquië' lu yödzö Jerusalén. ³Tsanni ni' yú'ugaquië' nöza Saulo, en nupa nacua'len lë', söjáquië', en cate' chizóa ila'dxinë' Damasco, tsáli-do'os buzeni'da' tu bení' za' lúxhiba, le

buzeni' ga ni' söjáquië'. ⁴Ní'irö gudzö'ë Saulo lu yu, en biyönnë' chí'i Nu rë lë':

—Saulo, Saulo, ¿bizx que ribía ládXu'u neda'?

⁵Saulo gunábinë' Lë', gunné':

—¿Nuzxi li', Xan?

Lë' gunné':

—Neda' Jesús, Nu ribía ládXu'u. Run zi' cuinu', ridá'bagu'u neda'. Raca quiu' ca na' raca queé'ba' bëdxi, run zi' cuinba' richégu'ba' yaga tuchi' túndë'ë-ba' zi'.

⁶Ní'irö Saulo guzxízidë'ë, gúdxinë', en gunné':

—Xan, ¿bizxi ré'ënu' guna'?

Xanru' gudxë' lë':

—Guyasa, en guyáz lu yödzö, atë' ni' isól-la'a quiu' nu guíë li' le ral-la' gunu'.

⁷Guládxinë' yugu' bönni' na' söjácalenë' Saulo, tu' bila'yönnë' chí'i na', sal-la' cuntu nu bila'lé'enë'. ⁸Ní'irö böasë' Saulo luyú, en cate' guxá' guió'j lahuë', biti' ca' rilé'enë'. Que lë ni na' gula'guélë'ë në'ë, en gula'ché'ë lë' Damasco. ⁹Guzóë' ni' tsonna dza nachul-la lahuë', en biti' bi gú'f'i gudahuë'.

¹⁰Zoë' ca' Ananías, bönni' réajlë'ë Cristo, yödzö Damasco, atë' Xanru' bulu'f'i lahuë' ga zoë' ca tu lu yëla béchigal, en gudxë' lë':

—Ananías.

Lë' bubí'ë didza', gunné':

—Ni zoa', Xan.

¹¹Xanru' gudxë' lë':

—Guyasa, en guyéaj ga naca la' nöza na' naz'f'i le Nöza Li, atë' lu yu'u lidxë' Judas gunaba didza' queë' Saulo, bönni' Tarso. Lu yu'u na' rulidzë' Dios. ¹²Chibilé'enë' tu bönni' ca tu lu yëla béchigal zë'ë tsázië' ga zoë', lë' Ananías, en ixóa në'ë lë' para huóalaj guió'j lahuë'.

¹³Ní'irö bubí'ë didza' Ananías, rë' Lë':

—Xan, zían nupa chibulu'siyönnë' neda' ca runë' bönni' ni, zían le naca dö' nu'ë le benë' qué-gaca bönachi ta'yéajlë' Li', nacua' Jerusalén. ¹⁴Zë'ë ca' ni, dë lu

ně'ë uláz quégaquiē' bixúz unná bē' sönē' yúgu'tē nupa tu'lidza Dios len Lo' Li'.

¹⁵ Ní'irō Xanru' rē' Ananías na', rnnē':

—Guyéaj, tu' guró' caza' neda' bönni' ni para gunē' libán ca naca quia' lógaca bönachi izá'a, en lógaquiē' bönni' ta'nná bé'enē' légaquiē', enca' lógaca bönachi Israel. ¹⁶ Uluf'ida' lē' le zían le qui'i sáquē'ë uláz quia' neda', gunē' xichina'.

¹⁷ Ní'irō guyijē' Ananías ni', ate' guyáz-iē' yu'u, en guxóa ně'ë Saulo, ate' rē' lē':

—Böcha'a Saulo, Xanru' Jesús, Nu na' buluf'i lahu la' nöza ga ni' zo'o, gusól-lē'ë neda' para huóalaj guiój lo', en idisóalenē' Dios Bö' Lá'ayi li'.

¹⁸ La' ní'isö gula'guínnaj le naca ca xilácuba' böla lu guiój lahuē', ate' la' böáljatē' guiój lahuē'. Ní'irō guyasē' Saulo, en bidilē' nisa. ¹⁹ Gudödi ni' gudahuē', en böáca ládxē'ë. Ca chopa tsonna dza guzóalenē' yugu' bönni' ta'yéajlē'ë Cristo nacu'ë Damasco.

Runē' libán Saulo lu yödzo Damasco

²⁰ La' gusí lotē' Saulo runē' libán queē' Cristo gapa naca lu yu'u ga tu'dubē' bönni' judío, en tu'sedē' queē' Dios, rnnē':

—Jesús náquiē' Xz'ini cazē' Dios.

²¹ Bulu'báinē' yúgu'tē bönni' ni' ta'yönnē' lē', ta'nnē':

—¿Naru' calēga bönni' ni bönni' na' busunítie' nupa nacuá' Jerusalén, en tu'lidza Dios lu Lē' Jesús? Para gunē' caní bidē' ca' ni para ichē'ë légaquiē' nadzún-gaquiē' lógaquiē' bixúz unná bē'.

²² Bidíparō ládxē'ë Saulo, en benē' ga gula'bō'ë böniga bönni' judío nacu'ë Damasco, tu' buluf'inē' légaquiē' Jesús naca cazē' Cristo, bönni' na' tunē' löza idinná bé'enē' légaquiē'.

Rulē' Saulo lu ná'agaquiē' bönni' judío

²³ Cate' chigudödi zían dza, gulún xtídza'gaquiē' bönni' judío nacu'ë ní' ilútiē' Saulo. ²⁴ Rēla, en tē dza gula'bó'

nísiē' yugu' bönni' judío ga nu ridödi lu zö'ö run chí'i yödzo na' para ilútiē' lē', pero gúquibe'enē' Saulo le té'ennē' ilunē' queē'. ²⁵ Ní'irō yugu' bönni' ta'yéajlē'ë Cristo gula'guél'ë Saulo chí'i dzó'ölö, ate' gula'gu'ë lē' tu lu ga'böra zxon naga' du, en bulu'zötjē' lē' ní'ilö lu zö'ö run chí'i yödzo na'.

Rudxinē' Saulo Jerusalén

²⁶ Cate' budxinē' Saulo Jerusalén, gú'unnē' tsöjenē' tsözxón bönni' ni' ta'yéajlē'ë Cristo, pero yúgu'tē' guládxinē' lē', tu' cabí téquinē' réajlē'ë Saulo na' Cristo. ²⁷ Ní'irō bönni' na' lē' Bernabé gudél'ë Saulo, en guchē'ë lē' ga na' nacu'ë bönni' gubáz nasól-lē'ë Cristo. Busiyönnē' légaquiē' ca na' guca queē' Saulo, bilé'enē' Xanru' la' nöza, ate' Xanru' caz bé'lenē' lē' didza', en ca na' benē' Saulo lu yödzo Damasco, len yöl-la' rugu ladxi' benē' libán ca naca queē' Jesús. ²⁸ Ní'irō Saulo guzóalenē' légaquiē' lu yödzo Jerusalén, ate' gudálenē' légaquiē' tsözxón. ²⁹ Lu yöl-la' rugu ladxi' benē' libán Saulo ca naca queē' Xanru', en gudíl-lalenē' didza' bönni' judío tu'ë didza' griego, ate' légaquiē' gula'zóa gula'bō'ë ilútiē' lē'. ³⁰ Cate' guléquibe'enē' bóchi'ru' ta'yéajlē'ë Cristo lē' ni, gula'ché'ë Saulo lu yödzo Cesarea, ate' gula'sól-lē'ë lē' yödzo Tarso, le naca ladzē' Saulo.

³¹ Ní'irō guca tsahuí' quégaca yúgu'tē cō' bönachi queē' Cristo, nacuá' idú luyú Judea, en luyú Galilea, en luyú Samaria, ate' bila'dipa ládxi'gaquiē'. Gula'cu'ë lu yöl-la' radxi quégaquiē' Xanru', ate' gula'yanē' tu' gúcalenē' Dios Bö' Lá'ayi légaquiē'.

Pedro ruúnē' tu bönni' lē' Eneas

³² Ia'tú le guca, cate' Pedro yöjyúē' yugu' bóchi'ru', bidxinē' ga nacu'ë bönni' ta'yéajlē'ë Jesús lu yödzo Lida. ³³ Yöjxáquiē' tu bönni' ni' lē' Eneas,

chiguca xunu' iz dë' ré'enë', nacú'unië' bin. ³⁴ Pedro gudxë' lë':

—Eneas, Jesucristo ruúnë' li'. Guyasa, en butubi xto'.

La' guyásatë' Eneas na'. ³⁵ Yúgu'të nupa nacúa' yödzö Lida, en yödzö Sarón bila'l'é lë', atë' bulu'huóáca queë' Xanru', tu' chita'yéajlë' Lë'.

Rátinu Dorcas, en rubannu

³⁶ Ia'stú le guca, lu yödzö Jope zóanu tu nigula réajlë'ënu Cristo, lënu Tabita, en ca naca didza' griego lënu Dorcas. Benu nigula ni zían le nácagaca dxi'a le tácalen bönachi yechi'. ³⁷ Le guca dza ni', gú'ínu Dorcas na', en gútinu. Gudödi gula'gu'binu lënu, gula'gu'xjë'-nu tu lu yu'u ga naca buropi cuía. ³⁸ Tu' dë yödzö Lida gála'sö ga na' dë yödzö Jope, ga na' zoë' Pedro, bila'yönnë' bönni' Jope na' ta'yéajlë'ë Cristo zoë' Pedro ni', atë' que lë ni na' gula'sól-lë'ë chopë' bönni' ga na' zoë', atë' guláta'yuë' lahuë', të' lë':

—Biti' tsenu' guídu' queétu'.

³⁹ Ní'irö la' guyásatë' Pedro, sa'yéajlë' légaquië'. Cate' bidxinë' ni', la' gula'chë'të' lë' ga naca lu yu'u ga dënu nigula nati na'. Ní'irö yugu' nigula uzëbi bulu'dúbinu gásibi'ilë', ta'bódxinu, en tu'luf'ínu lë' lari' quégaquië' bönni', en nigula, yugu' le benu Dorcas cate' ni' zóalennu légacanu. ⁴⁰ Ní'irö Pedro bubéajë' ní'ilö yúgu'të nupa nacúa' ni', atë' buzóa zxi'bë', rulidzë' Dios. Ní'irö buécjë' ga dënu Dorcas na', gunné':

—Tabita, guyasa.

La' buxa'të guíoj lonu Dorcas. Cate' bilé'enu-në' Pedro, la' guyástënu, guró'önu. ⁴¹ Gudélë'ë Pedro ná'anu, en buchisë'-nu. Ní'irö bulidzë' bönni' na' ta'yéajlë'ë Jesús, len yugu' nigula uzëbi na', atë' busudxinë' Dorcas na' lógaquië', nabannu. ⁴² Ca guca lë ni gúzë didza' idú lu yödzö Jope, atë' gula'yéajlë' bönachi zían Xanru' Jesús. ⁴³ Bugá'anë' Pedro yödzö Jope na' zían

dza lu yu'u lidxë' Simón, bönni' runë' tsahui' guídi zxa bëdxi.

Le benë' Pedro lidxë' Cornelio

10 Zoë' yödzö Cesarea tu bönni' lë' Cornelio, bönni' rinná bé'enë' tu gáyu'ë bönni' rójáquië' gudil-la, naz'íi lágaquië' Bönni' Italia Rójáquië' Gudil-la. ² Cornelio na' reaj ládxë'ë Dios, en rádxinë' Lë', atë' yúgu'të bönachi nacúa' lidxë' núngaca lë' tsózxón. Runödzjë' Cornelio dumí zían le rácalen bönachi yechi', en rulídzatica'së' Dios. ³ Tu dza idú ridödi xihuó bilé'enë' Cornelio ca tu lu yëla béchigal, razië' tu gubáz lá'ayi queë' Dios ga na' zoë', en rë' lë':

—Cornelio.

⁴ Gúdxinë' Cornelio. Buyúë' gubáz lá'ayi na', en gudxë' lë':

—¿Bizxi rño', Xan?

Gubáz lá'ayi na' gudxë' lë', rnnë':

—Dios riyönnë' le rulidzu'-në', en nóz-inë' ca runu', rácalenu' bönachi yechi'.

⁵ Na'a, gúsól-la' yugu' bönni' tsójáquië' yödzö Jope tsöjlídzagaquië' bönni' na' lë' Simón, zoa ia'tú lë' Pedro. ⁶ Bönni' ni zoë' lidxë' tu bönni' runë' tsahui' guídi zxa bëdxi. Bönni' ni, lësca' lë' Simón, atë' zoa lidxë' ra' nísado'. Pedro na' gufë' li' le ralla' gunu'.

⁷ Cate' chibuzë'ë gubáz lá'ayi na' bé'lenë' lë' didza', bulidzë' Cornelio chó-pabi' bi'i huen dxin queë', en tuë' bönni' rejë' gudil-la reaj ládxë'ë Dios, en dzáguië' bönachi nacúa' lidxë' Cornelio. ⁸ Cate' budxi busiyönnë' légaquië' yúgu'të le guca, gúsól-lë'ë légaquië' yödzö Jope.

⁹ Dza buropi, tsanni ni' yú'ugaquië' nöza, en ta'dxinë' gala' ga dë Jope na', la' ní'sö gurenë' Pedro ícjo'olö yu'u para ulidzë' Dios, ni' naca idú huagubidza.

¹⁰ La' ná'asö ridunë' Pedro, en gú'un-në' gahuë', atë' tsanni ni' tu'pé'ë queë', bilé'enë' le naca ca tu lu yëla béchigal. ¹¹ Bilé'enë' nayalaj lúzxiba, en ruhuötaj

tu le naca ca tu lari' guitsa' zxon ga zoë', le naga' idapa la'a. ¹²Lahui lari' na' dxíagacaba' yugu' böa' guixi' izá'a nacua' tapa ni'a ná'agacaba', en yugu' böa' tá'ayöj lé'egacaba' lu yu, en yugu' böa' zoa xiligacaba'. ¹³Ní'irö biyönnë' chi'i nu rë lé':

—Pedro, guyasa. Béti-gacaba', en gudagu.

¹⁴Bubi'ë didza' Pedro, rnnë':

—¡Calëga, Xan! Catu caz gudahua' le cabí ral-la' gágutu', o le cabí naca dxi'a.

¹⁵Le buropi luzuí biyönnë' chi'i nu na' gudxi lé':

—Le nunë' Dios dxi'a, biti' innó' que: "Biti' naca dxi'a."

¹⁶Tsonna luzuí guca caní, ate' ní'irö la' buépitë' lari' zxon na' lúzxiba. ¹⁷Tsanni ni' rö'ë böniga Pedro, rizá' ládxë'ë bizxi sa'yéaj lé na' bilé'enë' ca tu lu yëla béchi-gal, bila'dxinë' bönni' na' nasól-lë'ë Cornelio légaquië' ra' yu'u, ta'nabë' gazxi zoa lidxë' Simón na'. ¹⁸Cate' bila'dxinë' ni', bulu'lidzë' nupa nacua' yu'u na', en gula'nábinë' légaquië' channö zoë' tu bönni' lé' Simón ni', zoa ia'tú lé' Pedro.

¹⁹Tsanni ni' rizá' ládxë'ë Pedro ca naca lé na' bilé'enë', Dios Bö' Lá'ayi gudxë' lé', rnnë':

—Buyútsöca'. Chibila'dxinë' tsonné' bönni' ni, tu'guiljë' li'. ²⁰Guyaschi na'a, en bötaj zxan yu'u. Biti' gaca chopa ládxu'u tséajlenu' légaquië', tu' nasól-la'a neda' yugu' bönni' ni.

²¹Ní'irö bö'tjë' Pedro zxan yu'u ga na' nacu'ë bönni' na' nasól-lë'ë Cornelio, en gudxë' légaquië':

—Neda' bönni' ruguflajli'. ¿Bizxi huen zá'ali' ni?

²²Bulu'bi'ë didza', të' lé':

—Cornelio, tu bönni' rinná bé'enë' bönni' rójáquië' gudil-la, nasól-lë'ë netu'. Náquië' bönni' tsahui', en rádxinë' Dios. Yúgu'të bönni' judío tunë' bal bönni' ni, en nadx'iguequinë' lé'. Ia'tú le guca, tu gubáz lá'ayi queë' Dios bé'lenë' lé' didza',

en gudxë' lé' isól-lë'ë nu udulídza li' guí-du' lidxë' para yönnë' didza' gu'u.

²³Ní'irö Pedro gulu'ë légaquië' lu yu'u, en bë'ë ga ila'cu'ë. Cate' za' rení' ia'tú dza, guyasë' Pedro, en guyéajlenë' légaquië'. Bal-lë' böchi'ru' nacu'ë Jope na' gulunë' lé' tsözxón.

²⁴Dza bunni ni', bila'dxinë' Cesarea. Chizóë' Cornelio ribözë' légaquië', ate' chinutubë' yugu' di'a dza queë', en yugu' böchi' luzë'ë nadx'irönë' lidxë'. ²⁵Cate' guyazië' Pedro lö'a, birúajë' Cornelio yu'u, yöjtságuie' lé'. Biyéchuë' xini'ë Pedro, en guyéaj ládxë'ë lé' ca runru' queë' Dios caz. ²⁶Pedro buchisë' lé', en gudxë' lé':

—Guyasa. Lësca' bönachi yödzölió naca' ca nacu' li'.

²⁷Ni' tu'isë' ca' didza', guyázatë' Pedro yu'u, en yöjxáquië' nudúbigaca bönachi zían ni'. ²⁸Ní'irö Pedro gudxë' légaquië', rnnë':

—Libi'ili' nöz quézili' ca rinná bë' xibá queë' Moisés, rnna biti' ral-la' gunë' tu bönni' judío tsözxón o tsázalenë' nu bönni' izá'a. Na'a, Dios bulu'inë' neda' biti' ral-la' innía' queë' nitúë' bönni' náquië' cá'asö o biti' náquië' dxi'a. ²⁹Que lé ni na' cate' bulídzali' neda', la' bídatea', en biti' guca chopa ládxa'a. Rinaba' na'a, ¿bizx que na' bulídzali' neda'?

³⁰Ní'irö bubi'ë didza' Cornelio, gunné':

—Chiguca tapa dza ca zóaru' na'a, idú ridödi xihuó, cate' ni' runa' gubasa, en rulidza'-në' Dios lu yu'u lidxa' ni, bilé'eda'-bi' tubi' bönni' ra'bán nacubi' lari' rëpi yösa bení', dulu'i lobi' neda'.

³¹Caní gúdxibi' neda': "Cornelio. Dios riyönnë' le rulidzu'-në', en nózinë' ca runu', rácalenu' yugu' bönachi yechi'.

³²Na'a, isól-lu'u nu bönni' lu yödzö Jope para tsöjlídzë' tu bönni' lé' Simón, zoa ia'tú lé' Pedro. Bönni' ni zoë' lidxë' tu bönni' runë' tsahui' guídi zxa bëdxi, en lé' ca' Simón. Zoa lidxë' bönni' ni

ra' nísado'. Cate' idxinë' Pedro na' ga zu', usiyönnë' li' didza' dxi'a." ³³Caní guca, la' gusól-la'tea' nu tsöjlidza' li', ate' tsáhuí'do' benu' bidu' ga zóatu' ni. Que lë ni na' zóatu' ni yúgu'tëtu', nudúbitu' lahuë' Dios para uzé nágatu' le inná bé'enë' Dios li' innó'.

Didza' bë'ë Pedro lidxë' Cornelio

³⁴Ní'irö gusí lahuë' Pedro ru'ë didza', rnnë':

—Le nácatë réajni'ida' na'a, biti' ruyusë' Dios yöl-la' rinnësö quégaca bönachi, pero tuz ca rilé'enë' rë'u. ³⁵Dios raza ládxë'ë bönachi idútë yödzülió, nupa na' tadxi Lë', en tun le naca dxi'a. ³⁶Gusól-lë'ë Dios xtídzë'ë ga nacua' bönachi Israel, en gusól-lë'ë nu ben libán que didza' dxi'a, le run ga raca dxi'a quégaca bönachi, lë na' bidxín queëru' lu në'ë Jesucristo. Lë cazë' náquië' Xanru' yúgu'tëru'. ³⁷Libí'ili' nöz quézili' lë na' guca luyú Judea, le gusí lo guca luyú Galilea gudödi benë' libán Juan para ila'dila bönachi nisa. ³⁸Nözili' ca benë' Dios le guca queë' Jesús, bönni' Nazaret. Gusól-lë'ë Dios Bö' Lá'ayi, en yöl-la' huáca queë' para sóalengaca Lë'. Nözili' ca na' gudë' Jesús, runë' le naca tsahui', en ruúnë' yúgu'të nupa gula'guf'i gula'zaca' lu na' tu' xihui'. Caní benë', tu' guzóalenë' Dios Lë'. ³⁹Na'a, netu' runtu' ba nalí que yúgu'të lë na' benë' Jesús luyú Judea, en lu yödzo Jerusalén, en ca na' guca, gulútië' Jesús, cate' bulu'dé'ë Lë' lë'e yaga cruz. ⁴⁰Ní'irö Dios busubanë' Lë' cate' guca tsonna dza nátië', en benë' ga buluf'i lahuë' ga zóatu' netu'. ⁴¹Biti' buluf'i lahuë' lógaca yúgu'të bönachi, pero lotu' netu' buluf'i lahuë'. Dios guröë' netu' dza ni'te para guntu' ba nalí queë' Jesús, ate' güfi' gudágulentu' Lë' tsözxón gudödi bubanë' lu yöl-la' guti. ⁴²Gunná bé'enë' Dios netu' guntu' libán lógaca bönachi, ate' runtu' ba nalí queë'

Cristo, náquië' Nu buzóa cazë' Dios para uchi'a usöröë' nupa nabángaca, en nupa chinátigaca. ⁴³Lësca' yúgu'të bönni' gulu'ë didza' uláz queë' Dios gulunë' ba nalí queë' Jesús, gula'nnë': "Yúgu'të nupa ila'yéajlë' Lë', Dios uniti lahuë' dul-la' nabága'gaquië' ni'a que le benë' Lë'."

Dios Bö' Lá'ayi ridisóalenë' bönachi izá'a

⁴⁴Ni' ru'isë' caní didza' Pedro, la' bidxintë' Dios Bö' Lá'ayi, bidisóalenë' lé-gaquië', yúgu'të nupa ni' ta'yöni libán runë' lë'. ⁴⁵Gula'ná' badxë' bönni' judío ta'yéajlë'ë Cristo, nupa na' bila'dxín ni' tsözxón len Pedro, tu' bidë' Dios Bö' Lá'ayi, Nu na' nasól-lë'ë Dios Xuz. Bidisóalenë' bönachi ni' biti' náca'gaca judío. ⁴⁶Caní gulunë' tu' bila'yönnë' tu'ë bönni' zí'tu' na' didza' yúbölö, en tunë' Dios zxön. ⁴⁷Ní'irö bë'ë didza' Pedro, gunné':

—¿Naru' huácatsö nu inná be'e bönachi ni para cabí ila'dila nisa? Naca bë' Dios Bö' Lá'ayi bidisóalenë' légaquië', ca na' bidisóalenë' netu'.

⁴⁸Gunná bë'ë Pedro ila'dilë' nisa tu' nazí' lu ná'agaquië' Lë' Xanru' Jesús. Ní'irö yugu' bönni' ni' gulá'tayuë' lahuë' Pedro ugá'analenë' légaquië' ca chopa tsonna dza.

Didza' bë'ë Pedro lógaca bönachi queë' Cristo nacua' Jerusalén

11 Bila'yönnë' gubáz nasól-lë'ë Cristo, en bóchi'ru' nacu'ë luyú Judea ca na' bönni' biti' náca'gaquië' judío gula'zí' lu ná'agaquië' xtídzë'ë Dios. ²Cate' budxinë' Pedro Jerusalén, bóchi'ru' judío gula'díl-lalenë' lë' didza'. ³Gulé' Pedro:

—¿Bixz que yöjtsú'ulenu' bönni' biti' náca'gaquië' judío, en gudágulenu' lé-gaquië' tsözxón?

⁴Ní'irö gusí lahuë' Pedro rusiyönnë' lé-gaquië' idútë lë na' guca, rnnë':

5—Guzóa' lu yödzo Jope, en cate' ni' rulidza'-në' Dios, bilé'eda' ca tu lu yëla béchigal tu le buluí'inë' Dios neda'. Bilé'eda' bötaj birúaj lúzxiba tu le naca ca tu lari' guitsa' zxon, naga' idapa la'a, ate' bidxin ga na' zoa'.⁶Cate' ni' ruyúa' le para ilé'eda' le dxía láhuilö, bilé'egacada'-ba' böa' guixi' nacua' tapa n'agacaba', yugu' böa' guixi' sínia', en böa' tá'ayöj lë'egacaba' lu yu, en böa' zoa xfligacaba'.⁷Biyönda' chi' nu gudxi neda': "Pedro, guyasa. Bëti-ba', en gudagu."⁸Ní'irö gudxa'-në': "Biti' ca', Xan. Catu caz gudahua' tu le cabí ral-la' gágutu', o tu le cabí naca dx-i'a."⁹Ní'irö le buropi luzuí bulidza chi'i lúzxiba na' neda', en gudxi neda': "Le nunë' Dios dxi'a, biti' innó' biti' naca dx-i'a."¹⁰Tsonna luzuí guca caní, ate' ní'irö idútë lë na' bilé'eda' la' buépité lúzxiba.¹¹La' ní'isö bila'dxintë' tsonnë' bönni' ra' yu'u ga na' zoa', narúajgaquië' yödzo Cesarea, nasól-lë'ë légaquië' tu bönni' lë' Cornelio. Sududíljagaquië' neda'.¹²Dios Bö' Lá'ayi gudxë' neda': "Guyéajlen légaquië', en cabí gaca chopa ládx-u'u." Lësca' izxópate' bóchi'ru' ni gula'zá'lenë' neda' tsözxón. Guyéajtu' Cesarea, ate' guyaztu' lidxë' tu bönni' zoë' ni'.¹³Bönni' ni' gudíxjöi'inë' netu' ca na' bilé'enë', bidxinë' tu gubáz lá'ayi queë' Dios lu yu'u lidxë'. Guzuñë' lahuë', en gudxë' lë': "Na'a isól-la'gacu'-në' bönni' tsöjajúie' yödzo Jope, tsöjlídzagaquië' Simón, zoa ia'tú lë' Pedro."¹⁴Bönni' na' usiyönnë' li' naca gaca uló' li', en ulu'lá-gaca ca' yúgu'të bönni' nacua' lidxu'."¹⁵Cate' ni' gusi' lahua' ruf'ilená' légaquië' didza', bidisóalenë' Dios Bö' Lá'ayi légaquië' ca na' bidisóalenë' rë'u zí'atëlö.¹⁶Ní'irö yöjneda' didza' na' bë'ë Xanru', gunné': "Le nácatë Juan buquilé' bönni' nisa lu nisa, pero libí'ili', gaca queéli' le rulu'isö yöl-la' ridila nisa na', idisóalenë' Dios Bö' Lá'ayi libí'ili'."¹⁷Que lë ni na', channö Dios gusól-lë'ë

Dios Bö' Lá'ayi quégaquië', la' tuz ca benë' queëru' rë'u réajlë'ëru' Xanru' Jesucristo, çnúzxité neda' inná bé'eda'-në' Dios?

¹⁸Ní'irö, cate' bila'yönnë' lë ni, gula'cuá' dxíë', en gula'gu'ë Dios yöl-la' ba, ta'nnë':

—Caní naca, Dios ru'ë lataj bönni' biti' nácaquië' judío, tu'b'íi ládxi'gaquië' para ila'déli'në' yöl-la' na'bán idú.

Yugu' bönni' nacu'ë Antioquía ta'yéajlë'ë Cristo

¹⁹Cate' ni' yugu' bönni' judío biti' ta'yéajlë'ë gulútië' Esteban, en gula'bía ládxi'gaquië' ia'zica'rö bönni' ta'yéajlë'ë Cristo, bulu'zxunnaj bönni' ni, en gulásilasi zían yödzo luyú Fenicia, en luyú Chipre, en lu yödzo Antioquía. Gulunë' libán ni' que xtídzë'ë Dios, pero lógacasö bönni' judío.²⁰Yugu' bönni' Chipre, en yugu' bönni' Cirene, gula'cuá'lenë' légaquië', ate' yugu' bönni' ni, cate' bila'dxinë' lu yödzo Antioquía, gulu'ílenë' ca' didza' yugu' bönni' izá'a. Gulunë' libán lógaquië' que didza' dx-i'a ca naca queë' Xanru' Jesús.²¹Yöl-la' huáca queë' Xanru' guzóalen légaquië', ate' bönni' zían gula'yéajlë' Xanru', en bulu'huóaca queë'.

²²Cate' bidxin didza' ca guca lë ni, ate' bila'yönnë' bönni' queë' Cristo nacu'ë Jerusalén, gula'sól-lë'ë Bernabé tséajë' Antioquía na'.²³Cate' Bernabé na' bidxinë' Antioquía, bilé'enë' le ruzá ládxi'ë Dios quégaquië', en budzéjanë'. Guchízië' icja nágaquië' para ila'día'tica'së' queë' Xanru' idú ládxi'gaquië'.²⁴Náquië' Bernabé na' tsahui', en idú zóalenë' Dios Bö' Lá'ayi lë', en idú ládxi'ë réajlë'ë Cristo. Ní'a que libán benë' Bernabé na', bönni' zían lu yödzo na' gula'yéajlë' Xanru'.

²⁵Gudödi ni', guyijë' Bernabé na' yödzo Tarso, yöjdiljë' Saulo. Cate' budzólinë' lë', buchë'ë lë' Antioquía.

²⁶ Idú ca tu iz gula'cu'ë ni', tunë' tsözxón bönachi queë' Cristo, en tu'sédinë' bönachi zián. Lu yödzo Antioquía na', gusí lo gula'zif' lágaquië' cristiano le rna len didza' xidza': Bönachi Queë' Cristo, nupa ni' ta'yéajlë' Lë'.

²⁷ Dza ni' bila'rúajë' Jerusalén, en yójáquië' Antioquía bal-lë' bönni' tu'ë didza' uláz queë' Dios. ²⁸ Guzuínë' Agabo, bönni' dzáguie' yugu' bönni' na', en uláz queë' Dios Bö' Lá'ayi buzéajni'inë' légaquië', gunné':

—Si' gaca gubín iduté yödzoilió.

Guca gubín na' cate' ni' rinná bë'ë Claudio, lu yödzo Roma. ²⁹ Ní'irö gula'zif' lu ná'agaquië' bönni' ta'yéajlë'ë Cristo nacu'ë Antioquía, ila'sól-lë'ë tsca le dësö que queégaquië', le gácalen bóchi'ru' nacu'ë luyú Judea. ³⁰ Caní gulunë', ate' lë na' bulu'nödzejë', gula'gu'ë lu ná'agaquië' Bernabé, en Saulo para ilu'ë le lógaquië' bönni' gula tapa chi'ë bönachi queë' Cristo nacu'ë Judea.

Tútië' Jacobo, en ta'gu'ë

Pedro lidxi guíë

12 Dza na' Herodes, bönni' unná bë', benë' ga gula'zönë' bal-lë' bönni' queë' Cristo para ulu'saca' zif'ë légaquië'. ² Gunná bé'enë' bönni' gulútië' Jacobo, bóchë'ë Juan. Gulu'ë lë' gufé tuchi'. ³ Cate' gúquiibe'enë' Herodes gula'yaza ládxi'gaquië' bönni' judío lë ni, benë' ga gula'zönë' ca' Pedro. Gulaca lë ni dza ni' raca laní cate' tahuë' yöta xtila bití' nazí'í cúa zi que. ⁴ Gudödi gula'zönë' Pedro, gula'gu'ë lë' lidxi guíë, en bulu'dödë' lë' lu ná'agaquië' tapa cö' bönni' rójáquië' gudil-la, nacu'ë tapë' tu huéaj cö' na', para uyúgaquië' lë'. Yu'u ládxë'ë Herodes ubéajë' Pedro lógaca bönachi tödi Laní Pascua, laní na' tu'subanë' ca benë' Dios, bubéajë' bönachi judío luyú Egipto. ⁵ Caní guca, nun chí'gacré' Pedro lu yu'u lidxi guíë na', pero bö-

nachi queë' Cristo bulu'lídzatica'sö Dios, ta'nábini Dios gácalenë' Pedro.

Dios rubéajë' Pedro lidxi guíë

⁶ Cate' si' idxín dza yu'u ládxë'ë Herodes ubéajë' Pedro lidxi guíë na', la' dzö' ní'isö dë' rásië' Pedro, ate' nacu'ë chopë' bönni' rójáquië' gudil-la cuita lë'ë Pedro na', en núga'gaquië' lë' chopa du guíë. Gula'cu'ë ia'bal-lë' bönni' rójáquië' gudil-la tapa chi'ë ga nu riyaza lidxi guíë na'. ⁷ Tsárido'os buluf'í lahuë' tu gubáz lá'ayi queë' Xanru' ni', ate' buzení'da' bení' lidxi guíë. Gudanë' gubáz lá'ayi na' cuita lë'ë Pedro, ate' busubanë' lë', en gudxë' lë':

—Guyaschi.

Ní'irö bulu'huédxí du guíë na' naga' ní'a në'ë Pedro. ⁸ Gubáz lá'ayi na' gudxë' lë', gunné':

—Béga' lë'u, en gudá' xirachu'.

La' bentë' Pedro caní. Ní'irö gubáz lá'ayi na' gudxë' lë', rnnë':

—Guxóa lari' cúdzu'u, en gudá len neda'.

⁹ Burúajë' Pedro, sa'yéajlenë' gubáz lá'ayi na', pero bití' réquiibe'enë' nácatë le runë' gubáz lá'ayi na'. Gúquinë' yélasö rinenë'. ¹⁰ Cate' chigula'dödë' ga nacu'ë bönni' zfaló, en bönni' buropi cö', bönni' na' rójáquië' gudil-la tapa chi'ë, bila'dxinë' ga zoa le néquini guíë le nusayaj ga nu riyaza lidxi guíë na', ga nu rurúaj la' nöza que yödzo. Ga nu riyaza na', rácasö que guyalaj. Cate' bila'rúajë' ni', gula'zë'ë ga ridzaga ia'turö nöza, ate' ni' gubáz lá'ayi na' la' bulá'alentë' Pedro. ¹¹ Ní'irö réquiibe'enë' Pedro, ate' lu icja ládxi'da'azë' gunné':

—Na'a chinözda' le nácatë gusól-lë'ë Xanru' gubáz lá'ayi queë', en busölë' neda' lu në'ë Herodes, en lu yúgu'të le gul'ënnë' bönni' judío ilunë' quia'.

¹² Tsanni ni' yu'ë nöza Pedro, rizá' ládxë'ë ca naca lë na' guca, ate' bidxinë' lídxinu María, xiná'abi' Juan, bí'í na' zoa

ia'tú labi' Marcos. Lu yu'u na' nudúbi-gaca bônachi zían ta'yéajlë' Cristo, en tu'lidza Dios. ¹³ Cate' bulidzë' Pedro ra' yu'u lö'a, birúajbi' bi'i nigula lëbi' Rode para inózibi' nuzxi na'. ¹⁴ Cate' bün-bë'ëbi' bi'i nigula ni chi'ë Pedro, lu yöl-la' rudzeja queëbi' biti' gusaljbi' yu'u, pero carelö böajbi' lu yu'u, yöjtíxjöi'ibi' nupa nacua' ni', mnabi':

—Zoë' Pedro ra' yu'u.

¹⁵ Ní'irö gulé' lëbi':

—Nachixi icju'.

Lëbi' tsútsurö ben xtídza'bi' naca caní. Ní'irö gula'nnë':

—Calëga lë'. Bixín queë' na'.

¹⁶ Tsanni na' biti' zoa dxíë' Pedro rulidzë' nupa nacua' lu yu'u. Cate' gula'saljë' yu'u, gula'nítisinë' cate' bila'lé'enë' lë'. ¹⁷ Ní'irö guchisa në'ë Pedro para ila'cu'ë dxisö, ate' busiyönnë' lé-gaquië' ca benë' Xanru', bubéajë' lë' lidxi gufé. Ní'irö gudxë' légaquië':

—Guli'siyönnë' ca' Jacobo, en yugu' böchi'ru' ca na' guca.

Ní'irö burúajë' Pedro, sa'yéajë' ga yúbölö.

¹⁸ Cate' za' rení' dza na', bönni' röjáquië' gudil-la gula'bö'ë böniga nacxi guca, bítirö yu'ë Pedro lidxi gufé.

¹⁹ Ní'irö gusól-lë'ë Herodes nupa tsöjxí'-gaca Pedro. Cate' biti' bulu'dzölinë' lë', Herodes gunabi yúdxinë' yugu' bönni' na' röjáquië' gudil-la, bönni' gulún chi'ë Pedro. Gudödi ni' gunná bé'enë' nupa bétigaca yugu' bönni' na' röjáquië' gudil-la. Ní'irö buzé'ë Herodes luyú Judea, sa'yéajë' Cesarea, ate' bugá'anë' ni'.

Ca Gutiérrez Herodes

²⁰ Dza ní'sö rilenë' Herodes bönachi yödzö Tiro, en yödzö Sidón. Zí'alö bönachi lu xiyúë' Herodes na' gula'sól-la' le biyadzaj quégaca bönachi lu xiyú-gaca yödzö Tiro, en Sidón na', pero tu' rilenë' Herodes légaquië', bítirö bi

ta'sól-lë'ë quégaquië'. Ní'irö gulunë' tuz bönni' Tiro, en Sidón na', ate' gulunë' ga soë' Blasto uné quégaquië' lahuë' Herodes na'. Náquië' Blasto na' huen dxin nadéli'në' lataj lo lahuë' Herodes. Gulé'ënnë' bönni' Tiro, en Sidón na' ila'dxinë' lahuë' Herodes, para ila'nábinë' lë' ugá'ana tsahui' didza' bizxaj quégaquië'. ²¹ Ní'irö budxíë' bë' Herodes dza yönnë' légaquië', ate' dza na' gurö'ë xilatjë' ga ruchí'a rusöröë' bi raca, nacué' lari' nazaca', en benë' libán lógaquië'. ²² Ní'irö bulu'lidzë' zidzaj bönni' na', ta'nnë':

—¡Calëga bönni'sö ni! ¡Dios caz ni ru'ë didza'!

²³ La' ná'asö la' bë'të' gubáz lá'ayi queë' Xanru' lë' tu' buzi'ë lë cazë' yölla' ba ral-la' gaca queë' Dios. Ní'irö gurö'ë Herodes na' buzuga', ate' Gutiérrez tu' táguba' lë'.

²⁴ Ní'irö guca libán que xtídzë'ë Xanru', ate' gula'yán nupa nazi' lu ná'agaca le.

Le zí'alö luzuí röjéngaquië' Bernabé, en Saulo libán

²⁵ Cate' Bernabé, en Saulo chibu-lu'dödë' dumí na' lu ná'agaquië' bönni' gula tapa chi'ë bönachi queë' Cristo nacué' Jerusalén, bulu'zë'ë ni', yöjhuój-gaquië' yödzö Antioquía. Gula'ché'ë-bi ca' bi' Juan, zoa ia'tú labi' Marcos.

13 Dza ná'asö gula'cu'ë bönni' tu'ë didza' uláz queë' Dios, en bönni' tu'sédinë' bönachi lu yödzö Antioquía, tunë' tu zxön bönachi queë' Cristo lu yödzö na'. Caní légaquië':

Bernabé,

Simón, (lë' ca' Bönni' Gasja),

Lucio, (bönni' Cirene),

Saulo,

Manaén, (bönni' na' guzxónlenë' tsözxón Herodes, bönni' rinná bë'ë luyú Galilea).

²Tsanni ni' nudúbigaquië' bönni' ni queë' Xanru', en tunë' gubasa, Dios Bö' Lá'ayi gudxë' légaquië', rnnë':

—Gulí'béaj-gáquië' quez quia' Bernabé, en Saulo para tsójéngaquië' dxin na' bulidza' légaquië' ilunë'.

³Budxi gulunë' gubasa, en gulu'ílenë' Dios didza', ní'irö gula'xóa ná'agaquië' chopë' ni, en gula'sól-lë'ë légaquië'.

Yugu' gubáz nasól-lë'ë Cristo tunë' libán luyú Chipre

⁴Ní'irö yöjáquië' Bernabé, en Saulo yödzö Seleucia, tu' gusól-lë'ë Dios Bö' Lá'ayi légaquië' ni', ate' ni' gula'benë' tu lë'e barco le guchë' légaquië' ga naca tu luyú bidxi lu nísado', nazí'i le Chipre.

⁵Cate' bila'dxinë' lu yödzö Salamina luyú na', gulu'ë xtídzë'ë Dios gapa naca lu yu'u ga tu'dubë' bönni' judío luyú na', en tu'sëdë' queë' Dios. Nachë'gaquië'-bi' bi'i Juan para gunbi' légaquië' tu zxön.

⁶Budxi gula'dödë' idú gapa dë yödzödo' luyú bidxi na' lu nisa zxön, ní'irö bila'dxinë' yödzö Pafos. Yöjxáca'gaquië' Barjesús, tu bönni' judío ni'. Náquië' bönni' udzá' rinnë' yë'ë, en rnnë' ru'ë didza' uláz queë' Dios. ⁷Bönni' ni dzáguië' Sergio Paulo, bönni' réajni'i rinná bë'ë. Bönni' unná bë' na' bulidzë' Bernabé, en Saulo, tu' ré'ënë' yönnë' xtídzë'ë Dios. ⁸Ní'irö bönni' udzá' na' gudá'baguië' Bernabé, en Saulo, tu' gú'unnë' gunë' ga biti' tséajlë'ë Dios bönni' rinná bë'ë. Bönni' udzá' na' lë' ca' Elimas tsca naca xtídzá'gaca bönachi iza'a ga na'.

⁹Ní'irö Saulo, lë' ca' Pablo, buzóa tsutsu lahuë', zóalenë' Dios Bö' Lá'ayi lë'. Ruyúë' Elimas na' ¹⁰en ré' lë':

—Lí', bönni' rizí' yë', en bönni' huiá' dö', nacu' ca zxf'ini caz tu' xihui', en bönni' biti' rilé'enë' dxi'a yúgu'të le naca tsahui'. ¿Naru' cabí soa dxitso' ca runu', ridá'bagu'u didza' tsahui' queë' Xanru', en ruzágu'u xinóza nu ré'ëni tséajlë' Lë'?

¹¹Na'a, Xanru' usaca' zí'ë lí', ate' ichul-la lo', en biti' ilé'enu' gubidza nababa dza.

La' guchúl-latë lahuë' Elimas na', ate' gudé' nilö ná'alö, riguiljé' nuzxi sön në'ë para ichë' lë'. ¹²Cate' bilé'enë' bönni' unná bë' na' lë' na' guca, bubánninë' ca naca xtídzë'ë Xanru', ate' guyéajlë'ë Cristo.

Le gulunë' Pablo, en Bernabé lu yödzö Antioquía luyú Pisidia

¹³Ní'irö buzë'ë Pablo lu yödzö Pafos na' len yugu' bönni' dzágagaquië' lë', nacu'ë tu lë'e barco, ate' bila'dxinë' yödzö Perge luyú Panfilia. Lu yödzö na' bi'i Juan bulá'alenbi' légaquië', en bóajbi' Jerusalén. ¹⁴Gudödi ni' bulu'zë'ë Perge na', en yöjáquië' yödzö Antioquía luyú Pisidia. Lu yödzö na', cate' ni' naca dza lá'ayi quégaquië' bönni' judío, gula'yázië' lu yu'u ga tu'dubë' tu'sëdë' queë' Dios, ate' lu yu'u na' gula'bö'ë. ¹⁵Ní'irö tu bönni' zoë' ni' bulabë' guichi ga nazúaj xibá queë' Dios, enca' le nazúaj lu guichi ca gula'nnë' bönni' gulu'ë didza' uláz queë' Dios. Gudödi ni' yugu' bönni' unná bë' que yu'u na' gula'sól-lë'ë nu yöjódx Saulo, en Bernabé, gunnë':

—Libí'ili', bóchi'tu'. Channö nuá'ali' bi innali' le uzéajni'i netu', guli'nnë'.

¹⁶Ní'irö guzuínë' Pablo, en guchisa në'ë para ila'cu'ë dxisö, gunnë':

—Bulí'zë' nágali' le guía' libí'ili', bönni' Israel, en libí'ili', núlöli' rádxili'-në' Dios. ¹⁷Xanru' Dios, Nu ta'yéaj ládx-i'gaca bönachi Israel, guró cazë' xuz xtó'oru', en benë' ga gula'yándë'ë cate' ni' nácagaquië' bönni' zí'tu' luyú Egipto. Len yöl-la' huáca zxön queë' bubéajë' légaquië' luyú ni'. ¹⁸Idú choá' iz Dios biá' gulënë' quégaquië' cate' ni' gula'dé' idú luyú bidxi lu lataj cá'asö. ¹⁹Cate' budxi busunítie' gadxi cö' yödzö gula'cuá' luyú Canaán, bunödzjë' xiyúgaca bönachi ni' quégaquië' xuz xtó'oru'. ²⁰Gudödi ni', le guca idú ca tapa gayuá' yu' chi-un

iz, Dios bucu'ë yugu' bönni' bulu'chi'a bulu'söröë' légaquië' ga bidxintë zoë' Samuel, bönni' bë'ë didza' uláz queë' Dios. ²¹ Ní'irö gula'nábinë' Dios uzóë' tu bönni' unná bë' quégaquië'. Dios guróë' Saúl, xzí'inë' Cis, bönni' nababë' di'a dza queë' Benjamín. Idú ca choá' iz gunná bë'enë' Saúl na' légaquië'. ²² Gudödi ni' Dios gudúë' Saúl na', ate' buzóë' David quégaquië' para inná bë'ë. Dios benë' ba nalí queë' David ni, gunné': "Nözda' runë' David, xzí'inë' Isaí, le raza ládxa'a, en gunë' yúgu'të le ré'ënda' neda'." ²³ Ladaj xzí'ini xi'sóë' David na' benë' Dios ga guljë' Jesús para gáquië' bönni' usölë' bönnachi Israel, ca na' guzxf' lu në'ë Dios zí'atëlö gunë'. ²⁴ Zí'alö cate' si' ilá lahuë' Jesús, benë' Juan libán lógaca yúgu'të bönnachi Israel para ulu'bf'i ládxi'gaca, en ila'dila nisa. ²⁵ Cate' ni' chizóa údxi gunë' libán Juan na', gunné': "¿Nuzxi réquili' naca' neda'? Biti' naca' Cristo, bönni' na' ral-la' guídë'. ¡Na'a, buli'yútsöca! Chizóë' idxinë' bönni' na' ga zoa' ni, ate' neda' bití' naca' lesaca' ilecja' xiráchuë' nudé'ë."

²⁶ Libí'ili', bócha'a, yugu' xzí'ini xi'sóë' Abraham, en núlöli' zóali' ni, en rádxili'në' Dios. Dios caz gusól-lë'ë queéli' didza' ni para uláli'. ²⁷ Nupa nacua' Jerusalén, en bönni' ta'nná bë'enë' légaquië' bití' bulu'únbë'ë Jesús, en bití' gula'yéajni'inë' le nazúaj lu guichi le gula'nnë' yugu' bönni' gulu'ë didza' uláz queë' Dios, sal-la' tu'laba cazë' yugu' didza' ni yugu' dza lá'ayi. Lu yöl-la' cabí réajni'i quégaquië' gulunë' ga budxín ca rnna didza' ni cate' ni' gula'chúguië' queë' Jesús gátie'. ²⁸ Sal-la' bití' budzöli le nabáguë'ë Jesús gátie', gula'nábinë' Pilato inná bë'enë' bönni' ilútië' Lë'. ²⁹ Cate' budxi gulunë' queë' yúgu'të le nazúaj lu guichi ca ral-la' gaca queë', bulu'zötjë' Lë' lë'e yaga cruz, en bulu'cáché'ë Lë' yeru ba. ³⁰ ¡Ní'irö Dios busubanë' Lë' lu yöl-la' guti! ³¹ Zían

dza buluf'i lahuë' Jesús lógaca nupa yójacalen Lë' tsözxón cate' ni' buzé'ë luyú Galilea, en bidxinë' Jerusalén. Na'a, yugu' bönni' na' tunë' ba nalí queë' lógaca bönnachi.

³² Caní naca, lësca' netu' ni rusiyöntu' libí'ili' didza' dxi'a ca naca lë na' guzxf' lu në'ë Dios gunë' quégaquië' xuz xtó'oru'. ³³ Lë na' guzxf' lu në'ë Dios quégaquië', Lë cazë' benë' ga budxín queëru', nácaru' xzí'ini xi'sóagaquië'. Caní benë' cate' busubanë' Jesús. Guca ca na' nazúaj lu guichi ga zoa salmo buropi, le rnna caní: "Li' nacu' Xzí'ina'. Neda' buzóa caza' Li'." ³⁴ Ca naca na', Dios busubanë' Lë' lu yöl-la' guti para cabí initi le naca cazë', Lë cazë' Dios gunné' caní: "Gunnel' quiu' le náca gaca bica' ba guzxf' lu na'a lahuë' David." ³⁵ Que lë ni na' nazúaj ca' lu guichi, ga zoa ia'tú salmo, le rnna caní: "Biti' gu'u lataj ugá'anë' bönni' lá'ayi quiu' ga initi le naca cazë'." ³⁶ Le guca queë' David naca bë'. Gudödi benë' dxin lógaca bönnachi uládz queë', ca na' gunná bë'enë' Dios lë', ní'irö gútië', ate' gula'gu'ë lë' yeru ba ga nacué' xuz xtá'ahuë', ate' guniti le naca cazë'. ³⁷ Na'a, ca naca queë' Jesús na', Dios busubanë' Lë', ate' bití' guniti le naca cazë' lu yeru ba. ³⁸ Libí'ili', bócha'a, ralla' inózili' lë ni rusiyöntu' libí'ili'. Dios runiti lahuë' libí'ili' ca naca dul-la' nabága'li' ni'a que le benë' Jesús ni. ³⁹ Na'a, Dios ruúnë' tsahui' yúgu'të nupa ta'yéajlë' Jesús, rugúë' yugu' dul-la' na' le cabí guca ugúa xibá queë' Dios, le bë'ë Moisés. ⁴⁰ Gulí'gún chi'i cuinlí' na'a para cabí gaca queéli' le nazúaj lu guichi le gula'nnë' bönni' gulu'ë didza' uláz queë' Dios, le rnna caní:

⁴¹ Buli'yútsöca', libí'ili', bönni' cabí tunë' neda' bal.

Ubánili', pero lu yöl-la' cabí réajlë' queéli' gátili'.

Neda' guna' tu dxin dza ni zóali',

en sal-la' nu ulu'i lib'i'ili' le rulu'i dxin na', biti' ca' tséajl'éli'.

⁴²Cate' bulu'rúajë' Pablo, en yugu' bönni' na' dzágagaquië' lë' lu yu'u ga na' tu'dubë' bönni' judío, en tu'sedë' queë' Dios, ní'irö bönachi ni' guláta'yu lógaquië' ulu'sédinë' légaquië' ca naca lë ni cate' idxín ia'tú dza lá'ayi quégaquië'. ⁴³Cate' ni' bulu'rúajë' lu yu'u na' bönni' nudúbigaquië' ni', zían bönni' judío, en bönni' nuhuóácagaquië' judío, yugu' bönni' ta'yéaj ládxi'gaquië' Dios, gulunë' tsözxón Pablo, en Bernabé. Chopë' ni gulu'ilenë' légaquië' didza', en bulu'séë ládxi'gaquië' para ilácatica'së' tsutsu, ilunë' löza le ruzá' ládxi'ë Dios quégaquië'.

⁴⁴Ia'xunu' gubidza ca' cate' bidxín ia'tú dza lá'ayi quégaquië', bulu'dubë' lá-tu'biqiu' yúgutë bönachi lu yödzö na' para ila'yönnë' xtídzë'ë Dios. ⁴⁵Ní'irö bulu'zxe'enë' bönni' judío biti' ta'yéajlë'ë, cate' bila'lé'enë' bönachi zían na', ate' gula'nnë' que didza' ru'ë Pablo, en gula'dá'báguë'ë le. ⁴⁶Ní'irö lu yöl-la' rugu ladxi' quégaquië' Pablo, en Bernabé, gulë' yugu' bönni' judío na', ta'nnë':

—Ben bayudxi usiyöntu' lib'i'ili' zí'alö xtídzë'ë Dios, pero tu' rucá'anali' cá'asö didza' ni, en rusáca'li' queéli' biti' nácali' lesaca' sf'ili' yöl-la' na'bán idú ni, que lë ni na', na'a uyéajtu' ga nacua' bönachi izá'a. ⁴⁷Lësca' caní gunná bé'enë Xanru' Dios netu' guntu' libán queë' Cristo lógaca bönachi izá'a, en naca ca rna didza' na' bë'ë Dios ca naca queë' Cristo, gunné':

Nuzóa' Li' para gacu' bení' quégaca bönachi izá'a,
en gacu' Nu usölá bönachi iduté yödzölió.

⁴⁸Cate' bila'yöni bönachi izá'a nacua' ni' didza' ni, bulu'dzéjanë', en gula'gu'ë Xanru' yöl-la' ba ni'a que xtídzë'ë, yúgu'të nupa ni' chinunë' Dios quéguequi gata' quéguequi yöl-la' na'bán idú.

⁴⁹Caní guca, guzé xtídzë'ë Xanru', ate' bila'yöni bönachi yúgu'të yödzö nacua' luyú ni'. ⁵⁰Ní'irö bönni' judío biti' ta'yéajlë'ë na' gula'gu'u yöl-lë'ë yugu' bönni' lo que yödzö ni' para cabí ila'lé'enë' dxi'a Pablo, en Bernabé. Lësca' caní gula'gu'u yöl-lë'ë nigula lo ta'yéaj ládxi'nu Dios. Caní guca, gulunë' ga gula'bía ládxi'gaquië' Pablo, en Bernabé, ate' bulu'láguë' chopë' ni ní'lö lu xiyúgaquië'. ⁵¹Ní'irö Pablo, en Bernabé bulu'quínna-jë' yu bëchtö da' la' lábagaquië' le rulu'i nagá'ana xíguia' nabága'gaca bönachi lu yödzö na', ate' yöjáquië' lu yödzö Iconio. ⁵²Bulu'dzéjanë' bönni' yödzö Antioquia na', bönni' ta'yéajlë'ë Xanru', ate' guzóalenë' Dios Bö' Lá'ayi légaquië'.

Le gulunë' Pablo, en Bernabé lu yödzö Iconio

14 Cate' bila'dxinë' Pablo, en Bernabé yödzö Iconio, gula'yu'ë tsözxón lu yu'u ga tu'dubë' bönni' judío, en tu'sedë' queë' Dios, ate' gulu'ë didza' ni'. Caní guca, zían bönachi judío, enca' zían bönachi izá'a gula'yéajlë' Cristo. ²Ní'irö bönni' judío biti' ta'yéajlë'ë gula'gu'u yöl-lë'ë bal-lë' bönni' izá'a, para cabí ila'lé'enë' dxi'a bóchi'ru' ta'yéajlë'ë Cristo. ³Tu' gula'yéajlë' bönachi zían na' Cristo, gula'cu'ë Pablo, en Bernabé ni' zían dza, ate' lu yöl-la' rugu ladxi' gulu'ë xtídzë'ë Dios, tu' tu'zxöni ládxi'gaquië' Xanru'. Lë cazë' Xanru' bulu'e naca iduté li didza' tu'ë ca naca le ruzá' ládxi'ë Dios quégaca bönachi, tu' bë'ë légaquië' lataj gulunë' yugu' le taca bë', en le tun ga tu'bani bönachi. ⁴Ní'irö bönachi lu yödzö na' bila'rúaj choplö. Bal-lë' gula'dé'ë bönni' judío biti' ta'yéajlë'ë, ate' ia'bal-lë' gula'dé'ë Bernabé, en Pablo, gubáz na' nasól-lë'ë Cristo. ⁵Ní'irö bönni' judío biti' ta'yéajlë'ë na', en yugu' bönni' izá'a ni' gulunë' tuz bönni' ta'nná bé'enë' légaquië', ate' bulu'dubë' para ilu'ë

dö' quégaquié' gubáz na' nasól-lë'é Cristo, en ulu'ladxé' légaquié' guió'j. ⁶Cate' téquibe'ené' Pablo, en Bernabé lë ni, bulu'zxúnnajé' ni', yó'jáquié' yódzö Lистра, en Derbe luyú Licaonia, ate' gula'dödé' yúgu'té yódzödo' idú gásibi'ilö ni', ⁷gapa ni' guluné' libán que didza' dxi'a ca naca queé' Cristo.

Tu'ladxé' Pablo guió'j lu yódzö Lистра

⁸Zoé' tu bönni' lu yódzö Lистра biti' raca së'é. Ró'ösé' ni' tu' cabí rizé'é cate' ni' guljé, en catu caz guzë'e ni'é. ⁹Bönni' ni ruzé náguié' didza' ru'é Pablo. Pablo buyúé' lë, en gúquibe'ené' réajlë'é Cristo para huó'áquié'. ¹⁰Ní'irö Pablo bë'é zidzaj didza', en rë' lë':

—Guzuí.

La' guxítí'té' bönni' na', en guzë'e ni'é. ¹¹Cate' yugu' bönni' Lистра bila'lé'ené' lë na' bené' Pablo, gula'sí lógaquié' tu'é zidzaj didza' lu didza' tu'é bönni' Licaonia na', ta'nné':

—¡Yugu' dios bönni' ni! ¡Nuhuótjagaquié' ga zóaru', en tu'luf'i cuíngaquié' ca nácagaquié' bönni'!

¹²Gula'nné' Bernabé na' náquié' Júpiter, ca lë' dios lo quégaquié', ate' gula'nné' náquié' Pablo Mercurio, ia'tú dios quégaquié'. Caní gula'nné' tu' ru'é didza' Pablo ca na' ta'nné' runé' Mercurio na'. ¹³Zoa yudo' que Júpiter ga ni' nacu'ë, cuita nōza ga ni' ta'yaza bōnachi lu yódzö na'. La' bidxinté' bixúz que Júpiter na', naché'ë-ba' yugu' bēdxi, en nu'ë ca' yugu' breguú' yōj, ate' dzágagaca bōnachi zían lë'. Gulé'ënné' ilútié'-ba' bēdxi na' lógaquié' Pablo, en Bernabé para ila'yéaj lādxi'gaquié' légaquié' ca tuné' quégaca dios quégaquié'. ¹⁴Cate' Bernabé, en Pablo, gubáz na' nasól-lë'é Cristo, guléquibe'ené' lë ni, gula'chözé' lari' nácugaquié'. Tu'huf'ininé' tu' tuné' bönni' ni le cabí ral-la' iluné', ate' gula'xítí'ë, en yōjcu'ë gatsaj lāhui'lö

bōnachi zían na', en gulu'ë zidzaj didza', tē' légaquié':

¹⁵—¡Libí'ili' bōnachi! ¿Bizx que runli' caní? Lësca' bönni' ca libí'ili' nácatu', en rigú'xjöi'itu' libí'ili' lë ni caz ral-la' ucá'anali', le cabí nácate', para guéquilí' queé' Dios ban. Dios ni bené' lúzxiba, en yódzölió, en nísado', en yúgu'té le nacuá' tu tu lataj na'. ¹⁶Yugu' iz chigula'dödi, gulún yúgu'té bōnachi ca rnasö que queé'guequi, ate' Dios biti' buzágué'ë xinó'zguequi, ¹⁷pero bené' ga gulaca le tun ba nalí queé', yugu' le náca-gaca dxi'a bené' quégaquié'. Risól-lë'é queé'ru' nisa guió'j, en runé' ga ta'yán le rázaru'. Ruzölaj rudzé'ené' rë'u, en runé' ga rudzeja lādxi'ru'.

¹⁸Sal-la' Bernabé, en Pablo gulé' légaquié' caní, cánnisö bila'déli'né' bulu'zágué'ë xinó'zguequi bōnachi zían na', para cabí ilútié'-ba' bēdxi na' lógaquié'.

¹⁹Ní'irö bal-lë' bönni' judío biti' ta'yéajlë'ë, narúajgaquié' Antioquía, en Iconio, bila'dxiné' ni', ate' gula'gú'u yó'l-lë'é bōnachi zían na'. Ní'irö yúgu'té' bulu'ladxé' Pablo guió'j, en gulá'ayöjé' lë' ní'ilö ra' yódzö na', tu' téquiné' chinátie'. ²⁰Ní'irö bulu'dubé' yugu' bönni' ta'yéajlë'ë Cristo idú gásibi'ilö ga dë' Pablo. Guyasé' lë, en buázié' lu yódzö na'. Cate' za' rení' ia'tú dza, burúajlené' Bernabé, yó'jáquié' yódzö Derbe.

²¹Lu yódzö ni' guluné' libán que didza' dxi'a ca naca queé' Jesucristo, ate' bōnachi zían ni' gula'yéajlë' Cristo. Gudödi ni' yōjhuó'jgaquié' Lистра, en Iconio, en Antioquía. ²²Cate' gula'dödé' Bernabé, en Pablo yugu' yódzö na', bulu'tipé' lādxi'gaquié' bönni' ni' ta'yéajlë'ë Cristo, en bulu'sé'ë lādxi'gaquié' ulu'gá'ané' tsutsu ca na' ta'yéajlë'ë Lë'. Gulé' légaquié':

—Rë'u tsaza cázaru' ga rinná bë'é Dios, run bayudxi quí'i sáca'ru' zían le gaca queé'ru'.

²³ Bulu'cu'ë yugu' bönni' gula ilún chi'ë bönachi queë' Cristo tu cö' huéaj bönachi ni' queë' Cristo. Cate' chigulu'ilenë' Dios didza', en gulunë' gubasa, ní'irö gula'gu'ë légaquië' lu në'ë Xanru', Nu na' ta'yéajlë'ë.

**Pablo, en Bernabé tu'dxinë'
Antioquía luyú Siria**

²⁴ Ní'irö Pablo, en Bernabé gula'dödë' luyú Pisidia, ate' bila'dxinë' luyú Panfilia. ²⁵ Budxi gulunë' libán que xtdzë'ë Cristo lu yödzo Perge, yöjajúie' yödzo Atalia. ²⁶ Bulu'zë'ë ni', ate' gula'benë' tu lë'e barco, en bulu'dxinë' yödzo Antioquía, ga na' nacu'ë bönni' queë' Cristo, bönni' na' gula'sól-lë'ë légaquië' tsójéngaqüie' libán, cate' ni' gula'gu'ë légaquië' lu në'ë Dios, Nu na' ruzá' ladxi' quégaquië' ilunë' xichinë', dxin na' chibudxi gulunë'. ²⁷ Cate' ni' bulu'dxinë' Antioquía, bulu'dubi bönachi queë' Cristo nacua' ni'. Ní'irö Pablo, en Bernabé bulu'siyönnë' légaquië' ca nácagaca le zxön benë' Dios lu ná'agaquië', enca' ca benë' Dios, bë'ë yugu' bönachi izá'a lataj ta'yéajlë' ca' Lë'. ²⁸ Pablo, en Bernabé bulu'gá'analënë' bönachi ni' ta'yéajlë' Cristo zían dza.

**Tu'dubë' huen dxin queë'
Cristo lu yödzo Jerusalén**

15 Ní'irö bal-lë' bönni' narúajgaquië' luyú Judea bila'dxinë' yödzo Antioquía, ate' bulu'sédinë' bóchi'ru', bönni' izá'a ni', ta'nné':

—Channö cabí irugu lu xipéla'li' ca nalébitu' runtú' ca na' gunná bë'ë Moisés, biti' gaca uláli'.

² Ní'irö Pablo, en Bernabé gula'dí-lalenë' légaquië' didza', ate' gúcada' dzatsa. Gudödi ni', gula'bóë' Pablo, en Bernabé len ia'bal-lë' bönni' bóchi'ru' ni', para tsójajúie' Jerusalén, en ila'dxinë' lógaquië' gubáz ni' queë' Cristo, enca' lógaquië' bönni' gula tapa chi'ë bönachi

queë' Cristo ni', para iluf'ilenë' légaquië' didza' ca naca lë ni raca, tu'sédinë' bönni' na' bönachi le nachixi.

³ Ní'irö yugu' bönni' queë' Cristo nacu'ë Antioquía bulu'gu'ë légaquië' nöza, ate' gula'dödë' lu xiyú yödzo Fenicia, en luyú Samaria, ate' bulu'siyönnë' bóchi' luzá'aru' yugu' lataj ni' ca guca, bulu'huóajúie' bönni' izá'a queë' Cristo. Lë ni ben ga bulu'dzëjanë' yúgu'të bóchi' luzá'aru' ni'.

⁴ Cate' bila'dxinë' Pablo, en Bernabé lu yödzo Jerusalén, yugu' bönni' queë' Cristo nacu'ë ni', enca' yugu' gubáz nasól-lë'ë Lë', en yugu' bönni' gula tapa chi'ë gulunë' légaquië' bal. Pablo, en Bernabé bulu'siyönnë' légaquië' yúgu'të le benë' Dios lu ná'agaquië'. ⁵ Ní'irö gula'zuínë' bal-lë' bönni' yudo' fariseo, bönni' ta'yéajlë'ë Cristo, en ta'nné':

—Run bayudxi irugu lu xipéla'gaquië' bönni' izá'a na' ta'yéajlë'ë Cristo, en inná bé'eru' légaquië' ilunë' ca rnna bë' xibá queë' Moisés.

⁶ Ní'irö bulu'dubë' gubáz nasól-lë'ë Cristo len bönni' gula tapa chi'ë bönachi queë', para ulu'chi'a ulu'soróë' lë ni raca. ⁷ Gudödi gulu'ë zían didza', guzuínë' Pedro, en gudxë' légaquië':

—Libí'ili', bócha'a. Nöz quézili' ca guca dza ni'te, Dios guró cazë' neda' para guna' libán lógaca bönachi izá'a para ila'yöni didza' dxi'a, en ila'yéajlë' Cristo.

⁸ Dios, Nu nunbë' caz le yu'u icja ládxi'do'gaca bönachi, buzóë' le naca bë' runë' légaquië' bal, gúsól-lë'ë Dios Bö' Lá'ayi quégaquië', ca na' gúsól-lë'ë Lë' queéru'.

⁹ Biti' butsé'ë ca benë' quégaquië', en queéru', en lësca' bunë' dxi'a icja ládxi'do'gaquië' tu' ta'yéajlë'ë Cristo. ¹⁰ Na'a,

¿bizx que run leli'-në' Dios, rusubága'li' yua' xiyéngaca bóchi' luzá'aru'? Yua' ni, le naca le ta'nná bë' xibá queë' Moisés, biti' guca guá'aru' rë'u, en biti' guca ilu'ë xuz xtó'oru' le. ¹¹ Rë'u ni, réajlë'ëru' nuláru' ni'a que le buzá' ládxë'ë Xan-

ru' Jesús queéru', en ca na' nuláru' rë'u, ulu'lé' ca' légaquié'.

¹²Cate' budxi béë Pedro didza' ni, yúgu'té' gula'cu'ë dxisö, ate' bulu'zé nágagaquié' didza' gulu'ë Bernabé, en Pablo. Bulu'siyönné' légaquié' yugu' le taca bé', en le tun ga tu'bani bönachi, yugu' le bené' Dios lu ná'agaquié' ga nacua' bönachi izá'a. ¹³Cate' Bernabé, en Pablo budxi gulu'ë didza' ni, bubí'ë didza' Jacobo, gunné':

—Libí'ili', bócha'a. Buli'zé nágali' le guía' libí'ili'. ¹⁴Simón Pedro chigudíxjöi' quézínë' rë'u ca bené' Dios, bulu'e lahui yöl-la' huáca queé' le zí'alö luzuí lógaca yugu' bönachi izá'a para bubéajé' quez queé' bönachi nútsa'gaca ládjagaquié'. ¹⁵Ca naca lé ni röjlózgaca xtídzagaquié' bönni' gulu'ë didza' uláz queé' Dios, ca na' nazúaj lu guichi lá'ayi, rnna:

¹⁶Dza tödi lé ni huöda', en uchisa' Nu inná bé', bönni' na' tsázié' xilatjé' David. Guna' ca run nu ruchisa tu yu'u naguinnaj.

Uchisa' ca' bönachi ila'cuá' lidxë', nupa nagá'anagaca.

Guna' ca run nu ruchisa tu zö'ö yexu'.

Caní uchisa' le gunná bé'ë David

¹⁷para ulu'guilaj ia'zica'rö bönachi Xanru'.

Ulu'guilaj bönachi izá'a Lé',

ate' si' láguequi: Bönachi Queé' Dios.

¹⁸Caní rnné' Xanru',

Nu na' dza ni'te ben ga naca bé' yúgu'té lé ni.

¹⁹'Que lé ni na' runi neda' biti' ralla' gun níguir' bönachi izá'a, nupa tu'huóaca queé' Dios. ²⁰Ral-la' uzúajru' lu guichi quégaquié' ulu'cá'ané' yugu' le biti' ral-la' ilahué', le nadödi lógaca budó' guiój budó' yaga, en cabí iluné' le ruá' dö', en cabí ilahué' xipéla'gacaba' böa' guixi' biti' narúaj-gacaba' rön, en cabí ilahué' xichönba' bíti'tës böa' guixi'.

²¹Dza ni'te nacua' yúgu'té yödzö nupa tun libán lu yu'u gapa tu'dubé' bönni' judío, en tu'sedé' queé' Dios. Tuné' libán ni' que le buzúajé' lu guichi Moisés. Tu'laba cazé' le yugu' dza lá'ayi.

²²Ní'irö gula'yaza ládxí'gaquié' gubáz nasól-lé'ë Cristo, en bönni' gula tapa chí'ë, en yúgu'té bönachi queé' Cristo, ila'böé' bal-lé' bönni' ládjagaquié', en ila'sól-lé'ë légaquié' Antioquia. Tsójacalené' Pablo, en Bernabé. Chopé' na' gula'böé', légaquié' Judas, zoa ia'tú lé' Barsabás, enca' Silas. Nácagaquié' bönni' lo ládjagaquié' bóchi'ru' ni'. ²³Bulu'zúajé' lu guichi le bulu'dödé' lu ná'agaquié' ilu'ë, le rnna caní:

“Netu', gubáz nasól-lé'ë Cristo, en bönni' gula tun chí'ë, en yugu' bóchi'ru', rugápatu' libí'ili' Dios, bóchi'tu', nácali' bönachi izá'a zóali' Antioquia, en yugu' yödzö luyú Siria, en Cilicia. ²⁴Biyónitu' ca tun bal-la bönachi bila'rúaj ga zóatu', nupa na' biti' nasól-la'tu'. Dutsá'agaquié' libí'ili' len le ta'nné', en tu'bequi böniga icja ládxí'do'oli', tu' ta'nná bé'ë irugu lu xipéla'li', en gunli' ca rinná bé' xibá queé' Moisés. ²⁵Que lé ni na' guyaza ládxí'tu' cate' chibén tuz xtídzatu', gurötu' chopé' bönni', nupa isól-la'tu' para uduyúgaquié' libí'ili'. Guídlengaquié' Bernabé, en Pablo, nupa na' nadxf'iru'. ²⁶Chiyójáquié' Bernabé, en Pablo gapa guzóa bönadxi ilátíé' tu' nadxf'iguequiné' Xanru' Jesucristo. ²⁷Caní naca, risól-la'tu' Judas, en Silas ga zóali'. Chopé' ni ulu'siyönné' libí'ili' lé ni ruzúajtu' lu guichi ni. ²⁸Dios Bö' Lá'ayi buluf'iné' netu' le raza ládxé'ë, en lësca' caní raza ládxí'tu' netu', biti' usubá'gá'rötu' libí'ili' yua', le naca le rinná bé' xibá queé' Moisés, pero yugu' lé nisö run bayudxi gunli':

²⁹Biti' gáguli' le nadödi lógaca budó' guiój budó' yaga.

Biti' gáguli' rön.

Biti' gáguli' xipéla'gacaba' böa' guixi'
biti' narúaj-gácaba' rön.

Biti' gunli' le ruá' dö'.

Channö gun chi'i cuinli' para gunli' ca
rnna yugu' lë ni, gunli' dxi'a."

³⁰Caní guca, yugu' bönni' na'
nasól-la'gaquië' bila'dxinë' Antioquía.
Bulu'tubë' bönachi queë' Cristo
nacuá' ni', ate' gula'gu'ë guichi na' lu
ná'agaquië'. ³¹Cate' chibudxi bulu'labë'
le, bulu'dzéjanë' ca naca le nazúaj lu
guichi na', le ruhué tsahui' légaquië'.

³²Tu' nácaquië' Judas, en Silas bönni'
tu'ë didza' uláz queë' Dios bulu'hué
tsáhuë'ë légaquië', en bulu'tipë'
ládxi'gaquië' bóchi'ru' ni', bulu'gunë'
dxin didza' zían le gulu'ilenë' légaquië'.

³³Gudödi bulu'dzënë' Judas, en Silas
ni' nababa dza, n'irö bóchi'ru' ni'
bulu'zenë' légaquië' dxi'a didza' para
tsöjhuóajgaquië' Jerusalén ga nacu'ë
bönni' gula'sól-lë'ë légaquië'. ³⁴Guyaza
ládxi'ë Silas bugá'anë' Antioquía.
³⁵Bulu'gá'anë' ca' Pablo, en Bernabé
Antioquía na', ate' bulu'sédinë' bönachi,
en gulunë' libán que xtídzë'ë Xanru'.
Lësca' caní gulún zíanrö ca' bönachi.

Risí lahuë' Pablo röjenë' libán le buropi luzuí

³⁶Gudödi nababa dza Pablo gudxë'
Bernabé:

—Uyéajru' leyúbölö tsöjyúgacaru'-në'
bóchi'ru' nacu'ë yúgu'të yödzö gapa
chiyöjneru' libán que xtídzë'ë Xanru',
para ilé'eru' nacxi raca quégaquië'.

³⁷Gú'unnë' Bernabé ila'ché'ë-bi' bi'i
Juan Marcos, tséajlenbi' légaquië',
³⁸pero biti' guyaza ládxi'ë Pablo
ila'ché'ë-bi' tséajlenbi' légaquië' tu'
bulá'alenbi' légaquië' luyú Panfilia, en
bíti'rö yöjénlenbi' légaquië' dxin queë'
Xanru'. ³⁹Biti' guca tuz xtídzä'gaquië'
Bernabé, en Pablo ga bidxintë
bulu'lá'alenë' tuë' ia'túë'. Bernabé
guchë'ë-bi' bi'i Marcos, ate' gula'benë'

tu lë'e barco, yöjáquië' luyú Chipre.
⁴⁰Pablo guróë' Silas para tséajlenë' lë'.
N'irö yugu' bóchi'ru' gula'gu'ë légaquië'
lu në'ë Xanru', en gula'nábinë' Lë' uzá'
ládxi'ë quégaquië', ate' bulu'zë'ë Pablo,
en Silas ni'. ⁴¹Gula'dödë' yugu' yödzö
luyú Siria, en Cilicia, ate' bulu'tipë'
ládxi'gaca bönachi queë' Cristo nacuá'
ni'.

Bi'i Timoteo runbi' tsözxón Pablo, en Silas

16 Gudödi ni' bila'dxinë' Pablo, en
Silas yödzö Derbe, en yödzö Lis-
tra. Zóabi' tu bi'i bönni' ni', réajlë'ëbi'
Cristo, lëbi' Timoteo. Nácabi' zxf'in-
inu tu nigula judío réajlë'ënu Cristo,
pero xúzibi' biti' náquië' judío. ²Yugu'
bóchi'ru' nacu'ë Lистра, en Iconio tunë'
ba nalí queë'ëbi', ta'nnë' runbi' le naca
dxi'a. ³Gú'unnë' Pablo tséajlenbi' bi'i
ni lë', ate' gudélë'ë-bi', en guchúguië'
lu xipéla'bi' ca tun bönachi judío. Caní
benë' para cabí ila'nnë' queë'ëbi' bönni'
judío nacu'ë yugu' yödzö ni', tu' nózigue-
quinë' yúgu'të' xúzibi' biti' náquië' judío.
⁴Cate' Pablo, en nupa dzágagaca lë' gu-
la'dödë' gapa nacuá' yödzö ni', tu tu
yödzö na' bulu'dödë' lu ná'agaquië' yugu'
bóchi'ru' nacu'ë gapa ni' yugu' xibá na'
gulunë' gubáz nasól-lë'ë Cristo, en bönni'
gula tapa chi'ë bönachi queë', nacu'ë
Jerusalén. Bulu'dödë' yugu' xibá ni lu
ná'agaquië' para ilunë' ca rinná bë' xibá
na'. ⁵Caní guca, bönachi yúgu'të cö' bö-
nachi queë' Cristo bila'dipa ládxi'gaca ca
naca le réajlë'ëru' Cristo, ate' gula'yán tu
tu dza.

Tu bönni' Macedonia rulidzë' Pablo lu yëla béchigal

⁶Pablo, en bönni' dzágagaquië' lë' gu-
la'dödë' luyú Frigia, en luyú Galacia, tu'
buzáguë'ë Dios Bö' Lá'ayi xinózgaquië',
para cabí ilunë' libán que xtídzë'ë Xan-
ru' luyú Asia. ⁷Cate' bila'dxinë' luyú

Misia, gul'é'ennë' tsöj'áquië' luyú Bitinia, pero Dios Bö' Lá'ayi, Nu risól-lë'ë Jesús que'érú', bití' bë'ë légaquië' lataj. ⁸Ní'irö gula'dödë' gala' ga dë Misia, ate' yöj'áquië' lu yödzö Troas. Neda' Lucas, ruzúaja' lu guichi lë ni, guzóa' Troas na', ate' yöjsóalena'-në' Pablo. ⁹Lu yödzö ni' Dios buluf'inë' Pablo tu le bilé'enë' lu yëla béchigal. Tu bönni' Macedonia buluf'i lahuë' lë, zufnë', en ráta'yue' lahuë' Pablo, rnnë': "Gudödi ladztu', lu xiyú Macedonia, en gúcalen netu'." ¹⁰Cate' bilé'enë' Pablo lë ni, lë na' buluf'i lahui lë', la' bë' ládxi'tëtü' tséajtu' luyú Macedonia, tu' gúquibe'etu' Dios chibulidzë' netu' tsöjentu' libán que didza' dxi'a ló-gaca bönachi luyú ni'.

Le gulunë' Pablo, en Silas lu yödzö Filipos

¹¹Ní'irö gurentu' lë'e barco, en buzá'atu' Troas. Gudóditu' lirá ga bidxintu' yödzö Samotracia, ate' gudödi ia'tú dza bidxintu' yödzö Neápolis. ¹²Buzá'atu' ni', ate' bidxintu' Filipos, yödzö na' nácarö lo ca yúgu'të yödzö nabábagaca tsólá'a ni' luyú Macedonia. Lu yödzö ni' yugu' bönni' Roma nucuá'agaquië' bönachi uládz quegaquië'. Lu yödzö nisö guzóatu' nababa dza. ¹³Cate' bidxín tu dza lá'ayi, birúajtu' lu yödzö, en guyéajtu' ra' yegu ga na' tu'dubi caz bönachi yödzö na', en tu'lidza Dios. Guró'ötu' ni', en busiyöntu' yugu' nigula nudúbigacanu ni' ca naca xtídzë'ë Xanru'. ¹⁴Nútsa'nu ládjagacanu Lidia, tu nigula Tiatira. Nácanu nigula rúti'nu lari' xiná chul-la le nazáca'da'. Reaj ládxi'nu Dios, ate' buzé náganu didza' ru'ë Pablo, ate' Xanru' gúcalenë'-nu para guxzí' lu ná'anu didza' na' bë'ë. ¹⁵Ní'irö bidílanu lënu nisa, ate' gula'dila ca' nisa bönachi nacuá' lídxi'nu. Gudödi ni' gúta'yunu lotu', gunnánu:

—Channö réquibe'eli' réajlë'a Xanru', guli'tsaza lidxa', en guli'sóa ni'.

Bennu bayudxi ugá'anatu' ni'.

¹⁶Ia'tú le guca tu dza tsanni ni' zéajtu' ga na' rulidztu'-në' Dios, birúajbi' dutságabi' tu bi'i nigula netu' yu'u lëbi' bö' le run ga rinné yá'abi'. Len yöl-la' rinné ya'a queébi' runbi' ga ta'z'í'dë'ë dumí yugu' bönni' xanbi'. ¹⁷Bi'i nigula ni sudunóbi'-në' Pablo, en netu', ru'í'ibi' zidzaj didza', rnnabi':

—¡Yugu' bönni' ni tunë' xichinë' Dios nayépisëtë'rë'! ¡Tu'siyönnë' lib'í'ili' naca gaca uláli'!

¹⁸Caní benbi' zían dza. Cate' bíti'rö guyaza ládxi'ë Pablo, buécjë', en bulidzë' bö' na' yu'u lëbi', rnnë':

—Lu Lë' Xanru' Jesucristo, rinná bé'eda' lí'. ¡Burúaj icja ládxi'do'obi' bi'i nigula ni!

La' ní'isö burúajtë bö' na'.

¹⁹Cate' bila'lé'enë' xanbi' chiburúaj bö' na' run ga rinné yá'abi', en bíti'rö naca löza ila'zi'ë dumí ni'a queébi', que lë ni na' gula'zönë' Pablo, en Silas, ate' gula'ché'ë légaquië' lógaquië' bönni' yúlahui', nudúbigaquië' ga naca lu yé'ëyi. ²⁰Bulu'cu'ë légaquië' lógaquië' bönni' yúlahui' na', ta'nnë':

—Yugu' bönni' ni nácagaquië' judío, en tunë' ga tu'tsatsa bönachi yödzö ni. ²¹Tu'sédinë' le cabí ral-la' sí' lu ná'aru', en bití' ral-la' gunru', tu' nabábaru' Roma.

²²Ní'irö bönachi zían ni' gula'dá-baga' Pablo, en Silas, ate' yugu' bönni' yúlahui' gula'nná bé'enë' nupa gula'lecja lari' nácugaquië' Pablo, en Silas, ate' gula'guiné' légaquië' gubá'ayi. ²³Gudödi gula'guíndë'ë légaquië', gula'gu'ë légaquië' lidxi guíë. Gula'nná bé'enë' bönni' rusayjë' lidxi guíë na' gun chí'idë'ë légaquië'. ²⁴Bönni' ni, cate' chigula'nná bé'enë' lë' caní, gulu'ë légaquië' lu yu'u lë'e dxi' lidxi guíë na', en gulu'ë ní'agaquië' yeru yaga ta'zón ní'agaquië'.

²⁵ Idú guluhuēla Pablo, en Silas tu'lidzē' Dios, en tul-lē' yöl-la' ba queē' Dios, ate' ta'yönnē' yugu' bönni' nadzúngaquiē' lidxi gufé na'. ²⁶ Ní'irö tsáldo'os gudödi budó' zxu' bach. Caní guca ga bidxintē' guxzizi xilibi zö'ö lidxi gufé na', ate' la' gula'yáljatē' yúgu'tē' gapa nu riyaza, ate' bulu'huédxi ca' yugu' du gufé nága'gaca bönni' nadzúngaquiē' ni'. ²⁷ Bubanē' bönni' na' rusayjē' lidxi gufé. Cate' bilé'enē' nayálgagaca gapa nu riyaza lidxi gufé na', gulecjē' gufé tuchi' queē' para guti cuiné', tu' réquinē' chibulu'zxúnnajē' bönni' nadzúngaquiē' lidxi gufé na'. ²⁸ Ní'irö Pablo zidzaj bulidzē' lē', gunné':

—¡Biti' bi gúni cuinu', tu' zóatu' ni yúgu'tētu'!

²⁹ Ní'irö bönni' na' gunabē' guf', ate' gudá'atē' lu yu'u lidxi gufé na'. Guxzízidē' lu yöl-la' radxi, ate' biyéchuē' xiní'agaquiē' Pablo, en Silas. ³⁰ Cate' chinubéajē' légaquiē' lidxi gufé na', gudxē' légaquiē':

—Libi'ili', bönni', ¿bizxi ral-la' guna' para ulá'?

³¹ Légaquiē' tē' lē':

—Guyéajlē' Xanru' Jesucristo, ate' uló' li', en lēasca' caní ulu'lágaca bönachi nacua' lidxu'.

³² Guluf'ilenē' lē' didza' ca naca xtídzē' Xanru', dzágagaca lē' yúgu'tē' bönachi nacua' lidxē'. ³³ La' ná'asö, ni' naca chi'i dzó'ölö la' guchē'tē' légaquiē', ate' yöjtibē' légaquiē' ga dxíagaquiē' huē'. Gudödi ni', la' bidílatē' nisa, ate' gula'dila ca' nisa yúgu'tē' bönachi nacua' lidxē'. ³⁴ Ní'irö guchē' légaquiē' lidxē', en bē'ē le gulahuē'. Rudzéjanē' lē', en tu'dzeja ca' yúgu'tē' bönachi nacua' lidxē' tu' ta'yéajlē' Dios.

³⁵ Cate' za' rení' dza na', yugu' bönni' yúlahui' gula'sól-lē'ē' ni'a ná'agaquiē', ate' gulé' bönni' na' rusayjē' lidxi gufé:

—Busán-gáquiē' bönni' na'.

³⁶ Ní'irö bönni' na' rusayjē' lidxi gufé gudíxjöi'inē' Pablo didza' ni, gunné':

—Gula'sól-lē'ē' bönni' yúlahui' didza' usana' libí'ili'. Na'a, guli'rúaj, en buli'huóaj dxíado' ga rizóali'.

³⁷ Ní'irö birúajē' Pablo, en gudxē' yugu' ni'a ná'agaquiē' bönni' yúlahui' na', gunné':

—Chigula'guiné' netu' lógaca bönachi sal-la' biti' narúguini queé'tu' ca rinná bē' xibá, en gula'gu'ē' netu' lidxi gufé, ate' netu' ni nabábatu' Roma. ¿Naru' tu'santsē' netu' bagáchi'sö? ¡Biti' ca' gaca! ¡Ilídigarē' légaquiē' udusángaquiē' netu'!

³⁸ Yöjhuóajgaquiē' ni'a ná'agaquiē' bönni' yúlahui' na', en bulu'siyönnē' yugu' bönni' yúlahui' didza' ni, ate' légaquiē' guládxinē' cate' bila'yönnē' nabábagaquiē' Pablo, en Silas Roma. ³⁹ Cate' bila'dxinē' lidxi gufé ni', guláta'yue' lógaquiē' Pablo, en Silas cabí ulu'subáguē' légaquiē' xíguia'. Ní'irö gula'béajē' légaquiē' lidxi gufé na', en guláta'yue' lógaquiē' ulu'rúajē' yödzö na'. ⁴⁰ Ní'irö bila'rúajē' Pablo, en Silas lidxi gufé na', ate' gula'yáziē' lídxinu Lidia. Cate' chibila'lē'enē' bóchi'ru' nacu'ē ni', bulu'chíziē' didza' icja nágaquiē', en la' bulu'zá'atē' ni'.

Yugu' bönachi

Tesalónica tunē' dzatsa

17 Gula'dödē' Pablo, en Silas lu yödzö Anfípolis, en lu yödzö Apolonia, ate' bila'dxinē' lu yödzö Tesalónica, ga ni' zoa tu yu'u ga tu'dubē' bönni' judío, en tu'sédē' queē' Dios. ² Bugá'anē' Pablo ni' idú galaj dza, ate' ca run cazē', guyijē' ga zoa yu'u na' cate' naca dza lá'ayi quégaquiē' bönni' judío, ate' bē'lenē' légaquiē' didza'. ³ Buchila lá'anē', en buluf'inē' légaquiē' rusēdi le nazúaj lu guichi lá'ayi run bayudxi qui'i sáquē'ē Cristo, Bönni' na' tunē' löza bönni' judío udusólē' légaquiē', ate'

tödi gátië' ubanë' lu yöl-la' guti. Ní'irö Pablo gudxë' légaquië':

—¡Caní guca queë' bönni' na' lë' Jesús, runa' libán queë' ga ni zóali! ¡Bönni' ni náquië' Cristo!

⁴Ní'irö bal-lë' gula'yéajlë'ë Cristo, ate' gulunë' tsözxón Pablo, en Silas. Lësca' caní zían bönni' izá'a, bönni' ta'yéaj ládx-i'gaquië' Dios, gula'yéajlë'ë Cristo. Lësca' zían nigula lo gula'yéajlë'ënu Cristo.

⁵Ní'irö yugu' bönni' judío biti' ta'yéajlë'ë, lu yöl-la' ruxzë'e quégaquië' Pablo, bulu'tubë' yugu' bönni' biti' nácaquië' tsahui', bönni' ta'dasë' ca'. Cate' chibulu'túbë' bönachi zían, gulunë' ga gulún dzatsa idú lu yödzo na', ate' bayudxi gula'yázië' lidxë' Jasón para ulu'béajë' Pablo, en Silas lógaca bönachi na' tun dzatsa. ⁶Cate' biti' bulu'dzólinë' Pablo, en Silas, gula'béajë' Jasón, en ia'zícá'rë' bóchi'ru' nacu'ë ni', ate' gula'ché'ë légaquië' lógaquië' bönni' yúlahui'. Gulu'ë zidzaj didza', ta'nnë':

—Yugu' bönni' na' nutsá'gaquië' bönachi idútë yödzo'lió chibila'dxinë' ca' ni.

⁷Jasón ni gulu'ë légaquië' lidxë'. Yúgu'të bönni' ni ta'dá'baguë'ë xibá queë' César, bönni' rinná bé'enë' rë'u, ta'nnë': “Zoë' ia'túë' bönni' rinná bë'ë, lë' Jesús.”

⁸Cate' bila'yönnë' yugu' bönni' lu yödzo, en yugu' bönni' yúlahui' na' lë ni, gula'bö'ë böniga. ⁹Ní'irö, gudödi gula'z-i'ë bönni' yúlahui' dumí le bulu'cá'anagarë' Jasón, en ia'zícá'rë' bönni' na', bulu'sanë' légaquië'.

Le gulunë' Pablo, en Silas lu yödzo Berea

¹⁰Ní'irö yugu' bóchi'ru' ni' la' gula'sól-la'të' Pablo, en Silas, ni' naca chi'i dzó'ölö, ate' sójáquië' yödzo Berea. Cate' bila'dxinë' ni', gula'yázië' lu yu'u ga tu'dubë' bönni' judío nacu'ë ni', en tu'sëdë' queë' Dios. ¹¹Gulácarë' tsahui' bönni' ni ca bönni' nacu'ë Tesalónica, tu' gula'z'i' lu ná'agaquië' xtídzë'ë Xanru' idú ládx-

i'gaquië'. Yugu' dza bulu'labë' dxi'a le nazúaj lu guichi lá'ayi, para iléquibe'enë' channö nácatë lë na' rnnë' Pablo. ¹²Caní guca, zían bönni' judío gula'yéajlë'ë Cristo. Lësca' caní, zían bönni' izá'a, yugu' nigula lo, en yugu' bönni' gula'yéajlë'ë Cristo. ¹³Ní'irö cate' guléquibe'enë' bönni' judío nacu'ë Tesalónica, lësca' riguíxjö'ë Pablo xtídzë'ë Dios lu yödzo Berea, yójáquië' ni', en gulunë' ca' ni' ga gulún dzatsa bönachi zían. ¹⁴Ní'irö yugu' bóchi'ru' ni' la' gula'sól-la'të' Pablo, para tsejë' ga naca ra' nísado', pero bulu'gá'anasë' Silas, en bi'i Timoteo lu yödzo Berea. ¹⁵Yugu' bönni' Berea na' gula'ché'ë Pablo lu yödzo Atenas. Ní'irö la' yójhuójgacatë' lu yödzo Berea, tu'ú'ë xtídzë'ë Pablo, para ilé' Silas, en bi'i Timoteo, tsójacatë' ga ni' zoë' Pablo.

Le benë' Pablo lu yödzo Atenas

¹⁶Tsanni ni' zoë' Pablo ribözë' Silas, en bi'i Timoteo, lu yödzo Atenas, ruhu'ini ládxë'ë tu' rilé'enë' ta'yéaj ládx'i'gaca yúgu'të bönachi yödzo na' yugu' budó' guíój budó' yaga. ¹⁷Que lë ni na' bé'lenë' bönni' judío, en bönni' ta'yéaj ládx-i'gaquië' Dios didza' ga naca lu yu'u ga tu'dubë' tu'sëdë' queë' Dios. Yugu' dza bé'lenë' nupa ta'dá lu yé'ëyi didza' ca naca xtídzë'ë Cristo. ¹⁸Bal-lë' bönni' dá'gaquië' le tu'sédinë' bönni' epicúreo, en le tu'sédinë' bönni' estoico guluf'ilenë' Pablo didza'. Bal-lë' gula'nnë':

—¿Bizxi ré'ënitsenë' innë' bönni' huë' didza' ni?

Ia'bal-lë' gula'nnë':

—Réquitu' náquië' nu run libán qué-gaca dios zi'tu'.

Caní gula'nnë' tu' runë' libán Pablo ló-gaquië' que didza' dxi'a queë' Jesús, en que yöl-la' rubán. ¹⁹Ní'irö gula'guélë'ë në'ë Pablo, en gula'ché'ë lë' lu guí'a ga tu'dubë' tu'ë didza', naz'i' le Areópago, ta'nnë':

—¿Naru' huácatsö yónitu' didza' cubi ni rusiyönnu' netu'? ²⁰Rusiyönnu' netu' le tun ga rubánitu'. Ré'énitu' inóztu' bizzi rna didza' ni ru'u.

²¹Biti'rö ta'yaza ládxi'gaquié' iluné' bönni' Atenas na', en bönni' izá'a nacu'é ni', pero ila'yónisiné', en ilu'isé' didza' tu le cubi.

²²Ní'irö guzufiné' Pablo gatsaj láhui'lö lö'a Areópago na', gunné':

—Bönni' Atenas, yúgu'té le rilé'eda' naca bé' reaj ládxi'da'ali' yugu' dios queé'li'. ²³Cate' gudöda' lu yödzö, en buyúgaca' yugu' le reaj ládxi'li', yöjxá-ca'a ca' tu nichu ga ni' nazúaj le rna caní: "Tu Dios, Cuntu Nu Nunbé' Lë'." Dios na' reaj ládxi'li'-né' sal-la' biti' núnbé'éli'-né', Dios ni runa' libán queé' loli'.

²⁴'iDios ni bené' yödzölió, en yúgu'té le nacua' yödzölió ni! ¡Náquié' Xani yehua' yubá, en Xani luyú ni, en biti' ca' zoé' tu yudo' núngaca bönachi! ²⁵Biti' bi riyadzaj queé' le gaca ulu'nödzaj bönachi, tu' runödzjé' Lë' cazé' qué-gaca yúgu'té bönachi yöl-la' na'bán, en yúgu'té le riquíniru'.

²⁶Lë' bené' tuzé' bönni' ga zá'gaca yúgu'té bönachi izá'a para ila'cuá' idú yödzölió, en bulu'e dza ila'cuá', en gapa ral-la' ila'cuá'. ²⁷Dios bucu'é légaquié' para ulu'guiljé' Lë', channö nácati'tés ila'dzöliné' Lë' sal-la' ila'gán ila'zönsé'. Caní raca sal-la' biti' zoé' zítu' ga zóaru' tu turu'. ²⁸Lë' cazé' runé' ga zóaru' nabanru', en bi gaca gunru', en le nácaru'. Naca ca na' gula'nné' bal-lë' bönni' nútsa'gaquié' lib'ili', nupa bulu'zúaj le do' rúl-lali', le ta'nná: "Dí'a dza queé' Dios nácaru'." ²⁹Na'a, channö nácaru' dí'a dza queé' Dios, biti' ral-la' innaru' náquié' Dios ca tu budó' guiój budó' yaga, o tu le néquini oro, o plata, o guiój, le núngaca bönachi ca naca tu le ta'guínnajsö ícjaguequi. ³⁰Dios budödé' cá'asö yugu' le guluné' lu yöl-la' biti'

réajni'i quégaquié' yugu' iz chigula'dödi, pero na'a rinná bé'ené' yúgu'té bönachi iduté yödzölió ulu'bí'i ládxi'gaca. ³¹Dios chinulu'é tu dza cate' uchi'a usöróé' yúgu'té bönachi. Idú tsahui' naca ca uchi'a usöróé' légaquié' lu né'é Jesús, bönni' na' buzóa cazé' Lë', ate' lógaca yúgu'té bönachi bené' tsutsu gaca caní tu' busubané' Lë' lu yöl-la' guti.

³²Cate' bila'yönné' didza' bé'é Pablo ca guca, zoa nu bubán lu yöl-la' guti, bulu'titjé' bal-lë', ate' ia'bal-lë' gula'nné':

—Yóniguetu' ia'tú lë ni ru'u didza' que.

³³Ní'irö burúajé' Pablo gatsaj láhui'lö ga na' nacu'é, söhuójé'. ³⁴Bal-lë' gula'yéajlë'é Cristo, en guluné' tsözxón Pablo. Nútsé'é Dionisio, bönni' areópago, ládjagaquié', ate' nútsa'nu ca' ládjagaquié' nigula na' lënu Dámaris. Ia'bal-lë' na' gula'yéajlë'é ca' Cristo.

Le bené' Pablo lu yödzö Corinto

18 Gudödi guca lë ni, buzé'é Pablo yödzö Atenas na', ate' guyijé' yödzö Corinto. ²Yöjxáquié' Aquilo, tu bönni' judío ni'. Guljé' bönni' ni luyú Ponto, en sí' bidxíngazé' yödzö Corinto na'. Buzé'é luyú Italia len nigula queé', lënu Priscila, tu' gunná bé'é Claudio, bönni' unná bé', ulu'rúajé' yúgu'té bönni' judío yödzö Roma. Guyijé' Pablo ga nacu'é Aquilo, en Priscila na' ³tu' naca tuz dxin tuné' Aquilo, en Pablo. Bugá'analené' légaquié', ate' tsözxón guluné' dxin, tuné' yugu' yu'u guídido'. ⁴Cate' nácgaca dza lá'ayi quégaquié' bönni' judío, razié' Pablo lu yu'u ga tu'dubé' tu'sédé' queé' Dios, ga ni' bé'lené' légaquié' didza'. Gú'unné' ulu'iné' yugu' bönni' judío, en yugu' bönni' izá'a nacu'é ni', naca iduté li le riguíxjö'é ca naca queé' Jesucristo.

⁵Cate' bila'dxiné' Silas, en bi'i Timoteo ni', nuzá'agaquié' luyú Macedonia, nuguf'ide'ené' Pablo, runé' libán que

xtídzë'ë Dios, en runë' ba nalfí lógaquië' bönni' judío, rnnë':

—Jesús náquië' Cristo, Nu na' tunë' löza yugu' bönni' judío udusólë' légaquië'.

⁶Cate' bönni' judío nacu'ë ni' gula'dá'báguë'ë xtídzë'ë, en gula'nnë' zi'ë que, n'í'irö Pablo gudxibë' lari' nácuë' para uluf'inë' légaquië' bítí'rö nabáguë'ë lë' ni'a quégaquië', ate' gudxë' légaquië':

—La' cuínsili' nabága'li' xíguia' que yól-la' guti' queé'li', calëga neda' nabága'a le. Na'a, uyija' ga nacua' bö'nachi izá'a.

⁷N'í'irö burúajë' Pablo ni', en guyijë' lidxë' Justo, bönni' reaj ládxë'ë Dios, ate' zoa lidxë' gal-la' ra' yu'u ga tu'dubë' bönni' judío, en tu'sedë' queë' Dios. ⁸Crispo, bönni' lo que yu'u ga na' tu'dubë' tu'sedë' queë' Dios guyéajlë'ë Xanru' Jesús, ate' dzágagaca lë' yúgu'të bö'nachi nacua' lidxë'. Cate' bila'yönnë' xtídzë'ë Dios, zían bönni' Corinto gula'yéajlë'ë Cristo, ate' gula'dilë' nisa. ⁹N'í'irö Lë' cazë' Xanru' gudxë' Pablo lu yëla béchigal, gunné':

—Biti' gádxinu', en bití' su' dxisö, quíxjö'u xtídz'a'a, ¹⁰tu' zóalen caza' neda' li', ate' cuntu nu uzapa' në'e li' para guá' dö' quiu', tu' néquiguequi quia' bö'nachi zían lu yödzö ni.

¹¹Bugá'anë' Pablo ni' idü ca tu iz yu' gatsaj, ate' busédinë' légaquië' xtídzë'ë Dios.

¹²Cate' bidxín dza rinná bë'ë Galión luyú Acaya, guláquië' tuz bönni' judío bití' ta'yéajlë', ate' gula'dá'báguë'ë Pablo, en gula'ché'ë lë' ga rö'ë ruchi'a rusöröë' Galión na'. ¹³Gulé' Galión na':

—Bönni' ni rigú'u yól-lë'ë bö'nachi para ilunë' bal Dios, ca ridá'baga' xibá queé'tu'.

¹⁴Cate' chizóa gu'ë didza' Pablo, Galión na' gudxë' yugu' bönni' judío, rnnë':

—Libí'ili', bönni' judío, la'tu' guca tu le riguitsaj xibá queë' César, o tu le ruá' dö', guá' ilena' uzë' naga' xtídz'a'li' ca ral-la' guna', ¹⁵pero channö naca didza' bizxaj

que dídz'a'sö, o que lágaca bö'nachi, en ca naca xibá queé'zili', guli'cá'ana tsahui' libí'isili', tu' cabí ré'ënda' neda' gaca' nu uchi'a usörö yugu' le caní.

¹⁶N'í'irö Galión bulágui'ë légaquië' lu yu'u yúlahui'. ¹⁷N'í'irö yúgu'të bönni' uládz na' gula'guélë'ë Sóstenes, bönni' lo que yu'u ga tu'dubë' bönni' judío, en tu'sedë' queë' Dios, ate' gula'guínë' lë' lö'a yúlahui', pero bití' bë' ládxë'ë Galión lë na' raca.

¹⁸Pablo bugá'anë' lu yödzö na' zían dza, ate' gudödi busiyönnë' bóchi'ru' nacu'ë ni' didza', guyijë' yödzö Cencia, ga ni' benë' yútusö icjë', tu' dë tu le nazi' lu në'ë lahuë' Dios gunë'. N'í'irö gurenë' tu lë'e barco, para tsejë' luyú Siria, dzágagaquië' lë' Priscila, en Aquilo. ¹⁹Cate' bila'dxinë' yödzö Éfeso, Pablo bulá'alënë' légaquië' ni'. Guyáz-ië' lu yu'u ga tu'dubë' bönni' judío, en tu'sedë' queë' Dios, ate' bé'lenë' nupa nacua' ni' didza'. ²⁰Yugu' bönni' ni' gulá'ta'yue' lahuë' Pablo ugá'analenë' légaquië' ia'lati' xidzé, pero lë' bití' gú'unë'. ²¹Bé'lenë' légaquië' didza', gunné':

—Run bayudxi soa' gapa' laní si' gaca Jerusalén, ate' leyúbölö huöda' ga ni zóali', channö gué'ënnë' Dios.

N'í'irö gurenë' Pablo tu lë'e barco, en buzë'ë Éfeso na'.

Ridxinë' Pablo Antioquía, ate' risí lahuë' röjenë' libán le bunny luzuí

²²Gudödi bidxinë' Pablo yödzö Censarea, gurenë' guyijë' Jerusalén, ga ni' yöjyúë' bö'nachi queë' Cristo, ate' n'í'irö buzë'ë ni', en guyijë' Antioquía. ²³Gudödi zoë' ni' nababa dza, buzë'ë ni', sa'yéajë' tu tu yödzö luyú Galacia, en Frigia. Benë' tsutsu bóchi'ru' nacu'ë ni' ca naca le ta'yéajlë'ë Cristo.

Runë' libán Apolos lu yödzö Éfeso

²⁴Tu dza ni' bidxinë' Apolos, tu bönni' judío lu yödzö Éfeso. Guljë' bönni'

ni lu yödzo Alejandría, en nabé'ede'ené' ru'ë didza', en nazédadé'ë le nazúaj lu guichi lá'ayi. ²⁵ Chinazédé' bönni' ni ca naca le réajlé'ëru' Xanru'. Idú ládxé'ë bé'ë didza', en ca nácaté busédiné' bönachi ca naca queé' Jesús, sal-la' nún-bé'ë tuz le ruquíla bönachi nisa ca bené' Juan. ²⁶ Gusí lahué' Apolos ru'ë didza' idú ládxé'ë ga naca lu yu'u ga tu'dubé' bönni' judío, en tu'sédé' queé' Dios. Cate' Priscila, en Aquilo bila'yönné' didza' ru'ë Apolos na', gula'ché'ë lé' quez, en bulu'zéajni'iröné' lé' xibá queé' Dios. ²⁷ Cate' gú'unné' Apolos tödé' luyú Acaya, bulu'tipé' ládxé'ë, ate' bulu'zúajé' tu lu guichi le tsöjuá'gaquié' quégaquié' bönni' teaj ládxé'ë Cristo luyú Acaya na', para iluné' Apolos na' bal. Cate' bidxiné' Apolos luyú na', yugu' bönni' ni' teaj ládxé'ë Cristo bulu'z'f'dé'ë xibé didza' ru'ë Apolos na', tu' ruzá' ládxé'ë Dios quégaquié'. ²⁸ Caní guca, tu' bucul-lé' Apolos na' yugu' bönni' judío ni' lógaca yúgu'té bönachi, tu' buguné' dxin le nazúaj lu guichi lá'ayi, en bulu'e bönni' na' Jesús naca cazé' Cristo.

Le bené' Pablo lu yödzo Éfeso

19 Tsanni ni' zoé' Apolos lu yödzo Corinto, gudödé' Pablo gapa nacua' yödzo ia'lati' ra'lö, ate' bidxiné' Éfeso. Yöjxáquié' bal-lé' bönni' ta'yéajlé'ë Cristo ni'. ² Pablo gunábiné' légaquié', rnné':

—¿Naru' bidisóalené' Dios Bö' Lá'ayi libí'ili' cate' ni' guyéajlé'ëli' Cristo?

Gulé' lé':

—Biti' nayónitu' channö zoé' Dios Bö' Lá'ayi.

³ Ní'irö Pablo gunábiné' légaquié', rnné':

—¿Nacxi guca le bidí'ali' nisa?

Ta'nné':

—Ca buquílé' Juan bönachi nisa.

⁴ Pablo gunné':

—Buquílé' Juan bönachi nisa, nupa ni' bulu'bí'i ládxi'guequi, ate' Juan caz gudxé' léguequi ral-la' ila'yéajlé' Bönni' na' si' zá'télé' ca lé', ate' Bönni' ni naquié' Jesús, Lé' Cristo.

⁵ Cate' yugu' bönni' na' bila'yönné' didza' ni ru'ë Pablo, bila'dilé' nisa tu' chita'yéajlé'ë Xanru' Jesús. ⁶ Cate' guxóa né'ë Pablo légaquié', en ni' rulidzé' Dios, bidisóalené' Dios Bö' Lá'ayi légaquié', ate' gulu'ë didza' yúbölö, en gulu'ë didza' uláz queé' Dios. ⁷ Guláquié' bönni' ni idú chínnué'.

⁸ Guzóé' Pablo idú ca tsonna beo' ni', ate' guyázié' lu yu'u ga tu'dubé' bönni' judío, en tu'sédé' queé' Dios, ate' lu yöl-la' rugu laddi' bené' libán lógaquié'. Bé'lené' légaquié' didza', en gú'unné' ulu'íné' légaquié' nácaté le riguíxjö'ë ca rinná bé'ë Dios. ⁹ Ní'irö bizídi icja ládx-i'do'gaquié' bal-lé', en bití' gula'yéajlé'ë Cristo, ate' gula'nné' z'í'ë que xtídzé'ë Xanru' ga nacua' bönachi zían na'. Ní'irö Pablo bulá'alené' légaquié', ate' bubéaj-jé' quez nupa ta'yéajlé' Cristo. Bé'lené' bönachi ni ta'yéajlé' Cristo didza' yugu' dza ga na' tu'dubé' lu yu'u ga ruséd-iné' Tiranno bönachi. ¹⁰ Caní béntica'sé' Pablo idú ca chopá iz, ate' caní guca, bila'yöni yúgu'té bönachi didza' ca naca queé' Xanru' Jesús, bönachi nacua' yugu' yödzo luyú Asia, bönachi judío, en bönachi izá'a. ¹¹ Dios bené' yugu' yöl-la' huáca zxön lu né'ë Pablo. ¹² Caní guca, bal-lé' bönni' gula'z'í'ë yugu' lári'-do' bégué'ë icjé' Pablo, en yugu' lari' tsólá'a bugalé' lé'ë, ate' yöjuá'gaquié' léguequi gapa nacua' nupa te'e, ate' bulu'huóáquié' ca naca yödzo'hué' que quéégaquié', en bulu'rúaj bö' xihui' yú'u-gaca bönachi na'.

¹³ Ní'irö bal-lé' bönni' judío udá dzaga tu'béajé' bö' xihui' gulé'ënné' ulu'guné' dxin Lé' Xanru' Jesús para ulu'béaj-jé' yugu' bö' xihui' yú'ugaca bönachi, ta'nné':

—Ni'a que Lë' Jesús, Nu na' runë libán que Pablo, rinná bé'etu' lib'ili' urúajli'.

¹⁴Caní gulunë gadxi bönni' xfi'ne' Esceva, tu bönni' judío náquië' bönni' lo ládjagaquië' bixúz unná bé'. ¹⁵Bub'í didza' bö' xihui' na', gunná:

—Núnbe'a-në' Jesús, en núnbe'eda' bönni' lë' Pablo, pero lib'ili', ¿núzxité lib'ili'?

¹⁶Ní'irö guxíti'ë bönni' na' yu'u lë' bö' xihui', yöjenë' légaquië' zi', en bucul-lë' yúgu'të', tu' guxzéqui'rönë' ca légaquië'. Caní guca, xiguídigacasë', en hué'gacatézë' bulu'zxúnnajë' gadxë' bönni' na' lu yu'u ni'. ¹⁷Guzé didza' ca guca lë ni, ate' bila'yöni yúgu'të nupa nacua' lu yödzö Éfeso, bönachi judío, en bönachi izá'a, ate' yúgu'të' guládxiné' Dios. Que lë ni na' gulunë' zxön Lë' Xanru' Jesús.

¹⁸Lësca' bila'dxiné' zían bönni' ta'yéajlë'ë Cristo, en gula'xóalëpë' dul-la' nabá-ga'gaquië', en gula'guíxjö'ë le chigulunë'. ¹⁹Lësca' caní gulunë' zían bönni', zí'alö gulunë' yöl-la' udzá'. Du-juá'agaquië' yugu' guichi udzá' quégaquië', ate' bulu'zégui'ë léguequi lógaca yúgu'të bönachi. Bulu'labë' tscanazáca'gaca guichi na', le guca idú chi un mil dumí plata. ²⁰Caní guca, guzë-da' xtídzë'ë Xanru', en bidéli'da' bönachi zían. Idú ládxi'gaquië' gula'yéajlë'ë Cristo.

²¹Gudödi gulaca lë ni, benë' queë' Pablo tsejë' Jerusalén, pero zí'alö ral-la' tödë' yugu' yödzö luyú Macedonia, en luyú Acaya, ate' gunné':

—Tödi tseja' Jerusalén, run bayudxi tseja' ca' Roma.

²²Ní'irö gusól-lë'ë-bi' chópabi' bi'i bönni' tácalenbi' lë', légcabi' Timoteo, en Erasto, luyú Macedonia, pero bugá'anë' lë' nababa dza luyú Asia na'.

Tu'tsatsa bönachi lu yödzö Éfeso

²³Bulu'tsatsa bönachi Éfeso dza ni', ate' gula'dá'baguë'ë xtídzë'ë

Xanru'. ²⁴Benë' Demetrio, bönni' gubëdxi guíë plata ga bulu'tsatsë'. Run cazë' yugu' lidxi budó' guiój budó' yaga néquiguequini plata que dios quégaquië', lënu Diana. Gula'zi'ë bönni' tunë' dxin ni dumí bach. ²⁵Butubë' Demetrio na' ia'zica'rë' bönni' tunë' la' dxin nisö, ate' gudxë' légaquië':

—Böcha'a, nöz quézili' ca naca dxin runru', runna dumí queëru'. ²⁶Rilé'eli', en riyönili' ca runë' Pablo na'. Calégasö Éfeso ni, pero idú luyú Asia chibidéli'në' bönachi zían, ate' chibutsë'ë ca tunë', tu' rë' légaquië': "Yúgu le núngaca bönachi biti' nacagaca dios." ²⁷Calégasö zoa bönadxi ugá'ana cá'asö dxin ni runru', pero lësca' zoa bönadxi ugá'ana cá'asö yudo' que dios zxön lënu Diana. Caní gaca, ugá'ana cá'asö yöl-la' zxön queënu, dios ni ta'yéaj ládxi'gaca-nu bönachi iduté luyú Asia, enca' iduté yödzöliö.

²⁸Cate' yugu' bönni' na' bila'yönnë' didza' ni, gula'léde'enë', ate' gulu'ë zidzaj didza', ta'nnë':

—Nácatëronu zxön Diana, dios queëru' rë'u, bönachi Éfeso.

²⁹Caní guca, bulu'tsatsa bönachi iduté lu yödzö na', ate' guláquië' tuz, en carelö yöjáquië' lö'a yúlahui'. Gulá'ayöjë' Gayo, en Aristarco, bönni' Macedonia túngaquië' Pablo tsözxön, ga ni'. ³⁰Cate' gú'unnë' Pablo tsázië' ga nacua' bönachi zían na', biti' ca' gulu'ë lë' lataj bönni' ta'yéajlë'ë Cristo. ³¹Lësca' caní gulunë' bal-lë' bönni' yúlahui' que luyú Asia, bönni' ta'lé'enë' Pablo dxi'a. Gula'sól-lë'ë queë' nupa gulá'ta'yu lahuë' biti' tsazië' lö'a yúlahui' na'. ³²Ga ni' tu'tsatsë', en ta'bódxí'ë, tu le ta'nnë' bal-lë', en ia'tú le ta'nnë' ia'zica'rë', tu' ró'ögacasë' baröli bönni' zían na' tu'tsatsë', en lá'tu'biqui' yúgu'tëgaquië' biti' nózguequinë' bizx que na' nudúbigaquië' ni'. ³³Ní'irö yugu' bönni' judío gula'béajë' Alejandro ladaj bönachi zían na', ate' bulu'dxíguë'ë lë' lógaca bönachi zían na'. Bulu'e Alejandro

na' len në'e para ila'bó' dxisò, tu' gú'un-nè' gu'e didza' le gácalen yugu' bönni' judío na' lógaca yúgu'téguequi. ³⁴ Cate' guléquibe'enè' náquiè' judío, yúgu'tè' gulu'è tsòzxón zidzaj didza' idú ca chopahora, ta'nné':

—¡Nácatèronu zxön Diana, dios queéru' rë'u bönachi Éfeso!

³⁵ Ní'irò bönni' uzúaj que yúlahui' benè' ga gula'bó' dxisò bönachi zían na', gunné':

—Bönni' Éfeso, nózigaca yúgu'tè bönachi zoa yudo' queénu Diana, dios zxön, ni. Rë'u ni, bönachi Éfeso, run chí'iru' yudo' na', enca' budó' na' bõxaj ga zóaru', le birúaj lúzxiba. ³⁶ Cuntu nu gaca tá'baga' lè ni. Que lè ni na' run bayudxi sóali' dxisò, en biti' bi gúntézili'. ³⁷ Naché'gacali'-nè' bönni' ni, en biti' ta'banè' le dzò'ò yudo', en biti' ta'nné' xihuè'è queénu dios queéli'. ³⁸ Que lè ni na', channò zoa didza' bizxaj quégaquiè' Demetrio, en yugu' bönni' gubèdxi gufé plata nacua'lenè' lè', len núti'tès bönni', dè lataj ga nu uzé' nagui légaquiè', en zoa nu uchi'a usörò légaquiè'. Ni' huáca ulu'zegui luzá'agaquiè' didza' tuè' ia'túè'. ³⁹ Na'a, channò dè ia'tú le inábali', huáca ucá'anaru' tsahui' le cate' ulu'dubi bönni' yúlahui' ca na' rinná bè' yúlahui'. ⁴⁰ Zoa bönadxi nu zegui rë'u didza' ni'a que dzatsa ni guca na'a, inná ridá'baga'ru' yúlahui'. Biti' bi gaca innaru' bizx que guca dzatsa ni.

⁴¹ Cate' budxi bè'è didza' ni, busól-lè'è bönachi zían na' nudúbigaca ni' tsòhuó'gaca lídxiguequi.

Sa'yéajè' Pablo luyú Macedonia, en luyú Grecia

20 Cate' guró'ò dxi dzatsa na' guca lu yödzo Éfeso, bulidzè' Pablo yugu' bönni' ta'yéajlè'è Cristo, ate' guchíz-iè' icja nágagaquiè' didza'. Gudödi ni' bunidè' légaquiè', en la' bulá'alentè' légaquiè'. Birúajè' ni', ate' sa'yéajè' luyú

Macedonia. ² Gudödè' yugu' yödzo luyú ni', ruzéajni'ide'enè' bóchi'ru' nacu'è ni', ate' gudödi ni' bidxinè' luyú Acaya. ³ Guzòè' Pablo ni' idú ca tsonna beo'. Cate' chizóa cuenè' tu lè'e barco para tsejè' luyú Siria, gúquibe'enè' ta'bó' nísíè' bönni' judío lè' para ila'zönè' lè'. Que lè ni na' buguélè'è nõza sòhuó'jè' luyú Macedonia, ate' bidxinè' yödzo Filipos. ⁴ Sópater, xfi'nè' Pirro, bönni' Berea, en Aristarco, en Segundo, yugu' bönni' Tesalónica, en Gayo, bönni' Derbe, enca' bi'i Timoteo, en Tíquico, en Trófimo, yugu' bönni' Asia, sòjácalenè' tsòzxón lè'. ⁵ Ní'irò yugu' bönni' ni yójnórugaquiè' lahuè' Pablo, yójáquiè' yödzo Troas, ga ni' gula'bözè' lè'. ⁶ Lu yödzo Filipos na', neda', Lucas, yójtsga'-nè' Pablo. Cate' chigudödi laní cate' tahuè' bönni' judío yöta xtila biti' nazí'í cúa zi que, guren-tu' tu lè'e barco, en buzá'atu' Filipos na'. Gudödi gayu' dza budzágatu' bönni' ni' yójnórugaquiè' lahuè' Pablo, yójáquiè' Troas, ate' ni' bugá'anatu' gadxi dza.

Le benè' Pablo lu yödzo Troas

⁷ Dza risí lo le gadxi dza bulu'dubè' bönni' ta'yéajlè'è Cristo para ilahuè' yöta xtila le rusá' ládxi'ru' ca gútiè' Jesucristo. Ni' rusédinè' Pablo légaquiè', en tu' ral-la' uzé'è ni' cate' za' rení' dza na', xidzé bè'è didza', ga bidxintè' gudödi guluhuèla. ⁸ Ga ni' nudúbigaquiè' naca lu yu'u xitsá', ate' nacua' zían le ta'gú'u bení' ga na'. ⁹ Zóabi' bi'i Eutico ni', ró'öbi' ga ra'a lení' que yu'u na', ate' nadódirò yèla lobi' tu' ritunna libán runè' Pablo. Ga ni' ró'öbi' rásibi' bi'i na' naca ga bunny cuía lu yu'u, ate' rásisibi' ca' gubíxitébi', bõxjabi' ga bidxíntèbi' zcan yu'u. Nátitébi' bulu'lisè'-bi'. ¹⁰ Bõtjè' Pablo zcan yu'u na', ate' yójxóè' lèbi', en bunidè'-bi'. Ní'irò gudxè' nupa nacua' ni':

—Biti' gadxi idzóbili'. Nabanbi'.

¹¹ Cate' chibubenë' Pablo xitsá', gudélë'ë yôta xtila, gudahuë'. Ní'irô Pablo bé'lenë' légaquië' didza' ga bidxintë zila balö. Gudödi ni' burúajë' ni'. ¹² Bi'i bönni' ra'bán na' gubíxibi', bulu'ché'ë-bi' nabanbi', en bulu'z'f zxöndë'ë.

Ca guca bidxintu' Mileto

¹³ Gunórutu' lahuë' Pablo, en yöjchen-tu' tu lë'e barco, ate' gudóditu' ga bidxintu' yödzö Asón para tsöjtságotu'-në' Pablo ni', para gaca ca na' chibén xtídzat'u', tu' gú'unnë' Pablo tsejë' ni' sé'esi ni'ë. ¹⁴ Cate' chibudzágotu'-në' lu yödzö Asón na', gurénlenë' netu' lë'e barco, ate' guyéajtu' yödzö Mitilene. ¹⁵ Buzá' barco ni', ate' dza buropi bidxintu' tödi li ga zoa luyú bidxi naz'fi le Quío, ate' ia'tú dza ca' gudóditu' tödi li ga dë yödzö Samos, en bidxintu' yödzö Trogilio ga ni' guzóatu' tu chi'i. Ia'tú dza ca' bidxintu' yödzö Mileto. ¹⁶ Caní bentu' tu' chibenë' queë' Pablo tódise' yödzö Éfeso, para cabí tsenë' luyú Asia, tu' run bayudxi soë' Jerusalén cate' naca dza Pentecostés channö séqui'në'.

Didza' bë'ë Pablo lu yödzö Mileto

¹⁷ Cate' ni' zoë' Pablo lu yödzö Mileto, gusól-lë'ë nu yöjlidza bönni' gula tapa chi'ë bönachi queë' Cristo nacu'ë Éfeso. ¹⁸ Cate' bila'dxinë' ga zoë' Pablo, lë' gudxë' légaquië':

—Libí'ili' chinóz quézili' ca béntica'sa' ga zóali' ga gudela' bidxina' luyú Asia. ¹⁹ Yugu' dza bena' xichinë' Xanru' lu yölla' nöxaj ladxí', ga bidxintë gurödxá' ni'a queé'li', ate' zían le guca quia' le guzxf' bë' neda' ni'a que le ruá' dö' gulunë' quia' bönachi judío biti' ta'yéajlë' Cristo. ²⁰ Béntica'sa' libán ga zóali' que yúgu'të le ruz'í'ili' xibé, en busé-dida' libí'ili' yálajdo' ga nudúbili', en gapa naca lu yu'u lídxili'. ²¹ Bena' ba nalí lógaca bönachi judío, en lógaca bö-

nachi izá'a para ulu'bí'í ladxí'gaca, en ulu'huóaca queë' Dios, en ila'yéajlë' Xanru' Jesucristo. ²² Na'a, Dios Bö' Lá'ayi chinunë' quia' tseja' Jerusalén, en biti' nözda' bizxi gaca quia' ni'. ²³ Yúgu'të yödzö ga ridá', riguíxjöi'inë' Dios Bö' Lá'ayi neda', rë' neda' ila'gu'ë neda' lidxi guíë bönni' judío biti' ta'yéajlë', en ulu'saca' zi'ë neda'. ²⁴ Biti' bi runi neda' que lë na' gaca, sal-la' gátia' o cabí gátia', pero rufi ladxí'sida' údxí guna' le chigudéla'a runa', para guna' dxin na' budödë' Xanru' Jesús lu na'a, le naca guna' libán que didza' dxí'a ca naca le ruzá' ladxë'ë Dios queéru'. Caní guna' len yölla' rudzeja.

²⁵ Na'a, yúgu'tëli' na' chibena' libán loli' ca rinná bë'ë Dios, nözda' bíti'rö ulé'eli' neda'. ²⁶ Que lë ni na', le nácatë rea' libí'ili' na'a dza. Biti' nabá-ga'a neda' queé'li' nituli' libí'ili'. ²⁷ Biti' bi bucáchi'da' libí'ili', pero gudíxjöi'ida' libí'ili' yúgu'të le rnnë' Dios. ²⁸ Que lë ni na', guli'gún chi'i cuinli', en guli'gún chi'i yúgu'të bönachi queë' Cristo, tu' nuzóë' Dios Bö' Lá'ayi libí'ili' para gácalenli' légaquië', en gun ch'í'ili' bönachi queë' Xanru', Bönni' na' gútië' uláz quégaquië', bulaljë' xichönë' le böá'uinë' légaquië'. ²⁹ Chinözda', tödi uzá'a ga zóali', ila'yaza nupa ilé'ëni ulu'suniti bönachi queë' Cristo ga zóali', ilunë' ca tunba' bö'cu' gu'f'a sínia', tu'sunítiba' yugu' bö'cu' zxila'. ³⁰ Ila'ruájë' bönni' nútsa'gaquië' ladjali', ate' ilu'ë didza' biti' nácatë para ulu'béajë' quégacasë' nupa ta'yéajlë' Cristo nútsa'gaca ladjali'. ³¹ Que lë ni na', guli'sóa ban ladxí', en guli'tsöjné ca bena' neda' idú ca tsonna iz, rëla, en tē dza buchízia' icja nágali' tu tuli' ga bidxintë gurödxá' queé'li'.

³² Na'a, böchi' luzá'ado', rigu'a libí'ili' lu në'ë Dios. Rinábida' Lë' uzá' ladxë'ë queé'li', en gunë' ca rnna xtídzë'ë. Dios gunë' libí'ili' tsutsu, en gunë' ga idé'li'li' gunli' tsözxón yugu' bönni' rö queë'.

³³ Catu caz guzé ládxa'a le nequi quégaquië' böchi' luzá'a. Biti' guzé ládxa'a dumí, o lari' quégaquië'. ³⁴ Nöz quézili' dxi'a, len na'a caza' bena' dxin para gaca gá'ua' le biyadzaj quia', en quégaca nupa gula'cuá'len neda'. ³⁵ Ca naca yúgu'të le bena', bulu'ida' lib'ili' caní ral-la' gunru' dxin para gaca gácalenru' nupa bi ta'yadzaj. Ral-la' tsöjneru' didza' bë'ë Xanru' Jesús, gunné: "Uz'irö xibé nu bi runödzej ca nu bi rizf'."

³⁶ Cate' budxi bë'ë Pablo didza' ni, buzóa zxibë', ate' benë' tsözxón yúgu'të', bulu'lidzë' Dios. ³⁷ Ní'irö gula'bödxë' yúgu'të'. Bulu'nidë' yenë' Pablo, en bulu'tsaga lahuë' lë'. ³⁸ Caní gulunë' tu' bulu'huf'innë' ni'a que didza' na' bë'ë Pablo, gunné: "Bíti'rö ulé'eli' neda'." Yójacalenë' tsözxón lë' ga na' gurenë' lu barco.

Sa'yéajë' Pablo Jerusalén

21 Gudödi bulá'alentu' légaquië', guyú'utë nözä barco na', ate' lirá guyéajtu' ga zoa luyú bidxi naz'fi le Cos. Dza buropi na', gudóditu' ia'tú lataj naz'fi le Rodas, ate' buzá'atu' ni', en bidxintu' yödzö Pátara. ² Yójxáca'tu' tu barco yúbölö ni' le zeaj luyú Fenicia. Gurentu' lë'e barco na', ate' guyú'utë nözä. ³ Gudóditu' ga nalá' Chipre, le guta' tsölá'a yögöla, ate' guyéajtu' luyú Siria, ga ni' guyaza barco na' lu yödzö Tiro, tu' ral-la' tsöjca'ana yua' ni' le dzö'ö lë'e barco na'. ⁴ Lu yödzö Tiro na' yójxáca'tu' tu bönni' réajlë'ë Cristo, ate' bugá'analentu' lë', en yugu' bóchi'ru' ni' idú gadxi dza. Tu' chibulu'inë' Dios Bö' Lá'ayi légaquië' le ral-la' gaca queë' Pablo, gulé' lë' biti' tsejë' Jerusalén. ⁵ Cate' chibizá'a dza na', burúajtu' ni', ate' gula'zá'lenë' netu' tsözxón yúgu'të' len nigula que queégaquië', en yugu' bi'i quégaquië', ga bidxintëtu' ní'ilo ra' yödzö na'. Ra' nísado' ni' buzóa zxibitu', en bulidztu'-në' Dios. ⁶ Budxi bunida'

luzá'atu' tutu' ia'tutu', bubentu' lë'e barco, ate' légaquië' yójhuójgaquië' lídxigaquië'.

⁷ Buzá'atë barco na' lu yödzö Tiro, ate' ga yöjsé bidxín lu yödzö Tolemaida. Burúajtu' lë'e barco na' ni'. Bugápatu' Dios bóchi'ru' nacu'ë ni', ate' bugá'analentu' légaquië' tu dza. ⁸ Cate' za' renf' ia'tú dza, burúajë' Pablo ni', ate' dzágatu'-në' netu' guyéajtu' yödzö Cesarea. Ni' guyú'utu' lu yu'u lidxë' Felipe, ate' bugá'analentu' lë'. Runë' Felipe na' libán que didza' dxi'a. Bítse'ë gadxë' bönni' ni' bulu'cu'ë dza ni'te para ilácalenë' bönachi queë' Cristo. ⁹ Nacuá'abi' tapa bi'i nigula ra'bán queë' Felipe na', tu'ibi' didza' uláz queë' Dios. ¹⁰ Gudödi gudzetu' chopa tsonna dza ni', ní'irö bidxinë' Agabo ni', bönni' ru'ë didza' uláz queë' Dios, narúajë' luyú Judea. ¹¹ Bönni' ni' buduyüë' netu', ate' gudélë'ë pan le néquini guídi queë' Pablo. Bégu'ë ni'a na' cuinë', en gunné:

—Caní rnnë' Dios Bö' Lá'ayi: "Caní ilunë' bönni' judío nacu'ë Jerusalén. Ilúguië' bönni' ni nequi queë' pan guídi ni, ate' ulu'dödë' lë' lu ná'agaca bönachi izá'a."

¹² Cate' biyónitu' didza' ni, gúta'yutu' lahuë' Pablo, netu', en nupa nacuá' ni', para cabí tsejë' Jerusalén. ¹³ Bubi'ë didza' Pablo, gunné:

—¿Bizxi ni runli', ribódxili', en rusuhuf'inili' neda'? Neda' chizóa caza' sina', calégasö ilúguië' neda', pero gátia' ca' lu yödzö Jerusalén ni'a queë' Xanru' Jesús.

¹⁴ Tu' cabí guzxéqui'tu'-në' didza', bití'rö bi gúdxitu'-në', ate' gunnatu':

—Gaca ca raza ládxe'ë Xanru'.

¹⁵ Cate' chigula'dödi dza na', bupa'atu' queé'tu', ate' guyéajtu' Jerusalén. ¹⁶ Gula'zá'lenë' netu' bal-lë' bönni' ta'yéajlë'ë Cristo, nacu'ë Cesarea, ate' dzáguië' Mnasón, tu bönni' Chipre, légaquië'.

Réajlë'ë Cristo dza ni'te, ate' ral-la' tsöjgá'anatu' lidxë' bönni' ni.

Pablo röjyúë' Jacobo

¹⁷ Cate' bidxintu' Jerusalén, len yöl-la' rudzeja quégaquië' bóchi'ru' ni' ta'yéajlë'ë Cristo gulunë' netu' bal. ¹⁸ Dza buropi na' Pablo guyázalenë' netu' lu yu'u, yöjyutu'-në' Jacobo, ate' nudúbigaquië' ni' yúgu'të bönni' gula tapa chi'ë bönachi queë' Cristo nacu'ë Jerusalén. ¹⁹ Cate' Pablo chibugapë' légaquië' Dios, busiyönnë' légaquië' yúgu'të le benë' Dios lu në'ë lë' ga nacuá' bönachi izá'a. ²⁰ Cate' bila'yönnë' lë ni, gula'gu'ë Dios yöl-la' ba. Ní'irö gulé' Pablo:

—Nöz quézinu', bóchi'tu', cate' xö zían gáyu'ë bönni' judío ta'yéajlë'ë Cristo, ate' yúgu'të túndë'ë bal xibá queë' Moisés. ²¹ Chibila'yönnë' yugu' le tu'i didza' bönachi le ta'nnë' quiu', ta'nná rigú'u yól-lu'u yúgu'të bönni' judío nútsa'gaquië' ladaj bönachi izá'a, para ulu'cá'anë' le gunná bë'ë Moisés, en rinná bé'enu' légaquië' biti' ila'chúguië' lu xpéla'gacabi' bi'i bönni'do' quégaquië', en biti' ilunë' bal yugu' le nalébiru' runru' rë'u, bönachi judío. ²² ¿Nacxi caz gunru' na'a? Ulu'rúaj bönachi zían cate' ila'yöni chibidxínu' ni. ²³ Na'a, ben lë ni rëtu' li'. Nacuá'lenë' netu' ni tapë' bönni', chinazí' lu ná'agaquië' lahuë' Dios tu le ilunë'. ²⁴ Guchë'ë yugu' bönni' ni, en ben légaquië' tsözxón gun dxi'a cuinli' ca naca que yudo', en gudixxaj li' le ral-la' ila'guixxjë' para ilún yútusó ícagaquië'. Ní'irö ila'nózinë' yúgu'të bönni' judío biti' nácatë lë na' ta'nnë' quiu', pero lëscá' li' runu' le naca dxi'a, en runu' ca rinná bë' xibá queë' Moisés. ²⁵ Ca naca quégaca bönachi izá'a, nupa ni' chita'yéajlë' Cristo, chibén xtídza'tu', en buzúajtu' lu guichi ca ral-la' ilunë'. Biti' run bayudxi ilún chi'ë yugu' lë ni tunë' bönni' judío, pero tuz:

Biti' ilahuë' le ta'gú'u bönachi lógaca budó' guió'j budó' yaga.

Biti' ilahuë' rön.

Biti' ilahuë' xipéla'gacaba' böa' guixi' biti' narúaj-gácaba' rön.

Biti' ilunë' le ruá' dö'.

Ta'zönë' Pablo lö'a yudo'

²⁶ Ní'irö Pablo guchë'ë queë' tapë' bönni' na', ate' dza buropi ni' ben dxi'a cuinë' tsözxón len légaquië' ca naca que yudo'. Ní'irö guyázië' lö'a yudo', para gaca bë' bizxi dza údxi ilunë' le tu'ún dxi'a cúngaquië', dza ni' ral-la' tsöjuá'agaquië' le ila'gu'ë lahuë' Dios que queégaquië'. ²⁷ Cate' chizóa izá'a gadxi dza na', bal-lë' judío narúajgaquië' luyú Asia bila'lé'enë' Pablo, zoë' lö'a yudo'. Gulunë' ga gulún dzatsa bönachi zían, ate' gula'zönë' Pablo. ²⁸ Gulu'ë zidzaj didza', ta'nnë':

—¡Guli'gacalen netu', bönni' Israel! Bönni' ni rusédinë' yúgu'të bönachi yúgu'të lataj ulu'cá'ana cá'asö yödzö queéru', en xibá queë' Moisés, en yudo' queéru' ni. Na'a, chigulu'ë yugu' bönni' izá'a lu yudo' ni. Caní runë', run dí'tjanë' lataj lá'ayi ni.

²⁹ Caní gula'nnë' tu' bila'lé'enë' Pablo zí'alö lu yödzö dzáguie' Trófimo, bönni' Éfeso, en téquinë' gulu'ë bönni' ni lu yudo'.

³⁰ Caní guca, bulu'dubi yúgu'të bönachi yödzö, ate' bila'guirë' ni'. Ní'irö gula'zönë' Pablo, en gulá'ayöjë' lë', bulu'béajë' lë' lö'a yudo', ate' la' bulu'sáyjatë' ga nu riyaza lö'a yudo' na'. ³¹ Cate' chitequi quézinë' ilütië' Pablo, bidxín didza' lahuë' bönni' lo rinná bé'enë' bönni' röjáquië' gudil-la. Biyönnë' tun dzatsa yúgu'të bönachi Jerusalén. ³² Bönni' lo ni la' butúbite' bönni' röjáquië' gudil-la, len bönni' ta'nná bé'enë' légaquië', ate' carelö guyéajlenë' légaquië' ga na' tun dzatsa bönachi na'. Cate' bila'lé'e bönachi ni' bönni' lo na' rinná bé'enë'

bönni' röjáquië' gudil-la, en bönni' na' röjáquië' gudil-la, bulu'sané' ta'guiné' Pablo. ³³ Ní'irö gubígui'ë bönni' lo na', en guzxönë' Pablo, ate' gunná bé'enë' bönni' röjáquië' gudil-la ilúguië' lë' len chopa du gufé. Gudödi ni' gunábinë' bönachi zían ni', rnnë':

—¿Nuzxi caz bönni' ni, en bizxi benë'?

³⁴ Ta'bódxí'a bönachi zían na', que queégaca ca ta'nná. Caní guca, biti' bi guca tséajni'inë' bönni' lo na', tu' tu'tsatsa bönachi na', ate' gunná bé'enë' bönni' röjáquië' gudil-la ila'ché'ë Pablo lu yu'u zxön ga nagá'anagaquië' bönni' na' röjáquië' gudil-la. ³⁵ Cate' bila'dxinë' ga naca ni'yëpi' que yu'u zxön na', bönni' na' röjáquië' gudil-la guluf'inë' Pablo, tu' dxíadi'igaca bönachi zían légaquië', ³⁶ en zá'gaca cúdzu'lögaquië', ta'bódxí'a, ta'nná:

—Guli'gútië'.

Didza' bë'ë Pablo uláz queë' lógaca bönachi

³⁷ Cate' ni' gula'sí lógaquië' ila'gu'ë Pablo lu yu'u zxön ni', lë' gudxë' bönni' lo na' rinná bé'enë' bönni' röjáquië' gudil-la, gunné':

—¿Naru' gunnu' neda' lataj gufa' li' tu didza'?

Bönni' lo na' gudxë' Pablo:

—¿Rácato' didza' griego? ³⁸ ¿Naru' calëga li' bönni' Egipto na' dza lahui nisö butubë' yugu' bönni' gula'dá'baguë'ë yúlahui', ate' guchë'ë idú choá' gáyu'ë bönni' huëti bönachi lu lataj cá'asó?

³⁹ Ní'irö Pablo gudxë' lë', gunné':

—Le nácatë naca' neda' bönni' judío. Gulja' Tarso, tu yödzo lo luyú Cilicia. Rá-ta'yua' lo' gunnu' neda' lataj gu'a didza' lógaca bönachi ni.

⁴⁰ Bönni' lo na' bë'ë lë' lataj, ate' guzuiné' Pablo ga naca ni'yëpi', en guchisa në'ë para ila'cuá' dxisö bönachi zían ni'. Cate' chigula'cu'ë dxisö, Pablo bë'lenë' légaquië' didza' lu didza' hebreo.

22 Caní gunné' Pablo: —Libí'ili', bönni' gula, en libí'ili' bócha'a. Bulizé nágali' le gufa' libí'ili' ca naca le runa'.

² Cate' bila'yönnë' ru'ë didza' hebreo, gula'cuá'arë' dxisö. Pablo gudxë' légaquië', rnnë':

³ —Naca caza' neda' bönni' judío. Gulja' lu yödzo Tarso luyú Cilicia, pero guzxöna' lu yödzo ni, ate' busédinë' Gamaliel neda' idú ca naca xibá quégaquië' xuz xtó'oru'. Bética'sö ládxa'a guyéaj ládxa'a Dios ca runli' libí'ili' na'a. ⁴ Zí'alö gudxía ládxi'gaca'-në' bönni' nazí' lu ná'agaquië' xtídzë'ë Cristo, en guché'gaca'-në' ga ilatië'. Guzxóngaca'-në', en gulú'ugaca'-në' lidxi gufé, yugu' bönni', en nigula. ⁵ Lësca' huáca ilunë' ba nalí yugu' bixúz unná bë', en yugu' bönni' gula tu'zéajni'inë' que le gulunë'. Gulunë' guichi unná bë' le yöju'a ga nacu'ë bóchi'ru' judío lu yödzo Damasco. Guyija' ni' para tsöjxóngaca' nupa ni' ta'yéajlë' Cristo, para idiché'gaca'-në' nága'gaquië' Jerusalén ni, para ilácagaquië' xíguia'.

Riguíxjö'ë Pablo ca böáquië' queë' Cristo

⁶ Ní'irö gunné' Pablo:

—Cate' ni' sa'yéaja' la' nöza, en si' idxina' Damasco, cate' guca idú huagubidza, tsárido'os guyëpi yösa bení' le za' lúzxiba, le buzení' ga na' sa'yéaja'. ⁷ La' yöjótá'tea' lu yu, en biyönda' chi'i Nu gudxi neda': "Saulo, Saulo, ¿bizx que ribía ládxi'u neda'?" ⁸ Ní'irö gunábida' lë', gunnía': "¿Nuzxi li', Xan?" Lë' gudxë' neda': "Neda' ni Jesús, bönni' Nazaret. Neda' caz ribía ládxi'u." ⁹ Nupa ni' gula'cuá'len neda' bila'lé'e caz bení' na', en guladxi, pero biti' bila'yöni chi'i Nu na' bulidza neda'. ¹⁰ Ní'irö gudxa'-në': "¿Nacxi guna', Xan?" Xanru' gudxë' neda': "Guyasa, en guyéaj Damasco. Zoë' ni' tu bönni' gufé' li' ca naca yúgu'të le

ral-la' gunu'." ¹¹ Tu' cabirö rilé'eda' tu' budf'i yösa bení' na' guyé'pida' lahua', que lè ni na' yugu' bönni' dzágagaquiè' neda' gula'guél'è na'a, ate' gula'ché'è neda' ga bidxíntea' Damasco.

¹² Zoè' Ananías ni', tu bönni' runè' idutè ca rinná bè' xibá queè' Dios, ate' yugu' bönni' judío nacu'è Damasco gunè' lè' bal. ¹³ Bidxinè' Ananías na' ga zoa', en gudxè' neda': "Saulo, bócha'a, huóalaj guió'j lo'." La' ní'sö böálaj guió'j lahua', ate' bilé'eda' lè'. ¹⁴ Lè' gudxè' neda': "Dios quégaquiè' xuz xtó'oru', dza ni'te guró cazè' lí' para inózinu' le ré'èni quézinè' Lè', en ilé'enu'-nè' Bönni' Tsahui', Lè cazè' Zxf'inè', en yönnu' le guíè' Lè cazè' lí'. ¹⁵ Caní gaca, tu' ral-la' gunu' ba nalí queè' Lè' lógaca yúgu'tè bönachi, usiyönnu' légaquiè' ca naca le chibilé'enu', en le chibiyóninu'. ¹⁶ Na'a, ¿bizx que ridzenu'? ¡Guyasa, en bidila nisa! Bulidzè' Xanru' para únè' lí' dxi'a, en ugúè' dul-la' nabágu'u'."

Cristo gúsól-lè'è Pablo para gunè' libán lógaca bönachi izá'a

¹⁷ Gunné' ca' Pablo:

—Gudódi ni', cate' budxina' Jerusalén, en tsanni ni' rulidza'-nè' Dios lu chila yudo', bilé'eda' tu le naca ca tu lu yéla béchigal. ¹⁸ Bilé'eda'-nè' Xanru', ate' gudxè' neda': "¡Guyéaj carelò! ¡Burúajtè Jerusalén ni, tu' cabí ilunè' bal bönni' ni le gunu' ba nalí quia'!" ¹⁹ Neda' gudxa'-nè': "Xan, nózgaca quézinè' ca bena' neda'. Guyázia' gapa naca lu yu'u ga tu'dubè' tu'sèdè' bönni' judío queè' Dios. Gudina' nupa ni' ta'yéajlè' Lí', en gulú'ugaca'-nè' lidxi guíè. ²⁰ Cate' ni' gulútiè' Esteban, bönni' ni' benè' ba nalí quiu', lè'sca' zoa' neda' ni', en bena' tuz yugu' bönni' gulútiè' lè' tu' ben chí'a lari' nácugaquiè' bönni' na' bulu'ladxè' lè' guió'j." ²¹ Ní'irö Xanru' gudxè' neda': "Guyéaj, tu' risól-la'a lí' lógaca bönachi izá'a."

Pablo ru'ilenè' bönni' lo didza', bönni' rinná bé'enè' bönni' rójáquiè' gudil-la

²² Nisö ze lo yugu' bönni' judío bulu'zè' nácugaquiè' didza' bè'è Pablo, ate' ní'irö gula'bódx'i'è. Gulu'è zidzaj didza', ta'nnè':

—¡Gulí'gútiè' bönni' ni! ¡Bíti'rö ral-la' soè' ibanè'!

²³ Ní'irö tu' ta'bódx'i'è, en ta'chözè' le nácugaquiè' lu yöl-la' rilé' quégaquiè', en tu'chejè' bëchtö yu lu bö'ös, ²⁴ bönni' lo na' rinná bé'enè' bönni' rójáquiè' gudil-la gunná bè'è ulu'gu'è Pablo lu yu'u zxön na'. Lè'sca' gunná bé'enè' légaquiè' ila'guiné' Pablo para quíxjö'è le nácate, para ila'nózinè' bizx que na' ta'bódx'i'è bönni' judío caní queè' Pablo. ²⁵ Cate' gulúgui'è lè' du guídi para ila'guiné' lè', Pablo gudxè' tu bönni' nacu'è lu në'è bönni' rójáquiè' gudil-la zoè' ni', rnnè':

—¿Naru' dè lataj quínili' neda'? Nababa' Roma, ate' cuntu nu buchí'a busoró neda' channö nabága'a xíguia'.

²⁶ Cate' bönni' na' biyönnè' lè ni, guyijè' yöjtíxjö'i'è bönni' lo na' rinná bé'enè' bönni' rójáquiè' gudil-la. Rè' lè':

—¿Bizxi caz ni runru'? ¡Bönni' ni nababè' Roma!

²⁷ Ní'irö bidè' bönni' lo na' ga zoè' Pablo, en gudxè' lè':

—¡Gudixjö'! ¿Naru' nababu' lí' Roma? Pablo gudxè' lè':

—Ön, nababa'.

²⁸ Bubi'è didza' bönni' lo na', gunné':

—Neda' ni, dumí zían gudizxja' para ibaba' Roma.

Ní'irö Pablo gudxè' lè':

—Neda' gubaba' Roma cate' ni' gulja' tu' nabábagaquiè' xuz xiná'a Roma.

²⁹ Cate' bönni' na' chizóa ila'guiné' lè' bila'yönnè' lè ni, la' bulu'bíga'tè' ga zoè' Pablo. Lè'sca' gúdxinè' bönni' lo na' cate' gunózinè' nababè' Pablo Roma, tu' chigunná bè'è ilúguiè' lè'.

**Ridxinë' Pablo lógaquië'
bönni' yudo' tu'chi'a tu'söröë'**

³⁰ Dza buropi ni', gú'unnë' bönni' lo na' inózinë' gazxi ga rë' bizxi na' yugu' bönni' judío tu'zéguië' Pablo didza'. Gunná bë'ë bulu'sedxë' du guíë na' náguë'ë Pablo, atë' gunná bë'ë ulu'dubë' bixúz unná bë' judío, en yúgu'të bönni' yudo' tu'chi'a tu'söröë'. Ní'irö bubéajë' Pablo ga na' nagú'ugaquië' lë', atë' buzóë' lë' lógaquië'.

23 Ní'irö buyúddë' Pablo lógaquië' bönni' yudo' tu'chi'a tu'söröë' na', en gunné':

—Libí'ili', bócha'a. Ga ridxintë na'a riböza' dxí'ado'. Caní naca, bití' zoa le ruxösa ládxi'da'ahua' neda' lahuë' Dios.

² Ní'irö Ananías, bixúz lo, gunná bé'enë' nupa nacua' cuita lë'ë Pablo ila'gápë'ë ru'ë. ³ Pablo gudxë' lë':

—Lëzca' caní Dios ubi'ë quiu', lí', ru-luf'isö tsahui' cuinu'. ¿Naru' rö'ö cazu' ruchi'a rusöröu' neda' ca rinná bë' xibá, pero ridödi bëtso' ca rinná bë' xibá na', na' rinná bé'enu' ila'gápë'ë neda'?

⁴ Nupa nacua' ní' të Pablo:

—¿Naru' rulidza zi'tso'-në' bixúz lo queë' Dios?

⁵ Pablo gudxë' légaquië':

—Libí'ili', bócha'a. Nazúaj lu guichi, rna: "Bití' ulidza zi'u nu rinná be'e bönnachi uládz quiu'", pero neda' bití' gúquibe'eda' náquië' bixúz lo.

⁶ Ní'irö gúquibe'enë' Pablo bal-lë' nácagaquië' bönni' yudo' saduceo, atë' ia'bal-lë' bönni' yudo' fariseo. Ní'irö bë'ë zidzaj didza' lógaquië' bönni' yudo' tu'chi'a tu'söröë' na', gunné':

—¿Libí'ili', bócha'a! ¡Naca' bönni' fariseo, en naca' zxf'inë' tu bönni' fariseo! ¡Na'a ruchi'a rusöröli' neda' tu runa' löza ulu'bán nupa chinátigaca!

⁷ Cate' bë'ë Pablo didza' ni, bila'rúajë' choplö yugu' bönni' yudo' fariseo, en yugu' bönni' yudo' saduceo, atë' gula'dil-

la dídzë'ë la' légacasë'. ⁸ Caní gulunë' tu' ta'nnë' bönni' saduceo na' bití' ulu'bán nupa chinátigaca, en bití' nacu'ë gubáz lá'ayi, en bití' nacua' bö' nácagaca caz bönnachi, pero ta'yéajlë'ë bönni' yudo' fariseo nácagaca yúgu'të lë ni. ⁹ Que lë ni na' gula'bódxí'ë. Ní'irö gula'yasë' bönni' nazédagaquië' xibá queë' Dios, yugu' bönni' yudo' fariseo, en gula'dil-la dídzë'ë, ta'nnë':

—Rusáca'tu' queëtu' bití' bi dö' nu'ë bönni' ni. Channö tu bö' naca caz bönnachi bé'len lë' didza', o channö tu gubáz lá'ayi queë' Dios bé'lenë' lë' didza', bití' ral-la' tá'baga'ru'-në' Dios.

¹⁰ Cate' chita'díl-lada' dídzë'ë bönni' judío na', gúdxinë' bönni' lo na' rinná bé'enë' bönni' röjáquië' gudil-la, tu' réquinë' ulu'zxuzxaj ulu'quinnajë' Pablo. Ní'irö gunná bé'enë' bönni' röjáquië' gudil-la tsöjléajgaquië' Pablo ladaj bönni' judío na', en ulu'ché'ë lë' lu yu'u zxön ga na' nagá'anagaquië' bönni' na' röjáquië' gudil-la.

¹¹ Cate' chinaca chí' dzó'ölö la' dza ná'asö, buluf'i lahuë' Xanru' ga zoë' Pablo, en gudxë' lë':

—Butipa ládxu'u, Pablo. Ca na' chibenu' ba nalí quia' Jerusalén ni, lësca' run bayudxi gunu' ba nalí quia' lu yödzö Roma.

Tun xtídza'gaquië' ilútië' Pablo

¹² Cate' za' rení' ia'tú dza, gulún xtídza'gaquië' bal-lë' bönni' judío, en gulún tsutsu xtídza'gaquië', ta'nnë' gunë' Dios légaquië' xíguia' channö cabí ilunë' lë na' gulún xtídza'gaquië', gula'nnë' bití' ca' ilë'aj ilahuë' ga idxinrö chigulútië' Pablo. ¹³ Nayanrö ca choá'gaquië' bönni' na' gulún tsutsu xtídza'gaquië' caní. ¹⁴ Yöjáquië' bönni' ni ga nacu'ë yugu' bixúz unná bë', en bönni' gula tu'zëajni'inë' bönnachi judío, atë' gula'nnë':

—Chiben tsutsu xtídza'tu', gunnatu' gunë' Dios netu' xíguia' channö cabí gun-

tu' caní. Biti' gu'aj gágutu' ga gútirötu'-nè' Pablo. ¹⁵ Na'a, libí'ili', en bönni' yudo' tu'chi'a tu'söróè', guli'guíè' bönni' lo rinná bé'enè' bönni' rójáquiè' gudil-la idiché'è Pablo cuxó para idxinè' ga nudúbili', innali' ré'énili' inábili'-nè' Pablo tu didza' gate ga rē'. Netu' cō'ō nistu'-nè' la' nōza, ate' gútitu'-nè' z'f'alō ca idxinè' ni.

¹⁶ Biyónibi' bi'i bönni' queénu nigula zanè' Pablo ca na' ila'bó' nísíè' Pablo, ate' guyéajbi', en guyá'ubi' yu'u zxon na', ate' yójtíxjoi'ibi'-nè' Pablo. ¹⁷ Pablo bulidzè' tuè' bönni' nacu'è lu në'è bönni' rójáquiè' gudil-la en gudxè' lè':

—Guché'è-bi' bi'i ni lahuè' bönni' lo, tu' nuá'abi' didza' guiébi'-nè'.

¹⁸ Ní'irō bönni' na' gudélé'è-bi', en guché'è-bi' ga na' zoè' bönni' lo na', ate' gudxè' lè':

—Bulídzè' Pablo, bönni' na' yu'è lidxi guíè, neda', en gúta'yue' lahua' idigu'a-bi' bi'i ni lo', tu' ré'énibi' güf'ilenbi' lí' didza'.

¹⁹ Bönni' lo na' gudélé'è ná'abi', en guché'è-bi' quez, ate' gunábinè'-bi', rnnè':

—¿Bizxi na' ral-la' guío' neda'?

²⁰ Lèbi' gúdxibi'-nè':

—Chinúngaquiè' didza' bönni' judío iláta'yue' lo' ichè'u-nè' Pablo cuxó, para idxinè' lógaquiè' bönni' yudo' tu'chi'a tu'söróè'. Ilé' lí' té'ènnè' ila'nábinè' lè' tu didza' gate ga rē', ²¹ pero bití' tséajlè'u le ila'nné' tu' nadödi choá'gaquiè' ila'bó' nísíè' Pablo. Chigulún tsutsu xtídzè'è gula'nné' gunè' Dios légaquiè' xíguia' channō cabí ilútiè' lè'. Biti' bi ilè'aj ilahuè' ga idxinrō ilútiè' lè'. Chizóagaquiè' ta'bözè' si' lu no'o gunu' le ila'nábinè' lí'.

²² Ní'irō bönni' lo na' rinná bé'enè' bönni' rójáquiè' gudil-la gunná bé'enè'-bi' cuntú nu guiébi' lè na' chigúdxibi' lè', ate' ní'irō busól-lè'è-bi' bi'i ni.

Ridxinè' Pablo lahuè' Félix, bönni' rinná bē'è luyú na'

²³ Ní'irō bönni' lo na' bulidzè' chopè' bönni' nacu'è tu gáyu'è bönni' rójáquiè' gudil-la lu ná'agaquiè' tu tuè', ate' gunná bé'enè' légaquiè' ulu'cözè' chopa gáyu'è bönni' rójáquiè' gudil-la ta'zè'e ní'agaquiè', en tsónnalalaj yu' chiè' bönni' rójáquiè' gudil-la dxíagaquiè' böa', en chopa gáyu'è bönni' rójáquiè' gudil-la ilu'è yaga tuchi' para tsójáquiè' yödzo Cesarea idú ridödi xtsó'. ²⁴ Lésca' gunná bé'enè' légaquiè' ulu'cözè'-ba' tu böa' cuíè'-ba' Pablo, ate' ila'ché'è lè' dxí'ado', cabí bi gaca queè', para idxinè' lahuè' Félix, bönni' lo rinná bē'è uláz que Roma.

²⁵ Gusól-lè'è ca' tu guichi le rna caní:

²⁶ “Neda', Claudio Lisias, ruzúaja' quiu' lu guichi, bönni' lo unná bē', Félix. Rugapa' Dios lí'.

²⁷ 'Bönni' ni risól-la'a-nè' quiu', gula'zönè' bönni' judío lè', en gulé'ènnè' ilútiè' lè'. Cate' gúquibe'eda' nababè' Roma, guché'gaca'-nè' bönni' rójáquiè' gudil-la, en busólá'-nè' lu ná'agaquiè' judío na'. ²⁸ Gú'unida' inözda' bizxi benè', lè na' tu'zéguiè' lè' didza' bönni' judío, ate' guché'a-nè' lógaquiè' bönni' yudo' tu'chi'a tu'söróè' légaquiè'. ²⁹ Cate' buédxi didza', gunözda' tu'zéguiè' lè' didza' ca naca le rinná bē' xibá quégaquiè', en bití' bi nabáguè'è bönni' ni para nu guti lè', o nu cu'u lè' lidxi guíè. ³⁰ Ní'irō cate' bidxín nu gudíxjoi' neda' ta'bó' nísíè' yugu' bönni' judío lè', la' gusól-la'tea' lè' ga zu', ate' gunná bé'egacada'-nè' bönni' ni tu'zéguiè' lè' didza' ila'dxinè' lo' lí', para ila'guíxjoi'inè' lí' bi didza' nápagaquiè' lè'. ¡Dios gun tsáhuè'è lí'!”

³¹ Ní'irō bönni' na' rójáquiè' gudil-la gula'guélè'è Pablo, en gulunè' ca na' chigunná bé'enè' légaquiè', ate' gula'ché'è lè' yödzo Antípatris, ní' naca

chi'i dzó'ölö. ³² Cate' za' rení' ia'tú dza bönni' rójáquié' gudil-la ta'z'e ní'agaquié' yójhuó'jgaquié' Jerusalén, ate' bönni' rójáquié' gudil-la dxíagaquié' böa' bulu'ú'é nōza, dzágagaquié' Pablo. ³³ Cate' bönni' na' rójáquié' gudil-la naché'gaquié' Pablo bila'dxiné' Cesarea, bulu'nōdzjé' guichi na' lu ně'ē bönni' rinná bē'ē uláz que Roma, en bulu'sudxiné' Pablo lahué'. ³⁴ Gudōdi bula-bé' bönni' unná bē' guichi na', gunábiné' Pablo gazxi bönni' lē'. Cate' gúquibe'ené' nababé' luyú Cilicia, ³⁵ gudxé' lē':

—Yónida' le innó' cate' ila'dxín ni nupa tu'zegui lí' didza'.

Ní'irō gunná bē'ené' ilún chi'ē lē' lu yu'u yúlahui' ga ribō'ē Herodes, bönni' rinná bē'ē, para uchi'a usōrōé' bōnachi.

Pablo ru'ē didza' uláz queé' lahué' Félix

24 Cate' chibizá'a gayu' dza, bidxiné' Ananías, bixúz lo, ní', ate' dzágagaquié' lē' bal-lē' bönni' gula tu'zējajni'iné', en Tértulo, tu bönni' nazé'ede'ené' didza'. Bila'dxiné' lahué' bönni' unná bē', ate' gula'nné' queé' Pablo. ² Cate' chibulu'lidzē' Pablo, ate' bidxiné' ní', gusí lahué' Tértulo ruzégui'ē lē' didza', rnné':

—Bönni' lo unná bē', Félix. Ní'a quiu' lí' ruzi'tu' xibé le run tsahui' netu', ate' lu yól-la' réajni'i quiu' rinná bē'enu' dx-i'a bōnachi uládz queé'tu'. ³ Yúgu'tē lē ni ruzí'tica'stu' xibé gáti'tēs, ate' idú lādxi'tu' rētu' lí': “Xclenu'.” ⁴ Na'a, para cabí upízzjarōtu' lí', ráta'yua' lo' gun zxōn lādxi'u, yōnnu' tu le do' gufētu' lí'. ⁵ Gúquibe'etu' bönni' ni rigú'u yól-lē'ē bōnachi, en runé' ga ta'dá'baguē'ē yúlahui' yugu' bönni' judío nacu'ē iduté' yōdzōlió, en náquié' bönni' lo quégaquié' bönni' dá'gaquié' bönni' Nazaret na'. ⁶ Lē'sca' gú'unné' gun dí'tjané' yudo' queé'tu'. Que lē ni na' guzxoñtu'-né', en gú'u-nitu' uchi'a usōrōtu' lē' ca naca xibá

queé'tu'. ⁷ Ní'irō Lisias, bönni' lo rinná bē'ené' bönni' rójáquié' gudil-la bidxiné' ga zóatu', en lu yól-la' sínia' zxōn bugúé' bönni' ni lu na'tu'. ⁸ Ní'irō gunná bē'ené' Lisias na' ídigaca nupa tu'zegui lē' didza' lo' lí'. Na'a, lí' caz, cate' rinabi yúdxinu-né' Pablo ni, huáca inózinu' gate ga rē' yúgu'tē lē ni ruzéguitu' lē' didza'.

⁹ Lē'sca' caní gula'nné' yugu' bönni' judío ní', gula'nné' naca caz caní. ¹⁰ Ní'irō butásō ně'ē bönni' rinná bē'ē uláz que Roma na' para gu'ē didza' Pablo, ate' lē' bubí'ē didza', gunné':

—Idú lādxa'a quíxjō'a ca naca le runa', tu' chinaca zían iz ruchi'a rusōróu' le raca quégaca bōnachi ladztu'. ¹¹ Le bena' huáca inabu'. Biti' réquini chinnu dza bidxina' Jerusalén para tseaj lādxa'a-né' Dios. ¹² Biti' yójxáca'gaquié' neda' nu ridí'l-lalena' didza', en bití' bena' ga ulu'tsatsa bōnachi ga naca chila yudo', en cabí lu yu'u ga tu'dubé' tu'sedé' queé' Dios, en cabí lu yōdzō. ¹³ Biti' ca' gaca ulu'béaj lié' yugu' lē ni tu'zéguié' neda' didza'. ¹⁴ Lē ni rixóalēpa' lo'. Ca runa' xichiné' Dios quégaquié' xuz xtó'o-tu' nalébi ca le tu'sédiné' légaquié', pero bönni' judío ni tu'ē le: Le ridá'baga' Dios, tu' réajlé'a yúgu'tē le rinná bē' xibá queé' Dios, enca' yúgu'tē le bulu'zúajé' bönni' gulu'ē didza' uláz queé' Dios. ¹⁵ Ca na' légaquié' tuné' lōza Dios, lē'sca' neda' runa' lōza Dios, usubané' nupa chinátigaca, bōnachi tsahui', en bōnachi bití' nácagaca tsahui'. ¹⁶ Que lē ni na' rufí lādxi'tica'sa' cabí íbága'a le gun ga uxós lādxi'da'ahua' neda' lahué' Dios o lógaca bōnachi.

¹⁷ Gudōdi zoa' ga yúbölö idú chopa tsonna iz, budxina' ga nacuá' bōnachi uládz quia' para unōdzja' dumí le gácalen bōnachi yechi', en unōdzja' le rigu'a lahué' Dios. ¹⁸ Tsanni ní' runa' caní, bal-lē' bönni' judío narúajgaquié' luyú Asia bidixáca'gaquié' neda'. Ní' zoa' lō'a yudo', nubéaj dxi'a cuina' ca

naca que yudo', en cabí nutuba' bö-nachi zían, en cabí nuna' ga ulu'tsatsa bönachi. ¹⁹Yugu' bönni' judío ni' rala' ila'dxiné' lo' lí, en ulu'zéguié' neda' didza' channó nápaqaquié' neda' didza'. ²⁰Ila'nnátsöquié' bönni' judío ni channó bulu'dzólíné' bi le cabí naca dxi'a bena' cate' ni' bidxina' lógaquié' bönni' yudo' tu'chi'a tu'söróé' légaquié'. ²¹Tuz cate' ni' zoa' lógaquié', bé'a zidzaj didza', gunná': "Ruchi'a rusöröli' neda' na'a tu'runa' löza ulu'bán nupa chinátigaca."

²²Cate' biyönné' Félix didza' ni, en dxi'ado' chinóziné' ca naca que lè na' rusédiné' Pablo, buzé láhui'sé' ca' didza' bizxaj ni, gunné':

—Cati' idxiné' Lisias, bönni' lo rinná bé'ené' bönni' röjáquié' gudil-la, údxi yónida' ca naca didza' bizxaj queéli'.

²³Ní'irö Félix gunná bé'ené' tu bönni' nacu'é lu në'é bönni' röjáquié' gudil-la zoé' ni', gun chi'é Pablo, pero gu'é lè' lataj tē' lö'a, en biti' uzágué'ë xinóz-gaquié' böchi' luzé'ë duyúgaquié' lè' bi dxin iluné' queé'.

²⁴Chopa tsonna dza gudzé, bidé' leyúbölö Félix na'. Drusila, nigula queé' dzáganu lè'. Nácanu nigula judío. Félix bulidzé' Pablo, ate' buzé náguié' xtídzé'ë ca naca le réajlé'ëru' Jesucristo. ²⁵Cate' bé'ë didza' Pablo ca ral-la' gácaru' tsahui', en inná be'e cuinru', ate' idxinru' ga uchi'a usöróé' Dios rē'u dza sí' za', ní'irö gudxi bidzóbiné' Félix, en gudxé' Pablo:

—Guyéaj na'a. Cate' gapa' lataj ulidza' lí'.

²⁶Lësca' gú'unné' Félix si'ë dumí le unödzejé' Pablo lè' para usané' lè', ate' que lè ni na', zían luzuí bulidzé' Pablo, en bé'lené' lè' didza'. ²⁷Cate' bizá'a chopa iz guyázié' Porcio Festo xilatjé' Félix, ate' tu' gú'unné' Félix guné' le tsaza ládx-i'gaquié' bönni' judío, bucá'ané' Pablo nadzuné' lidxi guié'.

Ridxiné' Pablo lahué' Festo, bönni' unná bé'

25 Bidxiné' Festo yödzö Cesarea para tsázié' xilatjé', gáquié' bönni' unná bé' ulaz que Roma. Cate' bizá'a tsonna dza buzé'ë yödzö na', sa'yéajé' Jerusalén. ²Cate' bidxiné' Festo ni' yugu' bixúz unná bé', en yugu' bönni' lo quégaca bönachi judío bila'dxiné' lahué' para ila'nné' queé' Pablo, ate' gulá-ta'yué' lahué' Festo ³bi uzá' ládxé'ë quégaquié', isól-lé'ë nupa tsöjxí'gaca Pablo, para udxiné' Jerusalén. Gulé'ënné' ila'bó' nísie' lè' la' nöza para ilútié' lè'. ⁴Bubi'ë didza' Festo, gudxé' légaquié':

—Lu yödzö Cesarea nadzuné' Pablo, ate' ral-la' tseja' ni' cuxó huidzaj nisö. ⁵Que lè ni na', núti'tëslöli' dè lu ná'ali', ral-la' sá'lenli' neda', en channó nabágué'ë bönni' ni' xíguia', huáca uzéguili'-né' didza' ni'.

⁶Gudzené' Festo Jerusalén idú ca xunu' gubidza, ate' ní'irö bóajé' Cesarea. Cate' guzá' rení' ia'tú dza guró'ë ga ruchi'a rusöróé', en gunná bé'ené' nupa tsöjxí'gaca Pablo. ⁷Cate' chibidxiné' Pablo ni', yugu' bönni' judío narúajgaquié' Jerusalén gula'gu'é lè' lé'alö, en zían le gula'nné' queé'. Bulu'zéguié' lè' le tu'subágué'ë lè' xíguia', pero biti' guca ulu'béaj lié' yugu' lè na' gula'nné' queé'. ⁸Ní'irö bé'ë didza' Pablo uláz queé', gunné':

—Biti' bi le ruá' dö' bena' que xibá quégaquié' bönni' judío, en cabí que yudo' quégaquié', en cabí queé' César, bönni' Roma, rinná bé'ené' rē'u.

⁹Gú'unné' Festo guné' le ila'yaza ládx-i'gaquié' bönni' judío, ate' bubí'ë didza', gudxé' Pablo:

—¿Ré'ënu' so'o Jerusalén, ga na' soa nu uchi'a usöró lí' ca náca gaca lè ni ta'nné' quiu'?

¹⁰Bubi'ë didza' Pablo, gudxé' lè':

—Zoa caza' ga röö nu ruchi'a rusörö uláz queë César, ga na' ral-la' uchi'a usörö'u' neda'. Biti' bi huiá dö' nuna' quégaquië' bönni' judío, ate' chinóz quézinu' lë ni. ¹¹ La'tu' nuna' tu le ruá dö', o bítitës le run ga íbaga'a xíguia' gátia', bití tá'baga'a gátia'. Na'a, channö cabí nuna' ca ta'nné' quia' bönni' ni, cuntu caz nu dë lu nê'e udödi neda' lu ná'agaquië'. Rinaba' tseja' lahuë' César ga udxí'a uró quia'.

¹² Cate' Festo chibé'lenë' yugu' bönni' yúlahui' didza', bubí'ë didza', gudxë' Pablo:

—Chigunábu' tseju' lahuë' César. Lahuë' César uyiju'.

**Ru'ë didza' Pablo lahuë'
Agripa, bönni' unná bë'**

¹³ Gudödi chopa tsonna dza, bidxinë' Agripa, bönni' rinná bë'ë lu yödzo Cesarea, dzáganu Berenice lë', duyúgaquië' Festo. ¹⁴ Cate' chigula'cu'ë ni' zían dza, Festo buluf'inë' Agripa, bönni' rinná bë'ë, ca naca queë' Pablo. Gudxë' lë':

—Zoë' tu bönni' ni bucá'anë' Félix lë' lidxi gufé. ¹⁵ Cate' guzóa' Jerusalén, yugu' bixúz unná bë', en bönni' gula tu'zéajni'inë', bila'dxinë' lahua', ate' gula'nné' queë' bönni' ni. Gula'nábinë' neda' ichuga' queë' gátie'. ¹⁶ Neda' bubí'a didza', gudxa' légaquië' bití nalébiguequinë' bönni' Roma ila'chúguie' queë' tu bönni' gátie' channö cabí ila'dxini lahuë' nupa tu'zegui lë' didza', para gaca ubi'ë didza' ca naca lë' na' ta'nné' queë'. ¹⁷ Que lë' ni na', cate' bila'dxinë' légaquië' ni, bití' ca' gudzedá', pero cate' guzá' gyeani' ia'tú dza guró'a ga ruchi'a rusöró'a, ate' gunná bé'eda' nupa yöjxí'gaca bönni' ni. ¹⁸ Cate' gula'cu'ë ni bönni' na' tu'zéguie' lë' didza', bití' bi gula'nné' queë' ca busaca' quia' ila'nné'. ¹⁹ Gula'nné' queë' bal-la didza' bizxaj

ca naca le ta'yéajlë'ë Dios, en ca naca queë' tu bönni' lë' Jesús, nu na' guti, pero Pablo runë' tsutsu xtídzë'ë rnnë' ni zoë' nabanë' leyúbölö. ²⁰ Tu' buchíxida' ca nácagaca lë' ni, gunábida'-në' Pablo channö ré'ënë' tsejé' Jerusalén, ga ni' soa nu uchi'a usörö lë' ca nácagaca lë' ni. ²¹ Ní'irö cate' gunabë' Pablo tsejé' lahuë' Augusto César para uchi'a usöröë' lë' ni', gunná bé'eda' bönni' rójáquië' gudil-la ilún ch'ígarë' lë' cate' gála'rö dza isól-la'a-në' lahuë' César.

²² Ní'irö Agripa gudxë' Festo na':

—Lëzca' neda' ré'ënda' yónida' le inné' bönni' na'.

Festo gudxë' lë':

—Cuxó yönnu' le inné'.

²³ Cate' za' rení' ia'tú dza, len ba zxon bila'dxinë' Agripa, en Berenice ni'. Gula'yázië' ga ral-la' ilu'ë didza', dzágagaquië' légaquië' bönni' unná bë', ate' gula'sól-lë'ë nupa tsöjxí'gaca Pablo. ²⁴ Ní'irö Festo gudxë' Agripa, bönni' unná bë':

—Bönni' unná bë', Agripa, en yúgu'tëli' zóali' ni tsözxón len netu'. Ni zoë' rilé'eli'-në' bönni' na', ta'nné' queë' yúgu'të bönni' judío nacu'ë Jerusalén, enca' nupa nacuá' ni, té' neda' ral-la' gátie'. ²⁵ Runi neda' bití' bi benë' le nabáguë'ë xíguia' gátie', pero tu' gunabë' lë' cazë' tsejé' ga uchi'a usöröë' Augusto César lë', que lë' ni na' chinuna' quia' isól-la'a-në' lahuë' Augusto. ²⁶ Tu' cabí nözda' bi ral-la' uzúaja' lu guichi le uzegui bönni' ni didza' para isól-la'a lu nê'ë César, xana', que lë' ni na' nachë'a-në' lolí', en le nácarö lo, nachë'a-në' lo' lí', Agripa, bönni' unná bë', para cate' údxí rinábini yudxu'-në', ní'irö inözda' bi ral-la' uzúaja' lu guichi ca naca queë' bönni' ni. ²⁷ Réquida' bití' naca dxi'a isól-la'a-në' nu bönni' náguë'ë ni' channö cabí gaca ulu'a le nabáguë'ë.

**Didza' b'ë Pablo uláz queë'
lahuë' Agripa, bönni' unná bë'**

26 Ní'irö Agripa gudxë' Pablo:
—Dë lataj gu'u didza' uláz
quiu'.

Buchila në'ë Pablo lahuë' Agripa, ate'
gusí lahuë' ru'ë didza', rñnë':

²—Bönni' unná bë', Agripa. Raza ládxa-
a'a tu' dë lataj na'a gu'a didza' uláz quia'
lo' li' ca naca yúgu'të le tu'zéguië' bö-
nni' judío neda' didza'. ³Raza ládxi'ra' tu'
núnbë'u yúgu'të le nalébiguequinë' tunë'
bönni' judío, enca' yugu' lë ni ridí-latu'
didza'.

Yugu' le benë' Pablo zí'atëlö

⁴Gunné' ca' Pablo:

—Nó'zguequi quézinë' yúgu'të bönni'
judío ca na' bena' ga gudéla'të cuídia'
ga nacuá' bönnachi uládz quia', enca' lu
yödzo Jerusalén. ⁵Nó'zguequi quézinë'
ca', en huáca ila'guíxjö'ë ca na' bena' dza
ni'te. Guca' bönni' fariseo. Yugu' bönni'
fariseo tu'í ládxi'gacarë' ila'yéaj ládxi-
gaquië' Dios ca tunë' ia'zica'rë' bönni'
judío. ⁶Na'a, zoa' ni loli' para nu uchi'a
usöró neda' tu' runa' löza Dios, usub-
anë' bönni' nati, en gunë' ca na' guzxf' lu
në'ë lógaquië' xuz xtó'otu'. ⁷Tunë' löza
yugu' bönni' idxinnu cö' di'a dza queë-
tu' ila'déli'në' lë na' guzxf' lu në'ë Dios.
Que lë ni na' ta'yéaj ládxi'gaquië' Dios,
en tunë' xichinë' rëla, en të dza. Tu'
runa' löza lë ni, nuzégui'gaquië' bönni'
judío neda'. Caní naca, bönni' unná bë',
Agripa. ⁸Na'a, ¿naru' réquitseli' lib'íli'
biti' naca le tséajlë'ëru', usubanë' Dios
bönni' nati?

**Pablo gudxía ládxi'ë'
bönnachi queë' Cristo**

⁹Gunné' ca' Pablo:

—Lézca' neda', zí'atëlö gúquida' le
zián ral-la' guna', tá'baga'a-në' Jesús,
bönni' Nazaret. ¹⁰Caní bena' lu yödzo

Jerusalén. Gulu'a zían bönnachi ta'yéa-
jlë' Jesús lidxi guíë', tu' bulu'dödë' yugu'
bixúz unná bë' lu na'a yöl-la' unná bë'.
Cate' gulútië' bönnachi ni', bënlena' lé-
gaquië' tuz didza'. ¹¹Zián luzuí busaca'
zi'a yugu' bönni' ni' para ulu'sán ládxi-
i'gaquië' ca ta'yéajlë'ë Cristo. Caní be-
na' gapa naca lu yu'u ga tu'dubë' bönni'
judío, en tu'sëdë' queë' Dios. Guléde'eda'
légaquië', ate' gudxía ládxa'a légaquië'
ga bidxintë guyija' gapa nacuá' yödzo zi-
tu' para tsöjxóngaca'-në'.

**Riguíxjö'ë Pablo ca
böáquië' queë' Cristo**

¹²Gunné' ca' Pablo:

—Para guna' caní guyija' yödzo Dam-
asco, ate' bixúz unná bë' nasól-la'gaquië'
neda' nudódigaquië' lu na'a yöl-la' unná
bë'. ¹³Caní guca, bönni' unná bë',
Agripa. Cate' ni' sa'yija' la' nöza, ni' naca
idú huagubidza, bilé'eda' tu bení lúzxi'ba
le buzení'rö ca gubidza. Buzení' ga na'
zoa', en ga nacuá' nupa söjácalen neda'.
¹⁴Ní'irö yúgu'tëtu' gudzó'ötu' lu yu, ate'
biyönda' chí'i nu bulidza neda'. Bë'ë
didza' hebreo, gunné': “Saulo, Saulo,
¿bizx que ribía ládxi'u neda'? Run zi'
cuinu', ridá'bagu'u neda'. Raca quiu'
ca raca queé'ba' bédxi, run zi' cuinba',
richégu'ba' yaga tuchi' le túndë'ë-ba' zi'.”
¹⁵Ní'irö gudxa'-në': “¿Nuzxi li', Xan?”
Xanru' gudxë' neda': “Neda' ni Jesús,
Nu na' ribía ládxi'u.” ¹⁶Na'a, guyasa, en
guzuí, tu' buluf'i lahua' li' na'a, para
uzóa' li' gunu' xichina', en gunu' ba nalí
que lë ni chibilé'enu', enca' quégaca le
ulu'í'ida' li', uluf'i lahua' ga zu'. ¹⁷Usölá'
li' lu ná'agaquië' bönni' uládz quiu', en
lu ná'agaquië' bönni' izá'a, lógaca nupa
ni' risól-la'a li' na'a. ¹⁸Risól-la'a li' ga na'
nacu'ë para gunu' ga ulu'huóálaj guió'j
lógaquië', en ulu'huóáquië' queë' Dios,
en ulu'cá'anë' le naca chul-la que dul-la',
en ila'dxinë' lu bení. Ulu'rúajë' lu na' Sa-
tanás tu' xihui', en ila'yázië' lu në'ë Dios.

Channö ila'yéajlë neda', Dios uniti lahuë légaquië', en uguë' dul-la' nabá-ga'gaquië', ate' ila'déli'në' ila'bábalenë' bönachi chinubéajë' Dios quez queë'."

Benë' Pablo ca naca le buluf'inë' Xanru' lë'

¹⁹ Gunnë' ca' Pablo:

—Qui lë ni na', bönni' unná bë', Agripa, bití' gudá'baga'a guna' le buluf'inë' Dios, zoë' yehua' yubá, neda'.
²⁰ Buzéajni'ida' nupa nacua' yödzo Damasco, en gudödi ni' nupa nacua' Jerusalén, en nupa nacua' luyú Judea, en bönachi yugu' yödzo zítu' para ulu'bí'i ládxi'gaca, en ulu'huóaca queë' Dios, en ilún le ilaca bë' chibulu'bí'i ládxi'gaca. ²¹ Tu' bena' caní, yugu' bönni' judío gula'zönë' neda' cate' ni' zoa' lö'a yudo', en gulé'ennë' ilútië' neda'. ²² Ní'irö gúcalenë' Dios neda', ate' ga ridxintë na'a dza zoa' idú ládxa'a, runa' ba nalí lógaquië' bönni' cá'asö, en lógaquië' bönni' lo. Bití' ruá'a didza' yúbölö, pero ca gula'nnasë' zí'alö bönni' gulu'ë didza' uláz queë' Dios, enca' ca gunné' Moisés ca ral-la' gaca. ²³ Gula'nnë': "Qui'i sáquë'ë Cristo, en tödi gátie', gáquië' nu isí lo ubán tsaz lu yöl-la' guti, para ulu'ë lahui naca löza ila'dxín bönachi lataj bení', en gaca libán que lë ni lógaca bönachi uládz queëtu', enca' lógaca bönachi izá'a."

Pablo ruzéajni'inë' Agripa para tséajlë'ë Cristo

²⁴ Cate' chibë'ë Pablo yugu' didza' ni, le bë'ë uláz queë', ní'irö bë'ë zidzaj didza' Festo, gunné':

—¡Nachixi icju', Pablo! ¡Tu' nazé-dado'o, chiguchixi icju'!

²⁵ Ní'irö Pablo gudxë' lë':

—Bití' nachixi icja', rea' lí, Festo, ate' didza' ni ruá'a naca idütë lí, en naca lesaca'. ²⁶ Lë cazë' Agripa, bönni' ni rinná bë'ë, nózinë' yugu' lë ni, en que lë ni na',

idú ládxa'a ruá'a didza' lahuë' lë'. Nózinë' yugu' lë ni, tu' cabí guca bagáchi'sö lë na' guca. ²⁷ Bönni' unná bë', Agripa. ¿Naru' réajlë'u le gula'nnë' bönni' gulu'ë didza' uláz queë' Dios? Nözda' réajlë'u lë ni.

²⁸ Ní'irö Agripa gudxë' Pablo:

—Ia'látí'sö la' réquinu' idéli'nu' neda' para gaca' queë' Cristo.

²⁹ Pablo gudxë' lë':

—Ní'a queë' Xanru' Dios ré'ënda', sal-la' ia'látí'sö o yenni', calégasö lí, pero lësca' yúgu'të nupa ni ta'yöni neda', gá-cali' idú ca naca' neda', néquida' queë' Cristo, pero calëga gága'li' du guíë ca ni nága'a neda'.

³⁰ Cate' budxi bë'ë Pablo didza' ni, guzuínë' bönni' lo unná bë' na', ate' gulazuínë' ca' bönni' rinná bë'ë, en Berenice, en nupa ró'lengaca légaquië'.

³¹ Cate' bila'rúajë' quez, gulu'í xtídza'-gaquië', ta'nnë':

—Bití' bi nunë' bönni' ni le nabáguë'ë xíguia' gátie', en calëga tsázië' lidxi guíë.

³² Agripa gudxë' Festo:

—Huáca usanu'-në' bönni' ni la'tu' cabí gunabë' tsejé' lahuë' César ga uchi'a usóroë' lë'.

Ta'sól-lë'ë Pablo yödzo Roma

27 Cate' chigulunë' quégaquië' ila'sól-lë'ë netu' lë'e barco para tséajtu' yödzo Roma, luyú Italia, gula'guélë'ë Pablo, en ia'bal-lë' nupa nadzúngaca, ate' bulu'dödë' légaquië' lu në'ë Julio, tu bönni' rinná bé'enë' tu cö' bönni' rójáquië' gudil-la nazí'i le: Bönni' Queë' Augusto Rójáquië' Gudil-la. ² Gurentu' tu lë'e barco que luyú Adramitio, le ral-la' tödi yugu' yödzo gapa ta'dxín barco ga naca luyú Asia, ate' yú'usötu' ca' lë'e barco na', buzá'atu' yödzo Cesarea. Aristarco, tu bönni' yödz Tesalónica, le nababa luyú Macedonia dzáguië' netu'. ³ Cate' za' rení' ia'tú dza, bidxintu' yödzo Sidón,

ate' ni' Julio, bönni' na' rinná bé'enë bönni' rōjáquië' gudil-la, lu yöl-la' dxi'i ladxi' queë', bē'ë Pablo lataj tsejē' ga nacu'ë böchi' luzé'ë para ilácalenë' lē' bi riyadzaj queë'. ⁴Gudōdi ni', bubentu' lē'e barco, ate' buzá'atu' ni'. Gudóditu' tsölá'a ga dē luyú bidxi Chipre ga rō'ö dxi bö' na' recja, tu' za' saca' lotu' bö' recja lu nísado' na'. ⁵Ní'irō gudóditu' lu nísado' ga nalá' luyú Cilicia, en luyú Panfilia, ate' bidxintu' Mira, tu yōdzö nababa luyú Licia.

⁶Bönni' na' rinná bé'enë bönni' rōjáquië' gudil-la, en naché'ë netu', yōjxáquië' tu barco ni' narúaj yōdzö Alejandría que luyú Egipto, barco na' zeaj luyú Italia ga rō' yōdzö Roma. Gulu'ë netu' lē'e barco na'. ⁷Guzá' barco na' tsahui' lādxi'do' zían dza, ate' len yöl-la' rizáca'sö bidxintu' ga nalá' tu luyú bidxi lu nísado' na' nazí'i le Gnido, ate' tu' ruzaga' netu' bö' na' recja, gudóditu' tsölá'a luyú bidxi nazí'i le Creta ga rō'ö dxi bö' na' recja, en bidxintu' ga nalá' yōdzö Salmón luyú Creta na'. ⁸Lu yöl-la' rizáca'sö gudóditu' tsölá'a ga dē luyú bidxi Creta na', en bidxintu' tu lataj ga ta'dxín barco, nazí'i le Buenos Puertos, le dē gala' ga na' dē yōdzö Lasea.

⁹Tu' chigudzéda'atu', chigula' zoa bö'nadxi gaca ditaj bítitēs barco rizá' lu nísado' na', tu' chigudōdi yugu' dza tunë' gubasa cate' si' idxín beo' ziaga cate' récjada' bö'. Que lē' ni na' Pablo buzéajni'inë' légaquië', ¹⁰rnnë':

—Libi'ili', bönni', réquibe'eda' ga tseaj barco ni, huazóa bö'nadxi gaca ditaj barco ni, en yua' dzö'ö lē'e, en lē'sca' soa bö'nadxi queëru' gátiru'.

¹¹Bönni' na', rinná bé'enë bönni' rōjáquië' gudil-la, guyéajlë'ërë' le gula'n- nē' bönni' na' dē lu nē'ë barco, en bönni' xan caz, ca le gunné' Pablo. ¹²Tu' cabí naca dxi'a lataj ni' ga ta'dxín barco, nazí'i le Buenos Puertos, para ulu'gá'anë'

ni' yugu' beo' ziaga, que lē' ni na' la'- tu'biqui' yúgu'të bönni' nacu'ë lē'e barco na' gulún tuz xtídza'gaquië' ulu'zë'ë ni', channö huáca ila'dxinë' ga ta'dxín barco lu yōdzö Fenice, lē'sca' dē luyú bidxi na' nazí'i le Creta, le dē tsölá'a ga ribía gubidza, ate' gulé'ënnë' ulu'gá'anë' ni' yugu' beo' ziaga.

Recja bö' budunu' lu nísado'

¹³Tu' recja tu bö'do' le za' saca' tsölá'a ga ridōdi gubidza beo' ziaga, téquinë' chiraca ilunë' ca té'ënnë', ate' bulu'lisë' guíë' zí'i naga' du guíë' le ruzóa dxisö barco, ate' gudōdi barco na' gala' ra' luyú bidxi na' nazí'i le Creta. ¹⁴Ia'tú ch'isö ca', guyecja tu bö' budunu' za' lotu', nazí'i le Euroclidón. ¹⁵Tu' ruzéaj bö' na' recja barco na' tsölá'alö, ate' tu' cabí guca tseaj barco ga za' bö', ní'irö bé'ëtu' lataj bö' na' buzéaj barco na' ga ré'ëni. ¹⁶Cate' gudōdi barco na' ga bidxintu' tsölá'a tu luyú bídxi'ido' nazí'i le Cauda, tsölá'a ni' ga bití' récjada' bö', lu yöl-la' rizáca'sö buchísatu' bárcodo' ná'ayöj barco zxon na' yú'utu'. ¹⁷Gudōdi burentu' le lahui barco zxon na', ní'irö bé-ga'ratu' barco zxon na'. Zxante barco na' buchólitu' du, para cabí ilá'a lu le ridxía nisa na'. Tu' gúdxitu' tödi barco na', en inídxí' lu yuzxi lu nísado' na', buzótjatu' lari' que, le rutubi bö' rusá' barco na'. Canísö bé'ëtu' lataj bö' na' recja buzéaj barco. ¹⁸Cate' za' rení' ia'tú dza, en ní' ruzéajda' bö' budunu' recja barco na', ní'irö gurú'unatu' lu nísado' lati' yua' dzö'ö lē'e barco na'. ¹⁹Dza bunny, len na' cuintu' gurú'unatu' le tun dxin que barco na' lu nísado'. ²⁰Cate' chiguca zían dza bití' rilé'etu' gubidza, en nitú bōlaj, en tu' récjada' bö' na' ruzéaj barco na' yú'utu', bítí'rö runtu' löza ulatu'.

²¹Tu' chiguca zían dza bití' nágotu', guzuínë' Pablo gatsaj láhui'lö légaquië', en gudxë' légaquië':

—Libi'ili', bönni', dxí'arö guca la'tu' uzé nágali' neda', en cabí uzá'aru' luyú Creta, en cabí udutságaru' lë ni rigufi rizáca'ru', en yugu' lë ni raca ditaj que barco ni. ²²Na'a, rea' libi'ili': Tsutsu guli'gún ládxi'li', tu' cabí gátili' nituli' libi'ili' tscali' zóali' ni, sal-la' gaca ditaj barco ni. ²³Caní gaca tu' budulufi lahué' neda' gudiyéla tu gubáz lá'ayi queé' Dios. Dios ni néquida' queé', en runa' xichiné'. ²⁴Gubáz lá'ayi na' gudxé' neda', gunné': "Pablo, biti' gádxinu'. Run bayudxi idxinu' lahué' César. Tu' nadxí'ine' Dios li', usolé' yúgu'té bönachi nacuá'len li' lë'e barco ni." ²⁵Que lë ni na', tsutsu guli'gún ládxi'li', tu' ruzxöni ládxa'a-né' Dios, gaca ca na' chigudxé' gubáz lá'ayi queé' neda'. ²⁶Caní gaca sal-la' run bayudxi gaca ditaj barco ni tu luyú bídxido', ga ni' tsöjca'ana rë'u.

²⁷Cate' ni' chigudödi chidá' dza, ate' bö' na' recja ruzéaj barco na' lu nísado' nazí'i le Adriático, idú ladxi' yëla guléquiné' bönni' tuné' dxin lu barco na' chizóa idxín barco gala' tu luyú bidxi. ²⁸Gula'rú'uné' du lu nísado' na', ate' gula'nóziné' galaj ösa naca ga bidxinté ga rë' lu nisa. Cate' gudödi barco na' ia'látido', gula'rú'uné' du na' leyúbölö, en gula'nóziné' chinaca chinu ösa. ²⁹Tu' guládxiné' tsöjdn barco na' lu guiöj, que lë ni na', tsölá'a láchuilö que barco gula'rú'uné' lu nísado' tapa guié zi'i nága'-gaca du guié le tu'zóa dxisö barco lu nisa. Lu yöl-la' ruúbi ruguf'isö ládxi'do'gaquié' gula'bözé' tsení'. ³⁰Ní'irö gulé'enné' bönni' tuné' dxin lu barco ulu'zxúnna'jé' lë'e barco na'. Bulu'zötjé' bárcodo' na' dë lahui barco zxön na' lu nísado'. Guluné' ca té'enné' ilu'é ia'lati' zi'tu' guié zi'i na' naga' du guié le ruzóa dxisö barco na', le zoa saca' tsölá'a láchuilö. ³¹Ní'irö Pablo gudxé' bönni' na' rinná bé'ené' bönni' röjáquié' gudil-la, tsözxön len bönni' na' röjáquié' gudil-la, gunné':

—Channö cabí ulu'gá'ané' bönni' ni lë'e barco ni, biti' gaca uláli'.

³²Ní'irö bönni' na' röjáquié' gudil-la gula'chúguié' du naga' bárcodo' na', ate' gulu'é lataj gubixi lu nísado'.

³³Cate' chizá' rení', Pablo gúta'yué' lögaquié' bi ilahué' yúgu'té'. Gudxé' légaquié':

—Na'a chiguca chidá' dza rubéaj yëla loli', en runli' gubasa, biti' bi náguli'. ³⁴Que lë ni na', ráta'yua' loli' gáguli' para huóaca ládxi'li', tu' cabí gátili' nituli' libi'ili'.

³⁵Cate' Pablo budxi bé'ë didza' ni, gudélé'ë yöta xtila, en gudxé' Dios: "Xclenu'." Caní bené' lögaquié' yúgu'té'. Ní'irö buzxuzxjé' yöta xtila na', en gusi lahué' rahué'. ³⁶Ní'irö bila'dipa ládxi'-gaquié' yúgu'té', en gulahué'. ³⁷Tscatu' zóatu' lë'e barco na', gúcatu' idú chopa gayuá' yu' tsónnalalaj yu' chizxópatu'. ³⁸Gudödi gulahué', en bulu'huóljané', ní'irö gula'rú'uné' zxoá' xtila dë lë'e barco na' lu nisa, para ulu'lahué' yua' dzö'ö lë'e barco na'.

Raca ditaj barco lu nísado'

³⁹Cate' chiguca lahui' dza, yugu' bönni' tuné' dxin lu barco na' biti' bulu'únbé'ë luyú na'. Bila'lé'ené' ga röjró' nisa zxön na' gatsaj láchuilö luyú bidxi na', en dë lataj ni' ga naca lachi' ra' nísado'. Gulé'enné' iluné' ga tsaza barco na' ga ni'. ⁴⁰Ní'irö bulu'sedxé' yugu' du guié nága'gaca yugu' guié zi'i tu'zóa dxisö barco na', en bulu'sané' léguequi, ate' gula'bixi lu nísado'. Bulu'sedxé' ca' du naga' në'e yaga le ruzecaj rudxí'i barco. Ní'irö bulu'chisé' lari' que le rutubi bö', le zoa tsölá'a láchuilö barco na', ate' ní'irö gusi lo ridödi barco saca' ga röjró' nísado' gatsaj láchuilö luyú bidxi na'. ⁴¹Cate' bidxín barco na' tu lataj ga ridzaga chopa nisa, ni' binidxi' tsölá'a láchuilö barco na' lu yuzxi lu nísado' na', ate' bugá'anasö barco na' ga ni'.

Bítirō guca bi utá le, ate' tsólá'a cúd-zilō barco na', gusí lo riguitsaj nísado' na' le, len yöl-la' rizá' que. ⁴²Ní'irō bönni' rōjáquiē' gudil-la gulé'ennē' ilútiē' bönni' nadzúngaquiē', para cabí ila'zxúnna-jē', ila'zxóē' lu nisa na'. ⁴³Bönni' na' rinná bé'enē' bönni' na' rōjáquiē' gudil-la gú'unnē' usólē' Pablo, ate' gunná bé'enē' bönni' na' rōjáquiē' gudil-la cabí ilunē' ca na' té'ennē'. Ní'irō gunná bé'enē' bönni' taca ila'zxóē' lu nisa, zí'alō légaquiē' ila'yáziē' lu nisa para ila'dxinē' luyú bidxi. ⁴⁴Gunná bé'enē' ca' yugu' bönni' nagá'anagaquiē' ila'zxóē' lu yaga dzö'ó láhuilō barco, en ia'bal-lē' láhuigaca yá-gado' que barco na'. Caní guca, bulu'lé' yúgu'tē'. Canísó bila'dxinē' luyú bidxi na'.

Le benē' Pablo luyú bidxi nazí'i le Malta

28 Cate' chibulatu' yúgu'tētu', gunöztu' luyú bidxi ga na' zóatu' nazí'i le Malta. ²Bönni' xidza' nacué' luyú bidxi na' lu yöl-la' dxi'i ladxi' quégaquiē' gulunē' netu' bal. Gula'béquiē' guf', ate' bulu'lidzē' netu' yúgu'tētu' iditsē'e cuintu', tu' ralaj guió'j, en runda' ziaga. ³Ní'irō Pablo gúchē'ē tu tsölén huága zxisi bídxido', en cate' gulu'ē le lu guf', birúajba' tuba' bëla sínia' lē'e huágado', rizxúnna'jba' bóchila que guf' na', ate' yójt'íniba' yen në'ē Pablo. ⁴Cate' bönni' xidza' na' bila'lé'enē' bëla na', nála'ba' yen në'ē Pablo, gulé' tuē' ia'túē':

—Le nácatē bönni' ni náquiē' nu ruti bönachi. Sal-la' bulé' lu nísado', dios queéru' lē' Tsahui' biti' ru'ē lē' lataj soē' ibanē'.

⁵Gudxibi në'ē Pablo, en busládzu'ē-ba' bëla sínia' na'. Yójxóatēba' lu guf', ate' lē' biti' bi guca queē'. ⁶Bönni' xidza' nacué' ni' tu'yúē' Pablo, bátacalō cō'ē gui, o tsó'ótē' gátie'. Ní'irō cate' chigudzé ta'bözē', en bila'lé'enē' biti' bi raca queē',

ia'tú le guléquinē', ate' gula'nnē' naca cazē' tu dios.

⁷Lataj ní'sö dē xiyúē' Publio, bönni' lo que luyú bidxi na', ate' bönni' ni benē' netu' bal. Lu yöl-la' dxi'i ladxi' queē' gulu'ē netu' lidxē' idú tsonna dza. ⁸Dza na' dē' ré'enē' xuzē' Publio na', yu'ē xilá, en ré'enē' huē' rön. Guyáziē' Pablo sójyúē' lē', en gudödi bulidzē' Dios, ní'irō guxóa në'ē bönni' huē' na', en bunē' lē'. ⁹Tu' benē' Pablo lē ni, lē'sca' bila'dxín nupa te'e ga zoē', nacué' luyú bidxi ni', en bulu'huóáquiē'. ¹⁰Yugu' bönni' ni gulunē' netu' bal, en zían le gulunē' queé-tu'. Cate' chizóa uzá'atu' luyú ni', bulu'nödzej' yugu' le naquínitú' queé'tu'.

Ridxinē' Pablo lu yödzo Roma

¹¹Cate' chiguca tsonna beo' zóatu' ni', ní'irō gurentu' tu lē'e barco que yödzo Alejandría, le bugá'ana luyú bidxi na' yugu' beo' ziaga. Barco ni dá'gaca tsólá'a láhuilō budó' yaga léguequi Cás-tor, en Pólux, dios bilidi' quégaca bönachi Alejandría na'. ¹²Buzá'a barco na' ga ni', ate' bidxín yödzo Siracusa, ga ni' bugá'anatu' tsonna dza. ¹³Buzá'atu' ni', ate' gudóditu' tsólá'alō luyú ni', en bidxintu' yödzo Regio. Cate' za' rení' ia'tú dza, tu' recja bö' za' saca' ga ridödi gubidza beo' ziaga, buzá'atu' ni', ate' dza buropi na' bidxíntētu' yödzo Pute-oli luyú Italia. ¹⁴Lu yödzo na' yójxáca-tu' yugu' bóchi'ru' ta'yéajl'ē Cristo, ate' gulá'tayué' lotu' ugá'analentu' légaquiē' idú xunu' dza. Cate' bizá'a dza na' buzá'atu' ni' para tséajtu' yödzo Roma, rizē'e ní'atu'. ¹⁵Chibila'yönnē' bóchi'ru' nacué' Roma chizóa idxintu' ni', ate' bila'rúajē' idix'gala'gaquiē' netu'. Bila'dxinē' tu yödzo' nazí'i le Yé'eyi Que Apio. Ia'bal-lē' bila'dxinē' tu lataj nazí'i le Tsonna Yu'u Quégaquiē' Bönni' Yú-ugaquiē' Nöza. Cate' Pablo bilé'enē' légaquiē', bidipa ládxē'ē, en gudxē' Dios: "Xclenu'."

¹⁶Cate' bidxintu' Roma, bönni' na' rinná bé'ené' bönni' röjáquié' gudil-la, guché'ë bönni' na' nadzúngaquié', ate' budödé' légaquié' lu në'ë tu bönni' lo rinná bé'ené' bönni' röjáquié' gudil-la, ate' bë'ë Pablo lataj soé' queé'zë', zóalené' lë' tu bönni' rejé' gudil-la ruyúé' lë'.

Runé' Pablo libán lu yödzö Roma

¹⁷Cate' chigudödi tsonna dza, bulidzë' Pablo yugu' bönni' lo quegaquié' bönni' judío nacu'ë Roma. Cate' chibulu'dubë' ga na' zoé' Pablo, lë' gudxë' légaquié':

—Lib'ili', bócha'a, sal-la' biti' bi be-na' quégaca bönachi ládzarú', en caléga que le nalébiru' runru' ca na' guluné' xuz xtó'oru', yugu' bönni' judío nacu'ë Jerusalén bulu'dödé' neda' lu ná'agaquié' bönni' Roma nacu'ë Jerusalén, ate' bulu'sayjé' neda' lidxi guíé'. ¹⁸Ní'irö cate' chigula'nabi yúdxiné' neda' bönni' Roma, gulé'ënné' ulu'sané' neda', tu' gulé'quibe'ené' biti' nabága'a xíguia' gátia'. ¹⁹Yugu' bönni' judío ni' gula'dá'bágué'ë nupa na' gulé'ëni ulu'sán neda', ate' ben bayudxi gunaba' tseja' lahué' César ga uchi'a usóróé' neda', en caléga para uzéguia' bönachi uládz queéru' didza'. ²⁰Que lë ni na' bulidza' lib'ili' para ilé'eda' lib'ili', en güf'ilena' lib'ili' didza', tu' nága'a du guíé' ni tu' runa' löza le runru' löza rë'u, bönachi Israel, gácaté lë na' guzxi' lu në'ë Dios gata' queéru'.

²¹Ní'irö légaquié' gulé' Pablo:

—Biti' ridxini queétu' guichi le za' luyú Judea ca naca lë na' raca quiu', en cuntú nu ridxini nu naca bóchi'ru' judío, nu usiyöni netu' channö nu bi rnné quiu' le ruá' dö'. ²²Na'a, ré'ënitú yónitu' xtídzú'u, lë na' riguinnaj icju', tu' chinó'zitu' ta'nné bönachi yúgu'té lataj quégaca nupa nazí' lu né'eguequi xibá cubi ni.

²³Caní guca, bulu'dxíé' bë' tu dza, ate' dza na' bila'dxiné' zíané' ga na' zoé'

Pablo. Gusí lahué' Pablo zílado', ate' ni' gúl-li'ni buzéajni'iné' légaquié', en buchila lá'ané' le rinná bë'ë Dios. Gú'un-né' ulu'f'iné' légaquié' naca iduté li libán runé' queé' Jesús. Para guné' caní bu-guné' dxin le rinná bë' xibá queé' Moisés, enca' le gula'nné' bönni' gulu'ë didza' uláz queé' Dios. ²⁴Bal-lé' gula'zí' lu ná'agaquié' didza' bë'ë Pablo, pero ia'bal-lé' biti' ca' gula'yéajlë'ë. ²⁵Tu' bila'rúajé' choplö, gula'sí lógaquié' tu'zé'ë ni', ate' Pablo gudxë' légaquié', rnné':

—Didza' nácaté bë'ë Dios Bö' Lá'ayi, lë na' gunné' Isaías, bönni' bë'ë didza' uláz queé' Dios, ca na' buzéajni'iné' xuz xtó'oru', gunné':

²⁶Guyéaj lógaca bönachi ni', yöjödxi légaquié':

Yöni nágali', pero biti' tséajni'ili'.

Uyuli' iná'ali', pero biti' ilé'eli'.

²⁷Yugu' bönni' ni chinazidi icja ládxi'do'gaquié',

en biti' bi riyaza icja nágagaquié'.

Guluné' ca tun nupa nachul-la guió'j lóguequi

para cabí ila'lé'e len guió'j lóguequi,

en cabí ila'yöni nágaguequi

para cabí ulu'zéajni'i ládxi'guequi,

en cabí ilé'ëni ulu'huóaca queé' Dios

para gaca una' lóguequi.

²⁸Na'a, ral-la' inózili' lë ni. Dios risól-lé'ë netu' lógaca bönachi izá'a para ulu'lágaca, ate' légaquié' ila'yönné'.

²⁹Cate' Pablo budxi bë'ë didza' ni, bila'rúajé' bönni' judío, ta'díl-lada' dídzë'ë la' légasasé'.

³⁰Idú chopa iz bugá'ané' Pablo ni', zoé' tu lu yu'u ga na' riguizxjé', ate' bené' bal yúgu'té nupa buduyúgaca Lë'. ³¹Lu yölla' rugu ladxi' bené' libán ca rinná bë'ë Dios. Busédiné' bönachi ca naca queé' Xanru' Jesucristo, ate' cuntú nu buzaga' xinözé'. ¡Ca' naca!

DIDZA' GUSÓL-LĒ'Ē PABLO YÖDZÖ ROMA

Pablo rugapë' Dios bönachi queë' Cristo nacu'ë Roma

1 Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

²Dza ni'te guzxf' lu në'ë Dios isól-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios. ³Bulu'zúajë' lu guichi yúgu'të le ral-la' gunë' Zxf'inë' Dios, Nu na' naca Xanru' Jesucristo. Lu yöl-la' bönachi queë' náquië' zxf'ini xi'sóë' David, ⁴pero ca naca bö' naca cazë', le naca lá'ayi, naca bë' náquië' Zxf'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti. ⁵Ni'a que le benë' Jesucristo ruzí'iru' xibé le ruzá' ládxe'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi iduté yödzölió Lë', en ilún ca rnna xtídzë'ë. ⁶Bitsa'li' lib'ili' lád-jagaca bönachi yödzölió na', pero na'a nulidzë' Dios lib'ili' para guéquili' queë' Jesucristo.

⁷Rugapa' Dios lib'ili', yúgu'tëli' zóali' Roma. Dios nadxf'inë' lib'ili', en bulidzë' lib'ili' para gácali' quez queë'. Rinábida'në' Xúziru' Dios, enca' Xanru' Jesucristo, gunnë' queéli' le ruzá' ládxe'ë queëru', en le ribequi dxi ládxi'ru'.

Ré'ënë' Pablo tsöjyüë' bönachi queë' Cristo nacu'ë Roma

⁸Lë ni risí lahua' ruzúaja' lu guichi: Tu' néquiru' queë' Jesucristo rea'në' Dios: "Xclenu'" ca naca queéli' yúgu'tëli', ate' ta'guixjö' bönachi iduté yödzölió ca réajlë'ëli' Jesucristo. ⁹Idú ládxa'a runa' xi-

chinë' Dios, runa' libán que didza' dx-i'a ca naca queë' Zxf'inë'. Nózinë' Dios rulídzatica'sa'në', en rinábida'në' gaca tsahui' queéli'. ¹⁰Rinábítica'sida' Dios, channö naca le ré'ënë' Lë', gunnë' neda' lataj uduyúa' lib'ili'. ¹¹Caní rinábida'në' tu' raca ládxa'a ilé'eda' lib'ili' para gaca guna' ga gata' queéli' tu le unödzejë' Dios Bö' Lá'ayi queéli', le gun ga gácali' tsutsu. ¹²Lë na' ré'ënda' naca utipa ládxi'ru' turu' ia'turu', tu' réajlë'ëru' Jesucristo yúgu'tëru'.

¹³Böchi' luzá'ado', ré'ënda' inózili' lë ni. Zián luzuí bë' ládxa'a guída' ga zóali', pero ga ridxintë na'a biti' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na' tu'zf' xibé ia'bal-la bönachi yödzölió ni. ¹⁴Dë le ral-la' guna' quégaca yúgu'të bönachi, quégaca bönachi nazédagaca, en quégaca bönachi cabí nazédagaca, quégaca bönachi ta'yéajni'i, en quégaca bönachi cabí ta'yéajni'i. ¹⁵Que lë ni na', tsca gaca guna', zoa' riböza' guna' ca' libán que didza' dxi'a ga ni' zóali' lib'ili', zóali' Roma.

Yöl-la' huáca zxön que didza' dxi'a

¹⁶Biti' ca' rutuf'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'të nupa ta'yéajlë' le. Ga risí lo, ré'ënë' Dios ila'yönnë' bönni' judío le, ate' tödi na' ila'yöni ca' bönachi izá'a. ¹⁷Didza' dx-i'a ni rulu'fi rë'u gunë' Dios ga huóacar'u' tsahui', channö uyéajlë'ëru' Lë', en biti' gaca chopa ládxi'ru'. Ca naca lë ni nazúaj ca' lu guichi lá'ayi, rnna: "Nu naca tsahui' tu' réajlë' Dios, gata' yöl-la' na'bán que nu na'."

Xíguia' nabága'gaca bönachi

¹⁸Dios, Nu zoa yehua' yubá, bulu'e lahui biti' rilé'enë' dxi'a yúgu'të le ruá'dö', en le cabí naca tsahui' tun bönachi. Gunë' xíguia' yugu' bönni' na',

lu yöl-la' biti' naca tsahui' quégaquië' ta'dá'baguë' le naca idütë li. ¹⁹ Caní gaca quégaquië' tu' nalá' lahui lógaca yúgu'të bönachi le naca bë' zoa cazë' Dios, tu' buluf'i quézinë' Dios lë ni ga na' nacu'ë. ²⁰ Dza ni'te cate' si' guta' yödzölió, ga ridxintë na'a dza, yugu' le nunë' Dios nácacaga bë' le cabí gaca il'éru' queë' Dios, ca naca yöl-la' huáca idú queë', en le naca cazë' Dios. Que lë ni na', biti' gaca ila'n-né' biti' nabága'gaquië' xíguia'. ²¹ Cate' ni' gulúnbë' Dios, biti' gula'yéaj ládxi'gaquië' Lë' ca ral-la' tseaj ládxi'ru'në' Dios, en biti' gulé' Lë': "Xclenu'." Que lë ni na', cá'asö böáca le gula'zá ládxi'gaquië', ate' gula'chul-la gula'nítie' tu' nazidi icja ládxi'do'gaquië'. ²² Sal-la' guléquinë' ta'yéajni'inë' yenni', bulu'huóáquië' bönni' biti' bi nózguequinë' ²³ tu' bulu'cá'anë' yöl-la' bení' queë' Dios Nu zóatica'sö, ate' gula'yéaj ládxi'gaquië' budó' guiój budó' yaga, budó' na' nácacaga ca yugu' bönni' tati cazë', en ca yugu' böa'do' zoa xiligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lë'ëba' lu yu ni.

²⁴ Que lë ni na' Dios guléaj ládxi'gaquië' para ilunë' yugu' le ta'zé ládxi'gaquië' le ruá' dö', ate' caní guca, bulu'cá'ana cuíngaquië' lu yöl-la' stu' tuë' len ia'túé'. ²⁵ Guca caní tu' bulu'cá'anë' xtídzë'ë Dios, le naca idütë li, ate' gula'z'í lu ná'agaquië' tu le cabí nácatë. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gácatica'sö queë' yöl-la' ba. ¡Ca' gaca!

²⁶ Que lë ni na' Dios guléaj ládxi'gaquië' para ilunë' yugu' le ta'zé ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'. ²⁷ Lëscá' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zé ládxi'gaquië' le ruá' dö' túnlenë' tuë' ia'túé', en gulunë'

le tun ga nu rutu'í, tu' gula'cuá'lenë' la' luzá'a bönni'gacasë'. Que lë ni na' gula'gu'í gula'záquië' lu xipéla'gaquië' yugu' bönni' gulunë' caní tu' bubí'ë Dios quégaquië' ca sa'yéaj dul-la' na' gulunë' tu' nucu'anagaquië' Dios.

²⁸ Tu' cabí gulé'ennë' ilunë' Dios bal, que lë ni na' guléaj ládxi'gaquië' Dios légaquië' para ila'zá' ládxi'gaquië' le biti' naca dxi'a, en ilunë' le cabí nazaca'.

²⁹ Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídí'në'.

Biti' ta'lé'enë' dxi'a luzá'agaquië', en tu'zxé'enë' luzá'agaquië'.

Tutië' luzá'agaquië', en ta'díl-lalenë' luzá'agaquië'.

Ta'z'í yé'enë' bönachi, en zi'të nácacagaquië' xihui'.

Ta'nné' que luzá'agaquië'.

³⁰ Ta'nné' le cabí nácatë que luzá'agaquië'.

Biti' ta'lé'enë' Dios dxi'a, en nácacagaquië' bönni' bizxaj.

Tun cuíngaquië' lo, en tun ba zxön cuíngaquië'.

Ta'gulj'ë le ruá' dö' ilunë', en ta'dá'baguë'ë xuz xiná'agaquië'.

³¹ Nácacagaquië' bönni' biti' ta'yéajni'inë', en tun díjtjagaquië' xtídzá'gaquië'.

Biti' nácacagaquië' dxi'i ládxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

³² Nózguequi quézinë' le nuzóë' tsaz Dios ca ral-la' gaca quégaca nupa tun yugu' le caní, ilátigaca tsaz. Sal-la' nóziguequinë' lë ni, calégasö caní tunë', pero ta'yaza ládxi'gaquië' nupa tun ca' caní.

Naca tsahui' ichúguië' Dios quégaca bönachi gátigaca

2 Que lë ni na', biti' gaca ubéaj tsahui' cuinu', nútí'tës nu nacu', richugu bë'u luzó'o. Cate' richugu bë'u luzó'o,

rusubaga' cuinu' xíguia', tu' richugu bë'u luzó'o, en lësca' runu' li'. ²Nöz quéziru' ca ruchi'a rusöróë' Dios. Naca idútë li ca ruchi'a rusöróë' nupa tun le ruá' dö'. ³Li' richugu bë'u nupa tun le ruá' dö', en tuz ca runu' li'. ¿Naru' réquit-senu' uló' li' cate' uchi'a usöróë' Dios? ⁴¿Naru' rucá'angatso' cá'asó yöl-la' dxi'i ladx'i idú queë' Dios, en yöl-la' ribóza zxön ladx'i queë', en ca runë', ridzenë' para lenë' li'? ¿Naru' cabí nöz quéz-inu' ruzá' ládxë'ë Dios quiu' yöl-la' dx-i'i ladx'i queë' para gunë' ga ub'i ládx-u'u? ⁵Lu yöl-la' ládx'i'do' zidi quiu' biti' rubí'i ládxu'u. Que lë ni na' rusubaga' cuinu' xíguia' gunë' Dios lí' cate' uchi'a usöróë' bönachi, ate' gaca bë' naca ca ralla' gunë' Dios cate' ichúguië' quégaca bönachi ilátigaca. ⁶La' dza n'isó ub'i cazë' Dios que queë' bönni' tsa naca le gulunë' tu tuë'. ⁷Unödzejë' yöl-la' na'bán idú quégaca nupa túntica'só le naca dxi'a, tu' tu'i ládx'i'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'. ⁸Lu yöl-la' rilé queë', Dios gunë' xíguia' nupa ta'dá'baga', en biti' té'ëni ilún ca rnna le naca idútë li, pero tun ca rnna le cabí naca tsahui'. ⁹Ila'gu'í ila'záquië', en hu'ínida' ládxë'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a. ¹⁰Dios gunë' ga ilácagaquië' bica' ba, en gunë' lé-gaquië' bal, en gu'ë le cuéqui dxi ládx-i'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹¹Caní uchi'a usöróë' Dios bönachi, ate' Lë' biti' runë' bal le ta'nnasó bönachi. ¹²Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'baguë'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë'

dul-la', Lë' uchi'a usöróë' légaquië' ca naca le rinná bë' xibá na'. ¹³Caní gaca, tu' cabí nácagaquië' tsahui' lahuë' Dios yugu' bönni' ta'yónisë' xibá queë', pero ulu'huóaca tsahui' lahuë' Lë' yugu' bönni' tunë' ca rnna xibá queë'. ¹⁴Bönni' na' biti' nácagaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládx'i'do'gaquië'. ¹⁵Nupa ni tu'luf'i lahui le run xibá na' nazúaj lu icja ládx'i'do'gaquië'. Le yu'u icja ládx'i'do'gaquië' naca bë' naca caní. Ca ta'zá' ládx'i'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'tué'. ¹⁶Caní ubi'ë Dios quégaquië' dza ni' uchi'a usöróë' lu na' Jesucristo yugu' le núngaquië', en le gula'zá' ládx'i'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

¹⁷Núlöli' rnnali' nácali' judío, en ruzxöni ládx'i'li' xibá queë' Dios, en run ba zxön cuinli' tu' núnbë'ëli'-në' Dios, ¹⁸nöz quézili' le ré'ënë' Dios gunli', en le rusëdi lib'ili' xibá queë', en réquibe'eli' le nácatërö dxi'a. ¹⁹Réquili' gaca uluf'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'li' nupa nachul-la nanítigaca. ²⁰Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dë lu ná'ali' xibá queë' Dios le rusëdi bönachi ca naca yöl-la' réajni'i idú, en le naca idútë li. ²¹Na'a, lib'ili' rusédili' ia'zica'rö bönachi. ¿Naru' cabí ral-la' usëdi cuinli'? Lib'ili' rnnali': "Biti' cuanu'." ¿Naru' ribántsali' lib'ili'? ²²Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' lib'ili' dul-la' le riguitsaj xibá que yöl-la' nutsaga na'? Lib'ili' biti' rilé'eli' dxi'a yugu' budó' guió' budó' yaga. ¿Naru' ribántsali' le

dzö'ö lu yudo' quéguequi? ²³Run ba zxön cuinli' tu' dë lu ná'ali' xibá queë' Dios. ¿Naru' rucá'anatsali' Dios cá'asö, en riguít'sjali' xibá le gunná bē'ē Lē'? ²⁴Nazúaj lu guichi lá'ayi ca runli', rnna: Ni'a que le runli' libí'ili' nupa biti' náca-gaca judío ta'nné zi' queë' Dios.

²⁵Le nácatē ruzi'u xibé lē na' narugu lu xipélu'u le naca bē' nazí' lu ná'ali' xibá queë' Dios channō runu' ca rinná bē' xibá na' queë' Dios, pero channō riguít'sju' xibá le gunná bē'ē Lē', nuhuóacu' ca tu bönni' biti' néquinē' queë' Dios.

²⁶Que lē ni na', channō zoë' tu bönni' biti' narugu lu xipélē'ē lē na' naca bē' nu nazí'i xibá queë' Dios, pero runē' idútē ca rinná bē' xibá queë' Lē', bönni' ni náquiē' lahuē' Dios ca tu bönni' narugu caz lu xipélē'ē lē na' naca bē' sal-la' biti' narugu lu xipéla' cazē'. ²⁷Bönni' na' biti' narugu lu xipélē'ē lē na' naca bē' nu nazí'i xibá queë' Dios, pero runē' idú ca rinná bē' xibá na' queë' Dios, ca runē' bönni' ni rulu'í nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipéla'li' lē na' naca bē' nazí' lu ná'ali' xibá na' queë' Dios, pero biti' runli' ca rinná bē' xibá queë' na'. ²⁸Biti' náquiē' idú bönni' judío tu bönni' nácasē' caní lu yöl-la' bönáchisö queë', ate' biti' naca idú lē na' naca bē' le narúgusö lu xipélē'ē nu bönni'. ²⁹Náquiē' idú bönni' judío bönni' na' náquiē' caní lu icja ládxi'da'ahuē', en le naca idú le narugu lu xipélē'ē nu bönni' le naca bē' nu nazí'i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calēga que yöl-la' bönáchisö queëru'. Nu bönni' náquiē' caní, biti' tun bönachi lē' bal, pero Dios caz gunē' lē' bal.

3 Channō caní naca, ¿bizxi ruzi'tsē' xibé tu bönni' tu' náquiē' judío? ¿Bizxi ruzi'ē xibé tu bönni' judío tu' narugu lu xipélē'ē? ²Yenni' ruzi'ē xibé, en zían ca ruzi'ē xibé. Le nácatērö lo, Dios gulu'ē lu ná'agaquiē' yugu' bönni'

judío didza' lá'ayi queë'. ³Bal-lē' biti' ta'yéajl'ē Dios. ¿Naru' réquitsenu' biti' gunē' Dios ca rnna xtídzē'ē tu' cabí ta'yéajl'ē Lē'? ⁴Biti' ca' gaca! Ral-la' guéquiē'ēru' rúntica'sē' Dios ca rnna didza' bē'ē, sal-la' ta'z'í' yē' yúgu'tē bönachi. Ca naca queë' nazúaj lu guichi lá'ayi le rnna:

Gaca bē' nacu' tsahui' ni'a que didza' ru'u,
en uruju' tsahui' channō nu uchi'a usörö
Lí'.

⁵Cate' runru' le ruá' dö', Dios rnnē' biti' naca tsahui' le runru'. Lē ni naca bē' tsahui' náquiē' Dios. Nacuá' nupa ta'nná: "Le cabí naca tsahui' le runru' naca bē' náquiē' Dios tsahui', ate' que lē ni na' biti' ral-la' gunē' rē'u xíguia'." ⁶Biti' ca' naca caní! La'tu' ruzi'ē xibé Dios le ruá' dö' runru', ¿nacxi caz gaca uchi'a usöröē' bönachi yödzülió ni?

⁷Cate' nu rizí' yē', Dios rnnē' biti' ru'í didza' nu na' ca runē' Lē'. Lē ni naca bē' naca idútē li didza' ru'ē Dios. Ta'n-né' bönni' le ta'z'í' yē'ē légaquiē' run ga gaca queë' Dios yöl-la' ba, ate' biti' ral-la' ichúguiē' quégaquiē', cabí inné' náca-gaquiē' bönni' dul-la'. ⁸¿Naru' huannát-saru': "Guá'aru' dö' para gaca le naca dx-i'a"? Nupa na' ta'nné zi' queëru' ta'nná rusédiru' caní, ate' tsahui' naca ichúguiē' Dios quéguequi.

Yúgu'tēru' nabága'ru' dul-la'

⁹¿Bizxi caz innaru' na'a? Ca naca queétu' netu', bönni' judío, ¿nácārötü' tsahui' ca ia'z'íca'rö bönachi? ¿Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'tē' nabága'-gaquiē' dul-la'! ¹⁰Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

¹¹Cuntu nu réajni'i.

Cuntu nu riguila' Dios.

¹²Yúgu'tē' ta'dé' ga yúbölö.

Yúgu'të' nanítigaquië'.

Cuntu nu run le naca dxí'a, cuntu nu caz.

¹³Lubá'agaquië' náacagaca ca yeru ba nayáljagaca.

Len yöl-la' rinnësö quégaquië' ta'zif yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínía'.

¹⁴Len yugu' didza' tu'ë, tu'didza' yúdx-inë' bönachi,

en ta'nné' zi'ë quégaca bönachi na'.

¹⁵Nacu'ë sina' tútigaquië' bönachi.

¹⁶Gátitës ga ta'dödë' tu'sunítie', en tu'saca' zi'ë luzá'agaquië'.

¹⁷Biti' ta'zéqui'në' ila'bözë' dxí'ado'.

¹⁸Biti' ca' tádxinë' Dios.

¹⁹Nóziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná biti' nabaga' dul-la', ate' yúgu'të bönachi idútë yödölió, uchi'a usóróë' Dios quéguequi. ²⁰Tuf'i ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntu nu huóáca tsahui' caní, tu' nuzóë' Dios xibá queë' para guéquibe'eru' nabága'ru' dul-la'.

Uláru' tu' réajlë'ëru' Jesucristo

²¹Na'a, chibuluf'i lahui ca gaca huóácaru' tsahui' lahuë' Dios. Biti' gaca huóácaru' tsahui' tu' runru' ca rinná bë' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'n-në' bönni' gulu'ë didza' uláz queë' Dios, ru'í didza' ca gaca huóácaru' tsahui'.

²²Dios caz runë' ga huóácaru' tsahui' tu' réajlë'ëru' Jesucristo, ate' gunë' ga ulu'huóáca tsahui' yúgu'të nupa ila'yéajlë' Lë'. Tuz ca náacagaca yúgu'të bönachi ²³tu' núngaquië' yúgu'të' dul-la', en biti' ca' náacagaquië' tsahui' ca na' náquië' Dios idú tsahui'. ²⁴Dios ruzá ládxi'ë queëru', en nunsë' rë'u tsahui' tu' böá'uë' Jesucristo rë'u. ²⁵Dios budödë' Jesucristo uláz queëru'. Lë' bulaljë' xi-

chönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxi' queë' budódisë' cá'asö yugu' dul-la' benru' dza ni'te. ²⁶Caní benë' Dios, buluf'i cuinë' tsahui' dza ni zóaru' na'a, ate' rugá'anë' tsahui' sal-la' rugüë' dul-la' nabága'gaca bönachi, runë' ga tu'huóáca tsahui' nupa ta'yéajlë' Cristo.

²⁷¿Naru' huécatsö gun ba zxön cuinru' ca naca queëru'? ¡Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo. ²⁸Na'a, rusáca'ru' queëru' nuhuóáquië' tsahui' tu bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

²⁹Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Ön, náquië' ca' Dios quégaca bönachi izá'a na' ³⁰tu' zoa Tuz Nu naca Dios. Dios ni gunë' ga ulu'huóáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipéla'gaquië' lë na' naca bë' nu nequi queë' Dios, en lës-ca' caní gunë' ga ulu'huóáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipéla'gaquië' lë na' naca bë'. ³¹Na'a, channö nuláru' tu' réajlë'ësiru' Jesucristo, ¿ba nagá'ana cá'asö xibá queë' Dios? ¡Biti' ca' naca ca', pero nagá'anarö tsutsu xibá queë' na'!

Le benë' Abraham rusedi rë'u

4 ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío? ²La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios. ³Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'." ⁴Channö zoa nu bönni' runë' xichinru',

le riguíxjaru'-në' biti' naca tu le ruzá' ládxi'ru' queé', pero naca tu le ral-la'ru' queé' bönni' na'. ⁵Lësca' caní channó tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóaca tsahui' bönachi biti' nácagaca tsahui', rnnë' náquië' tsahui' lahuë' Lë' bönni' na', tu' réajlë'ë Lë'. ⁶Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'. ⁷Caní gunné' David:

¡Bica' ba bönni' na' Dios runiti lahuë' le biti' naca tsahui' nunë',
en rugúë' yugu' dul-la' nabáguë'ë!

⁸¡Bica' ba bönni' na', Dios biti' rusub-águë'ë lë' xíguia' tu' nözi dul-la' benë' bönni' na'!

⁹¿Naru' nácagacsë' bica' ba bönni' narugu lu xipéla'gaquië' lë na' naca bë', o nácagaca ca' caní nupa na' cabí narugu lë na' lu xipéla'gaquië'? Chigunná cázaru' böáquië' Abraham tsahui' lahuë' Dios tu' guyéajlë'ë Lë'. ¹⁰¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zí'aló? Biti' guca cate' chinarugu lu xipélë'ë, pero zí'aló guca. ¹¹Abraham guyéajlë'ë Dios cate' ni' biti' narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'isó chinuhuóáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' biti' narugu lu xipéla'gaquië' lë na' naca bë'. Tu' ta'yéajlë'ë Dios, huáca innë' Dios nácagaquië' tsahui' lahuë' Lë'. ¹²Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' biti' narúguni lu xipélë'ë lë na'.

Le guzxi' lu në'ë Dios gata' queéru' tu' réajlë'ëru' Lë'

¹³Guzxi' lu në'ë Dios bi unödzejë' queé' Abraham, en quégaca xzí'ini xí'sóë', gata' quégaquië' la' yödzölió nisö. Gaca caní, calëga tu' tunë' ca rinná bë' xibá queé' Dios, pero tu' nuhuóacagaquië' tsahui' lahuë' Lë' tu' ta'yéajlë'ë Lë'. ¹⁴La'tu' gata' yödzölió ni quégacasö nupa tun ca rinná bë' xibá queé' Dios, biti' gun bayudxi nu tséajlë' Lë', ate' nítisö gaca le guzxi' lu në'ë Dios. ¹⁵Rulu'í xibá queé' Dios rë'u nabága'ru' xíguia', le run ga ichúguië' Dios queéru' gátiru'. Ga ni' biti' ridxini xibá queé' na', biti' gaca ila'dá'baga' bönachi le rinná bë' xibá na'.

¹⁶Que lë ni na' uzí'iru' xibé le guzxi' lu në'ë Dios tu' réajlë'ëru' Lë', para gaca bë' naca tu le ruzá' ládxi'ë queéru'. Caní naca, para gaca bë'da' gata' quéguequi yúgu'të xzí'ini xí'sóë' Abraham lë na' guzxi' lu në'ë Dios, calégasö quégaquië' bönni' na' dë lu ná'agaquië' xibá queé' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios. ¹⁷Caní náquië' ca na' nazúaj lu guichi lá'ayi, le rna: "Nuzóa' lí' ca xúz-gaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queéru' yúgu'tëru'. Dios ni rusubanë' nupa chinátigaca, en ru'ë didza' que nu biti' zuíni tsca chizóa caz nu na' biti' zuíni.

¹⁸Caní naca tu' gudxë' Dios Abraham na': "Ziántërö ila'cuá' xzí'ini xí'sú'." Abraham guyéajlë'ë Dios, en benë' löza lë na' guzxi' lu në'ë Dios, sal-la' biti' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió. ¹⁹Biti' guca Abraham chopá ládxi'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le

naca cazë, chinati caz tu' chinagúlädë, enca' ca naca queénu Sara queë, nácanu nigula huödx. ²⁰ Biti' guca chopa ládxë, en biti' gúquië' tu' caréajlé' ca naca le guzxi' lu në'ë Dios gunë' queë', pero bidipa ládxë'ë tu' guyéajlé'ë Dios, ate' gulu'ë Dios yöl-la' ba. ²¹ Idú ládxë'ë benë' löza Dios, napë' yöl-la' huáca gunë' idútë lë na' guzxi' lu në'ë. ²² Que lë ni na', tu' guyéajlé'ë Abraham Dios, Dios buzóë' queë' náquië' tsahui'.

²³ Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham, ²⁴ pero para uzi'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlé'ëru' Lë', busubanë' Xanru' Jesús lu yöl-la' guti. ²⁵ Jesús na', Dios budödë' Lë' para gútië' tu' nözi dul-la' nabágaru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

Le rata' queéru' tu' rnnë' Dios nuhuóácaru' tsahui'

5 Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlé'ëru' Lë', ate' que lë ni na' nuhuóácaru' tuz len Lë'. ² Tu' réajlé'ëru' Jesucristo, ruzí'iru' xibé le ruzá' ládxë'ë Dios queéru', le rutipa ládx-i'ru'. Rudzëjaru' tu' runru' löza uzí'iru' ca' xibé yöl-la' zxön queë' Dios. ³ Calégasö caní rudzëjaru', pero rudzëjaru' ca' cate' rigufi rizáca'ru', tu' chinöziru' le rigufi rizáca'ru' rusedi rë'u cózaru' zxön ladxi'. ⁴ Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u. ⁵ Cate' runru' löza Lë', bití' ca' raca chopa ládx-i'ru'. Caní naca, tu' nuhuóalaj nudzë'e icja ládx-i'do'oru' yöl-la' nadxi'i queë' Dios rë'u. Runë' Dios Bö' Lá'ayi, Bönni' gusól-lë'ë Dios queéru' ga raca caní.

⁶ Cate' ni' bití' ca' guca uláru' rácasö queéru', cate' gúla'rö dza queë', Cristo gútië' uláz queéru', ni' nácaru' bönachi dul-la'. ⁷ Cuntu nu gué'ëni gati uláz queë' tu' bönni' tsahui'. Nadxi ca' nu urugui gati uláz queë' tu' bönni' náquië' idú dx-i'a. ⁸ Dios ruluf'inë' rë'u ca nadxi'ide'enë' rë'u, tu' gútië' Cristo uláz queéru' cate' ni' nácaru' bönni' dul-la'. ⁹ Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queéru'. Que lë ni na' chinácada' löza usölë' Lë' rë'u lu dza ichúguië' Dios quégaca bönachi dul-la' gátigaca. ¹⁰ Cate' ni' bití' rilé'ëru' në' Dios dxi'a, gútië' Zxi'inë' Dios uláz queéru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'. ¹¹ Rudzëjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'. ¹³ Zí'atëlö ga bidxintë xibá queë' Dios, gulún bönachi yödzölió ni dul-la', pero bití' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' bití' ridxini xibá queë' quégaquië'. ¹⁴ Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' bití' gula'dá'baga' tu le gunná bë'ë Dios ca benë' Adán. Náca gaca yúgu'të bönachi tuz len Adán tu' náca gaca zxi'ini xi'sóë'. Lë ni rulufi rë'u ca ilaca tuz len Cristo yúgu'të nupa ila'yéajlé' Lë'.

¹⁵ Le rúnnašë' queéru' Dios bití' naca ca le guca queéru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxi'atërö naca le ruzá' ládxë'ë queéru' Dios, en le

rúnнасé' queéru'. Ruzá' ládxë'ë queéru' lë ni ni'a que le benë' yetuzë' Bönni', Jesucristo. ¹⁶ Le rúnнасé' Dios queéru' biti' naca ca le guca queéru' tu' nözi dul-la' na' benë' tuzë' bönni' na'. Le guchúguië' Dios queë' Adán gátie' tu' nözi dul-la' na' benë', guchúguië' ca' Dios qué-gaca yúgu'të bönachi gátigaca. Le rún-nasé' Dios queéru' naca para huóácaru' tsahui' lahuë' Lë' sal-la' nabágaru' dul-la' zían. ¹⁷ Guyú'u yöl-la' guti tu' nözi dul-la' benë' tuzë' bönni'. Nácaterö löza ila'deli' yöl-la' na'bán nupa ulu'huóaca tsahui' lahuë' Dios tu' zoa le ruzá' ládxë'ë queéru' Dios ni'a que le benë' yetuzë' Bönni', Jesucristo.

¹⁸ Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huóaca tsahui' yúgu'të bönachi ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'. ¹⁹ Bulu'huóaca huen dul-la' bönachi zían tu' cabí benë' tuzë' bönni' ca rnna xtídzë'ë Dios. Lësca' caní ulu'huóaca tsahui' bönachi tu' benë' yetuzë' Bönni' na' ca rnna xtídzë'ë Dios.

²⁰ Guyú'u xibá queë' Dios yödzülió ni para gaca bë'da' nabága'gaca bönachi dul-la'. Tu' guca bë'rö nabága'gaca dul-la', guca bë'rö ca' zxonterö naca le buzá' ládxë'ë Dios quégaca bönachi. ²¹ Guta' yöl-la' huáca unná bë' que dul-la' guti rë'u. Lësca' caní le ruzá' ládxë'ë Dios queéru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queéru' ni'a que le benë' Xanru' Jesucristo.

**Naca tsca chinátiru' para
cabirö gunru' dul-la'
tu' nabániru'-në' Jesucristo**

6 ¿Bizxi caz innaru' na'a? ¿Naru' gúntsaru' dul-la' para gáta'rö queéru' le ruzá' ládxë'ë Dios queéru'? ² ¿Biti' gun cázaru' ca! Naca queéru' ca tsaz chinati

cázaru' para cabirö gunru' dul-la'. ¿Naru' gúntica'siru' dul-la'? ³ ¿Naru' cabí nózili' ca na' naca queéru'? Channö bidílaru' nisa para huóácaru' tuz len Cristo, lë na' bidílaru' nisa rulu'f'i rë'u chigudódiru' lu yöl-la' guti tsözxón len Lë'. ⁴ Ca na' guca, gútilenru'-në' Cristo tsözxón, lësca' caní bigáchi'lenru'-në' tsözxón niu' yeru ba cate' ni' bidílaru' nisa. Ca na' busub-anë' Dios Cristo lu yöl-la' guti len yöl-la' huáca zxon queë', lës caní ca' rë'u nubánlenru'-në' Jesús tsözxón para gácaru' bönachi idútë cubi queë'.

⁵ Channö nunru' Cristo tsözxón, gútiru' ca na' gútië' Lë', lësca' caní gunru'-në' tsözxón, ubanru' lu yöl-la' guti ca na' bubanë' Lë'. ⁶ Chinóz quéziru' lë ni, yöl-la' bönachi queéru' le guzóa z'f'alö gudá'len Lë' tsözxón lë'e yaga cruz, para initi yöl-la' bönachi queéru' na' bënlenru' le dul-la', para cabirö inná be'e le naca dul-la' rë'u. ⁷ Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabágaru' dul-la' na', ate' bíti'rö yú'uru' lu na' dul-la'. ⁸ Na'a, channö nátilenru'-në' Cristo tsözxón, réajlë'ëru' ubánlenru'-në' ca' tsözxón, ⁹ tu' chinóziru' bubanë' Cristo lu yöl-la' guti, en bíti'rö gátie'. Que lë ni na' bíti'rö bi gaca gun yöl-la' guti na' queë' Lë'. ¹⁰ Ca na' guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios. ¹¹ Lësca' caní ral-la' usáca'li' queéli' naca queéli' ca chinati cázali' para cabirö gunli' dul-la', pero zóali' nabanli' para gunli' ca rnna xtídzë'ë Dios tu' nácali' tuz len Xanru' Jesucristo.

¹² Que lë ni na', biti' güf'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizé' ládx'i'li' le ruá' dö', lu le naca cázali'. ¹³ Biti' udödi cuinli' lu dul-la', biti' gunli' le ruá' dö', pero guli'dödi

cuinli' lu në'ë Dios tu' nubanli' lu yöl-la' guti, en guli'dödi lu në'ë idütë le naca cázali' para ugúnlenë' le le naca dxi'a. ¹⁴Biti' güf'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá ládxe'ë queëru'.

Le rucudzu' didza' ca naca que nu bönni' nadó'o

¹⁵¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá ládxe'ë Dios rë'u? ¿Biti' ca' gunru' caní! ¹⁶Chinóz quézili' dxi'a channö udödi cuinli' lu në'ë nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lësca' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huóacali' tsahui'. ¹⁷Na'a, ¿Xclenë' Dios! Salla' zí'aló gúcali' bönni' nadó'ogaca lu na' dul-la', na'a idú ládxi'li' runli' ca rinná bë' xibá na' budödi cuinli' lu në'e. ¹⁸Tu' chinulali' lu na' dul-la', nuhuóacali' ca yugu' bönni' nadó'ogaca lu na' le naca dxi'a. ¹⁹(Ruf'ilena' libí'ili' didza' ca tufi didza' bönachi, tu' cabí réajni'ili' idütë lu yöl-la' bönachi queéli'.) Zí'aló budödi cuinli' len idütë le naca cázali' lu na' le ruá dö', en lu na' le cabí naca tsahui', ate' gúcali' ca yugu' bönni' nadó'ogaca lu në'eguequi, en benli' xichini le ruá dö' na'. Na'a, guli'dödi idütë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'. ²¹Na'a, ¿naru' buzí'itsali' xibé lë na' benli' zí'aló? Na'a

lë na' benli' run ga rutuí'ili', en run ga nu gati tsaz. ²²Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queéli' yöl-la' na'bán idú. ²³Lazzaj nu run dul-la' naca yöl-la' guti, pero le rúnna'së' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

Le rucudzu' didza' yöl-la' nutsaga na'

7 Bócha'ado', núlöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'. ²Naca queéli' ca naca que tu nigula nutsaga ná'lennu-në' bönni', yú'unu lu në'ë bönni' queënu tsanni ni zoë' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'. ³Caní naca, tsanni ni zoë' nabanë' bönni' queënu, channö utsaga ná'lennu-në' ia'túë' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴Lësca' caní raca queéli', bócha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxe'ë Dios. ⁵Tsanni ni' guyú'uru' lu na' yöl-la' bönáchisö queëru', le rinná bë' xibá na' ben ga gualaca bë' le guzé ládxi'ru' le ruá dö', le gulún dxin lu idütë le naca cázaru' para ilún ga gátiru'. ⁶Na'a nuláru' lu na' xibá na' tu' nati cázaru' tsa naca le rinná bë' xibá na' gunná be'e rë'u zí'aló. Caní naca para gaca gunru' xichinë' Dios lu yöl-la' na'bán cubi le runnë' queëru' Dios Bö'

Lá'ayi, en calëga gunru' xichinë' lu lë na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¿Biti' ca' run caní! La'tu' cabí buzéajni'i le rinná bë' xibá na' neda', biti' gunözda' naca dul-la' le runa'. La'tu' cabí zoa lu xibá na' le rnna: "Biti' së ládxi'u le dë que luzó'o", biti' gunözda' naca dul-la' yöl-la' rizé ladxí' le dë que luzá'a. ⁸ Cate' bidxín quia' xibá na', guca bë' le naca dul-la' na' run dxin lu idútë le naca', ate' ben ga gúquibe'eda' rizé ládxa'a yúgu'të le ruá' dö'. Ga biti' ridxini xibá na', biti' naca bë' le naca dul-la'. ⁹ Dza ni'te, zí'atëlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'. ¹⁰ Dios gunná bë'ë xibá na' para gun ga gata' queéru' yöl-la' na'bán, pero ben ga gúquibe'eda' chinati caza'. ¹¹ Guca bë' nazí' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

¹² Que lë ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë. ¹³ ¿Naru' bentsö lë na' naca dxi'a ga bidxín quia' yöl-la' guti? ¿Biti' ca' naca ca'! Le naca dul-la' bugún dxin lë na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatëro xihui' yúgu'të le naca dul-la'.

¹⁴ Nóziru' Dios Bö' Lá'ayi bennë queéru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que. ¹⁵ Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' lë na' ré'ënda' guna'. Le naca dul-la' le cabí rilé'eda' dxi'a, lë na' runa'. ¹⁶ Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le

cabí naca dxi'a. Que lë ni na' naca bë'da' naca dxi'a le rinná bë' xibá na'. ¹⁷ Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'. ¹⁸ Nözda' biti' zóalen neda' le naca dxi'a, o huáca innía', lë na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' lë na' naca dxi'a. ¹⁹ Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'. ²⁰ Que lë ni na', channö runa' dul-la' na' biti' ré'ënda' guna', calëga neda' caz runa' le, pero dul-la' na' dzaga neda' run ga runa' dul-la' na'.

²¹ Caní naca le raca queéru' yúgu'tëru'. Cate' ré'eniru' gunru' le naca dxi'a, dzaga rë'u le run ga runru' le ruá' dö'. ²² Lu icja ládxi'da'ahua' raza ládxa'a xibá queë' Dios ²³ pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

²⁴ ¿Bica' bayechi' neda'! ¿Nuzxi caz gaca usölá neda' lu yöl-la' bönáchisö quia' le run ga runa' dul-la'? ²⁵ ¿Xclenë' Dios, chinularu' na'a ni'a que le benë' Xanru' Jesucristo! Que lë ni na', tsa naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga ré'ënda' guna' dul-la'.

Le runru' tu' zóalenë' Dios Bö' Lá'ayi rë'u

8 Que lë ni na', bíti'rö bi xíguia' nabá-ga'gaquie' yugu' bönni' néquigue-quinë' queë' Jesucristo, bönni' na' bíti'rö tunë' ca ré'ëni yöl-la' bönáchisö qué-gaquië', pero ca ré'ënë' Dios Bö' Lá'ayi tunë'. ² Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti.

³Chinunë' Dios le cabí guca gun xibá na', tu' cabí bi guzquéu' gun tu' nácaru' bönáchisö. Dios gusól-lë'ë Zxí'ini cazë', ate' guljë' bönachi ca nácaru' rë'u, nácaru' bönachi dul-la', pero biti' bi dul-la' benë' Lë'. Busubaga' cuinë' dul-la' nabá-ga'ru' rë'u, ate' caní guca, guchúguië' que dul-la' runru' lu yöl-la' bönáchisö queëru'. ⁴Caní benë' para gaca gunru' idútë le naca tsahui' le rinná bë' xibá queë', núlöru' na' bítirö runru' ca ré'ëni yöl-la' bönáchisö queëru', pero ca ré'ëne' Dios Bö' Lá'ayi runru'.

⁵Bönni' tunë' ca ré'ëni yöl-la' bönáchisö quegaquië', tu'fí ládxi'gaquië' le naca que yöl-la' bönáchisö quegaquië', pero bönni' tunë' ca ré'ëne' Dios Bö' Lá'ayi, tu'fí ládxi'gaquië' le naca queë' Dios Bö' Lá'ayi. ⁶Channö ru'fí ládxi'siru' le naca que yöl-la' bönáchisö queëru', tsaz gátiru', pero channö ru'fí ládxi'ru' le naca queë' Dios Bö' Lá'ayi, chidé yöl-la' na'bán idú queëru', en ribózaru' dxi ládxi'. ⁷Núti'tës nu ru'fí ládxi'sö le naca que yöl-la' bönáchisö que, biti' rilë'e Dios dxi'a, tu' cabí run nu na' ca rinná bë' xibá queë' Dios, en biti' ca' gaca gun caní. ⁸Que lë ni na', bönni' na' tunë' ca ré'ëni yöl-la' bönáchisö quegaquië' biti' gaca ilunë' le raza ládxi'ë Dios.

⁹Na'a, bítirö runli' ca ré'ëni yöl-la' bönáchisö queéli', pero runli' ca ré'ëne' Dios Bö' Lá'ayi tu' zóalen cazë' Lë' libí'ili'. Tu bönni' biti' zóalenë' Dios Bö' Lá'ayi lë', Nu na' risól-lë'ë Cristo queëru', biti' néquinë' queë' Cristo. ¹⁰Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'. ¹¹Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesu-cristo lu yöl-la' guti, runë' ga nubanli' lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

¹²Que lë ni na', libí'ili' bócha'a, dë tu le ral-la'ru', pero calëga que yöl-la' bönáchisö queëru', para cabirö gunru' ca ré'ëni yöl-la' bönáchisö queëru' na'. ¹³Channö runli' ca ré'ëni yöl-la' bönáchisö queéli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queéli', gata' yöl-la' na'bán idú queéli'.

¹⁴Yúgu'të nupa tun ca ré'ëne' Dios Bö' Lá'ayi nácacaga zxf'inë' Dios. ¹⁵Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzóbili', pero chinunë' ga nácali' zxf'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad. ¹⁶Lë cazë' Dios Bö' Lá'ayi ruzéajni'inë' bö' naca cázaru', en runë' ga nóziru' nácaru' zxf'inë' Dios. ¹⁷Channö chinácaru' zxf'inë' Dios, gata' ca' queëru' tsözxón len Cristo le nequi queë' Xúziru' Dios. Caní gaca queëru' channö rigufi rizáca'lenru'-në' tsözxón Cristo para uzí'iru' xibé tsözxón len Cristo yöl-la' zxón queë' Dios.

¹⁸Runi neda', yugu' lë ni rigufi rizá-ca'ru' na'a naca tu le cudí'do'os tscá naca yöl-la' zxón na' gata' queëru' dza si' za'. ¹⁹Ta'böza yúgu'të le nunë' Dios, en ta'zë ládxi'gaca idxintë dza na' ulu'ë lahui Dios yugu' bönni' nácacaguië' zxf'ini cazë'. ²⁰Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu' benë' Dios ga naca caní. Benë' ca' ga naca löza que idútë lë na' nunë', ²¹ate' ulu'lá-gaca yúgu'të le nunë' Dios lu lë na' run ga ila'niti. Caní gaca, yúgu'të lë na' ulu'z'f' ca' xibé yöl-la' rusölá le nazá-ca'da' na' ulu'zi'ë xibé yugu' zxf'inë' Dios. ²²Nóziru' ta'gu'fí ta'zaca' yúgu'të le nunë' Dios ga ridxintë na'a dza, ca na' rigufi rizáca'nu tu nigula chizóa sóabi' bí'ido' queënu. ²³Rigufi rizáca'a, calëgasö yödzölió ni, pero rigufi rizáca'ru'

ca' rë'u, sal-la' zóalenë' Dios Bö' Lá'ayi rë'u, Nu na' naca queéru' le rulu'í rë'u ca ral-la' gaca cázaru'. Rigufi rizáca'ru' tsanni ni ribózaru' dza ni' ulu'ë lahui Dios nácaru' idú zxf'inë', dza ni' únë' ca' idútë le naca cázaru'. ²⁴ Tu' runru' löza lë ni, nuláru' rë'u, pero channö gaca ilé'eru' lë na' runru' löza, bití' naca tu le ribózaru'. Bití' ribózaru' le chirilé'eru'. ²⁵ Na'a, channö runru' löza tu le cabí gaca ilé'eru', lu yöl-la' ribóza zxön ladxi' ribózaru' le.

²⁶ Lësca' caní rácalenë' Dios Bö' Lá'ayi rë'u cate' rudú ládxi'ru', tu' cabí nóziru' bi ral-la' inábiru'-në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxë'ë, tsca cabí gaca nu inná. ²⁷ Dios ruyúë' le yu'u icja ládxi'do'-gaca bönachi, en nózinë' le ré'ënë' in-në' Dios Bö' Lá'ayi na', ate' Lë', ca ré'ëni quézinë' Dios, rudödë' xtídza'gaca nupa néquiquequi quez queë' Cristo lahuë' Dios.

Nadéli'tëröru' tu' zóalenë' Cristo rë'u

²⁸ Nóziru' tu'zi'ë xibé bönni' yúgu'të le raca quégaquië', bönni' na' nadxf'igue-quinë' Dios, ate' bulidzë' Dios légaquië' ca nuzóa cazë' gunë'. ²⁹ Yugu' bönni' na' guró cazë' queë' Dios zí'atëlö, buzóë' ca' quégaquië' zf'atëlö ilácagaquië' ca naca cazë' Zxf'inë', para gáquië' Zxf'inë' lo ladaj zían bóchë'ë. ³⁰ Nupa na' buzóë' Dios quégaquië' zf'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibé yöl-la' zxön queë'.

³¹ ¿Bizxi caz innaru' na'a ca náca-gaca lë ni? Channö rácalenë' Dios rë'u, bití' ral-la' gádxiru' sal-la' bi ilún bönachi queéru'. ³² Dios, idú ládxë'ë ben-në' queéru' Zxf'ini cazë'. Budödë' lë' para gútië' uláz queéru'. Channö caní benë'

Dios, ¿naru' cabí gúnnadë'ë queéru' tsözxón len Zxf'inë' yúgu'të le dë'? ³³ ¿Nuzxi caz gaca bi usubaga' nupa na' guró cazë' queë' Dios? ¿Cuntu nu gaca, tu' run cazë' Dios ga nuhuöá-caru' tsahui'? ³⁴ ¿Nuzxi caz gaca ichugu queéru' gátiru'? ¿Cuntu nu gaca, tu' guti cazë' Cristo uláz queéru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatërë' zxön, ate' rnnë' dxi'a uláz queéru' lahuë' Dios! ³⁵ Sal-la' bi raca queéru', nöz quéziru' nadxf'inë' Cristo rë'u. Nóziru' nadxf'inë' rë'u:

sal-la' rigufi rizáca'ru', o sal-la' risëbi ládxi'ru',
o sal-la' ta'bía ládxi'gaca bönachi rë'u,
o sal-la' ridunru', o sal-la' riyadzaj le gácuru',
o sal-la' zoa bönadxi queéru', o sal-la' ilútië' bönni' rë'u.

³⁶ Ca náca-gaca lë ni nazúaj lu guichi lá'ayi, rnna:
Tu' néquitu' quiu' Li', túntica'sö bönachi ga gátitu'.

Nácatu' ca yugu' bö'cu' zxila',
nadódigacaba' lu na' nu guti légacaba'.

³⁷ Na'a, tu' zóalen rë'u Nu na' nadxf'i rë'u, nácatërö löza idéli'ru' lu le raca queéru'. ³⁸⁻³⁹ Que lë ni na' runi neda':
Bití' bi sequi' gun ga bítirö idxf'inë' Dios rë'u.

Nadxf'inë' rë'u tu' néquiru' queë' Xanru' Jesucristo.

Bití' sequi' gun caní yöl-la' guti o yöl-la' na'bán,

o yugu' gubáz lá'ayi o nupa ta'nná bë',
o yugu' yöl-la' huáca que tu' xihui',
o bítitës bi zoa o bítitës bi si' za',
o tu le dë xitsá'alö o tu le dë cadxf'ilö,
o bítitës bi nunë' Dios.

Dios guró cazë' queë' bönachi Israel

9 Ruáa didza' idútë li tu' néquida' queë' Cristo, ate' röjlóz didza' ni le naca queë' Dios Bö' Lá'ayi le yu'u

icja ládxi'da'ahua'. ¡Biti' rizí' yé'a!
²Ruhuí'inide'eda', en risébitica'sö
 ládxa'a ³tu' raca ládxa'a guna' ga ulu'lé'
 böchi' luzá'a, bönni' uládz quia'. La'tu'
 huácalen légaquié', gué'eni quézida'
 ubéaj ládxe'ë Dios neda', en ulá'alena'
 Cristo. ⁴Yugu' bönni' uládz quia' na'
 nácaquié' zxf'ini xi'sóé' Israel, ate'
 Dios bé'ë légaquié' lataj ilácaquié'
 zxf'ini cazé'. Yöl-la' zxön queé' Dios
 guzóalen légaquié', ate' Dios budödé'
 lu ná'agaquié' didza' rucá'ana tsahui',
 enca' xibá queé'. Bulidzé' légaquié'
 para tseaj ládxi'gaquié' Lë', ate'
 budödé' lu ná'agaquié' yugu' le guzxf'
 lu në'ë guné' le ilún tsahui' bönachi.
⁵Nácaquié' zxf'ini xi'sóagaquié' xuz
 xtó'otu' Abraham, en Isaac, en Jacob,
 ate' ladaj di'a dza quégaquié', ca naca
 yöl-la' bönachi queé', guljé' Cristo, Nu
 naca caz Dios, en rinná bé'ené' yúgu'té.
 ¡Rácatica'sö queé' yöl-la' ba! ¡Ca' gaca!

⁶Sal-la' yúgu'té bönni' uládz quia' biti'
 nazí' lu ná'agaquié' Cristo, biti' ral-la' in-
 naru': Nítisö böáca xtídzé'ë Dios. Caléga
 yúgu'té zxf'ini xi'sóé' Israel nácaquié'
 idú bönachi Israel, nupa néquiquequi
 queé' Dios. ⁷Sal-la' gúljagaquié' zían
 zxf'ini xi'sóé' Abraham, biti' guláquié'
 yúgu'té idú zxf'ini xi'sóé' Abraham, pero
 guca ca na' nazúaj lu guichi lá'ayi, le
 rna: "Yugu' zxf'ini xi'sóé' Isaac ilaca idú
 zxf'ini xi'sú'." ⁸Caní naca, nupa náca-
 gaca zxf'iné' tu bönni' néquiné' queé'
 Dios, caléga yúgu'té nácaquié' zxf'iné'
 Dios. Lësca' caní, náca gaca idú zxf'ini
 xi'sóé' Abraham núpaso na' náljagaca
 ni'a que lë na' guzxf' lu në'ë Dios. ⁹Lë na'
 guzxf' lu në'ë Dios unödzejé' queé' Abra-
 ham rna caní: "Ia'tú iz na'a dza huö-
 da', ate' Sara quiu' uzóanu-bi' tubi' bi'i
 bönni'do'."

¹⁰Calégasö lë ni guca caní, pero lës-
 ca' cate' Rebeca ni' nuá'anu-bi' yugu'
 bi'i bönni'do' queé' Isaac, xuz xtó'o-
 tu', ¹¹⁻¹³cate' ni' si' iláljabi', en biti'

bi núnigacabi' le naca dxi'a o le ruá'
 dö', Dios gudxé'-nu Rebeca na', gunné':
 "Bi'i bönni' zí'alö quiu' gunbi' xichin-
 bi' bi'i buropi." Didza' ni röjlóz lë na'
 nazúaj lu guichi ca gunné' Dios, le rna:
 "Bidxí'ida'-né' Jacob, en caléga Esaú."
 Caní guca, bugá'ana tsutsu le buzóé' tsaz
 Dios ca naca lë na' chiguró cazé'. Que
 lë ni na' biti' raca caní ni'a que tu le
 gaca ilún bönachi, pero naca caní tu' ribó
 cazé' Dios nu rulidzé'.

¹⁴¿Bizxi caz innaru' na'a? ¿Naru'
 runtsé' Dios le cabí naca tsahui'? ¡Biti' ca'
 runé' caní! ¹⁵Dios gudxé' Moisés, gun-
 né': "Huéchi' ládxa'a nu ré'ënda' huéchi'
 ládxa'a, en güfi' ládxa'a nu ré'ënda' güfi'
 ládxa'a." ¹⁶Que lë ni na', biti' raca caní
 ni'a que le té'ëni caz bönachi, o tu'
 runé' bayudxi nu bönni', pero naca tu'
 ré'ëni quéziné' Dios, ruhuéchi' ládxe'ë
 bönachi. ¹⁷Ca naca lë ni nazúaj lu guichi
 lá'ayi ca na' Dios gudxé' Faraón, gunné':
 "Que lë ni na' buzóa' li' ga rinná bé'u
 para ulu'a lahui yöl-la' huáca quia' ga
 zu', en guna' ga ilunbé' bönachi idúté
 yödzölió le naca' neda'." ¹⁸Caní naca,
 Dios ruhuéchi' ládxe'ë nu ré'ëni quéz-
 iné', en lësca' caní runé' zidzaj icja ládxi-
 i'da'ahué' nu bönni' ré'ëné' guné' zidzaj
 icja ládxi'da'ahué' bönni' na', ca na' bené'
 queé' Faraón na'.

¹⁹Na'a guiéli' neda': "Channö caní
 naca, ¿bizx que rsubágué'ë Dios bö-
 nachi xíguia'? ¿Nuzxi caz gaca tá'baga'
 le ré'ëni quéziné' Dios guné'?" ²⁰¡Biti' ca'
 naca caní! ¿Nuzxi caz li' rnnió' que Dios?
 ¿Naru' huácatsö tu yusu' néquini yu guíé
 bönni' huen rö'ö, inná: "¿Bizx que be-
 nu' neda' caní?" ²¹¿Naru' cabí dë lu në'ë
 bönni' huen rö'ö guné' que guna' na' tu
 yusu' nu ugún le dxin ga liná', en que la'
 guna' ná'asö guné' ia'tú yusu' nu ugún le
 dxin ga biti' naca liná'?

²²Ré'ëni quéziné' Dios ulu'ë lahui ca
 guné' xíguia' nu ruá' dö' en guné' ga
 gaca bé' yöl-la' huáca queé', pero lu yöl-

la' riböza xzön ladxi' queë' biá' guléné' yugu' bönni' ni' ral-la' ichúguië' qué-gaquië', yugu' bönni' na' nabága'gaquië' xíguia', en run bayudxi usunítie' lé-gaquië'. ²³ Caní runë' Dios para gaca bë' nácatëro lesaca' yöl-la' ruzá' ladxi' queë', lë na' rulu'ë lahui lógaca nupa na' ruhuéchi' ládxë'ë, bönni' na' buzóë' qué-gaquië' z'fatëlö ulu'zi'ë xibé yöl-la' xzön queë'. ²⁴ Yugu' bönni' caní bulidzë' Dios. Calégasö bulidzë' netu', bönachi judío, pero lësca' bulidzë' bönachi izá'a. ²⁵ Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné': Nupa biti' nácgaca bönachi quia', gu'a láguequi: Bönachi quia', ate' nupa na' biti' bidxf'ida', gu'a láguequi: Nupa nadxf'ida'.

²⁶ La' ná'asö ga gunnía' quéguequi: "Biti' nácali' bönachi quia'", si' láguequi: "Yugu' zxf'inë' Dios ban."

²⁷ Na'a, ca naca quégaca zxf'ini xi'sóë' Israel, Isaías gunné': Sal-la' ila'yanë' zxf'ini xi'sóë' Israel, en iláquië' tsca naca yuzxi tu ra' yegu xzön, ulu'lé' nabábasë'.

²⁸ Xanru' Dios la' guntë' ga gaca idútë lë na' ichúguië' quégaca bönachi yödzülió ni.

²⁹ Lësca' caní Isafas bë'ë didza' z'fatëlö, gunné':

Dios, Xanru' unná bë' idú, la'tu' cabí bucá'anë' queëru' yugu' zxf'ini xi'sóaru', ugá'anaru' ca yödzö Sodoma, en yödzö Gomorra, yugu' yödzö na' busunítie' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' biti' nabábagaquië' Israel chibila'déli'në' nuhuóacagaquië' tsahui' lahuë' Dios, en biti' gulunë' bayudxi ulu'huóáquië' tsahui' lahuë' Dios, pero nuhuóacagaquië' tsahui' tu' ta'yéajlë'ë

Dios. ³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquië' tsahui', biti' bila'déli'në' le ral-la' gata' quégaquië' tu' tunë' ca rinná bë' xibá na'. ³² ¿Bizx que na' guca caní? Caní guca, tu' cabí gulunë' caní lu yöl-la' réajlë' quégaquië' Dios, pero rácasö quégaquië' gulë'ënnë' ilunë' ca rinná bë' xibá na', ate' que lë ni na' gula'chíxinë', o huáca innaru': Yöjchégu'gaquië' lu lë na' nazí'i le: Guiój Ga Nu Røjchegu'. ³³ Ca naca lë ni nazúaj lu guichi lá'ayi, rnna:

¡Buli'yú! Uzóa'-në' yödzö Sión bönni' na' gáquië' ca tu guiój ga nu tsøjchegu', guiój na' gun ga nu ichixi inigui. Nu tséajlë' Lë', biti' ca' utuf'i nu na'.

10 Libí'ili', bócha'ado', le rizé ládx-a'a, en le rinábida'-në' Dios gunë' quégaca bönachi Israel naca gunë' ga ulu'lé'. ² Runa' ba nalí quégaquië', idú ládxi'gaquië' tuf'i ládxi'gaquië' Dios, pero calëga len yöl-la' réajni'i idú. ³ Biti' nózguequinë' ca runë' Dios, runsë' ga nácaru' tsahui', pero té'ënnë' ilún cuín-gaquië' tsahui' rácasö quégaquië', en biti' ta'cu'ë nöxaj ladxi' lahuë' Dios para gaca gunë' légaquië' tsahui'. ⁴ Budxi benë' Cristo le ré'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

⁵ Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' idútë ca rinná bë' xibá na', soë' ibanë' tu' gunë' caní." ⁶ Na'a, ca naca que nu huóaca tsahui' tu' réajlë' Dios, rnna caní: "Biti' innó' lu icja ládxi'do'o, biti' innó': ¿Nuzxi caz cuen ni' yehua' yubá?" Lë ni naca, para gun nu na' ga huójtë' Cristo, ⁷ en biti' innó': "¿Nuzxi caz huó-taj ga dë lataj que nupa chinátigaca?" Lë ni naca, para gun nu na' ga cuenë' Cristo, urúajë' lu yöl-la' guti. ⁸ Na'a, ¿bizxi caz rnna? Caní rnna: "Gala' ga zu' zoa caz

xtídzë'ë Dios. Lu ru'u, en lu icja ládxi'-do'o zoa xtídzë'ë na'." Lë ni naca didza' que le réajlë'ëru' Dios runtu' libán que, rnnatu': ⁹"Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'." ¹⁰Lu icja ládxi'do'oru' réajlë'ëru' Jesús para gácaru' tsahui', ate' len didza' ru'íru', rulu'íru' lahui le náquië' Jesu-cristo para uláru'.

¹¹Nazúaj lu guichi lá'ayi le rnna: "Biti' ca' ulu'tuf'i yúgu'të nupa ta'yéajlë' Lë'." ¹²Dios, la' tuz ca ru'í ládxi'ë yugu' bönni' judío, enca' yugu' bönni' idútë yödzölió, tu' Lë cazë' Xanru' náquië' Xán-gaquië' yúgu'të, en nápadë'ë bi unödzjë' quégaca yúgu'të nupa tu'lidza Lë'. ¹³Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'." ¹⁴¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntu nu zoa nu gun libán ló-gaquië'? ¹⁵¿Nacxi caz gaca ilunë' libán channö cuntu nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacua' bönni' rójéngaqië' libán que le ribequi dxi ládxi'ru', en tunë' libán que didza' dxi'a."

¹⁶Na'a, calëga yúgu'të' gula'z'í lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?" ¹⁷Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

¹⁸Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna: Idútë yödzölió bila'yöni ch'íguequi. Yúgu'të lataj bila'dxín xtídzá'guequi.

¹⁹Lësca' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné': Gun caza' ga uzxé'eli',

tu' idx'í'ida' bönachi bití nabábagaca lib'í'ili'.

Ní'a quégaca bönachi cabí ta'yéajni'i guna' ga lelí'.

²⁰Gudödi ní' gúcadë'ë rugu ladxi' Isaías na', en bë'ë didza' uláz queë' Dios, gunné':

Bila'dzöli neda' nupa bití' gula'guílaj neda'.

Bulu'í lahua' lógaquië' bönni' bití' bi gula'nábinë' neda'.

²¹Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí na'a, bulidza' bönachi bití' túngaca ca rnna xtídzá'a, en ta'dá'baga' neda'."

Nupa nulágaca ladaj bönachi Israel

11 Na'a rnnía': ¿Naru' nusán në'ë Dios bönachi Israel? ¿Bití' ca' naca caní! Neda' caz naca' bönni' Israel. Naca' xz'í'ini xí'sóë' Abraham, en nababa' di'a dza queë' Benjamín, xz'í'ini cazë' Israel na'. ²Dios bití' nusán në'ë bönachi queë', nupa na' guró cazë' queë' dza ni'te. ¿Naru' cabí núnbë'ëli' lë na' nazúaj lu guichi lá'ayi ca na' benë' Elías? Bulidzë' Dios, en buzéguië' bönachi Israel didza', gunné': ³"Xan, chigulútië' bönni' gulu'ë didza' uláz quiu', en bulu'quinnajë' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' té'ënnë' ilútië' ca' neda'." ⁴Na'a, ¿bizxi didza' bu-bí'ë Dios? Caní gunné': "Nun ch'í'igaca caza'-në' quia' tsónnalalaj yu' chi gáyu'ë bönni' bití' tu'zechu zxi'bagaquië' lo budó' guió'j na' naz'í' le Baal." ⁵Lësca' caní naca dza ni zóaru' na'a, nagá'anagaca bal-la bönachi Israel, nupa na' guró cazë' queë' Dios tu' ruzá' ládxi'ë caní quégaquië'. ⁶Channö naca le ruzá' ládxi'ë caní quégaquië', bití' naca ní'a que tu le gaca ilunë'. La'tu' guca ní'a que tu le gaca gunru', lë na' ruzá' ládxi'ë queëru' Dios bíti'ró gaca tu le ruzá' ládxi'ë queëru'.

⁷ ¿Bizxi caz innaru' na'a? Lë na' gula'guíljë' bönni' Israel, biti' bila'déli'në', pero chibila'déli' le nupa ni' guró cazë' queë' Dios, ate' ia'zica'rë' na', Dios benë' zidi icja ládxi'do'gaquië'. ⁸ Ca naca lë ni nazúaj lu guichi lá'ayi, rna: "Dios benë' ga nácaquië' chul-la niti." Caní benë', en sal-la' gaca ila'lé'enë' le runë', en ila'yönnë' xtídzë'ë, biti' ca' ta'yéajni'inë'. Caní naca quégaquië' ga ridxintë dza ni zóaru' na'a. ⁹ Ca naca lë ni bë'ë ca' David didza', gunné':

Yugu' laní quégaquië' ulu'huóaca le
ila'zón légaquië',

en ca tu yalaj ga ila'rólinë'.

Ilaca ca' le ilún ga ila'chíxinë',

en ca tu le uzí' lébi légaquië'.

¹⁰ Ila'chul-la guiój lógaquië', para cabí
ila'lé'enë'.

Ila'yechu tsaz cúdzu'gaquië' tu' ilu'ë
yua'.

Ca gaca ulu'lágaca bönachi biti' náca gaca judío

¹¹ Na'a rnní'a': ¿Naru' gula'chíxinë'
yugu' bönni' judío ga bidxintë gula'nítië'
tsaz? ¿Biti' ca' guca ca'! Gula'dá'baguë'ë
xtídzë'ë Dios, ate' na'a Dios ru'ë lataj
ulu'lágaca nupa biti' náca gaca judío
para gunë' ga ulu'zxé'enë' yugu' bön-
ni' judío léguequi. ¹² Le gulunë' bönni'
judío, gula'chíxinë', ben ga bidxín qué-
gaca bönachi yödzölió ni le naca ca tu
yöl-la' tsahui'. Channö caní guca, guta'
yöl-la' tsahui' quégaca nupa biti' náca-
gaca judío tu' gula'nítië' yugu' bönni'
judío, zxóntëro gaca le gata' quéguequi
cate' yugu' bönni' judío na' ulu'huóáquië'
queë' Dios.

¹³ Na'a rea' libí'ili' biti' nácali' judío,
rnní'a': Tu' naca' gubáz nasól-lë'ë Dios
lógaca nupa biti' náca gaca judío, runa'
zxön lë na' dë lu na'a ¹⁴ para nadxi ca'
huáca guna' ga ulu'zxé'enë' bönni' uládz
quia' libí'ili', en caní guna' ga ulu'lé'
bal-lë'. ¹⁵ Channö bulu'huóaca bönachi

nacuá' idú yödzölió queë' Dios tu' bu-
lu'nítië' yugu' bönni' judío xilátjagaquië',
zxóntëro gaca le gata' quéguequi cate'
ulu'huóázië' xilátjagaca cazë' na'. Gaca
ca raca cate' tu'bángaca nupa chináti-
gaca. ¹⁶ Channö rigú'uru' quez queë'
Dios cúa nílado' rubéajru' zí'aló, lësca'
cúa na' nagá'ana naca quez queë', en
channö uzóaru' quez queë' Dios luí yaga,
lësca' ilaca quez queë' ni'a në'e yaga na'.

¹⁷ Náca gacië' bal-lë' bönni' judío ca
ni'a në'e tu yaga olivo narúgugaca, ate'
libí'ili', ca ni'a në'e tu yaga olivo guí'a,
yöjtá'ali' yaga olivo dxi'a na', en buázili'
xilátjagaca nupa na' gurúgugaca, en
ruzí'ili' xibé luí, en xichöni yaga olivo
dxi'a na'. ¹⁸ Que lë ni na', biti' gun ba
zxön cuinli', biti' uzóali' tsölá'aló nupa
náca gaca ca ni'a në'e na' narúgugaca.
Channö run ba zxön cuinli', ral-la' in-
ózi' calëga libí'ili' rugáguli' luí yaga na',
pero luí yaga na' rugagu libí'ili'.

¹⁹ Nadxi ca' innó': "Gula'rugú ni'a
në'e yaga na' para gaca tsázia' neda'
xilátjagaca." ²⁰ Nácatë didza' ru'u, pero
gula'rúguië' tu' cabí gula'yéajlë'ë, ate'
yöjtó'o li' yaga na' tu' réajlë'u Dios. Que
lë ni na', biti' ral-la' gun ba zxön cuinu',
pero ral-la' gádxinu' Dios. ²¹ Channö
benë' Dios léguequi xíguia', nupa na'
náca gaca caz ni'a në'e yaga dxi'a na',
¿naru' cabí gunë' xíguia' ca' li'? ²² Buyút-
sóca' na'a ca náquië' dxi'i ladxi' Dios,
en ca rúndë'ë ca' xíguia'. Le nácatë
rúndë'ë xíguia' nupa na' gula'chixi, pero
náquië' dxi'i ladxi' len li'. Que lë ni na',
ral-la' gúntica'su' ca sa'yéaj yöl-la' dx-
i'i ladxi' queë' na', para cabí ichúguië'
ca' li' lu yaga queë' na'. ²³ Lësca' caní
gaca quégaquië' channö cabí ulu'gá'anë'
lu yöl-la' cabí réajlë' quégaquië', tsöjtá-
gaquië' leyúbölö lu yaga na', tu' napë'
Dios yöl-la' huáca gunë' ga tsöjtá'gaquië'
le leyúbölö. ²⁴ Nacu' li' ca tu ni'a në'e
gurugu lu yaga olivo guí'a, en yöjtó'o
yaga olivo dxi'a ga cuntú nu udá' tu ni'a

ně'e yaga gu'á. Yénni'tërö huáca qué-gaquië', nácagaca cazë' ni'a në'e yaga dx-i'a na', huáca tsójtá'gaquië' leyúbölö lu yaga quéguequi cazë' na'.

Ca gaca ulu'lágaca bönachi Israel

²⁵ Bócha'ado', ré'ënda' inózili' lë ni bi-gachi', para cabí gun ba zxön cuinli' ca naca yöl-la' réajni'i queé'li'. Bulu'huóaca bal-la bönachi Israel zidi ladxi', atë' caní iláquië' ga idxinrö dza chinayá zgaca yúgu'të bönachi bití' nácagaca judío ga rinná bë'ë Dios, nupa na' ral-la' ulu'lá-gaca. ²⁶ Tödi na' gata' lataj ulu'lé' ca' yúgu'të bönni' Israel, ca na' nazúaj lu guichi lá'ayi, rna:

Irúaj yödzö Sión Nu rusölá,
en ugúa le ruá' dö' nabága'gaca zxf'ini
xi'sóë' Jacob.

²⁷ Lë ni naca didza' dzaga gúnlena' légaquië'

cate' ugúa' dul-la' nabága'gaquië'.

²⁸ Caní naca, gula'dá'baguë'ë didza' dxi'a, atë' Dios guléaj láchxë'ë légaquië' para gaca uláli' lib'ili', pero nadxf'inë' ca' légaquië', tu' guró cazë' queë' xuz xtó'ogaquië'. ²⁹ Tsaz runödzjë' Dios le runödzjë', en tsaz rulidzë' bönachi. ³⁰ Ca na' naca queé'li', z'atëlö bití' benli' ca rna xtídzë'ë Dios, atë' na'a ruhuéchi' láchxë'ë Dios lib'ili' tu' cabí gulunë' yugu' bönni' judío ca rnnë'. ³¹ Lësca' caní naca quégaquië' na'a, bití' tunë' ca rnnë' Dios, pero caní gácasö ga idxinrö dza huéchi' láchxë'ë Dios lé-gaquië', ca ruhuéchi' láchxë'ë lib'ili' na'a.

³² Dios guléaj láchxë'ë yúgu'të bönachi para ila'dá'baguë'ë xtídzë'ë, para gaca huéchi' láchxë'ë yúgu'të'.

³³ Zxöntërö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en bití' gaca nu inözi yugu' le runë' Dios. ³⁴ ¿Nuzxi caz guyéajni'i le guzá' láchxë'ë Xanru'? ¿Nuzxi caz buzéajni'i Lë'? ³⁵ ¿Nuzxi caz

bi bunödzej queë' Dios para gun bayudxi bi ubi'ë Dios que? ³⁶ Yúgu'të le dë narúaj-gaca lu në'ë Dios, en taca lu në'ë, en nácagaca para uzi'ë xibéguequi. ¡Gácat-ica'sö queë' Dios yöl-la' ba! ¡Ca' gaca!

Ral-la' udödi cuinru' quez queë' Dios

12 ¡Böchi' luzá'ado! ¡Ruhuéchi' láchxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza láchxë'ë Dios. Lë ni ral-la' gunli', ca sa'yéaj le reaj láchxi'ru'-në' Dios. ² Bítirö gunli' la' lébisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja láchxi'do'oli'. Guli'gún caní para gaca inózili' le naca dxi'a ré'ënë' Dios gunli', lë na' raza láchxë'ë, en le naca idú.

³ Na'a, tu' zoa le buzá' láchxë'ë quia' Dios, rea' yúgu'tëli': Bití' gun ba zxön cuinli', le cabí ral-la' gunli', pero ral-la' gácali' nöxaj ladxi' ca ribequi ícjali', tsca naca yöl-la' réajlë' queé'li' Dios le ben-në' que queé'li'. ⁴ Ca na' naca tuz idütë le naca cázaru', sal-la' zían le nagudi' dzá-galenru', en calëga tuz dxin tun yúgu'të le zían na' nagudi' dzágalenru', ⁵ lësca' caní naca queë'ru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, atë' que lë ni na' yúgu'tëru' nácaru' tuz turu' len ia'turu'.

⁶ Tu turu' dë lu ná'aru' tu le bennë' queë'ru' Dios, atë' nadzá'gaca tu tu tsca naca le buzá' láchxë'ë que queë'ru'.

Bönni' na' Dios bunödzejë' queë' gu'ë didza' uláz queë',
tsca réajlë'ë Lë', ral-la' gu'ë didza' bönni' na'.

⁷ Bönni' na' Dios bunödzejë' queë' gunë' xichinë',

dxí'ado' ral-la' gunë' dxin na'.

Bönni' na' Dios bunödzejë' queë' usédinë' bönachi,

dxí'ado' ral-la' usédinë' bönachi.

⁸ Bönni' na' Dios bunödzej' queë' uzéa-
jni'inë' bönachi,
dxí'ado' ral-la' uzéajni'inë' légaquië'.
Bönni' bi unödzej' que nu yúbölö,
idú ládxë'è ral-la' unödzej'.
Bönni' rinná bé'enë' bönachi,
idú ládxë'è ral-la' gunë' caní.
Bönni' rácalenë' luzé'ë,
len yöl-la' rudzeja ral-la' gunë' caní.

**Yugu' le ral-la' gun
nu nequi queë' Cristo**

⁹ Ral-la' idxf'ili' luzá'ali' idú ládxi'li'.
Buli'cá'ana le ruá' dö'.
Guli'güü' ládxi'li' gunli' le naca dxi'a.
¹⁰ Guli'dxf'i-guéquinë' luzá'ali'
ca nadxf'igueli'-në' böchi' cázali'.
Ca runli'-në' bal luzá'ali'
ral-la' gunli' ga gácarë' lo ca nácali' la'
cuínsili'.
¹¹ Buli'típatica'sö ládxi'li', en biti' gácali'
xöhuëdi.
Guli'gún xichinë' Xanru' idú ládxi'li'.
¹² Buli'dzeja tu' zoa le runli' löza.
Guli'cóz zxön ladxi' cate' bi riguf'i
rizáca'li'.
Buli'lídzatica'së' Dios.
¹³ Buli'nödzej quegaca bönachi queë'
Cristo
tsca nayádzjaguequinë'.
Guli'güü' lataj ga ila'cuá' nupa ta'dxín
queé'li'.
¹⁴ Guli'nábinë' Dios gunë' dxi'a
quegaca nupa ta'bía ládxi'gaca lib'ili'.
Guli'naba gaca dxi'a quegaquië',
en biti' udxíali' légaquië' dö'.
¹⁵ Buli'dzéjalen nupa tu'dzeja.
Guli'códxilen nupa ta'bödxí.
¹⁶ Guli'gaca tuz len luzá'ali'.
Biti' gun ba zxön cuinli',
pero guli'gún tsözxón yugu' bönni' nöxaj
ladxi'.
Biti' guéquili' chinadéli'li' idútë yöl-la'
réajni'.
¹⁷ Cuntu nu ubí'ili' que,
biti' guá'ali' dö' que nu ruá' dö' queé'li'.

Guli'gún dxi'a quegaca yúgu'të bönachi.
¹⁸ Channö huáca, tsca séqui'li', guli'cóz
dxi'a

len yúgu'të bönachi.

¹⁹ Böchi' luzá'ado', biti' uzí' lébili' bö-
nachi la' lib'isili', pero guli'güü' lataj
ubi'ë Dios quegaca bönachi na', tu'
nazúaj lu guichi lá'ayi le rna:
Neda' caza' uzí' lëba'.

Neda' ubi'a quegaca bönachi.
Caní gunné' Xanru' Dios. ²⁰ Lësca' caní
rna:

Channö zoë' nu bönni' biti' ridzáguië' li'
dxi'a,

en ridunë', bë'ë le gahuë'.

Channö ribidxë' nisa, bë'ë le guf'jë'.

Cate' gunu' caní, gunu' ga utuf'inë' bönni'
na'.

²¹ Biti' gu'u lataj inná be'e le ruá' dö' li',
pero gunná be'e le ruá' dö' na',
ugunu' dxin le naca dxi'a.

13 Yúgu'téli' ral-la' gunli' ca ta'nnë'
bönni' yúlahui'. Dios caz budödë'
lu ná'agaquië' yöl-la' unná bë' nápa-
gaquië', en nucu'ë xilátjagaquië' bönni'
ni dë lu ná'agaquië' yöl-la' unná bë'.

² Que lë ni na', nu ridá'baga' yúlahui'
ridá'baga' le nuzóa cazë' Dios, ate' nupa
ta'dá'baga' caní, nabága'gaca xiguaia'.

³ Nacu'ë bönni' yúlahui', calëga para
ulu'zenë' bach nu run le naca dxi'a, pero
para ulu'zenë' bach nu ruá' dö'. Channö
ré'ënu' gunu' ga biti' ulu'zenë' li' bach,
ben le naca dxi'a, ate' uruju' dxi'a ló-
gaquië'.

⁴ Náquië' bönni' yúlahui' ni'a
në'ë Dios para gácalenë' li', pero channö
runu' le ruá' dö', ral-la' gádxinu', tu' cabí
nu'ë nítisö xiyaga yúlahui'. Náquië' ni'a
në'ë Dios para uzí' lëbë', gunë' xiguaia' nu
ruá' dö'.

⁵ Que lë ni na' run bayudxi gun-
li' ca rnnë' bönni' na' dë lu në'ë, calë-
gasö tu' budödë' Dios lu në'ë gunë' lib'ili'
xiguaia', pero lësca' para soa dxi ládxi'-
do'oli' lahuë' Dios. ⁶ Que lë ni na' ca'
riguizxaj lázali' que yúlahui', tu' náca-

gaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

⁷Guli'guíxaj yúgu'të bönachi le rál-la'li' quégaquië'. Guli'guíxaj lázali' lu na' nu ral-la' quíxaj lázali'. Guli'guíxaj dumí nu ral-la' quíxajali'. Guli'gadxi nu ral-la' gádxili', en guli'gún bal nu ral-la' gunli' bal. ⁸Cuntu nu bi ral-la' gál-la'li' que, pero tuz ral-la' idx'i'li' luzá'ali', tu' chibén idú ca rinná bë' xibá queë' Dios nu nadx'i' luzé'e. ⁹Caní ta'nná bë' xibá na':

Biti' gunu' dul-la' le riguitsaj xibá que yöl-la' nutsaga na'.

Biti' gútiu' bönachi.

Biti' cuanu'.

Biti' innió' que luzó'o le cabí nácatë.

Biti' së ládxu'u le dë que luzó'o.

Yugu' xibá ni, en yúgu'të xibá ia'zica'rö, údxi gun nu run ca rnna didza' rnna caní: Bidx'i' luzó'o ca nadx'i' cuinu'.

¹⁰Nu na' nadx'i' luzé'e biti' bi run que luzé'e le ruá' dö'. Caní naca, nu na' nadx'i' luzé'e run idú ca rinná bë' xibá queë' Dios.

¹¹Guli'gún caní tu' nózili' ca raza dza ni zóaru' na'a, en nózili' ca' chibidxín dza usubán ládx'i'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo. ¹²Ga zóaru' na'a naca ca chi'i dzó'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'. ¹³Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tül-lalenu' luzá'aru', en cabí uzxé'ëru' luzá'aru'.

¹⁴Na'a, ral-la' un cuinli' lu icja ládx'i'-do'oli' ca náquië' Xanru' Jesucristo, en biti' güf'i ládx'i'li' gunli' le rizé ládx'i'li' lu yöl-la' bönáchisö queé'li'.

Biti' ral-la' si' quídza'ru' böchi' luzá'aru'

14 Guli'güf' lataj nu réajlë' Cristo gun lib'i'li' tsözxón sal-la' biti' naca idú ca réajlë' nu na' Lë'. Biti' tül-laleni' nu na' ca nácagaca le runi nu na' huáca nu gun. ²Ca naca lë ni, nacu'ë bönni' runi légaquië' huáca ilahuë' yúgu'të le tagu bönachi, pero ia'bal-lë' bönni', tu' cabí naca idú ca ta'yéajlë'ë Cristo, tágusë' le raza ruzóaru'. ³Na'a, bönni' na' rahuë' yúgu'të biti' ral-la' uzóë' tsölá'alö nu bönni' biti' rahuë' yúgu'të, en lësca' caní, bönni' na' biti' rahuë' yúgu'të biti' ral-la' si' quídze'ë bönni' na' rahuë' yúgu'të, tu' nazí lu në'ë Dios iropë' bönni' na' ta'yéajlë'ë Cristo. ⁴¿Nuzxi caz lí, rizí' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o biti' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

⁵Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'. ⁶Bönni' na' runë' bal tu dza, runë' le bal para tseaj ládxë'ë Xanru', ate' bönni' na' biti' runë' bal dza na', para tseaj ládxë'ë Xanru' biti' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxë'ë Xanru', en rë'ë Dios: "Xclenu'", ate' bönni' na' biti' rahuë' yúgu'të, biti' rahuë' le para tseaj ládxë'ë Xanru', en rë'ë ca' Dios: "Xclenu'."

⁷Biti' zoë' nabanë' queéze' nitúë' bönni' nabábalenë' rë'u, en biti' ratië' queéze' nitúë' bönni'. ⁸Channö zóaru'

nabanru', para tseaj ládxi'ru'-në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'. ⁹Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

¹⁰Na'a lí, ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u. ¹¹Ca naca lë ni nazúaj lu guichi lá'ayi, rnna: Rnnë' Xanru': "Ni'a quia' neda' caz, ulu'zechu zxfbigaca yúgu'të bönachi lahua' neda'.

Ila'guixjö' yálajdo' naca' Dios."

¹²Caní naca, uchi'a usöröë' Dios yúgu'tëru'.

Biti' ral-la' gunru' ga ichixi iníguinë' böchi' luzá'aru'

¹³Que lë ni na', bíti'rö ral-la' ichugu bë'eru' luzá'aru', pero ral-la' gun yúdxiru' cabí gunru' ga ichixi iníguinë' böchi' luzá'aru', en para cabí gunru' ga gunë' dul-la'. ¹⁴Nöz quézida' bití' bi dë le ráguru' le gaca gun ga bíti'rö nácaru' tsahui' lahuë' Dios, ate' röjllöz lë ni didza' bëë' Xanru' Jesús. Channö réquinë' tu bönni' zoa bi gaca gun ga bíti'rö náquië' tsahui' lahuë' Dios, queë' bönni' ni, caní naca. ¹⁵Channö rusuhuf'innu' böchi' luzó'o, tu' ragu' le runi lë' bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopa ládxe'ë bönni' na', gútië' Cristo uláz queë'. ¹⁶Que lë ni na', bití' bi gunlí' le gun ga ila'nnë' xihui' bönachi que le rusáca'lí' queé'li' naca tsahui'. ¹⁷Cate' rinná be'enë' Dios rë'u, bití' ruí'i ládxi'ru' le guí'aj gáguru', pero ruí'i ládxi'ru' gácaru' tsahui', en sóaru' dxi ladxí', en udzëjaru', yugu' le gaca gunru' tu' zóalenë' Dios Bö' Lá'ayi rë'u.

¹⁸Núti'tës nu run xichinë' Cristo ca nácagaca lë ni, run le raza ládxe'ë Dios, ate' urúaj dxi'a lógaca bönachi.

¹⁹Que lë ni na' ral-la' gunru' le ilún ga gata' le ribequi dxi ládxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo. ²⁰Bití' bi ral-la' gagu' le gun ga gaca chopa ladxí' nu na' nuzóë' Dios. Nácate lë na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi lë na' ráguru'. ²¹Gácarö dxi'a cabí gagu' bëla', en cabí guí'ju' xisi uva nal-la, en bití' bi gunu' le gun ga ichixi iníguinë' böchi' luzó'o, o le gun ga gaca chopa ládxe'ë, o le gun ga huóaj ládxe'ë ca réajlë'ë Cristo. ²²Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' bití' ruxösa ládxi'da'ahuë' lë' tu' nözi lë na' runi lë' dë lataj gunë', ²³pero bönni' na' raza chopa ládxe'ë tu' nözi le rahuë', nabáguë'ë xíguia', tu' runë' le cabí runi lë' dë lataj gunë'. Naca dul-la' yúgu'të le runru', le cabí runi rë'u dë lataj gunru'.

Ral-la' gunru' le raza ládxe'ë böchi' luzá'aru'

15 Que lë ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Bití' ral-la' gunru' le raza ládxi'ru' la' cuínsiru'. ²Yúgu'tëru' ral-la' gunru' le raza ládxe'ë böchi' luzá'aru' para gaca dxi'a queë', en idipa ládxe'ë ca réajlë'ë Cristo. ³Caní ral-la' gunru', tu' cabí benë' Cristo le guyaza ládxe'ë la' cuínsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' guluf'i nupa gula'nnë' xihui' quiu' Lí', Dios." ⁴Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribózaru' zxon ladxí', en ruhuë'

tsahui' rë'u. Que lë ni na' zoa le runru' löza. ⁵Rinábida'-në' Dios, Nu run ga ribózaru' zxon ladxí', en Nu ruhué tsahui' rë'u, gunë' ga gunli' tuz ca rusáca'li' queéli', para gácali' ca na' ré'ënë' Jesucristo. ⁶Caní ral-la' gunli' para gácali' tuz, cú'uli'-në' tsözxón yöl-la' ba Dios, Xuzë' Xanru' Jesucristo. ⁷Que lë ni na', para gaca yöl-la' ba queë' Dios, guli'sf' lu ná'ali' tuli' ia'tuli' ca na' Cristo guzxf' lu në'ë ca' rë'u. ⁸Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idútë li didza' ru'ë Dios, ate' benë' ga bulu'dxín le guzxf' lu në'ë Dios unödzejë' quégaquië' xuz xtó'otu'.

**Yugu' bönachi izá'a
ila'yöni didza' dxi'a**

⁹Bidë' ca' Cristo para benë' ga ila'gú'u Dios yöl-la' ba nupa biti' náacagaca judío tu' ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna: Que lë ni na', ulu'a lahui le nacu' Li' lógaca bönachi idútë yödzölió, en gul-la' quiu' yöl-la' ba.

¹⁰Ga yúbölö nazúaj lu guichi lá'ayi le rnna:

Libí'ili', bönachi idútë yödzölió,
buli'dzëjalen bönachi queë' Dios.

¹¹Ga yúbölö nazúaj ca' lu guichi lá'ayi le rnna:

Guli'cu'ë Xanru' yöl-la' ba,
yúgu'tëli' biti' nácali' judío.
Guli'tséaj ladxí' Lë',
yúgu'tëli' zóali' idútë yödzölió.

¹²Lësca' caní buzúajë' Isaías lu guichi le rnna:

Ilá' lahui Nu nababa di'a dza queë' Isaí.
Gaca lo Nu na' para inná be'e nupa biti'
náacagaca judío.
Nupa ni ilún löza Lë'.

¹³Rinábida'-në' Dios, Nu run ga runru' löza, gunë' ga udzëjade'eli', en ga soa dxi

ládxi'li' tu' réajlë'ëli' Lë', en gunë' ga gaca idú ca runli' löza, tu' zóalen yöl-la' huáca queë' Dios Bó' Lá'ayi libí'ili'.

¹⁴Böchi' luzá'ado'. Chinóz quézida' rúntica'sili' le naca dxi'a, en dëda' yöl-la' réajni'i queéli' para gaca uzéajni'ili' luzá'ali'. ¹⁵Na'a naca' rugu ladxí', ruzúaja' queéli' lu guichi ni, böcha'a, en rusá'a ládxi'li' tu' zoa le buzá' ládxe'ë Dios quia' neda'. ¹⁶Que lë ni na' runa' xichinë' Jesucristo lógaca bönachi biti' náacagaca judío, en runa' libán que didza' dxi'a queë' Dios, para gaca ugu'a bönachi biti' náacagaca judío lu në'ë Dios, nupa na' guró cazë' Dios Bó' Lá'ayi queë' Lë'. Iláca-gaquië' ca tu le rigú'uru' lu në'ë Dios, le raza ládxe'ë Lë'.

¹⁷Na'a, tu' rúnlena' tsözxón Jesucristo dxin, dë lu na'a tsaza ládxa'a ca naca le nuna' lu xichinë' Dios. ¹⁸Lësca' rurúguida' inní'a' ca naca lë na' benë' Cristo lu na'a neda', benë' ga tun bönachi biti' náacagaca judío ca rnna xtídzë'ë Dios. Lë ni benë' Lë', bugunë' dxin didza' bë'a neda', en yugu' dxin bena' neda'.

¹⁹Lu na'a neda' bugunë' dxin ca' le náacagaca bë' bulu'e lahui Lë', en yugu' yöl-la' huáca zxon benë', en yöl-la' huáca na' queë' Dios Bó' Lá'ayi le guzóalen neda'. Caní guca, gusí lahua' runa' libán lu yödzö Jerusalén, ate' idú gásibi'ilö ga ridxintë luyú Ilírico, chinuna' libán que didza' dxi'a ca naca queë' Cristo.

²⁰Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguélë'ë lahui dxin zxon chinunë' bönni' yúbölö. ²¹Ca bena' neda' naca ca na' nazúaj lu guichi lá'ayi le rnna:

Ilá'lë'e nupa nacua' ga cuntu nu ben libán queë' Lë',

en ila'yéajni'i nupa catu caz bila'yöni ca naca queë'.

Ré'éné' Pablo tsejé' yödzo Roma

²²Que læ ni na', sal-la' zían luzuí gú'unida' guída' ga zóali', biti' guca guída'. ²³Na'a, chibudxi bena' dxin quia' yugu' lataj ni, en chiré'enda' zían iz guída' ga zóali'. ²⁴Que læ ni na', cate' tseja' luyú España, tōda' ga zóali' libí'ili', tu' runa' löza uduyúa' libí'ili', en udzéalenda' libí'ili'. Tōdi ni' huáca ugú'uli' neda' nöza. ²⁵Na'a ral-la' tseja' Jerusalén, tsōju'a tu le gácalen nupa ni' néquiquequi queé' Cristo. ²⁶Caní guna', le gula'yaza lādxi'gaquié' bōnni' nacué' luyú Macedonia, en luyú Acaya, bulu'tubé' bi tu'nödzejé' quéguequi bōnachi yechi' dzágagaca bōnachi queé' Cristo, nacué' Jerusalén. ²⁷Gula'yaza lādxi'gaquié' bōnni' biti' náca-gaquié' judío guluné' læ ni. Le nácaté naca tu le rál-la'gaquié' quégaca bōnachi judío ni'. Channō bōnni' biti' náca-gaquié' judío tu'zi'é xibé le nácgaca queé' Dios ni'a que le núngaca bōnachi judío, læsca' ral-la' ilácalené' bōnachi judío na', ulu'guné' dxin le dē quégaquié'. ²⁸Que læ ni na', cate' údxi udōda' lu ná'agaca bōnachi judío læ na' bulu'nödzejé' bōnni' ni, ní'rō tōda' ga zóali' libí'ili' cate' tseja' luyú España. ²⁹Cate' guída' ga zóali', runa' löza idxí'lena' yúgu'té le ruzí'iru' xibé ni'a que didza' dxi'a queé' Cristo.

³⁰Ni'a queé' Xanru' Jesucristo, en ni'a que yöl-la' nadxf'i ruchízié' Dios Bō Lá'ayi icja lādxi'do'oru', ráta'yua' loli', bócha'ado', ulídzali'-né' Dios tsözxón len neda', inábili'-né' gácalené' neda'. ³¹Guli'nabi-né' Dios guné' ga ulá' neda' lu ná'agaquié' bōnni' biti' ta'yéajl'é nacué' luyú Judea, en guné' ga ila'yaza lādxi'gaquié' ila'zi'é læ na' tsōju'a lu ná'agaquié' bōnni' náca-gaquié' queé' Cristo, nacué' Jerusalén. ³²Guli'nabi-né' ca', channō naca ca ré'éné' Dios, guné' neda' lataj idxina' queéli' len yöl-la' rudzeja quia', para uzí lādxi'lena'

libí'ili'. ³³Na'a rinábida'-né' Dios, Nu run ga zoa dxi lādxi'ru', sóalené' yúgu'téli'. ¡Ca' gaca!

Tu'gapa Dios luzé'guequi bōnachi queé' Cristo

16 Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queé' Dios dzáganu bōnachi queé' Cristo nacué' yödzo Cencia. ²Uláz queé' Xanru' guli'sí' lu ná'ali'-nu nigula na', ca ral-la' ilún bōnachi queé' Cristo. Guli'gácalen lænu, unódz-jali' queé'nu bíti'tés bi riquínnu. Læ cázanu gúcalennu bōnachi zían, en gúcalennu ca' neda'.

³Guli'gapa Dios Priscila, en Aquilo, nupa na' gulunlen neda' tsözxón dxin queé' Jesucristo. ⁴Chopé' ni gula'dödé' ga guzóa bōnadxi ilátie' para guluné' ga cabí gátia' neda', ate' rea' légaquié': "Xclenli'", en calégasö neda', pero læsca' yúgu'té böchi' luzá'aru' nabábagaquié' gapa nacué' bōnachi queé' Cristo biti' nácgaca judío, té'é légaquié': "Xclenli'". ⁵Guli'gapa Dios bōnachi queé' Cristo tu'dubé' lu yu'u lídxigaquié' Priscila, en Aquilo na'. Guli'gapa Dios Epeneto, bōnni' na' nadxf'ida'. Bōnni' ni guyéajl'é Cristo zí'atélö ca yúgu'té bōnachi luyú Acaya. ⁶Guli'gapa Dios María, nigula na' bennu dxin zxón queé' Cristo ga ni' rudúbili' libí'ili'. ⁷Guli'gapa Dios Andrónico, en Junias, yugu' bōnni' uládz quia'. Yugu' bōnni' ni gula'dzúnlené' neda' tsözxón lidxi gufé, en nadéli'gaquié' lataj lo ladaj bōnni' gubáz nasól-l'é' Cristo. Læsca' gula'yéajl'é' Cristo zí'alö ca neda'.

⁸Guli'gapa Dios Amplias, bōnni' na' nadxf'ida', en néquiné' queé' Xanru'. ⁹Guli'gapa Dios Urbano, bōnni' na' bēnlené' netu' tsözxón dxin queé' Jesucristo. Guli'gapa Dios Estaquis, bōnni' na' nadxf'ida'. ¹⁰Guli'gapa Dios Apeles, bōnni' na' naca bē' réajl'é' Cristo. Guli'gapa Dios nupa nacué' lidxé' Aristóbulo.

¹¹ Guli'gapa Dios Herodión, bönni' uládz quia'. Guli'gapa Dios nupa nacua' lidxë Narciso, en ta'yéajlë'ë Xanru'. ¹² Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxon queë' Xanru', ate' nadxí'iru'-nu. ¹³ Guli'gapa Dios Rufo, bönni' rö queë' Xanru'. Guli'gapa Dios xinë'ë Rufo na', nácanu ca' ca xiná' caza'. ¹⁴ Guli'gapa Dios Asín-crito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacua'lenë légaquië'. ¹⁵ Guli'gapa Dios Filólogo, en Julia, en Nereo, en nigula zanë Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacua'lenë légaquië'.

¹⁶ Guli'gapa Dios luzá'ali', unída'li' luzá'ali' lu yöl-la' nadxí'i queé'li'. Tu'gapë' Dios libí'ili' yúgu'të böchi' luzá'aru' nabábagaquië' gapa nacua' bönachi queë' Cristo luyú ni.

¹⁷ Na'a, ráta'yua' loli', bócha'ado', guli'gún ga ilaca bé' nupa tun ga irúajli' chopló, en tun ga ichixi iníguili', tu' tu'sédinë' le cabí röjlóz le nazédali'. Guli'cuíta ga nacua' bönachi caní ¹⁸ tu' cabí tun xichiné' Jesucristo. Tunë' dxin para bi gata' quégacasë', en ta'z'i' yé'enë' yugu' bönni' nöxaj ladxi', tu'gunë' dxin didza' nöxaj ladxi', en didza' tséajlë'ëru' le cabí nácatë. ¹⁹ Rizé didza' ca na' runli' ca rna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, ré'enda' gácali' sina' gunli' le naca dxi'a, en calëga gunli' le ruá' dö'.

²⁰ Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru' Jesucristo uzá' ládxë'ë queé'li' le gácalen libí'ili'.

²¹ Bi'i Timoteo, bi'i na' rúnlenbi' neda' tsözxón dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Bóchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' ládxë'ë queé'li' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'tutu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza. ²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rna xtídzë'ë.

²⁷ ¡Ni'a que le benë' Jesucristo, gácat-ica'sö yöl-la' ba queë' la's dui Dios, Nu rácatëro caz! ¡Ca' gaca!

DIDZA' ZÍ'ALÖ GUSÓL-LĒ'Ē PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

1 Ca ré'ëni queézinë' Dios bulidzë' neda', Pablo, para gaca' gubáz queë' Jesucristo. Bóchi'ru' Sóstenes runë' neda' tsözxón. ²Rugapa' Dios lib'ili', böchi' luzá'ado', rudúbili' queë' Dios lu yödzo Corinto, en nácali' quez queë' Dios tu' nácali' tuz len Jesucristo. Dios caz bulidzë' lib'ili' para guéquili' quez queë' tsözxón len yúgu'të nupa nacua' yúgu'të lataj, en tu'lidzë' Dios, tu'gunë' dxin La la'ayi queë' Xanru' Jesucristo, Xán-gaquië', enca' Xanru'. ³Ráta'yua' lahuë' Xúziru' Dios, en lahuë' Xanru' Jesucristo uzá' ládxë'ë queé'li', en gunë' ga soa dxi icja ládxi'do'oli'.

Yugu' le ruzi'iru' xibé tu' néquiru' queë' Cristo

⁴Rética'sa'-në' Dios: "Xclenu'" ca naca queé'li', tu' zoa le buzá' ládxë'ë Dios queé'li' tu' nácali' tuz len Jesucristo. ⁵Tu' nácali' tuz len Cristo, Dios chinagú'udë'ë xinózili' yúgu'të le nequi queë'. Rácalenë' lib'ili' ca naca yúgu'të didza' ru'ili', en runë' ga réajni'ili' yúgu'të. ⁶Caní naca, tu' guzxí' lu ná'ali' idú ládxi'ili' le runtu' liná' lo ca naca queë' Cristo. ⁷Que læ ni na', biti' bi riyadzaj queé'li' que le runnë' Dios Bõ' Lá'ayi queéru', tsanni ni ribózali' dza na' ilá' lahuë' Xanru' Jesucristo. ⁸Lë cazë' utipë' ládxi'li' para gaca guá' ilenli' yúgu'të ga idxintë dza údxi, para cabí gaca nu bi inné queé'li' dza ni' huödë' Xanru' Jesucristo. ⁹Dios runë' ca rnnë', en Lë cazë' bulidzë' lib'ili' para gácali' tuz len Zxí'inë', Xanru' Jesucristo.

Narúajgaca choplö bönachi queë' Cristo nacu'ë Corinto

¹⁰Ní'a queë' Xanru' Jesucristo ráta'yua' loli', böchi' luzá'ado', guli'gún tuz xtídza'li' yúgu'tëli'. Biti' irúajli' choplö, pero guli'gaca tuz ca rizá' ládxi'li', en ca runi lib'ili'. ¹¹Caní rea' lib'ili', böchi' luzá'ado', tu' gula'guíxjöi'inë' neda' bönni' nacu'ë lídxinu Cloé ca runli', ta'nnë' ridil-la dídzza'li'. ¹²Lë ni rnní'a': Nadzá'lö didza' ru'ili' tu tuli'. Bál-lali' rnnali' dá'ali' Pablo. Ia'bál-lali' rnnali' dá'ali' Apolos. Ia'bál-lali' rnnali' dá'ali' Cefas, ate' ia'bál-lali' rnnali' dá'ali' Cristo. ¹³¿Naru' birúajtsë' choplö Cristo? ¿Naru' gudá'atsa' neda', Pablo, læ'e yaga cruz uláz queé'li'? ¿Naru' bidíflatsali' nisa para gácali' tuz len neda'? ¹⁴Rea'-në' Dios: "Xclenu'", tu' cabí buquila' nisa niturö lib'ili', pero chópasë' Crispo, en Gayo. ¹⁵Que læ ni na' biti' gaca innali' bidíflali' nisa para gácali' tuz len neda'. ¹⁶Lësca' buquila' nisa Estéfanos, en nupa nacua' lidxë'. Biti' røjneda' channö buquila' nisa nu yúbölö. ¹⁷Gusól-lë'ë Cristo neda', calëga para uquila' bönachi nisa, pero para guna' libán que didza' dxi'a. Ru'a didza', calëga lu yöl-la' rácada' que caza', para cabí ucácha'a yöl-la' huáca que le benë' Cristo læ'e yaga cruz.

Cristo napa cazë' yöl-la' huáca, en yöl-la' réajni'i queë' Dios

¹⁸Nupa nácagaca chul-la niti téquiguequi cá'asö naca libán runru' ca naca queë' Jesús, ca na' gútië' læ'e yaga cruz, pero rë'u na' nuláru', réquibe'eru' dzaga le yöl-la' huáca queë' Dios le rusölá rë'u. ¹⁹Caní naca, tu' nazúaj lu guichi lá'ayi le rnna: Guna' ga huóaca nítisö yöl-la' rácada' quégaca nupa taca yenni'. Tsölá'alö ucá'ana' yöl-la' réajni'i quégaca nupa ta'yéajni'i yenni'.

²⁰ ¿Bizxi caz uzi'tsë' xibé bönni' réajni'inë' yenni'? ¿Bizxi caz uzi'tsë' xibé bönni' nazédadë'ë? ¿Bizxi caz uzi'tsë' xibé bönni' nabé'ede'enë' ru'ë didza'? Dios chibënë' ga böáca cá'asö yöl-la' réajni'i quégaca bönachi yödzölió ni. ²¹ Dios, lu yöl-la' réajni'i queë', biti' bë'e lataj ilünbe'e bönachi yödzölió ni Lë' ni'a que yöl-la' rácada' quégaquië'. Dios guyaza ládxe'ë busölë' nupa ta'yéajlë' Lë' ni'a que libán na' runru', sal-la' téquiguequi bönachi cá'asö naca.

²² Té'ënnë' yugu' bönni' judío ila'lé'enë' yöl-la' huáca nácgaca bë', ate' bönni' zi'tu' ta'guiljë' yöl-la' réajni'i. ²³ Rë'u ni runru' libán queë' Cristo, ca na' gútië' lë'e yaga cruz. Le nácatë, libán runru' ca gútië' Cristo, run ga ta'chixi ta'nigui bönachi judío, ate' ia'zica'rö bönachi téquiguequi cá'asö naca. ²⁴ Bönni' na' bulidzë' Dios légaquië', sal-la' nácgacaquië' bönni' judío o bönni' zi'tu', téquibe'enë' napa cazë' Cristo yöl-la' huáca queë' Dios, en yöl-la' réajni'i queë' Dios. ²⁵ Téquiguequi bönachi yödzölió ni le benë' Dios naca bë' biti' bi nózinë', pero lë na' benë' náparö yöl-la' réajni'i ca yöl-la' réajni'i quégaca bönachi. Téquiguequi le benë' Dios naca bë' nacuídi'në', pero lë na' benë' náparö yöl-la' huáca ca yöl-la' huáca quégaca bönachi. ²⁶ Na'a, böchi' luzá'ado', guli'tsöjné ca gúcali' cate' bulidzë' Dios libí'ili'. Biti' gula'cu'ë ládjali' zían bönni' ta'yéajni'inë' lu yöl-la' bönáchisö quégaquië', en biti' gula'cu'ë ládjali' zían bönni' unná bë', en calëga zían bönni' nácgacaquië' lo. ²⁷ Téquiguequi bönachi yödzölió ni yugu' bönni' na' guróë' Dios biti' bi nózguequinë'. Caní benë' Dios para gunë' ga ulu'tu'fi nupa ta'yéajni'i. Lë'sca' caní guróë' Dios nupa nacuídi'gaca yödzölió ni para gunë' ga ulu'tu'fi nupa nál-lagaca. ²⁸ Lë'sca' caní, téquiguequi bönachi yödzölió ni nupa

na' guróë' Dios nácgaca cá'asö, en biti' bi nácgaca, en nacuídi'gaca. Caní benë' Dios para gunë' ga ulu'gá'ana cá'asö lë na' tun zxön bönachi yödzölió ni. ²⁹ Que lë ni na', cuntu nu gaca gun ba zxön cuini lahuë' Dios. ³⁰ Dios caz benë' ga nácaru' tuz len Jesucristo, en benë' ga náparu' yöl-la' réajni'i queë' Cristo. Tu' náquië' Cristo tuz len rë'u, nuhuóácaru' tsahui', en néquiru' quez queë' Dios, en nuláru'. ³¹ Naca ca na' nazúaj lu guichi lá'ayi, le rnna: "Channö zoa nu bi ré'ëni gun zxön, ral-la' gun zxön Xanru'."

Libán runru' queë' Cristo, ca gudë'ë lë'e yaga cruz

2 Caní guca, böchi' luzá'ado', cate' bidxina' queéli'. Bena' libán loli' que xtídzë'ë Dios, calëga len yöl-la' réajni'i quia', en biti' bë'a didza' lu yöl-la' rácada' quia'. ² Cate' ni' guzóalena' libí'ili', bë' ládxa'a cabí gu'a didza' que le yúbölö, pero ca nácatë queë' Jesucristo bë'a didza', ca na' gudë'ë lë'e yaga cruz. ³ Guzóalena' libí'ili' lu yöl-la' ricuídi' quia', ate' lu yöl-la' radxi quia' guxzízida'a. ⁴ Bë'lëna' libí'ili' didza', en bena' libán que xtídzë'ë Dios, calëga ca tu'fi didza' bönachi lu yöl-la' rácada' quéguequisö, pero guzóalënë' Dios Bö' Lá'ayi neda', ate' guzóalën yöl-la' huáca queë' Dios neda', le guca bë' naca idütë' li didza' bë'a. ⁵ Caní bena' para gaca tséajlë'ëli' Dios, calëga tu' biyónili' yöl-la' rácada' quégaca bönachi, pero tu' bilé'eli' yöl-la' huáca queë' cazë' Dios.

Dios Bö' Lá'ayi runë' ga núnbë'ëru'-në' Dios

⁶ Ru'í'tu' didza' lu yöl-la' rácada' lógaca nupa chinácarö idú ca ta'yéajlë' Dios. Yöl-la' rácada' ni biti' naca ca le nápagaca bönachi yödzölió ni, en biti' naca ca le nápagaquië' bönni' ta'nná bë'ë dza ni zóaru' na'a, nupa na' ta'niti' caz. ⁷ Ru'í'tu' didza' que yöl-la' rácada' na-

gachi', lë na' runödzejë Dios, tu' bigachi' yöl-la' rácada' na' buzóë' Dios dza ni'te para uz'iru' xibé. ⁸Yugu' bönni' ta'nná bé'ë dza ni zóaru' na'a biti' gulúnbë'ë yöl-la' rácada' na'. La'tu' gulúnbë'ë le, biti' ulu'dé'ë Xanru' nayépisëtë'rë' lë'e yaga cruz. ⁹Naca ca na' nazúaj lu guichi lá'ayi le rnna:

Chinupé'ë Dios le ulu'z'í xibé nupa naxf'iguequi Lë', yugu' le cuntu nu ble'e, en biti' biyóni, en biti' gula'zá' ládxi'gaca bönachi ca naca que.

¹⁰Na'a, Dios nuzéajni'inë' rë'u yugu' lë ni lu në'ë Dios Bö' Lá'ayi, tu' ruyú cazë' Dios Bö' Lá'ayi yúgu'të, enca' le yu'u icja ládxi'da'ahuë' Dios caz.

¹¹¿Naru' gaca inózinë' nu bönni' le yu'u icja ládxi'da'ahuë' ia'túë' bönni'? Tuz bö' naca cazë' bönni' na' nözi lë na'. Lësca' caní, cuntu nu nözi le yu'u icja ládxi'da'ahuë' Dios. Tuzë' Dios Bö' Lá'ayi nózinë' lë ni. ¹²Rë'u ni, biti' nazí lu ná'aru' tu bö' ridasö yödzölió ni, pero nazí lu ná'aru' Dios Bö' Lá'ayi, Nu na' ruchízië' Dios rë'u para gaca gúnbë'ëru' yugu' le buzá' ládxe'ë Dios queëru'. ¹³Yugu' lë na' buzá' ládxe'ë Dios queëru' ru'iru' didza' que, calëga len didza' tu'sédinë' bönachi rë'u len yöl-la' rácada' quéguequi, pero len yugu' didza' rusédinë' Dios Bö' Lá'ayi rë'u. Caní naca, ruzéajni'iru' bönachi zóalenë' Dios Bö' Lá'ayi légaquië' ca naca le rusédinë' Dios Bö' Lá'ayi rë'u.

¹⁴Tu bönni' biti' zóalenë' Dios Bö' Lá'ayi lë' biti' rizí lu në'ë le rusédinë' Dios Bö' Lá'ayi rë'u, tu' réquinë' cá'asö naca. Biti' gaca tséajni'inë' bönni' na' lë ni, tu' gaca guéquibe'enë' tuzë' bönni' zóalenë' Dios Bö' Lá'ayi lë' le nazaca' lë ni. ¹⁵Tu bönni' zóalenë' Dios Bö' Lá'ayi lë' gaca guéquibe'enë' le nazaca' yúgu'të, pero cuntu nu gaca guéquibe'e le nazaca' cazë' bönni' na'. ¹⁶Nazúaj lu guichi lá'ayi le rnna:

¿Nuzxi caz nözi le rizá' ládxe'ë Xanru'?
¿Nuzxi caz gaca uzéajni'i Lë'?

Le rizá' ládxe'ë Cristo yu'u icja ládxi'do'oru' rë'u.

Nácaru' huen dxin tsözxón len Dios

3 Que lë ni na', böchi' luzá'ado', biti' guca güf'ilena' lib'íli' didza' ca ru'filena'-në' didza' tu bönni' nudödi cuinë' lu në'ë Dios Bö' Lá'ayi, pero bé'lëna' lib'íli' didza' ca ru'filena' nu naca bönáchisö didza', biti' zóalenë' Dios Bö' Lá'ayi nu na'. Nácali' ca yugu' bi'i hué'ëni. Biti' nácali' tsutsu ca réajlë'ëli'-në' Cristo. ²Busédida' lib'íli' le cabí naca böniga, lë na' guca ca nidxi' güf'íli'. Biti' busédida' lib'íli' le naca böniga ca bëla' gáguli'. Biti' guca tséajni'ili' le naca ca bëla' gáguli', en biti' rácali' na'a. ³Caní naca, tu' nácali' ca nu naca bönáchisö ga ridxintë na'a dza. Tsanni ni ruzxé'eli' luzá'ali', en ridil-la dídza'li', en rirúajli' choplö, nácali' ca nu naca bönáchisö, en runli' tuz ca tun bönachi yödzölió ni. ⁴Cate' zóalen lib'íli' nu rnna da' Pablo nu na', en ia'tú nu rnna da' Apolos, nácali' ca nu naca bönáchisö.

⁵¿Nuzxi caz naca' neda', Pablo? ¿Nuzxi caz na' Apolos? Nácatu' huen dxin queë' Dios, ate' ni'a que le bentu' guyéajlë'ëli' Cristo. Tu tutu' runtu' dxin na' bennë' Xanru' que queëtu'. ⁶Dxin bentu' lu icja ládxi'do'oli' naca ca dxin run nu raza ruzóa. Neda' guza' xisedo', ate' Apolos gulu'ë nisa, pero Dios benë' ga gulén, en guzxón xisedo' na' nadúz icja ládxi'do'oli'. ⁷Caní naca, láti'do'os nazáquië' bönni' guz, en láti'do'os ca' bönni' rigu'ë nisa, pero nazáca'dë'ë Dios Nu run ga rilén, en rizxón xisedo' na'. ⁸Tuz ca nácaquië' bönni' razë', en bönni' rigu'ë nisa. Dios ubi'ë que queégaquië' tsca naca dxin runë' tu tuë'. ⁹Nácatu' huen dxin tsözxón len Dios, ate' lib'íli' nácali' ca la' yëla queë' Dios ga runtu' dxin.

Lësca' caní nácali' ca tu yu'u runë' Dios. ¹⁰Ca naca le buzá' láchxë'ë Dios quia', naca' ca tu bönni' huen zö'ö lo. Neda' gulu'a xilibi zö'ö, ate' nu yúbölö richisa zö'ö na'. Tu turu' ral-la' uyuru' ca richísaru' zö'ö lahui xilibi zö'ö na'. ¹¹Dios chigulu'ë tu xilibi zö'ö le naca Lë cazë' Jesucristo, ate' cuntu nu gaca cu'u ia'tú xilibi zö'ö caní. ¹²Dxin runru' queë' Cristo naca ca richísaru' zö'ö lahui xilibi zö'ö na'. Lahui xilibi zö'ö na' gaca nu gun dxin le naca ca richisa zö'ö le naca ca le néquini oro, o plata, o guiój nazáca'da'gaca, o gaca nu gun dxin le naca ca richisa zö'ö le néquini yaga, o guizxi, o guixi' cá'asö. ¹³Gaca bë' ca naca dxin núngaca tu tu bönachi. Cate' idxín dza ichúguië' Dios quégaca bönachi, ilá' lahui dxin nunru', tu' tödi dxin na' lu guí', ate' guí' na' sí' bë' dxin núngaca tu tu bönachi. ¹⁴Channö dxin nunë' tu bönni' urúaj dxi'a lu guí' na', le naca ca tu zö'ö guchisé', Dios ubi'ë queë' ca sa'yéaj dxin nunë'. ¹⁵Channö tsegui dxin nunë' tu bönni' le naca ca tu zö'ö guchisé', unítie' le ré'ënë' ubi'ë Dios queë', pero ulá cazë' lë', ate' gaca queë' ca raca que nu rulá tu lu guí'.

¹⁶¿Naru' cabí nózili' naca cázali' yudo' queë' Dios, ate' zoë' Dios Bö' Lá'ayi icja láchxi'do'oli'? ¹⁷Channö nu usuniti yudo' queë' Dios, Dios usunítie' nu na', tu' naca lá'ayi yudo' queë' Dios, ate' lib'ili' naca cázali' yudo' na'.

¹⁸Biti' sí' ye'e cuinli'. Channö réqui nu nutsa' láchjali' rácada' ca tácada' bönachi yödzölió ni, ral-la' huóaca nu na' ca tu bönni' biti' bi nózinë', para gata' que yöl-la' rácada' le naca idú. ¹⁹Nu bönni' napzë' yöl-la' rácada' que yödzölió ni náquië' tu bönni' biti' bi nózinë' lahuë' Dios. Nazúaj lu guichi lá'ayi le rna: "Dios runë' ga ila'chixi ila'nigui nupa tácada', rugunë' dxin yöl-la' rácada' quéguequi." ²⁰Lësca' caní rna: "Xanru' nózinë' nítisö naca le ta'bequi ícjugaca

bönachi tácada'." ²¹Que lë ni na', biti' ral-la' gunli' zxon le gaca gunë' tu bönni'. Nequi queëli' yúgu'të. ²²Néquiquequi queëli':

Pablo, en Apolos, en Cefas, en yödzölió ni, en yöl-la' na'bán, en yöl-la' guti, en dza ni zóaru' na'a, en dza sí' za'. Yúgu'të nequi queëli', ²³ate' lib'ili' néquili' queë' Cristo, ate' Cristo néquinë' queë' Dios.

Dxin tunë' bönni' gubáz nasól-lë'ë Cristo

4 Que lë ni na', ral-la' guéquili' nácatu' netu' huen dxin queë' Cristo, en nazi' lu na'tu' le nagachi' queë' Dios. ²Yugu' bönni', Dios nudödë' lu ná'agaquië' ulu'gunë' dxin le nequi queë', run bayudxi ilunë' idú dxi'a le tunë'. ³Biti' bi ru'í láchxa'a channö uchi'a usöröli' neda', o channö ulu'chi'a ulu'sörö bönachi yödzölió ni neda'. Biti' ca' ruchí'a rusöró cuina'. ⁴Biti' ruxós láchxi'da'ahua' neda'. Lë ni biti' naca bë' biti' nabága'a xíguia'. Xanru' náquië' Nu ruchí'a rusöröë' neda'. ⁵Que lë ni na', biti' ral-la' uchi'a usöröli' nu bönni' z'alö ca idxín dza que. Guli'cöz dza ni' huödë' Xanru', ate' Lë' ubéajë' ga liná' le nagachi' ga chul-la, en ulu'ë lahui le yu'u icja láchxi'do'gaca yúgu'të bönachi. Ní'irö Dios ubi'ë que quégaca bönachi le gun bal léguequi ca ral-la' gaca quéguequi.

⁶Na'a, böchi' luzá'ado', ca naca lë ni, bë'a didza' que le runtu' netu', Apolos, en neda'. Huáca usédali' ca runtu' netu' para gunli' le nazúajsö lu guichi lá'ayi, en biti' gunli' zxon tuë' bönni', en biti' uzóali' tsól'alö ia'túë'. ⁷¿Nuzxi bentsö ga nacu' lí' lo? ¿Bizxi caz bidéli'nu' lí' le cabí bennë' Dios quiu'? Channö Lë' bennasë' quiu' lë na' dë lu no'o, ¿bizx que run ba zxon cuinu', réquinu' rácasö quiu' bidéli'nu' lë na'?

⁸ ¿Naru' réquitseli' nadéli'tëröli'? ¿Naru' réquitseli' rilé'eli' yöl-la' tsahui' queéli'? ¿Naru' réquitseli' rinná bé'éli', sal-la' biti' rinná bé'etu' netu'? Ni'a queé' Xanru' Dios ré'enda' inná bé'éli' para gaca inná bé'lentu' libí'ili' tsözxón.

⁹ Runi neda' naca queétu', bönni' gubáz queé' Dios, ca nuzóé' netu' zéajtu' xibánitè ca na' raca queégaquie' bönni' chinarugu queégaquie' ilátiè' lahui' lógaca bönachi. Nácatu' ca tu le tu'yuda' bönachi yödzölió ni, enca' ca tu le tu'yúdè'è gubáz lá'ayi queé' Dios.

¹⁰ Tu' ré'enu' guntu' xichiné' Cristo, ru'itu' bönachi lataj téquiguequi nácatu' bönni' biti' bi nózquequinè', pero libí'ili' réquili' rácada'ali' tu' nácali' queé' Cristo.

Libí'ili' réquili' chinál-lali',
pero téquiguequi bönachi nacuídi'tu'
netu'.

Tu'zóa bönachi netu' tsólá'alö,
pero tun libí'ili' bal.

¹¹ Ga ridxintè na'a dza, riduntu', en
ribídxitu' nisa.

Biti' dè lari' gácutu'.

Tun bönachi netu' zi', en biti' zoa
lídxitu'.

¹² Rusaca' zi' cuintu', la' nétu'sö runtu'
dxin.

Tu'lidza bönachi netu' zi',
pero netu' rinábatu' le gácalen léguequi.
Ta'bía ládxigaca bönachi netu',
pero ruá' rilentu' le.

¹³ Ta'nné' queétu',
pero lu yöl-la' nöxaj ladxi' ru'ilentu' lé-
gaquie' didza'.

Ga ridxintè na'a dza nácatu' ca bëbu que
yödzölió ni,

en ca tu le ta'rú'una yúgu'tè bönachi.

¹⁴ Ruzúaja' queéli' caní lu guichi,
calèga tu' ré'enda' guna' ga utuf'ili',
pero ré'enda' uzéajni'ida' libí'ili', runa' ca
runè' tu' bönni' ruzéajni'inè' yugu' zxi'ini
cazè' tu' nadxi'inè' légacabi'. ¹⁵ Sal-la'
gaca zían gáyú'è bönni' ila'cuá'alen

libí'ili', en ulu'sédinè' libí'ili' ca naca
queé' Cristo, tuz nu zoa naca ca xúzili',
nu na' ben ga néquili' queé' Cristo. Lu
yöl-la' na'bán cubi le nápalí' tu' dzá-
gali' Cristo, neda' caz naca' ca xúzili' tu'
busiyönda' libí'ili' didza' dxi'a. ¹⁶ Que lè
ni na', ráta'yua' loli' güf'i ládx'i'li' gunli'
ca runa' neda'.

¹⁷ Que lè ni na' ca' risól-la'a-bi' bi'i
Timoteo ga zóali'. Tu' rúnlenbi' neda'
dxin queé' Xanru' nácabí' ca zxf'ini caza',
en nácabí' idú ladxi', atè' nadxf'ida'-
bi'. Gunbi' Timoteo ga tsöjnéli' yugu'
xibá rusédida' tu' néquida' queé' Cristo,
yugu' le rusédida' yúgu'tè lataj lógaca
yúgu'tè cö' bönachi queé' Cristo. ¹⁸ Bál-
lali' run ba zxön cuinli' tu' réquili' bítirö
udxina' ga zóali'. ¹⁹ Na'a, la' udxín-
tea' ga zóali' channö Xanru' gunné'
neda' lataj. Ní'irö guéquibe'eda', calé-
gasö didza' tu'è bönni' tun ba zxön
cuíngaquie', pero guéquibe'eda' channö
zóalen yöl-la' huáca queé' Dios légaquie'.

²⁰ Channö nazí' lu ná'ali' rinná bé'enè'
Dios libí'ili', biti' naca bë' naca caní tu'
rnnásili' ca'. Naca bë' naca caní channö
zóalen libí'ili' yöl-la' huáca queé' Dios.

²¹ ¿Bízxilö ré'énili'? ¿Naru' ré'énili' udx-
ina' ga zóali' len gubá'ayi, para guna'
libí'ili' zi', o len yöl-la' nadxf'i, en lu yöl-
la' nöxaj ladxi'?

Pablo ruchi'a rusöröè' tuè' bönni' runè' le ruá' dö'

5 Rizé didza' zóalenè' libí'ili' tuè' bön-
ni' runè' le ruá' dö', tu' zóalenè'
nigula queé' xuzè'. Le ruá' dö' caní biti'
ca' tun bönachi biti' núnbè'gaca Dios.

² Libí'ili' run ba zxön cuinli', pero ral-
la' hu'ini'li', en ubéajli' nu na' run dul-
la' na' ga zóali'. ³ Sal-la' biti' zóalena'
libí'ili' lu idütè le naca', le nácatè zóale-
na' libí'ili' lu bö' naca caza'. Ca chizóalen
caza' libí'ili' chibuchí'a busöróa' nu na'
run dul-la' na'. ⁴ Cate' udúbili' queé' Xan-
ru' Jesucristo guna' libí'ili' tsözxón lu bö'

naca caza'. Ní'irö, len yöl-la' huáca queé' Xanru' Jesús ⁵bulí'dödé' bönni' na' lu na' Satanás tu' xihui' para initi idüté le naca cazé', pero ulá bö' naca cazé' dza ni' huödé' Xanru'.

⁶Biti' naca dxi'a gun ba zxön cuinli' ca naca le runli'. ¿Naru' cabí nózili' didza' na' rna: "Cua zido'os que yöta xtila gun ga chazxaj idüté cúa nazí'i le"? ⁷Na'a, guli'cúa ga zóali' dul-la' na' le naca ca tu cúa zi gulás, para gácali' dxi'a. Ní'irö gácali' ca tu cúa cubi le cabí nazí'i cúa zi que, ca na' le nácaté chinácali'. Naca queéru' ca chizóaru' Laní Pascua cate' tahué' yöta xtila bití' nazí' cúa zi que, en chigulútié'-ba' uláz queéru' bö'cu' zxila' que Laní Pascua na', bö'cu' zxila' na' náquié' Lè cazé' Cristo. ⁸Que lè ni na' ral-la' gunru' laní na', calèga zóalen rë'u cúa zi gulás na' le ruluí'i le ruá' dö', en le cabí nazaca', pero ral-la' ugunru' dxin yöta xtila na' bití' nazí'i cúa zi que, yöta xtila na' ruluí'i le naca idú dxi'a, en le naca idüté li.

⁹Cate' buzúaja' queéli' lu guichi zí'alö, gudxi caza' libí'ili' bití' gunli' tsözxón bönni' tuné le ruá' dö'. ¹⁰Gudxa' libí'ili' caní, calèga para ucuítali' tsaz ga nacua' bönachi yödzülió ni, nupa tun le ruá' dö', en ga nacua' bönachi ta'zé ládxi'-gaca le dè que luzé'eguequi, en ga nacu'é yugu' bönni' gubán, en bönachi ta'yéaj ládxi'gaca budó' guió'j budó' yaga. Para gunli' caní gun bayudxi irúajli' yödzülió ni. ¹¹Le ré'eni inná didza' na' buzúaja' queéli' zí'alö naca para cabí gunli' tu zxön tué' bönni' rnné' néquine' queé' Cristo, pero runé' dul-la' le lè'e, o rizé ládxe'è le dè que luzé'è, o reaj ládxe'è tu budó' néquini, o rinné xihue'è, o rizúdx-iné', o ribané'. Bití' ca' gágulenli' tsözxón tué' bönni' caní. ¹²⁻¹³Bití' nequi quia' neda' uchi'a usöróa' nupa bití' nabábagaca rë'u. Dios uchi'a usöróe' léguequi. Libí'i cázali' ral-la' uchi'a usöröli'

nupa nabábagaca libí'ili'. Que lè ni na', guli'cúé' ga zóali' bönni' xihui' na'.

Biti' ral-la' iché'ëru' böchi' luzá'aru' lógaca bönachi yúlahui'

6 Cate' ridil-la dídza'li' tuli' len ia-tuli', ¿nacxi caz rurúguili' tséajli' yúlahui' ga ulu'chi'a ulu'söró nupa bití' ta'yéajlè' Cristo libí'ili'? Dxí'arö tséajli' lógaca bönachi queé' Cristo para ulu'chi'a ulu'söró libí'ili'. ²¿Naru' cabí nózili' nupa néquiquequi queé' Cristo ral-la' ulu'chi'a ulu'söró yúgu'tè bönachi yödzülió? Channö libí'i cázali' uchi'a usöröli' bönachi yödzülió, ¿naru' cabí nápali' yöl-la' réajni'i uchi'a usöröli' didza' bizxaj caní? ³¿Naru' cabí nózili' ral-la' uchi'a usöröru' yugu' gubáz lá'ayi? Rúntëro bayudxi uchi'a usöröru' le taca yödzülió ga ni zóaru' na'a. ⁴Na'a, channö raca tu le run bayudxi nu uchi'a usöró, lè na' raca yödzülió ni, ¿bizx que rucá'ali' nupa ulu'chi'a ulu'söró le, nupa na' bití' bi dè lu né'eguequi lád'jagaca bönachi queé' Cristo? ⁵Rnnía' caní para guna' ga utuí'ili'. ¿Naru' cabí zóalen libí'ili' nu raca lati' nu gaca uchi'a usöró le raca quégaquie' böchi' luzá'ali'? ⁶¿Nacxi caz gaca tu bönni' réajlè'è Cristo iché'è böchi' luzé'è yúlahui' ga ulu'chi'a ulu'söró bönachi bití' ta'yéajlè' Cristo légaquie'?

⁷Le nácaté richixi riníguili' tu' ridil-la dídza'li'. ¿Bizx que bití' guá' ilenli' nu ruá' dö' queéli'? ¿Bizx que bití' guá' ilenli' nu rucáchi'lan le dè queéli'? ⁸Libí'ili' ruá'ali' dö', en rucachi' lanli', ate' runli' caní quégaquie' böchi' luzá'ali' ta'yéajlè'è Cristo.

⁹⁻¹⁰¿Naru' cabí nózili' bití' ila'yaza bönachi bití' nábagaca tsahui' ga rinná bē'è Dios? ¡Bití' si' ye'e cuinli'!

Bití' ca' tsaz ga rinná bē'è Dios nu run le ruá' dö':

Cuntu nu reaj ladxi' budó' guió'j budó' yaga,

en cuntu nu riguitsaj xibá que yöl-la' nutschaga na',
 en cuntu nu bönni' run cuinë' ca nigula,
 en cuntu nu bönni' zóalenë' la' luzé'e bönni'së',
 en cuntu nu bönni' gubán, en cuntu nu ruhuidi',
 en cuntu nu rizudxi, en cuntu nu rinné xihui',
 en cuntu nu rucáchi'lan.

Biti' ca' tsaz nu run caní ga rinná bëë Dios.

¹¹ Caní gúcali' bál-lali' lib'íli', pero na'a chinuhuóacali' dxi'a que dul-la' gubága'li', en chinéquili' quez queë' Dios, en chinuhuóacali' tsahui' ni'a que le benë' Xanru' Jesús. Bö' Lá'ayi queë' Dios runë' ga raca caní.

Idútë le naca cázaru' nequi quez queë' Dios

¹² Ta'nná bönachi: "Yúgu'të dë lataj gunru'." Sal-la' nácatë didza' ni, biti' ralla' gunru' yúgu'të. Sal-la' dë lataj guna' yúgu'të, biti' gu'a lataj bi inná be'e neda'.

¹³ Ta'nná ca' bönachi: "La' huagu naca le tsaz lé'ëru', ate' lé'ëru' naca ga tsudzu la' huagu." Nácatë didza' ni, pero idxín dza usunítie' Dios la' huagu, enca' lé'ëru'. Dios benë' idútë le naca cázaru', calëga para ugunru' le dxin gunru' le ruá' dö'. Naca para uzi'ë xibé Xanru', ate' Xanru' náquië' para uzi' xibé' idútë le naca cázaru'. ¹⁴ Dios busubanë' Xanru' Cristo lu yöl-la' guti. Lësca' caní, len yöl-la' huáca queë' usubanë' rë'u.

¹⁵ ¿Naru' cabí nózili', idútë le nácali' naca tuz len le naca cazë' Cristo? ¿Nacxi caz gaca cúali' tu le da' Cristo, en gunli' ga ta' tu nigula udá dzaga? ¿Biti' ca' ral-la' gunli' caní! ¹⁶ ¿Naru' cabí nózili' channö tu bönni' zóalenë'-nu nigula udá dzaga, náquië' tuz len lënu? Ca naca lë ni nazúaj lu guichi lá'ayi le rna: "Ilácagaquië' ca tuz bönachi iropë' na'."

¹⁷ Na'a, nu bönni' náquië' tuz len Xanru', náquië' tuz len Lë' lu bö' naca cazë'.

¹⁸ Que lë ni na', biti' ca' gunli' le ruá' dö'. Bítitës dul-la' yúbölö runë' tu bönni', n'íilö lu le naca cazë' runë' dul-la' na'. Nu bönni' runë' dul-la' le lë'ë, runë' dul-la' le dzaga lë cazë'. ¹⁹ ¿Naru' cabí nózili' idútë le naca cázali' naca yudo' queë' Dios Bö' Lá'ayi? Dios caz nuchizë' Dios Bö' Lá'ayi na' lib'íli', ate' Lë' zoë' icja ládxi'do'oli'. Que lë ni na' biti' nequi queë'zili' idútë le naca cázali'. Na'a, nequi queë' Dios. ²⁰ Dios gú'uë' lib'íli' len tu le zxön le gudizxjë'. Guli'gún dxin idútë le nácali', enca' bö' naca cázali' para gaca queë' Dios yöl-la' ba, tu' néquiguequi queë' Dios idútë le naca cázali', enca' bö' naca cázali'.

Rusédinë' Pablo ca naca que yöl-la' nutschaga na'

7 Na'a, ubi'a didza' yugu' le rinábili' neda', le buzúajli' quia' lu guichi. Gácarö dxi'a queë' nu bönni' channö cabí sóalenë'-nu nigula. ² Tu' tunda' bönachi le ruá' dö' ga ni' zóali', yúgu'të bönni' nabábagaquië' lib'íli' ral-la' ila'cuá'lenë'-nu nigula que queë'gaquië', ate' yúgu'të nigula ral-la' ila'cuá'lennu-në' bönni' que queë'gacanu. ³ Bönni' na' zóanu nigula queë' ral-la' gunë' queë'nu nigula queë' ca naca yöl-la' run que yöl-la' nutschaga na', en la' lébisö ral-la' gunnu nigula len bönni' queë'nu. ⁴ Biti' dë lu ná'asönu nigula le naca cázanu, pero bönni' queë'nu dë lu në'ë ca' le. Lësca' caní, biti' dë lu ná'asë' bönni' le naca cazë', pero nigula queë' dë lu ná'anu ca' le. ⁵ Biti' ralla' ila'dá'baguë'ë luzá'agaquië' bönni', en nigula na', nutschaga ná'agaquië'. Huácasö ca' channö ilunë' tuz didza' biti' ila'dzáguie' tu ch'isö para gaca ulu'lidzë' Dios idú ládxi'gaquië'. Tödi na', bönni' na' ral-la' sóalenë'-nu nigula queë' leyúbölö, para cabí sequi' Satanás tu' xi-

hui' gun ga tsázagaquië' nöza dul-la' tu' cabí gaca ila'nná be'e cuíngaquië'.

⁶Lë ni rea' libí'ili' naca tu le run-
në' Xanru' libí'ili' lataj. Biti' naca le
gunná bë'ë. ⁷Runi neda' gácarö dxi'a
ulu'gá'anë' tuz yúgu'të bönni', ca na' zoa'
tuza' neda'. Tu tuë' bönni' rizi'ë tsca le
runödzejë' Dios queë' gunë'. Tuë' rizi'ë
tu le runödzejë', ate' ia'túë' rizi'ë ia'tú le
runödzejë'.

⁸Na'a, rea' nupa zóagaca tuz, enca'
yugu' nigula uzëbi, gácarö dxi'a quegue-
qui ulu'gá'ana tuz ca na' zoa' tuz neda'.
⁹Channö cabí gaca ila'nná be'e cuín-
gaquië', huáca ulu'tsaga ná'agaquië', tu'
gácarö dxi'a ulu'tsaga ná'agaquië', en
cabí ila'zé ládxi'gaquië' le ruá' dö'.

¹⁰Rinná bé'eda' nupa chinutsaga
në'eguequi, en calëga néda'sö runa'
xibá ni, pero Lë cazë' Xanru' runë'
le, rnnë': "Biti' ulá'alennu tu nigula
bönni' queénu." ¹¹Channö nu nigula
ulá'alennu-në' bönni' queénu, ral-la'
ugá'ananu túzinu, o huóacanu tuz len
bönni' queénu na'. Lësca' caní tu bönni'
biti' ral-la' ucá'anë'-nu nigula queë'.

¹²Na'a, néda'sö rea' ia'zica'rö bönachi,
en calëga rnnë' Xanru' caní, rnnía':
Channö zoë' nu böchi' luzá'aru' réajlë'ë
Cristo, ate' nigula queë' bití' réajlë'ënu
Xanru', en channö ré'ëninu ugá'analennu
lë', bití' ral-la' ulá'alennë'-nu. ¹³Lësca'
caní rnnía': Channö zóanu nu nigula zan-
ru' réajlë'ënu Cristo, ate' bönni' queénu
bití' réajlë'ë Xanru', en channö ré'ënnë'
ugá'analennë'-nu, bití' ral-la' ulá'alennu
lë'. ¹⁴¡Caní ral-la' ilunë'! Bönni' cabí réa-
jlë'ë na', Dios rilé'enë' lë' ca tu bönni'
néquinë' quez queë' tu' náquië' tuz len
nigula queë' réajlë'ënu Cristo, ate' nigula
caní, bití' réajlë'ënu, Dios rilé'enë'-nu ca
tu nigula néquinu quez queë' tu' nácanu
tuz len bönni' queénu náquië' böchi'
luzá'aru' réajlë'ë Cristo. La'tu' cabí naca
caní, ilácabi' xz'ínigaquië' ca yugu' bí'i
lan lahuë' Dios. Na'a, nácacagabi' quez

queë' Dios. ¹⁵Nu bönni' o nigula nu
cabí réajlë' Cristo, channö ré'ëni ulá'alen
nu na' nutsaga ná'alen, huáca ca'. Bití'
run bayudxi ugá'analen nu na' böchi'
luzá'aru' o zanru' nu réajlë' Cristo, tu'
bulidzë' Dios rë'u para cózaru' tsáhui'-
do'. ¹⁶¡Caní ral-la' gaca! Nadxi ca' lí',
nigula, huáca gunu' ga ulé' bönni' quiu',
ate' nadxi ca' lí', bönni', huáca gunu' ga
ulanu nigula quiu'.

¹⁷Ral-la' gunru' tu turu' tsca le bennë'
queéru' Xanru', enca' tsca guca queéru'
cate' bulidzë' Dios rë'u para guéquiru'
queë'. Rusédida' yúgu'të cö' bönachi
queë' Cristo xibá ni. ¹⁸Channö Dios
bulidzë' nu bönni' narugu lu xipélë'ë
le naca bë' néquinë' queë' Dios, ral-
la' ugá'anë' caní, zoa lu xipélë'ë lë na'
naca bë'. Lësca' caní, channö Dios bu-
lidzë' nu bönni' bití' narugu lu xipélë'ë
lë na' naca bë', bití' ral-la' ichúguië' lë
na' lu xipélë'ë. ¹⁹Bití' bi nazaca' lë na'
narugu lu xipélë'ë tu bönni', en channö
bití' narugu lu xipélë'ë bönni' lë na'
naca bë', bití' bi nazaca'. Le nácada'
lesaca' naca gunru' ca rinná bë' xibá
queë' Dios. ²⁰Ral-la' ugá'anë' tu tuë' bö-
nni' ca na' gúquië' cate' ní' bulidzë' Dios
lë'. ²¹Channö bulidzë' lí' cate' ní' nacu'
bönni' nadó'o, bití' cö'u böniga tu' nacu'
caní, pero channö gata' quiu' lataj iru-
ju' lu na' xanu', buzí' xibé' lataj na' gata'
qui' iruju'. ²²Channö bulidzë' Xanru'
nu bönni' cate' ní' nado'ë, lahuë' Xan-
ru' náquië' ca nu bönni' narúajë' lu në'ë
xanë' na', para gunë' xichinë' Xanru'. Lës-
ca' caní, channö bulidzë' Xanru' nu bö-
nni' cate' ní' narúajë' lu në'ë xanë' na',
bönni' ni náquië' ca tu bönni' nadó'o
queë' Cristo. ²³Zxóntërö le gudizxjë'
Dios, gú'uë' libí'ili'. Que lë ni na' bití'
ral-la' guti' cuinlí' lu ná'agaca bönachi.
²⁴Que lë ni na' ca', böchi' luzá'ado', ral-
la' sóali' lahuë' Dios tsca guca queéli' tu
tuli' cate' ní' bulidzë' Dios libí'ili'.

²⁵ Ca naca quégaca nupa biti' nutsaga ná'agaca, biti' bi gunná bé'ené' Xanru' neda'. Caní runi neda', ate' huáca uzxöni ládxi'li' neda' tu' ruhuéchi' ládxi'ë Xanru' neda'. ²⁶ Tu' taca zían le raca queéru' dza ni zóaru' na'a, runi neda' gácarö dxi'a channö ulu'gá'ané' yúgu'të bönni' ca nácaquaié' na'a. ²⁷ Channö nutsaga ná'lenu'-nu nigula, biti' ulá'alenu'-nu. Lësca' caní, channö zu' tuzu', biti' quilju' tu nigula para utsaga ná'lenu'-nu. ²⁸ Na'a, channö utsaga ná'lenu'-nu nigula, biti' gunu' dul-la', en channö tu bi'i nigula utsaga ná'aleni'-né' bönni', biti' gunbi' dul-la', pero ila'gu'f'i ila'zaca' nupa nutsaga ná'agaca yödzölió ni, ate' ré'enda' guna' ga uláli' lu yöl-la' riguf'i rizaca' na'.

²⁹ Na'a, rea' lib'ili' lë ni, böchi' luzá'ado'. ¡Chizóa idxín dza údxi! Que lë ni na', yugu' bönni' nutsaga ná'lengaquie'-nu nigula ral-la' ilu' ládxi'gaquie' Dios, ca runé' nu bönni' biti' nutsaga ná'aleni' nigula. ³⁰ Lësca' caní, nupa ta'bödxi yechi' ral-la' ulu'dzeja lahué' Dios ca run nu biti' ribödxi, ate' nupa tu'dzeja ral-la' ila'cuá' nöxaj lahué' Dios ca run nu biti' rudzeja, ate' nupa to'o ral-la' ilaca ca nu biti' bi dë que. ³¹ Nupa tu'gún dxin le dë yödzölió ni ral-la' ilaca ca nu biti' ru'f'i ladxí' le dë yödzölió ni, tu' udödi quégaca le rilé'eru' yödzölió ni.

³² Ré'enda' biti' ubi ugu'f'ili'. Tu bönni' biti' zóanu nigula queé' ru'f'i ládxi'ë le nequi queé' Xanru', naca guné' le raza ládxi'ë Xanru'. ³³ Tu bönni' nutsaga ná'lené'-nu tu nigula ru'f'i ládxi'ë le raca yödzölió, naca guné' le raza ládxi'nu nigula queé'. ³⁴ Lësca' caní raca queénu tu nigula nutsaga ná'lennu-né' bönni', en queénu nigula na' zóanu túzinu. Nigula na' zóanu túzinu ru'f'i ládxi'nu le nequi queé' Xanru', naca sóanu quez queé' Dios lu le naca cázanu, en lu bö' naca cázanu. Nigula na' nutsaga ná'lennu-né' tu bön-

ni' ru'f'i ládxi'nu le raca yödzölió ni, naca gunnu le raza ládxi'ë bönni' queénu.

³⁵ Yugu' lë ni rea' lib'ili' para uz'f'ili' xibé lë ni, en caléga para uzága'a xinózili'. Ré'enda' gunli' le ral-la' gunli', para gunli' xichiné' Xanru' idú ládxi'li'.

³⁶ Channö zoé' tu bönni' réquiné' biti' naca dxi'a ugá'anabi' túzibi' bi'i nigula ra'bando' queé', en chizóa iz queébi', en ré'énide'ebi' utsaga ná'aleni'-né' bönni', huáca utsaga ná'aleni'-né'. ¡Biti' gunbi' dul-la'! ³⁷ Channö chinún tsutsu xtídzé'ë bönni' na', en biti' run bayudxi guné' caní, en dë lu në'ë naca guné', en chinún tsutsu xtídzé'ë ugá'anabi' túzibi', guné' le naca dxi'a bönni' na'. ³⁸ Caní naca, nu ru'f'i lataj bi'i que utsaga ná'aleni'-né' bönni', run le naca dxi'a, pero nu run ga ugá'anabi' túzibi' run le nácarö dxi'a.

³⁹ Nigula na' nutsaga ná'lennu-né' bönni', rinná be'e xibá que yöl-la' nutsaga na' lënu tsanni ni zoé' nabané' bönni' queénu. Channö gátié' bönni' queénu, gata' lu ná'anu utsaga ná'lennu-né' nu bönni' ré'éninu, channö réajlé'ë Xanru' bönni' na'. ⁴⁰ Runi neda' gácarönu bica' ba channö ugá'ananu túzinu, en réquida' Bö' Lá'ayi queé' Dios runé' neda' tzazxón.

Le ta'gú'u bönachi lógaca budó' guió'j budó' yaga

8 Na'a, gu'a didza' ca naca que le ré'aj ráguru', lë na' gula'gú'u bönachi lógaca budó' guió'j budó' yaga. Ta'nná bönachi: "Yúgu'tëru' náparu' yöl-la' réajni'i." ¡Nácatë didza' ni! Yöl-la' réajni'i caní run ga run ba zxön cuinru', pero yöl-la' nadxí' queéru' luzá'aru' run ga rácalenru' luzá'aru'. ² Channö zoé' nu bönni' réquiné' chiréajni'iné', biti' bi réajni'iné' ca ral-la' tséajni'iné', ³ pero nu bönni' nadxí'iné' Dios, Dios caz zóalené' bönni' na'.

⁴ Na'a, ca naca que le ré'aj ráguru', lë na' gula'gú'u bönachi lógaca budó' guió'j budó' yaga, nóziru' biti' bi nazáca'

gaca budó' guiój budó' yaga na' yödzülió ni, en cúnturö nu zoa naca Dios. ⁵ Sal-la' nacua' le téquiguequi bönachi náca-gaca dios, le nacua' lúzhiba, en le nacua' luyú, ate' zían le tu'lidza bönachi, en tu'í lágaca: dios, enca': xan, ⁶ pero queéru' rë'u:

Tuzë' náquië' Dios, Lë' Xuz.

Lë' benë' yúgu'të le rilë'eru',

ate' zóaru' nabanru' para tseaj ládxi'ru' Lë'.

Tuzë' náquië' Xanru', Lë' Jesucristo.

Lu në'ë Lë', Dios benë' yúgu'të le dë, ate' nabániru' Lë'.

⁷ Calëga yúgu'të böchi' luzá'aru' ta'yéajni'inë' lë ni. Bal-lë', nupa ni' zí'alö gula'yéaj ládxi'gaca budó' guiój budó' yaga, ga ridxintë na'a dza të'aj tahuë' le gula'gú'u bönachi lógaca budó' guiój budó' yaga, ate' téquinë' napa yöl-la' huáca que budó' na'. Tu' cabí naca idú ládxi'gaquië', que lë ni na' téquinë' nabága'gaquië' xíguia' channö tahuë' lë na'. ⁸ Biti' gun le gu'aj gáguru' ga gunë' Dios rë'u bal. Channö gáguru' le, bití' gácaröru' dxi'a, en channö cabí gáguru' le, bití' gácaröru' cá'asö. ⁹ Dë lu ná'ali' gu'aj gágulli' bití'tës. Guli'gún chi'i cuinli' para cabí gunli' ga ila'chixi ila'nigui nupa bití' naca idú ca ta'yéajlë' Cristo. ¹⁰ Nadxi ca' li' réquinu' napu' yöl-la' réajni'i ca naca lë ni, en huáca gagu' bití'tës. Channö cö'u xilataj budó' guiój budó' yaga, en gu'aj gagu' le gula'gú'u bönachi lo budó' guiój budó' yaga na', ate' channö nu böchi' luzó'o bití' naca idú ládxe'ë ilë'enë' li', rö'u ragu' ni', nadxi ca' gunu' ga gahuë' lë na' gula'gú'u bönachi lo budó' guiój budó' yaga na'. ¹¹ Caní gaca, tu' réquinu' napu' yöl-la' réajni'i, gunu' ga ichixi iníguinë' böchi' luzó'o bití' naca idú ládxe'ë. ¿Naru' guntso' caní queë' böchi' luzó'o, ni'a que nu na' gútië' Cristo? ¹² Channö caní gunu', gunu' dul-la' tu' usubágu'u böchi' luzó'o xíguia', en

gunu' ga ichixi iníguinë' tu' cabí naca idú ládxe'ë, en gunu' ca' dul-la' le ruzóa Cristo tsólá'alö. ¹³ Que lë ni na', channö le gu'aj gahua' gun ga ichixi iníguinë' böchi' luzá'a, bití'rö gahua' bëla' na', para cabí guna' ga gunë' böchi' luzá'a dul-la'.

Le dë lu në'ë nu bönni' gubáz nasól-lë'ë Cristo

9 ¿Naru' cabí naca' gubáz nasól-lë'ë Cristo? ¿Naru' cabí nadéli'da' yöl-la' rusolá? ¿Naru' cabí bilé'eda'-në' Xanru' Jesús? ¿Naru' cabí nácali' queë' Cristo ni'a que dxin bena' neda' uláz queë' Xanru'? ² Nadxi ca' téquiguequi ia'zica'rö bönachi bití' naca' gubáz nasól-lë'ë Cristo. Libí'ili' run bayudxi guéquili' naca' gubáz queë' Cristo. Tu' nácali' queë' Xanru', le naca cázali' naca bë' naca' gubáz nasól-lë'ë Xanru'.

³⁻⁴ Nacuá' nupa ta'zi' quidza' neda'. Caní rubi'a didza', rea' légaquië': Dë lu na'a inaba' le gu'aj gahua' tu' runa' dxin ni. ⁵ Lëasca' caní dë lu na'a ut-saga ná'alena'-bi' tubi' bi'i nigula zanru' réajlë'ëbi' Cristo para gunbi' neda' tsözxón ga ridá', ca na' tunë' ia'zica'rë' gubáz nasól-lë'ë Cristo, en yugu' bönni' böchë'ë Xanru', enca' Pedro. ⁶ ¿Naru' réquili' tuza' neda', en Bernabé ral-la' guntu' dxin lahui' dza, para idzólitu' le gágutu'? ⁷ ¿Nuzxi caz bönni' rejë' gudilla, ate' riguijxjë' la' cuinsë'? ¿Nuzxi caz bönni' rudë'ë tu la' yëla que lubá uva, en bití' rahuë' le ribía lubá na'? ¿Nuzxi caz bönni' rapa chi'ë-ba' bö'cu' zxila', en bití' re'jë' nidxi' quégacaba'? ⁸ Bití' guéquili' la' néda'sö ruá'a caní didza'. Lëasca' caní rna le nazúaj lu guichi lu xibá queë' Moisés. ⁹ Lu xibá queë' Moisés nazúaj lu guichi le rna: Bití' cu'u du rúa'aba' bëdxi cate' rul'biba' zxo'a' xtila. Bë'ë Dios didza' ni, calégasö tu' rufi ládxe'ë-ba' bëdxi, ¹⁰ pero para uzí'iru' ca' xibé rë'u. Que lë ni na' nazúaj lu guichi didza' na',

ate' bönni' na' rugá'anë'-ba' bëdxi, enca' bönni' na' runë' ga tu'libiba' bëdxi xzoa' xtila, iropë' na' ral-la' ilunë' löza ila'z-i'è que le rulá' luyú na'. ¹¹ Na'a, channö bentu' dxin ga zóali', le naca ca dxin guz gu'una, lë na' naca queë' Dios Bõ' Lá'ayi, ¿naru' réquitseli' biti' ral-la' uz'itu' xibé tu le do' dë queéli' ca na' ruzi'è xibé bönni' guz gu'una le rulapë'? ¹² Ia'zica'rõ bönnachi tu'zéajni'inë' libí'ili' tu'zi'è xibé le dë queéli'. ¿Naru' cabí rála'tërõ uz'itu' xibé netu' le dë queéli'?

Catu caz buzi'tu' xibé lë ni dë lu na'tu', pero biá' gulentu' yúgu'të para gaca guntu' libán que didza' dxi'a ca naca queë' Cristo. ¹³ Nöz quézili' ca raca quégaca nupa tun dxin que yudo', tu'zi' xibé gun que yudo'. Lësca' caní nupa ta'gú'u rön quégacaba' böa' bëdxi lu bucugu lá'ayi queë' Dios, tahuë' bëla' quégacaba' böa' bëdxi na'. ¹⁴ Lësca' caní nuzóë' Xanru' ca ral-la' gaca quégaquië' bönni' tunë' libán que didza' dxi'a. Nupa tu'zi' xibé libán na' tunë' ral-la' ulu'gagu légaquië'. ¹⁵ Neda' catu caz buzi'a xibé lë ni dë lu na'a, ate' lë ni ruzúaja' lu guichi ni biti' naca le rinábini nu bi gunna quia'. Run ba zxön cuina' tu' cabí nazxja' cate' runa' libán que didza' dxi'a. Guë'ënitëra' gátia' ca gu'a lataj nu innë' runa' libán na' tu' nazxja'.

¹⁶ Biti' dë lu na'a gun ba zxön cuina' tu' runa' libán que didza' dxi'a, tu' run bayudxi guna' libán que. Bica' bayechi' neda' channö cabí guna' libán que didza' dxi'a. ¹⁷ La'tu' runa' libán tu' ré'ëni quézida', huáca inaba' lazxja', pero run bayudxi guna' libán, tu' naca tu le busubáguë'ë Dios neda' guna'. ¹⁸ ¿Bixzi lazxja' uzi'tsa' xibé channö? Ruzi'a xibé le raza lãdxa'a tu' cabí nazxja' cate' runa' libán que didza' dxi'a. Biti' ca' ruzi'a xibé lë na' dë lu na'a tu' runa' libán que didza' dxi'a.

¹⁹ Na'a, sal-la' cunttu nu yu'a lu në'e, chibén cuina' ca tu bönni' nadó'o quégaca yúgu'të bönnachi para gaca guna'

ga ulu'lágaca ziánrõ ca' bönnachi. ²⁰ Cate' runa' libán lógaca bönnachi judío, run cuina' ca tu bönni' judío para gaca guna' ga ulu'lágaca bönnachi judío na'. Bönnachi judío na' tun ca rinná bë' xibá queë' Moisés. Que lë ni na' run cuina' ca tu bönni' runë' ca rinná bë' xibá na' sal-la' biti' yu'a lu na' xibá na'. Caní runa' para gaca guna' ga ulu'lágaca nupa tun ca rinná bë' xibá na'. ²¹ Cate' runa' libán lógaca bönnachi izá'a, nupa biti' rinná be'e xibá queë' Moisés léguequi, run cuina' ca tu bönni' zi'tu' na', para gaca guna' ga ulu'lë'. Biti' rucá'ana' cá'asõ xibá queë' Dios. Neda' runa' ca rinná bë' xibá queë' Cristo. ²² Run cuina' ca tu bönni' biti' naca idú ca réajlë'ë Cristo para gaca guna' ga ulu'lágaca nupa na' biti' naca idú ca ta'yéajlë' Lë'. Run cuina' ca náca-gaca yúgu'të bönnachi para gaca guna' ga ulu'lágaca bal-la bönnachi na'. ²³ Lu yúgu'të lë ni runa', runa' ga ta'yöni bönnachi didza' dxi'a, para gaca uzi'a xibé tsözxön len libí'ili' didza' dxi'a na'.

²⁴ Chinöz quézili' ca tunë' bönni' nüt-sa'gaquië' lu huitaj. Ta'xíti'ë yúgu'të', pero tuzë' bönni' idéli'në' uzi'ë xibé lataj lo. Lësca' caní ral-la' gunli' xichinë' Dios, gácali' ca bönni' nüt-sa'gaquië' lu huitaj, para idéli'li' uz'ili' xibé le ubi'ë Dios queéli'. ²⁵ Yúgu'të bönni', cate' tu'pá'a cuíngaquië' para gaca ila'yázië' lu huitaj, ta'nná be'e cuíngaquië' lu yúgu'të le tunë'. Tunë' caní para ila'déli'në' tu bregui' zin le inítitë, pero idéli'ru' rë'u tu le uz'itica'siru' xibé. ²⁶ Que lë ni na', naca' neda' ca tu bönni' idú lãdxë'ë rixíti'ë. Naca' ca' ca tu bönni', idú lãdxë'ë ridil-lë'. Biti' rucudxa' lu bö'ös. ²⁷ Ca runë' bönni' na' rulidzë' bönnachi para tsöjtsázagaca lu huitaj, runa' ca' neda', runa' libán para ulu'lágaca bönnachi. Bönni' na' nüt-së'ë lu huitaj runë' ga gaca tsutsu idütë le naca cazë', en rinná bë'enë' le. Lësca' caní runa' neda', para cabí unítia' xilatja' lu dxin queë' Dios.

**Biti' ral-la' tseaj ládxi'ru'
budó' guió'j budó' yaga**

10 Ré'enda' uzéajni'ida' libí'ili', böchi' luzá'ado', ca guca quégaquië' xuz xtó'otu'. Dios benë' ga gulú'u xzul-la tu böaj yúgu'të'. Lësca' caní, gula'dödë' yúgu'të' gatsaj láhui'lö nísado'. ²Lu böaj ni', en lu nísado' ni', guca quégaquië' ca raca que nu ridila nisa. Lë na' guca quégaquië' guca bë' guláquië' tuz len Moisés. ³Lësca' caní, gulahuë' yúgu'të' yöta xtildo' na' bunödzejë' Dios Bö' Lá'ayi quégaquië'. ⁴Gulë'ajë' yúgu'të' nisa na' bunödzejë' Dios Bö' Lá'ayi quégaquië', tu' gulë'ajë' nisa birúaj lë'e guió'j na' bulu'e lahui Dios Bö' Lá'ayi, guió'j na' gula'báninë' légaquië'. Ca guca guió'j na' naca cazë' Cristo, nabániru' Lë'. ⁵Sal-la' guca caní, bití' guyaza ládxië' Dios yúgu'të'. Que lë ni na' gulátië' lu lataj cá'asö.

⁶Yúgu'të lë ni naca tu le ruzéajni'i rë'u, para cabí së ládxi'ru' le ruá' dö', ca na' gula'zé ládxi'gaquië' légaquië'. ⁷Biti' ral-la' tseaj ládxi'ru' budó' guió'j budó' yaga, ca na' gulunë' bal-lë' légaquië'. Nazúaj lu guichi lá'ayi le rnna: "Gula'bö'ë bönni' ni', en gulë'aj gulahuë', ate' gula'yasë', en gulunë' laní que budó' na'." ⁸Biti' ral-la' gunru' le ruá' dö', ca na' gulunë' bal-lë' légaquië' le ruá' dö', ate' tu dzasö gulátië' idú ca tsonna-uruá' milë'. ⁹Biti' ral-la' si' bë'ëru' Xanru', ca na' gula'zí' bë'ë Lë' bal-lë' légaquië', ate' gulátië' tu' guláguya'aba' bëla sínia' légaquië'. ¹⁰Lësca' caní, bití' ral-la' innëru' queë' Dios ca na' gula'nnë' queë' bal-lë' légaquië', ate' tuë' gubáz lá'ayi queë' Dios busunítië' légaquië'.

¹¹Yúgu'të lë ni le gulaca quégaquië' xuz xtó'otu', tu'zéajni'i rë'u, en nazúaj lu guichi lá'ayi para gun gadxi rë'u, tu' chizóaru' dza chizóa údxi que yödžölió ni. ¹²Que lë ni na', nu réqui chinal-la,

ral-la' gun chi'i cuini, para cabí ichixi inigui. ¹³Ca naca le ta'zí' bë' libí'ili' raca ca' quéguequi yúgu'të bönachi. Dios runë' ca rnnë', en bití' gu'ë lataj bi si' bë' libí'ili' le cabí gaca guá' ilenli', pero cate' bi si' bë' libí'ili', uluf'inë' libí'ili' naca gaca irúajli' lu na' tu' xihui', para gaca guá' ilenli'.

¹⁴Que lë ni na', böchi' luzá'ado', bití' tseaj ládxi'li' budó' guió'j budó' yaga. ¹⁵Rufilena' libí'ili' didza' ca rufilena' didza' nupa ta'yéajni'i. Buli'chi'a buli'söró didza' ni gu'a. ¹⁶Cate' inábiru'-në' Dios gun lá'ayë' le ré'ajru' cate' rusub-anru' ca gútië' Cristo, lë na' ré'ajru' rulu'í nácaru' tuz len Cristo, en ruzí'iru' xibé le benë' Cristo cate' bulaljë' xichönë' cate' gútië' lë'e yaga cruz. Lësca' caní, yöta xtila na' ruzxúxjaru', en ráguru', rulu'í dzágaru'-në' Cristo, en ruzí'iru' xibé le benë' Cristo cate' budödë' idütë le naca cazë' uláz queëru'. ¹⁷Sal-la' zianru' nácaru', yúgu'tëru' ráguru' tuz yöta xtila na', en que lë ni na' nácaru' ca tuz bönachi.

¹⁸Buli'yútsöca' ca tunë' bönni' Israel. Bönni' ni' tahuë' lahuë' Dios le ta'gu'ë lu bucugu lá'ayi queë', lë na' tahuë' rulu'í dzágagaquië' Dios. ¹⁹¿Bizxi rnna didza' ni ruá'a? Bití' rnní'a napa budó' guió'j budó' yaga yöl-la' huáca, en le ta'gú'u bönachi lógaca budó' guió'j budó' yaga na' bití' napa yöl-la' huáca. ²⁰Caní rn-ní'a: Lë na' ta'gú'u bönachi bití' núbë'-gaquië' Dios lógaca budó' guió'j budó' yaga, ta'gú'u lógaca bö' xihui', en calëga lahuë' Dios. Ré'enda' bití' idzágalí' yugu' bö' xihui'. ²¹Bití' gaca gu'jali' le rulu'í nácaru' tuz len Xanru', enca' lë na' ulufi nácalí' tuz len yugu' bö' xihui'. Bití' gaca gáguli' le rulu'í dzágaru'-në' Xanru', enca' le ulufi dzágali' yugu' bö' xihui'. ²²¿Naru' gúntsaru' ga uzxé'enë' Xanru'? ¿Naru' réquitseli' nápatërolí' yöl-la' huáca ca napë' Lë'?

Le dë lu ná'aru' gunru', en ca ral-la' idxi'igacru'-në' böchi' luzá'aru'

²³Naca idútë li didza' na' rnna: "Yúgu'të dë lu ná'aru' gunru'." Na'a, neda' rnní'a: Calëga yúgu'të ral-la' gunru'. Yúgu'të dë lu ná'aru' gunru', pero calëga yúgu'të gun ga gácarö idú ca réajlë'ëru' Cristo. ²⁴Ral-la' guí'f'i ládxi'ru' gunru' le gun ga gaca dxi'a quégaquië' böchi' luzá'aru', en calëgasö le gun ga gaca dxi'a que la' cuínsiru'.

²⁵Bíti'tës bi tuti' bönachi lu yé'ëyi, huáca gáguli', en biti' bi ral-la' inábali' que, para cabí cuéqui böniga ládxi' do'oli'. ²⁶Nazúaj lu guichi le rnna: "Queë' Xanru' nequi yödzöliö ni, enca' yúgu'të le dë yödzöliö ni."

²⁷Channö ulidzë' tu bönni' biti' réajlë'ë Dios libí'ili' para guídali' lidxë', ate' gué'ënilí' tséajli', guli'gagu yúgu'të le cu'ë loli', en biti' bi inábali' que, para cabí cuéqui böniga ládxi' do'oli'.

²⁸Channö nútí'tës nu guí'ë libí'ili': "Lë ni gula'gu'ë lo budó' guí'ój budó' yaga", biti' gáguli' lë na' para gaca dxi'a que nu na' gudí'xjöi' caní libí'ili', en para cabí cuéqui böniga ládxi'da'ahuë'. ²⁹Rnní'a: Para cabí cuéqui böniga ládxi'da'ahuë' bönni' na' gudí'xjöi'inë' caní libí'ili', en calëga para cabí cuéqui böniga ládxi' do'oli' libí'i cázali'.

Nadxi ca' nu inábini neda', inná: "¿Bízx que ral-la' uzóa' tsölá'alö le dë lu na'a guna' tu' ribequi böniga ládxi'da'ahuë' bönni' yúbölo?" ³⁰Huáca inná ca' nu na': "Channö guí'a-në' Dios: Xclenu', ni'a que lë na' rahua', ¿bízx que nu zegui neda' didza' ni'a que lë na' rahua'?" ³¹Channö bi gáguli' o bi guí'jali', o bítí'tës bi gunlí', guli'gún yúgu'të para gaca queë' Dios yöl-la' ba. ³²Biti' bi gunlí' le gun ga ila'chixi ila'nigui bönachi judío, en biti' gunlí' le gun ga ila'chixi ila'nigui bönachi biti' nácagaca judío, en biti' gunlí' le gun ga ila'chixi ila'nigui

bönachi queë' Dios. ³³Guli'gún ca runa' neda'. Ruí'i ládxa'a guna' le ila'yaza ládxi'gaca yúgu'të bönachi, en biti' ruí'i ládxa'a'a guna' le uzi'a xibé la' néda'sö, pero le ulu'zí' xibé ia'zica'rö bönachi para ulu'lágaca.

11 Guli'gún ca runa' neda', ca na' neda' ca' runa' ca benë' Cristo.

Le tunnu nigula lógaca bönachi queë' Cristo

²Runa' libí'ili' zxön, böchi' luzá'ado', tu' röjnética'sili' neda', en nazi' lu ná'ali' xibá budöda' lu ná'ali'. ³Na'a, ré'ënda' tséajni'ili' rinná bé'enë' Cristo yúgu'të bönni', ate' bönni' rinná bé'enë'-nu nigula, ate' Dios rinná bé'enë' Zxf'inë', Bönni' na' náquië' Cristo. ⁴Channö tu bönni' rulidzë' Dios, o ru'ë didza' uláz queë' Dios, en dxí'a icjé' xilu'ë, rucá'anë' Cristo cá'asö. ⁵Na'a, channö tu nigula rulídzanu Dios, o ru'ínu didza' uláz queë' Dios, en biti' bi zxoá ícjanu, rucá'ananu bönni' queénu cá'asö, en naca queénu ca naca queénu tu nigula narugu guitsa' ícjanu. ⁶Channö tu nigula cabí bi zxoá ícjanu, ral-la' irugu ca' guitsa' ícjanu. Channö gun ga utuí'ínu nigula na' channö nu chugu guitsa' ícjanu, ral-la' bi ixóa ícjanu. ⁷Tu bönni' biti' bi ral-la' udxí'a icjé' cate' ridxinë' lahuë' Dios, tu' náquië' ca naca cazë' Dios, ate' lë na' náquië' bönni' rulu'f'i lahui yöl-la' zxön queë' Dios, pero le nácanu nigula na' rulu'f'i lahui yöl-la' zxön queë' bönni' queénu. ⁸Cate' benë' Dios bönachi, biti' bubéajë' bönni' na' lu nigula. Nigula na', lu bönni' na' bubéajë'-nu. ⁹Lësca' caní, biti' benë' Dios bönni' para uzí'ínu xibé' nigula, pero benë' nigula para uzí'ë xibánu bönni'. ¹⁰Que lë ni na', nigula na' ral-la' ixóa ícjanu le rulu'f'i zoa nu rinná be'e lënu tu' tu'yúé' gubáz lá'ayi queë' Dios rë'u. ¹¹Na'a, lahuë' Xanru', tu bönni' riquinnë'-nu nigula queë', ate' nigula na' riquíninu-në' bönni' queénu.

¹² Ca na' benë' Dios, bubéajë'-nu nigula lu bönni', lësca' caní na'a, yúgu'të bönni' náljlengaquië'-nu nigula, ate' yúgu'të rirúaj lu në'ë Dios.

¹³ Bulí'chi'a bulí'soró' la' libí'isili'. ¿Naru' ral-la' ulídzanu-në' Dios tu nigula biti' bi xzoa ícjanu? ¹⁴ ¿Naru' cabí rusëdi libí'ili' yöl-la' nácatë quégaca bönachi, ral-la' utuf'inë' bönni' na' ru'ë lataj itunna guitsa' icjë'? ¹⁵ Na'a, channö natúnna guitsa' ícjanu tu nigula, naca yöl-la' lachi queénu, tu' bë'ë Dios queénu guitsa' ícjanu para usubín ícjanu. ¹⁶ Channö zoa nu gué'ëni tá'baga' didza' ni, canísö nazi' lu na'tu' runtu', en lébisö tun yugu' cö' bönachi queë' Dios.

**Bönachi Corinto tu'cá'ana
cá'asö le rë'aj ráguru' para
usubanru' ca gútië' Xanru'**

¹⁷ Biti' runa' libí'ili' bal ca naca le uzéajni'ida' libí'ili' na'a. Le runli' biti' run ga raca dxi'a queéli' cate' rudúbili' queë' Cristo, pero run ga raca queéli' le cabí naca dxi'a. ¹⁸ Risí lahua' ruzéajni'ida' libí'ili' lë ni ta'guíxjöi'i bönachi neda', ta'nná: "Cate' rudúbili' queë' Cristo, narúajli' choplö", ate' réajlë'a nadxi ca' naca caní. ¹⁹ Run bayudxi ila'cuá'alen libí'ili' nupa tu'sedi le cabí nácatë para ilaca bë' nupa nácgaca idú bönachi queë' Cristo. ²⁰ Que lë ni na', cate' rudúbili', lë na' ráguli' tsözxón biti' naca le rë'aj ráguru' para usubanru' ca gútië' Xanru'. ²¹ Caní naca, tu' runli' bayudxi tu tuli' ráguli' le nuá'ali' que queéli' cate' ráguli' tsözxón, ate' que lë ni na' ridunli' bál-lali', ate' ia'bál-lali' rë'aj ráguli' ga ridxintë rizúdxili'. ²² ¿Naru' cabí zoa lídxili' ga huáca guí'aj gáguli'? Ca na' runli', rucá'anali' bönachi queë' Dios cá'asö, en runli' ga tu'tuí' nupa biti' bi dë quéguequi. ¿Bizxi caz guía' libí'ili'? ¿Naru' guntsa' libí'ili' bal? Biti' ca' runa' libí'ili' bal ca naca lë ni runli'.

**Le rë'aj ráguru' para
usubanru' ca gútië' Xanru'**

²³ Xanru' caz budödë' lu na'a lë na' busédida' libí'ili', ca na' benë' Xanru' Jesús yëla ni' cate' nu budödi Lë' lu ná'agaquië' bönni' gulútië' Lë'. Gudélë'ë yöta xtila, ²⁴ en cate' budxi gudxë' Dios: "Xclenu'", buzuzxjë' le, en gunné': "Guli'gagu. Lë ni naca xipéla'a le nayuzxaj uláz queéli'. Guli'gún caní, para usubanli' ca gaca quia' neda'." ²⁵ Lësca' caní, gudödi gulahuë', gudélë'ë tu zxíga'do', en gunné': "Le yudzu zxíga'do' ni naca xichöna', le run tsutsu didza' cubi rucá'ana tsahui'. Guli'gún caní yúgu'të luzuí guí'jali' le, para usubanli' ca gaca quia' neda'." ²⁶ Caní gaca ga idxintë dza huödë' Xanru'. Yúgu'të luzuí gáguli' yöta xtila caní, en guí'jali' que le yudzu zxíga'do' caní, uluf'ili' lahui ca gútië' Xanru'.

**Ca ral-la' gunru' cate' guí'aj gáguru'
para usubanru' ca gútië' Xanru'**

²⁷ Que lë ni na', núti'tës nu gagu yöta xtila ni o guí'aj que le yudzu zxíga'do' ni queë' Xanru', en biti' run le bal, nabaga' xíguia' nu na', en run dul-la', tu' rucá'ana xipélë'ë Xanru', enca' xichönë' cá'asö. ²⁸ Que lë ni na', ral-la' uchi'a usöröru' la' cuínsiru' tu turu', ate' ní'irö huáca gáguru' yöta xtila ni, en guí'ajru' que le yudzu zxíga'do' ni. ²⁹ Núti'tës nu rë'aj ragu lë ni, en biti' run le bal tu' cabí réquibe'ë ruluf'i le guca queë' Xanru', rusubaga' cuini dul-la' ni'a que lë na' rë'aj ragu. ³⁰ Que lë ni na' te'e zían nupa dzága-gaca libí'ili', en ta'cuídi', ate' zianguequi chinátigaca. ³¹ La'tu' uchi'a usöröru' la' cuínsiru', biti' uchi'a usöröë' Xanru' rë'u. ³² Channö gun bayudxi uchi'a usöröë' Xanru' rë'u, usaca' zí'ë rë'u, para cabí irugu queëru' cate' ichúguië' quéguequi bönachi yödzüliö ilátigaca.

³³ Que lë ni na', böchi' luzá'ado', cate' udúbili' para gu'aj gáguli' para usub-anli' ca gútië' Xanru', guli'cöza luzá'ali'.
³⁴ Channö zoa nu ridún, ral-la' gagu nu na' ga naca lu yu'u lidxi, para cabí gun bayudxi uchi'a usöröë' Dios libí'ili' cate' udúbili'. Nacuá' ia'bal-la le runli', pero ucá'ana' tsahui' yugu' lë na' cate' uduyúa' libí'ili'.

Yugu' yöl-la' huáca runnë' queéru' Dios Bö' Lá'ayi

12 Na'a, böchi' luzá'ado', ré'enda' tséajni'ili' ca zeaj naca yöl-la' huáca runnë' queéru' Dios Bö' Lá'ayi.

² Nöz quezili' ca guca cate' ni' biti' réajlë'ënilí' Cristo, bé'ëli' lataj gula'ché' bönachi libí'ili' ga yúbölö. Guyéaj ládx-i'li' budó' guió'j budó' yaga, le cabí ta'n-né. ³ Que lë ni na', ruzéajni'ida' libí'ili' caní, rnní'a': Ladaj yúgu'të nupa tufi didza' uláz queë' Bö' Lá'ayi queë' Dios, cuntú nu gaca inné xihui' queë' Jesús, en nitúë' gaca inné: "Jesús náquië' Xanru'", channö cabí zóalenë' Dios Bö' Lá'ayi nu na'.

⁴ Na'a, nadzá'gaca tu tu le runnë' Dios Bö' Lá'ayi queéru', pero tuzë' náquië' Bö' Lá'ayi na'. ⁵ Lësca' caní, nadzá'gaca tu tu dxin rigu'ë Xanru' lu ná'aru', pero tuzë' náquië' Xanru' na'. ⁶ Nadzá'gaca ca' tu tu yöl-la' huáca náparu' le rúniru' xichinë' Dios, pero tuzë' náquië' Dios, Nu na' runna yöl-la' huáca na' queéru' para gunru' xichinë'. ⁷ Dios runnë' que queéru' tu le naca bë' náparu' yöl-la' huáca queë' Dios Bö' Lá'ayi, lë na' ruzí'iru' xibé yúgu'tëru'. ⁸ Dios Bö' Lá'ayi runödzjë' queë' tu bönni' yöl-la' huáca ru'ë didza' len yöl-la' rácada', ate' ia'túë' bönni', Lë cazë' Bö' Lá'ayi runödzjë' queë' yöl-la' huáca ru'ë didza' lu yöl-la' réajni'i. ⁹ Lësca' caní, Lë cazë' Dios Bö' Lá'ayi na' runödzjë' queë' ia'túë' bönni' yöl-la' réajlë' Cristo bi gunë', ate' ia'túë' bönni' runödzjë' queë' yöl-la' huáca ru'ünë'

nupa te'e. ¹⁰ Ia'túë' bönni' runödzjë' queë' yöl-la' huáca runë' yugu' yöl-la' huáca que yehua' yubá, ate' ia'túë' bönni' ru'ë lë' lataj ru'ë didza' uláz queë' Dios, ate' ia'túë' bönni' runödzjë' queë' yöl-la' huáca réquibe'enë' channö bö' dzaga nu bönni' nequi queë' Dios, o nequi que tu' xihui'. Runödzjë' queë' ia'túë' bönni' yöl-la' huáca ru'ë didza' yúbölö le cabí nazëdë', ate' queë' ia'túë' bönni' yöl-la' huáca rudödë' didza' yúbölö na' biti' nazëdë'. ¹¹ Yúgu'të lë ni runë' Lë cazë' Dios Bö' Lá'ayi, tu' runödzjë' que tu tu bönachi tsca ré'ëni quézinë'.

Yúgu'tëru' nácaru' ca tuz bönachi

¹² Ca na' naca tuz idútë le naca cázaru', sal-la' zían le nagudi' dzágalenru', ate' le zían na' nagudi' dzágalenru' nácacaga tuz idútë le naca cázaru', lësca' caní naca queë' Cristo. ¹³ Tu' zóalenë' Lë cazë' Dios Bö' Lá'ayi rë'u, lë ni naca queéru' ca tu le nadílaru' nisa, le naca bë' nácaru' ca tuz bönachi, sal-la' nácaru' yugu' bönni' judío, en yugu' bönni' zí'tu', enca' yugu' bönni' nadó'ogaquië', en yugu' bönni' biti' nadó'ogaquië'. Yúgu'tëru', Dios bë'ë rë'u lataj s'í'iru' le runödzja cazë' Bö' Lá'ayi.

¹⁴ Na'a, lu idútë le naca cázaru', zían le nagudi' dzágalenru', en calëga tuz. ¹⁵ La'tu' huáca güfi' didza' n'aru', huanná: "Tu' cabí naca' në'ë bönni', biti' néquida' queë'", didza' ni biti' gun ga biti' nequi queë' bönni' na'. ¹⁶ La'tu' huáca güfi' didza' nágaru', huanná: "Tu' cabí naca' guió'j lahuë', biti' néquida' queë' bönni' ni", didza' ni biti' gun ga biti' nequi queë' bönni' na'. ¹⁷ La'tu' naca guió'j loru' idútë le naca cázaru', ¿nacxi gaca yóniru'? La'tu' naca nágaru' idútë, ¿nacxi gaca ilé'e zxína'ru'? ¹⁸ Na'a, Dios nucu'ë yúgu'të le nagudi' dzágalenru' ca gú'uni quézinë' Lë'. ¹⁹ La'tu' naca tuz le nagudi' dzágalenru', bítirö soa idú ca naca cázaru'.

²⁰ Na'a, ca nácaru', zían le nagudi' dzá-galenru', pero tuz le nácaru'.

²¹ Que lè ni na', guió'j loru' biti' gaca gué ná'aru', inná: "Biti' riquinda' lí." Lësca' caní, ícjaru' biti' gaca gué n'aru', inná: "Biti' riquinda' libí'ili'."

²² Na'a, yugu' le nagudi' dzágalenru', lè na' réquiru' nácgacarö cudí'sö, lè ni naquíniröru'. ²³ Lësca' caní, yugu' le nagudi' dzágalenru', le réquiru' nácgacarö cá'asö, lè ni rugácuröru' dx-í'a, en yugu' le réquiru' biti' ral-la' ilá' lahui, rugácuröru' ca' dxi'a. ²⁴ Biti' run bayudxi gunru' caní que le ná-carö lachi que le néquiniru'. Dios bené idütè le naca cázaru', en bené' ga ná-carö lesaca' lè na' réquiru' rë'u nácarö cá'asö. ²⁵ Caní bené', ate' biti' narúaj-gaca choplö le nagudi' dzágalenru', tu' tun chi'i luzé'eguequi tu ia'tú. ²⁶ Channö gaca zi' tu le néquiniru', ilaca zi' tsözxón len le yúgu'tè le néquiniru' na', en channö tu le néquiniru' zoa bi ruzí' xibé, yúgu'tè le nagudi' dzágalenru' tu'z'í xibé tsözxón le.

²⁷ Na'a, libí'i cázali' dzágali' idütè le naca cazé' Cristo, ate' tu tuli' nácali' ca yugu' le nagudi' dzágalené'. ²⁸ Lësca' caní, ladaj bönachi queé' Cristo, Dios nucu'è nupa tun xichiné'.

Ga naca lo nucu'è yugu' bönni' gubáz queé' Cristo.

Ga naca buropi nucu'è yugu' bönni' tu'è didza' uláz queé'.

Ga bunní nucu'è yugu' bönni' tu'sédiné' luzá'aru'.

Ní'rö nucu'è nupa tun yugu' yöl-la' huáca que yehua' yubá.

Ní'rö nucu'è nupa tu'ún nupa te'e.

Ní'rö nucu'è nupa tácalen böchi' luzá'aru'.

Ní'rö nucu'è yugu' bönni' tu'lufiné' rë'u dxin gunru'.

Ní'rö nucu'è yugu' bönni' tu'è didza' yúbölö biti' nazédagaquié'.

²⁹ Calëga yúgu'tè' nácgagaquié' gubáz queé' Cristo.

Calëga yúgu'tè' tu'è didza' uláz queé' Dios.

Calëga yúgu'tè' tu'sédiné' luzá'aru'.

Calëga yúgu'tè' tuné' yugu' yöl-la' huáca que yehua' yubá.

³⁰ Calëga yúgu'tè' dë lu ná'agaquié' ulu'úné' nupa te'e.

Calëga yúgu'tè' tu'è didza' yúbölö biti' nazédagaquié'.

Calëga yúgu'tè' tu'dödé' didza' yúbölö biti' nazédagaquié'.

³¹ Guli'güí ládxi'li' cu'è Dios lu ná'ali' yugu' yöl-la' huáca na' nácgacarö lesaca'. Na'a, ulufí'ida' libí'ili' tu le nácarö lesaca' ca yúgu'tè lè ni.

Yöl-la' nadxí'i

13 Sal-la' gaca gu'a xtída'gaca bö-nachi le cabí nazëda', enca' xtída'gagaquié' gubáz lá'ayi queé' Dios, pero channö cabí nadxí'ida' luzá'a, didza' gu'a biti' gácarö lesaca' ca bö le run gui rucódxiru' o gué rutí-laru' luzé'e. ² Sal-la' nazí' lu na'a gu'a didza' uláz queé' Dios en tséajni'ida' yúgu'tè le nagachi', en yúgu'tè didza' réajni'i, en sal-la' naca idú ca réajlë'a Dios ga ridx-inté huáca cúa' yugu' gu'a, pero channö cabí nadxí'ida' luzá'a, biti' bi nazáca'a. ³ Sal-la' quísia' idütè le dë quia' para ugahua' yugu' bönachi yechi', en sal-la' udöda' idütè le naca' ga ulu'zegui bö-nachi le tu' réajlë'a Cristo, pero channö cabí nadxí'ida' luzá'a, biti' ca' uzi'a xibé lè na' runa'.

⁴ Nu bönni' nadxí'iné' luzé'ë, ribözé' zxön ladxi'.

Náquié' dxi'i ladxi', en biti' ruzxé'ené' luzé'ë.

Nadxí'iné' luzé'ë idú ládxi'ë.

Biti' run ba zxön cuiné', en biti' run cuiné' lo.

⁵ Biti' runé' le ruá' dö'.

Biti' rudúli'né' le dë queé'.

Biti' rilétenë', en biti' rönjenë' dö' gulufi bönachi queë'.

⁶ Biti' ca' rudzéjanë' cate' nu run le ruá' dö'.

Rudzéjanë' cate' nu run le naca idútë li.

⁷ Ruá' rilenë' bíti'tës bi gun luzé'ë queë'.

Réajlë'tica'së' luzé'ë.

Rúntica'së' löza gun luzé'ë le naca dxi'a.

Ribózatica'së' zxön ladxi'.

⁸ Bíti'rö tódi que yöl-la' nadxí'i. Huadódi que le dë lu ná'agaca bönachi ilufi didza' uláz queë' Dios. Huadxín dza cate' bíti'rö gata' lu ná'agaca bönachi ilufi didza' yúbölö le cabí nazédagaca, ate' huadódi que yöl-la' réajni' queguequi bönachi. ⁹ Láti'do'os réajni'iru' na'a, en láti'do'os ca' ruf'iru' didza' uláz queë' Dios. ¹⁰ Cate' idxín le naca idú, ní'irö údxi que lë na' naca láti'do'os.

¹¹ Cate' ni' naca' bí'ido', bë'a didza' ca bí'ido', en gulequi icja' ca bí'ido', en guzá' ládxa'a ca bí'ido'. Cate' bigula' bucá'ana' le nequi que bí'ida'ahua'.

¹² Na'a le rilé'eru' naca ca le rilé'eru' cate' ruyú cuinru' tu lu gufé dxílido'. Biti' rilé'eru' idú ca naca. Dza ní'irö ilé'eru' idú ca naca yúgu'të. Na'a núnbë'a láti'do'os. Dza ní'irö gúnbë'a yúgu'të ca na' Dios caz núnbë'ë neda'. ¹³ Na'a, nacua'ti-ca'sö yöl-la' réajlë' queéru' Dios, en yöl-la' run löza queéru' Dios, en yöl-la' nadxí'i queéru' luzá'aru'. Nacua' yonna ni, pero le naca lo naca yöl-la' nadxí'i.

Yugu' yöl-la' huáca runnë' queéru' Dios Bö' Lá'ayi

14 Guli'gún bayudxi idxí'ili' luzá'ali', en guli'güf ládxi'li' sí'ili' ca' yugu' yöl-la' huáca runnë' queéru' Dios Bö' Lá'ayi, en le naca lo, yöl-la' huáca güf'ili' didza' uláz queë' Dios. ² Nu rufi didza' yúbölö le cabí nazéda, calëga bönachi ruf'ilen didza' nu na'. Dios caz ruf'ilen didza' nu na', tu' cuntu nu zoa réajni'i didza' rufi nu na'. Dios Bö' Lá'ayi ru'ë

nu na' lataj rufi didza' ca ná'agaca le nagachi' queë' Dios. ³ Nu na' rufi didza' uláz queë' Dios, ruf'ilen bönachi didza' para gácarö idú ca ta'yéajlë' Cristo. Ruti'pa ládxi'guequi, en ruhué tsahui' léguequi. ⁴ Nu na' rufi didza' yúbölö le cabí nazéda run tsutsu la' cuinsi, pero nu rufi didza' uláz queë' Dios run tsutsu yúgu'të bönachi queë' Cristo.

⁵ Raca ládxa'a güf'ili' didza' yúbölö le cabí nazédali' yúgu'tëli', pero le naca lo, ré'ënda' güf'ili' didza' uláz queë' Dios. Ruzí'iröru' xibé nu rufi didza' uláz queë' Dios ca ruzí'iru' xibé nu rufi didza' yúbölö le cabí nazéda, channö cabí zoa nu udödi didza' yúbölö na' le cabí nazéda, para ilaca tsutsu bönachi queë' Cristo. ⁶ Que lë ni na', böchi' luzá'ado', cate' guída' ga zóali', channö güf'ilena' lib'ili' didza' yúbölö le cabí nazéda', biti' bi uzí'ili' xibé. Uzí'sili' xibé didza' na' güf'ilena' lib'ili' le nulu'inë' Dios neda', o didza' uzéajni'i rë'u, o didza' gu'a uláz queë' Dios, o le naca xibá queë'.

⁷ Lësca' caní raza que le ta'gú'u bö, yugu' le cabí nabángaca, ca naca gui rucódxiru', o ca naca guitarra. Channö cabí tul-la ca ral-la' ilún, ¿nacxi caz gúnbë'ëru' bízxilö le tul-la na', lë na' rul-la gui na', o guitarra na'? ⁸ Channö cabí cödxí ca ral-la' gun lúzuba' böa' na' ulidza rë'u lu gudil-la, ¿nuzxi caz upá cuini para tseaj lu gudil-la na'? ⁹ Lësca' caní raza queéli'. Channö len lúdxí'li' güf'ili' didza' le cabí taca bönachi, biti' ca' ila'yéajni'i didza' güf'ili'. Caní gaca, nítisö güf'ili' didza'. ¹⁰ Le nácatë nacua' zían didza' yúbölö tu'fí zían cö' bönachi izá'a lu yödzöliö ni, ate' nacua' bönachi ta'yéajni'i tu tu didza' na'. ¹¹ Na'a, channö cabí réajni'ida' didza' ru'ë tu bönni', gaca' ca tu bönni' zítu' lahuë' bönni' na' ru'ë didza', ate' bönni' na' ru'ë didza' gáquië' ca' lahua' neda' ca tu bönni' zítu'. ¹² Lësca' caní naca queéli'. Rufi-da' ládxi'li' sí'ili' yugu' le runnë' queéru'

Dios Bö' Lá'ayi. Que læ ni na', guli'güf lãdxi'li' s'f'ili' le ilún ga ilácarö tsutsu bö-nachi queë' Cristo.

¹³ Que læ ni na' ca', nu ru'f'i didza' yúbölö le cabí nazëda ral-la' ulidza Dios, en inabi Lë' gunnë' que yöl-la' huáca quixjö' le ré'ëni inná didza' na' ru'f'i nu na'. ¹⁴ Cate' rulidza'-në' Dios, channö ruá'a didza' yúbölö le cabí nazëda', lu bö' naca caza' rulidza'-në' Dios, pero tu' cabí réajni'ida' didza' ruá'a, lu yöl-la' réajni'i quia' bití' ruzi'a xibé didza' na' ruá'a. ¹⁵ ¿Nacxi caz ral-la' guna' channö? Ulidza'-në' Dios lu bö' naca caza', enca' lu yöl-la' réajni'i quia' ulidza'-në' Dios. Gul-la' yöl-la' ba lu bö' naca caza', enca' lu yöl-la' réajni'i quia' gul-la' yöl-la' ba. ¹⁶ Channö lu bö' naca cazu' rulidza lá'ayu'-në' Dios, ate' zoa ni' nu riyónisö, channö cabí réajni'i didza' ru'u, ¿nacxi caz gaca inná: "Ca' gaca", ni'a que didza' ru'u, rë'u-në' Dios: "Xclenu"?" ¹⁷ Nadxi ca' dxí'ado' ru'u didza', rë'u-në' Dios: "Xclenu." Channö cabí réajni'i didza' ru'u, bití' bi uzí' xibé nu na' riyóni. ¹⁸ Rea'-në' Dios: "Xclenu", tu' ru'f'ira' didza' yúbölö le cabí nazëda' ca yúgu'tëli'. ¹⁹ Lógaca bönachi queë' Dios guë'ënitëröda' gu'a gáyu'sö didza' le gaca ila'yéajni'i bönachi ca zían gayuá' didza' yúbölö le cabí nazëda', ate' cuntu nu gaca tséajni'i. Gaca usédida' ia'zica'rö bönachi tuzi channö ila'yéajni'i didza' gu'a.

²⁰ Böchi' luzá'ado', bití' gácali' ca bí'ido' ca naca le rizá' lãdxi'li'. Guli'gaca ca bí'ido' para cabí gunli' le ruá' dö', pero guli'gaca bönni' chinácagaca ca naca le rizá' lãdxi'li'. ²¹ Nazúaj lu guichi lá'ayi le rnna: "Len didza' yúbölö, en lu ruá'agaca bönachi izá'a güf'ilená' bönachi ni didza'. Sal-la' guna' caní, bití' ulu'zé nágagaca xtí'dza'a." ¿Caní rnnë' Xanru'! ²² Caní naca, Dios ru'ë rë'u lataj ru'f'iru' didza' yúbölö le cabí nazëdaru' para gaca tu le naca bë' lógaca bö-

nachi bití' ta'yéajlë', en calëga lógaca nupa ta'yéajlë' Cristo. Ru'ë rë'u lataj ru'f'iru' didza' uláz queë' Lë' le ulu'z'í' xibé nupa ta'yéajlë' Cristo, en calëga bönachi na' bití' ta'yéajlë'. ²³ Que læ ni na', cate' udúbili' tsözxón, yúgu'tëli' na' néquili' queë' Cristo, channö güf'ili' didza' yúbölö le cabí nazëdali' yúgu'tëli', ate' tsázagaca nupa nazëdagaca láti'do'os, o nupa bití' ta'yéajlë' Cristo, ¿naru' cabí ila'nná: "Nachixi ícjali'?" ²⁴ Na'a, channö yúgu'tëli' güf'ili' didza' uláz queë' Dios, ate' tsaz nu cabí réajlë' Cristo o nu nazëda láti'do'os, guéquibe'e nu na' nabaga' xíguia', ate' Dios uchi'a usöröë' lë'. Caní guéquibe'e nu na', tu' tseajni'i didza' güf'ili' yúgu'tëli'. ²⁵ Guéquibe'e ca naca le rizá' lãdxi' nu na', læ na' bigachi', ate' uzóa zxibi nu na', en tseaj lãdxi' Dios, ate' inná: "Le nácatë Dios zóalenë' libí'ili'."

Ca ral-la' gunru' ga rudúbiru' queë' Cristo

²⁶ Que læ ni na', böchi' luzá'ado', cate' rudúbili' queë' Cristo, rul-lë' tuë' bönni' dzáguië' libí'ili' tu salmo, ate' rusédinë' ia'túë' tu xibá, ate' ia'túë' riguíxjöi'inë' libí'ili' tu le buluf'inë' Dios læ', ate' ia'túë' ru'ë didza' yúbölö le cabí nazëdë', ate' ia'túë' rudödë' didza' yúbölö na' le cabí nazëdë'. Yúgu'të le gunli' ral-la' gaca le ulu'z'í' xibé nupa tu'dubi queë' Cristo. ²⁷ Cate' nacua' ni' nupa tu'f'i didza' yúbölö le cabí nazëdagaca, bití' ral-la' güf'ili' didza' caní zíanrö ca chopá tsónnasili'. Huáca gu'ë didza' tuzë' bönni' na', ate' tödi na' huáca gu'ë didza' ia'túë', pero run bayudxi soa nu udödi didza' yúbölö na' le bití' nazëdali'. ²⁸ Channö cuntu nu zoa nu gaca udödi didza' yúbölö na' le cabí nazëdali', nu na' ru'f'i didza' yúbölö le cabí nazëda ral-la' soa dxisö ga na' nudúbili', ate' huáca güf'ilen Dios didza' na' lu ícja lãdxi'-da'ahui. ²⁹ Lësca' caní, yugu' bönni' tu'ë

didza' uláz queë' Dios ral-la' ilu'ë didza' chopa tsónnasë', ate' ia'zica'rë' bönni' na' tu'ë didza' uláz queë' Dios ral-la' ulu'chi'a ulu'söröë' didza' ru'ë bönni' na'.³⁰ Channö Dios uluf'inë' tu bönni' rö'ë ni' le ré'ëni inná xtídzë'ë, ral-la' soa dxisö nu na' ru'í didza'.³¹ Yúgu'tëli' huáca giuf'ili' didza' uláz queë' Dios tu tuli' para izédali' yúgu'tëli', en idipa ládxi'li' ca' yúgu'tëli'.³² Yugu' bönni' tu'ë didza' uláz queë' Dios huáca ila'nná be'e cuíngaqië', en ila'cu'ë dxisö.³³ Calëga Dios nu run ga rutsársaru', tu' ré'ënë' Lë' gácaru' ba'a ládxi', ca na' runë' ga nacuá yúgu'të cö' bönachi queë' Cristo.

³⁴Ral-la' ila'cuá'anu dxisö nigula queé'li' ga na' rudúbili'. Biti' dë lu ná'agacanu iluf'inu didza' ni'. Ral-la' ila'cuá'anu nöxaj ca na' rinná bë' xibá queë' Dios.³⁵ Channö té'ëninu ila'yéajni'inu ia'lati', ral-la' ila'nábinu bönni' que queégacanu cate' ni' nacu'ë lídxigaquië'. Biti' ral-la' iluf'inu didza' yugu' nigula ga na' rudúbiru' queë' Dios.

³⁶¿Naru' réquitseli' bunödzejë' Dios xtídzë'ë lu ruá'ali' lib'isili'? ¿Naru' réquitseli' bidxín xtídzë'ë Dios queézili' lib'ili'?³⁷ Channö nu bönni' nús'tëë ládjali' réquinë' ru'ë didza' uláz queë' Dios, o réquinë' zóalenë' Dios Bö' Lá'ayi lë', bönni' ni ral-la' si' lu në'ë naca xibá queë' Xanru' le ruzúaja' queé'li' lu guichi ni.³⁸ Na'a, channö cabí ru'í ládxe'ë didza' ni, biti' güf'í ládxi'li'-në' bönni' na'.

³⁹Que lë ni na', böchi' luzá'ado', guli'güf' ládxi'li' güf'ili' didza' uláz queë' Dios, en biti' inná bé'eli' nu ru'í didza' yúbölö le cabí nazëda.⁴⁰ Ral-la' gunru' yúgu'të ca sa'yéaj, en lu yöl-la' ba'a ládxi'.

Bubanë' Cristo lu yöl-la' guti

15 Na'a, böchi' luzá'ado', riguf'xjöi'ida' lib'ili' ca naca didza' dxi'a na' bena' libán que ga zóali', lë na' guzxi' lu ná'ali', ate' run ga nácarö idú ca réa-

jlë'ëli' Cristo.² Ni'a que didza' ni uláli', channö gunli' ca rna didza' dxi'a na' bena' libán que ga zóali', channö le nácatë guyéajlë'ëli'-në' Cristo.

³Ga gusi lo budöda' lu ná'ali' le budödë' Dios lu na'a neda'. Caní rna: "Gútië' Cristo uláz queéru' tu' nabága'ru' dul-la'." Ca naca lë ni nazúaj lu guichi lá'ayi le rna ben bayudxi benë'.⁴ Rna ca: "Bigachë'ë yeru ba, en cate' bizá'a tsonna dza, bubanë' lu yöl-la' guti", ca na' nazúaj ca' lu guichi lá'ayi le rna ben bayudxi guca queë'.⁵ Gudödi ni' buluf'í lahuë' Cristo, ate' bilé'enë' Pedro Lë', en gudödi ni' idxínnutë' gubáz queë' bila'lë'enë' Lë'.⁶ Ní'irö buluf'í lahuë' lógaquië' zíanrö ca gayu' gáyu'ë böchi' luzá'aru' ta'yéajlë'ë Cristo, cate' ni' nudúbigaquië' tsözxón. La'tu'biqui' yúgu'të' böchi'ru' ni nacu'ë nabángaqië' na'a, sal-la' bal-lë' chinátigaquië'.⁷ Ní'irö Jacobo bilé'enë' Lë', en gudödi ni' buluf'í lahuë' lógaquië' yúgu'të bönni' gubáz queë'.

⁸Ga yöjsetë buluf'í lahuë' ca' lahua' neda'. Ca guca lë ni, naca' ca tu b'íido' gúljabí' cate' chigudödi dza ral-la' gáljabí'.⁹ Caní naca, tu' nácara' neda' cá'asö ca yúgu'të bönni' gubáz queë', en biti' naca' neda' lesaca' si' la' gubáz queë', tu' gudxía ládxa'a bönachi queë' Dios.¹⁰ Na'a, tu' buzá' ládxe'ë quia' Dios naca' le naca' na'a, en calëga nítisö buzá' ládxe'ë quia'. Béntëra' neda' xichinë' ca ia'zica'rë' gubáz queë', sal-la' calëga rácasö quia' bena' dxin na'. Dios caz, lu yöl-la' ruzá' ládxi' queë', bugunë' neda' dxin.¹¹ Na'a, channö bena' libán neda' o channö gulunë' libán ia'zica'rë' bönni', lë ni le runtu' libán que, en le guyéajlë'ëli' lib'ili'.

Ubanru' lu yöl-la' guti

¹²Runtu' libán queë' Cristo ca na' bubanë' lu yöl-la' guti. Channö caní naca, ¿nacxi caz naca, rnnali' bál-lali':

“Biti’ ulu’bán nupa chinátigaca”? ¹³La’-tu’ cabí ulu’bán nupa chinátigaca, biti’ bubanë’ Cristo, ¹⁴en la’tu’ cabí bubanë’ Cristo, nítisö naca le bentu’ libán que, en nítisö naca yöl-la’ réajlë’ queéli’ Lë’. ¹⁵Ia’stú, la’tu’ cabí bubanë’ Cristo, rizí yé’ëtu’ cate’ runtu’ ba nalí queë’ Dios, rnnatu’ busubanë’ Cristo, ate’ la’tu’ cabí usubanë’ nupa chinátigaca, Dios biti’ busubanë’ Cristo. ¹⁶La’tu’ cabí ulu’bán nupa chinátigaca, biti’ bubanë’ Cristo, ¹⁷en la’tu’ cabí bubanë’ Cristo, nítisö naca yöl-la’ réajlë’ queéli’ Lë’, ate’ nagá’anagaca dul-la’ nabága’li’. ¹⁸Lësca’ caní, nupa na’ chinátigaca, en gula’yéajlë’ Cristo, tsaz gulati channö cabí bubanë’ Lë’. ¹⁹Channö tsánnisö ni zóaru’ nabanru’ huáca uzí’iru’ xibé’ Cristo, ná-caröru’ bayechi’ ca yúgu’të bönachi.

²⁰Na’a, le nácatë bubanë’ Cristo lu yöl-la’ guti, en náquië’ nu gusí lo bubán tsaz ladaj yúgu’të nupa ulu’bán tsaz lu yöl-la’ guti. ²¹Ca na’ guyú’u yöl-la’ guti ni’a que le benë’ tuë’ bönni’, lësca’ caní, ni’a que le benë’ ia’tuë’ bönni’ guyú’u yöl-la’ rubán quégaca nupa chinátigaca. ²²Ca na’ tati yúgu’të bönachi tu’ náljlengaca Adán, lësca’ caní ulu’bán yúgu’të nupa na’ náljlengaca Cristo. ²³Tu tuë’ ubanë’ ca ral-la’ gaca. Zí’alö bubanë’ Cristo, ate’ tödi ni ulu’bán nupa néquiquequi queë’ Cristo cate’ huödë’. ²⁴Ní’irö idxín dza údxi cate’ ugúë’ Cristo idútë le dë lu në’e, en idútë yöl-la’ unná bë’, en idútë yöl-la’ huáca que tu’ xihuí’, ate’ udödë’ yöl-la’ unná bë’ queë’ lu në’e Dios Xuz. ²⁵Run bayudxi inná bë’e Cristo ga idxinrö dza chibenë’ Dios ga ulu’zechu zxíbi-gaca lahuë’ Lë’ yúgu’të nupa ta’dá’baga’ Lë’. ²⁶Le ridá’baga’ Lë’ le usunítie’ ga údxi naca yöl-la’ guti. ²⁷Dios chinudödë’ yúgu’të lu në’e Zxí’inë’ para inná bé’enë’ le. Nazúaj lu guichi lá’ayi, rna: “Budödë’ yúgu’të lu në’e para inná bé’enë’ le.” Na’a, naca bë’ biti’ budödi cuinë’ lu në’e Zxí’inë’, tu’ naca cazë’

Lë’ Nu rudödi yúgu’të lu në’e Zxí’inë’. ²⁸Cate’ idxín dza ni’ chinudödë’ Dios lu në’e Cristo yúgu’të para inná bé’enë’ le, ní’irö Lë’ cazë’ Zxí’inë’ udödi cuinë’ lu në’e Dios, Nu na’ budödi lu në’e Zxí’inë’ yúgu’të, ate’ ga údxi, Dios inná bé’enë’ tsaz yúgu’të.

²⁹Bál-lali’ ridí’lali’ nisa uláz quégaca nupa chinátigaca. Channö réquili’ biti’ ulu’bán nupa na’ chinátigaca, ¿bizx que ridí’lali’ nisa uláz quégaca nupa chinátigaca?

³⁰Zoa bönadxi queé’tu’ gátitu’ yúgu’të dza. ¿Bizx que ru’ítu’ lataj gaca caní channö cabí ubanru’ lu yöl-la’ guti? ³¹Yúgu’të dza zoa bönadxi gátia’. Riguí’xjöi’ida’ libí’ili’ lë ni, böchi’ luzá’ado’, tu’ raza ládxa’a le bena’. Caní naca tu’ bena’ ga réajlë’ëli’ Xanru’ Jesucristo. ³²Channö tu’ gú’unisida’ gudí’-lalena’ böa’ guixi’ sínia’ lu yödzö Éfeso, ¿bizxi caz uzi’a xibé? Channö cabí ulu’bán nupa chinátigaca, ral-la’ gunru’ ca ta’nná bönachi: “Gui’aj gáguru’ tu’ huátiru’ cuxó huidzaj.”

³³Biti’ güí’ili’ lataj nu si’ ye’e libí’ili’. Channö si’ lu ná’ali’ láti’do’os le cabí nácatë, idútëli’ huóacali’ chul-la niti. ³⁴Buli’b’í’i ládxi’li’, en biti’ gunlí’ dul-la’ tu’ cabí núnbë’ëli’-në’ Dios bál-lali’ libí’ili’. Rnnía’ caní para guna’ ga utuf’ili’.

Ca ilaca nupa ulu’bán lu yöl-la’ guti

³⁵Nadxi ca’ zoa nu inná: “¿Nacxi ulu’bán nupa chinátigaca? ¿Nacxi gaca idú ca náca’gaca cazë’ cate’ ulu’dxinë’?” ³⁶Li’, bönni’ biti’ bi nózinë’. Lë na’ rázu’ luyú’ biti’ ilén channö cabí initi. ³⁷Lë na’ rázu’ luyú’ naca tu xisédo’os, nadxi ca’ que zxoa’ xtila o que ia’tú guixi’ cuando’. Lë na’ rázu’ biti’ naca guixi’ cuando’ na’ ral-la’ ilén. ³⁸Dios runë’ ga gaca guixi’ cuando’ ca nun cazë’ que. Ca naca tu tu xisédo’ na’ runë’ ga gaca guixi’ cuando’ que. ³⁹Lësca’ caní, biti’ naca lébisö bëla’ que queégacaba’ yúgu’tëba’ böa’ guixi’.

Zoa tu bëla' quégaca bönachi, en ia'tú ca naca bëla' quégacaba' böa' guixi'. Ia'tú ca naca bëla' quégacaba' biguinni, en ia'tú ca naca bëla' quégacaba' böla. ⁴⁰Lësca' caní nadzá' idú ca nácgaca caz nupa nacua' yehua' yubá ca naca idú ca nácgaca caz nupa nacua' luyú ni. Zoa tu yöl-la' lachi quégaca nupa nacua' yehua' yubá, en ia'tú ca naca yöl-la' lachi quégaca nupa nacua' luyú ni. ⁴¹Zoa tu yöl-la' lachi que gubidza, en ia'tú que beo', en ia'tú quéguequi böljaj lúzxiba. Yöl-la' lachi que tu böljaj lúzxiba nadzá' ca naca yöl-la' lachi que ia'tú böljaj lúzxiba. ⁴²Lësca' caní gaca cate' ulu'bán nupa chinátigaca. Cate' rigachi' lu yeru ba naca tu bëla' initi. Cate' ubán, ní'irö gaca tu le soa tsaz. ⁴³Cate' rigachi' lu yeru ba naca tu bëla' cá'asö, en le nacuidi'. Cate' ubán, ní'irö gaca tu le lachi, en le nál-la. ⁴⁴Cate' rigachi' lu yeru ba naca tu bëla' que yödzölió ni. Cate' ubán, ní'irö gaca tu le soa tsaz yehua' yubá. Zoa tu bëla' que yödzölió ni, en ia'tú ca gaca le idzaga bö' naca cázaru'.

⁴⁵Nazúaj lu guichi lá'ayi le rnna: "Bönni' na' gusí lahué' zoé' luyú ni, lé' Adán, Dios bené' lé' bönni' ban", pero Bönni' na' guyázié' xilatjé' Adán, Lé' Cristo, Dios bené' ga náquié' Bö' nabániru'. ⁴⁶Biti' blé'è z'falö Bönni' na' náquié' Bö'. Bla' z'falö nu na' naca bönáchisö, ate' ní'irö blé'è Bönni' na' náquié' Bö'. ⁴⁷Bönni' ni' blé'è z'falö, gúquiné' yu. Bönni' na' blé'è burópilö, Nu na' naca Xanru', birúajé' yehua' yubá. ⁴⁸Nupa nacua' luyú ni nácgaca ca gúquié' bönni' na' gúquiné' yu, ate' nupa ral-la' tsöjcuá' yehua' yubá ilaca ca naca Nu na' birúaj yehua' yubá. ⁴⁹Ca na' na'a dë queéru' tu bëla' le naca ca guca bëla' queé' bönni' na' gúquiné' yu, lësca' ral-la' huöequiru' ca néquiné' Nu na' birúaj yehua' yubá.

⁵⁰Caní ré'eni inná lé ni rea' libí'ili', böchi' luzá'ado', rnniá': Le néquini bëla',

en rön biti' gaca tsaz ga ni' rinná bë'è Dios, en lësca' caní, lé na' initi biti' gaca ideli' lé na' soa tsaz. ⁵¹Buli'yút-söca', rea' libí'ili' tu le bigachi': Biti' gátiru' yúgu'téru', pero Dios utsé'è ca nácaru' yúgu'téru'. ⁵²Tsárido'os gaca, tsca naca tu le rutásö guió'j loru', cate' cödxí lúzuba' böa' le röjseté. Cödxí lúzuba' na', ate' ulu'bán nupa chinátigaca, en iléquini tu le soa tsaz, ate' Dios utsé'è le néquiniru' yúgu'téru'. ⁵³Lé na' nácaru' le riniti ral-la' huóaca le soa tsaz, ate' le néquiniru', lé na' ral-la' gati, huóaca tu le catu caz gati. ⁵⁴Cate' lé na' riniti chinuhuóaca le soa tsaz, enca' lé na' ral-la' gati chinuhuóaca le catu caz gati, ní'irö idxín lé na' nazúaj lu guichi lá'ayi, le rnna:

Nadúa tsaz yöl-la' guti.

Chibidéli'né' Cristo.

⁵⁵Bíti'rö inná be'e yöl-la' guti ré'u.

Bíti'rö gaca yöl-la' guti bi gun queéru'.

⁵⁶Huáca bi gun yöl-la' guti queéru' tu' nabága'ru' dul-la', ate' nabága'ru' dul-la' tu' ridá'baga'ru' xibá queé' Dios.

⁵⁷¡Xclené' Dios! ¡Lé cazé' runé' ga nuláru' lu yöl-la' guti ní'a que le bené' Xanru' Jesucristo!

⁵⁸Que lé ni na', böchi' luzá'ado', guli'sóa tsutsu. Guli'gaca idú ladxí'li', gúntica'sili' xichiné' Xanru' tu' nöz quézili' biti' runlí' nítisö xichiné' Xanru'.

Yugu' bönachi Corinto tu'nödzaj quégaquié' böchi'gaca ta'yádzjané'

16 Na'a, ca naca que dumí na' unödzjali', le gácalen böchi'ru' ta'yéajlé'è Cristo nacu'è Jerusalén, guli'gún na'a ca na' gunná bé'eda' yugu' cö' bönachi queé' Cristo, nacua' luyú Galacia. ²Yugu' dza domingo, tu tuli' ral-la' cú'uli' quez lati' dumí, tsca na' Dios runné' queéli'. Guli'gún chí' le, para cabí gun bayudxi bi utúbili' cate' idxina' ga zóali'. ³Cate' ní' idxina' ga zóali', isól-la'a Jerusalén bönni' na'

cöli' libí'ili'. Uzúaja' tu lu guichi le gun ga ilaca bé'gaquié', ate' ilu'ë dumí na' unódzjali'. ⁴Channö ral-la' tseja' ca' neda', tsójácalenë' neda'.

Le ré'ënë' gunë' Pablo

⁵Guída' ga zóali' cate' údxi töda' yugu' yödzo luyú Macedonia, tu' run bayudxi töda' yugu' yödzo na'. ⁶Réquida' ugá'analena' libí'ili' tu chí'i, o nadxi ca' ugá'ana' ni' yugu' beo' ziaga. Ní'irö huáca gácalenli' neda', ugú'uli' neda' nöza gátitës ga ral-la' tseja'. ⁷Cate' guída' uduyúa' libí'ili' bití ré'enda' tódisa' ni'. Runa' löza sóalena' libí'ili' xidzé, channö gunnë' Xanru' neda' lataj. ⁸Ugá'ana' ni lu yödzo Éfeso ga idxinrö dza Pentecostés ⁹tu' dë lataj ni guna' tu dxin zxön queë' Xanru', sal-la' zían nupa ta'dá'baga' neda'.

¹⁰Channö idxinbi' bi'i Timoteo ga na' zóali', guli'güf'i ládxi'li'-bi', para cabí ubi uguí'ibi' tsanni ni' sóalenbi' libí'ili', tu' runbi' xichinë' Xanru' ca na' runa' neda' xichinë'. ¹¹Que lë ni na', cuntú nu ral-la' uzóa lëbi' tsölá'alö. Guli'gácalen-bi', ugú'uli'-bi' nöza idú tsáhu'i'do', para udx-inbi' ga ni zoa' neda', tu' riböza'-bi' lëbi', enca' yugu' bóchi'ru' tünlenë'-bi' tsözxón dxin.

¹²Ca naca queë' bóchi'ru' Apolos, gúta'yua' lahuë' tsejë' tsöjyúë' libí'ili' tsözxón len yugu' bóchi'ru', pero bití ré'ënë' tsejë' na'a. Guídë' cate' séqui'në'.

Didza' ru'ë Pablo ga ruúdx

¹³Buli'subán ládxi'li', en guli'gaca tsutsu ca réajlë'ëli'-në' Cristo. Guli'gaca

ru'gu ladxi', en buli'tipa ládxi'li'. ¹⁴Len yöl-la' nadxí'i guli'gún bíti'tës bi gunli'.

¹⁵Na'a, böchi' luzá'ado', chinóz quézili' ca naca queë' Estéfanos, enca' quégaca dí'a dza queë'. Nácagaca nupa gula'sí lógaca ta'yéajlë' Cristo ladaj bönachi nacua' luyú Acaya. Bulu'dödi cuíngaquië' para ilunë' xichíngaca bönachi queë' Dios. ¹⁶Ráta'yua' loli', böchi' luzá'ado', gunli' bal nupa nácagaca ca bóchi'ru' na', enca' ca nácagaca nupa tunlen légaquië' tsözxón dxin, en tácalen légaquië'. ¹⁷Rudzéjada' tu' bila'dxinë' Estéfanos, en Fortunato, en Acaico ga zoa', tu' gúcalengaquië' neda' uláz queéli'. ¹⁸Bulu'hué tsáhuë'ë neda' ca na' bulu'hué tsáhuë'ë ca' libí'ili'. Guli'gún bal bönachi caní.

¹⁹Yugu' cö' bönachi queë' Dios luyú Asia ni tu'gapa Dios libí'ili'. Aquilo, en Priscila, enca' nupa tu'dubi queë' Dios ga naca lu yu'u lédxigaquië' tu'gapë' Dios libí'ili'. ²⁰Yúgu'të bóchi'ru' ni tu'gapë' Dios libí'ili'. Guli'gapa Dios tuli' ia'tuli', en unída'li' luzá'ali'.

²¹Neda', Pablo, len na' cuin caza' ruzúaja' lu guichi lë ni, rnní'a: Rugapa' Dios libí'ili'.

²²Nu bití nadxí'i Xanru' Jesucristo, chinabía dö' nu na'.

Gudá Xanru'.

²³Rinábida'-në' Xanru' Jesucristo uzá ládxe'ë queéli'. ²⁴Nadxí'ida' yúgu'tëli' tu' nácaru' tuz len Xanru' Jesucristo. ¡Ca' gaca!

DIDZA' BUROPI GUSÓL-LĚ'Ě PABLO YÖDZÖ CORINTO

Pablo rugapë' Dios bönachi queë' Cristo nacu'ë Corinto

1 Neda', Pablo, naca' gubáz queë' Jesucristo tu' ré'ënë' caní Dios. B'i böchi'ru' Timoteo runbi' neda' tsözxón. Rugapa' Dios lib'ili', rudúbili' queë' Dios lu yödzo Corinto, enca' yúgu'téli' néquili' quez queë' Dios luyú Acaya ga na' nababa Corinto. ²Rinábida'-në' Xúziru' Dios, en Xanru' Jesucristo uzá' ládxë'ë queéli', en gunë' ga soa dxi icja ládxi'do'oli'.

Yugu' le gud'i guzáquë'ë Pablo

³Yöl-la' ba Dios, Xuzë' Xanru' Jesucristo, tu' náquië' Xúziru', en ruhuéchi' ládxë'ë rë'u, en náquië' ca' Dios, Nu ruhué tsáhu'i'tica'sö rë'u! ⁴Dios ruhué tsáhuë'ë rë'u cate' raca bíti'tës bi raca queëru', para gaca huë tsáhu'ru' ca' nupa bi raca quéguequi. Ruhué tsáhu'ru' légaquië' ca na' Dios ruhué tsáhuë'ë rë'u.

⁵Tsca ta'yán le riguf'i rizáca'ru', ca na' gud'i guzáquë'ë Cristo, lësca' caní ta'yán le tu'hué tsahui' rë'u, tu' nácaru' tuz len Cristo. ⁶Que lë ni na', channö bi riguf'i rizáca'tu', raca caní queëtu' para gaca huë tsáhu'i'tu' lib'ili', en guntu' ga uláli'. Channö Dios ruhué tsáhuë'ë netu', raca caní para gaca huë tsáhu'i'tu' lib'ili', ate' lu yöl-la' riböza zxön ladxi' queéli', gaca guá' ilenli' yugu' le quí'í sáca'li', ca na' raca ca' queëtu'. ⁷Ruzxöni ládxi'tu'-në' Dios gúntica'së' ga gaca dxi'í'a queéli', tu' chinóztu' ca na' riguf'i rizáca'li' tsözxón len netu', lësca' caní ruz'ili' xibé tsözxón len netu' le ruhué tsáhuë'ë Dios rë'u.

⁸Ré'ënitü' inózili', böchi' luzá'ado', ca naca le zían le gulaca queëtu' luyú

Asia. Gudóditë bë' lë na' guca queëtu', ate' guca zítërö ca le guca guá' ilentu'. Ca' guca, bíti'rö bentu' löza sóatu' ibantu'. ⁹Gúquitu' guca queëtu' ca raca quégaquië' bönni' chinarugu quégaquië' ilátië'. Guca caní queëtu' para cabí uzxöni ládxi'tu' la' cuínsitu', pero uzxöni ládxi'tu'-në' Dios, Nu rusbán nupa chinátigaca. ¹⁰Dios busólë' netu' lu lë na' ben ga guzóa bönadxi gátitu', ate' rusólë' netu' yúgu'të dza. Runtu' löza usólë' Lë' netu' caní leyúbölö ¹¹channö gácalenli' netu', ulídzali'-në' Dios, en inábili'-në' gácalenë' netu'. Dios gunë' ca na' inábili'-në' tsözxón len bönachi zían, uzá' ládxë'ë queëtu', ate' ila'nná: "Xclenë' Dios" ni'a queëtu'.

Riguíxjö'ë Pablo bizx que ridzenë' idxinë' Corinto

¹²Lë ni le run ga rudzëjatu'. Bö' naca caztu' rulu'í netu', len yöl-la' ba'a ladxi' queëtu', en idú ládxi'tu' runtu' bi runtu' yödzülió ni, ate' caní bentu' ca' ga ni' zóali'. Caní bentu', tu' gúcalen netu' le buzá' ládxë'ë Dios queëtu', en calëga len yöl-la' réajni' queëztu' bentu' caní. ¹³Ruzúajstötu' queéli' lu guichi le gaca ulábalí, en le gaca tséajni'ili'. Raca ládxa'a tséajni'ili' idú ¹⁴lë na' réajni'ili' lati'. Ní'irö cate' idxin dza huödë' Xanru' Jesucristo, gaca gunli' netu' zxön ca na' netu' guntu' lib'ili' zxön.

¹⁵⁻¹⁶Tu' bena' löza lë ni, guzá' ládxa'a guída' ga zóali' zí'alö cate' gudöda' luyú Macedonia, ate' guída' ga zóali' leyúbölö cate' uzá'a ni para uz'ili' xibá' chopa luzuí. Tödi ni' huáca gácalenli' neda' ugú'uli' neda' nöza tseja' luyú Judea. Caní gú'unida' guna'. ¹⁷¿Naru' réquitseli' guzxi' yë'a tu' butsa'a ca guna? ¿Naru' réquitseli' lu yöl-la' bönáchisö quia' runa' le rizá'asö icja', en bé'ësa' ca' didza' cate' gunniá: "Caní guna"? ¹⁸Ni'a queë' Xanru' Dios, Nu run idútë ca rma xtídzë'ë, bití' bé'ësa' ca' didza'

cate' bé'lēna' libí'ili' xtídzě'ē Dios. ¹⁹ Jesucristo, Zxí'inē' Dios, Nu na' bentu' libán que ga zóali', neda' len Silvano, en Timoteo, biti' ru'isē' ca' didza'. Lē' ru'ē didza' idútē li. ²⁰ Cristo caz runē' ga naca idútē lōza yúgu'tē le guzxi' lu nē'ē Dios, ate' ni'a queē' Lē' gaca innaru': "Ca' gaca", para gaca queē' Dios yōl-la' ba. ²¹ Dios caz runē' ga runtu' lōza tsōzxon len libí'ili' néquiru' queē' Cristo, en budōdē' lu na'tu' dxin queē' runtu'. ²² Bennē' queēru' le naca bē' néquiru' queē', tu' guchiziē' icja lādxi'do'oru' Dios Bō' Lá'ayi, Nu naca queēru' le run ga naca lōza yúgu'tē le gunnē' Dios queēru'.

²³ Ni'a queē' Xanru' Dios, Nu nözi le rizá' lādxa'a, ruá'a didza' idútē li. Nőzinē' Lē' biti' bida' ga zóali' lu yōdzō Corinto, para cabí gun bayudxi guna' ga hu'ínili'.

²⁴ Biti' ré'ēnitu' inná bé'etu' libí'ili' ca réajlě'ēli' Cristo, tu' chinácali' tsutsu ca réajlě'ēli' Lē'. Ré'ēnitu' guntu' le gun ga udzeja lādxi'li'.

2 Que lē ni na' bē' lādxa'a cabí guí-datea' queéli' zí'alō, para cabí guna' ga hu'ínili'. ² Channō guna' neda' ga hu'ínili', ¿nuzxi caz gun ga udzējada' neda'? ¿Naru' guntsa' ga hu'ini nu ral-la' gun ga udzējada' neda'? ³ Que lē ni na' buzúaja' queéli' lu guichi zí'alō. Biti' gú'unida' guída' ga zóali', para cabí gunli' libí'ili' ga hu'ínida' neda', tu' ralla' gácali' libí'i cázali' le gun ga udzējada' neda'. Tu' ruzxonī lādxa'a libí'ili', nōzda' udzējali' yúgu'tēli' channō udzējada' neda'. ⁴ Cate' ni' buzúaja' queéli' lu guichi lē na', gusé'bide'e lādxa'a, en bu'ínide'e lādxa'a ga bidxintē gurōdxa'. Buzúaja' caní lu guichi, calēga para guna' ga hu'ínili', pero para inőzili' ca nadxí'ide'eda' libí'ili'.

Ral-la' uniti loru' nu ruá' dō' cate' rubí'i ladxi'

⁵ Channō zoē' tu bōnni' ni', bōnni' na' busuhuf'ininē' rē'u, calēga né-

da'sō busuhuf'ininē', pero huáca innaru' busuhuf'ininē' yúgu'tēli' libí'ili'. Rnnía': "Huaca innaru'", para cabí tōdi bē' ichugu bē'a queē' bōnni' na'. ⁶ Tscati' gaz xíguia' chibenli' lātu'biqui' yúgu'tēli' queē' bōnni' na'. ⁷ Na'a, ral-la' uniti loli' bōnni' na', en utípalí' lādxi'ē, para cabí tōdi bē' hu'íninē', en para cabí gaca tsaz chopa lādxi'ē. ⁸ Que lē ni na' rá-ta'yua' loli' gunli' le gaca bē' nadxí'ili-nē' idú lādxi'li'. ⁹ Que lē ni na' ca' buzúaja' queéli' lu guichi lē na'. Gú'unida' si' bē'a libí'ili' para inōzda' channō rúntica'sili' ca rnna xtídzā'a. ¹⁰ Cate' nu runiti loli' libí'ili', neda' ca' runiti lahua' nu na'. Cate' nu runiti lahua', channō bi ben nu na' runiti lahua', runa' caní uláz queē' Cristo para gaca bi uzí'ili' xibé. ¹¹ Caní runa', para cabí sequi' Satanás tu' xihui' ucúl-la rē'u, tu' chinóziru' yugu' le ré'ēni gun queēru'.

Gurō'ē bōniga Pablo lu yōdzō Troas

¹² Cate' bidxina' lu yōdzō Troas para guna' libán que didza' dxi'a queē' Cristo, bēnnadē'ē Xanru' neda' lataj guna' libán ni'. ¹³ Sal-la' guca caní, gurō'a bōniga tu' cabí yōjxáca'a-bi' bi'i bōchi'ru' Tito ni'. Que lē ni na' buzá'alēna' bōnachi ni', ate' guyija' luyú Macedonia.

Idéli'ru' tu' zóalenē' Cristo rē'u

¹⁴ ¿Xclenē' Dios! Richética'sē' rē'u ca tu le naca bē' bidéli'nē' Cristo yōl-la' rusölá queēru'. Dios rugunē' dxin rē'u para rulu'ē lahui ca gaca ilūnb'e bōnachi Cristo. Le nácaru' naca ca tu le rilá' zxihi, le riguisi gátitēs. ¹⁵ Nácaru' ca tu nōri rilá' zxihi, le ruzégui'ē Cristo lahuē' Dios, en le riguisiē' lógaca nupa nulá-gaca, en nupa nanítigaca. ¹⁶ Lógaca nupa na' nanítigaca nácaru' ca tu le rilá' siguti le naca bē' ilátitē. Lógaca nupa na' nulá-gaca nácaru' ca tu le rilá' zxihi le naca bē' ibántica'siru'. ¿Nuzxi caz naca lesaca' gaca que caní? ¹⁷ Biti' runtu' ca tun zían

bönachi, nupa tu'gún dxin xtídzë'è Dios ca tu le tuti', en to'o. Tu' nasól-lë'è Dios netu', idú ládxi'tu' ru'itu' didza' lahuë' Lë' tu' nácatu' tuz len Cristo.

Ca naca didza' le ruún rë'u tuz len Dios

3 ¿Naru' réquitseli' run ba zxön cuin-tu' cate' ru'itu' caní didza'? ¿Naru' runtsö bayudxi uluf'itu' lib'ili' tu guichi le rulu'fi le nácatu'? ¿Naru' ral-la' in-ábitu' lib'ili' gúnnali' queé'tu' tu guichi caní, ca na' tun bal-la bönachi? ²Lib'fi cázali' nácali' ca tu guichi le rulu'fi le nácatu', le nazúaj lu icja ládxi'do'otu', ate' yúgu'të bönachi gaca ulu'laba le, en tséajni'iguequi le. ³Le nácali' nalá' lahui ca tu guichi nuzúajë' Cristo, le gusól-lë'è lu na'tu'. Biti' nazúaj tu lu guichi, pero Bö' Lá'ayi queë' Dios ban nuzúajë' le, calëga tu lu guiójta'a, pero lu icja ládxi'do'oli' nuzúajë'.

⁴Ru'itu' caní didza' tu' ruzxöni ládxi'tu'-në' Dios tu' zóalenë' Cristo rë'u. ⁵Biti' réquitu' bi gaca guntu' rácasö queé'tu', pero Dios runnë' queé'tu' yöl-la' huáca bi guntu'. ⁶Dios caz bennë' queé'tu' yöl-la' huáca guntu' xichinë' lu didza' cubi na', le ruún rë'u tuz len Dios. Didza' ni biti' naca tu xibá nazúaj lu guichi, pero naca tu le nusédinë' Dios Bö' Lá'ayi rë'u. Xibá na' nazúaj lu guichisö richugu queéru' gátiru', pero Dios Bö' Lá'ayi nabániru'.

⁷Yugu' xibá queë' nazúajgaca lu guichi, Dios buzúajë' yugu' lu guiójta'a, ate' bulu'e lahui yöl-la' bení' queë' cate' budödë' le lu në'ë Moisés. Sal-la' gudödi que, guyépitëro yösa bení' lahuë' Moisés. Caní guca, bití' guca ulu'yú bönachi Israel lahuë' Moisés. Channö yöl-la' bení' caní yójtsaga xibá na', ate' xibá na' richugu quégaca bönachi ilátigaca, ⁸zxöntëro naca yöl-la' bení' na' dzaga yugu' le runë' Dios Bö' Lá'ayi. ⁹Yójtsaga yöl-la' bení'

lë na' ben ga narugu quégaca bönachi ilátigaca. Zxöntëro naca yöl-la' bení' que lë na' run ga rnnë' Dios nácatu' tsahui' bönachi. ¹⁰Tu' nácatëro lesaca' yöl-la' bení' na' nalá' lahui na'a, cuídi'sö nagá'ana yöl-la' bení' na' bilá' lahui cate' Dios bunödzejë' xibá queë' quégaca bönachi. ¹¹Channö guzóa yöl-la' bení' que lë na' guzóa tu ch'ido'osö, zxöntëro naca yöl-la' bení' que lë ni sóatica'sö.

¹²Tu' zoa lë ni runru' löza, ru'itu' didza' lu yöl-la' rugu ladxí'. ¹³Biti' runtu' ca benë' Moisés, bucache' lahuë' len tu lári'do', para cabí ulu'yú bönachi Israel yöl-la' bení' na' zeaj riniti. ¹⁴Gula'chulla gula'nítie' yugu' bönni' ni'. Ga ridxintë na'a dza cate' tu'labë' guichi que didza' gula na' le ruún bönachi tuz len Dios, naca tsca nagá'ana la' leze lári'do' na' lógaquie', lë na' gaca ugúë' tuzë' Cristo. ¹⁵Ga ridxintë na'a dza, cate' tu'labë' guichi ga na' nazúaj didza' queë' Moisés, zxa ca tu lári'do' guiój lógaquie' le run ga nachul-la nanítigaquie'. ¹⁶Cate' nu ruhuóaca queë' Xanru', rigúa lë na' run ga nachul-la naniti nu na'. ¹⁷Cate' ni rnnatu': "Xanru'", ru'itu' didza' queë' Dios Bö' Lá'ayi. Ga zoë' Bö' Lá'ayi queë' Xanru', ni' zoa caz yöl-la' nadzán. ¹⁸Yúgu'tëru' rë'u bití' bi nusayaj loru'. Nácaru' ca tu gufë dxili ga nalá' yöl-la' bení' que lahuë' Xanru', ate' yöl-la' bení' na' queë' Xanru', Nu naca Bö' Lá'ayi, rutsá' rë'u, en run ga zeaj rácaröru' ca náquie' Cristo caz, en ráta'rö queéru' yöl-la' bení' queë'.

4 Dios buéchi' ládxi'è netu', en budödë' lu na'tu' dxin ni runtu'. Que lë ni na' bití' raca chopa ládxi'tu'. ²Chibucá'anatu' le tun bönachi bagáchi'sö, en le tun ga rutuf'iru'. Cuntu nu rizí' yé'etu', en bití' rutsá'atu' xtídzë'è Dios. Tu' ru'itu' didza' que le naca idútë li, ru'fi ládxi'tu' guntu' le iléquibe'e yúgu'të bönachi naca dxi'a lahuë' Dios. ³Channö zoa nu

biti' réajni'ini didza' dxi'a runtu' ba nalí que, nácagacasö nupa nachul-la nanítigaca biti' ta'yéajni'i le. ⁴Biti' ta'yéajlë' bönachi na'. Ben tu' xihui' ga naca caní, nu na' nun cuini ca dios, en rinná be'e bönachi dza ni zóaru' na'a. Ben ga nachul-la nanítigaca, para cabí ila'lé'e bení que didza' dxi'a ca naca yöl-la' bení queé' Cristo, Nu na' naca idú ca náquië' Dios caz. ⁵Biti' runtu' libán que la' cuínsitu', pero runtu' libán queé' Jesucristo, en riguixj'ö'ötu' náquië' Xanru', ate' netu' ni nácatu' huen dxin queé'li' tu' nadxi'itu'-në' Jesús. ⁶Dios, Nu ben ga buzení bení ga ni' guca chul-la, náquië' Nu rigú'u bení icja ládxi'do'oru', le ruzéajni'i rë'u para gúnbë'ëru' yöl-la' bení queé' Dios, lë na' ruzení lahuë' Jesucristo.

Tu' réajlë'ëru' Dios runru' ca ré'ënë' Lë'

⁷Yöl-la' tsahui' ni yu'u icja ládxi'-do'oru' rë'u. Nácaru' ca yugu' yusu' yu, para gaca bë' nequi queé' Dios yöl-la' huáca zxön na', en calëga que cázaru'.

⁸Tu'saca' zi' bönachi netu', pero biti' rudú ládxi'tu'.

Ró'ötu' böniga, pero biti' raca chopá ládxi'tu'.

⁹Ta'bía ládxi' bönachi netu', pero biti' rubéaj ládxi'ë' Dios netu'.

Ta'zé'ede'e netu' yu, pero biti' tu'suniti netu'.

¹⁰Lu idú le naca caztu' rátitica'stu' tsözxön len Jesús,

na' naca bë' lu le naca caztu' nabánitu' Lë'.

¹¹Tsanni ni zóatu' nabantu', zóatica'sö bönadxi gátitu' tu' néquitu' queé' Jesús para gaca bë' nabánitu' Lë' lu le naca caztu' le riniti. ¹²Caní naca, zoa bönadxi queé'tu' gátitu', pero ni'a que lë ni rata' yöl-la' na'bán queé'li'.

¹³Nazúaj lu guichi lá'ayi le rnna: "Guyéajlë'a Dios, ate' que lë ni na' bë'a

didza'." Lësca' caní raca queé'tu', réajlë'ëtu' Dios, en que lë ni na' ruí'itu' didza'. ¹⁴Nöztu' ca gunë' Dios, Nu busubán Xanru' Jesús, usubanë' ca' netu' tsözxön len Jesús, en usudxinë' netu' tsözxön len libí'ili' lahuë' Lë'. ¹⁵Raca caní yúgu'të lë ni para gaca bi uzí'ili' xibé. Channö ila'deli' zianrö ca' bönachi le ruzá' ládxi'ë' Dios queé'ru', ila'nnë': "Xclenë' Dios", ate' gaca yöl-la' ba queé' Dios.

¹⁶Que lë ni na', biti' raca chopá ládxi'itu'. Sal-la' riniti idú le naca caztu', yúgu'të dza rucubë' Dios le nácatu' lu icja ládxi'do'otu'. ¹⁷Le cuídi'sö rigufi rizáca'ru' ni tu chí'ido'osö run ga gata' queé'ru' le uzí'da'aru' xibé le sóatica'sö, en le nácatëro lesaca' ca gaca gúnbë'ëru'. ¹⁸Biti' ruí' ládxi'ru' le rilé'ëru' luyú ni, pero le biti' gaca ilé'ëru' ruí' ládxi'ru'. Lë na' rilé'ëru', tu chí'ido'osö zoa, pero le cabí gaca ilé'ëru' sóatica'sö.

5 Nóziru' cate' initi idútë le naca cázaru', le naca ca tu yu'u lári'do' yödzölió ni, Dios chinupé'ë tu le cubi queé'ru', le naca ca tu yu'u le zoa tsaz ni' yehua' yubá, lë na' nun cazë' Lë'. ²Que lë ni na' rinné ládxi'ru' tu' ré'ëni'ru' tsú'uru' le cubi ni', lë na' naca ca tu lídxi'ru' ni' yehua' yubá. ³Tsú'uru' le cubi ni' ca na' rácuru' tu lari', para cabí sóaru' ga biti' zoa idútë le naca cázaru'. ⁴Tsanni ni zóaru' lu idútë le naca cázaru', le naca ca tu yu'u lári'do', rinné ládxi'ru' lu yöl-la' risëbi ládxi' queé'ru'. Biti' runru' caní tu' ré'ëni'ru' ucá'anaru' idútë le naca cázaru', pero ré'ëni'ru' tsú'uru' tsaz le cubi ni'. Caní gaca, ucá'anaru' idútë le naca cázaru' le riniti, ate' tsú'uru' lu yöl-la' na'bán idú. ⁵Dios chinupé'ë yúgu'të lë ni queé'ru', ate' guchízië' rë'u Dios Bö' Lá'ayi, Nu naca queé'ru' le naca bë' naca löza sí'iru' lë na' nupé'ë queé'ru'.

⁶Que lë ni na' nadipa ládxi'ru'. Tsanni ni yú'uru' lu le naca cázaru', nóziru' zóaru' zi'tu' ga zoa lídxië' Xanru'. ⁷Run-

ru' ca runru' tu' réajlë'ëru'-në' Dios, en calëga tu' zoa bi rilë'ëru'. ⁸Tu' runru' löza lë ni, ré'ëniuru' ucá'anaru' le naca cázaru' ni para tsöjsóalenru'-në' Xanru'. ⁹Que lë ni na' ru'í'í ládxi'ru' gunru' le raza ládxi'ë Xanru', channö ugá'anaru' lu idütë le naca cázaru' ni, o channö tsöjsóalenru'-në' Xanru' ni'. ¹⁰Caní runru' tu' run bayudxi idxinru' yúgu'tëru' lahuë' Cristo ga ni' rö'ë ruchi'a rusöróë'. Ní'irö ubi'ë que queëru' tsa naca le benru' tsanni ni yú'uru' lu le naca cázaru', channö benru' le naca dxi'a o le cabí naca dxi'a.

Le ruún rë'u tuz len Dios

¹¹Que lë ni na', tu' rádxitu'-në' Dios, ru'í'í ládxi'tu' uzéajni'itu' bönachi. Nóz-inë' Dios ca naca le yu'u icja ládxi'-do'otu', ate' ruzxöni ládxa'a nózili' dxi'a ca' libí'ili' lë na' yu'u icja ládxi'-do'otu'. ¹²Biti' rubéaj cuintu' dxi'a loli'. Ré'ënitü' gata' lataj queéli' gunli' netu' bal, para gaca ubí'ili' didza', bi guiéli' yugu' bönni' tun ba zxön cuíngaquië' ca na' tu'lu'isö lahui cuíngaquië', en calëga ca nácaquië' lu icja ládxi'do'gaquië'. ¹³Channö nachixi ícjavu', naca para gaca yöl-la' ba queë' Dios, en channö cabí nachixi ícjavu', naca para gaca bi uzí'ili' xibé. ¹⁴Run bayudxi bi guntu' tu' nadxi'inë' Cristo rë'u, tu' chinöziru' tuz Nu guti uláz quegaca yúgu'të bönachi, en que lë ni na' naca quegaca yúgu'të bönachi tsa nátilengaca Lë' tsözxón. ¹⁵Lë' gútië' uláz quegaca yúgu'të bönachi para cabirö ilunë' bönni' nabán-gaquië' le nequi quegacasë', pero le nequi que Nu na' guti uláz quegaquië', en bubán lu yöl-la' guti. ¹⁶Que lë ni na', bíti'rö gúnbë'ëtu' bönachi tsa naca le nalá'gaca láhui'lö, en sal-la' canísö bën'bë'ëtu'-në' Cristo, bitü' nún'bë'ëtu'-në' caní na'a. ¹⁷Channö nuhuóaca nútü'tës bönachi tuz len Cristo, chinaca bönachi

cubi nu na'. Chigudödi que le gulaca zí'alö, ate' chinucúbigaca yúgu'të.

¹⁸Yúgu'të lë ni nunë' Dios, Nu bun rë'u tuz len Lë' lu në'ë Cristo, en budödë' lu na'tu' guntu' libán ca gaca ulu'huóaca yúgu'të bönachi tuz len Lë'. ¹⁹Libán runtu' rna caní: "Dios guzóalenë' Cristo, en benë' ga gaca ulu'huóaca bönachi yödzülió ni tuz len Lë', en bitü' röj-nenë' dul-la' gula'baga'." Budödë' lu na'tu' didza' dxi'a ni, ca gaca ulu'huóaca bönachi tuz len Dios. ²⁰Na'a, nácatu' gubáz queë' Cristo, en raca na'a ca Dios caz ráta'yue' loli' lu rú'atu' netu'. Que lë ni na' ráta'yutu' loli' uláz queë' Cristo, guli'huóaca tuz len Dios. ²¹Cristo bitü' bi dul-la' benë', pero Dios budödë' Lë' ca tu bönni' dul-la' uláz queëru', para gata' queëru' lataj gácaru' tsahui' ca náquië' Dios caz tu' nácaru' tuz len Cristo.

6 Tu' runtu' dxin tsözxón len Dios, rá-ta'yutu' loli', rnatu': Bitü' udödili' cá'asö le ruzá' ládxi'ë Dios queéli'. ²Nazúaj lu guichi lá'ayi ca gunné' Dios le rna:

Tu dza buzá' ládxa'a quiu', biyönda' li', ate' dza bena' ga gaca uló', gúcalena' li'.

¡Buli'yútsöca! ¡Na'a naca dza ruzá' ládxi'ë queëru'! ¡Na'a naca dza gaca uláru'!

³Bitü' ré'ënitü' bi guntu' le gun ga nu ichixi inigui, para cabí soa nu ucá'ana cá'asö dxin ni runtu'. ⁴Ni'a que bíti'tës bi runtu', ru'í'í ládxi'tu' gaca bë' nácatu' huen dxin queë' Dios. Que lë ni na', len yöl-la' riböza zxön ladxí' ruá' rilentu' yugu' le riguí'í rizáca'tu', en yugu' le riyadzaj queëtu', en yugu' le tun ga ró'ötu' böniga. ⁵Caní bentu' sal-la' gula'zé'ede'e bönachi netu' yu, en gula'gu'ë netu' lidxi guíë, en gula'bía di'í netu'. Gudödi bë' bentu' dxin, en bitü' guta' lataj queëtu' gásitu' o bi gágutu'. ⁶Bë' ládxi'tu' gaca bë' nácatu' huen dxin queë' Dios. Guca bë' lë ni:

Tu' nácatu' ba'a ladxi', en tu' nápatu' yöl-la' réajni'i,

en tu' riböztu' zxön ladxi', en tu' nácatu' dxi'i ladxi',

en tu' zóalenë' Dios Bö' Lá'ayi netu', en tu' naca idú ca nadxi'itu' luzá'atu'.

⁷ Ruí'itu' didza' idútë li, ate' zóalen netu' yöl-la' huáca queë' Dios. Le naca tsahui' naca ca tu le rudí'initu' lu gudil-la, enca' le run chi'i netu' lu gudil-la na'.

⁸ Nacuá' nupa tun netu' bal, enca' nupa tu'zóa netu' tsólá'alö.

Nacuá' nupa tu'lidza ditaj netu', enca' nupa tu'lidza tsahui' netu'.

Sal-la' ta'nná bönachi rizi' yé'ëtu', ruí'itu' didza' idútë li.

⁹ Sal-la' nacuá' bönachi biti' núnbë'-gaquië' netu',

nacuá' ca' nupa núnbë'gaca netu'.

Ridatu' ga zoa bönadxi gátitu', pero ni zóatu' nabantu'.

Tunë' netu' xíguia', pero biti' tutië' netu'.

¹⁰ Tu'suhu'ini netu', pero rudzéjatica'stu'.

Nácatu' bönni' yechi', pero runtu' ga rata' yöl-la' tsahui' idú quégaca bönachi zían.

Sal-la' biti' bi dë queëtu', nequi queëtu' yúgu'të le dë.

¹¹ Idú ládxi'tu' ruí'ilentu' libí'ili' didza', böchi' luzá'ado', zóali' Corinto. Buluí'itu' libí'ili' ca ruí' ládxi'da'tu' libí'ili'.

¹² Channö cabí nácaru' tuz biti' naca tu' cabí ruí' ládxi'tu' libí'ili', pero libí' cázali' biti' ruí' ládxi'li' netu'. ¹³ Na'a, ruí'ilena' libí'ili' didza' ca runë' tu bönni' ruí'ilenë'-bi' zxi'inë' didza', rnnía': Buli'bf'i queëtu' ca rúnlentu' libí'ili'. Guli'güü' ladxi' netu'.

Nácaru' ca tu yudo' ga yu'ë Dios ban

¹⁴ Biti' gácali' tuz len bönachi biti' ta'yéajlë'.

¿Nacxi gácatsö ilaca tuz le naca tsahui', en le cabí naca tsahui'?

¿Nacxi gácatsö ilaca tuz le naca chul-la, en le naca bení'?

¹⁵ ¿Nacxi gácatsö ilácagaquië' tuz Cristo, en Satanás, tu' xihui'?

¿Nacxi gácatsö ilácagaquië' tuz tu bönni' réajlë'ë Cristo, en tu bönni' biti' réajlë'ë?

¹⁶ ¿Nacxi gácatsö ilaca tuz yudo' queë' Dios, en budó' guió'j budó' yaga?

Libí' cázali' nácali' ca tu yudo' ga yu'ë Dios ban. Ca naca lë ni, Dios caz gunné': Sóalena' légaquië', en tálena' légaquië'. Gaca' Dios quégaquië', ate' légaquië' iláquië' bönachi quia'.

¹⁷ Que lë ni na', gunné' ca' caní:

Guli'rúaj ládjagaquië', en buli'lá'alén légaquië'.

Rnnë' Xanru': "Biti' gútsa'li' le ruá' dö', ate' si' lu na'a libí'ili'.

¹⁸ Neda' gaca' xuz cázali', ate' libí'ili' gácali' zxi'ina', bönni', en nigula."

Caní rnnë' Xanru', Nu napa caz idútë yöl-la' huáca.

7 Böchi' luzá'ado', néquiguequi queëru' yugu' lë ni guzxi' lu në'ë Dios. Que lë ni na' ral-la' un cuinru' dxi'a, en ubéajru' yúgu'të le rucá'ana cá'asö idútë le naca cázaru', en bö' naca cázaru'. Lu yöl-la' radxi queëru' Dios ral-la' guéquiru' quez queë' Lë'.

Ca bulu'bf'i ládxi'gaca nupa ta'yéajlë' Cristo

² Guli'sí' lu ná'alí' netu'.

Cuntu nu biá'atu' dö' que, nu dzaga libí'ili'.

Cuntu nu bentu' ga ichixi inigui.

Cuntu nu guzxi' yé'etu'.

³ Ruá'a caní didza', calëga para usubá-ga'a libí'ili' xíguia', pero naca ca na' chigunnía' zí'alö, rnnía': Zoa' sina' ibánlena' libí'ili' o gátilena' libí'ili' tu' ruí' ládxa'a libí'ili'. ⁴ Ruzxónida' ládxa'a libí'ili', en rúnda'a libí'ili' zxön. Sal-la' zían le riguí' rizáca'tu', nadípada' ládxa'a, en rudzé-jade'e ládxa'a.

⁵ Cate' bidxintu' luyú Macedonia, ga ridxintë na'a dza, biti' rata' queétu' lataj uzi' ládxi'tu', pero zían le taca queétu'. Ta'díl-lalen bönachi netu', ate' lu icja ládxi'do'otu' yú'ugaca le tun ga rádx-itu'. ⁶ Ní'irö Dios, Nu rutipa ladxí' nu chizóa gaca chopa ladxí', butipë' ládxi'-tu' cate' budxinbi' bi'i Tito ga guzóatu'. ⁷ Biti' gúcasö tu' budxinbi' queétu', pero tu' gudíxjöi'ibi' ca' netu' ca na' libí'ili' butípali' ládxi'bi'. Gudíxjöi'ibi' netu' ca na' ré'ëni'de'eli' ulé'eli' neda', en ca na' ruhu'ínili' ni'a que lë na' guca ni', enca' ca ru'í ládxi'li' neda'. Yúgu'të lë ni ben ga rudzeja ládxa'a.

⁸ Sal-la' le buzúaja' queéli' lu guichi zí'alö ben ga bufínili', biti' ruhu'índa' na'a. Zí'alö bufínida' cate' gúquibe'eda' ben ga bufínili' libí'ili' tu chf'ido', ⁹ pero na'a rudzëjada', calëga tu' bufínili', pero tu' ben yöl-la' ruhu'íni queéli' na' ga bubí'i ládxi'li'. Dios bugunë' dxin yöl-la' ruhu'íni queéli', para cabí ichixi iníguili' ni'a que le bentu' netu'. ¹⁰ Yöl-la' ruhu'íni na' rugunë' dxin Dios run ga nu ubí'i ladxí' para ulá nu na', ate' que lë ni na' biti' ral-la' hu'íniru' que. Yöl-la' ruhu'íni le naca que yödzóliö ni run ga ilátigaca bönachi. ¹¹ Bulí'yútsöca' ca bugunë' Dios dxin yöl-la' ruhu'íni queéli' na'.

Ben ga ru'í ládxi'li'-në' Dios.

Ben ga gú'unili' urúajli' dxi'a.

Ben ga guléli' nu na' ben dul-la'.

Ben ga rádxili'-në' Dios.

Ben ga bë' ládxi'li' gunli' ca rnna xtídzë'ë Dios.

Ben ga nadxf'ili'-në' Dios idú ládxi'li'.

Ben ga gú'unili' gunli' xíguia' nu na' ben dul-la'.

Benli' le naca bë' biti' bi dul-la' nabága'li' ni'a que lë na' guca.

¹² Que lë ni na', sal-la' buzúaja' caní lu guichi na', biti' guca ni'a que nu na' ben dul-la', en calëga ni'a que nu na' gudí'i guxzaca', pero para gaca bë' lahuë' Dios

le nácatë ru'í ládxi'li' netu'. ¹³ ¡Lë ni bu-tipa ládxi'tu'! Calégasö bidipa ládxi'tu', pero rudzëjade'e ládxi'tu' tu' rudzëjabí bi'i Tito ni'a que le benli' libí'ili', tu' butípali' ládxi'bi'.

¹⁴ Bena' libí'ili' zxön lobi' Tito, ate' biti' benli' ga utuf'ida'. Bë'lentica'stu' libí'ili' didza' idütë li, ate' lësca' caní naca idütë li didza' bë'lentu'-bi' Tito cate' bentu' libí'ili' bal. ¹⁵ Zeaj rácarö idú ca nadxf'ibi' bi'i Tito libí'ili' cate' røjnebi' ca na' benli' ca rnna xtídzatu', en ca na' benli'-bi' bal lu yöl-la' radxi Dios queéli' en lu yöl-la' nöxaj ladxí' queéli'. ¹⁶ Rudzëjade'eda' tu' gaca uzxöni ládxa'a libí'ili' idú ládxa'a.

Ca ral-la' unödzej nu réajlë' Cristo le dë que

8 Na'a, böchi' luzá'ado', ré'ënitú' quíxjöi'itu' libí'ili' ca naca le buzá' ládxi'ë Dios quégaca yugu' cö' bönachi queé' Cristo luyú Macedonia. ² Sal-la' yenni' gula'gu'í gula'záquië' lu yugu' le guxzí' bë' légaquië', bulu'dzëjade'enë', en idú ládxi'gaquië' bulu'nódzjadë'ë sal-la' nácaquië' bönachi yechi'. ³ Neda' runa' ba nalí quégaquië', idú ládxi'gaquië' bulu'nódzjadë'ë tsa gula'zéquí'në', en bulu'nódzjarë' tsa gula'zéquí'në'. ⁴ Gula'nábide'enë' netu', en guláta'yudë'ë lotu' güf'itu' légaquië' lataj tsözxón len netu' ilácalenë' bóchi'ru' ta'yéajlë'ë Cristo. ⁵ Gulunrë' ca guqui ícjavu' ilunë'. Bulu'dödi cúngaquië' zí'alö lu në'ë Xanru', enca' lu na'tu' netu', le naca le raza ládxi'ë Dios. ⁶ Que lë ni na' gunábitu'-bi' bi'i Tito údxi gunbi' xichinbi' ga ni' zóali', en utúbibi' dumí runódzjali' lu yöl-la' dxi'i ladxí' queéli', ca na' gusí lobi' benbi' zí'alö. ⁷ Nácali' lo ca naca yúgu'të le runli', ca réajlë'ëli' Cristo, en ca réajni'ili', en ca ruzéajni'ili' bönachi,

en ca ru'í ládxi'li' luzá'ali',
enca' ca nadxf'ili' netu'.
Lësca' caní ral-la' gácali' lo ca gácalenli'
luzá'ali', lu yöl-la' dxi'i ladxi' queéli' bi
unódzjali' quégaquië'.

⁸ Biti' rinná bé'eda' lib'íli' gunli' caní.
Ruá'a didza' ca tun ia'zica'rö bönachi,
tu'nödzej idú ládxi'gaca, para guna' ga
gunli' le gaca bë' naca idú ca nadxf'ili'
luzá'ali'. ⁹ Nöz quézili' le buzá' ládxi'ë
Xanru' Jesucristo queéru'.
Bilé'enë' yöl-la' tsahui'
pero para gácalenë' lib'íli'
böáquië' yechi'
para gata' queéli' yöl-la' tsahui',
tu' gúquië' Lë' yechi'.

¹⁰ Caní runi neda': Dxi'arö gaca queéli'
údxí gunli' lë na' gusí loli' runli' chiguca
tu iz. Gúcali' lo, calégasö ca bunódzjali',
pero lësca' ca gú'unili' unódzjali'. ¹¹ Na'a,
idú ládxi'li' buli'siyudxi gunli' lë na' gusí
loli' runli', idú ládxi'li' bunódzjali'. Bu-
li'nödzej na'a tsca séqui'li'. ¹² Channö
ré'enili' bi unódzjali', Dios runë' bal le
runódzjali' tsca naca le dësö queéli'. Biti'
rinabë' unódzjaröli' tsca le dësö queéli'.

¹³ Biti' ré'enda' guna' ga unódzjali' le
gácalen ia'zica'rö bönachi ga idxintë
yadzaj queéli'. ¹⁴ Ré'enda' gaca tuz ca dë
queéli', en quégaquië'. Na'a dëda' queéli'
le gaca unódzjali' para bi gata' qué-
gaca nupa ni' riyadzaj quéguequi. Ní'irö
cate' bi yadzaj queéli', légaquië' huáca
bi ulu'nödzejë' queéli' para caní gaca tuz
ca dë queéli', en quégaquië' yúgu'tëli'.
¹⁵ Lësca' caní nazúaj lu guichi lá'ayi le
rnna: "Nu na' butúbida', bití' bugá'ana
que, ate' nu na' butubi láti'do'os, bití'
biyadzaj que."

Ca runbi' bi'i Tito, enca' nupa dzágagaca lëbi'

¹⁶ ¡Xlenë' Dios, tu' benë' Lë' ga ru'í
ládxi'bi' bi'i Tito lib'íli', ca na' ru'í ládxi-
a'a neda' lib'íli'! ¹⁷ Calégasö runbi' ca
rnna xtídza'a bi rinábida'-bi', pero tu'

ru'í ladxi' cázabi' lib'íli', rácasö queébi'
gú'unibi' tsöyubi' lib'íli'.

¹⁸ Risól-la'tu'-në' tsözxón len lëbi'
bóchi'ru' na' tun lë' bal yúgu'të cö
bönachi queë' Cristo, tu' runë' dxi'a dxin
que didza' dxi'a. ¹⁹ Ia'stú, gula'bó yugu'
cö' bönachi queë' Cristo bönni' ni, para
tséajlenë' tsözxón netu' guá'atu' lë na'
runódzjali', para gaca yöl-la' ba queë'
Xanru', en gaca bë' ca' ru'í ládxi'ru'
luzá'aru' ta'yéajlë'ë Cristo. ²⁰ Caní gaca,
gunë' netu' tsözxón para cuntu nu bi
gaca innë' queétu', ca rúnlentu' dumí
na' runódzjada'ali', le gácalen bönachi
yechi'. ²¹ Ru'í ládxi'tu' guntu' le naca
dxi'a, calégasö lahuë' Xanru', pero lësca'
lógaca bönachi.

²² Risól-la'tu'-në' ca' ia'túë' bóchi'ru'
tsözxón len légaquië', ate' zían luzuí
guzxi' bé'ëtu' lë', ate' naca bë' ré'ënë'
gácalenë' rë'u idú ládxi'ë. Ia'stú, tu'
ruzxöni ládxi'ë lib'íli', ré'ënitëronë' ca'
gácalenë' rë'u lu dxin ni. ²³ Channö nu
bi inaba ca nácabi' bi'i Tito, nácabi'
luzá'a, rúnlenbi' neda' tsözxón dxin para
gácalentu' lib'íli'. Channö nu bi inaba
ca nácagaquië' ia'zica'rë' bóchi'ru' na',
nasól-la'gaca yugu' cö' bönachi queë'
Cristo légaquië', ate' tunë' ga gaca yöl-la'
ba queë' Cristo. ²⁴ Guli'gún ga gaca bë'
nadxf'ili' légaquië' para iléquibe'e yugu'
cö' bönachi queë' Cristo runli' caní, en
ila'nözi naca idütë li didza' dxi'a ru'ítu'
ca naca queéli'.

Ca naca dumí rutúbiru' le gácalen yugu' bóchi'ru'

9 Ca naca le runódzjali' quégaquië'
bóchi'ru' ta'yéajlë'ë Cristo, bití' run
bayudxi uzúaja' queéli' lu guichi ni.
² Chinözda' ca ré'ënili' gunli' lë ni, ate'
ruá'a didza' lógaca bönachi ta'yéajlë'
Cristo luyú Macedonia ni ca naca le dx-
i'a runli'. Riguíxjöi'ida' légaquië' ca naca
queéli', zóali' luyú Acaya, chiguca tu iz
chizóa gunli' lë ni, ate' tu' ru'í ládxi'li'

gunli' lè ni, bidipa láchxi'gaca lá'tu'biqui' yúgu'tè bönachi ni ta'yéajlè Cristo. ³Na'a, risól-la'a yugu' bóchi'ru' ni queéli' para gaca bè' naca idútè li didza' ru'itu' ca naca queéli', ate' naca ca na' chigun-ní'a' queéli', chizó'a gunli' lè na' gácalen yugu' luzá'aru'. ⁴Channö ila'zá'alen bal-la bönachi Macedonia ta'yéajlè Cristo neda' tsözxón, ate' gaca bè' biti' zuñi gunli' lè na', n'irö utuf'itu' tu' buzxóni láchxi'tu' lib'ili', ate' lib'i cázali' ca' ral-la' utuf'ili'. ⁵Que lè ni na' gúquida' ral-la' isól-la'a yugu' bóchi'ru' ni para ila'dxinè' ga zóali' z'f'alò ca neda', ate' ilácalenè' lib'ili' para udxi utúbili' lè na' guzxi' lu ná'ali' unódzjali'. Caní gaca, údxi utúbili' dumí na' z'f'alò ca idxina', ate' gaca bè' runódzjali' tu' ré'eni cázali', en calèga tu' rinná bé'etu' lib'ili' bi unódzjali'.

⁶Guli'tsöjné lè na' rnna:

Nu raza ruzóa láti'do'os, láti'do'os ca' uzí'.

Nu raza ruzóa sizxóni, sizxóni ca' uzí'.

⁷Tu tuli' ral-la' unódzjali' tsca na' chin-uzóali' icja láchxi'do'oli', en calèga lu yöl-la' ruhu'ini queéli' o tu' run bayudxi, tu' nadxi'inè' Dios nu runódzaj idú láchxi'.

⁸Dios gaca gúnnadè'è queéli' ca riquínili' para gata' queéli' yúgu'tè lè na' riquínili', ate' ugá'ana queéli' para gaca gácalenli' nu bi riyadzaj que. ⁹Lësca' caní nazúaj lu guichi lá'ayi le rnna:

Idú láchxè'è bunödzejè' quégaca bönachi yechi'.

Naca bé'tica'sö yöl-la' dxi'i láchxi' queè'.

¹⁰Dios, Nu runna queéru' bi gaz uzóaru', enca' bi gu'aj gáguru', gunnè' ca' queéli' bi unódzjali', le naca ca lè na' nu raza ruzóa, en gunè' ca' ga ila'yán le ilápali' le nátagaca yugu' le dxi'a runli'. ¹¹Dios gunè' ga gáta'da' queéli' yöl-la' tsahui' para gaca unódzjada'ali'. Caní gaca, yugu' le unódzjali', lè na' quísi-tu' uláz queéli', gun ga ila'nná bönachi zían: "Xclenè' Dios." ¹²Lè na' runódz-jali' le gácalen yugu' bóchi'ru', calégasó

güf'i quégaquiè' le ta'yádzjanè', pero gun ga ila'nnè': "Xclenè' Dios." ¹³Cate' gunli' caní, ila'gu'è Dios yöl-la' ba tu' gaca bè' runli' ca rnna didza' dxi'a queè' Cristo ca na' rnna'li' runli'. Ila'gu'è Lè' yöl-la' ba ca', tu' nácali' dxi'i láchxi', runódzjali' quégaquiè', enca' quégaca ia'zica'rö bönachi. ¹⁴Ulu'lidzè' Dios, en ila'nábinè' Lè' gácalenè' lib'ili' tu' nadxi'igequinè' lib'ili' ni'a que le buzá' láchxi'dè'è Dios queéli'. ¹⁵¡Xclenè' Dios, bennè' tu le ná-cada' lesaca' queéli'!

Yöl-la' unná bè' dè lu nè'è Pablo

10 Ta'nná bönachi naca' nöxaj láchxi' cate' zóalena' lib'ili', pero cate' zoa' zi'tu' ga zóali' naca' rugu láchxi' ca ruzúaja' lu guichi. Tu' náquiè' nöxaj láchxi', en dxi'i láchxi' Cristo, neda', Pablo, ráta'yua' loli' ²cabí gunli' ga gun bayudxi gaca' rugu láchxi' len lib'ili' cate' idxina' ga zóali'. Chizóa gaca' rugu láchxi' len nupa ni' ta'nná runtu' dxin ni lu yöl-la' bönáchisö queétu'. ³Le nácatè nácatu' bönachi, pero calèga rácasö queétu' runtu' xichinè' Dios. ⁴Yugu' le rud'initu' lu gudil-la, biti' nátagaca ca le tu'd'f'ini bönachi yödzülió ni lu gudil-la, pero yugu' le rud'initu' lu gudil-la nátagaca yöl-la' huáca queè' Dios, le ruguntu' dxin para usunítitu' le nál-lagaca que tu' xihui'.

⁵Rusunítitu' yugu' didza' biti' nácatè le tu'zxóni láchxi'gaca bönachi, en yúgu'tè le tun ga tun ba zxón cuínguequi, en le tun ga cabí ilunbè' Dios. Runtu' ga gaca ila'nná bé'enè' yúgu'tè le ta'zá' láchxi'gaquiè', lè na' tun ga ta'dá'baguè'è Dios, ate' runtu' ca' ga tunè' ca rnnè' Cristo. ⁶Tödi gunli' le gaca bè' naca idú ca runli' ca rnna xtídzè'è Cristo, sóatu' sina' guntu' xíguia' yúgu'tè nupa ni' ta'dá'baga' xtídzè'è.

⁷Ruyuli' le nalá' láchuisö. Channö réquinè' nu bönni' dzáguie' lib'ili' néquinè' queè' Cristo, ral-la' guéquibe'enè' ca' lè ni: Ca na' lè

néquiné' queé' Cristo, lésca' caní netu' néquitu' queé' Cristo. ⁸Biti' ca' rutu'ida' sal-la' gudödi bē' ben ba zxön cuina' ca naca yöl-la' unná bē' budödē' Xanru' lu na'tu'. Lē na' dē lu na'tu' naca para guntu' ga gácarö idú ca réajl'ēli' Cristo, en calēga para usunítitu' lib'íli'. ⁹Biti' ré'ēnda' guéquili' ré'ēnda' gun gádxida' lib'íli' ni'a que le ruzúaja' queéli' lu guichi ni. ¹⁰Nacuá' ni' nupa ilá'nná: "Yugu' le ruzúajē' Pablo queéru' lu guichi, rulidza zi'ē rē'u, en ralē' didza', pero cate' zóalenē' rē'u runē' nōxaj ladxi', en didza' gúlado' ru'ē." ¹¹Nu na' ru'í caní didza' ral-la' guéquibe'e lē ni: Ca na' nácatu' cate' bi ruzúajtu' queéli' lu guichi tsanni ni zóatu' zi'tu' ga zóali', gácatu' ca' lu le guntu' cate' ni' sóalentu' lib'íli'.

¹²Le nácatē bití' nácatu' rugu ladxi' para innatu' nácatu' lēbi ca nácgaca nupa ni' tun ba zxön cúnguequi. Nácgaca nupa ni' yugu' bōnni' bití' bi nōzguequiné'. Lu le ta'za'sō lādxi'gaquié' tu'zōé' ca ral-la' ilaca bōnachi, en tu'chi'a tu'söróē' la' légacasē' tsca naca lē na' ta'za'sō lādxi'gaquié'. ¹³Netu' bití' gunrō ba zxön cuintu' ca ral-la' guntu', pero ca nácatē dxin budödē' Dios lu na'tu', ate' lu dxin ni, ral-la' guntu' le ga ni' zóali' lib'íli'. ¹⁴Channō budödē' Dios lu na'tu' dxin guntu' ga zóali', bití' ca' gudödi bē'ētū' ca bentu' cate' bidxintu' ga zóali', en bentu' libán que didza' dxi'a ga na' zóali'. ¹⁵Bití' run ba zxön cuintu' ca naca dxin núngaca ia'zica'rō bōnachi, pero ca nácasō dxin na' budödē' Dios lu na'tu'. Runtu' löza gácarö idú ca réajl'ēli' Cristo para gaca guntu' dxin ga zóali' le nácarö lesaca', tsca naca le budödē' Dios lu na'tu' guntu'. ¹⁶Ní'irō gaca guntu' libán que didza' dxi'a ga nacué' yōdzō dzō' zí'tu'rō ga zóali'. Caní gaca, bití' gun bayudxi gun ba zxön cuintu' ni'a que dxin núngaca ia'zica'rō bōnachi, lē na' budödē' Dios lu né'eguequi.

¹⁷Nazúaj lu guichi lá'ayi le rnna: Nu ré'ēni bi gun zxön, le ben cazē' Xanru' ral-la' gun zxön.

¹⁸Nurúajē' dxi'a tu bōnni' cate' rnnē' Xanru' nurúajē' dxi'a, en calēga cate' ru'ē caní didza' bōnni' na' que la' cuinsē'.

Ca nácgauquié' Pablo, en bōnni' tun cúngauquié' gubáz queé' Cristo

11 Ré'ēnda' guá' ilenli' neda' tsanni ni gu'a didza' lu yöl-la' bití' bi nōzi quia'. Buli'sá' lādxi'li' quia'. ²Ru'í lādxa'a lib'íli' ca na' Dios caz ru'í lādxi'ē lib'íli', tu' nácali' ca nácabi' tubi' bi'i nigula ra'bando', naca idú lādxi'i'bi', rusudxina'-bi' lahué' Cristo para ut-saga ná'aleni' Lē cazē'. ³Rádxida' idxín queéli' nu si' ye'e lib'íli', en gun ga usanli' ca nadxi'ili'-nē' Cristo idú lādxi'li', ca na' guca queénu Eva, nigula queé' Adán, cate' guzxi' ye'e Satanás tu' xihui' lēnu lu yöl-la' sina' que. ⁴Caní rnnía' tu' idú lādxi'li' ru'íli' nu za' queéli' lataj, en run libán que xibá queé' Jesús, le nadzá' ca naca xibá na' bentu' netu' libán que, ate' rizí' lu ná'ali' tu bö', en tu didza' dxi'a le nadzá'gaca ca nácgaca Bō' Lá'ayi na', en didza' dxi'a na' guzxi' lu ná'ali' lu na'tu' netu'. ⁵Réquida' bití' nácara' cuídi'sō ca nácgauquié' bōnni' ni' nácatērogaquié' lo, ate' réquili' nácgauquié' gubáz queé' Cristo. ⁶Nadxi ca' naca' cuídi'sō ca ruá'a didza', pero bití' naca' cuídi'sō ca naca yöl-la' réajni'i napa'. Zián luzuí, en zián ca buluf'itu' lib'íli' ca naca yöl-la' réajni'i nápatu'.

⁷Nadxi ca' bití' naca dxi'a tu le bena', bití' bi buquizxa' lib'íli' cate' bena' libán ga zóali' que didza' dxi'a. Ben cuina' cá'asō, ate' bena' ga gúcali' lib'íli' zxön. ⁸Buguna' dxin le nequi quéguequi ia'zica'rō cō' bōnachi queé' Cristo, tu' guzxi'a dumí bulu'nōdzjē' légaquié' quia' para guca bena' dxin ga zóali' lib'íli'. ⁹Cate' guzóalena' lib'íli', en biyadzaj quia', bití' busaca' zí'a nituli' lib'íli', pero lē na'

biyadzaj quia', gulunnë quia' bóchi'ru' bila'ruájë' luyú Macedonia, en bila'dxinë' ga zoa'. Catu caz busaca' zi'a libí'ili', ate' la' lébisö ca guna'. ¹⁰Ni'a que le naca idútë li queë' Cristo le zóalen neda', biti' soa' dxisö, gun ba zxon cuina' ca naca lë ni idú luyú Acaya. ¹¹¿Naru' réquitseli' rnní'a caní tu' cabí nadx'ida' libí'ili'? Nózinë' Dios nadx'ida' libí'ili'.

¹²Gúntica'sa' ca runa' na'a, para cabí gata' quégaquië' lataj ilún ba zxon cuín-gaquië' bönni' ni' ta'nnasë' náca-gaquië' gubáz queë' Cristo, en ta'nné' tunë' xich-inë' Lë' ca runtú' netú'. ¹³Biti' ca' náca-gaquië' gubáz nasól-lë'ë Cristo. Ta'z'f yë'ë ca naca dxin tunë', en tun cuín-gacasë' gubáz queë' Cristo. ¹⁴Biti' ral-la' ubániru' ca tunë' bönni' na'. Lës-ca' Satanás caz, tu' xihui', rulu'fi cuini ca tu gubáz lá'ayi queë' Dios, ridé' lu bení'. ¹⁵Que lë ni na' biti' ral-la' ubániru' channö yugu' huen dxin que tu' xihui' na' tu'luf'í cuín-gaquië' ca nupa tun xichini Nu na' naca tsahui'. Udxí quégaquië' ca sa'yéaj le tunë'.

Yugu' le gud'í guz'áquë'ë Pablo

¹⁶Leyúbölö rea' libí'ili': Cuntu nu ral-la' guequi nachixi icja'. Channö réquili' nachixi icja', guli'güü' neda' lataj gu'a didza' ca tu bönni' nachixi icjé', para gun ba zxon cuina' tu ch'ido'. ¹⁷Didza' ni ruá'a biti' naca le rinná bë'ë Xanru', pero ruá'a didza' ca tu bönni' nachixi icjé', run ba zxon cuina'. ¹⁸Nacu'ë zían bönni' tun ba zxon cuín-gaquië' ca náca-gaca le tunë' lu yöl-la' bönáchisö qué-gaquië'. Que lë ni na', neda' ca' gun ba zxon cuina'. ¹⁹Tu' réquili' rácada'ali', idú ládx'i'li' ru'ili' lataj ilu'ë didza' yugu' bönni' nachixi ícjagaquië'. ²⁰Ru'ili' ca' lataj nu gun libí'ili' bönni' nadó'ogaca, o nu cúa le dë queéli', o nu inná be'e libí'ili', o nu ucá'ana libí'ili' cá'asö, o nu capa' rú'ali'. ²¹Rutu'ida' rnní'a lë ni: Biti'

bentu' caní queéli' tu' gudödi bë' gúcatu' nöxaj ladxi'.

Channö zoa nu naca rugu ladxi' para gun ba zxon cuini, neda' ca' gaca' rugu ladxi', en gu'a didza' ca tu bönni' nachixi icjé'.

²²¿Naru' náca-gaquië' bönni' hebreo?

Lësca' naca' neda'.

¿Naru' náca-gaquië' bönni' Israel?

Lësca' naca' neda'.

¿Naru' náca-gaquië' zxf'ini xi'sóë'

Abraham?

Lësca' naca' neda'.

²³¿Naru' náca-gaquië' huen dxin queë' Cristo?

Lësca' nácatëra' neda'.

(Na'a ruá'a didza' ca tu bönni' nachixi icjé' cate' rnní'a caní.)

Béntëra' dxin ca gulunë' légaquië'.

Guyu'a lidxi guíë zíanrö luzuí ca gula'yu'ë légaquië'.

Gula'zé'eda' neda' yu bönachi zíanrö luzuí ca guca quégaquië'.

Guzóa bönadxi gátia' zíanrö luzuí ca guzóa quégaquië'.

²⁴Gayu' luzuí yugu' bönni' judío gula'guínë' neda' guídi.

Tu tu luzuí na' gula'guínë' neda' chënna uruá' luzuí.

²⁵Tsonna luzuí gula'guínë' neda' gubá'ayi.

Tu luzuí bulu'ladxë' neda' guiój.

Tsonna luzuí guzóa' tu lë'e barco le guca ditaj, en bötaj lu nísado'.

Tu luzuí guzóa' idú tu yëla, en tu dza lu nisa que nísado'.

²⁶Zían luzuí cate' ni' yu'a nöza,

gudöda' gapa guzóa bönadxi quia' yugu' lu yegu,

en gapa guzóa bönadxi quia' lu ná-a-gaquië' gubán,

en gapa guzóa bönadxi quia' lu ná-a-gaquië' bönni' uládz quia',

en gapa guzóa bönadxi quia' lu ná-a-gaquië' bönni' zi'tu',

en gapa guzóa bönadxi quia' lu yödzö,

en gapa guzóa bönadxi quia' lu lataj cá'asö,
 en gapa guzóa bönadxi quia' lu nísado',
 en gapa guzóa bönadxi quia' lu ná'agaquié' bönni' ta'z'í yé'è, ta'nné' nácagaquié' bóchi'ru' ta'yéajlè'è Cristo.

²⁷ Bena' dxin zi'i, en gudú ládxa'a.

Zián luzuí biti' guta' quia' lataj gásia'.

Guduna', en gubidxa' nisa.

Zián luzuí biti' guta' quia' bi gahua', o ga utsé'e cuina', o lari' gácua'.

²⁸ Ia'stú, yúgu'tè dza ruúbi ruguf'ida' tu' ruf'ida' ládxa'a yúgu'tè cö' bönachi queé' Cristo. ²⁹ Cate' nu ricuidi', neda' ca' ricuídi'da'. Cate' nu run ga ichixi in-íguinè' tu bóchi'ru', rileda' nu run caní.

³⁰ Channö run bayudxi gun ba zxön cuina', gun ba zxön cuina' ca naca le nácagaca bè' ricuídi'da'. ³¹ ¡Dios, Xuzé' Xanru' Jesucristo, gácativa'sö queé' yöl-la' ba! ¡Lé' nózinè' ru'áa didza' idútè li!

³² Cate' ni' guzóa' lu yödzo Damasco, bönni' ni' guta' lu në'è uláz queé' bönni' rinná bè'è, lé' Aretas, bucu'é yugu' bönni' gula'bó' nísíe' para ila'zönè' neda', ³³ pero yugu' bóchi'ru' ni' bulu'dödè' neda' tu ga ra'a bení' que yu'u, yu'a tu ga'böra zxön, en bulu'zötjè' neda' nílö lu zö'ö run chi'i yödzo na'. Caní guca, bulá' lu ná'agaquié' bönni' ni' gula'bó' nísíe' neda'.

Yugu' le buluí'inè' Dios Pablo

12 Le nácatè biti' ral-la' gun ba zxön cuina'. Sal-la' caní naca, na'a gu'a didza' ca nácagaca le buluí'inè' Xanru' neda', en le buzéajni'inè' neda'. ² Núnbè'a-nè' tu bönni' réajlè'è Cristo, chiguca chidá' iz zoa nu guché' lé' yehua' yubá. Biti' nözda' channö guyijè' ni' lu idútè le naca cazè', o lu bó' naca cazè'. Tuzé' Dios nózinè'. ³ Nözda' guyáz-iè' lataj lachi queé' Dios, nazí'i le paraíso. Biti' nözda' channö guyijè' ni' lu idútè le naca cazè', o cabí. Tuzé' Dios nózinè'.

⁴ Tsanni ni' zoé' ga na', biyönnè' le tun ga nu rubani, yugu' le biti' dè' lataj nu güf'i didza' que. ⁵ Bönni' ni huáca guna' lé' zxön, pero biti' gun ba zxön cuina'. Tuz gun ba zxön cuina' tu' ricuídi'da'. ⁶ La-tu' gué'énida' gun ba zxön cuina', biti' gaca' bönni' biti' bi nózinè', channö in-nía' le naca idútè li. Na'a, biti' gun ba zxön cuina' tu' cabí ré'ènda' nu gunró neda' bal tsca le bilé'e bena' neda', o tsca naca didza' biyóni bè'a neda'.

⁷ Ní'rö, para cabí tódi bè' gun ba zxön cuina' tu' bilé'eda' lé' na' tun ga nu rubani, Dios buzóé' tu hué' lu xipéla'a le riláda' ca rilá ga riné' tu yótsi'. Hué' na' guca ca tu le bugún dxin tu' xihui', para busaca' zi' neda'. Caní guca quia' para cabí tódi bè' gun ba zxön cuina'. ⁸ Tsonna luzuí gúta'yua' lahué' Xanru', en gunábida' Lé' ugúé' xihué'a na'. ⁹ Xanru' gudxé' neda': "Nácatè quiu' le ruzá' ládxa'a quiu'. Uzí'tèru' xibé le ruzá' ládxa'a quiu' cate' ricuídi'nu'." Que lé' ni na', rudzèjade'eda' tu' ricuídi'da'. Tu' raca caní quia', rácalentèrö yöl-la' huáca queé' Cristo neda'. ¹⁰ Que lé' ni na', tu' nadxí'ida'-nè' Cristo, rudzèjada' cate' ricuídi'da', en cate' nu rulidza neda' zi', en cate' bi riyadzaj quia', en cate' nu ribía ladxí' neda', en cate' bi raca quia'. Cate' nacuídi'da', nápatèrö caza' yöl-la' huáca queé' Lé'.

Pablo ruí'i ládxe'è bönachi queé' Cristo nacúa' Corinto

¹¹ Naca' tu bönni' biti' bi nózinè' tu' bè'a didza' ca naca le dxí'a bena' neda'. Libí'i cázali' benli' bayudxi bena' caní. Libí'ili' ral-la' gunli' neda' bal, ate' sal-la' biti' bi naca' neda', biti' ca' nácara' cuidi' ca nácagaquié' bönni' ni' nácada'-gaquié' lo, ta'nné' nácagaquié' gubáz queé' Cristo. ¹² Yugu' le bena' lu yöl-la' riböza zxön ladxí' quia' ga ni' zóali' nácagaca bè' naca' gubáz queé' Cristo. Bilé'eli' yugu' le bena', le nácagaca bè',

en le tun ga nu rubani, en yugu' yöl-la' huáca zxön que yehua' yubá. ¹³Tuz le cabí bena' ga zóali' le bena' ga nacua' ia'zica'rö cö' bönachi queë' Cristo. Biti' busaca' zi'a libí'ili' bi gúnnali' le guí'aj gahua'. Buli'niti lo neda' tu' cabí bena' caní queéli'.

¹⁴Chizóa guída' ga zóali' le bunny luzuí. Biti' bi inaba' gúnnali' quia'. Ré'enda' gunna cuin cázali' quia', en calëga bi dë queéli'. Yugu' bi'i hué'enido', bití' run bayudxi ulu'gágubi' xuz xiná'agacabi'. Xuz xiná'agacabi' na' ral-la' ulu'gahuë' xzí'inigaquië'. ¹⁵Idú ládxa'a utóa' yúgu'të le dë quia', en udödi cuina' ni'a queéli' para gaca bi uzí'ili' xibé, sal-la' réquida' cate' nadxí'iröda' libí'ili', zeaj ruhuéchi' yöl-la' nadxí'i queéli' neda'.

¹⁶Nöz quézili' bití' busaca' zi'a libí'ili'. Na'a, bál-lali' innali' guca' sina', ate' len didza' bití' nácatë buzi'a xibali'.

¹⁷¿Naru' réquitseli' guzxi' yé'eda' libí'ili' cate' gusól-la'a yugu' gubáz quia' ga zóali'? ¹⁸Gúta'yua' lobí' bi'i Tito tséajbi' ga zóali', ate' gusól-la'a-në' bóchi'ru' na' tsözxón len lëbi'. ¿Naru' réquitseli' buzí'ibi' xibali' bi'i Tito? ¿Naru' cabí bentu' la' lébisö ca runtu' bi'i Tito, en neda', enca' la' lébisö didza' bé'ëtu'?

¹⁹¿Naru' réquitseli' rubéaj cuintu' dx-i'a lolí' libí'ili'? Lahuë' Dios ruí'itu' didza' uláz queë' Cristo, böchi' luzá'ado', ate' yúgu'të le runtu' nácatë para gácarö idú yöl-la' réajlë' queéli' Cristo. ²⁰Rádxida' bití' gácali' ca ré'enda' gácali' cate' guída' ga zóali', ate' neda' bití' gaca' ca ré'ënili' libí'ili' gaca'. Rádxida' ridil-la dídza'li', en ruzxé'eli' luzá'ali', en rileli' luzá'ali', en rulidza dítjali' luzá'ali', en rnnëli' que luzá'ali', en run ba zxön cuinli', en rutsátsali'. ²¹Cate' guída' ga zóali', channö caní raca queéli', rádxida' gunë' Dios ga utuí'ida' ca naca queéli', ate' gun bayudxi cödxá' ni'a quégaca zían nupa ni' gulún dul-la', en bití' bulu'bí'i ládxi'igaca ca nácatë le cabí naca tsahui'

gulúngaca, en yugu' le gula'zé ládxi'guequi le cabí naca dxi'a.

Pablo ruzéajni'inë' bönachi Corinto, en rugapë' Dios légaquië'

13 Le bunny luzuí ni guída' ga zóali'. Nazúaj lu guichi ló'ayi le rnna: "Run bayudxi ila'cuá' chopá tsonna nupa ilún ba nalí channö nu bi uzegui luzé'e didza'." ²Chibuzéajni'ida' nupa gulún dul-la' cate' ni' guzóalena' libí'ili' le buropi luzuí, ate' na'a ruzéajni'ida' légaquië' leyúbölö, enca' yúgu'të nupa tun dul-la', sal-la' ni zoa' zítu', rnní'a: Channö guída' ga zóali' leyúbölö bití' gaca' nöxaj ladxí' para til-la' légaquië'. ³Rinábalí' tu le gaca bë' ruá'a didza' uláz queë' Cristo. Lë na' guna' gaca bë' ruá'a caní didza'. Bití' ca' ricuídi'në' Cristo cate' bi runë' queéli', pero lu yöl-la' huáca zxön queë' runë' bi runë' queéli'. ⁴Le nácatë gudé'ë lë'e yaga cruz ca nu ricuídi', pero zoë' nabanë' tu' zóalen yöl-la' huáca queë' Dios Lë'. Netu' ca' ricuídi'tu' tsözxón len Lë', pero tu' nácatu' tuz len Lë' nabantu', ate' zóalen netu' yöl-la' huáca queë' Dios bi guntu' ga ni' zóali'.

⁵Buli'yú cuinli' channö réajlë'ëli' Cristo o cabí. Gulí'sí' bë' la' cuínsili'. ¿Naru' cabí nözili' zóalenë' Jesucristo libí'ili' channö le nácatë réajlë'ëli' Lë'?

⁶Runtu' löza chinöz quézili' le nácatë netu' réajlë'ëtu' Cristo. ⁷Rulídzatu'-në' Dios rinábitu'-në' gácalenë' libí'ili', para cabí guá'ali' dö', calëga para urúajtu' dxi'a netu', pero para gunlí' libí'ili' le naca tsahui' sal-la' guéquili' richixi riníguitu' netu'. ⁸Bití' ca' gaca tá'baga'tu' le naca idútë li, pero gácasö guntu' ca sa'yéaj le naca idútë li. ⁹Que lë ni na' rudzéjatu' cate' ricuídi'tu', ate' libí'ili' ridipa ládxi'li'. Rulídzatica'stu'-në' Dios, rinábitu'-në' gunë' ga gaca idú ca réajlë'ëli' Cristo. ¹⁰Que lë ni na' ruzúaja' queéli' lu guichi

lë ni tsanni ni zoa' zi'tu' ga zóali'. Ní'irö cate' guída' ga zóali' biti' gun bayudxi usaca' zi'a libí'ili', pero uguna' dxin yöl-la' unná bé' nudödë' Xanru' lu na'a, le naca para utipa' ládxi'li', en calëga para usunítia' libí'ili'.

¹¹ Na'a, böchi' luzá'ado', dipa ládxi'li'. Guli'güü' ládxi'li' gaca idú ca réajlë'ëli' Cristo.

Guli'gaca tuz len luzá'ali', en guli'côza dxí'ado'.

Rinábida'-në' Dios sóalenë' libí'ili'.

Lë' nadxí'inë' rë'u, en runë' ga ribózaru' dxí'ado'.

¹² Guli'gapa Dios luzá'ali', tuli' ia'tuli', en unída'li' luzá'ali'. ¹³ Yúgu'të böchi' luzá'aru' ni tu'gapë' Dios libí'ili'.

¹⁴ Rinábida'-në' Dios gunë' ga gata' queé'li' yúgu'tëli' le ruzá' ládxi'ë' Xanru' Jesucristo queéru', en idxí'inë' ca' libí'ili', en gunë' ga gácali' tuz len Dios Bö' Lá'ayi. ¡Ca' gaca!

DIDZA' GUSÓL-LĒ'Ē PABLO LUYÚ GALACIA

Ruzúajë' Pablo quégaca bönachi luyú Galacia

1 Neda', Pablo, naca' gubáz queë' Cristo. Biti' gula'söl-la' bönachi neda'. Jesucristo caz gusól-lë'ë neda', en nunë' Xúziru' Dios tu zxön Lë'. Lë' busubanë' Jesús lu yöl-la' guti. ²Ruzúaja' queéli' lu guichi ni, libí'ili', yugu' cö' bönachi tu'dubi queë' Cristo luyú Galacia. Núnagaquie' yugu' bóchi'ru' ni tu zxön neda'. ³Rinábida' Xúziru' Dios, enca' Xanru' Jesucristo uzá' ládxe'ë queéli', en gunë' ga soa dxi icja ládxi'do'oli'. ⁴Jesucristo caz budödi cuinë' lu yöl-la' guti tu' nözi dul-la' nabága'ru' para busölë' rë'u lu le naxihui' raca dza ni zóaru' na'a. Benë' caní tu' naca ca ré'ëni quézinë' Xúziru' Dios. ⁵¡Gácatica'sö queë' Dios yöl-la' ba! ¡Ca' caz!

Tuz naca le rinné dxi'a queë' Jesucristo

⁶Rubánide'eda' ca runli', rucá'anatëli' Dios. Lë' bulidzë' libí'ili' para guéquili' queë' tu' nözi le ruzá' ládxe'ë Jesucristo queëru', ate' na'a ré'ënili' si' ladxi' ná'ali' tu le rinné dxi'a izá'a. ⁷Le nácatë bití' ca' zoa ia'tú le rinné dxi'a pero ruá'a caní didza' tu' nacu'ë bönni' tu'tsë'ë libí'ili', en té'ënë' ulu'tsë'ë le rinné dxi'a queë' Cristo. ⁸Channö zoa nu gun ba nali que tu le rinné dxi'a le cabí naca tuz ca naca lë na' bentu' ba nali que loli' libí'ili', rinábida'-në' Dios udxíë' dö' nu na' run caní. Ral-la' udxíë' neda' dö' channö guna' caní, en channö gunë' caní tu gubáz queë' Dios zë'ë yehua' yubá, Dios caz udxíë' ca' lë' dö'. ⁹Chigunná caza' caní zí'alö, ate' na'a rnní'a' caní leyúbölö: Channö zoa nu gun ba nali que tu le rin-

né dxi'a le cabí naca tuz ca naca lë na' chiguzxí' ladxi' ná'ali', rinábida'-në' Dios udxíë' dö' nu na'.

¹⁰¿Réquitseli' ré'ënda' cú'uli' neda' yöl-la' zxön cate' ru'a caní didza'? ¡Biti' ca'! Ré'ënda' urúaja' tsahui' lahuë' Dios. ¿Réquili' ré'ënda' uzaca' baládxí'lengaca bönachi neda'? La'tu' ré'ënda' uzaca' baládxí'lengaca bönachi neda', bití' gaca' huen dxin queë' Cristo.

Naca böáquië' Pablo bönni' gubáz queë' Cristo

¹¹Ral-la' inózili' lë ni, böchi' zána'-do'. Le rinné dxi'a na' runa' ba nali que bití' gulén icja lo ládxi'da'ahuiguesqui bönachi. ¹²Cuntu nu bönni' budödë' lu na'a le rinné dxi'a na', en calëga nu bönni' busédinë' neda' le. Jesucristo caz buzéajni'inë' neda' ca naca le rinné dxi'a queë'. ¹³Chibiyón quézili' ca na' ben caza' neda' zí'atëlö cate' ni' nazí' lu na'a ca tequi le bach Dios bönni' judío. Nózili' ca bena', yenni' gudxía nahua' bönachi queë' Dios ta'yija ladxi' Cristo, en gú'unda' usulu usunítia' léguesqui. ¹⁴Lu le tequi le bach Dios bönni' judío, guyépisëtëra' neda' ca lá'tu'biqui' yúgu'të luzá'a bönni' judío yú'ugaquie' iz ca yu'a neda', tu' guzxi'rö ladxi' na'a ca léguesqui le bulu'dödë' xuz xtó'oru' loru' ca tun cazë'. ¹⁵Caní bena' neda', pero tu' náquie' dxi'i ladxi' Dios, guró cazë' neda' zí'atëlö ca gulja', ate' bulidzë' neda' para guna' xichinë'. ¹⁶Ní'rö, cate' gú'uni quézinë' Dios, benë' ga núnbë'a-në' zxf'inë', en gusól-lë'ë neda' tsöjena' libán que le rinné dxi'a ca naca queë' Lë' lógaca bönachi izá'a. Cate' benë' caní, bití' yödilja' nu naca bönachi nu usedi neda'. ¹⁷Cabí guyija' yödzö Jerusalén para tsöyúa' nupa ni' nácagaca bönni' gubáz queë' Cristo zí'alö ca neda', pero guyija' luyú Arabia, ate' gudödi ni' böja' yödzö Damasco.

¹⁸ Caní guca, chigudödi tsonna iz cate' ni' guyija' yödzö Jerusalén, yöyúa'-në' Pedro, ate' bugá'analena' lë' idú ca chidá' gubidza. ¹⁹ Tsanni ni' zoa' ni' biti' ca' bilé'eda' ia'turë' bönni' gubáz queë' Cristo, pero tuzë' Jacobo, bönni' bóchë'ë Xanru' bilé'eda'. ²⁰ Didza' ni ruzúaja' queéli' lu guichi nácatë. Ni'a queë' Dios biti' ca' rizí' yë'a.

²¹ Gudödi ni' guyija', gudöda' yugu' yödz luyú Siria, en luyú Cilicia. ²² Yugu' dza ni' biti' núnbë'gaquië' neda' bóchi'ru' tu'dubë' queë' Cristo gapa naca luyú Judea. ²³ Gula'nózisinë' lë na' gúla'guixjö' quia' ia'zica'rö bönachi, gula'nná: "Bönni' na' gudxía nahuë' rë'u zí'alö, runë' libán na'a que le reja ládxi'ru', lë na' gú'unë' usulu usunítie'." ²⁴ Caní guca, gula'gu'ë yöl-la' ba Dios tu' nözda' neda'.

Bönni' gubáz queë' Cristo guzxí' lu ná'agaquië' Pablo

2 Cate' chigudödi chidá' iz, guyéa-jlena' Bernabé, en budxina' yödzö Jerusalén. Guchë'a-bi' Tito, dzágabi' neda'. ² Guyija' ni', en bë'lëna' didza' tsölá'alö bönni' ni' yu'u lu ná'agaquië' dxin queë' Cristo, ate' gudíxjöi'ida' lé-gaquië' ca naca libán runa' que le rinné dxi'a lógaca bönachi izá'a. Caní bena' tu' gú'unda' cabí ugá'ana nítisö dxin na' chibëna', enca' dxin ni runa' na'a. ³ Sal-la' nácabi' Tito, bi'i luzá'a, bi'i griego, biti' gulunë' bönni' ni ga irugu lu xpéla'bi' lë na' naca bë' bönachi queë' Dios ca tun cazë' bönni' judío. ⁴ Le nácatë gula'cuá' bal-la bönachi ni', nupa ni' ta'zí' yë', ta'ná nácagaca bóchi'ru', ate' gulé'ëni ilún ga irugu lu xpéla'bi' Tito lë na' naca bë'. Yugu' bönni' ni núngaquië' tu zxön rë'u pero tu'yusë' ca runru' para iléquië'benë' ca nuláru' lu yöl-la' unná bë' que le rinná bë' xibá queë' Moisés tu' nácaru' tuz len Jesucristo. Gulé'ëne' ilunë' ga huóácaru' leyúbölö huen dxin

tsaz lu xibá na'. ⁵ Biti' ca' bë'tu' légaquië' lataj. Caní bentu' para gun ch'itu' le nácatë que le rinné dxi'a para gaca uzí'ili' xibé le rinné dxi'a na'.

⁶ Yugu' bönni' ni' réquiru' yu'u lu ná'agaquië' dxin queë' Cristo biti' bi gula'nná be'e neda' le naca cubi, pero biti' rufí ládxa'a ca nácagaquië'. Dios biti' ruchi'a rusöröë' rë'u ca tu'chi'a tu'sörö bönachi rë'u. ⁷ Biti' bi gula'nná be'e neda' tu' guléquië'benë' Dios nudödë' lu na'a dxin queë', para tsöjena' libán que le rinné dxi'a lógaca bönachi izá'a, ca na' nudödë' lu në'ë Pedro dxin queë', para gunë' libán que le rinné dxi'a lógaca bönachi judío. ⁸ Len yöl-la' huáca queë', Dios benë' neda' bönni' gubáz queë' para usédida' bönachi izá'a, ca na' benë' Pedro bönni' gubáz queë' para usédinë' bönachi judío.

⁹ Jacobo, en Pedro, en Juan, bönni' ni' réquiru' yu'u lu ná'agaquië' dxin queë' Cristo, guléquië'benë' Dios nudödë' lu na'a dxin ni. Que lë ni na' guzxi' ladxi' ná'agaquië' neda', enca' Bernabé, ate' bentu' tuz didza' tsöjentu' xichinë' Dios lógaca bönachi izá'a neda', en Bernabé, ate' légaquië' ilunë' xichinë' Dios lógaca bönachi judío. ¹⁰ Gulá'ta'yusé' lotu' tsönetu' gácalentu' bönachi yechi', ate' lë ni naca tu le rufítica'sö ládxa'a runa'.

Ca guca cate' Pablo gudíl-lalenë' Pedro lu yödzö Antiquía

¹¹ Cate' bidxinë' Pedro lu yödzö Antioquía, gudíl-lalena' lë' didza' tu' lë cazë' guchíxinë' ca benë'. ¹² Caní guca tu' zí'atëlö gudágulenë' tsözxón yugu' bönachi izá'a ni'. Benë' caní ga bila'dxin-rë' bal-la bönni' dá'gaquië' Jacobo. Ní'irö gusí lahuë' rubíguië', en bíti'rö gudágu-lenë' tsözxón bönachi izá'a na' tu' gudxinë' bi ilunë' bönni' na' nazí' lu ná'agaquië' ilunë' ga irugu lu xpéla'gaca bönachi izá'a ca rinná bë' xibá queë' Moisés. ¹³ Ní'irö ia'zica'rë' bönni' judío

ni' ta'yija ládxë'ë Cristo gulunë' tu zxön Pedro ca runë' lu yöl-la' radxi queë', ate' caní guca ga bidxintë' gulunë' ga gúdx-inë' ca' Bernabé, ate' lë' benë' tu zxön légaquië'. ¹⁴ Cate' bilé'eda' biti' tunë' ca naca le nácatë' le rusedi rë'u le rinné dxi'a, gudxa'-në' Pedro lógaca yúgu'të nupa ni' nudúbigaca queë' Cristo, gunnía': "Li' nacu' bönni' judío, pero runu' li' ca tún-gaca bönachi izá'a, en calëga ca tunë' bönni' judío. ¿Bizx queë' ré'ënu' gunu' ga ilúngaca bönachi izá'a ca tunë' bönni' judío?"

Nulágaca bönachi judío ca na' nulágaca ca' bönachi izá'a

¹⁵ Gudxa' ca' Pedro: "Rë'u ni nácaru' bönni' judío tu' nácaquië' xuz xiná'aru' judío, en calëga bönachi izá'a, nupa cabí núnbë'gaca Dios. ¹⁶ Nöz quéziru' cuntu nu huóaca tsahui' lahuë' Dios tu' run nu na' tsa rinná bë' xibá queë' Moisés, pero huóaca tsahui' tuzi nu na' reja ladxi' Jesucristo. Lës caní ca' rë'u reja ládxi'ru' Jesucristo para huóácaru' tsahui' lahuë' Dios, en calëga tu' runru' tsa rinná bë' xibá queë' Moisés. Cuntu caz nu huóaca tsahui' lahuë' Dios tu' run tsa rinná bë' xibá queë' Moisés.

¹⁷ Na'a, réquiru' nuhuóácaru' tsahui' tu' reja ládxi'ru' Cristo, pero channö naca bë' nácaru' bönni' dul-la' ca náca-gaca bönachi izá'a, ¿jinnátsaru' runë' Cristo ga runru' dul-la'?? ¡Biti' caz! ¹⁸ Channö ru'í ládxa'a uchisa' le chibuquinja', lë ni naca bë' riguitsja' xibá le gunná bë'ë Dios. ¹⁹ Tu' cabí guca uzóa' didza' xibá na' gunná bë'ë Moisés, guca quia' tsa chinátia'. Tu' caní naca, nulá' na'a lu xibá na' para soa' ibana', en guna' ca ré'ënë' Dios. ²⁰ Naca quia' ca chigútile-na' tsözxón Cristo lë'e yaga cruz ga na' gútië' Lë'. Que lë ni na' calëga neda' ni zoa' nabana', pero Cristo zoë' nabanë' lu icja ládxi'da'ahua'. Tsa naca zoa' nabana' na'a, naca tu' reja ládxa'a Lë'

zxf'inë' Dios, Bönni' na' bidxf'inë' neda', en budödi cuinë' lu yöl-la' guti uláz quia' neda'. ²¹ Biti' ré'ënda' uzóa' tsólá'alö le ruzá' ládxë'ë queëru' Dios. Channö huáca huóáquië' tsahui' tu bönni' lahuë' Dios tu' runë' tsa rinná bë' xibá queë' Moisés, ní'irö nítisö gútië' Cristo."

Le rinná bë' xibá queë' Moisés, en le reja ládxi'ru' Cristo

3 Lib'íli', tu' canóz, lib'íli', bönni' Galacia. ¿Nuzxi gulú'utsó lib'íli' nëbi para cabirö uzóali' didza' le nácatë? Gate ga rë' buluf'itu' lib'íli' le sa'yéaj ca gútië' Jesucristo lë'e yaga cruz. ² Gudíxjöi' neda' lë ni. ¿Bidisóalenë' lib'íli' Dios Bö' lá'ayi tu' benli' ca rinná bë' xibá queë' Moisés o tu' guyija ládxi'li' le rinné dxi'a biyónili'? ³ ¿Nacxi guca nácali' tu' canóz caní? Gusí loli' nácali' bönachi queë' Dios tu' zóalenë' lib'íli' Dios Bö' lá'ayi. ¿Réquitseli' huáca udxu' gunli' ga guéquili' queë' Dios rácasö queéli'? ⁴ ¿Guca nítisö guca queéli' yúgu'të lë na' guzaca' gud'íli'? ¡Biti' ca' guca caní! ⁵ Cate' Dios risól-lë'ë queéli' Dios Bö' lá'ayi, en ru'ë lib'íli' lataj gunli' yugu' yöl-la' huáca que yehua' yubá, ¿runë' caní tu' runli' ca rinná bë' xibá queë' Moisés o tu' reja ládxi'li' le rinné dxi'a na' biyónili'?

⁶ Lu guichi lá'ayi rna: Abraham guyija ládxë'ë Dios, ate' Dios gunné' náquië' bönni' tsahui' tu' guyija ládxë'ë Lë'. ⁷ Que lë ni na' ral-la' inözili', nupa na' ta'yija ladxi' Dios náca-gaca idú zxf'ini xi'sóë' Abraham. ⁸ Lu guichi lá'ayi ru'í didza' z'atëlö ca gunë' Dios, innë' nácaquië' tsahui' bönni' izá'a ila'yija ládxë'ë Lë'. Que lë ni na' Dios gudíxjöi'inë' Abraham z'atëlö ca naca le rinné dxi'a, gunné': "Lu në'ë Zxf'ini xi'sú' guna' ga gaca dxi'a qué-gaca bönachi idutë yödzülió." ⁹ Caní naca, Abraham guyija ládxë'ë Dios, ate' Dios benë' ga guca dxi'a queë'. Lës caní

ca' na'a, Dios runë' ga raca dxi'a quégaca yúgu'të nupa ta'yija ladxi' Lë'.

¹⁰ Nupa na' tu'zxonì ladxi' ulu'huóaca tsahui' tu' túngaca ca rinná bë' xibá queë' Moisés, nabága'gaca xíguia'. Caní naca tu' nazúaj lu guichi lá'ayi, le rnna: "Yúgu'të nupa na' cabí túngaca idutë ca rinná bë' xibá na' nabága'gaca xíguia'."

¹¹ Na'a, naca bë' cuntú nu huóaca tsahui' lahuë' Dios tu' run nu na' le rinná bë' xibá na', tu' zoa lu guichi lá'ayi le rnna: "Nu na' nuhuóaca tsahui' lahuë' Dios soa ibán tu' reja ladxi' Lë'." ¹² Ca na' nuhuóaca tsahui' lahuë' Dios nu na' reja ladxi' Cristo nadzá' ca naca que nu na' ruzxonì ladxi' nuhuóaca tsahui' tu' run ca rinná bë' xibá queë' Moisés. Zoa lu guichi lá'ayi le rnna: "Nu na' run idutë ca rinná bë' xibá na' soa ibán tu' run caní."

¹³ Cristo busölé' rë'u lu le richugu queéru' le rinná bë' xibá na' tu' bë'ë latja nu guchugu queë' uláz queéru'. Caní naca tu' zoa lu guichi lá'ayi le rnna: "Narugu quégaca yúgu'të nupa na' dá'gaca lë'e yaga." ¹⁴ Caní guca queë' Cristo para gaca gunë' Dios ca na' guzxi' lu në'ë queë' Abraham, gunë' ga gaca dxi'a quégaca bönachi izá'a lu në'ë Jesucristo, en para gaca gunë' ga idisóalenë' Dios Bö' lá'ayi rë'u channö uyija ládxi'ru' Lë', ca na' guzxi' lu në'ë Dios gunë'.

Le rinná bë' xibá queë' Moisés, en le guzxi' lu në'ë Dios gunë' queéru'

¹⁵ Na'a, böchi' zána'do', uzúaja' queéli' tu le rucudzu' didza', tu le raca queéru'. Cate' chopá bönni' chigulunë' tuz xtídzagaquie', en chigulunë' tsutsu didza' na', cuntú nu gaca utsá' didza' na', en cabí gaca nu bi udá' lë'e didza' na'. ¹⁶ Dios guzxi' lu në'ë bi gunë' queë' Abraham, en que zxi'ini xi'sóë'. Ga zoa lu guichi lë ni, bití' rnna: "Quégaca zxi'ini xi'sú'", le ru'i didza' que zían bönachi, pero rnna: "Que zxi'ini xi'sú'." Lë ni ru'i didza' que tuz bönni', Lë' Cristo. ¹⁷ Lë ni na' le ré'ën-

da' innía': Dios benë' tuz didza' len Abraham, en guzxi' lu në'ë gunë' ca na' gunë'. Le nazúaj lu xibá queë' Dios, le benë' Dios tapa gayuá' yu' chi-uruá' iz gudödi ni' cate' gudxë' caní Abraham, bití' gaca ugúa lë na' guzxi' lu në'ë Dios gunë', en cabí gaca usulu le. ¹⁸ Na'a, channö ral-la' gunru' ca rinná bë' xibá na' para sí'iru' le guzxi' lu në'ë Dios gunsë', bíti'rö naca tu le guzxi' lu ná'asë' gunë'. Dios runsë' caní tu' caní guzxi' lu në'ë bi gunë' queë' Abraham.

¹⁹ Channö caní naca, ¿bizx queë' gunná bë'ë Dios xibá na' nazúajgaca lu didza' queë'? Dios gunná bë'ë caní para gaca bë' xíguia' nabága'ru', pero gúcasö caní ga bidxintë dza na' bilá' lahuë' zxi'ini xi'sóë' Abraham na', Bönni' na' guzxi' lu në'ë Dios gunë' queë' lë na'. Yugu' le gunná bë'ë Dios lu xibá queë', gusöl-lë'ë yödzölió ni lu ná'agaquie' gubáz lá'ayi queë', ate' Moisés budödë' didza' ca nácagaca xibá na'. ²⁰ Bití' naquín nu udödi didza' cate' naca tuz nu run tuz didza', ate' Dios, tuz náquie'.

Bizx queë' gunná bë'ë Dios le zóagaca lu xibá queë'

²¹ Le nazúajgaca lu xibá queë' Dios, ¿ta'dá'gaca lë na' guzxi' lu në'ë Dios gunë'? ¡Bití' ca! La'tu' gunná bë'ë Dios tu xibá le gaca gun ga sóaru' ibanru' tsaz, ní'rö huáca huóácaru' tsahui' lahuë' Dios channö gunru' ca na' rinná bë' xibá na'. ²² Tsca naca lë na' nazúaj lu guichi lá'ayi, yúgu'tëru' nabága'ru' dulla'. Caní naca para gaca sí'iru' lë na' guzxi' lu në'ë Dios gata' queéru' cate' tseja ládxi'ru' Jesucristo.

²³ Zí'atëlö ga bidxín dza gaca tseja ládxi'ru' Cristo, le rnna xibá na' gunná be'e rë'u, ca na' zoa le rinná be'e tu bönni' yu'ë lidxi guie'. Caní guca ga bidxintë dza bilá' lahui gaca huóácaru' tsahui' channö uyija ládxi'ru' Lë'. ²⁴ Caní naca, le nazúaj lu xibá queë' Dios gunná be'e

rë'u, lë na' busedi rë'u ca tu bönni' usedi ga bidxintë dza bilá' lahuë' Jesucristo, para gaca huóácaru' tsahui' lahuë' Dios channö uyija ládxi'ru' Lë'. ²⁵ Na'a, tu' bidxín dza gaca huóácaru' tsahui' channö uyija ládxi'ru' Cristo, bíti'rö inná be'e rë'u lë na' busedi rë'u.

²⁶ Yúgu'tëli' nácali' bi'i queë cazë' Dios tu reja ládxi'li'-në' Jesucristo, en chinácali' tuz len Lë'. ²⁷ Yúgu'të nupa nadfla-gaca nisa para huóácgaca tuz len Jesucristo, nuhuóácgaca ca náquië' Lë cazë'. ²⁸ Bíti'rö narúaj choplö bönni' judío, en bönni' izá'a, en cabí narúaj choplö bönni' náquië' tsaz huen dxin, en bönni' nazán, en cabí narúaj choplö bönni', en nigula, tu' cate' böácali' tuz len Jesucristo, yúgu'tëli' böácali' ca' tuz len luzá'ali' tuli' ia'tuli'. ²⁹ Na'a, channö néquili' queë' Cristo, nácali' ca' zxf'ini xí'sóë Abraham, ate' nazí'ili' lë na' guzxi' lu në'ë Dios gunnë' queë' Abraham.

4 Lë ni le ré'enda' innía': Tsanni ni ribózbabi' tu bi'i bönni'do' s'íbi' bi ral-la' gunnë' xúzibi' queébi', ni' nácabi' bf'ido', en biti' nayépisëtërobí' ca raca que tu nu naca tsaz huen dxin, sal-la' le nácatë nequi queébi' yúgu'të. ² Tsanni ni' nácabi' bf'ido', nacuá' nupa tun chí'i lëbi', en tu'gún dxin le nequi queébi' ga idxintë dza chinuzóë' xúzibi' queébi'. ³ Lës caní raca ca' queéru'. Tsanni ni' gúcaru' ca bf'ido', gunná be'e xibá na' rë'u ca raca quégaca bönachi yödzóliö ni. ⁴ Cate' bizá'a dza, Dios gúsól-lë'ë zxf'ini cazë' ni. Gúquië' zxf'ininu tu nigula ca nácaru' rë'u, en gunná be'e le zoa lu xibá quégaca bönni' judío Lë'. ⁵ Caní guca queë' para guca busölë' nupa na' rinná be'e le zoa lu xibá léguequi, para gaca huóácaru' bi'i queë' Dios.

⁶ Para gaca bë' chinácali' bi'i queë cazë', Dios guchizë' Dios Bö' lá'ayi ládxi'do'oli', ate' Lë cazë' rulidzë' Dios uláz queéli', rnnë': "Xuza'." ⁷ Caní naca, chinácali' bi'i queë' Dios, en bíti'rö ná-

cali' ca yugu' bönni' tsaz nácagaquië' huen dxin. Na'a, tu' nácali' bi'i queë cazë' Dios, Lë cazë' nazí' ladxi' në'ë guequi queéli' le nequi queë' tu' nácali' tuz len Cristo.

Pablo ru'í ládxi'ë bönni' Galacia ta'yija ládxi'ë Cristo

⁸ Cate' ni' biti' núnbë'ëli'-në' Dios, gúcali' ca yugu' bönni', tsaz nácagaquië' huen dxin, en benli' dxin quégaca budó' néquini. Biti' ca' nácagaca budó' na' Dios. ⁹ Na'a, tu' núnbë'ëli'-në' Dios, o huáca innaru': Tu' núnbë'ë Dios lib'íli', ¿bizx queë ré'ënili' ubf'ili' yugu' lu xibá cané na' cabí nu uzí' xibé? ¿Ré'ënili' huóácali' huen dxin tsaz, en gunli' ca rinná bë' xibá na'? ¹⁰ Rápali' tu ia'tú dza, enca' tu ia'tú beo', enca' tu ia'tú cusu na, en tu ia'tú iz. ¹¹ Rádxida' bi gaca queéli'. ¿Naru' nuhuóáca nítisö dxin bena' para gúnbë'ëli' le nácatë? ¹² Ráta'yuá' loli', böchi' zána'do', gácali' ca naca' neda', nulá' na'a lu na' xibá benë' Moisés. Caní ral-la' gácali' tu' böáca' neda' ca gúcali' lib'íli'. Biti' bi le cabí naca dxi'a benli' quia' neda'.

¹³ Chinóz quézili' bizx queë na' gusí lahua' runa' libán loli' que le rinnë' dx-i'a. Bena' libán ni' tu' güf'ida'. ¹⁴ Biti' bucá'anali' neda' cané, en cabí buzóali' neda' tsólá'alö sal-la' bigútili' ca guca yödzöhuë' quia' na'. Benli' neda' bal, tuz ca gunli' bal tu gubáz lá'ayi queë' Dios, o ca runli' bal Jesucristo caz. ¹⁵ Budzé-jalë'ëli' dza ni'. ¿Bizxi guca queéli' tu' cabirö raca caní? Lë ni gaca innía' ca guca queéli': La'tu' huáca gunli', bubéajli' guiój lo quézili', le gúnnali' quia'. ¹⁶ Na'a, ¿réquili' nuhuóáca' tu nu riléde'e lib'íli' tu' gudxa' lib'íli' le nácatë?

¹⁷ Bönni' ni' tu'tsë'ë lib'íli' tu'í ládxi'ë lib'íli', pero caléga para gaca dxi'a queéli'. Té'ënë' ilunë' ga ucá'anali' netu' para gü'í ládxi'li' légaquië'. ¹⁸ Na'a, naca dxi'a zoa nu ru'í ladxi' lib'íli', pero tuz

channö naca para gaca dxi'a queéli'. Caní ru'ítica'sö ládxa'a lib'ili', en calégasö cate' ni' zóalena' lib'ili'.¹⁹ Lib'ili', zxf'ina'do'. Ca na' raca queénu nigula chizóa sóabi' bí'ido' queénu, riguf'i rizáca'nu, lës caní riguf'i rizáca'a neda' ni'a queéli' leyúbölö ga idxinrö dza gácali' idú ca náquië' Cristo.²⁰ Nácaru la' zóalena' lib'ili' na'a para gaca güf'ilena' lib'ili' didza' nadzá'alö, tu' ruúbi ruguf'ilë'ëda' ni'a queéli'.

Le rucudzu' didza' ca guca quegacanu Agar en Sara

²¹ Na'a, lib'ili', nuli' ré'ënilí' uzóa cuinli' lu xibá queë' Moisés, guli'ná'tsö-ca' didza' ni gu'a. ¿Catu caz buzé ná-gali' le rnna xibá na'?²² Rnna xibá na' caní: gula'cuá'abi' chópabi' bi'i bönni'-do' queë' Abraham. Tubi' gúcabi' zxf'ininu tu nigula tsaz nácanu huen dxin, ate' ia'tubi' gúcabi' zxf'ininu nigula nazannu.²³ Zxf'ininu nigula huen dxin na' gúlajbi' lu ni'a lu na' tu bönni' tsa tála-jbi' yúgu'të bí'ido', pero zxf'ininu nigula nazannu na' gúlajbi' tu' guzxf' lu në'ë Dios gunë' ga gálajbi'.²⁴ Lë ni naca ca tu le rucudzu' didza'. Ca guca quegacanu chópanu nigula ni sa'yéaj ca naca chopá didza' Dios bénlenë' bönachi. Tu didza' na' naca le buzóë' Dios lu gu'a Sinaí, le sa'yéaj lë na' guca queénu Agar. Nupa na' rinná be'e xibá na' léguequi, náca-gaca ca zxf'ininu Agar, en náca-gaca ca huen dxin tsaz lu xibá na'.²⁵ Le gúcanu Agar na' sa'yéaj ca' ca naca gu'a Sinaí na' le zoa luyú Arabia, en sa'yéaj ca' ca naca yödzö Jerusalén na'a dza, tu' naca yödzö na' ca tu bönni' tsaz náquië' huen dxin tsözxón len nupa nacua' lu yödzö na'.²⁶ Jerusalén na' zoa yehua' yubá nazán, ate' rë'u ni nácaru' bönachi uládz que yödzö ni'.²⁷ Nazúaj lu guichi lá'ayi le rnna: Budzeja, nigula huödx, cabí nacua' zxf'inu'.

Lu yöl-la' rudzeja quiu' guródx'a, sal-la' catu caz guca quiu' le riguf'i rizá-ca'nu nigula chizóa sóabi' bí'ido' queénu. Budzeja tu' sal-la' nusán në'eguequi bönachi li', gunë' Dios ga ila'yántërö zxf'inu' ca bi'i queénu nigula zóalennu bönni' queénu.

²⁸ Lib'ili', böchi' zána'do', rë'u ni nácaru' ca gúcabi' Isaac, zxf'inë' Abraham. Nácaru' ca yugu' zxf'ini xi'sóë' Abraham, guzxf' lu në'ë Dios gata' queë'.²⁹ Dza ni', bi'i na' gúlajbi' ca tála-jbi' yúgu'të bí'ido', gudxía ná'abi' bi'i na' gúlajbi' tu' nözi yöl-la' huáca queë' Dios Bö' lá'ayi. Lës caní raca ca' queéru' na'a, ta'bía no bönachi yödzölió ni rë'u.³⁰ ¿Bizxf' rnna le zoa lu guichi lá'ayi? Caní rnna: "Gurú'una-nu nigula na' tsaz nácanu huen dxin tsözxón len zxf'ininu, tu' biti' gaca zxf'ininu nigula na' s'íbi' tsözxón zxf'ininu nigula nazannu le guzxf' lu në'ë Dios guequi queébi' zxf'ininu nigula nazannu na'."³¹ Caní naca, böchi' zána'do'. Biti' nácaru' ca nácabi' zxf'ininu nigula na', tsaz gúcanu huen dxin, pero nácaru' ca zxf'ininu nigula nazannu na'.

Guli'gún chi'i cuinli', ugá'anali' lu yöl-la' nazán

5 Chinazanru' tu' busanë' Cristo rë'u. Guli'sóa tsutsu channö, ugá'anali' lu yöl-la' nazán na'. Biti' uzóa cuinli' leyúbölö lu xibá queë' Moisés para cabí gácali' ca tu bönni', tsaz náquië' huen dxin.

² Buli'zé nágali' neda'. Neda', Pablo, rea' lib'ili', channö ru'ili' lataj nu ichugu lu xpéla'li' ca rinná bë' xibá na', biti' ca' uzf'ili' xibé le benë' Cristo.³ Leyúbölö ré'ënda' guía' nütitës bönni' ru'ë lataj nu ichugu lu xpélë'ë caní, run bayudxi gunë' idutë ca le rinná bë' xibá queë' Moisés.⁴ Nuli' réquili' huóacali' tshui' lahuë' Dios tu' runli' ca rinná

bë' xibá na', chibulá'alenli'-në' Cristo. Chibusán ná'ali' le ruzá' ládxë'ë Dios queéru'. ⁵ Rë'u ni ruzxöni ládxi'ru' huóá-caru' tsahui' lahuë' Dios ni'a que yöl-la' huáca queë' Dios Bö' lá'ayi tu' reja ládxi'ru' Cristo. ⁶ Channö nácaru' tuz len Jesucristo, biti' bi run channö narugu lu xpéla'ru' ca rinná bë' xibá na' o channö cabí narugu caní lu xpéla'ru'. Le run bayudxi naca tseja ládxi'ru' Cristo, le run ga idxí'iru' luzá'aru'.

⁷ Dxí'ado' guca ca gusí loli' runli' dza ni'. ¿Nuzxi ben ga bucá'anali' le nácatë'? ⁸ Biti' benë' Dios, Bönni' rulidzë' libí'ili', ga benli' caní. ⁹ Biti' gal-la ládxi'li' lë na' rnna: "Láti'sö cúa zi que yöta xtila ruhuóáx idutë cúa ga nayú'u cúa zi na'." ¹⁰ Tu' nácaru' tuz len Xanru', runa' löza ca naca queé'li', sa' ládxi'li' tuz ca rizá' ládxa'a neda', ate' Dios gun zi'ë bönni' na' rutsë'ë libí'ili', núti'tës nu naca bönni' na'.

¹¹ Ca naca quia' neda', böchi' zána'do', nacua' nupa ta'nná rusédida' bönachi ral-la' irugu lu xpéla'guequi ca rinná bë' xibá queë' Moisés. Channö runa' caní, ¿bizx queë ta'bía nahuë' bönni' judío neda'? La'tu' rusédida' caní, cuntú nu ilé neda' tu' runa' libán ca gútië' Cristo lë'e yaga cruz. ¹² Ca naca que nupa ni' tu't-sá' libí'ili', té'ëni irugu lu xpéla'li' lë na', nácöru la' ila'chugu tsaz cuínguequi.

¹³ Ca naca queé'li', böchi' zána'do', Dios bulidzë' libí'ili' para gácali' bönachi nazángaca. Biti' ugunli' dxin yöl-la' nazán na' para gunli' ca rizësö ládxi'li', pero para gunli' dxin que luzá'ali', tuli' ia'tuli', tu' nadxi'ili' luzá'ali'. ¹⁴ Yúgu'të le rinná bë' xibá queë' Dios rusudxín nu na' run ca rinná bë' xibá na' rnna: "Ral-la' idxí'inu' luzó'o ca nadxi'i cuinu'." ¹⁵ Channö rizi' quídza'li' luzá'ali' tuli' ia'tuli', runli' ca tunba' böa' gu'a sínia', táguya'aba', en táguba' luzá'aba'. Buli'yú tsate' usulu usunítili' luzá'ali' tuli' ia'tuli'.

Le runru' lu yöl-la' bönáchisö queéru', en le runru' len yöl-la' huáca queë' Dios Bö' lá'ayi

¹⁶ Lë ni na' rea' libí'ili': Guli'güü' latja inná bë'enë' libí'ili' Dios Bö' lá'ayi, ate' ní'rö bítirö gunli' ca rizësö ládxi'ili' lu yöl-la' bönáchisö queé'li'. ¹⁷ Yugu' le rizë ládxi'ru gunru' lu yöl-la' bönáchisö queéru' biti' röjlöz le ré'ënë' Dios Bö' lá'ayi gunru', ate' lë na' ré'ënë' Dios Bö' lá'ayi biti' röjlöz le ré'ëni'ru' gunru' lu yöl-la' bönáchisö queéru'. Chopa ni, biti' röjlözgaca, en que lë ni na' biti' gaca gunli' ca ré'ëni' quézili'. ¹⁸ Channö ru'í'ili' lataj inná bë'enë' Dios Bö' lá'ayi libí'ili', bítirö inná be'e xibá queë' Moisés libí'ili'.

¹⁹ Naca bë' le tun bönachi lu yöl-la' bönáchisö quéguequi. Tun dul-la' le riguitsaj xibá que yöl-la' nutsaga na', enca' dul-la' le lë'ë. Tun yugu' le naxihui', en yugu' le catsahui'.

²⁰ Téquiguequi le bach budó' néquiniguequi. Tun yöl-la' gudzá'. Tu'dí'i luzé'eguequi, en ta'díl-lalen léguequi. Tu'zxe'e luzé'eguequi, en ta'lé nupa na', en tu'huídi'.

Ta'rúaj choplö, en tu'béaj tsólá'alö nupa dá'gaca léguequi.

²¹ Ta'zé ladxi' le dë que luzé'eguequi, en ta'guilaj xíguia'. Ta'zudxi, en tagu lë'e. Tu'dödi bë' ca túnguequi.

Le zían le caní túnguequi. Neda' ruxösa' ládxi'li' na'a para cabí gunli' caní ca na' buxösa' ládxi'li' z'f'alö, rn-nía': Nupa túngaca caní biti' ca' ila'deli' ila'yú'u ga na' rinná bë'ë Dios.

²² Channö zóalen Dios Bö' lá'ayi rë'u runru' caní: Nadxi'iru' luzá'aru'. Rudzeja ládxi'ru'.

Zoa dxi ládxi'do'oru'.
 Ribózaru' zxön ladxí'.
 Rufí ládxi'ru' luzá'aru'.
 Nácaru' dxi'i ladxí'.
 Rusudxinru' xtídza'ru'.
²³Nácaru' nöxaj ladxí'.
 Rinná be'e cuinru'.

Biti' ca' gunná bē'ē Moisés rē'u para cabí gunru' yugu' le caní. ²⁴Nupa néquiquequi queē' Cristo bítirō tun ca té'ēni quez, en cabí tun le ta'zēsō ladxí' lu yöl-la' bönáchisō queguequi. ²⁵Dios Bō' lá'ayi runnē' yöl-la' na'bán queéru'. Lē' cazē' ral-la' inná bé'enē' rē'u ca naca yúgu'tē le runru'.

²⁶Biti' ral-la' gun ba zxön cuinru', en cabí utsá'aru' luzá'aru', en cabí uzxé'eru' luzá'aru' turu' ia'turu'.

Ral-la' gácalenru' luzá'aru' turu' ia'turu'

6 Na'a, böchi' zána'do', channō il'é'eli' runē' dul-la' tu bönni' bóchi'li', nuli' zóalenē' Dios Bō' lá'ayi libí'ili', ral-la' gunli' ga ubí'i ládxe'ē bönni' na', pero run bayudxi gunli' caní lu yöl-la' nöxaj ladxí' queé'li', en uyú cuinli' tsate' cu'u tu' xihui' libí'ili' nöza dul-la'. ²Guli'gácalen luzá'ali' tuli' ia'tuli' tsca naca yuá' nabá-ga'li'. Channō gunli' caní uzóali' didza' le gunná bé'enē' Cristo rē'u.

³Channō zoa nu réqui chinadeli' yöl-la' nayépisē, en bití' bi nadeli' nu na', nu ni na' rizí' ye'e la' cuinsi. ⁴Tuhuéaj tuhuéajē' bönni' ral-la' uchi'a usoróē' que le runē'. Ní'irō channō urúajē' dxi'a, huáca gun ba zxön cuinē' ní'a que le chinunē', en bití' gun bayudxi uyúē' ca nún-gaca ia'zica'rō bönachi channō ba benrē' dxi'a o cabí. ⁵Tuhuéaj tuhuéajē' bönni' ral-la' gu'ē le nusubáguē'ē Dios lē'.

⁶Channō zoa nu rusedi libí'ili' ca naca le rinnē' dxi'a, ral-la' unódzjali' nu na' rusedi libí'ili' lati' que yúgu'tē le do' dē queé'li'.

⁷Biti' si' ye'e cuinli' tu' cuntú nu gaca si' ye'e Dios. Ulápalí' tsca naca le rázali'. ⁸Channō le rázali' naca yugu' le runli' ca rizēsō ládxi'li' lu yöl-la' bönáchisō queé'li', le ulápalí' gaca yöl-la' guti. Channō le rázali' naca yugu' le runli' ca raza ládxe'ē Dios Bō' Lá'ayi, ulápalí' le gunnē' Dios Bō' lá'ayi queé'li', le naca yöl-la' na'bán idú. ⁹Caní naca, bití' ral-la' huōa ládxi'ru' gunru' le naca dxi'a, tu' channō cabí huōa ládxi'ru', idxín dza uláparu'. ¹⁰Que lē ni na', bátatí'tēs gata' queéru' lataj, ral-la' gunru' le naca dxi'a quégaca yúgu'tē bönachi, en le naca lo, ral-la' gunru' caní quégaca böchi' zanru' ta'yija ladxí' Cristo.

Le buzúajē' Pablo lu guichi ga ruúdx

¹¹Buli'yú cate' bach didza' ni ruzúaja' lu guichi len na' cuina'. ¹²Nupa na' té'ēni ilún ga irugu lu xpéla'li' ca rinná bē' xibá queē' Moisés, túngaca caní para ulu'rúaj dxi'a lógaca bönachi, en cabí bi ilún queguequi tu' túngaca libán ca gútiē' Cristo lē'e yaga cruz. ¹³Yugu' bönni' na' ta'zí' lu ná'agaquiē' le narugu lu xpéla'-gaquiē' ca rinná bē' xibá queē' Moisés, bití' tu'zōē' didza' idutē ca rnna xibá na'. Té'ēnē' ilunē' ga irugu lu xpéla'li' para gaca ilún ba zxön cuíngaqiē' tu' ta'nná bé'enē' libí'ili' para irugu lu xpéla'li' caní. ¹⁴Ca naca quia' neda', cú'usa' yöl-la' ba le benē' Xanru' Jesucristo cate' gútiē' lē'e yaga cruz. Tu' nözi le benē' Cristo lē'e yaga cruz, yugu' le dē yödžolió ni naca quia' ca tu le chinati, bití' rufí ládxa'a le, ate' neda' naca' quégaca bönachi yödžolió ni ca tu bönni' nati, bití' tufí ladxí' neda'. ¹⁵Channō nácaru' tuz len Jesucristo, bití' bi run channō narugu lu xpéla'ru' ca rinná bē' xibá na' o channō cabí narugu lu xpéla'ru' caní. Le run bayudxi naca gácaru' bönachi cubi niu' lē'e ládxi'do'oru'. ¹⁶Yúgu'tē bönni' na' tunē' ca rinná bē' xibá runa' ni, en yúgu'tē bönni' na' néquiquequinē' queē' Dios,

rinábida'-ně' Dios guně' ga soa dxi ládxi-
i'do'gaquiě', en huéchi' ládxi'ě légaquiě'.

¹⁷Na'a zě lo, cuntu nu bönni' ral-la' ut-
sé'ě neda', tu' nácagaca bě' butsóa zóa-
gaca lu xpéla'a naca' huen dxin queě'
Xanru' Jesús.

¹⁸Na'a, böchi' zána'do', rinábida'-ně'
Xanru' Jesucristo uzá' ládxi'ě queéli'
yúgu'téli'. Ca' caz.

DIDZA' GUSÓL-LĒ'Ē PABLO YÖDZÖ ÉFESO

Pablo rugapë' Dios bönachi queë' Cristo nacua' Éfeso

1 Neda', Pablo, naca' gubáz nasól-lë'ë Jesucristo tu' gú'uni quézinë' Dios gaca' caní. Rugapa' Dios libí'ili', zóalí' Éfeso. Néquili' quez queë' Dios, en réajlë'ëli' Jesucristo. ²Rinábida'-në' Xúziru' Dios, enca' Xanru' Jesucristo uzá' ládxë'ë queé'li', en gunë' ga soa dxi icja ládxí'do'oli'.

Le naca queë' Dios Bö' Lá'ayi rata' queéru'

³¡Ral-la' cú'uru'-në' yöl-la' ba Dios, Xuzë' Xanru' Jesucristo! Tu' nácaru' tuz len Cristo, Dios chibuzá' ládxë'ë queéru' yúgu'të le naca dxi'a que yehua' yubá, le runë' Dios Bö' Lá'ayi ga rata' queéru'. ⁴Zí'atëlö ca benë' Dios yödzölió ni, guró cazë' rë'u para guéquiru' quez queë' tsözxón len Cristo, en gácaru' bönachi lá'ayi queë', en gácaru' idú dxi'a lahuë' Lë'. ⁵Dios bucözë' zí'atëlö sí' lu në'ë rë'u ca zxf'ini cazë' tsözxón len Jesucristo, tu' guyaza ládxë'ë gaca caní, en tu' naca le gú'uni quézinë' gunë'. ⁶¡Ral-la' cú'utica'siru'-në' Dios yöl-la' ba ni'a que le buzá' ládxë'ë queéru', yugu' le bën-nasë' queéru' tu' nácaru' tuz len Zxf'inë', Nu na' nadxf'inë'! ⁷¡Cristo böá'uë' rë'u cate' ni' gútië' uláz queéru' para gaca uniti lahuë' Dios rë'u ca naca dul-la' nabágaru'! ¡Zxóntërö naca le buzá' ládxë'ë Dios queéru', ⁸lë na' rúnnadë'ë Lë' queéru'! ¡Lu yöl-la' rácada' queë', en lu yöl-la' réajni'i queë' ⁹benë' Dios le bucözë' queéru', ate' buluf'inë' rë'u lë na' bigachi', le buzóa cazë' zí'atëlö usudxinë' lu në'ë Cristo! ¹⁰Lë na' buzóa cazë' Dios usudxinë' cate' izá'a dza, naca gunë' ga ilaca tuz, en ila'cuá' lu në'ë Cristo yúgu'të

le dë, le nacua' yehua' yubá, en le nacua' yödzölió ni.

¹¹Tu' nácaru' tuz len Cristo, Dios guró cazë' rë'u zí'atëlö para guequi queéru' le nequi queë' Xúziru' Dios, lë na' bucözë' queéru' ca naca le gú'uni quézinë' Dios, Nu run yúgu'të ca ré'ëni quézinë' Lë'. ¹²Caní benë' Dios para cú'uru'-në' yöl-la' ba ca naca yöl-la' zxón queë', rë'u ni ruzxöni ládxí'ru'-në' Cristo zí'atëlö ca ia'zíca'rö bönachi. ¹³Lësca' caní guca queé'li'. Cate' biyónili' didza' idútë li, didza' dxi'a ca gaca uláru', guyéajlë'ëli' Cristo, ate' Dios buzóë' queé'li' le naca bë' nácali' queë', tu' guchízië' icja ládx-i'do'oli' Dios Bö' Lá'ayi, Nu na' guzxf' lu në'ë Dios isól-lë'ë queéru'. ¹⁴Tu' zóalenë' Dios Bö' Lá'ayi rë'u, naca löza guequi queéru' le nequi queë' Xúziru' Dios cate' údxi huóá'uë' rë'u, rë'u na' chinéquiru' queë'. Caní naca para gaca yöl-la' ba que yöl-la' zxón queë'.

Pablo rinábinë' Dios gunnë' queéru' yöl-la' réajni'i

¹⁵Que lë ni na', cate' biyönda' ca réajlë'ëli'-në' Xanru' Jesús, en ca nadxf'ili' yúgu'të bönachi queë' Dios, ga ridxintë na'a dza ¹⁶biti' ca' rusana' rea'-në' Dios: "Xclenu'", ca naca queé'li'. Røjneda' libí'ili' cate' rulidza'-në' Dios. ¹⁷Rinábida'-në' Dios queë' Xanru' Jesucristo, Dios na' náquië' Xúziru' nayépisëtërë', rinábida'-në' isól-lë'ë Dios Bö' Lá'ayi queé'li', Bö' na' runna yöl-la' réajni'i queéru', en rulu'fi rë'u ca naca cazë' Dios, para gaca idú ca núnbë'ëru'-në'. ¹⁸Rinábida'-në' Dios uzéajni'inë' libí'ili' lu icja ládxí'do'oli' para gaca inózili' ca naca le runru' löza, lë na' bulidzë' libí'ili' para uzí'ili' xibé, en para inózili' ca naca yöl-la' tsahui' que yehua' yubá, le guequi quégaca nupa néquiguequi queë' Dios, ¹⁹enca' para inózili' cate' zxón naca yöl-la' huáca queë', le rácalen rë'u ni

réajlë'ëru' Lë'. Yöl-la' huáca zxön ni naca la' lébisö na' bulu'e lahui Dios ²⁰cate' ni' busubanë' Cristo lu yöl-la' guti, en benë' ga gurö'ë cuita lë'ë Lë cazë' ga nayépisëtë'rë' ni' yehua' yubá. ²¹Rinná bé'enë' nupa ni' ta'nná bé', en nupa ni' dë lu né'eguequi, en nupa ni' nadéli'gaca yöl-la' huáca, en nupa ni' nácataga xan. Cristo nayépisëtë'rë' ca yúgu'të nupa nadéli'gaca yöl-la' unná bé' yödzülió ni, en lu yödzülió si' za'. ²²Dios budödë' lu në'ë Cristo yúgu'të le dë para inná bé'enë' le, en buzö'ë Lë' quégaca bönachi queë' para gáquië' Xanru' lu yúgu'të le nequi queéru'. ²³Yugu' bönachi queë' Cristo nácataga ca idütë le naca cazë', ate' raquië' Lë' idú lu le naca cazë' na'. Run cazë' Lë' ga raca idú yúgu'të le dë.

Nuláru' tu' nadxi'inë' Dios rë'u

2 Dios chibennë' yöl-la' na'bán idú queéli', sal-la' gúcali' z'fatëlö ca bönni' nátigaca tu' nözi dul-la' nabága'li', en ni'a que dö' biá'ali'. ²Dza ni' benli' lébisö ca tun bönachi biti' nácataga tsahui' nacua' yödzülió ni, en benli' ca gú'uni tu' xihui', nu rinná bé' lu bö'ös, en rugún dxin nupa biti' túngaca ca rna xtídzë'ë Dios. ³Lësca' caní gúcaru' yúgu'tëru' rë'u. Benru' ca guzësö ládxi'ru', en ca guyaza ládxi'ru' lu yöl-la' bönáchisö queéru'. Que lë ni na' gubá-ga'ru' dul-la' lahuë' Dios le nun ga gunë' rë'u xíguia' ca gunë' quéguequi ia'zica'rö bönachi. ⁴⁻⁵Ní'irö cate' ni' nácaru' ca bönni' nátigaca tu' nözi dul-la' gubá-ga'ru', Dios busubanë' rë'u lu yöl-la' guti tsözxón len Cristo tu' buéchi' ládxi'ë rë'u, en bidxi'ide'enë' rë'u. Nuláli' tu' zoa le buzá ládxi'ë Dios queéli'. ⁶Dios busubanë' rë'u tsözxón len Cristo para gunë' ga có'oru' tsözxón len Lë' ga ni' rinná bé'ë yehua' yubá. ⁷Caní benë' Dios, en bulu'ínë' bönachi si' zá-gaca ca naca yöl-la' tsahui' que le buzá

ládxi'ë queéru', tu' budödë' Jesucristo ni'a queéru', le naca bé' ca nadxi'ide'enë' rë'u. ⁸Nuláli' tu' zoa le buzá ládxi'ë Dios queéli' tu' réajlë'ëli' Cristo. Busölë' lib'ili', calëga tu' nacua' le naca dxi'a benli' lib'ili', pero tu' naca le runsë' Dios. ⁹Cuntu nu gaca gun ba zxön cuini tu' nulá, tu' cabí nulá nu na' tu' nacua' le naca dxi'a nun nu na'. ¹⁰Le nácaru' naca le nun cazë' Dios. Tu' nácaru' tuz len Jesucristo, bucu'ë rë'u para gunru' le nácataga dxi'a, le bucözë' z'fatëlö gunru'.

Rö'ö dxi icja ládxi'do'oru' lahuë' Dios ni'a que le benë' Cristo

¹¹Gulí'tsöjné ca gúcali' z'fatëlö. Gúcali' bönachi izá'a, en que lë ni na' yugu' bönni' judío, bönni' na' ta'chúguië' lu xipéla'gaquië' le naca bé' dá'gaquië' Dios, en nazí' lágaquië' bönni' narugu lu xipéla'gaquië', ta'nnë' nácali' lib'ili' bönni' biti' narugu lu xipéla'gaquië'. ¹²Dza ni' nubíga'li' ga zoë' Cristo. Gúcali' bönni' zi'tu' lógaca bönachi Israel, en biti' buzí'ili' xibé didza' benë' tsutsu Dios, en guzxi' lu në'ë bi gata' quégaca bönachi queë'. Guzóali' yödzülió ni, biti' zoa le runli' löza, en biti' núnbë'nili'-në' Dios. ¹³Na'a, nácali' tuz len Jesucristo! Z'fatëlö nubíga'li' lib'ili' zi'tu' ga zoë' Dios, pero na'a nudxi'guë'ë Dios lib'ili' gála'sö tu' gútië' Cristo uláz queéru'! ¹⁴Lë cazë' Cristo runë' ga rö'ö dxi icja ládxi'do'oru' lahuë' Dios. Lë' benë' ga yugu' bönni' judío, en yugu' bönni' zi'tu' bulu'huóáquië' tuz bönachi, en busúluë' yöl-la' rilé le guléaj légaquië' choplö ca tu zö'ö zxön. ¹⁵Lë ni benë' Cristo cate' gútië' uláz queéru', en gudúë' yugu' xibá, en yugu' le rinná bé' nazúajgaca lu xibá quégaca bönachi judío, ate' chopa có' bönachi na', bunë' tuz bönachi cubi, nupa nácataga tuz len Lë' cazë'. Caní benë', en gulequi dxië' yöl-la' rilé na'. ¹⁶Cate' gútië' Cristo lë'e yaga cruz, busúluë' yöl-la' rilé na', ate' chopa có' bönachi

na', bunë' légaquië' ca tuz bönachi, en gulequi dxíë' icja ládxí'do'gaquië' lahuë' Dios.

¹⁷Caní guca, buluí'i lahuë' Cristo, en benë' libán que didza' dxi'a ca ribequi dxíë' yúgu'të bönachi, libí'ili' na' nácali' bönachi izá'a, en zóali' zí'tu' ga zoë' Dios, enca' bönachi judío nacua' gála'sö. ¹⁸Na'a, ni'a que le benë' Cristo, gaca ibí-ga'ru' lahuë' Xúziru' Dios, tu' zóalenë' Lë cazë' Dios Bö' Lá'ayi rë'u, sal-la' nácaru' bönachi judío o bönachi izá'a. ¹⁹Que lë ni na', libí'ili', bönachi izá'a, bíti'rö nácali' ca bönachi zí'tu' zóali' tu luyú biti' nequi queé'li', pero nabábalenli' bönachi queë' Dios. ¡Chinácali' ca bi'i queë cazë' Dios! ²⁰Libí'ili' nácali' ca tu yu'u zoa tsaz. Nácali' ca yugu' guiój zxóagaca lahui xilibi zö'ö, le bulu'cu'ë yugu' bönni' gubáz queë' Cristo, en yugu' bönni' gulu'ë didza' uláz queë' Dios, ate' Lë cazë' Jesucristo náquië' ca guiój lo que xilibi zö'ö na'. ²¹Idútë yu'u na' le nácali' libí' cázali' riyasa lahui xilibi zö'ö na' naca cazë' Cristo, en nacua' tu'lapa yugu' guiój que, para gaca tu yudo' lá'ayi le naca tuz len Xanru'. ²²Libí' cázali' nácali' tuz len Cristo Nu buzóa libí'ili' para gácali' ca tu yu'u ga na' yu'ë Dios, tu' dzáguë' Dios Bö' Lá'ayi libí'ili'.

Náquië' Pablo huen libán que didza' dxi'a lógaca bönachi izá'a

3 Que lë ni na', neda', Pablo, yu'a lidxi guíë tu' runa' libán queë' Jesucristo para uzí'ili' xibé', libí'ili', bönachi izá'a. ²Réquida' chinóz quezili' ca benë' Dios, budödë' lu na'a dxin runa' para uzí'ili' xibé le ruzá' ládxë'ë queëru'. ³Dios bulu'e lahui le bigachi' queë', en buzéajni'inë' neda' ca naca. Ca naca lë ni chibuzúaja' láti'do' queé'li' lu guichi. ⁴Cate' ulábali' lë ni, gúnbë'ëli' le réajni'ida' ca naca le bigachi' ca naca queë' Cristo. ⁵Dza ni'te cuntú nu buzéajni'inë' Dios ca naca le bigachi' na', pero na'a,

lu në'ë Dios Bö' Lá'ayi, chibulu'ë lahui Dios ca naca, tu' buluí'inë' yugu' bönni' gubáz lá'ayi queë', en yugu' bönni' tu'ë didza' uláz queë'. ⁶Caní rna lë na' bigachi': "Ni'a que didza' dxi'a ila'deli' bönachi izá'a tsözxón len bönachi judío le nequi queë' Dios, ate' ulu'huóáquië' ca tuz bönachi, en ulu'z-i'ë xibé tsözxón len légaquië' le guzxi' lu në'ë Dios unódzjé' quégaquië' tu' dá-gaquië' Jesucristo." ⁷Dios buzá' ládxë'ë quia' le bennë' quia'. Lu yöl-la' huáca zxón queë' benë' neda' huen libán que didza' dxi'a queë'. ⁸Nacra' cá'asö ca yúgu'të bönachi queë' Dios, pero Lë buzá' ládxë'ë quia' gaca' huen libán lógaca bönachi izá'a que didza' dxi'a ca naca yöl-la' tsahui' queë' Cristo, le nazá-ca'da'. ⁹Dios budödë' lu na'a guna' ga iléquibe'e yúgu'të bönachi ca naca le buzóa cazë' Dios dza ni'te, lë na' naca tu le bigachi' queë' Dios, Nu ben yúgu'të le rilé'eru'. ¹⁰Caní guca, para iléquibe'e yúgu'të nupa ta'nná bë', en nupa dë lu né'eguequi ni' yehua' yubá, idú ca naca yöl-la' réajni'i queë' Dios cate' ila'lé'e ca nácagaca bönachi queë' Cristo. ¹¹Dios benë' lë ni, busudxinë' lë na' buzóa cazë' dza ni'te, le benë' lu në'ë Xanru' Jesucristo. ¹²Tu' nácaru' tuz len Cristo, nazí'iru' lataj ibíga'ru' idú ladxi'ru' lahuë' Dios, tu' réajlë'ëru' Lë. ¹³Que lë ni na' ráta'yua' loli' biti' gaca chopá ládxí'li' tu' nözi le riguí' rizáca'a neda' para gácale-na' libí'ili', le naca tu le uzí'ili' xibé.

Ca naca yöl-la' nadxi'i queë' Cristo

¹⁴¡Que lë ni na', ruzechu zxiba' lahuë' Xuzë' Xanru' Jesucristo! ¹⁵Ca lë', nazí' ca' lógaca yúgu'të bönachi queë', nupa nacua' yehua' yubá, en nupa nacua' yödzölió ni. ¹⁶Rinábida'-në' Xúziru' Dios, lu yöl-la' zxón queë', le nazáca'da', gunnë' queé'li' yöl-la' huáca queë' Dios Bö' Lá'ayi, en gunë' ga gálali' lu icja ládxí'do'oli'. ¹⁷Rinábida'-

në' Cristo soë' icja ládxi'do'oli' tu' réa-
jlë'ëli' Lë'. Rinábida'-në' gunë' ga sóali'
tsaz lu yöl-la' nadxí'i queë', en biti'
tséaj bö' icja ládxi'do'oli' ca nadxí'ili'-
në', ¹⁸ para gaca tséajni'ili' tsözxón len
yúgu'të bönachi queë' Cristo ca naca yöl-
la' nadxí'i queë', tsca ga ridxín ní'ilö,
en ná'alö, en cadxí'ilö, en xitsá'alö.
¹⁹ Rinábida'-në' Dios gunë' ga gúnbë'ëli'
yöl-la' nadxí'i na', le cabí gaca gúnbë'ëru'
idú ca naca, para sóalen libí'ili' idú le
naca cazë' Dios.

²⁰ ¡Na'a, yöl-la' ba Dios, Nu gaca gún-
tëro ca gaca inábaru' o ca gaca sa' ládxi-
i'ru', ugunë' dxin yöl-la' huáca queë' lu
icja ládxi'do'oru'! ²¹ ¡Gácatica'só queë'
Dios yöl-la' ba lógaca bönachi queë'
Cristo, en lahuë' Lë' cazë' Jesucristo, na'a
dza, en yúgu'të dza zá'gaca! ¡Ca' gaca!

Dios Bö' Lá'ayi nunë' rë'u tuz

4 Na'a, neda' ráta'yua' loli', yu'a lidxi
guíë ni tu' runa' libán queë' Cristo,
rinábida' libí'ili' gunli' idú ca ral-la' ilún
nupa bulidzë' Dios para ilequi queë',
ca na' bulidzë' ca' libí'ili'. ² Guli'gaca
nóxaj ladxí', en dxi'i ladxí'. Guli'cóz zxón
ladxi'. Guli'güí' ladxí' luzá'alí' tuli' ia'tuli'
lu yöl-la' nadxí'i queé'li'. ³ Guli'güí' ladxí'
gácatica'sili' tuz ca na' chinunë' Dios Bö'
Lá'ayi libí'ili', gunli' caní lu yöl-la' riböza
tsáhui'do' queé'li' le rutsaga libí'ili'.

⁴ Tuz naca idútë le naca cazë' Cristo le
nadzágaru' rë'u.

Tuzë' náquië' Dios Bö' Lá'ayi dzáguië'
rë'u.

Tuz naca le runru' löza, lë na' bulidzë'
rë'u Dios para uzí'iru' xibé.

⁵ Tuzë' náquië' Xanru'.

Tuz le réajlë'ëru'.

Tuz le bidílaru' nisa.

⁶ Tuzë' náquië' Dios Nu naca Xúziru'
yúgu'tëru'.

Lë' rinná bé'enë' yúgu'tëru'.

Rugunë' dxin yúgu'tëru'.

Riböza cazë' Lë' lu icja ládxi'do'oru'
yúgu'tëru'.

⁷ Tu turu' nazí'iru' tu yöl-la' huáca
queë' Dios tsca naca le bennë' Cristo
que queéru'. ⁸ Naca caní ca na' nazúaj lu
guichi lá'ayi le rnna:

Buëpë' yehua' yubá, guché'ë zían bö-
nachi gula'dzúngaca.

Gudísië' quégaca bönachi le runódzjasë'
quégaquië'.

⁹ ¿Bizxi ré'ëni inná lë na' rnna: buëpë'?
Rusëdi rë'u bötjë' zí'alö, en bidxinë'
yödzülió cadxí'ilö ni. ¹⁰ Nu na' bötaj naca
Bönni' na' buëpë' xitsá'tëro ni' yehua'
yubá para budzë'ë yúgu'të len le naca
cazë' Lë'. ¹¹ Cristo caz bennë' que queéru'
yugu' yöl-la' huáca queë':

Bë' lataj bal-lë' bönni' iláquië' gubáz
queë'.

Benë' ga tu'ë didza' uláz queë' Dios
ia'bal-lë' bönni'.

Gusól-lë'ë ia'bal-lë' tsöjéngaquië' libán
que didza' dxi'a.

Bucu'ë ia'bal-lë' para ilún chí'ë bönachi
queë'.

Bucu'ë ia'bal-lë' para ulu'sédinë' bönachi
queë'.

¹² Cristo caz bupé'ë bönachi queë' caní
para gaca ilún xichinë', para ilún ga ilaca
idú nupa nácgaca ca idútë le naca cazë'
Lë'. ¹³ Caní gaca ga idxintë dza huóá-
caru' tuz yúgu'tëru' ca réajlë'ëru' Cristo,
en ca núnbë'ëru'-në' Zxf'inë' Dios. Gá-
caru' nál-la, en huóácaru' idú ca náquië'
Lë' cazë' Cristo. ¹⁴ Bítí'rö gácaru' ca yugu'
bí'ido', ca nácgaca nupa na' tu'tsa'të ca
túngaca, en nácgaca ca tu le naché' lu
yegu, o ca tu le röjché' bítí'tës bö' recja,
tu' ta'zi' lu né'eguequi bítí'tës didza' nu
rusëdi léguequi, nu na' rizí' ye'e léguequi
len yöl-la' sina' que, en run ga ta'chixi
ta'nigui. ¹⁵ Na'a, rë'u ni, tu' nadxí'iru'
luzá'aru', ral-la' güf'iru' didza' le naca
idútë li para gaca huóácaru' idú ca
náquië' Cristo, en gácaru' tuz len Lë', Nu
naca Xani idú le naca cazë', le nácaru'

rë'u. ¹⁶ Cristo caz runë' ga rutsaga dxi'a idütë le naca cazë', le nácaru' rë'u, ate' idütë le naca cazë' na' naguela' tsözxón ni'a que lë na' run tuz idütë le naca cazë'. Cate' tu turu' runru' xichinru', rë'u na' dzágaru' le naca cazë', idütë rizxón, en raca idú, ca na' zeaj rácarö idú ca nadxí'iru' luzá'aru'.

**Yöl-la' na'bán cubi náparu'
tu' nácaru' tuz len Cristo**

¹⁷ Uláz queë' Xanru' rea' libí'ili' lë ni, en rigu'a le lu ná'ali', rnní'a: Bítí'rö gunlí' ca tun nupa bití' núnbë'gaquië' Dios, nupa na' tun ca ta'za'sö ládxi-i'guequi, ¹⁸ en nachul-la nanítigaca icja ládxi'do'guequi. Tu' cabí nózguequinë' le nácatë, en nazídigaquië', bití' nazí'gaquië' yöl-la' na'bán na' runnë' Dios queë'ru'. ¹⁹ Bití' ca' tu'tuf'inë'. Nudödi cuíngaquië' lu le ruá' dö'. Idú ládxi'gaquië' tunë' yúgu'të le cabí naca tsahui'. ²⁰ Nupa ni' bulu'sedi libí'ili' ca naca queë' Cristo, bití' ca' bulu'sedi libí'ili' gunlí' ca tun bönachi caní. ²¹ Le naca idütë li biyónili' ca naca queë' Cristo, en le nácali' queë' tu'sédinë' libí'ili' le naca idütë li na' zóalen Jesús. ²² Gulí'nná be'e yöl-la' bönáchisö queéli' le gúcali' zí'alö, lë na' riniti ni'a que yöl-la' rizé ládxi' queéli' le ruá' dö' le guzxi' ye'e libí'ili'. ²³ Ral-la' huóacali' cubi lu icja ládxi'-do'oli', en lu bö' naca cázali'. ²⁴ Ral-la' sí'ili' yöl-la' bönachi cubi le nunë' Dios ca naca cazë' Lë', le ruluf'i cuini ni'a que le naca dxi'a, en le naca tsahui' runlí', en run ga gaca gunlí' caní.

²⁵ Que lë ni na', bítí'rö si' yé'ëli'. Yúgu'tëru' ral-la' güf'ilenru' luzá'aru' didza' le nácatë, tu' dzágaru' yúgu'tëru' idütë le naca cazë' Cristo.

²⁶ Channö hualéli', bití' ral-la' gunlí' dul-la'. Bití' ileli' xidzé. ²⁷ Bití' bi gunlí' le güf'i lataj tu' xihui' ucúl-la libí'ili'.

²⁸ Nu bönni' ribanë' ral-la' usanë' yöl-la' gubán queë', en tsázië' huen dxin para

gata' queë' bi unödzejë' quégaca nupa ta'yadzaj.

²⁹ Bití' güf'ili' didza' xihui', pero guli'güf' didza' dxi'a, yugu' le ilácalen nu yöni, en ilún ga gaca dxi'a que nu na'. ³⁰ Bití' usuhuf'inili' Dios Bö' Lá'ayi, tu' naca bë' néquili' queë' Dios tu' zóalenë' Dios Bö' Lá'ayi libí'ili', ate' idxín dza údxi usölé' libí'ili' lu dul-la'.

³¹ Gulí'cúa ladaj libí'ili' yöl-la' ruzxë'e, en yöl-la' ridzá'a, en yöl-la' rilé, en yöl-la' ridil-la didza', en yúgu'të yöl-la' bití' rilé'e luzá'ali' dxi'a.

³² Ral-la' gácali' dxi'i ládxi', en huéchi' ládxi'li' luzá'ali' tuli' ia'tuli', en uniti loli' luzá'ali' tuli' ia'tuli', ca na' benë' Dios, buniti lahuë' libí'ili' tu' nácali' tuz len Cristo.

**Ca ral-la' ilaca nupa nácgaca ca
bi'i queë' cazë' Dios**

5 Tu' nácali' ca bi'i queë' cazë' Dios, ate' nadxí'inë' libí'ili', guli'güf' ládxi' gácali' ca náquië' Lë'. ² Ca naca yúgu'të le runlí':

Ral-la' idxí'ili' luzá'ali' ca na' benë' Cristo.

Bidxí'inë' rë'u, en budödi cuinë' lu yöl-la' guti uláz queë'ru'.

Ben cuinë' ca böa' bédxido' rútiru'-ba' lahuë' Dios tu' nözi dul-la' nabága'ru'.

Gúquië' ca' ca tu le rilá' zxi xi le raza ládxe'ë Dios le rigú'uru' lu bucugu lá'ayi queë'.

³ Tu' nácali' queë' Dios, bití' ca' gunlí' le ruá' dö', en bití' gunlí' le cabí ral-la' gunlí', en bití' uhuí'di'li'.

Ní'irö cuntu nu gaca bi innë' queéli'.

⁴ Bití' güf'ili' didza' xihui', o didza' canóz, o didza' cá'asö, yugu' le cabí ral-la' gunlí',

pero nácarö dxi'a guiéli'-në' Dios:
"Xclenu'."

⁵ Chinóz quézili' nitüë' bönni' runë' le ruá' dö' biti' ca' tsázië' ga rinná' bë'ë Cristo tsözxón len Dios, o nu bönni' runë' le cabí' ral-la' gunë', o nu bönni' ruhuídi'në'. Nu na' ruhuidi' naca ca nu reaj ladxí' budó' guió'j budó' yaga. ⁶ Biti' güf'ili' lataj nu si' ye'e lib'ili' len didza' biti' nácatë. Tu' nözi dul-la' caní Dios gunë' xíguia' nupa biti' túngaca ca rna xtídzë'ë. ⁷ Biti' ca' gunli' tuz bö-nachi caní.

⁸ Zí'atëlö guzóali' ga naca chul-la que dul-la', pero na'a zóali' lu bení', tu' ná-calí' tuz len Xanru'. Guli'gaca ca bö-nachi ta'dá lu bení', ⁹ tu' run bení' na' ga gá-caru' dxi'i ladxí', en ga güf'iru' didza' le naca idütë li, en ga gácaru' tsahui'. ¹⁰ Guli'güf' ladxí' inózili' le raza ládxë'ë Xanru'. ¹¹ Biti' gútsa'li' nupa tun le ruá' dö', lë na' tunë' ga naca chul-la que dul-la', pero buli'béaj ga liná' yugu' lë na' tunë'. ¹² Utuí'iru' güf'iru' didza' ca naca le tun bö-nachi na' bagáchi'sö. ¹³ Cate' bi ubéajru' ga liná', gaca bë' yúgu'të tsa ná-cagaca, tu' gun le naca bení' ga gaca bë' yúgu'të. ¹⁴ Que lë ni na' nazúaj lu guichi lë na' rna:

Bubán, li' na' rasiu'.

Guyasa ladaj nupa nátigaca.

Cristo uzenf'ë quiu'.

¹⁵ Buli'yú cuinli' ca runli'. Biti' gácali' nupa biti' ta'yéajni'ini, pero guli'gaca bö-nachi ta'yéajni'i. ¹⁶ Guli'sí' xibé lataj dë queéli' tu' chizóaru' dza biti' raca dx-i'a queéru'. ¹⁷ Biti' gácali' bönni' biti' bi nózguequinë'. Guli'güf' ladxí' tséajni'ili' le ré'ënë Xanru' gunli'.

¹⁸ Biti' súdxili', tu' gun yöl-la' rizudxi ga nítili' tsaz.

Guli'güf'ida' lataj inná' bë'enë' Dios Bö' Lá'ayi lib'ili'.

¹⁹ Guli'güf'ilen luzá'ali' didza' tuli' ia'tuli',

ugunli' dxin yugu' le rul-la' légaca salmo,

en yugu' le rul-la' yöl-la' ba Dios,
en yugu' le rul-la' nagu'ë Dios Bö' Lá'ayi
icja ládxí'do'oru'.

Idú ládxí'ru' ral-la' gúl-laru' queë',
le cú'uru'-në' Dios yöl-la' ba.

²⁰ Guli'gún dxin Lë' Xanru' Jesucristo,
en guli'guf'ëtica'së' Xúziru' Dios:
"Xclenu'" ca naca yúgu'të.

Ca ral-la' gunru' quégaca di'a dza queéru'

²¹ Guli'gún ca rna xtídzá' luzá'ali' tuli' ia'tuli' para caní gunli'-në' Dios zxön.

²² Lib'ili', yugu' nigula, guli'gún ca rna xtídzá'gaquië' bönni' que queéli', ca na' ral-la' gunli' ca rna xtídzë'ë Xanru'. ²³ Caní ral-la' gunli', tu' rinná' bë'enë' bönni' nigula queë' ca na' runë' Cristo, rinná' bë'enë' bö-nachi queë'. Cristo náquië' ca' Nu rusölá bö-nachi queë', nupa na' dzágagaca le naca cazë' Lë'. ²⁴ Ca na' tun bö-nachi queë' Cristo ca rna xtídzë'ë, lësca' caní ral-la' ilunnu nigula ca rna xtídzá'gaquië' bönni' que queégacanu ca naca yúgu'të le raca.

²⁵ Lib'ili', yugu' bönni', ral-la' idx'ili'-nu nigula que queéli' ca na' Cristo nadxí'inë' bö-nachi queë', en budödi cuinë', gútië' uláz quégaquië'. ²⁶ Gútië' Cristo para bubéajë' quez queë' Dios bö-nachi queë' na', ate' nayárigaca tu lu nisa le naca xtídzë'ë. ²⁷ Gútië' uláz quégaquië' para gaca usudxinë' légaquië' lahuë' Dios, ná-cagaquië' ca tu lari' lachi, biti' nuá' bösaj le në'aj, en biti' naxú'una, en biti' zoa nitú le run ditaj le, pero runë' ga ilácagaquië' idú dxi'a, cuntu nu gaca bi inné' quégaquië'. ²⁸ Ral-la' idx'ili'-nu nigula que queéli' ca na' nadxí'i cuinli'. Nu bönni' nadxí'inë'-nu nigula queë', nadxí'i cuinë'. ²⁹ Cuntu nu bönni' runi zi' cuinë', pero rugahuë', en run chi'i cuinë', ca runë' ca' Cristo, ca rúnlenë' bö-nachi queë', ³⁰ nupa dzágagaca idütë le naca cazë'.

¡Rë'u ni dzágaru' le naca cazë' Lë'!

¡Néquiniru' xipél'é, en dxita queé'!

³¹Lësca' caní nazúaj lu guichi lá'ayi le rnna: "Que lë ni na' tu bönni' ral-la' ucá'anë' xuz xin'é para tsöjsóalenë'-nu nigula queé', ate' irópatë' ulu'huóaqüé' tuz." ³²Lë na' nazúaj lu guichi ni ru-luf'i lahui tu le naca idútë li, ate' neda' réquida' ru'í didza' ca' ca naca queé' Cristo, en quégaca bönachí queé' na'. ³³Lësca' ru'í didza' ca naca queé'li'. Yúgu'tëli' lib'íli', bönni', ral-la' idxí'li'-nu nigula que queé'li' ca na' nadx'í cuinli', ate' yugu' nigula ral-la' ilunnu bal bönni' que queégacanu.

6 Lib'íli', yugu' b'ído', ral-la' gunli' ca rnna xtídzá'gaquié' xuz xiná'ali' para caní gunli' ca rnna xtídzë'ë Xanru'. Ral-la' gunli' le naca tsahui'. ²Xibá z'íalö na' benë' Dios le naché' tu le guzx' lu në'ë gunë', naca lë na' rnna: "Ben bal xuz xinó'o, ³ate' gaca dxi'a quiu', ate' xidzé su' ibanu' yödzölió ni."

⁴Lib'íli', yugu' xuz, biti' gun leli' zxi'inili', pero buli'xón légacabi', en guli'sína' légacabi', en buli'sëdi légacabi' ca raza ládxë'ë Xanru'.

⁵Lib'íli', núlöli' nácali' bönni' nadó'ogaca, guli'gún ca rnna xtídzá'gaquié' xanli' luyú ni idú ládx'i'li', gunli' légaquié' bal lu yöl-la' radxi queé'li', en gunli' xichíngaquié' ca ral-la' gunli' xichinë' Cristo. ⁶Guli'gún xichíngaquié', calégasö cate' ni' tu'yüë lib'íli' para urúajli' dxi'a lógaquié', pero idú ládx-i'li' guli'gún xichíngaquié' ca raza ládxë'ë Dios, ca na' ral-la' gunli' xichinë' Cristo. ⁷Idú ládx'i'li' guli'gún xichíngaquié', ate' caní gaca, gunli' xichinë' Xanru', en calégasö xichíngaca bönachí. ⁸Nöz quézili' ca gunë' Xanru'. Ubi'ë que queéru' tsa naca le dxi'a runru' sal-la' nadzanru', o sal-la' nácaru' bönni' nadó'ogaquié'.

⁹Lib'íli', nacua' queé'li' bönni' nadó'ogaca, guli'gún dxi'a caní quégaca huen dxin queé'li' na', en biti' uzéli' ba nadx légaquié'. Guli'tsöjné ca naca queé'li',

yú'uli' lu në'ë Xanru' zoë' yehua' yubá la' ca nácatë quégaquié', ate' Lë' biti' rutsé'ë ca runë' que que bönachí.

Dios runnë' queéru' le tun chi'i rë'u

¹⁰Na'a, böchi' luzá'ado', guli'gaca tsutsu tu' nácali' tuz len Xanru', en zóalen lib'íli' yöl-la' huáca zxön queé'.

¹¹Guli'gún chi'i cuinli', ugunli' dxin yugu' le runnë' Dios queéru', le tun chi'i rë'u, para gaca sóali' tsutsu cate' gué'ëni si' bë' tu' xihui' lib'íli'. ¹²Biti' ridí'l-lalenru' bönachí néquiguequini bëla', en dxita, pero ridí'l-lalenru' yöl-la' unná bë' quégaca bö' xihui' ta'dá lu bö'ös, en dzágagaca nupa ta'nná bë', en nupa nadéli'gaca yöl-la' unná bë', en nupa dë lu ná'agaca, nupa nacua' yödzölió ni ga naca chul-la que dul-la'.

¹³Que lë ni na':

Guli'sí' yúgu'të le runnë' queéru' Dios le tun chi'i rë'u,
para cate' idxín queéru' dza ni' ilaca le nácgaca xihui',
gaca guá' ilenli',
en cate' údxi gunli' caní, ugá'anali' tsutsu.

¹⁴Guli'sóa tsutsu.

Guli'sí' le naca idútë li,

le gaca queé'li' ca tu guídí guga' lë'ëli'.

Guli'gaca tsahui' tu' gun chi'i lib'íli' le naca tsahui'

ca run tu lari' yödx run chi'i luchu'ë bönni' rejë' gudil-la.

¹⁵Guli'sóa sina' para gunli' libán que didza' dxi'a

le ribequi dxi icja ládx'i'do'oru' lahuë' Dios,

ca na' ruzóa cuinë' sina',

en ridé'ë xiráchuë' tu bönni' rejë' gudil-la.

¹⁶Le naca lo, yöl-la' réajlë' queé'li' Cristo gaca queé'li' ca tu le naca tsutsu uzéli' loli',

para cabí gál-la' yugu' le usán tu' xihui' lib'íli',

le nácagaca ca yaga túchi'do' zoa guí' láchuilöguequi.

¹⁷Yöl-la' rusölá gaca queé'li' ca tu lu'u guíë le gun chí'i ícjali'.

Xtúdzë'ë Dios gaca queé'li' ca tu guíë tuchi'

le runnë' Dios Bö' Lá'ayi queé'ru', para utíl-lalenru' le naca xihui'.

¹⁸Guli'gún yúgu'të lë ni, en buli'lidzë' Dios inábili'-në' gácalenë' lib'ili'.

Buli'lídzatica'së' Dios zóalenë' Dios Bö' Lá'ayi lib'ili'.

Para gunli' caní ral-la' usubán ládxi'li' en cabí huóaj ládxi'li',

inábili'-në' Dios gácalenë' nupa néquiguequi queë'.

¹⁹Buli'lidzë' Dios, inábili'-në' gácalenë' ca' neda', en gunnë' quia' didza' cate' ral-la' gu'a didza', en gunë' ga gaca' rugu ladxi' cate' guna' libán para uzéajni'ida' bönachi ca naca le bigachi' que didza' dxi'a. ²⁰Dios

budödë' lu na'a didza' dxi'a na' para guna' libán que, ate' tu' bena' caní yu'a lidxi guíë ni. Buli'lidzë' Dios channö, inábili'-në' gunë' ga gaca' rugu ladxi' para guna' libán que didza' dxi'a ca ral-la' guna'.

Ruúdx didza' bë'ë Pablo

²¹Tíquico, bóchi'ru' na' nadxí'iru'-në', en runë' xichinë' Xanru' idú ládxe'ë, quíxjöi'inë' lib'ili' idú ca raca quia', en ca runa' neda' ni. ²²Que lë ni na', isól-la'a-në' queé'li', ate' uluf'inë' lib'ili' ca raca queé'tu', ate' caní utipë' ládxi'li'.

²³Rinábida'-në' Xúziru' Dios, enca' Xanru' Jesucristo gunë' ga soa dxi icja ládxi'do'oli', en gata' queé'li' yöl-la' nadxí' le dzaga yöl-la' réajlë' queé'li' Cristo, yúgu'tëli' na' néquili' queë'. ²⁴Le ruzá' ládxe'ë Dios queé'ru' gaca queé'li', yúgu'tëli' na' nadxí'ili'-në' Xanru' Jesucristo, naca idú yöl-la' nadxí'i queé'li' Lë'. ¡Ca' gaca!

DIDZA' GUSÓL-LĚ'Ě PABLO YÖDZÖ FILIPOS

Pablo rugapë' Dios bönachi queë' Cristo nacua' Filipos

1 Neda', Pablo, enca' bi'i Timoteo, nactu' huen dxin queë' Jesucristo. Rugapa' Dios lib'ili', réajlë'ëli' Cristo, en lib'ili', dë lu ná'ali' xichinë' Cristo, en lib'ili', run ch'ili' bönachi queë' Cristo. Zóali' Filipos, en néquili' queë' Dios, en nácali' tuz len Jesucristo. ²Rinábida'-në' Xúziru' Dios, enca' Xanru' Jesucristo gunnë' queé'li' le ruzá' ládxë'ë queéru', en gunë' ga soa dxi icja ládxi'do'oli'.

Pablo rinábinë' Dios bi gunë' quegaca bönachi ta'yéajlë' Cristo

³Rea'-në' Dios: "Xclenu", cate' rizá' ládxa'a queé'li'. ⁴Cate' rulidza'-në' Dios, en rinábida'-në' gácalenë' lib'ili', rudzeja ládxa'a ⁵tu' rójneda' ca bénlenli' neda' tsözxón dxin que didza' dxi'a. Gusí loli' runli' dxin na' dza ni' si' biyónili', en runli' le ga ridxintë na'a dza. ⁶Dios gusí lahuë' runë' tu le naca dxi'a lu icja ládxi'do'oli'. Ruzxóni ládxa'a Lë' gúntica'së' caní ga idxintë dza huödë' Jesucristo. ⁷Ca na' rizá' ládxa'a queé'li' naca ca ral-la' guna' tu' nadxí'ide'eda' lib'ili'. Yúgu'tëli' ruzí'ili' xibë tsözxón len neda' le ruzá' ládxë'ë Dios queéru', tsanni ni yu'a lidxi guíë, en lësca' caní benli' cate' ni' bë'a didza', cate' na' bena' libán que didza' dxi'a le bena' ga bidxín queé'li' tsaz. ⁸Nózinë' Dios ca nadxí'ide'eda' lib'ili'. Naca ca na' nadxí'ide'enë' Lë cazë' Jesucristo rë'u. ⁹Rinábida'-në' Dios gunë' ga idxí'iröli' luzá'ali', en gáta'da' queé'li' yöl-la' rácada', en yöl-la' réajni'i idú ¹⁰para gaca cöli' le nácatërö dxi'a. Channö gaca caní queé'li', gácali' idú dxi'a, ate' cuntu nu gaca bi innë queé'li'

dza ni' huödë' Cristo. ¹¹Le nácali' naca bë' le naca dxi'a runë' Cristo lu icja ládxi'do'oli' para ilá' lahui yöl-la' zxón queë' Dios, en gaca queë' yöl-la' ba.

Zóaru' nabanru' para gácaru' ca náquië' Cristo

¹²Böchi' luzá'ado', ré'ënda' inózili' lë ni: Yúgu'të le guca quia' gulácalen neda' para guzxéqui'röda' bena' libán que didza' dxi'a. ¹³Caní guca, yúgu'të ni'a ná'agaquië' bönni' yúlahui', en ia'zíca'rë' bönni' ni nózguequinë' yu'a lidxi guíë ni tu' runa' xichinë' Cristo. ¹⁴Tu' yu'a neda' lidxi guíë ni ben ga látu'biqui' yúgu'të bóchi'ru' nácacarë' rugu ladxi', ate' tu'zxóni ládxi'gaquië' Xanru', en bíti'rö tádxinë' tunë' libán que xtídzë'ë Dios.

¹⁵Le nácatë bal-lë' tunë' libán queë' Cristo tu' tu'zxé'enë' neda', en ta'dil-lë', pero ia'bal-lë' tunë' libán queë' idú ládxi'gaquië'. ¹⁶Yugu' bönni' tu'zxé'enë' na' tunë' libán queë' Cristo lu yöl-la' run ba zxón cuíngaquië', en calëga idú ládxi'gaquië'. Té'ënnë' ulu'saca' zí'ë neda' tsanni ni yu'a lidxi guíë. ¹⁷Yugu' bönni' idú ládxi'gaquië' na', lu yöl-la' nadxí'i quegaquië' tunë' libán queë', tu' nózguequinë' Dios caz budödë' lu na'a dxin runa', runa' libán que didza' dxi'a. ¹⁸Biti' run lë na' ga rö'a böniga. Rudzëjada' tu' raca libán queë' Cristo nácati'tës, sal-la' tunë' libán idú ládxi'gaquië' o biti' tunë' le caní.

Na'a, rudzëjaröda' ¹⁹tu' chinózida' ulá' lu le raca quia', yu'a lidxi guíë ni, tu' rulídzali'-në' Dios, en tu' rácalenë' Dios Bö' Lá'ayi neda'. Náquië' Bö' risól-lë'ë Jesucristo queéru'. ²⁰Caní ré'ënda', en ruzxóni ládxa'a-në' Dios, gunë' ga biti' utuí'ida', en gunë' ga gaca gu'a didza' lu yöl-la' rugu ladxi', ate' lu na'a neda' gácatíca'sö yöl-la' ba queë' Cristo na'a dza, en yugu' dza zá'gaca, sal-la' gun bayudxi gátitea', o soa' ibana'. ²¹Ca runi neda', channö zoa' nabana', naca para

gaca' ca náquië' Cristo, en channö gátia', naca tu le uzí'ira' xibé. ²² Channö huáca guna' dxin le gácalen didza' dxi'a queë' Cristo channö sóasa' ibana', biti' nözda' bízxilö ral-la' cóa'. ²³ Naca böniga cóa'. Ré'ënda' gátitea' para tsöjsóalentea'-në' Cristo, tu' gácatëro dxi'a quia', ²⁴ pero runrö bayudxi sóasa' ibana' para séqui'-da' gácalena' libí'ili'. ²⁵ Tu' chinózida' naca caní, nözda' ca' ugá'analena' libí'ili' para gácalena' libí'ili' para gácarö idú ca réajlë'ëli' Cristo, ate' udzëjaröli' tu' réajlë'ëli' Lë'. ²⁶ Caní naca, udusóalena' libí'ili' leyúbölö, le gun ga tsaz ládxi'li'-në' Jesucristo ni'a que le gunë', gácalenë' neda'.

²⁷ Guli'güi'sö ladxí' gácali' ca sa'yéaj didza' dxi'a queë' Cristo. Caní gaca, channö uduyúa' libí'ili' o channö soa' zi'tu', huayónida' nácali' tsutsu, en nácali' tuz, runli' tsözxón dxin que le réajlë'ëru' le za' queëru' ni'a que didza' dxi'a. ²⁸ Biti' güi'ili' nupa biti' ta'l'é e libí'ili' dxi'a lataj ilún gadxi libí'ili'. Lë ni ulufi légaquie' ila'nítie', pero uláli' libí'ili', le gaca bë' rácalenë' Dios caz libí'ili'. ²⁹ Dios ru'ë libí'ili' lataj gunli' xichinë' Cristo, calégasö ca réajlë'ëli' Lë', pero lëasca' ca rigufi rizáca'li' cate' runli' xichinë'. ³⁰ Na'a, gaca gunli' neda' tsözxón güi' ládxi'ru' gunru' libán que didza' dxi'a. Bilé'e quézili' ca gudfi guzácá'a cate' bena' caní zí'alö, ate' riyónili' ca rigufi rizáca'a ca' na'a.

**Gúquie' Cristo nöxaj ladxí',
ate' bidéli'në' yöl-la' zxön**

2 Cristo runë' ga rutipa ládxi'li', en lu yöl-la' nadxfi' queë' ruhuéchi' ládxe'ë libí'ili', en runë' ga nácali' tuz len Dios Bö' Lá'ayi, en ga nadxfi'li' luzá'ali', en ga ruhuéchi' ládxi'li' luzá'ali' tuli' ia'tuli'.

² Na'a guli'gún ga udzëjarö ládxa'a. Para gunli' caní, ral-la' gácali' tuz len luzá'ali',

en gaca lébisö ca nadxfi'li' luzá'ali' tuli' ia'tuli'. Lëasca' caní ral-la' gácali' tuz lu bö' naca cázali', en ca rizá' ládxi'li'. ³ Ca naca le runli', biti' bi ral-la' gunli' lu yöl-la' rudul-li' queéli', o para gun ba zxon cuinli', pero dxí'ado' ral-la' gunli' yúgu'të, en cabí guéquilí' nadéli'röli' libí'ili' ca luzá'ali'. ⁴ Guli'güi' ladxí' gaca dxi'a ca' que luzá'ali', en calëga queézi'li'.

⁵ Ral-la' gácali' nöxaj ladxí' ca na' gúquie' Jesucristo nöxaj ladxí'. ⁶ Lë' naca cazë' lébisö ca náquie' Dios caz, pero biti' gúquinë' ral-la' gunë' bayudxi ugá'anë' lébisö ca na' náquie' Dios. ⁷ Bucá'ana cazë' yúgu'të le napë', en ben cuinë' ca tu bönni' nadó'o. Guljë' ca talaj bö-nachi, en gúquie' idú bö-nachi. ⁸ Cate' ni' náquie' bönni', gúquie' nöxaj ladxí', en benë' ca rnna xtídze'ë Dios, en gútië'. Gudé'ë lë'e yaga cruz ca na' raza queë' nu bönni' nabáguë'ë dul-la'. ⁹ Que lë ni na' Dios buchisë' Lë', en benë' ga náquie' lo ni' yehua' yubá, en benë' ga lë' tu le nácatëro lo ca yúgu'të lágaca bö-nachi. ¹⁰ Caní benë' Dios para cate' ila'yöni ca na' lë' Jesús, ulu'zëchu zxíbigaca yúgu'të nupa nacua' yehua' yubá, en lu yödzölió, en lu lataj chul-la. ¹¹ Yúgu'të ila'guíxjö'ë yálajdo' Jesucristo náquie' Xanru' para gaca yöl-la' ba queë' Xúziru' Dios.

**Ral-la' gácaru' ca tu
le ta'gú'u bení' yödzölió ni**

¹² Que lë ni na', böchi' luzá'ado', ca na' benli' ca rnna xtídza'a cate' ni' zóalena' libí'ili', runrö bayudxi gunli' ca rnna xtídza'a na'a, tsanni ni zoa' zi'tu' ga zóali'. Guli'gún xichinë' Xanru' ga idxintë dza údxi usölë' libí'ili'. Guli'gún caní lu yöl-la' radxi queéli' Lë', en lu yöl-la' rizxizi. ¹³ Lë' cazë' Dios runë' dxin lu icja ládxi'do'oli'. Runë' ga ré'ënilí' gunli' le raza ládxe'ë Lë', en runë' ca' ga séqui'li' gunli' lë na'.

¹⁴ Guli'gún yúgu'të le ral-la' gunli', en biti' bi innëli' que, en biti' til-la dídza'li'.

¹⁵ Caní ral-la' gunli', para cabí gaca nu bi inné queéli', pero caní gácali' ca zxi'ini cazé' Dios, nácali' idú dxi'a yödzölió ga ni zóali' ladaj bönachi biti' nácagaca tsahui', en nucá'anagaca Dios. Libí'ili' rigú'uli' bení' ládjagaquié' ca na' ta'gú'u bení' böla'j lúzxiba cate' ni naca chul-la, ¹⁶ cate' ru'f'ili' lógaquié' didza' ibánigue-quiné'. Channö caní gunli', huáca udzé-jade'eda' ni'a que le naca cázali' dza huödë' Cristo, tu' inözda' biti' guca nítisö guzóa bönadxi gátia', en caléga nítisö bena' dxin. ¹⁷ Yöl-la' réajlë' queéli' Cristo naca tu le raza ládxe'ë Dios. Sal-la' gun bayudxi gátia' para gaca idú yöl-la' réajlë' queéli' Lë', udzëjada', en uzí'lëna' xibé tsözxón yúgu'tëli'. ¹⁸ Lësca' caní ral-la' udzëjali' libí'ili', en uzí'lëni' tsözxón neda' xibé.

Ca tunbi' bi'i Timoteo, en bi'i Epafrodito

¹⁹ Channö caní ré'ënë' Xanru' Jesús, runa' löza isól-la'tea'-bi' bi'i Timoteo ga zóali', ate' ní'irö udzëjada' cate' huódabi' ududíxjöi'ibi' neda' cátëze raca queéli'. ²⁰ Túzibi' lëbi' rizá' ládxi'bi' ca na' rizá' ládxa'a neda', en ru'f'ida' ládxi'bi' libí'ili'. ²¹ Yúgu'të bönni' ia'zica'rö, le naca qué-gacasé' tufí' ládxi'gaquié'. Biti' tufí' ládxi'gaquié' xichiné' Cristo. ²² Nöz quézili' ca benbi' bi'i Timoteo, ca na' burúajbi' dxi'a. Bénlenbi' neda' tsözxón dxin que didza' dxi'a, ate' nácabi' quia' ca tubi' bi'i bönni' rúnlenbi'-né' tsözxón xúzibi' dxin. ²³ Isól-la'a-bi' bi'i Timoteo ga zóali' cate' inözda' nacxi gaca quia' ni ²⁴ sal-la' ruzxöni ládxa'a-në' Xanru' gunë' ga uduyútea' libí'ili'. ²⁵ Lësca' réquida' run bayudxi isól-la'a-bi' bí'i böchi'ru' Epafrodito ga zóali'. Bi'i ni bénlenbi' neda' tsözxón dxin queé' Cristo, ate' gudíl-lalentu' tu' xihui'. Libí' cázali' gusól-la'li'-bi' ga zoa' para gácalenbi' neda'. ²⁶ Lë cázabi' ré'ëni'bi' uduyúbi' libí'ili', en ru'f'ida' ládxi'bi'

libí'ili' tu' biyónili' ben bayá' queébi'. ²⁷ Le nácatë güi'ibi', en guqui gátibi', pero buéchi' ládxe'ë-bi' Dios, en calé-gasö lëbi', pero buéchi' ládxe'ë ca' neda', para cabí isëbirö ládxa'a ca na' risëbi ládxa'a na'a. ²⁸ Que lë ni na', gü'unirö-da' isól-la'a-bi' queéli' para gaca udzë-jali' leyübölö cate' ulé'eli'-bi', en bí'tirö isëbi ládxa'a neda'. ²⁹ Gulí'sf' lu ná'ali' lëbi' lu yöl-la' rudzeja queéli', tu' nácabi' bi'i böchi'ru' réajlë'ëbi' Cristo. Gulí'gún bal yúgu'të bönachi nácagaca ca nácabi' lëbi', ³⁰ tu' guzóa bönadxi queébi' gátibi' tu' benbi' xichiné' Cristo, en tu' gúcalen-bi' neda' uláz queéli'.

Le naca idú tsahui'

3 ¡Na'a, böchi' luzá'ado', buli'dzeja tu' nácali' tuz len Xanru'! Biti' rupixxaj neda' uzúaja' queéli' leyübölö lë na' buzúaja' queéli' zí'alö, tu' gácalen lë ni libí'ili'. ² Gulí'gún chí'i cuinli' ló-gaca nupa ni' tuá' dö'. Nácagaca ca yugu' bö'cu' sínia', nupa na' tun bayudxi irugu lu xipéla'gaquié' bönni' le naca bë' nazí' lu ná'gaquié' xtídzë'ë Dios. ³ Ré'u nadéli'ru' lë na' naca idütë li, le naca bë' nazí' lu ná'aru' le runné' queéru' Dios. Tu' réajlë'ëru' Dios, zóalenë' Dios Bö' Lá'ayi ré'u, ate' rudzëjaru' tu' nácaru' tuz len Jesucristo. Biti' ca' ruzxöni ládxi'ru' tu le runru' rácasö queéru'. ⁴ La-tu' ruzxöni ládxi'ru' lë ni, lësca' neda' chinadéli'da' bi uzxöni ládxa'a. Channö zoë' nu bönni' réquinë' ulé' tu' nacua' le nunë', neda' nadéli'röda' ca bönni' na': ⁵ Gurugu lu xipéla'a lë na' naca bë' cate' ni' gúquida' xunu' dza. Gulja' ladaj dí'a dza quégaca bönachi Israel. Nababa' zxi'ini xi'sóë' Benjamín. Xuz xiná'a nácagaquié' idú bönachi hebreo. Guca' bönni' yudo' fariseo ca na' bena' ca rinná' bë' xibá queé' Dios.

⁶Bë'da' ládxa'a xibá na' ga bidxintë gudxía ládxa'a bönachi queë Cristo. Tsca gaca gáquië' tsahui' tu bönni' tu' runë' ca rinná bë' xibá na', cuntu nu bi guca innë quia'.

⁷Na'a, yúgu'të lë na' bena' zxön zí'alö, nuzóa' tsölá'alö tu' néquida' queë Cristo. ⁸Calégasö yugu' lë na', pero nuzóa' ca' tsölá'alö yúgu'të le dë, para gaca gúnbe'eda'-në' Xanru' Jesucristo, le nácatëro lesaca' ca yúgu'të lë na'. Para gúnbe'eda' Lë gurú'una' nílö yúgu'të, en réquida' naca ca bëbu, para uzi'a xibé' Cristo, ⁹en para gaca' tuz len Lë'. Nuhuóaca' tsahui', caléga tu' runa' ca rinná bë' xibá na', pero Dios caz bunë' neda' tsahui' tu' réajlë'a Cristo, ca na' ruúnë' tsahui' yúgu'të nupa ta'yéajlë' Lë'. ¹⁰Ré'énisida' gúnbe'a-në' Cristo, en sóalen yöl-la' huáca queë Dios neda', lë na' busubán Cristo lu yöl-la' guti, ate' guna' Lë' tsözxón, qui'i saca'a ca na' gudfi guzxaqué'ë Lë', en soa' sina' gátia' ca gútië' Lë', ¹¹tu' runa' löza Dios, usubanë' ca' neda' lu yöl-la' guti.

Le runru' para idxinru' xilátjaru'

¹²Biti' rnní'a' chinadéli'da' yúgu'të lë ni gunnë' quia', en biti' réquida' chinaca' idú tsahui'. Na'a, runa' bayudxi idéli'da' yúgu'të lë na', tu' chibidéli'në' Jesucristo neda'. ¹³Böchi' luzá'ado', biti' ca' nadéli'da' yugu' lë ni, pero tuz le runa' bayudxi. Ruzál-la ládxa'a le chibidéli'da', ate' runa' bayudxi idéli'da' le za'. ¹⁴Runa' ca runë' tu bönni' rixítí'dë'ë para idxinë' xilatjë' para idéli'në' tu le uzi'ë xibé. Caní runa' para idéli'da' lë na' bulidzë' Dios rë'u para gata' queëru' ni' yehua' yubá tu' nácaru' tuz len Jesucristo.

¹⁵Caní ral-la' gunru' yúgu'tëru' rë'u, naca idú ca réajlë'ëru' Cristo. Channö réquili' bál-lali' ral-la' gunli' tu le yúbölö, rinábida'-në' Dios uzéajni'inë' libí'ili'. ¹⁶Na'a, ca naca lë na' bidéli'ru', ral-la' gúntica'siru' caní.

¹⁷Böchi' luzá'ado', guli'gún ca na' runa' neda'. Chibuluf'itu' libí'ili' ca ralla' gunli'. Bulí'yú ca tun nupa na' tun ca na' bentu' netu'. ¹⁸Chigudxi caza' libí'ili' zían luzuí, ate' rea' libí'ili' leyúbölö len yöl-la' ribödxí quia', rnní'a': Le tunë' zían bönni' run ga nácagaquië' ca nupa biti' ta'lé'e Cristo dxi'a, tu' tu'zózé' tsölá'alö le ben cazë' Lë' lë'e yaga cruz. ¹⁹Yugu' bönni' tunë' caní, tsöjajúquië' lu gu' gabila, tu' naca le ta'zësö ládxi'gaquië' dios quégaquië', ate' tun ba zxön cúngaquië' ni'a que lë na' ral-la' gun ga ulu'tuí'inë'. Tufí ládxi'së le dë yödzülió ni, ²⁰pero rë'u ni rufí ládxi'ru' le dë yehua' yubá ga nabábaru', en ribózaru' dza huödë' Xanru' Jesucristo, Nu rusölá rë'u, urúajë' yehua' yubá na'. ²¹Lë' utsé'ë idútë le naca cázaru', le riniti caz, en gunë' ga huóaca ca naca idútë le naca cazë' Lë', le sóatica'sö. Caní gunë' len yöl-la' huáca zxön queë' le ugunë' dxin para inná bé'enë' yúgu'të.

Ral-la' udzéjalentica'siru'-në' Xanru'

4 Que lë ni na', böchi' luzá'ado', guli'gaca tsutsu ca réajlë'ëli'-në' Xanru'. Nadxi'ide'eda' libí'ili', en ré'ënda' uduyúa' libí'ili'. Runli' ga rudzëjada', en nácali' ca tu le ruzi'a xibé.

²Libí'ili', Evodia, en Síntique, ráta'yua' loli' gácali' tuz ca ral-la' ilaca nupa néquiguequi queë' Xanru'. ³Na'a, bócha'a idú, ré'ënda' gácalenu' irópanu ni, tu' gulúnlennu neda' dxin, cate' bentu' libán que didza' dxi'a. Lësca' bulu'dzáquië' Clemente, en ia'zícara' rë' luzá'a na' netu'. Chinazúajgaca lágaguië' yehua' yubá ga na' nazúajgaca lágaca nupa chinadéli'gaca yöl-la' na'bán idú.

⁴¡Buli'dzéjalentica'sö-në' Xanru'!

Leyúbölö, rnní'a': ¡Buli'dzeja!

⁵¡Guli'gaca dxi'i ladxi' len yúgu'të bönachi!

¡Chizóa huödë' Xanru'!

⁶Biti' ubi ugu'ili', pero guli'nabi-në' Dios le riquinili', en guli'guifë': "Xclenu'" ca naca yúgu'të lë na' rinábali'. ⁷Dios gunë' ga gaca queéli' le cuéqui dxi icja ládxi'do'oli', lë na' nadódirö bë' ca le gaca ila'yéajni'i bönachi. Lë na' ribequi dxi icja ládxi'do'oru' gun chi'i icja ládxi'do'oli', en le rizá ládxi'li' tu' nácali' tuz len Jesucristo.

Ral-la' sa' ládxi'ru' le nácgaca dxi'a

⁸Ga ruúdxitë, böchi' luzá'ado', guli'sá' ládxi'li':

Yúgu'të le naca dxi'a, en le naca bica' ba, en le naca idútë li, en le naca idú, en le naca tsahui', en le naca ba'a, en le naca lachi, en le ral-la' gunru' bal.

⁹Guli'gún ca na' busédida' libí'ili', lë na' guzxi' lu ná'ali' tsca na' bé'lena' libí'ili' didza', en tsca na' bena' ga ni' zóali'. Dios, Nu runna queéru' le ribequi dxi icja ládxi'do'oru' sóalenë libí'ili'.

Le tsahui' gulunë' yugu' bönni' Filípos queë' Pablo

¹⁰Rudzéjalenda'-në' Xanru' tu' rufi ládxi'li' neda' leyúbölö. Biti' rnnía' gul-la ládxi'li' neda', pero biti' guta' queéli' lataj gácalenli' neda' zí'alö. ¹¹Lësca' caní, biti' rnnía' caní tu' zoa bi riyadzaj quia', tu' nazëda' tsaza ládxa'a le dësö quia'. ¹²Chigudöda' lu yöl-la' yechi', en lu yöl-la' tsahui'. Nazëda' soa' nácati'tës, sal-la' nóljada' o nabila riduna', en sal-la' dëda' quia' o zoa bi riyadzaj quia'. ¹³Yúgu'të huazéqui'da' tu' rutipë' Cristo ládxa'a. ¹⁴Benli' dxi'a cate' ni' gúcalenli' neda', en butípali' ládxa'a cate' gudfi' guzácá'a.

¹⁵Libí'ili', bönni' Filipos, nöz quézili' ca guca quia' dza ni' cate' buzá'a luyú Macedonia, para yöjena' libán que didza' dxi'a. Tsca nacua' bönachi queë' Cristo, cúnturö nu gúcalen neda', pero libí'isili' gúcalenli' neda'. Gusól-la'li' quia' bi bunódzjali', tu' guzxi' lu ná'ali' libán bena' neda'. ¹⁶Tsanni ni' guzós' yödzö Tesalónica, tu chopa luzuf gusól-la'li' quia' le bunódzjali' cate' ni' biyadzaj quia'. ¹⁷Biti' rufi ládxa'a bi si'a, pero ré'ënda' gáta'rö queéli' le uzí'ili' xibé yehua' yubá. ¹⁸Rea' libí'ili': Chiguzxi' i'a yúgu'të lë na' gusól-la'li' quia', ate' gudóditë bë' tsca le biyadzjada'. Ben ga naca caní lë na' gusól-la'li' lu ná'abi' bi'i Epafrodito. Lë na' bunódzjali' naca ca tu le rilá' zxixi le ridxintë lahuë Dios, en ca tu le rigú'uru' lahuë Dios le raza ládxi'ë. ¹⁹Dios gunnë' queéli' yúgu'të le riyadzaj queéli', tsca naca yöl-la' tsahui' rö'ö yehua' yubá, tu' nácali' tuz len Jesucristo. ²⁰¡Gácativa'sö queë' Xúziru' Dios yöl-la' ba! ¡Ca' gaca!

Yugu' bönachi queë' Cristo tu'gapa Dios luzé'eguequi

²¹Uláz quia' neda', guli'gapa Dios nupa ni' néquiguequi queë' Dios tu' nácgaca tuz len Jesucristo. Tu'gapë' Dios libí'ili' böchi' luzá'aru' núnquique' neda' tsözxón ni. ²²Lësca' yúgu'të nupa ni' néquiguequi queë' Dios, tu'gapa Dios libí'ili', en lësca' caní, yugu' bönni' huen dxin nacu'ë lidxë' bönni' rinná bë'ë idú luyú Roma tu'gapë' Dios libí'ili'.

²³Rinábida'-në' Xanru' Jesucristo uzá' ládxi'ë queéli' yúgu'tëli'. ¡Ca' gaca!

DIDZA' GUŞÓL-LĒ'Ē PABLO YÖDZÖ COLOSAS

Pablo rugapë' Dios bönachi queë' Cristo nacu'ë Colosas

1 Neda', Pablo, naca' gubáz queë' Jesu-cristo tu' ré'ënë' Dios caní, ate' dzá-gabi' bi'i bóchi'ru' Timoteo neda'. ²Ru-gapa' Dios libí'ili', zóali' Colosas. Nácali' bóchi'tu' réajlë'ëli' Cristo, en nácali' quez queë' Dios. Rinábida'-në' Xúziru' Dios uzá' ládxë'ë queéli', en gunë' ga soa dxi icja ládxí'do'oli'.

Pablo rulidzë' Dios, en ré' Lë': "Xclenu"

³Rética'stu'-në' Dios, Xuzë' Xanru' Je-sucristo: "Xclenu" cate' rulidztu'-në' Dios, en rinábitu'-në' bi gunë' queéli' ⁴tu' biyónitu' didza' ca réajlë'ëli' Je-sucristo, en ca nadxí'ili' yúgu'të nupa néquiguequi quez queë' Dios. ⁵Caní run-li' tu' runli' löza le nuzóë' Xanru' queéli' ni' yehua' yubá, lë na' biyónili' que cate' bé'lentu' libí'ili' didza', le naca löza sí'ili' ni'a que didza' dxi'a. ⁶Didza' dxi'a na' bidxín queéli' ca ridxín ca' idútë yödzülió. Run dxin, en raca libán que, idútë yödzülió, la' tuz ca raca ga zóali', dza ni'te ga ridxintë na'a dza, cate' ni' biyónili', en bénbë'ëli' idútë le ruzá' ládxë'ë queëru' Dios. ⁷Epafras, bönni' nadxí'iru'-në', busédinë' libí'ili' lë ni. Lë' rúnlenë' netu' tsözzón dxin, en rácalenë' libí'ili'. Náquië' huen dxin idú queë' Cristo. ⁸Bönni' ni gudíxjöi'inë' ne-tu' ca nadxí'ili' luzá'ali', ate' runë' Dios Bö' Lá'ayi ga gaca gunli' caní.

⁹Que lë ni na' netu' ca', dza ni'te ga ridxintë na'a dza, tu' réquibe'etu' lë ni, biti' ca' rizóa dxitu' rulidztu'-në' Dios, en rinábitu'-në' gácalenë' libí'ili', en gunë' ga gúnbë'ëli' idú le ré'ëni quezínë' Lë', en gunnë' queéli' yúgu'të yöl-la' rácada',

en yöl-la' réajni'i le rigu'ë Dios Bö' Lá'ayi ré'u. ¹⁰Caní rinábitu'-në' para gaca gun-li' ca ral-la' ilún nupa néquiguequi queë' Xanru', gunli' yúgu'të le raza ládxë'ë Lë', en séqui'li' gunli' yúgu'të le naca dxi'a, en gácarö idú ca núbë'ëli'-në' Dios. ¹¹Rinábitu'-në' utipë' ládxí'li', en gunnë' queéli' yöl-la' huáca idú queë', para gaca guá' ilenli' yúgu'të, en cózali' zxón ladxí', en udzeja ládxí'li'. ¹²Lu yöl-la' rudzeja queéli' guli'gufë' Dios Xuz: "Xclenu", tu' budödë' lu ná'aru' gata' queëru' lataj lu bení' queë', en gunru' tsözzón nupa néquiguequi quez queë'. ¹³Dios Xuz na' busólé' ré'u lu na' nu rinná bë' lataj chul-la, en budödë' ré'u ga na' rinná bë'ë Zxf'ini cazë', Nu nadxí'inë'. ¹⁴Zxf'inë' na' böá'uë' ré'u, tu' gútië' uláz queëru', ate' buniti lahuë' ré'u ca naca dul-la' gubága'ru'.

Nuhuócaru' tuz len Dios tu' gútië' Cristo uláz queëru'

¹⁵Cristo náquië' tuz ca náquië' Dios caz, Nu biti' gaca ilé'eru'. Zoa cazë' Lë' zí'atëlö ca yúgu'të le benë' Dios. ¹⁶Lu në'ë Cristo benë' Dios yúgu'të le dë, le nacua' lúzxiba, en le nacua' luyú, yugu' le rilé'eru', en yugu' le cabí gaca ilé'eru', lë na' nácagaca lataj lo, en yugu' yöl-la' unná bë', en le nápagaca yöl-la' zxón, en yugu' yöl-la' huáca que yehua' yubá, en que luyú ni. Yúgu'të benë' Dios lu në'ë Cristo para uzi'ë xibé Lë'. ¹⁷Cristo zoa cazë' zí'alö ca yúgu'të le dë, ate' yúgu'të nacua'tica'sö ni'a queë' Lë'. ¹⁸Cristo náquië' Xángaca bönachi queë', en runödzejë' quégaquië' yöl-la' na'bán. Náquië' ca' Nu gusí lo bubán tsaz lu yöl-la' guti. Zí'alö Lë' bubanë' tsaz lu yöl-la' guti para tsépisëtërë' ca yúgu'të le dë. ¹⁹Caní guca, tu' guyaza ládxë'ë Dios Xuz sóalen Cristo idútë le naca cazë' Lë'. ²⁰Ni'a que le benë' Cristo, Dios benë' ga gaca ulu'huóaca tuz len Lë' yúgu'të le dë, le nacua' luyú, en le nacua' lúzx-

iba. Bunë' léguequi tuz len Lë' tu' bulaljë' Cristo xichönë' cate' gútië' lë'e yaga cruz.

²¹ Libí'ili', zí'atëlö nulá'alenli'-në' Dios, en gúcali' ca yugu' bönni' biti' ta'l'é'enë' Dios dxi'a lu icja ládxi'do'oli' ni'a que dö' biá'ali', pero na'a chibunë' libí'ili' tuz len Lë'. ²² Caní guca, tu' budödi cuinë' Cristo, en gútië' uláz queéli' para gaca usudxinë' libí'ili' lahuë' Dios, nácali' quez queë', en idú dxi'a, ate' cuntu nu bi gaca innë' queéli'. ²³ Caní gaca channö ugá'analí' tsutsu ca réajlë'ëli' Cristo. Gácali' ca tu yu'u zxoá ga rë' xilibi zö'ö que, en biti' tseaj bö' ládxi'do'oli' ca runli' löza didza' dxi'a biyónili', lë na' raca libán que idútë yödzölió le benë' Dios zxan lúzxiba. Dios buzóë' neda', Pablo, para gaca' huen dxin que didza' dxi'a na'.

Dxin budödë' Dios lu në'ë Pablo

²⁴ Rudzëjada' na'a ca naca le rigufi rizáca'a para gácalena' libí'ili', en ruúdxirizá'a lu idútë le naca' le rigufi rizáca'lena' tsözxón Cristo uláz que idú le naca cazë' Lë', le naca bönachi queë'. ²⁵ Dios benë' ga naca' huen dxin qué-gaca bönachi queë' Cristo, ate' runa' xichinë' Dios, le budödë' lu na'a guna' para gácalena' libí'ili', quíxjö'a idú ca naca xtídzë'ë Dios. ²⁶ Ruzéajni'ida' bönachi le nagachi', lë na' bigachi' dza ni'te, ate' cuntu nu benbë' le, pero na'a Dios chibuluf'inë' bönachi néquiquequi quez queë' ca naca que. ²⁷ Dios gú'uni quézinë' gunë' ga ilúnbë'e yugu' yöl-la' tsahui' idú que le nagachi' ni, lë na' ta'yöni bönachi izá'a. Caní rnna lë na' bigachi': "Cristo náquië' tuz len libí'ili', en náquië' le naca löza idéli'li' tsazli' lu bení queë'."

²⁸ Runtu' libán queë' Cristo, en rusá'atu' ládxi'gaca yúgu'të bönachi, ate' ruséditu' léguequi idútë yöl-la' réajni'i, para gaca usudxintu' yúgu'të bönachi lahuë' Dios, naca idú ládxi'gaca tu' nácagaca tuz len Jesucristo. ²⁹ Para

gaca caní runa' dxin, en ru'í ládxa'a údxi guna' lë ni, rugúna' dxin yöl-la' huáca idú na' runnë' Cristo quia'.

2 Ré'ënda' inózili' ru'í'ida' ládxa'a runa' le gácalen libí'ili', enca' le gácalen bönachi yödzö Laodicea, en le gácalen ca' yúgu'të nupa biti' ila'l'é'eni neda'. ² Runa' caní para ila'dipa ládxi'gaquië', en iláquië' tuz lu yöl-la' nadxf'i, en ulu'z-i'ë xibë yúgu'të yöl-la' tsahui' que yöl-la' run löza idú le runna yöl-la' réajni'i queëru'. Caní raca para ilúnbë'ë le bigachi' queë' Dios Xuz, lë na' naca cazë' Cristo. ³ Lu në'ë Cristo ruzí'iru' xibë yúgu'të yöl-la' tsahui' que yöl-la' rácada', en yöl-la' réajni'i. ⁴ Lë ni rea' libí'ili', para cabí gaca nu si' ye'e libí'ili', nu güf'i didza' tséajlë'ëru' le cabí nácatë. ⁵ Sal-la' zoa' zi'tu' ga zóali' lu idútë le naca', lu bö' naca caza' zóalena' libí'ili', en rudzëjada' tu' rilé'eda' rö'ö xibá queéli', en nácali' tsutsu ca réajlë'ëli' Cristo.

⁶ Que lë ni na', ca na' guzxi' lu ná'ali' Xanru' Jesucristo, lësca' caní ral-la' gunli' yúgu'të le gunli', dzáguië' Lë' libí'ili'. ⁷ Ca na' nun ga rë' luí yaga, enca' ca na' nayás zö'ö lu xilibi zö'ö, guli'sóalen Cristo. Guli'sóa tsutsu ca réajlë'ëli' Lë', ca na' chinazédali'. Guli'gufética'së' Dios: "Xclenu'."

Le cubi nácaru' tu' dzágaru'-në' Cristo

⁸ Guli'gún chi'i cuinli' para cabí güf'ili' lataj nu si' ye'e libí'ili', nu ugún dxin yöl-la' réajni'i quégaca bönachi, en yugu' didza' ta'nnasë' nácagaca idútë li, ca naca le ta'l'ébi tun bönachi, en ca naca le tu'sedi bönachi le naca que yödzölió ni, en calëga le naca xtídzë'ë Cristo.

⁹ Idútë le naca cazë' Dios zóalen Cristo sal-la' böáquië' bönachi, ¹⁰ ate' libí'ili' nápalí' idútë le náquië' Dios tu' dzágali'-në' Cristo, Nu rinná be'e yúgu'të nupa ta'nná bë', en yugu' bönni' dë lu ná'agaquië'. ¹¹ Narugu lu xipéla'gaquië' bönni' judío le rulu'í dá'gaquië' Dios, pero

libí'ili', tu' dzágali' Cristo, zóalen libí'ili' le rulu'í néquili' queé' Dios, le cabí néquini lu ni'a lu ná'agaca bönachi. Yugu' bönni' judío tu'gúé' tu guídido', pero libí'ili', nadúa iduté yöl-la' bönachi queé'li' le bénlenli' dul-la'. Caní naca queé'li' tu' benli' tsözxón Cristo cate' gútié' lë'e yaga cruz. ¹² Cate' bidí'ali' nisa guca ca bigáchi'lenli'-në' Cristo tsözxón yeru ba, en bubánlenli'-në' tsözxón tu' guyéajlë'éli' Dios, len yöl-la' huáca queé' busubanë' Cristo lu yöl-la' guti. ¹³ Zí'atëlö gúcali' ca nupa chinátigaca tu' nözi dul-la' gubága'li', en bití' guzóalen libí'ili' le rulu'í néquili' queé' Dios, pero na'a Dios nunë' ga nabánlenli'-në' tsözxón Cristo, en buniti lahuë' libí'ili' ca naca yúgu'të dul-la' gubága'li'. ¹⁴ Dios busúluë' yugu' le nabága'ru' le nazúajgaca lu xibá queé', lë na' tu'zegui rë'u didza'. Bugúé' lë na' nabága'ru', en budé'ë le lë'e yaga cruz ca tu le nabáguë'ë Cristo. ¹⁵ Cate' gútië' Cristo lë'e yaga cruz, bugúé' yöl-la' huáca unná bë' quégaca bö' xihui' unná bë', en quégaca bö' xihui' dë lu né'eguequi yöl-la' huáca, tu' bulu'e lahui le nácgaca bö' xihui' na', en bugúé' iduté le guta' lu né'eguequi.

Ral-la' güi'í ládxi'ru' le naca que yehua' yubá

¹⁶ Que lë ni na', bití' güi'í'í' lataj nu zegui libí'ili' didza' ca naca le rë'aj ráguli', o tu' cabí runli' zxon yugu' dza laní, o tu' cabí runli' zxon beo' sí' ruzé, o tu' cabí runli' zxon yugu' dza lá'ayi quégaca bönachi. ¹⁷ Yúgu'të lë ni naca ca tu bixín que le ral-la' gaca, ate' le rulu'í yúgu'të lë ni náquië' Cristo caz. ¹⁸ Bití' güi'í'í' lataj nu gun ga unítli' le ral-la' sí'í'li', nu runda' bayudxi ga ilaca nöxaj ládxi'gaca bönachi, en ilún zxon yugu' gubáz lá'ayi. Tu'gutsa' cuíngaquië' le cabí bila'lë'enë', en tun ba zxon cuíngaquië' ca naca le dzó'ösö ícjagaquië' lu

yöl-la' bönáchisö quégaquië'. ¹⁹ Nu run caní bití' da' Cristo. Náquië' Xanru', en ruzóë' tsutsu iduté le naca cazë', le nácaru' rë'u. Rugahuë' le, en runë' ga naca tuz ni'a que le zeaj lu dxita lu bin, ate' rizxon iduté le naca cazë' ca ré'ënë' Dios uxönë' le.

²⁰ Libí'ili' chinátilenli'-në' Cristo para cabirö ila'nná be'e xibá que yödzülió libí'ili'. ¿Bizx que runli' tsca ni nácali' que yödzülió, en runli' ca ta'nná bë' xibá que? ²¹ Caní ta'nná yugu' xibá que yödzülió ni:

Bití' quítjanu' lë ni.

Bití' gagu' lë na'.

Bití' canu' ia'tú le dë.

²² Yúgu'të lë ni ila'niti cate' chibugunru' léguequi dxin. Caní nácgaca le ta'nná bë' bönachi, en yugu' xibá nazí' lu né'eguequi. ²³ Le nácatë, yugu' xibá ni, téqui bönachi nápagaca yöl-la' réajni'í. Tun ga tu'lú'í cuínguequi ca bönachi yudo', en ga tu'lú'í cuínguequi nöxaj ladxi', en ga tu'saca' z'ígaca iduté le zeaj naca caz, pero xibá ni bití' ca' tácalen rë'u para gaca inná bé'eru' yugu' le rizé ládxi'ru' lu yöl-la' bönáchisö queéru'.

3 Na'a, channö nubánlenli'-në' Cristo, guli'güi' ladxi' le nácgaca que yehua' yubá ga ni' rë'ë Cristo cuita lë'ë ibëla Dios, ga náquië' lo. ² Guli'sá' ladxi' le taca xitsá'alö, en calëga le taca luyú ni. ³ Naca queé'li' tsca chinátli', ate' yöl-la' na'bán queé'li' rapa chi'ë Cristo ga ni' zoa cazë' Dios. ⁴ Cristo nabánili' libí'ili'. Cate' ulufí lahuë' Lë', ní'irö ulufí loli' ca' libí'ili' tsözxón len Lë' lu bení' queé'.

Yöl-la' na'bán gula, en yöl-la' na'bán cubi

⁵ Que lë ni na', guli'gún ga ila'niti le nacua'len libí'ili' que yödzülió ni: Yugu' le ruá' dö', en le nácgaca xihui', en yugu' le rizé ládxi'li' le ruá' dö', en yugu' le rizé ládxi'li' le naca xihui', en yöl-la' ruhuidi'.

Yöl-la' ruhuidi' naca læbi ca nu reaj ladxi' budó' guió' budó' yaga, tu' cabí reaj ladxi' Dios nu ruhuidi'. ⁶Tun bönachi yugu' le caní, ate' guné' Dios xíguia' yúgu'tè nupa biti' túngaca ca rna xtídzè'è. ⁷Yugu' dul-la' caní benli' ca' libí'ili' cate' ni' nadódili' lu nē'eguequi. ⁸Na'a, bíti'rò gunli' yugu' læ ni: Bíti'rò idzá'ali', en bíti'rò leli'. Bíti'rò nu gunli' zi', en bíti'rò inné xíhuili'.

Bíti'rò innali' le ruá' dó'.

⁹Biti' si' yé'eli' luzá'ali' tuli' ia'tuli' tu' chinucá'anali' le gúcali' zí'aló, en yugu' le benli' zí'aló. ¹⁰Chinacali' bönachi cubi, ate' tu tu dza ricúbili', ruhuöá-caröli' ca naca Nu na' bun libí'ili', para gúnbè'eli' Lè' idú ca náquiè' Lè'. ¹¹Tu' chidzágaru'-nè' Cristo: Bíti'rò nácaru' bönni' zi'tu', en bönni' judío.

Bíti'rò nácaru' bönni' narugu lu xipéla'-gaquiè' le naca bè' nu da' Dios, en bönni' biti' narugu lu xipéla'gaquiè' læ na' naca bè'.

Bíti'rò nácaru' bönni' ta'yéajni'inè', en bönni' biti' ta'yéajni'inè'.

Bíti'rò nácaru' bönni' nadó'ogaquiè', en bönni' biti' nadó'ogaquiè'.

Na'a, Cristo náquiè' yúgu'tè le náca-gaca lesaca', en dzáguiè' yúgu'tèru'.

¹²Dios nadxí'inè' libí'ili', en guróè' libí'ili' para guéquili' quez queè'. Que læ ni na', ral-la':

Güf'i ládxi'li' luzá'ali', en gácali' dxi'i ladxi',

en nöxaj ladxi', en cuidi' ladxi',

en cózali' zxön ladxi'.

¹³Channö raca didza' bizxaj tuli' len ia'tuli', guli'guá' ilén luzá'ali' tuli' ia'tuli', en buli'niti lo luzá'ali' tuli' ia'tuli' ca na' benè' Cristo, buniti lahué' libí'ili'.

¹⁴Le nazáca'tèrö ca yúgu'tè læ ni, ral-la' idxí'ili' yúgu'tè bönachi, tu' naca yöl-la' nadxí'i le run ga nácaru' tuz, en ga nácaru' idú. ¹⁵Guli'güü' lataj le ribequi dxi

icja ládxi'do'oru' inná bè' lu icja ládxi'-do'oli', læ na' runné' Dios queéru'. Que læ ni na' bulidzè' libí'ili', para gácali' tuz lu idútè le naca cazè' Cristo. Guli'guié' Dios: "Xclenu'."

¹⁶Guli'sí' lu ná'ali' xtídzè'è Cristo le gaca queéli' tu yöl-la' tsahui' zxön. Tu' zóalen libí'ili' yöl-la' réajni'i queè' Dios, buli'sedi, en buli'zéjni'i luzá'ali' tuli' ia'tuli'. Idú ládxi'li' guli'gul-la yugu' salmo queè' Dios, en yugu' le rul-la yöl-la' ba, en yugu' le rul-la lá'ayi, ate' guiéli'-nè' Dios: "Xclenu'." ¹⁷Yúgu'tè le runli', le naca didza' ru'ili' o le naca dxin runli', guli'gún yúgu'tè lu Lè' Xanru' Jesús, en guiéli'-nè' Dios Xuz: "Xclenu'", dzáguiè' Cristo libí'ili'.

Le ral-la' gunru' que luzá'aru' tu' néquiru' queè' Cristo

¹⁸Libí'ili', nigula nutsaga ná'aleni' bönni' queéli', guli'gún ca rna xtídzagaquiè' bönni' que queéli'

ca ral-la' gunli', tu' néquili' queè' Xanru'.

¹⁹Libí'ili', bönni' nutsaga ná'aleni' nigula queéli',

guli'dxí'i nigula que queéli', en biti' uzéli' bach légacanu.

²⁰Libí'ili', bi'i ra'bán,

guli'gún ca rna yúgu'tè xtídzagaquiè' xuz xiná'ali'.

Læ ni raza ládxe'è Xanru'.

²¹Libí'ili', nülöli' nácali' xúzgaca bfído',

biti' tödi bè' usína'li' zxf'inili',

para cabí huóaj ládxi'gacabi'.

²²Libí'ili', nülöli' nácali' bönni' nadó'ogaquiè',

guli'gún ca rna yúgu'tè xtídzagaquiè' xanli' luyú ni.

Calégasö gunli' caní cate' tu'yúé' libí'ili' ca na' tun nupa té'eni ilún ga ila'yaza

ládxi'gaca bönachi,

pero idú ládxi'li' guli'gún xichíngaquiè'

ca ral-la' ilún nupa tadxi Dios.

²³ Ca naca yúgu'tè le runli', guli'gún idú ládxi'li',

gaca ca runli' xichinë' Xanru', en calégasó ca runli' xichíngaca bönachi.

²⁴ Chinóz queézili' ubi'è Xanru' queé'li', gunnè' queé'li' le chinupé'è Dios queégaca nupa náccagaca xzí'ini cazè'.

Caní gaca, tu' runli' xichinë' Xanru' Jesucristo.

²⁵ Nu ruá' dö', ubi'è Xanru' que nu na' ca naca dö' ruá' nu na', tu' cabí ut-sé'è Dios ca ral-la' ubi'è que queégaca bönachi.

4 Libí'ili', núlöli' nácali' xángaca bönachi, guli'gún le naca tsahui', en le naca dxi'a ca rugunli' dxin yugu' bönni' huen dxin queé'li'.

Guli'tsójné zoa ca' Xanli' yehua' yubá.

² Libí'ili', yúgu'téli', buli'lídzatica'sè' Dios.

Buli'subán ládxi'li' ulídzali'-nè' Dios, en guli'guíe': "Xclenu'."

³ La' ná'asö cate' rulídzali'-nè' Dios, guli'nabi-nè' ca' gácalenè' netu', en gunnè' netu' lataj quíxjö'ötu' xtídzè'è Xanru', para gaca uzéajni'itu' bönachi le bigachi' ca naca queé' Cristo. Tu' runa' caní nadzuna' lidxi gufé ni. ⁴ Guli'nabi-nè' ca' Dios, gunnè' neda' lataj usalaj lá'ana' le bigachi' na' ca ral-la' guna'.

⁵ Lu yöl-la' réajni'i queé'li', guli'gún le runli' lógaca nupa biti' ta'yéajlè' Cristo. Guli'gunda' dxin yugu' dza uzá ládxe'è Dios queé'li', gunli' xichinë'. ⁶ Ral-la' guí'ili' didza' ca raza ládxe'è Dios, en ca ral-la' gun nupa néquiquequi queé'. Ral-la' inózili' ca' naca ral-la' ubí'ili' didza', bi guié'li' tu tu bönachi.

Yugu' bönachi queé' Cristo tu'gapa Dios luzé'eguequi

⁷ Tíquico quíxjöi'inè' libí'ili' le raca quia' ni. Náquiè' bóchi'ru' nadxí'iru'-nè'. Náquiè' ca' huen dxin idú queé' Xanru', en rúnlenè' neda' tsözxón dxin

queé' Xanru'. ⁸ Que lè ni na' risól-la'a-nè' ga zóali', para uzéajni'inè' libí'ili' le raca quia', en utipè' ládxi'li'. ⁹ Onésimo, bóchi'ru' na' nabábalenè' libí'ili' sa'yéajlenè' lè' tsözxón. Náquiè' ca' bóchi'ru' nadxí'iru'-nè', en réajlè'è Xanru'. Chopè' ni ulu'siyönnè' libí'ili' yúgu'tè le raca ni.

¹⁰ Aristarco, bönni' na' yú'ulenè' neda' tsözxón lidxi gufé rugapè' Dios libí'ili'. Bi'i Marcos, bi'i bönni' queénu nigula zanè' Bernabé rugápabi' Dios ca' libí'ili'. Chigudxa' libí'ili' bi gunli' queébi' bi'i Marcos na'. Channö huídabi' ga zóali', guli'gún-bi' bal. ¹¹ Bönni' ni lè' Jesús, en zoa ia'tú lè' Justo lësca' rugapè' Dios libí'ili'. Nacuá' zían bönachi judío ta'yéajlè' Cristo, pero tsónnasè' ni ladaj bönachi judío tunè' dxin que le rinná bè'è Dios tsözxón len neda', en tu'huf' zxóndè'è neda'. ¹² Epafras, bönni' ni nababè' ca' libí'ili' rugapè' Dios libí'ili'. Náquiè' huen dxin queé' Cristo, en idú ládxe'è rulidze' Dios, en ráta'yutica'sè' lahuè' gácalenè' libí'ili' para gácali' idú ladxí', en sóali' ca' sina' gunli' yúgu'tè le ré'eni quezínè' Dios. ¹³ Runa' ba nalí queé' Epafras na', ruí'ida' ládxe'è libí'ili' enca' nupa nacué' yödzö Laodicea, en nupa nacué' yödzö Hierápolis. ¹⁴ Demas, enca' Lucas tu'gapè' Dios libí'ili'. Náquiè' Lucas bönni' na' ruúnè' bönachi, ate nadxí'iru'-nè'.

¹⁵ Guli'gapa Dios bóchi'ru' nacué' Laodicea, enca' Ninfas, en bönachi queé' Cristo nacué' lídxinu Ninfas na'. ¹⁶ Cate' údxi ulábali' guichi ni ga ni' zóali', guli'gún ga ulu'laba le bönachi queé' Cristo nacué' Laodicea. Buli'laba ca' libí'ili' guichi na' ila'söl-la' bönachi Laodicea na' queé'li'. ¹⁷ Guli'guíe' Arquipo: "Bè' ládxi'u gunu' dxin na' budödè' Xanru' lu no'o'."

¹⁸ Neda', Pablo, ruzúaj caza' lu guichi dídza'do' ni, rnía': Rugapa' Dios libí'ili'. Guli'tsójné ca raca quia' nadzuna' lidxi

guíë ni. Rinábida'-në' Dios uzá' ládxe'ë
queéli' le naca dxi'a. ¡Ca' gaca!

DIDZA' ZÍ'ALÖ GUSÓL-LĚ'Ě PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

1 Neda', Pablo, rugapa' Dios libí'ili', zóali' Tesalónica. Néquili' queë' Cristo, ate' nácali' tuz len Dios, enca' len Xanru' Jesucristo. Dzágagaquíë' neda' Silvano, en bi'i Timoteo. Rinábida'-në' Xúziru' Dios, enca' Xanru' Jesucristo uzá' ládxë'ë queé'li', en gunë' ga soa dxi icja ládxi'do'oli'.

Yugu' le taca bë' ta'yéajlë' bönachi Tesalónica Dios

²Rética'stu'-në' Dios: "Xclenu'" cate' rőjnetu' ca naca queé'li' yúgu'téli'. Rőjnética'stu' libí'ili', bi rinábitu'-në' Dios ni'a queé'li' cate' rulidztu'-në'. ³Rőjnética'stu' lahuë' Xúziru' Dios ca naca le runli' tu' réajlë'ëli' Cristo, en ca naca dxin runli' tu' nadxí'ili'-në', en ca na' nácatíca'sili' tsutsu tu' runli' löza Xanru' Jesucristo. ⁴Böchi' luzá'atu', Dios nadxí'inë' libí'ili', ate' nöztu' guró cazë' Lë' libí'ili'. ⁵Caní naca, tu' bidxín queé'li' didza' dxi'a runtú' libán que, calëga len dídza'só, pero lësca' len yöl-la' huáca bidxín queé'li', ate' Dios Bö' Lá'ayi benë' tsutsu le, ate' idú ládxi'li' benli' löza le. Nöz quézili' ca gúcatu' ga zóali' tu' nadxí'itu' libí'ili'.

⁶Libí'ili' butsá' cuinli', ate' runli' ca runtú' netu', enca' ca benë' Xanru', tu' guxzí' lu ná'ali' xtídzë'ë, ate' sal-la' gudí'i guxzáca'da'ali', budzëjali' tu' zóalenë' Dios Bö' Lá'ayi libí'ili'. ⁷Caní naca, chinácali' tu le naca bë' lógaca yúgu'të bönachi ta'yéajlë' Cristo nacua' luyú Macedonia, en luyú Acaya. ⁸Caní naca, tu' guzë xtídzë'ë Xanru' ni'a queé'li'. Calé-gasó luyú Macedonia, en luyú Acaya, pero lësca' yúgu'të lataj guzë didza'

ca réajlë'ëli' Dios. Caní naca, biti' bi run bayudxi innatu', ⁹tu' ta'guixjō' la' léguquisō bönachi ni' queé'tu' ca benli' netu' bal, en ca na' butsá' cuinli'. Bucá'anali' yugu' budó' guió'j budó' yaga, en böácali' queë' Dios para gunli' xichinë' Dios ban, Nu naca idú Dios. ¹⁰Na'a, ribózali' dza huödë' Zxí'inë' Dios, irúajë' yehua' yubá. Dios busubanë' Lë' lu yöl-la' guti. Nu ni naca Jesús, Nu rusölá rë'u lu dul-la', para cabí soa le gun ga ichúguie' Dios queë'ru' dza si' za'.

Xichinë' Dios benë' Pablo yödzo Tesalónica

2 Böchi' luzá'atu', nöz quézili' biti' guca nítisō dxin queë' Dios bentu' cate' ni' bidxintu' ga zóali'. ²Nózili' ca guca queé'tu' lu yödzo Filipos, ca na' gudí'i guxzáca'tu', ate' guluá' dö' bönachi ni' queé'tu'. Ní'irō cate' bidxintu' ga zóali' gúcatu' rugu ladxí' tu' guzóalenë' Dios queë'ru' netu', ate' bentu' libán loli' que didza' dxi'a le budödë' Dios lu na'tu'. Caní bentu' sal-la' gula'dá'baga'da' bönachi ládzali' netu'. ³Cate' ni' guchízatu' icja nágali' xtídzë'ë Dios, bé'ëtu' didza', calëga tu' nazí'i ye'e netu', en calëga tu' bi guzë ládxi'tu' le dë queé'li', en biti' guxzí' yé'etu' libí'ili'. ⁴Tu' nuzxōni ládxë'ë Dios netu', budödë' lu na'tu' gun-tu' libán que didza' dxi'a queë', ate' canísō ru'itu' didza'. ⁵Nöz quézili' catu caz bé'lentu' libí'ili' didza' le gun zxon libí'ili', en biti' gulëaj tsahui' cuintu' ca run nu bi rizé ladxí' le dë queé'li'. Nöz quézinë' Dios naca caní. ⁶Biti' gudíljatu' yöl-la' ba le naca que yödzoilió ni, lë na' cú'uli' libí'ili' netu', en calëga le ila'gú'u bönachi netu'. Sal-la' dë lu na'tu' inná bé'etu' libí'ili' tu' nácatu' gubáz nasól-lë'ë Cristo ⁷guzóalentu' libí'ili' dx-i'i ládxi'do', en bentu' ca runnu xiná'agacabi' bi'i hué'ënido', run chí'inu légacabi' dxi'i ládxi'do'. ⁸Caní guca, bidxí'ide-e-tu' libí'ili', ga bidxintë gu'unitu' udódi-

tu' lu ná'ali', calégasö didza' dxi'a queë' Dios, pero lá'tu'biqúi' udödi caztu' yöl-la' na'bán queëtu', tu' nadxí'ide'etu' libí'ili'.⁹ Rójneli', böchi' luzá'atu', ca na' guca cate' ni' bentu' libán loli' que didza' dxi'a queë' Dios, ca béntica'stu' dxin zi'i, ate' rëla, en tē dza bentu' dxin para cabí usaca' zí'itu' nitulí' libí'ili'.

¹⁰ Libí'ili' na' réajlë'ëli' Cristo, huáca gunli' ba nalí, ate' nózinë' Dios ca na' gudá'alentu' libí'ili' idú ca raza ládxi'ë Dios, en idú dxí'ado', en ca na' cuntú nu gaca bi inné que. ¹¹ Lësca' caní nózili' ca bentu' ca runë' tu bönni' quégacabi' zxf'inë', guchízatu' icja nágali', en butípatu' ládxi'li' tu tuli'. ¹² Busá'atu' ládxi'li' gunli' ca ral-la' gun nu nequi queë' Dios. Lë cazë' bulidzë' libí'ili' para gaca tsú'uli' ga na' rinná bë'ë Lë' lu bení' queë'.

¹³ Que lë ni na' ca', rética'stu'-në' Dios: "Xclenu'." Caní runtu' tu' guzxi' lu ná'ali' xtídzë'ë Dios le biyónili' bë'ëtu' didza', caléga ca xtídzá' bönáchisö, pero ca le nácatë naca, xtídzë'ë Dios naca. Xtídzë'ë na' run dxin lu icja ládxi'do'oli' libí'ili', réajlë'ëli' Cristo. ¹⁴ Böchi' luzá'atu', raza queéli' ca raza quégaca bönachi queë' Dios, nupa néquiquequi queë' Jesucristo luyú Judea. Caní naca tu' chigudí' guzxacá'da'ali' lu ná'agaca bönachi uládz queéli', lëbisö ca na' gula'guf'i gula'záquië' légaquië' lu ná'agaca bönachi uládz quégaquië', nupa ni' nacagaca bönni' judío. ¹⁵ Yugu' bönni' judío na' gulútië' Xanru' Jesús, en gulútië' ca' yugu' bönni' gulu'ë didza' uláz queë' Dios. Gula'bía ládxi'gaquië', en bulu'láguë' ca' netu'. Biti' tunë' le raza ládxi'ë Dios, tu' cabí ta'l'é'enë' dx-i'a yúgu'të bönachi izá'a. ¹⁶ Tu'záguë'ë ca' xinöztu', para cabí guntu' libán lógaca bönachi izá'a na' bití' nabábagaca légaquië', tu' ru'ilentu' léguequi didza' para ulu'lágaca. Caní raza, tu'zántica'së' dul-la' nabága'gaquië', en chinábaga'

gaquië' xígua' le run ga ichúguië' Dios quégaquië'.

Pablo ré'ënë' tsöjyúë' böchi'ru' nacu'ë Tesalónica

¹⁷ Na'a, böchi' luzá'atu', ruhu'f'initu' ca runë' tu bönni' uzëbi tu' nulá'alentu' libí'ili' tu chí'ido', pero sal-la' bití' rilé'etu' libí'ili', bití' nál-la ládxi'tu' libí'ili'. Que lë ni na', ru'f'i ládxi'rötu' ulé'etu' loli', tu' rizëda' ládxi'tu' guntu' caní. ¹⁸ Que lë ni na' ca' gú'unitu' guídatu' ga zóali', ate' neda', Pablo, le nácatë bë' ládxa'a guída' chopa tsonna luzuí, pero Satanás, tu' xihui', buzaga' xinöztu'. ¹⁹ ¿Bizxi caz naca le run ga runtu' löza, o le run ga rudzëjatu', o le ralla' idéli'tu', le uzí'itu' xibé lahuë' Xanru' Jesucristo cate' huödë'? ¿Naru' cabí libí' cázali' na'? ²⁰ Libí' cázali' nácali' le run ga nácatu' bica' ba, en le run ga rudzëjatu'.

3 Que lë ni na', cate' bití'rö guca guá' ilentu', ben xtídzá'tu' ugá'anatu' chópatu' lu yödzo Atenas, ² ate' gúsól-la'tu'-bi' bi' böchi'ru', Timoteo ga zóali'. Nácabi' bi'i huen dxin queë' Dios, en rúnlenbi' neda' tsözxón libán que didza' dx-i'a queë' Cristo. Gusól-la'tu'-bi' ga zóali' para cuéqui' libí'ili' tsutsu, en ichízabi' icja nágali' ca ral-la' tséajlë'ëli' Cristo, ³ para cabí soa nu gaca chopa ladxi' ni'a que le tu'saca' zi' bönachi ni netu'. Nöz quézili' zóaru' yödzülió ni para guá' ilenru' le caní. ⁴ Lësca' cate' ni' guzóalentu' libí'ili', busiyöntu' libí'ili' ca chizóa gaca le ulu'saca' zi' rë'u, le gaca ca na' chiguca queëtu', ate' nöz quézili' lë na'. ⁵ Que lë ni na', cate' bití'rö guca guá' ilena', gúsól-la'-a-bi' bi' Timoteo ga zóali', para ududíxjöi'ibi' neda' ca naca queéli' ca réajlë'ëli'-në' Cristo, en channö cabí gulú'u tu' xihui' libí'ili' nöza dul-la', nu na' rigú'u bönachi nöza dul-la', en channö cabí böaca nítisö dxin na' bentu' ga zóali'.

⁶Cate' buzá'abi' bi'i Timoteo ga zóali', en budxinbi' ga zóatu', busiyónbi' netu' le naca dxi'a. B'é'ebi' didza' ca na' réajl'é'eli' Cristo, en ca na' nadxí'igacali'-né' yugu' böchi' luzá'aru', en ca na', lu yöl-la' dxi'i ladxi' queéli' röjnética'sili' netu', enca' ca na' raca ládxi'li' ulé'eli' netu', ca na' netu' raca ládxi'tu' ca' ulé'etu' lib'ili'. ⁷Que lè ni na', böchi' luzá'atu', cate' ni' gudfi' guzáca'tu' yúgu'tè lè ni, en zían le guca queétu', bidxín didza' queétu' le bufi' zxon netu' cate' biyónitu' ca réajl'é'eli'-né' Cristo. ⁸Na'a, nuhuóaca ládxi'tu' tu' riyónitu' ró'oli' tsutsu ca réajl'é'eli'-né' Xanru'. ⁹¿Nacxi caz gaca guíetu'-né' Dios: "Xclenu" ca ral-la' guntu' ni'a que yúgu'tè le run ga rudzeja ládxi'tu' lahué' Dios queéru' ni'a que le nácali' lib'ili'? ¹⁰Bayudxi rulidztu'-né' Dios, en rinábitu'-né' rëla, en tè dza para gaca ulé'etu' lib'ili', en usá'atu' le riyadzaj queéli' ca naca le réajl'é'eli'-né' Cristo.

¹¹Na'a rinábitu'-né' Xúziru' Dios, enca' Xanru' Jesucristo, cu'é netu' nóza ga idxintu' ga zóali'. ¹²Lësca' rinábitu'-né' Xanru' guné' ga gala, en gaca idú ca nadxí'ili' luzá'ali' tuli' ia'tuli', en ca nadxí'ili' yúgu'tè bönachi, ca na' netu' nadxí'itu' ca' lib'ili'. ¹³Rinábitu'-né' guné' ga gaca tsutsu, en idú dxi'a icja ládxi'do'oli' lahué' Xúziru' Dios ca sa'yéaj le naca lá'ayi, ate' guné' caní ga idxinrö dza huödë' Xanru' Jesucristo, dzágagaca bönachi lá'ayi queé' Lë'.

Le runru' le raza ládxe'ë Dios

4 Ia'stú, böchi' luzá'atu', ni'a queé' Xanru' Jesús ráta'yutu' loli', en richízatu' icja nágali' para gunli' ca naca le chinazédali' lu na'tu' ca ral-la' gunli' le raza ládxe'ë Dios. Ca na' chirunli', ca' ral-la' gúntica'sili'.

²Chinóz quézili' yugu' le gunná bé'etu' lib'ili' uláz queé' Xanru' Jesús. ³Le ré'ënë' Dios naca gácali' idú dxi'a, en

bíti'rö gunli' le cabí naca tsahui', ⁴en inózili' tu tuli' nacxi ral-la' sóaleni'-nu nigula que queéli' idú ca sa'yéaj le naca lá'ayi, en gunli' légacanu bal. ⁵Biti' ral-la' sóaleni'-nu nigula queéli' lu yöl-la' rizé ladxí' le ruá' dö', ca na' tun bönachi bití' nabábagaca Dios, en bití' núbë'-gaca Dios. ⁶Ca nácagaca lè ni, cuntu nu ral-la' tödi bë', en cabí si' ye'e böchi' luzé'e bagáchi'sö, tu' ichúguié' Lë cazë' Xanru' quégaca yúgu'tè nupa tun le caní, guné' ca na' chigúdxitu' lib'ili', en bentu' ba nalí que loli'. ⁷Dios bulidzë' rë'u, calëga para gunru' le ruá' dö', pero para gácaru' idú dxi'a. ⁸Caní naca, nu ruzóa tsölá'alö lè ni, calëga bönáchisö ruzóa tsölá'alö, pero Dios caz ruzóa tsölá'alö, tu' gusól-lë'ë Lë cazë' Dios Bö' Lá'ayi queéru', Nu ru'i caní didza'.

⁹Biti' run bayudxi uzúaja' queéli' lu guichi ca ral-la' idxí'igacali'-né' böchi' luzá'ali', tu' chinazédali' la' lib'isili' lu në'ë Dios idxí'ili' luzá'ali' tuli' ia'tuli'. ¹⁰Le nácatë nadxí'igacali'-né' yúgu'tè böchi' luzá'aru' nacu'ë luyú Macedonia. Na'a, ráta'yutu' loli', böchi' luzá'atu', para idxí'igacaröli'-né' ca' yúgu'tè böchi' luzá'ali'. ¹¹Ráta'yutu' loli' ca', güfi' ládxi'li' cózali' dxí'ado', en gunli' yugu' le dë lu ná'asili', en gunli' dxin len na'a cuinli' ca na' chigunná bé'etu' lib'ili'. ¹²Gunná bé'etu' lib'ili' caní para gaca gunli' le naca dxí'ado' lógaca nupa bití' nabábagaca lib'ili', en caní gaca, bití' bi yadzaj queéli'.

Ca gaca cate' huödë'

Xanru' Jesucristo

¹³Lësca', böchi' luzá'atu', ré'ënitu' in-ózili' ca raca quégaca nupa chinátigaca, para cabí huí'nili' ca tun ia'zica'rö bönachi bití' zoa le tun löza. ¹⁴Channö réajl'é'ëru' gútié' Jesús, en bubanë', lësca' caní ral-la' uzxöni ládxi'ru'-né' Dios guné' ga huódalengaca tsözxón Jesús nupa ni' chigulati, en gula'yéajlë' Lë'.

¹⁵ Que lë ni na' rigu'xjöi'itu' lib'ili' xtídzë' Xanru' le rnna caní: "Rë'u ni zóaru' nabanru', en ugá'anaru' ga idxinrö dza huödë' Xanru' Jesucristo, bití' tsöjtságaru'-në' Cristo zí'alö ca nupa chigulati." ¹⁶ Caní gaca, tu' huötjë' Lë cazë' Xanru', en irúajë' yehua' yubá, ate' yön chi'ë, len yöl-la' unná bë' ulidzë', ate' yön ca' chi'ë gubáz lá'ayi lo, ate' yön ca' luzu ucödxë' Dios, ate' ulu'bán nupa na' chigulati, en gula'yéajlë' Cristo. ¹⁷ Ní'irö rë'u ni zóaru' nabanru', en nagá'anaru' luyú ni, uchisë' rë'u tsözxón len léguequi lu böaj lúzxiba para tsöjtságaru'-në' Xanru' lu bö'ös. Caní gaca, sóalenticas'iru'-në' Xanru'. ¹⁸ Que lë ni na', guli'huí' zxón luzá'ali' tuli' ia'tuli' ca nácagaca didza' ni.

5 Na'a, ca naca dza na', o rëla na' cate' ilaca lë ni, bití' run bayudxi uzúaja' queé'li' lu guichi, böchi' luzá'atu'. ² Lib'ili' chinóz quézili' dxi'a ca gaca dza cate' huödë' Xanru'. Idxinë' tsárido'os ca ridxinë' gubán chi'i dzó'ölö. ³ Cate' ilá'nná bönachi: "Raca dxi'a queéru', en bití' bi gaca queéru'", ní'irö la' idxintë le usuniti léguequi, lë na' idxín quéguequi ca na' ridxín le rigufi rizáca'nu nigula na' chizóa sóabi' bí'ido' queénu, ate' cuntu nu nutsa' ladaj bönachi yödzölió ni nu ulá cate' gaca lë na' gaca dza na'. ⁴ Na'a, böchi' luzá'atu', bití' zóali' chulla niti, en que lë ni na' bití' idxín dza ni' queé'li' bagáchi'sö ca ridxinë' bönni' gubán. ⁵ Yúgu'tëli' nácali' bönachi que bení', en que lahui' dza. Bití' nácaru' bönachi que chi'i dzó'ölö, en calëga que le naca chul-la. ⁶ Que lë ni na', bití' ral-la' tödi yëla loru' ca raca quégaca nupa bití' nabábagaca rë'u, pero ral-la' usubán ládxi'ru', en cózaru' ba'a ládxi'ido'. ⁷ Nupa tasi, chi'i dzó'ölö tasi, en nupa ta'zudxi, chi'i dzó'ölö ca' ta'zudxi. ⁸ Na'a, rë'u ni, nácaru' que lahui' dza, en ral-la' cózaru' ba'a ládxi'ido', tu' chinácu-ru' xzaru' le run chi'i rë'u, le naca yöl-

la' réajlë' queéru' Dios, en yöl-la' nadxí'i, ate' le runru' löza uláru' naca ca tu lu'u guié le run chi'i ícjaru'. ⁹ Caní naca, tu' nuzóë' Dios rë'u ni, calëga para idxinru' ga ichúguie' queéru', pero para uláru' tu' ruzxóni ládxi'ru'-në' Xanru' Jesucristo, ¹⁰ tu' gútië' Jesús uláz queéru' para sóaru' ibanru' tsözxón len Lë' cate' huödë', sal-la' chinátiru' o sóaru' ibanru' dza ni'. ¹¹ Que lë ni na' ral-la' utípali' ládxi'li' tuli' ia'tuli', en gunli' tsutsu tuli' ia'tuli' ca na' chirunli'.

Pablo richízië' icja nágagaquië' böchi' luzé'ë ta'yéajlë'ë Cristo

¹² Ráta'yutu' loli', böchi' luzá'atu', gún-bë'ëli' nupa tun xichinë' Xanru' ga zóali', nupa na' ta'nná be'e lib'ili' uláz queé' Xanru', en tu'sá' ládxi'li'. ¹³ Ráta'yutu' loli' ca', gunli' légaquië' bal lu yöl-la' nadxí'i queé'li', tu' tunë' dxin na'. Guli'cöza dxí'ado' tuli' len ia'tuli'.

¹⁴ Lësca' caní richízatu' icja nágali', böchi' luzá'atu', para usá'ali' ládxi'gaca nupa bití' túngaca dxin, en utípali' ládxi'gaca nupa tu'huóaj ládxi'guequi, en gácalenli' nupa bití' naca tsutsu ca ta'yéajlë' Cristo, en gácali' nöxaj ládxi' lógaca yúgu'të bönachi.

¹⁵ Guli'gún chi'i cuinli' para cabí uzí' lëbi luzá'ali', en cabí guá'ali' dö' que nu ruá' dö' queé'li', pero guli'güí' ládxi'li' gúntica'sili' le naca dxi'a que luzá'ali' tuli' ia'tuli', en quégaca yúgu'të bönachi.

¹⁶ Buli'dzéjatica'sö,

¹⁷ en buli'lídzatica'së' Dios,

¹⁸ en guli'guíë' Lë': "Xclenu'."

Caní ral-la' gunli' ni'a que yúgu'të le raca queé'li', tu' nácagaca lë ni le ré'ënë' Dios gunli' tu' nácali' queë' Jesucristo.

¹⁹ Bití' uzóa dxili' le rulídzatica'së' Dios Bö' Lá'ayi lib'ili'.

²⁰ Bití' uzóali' tsölá'alö xtídzë'ë bönni' ru'ë didza' uláz queë' Dios.

²¹ Guli'sí' bë' yúgu'të, en guli'sí' lu ná'ali' le naca dxi'a.

²² Biti' bi gútsa'li' le ruá' dö'.

²³ Lë cazë' Dios, Nu run ga zoa dxi icja ládxi'do'oru', gunë' ga gácali' idú dxi'a, en gun chi'ë bö' naca cázali', en icja ládxi'do'oli', en idútë le nácali', ate' cuntu nu gaca bi inné queéli' dza ni' huödë' Xanru' Jesucristo. ²⁴ Runë' Dios ca rnnë', Bönni' na' bulidzë' libí'ili'. Lë cazë' gunë' yugu' lë ni.

**Pablo rigu'ë yugu' böchi'
luzé'ë lu në'ë Dios**

²⁵ Böchi' luzá'atu', buli'lidzë' Dios, en inábili'-në' gácalenë' netu'.

²⁶ Buli'gapa Dios yúgu'të böchi' luzá'aru', en unída'li' légaquië' lu yöl-la' nadxí'i queéli'.

²⁷ Ní'a queë' Xanru' Dios ruchi'a libí'ili' ulábali' guichi ni lógaca yúgu'të böchi' luzá'aru' nabábagaquië' Cristo.

²⁸ Rinábida'-në' Xanru' Jesucristo uzá' ládxi'ë queéli' le nácgaca dxi'a queë'. ¡Ca' gaca!

DIDZA' BUROPI GUSÓL-LĒ'Ē PABLO YÖDZÖ TESALÓNICA

Pablo rugapë' Dios bönachi queë' Cristo nacua' Tesalónica

1 Neda', Pablo, rugapa' Dios lib'ili', zóali' Tesalónica. Nácali' queë' Xúziru' Dios, enca' queë' Xanru' Jesucristo. Silvano, en bi'i Timoteo dzágagaquië' neda'. ²Rinábitu' Xúziru' Dios, en Xanru' Jesucristo, uzá' ládxë'ë queé'li', en gunë' ga soa dxi icja ládxi'do'oli'.

Dios ichúguië' quegaca bönachi dul-la' ila'nítigaca cate' huödë' Cristo

³Ral-la' gufética'stu'-në' Dios: "Xclenu" ca naca queé'li', böchi' luzá'atu', ate' naca dxi'a guntu' caní, tu' zeaj rácarö idú ca réajlë'ëli'-në' Dios. Lësca' caní, ca nadxi'ili' luzá'ali' tuli' ia'tuli' zeaj rácarö idú. ⁴Que lë ni na', len yöl-la' rudzeja riguixjö'ötu' ca naca queé'li' lógaca bönachi queë' Dios ni, tu' ribózali' zxön ladxi', en réajlë'ëli' Dios sal-la' ta'bíada' ládxi'gaca bönachi lib'ili', en riguf'i rizáca'da'ali', pero ruá' rilenli' yúgu'të. ⁵Yugu' lë ni taca bë' naca tsahui' ca ruchi'a rusöróë' Dios bönachi. Ru'ë lataj riguf'i rizáca'li' na'a, para gácali' lesaca' tsázali' ga ni' rinná bë'ë Lë'.

⁶Naca tsahui' ca gunë' Dios, ubi'ë que-gaca nupa tu'saca' zi' lib'ili', gunë' ga ila'guf'i ila'zaca' nupa na'. ⁷Ia'stú, lib'ili' riguf'i rizáca'li' na'a, ate' ubi'ë Dios queé'li', gunë' ga uzí' ládxi'li' tsözxón len netu', dza ni' ilá' lahuë' Xanru' Jesucristo, cate' irúajë' yehua' yubá. Yugu' gubáz lá'ayi ni'a në'ë ilunë' Lë' tsözxón, en ulu'lu'ë lahui yöl-la' huáca zxön queë'. ⁸Ilá' lahuë' Cristo dza ni' ca tu guí' zxön cate' ni' gunë' zi' nupa biti' núnbë'gaca Dios, en biti' túngaca ca rna didza' dx-

i'a queë' Xanru' Jesucristo. ⁹Yugu' bönni' caní, uzí' lëbë' légaquië', ate' tsaz tsöjt-sázagaquië' lu guí' gabila. Ila'cuitë' tsaz lahuë' Xanru', ga nalá'gaca yöl-la' zxön queë', en yöl-la' huáca queë'. ¹⁰Caní gaca dza ni' cate' huödë' para gaca queë' yöl-la' ba ni'a que le nácagaca bönachi lá'ayi queë', ate' ulu'bani ni'a que le benë' ga nácagaca yúgu'të nupa ta'yéajlë' Lë'. Caní gaca ca' queé'li' tu' guyéajlë'ëli' le bentu' ba nalí que loli' ca naca queë' Jesús.

¹¹Que lë ni na' ca', rulídzatica'stu'-në' Dios queéru', en rinábitu'-në' gácalenë' lib'ili', en gunë' ga gácali' lesaca' idé'li' lë na' bulidzë' lib'ili' para uzí'ili' xibé. Lësca' rinábitu'-në' gunë' ga gaca idú yúgu'të le ruf'i ládxi'li' gunli' le naca dx-i'a, en yúgu'të dxin runli' lu yöl-la' réajlë' queé'li' Lë'. Len yöl-la' huáca queë' Dios huáca gunli' lë ni. ¹²Caní gaca, gaca yöl-la' ba que Lë' Xanru' Jesucristo ni'a que le runli', ate' gácali' lib'ili' bica' ba ni'a que le gunë' Lë', gaca ca naca le buzá' ládxë'ë queé'li' Dios queéru', enca' Xanru' Jesucristo.

Ulu'í lahuë' Bönni' Xihui'

2 Na'a, ca naca que dza huödë' Xanru' Jesucristo, en ca gaca, udutubë' rë'u queë' Lë', ráta'yutu' loli', böchi' luzá'atu', ²para cabí guí'ili' lataj nu gun chixi lib'ili' ca nácagaca le guzxí' lu ná'ali'. Biti' cuéqui böniga icja ládxi'do'oli' ni'a que bi ta'nnë' bönni' ta'zí' yë'ë, ta'nnë' zóalenë' Dios Bö' Lá'ayi légaquië', o ni'a que bi didza' tu'f'i bönachi, o ni'a que bi nazúaj tu lu guichi ta'nnë' netu' gusól-la'tu', le rna: "Chigudödi dza huödë' Xanru'." ³Biti' ca' guí'ili' lataj nu si' ye'e lib'ili', tu' cabí idxín dza ni' huödë' Jesús channö cabí ila'lá' lahui z'falö zían nupa ila'dá'baga' Dios, ate' ilá' lahuë' Bönni' Xihui', bönni' na' ral-la' tsázië' lu guí' gabila. ⁴Bönni' ni uzáguë'ë, ate' lu yöl-la' run ba zxön cuinë' tá'baguë'ë yúgu'të

le nequi queë Dios, o le tun zxön bö-nachi lu yöl-la' run Dios bal quéguequi. Gunë bönni' na' caní ga idxintë cö'ë ca Dios caz lu yudo' ga naca xilatjé' Dios, en gun cuinë' ca Dios.

⁵ ¿Naru' cabí röjneli' busiyönda' libí'ili' yugu' lë ni cate' ni' zóalena' libí'ili'? ⁶ Na'a, núnbë'ëli' Nu ruzaga' xinözë' Bönni' Xihui' na', para cabí ilá' lahuë' zí'alö ga idxinrö dza queë'. ⁷ Chirún dxin le nagachi' que le naca xihui', pero ná'atë zoa Nu ruzaga' xinözë' Bönni' Xihui' na' ga idxinrö dza ucuíta cuini Nu na' ruzaga' xinözë'. ⁸ Ní'irö ilá' lahuë' Bönni' Xihui' na', ate' Xanru' Jesucristo ucul-lë' lë' len bö' irúaj ru'ë, en usunítie' lë' len le tsëpi yösa bení' que dza huödë'. ⁹ Cate' idxinë' Bönni' Xihui' na', len yöl-la' huáca que Satanás tu' xihui' ilá' lahuë'. Len yöl-la' huáca que le cabí nácatë, gunë' yúgu'të yöl-la' huáca zxön, en yúgu'të le ilaca bë', en yúgu'të le ilún ga ulu'bani bö-nachi. ¹⁰ Len yöl-la' huáca que le cabí nácatë, gunë' caní lógaca nupa ila'niti tu' cabí gula'z' lu né'eguequi idú lách-i'guequi le naca idútë li, para ulu'láguëqui. ¹¹ Que lë ni na' Dios gu'ë lataj idxin quéguequi tu nu run yöl-la' huáca, nu si' ye'e léguëqui para ila'yéajlë' le cabí nácatë. ¹² Caní gaca para ila'baga' xíguia' yúgu'të nupa biti' gula'yéajlë' le naca idútë li, pero gula'yaza láchxi'gaca le cabí naca tsahui'.

Nupa guró cazë Dios para ulu'lágaca

¹³ Böchi' luzá'atu', libí'ili' na' nadxí'inë' Xanru' libí'ili', ral-la' guítica'stu'-në' Dios: "Xclenu'" ni'a que le naca queé'li', tu' chiguró cazë Dios libí'ili' dza ni'te para uláli' ni'a que le runë' Dios Bö' Lá'ayi, para gácali' idú tsahui' tu' réajlë'ëli' le naca idútë li. ¹⁴ Para gaca caní queé'li', Dios caz bulidzë' libí'ili', para idéli'li' gunli' tsözxön Xanru' Jesucristo lu bení' queë'.

Caní gaca ni'a que didza' dxi'a runtu' libán que.

¹⁵ Que lë ni na', böchi' luzá'atu', guli'sóa tsutsu, en guli'gún chi'i didza' na' nazédali', le bé'entu' libí'ili', en buzúajtu' queé'li' lu guichi. ¹⁶⁻¹⁷ Rinábitu'-në' Xanru' Jesucristo, en Xúziru' Dios, utipë' láchxi'li', en gunë' ga gácali' tsutsu ca naca yúgu'të le naca tsahui' runli', en yúgu'të didza' dxi'a ruí'ili'. Lë cazë' nadxí'inë' rë'u, en bennë' queéru' le ruhuí' xzóntica'sö rë'u, en le naca dxi'a runru' löza, yugu' lë na' buzá' láchxë'ë Dios queéru'.

Le ral-la' inábiru'-në' Dios

3 Ia'stú, böchi' luzá'atu', buli'lidzë' Dios, en inábili'-në' gácalenë' netu', runtu' libán ni, para së xtídzë'ë Xanru', ate' ilún le bal bö-nachi, para gaca ni ca na' guca ga ni' zóali' libí'ili'. ² Inábili'-në' ca' para ulatu' lu ná'agaquië' bönni' xihui' tuá' dö', tu' cabí ta'yéajlë' yúgu'të bö-nachi Dios. ³ Na'a, tu' runë' Xanru' ca rnnë', gunë' ga gácali' tsutsu, en gun chi'ë libí'ili', para cabí idzunli' lu na' tu' xihui'. ⁴ Ruzxöni láchxi'tu'-në' Xanru' ca naca queé'li', gunli' yugu' lë ni si' gunábitu' libí'ili', ca na' chirunli'. ⁵ Rinábitu'-në' Xanru' usë'ë láchxi'li' para idxí'ili'-në' Dios, en cózali' zxön láchxi' ca na' benë' Cristo.

Ca run bayudxi gunru' dxin

⁶ Ni'a que Lë' Xanru' Jesucristo ruchí'atu' libí'ili', böchi' luzá'atu', icuítali' ga nacu'ë böchi' luzá'aru' ta'dasë' ca', en biti' tunë' ca naca xibá buséditu' libí'ili'. ⁷ Nöz quézili' ral-la' gunli' ca runtu' netu'. Biti' gudásitu' ca' netu' ga ni' zóali'. ⁸ Biti' gudágusötu' le bénnali' queétu', pero lu yöl-la' ruúbi rugu'í, en lu yöl-la' ricuidi' bentu' dxin rëla, en te dza para cabí usaca' zí'itu' nituli' libí'ili'. ⁹ Caní bentu' para gácatu' loli' ca tu le rulu'í libí'ili' ca

ral-la' gunli', sal-la' dë lu na'tu' inábatu' bi gunli' queé'tu'. ¹⁰Lësca' cate' ni' guzóalentu' libí'ili', buchí'atu' libí'ili' caní, le rnna: "Channö cabí ré'ënë' nu bönni' gunë' dxin, biti' güí'ili' le gahuë'." ¹¹Canisö rnnatu' tu' riyónitu' nútsa'gaquië' ládjali' yugu' bönni' ta'dasë' ca', biti' bi dxin tunë', pero ta'dasë' ca' bi tun bi ta'nnë'. ¹²Ni'a queë' Xanru' Jesucristo ruchí'atu' yugu' bönni' tunë' caní, en richízatu' icja nágagaquië' ilunë' dxin lu yöl-la' riböza dxí'ado', para gaca ilahuë' le nequi quegacasë'.

¹³Na'a, böchi' luzá'atu', biti' soa dxili', gúntica'sili' le naca dxi'a. ¹⁴Channö núti'tës bönni' biti' gunë' ca rnna xtídza-tu', le ruzúajtu' lu guichi ni, guli'gún ga gaca bë'ë bönni' na', en biti' gun-

li' tsözxón lë' para utuí'inë'. ¹⁵Biti' ralla' il'éli'-në' ca tu bönni' biti' ril'éenë' libí'ili' dxi'a, pero guli'sá' ládxe'ë ca böchi' cázali'.

Pablo rigu'ë lu në'ë Dios yugu' böchi'ru' nacu'ë Tesalónica

¹⁶Rinábitu'-në' Xanru' gúntica'së' ga cuía dxi icja ládxi'do'oli' ca naca yúgu'të le runli', en sóalenë' yúgu'tëli'. Lë cazë runë' ga rö'ö dxi icja ládxi'do'oru'.

¹⁷Neda', Pablo, len na' caza' ruzúaja' lu guichi ni le rugapa' Dios libí'ili', ate naca tu le naca bë' yúgu'të guichi risól-la'a. Canisö ruzúaja' lu guichi. ¹⁸¡Le ruzá' ládxe'ë Xanru' Jesucristo queé'ru' gaca queéli' yúgu'tëli'! ¡Ca' gaca!

DIDZA' ZÍ'ALÖ GUSÓL-LĒ'Ē PABLO QUEĒBI' BI'I TIMOTEO

Pablo rugapë' Dios bi'i Timoteo

1 Neda', Pablo, naca' gubáz nasól-lĒ'Ē Jesucristo. Caní naca' tu' caní gunná bĒ'Ē Dios, Nu rusólá rĒ'u, enca' tu' gunná bĒ'Ē caní Xanru' Jesucristo, Nu na' runru' löza. ²Rugapa' Dios li', bócha'ado' Timoteo. Nacu' ca xzí'ini caza' tu' benru' tsözxón xichinĒ' Dios. Rinábida'-nĒ' Xúziru' Dios, enca' Xanru' Jesucristo uzá ládxĒ'Ē quiu', en huéchi' ládxĒ'Ē li', en gunĒ' ga soa dxi icja ládxĒ' do'o.

Pablo rusĒ'Ē ládxĒ'bi' Timoteo ca naca xibá cabí naca idú

³Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzo Éfeso, en inná bé'enu' bal-lĒ' bönni' ni' cabí ulu'sédinĒ' tu xibá yúbölö, ⁴en cabí ilunĒ' zxon yugu' didza' ridasö, en lágaca ziantĒrö cö' xuz xtó'ogaca bönachi, yugu' le tun ga tu'í ládxĒ'gaca bönachi le náca-gaca nítisö. Yugu' le caní biti' tun tsutsu bönachi queĒ' Dios ca naca le ta'yéajlĒ' LĒ'.

⁵Le rĒ'Ēni gun lĒ ni rea' li', naca para ila'dxi' bönachi luzĒ'eguequi, naca idú ládxĒ'gaca, en gaca dxi'a le ta'zá ládxĒ'gaca, en gaca idú le ta'yéajlĒ' Dios. ⁶Ca náca-gaca lĒ ni, biti' bulu'rúajĒ' bal-lĒ' bönni' dxi'a, pero gula'guélĒ'Ē tu nöza yúbölö, en tunĒ' bal yugu' le biti' nácatĒ. ⁷TĒ'ĒnnĒ' ulu'sédinĒ' bönachi ca naca le rinná bĒ' xibá queĒ' Dios, sal-la' biti' ta'yéajni'inĒ' lĒ na' tu'sédinĒ', en biti' ta'yéajni'inĒ' le ta'nnĒ' nácatĒ.

⁸RĒ'u nóziru' naca dxi'a xibá gunná bĒ'Ē Dios, channö nu rugún le dxin ca ral-la' gun. ⁹LĒ ni nóziru': Dios gudixjĒ' xibá queĒ', calĒga para inná be'e bönachi tsahui', pero para inná be'e bönachi caní:

Nupa ta'dá'baga' le rinná bĒ' xibá na'.
Nupa biti' túngaca ca rinná bĒ' xibá na'.
Nupa tu'cá'ana Dios cá'asö.
Nupa tun le naca xihui'.
Nupa biti' túngaca Dios zxon.
Nupa tu'cá'ana le nequi queĒ' Dios cá'asö.

Nupa tuti xuz xiná'aguequi.
Nupa tuti bönachi.

¹⁰Nupa tun le ruá' dö'.

Yugu' bönni' nacua'lenĒ' la' löjödxi bönni'gaquiĒ'.

Nupa ta'bán yugu' bí'ido'.

Nupa ta'zí' yĒ'.

Nupa tun tsutsu xtídza'guequi, ta'nná le cabí nácatĒ.

Nupa ta'dá'baga yugu' xibá tsahui'.

¹¹Nóziru' naca caní tu' bidxín queĒru' didza' dxi'a buzá ládxĒ'Ē Dios queĒru'. LĒ' náquiĒ' lá'ayi, en budödĒ' lu na'a didza' dxi'a na' runa' libán que.

Pablo rĒ' Cristo: "Xclenu" tu' buéchi' ládxĒ'Ē lĒ'

¹²Rea'-nĒ' Xanru' Jesucristo, Nu rutipa ládxĒ'a, "Xclenu" tu' buzxonĒ ládxĒ'Ē neda', en buzóĒ' neda' guna' xichinĒ'.

¹³Caní benĒ' sal-la' zí'alö neda' gunné zĒ'a queĒ', en gudxía ládxĒ'a bönachi queĒ', en zían le bi'a dö' queĒguequi, pero Cristo buéchi' ládxĒ'Ē neda', tu' bena' caní lu yöl-la' biti' réajni'i quia' cate' ni' biti' réajlĒ'Ēnida' LĒ'. ¹⁴Na'a, zxonĒtĒrö naca le buzá ládxĒ'Ē quia' Xanru' Jesucristo, lĒ na' run ga réajlĒ'Ēru' LĒ', enca' ga nadxi'iru'-nĒ'.

¹⁵Didza' idütĒ li lĒ ni, en le naca lesaca' ila'zí' lu ná'agaca yúgu'tĒ bönachi, le rnna: LĒ cazĒ' Jesucristo bidĒ' yödžlió ni para busölĒ' bönachi dul-la', ate' busölĒ' neda' sal-la' nácara' bönni' dul-la' ca yúgu'tĒ bönachi. ¹⁶Que lĒ ni na' buéchi' ládxĒ'Ē neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxon ladxi' idú queĒ', para gaca' tu le rulu'í lógaca nupa

ila'yéajlë' Lë', en gata' quéguequi yöl-la' na'bán idú. ¹⁷ Na'a rnníá': ¡Yöl-la' ba Dios, Nu rinná bética'sö, Nu catu caz údxi que, en Nu biti' gaca ilé'uru', la's dui Dios Nu nözi caz yúgu'të! ¡Queë' Lë' gácatica'sö yöl-la' run bal, en yöl-la' ba, na'a dza, en yúgu'të dza zá'gaca! ¡Ca' gaca!

¹⁸ Zxf'ina'do' Timoteo, rudöda' lu no'ö xibá ni para gunu' xichinë' Dios ca runë' tu bönni' idú ládxë'ë rejë' gudil-la, en para uzi'u xibé yugu' le gula'guíxjö' zí'alö nupa ni' gulufi' didza' uláz queë' Dios ca gaca quiu'. ¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja ládxi'do'ö. Chigula'chixi gula'nigui bal-la bönachi, nupa bulu'zóa tsölá'alö le réajlë'ëru' Cristo. ²⁰ Caní gulunë' Hime-neo, en Alejandro, nupa na' busana' lu na' Satanás tu' xihui' para ila'zëdë' ca ralla' ilunë', para cabirö ila'nnë' zi'ë que le nequi queë' Dios.

Le rusedi rë'u ulídzaru'-në' Dios

2 Que lë ni na' le naca lo le richízia' icja náagagaca bönachi naca ca ralla' ulídzaru'-në' Dios, en ca ral-la' gá-ta'yuru' lahuë', en ca ral-la' inábiru'-në' gunnë' bi riquíniru', en ca ral-la' guiéru'-në': "Xclenu'." Yugu' lë ni ralla' gunru' uláz quéguequi yúgu'të bönachi. ² Lësca' caní ral-la' gunru' uláz quégaca nupa ta'nná bë', en quégaca yúgu'të nupa náagagaca lo. Caní ral-la' gunru' para gaca dxi'a queéru', en gata' queéru' yöl-la' riböza tsáhui'do'. Ral-la' gunru' caní lu yöl-la' réajlë' queéru' Dios, en lu yöl-la' ba'a ladxí' queéru'. ³ Lë ni naca dxi'a, en le raza ládxë'ë Dios, Nu rusölá rë'u. ⁴ Dios caz ré'ënë' ulu'lágaca yúgu'të bönachi, en ré'ënë' ilúnbë'e le naca idútë li. ⁵ Tuzë' náquië' Dios, en tuzë' bönni' ruünë' dzaga Dios, en bönachi. Nu ni naca Jesucristo, Nu gulaj bönachi. ⁶ Lë cazë' budödi cuinë' lu yöl-la' guti, le benë' tu' nözi dul-la' nabága'

gaca yúgu'të bönachi. Dios benë' ba nalí queë' cate' bidxín dza queë' gútië'. ⁷ Ca naca lë ni, Dios buzóë' neda' para guna' libán que, en gaca' gubáz nasól-lë'ë Cristo, para usédigacada' bönachi izá'a ca naca le réajlë'ëru' Cristo, en ca naca le naca idútë li. Rilítëda', en biti' ca' rizí yë'a.

⁸ Na'a, ré'ënda' ulu'lidzë' bönni' Dios, en iláta'yuë' lahuë' gátitës, nácagaquië' idú dxi'a, en cabí ila'lenë' luzá'agaquië', en cabí ila'dil-la dídzagaquië'. ⁹ Lësca' caní, ré'ënda' ilácunu nigula le naca ba'a. Le naca lachi le ral-la' ulu'lu'ínu lahui naca yöl-la' nöxaj ladxí', en le naca idú ladxí', en calëga le tu'pá'as-inu icja lógacanu len oro, en yugu' bugá, en lari' nazáca'da'. ¹⁰ Yugu' le dxi'a tunnu ulu'lu'ínu lahui le nácacaganu ca na' run le tácunu le naca ba'a. Caní ral-la' ilunnu nigula núnbë'gacanu Dios. ¹¹ Ral-la' ila'cuá'anu yugu' nigula dxisö cate' nu rusedi légacanu, en ila'cuá'anu nöxaj. ¹² Biti' runna' yugu' nigula lataj ulu'séd-inu, en calëga ila'nná bé'enu yugu' bönni'. Ral-la' ila'cuá'anu dxisö ga nudúbigaca bönachi queë' Cristo. ¹³ Caní ral-la' gaca, tu' buzóë' Dios zí'alö Adán, ate' gudödi na' buzóë'-nu Eva. ¹⁴ Adán na', biti' guzxf' ye'e tu' xihui' lë', pero nigula queë', guzxf' ye'e lënu. Caní guca, gudítsjanu xibá queë' Dios, ¹⁵ pero ulanu nu nigula ruzóanu-bi' bí'ido' channö gúntica'sinu ca röjllöz le réajlë'ëru' Dios, en yöl-la' nadxf'i, en channö gácanu idú dxi'a, en idú ladxí'.

Ca ral-la' ilácagaquië' bönni' tapa chi'ë bönachi queë' Cristo

3 Didza' idútë li lë ni rnna: Channö ru'í ládxë'ë nu bönni' gáquië' nu gapa chi'i bönachi queë' Cristo, dxin dxi'a rizé ládxë'ë. ² Nu bönni' rapa chi'ë bönachi queë' Cristo run bayudxi gáquië': Tu bönni' cuntu nu gaca bi innë' queë'. Zoa túzinu nigula queë'.

Ral-la' gáquië' ban ladxi', en idú ladxi', en nöxaj ladxi'.

Ral-la' gu'ë ga ila'cu'ë bóchi'ru' ta'dxinë' lidxë'.

Ral-la' gáquië' bönni' nazéqui'de'enë' usédinë' bönachi.

³ Biti' gáquië' bönni' re'jë', en calëga bönni' s'nia'.

Biti' gaquië' bönni' rizé ládxi'së' si'ë dumí.

Ral-la' gáquië' bönni' dxi'i ladxi', en zxon ládxi'.

Biti' gáquië' bönni' ruhuídi'në'.

⁴ Ral-la' gáquië' bönni' rinná bé'enë' dxi'a bönachi nacua' lidxë'.

Ral-la' ilunbi' zxi'inë' ca rna xtídzë'ë lu yöl-la' run bal xúzgcabi'.

⁵ ¿Naru' huácatsö tu bönni' gapa chi'ë bönachi queë' Dios channö cabí raca inná bé'enë' dxi'a bönachi nacua' lidxë'?

⁶ Biti' ral-la' gáquië' tu bönni' si' gusí lahuë' t'ëë Cristo, para cabí tödi bë' gun ba zxon cuinë', en biti' gaca queë' ca na' guca que tu' xihui', nu ben ba zxon cuini, ate' Dios guchúguië' que tsöjgá'ana lataj chul-la. ⁷ Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsólá'alö, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' bönachi queë' Cristo

⁸ Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zé ládxi'së' dumí.

⁹ Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gaquië'.

¹⁰ Yugu' bönni' ni ral-la' si' bé'ëli' lé-gaquië' zí'alö, ate' n'irö gata' lu ná'agaquië' ilácalenë' bönachi queë' Cristo,

channö cabí zoa nu gaca bi inné qué-gaquië'. ¹¹ Lësca' caní, nigula que queë'gaquië' ral-la' ila'cuá'anu idú ládxi'gacanu, en cabí ilácanu unné que luzé'e. Ral-la' ilácanu zxon ladxi', en ilácanu li ladxi' lu yúgu'të le tunnu. ¹² Yugu' bönni' ilácalenë' bönachi queë' Cristo ral-la' soa túzinu nigula que queë'gaquië'. Lësca' ral-la' ila'nná bé'enë' dxi'a zxi'inigaquië', enca' bönachi ulidxi que queë'gaquië'. ¹³ Run bayudxi gaca caní, tu' ta'déli'në' lataj ga ilún bal bönachi xtídzá'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxi' para ilu'ë didza' ca naca le réajlë'ëru' Jesucristo.

Le bigachi' que le reaj ládxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'.

¹⁵ Channö huadzéda', ruzúaja' quiu' didza' ni para inózinu' naca ral-la' gunu' lógaca bönachi nacua' lidxë' Dios, nupa nácagaca bönachi queë' Dios ban, en nácagaca tsutsu, en ta'guíxjö' dxi'a le naca idútë li. Nácagaca ca yugu' ya'zxon, en le nunída'gaca zö'ö, le nácagaca tsutsu, en ta'zón yu'u. ¹⁶ Le nácatë, zxóntëro naca le bigachi' que le reaj ládxi'ru'-në' Dios, ca na' nazúaj lu guichi le rna:

Dios buluf'i lahuë', gúquië' bönachi.

Guca bë' náquië' tsahui' tu' guzóalenë'

Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödzölió Lë'.

Dios buchisë' Lë' xitsá' ga nayépisëtëre'.

Nupa ulu'huóaj ládxi'gaca ca naca le réajlë'ëru'-në' Cristo

4 Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huóaj ládxi'gaquië' ca naca le réajlë'ëru' Cristo.

Ulu'z'é nágagaquié' xtídza'gaca bönachi nacuá'len bö' ta'z'í yé' léguequi, ate' ulu'z'é nágagaquié' yugu' xibá queguequi bö' xihui'. ²Ulu'z'é nágagaquié' xtídza'gaca bönachi tu'luf'isö tsahui' cuínguequi. Yugu' bönachi na' tu'í didza' le cabí nácaté, en chinazidi ládxi'do'guequi, para cabí uxösa léguequi. ³Caní naca, tu'zágué'ë xinó'zguequi nupa té'ëni ulu'tsaga ná'agaca, en ta'nná bé'ené' bönachi para cabí ilágugaca le nagu'ë Dios para uzí'íru' xibé, lé na' huáca ilágugaca nupa ta'yéajlë' Dios, nupa na' chinún-bé'gaca le naca idútë li, en tē' Dios: "Xclenu'" cate' tahué' le. ⁴Dxi'a naca yúgu'të le bené' Dios, en bití' bi ralla' uzóaru' tsölá'alö channö ráguru' le, en rëru'-né' Dios: "Xclenu'." ⁵Rusedi xtídze'ë Dios rë'u, Lë' únë' dxi'a yúgu'të le gáguru' channö ulídzaru'-né' Dios, en inábiru'-né' gun lá'ayé' lé na' gáguru'.

Ca rurúajé' dxi'a huen dxin queé' Jesucristo

⁶Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queé' Jesucristo, en gaca bé' nazédu' dxi'a ca naca didza' que le réajlë'ëru'-né' Cristo, en ca naca xibá dxi'a rapa chi'u. ⁷Gurú'una yugu' didza' ridasö que yöd'zölió ca naca didza' tu'ínu yugu' nigula gula. Béntica'sö le gun ga gacu' tsutsu para gunu' ca ré'ëné' Dios. ⁸Láti'do'os uzi'u xibé gunu' le gun ga gácarö nál-la ní'a no'o, pero idú uzi'u xibé gunu' ca ré'ëné' Dios. Cate' runru' caní, lé ni run ga runru' löza sóaru' ibanru' yöd'zölió ni, enca' sóaru' ibanru' dza zá'gaca, tödi uzá'aru' yöd'zölió ni. ⁹Didza' idútë li lé ni, en le naca lesaca' ila'z'í lu ná'agaca yúgu'të bönachi. ¹⁰Que lé ni na', rusáca'da' z'í cuinru' runru' dxin, tu' runru' löza Dios ban. Cristo gútié' para usölé' yúgu'të

bönachi. Tu'z'í xibé le bené' nupa na' ta'yéajlë' Lë'.

¹¹Gunná be'e, en busedi bönachi ilún yugu' lé ni. ¹²Cuntu nu ral-la' uzóa li' tsölá'alö tu' nacu' bi'i ra'bán, pero ral-la' gunu' le ulu'í nupa ta'yéajlë' Dios ral-la' ilún ca runu' li'. Caní ulu'ínu' légaquié': Len didza' ru'u, en len le runu'.

Ca nadx'ínu' luzó'o, en ca ru'u lataj zóalené' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³Tsanni za'a idxina' quiu', bé'tica'sö ladx'í ulabu' guichi lá'ayi lógaca bönachi nacuá' ga ní' zu'. Guchiza icja nágagaquié' lé ni, en busedi légaquié'. ¹⁴Bití' udödu' cá'asö le buzá' ládxe'ë Dios quiu', lé na' benné' quiu' ca na' gula'nná nupa ní' gulu'í didza' uláz queé' Dios, cate' ní' bönni' gula tapa chi'ë bönachi queé' Cristo gula'xóa ná'agaquei' li', en bulu'lidzé' Dios.

¹⁵Béntica'sö yugu' lé ni. Béntica'sö ládxi'u gunu' caní, para ila'lé'e yúgu'të bönachi ca na' zeaj ridéli'nu' le nequi queé' Cristo. ¹⁶Gudapa chi'i cuinu', en gudapa chi'i xibá rusédiru'. Béntica'sö yugu' lé ni, ate' channö gunu' caní, uló' li', en ulu'lágaca ca' nupa ila'yöni li'.

Ca ral-la' gunbi' Timoteo ní'a quegaca bönachi queé' Cristo

5 Bití' uzenu' bach yugu' bönni' gula, pero guchiza icja nágagaquié' didza', tsca nácagaquié' xuz cazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' cazu'.

²Guchiza icja nágagacanu nigula gula didza', tsca nácagacanu xiná' cazu'.

Guchiza icja nágagacabi' bi'i nigula ra'bán didza', tsca nácagacabi' bi'i zan cazu', ca na' röjlóz le naca idú dxi'a.

³Ben bal yugu' nigula ba guti bönni' que queégacanu, nácagacanu túzinu. ⁴Channö zóanu tu nigula caní nacuá'abi' bi'i queénu o xz'íni xi'sóanu, ral-la'

ila'zédabi' ilunbi' ca ré'ënë' Dios, para ilácalenbi' zí'alö bönachi nacua' lídxigacabi', en ulu'bí'ibi' quégaquié' xuz xiná'agacabi'. Lë ni naca dxi'a, en le raza ládxë'ë Dios. ⁵Na'a, nigula na' nagá'ananu túzinu, runnu löza Dios, ate' rëla, en te dza rinábatíca'sinu lahuë' Dios, en rulídzanu Lë' ni'a quégaca bönachi queé', ⁶pero nigula túzinu na' runnu ca naca le rizé ládxí'nu nácanu ca tu nigula chinátinu cate' ni zóanu nabannu. ⁷Lësca' caní, gunná be'e bönachi nacua' ga ni' zu', para ilún ca sa'yéaj yugu' lë ni, para ilaca bönachi cuntunu gaca bi inné' quéguequi. ⁸Channö zoa nu bönni' cabí rugahuë' yugu' di'a dza queé', en le nácáro lo, channö cabí rugahuë' bönachi nacua' lídxë', chigudá'baguë'ë le réajlë'ëru' Cristo, en nácáre' xihui' ca nu cabí réajlë' Dios.

⁹Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-në' bönni' queénu para sóalennu-në' ia'tué' bönni'. ¹⁰Run bayudxi soa nu gun ba nalí queénu ca nácagaca le dxi'a runnu.

Gácalenli'-nu channö buscúlunu-bi' yugu' bí'ido', en channö ru'ínu ga ila'cuá' bóchi'ru' zá'gaquié' yödzo' zí'tu', en channö ru'ínu le ilë'aj ilágugaca bönachi queé' Dios, en channö rácalennu nupa ta'gu'í ta'zaca', en channö rúntica'sinu yúgu'të le naca dxi'a.

¹¹Yugu' nigula túzinu bití' yuí'igacanu tsónnalalaj iz, bití' ibábagacanu nupa gácalenli', tu' ilunnu ca ta'zësö ládxí'gacanu, en ila'dá'baga'nu Cristo, en ilë'ëninu ulu'tsaga ná'agacanu leyúbölö. ¹²Caní gaca, ila'bága'nu dul-la' tu' tu'zóanu tsólá'alö le gula'yéajlë'ënu Cristo zí'alö. ¹³Lësca' ilácanu nigula xöhuëdi, en

nigula ta'dasö ca', en calégasö ilácanu xöhuëdi, pero lësca' ilácanu nigula unné' que luzé'e, en tsöjgútsa'gacanu ga yúbölö, en ila'nnanu le cabí nácaté. ¹⁴Que lë ni na', ré'ënda' ulu'tsaga ná'gacanu leyúbölö nigula túzinu cani yú'ugacanu iz cuidi', en ulu'scúlanu-bi' yugu' bí'ido', en ila'nná bé'enu bi'i nacua'abi' yu'u que quéé'gacanu, para cabí iluf'ínu nu ridá'baga' rë'u lataj bi inné' queé'ru', rë'u na' réajlë'ëru' Cristo. ¹⁵Caní ral-la' gaca, tu' chibulu'bíga'nu bál-lagacacnu, ate' tunnu ca ré'ëni Satanás tu' xihui'.

¹⁶Channö nütí'tës bönni' o nigula nu réajlë' Cristo, nacua'anu nigula túzinu lídxigaca nupa na', ral-la' ilácalen lé'gacanu, para cabí ulu'saca' zi' bönachi queé' Cristo. Caní gaca, bönachi queé' Cristo na' gaca ilácalen yugu' nigula nagá'anagacanu túzinu.

¹⁷Benrö bal yugu' bönni' gula tapa chi'ë bönachi queé' Cristo, yugu' bönni' na' ta'nná bé'ë dxi'a, en béntërö ca' bal yugu' bönni' gula na' tunë' dxin, tunë' libán, en tu'sédinë' bönachi. ¹⁸Nazúaj lu guichi lá'ayi le rnna: "Biti' cu'u du ruá'aba' bédxi na' rulíbiba' zxoá' xtila." Rnna ca': "Náquië' lesaca' nu bönni' huen dxin si'ë lazxië'."

¹⁹Biti' si' lu no'o didza' ru'í' nu ruzegui didza' tu bönni' gula rapa chi'ë bönachi queé' Cristo, channö cabí nacua' chopatonna nupa tun ba nalí que le benë'. ²⁰Nupa túntica'sö dul-la', busidxi léguequi lógaca yúgu'të bönachi queé' Cristo para iladxi ia'zica'rö bönni' ni' Dios. ²¹Ni'a queé' Xanru' Dios, en Xanru' Jesuscristo, en ni'a quégaquié' gubáz lá'ayi rö queé', rinná bé'eda' li' gunu' ca ta'nná didza' ni. Tuz ca ral-la' uchi'a usöröu' yúgu'të bönachi, en bití' gunu' bal tuzë' bönni'. ²²Cuntu nu bönni' ixóatë no'o, cabí gunu' ga gáquië' huen dxin queé' Cristo, para cabí ibágu'u le runë' channö gunë' bönni' na' dul-la'.

²³ Bítirö gufju' nísasö. Tu' rúntica'sö bayá' lè'u ral-la' gufju' láti'do' xisi uva nal-la para cö' dxi'a lè'u.

²⁴ Yugu' dul-la' queguequi bal-la bönachi ila'lá' lahui zí'alö cate' si' ila'dxín ga uchi'a usöröë' Dios léguequi, ate' tódi ni' ila'lá' lahui dul-la' nabága'gaca ia'zica'rö bönachi. ²⁵ Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchë'ë tsaz dxin na' nunë'.

6 Yúgu'të bönni' nadó'ogaca ral-la' ilúndë'ë bal xánaquië', para cabí gaca nu inné' zí' que La láyí queë' Dios, en que xibá queë'. ² Nupa ni' nacué' xángaca ta'yéajlë'ë Cristo, bití' ral-la' ulu'cá'ana cá'asö légaquië' tu' nácagaquië' bóchi'guequi. Ral-la' ilunrö dxi'a xichíngaqië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inë' Lë cazë' légaquië'. Ca naca lë ni, busëdi bönachi nacué' ni', en guchiza le icja nágagaquië'.

Le reax ládxi'ru'-në' Dios le ruzí'iru' xibé

³ Channö zoa nu bönni' rusédinë' xibá yúbölö, en bití' rusédinë' yugu' didza' dxi'a queë' Xanru' Jesucristo, ca naca xibá na' rusedi rë'u ca ral-la' gunru' ca ré'ënë' Dios, ⁴ bönni' ni run ba zxon cuinë', en bití' bi nózinë'. Didza' bití' naca dxi'a rizé ládxe'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzé'eguequi, en ta'díl-lalen luzé'eguequi didza'. Lësca' tun didza' caní ga ta'nné' zí' bönachi que luzé'eguequi, en ta'zá' ládxi'gaca que luzé'eguequi le cabí nácatë. ⁵ Lësca' caní tun ga ta'díl-latica'së' didza' bönni' bití' ta'yéajni'inë', nupa bití' nazí' lu né'eguequi le naca idútë li. Téquini huáca ila'zí' dumí zían channö ilúngaca tsözxón nupa ta'yéaj ládxi'gaca Dios. Gucuíta ga nacué' bönachi caní. ⁶ Zxon naca le ruzí'iru' xibé cate' len yöl-la' riböza

zxön ládxi' reax ládxi'ru'-në' Dios. ⁷ Bití' bi nuá'aru' cate' ridxinru' yödzölió, en lësca' caní, bití' bi uá'aru' cate' uzá'aru' yödzölió ni. ⁸ Que lë ni na', channö dësö queëru' le gáguru', en le gácuru', ral-la' udzëjaru'. ⁹ Yugu' bönni' té'ënnë' gata' quegaquië' yöl-la' tsahui', gaca quegaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' bití' bi nözi quegaquië' zían le ila'zé ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz. ¹⁰ Tu' ta'zé ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zé ládxi'gaquië' le, bulu'cá'anë' le gula'yéajlë'ë Cristo, en chiraca quegaquië' zían le tu'saca' zí' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuíta ga raca le caní.

Bé'tica'sö ládxi'u gunu' le naca tsahui', en le ré'ënë' Dios.

Guyéajlë'tica'së' Cristo, en bidxí'i yugu' luzó'o.

Bë' ládxi' gacu' zxon ládxi', en nöxaj ládxi'.

¹² Ca runë' tu bönni' idú ládxe'ë rejë' gudil-la,

ben dxin que le réajlë'ëru' Cristo, ate' beni' quiu' yöl-la' na'bán idú.

Para gaca caní bulidzë' Dios lí'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. ¹³⁻¹⁴ Ní'a queë' Xanru' Dios, Nu na' nabánigaca yúgu'të le nacué', enca' ni'a queë' Jesucristo, Nu ben ba nalí le naca dxi'a le gunné' yálajdo' lahuë' Poncio Pilato, rinná bé'eda' lí' gun chí'u yugu' lë na' gunná bé'enë' Cristo rë'u. Ral-la' gacu' idú tsahui', en bití' bi gunu' le güi'i lataj nu bi inné' quiu', ga idxintë dza ni' uluf'i

lahuë' Xanru' Jesucristo. ¹⁵Cate' idxín dza na' huödë' Jesús, Dios ulu'ë lahui Lë'.
¡Dios náquië' lá'ayi!

¡Tuzë' Lë' dë lu në'ë yöl-la' unná bë',
en rinná bé'enë' yúgu'të nupa ta'nná bë',
en náquië' ca' Xángaca yúgu'të nupa
nácagaca xan!

¹⁶¡Tuzë' Lë' zóatica'së'!

¡Zoë' lu bení' ga bití' gaca nu idxín rácasö
que!

¡Catu caz nu bilé'e Lë', en bití' gaca nu
ilé'e Lë'!

¡Queë' Lë' gácatíca'sö le run Lë' bal, en
yöl-la' unná bë'!

¡Ca' gaca!

¹⁷Gunná be'e yugu' bönni' dë qué-
gaquië' yöl-la' tsahui' dza ni zóaru' na'a,
para cabí ilún ba zxön cúngaquië', en
para cabí ulu'zxöni ládxi'gaquië' yöl-la'
tsahui' na' bití' naca löza. ¡Ral-la' ilunë'
löza Dios ban, Nu rúnnada' queëru'
yúgu'të le ruzí'iru' xibé! ¹⁸Gunná be'e lé-

gaquië' ilunë' le naca dxi'a, para ila'yan-
da' dxin dxi'a tunë', lë na' naca tu
yöl-la' tsahui' idú. Ral-la' bi ulu'nödzejë'
quégaca bönachi yechi', en ilufi ládxi-
gaquië' léguequi. ¹⁹Channö ilunë' caní,
ulu'tubë' yöl-la' tsahui' na' naca idú, le
ulu'zi'ë xibé dza si' za', en ila'déli'në' yöl-
la' na'bán idú.

Le gulu'ë Pablo lu ná'abi' bi'i Timoteo

²⁰Bócha'ado' Timoteo, ben chí'i le
nadödi lu no'o. Gucuíta ga nacuá nupa
tuí'i didza' cá'asö, en yugu' didza' bití'
nazaca', en yugu' didza' bizxaj, yugu'
didza' na' tuí'i nupa ta'nnasö tácada',
ate' nazí' yé'eguequi ca naca lë na' tun.
²¹Bal-la bönachi gula'zí' lu né'eguequi
yugu' didza' caní, ate' gula'chixi gu-
la'nigui ca naca le réajlë'ëru' Cristo.

Rinábida'-në' Dios uzá' ládxe'ë quiu' le
nácagaca dxi'a queë'.

¡Ca' gaca!

DIDZA' BUŔOPI GUSÓL-LĚ'Ě PABLO QUEĚBI' BI'I TIMOTEO

Pablo rugapĕ' Dios bi'i Timoteo

1 Neda', Pablo, naca' gubáz nasól-lĚ'Ě Cristo. Caní naca' tu' ré'ĕnĕ' Dios gaca' caní, para caní gaca le guzxi' lu nĕ'ĕ, gunnĕ' queĕru' yól-la' na'bán idú, le ruzá' ládxĕ'ĕ Jesucristo queĕru'. ²Rugapa' Dios li', bócha'ado' Timoteo. Nacu' ca xxi'ini caza' tu' benru' tu xžn xichinĕ' Cristo, ate' nadxi'ida' li'. Rinábida-nĕ' Xúziru' Dios, enca' Xanru' Jesucristo, uzá' ládxĕ'ĕ quiu', en huéchi' ládxĕ'ĕ li', en gunĕ' ga cö' dxi icja ládxĕ'ĕ do'o.

Timoteo ral-la' gunbi' ba nalí queĕ' Jesucristo

³Rea'-nĕ' Dios: "Xclenu'" ca naca quiu' cate' rulidza'-nĕ' Dios. Biti' rizóa dxía' rinaba' ni'a quiu' rĕla, en te dza lahuĕ' Dios, Nu na' runa' xichinĕ' idú ládxa'a ca na' gulunĕ' xuz xtá'ahua'. ⁴Cate' rōjneda' ca na' gurōdxu', rizĕ' ládxa'a ulĕ'eda' li', para gaca udzĕjada' idú ládxa'a. ⁵Rea'-nĕ' Dios: "Xclenu'" tu' zoa le run ga rōjneda' ca réajlĕ'u Cristo idú ládxu'u. Lĕsca' caní, gula'yéajlĕ'ĕnu xinó'o gula Loida, enca' xinó'o Eunice Lĕ' z'falö ca li', ate' runa' löza, lĕsca' caní réajlĕ'u Lĕ' na'a.

⁶Tu' naca caní, rusá'a ládxu'u para usabanu' le bennĕ' Dios quiu', lĕ na' bidxín quiu' cate' ni' guxóa na'a li', en bulidza'-nĕ' Dios. ⁷Bö' na' bennĕ' Dios queĕru' bití' naca tu bö' le gun ga gádxiru', pero bennĕ' queĕru' Bö' Lá'ayi Nu run ga náparu' yól-la' huáca, en run ga nadxi'iru' luzá'aru', en run ca' ga rinná be'e cuinru'. ⁸Que lĕ ni na', bití' utuf'inu' gunu' ba nalí queĕ' Xanru', en bití' utuf'inu' ca raca quia' neda' ni, nadzuna' lidxi guĕ' tu' runa' xich-

inĕ', pero ben tsözxón nupa ta'guf'i ta'zaca' tu' tun libán que didza' dxi'a. Dios gunnĕ' yól-la' huáca quiu' para gunu' caní. ⁹Dios caz busólĕ' rĕ'u, en bulidzĕ' rĕ'u para gácaru' idú dxi'a. Bití' bulidzĕ' rĕ'u tu' zoa le dxi'a benru', pero bulidzĕ' rĕ'u tu' gú'uni quézinĕ' Lĕ', en tu' ruzá' ládxĕ'ĕ caní queĕru'. Dza ni'te buzóĕ' caní queĕru' z'fatĕlö ca guta' yōdzólió ni, tu' néquiru' queĕ' Jesucristo. ¹⁰Na'a, chibuluf'i lahui le ruzá' ládxĕ'ĕ Dios queĕru', tu' buluf'i lahuĕ' Jesucristo Nu rusólá rĕ'u. Bugúĕ' yól-la' guti, en bulu'e lahui yól-la' na'bán idú na', le cabí ca' initi. Caní naca ca rnna didza' dxi'a.

¹¹Cristo buzóĕ' neda' para guna' libán que didza' dxi'a na', en para gaca' gubáz queĕ' para usédigacada' bōnachi izá'a. ¹²Que lĕ ni na' riguf'i rizáca'a ca' yugu' le raca quia' ni, pero bití' rutuf'ida', tu' núbĕ'a Nu na' réajlĕ'a. Runa' löza Lĕ', napĕ' yól-la' huáca gapa chí'ĕ le budōda' lu nĕ'ĕ ga idxintĕ dza ni' huōdĕ'.

¹³Didza' dxi'a na' biyōnnu' bena' libán que ral-la' gaca quiu' tu le ruluf'i ca ralla' usédinu' bōnachi ca réajlĕ'ĕru' Jesucristo, en ca nadxi'iru' Lĕ'. ¹⁴Ben chí'i le naca dxi'a na' nadōdi lu no'o, ate' gaca gunu' caní len yól-la' huáca queĕ' Dios Bö' Lá'ayi, Nu zóalen rĕ'u.

¹⁵Chinóz quézinu' ca na' gulunĕ' zian bōnni' ta'yéajlĕ'ĕ Cristo nacu'ĕ luyú Asia bulu'béaj ládxĕ'gaquiĕ' neda'. Figelo, en Hermógenes nabábagaquiĕ' bōnni' ni. ¹⁶⁻¹⁷Rinábida'-nĕ' Xanru' Dios huéchi' ládxĕ'ĕ bōnachi nacuá' lidxĕ' Onesíforo, tu' butipĕ' ládxa'a bōnni' ni zían luzuí. Cate' bidxinĕ' Roma, idú ládxĕ'ĕ buguiljĕ' neda', ate' budzōlinĕ' neda'. Bití' butuf'inĕ' ni'a quia' neda' tu' nadzuna' lidxi guĕ' ni, nága'a du guĕ'. ¹⁸Rinábida'-nĕ' Xanru' huéchi' ládxĕ'ĕ lĕ' dza ni' idxinĕ' lahuĕ' Dios. Chinóz quézinu' ca na' gúcalenĕ' bōnni' ni rĕ'u, cate' ni' guzōaru' yōdzō Ēfeso.

**Ral-la' gácabi' Timoteo ca tu bönni'
idú ládxë'ë rejë' gudil-la**

2 Na'a, zxf'ina'do', butipa ládxu'u ca naca le ruzá' ládxë'ë Jesucristo quiu'.

² Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönachi.

³ Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxë'ë rejë' gudil-la. ⁴ Nu bönni' rejë' gudil-la, biti' ca' gútsë'ë yugu' le tun bönachi yödölió ni, para tsaza ládxë'ë bönni' na' nuzóë' lë' gáquië' bönni' queë' rejë' gudil-la. ⁵ Lësca' caní, nu nutsa' lu huitaj, biti' bi ideli' channö cabí run ca ral-la' gun. ⁶ Nu bönni' gúz gú'una runë' dxin, zí'aló lë' uzi'ë xibë lë na' razë'. ⁷ Busá' ládxu'u lë ni rea' li', ate' Xanru' caz gunë' ga tséajni'inu' yúgu'të.

⁸ Yöjné ca guca queë' Jesucristo. Guljë, en gúquië' zxf'ini xi'sóë' David, en gudödi gútië', bubanë' lu yöl-la' guti. Caní rna didza' dxi'a runa' libán que.

⁹ Tu' runa' libán que didza' dxi'a, rigufi rizáca'a le raca quía', ga ridxintë nága'a lidxi guíë ni, ca raca queë' tu bönni' huía' dö', pero biti' ca' nága'të xtídzë'ë Dios.

¹⁰ Que lë ni na' ruá' riléna' yúgu'të lë ni tu' nadxf'ida' nupa guróë' Dios, para ulu'lë' ca' légaquië'. Jesucristo caz runë' ga ulu'lágaca bönachi na' para ila'cuá' lu bení' idú queë'. ¹¹ Catëz naca lë ni rna: Channö nátílenru' Lë', sóalenru'-në' ca' ibanru'.

¹² Channö guá' ilenru' le quí'i sáca'ru', inná bé'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³ Sal-la' biti' runru' ca rnaru', Lë' rún-tica'së' ca rnnë'.

Lë' biti' gaca tá'baguë'ë le náquië'.

**Nu bönni' huen dxin queë'
Cristo rurúajë' dxi'a**

¹⁴ Busá' ládxigaca nupa nacué' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzë'ë ca nácgaca didza' cabí nazáca'gaca. Yugu' didza' caní tun ga ila'niti nupa tu'zë nagui léguequi.

¹⁵ Bë'tica'sö ládxu'u urúaju' dxi'a lahuë' Dios para gacu' ca tu bönni' huen dxin biti' rutuf'inë' ca naca dxin nunë'. Dxf'ado' ral-la' ugunu' dxin didza' idútë li. ¹⁶ Na'a, gucuíta ga nacué' nupa tufi didza' biti' nazaca', en didza' cá'asö, tu' tun didza' caní ga ilunrë' le cabí ré'ënë' Dios. ¹⁷ Ila'zë didza' tu'ë ca rízzón huë' nudzu' le ridúdu' rilá. Himeneo, en Fileto nabábagaquië' nupa tufi didza' caní. ¹⁸ Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baróli bal-la bönachi ga ridxintë bíti'rö ta'yéajlë' Cristo. ¹⁹ Le benë' tsutsu Dios zóatica'sö, en dë tu le naca bë', le rna: "Núnbë'ë Dios nupa néquiquequi queë'." Rna ca': "Guli'cuíta ga raca le ruá' dö', yúgu'tëli' libí'ili' néquili' queë' Cristo."

²⁰ Tu lu yu'u zön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga biti' naca liná'. ²¹ Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

²² Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxi'inu' yugu' luzó'o, en le run ga ribözu' dxí'ado'. Ca nácgaca lë ni,

ben tsözxón nupa tu'lidza Xanru', naca idú dxi'a icja láchxi'do'guequi. ²³Na'a, gurú'una yugu' didza' cá'asò, en didza' biti' nazaca', tu' chinóz quézinu' tun didza' caní ga ta'dil-la didza' bönachi. ²⁴Bönni' huen dxin queë' Xanru' biti' ral-la' tíl-lalenë' bönachi didza', pero ral-la' gáquië' nòxaj ladxí lógaca yúgu'të bönachi. Ral-la' gaca usédinë' bönachi, en gáquië' ca' zxon ladxí'. ²⁵Lu yöl-la' nòxaj ladxí' ral-la' uzéajni'inë' nupa ta'dá'baga' le runë' libán que. Channò gunë' caní, nadxi ca' Dios gu'ë légaquië' lataj ulu'bf'i láchxi'gaquië' para ilúnbë'ë le naca idútë li. ²⁶Caní ulu'lé' lu yalaj que tu' xihui' ga nadzúngaquië', ate' ulu'huóáquië' tsahui' para ilunë' ca ré'enë' Dios.

Ca ilaca bönachi dza tsöjsétëgaca

3 Lësca' ral-la' inózinu' lë ni: Dza tsöjsétëgaca ilaca dza ila'gu'í ila'zaca' bönachi. ²Yugu' dza ni' ila'cu'ë bönni' ilácagaquië' caní:

Ila'dxf'i la' cuíngacasë', en ulu'huídi'në'.
Ilún ba zxon cuíngaquië', en ulu'luf'i cuíngaquië' zxon.

Ila'nnë' zi'ë que le naca lá'ayi.
Ila'dá'baguë'ë xuz xiná'agaquië'.
Ilácagaquië' bönni' cabí ta'yaza láchxi'gaquië'.

Biti' ilunë' ca ré'enë' Dios.

³Biti' ila'dxf'inë' ca ral-la' ilunë'.

Ilácagaquië' zidzaj ladxí'.

Ila'nnë' que luzá'agaquië'.

Biti' ila'nná be'e cuíngaquië'.

Ilácagaquië' bönni' dza'a.

Biti' ila'lé'enë' dxi'a le naca dxi'a.

⁴Ilácagaquië' hueti luzé'e, en biti' ila'dzáguië' dxi'a.

Ulu'luf'i cuíngaquië' ca bönni' nayépisëgaquië'.

Ila'dxf'inë' le ila'yázaso láchxi'gaquië', en calëga Dios.

⁵Ulu'luf'i cuíngaquië' ca bönni' núnbë'-gaquië' Dios.

Ila'dá'baguë'ë le ruzá' láchxë'ë Dios queéru'.

Gucuíta ga nacua' bönachi caní. ⁶Lësca' caní, lu yöl-la' banísa quégaquië' ila'yazë' gapa naca lu yu'u, en ila'z'i yé'enë' yugu' nigula biti' bi nózguequinu para ila'z'i lu ná'agacanu le ulu'sédinë'. Ila'bága'nu nigula na' dul-la' zían, en iluf'i láchxi'gacanu yugu' le ila'zësò láchxi'gacanu le cabí nazaca'. ⁷Ila'yónitica'sinu nigula ni didza' ilún libán que bönachi, pero biti' ca' ila'déli'nu ila'yéajni'ininu le naca idútë li. ⁸Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo. ⁹Biti' ila'déli'rönë', pero gaca bë' náca-gaquië' bönni' biti' bi nózguequinë' lógaca yúgu'të bönachi, ate' gaca quégaquië' ca na' guca quégaquië' Janes, en Jambres na'.

Le rigu'ë Pablo lu ná'abi' bi'i Timoteo

¹⁰Nóz quézinu' ca naca le rusédida' bönachi, en ca runa'. Nózinu' ca' le ru'í láchxa'a guna', en ca réajlë'a Cristo, en ca naca' nòxaj ladxí', en ca nadxí'ida' luzá'a, en ca riböza' zxon ladxí'. ¹¹Nózinu' ca' yugu' le gula'bía láchxi'gaca bönachi neda', en yugu' le gud'í guzxá-ca'a, le gulaca quia' lu yödzo Antioquia, en lu yödzo Iconio, enca' lu yödzo Listra. Yugu' le gula'bía láchxi'gaca bönachi ni' neda' biá' guléna', ate' Xanru' Jesús busölë' neda' lu yúgu'të lë na'. ¹²Yúgu'të nupa té'eni ilaca idú dxi'a tu' néquiguequi queë' Jesucristo, lësca' ila'gu'í ila'záquië' yugu' le ila'bía láchxi'gaca bönachi légaquië'.

¹³Na'a, bönni' tuá' dö', en bönni' ta'z'i yé'ë ilácarë' xihui'. Ila'z'i yé'enë' bönachi, ate' ila'z'i ye'e bönachi ca' légaquië'.

¹⁴Na'a, ben chi'i yugu' le buzëdu', en le guzxi' lu no'o, tu' numbë' casu' nupa bulu'sedi li'. ¹⁵Ga gudela' nacu' b'ido' nünbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo. ¹⁶Yúgu'të le nazúajgaca lu guichi lá'ayi guchízië' Dios icja ládx-i'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nöza, en usedi rë'u para gácaru' tsahui'. ¹⁷Caní run, para gaca sina' nu naca queë' Dios, en gácada' gun yúgu'të le naca dxi'a.

4¹⁻²Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë'ë Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dx-i'a quiu' o biti' raca dxi'a. Lu yöl-la' zxön ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'. ³Caní ral-la' gunu' tu' idxín dza cate' biti' ulu'zé nágagaquië' xibá tsahui', pero ilë'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'. ⁴Ulu'cá'anë' le naca idútë li, en ila'zif lu ná'agaquië' yugu' didza' ridasö. ⁵Na'a, ral-la' gactu' zxön ladxi' lu yúgu'të le runu'. Biá' gulén le ulu'saca' li' zi'. Ben libán que didza' dxi'a. Idú ládxu'u ben dxin le budödë' Cristo lu no'o gunu'.

⁶Ca naca quia' neda', nudödi cuina' lu në'ë Dios, ate' chizóa ilütië' neda' tu' runa' xichinë', ate' dza uzá'a yödzölió ni chizóa idxín. ⁷Ca runë' tu bönni' idú ládxë'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. ⁸Ia'stú, naca löza quia' idéli'da' le ral-la' ila'zif

nupa nácagaca tsahui', le gunnë' Xanru' quia' dza ni', ate' tsahui' naca ca ruchí'a rusöröë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxí'i Lë', en idú ládx-i'guequi ta'bóza dza huödë'.

Le buzúajë' lu guichi Pablo gunbi' Timoteo

⁹Bë' ladxi' guídateo' ga ni zoa' ¹⁰tu' guléaj ládxë'ë Demas neda', tu' nadxí'inë' le ruzi'ë xibé yödzölió ni, ate' guiyijë' yödzö Tesalónica. Crescente guiyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. ¹¹Tuzë' Lucas zóalenë' neda'. Guchë'ë-bi' bi'i Marcos para guídalenbi' li' tsözxón, tu' nácabi' gúnlenbi' neda' tsözxón xichinë' Cristo. ¹²Gusól-la'a-bi' bi'i Tíquico lu yödzö Éfeso. ¹³Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquiguequini guídi.

¹⁴Alejandro, bönni' gubëdxi guíë, zían le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. ¹⁵Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶Cate' le zí'alö luzuí bidxina' lógaquië' bönni' yúlahui', cuntu nu gúcalen neda', pero bulu'béaj ládxi'gaca yúgu'të bönachi neda'. Biti' ré'ënda' uzí lëbë' Dios légaquië'. ¹⁷Guzóalenë' Xanru' neda', en butipë' ládxa'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busölë' Xanru' neda', ate' guca quia' tsa burúaja' lu ruá'aba' bëdxi guixi'. ¹⁸Lë cazë' Xanru' usölë' neda' lu yúgu'të le cabí raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatica'sö queë' yöl-la' ba yúgu'të dza zá'gaca! ¡Ca' gaca!

**Pablo rugapë' Dios
bönachi queë' Cristo**

¹⁹ Bugapa Dios Priscila, en Aquilo, enca' bönachi nacua' lidxë' Onesíforo.

²⁰ Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu'

ré'enë'. ²¹ Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá' ládxë'ë Dios quiu! ¡Ca' gaca!

DIDZA' GUSÓL-LĒ'Ē PABLO QUEĒBI' BI'I TITO

Pablo rugapë' Dios bi'i Tito

1 Neda', Pablo, naca' huen dxin queë' Dios, en gubáz nasól-lĒ'Ē Jesucristo. Gusól-lĒ'Ē neda' para guna' ga ila'yéajlĒ' bönachi chiguró cazĒ' Dios, para ulu'ún-bĒ' le naca idútĒ' li ca ral-la' gun nu n-un-bĒ' Dios. ²Caní naca' tu' runa' löza uzi'a xibé yöl-la' na'bán idú le guzxi' lu nĒ'Ē Dios gunnĒ' queéru' dza ni'te, cate' si' gusi' lo rata' yúgu'tĒ' le dĒ, ate' run cazĒ' LĒ' le nazi' lu nĒ'Ē gunĒ'. ³Cate' bidxín dza que, Dios bulu'e lahui xtídzĒ'Ē, le gu-lu'Ē lu na'a guna' libán que. Caní gunná bé'enĒ' Dios, Nu busölá rĒ'u, neda'. ⁴Ru-gapa' Dios li', bócha'ado' Tito. Nacu' idú zxi'ini caza' tu' naca lébisó ca réajlĒ'Ēru' Cristo. Rinábida'-nĒ' Dios Xuz, en Xan-ru' Jesucristo Nu busölá rĒ'u, uzá' lădxĒ'Ē quiu', en huéchi' lădxĒ'Ē li', en gunĒ' ga soa dxi icja lădxĒ'Ē'o.

Dxin queë' Cristo runbi' bi'i Tito luyú Creta

⁵Que lĒ ni na' bucá'ana' li' luyú Creta, para usó'o le riyadzaj quégaca bönachi queë' Cristo nacua' ni', para ilăcagaca idú bönachi queë' Cristo, en para ucú'u bönni' gula yúgu'tĒ' yödzó para ilún chi'Ē bönachi queë' Cristo nacua' tu tu yödzó ni', ca na' chigunná bé'eda' li' gunu'. ⁶Nu bönni' gula rapa chi'Ē bönachi queë' Cristo ral-la' gáquiĒ': Bönni' cuntu nu bi gaca innĒ' queë'. Zoa túzinu nigula queë'. Yugu' zxi'inĒ' ral-la' ila'yéajlĒ'Ēbi' Cristo. Biti' soa nu gaca innĒ' quégacabi' ta'dá dzăgasibi' ca', o ta'dá'baga'bi' xuz xină'agacabi'. ⁷Nu bönni' rapa chi'Ē bönachi queë' Cristo run bayudxi:

Biti' runĒ' le gü'i lataj nu bi innĒ' queë' ca runĒ' xichinĒ' Dios.

Biti' gáquiĒ' bönni' zidi o bönni' icja dza'a,

o bönni' re'jĒ', o bönni' ribízxjanĒ',
o bönni' rizĒ' lădxĒ'sĒ' dumí.

⁸Ral-la' gu'Ē ga ila'cu'Ē bóchi'ru' ta'dx-inĒ' lidxĒ'.

Ral-la' sĒ lădxĒ'Ē gunĒ' le naca dxi'a.

Ral-la' gáquiĒ' bönni' réajni'i, en bönni' tsahui'.

Ral-la' gădxinĒ' Dios, en innă' be'e cuinĒ'.

⁹Ral-la' gun chi'Ē didza' idútĒ' li ca chinazĒdĒ',

para gaca ichízĒ' icja năgagaca bönachi ca sa'yéaj xibă dxi'a,

en para gaca usayjĒ' rú'agaca bönachi ta'nnĒ' que.

¹⁰Caní ral-la' gáquiĒ' tu' ta'dă'baguĒ'Ē zĒán bönni', en tu'Ē didza' biti' naza-ca', en ta'zĒ' yĒ'enĒ' bönachi. ZĒán bön-ni' tunĒ' caní năcagaquiĒ' judío. ¹¹Yugu' bönni' ni, run bayudxi gunu' ga tsayaj ruă'agaquiĒ', tu' tunĒ' ga ta'chixi ta'nigui yúgu'tĒ' bönachi nacua' yu'u gapa ta'yăz-iĒ', en tu'sĒdinĒ' le cabí ral-la' ulu'sĒdinĒ'. Caní tunĒ' para ila'zĒ'isĒ' dumí.

¹²TuĒ' bönni' gubăbĒ' bönachi Creta ga na' zu', bönni' na' bĒ'Ē didza' ulăz que yudo' quégaquiĒ', gunnĒ': "Ta'zĒ' yĒ'tica'sĒ' bönni' Creta, en năcagaquiĒ' ca bōa' gu'ă sĒnia'. NăcagaquiĒ' bönni' huăgulĒ'Ē xōhuĒdi." ¹³Didza' ni benĒ' ba nalí quégaquiĒ' naca idútĒ' li. Que lĒ ni na' gudil-la légaquiĒ' para gaca idú ca ta'yéajlĒ'Ē Cristo, ¹⁴en para cabí ulu'zĒ' năgagaquiĒ' yugu' didza' ridasó quégaquiĒ' bönni' judío, en biti' ilunĒ' ca ta'nnă' bĒ' bönachi nucă'anagaca le naca idútĒ' li.

¹⁵Yúgu'tĒ' naca dxi'a quégaca nupa năcagaca dxi'a, pero quégaca nupa năcagaca xihui', en biti' ta'yéajlĒ', biti' bi naca dxi'a, pero năcagaca xihui' ga ridxintĒ' le ta'bequi ícjaguequi, en le ta'zá' lădx-i'gaca. ¹⁶Ta'nnĒ' núnbĒ'gaquiĒ' Dios,

pero le túngaquië' biti' röjlöz le ta'n-né' tu' nácaquië' bönni' tu'dí'inë' Dios. Ta'dá'baguë'ë xtídzë'ë, en biti' ca' gaca ilunë' le naca dxi'a.

Xibá dxi'a le ral-la' usédiru'

2 Na'a, ral-la' gu'u didza' le röjlöz xibá dxi'a.

²Busedi yugu' bönni' gula:

Biti' ral-la' ilé'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxi'inë' luzá'agaquië', en ila'bözë' zxon ladxi'.

³Busedi yugu' nigula gula:

Ilunnu le raza ládxë'ë Dios.

Cabí ila'nnënu que luzá'agacanu, en cabí ilé'ajnu.

Ral-la' ulu'sédinu le naca dxi'a.

⁴Ral-la' ulu'sédinu' nigula ni' yú'ugacanu iz cuidi'

para ila'dxi'inu bönni' que queégacanu, enca' zxi'inigacanu.

⁵Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxigacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le güf'i lataj nu inné' zi' que xtídzë'ë Dios.

⁶Busedi yugu' bönni' ni' nacu'ë iz cuidi':

Ral-la' ilácaquië' bönni' ta'yéajni'inë'.

⁷Ral-la' gúntica'su' le naca dxi'a, ulu'f'inu' bönachi caní ca ral-la' ilúngaca. Ca rusédinu' ral-la' ulu'f'i nacu' idú ladxi', en ba'a ladxi'.

⁸Ral-la' usédinu' didza' dxi'a le cabí gacanu bi inné' que.

Caní gunu' ga utu'f'inë' bönni' ridá'baguë'ë, en biti' gaca bi inné' queéli' runli' le ruá' dö'.

⁹Busedi bóchi'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nöxaj lógaquië' xángaquië'.

Ral-la' ilunë' yúgu'të le ila'yaza ládxi'gaquië' xángaquië'.

Biti' ral-la' tá'baga'gaquië' le ta'nná bë'ë.

¹⁰Biti' bi ulu'cáchi'lanë'.

Ral-la' ulu'lu'f'i cu'ngaquië' tsahui' ca naca yúgu'të le tunë'.

Caní ulu'f'i lo naca dxi'a xibá queë' Dios, Nu busölá rë'u.

¹¹Cristo, bönni' na' buzá' ládxe'ë Dios queéru' chibuluf'i lahuë' lógaca yúgu'të bönachi para ulu'lágaca. ¹²Lë' rusédinë' rë'u ucá'anaru' le cabí raza ládxe'ë Dios, en cabí së ládxi'ru' le naca que yödzólió ni, pero cózaru' zxon ladxi', en gácaru' tsahui' dza ni zóaru' na'a, en gunru' ca ré'ëni quézinë' Dios. ¹³Ral-la' cózaru' le runru' löza le gun ga gácaru' bica' ba, lë na' gaca dza ni' cate' ulu'f'i lahuë' Jesucristo lu bení idú queë'. Náquië' Dios zxon, Nu rusölá rë'u. ¹⁴Lë cazë' budödi cuinë' uláz queéru', para böá'uë' rë'u lu yúgu'të le naca xihui', ate' ruúnë' rë'u tsahui' para gácaru' bönachi queë', en güf'i ládxi'ru' gunru' le naca dxi'a.

¹⁵Yugu' lë ni bë' didza', en guchiza icja nágagaca bönachi ni', ate' len yölla' unná bë' gudil-la léguequi. Béntica'só caní, para cabí si' lataj nu ucá'ana cá'asó xtídzü'u.

Le ral-la' ilún bönachi ta'yéajlë' Cristo

3 Busá' ládxi'gaquië' bóchi'ru' ni' ilunë' ca ta'nné' bönni' dë lu ná'agaquië', en bönni' yúlahui', para ilunë' ca rnna xtídzá'gaquië'. Ral-la' ila'cu'ë sina' ilunë' le naca dxi'a. ²Biti' bi le ruá' dö' ral-la' ila'nné' que luzá'agaquië', en biti' ila'dí-lalenë' légaquië' didza', pero ral-la' iláca-gaquië' nöxaj ladxi', en idú ladxi' lógaca yúgu'të bönachi.

³Lësca' rë'u, zí'aló gúcaru' yugu' bönni' biti' ta'yéajni'inë', en gudá'baga'ru'

Dios. Gударu' nanítiru', en gúcaru' ca nupa nadó'ogaca, tu' benru' le guzé ládxi'ru' le ruá' dō', en ia'bal-la le guyaza ládxi'ru'. Benru' ca' le ruá' dō', en buzxé'eru' luzá'aru'. Biti' bila'lé'e bönachi rē'u dxi'a, ate' rē'u bití' bilé'eru' dxi'a luzá'aru' turu' ia'turu'. ⁴Ní'irō bulu'e lahu Dios, Nu rusólá rē'u. Naca bē' náquiē' idú dxi'a, en nadxí'inē' yúgu'tē bönachi, ⁵tu' busölé' rē'u, calēga tu' zoa bi le naca dxi'a benru' rē'u, pero tu' buéchi' ládxi'ē' rē'u. Bunē' rē'u dxi'a, en benē' ga nácaru' bönachi cubi. Dios Bō' Lá'ayi rucubē' rē'u. ⁶Dios gusól-lē'ē' Dios Bō' Lá'ayi queéru' tu' néquiru' queē' Jesucristo, Nu rusólá rē'u. ⁷Buzá' ládxi'ē' queéru', en bunē' rē'u tsahui' para gata' yöl-la' na'bán idú queéru', le runru' löza gunnē' queéru'.

⁸Didza' idútē li lē ni nuzúaja' lu guichi. Ré'ēnda' usédide'enu' yugu' bönni' ni' yugu' lē ni para iluf'i ládxi'gaquiē' ilúntica'sē' le naca dxi'a tu' ta'yéajlē'ē' Dios. Lē ni naca dxi'a, en nácada' lesaca' ila'z'í' lu ná'agaca yúgu'tē bönachi. ⁹Na'a, bití' gu'u lataj nu gü'í' didza' le cabí nazaca', o nu gü'í' ladxi' ca náca'gaca lágaca zióntērō cō' xuz xtó'ogaca bönachi, o nu tsójgutsa' yugu' didza' bizxaj, en yugu' le ridil-la didza' ca naca que xibá queē' Moisés, tu' cabí bi nazáca'gaca le caní, ate' cuntu nu uzí' xibé didza' caní.

¹⁰Channō zoa nu bönni' ni', rubéajē' choplō bönachi queē' Cristo, tōdi usó'o ládxi'ē' tu ia'tú luzuí, bubéajē' bönni' na'. ¹¹Nöz queézinu' chiböáquiē' caní nu bönni' bití' náquiē' tsahui', en runē' dul-la'. Chinabáguē'ē' xíguia' ni'a que lē na' runē'.

Le buzúajē' Pablo lu guichi le gunbí' bi'i Tito

¹²Cate' isól-la'a-nē' Artemas o Tíquico ga zu', bē' ladxi' guídu' ga ni zoa' lu yödzo Nicópolis, tu' chinuna' quia' ugá'ana' ni yugu' beo' ziaga. ¹³Zenas, bönni' na' rudödē' didza' ca rinná bē' bönachi yúlahui', enca' Apolos, ila'dx-inē' ga ni' zóali'. Bugú'u légaquiē' nöza lu yöl-la' rácalen, para cabí bi yadzaj quégaquiē'. ¹⁴Busedi yugu' böchi' luzá'aru' ilúntica'sē' le naca dxi'a, en bi ulu'nödzejē' quégaca nupa bi riyadzaj quéguequi, para gaca bē' caní le náca-gaquiē' queē' Cristo.

Pablo rugapē' Dios bönachi queē' Cristo

¹⁵Yúgu'tē nupa nacua'len neda' tu'gapa Dios lí'. Bugapa Dios nupa ni' nadxí'igaca rē'u tu' ta'yéajlē' Dios. Le ruzá' ládxi'ē' Dios queéru' gácalen yúgu'téli'. ¡Ca' gaca!

DIDZA' GUSÓL-LĚ'Ě PABLO QUEĚ' FILEMÓN

Pablo rugapĕ' Dios Filemón

1 Neda', Pablo, dzágabi' neda' bi'i bóchi'ru' Timoteo. Nadzuna' lidxi gufé tu' runa' xichinĕ' Jesucristo. Rugapa' Dios li', Filemón. Nacu' bōnni' nadxf'itu', en runu' xichinĕ' Cristo ca runtu' netu'. ²Rugapa' Dios Apia, nigula quiu'. Nácanu zanru' réajlĕ'ĕnu Cristo. Rugapa' Dios ca' zxf'inu', Arquipo. Ná-cabi' queĕ' Jesucristo ca tu bōnni' rejĕ' gudil-la, tu' runbi' xichinĕ' Lĕ' ca runtu' netu'. Lĕsca' rugapa' Dios bōnachi queĕ' Cristo tu'dubĕ' lu yu'u lidxu'. ³Rinábida'-nĕ' Xúziru' Dios, enca' Xanru' Jesucristo, uzá' ládxĕ'ĕ queĕli', en gunĕ' ga soa dxi icja ládxi'do'oli'.

Ca runĕ' Filemón tu' réajlĕ'ĕ Cristo

⁴Rética'sa'-nĕ' Dios queĕru' "Xclenu'", en rōjnĕtica'sida' li' cate' rulidza'-nĕ'. ⁵Caní runa' tu' ridxín quia' didza' ca nadxf'inu'-nĕ' Xanru' Jesús, en réajlĕ'u Lĕ', en nadxf'inu' ca' yúgu'tĕ bōnachi rō queĕ'. ⁶Rinábida'-nĕ' Dios gunĕ' ga gunda' dxin libán runu' ca naca le réajlĕ'u Cristo, para ulu'zĭ' xibĕ nupa nacuá' ni' yúgu'tĕ le naca dxi'a, le ruzá' ládxĕ'ĕ Jesucristo queĕru'. ⁷Rudzĕjada', en ruzĭ' zxōna' tu' nadxf'inu' yugu' bóchi'ru', en benu' li', bócha'a, ga bulu'huóaca ládxi'-gaca bōnachi ta'yéajlĕ' Cristo.

Filemón ral-la' uniti lahuĕ'-bi' Onésimo, bi'i nadó'o queĕ'

⁸Que lĕ ni na', sal-la' dĕ lu na'a tu' naca' gubáz nasól-lĕ'ĕ Cristo inná bé'eda' li' ca ral-la' gunu', ⁹ráta'yua' lo' len yōl-la' nadxf'i, neda' ni chinaca' bōnni' gula, en yu'a lidxi gufé tu' runa' xichinĕ' Jesucristo. ¹⁰Ráta'yua' lo' uláz queĕbi'

Onésimo, bi'i na' bena' ga bōácabi' queĕ' Cristo, en que lĕ ni na' nácabi' ca zxf'ini caza' ga ni nadzuna' lidxi gufé.

¹¹Bi'i ni, zĭ'alō biti' gúcabi' lesaca' quiu', pero na'a nácabi' lesaca' quiu' li', enca' quia' neda'. ¹²Bi'i ni rusól-la'a-bi' ga zu'. Ben bal lĕbi' ca neda' caz runu' bal, tu' nadxf'ida'-bi'. ¹³Gú'unida' ugá'analenbi' neda' ni, para uláz quiu' gunbi' xichina' tsanni ni yu'a lidxi gufé tu' runa' libán que didza' dxi'a, ¹⁴pero biti' bi ré'ĕnda' guna' le cabí naca didza' quiu', para cabí guna' bayudxi gácalenu' neda', pero huáca gácalenu' neda' tu' ré'ĕni quézinu' ca'. ¹⁵Nadxi ca' que lĕ ni na' buzá'abi' Onésimo ga zu' tu chĭ'ido' para udxinbi' tsaz ga zu'. ¹⁶Na'a, bíti'rō gácabi' quiu' ca tu bi'i nadó'o, pero gácabi' quiu' ca bi'i bóchi' casu', tu' nácabi' bi'i bóchi'ru' réajlĕ'ĕbi' Cristo, en nadxf'iru'-bi'. Nácabi' caní quia' neda', ate' ral-la' gácarōbi' ca' caní quiu', calĕ-gasō ca bóchi' luzó'o, pero lĕsca' ca bi'i bóchu'u réajlĕ'ĕbi' Xanru' Jesucristo.

¹⁷Que lĕ ni na', channō nunu' neda' tuz, ben lĕbi' bal ca neda' caz runu' bal. ¹⁸Channō bi xíguia' benbi' quiu' o channō bi rál-la'bi' quiu', gunnátĕz neda' ral-la'a. ¹⁹Neda', Pablo, len na'a caza' ruzúaja' quiu' lu guichi lĕ ni: Neda' caz quizxja' bi rál-la'bi', en calĕga guía' li': Lĕsca' ral-lu'u quia' yúgu'tĕ le dĕ quiu' tu' bena' neda' ga napu' yōl-la' na'bán idú. ²⁰Ca' gaca, bócha'a. Channō dĕ le uzĭ'a xibó' tu' néquiru' queĕ' Xanru', ben lĕ na' chigúta'yua' lo' tu' naca' bóchu'u réajlĕ'a Cristo, ate' caní gunu' ga huóaca ládxa'a.

²¹Ruzúaja' quiu' lu guichi ni, tu' ruzxōni ládxa'a li', gunu' ca rnna xtĭdza'a, en nōzda' gunu' ia'lati' ca lĕ na' chigúta'yua' lo'. ²²Lĕsca' rinaba' lo' upó'o quia' ga soa' lu yu'u lidxu', tu' runa' lōza urúaja' lidxi guĕ' ni, ate' guída' ga zóali' tu' rulídzali'-nĕ' Dios, en rinábali' lahuĕ' ni'a quia' neda'.

**Pablo ruzúajë' lu guichi le
rugapa Dios Filemón**

²³Epafra, bönni' yú'ulenë' neda'
tsözxón lidxi guié ni tu' runë' xichinë'
Jesucristo, rugapë' Dios li'. ²⁴Lësca'

tu'gapë' Dios li' Marcos, en Aristarco,
en Demas, en Lucas, yugu' bönni' ni
túnlenë' neda' tsözxón dxin queë' Cristo.

²⁵Rinábida'-në' Xanru' Jesucristo uzá'
ládxe'ë queéli'. ¡Ca' gaca!

DIDZA' RUZÉAJNI'I YUGU' BÖNACHI HEBREO

Dios bé'lené' rë'u didza' lu ru'ë Zxf'ini cazë'

1 Zián luzuí, en zián ca bené' Dios, bé'lené' xuz xtó'oru' didza' dza ni'te lu ruá'agaquié' bönni' gulu'ë didza' uláz queé'. ²Na'a, ga ruúdxí xtídzë'ë, dza ni zóaru' na'a, Dios bé'lené' rë'u didza' lu ru'ë Zxf'ini cazë'. Dios buzóë' Lë' para guequi queé' Zxf'iné' yúgu'të le nequi queé' Lë', ate' lu në'ë Zxf'iné' na', Dios bené' yödzölió ni. ³Zxf'iné' na' náquié' ca tu le rulu'í lahui yöl-la' zxön queé' Dios, en ca náquié' Zxf'iné' rulu'í lahui idú le náquié' Dios caz. Run cazë' ga nacuá'ti-ca'sö yúgu'të, ruguné' dxin didza' ru'ë, en yöl-la' huáca queé'. Cate' budxi bené' le ruún rë'u dxi'a que le naca dul-la' nabá-ga'ru', yöjchö'ë cuita lë'ë ibëla Dios, Nu rö'ö rinná bë' xitsá'tërö.

Zxf'iné' Dios nayépisëtërë' ca yugu' gubáz lá'ayi

⁴Zxf'iné' Dios nayépisëtërë' ca yugu' gubáz lá'ayi queé' Dios, tu' nácaterö lo le lë', lë na' Dios gulu'ë Lë' tu' náquié' Zxf'ini cazë', ca lágaquié' gubáz lá'ayi queé' na'. ⁵Dios catu caz gudxë' tué' gubáz lá'ayi queé' ca na' gudxë' Zxf'iné'. Gunné':

Zxf'ina' nacu'. Buzóa' Li' na'a.

Catu caz bë'ë didza' queé' tué' gubáz lá'ayi ca na' bë'ë didza' ca naca queé' Zxf'iné'. Gunné':

Naca' Xuzë', ate' Lë' náquié' Zxf'ina'.

⁶Lësca' caní, cate' Dios buzóë' Bi'i que cazë' lu yödzölió ni, gunné':

Yúgu'të gubáz lá'ayi queé' Dios ila'yéaj ládxi'gaquié' Lë'.

⁷Ca nácagaquié' gubáz lá'ayi queé', rna:

Lë' runé' ga nácagaquié' gubáz lá'ayi queé' ca bö' recja, ate' gubáz lá'ayi huen dxin queé', runé' ga nácagaquié' ca guí'.

⁸Na'a, ca naca cazë' Zxf'iné', rnné':

Ga rö'u rinná bë'u, inná bé'tica'su', Dios. Tshahi' naca ca rinná bë'u.

⁹Nadxi'inu' le naca tshahi', en calëga le ruá' dö'.

Que lë ni na' Dios budödë' lu no'o yöl-la' unná bë',

en bené' ga ruzí'tëru' Li' xibé yöl-la' unná bë'

ca le tu'zfi' xibé luzó'o.

¹⁰Lësca' caní rnné':

Li', Xan, cate' gusí lo, benu' yödzölió, ate' len ná'asu' buzú' lúzhiba.

¹¹Huadödi quéguequi, pero Li', tsaz idí'u.

Yúgu'të itébigaca ca ritëbi lari',

¹²en ca lari' utubu' léguequi, en utsó'o léguequi,

pero Li', catu caz utsá' cuinu' en catu caz igulu'.

¹³Dios catu caz gudxë' tué' gubáz lá'ayi queé' ca gudxë' Zxf'iné', gunné':

Guró'ö cuita lë'a ibëla

cate' gunra' ga ulu'zëchu zxíbigaca lo' nupa biti' ta'lé'e Li' dxi'a.

¹⁴Yúgu'të gubáz lá'ayi queé' Dios nácagaquié' bö' huen dxin queé' Dios, ate' nasól-lë'ë légaquié' para ilácalené' nupa ni nulágaca.

Biti' ral-la' ucá'anaru' cá'asö yöl-la' rusölá

2 Que lë ni na', ral-la' gü'i ládxi'röru' le chibiyóniru', para cabí gaca chopa ládxi'ru'. ²Guca bë' naca idútë li didza' na', le bidxín dza ni'te lu ná'agaquié' gubáz lá'ayi queé' Dios, ate' yúgu'të nupa gula'dödi bë' ca rna didza' na', en biti' gulún ca rna, Dios bené' léguequi xíguia' ca na' röjlöz le gulúngaca. ³Lësca' caní biti' ca' uláru' rë'u lu xíguia' na' channö ucá'anaru' cá'asö yöl-la' rusölá

ni, le benë' Lë cazë' Xanru' libán que zí'aló, ate' nupa bila'yóni Lë' bulu'luf'i rë'u naca idútë li. ⁴Lësca' caní Dios caz benë' tsözxón légaquië' ba nalfí, tu' benë' le nácagaca bë', en le tun ga rubániru', en yugu' yöl-la' huáca zxön. Gudísië' ca' yugu' le runödzejë' Dios Bö' Lá'ayi quégaquië' tsa gú'uni quézinë' Dios.

Dios benë' ga böáquië' Jesús idú ca nácaru' rë'u

⁵Dios bití' budödë' yödzölió si' za' lu ná'agaquië' gubáz lá'ayi que yehua' yubá queë', lë na' ru'iru' didza' que. ⁶Na'a, ca naca lë ni, nazúaj lu guichi lá'ayi didza' bë' nu run ba nalfí le rnna:

Dios, rubánide'eda' tu' ru'í ládXu'u bönachi.

Rubánide'eda' tu' rácalenu' léguequi.

⁷Ia'látí'sö cá'asö ca yugu' gubáz lá'ayi que yehua' yubá quiu' benu' bönachi.

Buzú' quéguequi yöl-la' zxön, en yöl-la' run bal, en budödu' yúgu'të le benu' Li' lu né'eguequi.

⁸Yúgu'të budödu' lu né'eguequi para ilá'nná be'e le.

Nazúaj lu guichi lá'ayi lë na' rnna: "Budödu' lu né'eguequi yúgu'të." Bití' bi bucá'anë' le cabí budödë' lu né'eguequi, pero ga ridxintë na'a dza, bití' rilé'eru' yu'u lu né'eguequi yúgu'të.

⁹Réquibe'eru' le guca queë' Jesús. Tu chí'isö, Dios benë' ga böáquië' ia'látí'sö cuidí' ca yugu' gubáz lá'ayi que yehua' yubá queë'. Guljë' bönachi para gútië', ate' gudí' guzxaquéë' Jesús lu yöl-la' guti uláz quégaca yúgu'të bönachi, tu' buzá' ládXë'ë Dios queëru' caní. Tu' benë' Jesús caní, Dios benë' ga rata' queëru' yöl-la' zxön, en yöl-la' run bal.

¹⁰Dios benë' yúgu'të le rilé'eru', en runë' ga nacua'tica'sö. Dios benë' ca ralla' gunë' cate' benë' ga naca bë' náquië' Cristo idú tsahui' ni'a que le gudí' i

guzxaquéë'. Caní benë' Dios queë' Cristo, Nu bideli' yöl-la' rusölá para gaca iché'ë bönachi zían yehua' yubá queë'. ¹¹Cristo ruúnë' tsahui' bönachi para ilequi quez queë' Dios. Tuzë' náquië' Xúzguequi nupa na' ruúnë' Cristo tsahui', en Xuz cazë'. Que lë ni na', bití' ca' rutuf'inë' Zxí'inë' Dios cate' rnnë' nácagaquië' böchi' luzë'ë. ¹²Ca naca lë ni nazúaj lu guichi lá'ayi le rnna: Usiyönda' böchi' luzá'a ca nacu' Li', Dios. Gatsaj láhui'lö bönachi tu'dubi quiu', gul-la' yöl-la' ba quiu'.

¹³Lësca' caní rnnë':

Uzxöni ládxa'a-në' Dios.

Ga yúbölö nazúaj le rnnë':

¡Buli'yútsöca' neda', en yugu' zxf'inë', nupa na' Dios bennë' quia'!

¹⁴Que lë ni na', tu' néquiguequinë' bëla' en rön yugu' zxf'inë' na', lësca' caní Cristo ben cuinë' ca nácagaquië'. Guljë' bëla' en rön. Caní guljë' para guca gútië', en caní guca busunítie' yöl-la' huáca unná bë' que tu' xihui', nu na' dë lu në'e guti bönachi. ¹⁵Caní benë' Cristo para guca busanë' yúgu'të nupa gulaca ca bönni' nadó'ogaquië' tsanni ni nacua' nabángaca, tu' guladxi yöl-la' guti. ¹⁶Naca bë' bití' benë' caní para gácalenë' yugu' gubáz lá'ayi que yehua' yubá queë' Dios, pero para gúcalenë' yugu' zxf'ini xi'sóë' Abraham. ¹⁷Que lë ni na', ben bayudxi böáquië' Cristo idú ca nácagaquië' böchi' luzë'ë na', para gáquië' lahuë' Dios tu bixúz lo, tu bixúzi runë' ca rnnë', en ruhuéchi' ládXë'ë bönachi, enca' para gunë' le gun ga gata' lu në'e ugüë' dul-la' nabága'gaca bönachi.

¹⁸Na'a, tu' gudí' guzxaquéë' Lë cazë' Cristo, ate' guzxi' bë' tu' xihui' Lë', que lë ni na' napë' yöl-la' huáca gácalenë' nupa ni, rizí' bë' tu' xihui' léguequi.

Jesús nayépisëtërë' ca Moisés

3 Que lë ni na', böchi' luzá'ado', libí'ilí' na' nácalí' quez queë' Dios

tu' bulidzë' Dios libí'ili', buli'yú dxi'a ca náquië' Jesucristo. Náquië' gubáz nasól-lë'ë Dios, enca' bixúz lo que le nazí' lu ná'aru'. ²Jesús ni runë' ca rnna xtídzë'ë Dios, Nu na' buzóa Lë' xilatjë', ca na' benë' ca' Moisés, benë' ca rnna xtídzë'ë Dios lógaca yúgu'të bönachi queë' Dios. ³Nayépisëtërë' Jesús ca Moisés, para gaca queë' yöl-la' ba, ca na' nácarë' lo bönni' nequi queë' tu yu'u ca naca huen dxin zoë' lu yu'u na'. ⁴Yúgu'të yu'u, zoa nu ben le, pero Dios náquië' Nu ben yúgu'të le rilë'eru'. ⁵Le nácatë Moisés benë' ca rnna xtídzë'ë Dios lógaca bönachi queë' Dios, pero gúquië' ca tu bönni' huen dxin, ate' benë' ba nalí que didza' ral-la' gu'ë Dios, ⁶pero Cristo runë' ca rnna xtídzë'ë Dios, en náquië' Zxf'ini cazë', ate' nacué' lu në'ë bönachi queë' Dios. Rë'u ni, nácaru' bönachi na' queë' Dios channö gácaru' tsutsu ga idxinrö dza údxi. Ral-la' gácaru' tsutsu ca ridipa ládxi'ru', enca' ca rudzë'jalenru' lë na' runru' löza.

Dë lataj ga ulu'zí' ládxi'gaca bönachi queë' Dios

⁷Que lë ni na', nazúaj lu guichi ca rn-në' Dios Bö' Lá'ayi le rnna:

Na'a, channö riyónili' didza' ru'ë Dios,

⁸biti' gácali' zidi lu icja ládxi'do'oli'

ca na' gulaca nupa ni' gula'dá'baga' Dios cate' ni' gula'zí' bë' Lë' lu lataj cá'asö.

⁹Gula'zí' bë'ë xuz xtó'oli' neda' ni' sal-la' bila'lé'enë' le bena' idú ca choá' iz.

¹⁰Que lë ni na' guléda' bönachi dza ni', en gunniá':

“Ta'chíxítica'sinë' ca ta'zá' ládxi'gaquië'. Biti' té'ënnë' ila'nózinë' le ré'ënda' ilunë'.”

¹¹Que lë ni na' guléda' légaquië', en bena' tsutsu xtídz'a, gunniá':

“Biti' ila'yázië' ga ulu'zí' ládxi'gaquië' tsözxón len neda'.”

¹²Gulí'gún chi'i cuinli', böchi' luzá'ado', para cabí gácali' nituli'

libí'ili' tu bönni' xihui' cabí réajlë'ë, en para cabí usanli'-në' Dios ban. ¹³Na'a, buli'zéajni'i tuli' ia'tuli' yúgu'të dza, tsanni ni naca dza ni zóaru' na'a, para cabí si' ye'e le naca xihui' libí'ili', en para cabí gácali' nituli' libí'ili' zidi lu icja ládxi'do'oli'. ¹⁴Yúgu'tëru' gunru' tsözxón Cristo channö gácaru' tsutsu ga idxinrö dza údxi, ca na' gusí lo ridipa ládxi'ru'.

¹⁵Caní ral-la' gunru' tsanni ni rnna:

Na'a, channö riyónili' chi'ë Dios,

biti' gácali' zidi lu icja ládxi'do'oli',

ca na' gulaca nupa ni' gula'dá'baga' Dios.

¹⁶¿Nupxi na' bila'yöni xtídzë'ë Dios, en gula'dá'baga' Lë'?

Gulún caní yúgu'të nupa ni' bubéajë' Moisés léguequi luyú Egipto.

¹⁷¿Nupxi na' gulënë' Dios idú ca choá' iz? Gulaca nupa ni' gulún dul-la',

ate' gulati lu lataj cá'asö. ¹⁸¿Nupxi ni' benë' tsutsu xtídzë'ë Dios, gunné' biti'

ila'yaza ga ulu'zí' ládxi'guequi tsözxón len Lë'?

Gulaca nupa ni' biti' gulún ca rnna xtídzë'ë Dios. ¹⁹Na'a, réquibe'eru' biti' guca ila'yázië' tu' cabí gula'yéajlë'ë Dios.

4 Na'a, tsanni ni nagá'ana le guzxi' lu në'ë Dios queëru' para gaca tsú'uru'

lataj queë' ga uzí' ládxi'ru', ral-la' gádxiru' para cabí unítiru' lataj tsú'uru' ni'.

²Biyönrü' rë'u didza' dxi'a ca na' bila'yönnë' légaquië', pero légaquië' biti' bulu'zi'ë xibé didza' na' bila'yönnë', tu'

cabí gula'yéajlë'ë Dios cate' bila'yönnë' le. ³Rë'u ni réajlë'ëru' Dios, en tsú'uru' lataj queë' ga uzí' ládxi'ru'.

Raca ca na' gunné' Dios:

Que lë ni na' guléda' légaquië'

en bena' tsutsu xtídz'a, gunniá':

Biti' tsú'ugaquië' ga ulu'zí' ládxi'lenë' neda'.

Dë lataj tsú'uru' rë'u ga uzí' ládxi'lenru'-në' Dios, sal-la' budxi benë' Dios xichinë' dza ni'te cate' ni' benë'

yödzölió ni, en chiruzí' ládxi'ë. ⁴Nazúaj lu guichi lá'ayi ga ru'í didza' ca naca

que dza igadxi, le rnna: “Buzí’ ládxi’ë Dios dza igadxi yugu’ lu dxin benë.”

⁵Ga yúbölö rnna: “Biti’ tsú’ugaquië’ ga ulu’zif’ ládxi’lenë’ neda’.” ⁶Nupa ni’ bila’yöni zí’alö didza’ dxi’a, biti’ guyú’ugaca ni’ tu’ cabí gulún ca rnna xtídzë’ë Dios. Que lë ni na’, ral-la’ tsú’ugaca bönachi yúbölö ni’. ⁷Que lë ni na’ ca’, Dios bulu’e tu dza yúbölö, gunné’: “Na’a dza.” Caní naca, cate’ chigudödi iz zián, bë’ë didza’ Dios lu ru’ë David, ca na’ nazúaj lu guichi lá’ayi le rnna:

Na’a dza, channö riyónili’ didza’ ru’ë Dios,

biti’ gácali’ zidi lu icja ládxi’do’oli’.

⁸La’tu’ benë’ Josué ga bulu’zif’ ládxi’i’gaquië’ cate’ gula’yu’ë lu xiyúgaquië’, biti’ bë’ë Dios didza’ gudödi ni’ que ia’turö dza cate’ nu uzif’ ládxi’len Lë’. ⁹Que lë ni na’, nagá’ana quégaca bönachi queë’ Dios lataj ila’déli’në’ ga ulu’zif’ ládxi’i’gaquië’. ¹⁰Nupa tsú’ugaca ga ulu’zif’ ládxi’lengaca Dios, ulu’zif’ ládxi’gaquië’ lu dxin tunë’, ca na’ buzí’ ládxi’ë Dios yugu’ lu dxin benë’ Lë’. ¹¹Que lë ni na’, ral-la’ güfi’ ládxi’ru’ tsú’uru’ ga ni’ uzif’ ládxi’lenru’-në’ Dios. Biti’ ral-la’ tá’baga’ru’ xtídzë’ë ca na’ gulún nupa ni’ biti’ gula’yéajlë’ Dios, en biti’ gula’yu’ë ni’.

¹²Xtídzë’ë Dios naca ban caz, en napa caz yöl-la’ huáca. Richúgurö ga rë’ ca guíë tuchi’ natuchi’ iropa rufi. Richugu ridxín ga ta’dzaga bö’ naca cázaru’, en le zoa lu icja ládxi’do’oru’, enca’ rökaj ga ridxintë lu dxita lu bin. Run ga naca bë’ le ribequi ícjaru’, en le rizá’ ládxi’ru’. ¹³Biti’ bi gaca ucáchi’ru’ ga biti’ gaca ilé’enë’ Dios le. Yúgu’të le nun cazë’ Dios nalá’ lahui, en narúaj ga liná’ lahuë’ Dios. Lahuë’ Lë’ run bayudxi quíxjö’öru’ le nunru’.

Jesús náquië’ bixúz lo, Nu nácatëro zxon

¹⁴Zoa queëru’ tu bixúz lo, nácatëro zxon, Nu na’ gudödi ni’ yehua’ yubá, Jesús, Zxí’inë’ Dios. Que lë ni na’ ral-la’ ugá’anaru’ tsutsu ca naca le nazí’ lu ná’aru’. ¹⁵Zoa queëru’ tu bixúz lo, Nu gaca huéchi’ ladxí’ rë’u ca náca-gaca le raca queëru’, tu’ guzxi’ bë’ tu’ xihui’ Lë cazë’ idütë ca na’ rizí’ bë’ tu’ xihui’ na’ rë’u, pero biti’ bi dul-la’ benë’ Lë’. ¹⁶Que lë ni na’, idú ládxi’ru’ ral-la’ ibíga’ru’ gala’ ga rö’ë rinná bë’ë Dios, Bönni’ ruzá’ ladxë’ë queëru’, en in-ábaru’ lahuë’ huéchi’ ládxi’ë rë’u, en uzá’ ládxi’ë queëru’, para gácalenë’ rë’u cate’ bi raca queëru’.

5 Dios ribó cazë’ nútí’tës bixúz lo ladaj bönachi, en ruzöë’ lë’ para gunë’ yugu’ le runë’ lahuë’ Dios uláz quégaca bönachi, en cu’ë lahuë’ Dios yugu’ le tu’nödzej bönachi, en yugu’ böa’ bëdxi tútigaquië’-ba’ lu bucugu lá’ayi tu’ nözi dul-la’ nabága’gaquië’. ²Bixúz lo na’, tu’ raca queë’ lébisö ca raca qué-gaca bönachi, gaca gáquië’ zxon ladxí’ len nupa náca-gaca yugu’ bönni’ canóz, en nupa ta’chixi ta’nigui. ³Que lë ni na’, tu’ náquië’ bixúz lo na’ bönáchisö, ral-la’ cu’ë lahuë’ Dios böa’ bëdxi na’ tútigaquië’-ba’ lu bucugu lá’ayi ni’a que dul-la’ nabaga’ cazë’, ca na’ runë’ ca’ ni’a que dul-la’ nabága’gaca bönachi.

⁴Cuntu nu gaca gun cuini bixúz lo, pero Dios rulidzë’ nu ral-la’ gaca bixúz lo, ca na’ bulidzë’ Aarón. ⁵Lësca’ caní guca queë’ Cristo. Biti’ ben cuinë’ bixúz lo, pero Dios buzöë’ Lë’ ca bixúz lo. Ca naca lë ni, Dios gudxë’ Lë’:

Li’ nacu’ Zxí’ina’.

Buzóa’ Li’ na’a.

⁶Lësca’ caní gudxë’ Lë’ le nazúaj ga yúbölö, gunné’:

Li’ nácatíca’su’ bixúz,

ca na’ gúquië’ Melquisedec bixúz.

⁷ Cristo, cate' ni' zoa cazë' yödzülió ni, bulidzë' Dios, en gúta'yue' lahuë'. Guródxí'ë, en guródxë' lahuë' Dios, Bönni' guca usólé' Lë' lu yöl-la' guti, ate' Dios biyönnë' Lë' tu' gúdxinë' Lë' idú ládxë'ë. ⁸ Sal-la' gúquië' Zxí'inë' Dios, bizédë' gunë' ca rna xtídzë'ë Dios tu' gulaca queë' yugu' le gudí'i guzxaqué'ë. ⁹ Cate' chigúquië' Cristo idú ca ral-la' gáquië' tu bixúz lo, Dios benë' Lë' Bönni' rusólé' tsaz yúgu'të nupa tun ca rna xtídzë'ë. ¹⁰ Ní'irö Dios buzóë' Lë' para gáquië' bixúz lo ca na' gúquië' Melquisedec na' bixúz lo.

Zoa bönadxi queëru' huóaj ládxi'ru', en tá'baga'ru'-në' Cristo

¹¹ Ca naca lë ni, zían le ral-la' güf'i-lentu' libí'ili' didza', le naca böniga quíxjöi'itu' libí'ili', tu' cabí réajni'inili'. ¹² Chigudödi dza ral-la' gaca usédili' bönachi xtídzë'ë Dios, tu' chibiyónili' xidzé, pero riquínili' nu quíxjöi' libí'ili' leyúbölö yugu' le cabí naca böniga nazí lu në'e nu si' réajlë'. Nagá'anali' ca yugu' bi'i hué'enido' ta'quínibi' nidxi', en calëga la' huagu tsutsu. ¹³ Yúgu'të bönni' naquíniguequinë' nu usedi légaquië' lë na' biti' naca böniga, nácaqaquië' ca yugu' bí'ido' té'ajbi' nidxi'. Biti' nazédaqaquië' ca sa'yéaj le naca tsahui'. ¹⁴ La' huagu tsutsu tu'zif' xibé nupa chinál-lágaca, nupa na' gaca iléquiube'e le naca dxi'a, en le cabí naca dxi'a, tu' nugún-gaquië' dxin yöl-la' réajni'i quégaquië'.

6 Que lë ni na', biti' ral-la' usédati-ca'siru' yugu' xibá buzédaru' cate' si' gusí lo riyóniru' ca naca queë' Cristo. Ral-la' tsöjñöröru' para gácaru' idú bönachi queë' Cristo. Biti' naquíni usédaru' leyúbölö yugu' xibá biti' naca böniga: ca ral-la' ubí'i ládxi'ru',

en ca bíti'rö gunru' le ruá' dö',
en ca ral-la' tséajlë'ëru'-në' Dios,

² en ca naca xibá que le ridílaru' nisa,

en ca rixóa ná'aru' bönachi ta'yéajlë'
Cristo,
en ca ral-la' ulu'bán nupa nátigaca,
en ca gunë' Dios, ichúquië' quégaca bönachi tuá' dö'.

³ Caní gunru' channö gunnë' Dios rë'u lataj.

⁴⁻⁶ ¿Naru' huácatsö gunru' ga ulu'bí'i ládxi'gaca leyúbölö nupa tu'huóaj ládxi', en ta'dá'baga' Dios? Channö bidxin quéguequi bení queë' Dios, en bulu'zif' xibé le runödzejë' Dios zoë' yehua' yubá, en gulaca tuz len Dios Bö' Lá'ayi, en channö bulu'zif' xibé didza' dxi'a queë' Dios en yöl-la' huáca que dza si' za', en channö ní'irö tu'huóaj ládxi', en ta'dá'baga' Dios, biti' ca' gaca nu gun ga ulu'bí'i ládxi'gaca leyúbölö, tu' gaca tsca ulu'dá' leyúbölö Zxí'inë' Dios lë'e yaga cruz en ilún tsca ulu'titaj Lë' lahuí' lógaca bönachi. ⁷ Nupa tun caní náca gaca ca yu na' ruzí' xibé nisa guiój le ribixi láhuilö zían luzuí. Channö yu na' runödzej le tu'zif' xibé nupa tá'ana yu na', raza ládxe'ë Dios le, ⁸ pero channö ruzóasö yu na' lubá yötsi', en bësígá', naca ditaj, en nabía dö', en naca para nu uzegui le.

Le runru' löza le run ga nácaru' tsutsu

⁹ Sal-la' ru'f'itu' caní didza', libí'ili' na' nadxf'itu', réquitu' ruzí'ili' xibé le náca-gacarö dxi'a, le tu'zif' xibé nupa nulá-gaca. ¹⁰ Dios náquië' tsahui', en biti' gal-la ládxe'ë dxin tsahui' benli', en yugu' le benli' tu' nadxf'ili' Lë'. Gúcalenli' nupa néquiguequi quez queë' Dios, en runli' xichínguequi. ¹¹ Na'a, ré'ënitú' güf'i ládxi'li' luzá'ali' tu ia'tuli', en gunli' caní ga idxinrö dza údxi, para gata' idú queéli' lë na' runli' löza. ¹² Ré'ënitú' cabí gácali' xöhuëdi, pero gunli' ca tun nupa ta'yéajlë' Dios, en ta'böza zxön ládxi', para idéli'li' yugu' le guzxf' lu në'ë Dios gunnë' queëru'.

¹³ Caní gaca, tu' benë' tsutsu Dios xtídzë'ë cate' guzxf' lu në'ë bi gunnë'

queë' Abraham. Tu' cabí zoa nu ná-carö lo ca Dios, que lë ni na' buze-taj cuinë', cate' ni' benë' tsutsu xtídzë'ë. ¹⁴Caní gunné' Dios: "Le nácatë guna' ga gaca dxí'a quiu', en guna' ga ila'yán-da'abi' xzí'ini xí'sú'." ¹⁵Gulözë' Abraham zxön ladxí', ate' bidéli'në' le guzxí' lu nëë' Dios gunné' queë'. ¹⁶Cate' tu bön-ni' runë' tsutsu xtídzë'ë, ruzötjë' nu ná-catëro lo ca lë', ate' lë ni ruzóa dxisö yúgu'të didza' bizxaj, tu' numë' tsutsu xtídzë'ë. ¹⁷Que lë ni na' Dios benë' tsutsu le guzxí' lu nëë' gunë', en buzötaj cuinë', tu' gú'unnë' uluf'inë' nupa ulu'zí' xibé le guzxí' lu nëë' unödzejë' quéguequi, ná-cada' löza, en tsaz naca le nuzóa lahuë' gunë'. ¹⁸Le guzxí' lu nëë' Dios, en le benë' tsutsu, chopa ni catu caz idzá'gaca, en ca naca quégaca chopa ni, bití' gaca sí' yëë' Dios. Caní benë' Dios para gá-cada' löza queëru' tu le huë' tsahui' rë'u. Ruzxöni ladxí'ru' Lë' idéli'ru' lë na' run-ru' löza le gunné' sí'ru'. ¹⁹Lë na' run-ru' löza ruzóatica'sö tsutsu icja ladxí'-do'oru', en naca ca tu du gufé ruzóa dx-isö barco. Lë na' runru' löza run chí'ë Cristo ni'a queëru' ga ni' zoë' Dios yehua' yubá, le nadxín lu lataj lá'ayi na' zoa cúdzi'lö lari' nala' lu yudo' röö' yehua' yubá. ²⁰Guyázië' Jesús uláz queëru' ca Nu röjnöru loru' ga ni' zoë' Dios, ate' Dios nuzóë' Lë' náquië' tsaz bixúz lo ca na' gúquië' Melquisedec bixúz lo.

Jesús náquië' bixúz lo ca gúquië' Melquisedec

7 Melquisedec gúquië' bönni' na' gunná bëë' lu yödzö Salem, enca' bixúz queë' Dios, nayëpisëtëre'. Cate' suzë'ë Abraham, söhuójjë' gudödi guca gudil-la cate' bucul-lë' yugu' bönni' ta'nná bëë', birúajë' Melquisedec na', yöjtságuië' Abraham, en gunábinë' Dios gun lá'ayë' Abraham. ²Abraham bëë' queë' tu cö' tu' chi cö' que yúgu'të le bidéli'në' lu gudil-la na'. Ca lë'

Melquisedec na' rnna lu didza' xidza': "Bönni' Unná Bë' Tsahui'", en náquië' ca' Bönni' unná bë' que yödzö Salem, le rnna lu didza' xidza': "Bönni' Unná Bë' Ribequi Dxíë'." ³Bití' zoa lu guichi le rnna gula'cu'ë xuz xinë'ë, o xuz xtá'ahuë', en bití' nazúaj dza guljë' o dza gútië', pero náquië' ca náquië' Xzí'inë' Dios tu' náquië' tsaz bixúz lo.

⁴Buli'yútsöca' na'a, ca na' gúquië' zxön Melquisedec na', tu' lë cazë' xúziru' Abraham bëë' queë' tu cö' tu' chi cö' que lë na' gulëajë' lu ná'agaquië' bönni' ta'nná bëë' ni' bucul-lë' lu gudil-la. ⁵Lu xibá queë' Moisés, Dios rinná bë'enë' yugu' xzí'ini xí'sóë' Leví, nupa ná-cagaca bixúz, ila'zi'ë tu cö' tu' chi cö' que le ta'zí' bönachi Israel, sal-la' ná-cagaca di'a dza quégaquië', tu' ná-cagaquië' yúgu'të' xzí'ini xí'sóë' Abraham. ⁶Melquisedec na' bití' náquië' di'a dza quégaquië', pero guzxí'ë tu cö' tu' chi cö' lu nëë' Abraham, nu na' bideli' yugu' le guzxí' lu nëë' Dios gunné' queë'. Lësca' Melquisedec na' gunábinë' Dios gun lá'ayë' Abraham, ⁷ate' cuntú nu gaca tá'baga' lë na' rnna: Nu nadéli'rö lahuë' Dios rinábini Dios gun lá'ayë' nu nacuídí'rö. ⁸Na'a, dza ni zóaru' na'a, nupa ta'zí' tu cö' tu' chi cö' lu ná'agaca bönachi ná-cagaca ca' bönachi tati caz, pero Melquisedec na', zoa le run ba nalí queë' le rnna zoë' nabanë'. ⁹Na'a, huáca innaru' queë' Leví, en quégaca xzí'ini xí'sóë', nupa na' ta'zí' tu cö' tu' chi cö' lu ná'agaca bönachi, lësca' gula'guíxjë' tu cö' tu' chi cö' cate' ni' Melquisedec na' guzxí'ë tu cö' tu' chi cö' lu nëë' Abraham, xuz gula gudödi quégaquië'. ¹⁰Caní naca, tu' huáca innaru' Abraham ni' nu'ë lë'ë Leví, en yugu' xzí'ini xí'sóë' cate' ni' yöjtságuië' Melquisedec lë', tu' cabí náljaniguequinë'.

¹¹Ta'zí' bönachi Israel xibá gunná bëë' Moisés lu ná'agaca bixúz, nupa ná-cagaca xzí'ini xí'sóë' Leví ga nababë'

ca' Aarón, bixúz lo. Na'a, la'tu' guca ulu'huóaca bönachi idú tsahui' lahuë' Dios tu' tun ca rinná bē' xibá queë' Moisés, biti' ben bayudxi soa ia'túë' bixúz ca gúquië' Melquisedec, en calëga ca gúquië' Aarón. ¹² Channö rutsé'ë Dios ca ral-la' gáquië' bixúz, run bayudxi ut-sé'ë ca' ca naca xibá queë'. ¹³ Xanru', Nu na' nazúaj lu guichi ca naca queë' yugu' lë ni, nababë' ia'turö cö' zxf'ini xi'sóë' Israel ca le nababë' Leví na', ate' que cö' zxf'ini xi'sóë' ga nababë' Xanru', cunttu nu guca bixúz lahuë' Dios. ¹⁴ Naca caní tu' naca bē' guljē' Xanru' lu cö' di'a dza queë' Judá, ate' Moisés biti' bē'ë didza' queë' Judá na' cate' bē'ë didza' quegaca nupa ral-la' ilaca bixúz.

¹⁵ Nácaterö bē' lë ni ni'a que le raca na'a. Ca na' gúquië' Melquisedec bixúz, chibuluf'i lahuë' ia'turē' bixúz, Jesús. ¹⁶ Bönni' ni, biti' gúquië' bixúz tu' rinná bē' xibá ca ral-la' ilaca di'a dza queë', pero náquië' bixúz tu' napē' yöl-la' huáca que yöl-la' na'bán le catu caz údxi. ¹⁷ Nazúaj lu guichi lá'ayi le run ba nalí queë' le rnna:

Tsaz nacu' bixúz

ca na' gúquië' Melquisedec bixúz.

¹⁸ Na'a, nadúa xibá gula ni', tu' cabí gudapa yöl-la' huáca unná bē', en biti' bi guca gun. ¹⁹ Xibá queë' Moisés na' biti' guca un bönachi idú tsahui'. Na'a, chiguyú'u tu le runru' löza le nácarrö dx-i'a, le run ga gaca íbígá'ru' gala' ga zoë' Dios.

²⁰ Cate' benë' Dios ga náquië' Jesús bixúz, benë' tsutsu xtídzë'ë. ²¹ Dios biti' benë' tsutsu xtídzë'ë cate' bucu'ë bönachi ni' ca bixúz, pero cate' benë' ga náquië' Jesús bixúz, benë' tsutsu xtídzë'ë, gunné':

Bena' tsutsu xtídzza'a neda', Xanu', gunnía':

“Biti' utsá'a ca guna'.

Tsaz nacu' bixúz

ca na' gúquië' Melquisedec bixúz.”

²² Que lë ni na', Cristo náquië' Nu run ga naca löza didza' rucá'ana tsahui' le nácarrö dxi'a ca lë na' guca zí'alö. ²³ Yugu' bixúz ni' guláquië' bönni' zían, tu' cabí guca ulu'gá'anë' yödzölió ni tu' gulátië', ²⁴ pero tu' zóatica'së' Jesús, tsaz náquië' bixúz, en biti' gaca nu huóaza xilatjē' para gaca bixúz. ²⁵ Que lë ni na', tsaz gaca usólé' nupa ta'biga' gala' ga zoë' Dios, nupa tu'gún dxin Lë', tu' zóatica'së' nabanë', en rnnë' dxi'a uláz quegaquië' lahuë' Dios.

²⁶ Ben bayudxi soa tu bixúz lo caní queëru'. Náquië' lá'ayi, en idú tsahui', en biti' náquië' tsözxón bönachi dul-la', pero nayépisëtëre' ca yúgu'të le nacua' ni' yehua' yubá. ²⁷ Jesús ni, biti' náquië' ca yugu' bixúz lo yödzölió ni, tu' ben bayudxi gula'gu'ë rön lahuë' Dios yugu' dza, ate' gulútië'-ba' böa' bédxi lahuë' Lë' tu' nözi dul-la' nabága'gaca cazë', ate' gudödi ni' gulunë' caní tu' nözi dul-la' nabága'gaca bönachi. Na'a, Jesús, tsaz gulu'ë rön lahuë' Dios, cate' ni' budödi cuinë' lahuë' Dios, en bulaljē' xichón cazë' tu' nözi dul-la' nabága'gaca yúgu'të bönachi. ²⁸ Lu xibá queë' Moisés bönachi biti' nácagaca idú dxi'a nácagaca bixúz, pero gudödi bidxín xibá queë' Moisés, Dios benë' tsutsu xtídzë'ë, cate' benë' ga náquië' Zxf'ini cazë' bixúz lo, tu' náquië' idú tsahui' ca ral-la' gáquië' bixúz.

Jesús náquië' Bixúz Lo queëru'

8 Na'a, ca rnna lë na' si' gunnía', naca caní: Zoa queëru' tu Bixúz Lo caní. Gurö'ë cuita lë'ë ibëla Dios, ate' rö'ë, rinná bē'ë yehua' yubá ni'. ² Lë' runë' dxin ca Bixúz Lo lu lataj nácaterö lá'ayi, le naca yudo' le naca idútë, lë na' buchisë' Xanru', en calëga bönachi. ³ Dios rucu'ë yúgu'të bixúz lo para ila'gu'ë yugu' le tu'nödzaj bönachi, enca' xichóngacaba' böa' bédxi lahuë' Dios. Que lë ni na' ben bayudxi soa bi gulu'ë Cristo lahuë' Dios. ⁴ La'tu' zoë' luyú ni,

biti' ca' gáquië' bixúz, tu' nacuá'tica'së' bixúz ni, nupa ta'gú'u yugu' le tu'nödzej bönachi lahuë' Dios ca rinná bë' xibá queë' Moisés. ⁵Yugu' bixúz ni tunë' dxin que tu le rulu'isö, en le naca ca tu bixín que lë na' rö'ö yehua' yubá. Caní naca, tu' gúdxidë'ë Dios Moisés cate' si' uchisé' yú'udo' na' néquini guídi, gunné': "Buyútsöca', ben yúgu'të idú ca naca lë na' buluf'ida' lí' lu gu'fa ni'." ⁶Na'a, Bixúz Lo queëru' ni runë' dxin que le nácatëro lesaca', ate' ni'a que le benë' Lë' zoa tu didza' rucá'ana tsahui' queëru' le nácatëro lesaca', en le ru'í didza' que le nácatëro lesaca' guzxi' lu në'ë Dios gata' queëru'.

⁷La'tu' gudapa didza' na' rucá'ana tsahui' le guzóa zí'alö idütë yöl-la' huáca, biti' ben bayudxi soa didza' buropi ni rucá'ana tsahui'. ⁸Na'a, Dios rulu'ë biti' gulaca bönachi ni' idú dxi'a cate' bë'ë didza' ca na' nazúaj lu guichi lá'ayi, gunné':

Buli'yútsöca', gunné' Xanru': Zá'gaca dza cate' uzóa' tu didza' cubi ucá'ana tsahui', le gúnlena' bönachi Israel, en bönachi Judá.

⁹Biti' gaca ca guca didza' rucá'ana tsahui' na',

lë na' bénlena' xuz xtó'ogaquië',

dza ni' gudéla'a ná'agaquië',

en bubéaja' légaquië' luyú Egipto.

Tu' bulu'cá'anë' didza' quia' rucá'ana tsahui',

neda' bucá'ana' légaquië', rnnë' Xanru'.

¹⁰Que lë ni na', caní gaca didza' ucá'ana tsahui'

gúnlena' bönachi Israel

tödi yugu' dza ni', rnnë' Xanru'.

Uchízia' icja ládxi'do'gaquië' xibá quia'

en uzúaja' le lu icja ládxi'do'gaquië'.

Ní'rö gaca' Dios quégaquië'

ate' légaquië' iláquië' bönachi quia'.

¹¹Biti' gun bayudxi nu usedi luzé'e, inná: Bénbë'ë Xanru', tu' ilúnbë'ë yúgu'të' neda',

ga isí lo nu naca cá'asö, ga idxintë nu naca lo.

¹²Huéchi' ládxa'a légaquië',

en uniti lahua' le cabí naca tsahui' gulunë',

en bítirö tsöjneda' dul-la' nabága'gaquië'.

¹³Cate' ni' ru'ë Dios didza' que tu didza' cubi rucá'ana tsahui', naca tu' chibigula lë na' guzóa zí'alö, ate' chizóa idúa lë na' nagula, en chinaca gulasi.

Lataj lá'ayi dë luyú, en lataj lá'ayi dë yehua' yubá

9 Na'a, didza' rucá'ana tsahui' na' guzóa zí'alö, dzágagaca xibá le ca ral-la' ila'yéaj ládxi'gaca bönachi Dios, en lataj lá'ayi bidzága le guca que luyú ni. ²Caní naca lataj lá'ayi na' néquini guídi. Lu lataj na' dë láhuilö, naz'í le Lataj Lá'ayi, gula'cuá' le nuá' guí, en bucugu lá'ayi ga ni' gula'gu'ë yugu' yöta xtildo' lahuë' Dios. ³Cúdzi'lö le buropi lari' nal-la' lu yu'u na' zoa lataj ni' naz'í le, Lataj Idú Lá'ayi, ⁴ate' lu lataj ni' gula'cuá' tu bucugu néquini oro ga na' buluzéguí'ë nöri, enca' tu gu'ina ga yu'u didza' rucá'ana tsahui', en nacu gu'ina na' oro. Lu gu'ina na' gula'cuá' zxíga'do' na' néquini oro, le nadzá' yöta xtildo' na' naz'í le maná, enca' xuyaga queë' Aarón, lë na' bubó' ni'a në'e, enca' yugu' guió'j blaga na', nazúaj láhuilö'guequi didza' rucá'ana tsahui'. ⁵⁻⁶Lahui gu'ina na' gula'cuá' chopa gubáz lá'ayi néquiguequini oro, lé'gaca querubín que lataj ga buluf'í lahuë' Dios, ate' bulu'zxóa xíliguequi láhuilö lataj ga ni' gulu'ë bixúz lo rön tu' nözi dul-la'. Caní bulu'cu'ë yugu' lë ni. Biti' dë lataj uzúaja' na'a idütë ca náca-gaca lë ni.

Ta'yázatica'së' yugu' bixúz lu lataj zoa láhuilö, ga na' tunë' dxin quégaquië' que le ta'yéaj ládxi'gaquië' Dios. ⁷Tuzë' bixúz lo guyázië' lu lataj buropi ni' tu luzuísö tu iz, en bi'ë rön le gulu'ë lahuë'

Dios tu' nözi dul-la' nabaga' cazë', enca' tu' nözi dul-la' nabága'gaca bönachi, dul-la' gulunë' le cabí guléquibe'enë'.⁸ Caní ruzéajni'inë' Dios Bö' Lá'ayi rë'u, bití' ca' guca idxinru' lahuë' Dios caz tsanni ni' tu'gunë' dxin lataj lá'ayi na' zoa láhuilö lu yu'u lá'ayi na' néquini guídi, lë na' bidzága didza' rucá'ana tsahui' le guzóa zí'alö.⁹ Yugu' lë ni naca tu le rulu'ísö que le raca na'a dza. Yugu' le gula'guë' lahuë' Dios, en rön quégacaba' böa' bédxi na' gulútië'-ba' lahuë' Dios bití' guca ulu'ún idú dxi'a icja ládxi'do'-gaquië' bönni' ni' gula'yéaj ládxi'gaquië' Dios caní.¹⁰ Yugu' lë ni buluf'i lahui quégacasö le gulë'aj gulahuë', en ca ral-la' ila'guíbi cuíngaquië', en quégaca xibá ca ral-la' gaca que idú ca zeaj naca cazë'. Yugu' lë ni buzóë' Dios quégaquië' ga bidxintë dza ral-la' utsé'ë yúgu'të.

¹¹ Na'a, chibudulu'i lahuë' Cristo, en náquië' Bixúz Lo que le naca idú dxi'a, le bilá' lahui ni'a que le benë' Lë'. Lataj lá'ayi ga na' guyázië' Lë' nácarö lo, en nácarö idú, en bití' néquini lu ni'a lu ná'agaca bönachi, en bití' naca que luyú ni.¹² Na'a, chiguyázië' Cristo lu lataj lá'ayi na', calëga len xichóngacaba' bédxido', en xichóngacaba' chivo, pero len rön queë' cazë'. Guyázië' lu lataj idú lá'ayi tu luzuísö, ate' caní guca, benë' ga nuláru' tsaz.¹³ Le nácatë xichóngacaba' bédxi, en chivo, en dö queëba' bédxido' bulu'zégui'ë-ba', yugu' le gula'guë' lu íc jagaca nupa nabága'gaca dul-la', guca ulu'gúa dul-la' na' nabága'gaca bönachi para ulu'ún légaquië' dxi'a idú ca zeaj naca cazë' ca naca que yöl-la' yudo' quégaquië'.¹⁴ Na'a, gúntërö ca' xichönë' Cristo, tu' budödi cuinë' queë' Dios, en gúquië' idú tsahui', ate' zóalenë' Dios Bö' Lá'ayi Lë', Nu zóatica'sö. Na'a, xichönë' Cristo ruún idú dxi'a icja ládxi'do'oru' lu yugu' le gubága'ru' le tun ga nu gati, para gaca gunru' xichinë' Dios ban.

¹⁵ Que lë ni na' náquië' Jesucristo Nu ben tsutsu didza' cubi rucá'ana tsahui', tu' gútië' Lë', en bugúë' dul-la' gula'bagaga' bönachi cate' ni' zoa didza' gula rucá'ana tsahui'. Gútië' ca' para gaca ila'zi'ë lë na' guzxi' lu në'ë Dios unödzejë' quégaquië' bönni' bulidzë', le zóatica'sö.¹⁶ Cate' ratië' nu bönni', en nucá'anë' tu didza' ca ral-la' ila'guísië' le nequi queë', run bayudxi gaca bë' chinátië' bönni' na' para gaca ilunë' ca rnna didza' na' nucá'anë'.¹⁷ Cate' chinátië' bönni' na', gaca ilunë' ca rnna didza' na', pero tsanni ni zoë' nabanë', bití' ca' gaca ilunë' ca rnna didza' na'.¹⁸ Que lë ni na', didza' na' rucá'ana tsahui' le guzóa zí'alö guca lesaca' tu' bidzága rön didza' na', le rulu'ísö zoa nu guti.¹⁹ Cate' ni' gudíxjöi'inë' Moisés bönachi ni' ca náca-gaca yúgu'të xibá queë' Dios, gudélé'ë rön quégacaba' bédxido', en quégacaba' chivo, le nutsi' nisa, ate' len tu guíxi'do' nazí'i le hisopo, en lítsa'ba' bö'cu' zxila' le në'aj xiná, buchéajë' rön, en nisa na' lahui guichi ga na' nazúaj xibá na', enca' láhuigaca bönachi.²⁰ Ní'irö gudxë' légaquië': "Lë ni naca rön le run tsutsu didza' rucá'ana tsahui' le gunná bé'enë' Dios rë'u para gunru' ca rnna."²¹ Lësca' caní buchéajë' Moisés rön na' lu lataj lá'ayi néquini guídi, en lahui yúgu'të le tu'gunë' dxin para ila'yéaj ládxi'gaquië' Dios.²² Ca na' rinná bë' xibá na', látu'biqui' yúgu'të ral-la' un dxi'a rön léguequi, ate' channö cabí tu'laljë' rön, bití' udúa dul-la'.

Xichönë' Jesucristo rugúa dul-la'

²³ Caní naca, ben bayudxi guzóa le bun dxi'a yudo' luyú ni le naca tu le rulu'ísö ca naca lë na' rö'ö yehua' yubá, pero ca naca lë na' rö'ö yehua' yubá, ben bayudxi soa le un dxi'a nupa ila'yaza le, le nácarö lesaca' ca xichóngacaba' böa' bédxido' caní.²⁴ Bití' guyázië' Cristo lataj lá'ayi néquini lu ni'a lu ná'agaca

bönachi, lë na' naca tu le ruluf'isö ca naca le naca idú, pero guyázië' yehua' yubá caz para gaca uluf'i lahuë' na'a lahuë' Dios uláz queéru'. ²⁵ Bixúz lo zoë' luyú ni razië' lataj nácatëro lá'ayi tu tu iz len rön quégacaba' böa' bédxi, pero biti' run bayudxi tsázië' Cristo zían luzuí para udödi cuinë' lahuë' Dios. ²⁶ La'-tu' guca caní, gun bayudxi qui'i sáquë'ë Cristo, en gátie' zían luzuí dza ni'te cate' guta' yödzöliö ga ridxintë na'a dza, pero na'a cate' naca dza údxi, tsaz buluf'i lahuë' tu luzuí, en budödi cuinë' lahuë' Dios, cate' gútië' para bugúë' dul-la' nabága'ru'. ²⁷ Ca na' run bayudxi ilátigaca bönachi tu luzuí ate' tödi ni' uchi'a usöröë' Dios léguequi, ²⁸ lës-ca' caní, gútië' Cristo tu luzuí, cate' budödi cuinë' lahuë' Dios para bugúë' dul-la' nabága'gaca bönachi zían. Na'a, uluf'i lahuë' le buropi luzuí, calëga para ugúë' dul-la', pero para usölë' tsaz nupa ta'böza Lë'.

10 Xibá na' gunná bë'ë Moisés guca tu le rulu'isö ca zeaj naca le tsahui' si' zá'gaca, en biti' guca idú ca nácagaca. Que lë ni na', xibá na' queë' Moisés biti' guca un idú tsahui' nupa ni' bila'dxín lahuë' Dios, en biá'-gaca rön quégacaba' böa' bédxido', lë na' gula'gú'utica'së' lahuë' Dios yugu' iz. ² La'-tu' guca un légaquië' idú tsahui', biti' gula'gú'utica'së' rön ni' lahuë' Dios, tu' cabirö iléquibe'enë' bönni' guca caní quégaquië' nabága'gaquië' dul-la' channö chibulu'huóáquië' idú tsahui'. ³ Rön ni' gula'gu'ë lahuë' Dios yugu' iz busá' ládxi'gaquië' nabága'gaquië' dul-la'. ⁴ Caní guca, tu' cabí guca xichóngacaba' bédxi, en chivo ugúá dul-la'.

⁵ Que lë ni na', cate' bidxinë' Cristo yödzöliö ni, gudxë' Dios ca na' nazúaj lu guichi lá'ayi le rnna:

Biti' ré'ënu' nu cu'u rön quégacaba' böa' bédxi lo'

pero benu' ga naca' bönáchisö.

⁶ Biti' raza ládxi'u nu uzegui'-ba' böa' bédxi lo',
o nu cu'u xichóngacaba' lo' tu' nözi dul-la'.

⁷ Ní'irö gunná': Ni zoa' para guna' ca ré'ënu' Li', Dios.

Naca ca na' nazúaj lu guichi lá'ayi ca gaca quia'.

⁸ Lë na' nazúaj z'älö rnna: "Biti' ré'ënë' Dios nu cu'u rön quégacaba' böa' bédxi lahuë'." Didza' ni ruluf'i ré'u bí'ti'rö raza ládxi'ë Dios lë ni sal-la' lu xibá queë' Moisés rinná bé'enë' Dios nu gun caní.

⁹ Gudödi ni' rnna: "Ni zoa' para guna' ca ré'ënu' Li', Dios." Didza' ni ruluf'i ré'u rugúë' Dios lë na' gula'gu'ë lahuë' z'älö, en ruzöë' xilataj le gulu'ë Zx'ini cazë' lahuë'. ¹⁰ Na'a, Dios ruúnë' ré'u idú tsahui' tu' benë' Cristo ca ré'ënë' Dios cate' ni' budödi cuinë' lahuë' Dios uláz queéru', en gútië' tu luzuí.

¹¹ Le nácatë yúgu'të bixúz luyú ni zuíguequinë' yugu' dza, en tunë' xichíngaquië', en la' tuz ca tunë', ta'gu'ë lahuë' Dios zían luzuí xichóngacaba' böa' bédxi, yugu' le cabí gaca ulu'gúá dul-la'.

¹² Na'a, Cristo, tu le gulu'ë tsaz lahuë' Dios tu luzuí tu' nözi dul-la', ate' ní'irö yöjchö'ë cuita lë'ë ibëla Dios. ¹³ Ribözë' ni' dza gunë' Dios ga ulu'zechu zxíbi-gaca lahuë' nupa biti' ta'lé'e Lë' dxi'a.

¹⁴ Ní'a que tuz le gulu'ë lahuë' Dios, tsaz benë' ga nácagaca idú tsahui' nupa na' bunë' dxi'a, en bubéajë' léguequi quez queë' Dios. ¹⁵ Lësca' caní Dios Bö' Lá'ayi runë' ba nalí loru', tu' gunné' z'älö lë na' nazúaj lu guichi le rnna:

¹⁶ Caní gaca didza' ucá'ana tsahui' gún-lena' légaquië'

tödi yugu' dza ni', rnnë' Xanru'.

Uchízia' icja ládxi'do'gaquië' xibá quia', en uzúaja' le lu icja ládxi'do'gaquië'.

¹⁷ Gudödi na' gunné':

Bí'ti'rö tsöjneda' dul-la' nabága'gaquië' en dö' biá'gaquië'.

¹⁸ Que lë ni na', channö chinadúa dul-la', bítirö run bayudxi nu bi cu'u lahué' Dios tu' nözi dul-la'.

Huáca ibíga'ru' gala' ga zoë' Dios

¹⁹ Na'a, yugu' böchi' luzá'ado', idú ládxi'ru' gaca idxinru' lahué' Dios caz, nía que xichönë' Jesucristo. ²⁰ Tséajlenru' tu nöza cubi, en idú tsahui' le nuzöë' Cristo, le ridxín cúdzi'lö lari' na' busayaj ga nu riyaza lataj idú lá'ayi na', o huáca innaru', nöza na' gusaljé' Cristo ni'a queéru' tu' budödë' idütë le naca cazë'. ²¹ Jesús náquië' queéru' tu bixúz nayépisëtërë', en rinná bé'enë' bönachi queë' Dios. ²² Que lë ni na' huáca ibíga'ru' gala' ga zoë' Dios idú ládxi'ru', en lu yöl-la' run löza queéru', tu' réajlë'ëru' Cristo, tu' chibunë' dxi'a icja ládxi'do'oru', para cabí uxösa ládxi'do'oru' rë'u, ate' gudibë' idütë le naca cázaru' len le naca tu nisa nácatërö idú. ²³ Ral-la' gácaru' tsutsu, en cabí gaca chopa ládxi'ru' ca naca le runru' löza que le nazí' lu ná'aru', le guzxi' lu në'ë Dios gunnë' queéru', ate' Lë' runë' ca rn-në'. ²⁴ Ral-la' utipa ládxi'ru' turu' ia'turu', para gunru' ga idxí'iröru' luzá'aru', en gúnröru' ca' le naca tsahui'. ²⁵ Bal-la bönachi bítirö tu'dubi len rë'u. Biti' ralla' gunru' ca tun bönachi na', pero ral-la' utipa ládxi'ru' turu' ia'turu', en gúnröru' caní tu' rilë'ëru' chizóa idxín dza huödë' Xanru'.

²⁶ Channö zéajlenru' runru' dul-la' tödi núnbë'ëru' le naca idütë li, bití' ca' nagá'ana bi gaca cú'uru' lahué' Dios le ugúa dul-la'. ²⁷ Yugu' bönni' tunë' caní, lu yöl-la' radxi ridzöbi quégaquië' ta'bözë' dza ichúguië' Dios quégaquië' ila'yázië' lu guí' gabila, lë na' uzéguitica'sö nupa ta'dá'baga' Dios. ²⁸ Cate' nu bönni' buzóë' xibá queë' Moisés tsölá'alö, gulútië' lë' channö chopa tsonna bönachi gulún ba nalfi que le benë', ate' cuntu nu buéchi' ladxi' bönni' na'. ²⁹ Na'a, nu bön-

ni' uzóë' tsölá'alö Zxí'inë' Dios, en uzóë' tsölá'alö ca' xichönë' le run tsutsu didza' rucá'ana tsahui', le ruún rë'u dxi'a, ibá-ga'rë' ca' xíguia'. Nu bönni' gunë' caní ucá'anë' cá'só Dios Bó' Lá'ayi, Nu ruzá' ladxi' queéru' le riquíniru'. ³⁰ Caní gaca, tu' núnbë'ëru'-në' Dios, Nu gunná: "Quia' neda' nequi yöl-la' ruzé' lëbi. Neda' ubi'a quégaca bönachi, rnnë' Xanru'." Lësca' caní gunné': "Xanru' uchi'a usöröë' bönachi queë'." ³¹ Ral-la' gadxi idzöbi nu ral-la' si' xíguia' lu në'ë Dios ban.

³² Gulí'tsójné yugu' dza chigula'dödi cate' ni' si' bidxín queéli' bení', ate' biá' gulenli' zían le bulu'saca' zi'ë libí'ili'. ³³ Bulu'lidza ditaj bönachi libí'ili', en bulu'dxía libí'ili' dö' lahui' lógaca bönachi, ate' benli' tsözxón ca' nupa gula'guí' gula'zaca' caní. ³⁴ Caní guca, tu' buéchi' ládxi'li' nupa nadzúngaca lidxi guíë', en lu yöl-la' rudzeja queéli' biá' gulenli' nupa gula'béaj lídxili' yugu' le guta' queéli'. Caní benli' tu' nózili' nequi queéli' le nácarö dxi'a, en le zóatica'sö ni' yehua' yubá. ³⁵ Na'a, bití' ucá'anali' lë na' runli' löza, le nachë' tu le zxön ubi'ë Dios queéli'. ³⁶ Run bayudxi cózali' zxön ladxi', para cate' chibenli' ca ré'ënë' Dios, sfíli' le guzxi' lu në'ë gunnë' queéli', ca na' nazúaj lu guichi lá'ayi, ca gunné' Dios le rnna:

³⁷ Ia'tú chí'ido'osö idxinë' Bönni' na' ralla' guídë'.

Biti' ca' tsenë'.

³⁸ Ní'irö nu naca tsahui' lahua' neda', ulá nu na' tu' réajlë' neda'.

Channö huóaj ladxi', en tá'baga' neda', bítirö tsaz ládxa'a nu na'.

³⁹ Na'a, rë'u ni, bití' nácaru' ca nupa tu'huóaj ladxi', en ta'dá'baga' Dios, en ila'niti, pero réajlë'ëru' Cristo, en nadéli'ru' yöl-la' rusölá.

Ca naca yöl-la' réajlë' queéru' Dios

11 Na'a, tu' réajlë'ëru' Dios, naca löza queéru' sfí'iru' le runru' löza,

ate' naca bē' zoa le cabí gaca ilé'eru'.
²Caní gula'yéajlë'ë xuz xtó'oru' Dios, ate' que lë ni na' nazúaj lu guichi lá'ayi ca guca quégaquië' le rnna: Bulu'rúajë' tsahui' lahuë' Dios.

³Tu' réajlë'ëru' Dios, réquibe'ëru' benë' Lë' yödzülió ni len didza' bé'ësë'. Lësca' caní, cate' benë' Dios yúgu'të le rilé'ëru', bugunë' dxin le cabí nalá'.

⁴Tu' guyéajlë'ë Abel Dios, gulu'ë rön queé'ba' böa' bédxido' lahuë' Dios, tu le nácatëro lesaca' ca le gulu'ë Caín lahuë' Dios, en que lë ni na' Dios benë' ba nalí queë' Abel na', gunné' náquië' tsahui', en benë' bal lë na' gulu'ë lahuë'. Sal-la' chinátië' Abel na', ga ridxintë na'a dza, naca tsca ru'ë didza', tu' guyéajlë'ë Dios.

⁵Tu' guyéajlë'ë Enoc Dios, gudödë' ni' yehua' yubá, en biti' ca' gútië', ate' bíti'rö nu budzüli lë', tu' buchë'ë Dios lë', ate' nazúaj lu guichi lá'ayi ca naca queë' le rnna: "Zí'alö ca buchë'ë Dios lë', benë' Enoc le raza láchxë'ë Dios." ⁶Na'a, channö cabí réajlë'ëru' Dios, biti' gaca gunru' le raza láchxë'ë Lë', ate' para ibí-ga'ru' gala' ga zoë' Dios, run bayudxi tséajlë'ëru' zoa cazë' Lë', en rubi'ë que nu ru'í ladxí' Lë'.

⁷Cate' ni' Dios buzéajni'inë' Noé ca ral-la' ilaca le cabí rilé'eninë' Noé na', tu' guyéajlë'ë Noé Dios, benë' ca rnna xtídzë'ë Dios. Bupé'ë barco zxon na' nazí'i le Arca, ate' lë'e barco na' bulu'lá bönachi dí'a dza queë' Noé. Tu' guyéajlë'ë Noé Dios, benë' ga naca bē' narugu quégaca bönachi yödzülió ilátigaca, ate' bidéli'në' gúquië' tsahui' lahuë' Dios, le ta'delí' nupa ta'yéajlë' Lë'.

⁸Cate' ni' Dios bulidzë' Abraham, tu' guyéajlë'ë Abraham Lë', benë' ca rnna xtídzë'ë Dios, en buzë'ë ladzë' para tsejë' lataj ni' ral-la' si'ë ca tu le guequi tsaz queë', ate' birúajë' ladzë' sal-la' biti' nóz-inë' gazxi na' ral-la' tsejë'. ⁹Tu' guyéajlë'ë Abraham Dios, gúquië' ca tu bön-ni' zí'tu', en guzöë' luyú na' Dios guzxi'

lu në'ë unödzejë' queë'. Guzöë' lu yu'u guídido', en lëbisö ca gulunë' Isaac, en Jacob, xzí'ini xí'söë' Abraham, nupa ni' guzxi' lu në'ë Dios unödzejë' quéguequi lë na' guzxi' lu në'ë unödzejë' queë' Abraham. ¹⁰Caní benë' Abraham, tu' benë' löza idéli'në' yödzo na' rō'ö tsaz xilibi zö'ö que, le nuzöë' Dios xilibi zö'ö que, ate' gulu'ë le ga na' zoë' Lë cazë'.

¹¹Lësca' caní Sara, sal-la' chinácanu nigula huödx, guyéajlë'ënu Dios, ate' Lë' bē'ë queënu yöl-la' huáca buzóanu-bi' bí'ido'. Buzóanu-bi' bí'i bönni'do' sal-la' chigudödi izi queënu, tu' guyéajlë'ënu Dios gunë' ca rnna xtídzë'ë na' guzxi' lu në'ë queënu. ¹²Que lë ni na', sal-la' chibigúladedë'ë Abraham, gula'cuá'abi' zióntëro'bi' xzí'ini xí'söë'. Gula'cuá'abi' tsca rō'öba' bölay lúxhiba, en tsca rō'ö yuzxi tu ra' nisa zxon, cunttu nu gaca ulaba légacabi'.

¹³Yúgu'të bönni' ni gulátië', en biti' gula'zi'ë lë na' guzxi' lu në'ë Dios unödzejë' quégaquië', pero gula'yéajlë'ë Dios, ate' zí'tu' zí'tu'sö bila'lé'enë' lë na' ral-la' ila'zi'ë. Gula'yéajlë'ë Dios, en gulunë' ba nalí que lë ni. Caní guca, bulu'lu'ë nácagaquië' ca bönni' zí'tu', en bönni' ta'dazë' yödzülió ni. ¹⁴Yugu' bönni' tu'ë caní didza', tu'lu'ë ta'guiljë' tu lataj le gaca ládzagaquië'. ¹⁵La-tu' gula'zá' láchxi'gaquië' caní que luyú ga ni' bila'rúajë', le nácatë ulu'dzölinë' naxxi huóajgaquië' ni', ¹⁶pero gula'zá' láchxi'gaquië' que luyú na' nácarö dx-i'a, le rō' yehua' yubá. Que lë ni na' biti' rutuí'inë' Dios cate' ta'nné' náquië' Dios quégaquië', tu' chinupé'ë tu yödzo quégaquië'.

¹⁷Tu' guyéajlë'ë Abraham Dios, cate' guzxi' bē'ë Dios lë', budödë'-bi' bí'i Isaac queë' lahuë' Dios ca na' tu'dödë'-ba' yugu' böa' bédxi tútigaquië'-ba' lahuë' Dios. Guzöë' sina' Abraham gútië'-bi' bí'i bönni' zí'alö queë' na' lahuë' Dios sal-la' nácabi' bí'i na' guzxi' lu në'ë

Dios unödzjé' queé'. ¹⁸ Caní bené' sal-la' gudxé' Dios lé', gunné': "Lu ná'abi' bi'i Isaac quiu' ichísagaca'-bi' xzí'ini xi'sú'." ¹⁹ Caní bené' Abraham, tu' gúquibe'ené' napé' Dios yöl-la' huáca usubané'-bi' lu yöl-la' guti, ate' ca tu lugá'a luséqui', huáca innaru' buzi'é-bi' lu yöl-la' guti sal-la' biti' guti cázabi'.

²⁰ Tu' guyéajl'é Isaac Dios, gunábiné' Dios gun lá'ayé'-bi' bi'i Jacob, enca' bi'i Esaú ca zeaj naca le ulu'zí'ibi' xibé dza si' za'. ²¹ Tu' guyéajl'é Jacob Dios, cate' ni' chizóa gátie' gunábiné' Dios gun lá'ayé'-bi' tu tubi' xzí'iné' José, ate' guyéaj ládxe'é Dios, ni' nayéchué' lu xiyaga queé'. ²² Tu' guyéajl'é José Dios, cate' ni' chizóa gátie', bé'é didza' que dza na' ila'rúajé' xzí'ini xi'sóé' Israel luyú Egipto, ate' gunná bé'é ca ral-la' ilu'é dxita queé' luyú ga na' tsöjcu'é.

²³ Tu' gula'yéajl'é Dios, cate' gúljabí' bí'ido' Moisés, xuz xiná'abi' bulu'cáché'é-bi' idú ca tsonna beo', tu' bila'lé'ené' nácabi' bi'i bönni'do' na' lachi, en biti' guládxiné' bönni' rinná bé'ené' bönachi Egipto, bönni' na' gunná bé'é ilútié'-bi' yugu' bi'i bönni'do' na'. ²⁴ Tu' guyéajl'é'bi' Moisés Dios, cate' guzxönbí', bíti'rö bé'é'bi' lataj nu uzóa lébi' bi'i bönni' queénu nigula xzí'iné' Faraón, bönni' na' rinná bé'ené' bönachi Egipto. ²⁵ Caní benbi' tu' gúquibi' nácarö dxi'a nu usaca' zi' lébi' tsözxón len bönachi queé' Dios ca uzí'ibi' xibé tu ch'isö yugu' le tu'zí' xibé nupa tun dul-la'. ²⁶ Gúquibi' nácarö lesaca' nu ulidza ditaj lébi', ca na' gaca ca' queé' Cristo, ca idéli'bi' yugu' yöl-la' tsahui' quégaca bönachi Egipto, tu' guzá ládxi'bi' ca naca le ubi'é Dios queé'bi'. ²⁷ Gudödi ni', tu' guyéajl'é Moisés Dios, birúajé' luyú Egipto, en biti' gúdxiné' yöl-la' rilé queé' bönni' rinná bé'ené' bönachi Egipto, ate' bíá' guléné' ca run nu rilé'e Dios, Nu na' biti' gaca ilé'eru'.

²⁸ Tu' guyéajl'é Moisés Dios, bené' Laní Pascua ca gunná bé'ené' Dios lé', en buchéajé' rön ra' yu'u lídxigaquié', para cabí guti xzí'inigaquié' nu na' ralla' usuniti yugu' bi'i bönni' zí'alö quégaca bönachi Egipto. ²⁹ Tu' gula'yéajl'é yugu' bönni' Israel Dios, gula'dödé' luyú bidxi gatsaj láhui'lö nísado' nazí' le Nisa Xiná. Cate' gulé'ënné' ila'dödé' ca' bönni' Egipto ni', gula'yépiné' nisa, en gulátigaquié' lu Nisa Xiná na'.

³⁰ Tu' gula'yéajl'é bönni' Israel Dios, cate' budxi gula'dödé' idú gásibi'lö yödzö Jericó yugu' dza idú gadxi dza, bila'guínnaj yugu' zö'ö gulún chi'i yödzö na'. ³¹ Tu' guyéajl'é'nu Rahab Dios, nigula ru'ínu lataj bönachi, biti' gútinu tsözxón len bönachi Jericó na' biti' gulún ca rnna xtídzé' Dios, tu' bennu bal bönni' Israel na' buduyúlangaquié' le rácalen bönachi Jericó.

³² ¿Bízxirö ral-la' innía'? Riyadzaj lataj uzúaja' ca guluné' Gedeón, en Barac, en Sansón, en Jefté, en David, en Samuel, enca' yugu' bönni' gulu'é didza' uláz queé' Dios.

³³ Tu' gula'yéajl'é Dios, bulu'zötjé' zían yödzö zxön.

Guluné' le naca tsahui', ate' gula'déli'né' le guzxí' lu n'é'e Dios unödzjé' quégaquié'.

Bulu'sayjé' ruá'agacaba' bédxi guixi'.

³⁴ Bulu'lé' yugu' lu guí' zxön.

Bila'rúajé' lu ná'agaca nupa gulé'ëni iluti légaquié' len guí'e tuchi'.

Dios buné' légaquié' tsutsu cate' ni' gula'cuídi'né'.

Bulu'huóáquié' ca' tsutsu lu gudil-la.

Bulu'láguié' bönni' guizxi yu rójáquié' gudil-la quégaquié' bönni' zítu'.

³⁵ Yugu' nigula dza ni' bulu'zí'ínu bi'i queé'gacanu nubángacabi' lu yöl-la' guti.

Ia'bal-lé' bönni' ni' gulátie' lu ná'agaquié' bönni' ni' bulu'saca' zí'é légaquié', en tu' cabí gulé'ënné'

ulu'cá'ané' Dios, biti' gula'zi'ë lataj nu usán légaquié'. Caní guluné' para ila'déli'né' yöl-la' rubán lu yöl-la' guti, lë na' guléquiné' nazáca'rö. ³⁶ Ia'bal-lé' biá' guléngaquié' yöl-la' rutitaj, en xíguia' que gubá'ayi, ate' gula'dzuné' lidxi gufé, nága'gaquié' du gufé. ³⁷ Bulu'ladxi' bönachi bal-lé' guió'j, en gula'chözé' ia'bal-lé'. Gula'zi' bë'ë légaquié', en gulútigaca ziángaquié' len gufé tuchi'. Gula'dödé' ná'alö n'ílö, nácuagaquié' guídi zxágacaba' bö'cu' zxila', en chivo. Guláquié' yechi', en gula'gu'í gula'záquë'ë, ate' bulu'dxia' bönachi légaquié' dö'. ³⁸ Caní guláquié' bönni' na', ate' biti' gulaca bönachi yödzülió ni lesaca' ulu'zi' xibégaquié'. Gula'dasé' lu lataj cá'asö, en yugu' lu gu'á, ate' gula'cu'á'sé' yugu' zxan bulóaj, en yugu' yeru luyú. ³⁹ Yúgu'té' bulu'rúajé' tsahui' lahué' Dios tu' gula'yéajlë' Lë', sal-la' biti' gula'zi'ë luyú ni le guzxi' lu në'ë Dios unödzejé' quégaquié'. ⁴⁰ Caní guca, tu' nupé'ë Dios ni'a queéru' tu le nácarö dxi'a para cate' úné' légaquié' idú dxi'a, rë'u ni gunru' légaquié' tsözxón.

Ral-la' uyuru'-në' Cristo

12 Que lë ni na', lësca' rë'u, tu' nacua' idú gásibi'ilö ga ni zóaru' ziánterö nupa tun ba nalí ca ta'yéajlë' Dios, ral-la' ucá'anaru' yúgu'të le ruá' dö' le naca ca tu le naca zi'i nuá'aru', enca' yúgu'të dul-la' nazóngaca rë'u, ate' lu yöl-la' riböza zxon ladxi' queéru', ral-la' gunru' xichiné' Dios, le naca tsca xíti'ru' lu huitaj le zoa loru'. ² Ral-la' uyuru'-në' Jesús, Nu na' run ga gaca tséajlë'ëru' Dios, en Nu run ga raca idú yöl-la' réajlë' queéru' Lë'. Jesús gud'í guzxaqué'ë lë'e yaga cruz, en biá' guléné' yöl-la' rutufi que, tu' gú'unnë' idéli'né' yöl-la' rudzeja na' uzi'ë xibé, ate' yöjchö'ë cuita lë'ë ibëla Dios, ga ni' rö'ë rinná bë'ë.

³ Buli'yúé' Jesús, ca na' gud'í guzxaqué'ë le bulu'saca' zi'ë bönni'

dul-la' Lë', para cabí icuídli'li, en para cabí gaca chopa ládxi'li'. ⁴ Ga ridxintë na'a dza, biti' bi biá' gulenli' ga idxintë nu gun libí'ili' hué' tu' ridá'baga'li' le naca dul-la'. ⁵ Nadxi ca' chizá' ral-la ládxi'li' lë na' ruzéajni'iné' Dios libí'ili'. Nácali' ca yugu' zxf'ini cazé', ca na' nazúaj lu guichi le rnnë':

Zxf'ina', biti' uzú' tsölá'alö le guné' Xanru',

cate' usëdi uzéajni'iné' li',
en biti' huóaj ládxu'u cate' unfiné' li'.

⁶ Xanru' runfiné' nu nadxf'iné',
en rusëdi ruzéajni'iné' yúgu'të nupa ta'zi'
lu në'e ilaca zxf'ini cazé'.

⁷ Ral-la' guá' ilenli' le unfiné' Dios libí'ili', tu' runé' Dios caní queéli' tsca nácali' zxf'ini cazé'. Biti' ca' zóabi' tubi' bf'ido' biti' unfiné'-bi' xúzibi'. ⁸ Na'a, channö cabí runfiné' Dios libí'ili' ca na' runé' quégaca yúgu'të zxf'ini cazé', n'irö nácali' ca yugu' bi'i lan, en biti' nácali' idú zxf'iné' Dios. ⁹ Ia'stú, cate' ni' nácaru' bf'ido', gula'cu'ë xuz xiná'aru' luyú ni, bulu'nfiné' rë'u, pero runru' légaquié' bal. Ca' naca, ral-la' gúnroru' ca rnna xtídzë'ë Xúziru' zoé' yehua' yubá para sóaru' ibanru' tsaz. ¹⁰ Yugu' xuz xiná'aru', tu' ch'isö bulu'nfiné' rë'u tsca le guléquisiné' naca dxi'a, pero cate' runfiné' Dios rë'u, naca para gaca tu le uz'iru' xibé, para gácaru' idú lá'ayi ca naca cazé' Lë'. ¹¹ Le nácatë biti' nalá lahui na'a le uz'iru' xibé que le runfiné' rë'u, pero run ga ruhu'íniru'. Channö güf'iru' lataj usëdi rë'u le runfiné' rë'u, gun ga cózaru' dx'ado', en ga gácaru' tsahui'.

Soa bönadxi queéru' channö cabí uzé' nágaru' chi'ë Dios

¹² Que lë ni na' buli'ún tsutsu ná'ali' le röjxéqui'guequi, enca' zxf'ibili' le ta'zxizi, en idipa ládxi'li' para gunli' le naca dxi'a.

¹³ Guli'sóa nöza tsahui', para cabí gun-

li' ga ucá'ana nu ricuidi' ladxi' nōza na', pero guli'gún ga huóaca ladxi' nu na'.

¹⁴Guli'güi' lādxi'li' cózalenli' dxi'a yúgu'tè bōnachi, en gácali' tsahui' lahuë' Dios, tu' channō cabí gunli' caní, bití' gaca ilé'eli'-nē' Xanru'. ¹⁵Guli'gún chi'i cuinli' para cabí soa nu ucá'ana le ruzá' lādxi'ë Dios queéru', en para cabí soa nu gaca ca tu guixi' silá', para cabí ut-sá' libí'ili', en cabí gun ga cabí gácali' tsahui' zianli' libí'ili'. ¹⁶Guli'gún chi'i cuinli' para cabí gun nu dzaga libí'ili' le ruá' dö', o le cabí naca tsahui', ca na' benē' Esaú, zxf'inē' Isáac. Esaú na' bēti'ë le ral-la' gata' lu nē'ë tu' náquiē' bi'i bōnni' huaca queē' xuzē' para guzx-i'ë tu le do' gudahuē'. ¹⁷Chinóz quézili' ca na' guca queē' Esaú gudödi ni' cate' gú'unnē' idéli'nē' le inabē' xuzē' lahuē' Dios para gaca le tsahui' queē'. Buéchi' lādxi'ë xuzē' lē', pero bití' guta' lataj ubí'i lādxi'ë Esaú na' sal-la' gudilaj lādxi'ë le len yöl-la' ribödxi queē'.

¹⁸Ca raca queéli' bití' naca ca guca quegaquiē' bōnni' Israel. Légaquiē' gula'biguē'ë gala' ga zoa tu gu'á le gaca nu can, ate' guyegui gu'á ni', en bōaca chul-la lahui' dza tu' guró'ö böaj gasaj, en guycjada' bö'. ¹⁹Bila'yōnnē' ta'bödxi lúzuba' böa', enca' chí'ë Dios Nu bē' didza'. Cate' bila'yōnnē' lē ni, guláta'yuē' lahuē' Moisés para cabirō güi'ilenē' Dios légaquiē' didza'. ²⁰Caní gulunē' tu' cabí guca guá iléngaquiē' lē na' gunná bē'enē' Dios légaquiē', gunné': "Channō tsöjlfiba' tuba' böa' guíxi'do'os gu'á ni, ral-la' ulu'lādxi'ë-ba' guió'j, o ulu'dödē'-ba' yaga tuchi'." ²¹Lē na' bila'lé'enē' ben gádxida' légaquiē', ate' Moisés gunné': "Radxi ridzóbida', en rizzízida'a."

²²Na'a, libí'ili' ral-la' gádxitē'öli' tu' ribíga'li' gala' tu lu gu'á nazí'i le Sión, en ga zoa yödzö queē' Dios ban, le nazí'i le Jerusalén que yehua' yubá, ga na' nacu'ë gubáz lá'ayi guizxi yu queē' Dios. ²³Ribí-ga'li' gala' ga ni' nudúbigaca zxf'ini cazē'

Dios lahuē' Lē', nupa na' nazúajgaca láguequi lu guichi ni' yehua' yubá, enca' ga zoē' Dios Nu ruchi'a rusöröe' yúgu'tè bōnachi, en ga na' nacuá' yugu' bö' gu-laca cazē' yugu' bōnni' tsahui', tu' bunē' Dios légaquiē' tsahui'. ²⁴Ribíga'li' ca' ga zoē' Jesús, Nu ben tsutsu didza' cubi na' rucá'ana tsahui', enca' ga nagu'ë Jesús rōn queē' le run ga runiti lahuē' Dios rē'u, rōn na' run le nácáro dxi'a ca le ben xichōnē' Abel, lē na' ben ga guchúguiē' Dios queébi' bi'i bōché'ë.

²⁵Que lē ni na', guli'gún chi'i cuinli' para cabí tá'baga'li' Nu na' ru'í didza'. Bití' ca' bulu'lá nupa ni' gula'dá'baga' nu na' bulidza légaquiē' luyú ni. Nácaterō löza bití' ca' uláru' rē'u channō tá'ba-ga'ru' Nu na' rulidza rē'u, zoē' yehua' yubá. ²⁶Dza ni' guzxizi luyú ni tu' biyón chí'ë Dios, pero na'a chiguzxi' lu nē'ë, gunné': "Ia'tú luzuísö, en calégasö luyú uxízia', pero lúzxiba ca' uxízia'." ²⁷Cate' ni' rnnē': "Ia'tú luzuísö", lē ni rulu'í rē'u ral-la' udúa yugu' le gaca ila'zxi'zi, lē na' rö'ö yödzölió ni, ate' ulu'gá'ana le cabí gaca ila'zxi'zi, lē na' rö' yehua' yubá. ²⁸Que lē ni na', tu' ral-la' idéli'ru' tu lataj ga inná bē'ëru', le cabí izxizi, ral-la' guiéru'-nē' Dios: "Xclenu'", ate' lu yöl-la' ba'a ladxi', en lu yöl-la' radxi Lē' tseaj lādxi'ru' Lē' ca na' raza lādxi'ë Lē', ²⁹tu' náquiē' Dios queéru' ca tu gu' le rusuniti le cabí naca idú tsahui'.

Le ral-la' gunru' le raza lādxi'ë Dios

13 Ral-la' idxf'itica'sili' luzá'ali' tuli' ia'tuli'. ²Guli'tsōjné ral-la' uzóali' lídxili' nu idxín ga zóali'. Cate' gulún caní bal-la bōnachi, bulu'cuá' lídxiguequi gubáz lá'ayi que yehua' yubá queē' Dios, sal-la' bití' guléquibe'e nácagaquiē' gubáz lá'ayi.

³Guli'tsōjné nupa nadzúngaca lidxi guíë tsca nunli' légaquiē' tsözxón, nadzunli' ca' lidxi guíë. Guli'güi' lādxi'li' yugu' bōnni' ta'bía lādxi'gaca bōnachi

légaquië, tsca libí'ili' riguí'i rizáca'lenli' légaquië tsözxón.

⁴Ral-la' gunli' bal yöl-la' nutsaga na', ate' tu tuë' bönni' ral-la' sóalenë-nu nigula queë' lu yöl-la' ba'a ladxi' queë', tu' ichúguië' Dios quégaca nupa tun le ruá' dö', en nupa ta'guítsaj xibá que yöl-la' nutsaga na'.

⁵Biti' bi uhuí'di'li', pero guli'tsaza ládx-i'li' tsca le dë queéli' na'a, tu' chigunnë' Dios: "Catu caz ucá'ana' li', en bití' ca' ubéaj ládxa'a li'." ⁶Caní naca, huáca in-naru' idú ládxi'ru' lë na' rnna: Xanru' náquië' Nu rácalen neda'.

Biti' ca' gádxida' bi gun bönachi quia'.

⁷Guli'tsöjné yugu' bönni' tu'yúë' libí'ili', nupa na' tu'sédinë' libí'ili' xtídzë'ë Dios. Buli'yú ca nadéli'gaquië', en guli'gún ca tunë' lu yöl-la' réajlë' quégaquië' Dios.

⁸Lébisö ca náquië' Jesucristo, néaje, en na'a, en cá'tica'sö. ⁹Biti' güf'ili' lataj yugu' xibá izá'a, en xibá nadzá' iché'-gaca libí'ili' nöza yúbölö. Naca dxi'a gunli' tsutsu icja ládxi'do'oli' ca naca le ruzá' ládxe'ë Dios queéli', en calëga ca nácagaca xibá que le rë'aj ráguru', lë na' bití' ulu'z'í' xibé nupa tu'í' ládxi'gaca léguequi.

¹⁰Zoa queëru' tu bucugu lá'ayi, le cabí ulu'z'í' xibé nupa tun dxin que didza' rucá'ana tsahui' na' bilá' z'í'alö. ¹¹Bixúz lo que yu'u lá'ayi na' gulu'ë xichóngacaba' böa' bédxi lu lataj idú lá'ayi tu' nözi dul-la', pero bulu'zéguië bëla' cá'asö quégacaba' ga naca ní'lö ra' yödzö. ¹²Lës-ca' caní gudí'i guzquéë'ë Jesús ní'lö ra' yödzö para bunë' bönachi dxi'a len rön queë' cazë'. ¹³Tsöjtá'aru'-në' Jesús, sal-la' ila'béaj bönachi rë'u lu yödzö, en s'í'ru' tsözxón len Lë' lë na' bulu'lidza ditaj bönachi Lë'. ¹⁴Biti' zoa tu yödzö queëru' yödzölió ni le soa tsaz, pero riguí'jaru' lë na' si' za'. ¹⁵Que lë ni na', ral-la' cú'utica'siru'-në' Dios yöl-la' ba, ugunru' dxin Lë' Jesucristo. Yöl-la' ba na' naca ca

tu le rigú'uru' lahuë' Dios. Len ruá'a cuinru' guiëru'-në' Dios: "Xclenu'" ni'a que le náquië' Lë'. ¹⁶Biti' gal-la ládxi'li' gunli' le naca dxi'a, en gácalenli' luzá'ali' tulí' ia'tulí', tu' naca lë ni ca tu le rigú'uru' lahuë' Dios le raza ládxe'ë Lë'.

¹⁷Guli'gún ca rnna xtídza'gaquië' bóchi'ru' tu'yúë' libí'ili', en guli'güí' lataj ila'nná bé'enë' libí'ili', tu' tapa chi'ë bö naca cázali', ca tunë' yugu' bönni' ral-la' ila'guíxj'ë lahuë' Dios le núngaquië'. Guli'gún caní para ilunë' dxin na' lu yöl-la' rudzeja quégaquië', en calëga lu yöl-la' risëbi ladxi' quégaquië', tu' cabí uz'í'ili' xibé dxin na' ilunë' lu yöl-la' risëbi ladxi' quégaquië'.

¹⁸Buli'lidzë' Dios, inábili'-në' gácalenë' netu', tu' runtu' löza soa dxi icja ládxi'do'otu', para cabí uxösa netu', ate' ruf'i ládxi'tu' gúntica'situ' le naca dxi'a. ¹⁹Le nácarö lo, ráta'yua' loli' inábili'-në' Dios ugu'ë neda' tu nöza para udxina' ga zóali' bayöntë.

Dios uzá' ládxe'ë queëru' le gácalen rë'u

²⁰Na'a, rinábitu'-në' Dios, Nu run le rucá'ana rë'u tsahui', en Nu busubán Xanru' Jesucristo lu yöl-la' guti, Nu na' naca Bönni' Lo Uyú Bö'cu' Zxila', tu' bulaljë' rön queë' le run tsutsu didza' rucá'ana tsahui', le zoa tsaz, ²¹rinábitu'-në' gunë' ga gácali' idú tsahui', para gaca gunli' yúgu'të dxin dxi'a, en gunli' ca ré'enë' Lë', ate' gunë' queéli' le raza ládxe'ë Lë', tu' néquili' queë' Jesucristo. ¡Queë' Cristo gácatica'sö yöl-la' ba! ¡Ca' gaca!

²²Ráta'yua' loli', böchi' luzá'ado', güf'i ládxi'li' didza' ni ruzéajni'i libí'ili', tu' naca láti'do'os lë ni ruzájaja' queéli'. ²³Ral-la' inözili' chiburájabi' bi'i Timoteo, bi'i bóchi'ru'do', lidxi guíë, ate' channö idxíntëbi' ga zoa' ni, gunbi' neda' tsözxón uduyútu' libí'ili'.

²⁴ Bulí'gapa Dios bóchi'ru' tu'yúë libí'ili', enca' yúgu'të bönachi rö queë' Dios. Tu'gapa Dios libí'ili' bönachi ta'yéajlë' Cristo nacué' luyú Italia.

²⁵ ¡Dios uzá' ládxë'ë queéli' yúgu'téli'!
¡Ca' gaca!

LE BUZÚAJĚ LU GUICH SANTIAGO

Santiago rugapĕ Dios bönni' judío ta'dé'ë Cristo

1 Neda', Jacobo, naca' huen dxin queĕ'
Dios, enca' queĕ' Xanru' Jesucristo.
Rugapa' Dios lib'ili', nácali' idxinnu cō'
dī'a dza quegaca bōnachi Israel, nási-
lasili' idú yōdzōlió ni.

Yōl-la' réajni'i le runnĕ' Dios queĕru'

²Bōchi' luzá'ado', cate' gaca bi gaca
queĕli' le si' bĕ' lib'ili', ral-la' udzĕjali'
idú lādxi'li' ³tu' nōz quezili', cate' bi raca
queĕli' le rizi' bĕ' lib'ili' ca réajlĕ'ĕli'
Cristo, lĕ ni rusedi lib'ili' cōzali' zxōn
ladxi'. ⁴Guli'giū' lādxi'li' gaca idú yōl-la'
zxōn ladxi' queĕli', para údxi gácali' bōn-
ni' ta'yéajni'inĕ', en biti' bi yadzaj queĕli'
ca nácacaca lĕ ni.

⁵Channō zoa ladaj lib'ili' nu biti' réa-
jni'ini, nu na' ral-la' inabi-nĕ' Dios, ate'
Dios caz gunnĕ' yōl-la' réajni'i que, tu'
runōdzjĕ' yōdxi yana' quegaca yúgu'tĕ
bōnachi, en biti' ca' réqui quezinĕ' gun-
nĕ' queĕru'. ⁶Na'a, nu bi rinabi-nĕ' Dios,
run bayudxi tséajlĕ' Lĕ', en cabí gaca
chopa ladxi'. Nu raca chopa ladxi', raca
que ca raca que bidxina' que nísado'
cate' rutá bō' le, ruzĕaj bō' le nilō ná'alō.
⁷Nu naca caní biti' ral-la' gun lōza
si' bi unōdzjĕ' Xanru'. ⁸Bōnni' na' reaj
bō' lādxi'da'ahuĕ' biti' ridzōlinĕ' nácalō
gunĕ'.

⁹Channō zoĕ' tu bōnni' bōchi'ru' réa-
jlĕ'ĕ Cristo, en náquiĕ' cá'asō yōdzōlió ni,
ral-la' udzĕjanĕ' tu' chinadéli'nĕ' tu lataj
lo lahuĕ' Dios. ¹⁰Bōnni' bōchi'ru' na'
rilĕ'enĕ' yōl-la' tsahui' queĕ' ral-la' udzĕ-
janĕ' cate' runĕ' Dios ga bítirō ruzxōni'
lādxi'ĕ lĕ na' dĕ queĕ'. Nu ruzxōni' ladxi'

yōl-la' tsahui' que, gaca que nu na' ca
raca que xiyija guíxi'do', la' ridóditĕ que.
¹¹Caní naca, tu' gaca que nu na' ca raca
que xiyija guíxi'do' na' cate' rilĕn gu-
bidza, en rudzá'ada', la' ribídxitĕ guixi'
na', en riguinnaj xiyija, en riniti yōl-
la' lachi que. Lĕsca' caní gaca queĕ'
bōnni' rilĕ'enĕ' yōl-la' tsahui' queĕ', in-
ftiĕ' tsanni ni runĕ' dxin riguiljĕ' yōl-la'
tsahui' na'.

Le ta'zī' bĕ' rĕ'u

¹²Bica' ba bōnni' bōchi'ru' na' ruá'
rilenĕ' le rizi' bĕ' lĕ'. Cate' chiburúajĕ'
tsahui', idéli'nĕ' yōl-la' na'bán idú, ca na'
rideli' nu nutsa' lu huitaj, nu rideli' tu
bregui' zin. Bōnni' bōchi'ru' na' náquiĕ'
bica' ba tu' idéli'nĕ' yōl-la' na'bán idú
na' guzx' lu nĕ'ĕ Dios unōdzjĕ' quegaca
nupa nadxf'iguequi Lĕ'. ¹³Cate' bi raca
queĕru' le run ga guĕ'ĕniru' gunru' le ruá'
dō', biti' ral-la' innaru': "Dios rizi' bĕ'ĕ
rĕ'u len le naca xihui'." Dios biti' rizi' bĕ'ĕ
nu bōnni' len le cabí naca dxi'a. ¹⁴Na'a,
channō nu bi raca que le rizi' bĕ' le len le
cabí naca dxi'a, naca tu' rizĕ' ladxi' le ruá'
dō', ate' lĕ ni ben ga gú'uni gun le ruá'
dō'. ¹⁵Lĕ na' rizĕ' lādxi'ru' le ruá' dō' run
ga gunru' dul-la', en cate' chibudxi ben-
ru' dul-la' na', la' dul-la' ná'asō rusubaga'
rĕ'u xíguia' gátiru'.

¹⁶Bōchi' luzá'ado', biti' si' ye'e la' cuín-
sili'. ¹⁷Yúgu'tĕ le naca dxi'a, en yúgu'tĕ
le naca idú le ruzí'iru' xibé, zá'gaca saca'
xitsá'alō, en ta'ruáj ga zoĕ' Xúziru' Dios,
Nu ben yugu' le ta'yĕpi yōsa lúzxiba,
yugu' le tu'tsá' cuínguequi, pero Lĕ' biti'
rutsá' cuinĕ', en biti' rutsĕ'ĕ ca runĕ', rún-
natica'sĕ' queĕru' le naca tsahui'. ¹⁸Ca
ré'ĕni quezinĕ' Dios, benĕ' ga nácaru' bō-
nachi cubi queĕ'. Bugunĕ' dxin didza'
queĕ' le naca idútĕ li, para gácaru' ca tu
gulapa z'á'alo queĕ' ladaj yúgu'tĕ nupa na'
guró cazĕ' Dios.

**Le reaj láchxi'ru'-në'
Dios le naca li láchxi'**

¹⁹Que lë ni na' rea' libí'ili', böchi' luzá'ado', yúgu'téli' ral-la' sóali' sina' yónili', pero biti' ral-la' innétézili', en biti' ilétézili'. ²⁰Nu na' riletéz biti' run le naca tsahui' lahué' Dios. ²¹Que lë ni na', guli' cá'ana yúgu'të le ruá' dö', en yúgu'të le zían le cabí naca tsahui', ate' lu yöl-la' nöxaj láchxi' guli'sí' lu ná'ali' didza' na' chinayaza icja láchxi'do'oli', tu' huáca gun didza' ni ga uláli'.

²²Na'a, guli'gún ca rnna didza' ni, en cabí yónisili', tu' channö yónisili' didza' ni, si' yé'eli' la' cuínsili'. ²³Nu riyónisö didza' ni, en biti' run ca rnna, nu ni naca ca tu bönni' ruyúé' lahué' tu lu guié dx-ili, ²⁴tu' ruyú cuiné', en söhuóje', ate' la' ral-latë láchxë'ë ca riné'ë. ²⁵Na'a, nu bönni' biti' ral-la láchxë'ë le riyönné', pero ru'i láchxë'ë xibá queé' Dios le naca idú li, en le gaca gun ga uláru', ate' ugá'ané' tsutsu, en gúntica'sé' ca rinná bē' xibá na', gaquie' bica' ba ca naca yúgu'të le runé'.

²⁶Channö nu bönni' ladaj libí'ili' réquiné' naca dxí'a ca reaj láchxë'ë Dios, pero biti' rapa chí'ë lúdxë'ë para cabí innésé' ca', bönni' ni rizí' yé'ené' la' cuinsé', ate' biti' raza láchxë'ë Dios ca reaj láchxë'ë bönni' na' Lë'. ²⁷Le reaj láchxi'ru'-në' Dios, le naca idú, en le naca dxí'a, naca gácalenru' yugu' bí'i uzé'bido', enca' yugu' nigula nagá'ananu túzinu, cate' ta'gufí' ta'zaca' nupa na', en cabí gútsa'ru' le cabí naca tsahui' le raca yödözlió ni.

Tuz ca ral-la' gunru' bönachi bal

2Böchi' luzá'ado', channö réajlë'ëli' Xanru' Jesucristo, Nu nácatërö lo, biti' ral-la' utsá'ali' ca gunli' bal tu tu bönachi. ²Channö tsázié' tu bönni' ga na' nudúbili', en nagu'ë xibón në'ë le néquini oro, en nácué' lari' nazáca'da', ate' tsázié'

ca' tu bönni' yéchi'do', nácué' lari' cá'asö, ³channö gunli' bal bönni' na' nácué' lari' nazáca'da', en guiéli'-në': "Guró'ölen rë'u ga ni naca dxí'a", pero guiéli' bönni' yéchi'do' na': "Ná'asö guzuí", o guiéli'-në': "Guró'i lu yu ni." ⁴Channö caní runli', rutsá'ali' ca runli' bal tu tu luzá'ali', en run cuinli' ca nu ruchi'a rusörö luzé'e, biti' naca dxí'a ca rizá' láchxi'li'.

⁵Böchi' luzá'ado', buli'zé' nágali' lë ni. Dios guró cazé' yugu' bönni', sal-la' téquiquequi bönachi yödözlió ni náca-gaquié' cá'asö, para ila'déli'në' yöl-la' tsahui' lahué' Lë' tu' ta'yéajlë'ë Cristo, en gata' quégaquié' lataj ga ni' rinná bē'ë Lë'. Gata' quégaquié' lë na' guzxf' lu në'ë Dios unödzejé' quégaca nupa ta'dxfi' Lë'. ⁶Libí'ili' rucá'anali' cá'asö bönachi yechi' ca', en runli' bal yugu' bönni' dë yöl-la' tsahui' quégaquié', ate' bönni' na' dë yöl-la' tsahui' quégaquié' tu'saca' zi'ë libí'ili', tu' tu'guné' libí'ili' dxin. Lësca' tu'dödë' libí'ili' lu ná'agaquié' bönni' yúlahuí'. ⁷Yugu' bönni' na' dë yöl-la' tsahui' quégaquié' ta'nné' zi'ë ca' que Lë' Jesucristo le nazáca'tërö, en ca naca Lë' nazí'i lali': "Nupa Dágaca Cristo."

⁸Runli' dxí'a channö runli' idú ca rinná bē' xibá lo, le nazúaj lu guichi, en rnna caní: "Ral-la' idxí'inu' luzó'o ca nadxí'i cuinu'." ⁹Na'a, channö rutsá'ali' ca runli' bal tu tu bönachi, runli' dul-la', en nabága'li' xíguia' lu xibá queé' Dios, tu' riguítsjali' xibá na'. ¹⁰Channö runé' tu bönni' idú ca rinná bē' xibá queé' Dios, pero channö ichíxiné' ca naca tuz le rinná bē' xibá na', chin-abágué'ë xíguia' que idútë le rinná bē' xibá na'. ¹¹Lë' cazé' Dios gunné': "Biti' gunu' dul-la' le riguitsaj xibá que yöl-la' nutsaga na'", en gunné' ca': "Biti' gútiu' bönachi." Na'a, channö cabí runu' dul-la' le riguitsaj xibá que yöl-la' nutsaga na', pero rútiu' bönachi, nabágu'u xíguia' que idútë xibá queé' Dios. ¹²Ca innali', en ca gunli', ral-la' gunli' ca

ral-la' ilún nupa uchi'a usöröë' Dios légaquië' ca rinná bē' xibá na', le run ga uláru'. ¹³ Nupa cabí tu'huechi' ládxi'gaca luzé'eguequi, uchi'a usöröë' Dios léguequi, ate' cuntu nu huéchi' ladxi' léguequi, pero nupa na' tu'huechi' ládxi'gaca luzé'eguequi ulu'rúaj dxi'a cate' uchi'a usöröë' Dios léguequi.

Le ral-la' gunru' tu' réajlë'ëru' Cristo

¹⁴ Böchi' luzá'ado', biti' bi uzi'ë xibé tu bönni' channö innasë: "Réajlë'a Cristo", pero biti' runë' le naca tsahui'. Biti' gaca ulé' bönni' na' channö innasë réajlë'ë Cristo. ¹⁵ Channö nacu'ë böchi' luzá'aru' ta'yéajlë'ë Cristo, en biti' dë le ilácuë', en caléga le ilahuë', ¹⁶ ate' channö tu nu dzaga lib'i'li' guiésö légaquië': "Böaj lídxili' tsáhu'i'do'. Chibölaj budzé'eli'", pero channö cabí unödzej quégaquië' lë na' ta'yádzjanë', biti' ca' gúcalen légaquië'. ¹⁷ Lësca' caní raca que nu bönni' rnasë réajlë'ë Cristo. Channö cabí runë' le naca bē' naca idú ca réajlë'ë Lë', biti' naca lesaca' yöl-la' réajlë' queë'.

¹⁸ Nadxi ca' guié' tu bönni' luzé'ë: "Li' réajlë'ësu' Cristo, ate' neda' runa' le naca tsahui'. Biti' gaca ulu'ínu' neda' réajlë'u Cristo channö cabí zoa le naca tsahui' runu'. Neda' ulu'ída' li' réajlë'a Cristo ni'a que le naca tsahui' runa'." ¹⁹ Li' réajlë'u tuzë' náquië' Dios. Naca dxi'a ca runu'. Lësca' caní ta'yéajlë' yugu' bö' xihui', en ta'zxizi tádxida' Lë'. ²⁰ Li', bönni' biti' bi nózinë'. Ral-la' inözi quézinu' channö zoa nu rnasö réajlë' Cristo, pero biti' run le naca tsahui', biti' naca lesaca' yöl-la' réajlë' Lë' que nu na'. ²¹ Naca bē' burúajë' xúziru' Abraham tsahui' lahuë' Dios ni'a que lë na' benë', cate' ni' gulu'ë-bi' bi'i Isaac queë' lahuë' Dios. Gulu'ë-bi' ca na' tun bönachi ta'gú'u le tu'zegui' lahuë' Dios, sal-la' biti' buzégui'ë-bi'. ²² Na'a gaca inózili' ca guca queë' Abraham. Lë na' benë' guca bē' guyéajlë'ë Dios. Ca' naca, guca bē' naca idú ca

guyéajlë'ë Dios ni'a que lë na' benë'. ²³ Caní guca lë na' nazúaj lu guichi lá'ayi le rnna: "Abraham guyéajlë'ë Dios, ate' Dios bil'é'enë' lë na' benë' ca tu le ben ga böáquië' Abraham tsahui'." Que lë ni na' guzxi'i lë: "Luzé'ë Dios."

²⁴ Na'a, ril'é quezili' naca bē' rurúajë' tu bönni' dxi'a ni'a que le runë', en calégasö tu' réajlë'ë Dios. ²⁵ Lësca' caní guca queënu Rahab, nigula bé'ënu bönachi lataj. Lësca' naca bē' burúajnu dxi'a tu' zoa tu le tsahui' bennu, lë na' bennu cate' ni' bennu bönni' tu'yulan bal, en gúcalennu légaquië' para bulu'guélë'ë yöjhuójgaquië' nöza yúbölö. ²⁶ Ca na' raca que idútë le naca cázaru' channö cabí yu'u bö', chinati, lësca' caní naca que le réajlë'ëru' Cristo channö cabí nalá' yöl-la' run que, biti' naca lesaca'.

Yugu' le rnna lúdxiru'

3 Böchi' luzá'ado', biti' guntëz zían cuinli' bönni' tu'sédinë' bönachi, tu' chinóz quézili' zítërö uchi'a usöröë' Dios rë'u, núlöru' rusédiru' bönachi. ² Yúgu'tëru' runru' zían le richixi riníguiru'. Channö cabí richixi riníguinë' tu bönni' ca naca didza' ru'ë, bönni' ni náquië' idú tsahui', en raca inná be'e cuinë' ca naca yúgu'të le runë'. ³ Cate' rigú'uru' gufé ruá'agacaba' böa' para gunru' ga ilunba' ca ré'ënriru', gaca inná bé'eru' léga'caba' lu idútë le tunba'. ⁴ Buli'yú ca' ca raca quéguequi barco. Sal-la' zxóntërö naca tu barco, en récjada' bö' ruzéaj le, cuídi'do'os naca nē'e xiyágui barco na' le ruzecaj rudxi'i barco para tseaj gáti'tës ga gué'ënnë' bönni' rusé'ë le. ⁵ Lësca' caní naca lúdxiru'. Sal-la' cuídi'do'os naca, zióntërö le rnna lúdxiru' na'. Buli'yútsöca' ca run guí. Sal-la' guí'do'os ribíbiru', tu guí'a sibi huayégui. ⁶ Lësca' lúdxiru' na' naca ca tu guí. Yúgu'të le ruá' dö' raca yödzülió ni rnna lúdxiru', en tu' dzaga lúdxiru'

na' idütë le naca cázaru', que læ ni na' run ga raca xihui' idütë le nácaru'. Le rnna lúdxí'ru' ribequi guí', le ruzegui' rë'u ca naca yúgu'të le runru', ate' tu' rnna caní lúdxí'ru' na', naca que tsca chinaguéla'të guí' le nabequi' tu' xihui'. ⁷Yúgu'tëba' böa' guixi' ta'daba' luyú, en yugu' böa' zoa xfligacaba', en yugu' böa' tá'ayöj lé'ëba' lu yu, enca' yúgu'tëba' böa' dzó'öba' lu nísado', huáca ila'nná be'e bönachi luyú ni léga'caba', ⁸pero cuntun nu bönni' gaca inná bé'enë' lúdxë'ë, tu' rnna lúdxí'ru' le ruá' dö', en biti' gaca nu uzaga' xinözi. Ziántërö le rnna lúdxí'ru' le naca ca tu le naché' yöl-la' guti. ⁹Len la' lúdxí'ru' ná'asö rulidza tsáhui'ru'-në' Dios Xuz, en rulidza dítjaru' ca' yugu' bönni', ate' benë' Dios légaquië' ca naca cazë' Lë'. ¹⁰Caní naca, len la' ruá'asiru' na' rulidza tsáhui'ru' bönachi, en rulidza dítjaru' bönachi. Böchi' luzá'ado', biti' ral-la' gaca caní. ¹¹Biti' ca' ta'lén nisa siziá', en nisa zöna' la' tuzi ga ta'lén. ¹²Böchi' luzá'ado', tu yaga higo biti' gaca cuía le ribía yaga olivo, ate' tu lubá uva biti' gaca cuía le ribía yaga higo na'. Lësca' caní, nitú ga rilén nisa biti' gaca ila'lén nisa zöna', en nisa siziá'.

Yöl-la' réajni'i le naca idú

¹³Channö zoë' tu bönni' ladjali' rá-cadë'ë, en réajni'de'enë', lu yöl-la' nöxaj ladxi' queë' ral-la' ulu'ë náquië' caní ni'a que le naca tsahui' runë'. ¹⁴Na'a, channö ruzxé'eli' luzá'ali', en runli' dxin para ila'gú'u bönachi libí'ili' yöl-la' ba, biti' ral-la' gun ba zxön cuinli' ca naca yöl-la' réajni'i queé'li'. Nu run caní rizí' yë', en ridá'baga' le naca idütë li. ¹⁵Yöl-la' réajni'i caní biti' naca le runödzjë' Dios, pero que yödzülió ni naca, enca' quégaca bönachi yödzülió ni, en que tu' xihui'. ¹⁶Yugu' bönni' tu'zxé'enë' luzá'agaquië', en té'ennë' ila'gú'u bönachi légaquië' yöl-la' ba, lësca' ta'dil-la' dídzë'ë, en tunë'

yúgu'të le ruá' dö'. ¹⁷Yugu' bönni' nápa-gaquië' yöl-la' réajni'i na' runödzjë' Dios: Tunë' le naca idú tsahui', en ta'bözë' dxí'ado'.

Nácagaquië' zxön ladxi', en nöxaj ladxi'. Tu'huechi' lúdxí'gaquië' bönachi, en tunë' le naca dxí'a.

Tuz ca tu'chi'a tu'söröë' luzá'agaquië', en biti' ta'béaj bë'ë luzá'agaquië'.

¹⁸Nupa tufi lúdxí'gaca ila'bequi dxi le raca, ta'böza dxí'ado', para gaca ca' dxí'a idütë le zeaj naca caz.

Nupa tun zxön le nacua' yödzülió

4 ¿Bixz que na' ridí'l-lali', en raca queé'li' tu' rizé' lúdxí'li' zían le rizé' lúdxí'li' tu' tuli', en que læ ni na' ridí'l-lalenli' luzá'ali'. ²Zián le ruhuí'di'li', en tu' cabí rizí'ili' le, que læ ni na' rútili' bönachi. Ruzxé'eli' le dë que luzá'ali', en tu' cabí ridé'li'li' le, que læ ni na' rizó'a ribó'öli', en ridí'l-lali'. Biti' rata' queé'li' le ré'ënili', tu' cabí rinábali'-në' Dios læ na'. ³Sal-la' zoa bi rinábali', biti' bi rizí'ili', tu' cabí naca dxí'a ca rinábali', tu' ré'ënili' læ na' rinábali' para ugunli' le dxin ca raza lúdxí'sili'. ⁴Libí'ili', bönachi nusanli'-në' Dios, ¿naru' cabí nózili' channö runli' zxön le nacua' yödzülió ni, chinuhuóá-cali' ca nu biti' rilé'e Dios dxí'a? Núti'tës nu ré'ëni gun zxön le nacua' yödzülió ni, nuhuóáca ca nu biti' rilé'e Dios dxí'a. ⁵Biti' rnasö ca' le nazúaj lu guichi lá'ayi le rnna: "Dios risól-lë'ë Dios Bö' Lá'ayi queé'ru', Nu zóalen rë'u, ate' Lë' nadxí'inë' rë'u, en rudúli'në' rë'u channö rusanru'-në'." ⁶Na'a, zxöntërö le ruzá' lúdxë'ë Dios queé'ru', tu' nazúaj lu guichi lá'ayi le rnna: "Dios ruzá'guë'ë xinózguequi nupa tun ba zxön cúnguequi, pero ruzá' lúdxë'ë quégaca nupa nácagaca nöxaj ladxi'." ⁷Que læ ni na', guli'sóa nöxaj ladxi' lahuë' Dios. Guli'nná be'e tu' xihui', ate' uzxunnaj ga zóali'. ⁸Guli'güi' lúdxí'li' sóalenli'-në' Dios, ate' Lë' idis-

óalenë' libí'ili'. Libí'ili', bönachi dul-la', guli'gaca tsahui', en bíti'rö gunli' dul-la'. Libí'ili', núlöli' reaj bö' ládxi'do'oli', en chopa le nadxí'ili', guli'gún dxi'a icja ládxi'do'oli'. ⁹Guli'sëbi ládxi'li', en buli'huf'ini, en guli'cödx. Na'a ruzxídx-ili, pero ral-la' códxili'. Rudzëjali', pero ral-la' huf'inili'. ¹⁰Guli'gaca nõxaj ladxi' lahuë' Xanru', ate' Lë' gunë' ga tsëpisëli'.

**Biti' ral-la' ichugu bé'ëru'
le run luzá'aru'**

¹¹Böchi' luzá'ado', biti' innëli' que luzá'ali' tuli' ia'tuli'. Nu bönni' rinnë' que böchi' luzé'ë, en rilaga yudxë' le runë', bönni' ni rinnë' que xibá queë' Dios, en ruchi'a rusöröë' le rinná bé' xibá na'. Na'a, channö ruchi'a rusöröu' le rinná bé' xibá na', run cuinu' nu ruchi'a rusöröë' le, en biti' runu' ca rinná bé' xibá na'. ¹²Na'a, tuzë' náquië' Dios, Nu ben xibá na', en náquië' ca' Nu ruchi'a rusöröë' le runru'. Lë cazë' gaca usölé' bönachi o usunítie' bönachi na'. Na'a, ¿núxité' run cuinu', rilaga yudxu' luzó'o?

**Biti' gaca gunru' löza
le gaca cuxó huidzaj**

¹³Na'a, buli'zë nágali', núlöli' rnnali': "Cuxó huidzaj tséajtu' yödzö ni', ate' sóatu' ni' tu iz, en zián le gá'utu', en úti'tu', ate' caní gáta'da' dumí queëtu'." ¹⁴Biti' nõzili' bizxi gaca cuxó huidzaj. ¿Nacxi caz naca queëru', tsca zóaru' yödzölió ni? Nácaru' ca bóchila le nalá' tu chí'ido'osö, en la' rinítitë'. ¹⁵Que lë ni na', caní ral-la' innali': "Channö gué'ën-në' Xanru', sóaru' ibanru', en tu ia'tú le gunru'." ¹⁶Na'a, libí'ili', lu yöl-la' run ba zxön queé'li' rigú'uli' yöl-la' ba la' cuín-sili'. Yúgu'të le caní le runli' zeaj naca le ruá' dö'. ¹⁷Channö nõziru' le naca dxi'a le ral-la' gunru', en biti' gunru' lë na', runru' dul-la'.

**Santiago rusé'ë ládxi'gaquië' bönni'
dë yöl-la' tsahui' queégaquië'**

5 Libí'ili', bönni' rilé'eli' yöl-la' tsahui', guli'cödx, en guli'cödx'a, tu' si' za' dza ilé'eli' yöl-la' yechi'. ²Chinaca ditaj yöl-la' tsahui' queé'li', ate' chinutó-gacaba' le ráculi' bóljado' que. ³Chinaca que dumí oro, en dumí plata queé'li' ca naca que gufé nazón yöni que, ate' yöni que na' naca ca tu le ruzegui libí'ili' didza', ate' gaca queé'li' ca tu gu' le usuniti libí'ili'. Caní gaca queé'li', tu' busó' butúbili' queézili' yöl-la' tsahui' dza ni zóaru' chiröjsëtë-gaca. ⁴¡Buli'yútsöca! Yugu' bönni' huen dxin gula'lapé' yöla queé'li' chita'naba yúdxinë' lászjagaquië', tu' cabí riguízx-janili' légaquië', ate' lë na' ta'nabë' bönni' huen dxin na' chibidxín didza' na' lahuë' Xanru', ate' Lë' rinná bé'enë' ni'a në'ë guizxi yu. ⁵Benli' ga buné'eli', en güf'i gudágutica'sili' le rmasö queé'li' lu yödzölió ni. Buxón cuinli', pero chizóa idxín dza údxi queé'li'. Gaca queé'li' ca raca queé'ba' bëdxi renni', chibú'u dza gútiru'-ba'. ⁶Richúguli' queégaquië' bönni' tsahui', en rútili' légaquië', ate' légaquië' biti' ta'dá'baguë'ë libí'ili' cate' rútili' légaquië'.

**Cózaru' zxön ladxi',
en ulídzaru'-në' Dios**

⁷Na'a, böchi' luzá'ado', guli'cöza zxön ladxi' ga idxinrö dza huödë' Xanru'. Buli'yú ca runë' tu bönni' guz gú'una. Lu yöl-la' riböza zxön ladxi' ribözë' guiójsiu', en guiójs cusu lin, ate' tödi ni' ulapé', en utubë' yöz zián. ⁸Lësca' caní, libí'ili' na' réajlë'ëli' Cristo, guli'cöza zxön ladxi', en buli'tipa ládxi'li', tu' chizá' gala' dza huödë' Xanru'. ⁹Böchi' luzá'ado', biti' innëli' que luzá'ali' tuli' ia'tuli', para cabí ibága'li' xíguia'. ¡Buli'yútsöca! ¡Chirudzaga lo udxinë' Xanru', ate' uchi'a usöröë' le runli'! ¹⁰Böchi'

luzá'ado', buli'yú ca guca quégaquië' bönni' gulu'ë didza' uláz queë' Xanru'. Nácagaquië' ca tu le rulu'í rë'u ca ralla' qu'í sáca'ru', en cózaru' zxön ladxí'.¹¹ Na'a, nucuá'aru' légaquië' ca yugu' bönni' guláquië' bica' ba, nupa ni' gula'gu'í gula'zaca'. Chibiyónili' ca benë' Job. Gulözë' zxön ladxí' sal-la' gud'í guzácacá'dë'ë, ate' nózili' ca' ca benë' Xanru' queë' ga búdxitë. Ruhuéchi'da' ladxë'ë Xanru' rë'u, en rufi ladxë'ë rë'u.

¹²Böchi' luzá'ado', le nácatërö lo naca lë ni rea' lib'íli': ¡Biti' uzótjali' Nu zoa yehua' yubá, en biti' uzótjali' le nacua' luyú ni, en biti' uzótjali' bítitës bi run tsutsu xtída'li! Cate' innali' "Ön" ral-la' innásili' "Ön." Cate' innali' "Biti'" ral-la' innásili' "Biti'." Caní ral-la' gunli', para cabí ibága'li' xíguia' lahuë' Dios.

¹³Channö riguí' rizáca' nu dzaga lib'íli', ral-la' ulidza Dios nu na'. Channö zoa nu rudzeja, ral-la' gul-la' yöl-la' ba nu na'.¹⁴ Channö re'e nu dzaga lib'íli', ral-la' ulidza bönni' gula tapa chi'ë bö-nachi queë' Cristo, para ulu'lidzë' Dios, en ila'nábinë' Lë' únë' bönni' huë' na'. Ral-la' ila'gu'ë lë' le za, en ulu'gunë' dxin Lë' Xanru'.¹⁵ Cate' ulu'lidzë' Dios, en

ta'yéajlë'ë gunë' Cristo ga huóáquië' bönni' huë' na', ní'rö gunë' Xanru' ga huóasa uzóë', en channö benë' dul-la' bönni' huë' na', Xanru' uniti lahuë' lë'.¹⁶ Que lë ni na', guli'xóalëpi dul-la' nabága'li' tuli' ia'tuli', en guli'naba que luzá'ali' tuli' ia'tuli' lahuë' Dios para únë' lib'íli', para urúaj yödzhüé' na' ré'eli'. Le rulidzë' tu bönni' tsahui' Dios, le runë' idú ladxë'ë, nácada' lesaca'.¹⁷ Elías, bönni' ni' bë'ë didza' uláz queë' Dios, gúquië' tu bönni' yödzhülió ca nácaru' rë'u, pero cate' bulidzë' Dios, en gunábinë' Lë' para cabí galaj guió'j, idú tsonna iz yu' xopa beo' biti' gulaj guió'j luyú ni.¹⁸ Gudödi ni' bulidzë' Dios leyúbölö, ate' böálaj guió'j, ate' bunödzej le gulazë' yugu' bönni' dza ni'.

¹⁹Böchi' luzá'ado', lë ni ral-la' inózili'. Channö nunbë' nu bönni' dzáguië' lib'íli' le naca idütë li, en richixi riníguinë', ate' zoa nu gun ga ub'í ladxë'ë bönni' na' richixi riníguinë',²⁰ nu na' gun ga ub'í ladxë'ë bönni' dul-la' na' gudé' ga yúbölö, usölé' bönni' dul-la' na' lu yöl-la' guti, en gunë' ga uniti lahuë' Dios dul-la' zían nabáguë'ë bönni' na'. ¡Ca' gaca!

DÍDZA'DO' ZÍ'ALÖ BUZÚAJĚ' PEDRO

Pedro rugapë' Dios nupa ta'dá' Cristo

1 Neda', Pedro, naca' gubáz nasól-lë'ë Jesucristo. Ruzúaja' queéli' lu guichi ni, libí'ili' násilasili' zi'tu' gapa dë ládza-li', zóali' luyú Ponto, en luyú Galacia, en luyú Capadocia, en luyú Asia, en luyú Bitinia. ²Guró cazë' Xúziru' Dios libí'ili' ca na' bucözë' dza ni'te, para guéquili' quez queë' lu në'ë Dios Bô' Lá'ayi, en gunli' ca rna xtídzë'ë Cristo, en gácali' idú tsahui' ni'a que xichönë' Cristo. Rinábida'-në' Dios uzá' ládxe'ë queéli', en gunë' ga soa dxi icja ládxi'do'oli'.

Le rúntica'siru' lóza

³Yöl-la' ba Dios, Xuzë' Xanru' Jesucristo! ¡Lu yöl-la' ruhuéchi' ladxi' zxön queë' bucubë' yöl-la' na'bán queéru' tu' busubanë' Jesucristo lu yöl-la' guti! ¡Lë ni run ga rúntica'siru' lóza, ⁴en gun ga idéli'ru' lë na' rapa chi'ë Dios queéru' yehua' yubá! Lë na' rapa chi'ë Dios, le unödzejë' quegaca bönachi queë', biti' initi, en biti' itëbi, en biti' igula. ⁵Tu' réajlë'ëli' Lë', lu yöl-la' huáca zxön queë', Dios gun chi'ë libí'ili' cate' idxinrö dza ni' uz'ili' xibé yöl-la' rusólá idú na' chinupë'ë queéru', en ulu'ë lahui dza údxi.

⁶Que lë ni na' rudzëjade'eli', sal-la' na'a ral-la' quí'i sáca'li' tu chí'ido' tu' taca zían le ta'zi' bë' libí'ili'. ⁷Tu' ruá' rilenli' yugu' lë na' ta'zi' bë' libí'ili', naca bë' naca idú ca réajlë'ëli' Cristo. Lësca' caní rizí' bé'ëru' oro, le initi, cate' ruch'aru' le lu guí'. Que lë ni na', cate' chinazí' bë' yöl-la' réajlë' queéli' Cristo, le nácarö lesaca' ca oro, gaca queéli' yöl-la' zxön, en yöl-la' run bal dza ni' ulufi' lahuë' Jesucristo.

⁸Libí'ili' nadxí'ili'-në' Cristo sal-la' catu caz bilé'eli' Lë'. Réajlë'ëli' Lë' sal-

la' biti' rilé'eli'-në' na'a, ate' rudzëjali'. Yöl-la' rudzeja zxön queéli' le cabí gaca quíxjö'öru' tsca naca, naca idútë li. ⁹Caní naca, tu' ridéli'li' yöl-la' rusólá que bö' naca cázali', le rata' queéli' tu' réajlë'ëli'-në' Cristo.

¹⁰Dza ni'te yugu' bönni' gulu'ë didza' uláz queë' Dios bulu'sédë' dxí'ado' ca naca yöl-la' rusólá na' dë queéru' na'a, ate' gulu'ë didza' ca naca le ruzá' ládxe'ë Dios queéru'. ¹¹Bô' Lá'ayi dzáguie' Cristo buzëajni'inë' zí'atëlö bönni' na' gulu'ë didza' uláz queë' Dios, en buluf'inë' légaquie' ca ral-la' qui'i sáque'ë Cristo, enca' ca gaca queë' yöl-la' zxön tódi na'. Que lë ni na' gulufi' ládxi'gaquie' ila'nózinë' bátaxi gaca lë ni, en nuzxi na' gaca que lë na' buluf'inë' Bô' dzáguie' Cristo légaquie'. ¹²Dios buluf'inë' bönni' na' gulu'ë didza' uláz queë' biti' naca tu le ila'lé'enë' légaquie', pero rë'u ni rilé'eru' lë na' gulu'ë didza' que, ate' libí'ili' riyónili' na'a ca naca que. Yugu' bönni' tunë' libán que didza' dxí'a tu'ë didza' que lë ni, ate' zóalen yöl-la' huáca queë' Dios Bô' Lá'ayi légaquie', Nu na' risól-lë'ë Dios zoë' yehua' yubá queéru', ate' té'ënë' gubáz lá'ayi queë' Dios ila'nózinë' ca naca lë na' gulu'ë didza' que dza ni'te.

Dios rulidzë' rë'u para gácaru' lá'ayi

¹³Que lë ni na', guli'sóa ban ladxi', en guli'cózatica'sö bá'ado'. Idú ládxi'li' buli'zxöni ládxi'li' lë na' uzá' ládxe'ë queéli' Dios dza ni' ulufi' lahuë' Jesucristo. ¹⁴Guli'gún ca rna xtídzë'ë Dios, en biti' güf'ili' lataj yugu' le rizé ládxi'i'li' ila'ché' libí'ili' ga yúbölö, ca na' benli' dza ni' biti' núnbë'ënili'-në' Dios. ¹⁵Ral-la' gácali' lá'ayi ca naca yúgu'të le runli', ca na' náquie' lá'ayi Dios, en bulidzë' libí'ili' para guéquili' queë'. ¹⁶Lësca' caní nazúaj lu guichi lá'ayi, ca na' gunné' Dios le rna: "Guli'gaca lá'ayi, tu' naca' neda' lá'ayi."

¹⁷ Rëli'-në: "Xuztu" cate' rulídzali'-në' Dios, ate' Lë', lébisö ca ruchi'a rusoróë' yúgu'të bönachi tsca naca le núngaca tu tu bönachi na'. Que lë ni na' ral-la' gádxili' Lë' tsanni ni zóali' yödzölió ni, le cabí naca idú ládza'li'. ¹⁸ Dios busólë' libí'ili' lu lë na' gúcali' dza ni' cate' benli' ca nácgaca le cá'asö bulu'dödë' xuz xtó'oli' loli'. Nöz quézili' böá'uë' libí'ili', calëga len tu le initi ca naca oro, en plata, ¹⁹ pero len xichönë' Jesucristo le nácatëro lesaca', tu' budödi cuinë', en gúquië' ca tuba' bö'cu' zxila' nácaba' idú dxi'a, böa'do' tutië'-ba' lahuë' Dios para ugúa dul-la'. ²⁰ Dios guró cazë' Cristo zí'atëlö ca benë' yödzölió ni, ate' dza ni zóaru' na'a benë' ga bulufi' lahuë' para uzí'ili' xibé'. ²¹ Ni'a que le benë' Cristo réajlë'ëli'-në' Dios, busubanë' Lë' lu yöl-la' guti, en benë' ga náquië' lo. Caní naca, réajlë'ëli'-në' Dios, en ruzxöni ládxi'i'li' Lë'.

²² Na'a, chinún cuinli' dxi'a tu' runli' ca rnna le naca idütë li, en naca idú ca nadxi'ili' yugu' böchi' luzá'ali' ta'yéajlë'ë Cristo. Que lë ni na', idú ládxi'li' ral-la' idxí'ili' luzá'ali' tuli' ia'tuli'. ²³ Chiböál-jali' leyúbölö, calëga tu' nuzóagaca bönachi tati caz libí'ili', pero nuzóa Nu zoa caz libí'ili', en náljalenli' xtídzë'ë Dios, le naca ban, en le zóatica'sö. ²⁴ Caní naca, tu' nazúaj lu guichi lá'ayi le rnna: Yúgu'të bönachi nácgaca ca naca guixi'. Yöl-la' lachi quéguequi naca ca xiyija guixi' na'.

Ribídxí guixi' na', en riguinnaj xiyija,

²⁵ pero xtídzë'ë Dios zóatica'sö.

Didza' ni bidxín queéli' lu didza' dxi'a.

2 Que lë ni na', guli'cá'ana yúgu'të le ruá' dö'. Bítí'rö si' yé'ëli', en bití' ubéaj dxi'a cuinli' lógaca bönachi. Bítí'rö uzxé'eli', en bití' innëli' que luzá'ali'. ² Ral-la' së ládxi'li' le naca queë' Dios Bö' Lá'ayi para gálali' ca na' tunbí' bí'i hué'énido', ta'zé ládxi'bi' nidxi'. Caní ral-

la' gunli' ga idxinrö dza uláli', ³ channö réquibe'eli' náquië' Xanru' dxi'i' ladxi'.

Cristo náquië' ca tu guiój naca ban

⁴ Guli'biga' ga zoë' Xanru'. Náquië' ca tu guiój naca ban. Náquië' ca tu guiój bulu'cá'ana bönachi cá'asö pero naca tu le guró cazë' Dios le nazáca'tëro. ⁵ Lësca' caní, libí'ili' nácali' ca yugu' guiój nabán-gaca. Guli'güif' Dios lataj ugunë' libí'ili' dxin, ate' gunë' ga gácali' ca tu yudo' ga soë' Dios Bö' Lá'ayi. Lu yudo' na' gácali' ca bixúz néquiguequinë' quez queë' Dios, ate' lu në'ë' Jesucristo gaca udódi'li' yugu' le runnë' Dios Bö' Lá'ayi queéli' lahuë' Dios, lë na' raza ládxe'ë Dios. ⁶ Que lë ni na' nazúaj ca' lu guichi lá'ayi le rnna: Rigu'a lu zö'ö yödzö Sión tu guiój lo squin zö'ö, le guró caza' neda', en naca lesaca'. Nu réajlë' Lë', bití' ichixi inigui.

⁷ Naca guiój ni queéli' libí'ili' na' réajlë'ëli' Cristo tu le nazáca'da', pero qué-gaca nupa bití' ta'yéajlë' Cristo, naca ca na' nazúaj lu guichi lá'ayi le rnna: Guiój na' bulu'zóë' bönni' tu'cu'ë zö'ö tsölá'alö, tu' guléquinë' naca cá'asö, guiój ni chinaca guiój lo squin zö'ö.

⁸ Lësca' caní nazúaj lu guichi lá'ayi le rnna:

Guiój ni gun ga tsøjchégu'gaca bönachi, en gun ga tsójtso'ögaca.

Le nácatë yøjchégu'gaquië' bönni' bití' ta'yéajlë'ë Cristo, tu' gula'chixinë' cate' bulu'zóë' xtídzë'ë Dios tsölá'alö. Dios bu-cu'ë légaquië' para ilunë' caní.

Nupa néquiguequi quez queë' Dios

⁹ Libí'ili' nácali' bönachi guró cazë' Dios. Yúgu'tëli' nácali' bixúz queë' Bönni' Unná Bë' Lá'ayi. Nácali' ca tu yödzö nequi quez queë' Dios. Nácali' bönachi que cazë' Dios. Caní nácali' para gaca gunli' libán que le zxön benë' Dios, Bönni' na' bulídzë' libí'ili' para birúajli' ga

naca chul-la que dul-la', en guyázali' lu bení idú queë'.

¹⁰ Zí'atëlö bití' gúcali' bönachi queë' Dios, pero na'a chinácali' bönachi queë'. Zí'atëlö cuntú nu buéchi' ladxi' libí'ili', pero na'a Dios caz ruhuéchi' ládxe'ë libí'ili'.

Zóaru' nabanru' para gunru' ca ré'ënë' Dios

¹¹ Böchi' luzá'ado', nácali' ca bönachi zítu', en ridásili' yödzülió ni. Que lë ni na', ráta'yua' loli', bití' güf'ili' lataj ila'nná be'e le rizësö ládxi'li' libí'ili', yugu' le ta'díl-lalen bö' naca cázali'.

¹² Guli'gún le naca dxi'a lógaca bönachi bití' núbë'gaquië' Dios. Caní gaca, channö ulu'zegui libí'ili' didza', en ila'nná tútili' bönachi, gaca ila'lé'e bönachi yugu' le dxi'a runli', ate' dza huödë' Xanru' ila'gu'ë Dios yöl-la' ba ni'a que le naca cázali'.

¹³ Tu' néquili' queë' Xanru', guli'gún bal yúgu'të bönni' ta'nná bë'ë, bönni' na' nucuá'agaca bönachi légaquië', sal-la' náquië' bönni' rinná bé'enë' idútë yödzülió, tu' náquië' bönni' lo unná bë',

¹⁴ o channö náquië' bönni' rinná bé'enë' tu yödzü, nu na' nuzóë' bönni' lo unná bë' na' para gunë' xíguia' nupa tua' dö', en gunë' bal nupa tun le naca dxi'a.

¹⁵ Caní ré'ënë' Dios gunli' para ila'bó' dxíë' yugu' bönni' bití' bi nõzguequinë', en bití' núbë'gaquië' Lë', cate' ila'lé'enë' le naca dxi'a na' runli'.

¹⁶ Guli'gaca ca yugu' bönni' nazán-gaquië', pero bití' ugunli' dxin yöl-la' nazán queéli' para gunli' le ruá' dö'.

Guli'gaca ca yugu' bönni' nadó'ogaquië' queë' Dios.

¹⁷ Guli'gún bal yúgu'të bönachi.

Guli'dxí'i yugu' böchi' luzá'ali'.

Guli'gadxi-në' Dios.

Guli'gún bal bönni' na' rinná bé'enë' idútë yödzülió.

Le gudí'i guzzáquë'ë Cristo ruzéajni'i rë'u ca ral-la' gunru'

¹⁸ Núlöli' nácali' bönni' nadó'ogaca, guli'gadxi bönni' xanli', en guli'gún lé-gaquië' bal, calégasö gunli' bal yugu' bönni' xanli' na' nácagaquië' tsahui', en tu'fí ládxi'gaquië' libí'ili', pero guli'gún bal ca' yugu' bönni' xanli' na' tu'saca' zí'ë libí'ili' lu dxin runli' queégaquië'.

¹⁹ Channö qu'fí sáca'li', en bití' bi nabá-ga'li', ate' guá' ilenli' lë na' tu' réquili' naca ca ré'ënë' Dios, urúajli' tsahui' lahuë' Dios. ²⁰ Na'a, channö ruá'ali' dö', ate' yugu' bönni' yúlahui' ilunë' libí'ili' xíguia', çnacxi caz uzí'ili' xibé sal-la' len yöl-la' riböza zxön ladxi' queéli' guá' ilenli' lë na' gaca queéli'? Channö ribóza-li' zxön ladxi', en ruá' rilenli' le rigufí rizáca'li', ate' benli' le naca dxi'a, n'irö urúajli' dxi'a lahuë' Dios. ²¹ Dios bulidzë' libí'ili' para qu'fí sáca'li' caní, tu' gudí'i guzzáquë'ë Lë cazë' Cristo uláz queéli', en buzóë' queéli' tu le rulufí libí'ili' ca ral-la' gunli', para qu'fí sáca'li' ca na' gudí'i guzzáquë'ë Lë'.

²² Cristo bití' bi dul-la' benë', en catu caz guzxfí yë'ë.

²³ Cate' bulu'dídza' yúdxinë' Lë', bití' butsagui yúdxinë' légaquië'.

Cate' bulu'saca' zí'ë Lë',

bití' buzenë' légaquië' le bach,

pero budödi cuinë' lu në'ë Dios,

Nu na' ruchi'a rusöröë' le runru' ca sa'yéaj.

²⁴ Lë cazë' Cristo guzxi'ë dul-la' queéru' lu idú le naca cazë' cate' ni' gútië' lë'e yaga cruz, para gácaru' ca yugu' bönni' nati, para cabirö gunru' dul-la', pero sóaru' ibanru' para gunru' le naca dxi'a. Lë' gúquië' huë' uláz queéru' para huóácaru' rë'u dxi'a. ²⁵ Gúcali' ca yugu' bö'cu' zxila' nanítigacaba', pero na'a budxinli' queë' Cristo, Nu ruyú libí'ili', en rapa chí'ë

bö' naca cázali'. Náquië' queéli' ca tu' bönni' uyú bö'cu' zxila'.

Ca ral-la' ilún nupa nutsaga ná'gaca

3¹⁻²Lësca' caní, libí'ili' nigula, ral-la' gunli' bal bönni' que queéli', en channö cabí ta'yéajlë'ë xtídzë'ë Cristo, ila'yéajlë'ë Lë' cate' ila'lé'enë' le naca dx-i'a runli', en ca na' nácali' ba'a ladxí', en runli' légaquië' bal, sal-la' biti' bi didza' ru'ílenli' légaquië' ca naca queë' Cristo. ³Yöl-la' lachi queéli' biti' naca le zoa láhuisö, tsca rupá'ali' ícjali', en tsca nácgaca le néquini oro nusí' cuinli', en lari' nazáca'da' náculi'. ⁴Yöl-la' lachi queéli' ral-la' gaca le yu'u icja ladxí'do'oli'. Yöl-la' lachi le ridiá'tica'sö naca yöl-la' nöxaj ladxí', en yöl-la' ba'a ladxí', le nazáca'da'gaca lahuë' Dios. ⁵Lësca' caní guca yöl-la' lachi quégacanu nigula gula'yéaj ladxí'nu Dios, nigula na' gula'cuá'anu dza ni'te. Bulu'zxöni ladxí'nu Dios, en gulunnu bal bönni' que queégacanu. ⁶Caní bennu Sara, tu' bennu ca rna xtídzë'ë Abraham, bönni' queénu, en bulídzanu lë', gunnánu: "Xan." Libí'ili' ca' gunli' ca bennu Sara na' channö gunli' le naca dxí'a, en biti' bi gádxili'.

⁷Lësca' caní, libí'ili', bönni', ral-la' güf'i ladxí'li' nigula que queéli'. Guli'gún légacanu bal, calégasö tu' nóta'gacanu ca yöl-la' nál-la queéli', pero lësca' tu' nadéli'gacanu yöl-la' na'bán na' runnë' Dios queéru', lébisö ca nadéli'li' libí'ili'. Guli'gún caní para cabí uzaga' tu' xihui' xinózili' cate' ulídzali'-në' Dios.

Huagu'í huazáca'ru' sal-la' gunru' le naca dxí'a

⁸Ga ruúdxitë, guli'gaca tuz tuli' len ia'tuli' yúgu'tëli', en guli'güf' ladxí'li' luzá'ali' tuli' ia'tuli'. Guli'gaca dxí'i ladxí', en zxön ladxí'. ⁹Biti' ubí'ili', cabí guá'ali' dö' que nu ruá' dö' queéli', en biti' utsaga yúdxili' nu rutsaga yudxi

libí'ili', pero caní ubí'ili', inábili'-në' Dios gunë' ga gaca bica' ba nu na', tu' bulídzë' Dios libí'ili' para gácali' bica' ba. ¹⁰Caní naca le nazúaj lu guichi lá'ayi le rna: Nu bönni' ré'enë' uzi'ë xibé yöl-la' na'bán queë', en cözë' dxí'ado', ral-la' ucá'anë' didza' xihui', en cabirö si' yë'ë.

¹¹Ral-la' ucá'anë' le ruá' dö', en gunë' le naca dxí'a.

Ral-la' güf'i ladxë'ë cözë' zxön ladxí', en gúntica'së' caní,

¹²Xanru' rapa chi'ë yugu' bönni' tsahui' en ruzé náguië' le tu'lídzë' Lë', pero ruzáguë'ë xinózguequi nupa tua dö'.

¹³¿Nuzxi caz guá' dö' queéli' channö ru'í ladxí'li' gúntica'sili' le naca tsahui'?

¹⁴Sal-la' quí'í sáca'li' cate' runli' le naca tsahui', gácali' bica' ba. Cuntu nu gádxili', en biti' ubi ugu'íli' ¹⁵pero buli'zxöni ladxí'li'-në' Cristo, en güf'ili' Lë' lataj inná bé'enë' lu icja ladxí'do'oli'. Guli'sósa sina' quíxjöi'ili' yúgu'të nupa ila'nabi libí'ili' bizx que runli' löza Cristo, en gunli' lë ni lu yöl-la' nöxaj ladxí' queéli', en lu yöl-la' run bal nupa na'.

¹⁶Guli'gúntica'sö le naca dxí'a lahuë' Dios, en channö nacua' nupa ta'nnë' xihui' que le naca tsahui' runli' tu' réajlë'ëli' Cristo, ní'rö ulu'tuf'i tu' nözi le ta'nnë' queéli'. ¹⁷Channö quí'í sáca'li', dxí'arö gaca channö naca tu' runli' le naca dxí'a, en calëga tu' ruá'ali' dö', channö Dios ré'enë' qui'í sáca'li' caní.

¹⁸Lë cazë' Cristo gudí'í guzquéë'ë, en gútië' uláz queéru' para bugüë' dul-la' nabága'ru'. Lë' náquië' dxí'a, pero gútië' ni'a queéru', yugu' bönni' dul-la'. Caní benë' para bunë' rë'u tuz len Dios. Lu yöl-la' bönachi queë' gútië' pero lu bö' naca cazë' ni zoë' nabanë' lu le cubi le naca cazë'. ¹⁹Lu bö' naca cazë' guyi-jë' yöjenë' libán lógaca bö' nadzúngaca. ²⁰Bö' ni gulaca cazë' yugu' bönni', dza ni'te gula'dá'baguë'ë xtídzë'ë Dios, dza

ni' zoë' Noé, cate' ni' gulözë' Dios lu yöl-la' riböza zxon ladxi' queë', en biti' busiúdxë' légaquië', tsanni ni' benë' Noé barco zxon na'. Lë'e barco na' bulu'lá nabábasó bönachi lu nisa. Gulaca xunu' bönachi, bönni', en nigula. ²¹Nisa ni' naca tu le rulu'fi ca naca nisa ga na' ridílaru' nisa, le naca bë' nuláru' lu yöl-la' guti tu' bubanë' Jesucristo lu yöl-la' guti. Lë na' ridílaru' nisa biti' naca tu le run dxi'a le nácaru' láhuisó, pero rulu'fi rufi ládxi'ru' gaca dxi'a icja ládxi'-do'oru' lahuë' Dios. ²²Jesucristo bubenë' yehua' yubá, ga na' yöjchö'ë cuita lë'ë ibëla Dios, en rinná bé'enë' yugu' gubáz lá'ayi, en nupa ni' ta'nná bë', en nupa nadé'li'gaca yöl-la' zxon.

Ral-la' ugunru' dxin yöl-la' huáca queë' Dios para gunru' xichinë' Cristo

4 Que lë ni na', ca na' gud'fi guz'áquë'ë Cristo lu le naca cazë', lësca' lib'ili' ral-la' soa cózali' qu'fi sáca'li'. Nu na' rigufi rizáca'a tu' da' le naca tsahui' chibucá'ana dul-la'. ²Na'a isí lo, ral-la' gúntica'sili' ca ré'ënë' Dios, en calëga ca rizësó ládxi'li' lu yöl-la' bönachi queé'li'. ³Tsca'ti' gaz le chibenli' chibenli'. Bítirö gunli' ca na' tun nupa biti' núnbë'gaca Dios. Dza ni'te benli' yugu' le cabí ral-la' gunli'. Guzë ládxi'li' le ruá dö'. Guzúdxi'li'. Gudödi bë' gü'fi gudáguli', en guyéaj ládxi'li' budó' guió'j budó' yaga, le rigútinë' Dios. ⁴Na'a, tu'bánninë' bönni' tunë' caní tu' cabirö runli' tsözxón légaquië' cate' tunë' le ruá dö' caní, en que lë ni na' tu'tsaga yúdxinë' lib'ili'. ⁵Légaquië' run bayudxi ulu'lufi' cuíngaquië' lahuë' Dios, ate' Lë' chizóa uchi'a usöróë' nupa nabángaca, en nupa chinátigaca. ⁶Que lë ni na' guca libán que didza' dxi'a lógaca nupa chinátigaca, nupa na' Dios buchi'a busöróë' léguequi cate' ni' gula'cuá' yödzölió ni, ca na' ruchi'a rusöróë' yúgu'të bönachi. Guca libán lóguequi

para ila'cuá' lu yöl-la' na'bán lu bö'nácagaca caz, ca na' zoa cazë' Dios lu yöl-la' na'bán.

⁷Chizóa idxín dza údxi que yúgu'të le dë. Que lë ni na', guli'gaca ba'a ladxi', en buli'subán ládxi'li' para gaca ulídzali'në' Dios. ⁸Tu' runtë bayudxi, guli'dxi'fi luzá'ali' tuli' ia'tuli', ate' channö dzágali' lu yöl-la' nadxfi, gácali' sina' uniti loli' yugu' luzá'ali' tua' dö' queé'li'. ⁹Guli'güif lataj ila'cuá' böchi' luzá'ali' lídxili', en biti' innë'li' quégaquië'. ¹⁰Ral-la' ugunli' dxi'ado' dxin yugu' le buzá' ládxi'ë Dios queé'li', en gácalenli' luzá'ali' tuli' ia'tuli'. ¹¹Nu bönni' runë' ba nalí, ral-la' gunë' ba nalí que xtídzë'ë Dios, ate' nu bönni' runë' xichinë' Cristo, ral-la' ugunë' dxin yöl-la' huáca na' runnë' Dios queë', ate' ni'a que yúgu'të le runli', gaca yöl-la' ba queë' Dios ni'a que le nunë' Jesucristo. ¡Gácativa'só queë' Dios yöl-la' ba, en yöl-la' unná bë'! ¡Ca' gaca!

Le ila'gu'fi ila'zaca' bönachi ta'yéajlë' Cristo

¹²Böchi' luzá'ado', biti' ubánili' tu' nözi le ta'zi' bë'da' lib'ili'. Biti' naca tu le cabí núnbë'gaca bönachi. ¹³Guli'dzë-jade'e tu' dë lataj queé'li' gunli'-në' tsözxón Cristo lu le rigufi rizáquë'ë Lë' ni'a que bönachi queë' para gaca udzë-jali' ca' dza na' huödë' Cristo, cate' ilé'eli' yöl-la' zxon queë'. ¹⁴Channö tu'dzaga yudxi bönachi lib'ili' tu' dá'ali' Cristo, bica' ba lib'ili', tu' naca bë' zóalenë' Dios Bö' Lá'ayi lib'ili', Nu na' za' yehua' yubá. Bönachi yödzölió ni tu'dzaga yudxi Lë', pero lib'ili' runli'-në' bal. ¹⁵Channö rigufi rizáquë'ë nu bönni' dzáguie' lib'ili', ral-la' gaca caní tu' dë'ë Cristo, en calëga tu' rútië' bönachi, o ribanë', o ru'ë dö', o tu' yöjgút-së'ë ga yúbölö. ¹⁶Na'a, channö nülöli' rigufi rizáca'li' tu' dá'ali' Cristo, biti' ral-la' utu'fi'li', pero guli'cu'ë Dios yöl-la' ba tu' nazí' lali' bönachi queë' Cristo.

¹⁷ Chibidxín dza isí lahué' Dios uchi'a usöróé' bönachi rö queé'. Channö zí'aló uchi'a usöróé' rë'u, ¿nácxitëro gaca qué-gaca nupa bití' túngaca ca rnna didza' dxi'a queé' Dios? ¹⁸ Channö naca böniga ulu'lágaca nupa tun le naca dxi'a, ¿nácxitëro gaca quégaca nupa ta'dá'baga' Dios, en tun dul-la'? ¹⁹ Caní naca, yugu' bönni' ni ta'guf'i ta'zaqué'ë tu' rë'ënë' Dios gaca caní, ral-la' ilúntica'sé' le naca tsahui', en ulu'dödë' bö' nácagaca cazë' lu në'ë Dios, tu' ben cazë' Lë' légaquié', en runë' ca rnna xtídzë'ë.

**Pedro ruzéajni'inë'
nupa ta'yéajlé' Cristo**

5 Na'a, ruzéajni'ida' libí'ili', bönni' gula tapa chí'ili' nupa néquiquequi queé' Cristo, tu' naca' neda' ca' bönni' gula ca nácali' libí'ili', en bilé'eda' le gudf'i guzzáqué'ë Cristo, ate' guna' ca' tsözxón libí'ili', uzf'iru' xibé yöl-la' zxön na' ilá' lahui. ² Guli'gaca ca bönni' tu'yúé' bö'cu' zxila', gun chí'ili' bönachi na' Dios gulu'ë lu ná'ali'. Guli'gún caní idú ládxi'li' ca ré'ënë' Dios, en calëga tu' run bayudxi queé'li', o tu' rizé ládxi'li' dumí. Guli'gún xichinli' tu ré'ënisili', ³ en calëga tu' ré'ënili' inná bé'esili' nupa na' nagu'ë lu ná'ali'. Guli'güi' ládxi'li' gácali' tu le ruluf'i ca ral-la' ilaca nupa na' run chí'ili'. ⁴ Caní naca, cate' uluf'i lahué' Cristo, bönni' lo uyú bö'cu' zxila', idéli'li' tu le uzí'ili' xibé le catu caz initi.

⁵ Lësca' caní, bi'i cuidí', guli'gún ca ta'nné' yugu' bönni' gula. Yúgu'téli' ral-la' gunli' bal luzá'ali', tuli' ia'tuli', lu yöl-la' nöxaj ladxi' queé'li', tu' nazúaj lu guichi lá'ayi le rnna: Dios ruzágué'ë xinózguequi nupa tun ba zxön cúinguequi pero rácalenë' nupa nácagaca nöxaj ladxi'.

⁶ Guli'sóa nöxaj ladxi' lu në'ë Dios, ate' Lë' uchisë' libí'ili' cate' izá'a dza. ⁷ Guli'cú'u yúgu'të le run ga ruúbí ruguf'ili' lu në'ë Dios, tu' ruí' ládxi'ë libí'ili'.

⁸ Guli'gaca ba'a ladxi', en buli'subán ládxi'li', tu' zoa tu' xihui', nu bití' rilé'e libí'ili' dxi'a, ridá idú gásibí'ilö, en naca ca tuba' bëdxi guixi' ribódxí'aba', riguiljba' nu gáguba'. ⁹ Guli'gaca tsutsu ca réajlé'ëli' Cristo, en guli'zága' xinóza tu' xihui', tu' nózili' ta'guf'i ta'zaqué'ë böchi' luzá'ali' idútë yödzülió ni ca na' riguf'i rizáca'li' libí'ili'. ¹⁰ Nf'irö cate' chigudf'i guzzáca'li' tu chí'sö, Dios gunë' ga gácali' idú tsahui', en ga gácali' tsutsu, en ga gálali', en ga sóali' tsaz. Lë cazë' Dios ruzá' ládxi'ë queéru' yúgu'të le ruzf'iru' xibé, en bulidzë' rë'u para uzf'iru' xibé yöl-la' zxön queé' le zóatica'sö tu' nácaru' tuz len Jesucristo. ¹¹ ¿Gácatíca'sö yöl-la' ba, en yöl-la' unná bë' queé' Lë'! ¡Ca' gaca!

**Pedro ruzenë' didza'
nupa ta'dá' Cristo**

¹² Dídza'do' ni ruzúaja' queé'li' lu guichi lu në'ë Silvano. Réquida' náquië' böchi'ru' idú ladxi'. Ré'ënda' utipa' ládxi'li', en runa' ba nalf' loli', le nácatë lë ni naca le ruzá' ládxi'ë queéru' Dios. ¡Guli'gaca tsutsu tu' ruzf'ili' xibé lë ni!

¹³ Yugu' bönachi queé' Cristo nacua' Babilonia tu'gapa Dios libí'ili'. Dios guró cazë' léguequi ca na' guróé' libí'ili'. Lësca' bi'i Marcos rugápabi' Dios libí'ili'. Ná-cabi' ca xzí'ini caza'. ¹⁴ Guli'gapa Dios luzá'ali' tuli' ia'tuli', en lu yöl-la' nadxf'i queé'li' luzá'ali' unída'li' luzá'ali' tuli' ia'tuli'.

Rinábida'-në' Dios gunë' ga soa dxi icja ládxi'do'oli', yúgu'téli' na' néquili' queé' Jesucristo. ¡Ca' gaca!

DÍDZA'DO' BUROPI BUZÚAJĚ' PEDRO

Pedro rugapě' Dios nupa ta'dá' Cristo

1 Neda', Simón Pedro, naca' huen dxin queě' Jesucristo, en gubáz nasól-lě'ě Lě'. Rugapa' Dios lib'ili', réajlě'ěli'-ně' Jesús. Lěbisō ca nazáca'gaca yōl-la' réajlě' queěli' Lě', en yōl-la' réajlě' queětu' Lě'. Dios beně' ga réajlě'ěli' Lě' tu' naca cazě' tsahui', en tu' náquiě' ca' Xanru' Jesucristo, Nu na' rusólá rě'u, tsahui'.² Rinábida'-ně' Dios guně' ga gata' queěli' idútě le ruzá' lădxě'ě queěru', en guně' ga soa dxi icja lădxi'do'oli' tu' núnbě'ěli'-ně' Dios, enca' Xanru' Jesús.

Le nácgaca nupa ta'yéajlě' Cristo

³Lu yōl-la' huáca zxōn queě', Dios chibenně' queěru' yúgu'tě le riqúiniru' para gata' queěru' yōl-la' na'bán idú, en para gácaru' ba'a ladxi', tu' núnbě'ěru' Nu na' bulidza rě'u para gata' queěru' yōl-la' zxōn queě', en le naca tsahui' queě'.⁴Tu' runě' caní, beně' ga gaca uz'iru' xibé yugu' le zxōn, en le naca tsahui' guzxí' lu ně'ě gunně' queěru', ate' tu' naca caní nuláru' lu le ruá' dō' raca yōdzōlió ni tu' ta'zě lădxi'gaca bōnachi le cabí naca tsahui'. Nuláru' para gácaru' ca náquiě' Lě' cazě' Dios.⁵Que lě ni na': Channō réajlě'ěli' Cristo, guli'gúf' lădxi'li' gácali' dxi'i ladxi'. Channō chinácali' dxi'i ladxi', guli'gúf' lădxi'li' gata' ca' queěli' yōl-la' rácada'.

⁶Channō nápalí' yōl-la' rácada', guli'gúf' lădxi'li' inná be'e cuinlí'. Channō rinná be'e cuinlí', guli'cōza zxōn ladxi'. Channō ribózáli' zxōn ladxi', guli'sóa ba'a ladxi'.

⁷Channō zóali' ba'a ladxi', guli'dxí' luzá'ali'.

Channō nadxí'ili' luzá'ali', guli'dxí' ca' yúgu'tě bōnachi.

⁸Channō caní runlí', en zeaj rácarō idú ca runlí' caní, lě ni gun ga bití' gaca nítisō yōl-la' réajlě' queěli' Lě', ate' tseaj gácarō idú ca núnbě'ěli'-ně' Xanru' Jesucristo.⁹Nu bōnni' bití' ru'f' lădxě'ě guně' caní, náquiě' ca tu' bōnni' nachulla nanítie', tu' chizá' ral-la lădxě'ě buně' Cristo lě' tsahui', en bugúě' yugu' dul-la' gubáguě' z'atələ.¹⁰Que lě ni na', bōchi' luzá'ado', ral-la' gúf'itěro lădxi'li' guéquibe'eli' bulidzě' Dios lib'ili', en gurō cazě' lib'ili'. Channō gunlí' caní, bití' ca' ichixi iníguli'.¹¹Caní gaca, idú lădxě'ě Dios gúnnasě' queěli' lataj tsázali' ga inná bė'tica'sě' Xanru' Jesucristo, Nu rusólá rě'u.

¹²Que lě ni na' gúntica'sa' ga tsōjněli' yugu' lě ni sal-la' chinóz quézili' le, en rugunlí' dxin le naca idútě li na' chiguzxí' lu ná'ali'.¹³Runi neda' ral-la' usubana' lădxi'li' ca nácgaca lě ni tsanni ni zoa' nabana'.¹⁴Ral-la' guna' caní tu' nōzda' si' gátia'. Xanru' Jesucristo chigudxi cazě' neda' gaca caní quia'.¹⁵Que lě ni na' ru'ida' lădxa'a guna' ga tsōjnética'sili' yugu' lě ni tōdi gátia'.

Nupa bila'lě'e yōl-la' zxōn queě' Cristo

¹⁶Bití' bė'lentu' lib'ili' tu didza' ridasō lu yōl-la' sina' queětu', cate' buzéajni'itu' lib'ili' ca ral-la' idxín dza huōdě' Xanru' Jesucristo, napě' yōl-la' unná bě' zxōn. Netu' bilé'e quézitu' yōl-la' zxōn queě'.¹⁷Bilé'etu' Lě' cate' Xúziru' Dios beně' Lě' bal, en bě'ě Lě' yōl-la' zxōn, ate' biyón chi'ě Dios, le birúaj lataj benf' queě', cate' gunně': "Bōnni' ni náquiě' Zxí'ina'. Nadxí'ida' Lě', en raza lădxa'a Lě'."¹⁸Netu' biyón quézitu' chi'ě na' le birúaj yehua' yubá cate' ni' guzóalentu'-ně' Xanru' lu gu'á lá'ayi na'.

¹⁹Lě na' guca, naca bě'da' zeaj nácatě didza' gulu'ě yugu' bōnni' uláz queě'

Dios, ate' ral-la' güi'í ládxi'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi-i'do'oli' Nu na' naca ca bölj hui sila queéru'. ²⁰Lë ni runda' bayudxi tséajni'ili': Cuntu nu bönni', rásasó queé' bití' gaca tséajni'inë' didza' b'ë'ë tu bönni' uláz queé' Dios. ²¹Yugu' didza' gulu'ë yugu' bönni' uláz queé' Dios bití' ca' gulu'ë tu' gulë'ëni quézinë', pero gulu'ë didza' uláz queé' Dios le guchízië' Dios Bö' Lá'ayi icja ládxi'do'gaquië'.

Ca nácgaca nupa tu'sédinë' le cabí nácatë

2 Yugu' bönni' ta'z'f' yë'ë gula'cuá'lenë' bönnachi Israel, en gula'nnë' nácgaguië' bönni' tu'ë didza' uláz queé' Dios. Lësca' caní yugu' bönni' ila'z'f' yë'ë ila'cuá'lenë' libí'ili', en ulu'sédinë' libí'ili' le cabí nácatë. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queéli' ucá'anali' le naca idútë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'. ²Zianlí' libí'ili' gunlí' légaquië' tsózxón lu le ruá' dö' ilunë', ate' tu' gunlí' bál-lali' caní ila'nnë' xihui' bönnachi que didza' dxi'a le naca idútë li. ³Lu yöl-la' ruhuidi' quégaquië' ulu'sédinë' libí'ili' le cabí nácatë, para gata' quégaquië' dumí queéli'. Chinarugu quégaquië' bönni' ni, ate' naca löza ila'nítië' tsaz.

⁴Dios bití' buniti lahuë' yugu' gubáz lá'ayi queé' na' gulunë' dul-la', pero gurú'unë' légaquië' lataj chul-la. Nága'gaguië' du guíë ga naca chul-la na', ga na' ta'bözë' dza usiúdxë' Dios légaquië'. ⁵Lësca' caní, bití' buniti lahuë' bönnachi gula'cuá' dza ni'te cate' gusól-lë'ë nisa guiój le busuniti yödölió le beti bönnachi nácgaca xihui', pero busölë' Noé lu nisa na', bönni' ni' benë' libán que le naca tsahui'. Dios busölë' ca' ia'gadxi di'a dza queé' Noé na' lu nisa. ⁶Lës-

ca' caní, Dios guchúguië' quégaca bönnachi gula'cuá' yödzo Sodoma, en yödzo Gomorra. Busunítië' léguequi lu guí', ate' bulu'huóaca dö. Le guca quéguequi naca tu le rulu'í le run gadxi nupa tua' dö'. ⁷Cate' busunítië' yugu' yödzo na', Dios busölë' Lot, tu bönni' tsahui', lu guí' na'. Bu'ínida' ládxië' Lot cate' bilé'enë' le xihui' gulún bönnachi tuá' dö' na'. ⁸Caní guca, tu' guzóalenë' bönni' tsahui' na' léguequi, ate' bilé'enë', en biyönnë' le ruá' dö' na' gulúngaca, ate' tu' gúquië' tsahui' gusëbi ládxië'ë yúgu'të dza ni'a que yugu' le cabí naca tsahui' gulúngaca. ⁹Caní naca, Xanru' nózinë' usölë' nupa na' tadxi Lë' lu na' nu run ga tsázagaca bönnachi nöza dul-la', pero nucózáë' xíguia' gunë' nupa bití' nácgaca tsahui' ga idxinrö dza ichúguië' quéguequi ila'niti tsaz.

¹⁰Ichúguda'arö quégaquië' bönni' ni tunë' yugu' le ta'z'é ládxië' le ruá' dö', en ta'dá'baguië' yöl-la' unná bë' queé' Xanru'. Nácgaguië' rugu ladxi', en zidi ladxi'. Bití' tádxinë' tu'lidza ditjë' gubáz lá'ayi ta'dé' lu bení'. ¹¹Gubáz lá'ayi na' nápagacatërë' yöl-la' unná bë', en yöl-la' huáca ca yugu' bönni' na', pero gubáz lá'ayi na' bití' tu'huázxjanë' nu ulu'zéguië' didza' lahuë' Xanru'.

¹²Yugu' bönni' ni nácgaguië' ca böa' guixi', bití' bi ta'yéajni'iba', pero náljagacaba' para nu sön légacaba', en guti légacaba'. Ta'nnë' xihuë'ë que le cabí ta'yéajni'inë', ate' ila'nítië' tsaz ca raca quégacaba' böa' guixi' na'. ¹³Dios ubi'ë quégaquië' le ila'gu'í ila'záquë'ë, tu' bulu'saca' zi'ë bönnachi. Téquinë' naca xibá-gaguië' tu'zi'ë xibé le raca na'a dza. Nácgaguië' ca tu huë' nudzu', en tu le run ditaj cate' ni' tahuë' tsózxón len libí'ili', ate' tu'dzéjanë' tu' ta'z'f' yé'enë' libí'ili'.

¹⁴Lu yöl-la' rizé ladxi' quégaquië' le ruá' dö' tu'yúë'-nu yugu' nigula. Bití' nacu'ë dxisó túngaguië' dul-la'. Tún-

gaquië' ga ta'chixi ta'nigui nupa biti' nácagaca tsutsu ca ta'yéajlë' Cristo. Ta'guľjatica'së' yugu' le tu'huídí'në'. Dios chinuchúguië' quégaquië' ilátigaquië'. ¹⁵Bulu'cá'anë' le naca idútë li, ate' nachul-la nanítigaquië'. Tunë' ca benë' Balaam, xzí'në' Beor, bönni' ni' bidxí'inë' dumí, ate' benë' le ruá' dö' tu' nazxjë'. ¹⁶Dios buzenë' le bach Balaam na' tu' benë' le ruá' dö' na'. Tuba' búrrodo' bé'lenba' lë' didza' ca na' tufi didza' bönachi, ate' buzága'ba' xinözë' Balaam ga na' sa'yéajë' lu yöl-la' ridá'bagá' queë'.

¹⁷Nácagaquië' bönni' ni ca tu buduá' chibufi' nisa que, enca' ca tu böaj le riché' bö' budunu'. Chinabá'a xilátjagaquië' lataj chul-la. ¹⁸Caní nácagaquië' tu' tu'ë didza' yugu' le zxön lu yöl-la' biti' bi nözi quégaquië', en tu'gunë' dxin yugu' le ta'zë ládxi'gaca bönachi le ruá' dö', en tunë' ga ta'chixi ta'nigui nupa si' bulu'lá ladaj nupa nácagaca chul-la niti. ¹⁹Të' bönachi ila'deli' yöl-la' rusölá, pero légaca cazë' nadzúnagaquië', en tunë' bayudxi le ruá' dö'. Nadzúnagaquië' yúgu'të bönni' lu na' bi rinná be'e icja ládxi'do'gaquië'. ²⁰Channö bulu'lë' lu le cabí naca tsahui' nacuá' yödzölió ni tu' gulúnbë'ë Xanru' Jesucristo, Nu rusölá rë'u, ate' n'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabá-ga'gacatë'ë xíguia' ga röjsetë ca le gula'báguë'ë zí'alö. ²¹Dxí'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' n'irö bulu'cá'anë' xibá lá'ayi bé'ë Dios quégaquië'. ²²Chibudxín quégaquië' didza' na' rnna:

Ruhuécjaba' bö'cu', ruhuöáguba' le si' gúbaba'.

Ruyázaba' cuchi na' si' gudíbiru'-ba' lu guna'.

Naca löza huödë' Xanru'

3 Didza' ni naca le buropi ruzúaja' queéli' lu guichi, böchi' luzá'ado'. Lu irópatë guichi na' ru'fi ládxa'a usubana' ládxi'li' ca nácagaca lë ni. ²Gulí'tsójné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Gulí'tsójné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasól-lë'ë Lë' lib'ili'.

³Ral-la' tsójnéli' lë ni naca lo. Dza tsöjsëtëgaca ulu'lufi' lahuë' bönni' ilunë' le ta'zë ládxi'ë le ruá' dö'. ⁴Ulu'titjë, ila'nnë: "¿Gazxi caz lë na' guzxi' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yúgu'të raca tuz ca guca cate' gusí lo rata' yödzölió ga ridxintë na'a dza." ⁵Tu'zöë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láchui'lö nisa. ⁶Len nisa ca' busunítië' Dios yödzölió dza ni'te cate' ni' gusól-lë'ë nisa guiój le beti yugu' bönachi dul-la'. ⁷Lúzxiba, en yödzölió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí. Caní gaca tu' gunné' caní Dios caz. Uzégui'ë léguequi dza ni' ichúguië' quégaca bönachi biti' nácagaca tsahui' gátigaca.

⁸Biti' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza. ⁹Biti' ridzenë' Xanru' gunë' le guzxi' lu në'ë gunë'. Téquiguequi bal-la bönachi ridzenë', pero ribözë' zxön ládxi', en ruá' rilenë' rë'u tu' cabí ré'enë' initi nitú bönachi, pero ré'enë' ulu'bí'i ládxi'gaca yúgu'të bönachi.

¹⁰Tsáldo'os idxín dza huödë' Xanru' ca ridxinë' tu bönni' gubán chi'i dzó'ölö. Lu dza na' huadödi que lúzxiba len tu bö zxön. Ila'niti yúgu'të le nacuá' lu guí

zxön. Ila'yegui yödzölió ni, en le nacuá' yödzölió ni.

¹¹ Channö caní gaca, ila'niti yúgu'tè lè ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios. ¹² Ral-la' cózali' dza huödë' Xanru', en güf'i ládxi'li' gunli' ga idxinrö bayón dza ni' cate' initi lúxiba, ate' ila'niti yúgu'tè le nacuá' ni lu guf'. ¹³ Caní gaca, pero rë'u ribózaru' le guzxf' lu në'ë Dios. Gunë' tu lúxiba cubi, en tu luyú cubi ga ni' soa le naca tsahui'.

¹⁴ Que lè ni na', böchi' luzá'ado', tsanni ni ribózali' yugu' lè ni, guli'güf' ládxi'li' gácali' idú tsahui' lahuë' Dios, ate' gunli' ga cuntu nu bi gaca inné queéli', en cózali' dxí'ado' cate' idxinrö dza ni'. ¹⁵ Ral-la' inózili' ribözë' Dios zxön ladxi' para gata' quégaca bönachi lataj ulu'lágaca, ca na' gunné' ca' bóchi'ru' Pablo. Buzúa-

jë' queéli' lu guichi, zóalen lë' yöl-la' réajni'i na' bë'ë Xanru' queë'. ¹⁶ Yúgu'tè lu guichi ruzúajë', ru'ë didza' ca náca-gaca lè ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' biti' nózguequinë', en bönni' biti' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinöz quézili' lè ni, böchi' luzá'ado'. Que lè ni na' guli'gún chí'i cuinli', para cabí ila'zí' ye'e bönachi biti' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo. ¹⁸ Guli'güf' ládxi'li' gácarö idú ca núnbë'ëli'-në' Xanru' Jesucristo, Nu rusölá rë'u, ate' ruzí'ili' xibé'. ¡Yöl-la' ba Lë' na'a dza, en yúgu'tè dza zá'gaca! ¡Ca' gaca!

DÍDZA'DO' ZÍ'ALÖ BUZÚAJĚ' JUAN

Didza' nabániru'

1 Rusiyöntu' libí'ili' ca naca queë' Bönni' na' zoa cazë' dza ni'te, le biyónitu' bē'ē didza', en le bilé'etu' ca naca queë', en le buyutu' benē' Bönni' na'. Gudanту' Lē'. Bönni' ni náquiē' Jesús, lē' ca' Didza' Nabánigaca Bönachi. ²Bönni' na' nabánigaca bönachi buluf'i lahuē', ate' bilé'etu' Lē'. Runtu' ba nalí queë', en rulu'itu' libí'ili' ca naca queë' Bönni' na' nabániru'. Bönni' ni guzóalenē' Dios Xuz, en chibudulu'f'i lahuē' ga zóaru'. ³Le bilé'etu', en le biyónitu' rusiyöntu' libí'ili' para gácali' ca' libí'ili' tuz len netu'. Le nácatē naca yöl-la' tuz queéru' len Dios Xuz, enca' len Jesucristo Xz'ínē' Dios. ⁴Ruzúajtu' queéli' lu guichi lē ni para gaca udzējaru' idú ládxi'ru'.

Dios náquiē' bení'

⁵Lē ni naca didza' biyónitu' bē'lenē' Jesús netu', ate' le rusiyöntu' libí'ili'. Caní rna: Dios náquiē' bení', ate' nitú le naca chul-la que dul-la' biti' zóalen Lē'. ⁶Channō innaru': "Nácaru' tuz len Dios", pero channō runru' le naca chul-la que dul-la', lē ni naca bē' rizí' yé'ēru', en biti' runru' le naca idútē li. ⁷Na'a, channō runru' le naca tsahui', en ridaru' lu bení' ca na' Lē' náquiē' tsahui', en zoē' lu bení', nácaru' tuz turu' len ia'turu', ate' xichönē' Jesucristo, Xz'ínē' Dios ruún rē'u dxi'a, en rugúa yúgu'tē dul-la' nabága'ru'.

⁸Channō rnaru': "Biti' bi dul-la' runru'", rizí' yé'ēru' la' cuínsiru', en biti' nazí' lu ná'aru' le naca idútē li. ⁹Channō ixóalēpiru' lahuē' Dios dul-la' nabága'ru', Lē' runē' ca rnnē', en náquiē' tsahui'. Uniti lahuē' dul-la' nabága'ru', en únē' rē'u tsahui', ugúē' yúgu'tē le ruá' dō'

dzaga rē'u. ¹⁰Channō innaru': "Biti' bi dul-la' nabága'ru'", naca ca innaru': "Dios rizí' yé'ē", ate' biti' runru' ca rna xtídzē'ē.

Cristo náquiē' Nu rudōdi xtídzá'ru' lahuē' Dios

2 Libí'ili', xz'ína'do', ruzúaja' queéli' lu guichi lē ni, para cabí gunli' dul-la'. Na'a, channō nútí'tēs nu gun dul-la', zoa nu rudōdi xtídzá'ru' lahuē' Dios Xuz, Lē' Jesucristo, Nu naca tsahui'. ²Naca cazē' Bönni' budōdi cuinē', en gútiē' para bugúē' dul-la' nabága'ru' lahuē' Dios. Calégasō gútiē' para bugúē' dul-la' nabága'ru' rē'u, pero gútiē' ca' para bugúē' dul-la' nabága'gaca bönachi idútē yōdzölió.

³Channō runru' ca naca le gunná bē'enē' rē'u, nóziru' chinúnbē'ēru' Lē'. ⁴Nu rna: "Neda' núnbē'a-nē' Dios" pero biti' run ca rinná bē' xibá queë', nu ni rizí' yē', en biti' run le naca idútē li. ⁵Nu run ca rna xtídzē'ē Dios, le nácatē nadxí'i nu ni Dios ca ral-la' gun. Channō runru' caní, nóziru' néquiru' queē' Dios. ⁶Lē'sca' caní, nu rna: "Neda' néquida' queē' Cristo", ral-la' gaca nu na' ca na' gúquiē' Cristo cate' gudē' yōdzölió ni.

Tu xibá cubi

⁷Böchi' luzá'ado', ruzúaja' queéli' lu guichi xibá ni. Biti' naca tu xibá cubi, pero xibá gula na', le zóalen libí'ili' dza ni'te. Xibá gula na' naca didza' biyónili' dza ni'te. ⁸Lē'sca' naca ca ruzúaja' queéli' lu guichi tu xibá cubi, lē na' le nácatē benē' Jesús ca rna, ate' runli' ca' libí'ili' ca rna, tu' chiridōdi que le naca chul-la que dul-la', ate' bení' idú chiruzení'.

⁹Nu rna: "Zoa' lu bení'", pero biti' rilé'e dxi'a böchi' luzé'e, nu ni ni run le naca chul-la que dul-la'. ¹⁰Nu nadxí'i böchi' luzé'e zoa lu bení', ate' le run ga nu ichixi inigui biti' zóalen nu na'. ¹¹Le naca chul-la que dul-la' run ga nu biti'

rilé'e dxi'a böchi' luzé'e, en ga ridá nu na' ga chul-la. Biti' nözi ga zeaj, tu' run le naca chul-la na' ga nachul-la naniti nu na'.

¹² Ruzúaja' queéli' lu guichi, zxf'ina'do', tu' chibunít lahué' Dios dul-la' nabága'li', tu' runé' le guzxf' lu në'e guné'.

¹³ Ruzúaja' queéli' lu guichi, lib'ili' nácali' xuz, tu' núnbë'ëli' Nu na' zoa caz dza ni'te. Ruzúaja' queéli' lu guichi, bi'i ra'bán, tu' chibucúl-lali' tu' xihui'.

¹⁴ Chibuzúaja' queéli' lu guichi, zxf'ina'do', tu' núnbë'ëli'-në' Dios Xuz. Chibuzúaja' queéli' lu guichi, lib'ili' nácali' xuz, tu' núnbë'ëli' Nu na' zoa caz dza ni'te. Chibuzúaja' queéli' lu guichi, bi'i ra'bán, tu' nácali' bi'i nál-la, en nazf' lu ná'ali' xtídzë'ë Dios, en chibucúl-lali' tu' xihui'.

¹⁵ Biti' idxf'isili' yödzölió ni, en calëga le dë yödzölió ni. Channö zoa nu nadxf'i yödzölió, bití' nadxf'i Dios Xuz. ¹⁶ Caní naca, tu' naca le tun bönachi yödzölió ni le cabí ré'ënë' Dios Xuz, pero naca le té'ëni bönachi yödzölió ni.

Tunë' le riyaza ladxi' yöl-la' bönáchisö quegaquié'.

Tunë' le ruá' dö' le ridani guiójj lógaquié'. Tun ba zxön cuíngaquié' ni'a que le dë quegaquié'.

Caní nátagaca le ruá' dö' tunë'.

¹⁷ Huadödi que yödzölió ni, enca' que le ta'zé ládxi'gaca bönachi, pero nu run ca ré'ënë' Dios sóatica'sö.

Nu ru'f'i didza' idütë li, en nu rizí' yë'

¹⁸ Zxf'ina'do', chizóaru' dza údxi, en ca na' chibiyónili' huidë' bönni' ridá'báguë'ë Cristo, lësca' na'a chigusí lo nacu'ë zían bönni' ta'dá'baguë'ë Cristo. Que lë ni na' nóziru' chizóaru' dza údxi. ¹⁹ Bila'rúajë' bönni' caní ládjaru', pero bití' guláquié' tuz len rë'u. La'tu' guláquié' tuz len rë'u, ila'cuá'lentica'së' rë'u. Na'a, bila'rúajë' para gaca bë' bití' nácaquié' yúgu'të' tuz len rë'u.

²⁰ Na'a, Bö' Lá'ayi nagú'u Nu naca lá'ayi rë'u, chizóalen lib'ili', ate' nöz quezili' yúgu'të. ²¹ Buzúaja' queéli' lu guichi, tu' chinózili' le naca idütë li, en calëga tu' cabí nózili' le. Nózili' ca' bití' ca' rizí' yë' nu nözi le naca idütë li.

²² ¿Nuzxi caz na' nu rizí' yë'? ¿Naru' cabí naca nu na' ridá'baga' náquië' Jesús Nu gusól-lë'ë Dios? Naca nu ni bönni' ridá'baguë'ë Cristo, tu' ridá'baguë'ë náquië' Dios Xuzë' Jesús, en ridá'baguë'ë ca' náquië' Jesús Zxf'inë' Dios. ²³ Núti'tës nu ridá'baga' Dios Zxf'ini, bití' ca' zóalenë' Dios Xuz nu na'. Núti'tës nu rna yálajdo' Jesús náquië' Zxf'inë' Dios, lësca' zóalenë' Dios Xuz nu na'.

²⁴ Na'a, guli'güf' lataj le biyónili' dza ni'te ugá'analentica'sö lib'ili'. Channö le biyónili' dza ni'te ugá'analentica'sö lib'ili', lësca' lib'ili' ugá'analentica'sili'-në' Dios Zxf'ini, enca' len Dios Xuz. ²⁵ Le guzxf' lu në'e Dios naca lë ni: Gunné' gunné' yöl-la' na'bán idú queëru'.

²⁶ Chibuzúaja' queéli' lu guichi lë ni ca naca quegaca nupa ta'z'í' ye'e lib'ili'.

²⁷ Na'a, zóalenë' Dios Bö' Lá'ayi lib'ili'. Cristo gusól-lë'ë Lë' queéli', ate' Lë' cazë' zóalentica'së' lib'ili'. Que lë ni na' bití' riquínili' nu usedi lib'ili', tu' chizóalen Nu na' lib'ili', en rusedi lib'ili'. Didza' idütë li ru'ë Lë', en bití' rizí' yë'ë. Ca na' chinazédali', guli'sóalentica'së' Cristo.

²⁸ Na'a, zxf'ina'do', guli'sóalentica'së' Cristo para cate' uluf'i lahuë' Lë', gá-caru' rugu ladxi', en bití' utuf'iru' sóaru' lahuë' Lë' cate' huödë'. ²⁹ Channö nózili' náquië' Dios tsahui', ral-la' inózili' ca' yúgu'të nupa tun le naca tsahui' náca-gaca zxf'inë' Dios.

Nupa nátagaca zxf'inë' Dios

3 Buli'yú ca nadxf'ide'enë' Dios Xuz rë'u, benë' ga nazf'i laru' zxf'inë' Dios caz. Que lë ni na' bönachi yödzölió ni bití' ca' núnbë'gaca le nácaru', tu' cabí gulúnbe'e Jesús. ² Böchi' luzá'ado', na'a

chinácaru' zxf'inē' Dios, en biti' naca bé'eni le ral-la' gácaru'. Nóziru' cate' uluf'i lahuē' Jesús, gácaru' ca náquiē' Lē', ate' ilé'eru'-nē' catēz náquiē' Lē'.³ Núti'tēs nu run löza gaca ca náquiē' Jesús, ru'í ladxi' nu na' gaca dxi'a ca na' náquiē' Jesús dxi'a.

⁴Núti'tēs nu run dul-la' riguitsaj xibá queē' Dios, tu' naca dul-la' le riguitsaj xibá. ⁵Nózili' buluf'i lahuē' Jesús para bugúē' dul-la' nabága'ru', en biti' bi dul-la' runē' Lē'. ⁶Núti'tēs nu dzaga Lē' biti' run dul-la'. Núti'tēs nu run dul-la' catu caz bil'é'e Jesús, en biti' nún-be'e Lē'. ⁷Zxf'ina'do', guli'gún chi'i cuinli' para cabí nu si' ye'e lib'ili'. Nu run le naca tsahui', naca tsahui' nu na' ca na' náquiē' Jesús tsahui'. ⁸Nu rúntica'sö dul-la' nequi que tu' xihui', tu' run dul-la' tu' xihui' dza ni'te. Que lē ni na' buduluf'i lahuē' Zxf'inē' Dios, para usunítiē' yugu' le nun tu' xihui'.

⁹Núti'tēs nu naca zxf'inē' Dios biti' rúntica'sö dul-la', tu' zóaléntica'sö le guzxi' lu nē'ē Dios Xuz nu na'. ¹⁰Caní naca bé' nupa nácacagaca zxf'inē' Dios, en nupa nácacagaca zxf'ini tu' xihui'. Núti'tēs nu biti' run le naca tsahui', en biti' nadxf'i böchi' luzé'e biti' nequi queē' Dios.

Ral-la' idxí'iru' yugu' böchi'ru' ta'yéajlě'ē Cristo

¹¹Lē ni naca didza' biyónili' dza ni'te, le rnna: Ral-la' idxí'iru' luzá'aru' turu' ia'turu'. ¹²Biti' ral-la' gunru' ca na' benē' Caín. Gúquiē' Caín que tu' xihui', ate' bētiē'-bi' bi'i böchě'ē. ¿Bixz que bētiē'-bi' bi'i böchě'ē? Bētiē'-bi' tu' gulaca le benē' Caín na' le ruá' dö', pero le benbi' bi'i böchě'ē, gulaca tsahui'.

¹³Bócha'ado', biti' ubánili' channö cabí ta'lé'e bönachi yödžölió ni lib'ili' dxi'a. ¹⁴Nóziru' chigudódiru' lu yöl-la' guti, en chidé yöl-la' na'bán idú queéru' tu' nadxf'iru' yugu' böchi'ru'. Nu biti' nadxf'i böchi' luzé'e, chinati caz

nu na'. ¹⁵Núti'tēs nu biti' rilé'e dxi'a böchi' luzé'e, naca huēti bönachi nu na', ate' nózili' nu ruti bönachi biti' dē yöl-la' na'bán idú que. ¹⁶Caní nún-bē'ēru' yöl-la' nadxf'i le naca idú. Naca ca budödē' Jesús yöl-la' na'bán queē', en gútiē' uláz queéru'. Lē'sca caní rē'u ral-la' udódiru' yöl-la' na'bán queéru', para gácalenru' yugu' böchi'ru'. ¹⁷Na'a, núti'tēs nu dē yöl-la' tsahui' que, lē na' dē yödžölió ni, ate' rilé'e böchi' luzé'e, bi riyadzaj queē', en biti' ruhuéchi' ladxi' lē', bi unödžaj queē', ¿naru' nadxf'itsö nu na' Dios? ¹⁸Lib'ili', zxf'ina'do', ral-la' idxí'iru' luzá'aru', calēga len dídza'sö o lu yöl-la' rinnēsö queéru', pero idú ládx-i'ru', enca' len idútē yöl-la' run queéru' ral-la' idxí'iru' luzá'aru'.

Le runru' löza lahuē' Dios

¹⁹⁻²⁰Channö caní nadxf'iru' yugu' böchi' luzá'aru', nóziru' néquiru' que Nu na' naca idútē li, ate' lahuē' Dios huáca cö' dxi icja ládxi'do'oru' channö ruxösa ládxi'do'oru' rē'u, tu' rácada'arē' Dios ca ládxi'do'oru', ate' Lē' nózine' yúgu'tē. ²¹Böchi' luzá'ado', channö cabí ruxösa ládxi'do'oru' rē'u, dē le runru' löza lahuē' Dios ²²tu' nóziru' gunnē' queéru' bítitēs bi inábaru' lahuē'. Caní naca, tu' runru' ca rinná bē' xibá queē', en le raza ládxě'ē Lē'. ²³Lē ni naca xibá queē', para tséajlě'ēru'-nē' Jesucristo, Zxf'inē' Dios, en idxí'iru' luzá'aru' ca na' chigunná bē'enē' rē'u. ²⁴Zóalen Dios nu run ca rinná bē' xibá queē', ate' Dios caz zóalēnē' nu na'. Caní nóziru' dzágaticasē' Lē' rē'u, tu' chigusól-lě'ē Dios Bö Lá'ayi queéru'.

Le naca bē' zóalēnē' Dios Bö' Lá'ayi rē'u

4 Böchi' luzá'ado', biti' tséajlě'ēli' núti'tēs bönni' rnnē' zóalēnē' Dios Bö' Lá'ayi lē', pero guli'sí' bē' bönni' na', channö zóalēnē' Dios Bö' Lá'ayi lē', tu'

ta'dé' zían bönni' ta'zi' yë'e yödžölió ni. Ta'nné' tu'ë didza' uláz queé' Dios. ²Caní gúnbe'ëli'-né' nu bönni' zóalené' Dios Bö' Lá'ayi lé'. Nequi queé' Dios bönni' na' rnné' yálajdo' ca bidé' Jesucristo, Nu gusól-lé'ë Dios, rnné' guca cazé' bönachi. ³Lësca' caní, biti' nequi queé' Dios nu bönni' biti' rnné' yalaj lulu ca bidé' Jesucristo, rnné' biti' guca cazé' bönachi. Bönni' ni néquiné' que na' na' ridá'bagá' Cristo, bönni' na' chibiyónili' ral-la' guídé', ate' na'a chiridé' yödžölió ni.

⁴Zxf'ina'do', néquili' queé' Dios, en chibucúl-lali' nupa na' ta'zi' yë', tu' ná-parö Nu na' zóalen libí'ili' yöl-la' huáca unná bé' ca nu na' ridá yödžölió ni. ⁵Lé-gaquié' náca-gaquié' bönachi yödžölió. Que lé ni na' tu'ë didza' que le naca que yödžölió, ate' bönachi yödžölió ni tu'zé ná-gagaca lé-gaquié'. ⁶Néquiru' rë'u queé' Dios. Nu nunbé' Dios ruzé' nagui rë'u. Nu biti' nequi queé' Dios biti' ruzé' nagui rë'u. Caní núnbe'ëru' nu na' yu'u le Bö' ru'í didza' le naca idúté' li, enca' nu na' yu'u le tu bö' rizí' yë'.

Náljalen Dios yöl-la' nadxí'í

⁷Böchi' luzá'ado', ral-la' idxí'iru' luzá'aru', tu' náljalen Dios yöl-la' nadxí'í, ate' nútí'tës nu nadxí'í luzé'e náljalen ca' Dios, en núnbe'e Dios. ⁸Nu biti' nadxí'í luzé'e, biti' núnbe'e Dios, tu' náljalen Dios yöl-la' nadxí'í. ⁹Caní bulu'e lahui Dios ca nadxí'iné' rë'u, gusól-lé'ë la's dui Zxf'ini cazé' yödžölió ni, para gata' yöl-la' na'bán idú queéru' ni'a queé' Lé'. ¹⁰Caní naca bé' yöl-la' nadxí'í idú, calëga ca nadxí'iru'-né' Dios, pero ca na' Lé' bidxf'iné' rë'u, en gusól-lé'ë Zxf'ini cazé' para gútié', en caní bugúé' dul-la' nabágaru'.

¹¹Böchi' luzá'ado', channö caní bidxf'ide'ené' Dios rë'u, lësca' rë'u ral-la' idxí'iru' luzá'aru'. ¹²Catu caz nu bilé'e Dios, pero channö nadxí'iru'

luzá'aru', Dios zóalené' rë'u, ate' naca bé' nadxí'iru'-né' Dios idú ladxí'ru'. ¹³Nóziru' zóalenru'-né' Dios, ate' Lé' zóalené' rë'u, tu' guchízié' Dios Bö' Lá'ayi rë'u. ¹⁴Netu' bilé'etu' le bené' Dios Xuz, en runtu' ba nalí que. Lé' gusól-lé'ë Zxf'ini cazé' Nu rusölá bönachi yödžölió. ¹⁵Nu bönni' rnné' yálajdo' náquié' Jesús Zxf'iné' Dios, Dios zóalen cazé' bönni' na', ate' lé' zóalené' Dios.

¹⁶Rë'u ni nóziru', en réajlé'ëru' nadxí'iné' Dios rë'u. Yöl-la' nadxí'í náljalen Dios, ate' nu bönni' nadxí'iné' luzé'ë, zóalené' bönni' na' Dios, ate' Dios zóalené' lé'. ¹⁷Caní run dxin yöl-la' nadxí'í lu icja ladxí'do'oru', run ga bití'rö rádxiru' dza ichúguié' Dios quégaca bönachi ilátigaca. Ca náquié' Jesús, nácaru' ca' rë'u yödžölió ni. ¹⁸Channö nadxí'iru'-né' Dios, biti' bi gádxiru'. Cate' nadxí'iru'-né' Dios idú ladxí'ru', runé' ga biti' rádxiru'. Nu radxi, rigu'í rizáca'a. Nu na' radxi, biti' nadxí'í Dios idú ladxí'.

¹⁹Rë'u ni nadxí'iru'-né' Dios, tu' zí'aló bidxf'í quéziné' Lé' rë'u. ²⁰Channö nu inná: "Neda' nadxí'ida'-né' Dios", pero biti' rilé'e dxi'a böchi' luzé'e, nu ni rizí' yë'. Nu biti' nadxí'í böchi' luzé'e nu rilé'e caz, ¿nacxi caz gaca idxí'í Dios, en catu caz bilé'e Lé'? ²¹Caní gunná bé'ené' Jesús rë'u. Gunné': Nu nadxí'í Dios, ral-la' idxí'í ca' böchi' luzé'e.

Ca gaca idéli'ru' lu le raca queéru' yödžölió ni

5 Nútí'tës bönni' réajlé'ë Jesús náquié' Cristo, náquié' zxf'iné' Dios, ate' nútí'tës bönni' nadxí'iné' Dios Nu buzóa lé', ral-la' idxí'iné' ca' luzé'ë nu naca bi'í queé' Dios. ²Caní réquibe'eru' nadxí'iru' yugu' bi'í queé' Dios. Naca caní channö nadxí'iru'-né' Dios, en runru' ca rinná bé'ené' rë'u. ³Caní naca bé' nadxí'iru'-né' Dios. Naca caní channö runru' ca

rinná bé'enë' rë'u, ate' lë na' rinná bé'enë' rë'u bití' naca böniga. ⁴Núti'tës bönni' náquië' bí'i queë' Dios ridéli'në' lu le raca yödzölió ni. Chibidéli'ru' lu le raca yödzölió tu' réajlë'ëru'-në' Dios. ⁵¿Nuzxi na' rideli' lu le raca yödzölió? Run caní nu réajlë' náquië' Jesús Zxí'inë' Dios.

**Dios Bö' Lá'ayi runë'
ba nalí queë' Cristo**

⁶Caní blë'ë Jesucristo. Bidë' bidilë' nisa, en bulaljë' xichönë'. Calégasö bidilë' nisa, pero lësca' bulaljë' xichönë'. Dios Bö' Lá'ayi náquië' Nu run ba nalí queë', tu' naca idütë li didza' ru'ë Dios Bö' Lá'ayi. ⁷Tsonna nupa tun ba nalí queë' Jesús yehua' yubá ni', Dios Xuz, en Dios Zxí'ini, lë' ca' Didza', en Dios Bö' Lá'ayi. Yonné' ni nácagaquië' tuz. ⁸Lësca' caní, tsonna le tun ba nalí queë' luyú ni, ca na' zóalenë' Dios Bö' Lá'ayi Lë', en le bidilë' Jesús nisa, en rön ni' bulaljë' lë'e yaga cruz, ate' yonna ni, tuz ca ta'nná. ⁹Channö sí' lu ná'aru' le tun ba nalí bönachi, le runë' ba nalí Dios nácatëro lesaca'. Lë na' benë' ba nalí Dios naca le benë' ba nalí queë' Jesús, gunné' náquië' Zxí'ini cazë'. ¹⁰Nu réajlë' Zxí'inë' Dios, nazí' lu në'e le nunë' ba nalí Dios. Nu cabí réajlë' Dios, naca ca rna nu na': Dios rizí' yë'ë. Caní naca, tu' cabí guyéajlë' le benë' ba nalí Dios queë' Zxí'inë'. ¹¹Lë ni naca le benë' ba nalí Dios. Gunné' chibennë' yöl-la' na'bán idú queëru', ate' Zxí'inë' na' náquië' Nu nabániru' caní. ¹²Nu bönni' zóalenë' Zxí'inë' Dios lë', dë yöl-la' na'bán idú queë'. Nu bönni' bití' zóalenë' Zxí'inë' Dios lë', bití' dë yöl-la' na'bán idú queë'.

**Ca nóziru' dë yöl-la'
na'bán idú queëru'**

¹³Libí'ili' na' réajlë'ëli'-në' Zxí'inë' Dios, ruzúaja' queëli' lu guichi lë ni para inózili' chidé yöl-la' na'bán idú queëli', en para gaca idú ca réajlë'ëli'-në' Zxí'inë' Dios.

¹⁴Lë ni naca le ruzxöni ládxi'ru' Lë'. Channö bi inábiru' Lë' ca ré'ënë' Lë', Lë' riyönnë' rë'u. ¹⁵Channö nóziru' riyönnë' rë'u ca naca bi rinábiru' Lë', nóziru' ca' ideli' queziru' lë na' rinábaru'.

¹⁶Channö ilé'ëru' böchi' luzá'aru' runë' dul-la' le cabí naché' yöl-la' guti, ralla' inábaru' queë' lahuë' Dios, ate' Lë' unödzejë' yöl-la' na'bán queë'. Caní rnia': Ral-la' inábali' quégaca nupa tun dul-la' le cabí naché' yöl-la' guti. Dë dul-la' le naché' yöl-la' guti. Bití' rnia' inábali' que nu run dul-la' caní. ¹⁷Yúgu'të le cabí naca tsahui' naca dul-la', pero dë dul-la' le cabí naché' yöl-la' guti. ¹⁸Nóziru' bití' rúntica'sö dul-la' nu naca zxí'inë' Dios, tu' rapa chi'ë Zxí'ini cazë' Dios nu na', ate' tu' xihui' bití' sequi' bi gun que.

¹⁹Nóziru' yú'uru' lu në'ë Dios, ate' yúgu'të bönachi tu'í ládxi'gaca le dë yödzölió ni yú'ugaca lu na' tu' xihui'.

²⁰Na'a, nóziru' chibidë' Zxí'inë' Dios, en bennë' yöl-la' réajni' queëru', para gúnbë'ëru' Nu na' naca idütë li. Zóalenru' Nu na' naca idütë li tu' zóalenru-në' Jesucristo, Zxí'inë' Dios. Nu ni naca Dios idú, en Nu runna yöl-la' na'bán idú queëru'. ²¹Zxí'ina'do', guli'gún chi'í cuinli' para cabí tseaj ládxi'li' yugu' budó' guió' budó' yaga. ¡Ca' gaca!

DÍDZA'DO' BUROPI BUZÚAJĚ' JUAN

Núnbě'ëru' le naca idútë li, en yöl-la' nadxí'i

1 Neda', bönni' gula run chi'a bö-nachi queë' Cristo, rugapa' li' Dios, nigula rö queë' Dios, tsözxón len yúgu'të zxf'inu'. Nadxí'ida' libí'ili' tu' núnbě'ëru' le naca idútë li, en calégasö neda', pero lëasca' yúgu'të nupa chinúnbě'gaca le naca idútë li ta'dxí'i libí'ili'. ²Nadxí'itu' libí'ili' tu' núnbě'ëru' le naca idútë li, le zóalenta'sö rë'u. ³Rinábida'-në' Dios Xuz, en Xanru' Jesucristo, Zxf'ini cazë' Dios, uzá' ládxe'ë queé'li', en huéchi' ládxe'ë libí'ili', en gunë' ga soa dxi icja ládxi'do'oli' tu' núnbě'ëli' le naca idútë li, en nadxí'ili' luzá'ali'.

⁴Budzéjade'eda' cate' biyönda' tunbi' zxf'inu' ca naca le naca idútë li, tu' tunbi' ca na' gunná bé'enë' Dios Xuz rë'u. ⁵Na'a, ráta'yua' lo', nigúlado', gunu' ca rinná bë' xibá queë' Cristo. Biti' ruzúaja' quiu' lu guichi tu xibá cubi. Ruzúaja' la' lébisö lë na' gunná bé'enë' rë'u dza ni'te. Gunnë' ral-la' idxí'iru' luzá'aru'. ⁶Caní naca bë' nadxí'iru'-në' Dios. Naca caní channö runru' ca rna le gunná bé'enë' rë'u. Lë na' gunná bé'enë' rë'u naca para idxí'iru' luzá'aru' ca na' chibiyónili' dza ni'te.

Nupa té'ëni ila'zí' ye'e rë'u

⁷Lë ni riguúxjöi'ida' libí'ili', tu' chita'dá zían nupa ta'zí' ye' yödzölió ni, nupa na' bití' ta'zí' lu në'eguequi ca bidë' Jesucristo, gúquië' idú bönachi. Nu na' run caní, naca nu rizí' ye', en nu ridá'baga' Cristo. ⁸Guli'gún chi'i cuinli' para cabí initi le nadé'li'li' tu' guzxi' lu na'li' Cristo, pero guli'güf' ládxi'li' idé'li'li' idútë le ralla' sf'ili' lu në'ë Dios.

⁹Núti'tës nu riguela' nöza yúbölö, en rucá'ana xtídzë'ë Cristo, bití' zóalenë' Dios nu na'. Nu dá'tica'sö xtídzë'ë Cristo, zóalenë' Dios Xuz, enca' Zxf'inë' nu na'. ¹⁰Channö núti'tës nu za' ga zóali', en rusedi xibá yúbölö, bití' ulébili' nu na' lídxili', en bití' guié'li' le: "Guyú'u len netu'." ¹¹Nu rë le: "Guyú'u len netu'", run tsözxón nu na' ca naca le ruá' dö' run nu na'.

Runë' Juan löza idxinë' ga nacu'ë böchi' luzé'ë

¹²Sal-la' le zían ral-la' uzúaja' queé'li' lu guichi, bití' ré'ënda' uzúaja' yúgu'të lu guichi. Runa' löza guída' ga zóali', ate' güf'iru' didza' ruá'a cuinru', para gaca udzéjaru' idú ládxi'ru'.

¹³Zxf'ininu' nigula zxilu', nigula rö queë' Dios, tu'gápabi' Dios li'. ¡Ca' gaca!

DÍDZA'DO' BUNNI BUZÚAJĚ' JUAN

Le naca tsahui' runě' bönni' lě' Gayo

1 Neda', bönni' gula run chí'a bönachi queě' Cristo, rugapa' Dios li', Gayo dxi'i ladxi'. Nadxí'ida' li' tu' núnbě'ėru' le naca idútě li.

² Bócha'ado', rinábida'-ně' Dios guně' ga gaca dxi'a quiu' lu yúgu'tě le runu', en su' ca' dxi'a, ca na' raca dxi'a que bö' naca cazu'. ³ Rudzėjada' tu' ta'dxině' yugu' bóchi'ru' ga zoa', en tuně' ba nalí quiu', ta'nně' nacu' li ladxi', en runu' ca naca le naca idútě li. ⁴ Biti' bi dě le runrö ga rudzėjada' ca lě ni, riyönda' tun nupa nácagaca ca bi'i que caza' ca rnna le naca idútě li.

⁵ Bócha'ado', runu' le naca tsahui', rácalenu' bóchi'ru', en runu' ca' le nácarö lesaca', rácalenu' bóchi'ru' bití' núnbe'enu' légaquiě'. ⁶ Yugu' bóchi'ru' ni tuně' ba nalí quiu' lógaca bönachi queě' Cristo ni, ta'guíxjö'ě ca na' nadxí'inu' légaquiě'. Runu' le naca dxi'a, rugú'u légaquiě' nöza, en rácalenu' légaquiě' ca na' sa'yéaj gunu' quégaca nupa tun xichině' Dios, para ulu'ú'ě nöza. ⁷ Légaquiě' bila'rúajě' ni tu' nadxí'igaquiě' Jesús, en bití' bi ta'zi'ě lu ná'agaca bönachi bití' ta'dá' Cristo. ⁸ Que lě ni na' ral-la' gunru' bal bönachi tun caní, para gúnlenru' légaquiě' dxin que le naca idútě li.

Le cabí naca tsahui' runě' Diótrefes

⁹ Chibuzúaja' lu guichi le uzéajni'i bönachi queě' Cristo ni', pero Diótrefes,

bönni' ni' raza láchxě'ě gáquiě' lo ládja-gaquiě', bití' runě' netu' bal. ¹⁰ Que lě ni na', channö huida' ga zóali', usá'a láchx-í'li' cate' udúbili' ca nácagaca le runě'. Rizí' quídzě'ě netu', en rmně' queětu' le cabí nácate. Bití' rizxón láchxě'ě tsa lě nisö, pero lěsca' bití' runě' bal bóchi'ru' ta'dxině' ni', ate' ruzáguě'ě xinózguequi nupa ni' té'eni ilún légaquiě' bal, en rubéajě' nupa na' ladaj bönachi queě' Cristo.

¹¹ Bócha'ado', bití' gunu' ca tun nupa tua' dö', pero ca tun nupa tun le naca tsahui' gunu'. Nu run le naca tsahui' nequi queě' Dios, pero nu ruá' dö' catu caz benbě' Dios.

Le naca tsahui' runě' Demetrio

¹² Yúgu'tě bóchi'ru' tuně' ba nalí queě' Demetrio, ate' naca bě' runě' le naca idútě li. Lěsca' netu' runtu' ba nalí queě', ate' nózili' nácate lě ni runtu' ba nalí queě'.

Le rinabě' Juan lahuě' Dios

¹³ Zíanrö ca' le gú'unida' uzúaja' quiu' lu guichi, pero bití' ré'ěnda' uzúaja' le lu guíchisö. ¹⁴ Na'a, runa' löza ilé'eteda' li', ate' güf'iru' didza' ruá'a cuinru'.

¹⁵ Rinábida'-ně' Dios guně' ga soa dxi icja láchxí'do'o. Nupa ni ta'dxí'i rě'u tu' gapa Dios li'. Lěsca' li', bugapa Dios tu tu nupa ni' ta'dxí'i rě'u. ¡Ca' gaca!

DÍDZA'DO' BUZÚAJĚ' JUDAS

Judas rugapě' Dios nupa nulidzě' Dios

1 Neda', Judas, tsaz naca' huen dxin queě' Jesucristo, en naca' ca' bóchě'ě Jacobo. Rugapa' Dios lib'ili', nulidzě' Dios Xuz lib'ili', en nadxí'ině' lib'ili', en rapa chí'ě lib'ili' tu' nácali' tuz len Jesucristo. ²Rě'ěnda' inóžili' ca ruhuéchi'da' ládxě'ě Dios lib'ili', en nadxí'ide'eně' lib'ili', enca' ruzóadě'ě dxi icja ládxi'do'oli'.

Nupa tu'sedi le cabí nácatě

³Lib'ili', bóchi' luzá'ado', gúcada' ládxa'a uzúaja' queéli' lu guichi ca naca yól-la' rusólá nadéli'ru', pero run bayudxi uchízia' icja nágalí' para idú ládxi'li' tíl-lalenli' nupa ta'dá'baga' le réajlě'ěru'-ně' Dios, lě na' budödě' Dios tsaz lu ná'agaca nupa néquiguequi quez queě' para ulu'zě didza' que lógaca yúgu'tě bönachi. ⁴Caní run bayudxi guna' tu' bagáchi'sö chigula'yázaleně' bal-lě' bönni' rě'u, Dios buzóě' quégaquiě' dza ni'te ichúguiě' quégaquiě' ila'nítie' tsaz. Biti' ta'yéaj ládxi'gaquiě' Dios bönni' caní. Tu' zoa le ruzá' ládxě'ě Dios queěru', téquině' huáca iluně' le ruá' dö'. Ta'dá'baguě'ě Xanru' Jesucristo. Tuzě' Lě' rinná bé'eně' rě'u.

⁵Chinóz quézili' lě ni, pero rě'ěnda' usá' ládxi'li' ca beně' Xanru' Dios. Sal-la' busólě' bönachi Israel cate' bubéajjě' léguequi luyú Egipto, gudödi ni' busunítie' nupa bítsa'gaca ládjaguequi, en bití' gula'yéajlě' Lě'. ⁶Lěsca' caní, yugu' gubáz lá'ayi queě' Dios, nupa ni' bití' gulún xichíngaquiě', pero bulu'cá'aně' xilátjagaquiě', Dios busayjě' léguaquiě' tu lataj chul-la. Nága'gaquiě' tsaz ni' ga idxinrö dza usiúdxě' Dios yödžölió ni. ⁷Lěsca' caní guca quégaca yödžö Sodoma, en yödžö Gomorra, enca' yugu'

yödžö dzágagaca léguequi. Ca na' guluně' gubáz lá'ayi na', gula'dá'baguě'ě Dios, lěsca' caní guluně' bönni' yugu' lu yödžö na'. Bulu'dödi cuíngaquiě' para guluně' le ruá' dö', en le gula'zěsö ládx-i'gaquiě' le tun ga nu rutufí. Na'a, tu' busaca' zi'ě Dios léguaquiě' lu gu' le cabirö ulu, lě na' guca quégaquiě' naca tu le run gadxi yúgu'těru', para cabí gunru' la' lěbisö.

⁸Sal-la' gulaca lě ni, la' canisö tuně' bönni' ni, bönni' rójácaleně' yěla ta'něně'. Tun dítjaně' idútě le naca cazě'. Ta'dá'baguě'ě le rinná bé'eně' Dios rě'u, en ta'nně' zi'ě quégaca nupa ta'nná bě' yehua' yubá. ⁹Miguel caz, gubáz lá'ayi lo, cate' gudíl-laleně' tu' xihui' para gaca u'ě idú le naca cazě' Moisés, bití' burúguině' udxí'ě dö' tu' xihui' na', pero gudxě' le: "Xanru' uzeně' li' bach." ¹⁰Yugu' bönni' ni ta'nně' zi'ě quégaca le runě' Dios, yugu' le bití' ta'yéajni'ině', ate' yugu' le ta'yéajni'ině' rácasö quégaquiě' ca na' tunba' böa' guixi' bití' ta'yéajni'iba', lě ni tu'guně' dxin, en caní tu'dxía dö' cuíngaquiě'.

¹¹Bica' bayechi' léguaquiě' tu' chiguluně' dul-la' ca na' beně' Caín, ate' lu yól-la' ruhuidi' quégaquiě' chigula'chixi gula'níguině' ca na' guchixi guníguině' Balaam para si'ě dumí, ate' chinaru'gu quégaquiě' ilátie' ca na' gútiě' Coré cate' gudá'baguiě' Moisés. ¹²Yugu' bönni' ni táguleně' tsöžxón lib'ili' cate' rágulí' yugu' güfí huagu lu yól-la' nadxí' queéli'. Tuně' ga ta'chixi ta'nigui nupa dzágagaca lib'ili', tu' tě'aj tagu lizě'. Náca'gaquiě' ca yugu' bönni' ralla' ulu'gágugaquiě'-ba' bö'cu' zxila', pero la' cuíngacasě' tu'gahuě'. Náca'gaquiě' ca böaj lúzxiba bití' nachě'gaca nisa, ate' ruá' bö' léguequi ná'alö ní'ilo. Náca'gaquiě' ca' ca yugu' yaga chibidxín dza bi ila'bía, pero bití' bi ta'bía. Náca'gaquiě' ca' ca yugu' yaga chigula'bidxi idú luí, en chinaládžu'gaca. ¹³Náca'gaquiě' ca' ca

nísado' cate' riyasa ridxía, ate' ribó' bidxina' que, lè na' ruluí' ca naca yöl-la' stu' tunë'. Nácagaquië' ca yugu' böläj lúzx-iba nucá'anagacaba' xinó'zgcaba'. Dios chinunë' quégaquië' ila'yázië' tsaz lataj chul-la.

¹⁴ Ca naca quégaquië' bë'ë ca' didza' Enoc uláz queë' Dios. Enoc na' gúquië' tu bönni' gubábalenë' le igadxí cö' zxf'ini xí'sóë' Adán. Gunné': "Buli'yútsöca', zë'ë Xanru', ate' dzágagaca Lë' zían gayuá' bönachi néquiguequi quez queë'. ¹⁵ Zë'ë para gunë' xíguia' yúgu'të bönachi, en ichúguië' quégaca yúgu'të nupa tua' dö' ila'niti tsaz." Caní gunë' tu' nözi yúgu'të didza' zí' gula'nné' bönni' dul-la' na' queë' Lë'. ¹⁶ Yugu' bönni' caní ta'nné' queë', en ta'z'í' quídzë'ë, en tunë' ca naca le ta'zësö ládxi'gaquië'. Tu'ë didza' lu yöl-la' run ba zxön cuíngaquië', en para ulu'zi'ë xibéquequi, tu'ë didza' le ta'gú'u bönachi yöl-la' zxön.

Judas rusé'ë ládxi'gaca nupa ta'yéajlë' Cristo

¹⁷ Na'a, böchi' luzá'ado', guli'tsöjné yugu' didza' gulu'ë bönni' gubáz queë' Xanru' Jesucristo dza ni'te. ¹⁸ Yugu' bönni' na' gulé' libí'ili': "Yugu' dza tsöjsétë-gaca ulu'luf'i lógaquië' bönni' ulu'titjë' le naca lá'ayi, en ilunë' ca naca le ta'zësö

ládxi'gaquië' le ruá' dö'." ¹⁹ Yugu' bönni' ni tunë' ga irúajli' choplö. Tu'ë didza' lu yöl-la' bönáchisö quégaquië', en bití' zóalenë' Dios Bö' Lá'ayi légaquië'.

²⁰ Na'a, böchi' luzá'ado', guli'sóa tsutsu lu yöl-la' réajlë' queé'li' Dios le naca idú lá'ayi. Buli'lidzë' Dios, ugunli' dxin yöl-la' huáca queë' Dios Bö' Lá'ayi. ²¹ Buli'gá'analenë' Dios, Nu nadx'fi rë'u, en guli'cöza dza ni' uluf'i lahuë' Xanru' Jesucristo, Nu ruhuéchi' ládxi'ë rë'u para gata' yöl-la' na'bán idú queëru'.

²² Guli'gún ga ila'dipa ládxi'gaca nupa raca chopá ládxi'gaca. ²³ Guli'gún ga ulu'lé', le gaca tsca ubéajli' légaquië' lu guf'. Lu yöl-la' radxi queé'li' buli'huéchi' ládxi'li' ia'z'ica'rö bönachi. Guli'gún chi'i cuinli', para cabí gunli' tsözxón légaquië', en cabí gútsa'li' le ruá' dö' tunë'.

Le rigú'uru' Dios yöl-la' zxön

²⁴⁻²⁵ Dios la's dui, Nu nözi caz yúgu'të, en Nu busölá rë'u ni'a que le benë' Xanru' Jesucristo, napë' yöl-la' huáca gun chi'ë libí'ili', para cabí ichixi iníguili', en usudxinë' libí'ili' lahuë' Lë' ga zoë' lu bení' idú. Gunë' ga gácali' idú tsahui', en ga udzëjade'eli'. ¡Gaca caz queë' Dios yöl-la' ba, en yöl-la' zxön, en yöl-la' naca lo, en yöl-la' unná bë', na'a dza, en yúgu'të dza zá'gaca! ¡Ca' gaca!

LE BULU'INĒ' DIOS JUAN

Apocalipsis

Le bulu'e lahui Dios ca naca queē' Jesucristo

1 Lē ni naca le bulu'e lahui Jesucristo, le bē'ē Lē' lataj Dios ulu'ine' yugu' huen dxin queē' ca naca le run bayudxi ilacatē. Jesucristo gusól-lē'ē tuē' gubáz lá'ayi queē', nu na' buzéajni'i neda', Juan, huen dxin queē' Cristo. Gubáz lá'ayi na' bulu'ine' neda' ca naca lē ni. ²Neda', Juan, ruzúaja' lu guichi ni le naca idútē li ca naca yúgu'tē le bilé'eda', en runa' ba nalí que xtídzē'ē Dios, en que le benē' ba nalí Jesucristo.

³Bica' ba nu ulaba didza' ni, ate' bica' bágaca nupa ulu'zē' nágagaca nu na' ulaba xtídzē'ē Dios ni, en ilún ca rnna lē ni nazúaj lu guichi, tu' chizóa gaca.

Juan ruzúajē' le uzéajni'i gadxi cō' bōnachi queē' Cristo

⁴Neda', Juan, ruzúaja' lu guichi didza' ni le uzéajni'i gadxi cō' bōnachi queē' Cristo nacua' luyú Asia. Dios, Bōnni' zoa cazē', en guzóatica'sē', en ral-la' huödē', rinábida'-nē' uzá' ládxē'ē queéli', en gunē' ga cō'ō dxi icja ládxí'do'oli', ate' dzágagaca gadxi bō' Lē' nacua' lahuē' Lē' ga ni' rō'ē rinná bē'ē. ⁵Dzáguiē' ca' Jesucristo Lē'. Jesús ni runē' ca rnnē', en runē' ba nalí queē' Dios. Zí'alō Lē' bubanē' tsaz lu yōl-la' guti, en rinná bé'enē' bōnni' ta'nná bē'ē yōdzōlió ni. Lē' nadxí'ine' rē'u, en gudibē' rē'u, tu' bugúē' dul-la' nabága'ru' len xichōnē' le bulaljē' lē'e yaga cruz, cate' gútiē' uláz queéru'. ⁶Jesucristo benē' ga rinná bé'ēru', en ga nácaru' yugu' bixúz, para cú'uru'-nē' Dios, Xuzē' Jesús, yōl-la' ba. ¡Yōl-la' ba Lē', en gácatica'sō queē' yōl-la' unná bē'! ¡Ca' gaca!

⁷¡Buli'yútsōca'! ¡Zē'ē Cristo lu bōaj lúxiba! ¡Ila'lé'e Lē' yúgu'tē bōnachi, enca' nupa ni' gulún Lē' huē', en bétigaca Lē'! ¡Ila'bōdxi yechi' yúgu'tē bōnachi yōdzōlió ni cate' ila'lé'e Lē'! ¡La'tu' gácatē caní! ¡Ca' gaca!

⁸Caní rnnē' Lē': "Neda' naca' Bōnni' zoē' zí'alō, enca' Bōnni' rōjsétiē' ca naca le risí lo, en le ruúdxitē." Caní rnnē' Xanru', Bōnni' napa cazē' yōl-la' huáca. ¡Zoa cazē' Lē', en guzóatica'sē', en si' ulé'ē!

Rilé'enē' Juan yōl-la' zxōn queē' Jesucristo

⁹Neda', Juan, naca' bōchi' luzá'ali', en tsōzxón rigufi' rizáca'lēna' libí'ili', en tsōzxón len libí'ili' ruzi'a xibé le rinná bē'ē Dios, en nadéli'da' yōl-la' ribōza zxōn ladxí' na' runnē' Jesucristo queéru'. Nadzuna' tu luyú bidxi ni gatsaj láhui'lō nísado', nazí' le Patmos. Nadzuna' tu' bena' libán que xtídzē'ē Dios, en tu' bena' ba nalí queē' Jesucristo. ¹⁰Lu dza lá'ayi queē' Xanru', guzóalenē' Dios Bō' Lá'ayi neda', ate' biyōnda' cúdzu'la' chí'ē tu bōnni' rulidzē' zidzaj. Biyón chí'ē ca ribōdxi lúzuba' bōa' bēdxi. ¹¹Bōnni' ni gudxē' neda': "Neda' naca' Bōnni' zoē' zí'alō, en Bōnni' rōjsétiē' ca naca le risí lo, en le ruúdxitē. Buzúaj lu guichi le riyōnnu', en rilé'enu', ate' gusól-la' le quéguequi gadxi cō' bōnachi quia' nacua' luyú Asia, nupa nacua':

Lu yōdzō Éfeso,
lu yōdzō Esmirna,
lu yōdzō Pérgamo,
lu yōdzō Tiatira,
lu yōdzō Sardis,
lu yōdzō Filadelfia,
lu yōdzō Laodicea."

¹²Buécja' para ilé'eda' Bōnni' na' rulidzē' neda'. Cate' buécja', bilé'eda' gadxi le nuá'gaca gu' le néquiquequini oro. ¹³Ladaj gadxi le nuá'gaca gu' na' bilé'eda' tu Bōnni' riné'ē ca tu bōnni'. Nácué' tu lari' tunna le ridxín xini'ē,

en luchu'ë nasíë' tu le néquini oro. ¹⁴Chiguíchido'os naca guitsa' icjé' ca naca zxila' o ca riná' bögui', ate' rëpi yösa bení' guiój lahuë' ca guí'. ¹⁵Rëpi yösa bení' ni'ë ca guíë bronze dxílido', le nudzé'eda' lu guí' ca bo' yalaj. Zidzaj biyón chi'ë ca riyón tu yegu zxön. ¹⁶Lu nëë ibëla xzóagacaba' gadxi böljaj bení', ate' rirúaj didza' ru'ë le naca ca tu guíë tuchi' natuchi' iropa la'a. Rëpi yösa bení' lahuë' ca gubidza cate' rudzá'a.

¹⁷Cate' bilé'eda' Lë' gudzó'a xini'ë ca tu bönni' nati. Ní'iró Lë' guxóa nëë neda' len nëë ibëla, en gudxë' neda': "Biti' gádxinu'. Neda' naca' Bönni' zoë' zí'alö, en röjsétië'. ¹⁸Naca' Nu nabán caz. Gú-tia', ate' na'a zóatic'a'sa' nabana'. Dë lu na'a inná bé'eda' yöl-la' guti, en lataj ga nacua' nupa nátigaca. ¹⁹Buzúaj lu guichi lë na' chibilé'enu', en le raca na'a, enca' le ral-la' gaca tödi na'a. ²⁰Lë ni naca le nagachi' ca naca quégacaba' gadxi böljaj bení' na' bilé'enu' xzóagacaba' lu na'a ibëla, en ca naca gadxi le nuá'gaca guí' le néquiquequini oro. Gadxi böljaj bení' na' sa'yéajgacaba' gadxi gubáz quégaca gadxi cö' bönachi quia', ate' gadxi le nuá'gaca guí' na' sa'yéajgaca gadxi cö' bönachi quia' na'."

Didza' gusól-lë'ë yödzö Éfeso

2 Gunné' ca' Bönni' na': "Buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzö Éfeso. Caní uzúaju' lu guichi: Ru'ë didza' Bönni' na' xzóagacaba' gadxi böljaj bení' lu nëë ibëla, en ridé' gatsaj láchui'lö gadxi le nuá'gaca guí' na' néquiquequini oro. ²Caní rnnia': Neda' nöz quézida' yugu' le runlí', en ca rúnda'ali' dxin. Nözda' ribózáli' zxön ladxi', en biti' gaca guá' ilenlí' nupa tua' dö'. Nözda' chiguzxí' bé'ëli' nupa ta'nná náca-gaca gubáz quia' pero biti' ca' náca-gaca, ate' na'a nózili' ta'zí' yë'. ³Ribózáli' zxön ladxi', en chigudí' guxzaca'li' tu'

dá'ali' neda', pero biti' gucuidí' láchxi'li'. ⁴Na'a, dë tu le ruzegui libí'ili' didza': Bítirö nadxí'ili' neda' ca na' bidxí'ili' neda' zí'alö. ⁵Que lë ni na', guli'tsöjné ca na' benlí' zí'alö, lë na' busanlí', ate' na'a, bulí'bí'i láchxi'li', en guli'gún ca na' benlí' zí'alö. Channö cabí ubí'i láchxi'li', guída-tia' queé'li', ate' ugúa' le nuá' guí' queé'li' xilataj. ⁶Na'a, zoa tu le rácalen libí'ili'. Biti' rilé'eli' dxi'a le tuné' bönni' nicolafta, nupa na' ta'yéaj láchxi'gaca budó' guiój budó' yaga, en tun le ruá' dö', lë na' lësca' biti' rilé'eda' dxi'a. ⁷Nu riyöni ral-la' uzé nagui lë ni rnnë Dios Bö' Lá'ayi, ru'ilenë' yugu' cö' bönachi quia' neda', Cristo, didza', rnnë: Nupa ila'deli' lu le raca yödzölió, guna' ga ilágugaca le ribía yaga da' gatsaj láchui'lö luyú lachi queë' Dios, le gun ga ila'cuá'tica'sö nabán."

Didza' gusól-lë'ë yödzö Esmirna

⁸Gunné' ca': "Lësca' caní, buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzö Esmirna. Caní uzúaju' lu guichi: Ru'ë didza' Bönni' na' zoë' zí'alö, en náquië' ca' Nu röjsete, Bönni' na' gútië', en bubanë' tsaz. ⁹Caní rnnia': Neda' nöz quézida' le runlí', en ca riguí' rizáca'li'. Nözda' nácali' yechi', pero le nácatë rilé'eli' yöl-la' tsahui' le naca idú. Nözda' ca' ca'tanné queé'li' nupa ni' ta'nná náca-gaca bönachi judfo, pero biti' ca' náca-gaca caní. Nupa ni ta'dá' Satanás, tu' xihui'. ¹⁰Biti' ca' gádxili' le ral-la' quí'i sá-ca'li'. Tu' xihui' na' gun ga idzunlí' bál-lali' libí'ili' lidxi guíë. Caní si' bë' libí'ili', ate' quí'i sáca'li' idú ca chi dza. Guli'tséajlë' neda' ga idxintë dza gátili', ate' neda' gunna' yöl-la' na'bán idú queé'li'. ¹¹Nu riyöni ral-la' uzé nagui lë ni rnnë Dios Bö' Lá'ayi, ru'ilenë' didza' yugu' cö' bönachi quia' neda', Cristo, rnnë: Nupa ila'deli' lu le raca yödzölió, biti' bi gun yöl-la' guti quéguequi, lë na' gaca le

buropi luzuí quégaca nupa ila'cuá'tica'sö lu guí' gabila."

Didza' gusól-lë'ë yödzo Pérgamo

¹² Gunné' ca': "Lësca' caní buzúaj lu guichi didza' ni isól-lu'u queé' gubáz quia' zóalené' bönachi quia' lu yödzo Pérgamo. Caní uzúaju' lu guichi: Ru'ë didza' Bönni' na' nu'ë gufé tuchi' na' natuchi' iropa la'a. ¹³ Neda' nöz quézida' le runli'. Nözda' ca' zóali' ga ni' rinná bë' Satanás, tu' xihui', pero ni ruzxöni ládxi'li' neda'. Biti' ca' nusanli' ca réajlë'ëli' neda'. Biti' busanli' le yugu' dza ni' cate' gulútië' Antipas, bönni' ni' bëntica'së' ba nalí quia', en gútië' ga ni' zoa Satanás, tu' xihui'. ¹⁴ Na'a, dë tu chopa le tu'zegui libí'ili' didza': Nacuá'len libí'ili' bal-la bönachi lu yödzo Pérgamo, nazí lu né'eguequi xibá queé' Balaam, bönni' ni' busédinë' Balac benë' ga gula'chixi gula'nigui bönachi Israel, ate' gulahuë'-ba' yugu' böa' bédxido' gulútiagaquie'-ba' lógaca budó' guió' budó' yaga, en gulunë' le ruá' dö'. ¹⁵ Lësca' caní nacuá'len libí'ili' nupa ni' nazí lu né'eguequi xibá quégaca bönachi nicolaíta, lë na' bití' rilé'eda' neda' dxi'a. ¹⁶ Que lë ni na', bulí'bí' ládxi'li' na'a. Channö cabí ubí' ládxi'li', guídatea' ga zóali', en tíl-lalena' légaquie' len didza' rirúaj ruá'a, le naca ca tu gufé tuchi'. ¹⁷ Nu riyöni ral-la' uzé' nagui lë ni rnnë' Dios Bö' Lá'ayi, ru'ílenë' yugu' cö' bönachi quia' neda', Cristo, didza', rnnë': Nupa ila'deli' lu le raca yödzölió, guna' ga ilágugaca yöta maná nagachi'. Unödza' ca' tu guió' chiguíchido' quégaquie', ate' lu guió' na' nazúaj tu la cubi, cuntú nu nunbë' le, pero núpaso na' ila'zfi' le, ilúnbë'e la na'."

Didza' gusól-lë'ë yödzo Tiatira

¹⁸ Gunné' ca': "Lësca' caní, buzúaj lu guichi didza' ni isól-lu'u queé' gubáz quia' zóalené' bönachi quia' lu yödzo

Tiatira. Caní uzúaju' lu guichi: Ru'ë didza' Zxí'inë' Dios, Bönni' na' dxía guió' lahuë' nátagaca ca guí', ate' ni'ë nátagaca ca guíë' bronce dxí'ido'. ¹⁹ Caní rnnë': Neda' nöz quézida' le runli'. Nözda' ca nadxí'ili' neda', en ca réajlë'ëli' neda'. Nözda' ca' ca runli' xichina' lu yöl-la' riböza xzön ladxí' queéli'. Nözda' nácáro idú ca runli' yugu' lë ni ca benli' z'falö. ²⁰ Nacuá' tu chopa le tu'zegui libí'ili' didza': Ru'í'ili'-nu lataj nigula na' lënu Jezabel, rnnanu ru'ínu didza' uláz queé' Dios, ate' ni'a que le rusédinu rizí' yé'enu bönni' tunë' xichina'. Rusédinu légaquie' le run ga tunë' le ruá' dö', en tahuë'-ba' böa' bédxido' ta'gu'ë lé-gacaba lógaca budó' guió' budó' yaga. ²¹ Neda' bë'a-nu lataj ubí' ládxi'nu, pero bití' ré'ëninu ucá'ananu le ruá' dö' na' runnu. ²² Que lë ni na' chú'una'-nu tu le gátí'nu ga na' quí' sáca'nu lu xihuë'ënu tsözxön len nupa gulún tsözxön len lënu le ruá' dö'. Caní guna' na'a channö cabí ulu'bí' ládxi'guequi para cabirö ilún dulla' na'. ²³ Guna' ga ilátibi' zxí'ininu. Caní gaca, iléquibe'e yúgu'të cö' bönachi quia' ruyúa' le ta'bequi ícjaguequi, en le ta'zá' ládxi'gaca bönachi, ate' ubí'a queéli' tscana le runli'. ²⁴ Ia'zica'li' zóali' yödzo Tiatira, nülöli' bití' nazí' lu ná'ali' lë na' rusédinu, en bití' nazédali' lë na' ta'nná bönachi ni' naca le nayéajni' idú, pero le nácatë naca xtida' Satanás, tu' xihui', rea' libí'ili': Biti' usubága'a libí'ili' ia'tú le ral-la' gunli'. ²⁵ Na'a, lë na' chinazí' lu ná'ali', guli'gún chí' ga idxintë dza huöda'. ²⁶ Bönni' ni' ila'déli'në' lu le raca yödzölió, en ilunë' ca ré'ënda' neda' ga údxitë, neda' guna' ga ila'nná bé'enë' bönachi idútë yödzölió. ²⁷ Ca na' budödë' Xuza' Dios yöl-la' unná bë' lu na'a, neda' ca' guna' ga ila'nná bé'enë' yugu' yödzö, ate' gata' lu ná'agaquie' tu xiyaga gufé, ate' ulu'zxuzxjë' bönachi na' ca nu ruzxuzxaj xziga' yó'öna néquini yu. ²⁸ Gu'a ca' le naca ca böljaj hui sila quégaquie'.

²⁹Nu riyöni ral-la' uzé nagui læ ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

Didza' gusól-lë'ë yödzo Sardis

3 Gunnë' ca': "Lësca' caní buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzo Sardis. Caní uzúaju' lu guichi: Ru'ë didza' Bönni' na' nacuá'len Lë' gadxi bö' na', ate' zxóagacaba' gadxi bölaj bení' lu në'ë ibëla, rnnë': Neda' nöz quézida' le ruá' dö' runli', en nözda' chinati cázali' sal-la' téquiguequi bönachi zóali' nabanli'. ²Buli'subán ládx-i'li'. Guli'gún tsutsu le nacuá'len libí'ili', le chizóa ilátigaca, tu' réquibe'eda' le runli' biti' naca idú tsahui' lahuë' Dios. ³Guli'tsöjné na'a xibá na' biyónili' le guzxi' lu ná'ali'. Guli'gún ca rnna xtídzë'ë Dios, en buli'bfí ládx-i'li'. Channö cabí usubán ládx-i'li', guída' ga zóali' tsáli-do'os ca na' ridxinë' tsáli-do'os gubán, en biti' inózili' bizxi dza na' guída' ga zóali'. ⁴Nacuá'len bal-la bönachi libí'ili' lu yödzo Sardis, nupa biti' nácagaca xihui'. Ila'dalen nupa ni neda', nácugaca lari' chiguíchido'os le rulu'fí nuhuóacagaca idú tsahui', en nácagaca lesaca' gaca caní quéguequi. ⁵Nupa ila'deli' lu le raca yödzölió ugácua' léguequi lari' chiguíchido'os, en biti' usúlua' léguequi chinazúajgaca lu guichi ga nazúajgaca lágaca nupa nadéli'gaca yöl-la' na'bán idú. Si' lu na'a nupa ni lahuë' Zuza' Dios, enca' lógaquië' gubáz lá'ayi queë'. ⁶Nu riyöni ral-la' uzé nagui læ ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

Didza' gusól-lë'ë yödzo Filadelfia

⁷Gunnë' ca': "Lësca' caní buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzo Filadelfia. Caní uzúaju' lu guichi: Ru'ë didza' Bönni' na' náquië' lá'ayi, en ru'ë

didza' idütë li, en dë lu në'ë xzí'ini guíë queë' David, bönni' gunná bë'ë. Bönni' na' ru'ë didza' risálajë' ga nu riyaza, ate' cuntu nu gaca usayaj le, en rusayjë' ga nu riyaza, ate' cuntu nu gaca isalaj le. ⁸Bönni' ni rnnë': Neda' nöz quézida' le runli'. Nözda' nápalí' láti'do'os yöl-la' huáca, pero runli' ca rnna xtídz'a'a, en biti' rutu'fíli' rnnali' néquili' quia'. Que læ ni na' nuzóa' loli' tu ga nu tsaz le nayalaj, ate' cuntu nu gaca usayaj le. ⁹Buli'yútsöca', ta'dé' bönni' ni' Satanás, tu' xihui', en ta'zi' yë'ë, ta'nnë' nácagaquië' bönachi judío ta'yéaj ládx-i'gaca Dios, pero biti' nácagaquië' caní, guna' ga ila'dxinë' loli', en ulu'zechu zxfbigaquië' xiní'ali'. Nf'irö iléquibe'enë' nadxf'ida' libí'ili'. ¹⁰Tu' benli' ca rnna xtídz'a'a, en gulózali' zxön ladxi', gun chi'a libí'ili' dza na' ila'gufi ila'zaca' yúgu'të bönachi lu yödzölió ni, læ na' gaca para si' bë' léguequi. ¹¹¡Si' guída'! Que læ ni na' guli'gún chi'i le nápalí', para cabí gaca nu gun ga cabí s'í'ili' læ na' ral-la' gunna' queé'li'. ¹²Núlöli' ni' idéla'li' lu le raca yödzölió, neda' guna' ga gácali' tsutsu ca nácagaca ya'zxón, ate' sóali' yudo' ga na' zoë' Dios, en catu caz irúajli' ni'. Udá'a libí'ili' ca læ' Dios quia', enca' ca læ yödzö queë' Dios le naca Jerusalén cubi, le huötaj irúaj yehua' yubá lu në'ë Dios. Lësca' udá'a libí'ili' La' cubi. ¹³Nu riyöni ral-la' uzé nagui læ ni rnnë' Dios Bö' Lá'ayi, ru'ilenë' yugu' cö' bönachi quia' neda', Cristo, didza'."

Didza' gusól-lë'ë yödzo Laodicea

¹⁴Gunnë' ca': "Lësca' caní buzúaj lu guichi didza' ni isól-lu'u queë' gubáz quia' zóalenë' bönachi quia' lu yödzo Laodicea. Caní uzúaju' lu guichi: Ru'ë didza' Bönni' na' zoë' tsaz, Bönni' runë' ca rnnë', en ru'ë didza' idütë li ca runë' ba nalí, en náquië' ca' Bönni' na' gulén lu në'ë yúgu'të le benë' Dios. ¹⁵Caní rnnë': Neda' nöz quézida' le runli'. Ca run-

li' naca ca nisa biti' naca ziaga, tu' cabí rucá'anali' tsaz neda', en biti' naca ca nisa zögui', tu' cabí dá'ali' neda' idú ládx-i'li'. Dxi'arö gaca la' gácali' ca nisa ziaga o ca nisa zögui'. ¹⁶Na'a, tu' nácali' ca nisa nati yúlasö, en biti' nácali' ca nisa ziaga, en biti' nácali' ca nisa zögui', chú'una' libí'ili' ca run nu ruhuébi nisa nati yula na'. ¹⁷Libí'ili' rnnali' rilé'eli' yöl-la' tsahui' queéli', en raca dxi'a queéli', en biti' bi riyadzaj queéli', pero biti' réquibe'eli' le nácali'. ¡Bayechi' nácali'! ¡Nácali' xizí'! ¡Nácali' yechi', en lo chulla, en ridali' xiguídisö! ¹⁸Que læ ni na', neda' ruzéajni'ida' libí'ili' gá'uli' le naca ca oro lu na'a neda' le nuna' dxi'a lu guí, para gata' yöl-la' tsahui' idú queéli'. Ral-la' gá'uli' ca' lari' chiguichi quia' le gáculi' para igachi' yöl-la' xiguídidö queéli' le run ga nu rutuí'i. Ral-la' gá'uli' ca' quia' le gun ga ulu'huóaca guió'j loli' para gaca ilé'eli' le naca quia'. ¹⁹Neda' ruzeda' bach, en run zi'a yúgu'të nupa nadxi'ida' channö cabí tun le naca dxi'a. Que læ ni na', buli'bí'i ládxi'li', en guli'gún xichina' idú ládxi'li'. ²⁰Buli'yút-söca', neda' caz zuína' ga nu riyaza, en rulidza'. Channö nútí'tës nu yöni chi'a, en isalaj quia', tsázia', en gágulena' nu na', ate' nu na' gágulen neda'. ²¹Núlöli' idéli'li' lu le raca yödzülió, neda' guna' ga có'öli' tsözxón len neda' ga na' rö'a rinná bë'a, ca na' benë' ca' Xuza' quia' neda'. Bidéli'da' neda' lu le guca quia', ate' guró'lena' Xuza' tsözxón ga na' rö'ë rinná bë'ë. ²²Nu riyöni, ral-la' uzé' nagui læ ni rnnë' Dios Bö' Lá'ayi, ru'ilenë' didza' yugu' cö' bönachi quia' neda', Cristo."

Yöl-la' ba ta'gu'ë Dios yehua' yubá

4 Gudödi gulaca yugu' læ ni, buyúa', en bilé'eda' tu ga nu riyaza le nayalaj yehua' yubá. Biyönda' ca' chi'ë bönni' na' biyönda' zí'alö, ate' bulidza zidzaj ca ribödxi lúzuba' böa' bëdxi. Chi'ni bu-

lidza neda', gunná: "Gudá xitsá'alö ni, ate' neda' ulu'ida' li' le run bayudxi ilaca tödi ni."

²La' ní'isö guzóalenë' Dios Bö' Lá'ayi neda', ate' bilé'eda' yehua' yubá ni' tu lataj ga Nu rö'ö rinná bë', en bilé'eda' ca' Nu na' rö'ö lataj na'. ³Rëpi yösa bení' Nu na' rö'ö lataj na', ca na' rëpi yösa bení' guió'j jaspe, en guió'j cornalina, yugu' guió'j nazáca'da'. Idú gási-bi'ilö lataj na' zoa biguita' le naca lachi ca naca guió'j esmeralda, le répida' yösa bení'. ⁴Idú gási'bi'ilö lataj na' nacuá' ca' ia'tapa uruá' lataj gapa ta'bó' nupa ta'nná bë', ate' yugu' lataj na' rö'ögaquië' tapa uru'ë bönni' gula, nácugaquië' lari' chiguíchido'os, en dxíagaca ícjagaquië' le néquiguequini oro. ⁵Ta'ruáj yösa, en guziú' rinné lu lataj lo ga ni' rö'ö Nu na', ate' bö zxön ru'u. Lahui' lo lataj na' tu'zeni' gadxi le ta'gú'u bení', le nácagaca gadxi bö' dzágagaca Dios. ⁶Ca dódilö lahui lataj ni dë tu ca naca tu nísado' le rëpi yösa bení' ca guió'j jara.

Nacuá' tapa nupa nabángaca cuiti lataj na', tsólá'a huéaj, ate' zían guió'j lógaca dxíagaca zaca' cúdzi'lóguequi, en láhuilóguequi. ⁷Tu nu nutsa' ladaj tapa ni nalá' ca nácaba' bëdxi guixi'. Nu na' buropi nalá' ca nácaba' bëdxi, ate' nu na' bunní nalá' lahui ca naca lo bönni', ate' nu budapi nalá' ca nácaba' bisía' ruzuba'. ⁸Idápatë nupa ni, nacuá' xopa xiligaca que queëguequi, ate' idá'alóguequi, en lé'elóguequi xiliguequi dxíada'gaca zían guió'j lóguequi. Rëla, en te za biti' ta'cuá' dxisö, ta'nná:

¡Lá'ayi! ¡Lá'ayi! ¡Lá'ayi náquië' Xanru' Dios!

¡Napa cazë' yöl-la' huáca!

¡Guzóa cazë' Lë', en zoa cazë', en chizóa ulé'!

⁹Nupa na' nabángaca ta'gú'u yöl-la' ba Nu na' rö'ö rinná bë', en zóatica'sö nabán. Tun bal Nu na', en tē Nu na': "Xclenu'." Bátati'tës tun idapa na' caní,

¹⁰ tu'tsaga lógaca tapa uru'ë bönni' gula na' lu yu lahui' lo Nu na', en ta'yéaj ládxi'gaca Nu na' zóatica'sö, en tu'cu'ë le néquiguequini oro dxía ícjagaquië' lahui' lo lataj ga ni' rö'ö rinná bë' Nu na', ta'nné':

¹¹ ¡Xantu' Dios, nacu' lesaca' cú'utu' Li' yöl-la' ba, en guntu' Li' bal, en gata' quiu' yöl-la' unná bë' tu' benu' yúgu'të le dël!
¡Ca ré'ëni quézinu' nacuá', en gula'sí lo nacuá'!

Tu guichi, en Bönni' náquië' Bö'cu' Zxíla'do'

5 Ní'irö bilé'eda' tu guichi lu na' ibëla Nu na' rö'ö lataj lo. Guichi na' naca tu guichi nudubi, en dá'gaca didza' lé'elö, en láhuilö. Naguela' guichi na' gadxi le nusáyajgaca le. ²Bilé'eda'-në' tuë' gubáz lá'ayi lo, ate' bë'ë zidzaj didza', gunné': "¿Nuzxi naca lesaca' uladzu' le naguéla'gaca guichi ni, en usalaj le?"

³Cuntu nu guca usalaj guichi na', en biti' guca nu uyú le, calëga nu zoa yehua' yubá, en calëga nu zoa luyú, en calëga nu zoa zxánilö luyú. ⁴Ní'irö gurödxá' tu' cabí bidzöli nu naca lesaca' usalaj guichi na', en biti' bidzöli nu naca lesaca' ulaba le, en cuntu nu naca lesaca' uyú le. ⁵Ní'irö tuë' bönni' gula ni' gudxë' neda', gunné': "Biti' cödxu'. Bönni' na' náquië' ca bëdxi guixi', en nabábalenë' zxf'ini xí'sóë Judá, en náquië' ca' zxf'ini xí'sóë David, chibidéli'në' lu yúgu'të le raca, en séqui'në' uládu'ë le naguéla'gaca guichi ni, en usálajë' le."

⁶Ní'irö bilé'eda'-në' Bönni' náquië' Bö'cu' Zxíla'do', zuínë' lahui' lo lataj lo na' zoa gatsaj láhui'lö nupa na' nabángaca, en gatsaj láhui'lë' ca' yugu' bönni' gula na'. Dxíë' huë' ca naca que tu bö'cu' zxíla' zoa nu bëti lëba' lahuë' Dios, nacuá' gadxi lúzuba', en gadxi guió'j loba', le tu'lufí ca nácagaca gadxi bö'

na' dzágagaca Dios, nasól-lë'ë léguequi idütë yödzülió. ⁷Gudödë' Bönni' náquië' Bö'cu' Zxíla'do', en gudélë'ë guichi na' lu na' ibëla Nu na' rö'ö lataj lo na'. ⁸Cate' chigudélë'ë guichi na', bulu'zóa zxíbiguequi idapa nupa na' nabángaca, en idapa uru'ë bönni' gula na' lahuë' Bönni' na' náquië' Bö'cu' Zxíla'do'. Tu tuë' bönni' gula na' zóngaqië' le rulla nazí' le arpa, en nuá'agaquië' ca' yugu' zxf'iga'do' néquiguequini oro, yugu' le yúdzugaca yalaj, lë na' rulufí yöl-la' rulidza Dios quégaca bönachi queë'. ⁹Tul-lë' tu le rulla yöl-la' ba, le naca cubi, le rnna caní:

Nacu' lesaca' quélu'u guichi na', en uládu'u le naguéla'gaca le, tu' bë'u lataj yugu' bönni' gulútië' Li', ate' len xichönu' böá'uu' bönachi para ilequi queë' Dios, nupa nácagaca bönachi izá'a nacuá' idütë yödzülió,

bönachi tu'í yúgu'të didza' yúbölö, en nabábagaca yúgu'të yödzo, en yúgu'të luyú nacuá' idütë yödzülió.

¹⁰Benu' ga nácagaquië' bönni' ta'nná bë'ë en ga nácagaquië' bixúz queë' Dios queëru'.

Benu' ga ta'nná bë'ë lu yu yödzülió.

¹¹Ní'irö buyúa', en biyönda' chí'igaquië' gubáz lá'ayi zían. Zían gáyu'ë, en gáyu'ë nacu'ë. Nacu'ë idú gásibi'ilö lataj lo na' tsözxón len nupa na' nabángaca, enca' yugu' bönni' gula na'. ¹²Tu'ë zidzaj didza' yúgu'të, ta'nné':

¡Bönni' na' náquië' Bö'cu' Zxíla'do' gulútië', náquië' lesaca' gata' yöl-la' unná bë' lu nëë, en yöl-la' tsahui', en yöl-la' réajni'i, en yöl-la' huáca!
¡Náquië' lesaca' gunru'-në' bal, en tseaj ládxi'ru' Lë', en cú'uru'-në' yöl-la' ba!

¹³Ní'irö biyönda' tul-la yúgu'të le benë' Dios yehua' yubá, en lu yu yödzölió, en xzánilö luyú, en lu nísado'. Tul-la yúgu'të le nacua' yugu' lataj na', ta'nná:

¡Yöl-la' ba Nu na' rö'ö lataj lo,
enca' Bönni' na' náquië' Bö'cu' Zxíla'do'!
¡Gúntica'siru'-në' bal
en cú'utica'siru'-në' yöl-la' ba,
ate' inná bé'tica'së' Lë'!

¹⁴Idápatë nupa na' nabángaca ta'nná:
“¡Ca' gaca!”

Ní'irö idapa uru'ë bönni' gula na' bulu'tsaga lógaquië' lu yu, en gula'yéaj ládxi'gaquië' Nu na' zóatica'sö.

Yugu' le naguéla'gaca guichi

6 Ní'irö bilé'eda'-në' Bönni' náquië' Bö'cu' Zxíla'do', ate' buládzü'ë tu le naguela' guichi na', ate' biyönda' tu nu nutsa' ladaj idapa na' nabángaca, ate' biyón chi'i ca guziú' rinné, gunná: “¡Gudá uyú'!”

²Buyúa', en bilé'eda'-ba' tuba' böa' chiguichi, ate' nu na' dxía lëba' zön tu uxiti' yaga. Gulu'ë lë' tu le néquini oro udxíë' icjë', ate' birúajë' ca tu nu nácatëro lo para idéli'në' lu gudil-la.

³Cate' buládzü'ë le buropi le naguela' guichi na', biyönda' nu buropi na' nabán, ate' gunná: “¡Gudá uyú'!”

⁴Ní'irö birúajba' ia'tuba' böa', nácaba' xiná. Bulu'dödë' lu në'e nu na' dxía lëba' yöl-la' huáca unná bë' tsöjtúa yöl-la' riböza dxi'a tsáhui'do' quégaca bönachi, en gun ga iluti luzé'eguequi. Bulu'nödzejë' queë' tu guíë tuchi' zxon.

⁵Cate' buládzü'ë le bunny le naguela' guichi na', biyönda' nu bunny na' nabán, ate' gunná: “¡Gudá uyú'!”

Buyúa', en bilé'eda'-ba' tuba' böa' gasaj, ate' nu na' dxía lëba' zön tu zxicóns. ⁶Biyönda' ru'í didza' tu chi'i gatsaj láhui'lö tapa na' nabángaca, ate' gunná: “Chopa guíë zxoá' xtila len lazraj que tu dza huen dxin tu' gaca gubín, en

xopa guíë zxoá' cebada len lazraj que tu dza huen dxin, pero biti' gunu' ga yadzaj le naca za, en biti' bi gunu' que xisi uva nal-la.”

⁷Cate' buládzü'ë le budapi le naguela' guichi na', biyönda' ru'í didza' nu budapi na' nabán, ate' gunná: “¡Gudá uyú'!”

⁸Buyúa', en bilé'eda'-ba' tuba' böa' gulaj, ate' nu na' dxía lëba' naz'í le Yöl-la' Guti, ate' zéajlen nu na' nu naz'í le Lataj Chul-la. Bulu'dödë' lu në'e nu na' inná be'e gatsaj tu gatsaj bönachi nacua' yödzölió para guti léguequi len guíë tuchi', en len yöl-la' ridún, en len yugu' yödzöhué', en len yugu' böa' guixi' sínia' dzó'öba' luyú.

⁹Cate' buládzü'ë le guyu' le naguela' guichi na', bilé'eda' zcan bucugu yehua' yubá ni' yugu' bö' gulaca cazë bönni' ni' gulútië' légaquië' tu' gulunë' libán que xtídzë'ë Dios, en tu' gulunë' ba nalí queë'.

¹⁰Gulu'í zidzaj didza' yugu' bö' ni, gula'nná: “¡Xantu' Lá'ayi, runu' ca rño'! ¡Bátaxi caz uchi'a usöróu' queé'tu', en uz'í lëbu' yugu' bönni' nacu'ë yödzölió tu' gulútië' netu'?”

¹¹Bulu'nödzejë' quéguequi yugu' lari' chiguíchido'os ilácuë', en gulé' léguequi: “Ral-la' uz'í ládxi'li' ia'tú chí'ido'osö, ga idxinró dza ila'dxín yúgu'të luzá'ali' huen dxin queë' Cristo ni, yugu' bönni' na' ral-la' iluti bönachi légaquië' ca' ca na' bé'tigaca lib'íli'.”

¹²Cate' buládzü'ë le buxzopi le naguela' guichi na', buyúa', en bilé'eda' gudó-dida' budó' zxu' luyú. Böaca gasaj gubidza, en guca ca tu lari' guitsa' gasaj, ate' böaca beo' xiná ca naca rön. ¹³Gula'guínnaj böljaj lúzxiba lu yu, le guca ca raza que yaga higo, cate' ta'guínnaj le ribía cate' rutá le bö' budunu'. ¹⁴Gudödi que lúzxiba, ate' guca que ca raza que tu guichi cate' nu rutubi le. Bulu'tsá' xilátjagaca yúgu'të gu'ado', enca' yúgu'të gapa zoa luyú bidxi lu nísado'. ¹⁵Ní'irö yugu'

bönni' ta'nná bē'ē luyú, en yugu' bönni' lo, en yugu' bönni' ta'lé'enē yöl-la' tsahui', en yugu' bönni' ta'nná bé'enē bönni' rōjáquiē' gudil-la, en yugu' bönni' dē lu ná'agaquiē', en yúgu'tē nupa nadó'ogaca, en yúgu'tē nupa bití' nadó'ogaca bulu'cachi' lógaquiē' gapa naca znan bulóaj, en gapa naca lē'e guió'j lu gu'fado'. ¹⁶ Gulé' yugu' gu'fado' na', en yugu' lē'e guió'j na': "Guli'dubága' netu', en buli'cachi' netu', para cabí ilé'e Nu na' rō'ō lataj lo ni' netu', en para cabí ideli' yöl-la' rilé queē' Bönni' na' náquiē' Bō'cu' Zxíla'do' netu'. ¹⁷ Chibidxín dza uluf'i lahui yöl-la' rilé quégaquiē', ate' ¿nuzxi caz sequi' guá' ilén le?"

Tu gayuá' yu' tapa-un milē' bönni'

7 Gudödi gulaca yugu' lē ni bilé'eda' tapa gubáz lá'ayi zuíguequinē' idapa la'a yödzölió. Tu'záguē'ē xinó'z'gaca idapa bö' recja tsólá'a huéaj luyú, para cabí tsecja bö' luyú yödzölió, en para cabí tsecja lu nísado', en para cabí utá yaga. ² Bilé'eda' ca' ia'túē' gubáz lá'ayi zē'ē rirúajē' ga rilén gubidza. Nu'ē tu le udé'ē nupa nácagaca queē' Dios ban le gaca bē' léguequi. Bē'ē zidzaj didza', en bulidzē' idapē' gubáz lá'ayi ni' nadödi lu ná'agaquiē' yöl-la' huáca unná bē' ilún dítjanē' luyú, en nísado'. ³ Gudxē' légaquiē': "Biti' gun dítjali' luyú, en nísado', en yugu' yaga cate' udá'arötu' tu le gaca bē' ra' xigágaquiē' bönni' huen dxin queē' Dios queéru'."

⁴ Biyönda' tsca nácagaquiē' bönni' da' légaquiē' lē na' naca bē'. Nácagaquiē' idú tu gayuá' yu' tapa-un milē' ladaj yúgu'tē cō' zxi'ini xi'sóē' Israel. ⁵ Yugu' bönni' na' da' légaquiē' lē na' naca bē' nácagaquiē': Chinnu milē' dī'a dza queē' Judá. Chinnu milē' dī'a dza queē' Rubén. Chinnu milē' dī'a dza queē' Gad. ⁶ Chinnu milē' dī'a dza queē' Aser. Chinnu milē' dī'a dza queē' Neftalí. Chinnu milē' dī'a dza queē' Manasés.

⁷ Chinnu milē' dī'a dza queē' Leví.

Chinnu milē' dī'a dza queē' Isacar.

⁸ Chinnu milē' dī'a dza queē' Zabulón.

Chinnu milē' dī'a dza queē' José.

Chinnu milē' dī'a dza queē' Benjamín.

Bönachi guizxi yu nácugaca lari' chiguíchido'os

⁹ Gudödi guca lē ni buyúa', en bilé'egacada' bönachi zían, cuntu nu gaca ulaba léguequi. Nabábagaquiē' yúgu'tē yödzö tu'f'i didza' yúbölö idútē yödzölió. Zuíguequinē' ca dódilö lahui lataj lo, ga na' rō'ē ca' Bönni' na' náquiē' Bō'cu' Zxíla'do', en nácugaquiē' lari' chiguíchido'os, en zóngaqueiē' zin. ¹⁰ Tu'ē zidzaj didza' yúgu'tē, ta'nné':

¡Yöl-la' rusölá za' lu nē'ē Dios queéru',
rō'ē lataj lo ni,
en za' ca' lu nē'ē Bönni' na' náquiē' Bō'cu'
Zxíla'do'!

¹¹ Zuíguequinē' yúgu'tē gubáz lá'ayi idú gásibi'ilö lataj lo na', enca' idú gásibi'ilö ga nacu'ē bönni' gula, enca' idú gásibi'ilö ga nacua' idapa na' nabángaca, ate' tu'tsaga lógaquiē' lu yu ca dódilö lahui lataj lo na', en ta'yéaj láchxi'gaquiē' Dios, ¹² ta'nné':

¡Ca' gaca! ¡Yöl-la' ba Li', Dios queétu'!
¡Napu' yöl-la' zxon, en yöl-la' réajni'!
¡Rétu' Li': "Xclenu", en runtú' Li' bal!
¡Napu' yöl-la' unná bē', en yöl-la' huáca!
¡Gácatíca'só caní quiu', Dios queétu'!
¡Ca' gaca!

¹³ Ní'irö gunábinē' neda' tuē' bönni' gula na', gunné': "¿Nupxi na' nácugaca lari' chiguíchido'os, en gapxi bönni' légaquiē'?"

¹⁴ Neda' gudxa' lē: "Xan, li' nöz quézinu'."

Lē' gudxē' neda': "Nupa ni gula'gufi gula'záca'da'. Gula'guibē' lari' nácugaquiē', en bulu'ún léguequi chiguíchido'os len xichönē' Bönni' na' náquiē' Bō'cu' Zxíla'do'. ¹⁵ Que lē ni na' nacu'ē ca dódilö lahui lataj lo ga rō'ē

rinná b'ë Dios, en tunë dxin lahuë Lë' rëla, en të dza lu yudo' queë'. Nu na' r'ö'ö lataj lo ni gun chi'i légaquië' tu' zóalenticas'ö légaquië'. ¹⁶Bí'ti'rö ila'dunë', en bí'ti'rö ila'bidxë' nisa, en bí'ti'rö ila'yéguinë' gubidza, en bí'ti'rö iléquinë' xilá ¹⁷tu' uyúë' Bönni' na' náquië' Bó'cu' Xzila'do' légaquië' ca nu uyú bö'cu' xzila'. Zoë' gatsaj láhulö lataj lo na'. Ichë'ë légaquië' gapa ralaj nisa le ru'í yöl-la' na'bán, ate' Dios uzxië' lógaquië' nisa ta'bödxë'."

Le igadxi le naguela' guichi

8 Cate' buládu'ë le igadxi le naguela' guichi na', guró'ö dxi yehua' yubá idú gatsaj hora. ²Ní'irö bilé'egacada'në' gadxi gubáz lá'ayi na' zuíguequinë' lahuë' Dios, ate' bulu'dödë' lu ná'agaquië' gadxi lúzuba' böa' bëdxi. ³Ní'irö bidë' ia'túë' gubáz lá'ayi, nu'ë tu xzíga'do' néquini oro, en guzuínë' ra' bucugu yehua' yubá ni'. Gulú'udë'ë yalaj lu në'ë para ugutsë' le len yöl-la' rulidza Dios le gulún yúgu'të bönachi queë' Cristo, en uzégui'ë le lu bucugu na' néquini oro, le zoa lahui lo lataj lo na'. ⁴Gurén dzön que yalaj na' zoa lu në'ë gubáz lá'ayi na', en guca tuz len yöl-la' rulidza Dios le gulún bönachi queë' Cristo, ate' bidxín ga na' r'ö'ë Dios. ⁵Ní'irö gubáz lá'ayi na' bulíë' xzíga'do' na' len bo' yalaj dxía lu bucugu na', ate' gurú'unë' le luyú. Gunné' guziú', ate' bö zidzaj biyón. Guyëpi yösa, en gudödi budó' xzu'.

Tu'cödxë' lúzuba' böa' bëdxi

⁶Ní'irö igádxite' gubáz lá'ayi na' zón-gaquië' gadxi lúzuba' böa' bëdxi na' gula'cu'ë sina' ulu'cödxë' léguequi.

⁷Bucödxë' gubáz lá'ayi zí'alö lúzuba' böa' bëdxi, ate' guró'ö guíój bögui' yöla sunna, en guí' nutsí'i rön, ate' bulu'huöxaj luyú. Guyegui tu cö' tsa tu tsonna cö' le dë luyú ni, ate' guyegui ca'

tu cö' tsa tu tsonna cö' yaga. Guyegui ca' yúgu'të guixi' ya'a.

⁸Bucödxë' gubáz lá'ayi buropi na' lúzuba' böa' bëdxi, ate' gubixi tu le naca ca tu gu'a xzön régui lu nísado', ate' ia'láti'do'os ca gatsaj tu gatsaj nísado' na' böaca rön. ⁹Guti tu cö' tsa tu tsonna cö' le nabángaca dzö'ö lu nisa xzön na', ate' guca ditaj tu cö' tsa tu tsonna cö' le ta'dödi láhulö nisa na'.

¹⁰Bucödxë' gubáz lá'ayi buni lúzuba' böa' bëdxi, ate' böxaj tu bölj lúzxiba, le régui ca tu guí' yöri gapa dë nisa yegu, enca' gapa ralaj nisa, ate' guca caní que ia'láti'do'os ca gatsaj tu gatsaj nisa na' r'ö'ö luyú. ¹¹Bölaj ni lëba' Ajenjo, le naca tu le silá', ate' böaca sillá' ia'láti'do'os ca gatsaj tu gatsaj nisa gapa na' dë nisa, en guca ca naca le silá' na', ate' gulati bönachi zían ni'a que nisa na' böaca sillá'.

¹²Bucödxë' gubáz lá'ayi budapi lúzuba' böa' bëdxi, ate' böaca chul-la ia'láti'do'os ca gatsaj tu gatsaj gubidza, en lësca' caní guca que beo', ate' böaca chul-la tu cö' tsa tu tsonna cö' bölj. Caní guca, bití' buzení' gubidza ia'láti'do'os ca gatsaj tu gatsaj dza, en bití' bulu'zení' bölj, en beo' ia'láti'do'os ca gatsaj tu gatsaj rëla.

¹³Ní'irö buyúa', en biyönda' ru'ë zidzaj didza' tuë' gubáz lá'ayi ridödë' gatsaj láhulö lúzxiba, en rnnë': "¡Bica' bayechi' libí'ili'! ¡Bica' bayechi' libí'ili'! ¡Bica' bayechi' libí'ili' zóali' luyú ni cate' ulu'cödxë' ia'tonnë' gubáz lá'ayi na' lúzuba' böa' bëdxi!"

9 Bucödxë' gubáz lá'ayi guyu' lúzuba' böa' bëdxi, ate' bilé'eda' nu naca ca tu bölj lúzxiba böxaj luyú, ate' bulu'nödzjé' nu na' xz'í'ini guíë' que lataj chul-la. ²Gusaljé' lataj chul-la na', ate' gurén dzön que lataj chul-la, le guca ca dzön rirúaj ga tu'zégui'ë bulá'do', ate' gula'chul-la gubidza, en lúzxiba ni'a que dzön na'. ³Lu dzön na' bila'rúajba' bóchi'zu, yugu' le gula'zxóasiba' luyú,

ate' Dios bë'ë légaçaba' lataj iládu'ba' bönachi ca tunba' xöjnó' dzó'öba' luyú. ⁴Gunná bé'ené' légaçaba' biti' ilún dí-tjaba' guixi' rö'ö luyú, en biti' ilún dí-tjaba' yugu' le naca ya'a, en calëga yugu' yaga, pero gáçasó iládu'ba' bönachi na' biti' da' lë na' naca bë' nu nequi queë' Dios ra' xigágaquië'. ⁵Biti' bë'ë légaçaba' lataj ilúti'ba' légaquië', pero ulu'saca' z'í'siba' légaquië' idú ca gayu' beo'. Riláda' ga tádu'ba' ca na' rilá ga rádu'ba' xöjnó'. ⁶Yugu' dza na' ilé'ëné' yugu' bönni' iluti cuígaquië', pero biti' ila'zéqui'në'. Ilé'ëninë' ilátië', pero ucuíta cuini yöl-la' guti.

⁷Nalá'gacaba' bóchi'zu na' ca náçagaçaba' böa' náçugacaba' le néquiguequini guíë, para tsöjácaba' gudil-la. Dxíagaca íçjagacaba' le náçagaca ca tu le néquini oro. Naca lógacaba' ca naca lógaca bönachi. ⁸Naca guitsa' íçjagacaba' ca naca guitsa' íçjanu nigula. Náçagaca láyi'gacaba' ca náçagaca láyi'ba' bëdxi guixi'. ⁹Náçugaca luchú'ugacaba' le néquini guíë. Ta'gú'u bö xíligacaba' ca na' ta'gú'u bö carreta ná'ayöjgacaba' böa' ta'xíti'ba' lu gudil-la. ¹⁰Náçagaca xibángacaba' ca naca xibángacaba' xöjnó', zoa lí'igacaba'. Lu xibángacaba' na' zoa le tu'df'iniba', para ilunba' zi' bönachi idú ca gayu' beo'. ¹¹Zoa nu rinná be'e légaçaba', nu na' naca gubáz xihui' que lataj chulla. Gubáz ni naz'í le lu didza' hebreo: Abadón, le rnna lu didza' griego: Apolión, en lu didza' xidza': Nu Rusuniti.

¹²Chigudödi tu le rusuniti bönachi, le za' z'í'alö, pero zá'gaca ia'chopa le ulu'suniti bönachi.

¹³Bucödxë' gubáz lá'ayi buzxopi lúzuba' böa' bëdxi, ate' biyönda' tu chí'i ru'í didza' gatsaj láhui'lö tapa le náçagaca ca lúzuba' bëdxi dá'gaca tapa squin bucugu na' néquini oro, le rö' lahuë' Dios. ¹⁴Chí'i ni ru'ílen didza' gubáz lá'ayi buzxopi na' si' bucödxë' lúzuba' böa' bëdxi, en rnna: "Busedxi

idápatë' gubáz xihui' na' nága'gaca ra' yegu Eufrates."

¹⁵Ní'irö bulu'sedxë' tapa gubáz xihui' na', chinucözë' Dios léguequi para la' ná'asó, le naca dza na', en beo' na', en izi na', para ilútigaca tu cö' tsa tu tsonna cö' bönachi nacua' yödzölió. ¹⁶Biyönda' tsca náçagaquië' bönni' röjáquië' gudil-la dxíagaquië'-ba' böa', en dzágagaquië' tapa gubáz xihui' na'. Náçagaquië' idú chopa gayuá' mil milë'.

¹⁷Bilé'egacada'-ba' böa' na' ca tu lu bixín, ate' nupa ta'bía légaçaba' nacu luchú'uguequi le naca gu'do'os, en ya'a ca lúzxiba, en gulaj. Náçagaca íçjagacaba' böa' na' ca íçjaba' bëdxi guixi', ate' lu ruá'agacaba' ta'rúaj guí, en dzön, en tu le ruzégui'da', naz'í le azufre. ¹⁸Yugu' lë na' ta'rúaj ruá'agacaba' bëtigaca tu cö' tsa tu tsonna cö' bönachi nacua' luyú, lë na' náçagaca guí, en dzön, en lë na' ruzégui'da'. ¹⁹Yugu' le tu'df'iniba' böa' na' ta'rúaj ruá'agacaba', en dzö'ö lu xibángacaba', tu' náçagaca xibángacaba' ca yugu' bëla zoa íçjagacaba' le tu'df'iniba'.

²⁰Ia'zica'rö bönachi, nupa biti' gulati lu chopa ni tu'suniti, biti' bulu'b'í ládxi'guequi para cabirö ilúngaca ca na' túngaca, en biti' bulu'sán ta'yéaj ládxi'guequi yugu' bö' xihui', en yugu' budó' guió' budó' yaga, yugu' budó' na' biti' ta'lé'e, en biti' ta'yöni, en biti' gaca sá'gaca. ²¹Biti' bulu'b'í ládxi'guequi para cabirö iluti bönachi, en calëga para cabirö ilúngaca yöl-la' gudzá' quéguequi, en le ruá' dö' túngaca, en yöl-la' ribán quéguequi.

Gubáz lá'ayi, nuá' lu në'ë tu guíchido'

10 Ní'irö bilé'eda'-në' ia'túë' gubáz lá'ayi nál-la, bö'tjë' birúajë' yehua' yubá, nácuë' böaj lúzxiba, en zoa ca tu biguita' íçjalé'. Rëpi yösa bení lahuë' ca run gubidza, ate' náçagaca ni'ë ca ya'zxon ta'yegui. ²Zoa lu në'ë tu guíchido' nayalaj, ate' tu ni'ë ibëla

nulibë' lu nísado', en ia'tú ni'ë yögöla nulibë' luyú bidxi. ³Ní'irö bë'ë zidzaj didza', ate' biyón chi'ë ca riyón cate' ribódxí'aba' bëdxi guixi', en cate' budxi bë'ë zidzaj didza' na', bila'yöni chí'igaca gadxi guziú'. ⁴Cate' budxi bila'yöni chí'igaca guziú' na', neda' si' uzúaja' lu guichi, pero biyönda' nu ru'fi didza' yehua' yubá, rë neda': "Bucáchi'sö didza' ni gulufi gadxi guziú' na'. Biti' uzúaju' didza' na' lu guichi."

⁵Ní'irö gubáz lá'ayi na' bilé'eda'-në' zuínë' lu nísado', en luyú bidxi, guchisa në'ë ibëla zaca' lúzxibalö, ⁶ate' ben tsutsu xtídzë'ë ni'a que Nu na' zoa caz, Nu na' ben yehua' yubá, en le nacua' ni', enca' yödzölió, en le nacua' ni', enca' nísado', en le nacua' ni', ate' gunné': "¡Bíti'rö tse! ⁷Cate' ucödxë' gubáz lá'ayi igadxi lúzuba' böa' bëdxi, usudxinë' Dios le nagachi' queë', lë na' bulufinë' yugu' huen dxin queë', bönni' ni' gulu'ë didza' uláz queë'."

⁸Ní'irö chí'i na' biyönda' rirúaj yehua' yubá bë'len neda' didza' leyúbölö. Gunná: "Guyéaj, yöjxi' guíchido' nayalaj na' zönë' gubáz lá'ayi na' nulibë' lu nísado', en luyú bidxi."

⁹Guyija' ga na' zoë' gubáz lá'ayi na', en gunábida'-në' gunné' guíchido' na' quia'. Gubáz lá'ayi na' gudxë' neda', gunné': "¡Guzxí, gudagu! Lu ru'u gaca zxixi ca naca bidxína'do' queéba' buz, pero lë'u huóaca silá'."

¹⁰Guzxi'a guíchido' na' zönë', en gu-dahua' le. Lu ru'áa guca zxixi ca naca bidxína'do' na', pero cate' budxi gu-dahua' le, böaca silá' lë'a. ¹¹Ní'irö gudxë' neda': "Ral-la' gu'u didza' leyúbölö uláz queë' Dios lógaca zían cö' bönachi izá'a, en gapa nacua' yúgu'të yödzö, en gapa tu'fi zían didza' yúbölö, en lógaca zían bönni' unná bë'."

Chopë' bönni' tunë' ba nalí

11 Ní'irö bidxín nu benna tu gui quia' le naca ca tu yaga ribixi, en gudxi neda': "Guyasa, en burixi yudo' queë' Dios. Burixi ca' bucugu lá'ayi que, en bulaba nupa nacua' ni' ta'yéaj ládxi'-gaca Dios. ²Bucá'ana ca' lö'a que yudo' na' dë n'ílö, en biti' urixu' le, tu' nadödi lu ná'agaca bönachi izá'a, ate' ulu'libi ulu'léaj yödzö lá'ayi na' idú ca chopa-un beo'."

³Gudxë' ca' neda': "Isól-la'a chopë' bönni' ilunë' ba nalí quia', ate' ilu'ë didza' uláz quia' idú ca chinu gayuá' yu' tsónnalalaj dza, nácugaquië' lari' le naca bödzádzado'." ⁴Chopë' bönni' ni tunë' ba nalí, nácugaquië' chopa yaga olivo na' nazúaj lu guichi lá'ayi ca naca quegaquië', en nácugaquië' ca' chopa le nuá'gaca gu' na' nacua' lahuë' Dios, Xani yödzölió. ⁵Channö gué'eni nu guá' dö' quegaquië', irúaj gu' ru'áa-gaquië' le usuniti nu na' ré'eni guá' dö' quegaquië', en guti nu na', enca' nupa ta'dá'baga' légaquië'. ⁶Chopë' ni dë lu ná'agaquië' ulu'záguë'ë xinöza nisa guió'j lúzxiba, para cabí galaj guió'j tsa dza na' ral-la' ilu'ë didza' uláz queë' Dios, ate' dë lu ná'agaquië' ca' ilunë' ga huóaca nisa rön, en ilunë' ga gatsaj yödzöhuë' yödzölió. Ilunë' caní bálati'tës luzuí ilé'ënnë'. ⁷Cate' údxi ilunë' ba nalí, irúajba' böa' sinia' lataj chul-la, en tíl-lalenba' légaquië', en ucúl-laba' légaquië', en gútiba' légaquië'. ⁸Le gulaca cazë' ila'túlusö ca' la' nöza lu yödzö zxön, ga ni' gudé'ë ca' Xanru' lë'e yaga cruz, en ca rucúdzuru' didza', nazí'i le ca' Sodoma, enca' Egipto. ⁹Idú ca tsonna dza yu' gatsaj bönachi yúgu'të yödzö, en yúgu'të bönachi izá'a, en bönachi tu'fi zían didza' yúbölö, en bönachi yúgu'të luyú, ila'lé'eni le gulaca cazë', en biti' ilu'í lataj nu ucache' légaquië' yeru ba. ¹⁰Ulu'dzéjade'e nupa

nacua' yödzülió tu' gulátië', ate' lu yöl-la' rudzeja quéguequi ila'sól-la' le ulu'nödzej quégaca luzé'eguequi, tu' bulu'saca' zi'ë chopë' ni gulu'ë didza' uláz queë' Dios bönachi nacua' yödzülió.

¹¹ Ní'iró cate' chibizá'a tsonna dza yu' gatsaj na', Dios busubanë' légaquië', ate' gula'yasë' gulazuínë', ate' guladxi gula'dzöbi yúgu'të nupa bila'lé'e légaquië'.

¹² Ní'iró bë' zidzaj didza' tu chi'i yehua' yubá, en gudxi légaquië': "Guli'cuén ni."

Gula'benë' lu böaj lúxiba zaca' yehua' yubáló, ate' nupa na' gula'dá'baga' légaquië' bila'lé'e légaquië'. ¹³ La' ní'sö gudódida' budó' zxu', ate' biguinaj tu cö' tsa tu chi cö' yugu' yu'u dzö'ö lu yödzo na', ate' lu budó' zxu' na', gulati tsónnalalaj yu' chi gayuá' bönachi. Guladxi gula'dzöbi nupa ni' nagá'anagaca, ate' gula'gú'u yöl-la' ba Dios zoë' yehua' yubá.

¹⁴ Chigudödi le buropi le rusuniti bönachi, ate' chizóa idxín le bunny le usuniti léguequi.

Rucödxë' gubáz lá'ayi igadxi lúzuba' böa' bëdxi

¹⁵ Bucödxë' gubáz lá'ayi igadxi lúzuba' böa' bëdxi, ate' guluf'i zidzaj didza' yugu' chi'i yehua' yubá, ta'nná:

Gapa ta'nná bë' bönachi yödzülió nadódigaca lu në'ë Xanru' Dios, en lu në'ë Cristo.

Lë' inná bé'tica'së'.

¹⁶ Ní'iró idapa uru'ë bönni' gula na' ró'ogaquië' gapa na' ta'nná bë'ë lahuë' Dios, bulu'tsaga lógaquië' lu yu, en ta'yéaj ládxi'gaquië' Dios. ¹⁷ Ta'nné':

¡Xantu' Dios, napa cazu' yöl-la' huáca!

¡Guzóa cazu', en zoa cazu', en ral-la' guída cazu'!

¡Xclenu', tu' chibugunu' dxin yöl-la' huáca zxön quiu',

en risí lo' rinná bë'u!

¹⁸ ¡Gula'lé bönachi yugu' yödzo

pero chibidxín dza gunu' léguequi xíguia'!

¡Naca dza uchi'a usöróu' nupa chinátigaca!

¡Ubi'u quégaquië' huen dxin quiu',

yugu' bönni' gulu'ë didza' uláz quiu',

nupa néquiguequi quez quiu', en gulún bal Lo',

nupa nácacaga cá'asö, en nupa nácacaga lo!

¡Chibidxín dza usunítu' nupa bulu'suniti yödzülió!

¹⁹ Ní'iró gualaj yudo' queë' Dios rö'ö yehua' yubá, ate' bilá' lahui gu'ina lá'ayi ga yu'u didza' rucá'ana tsahui' le nunë' Dios. Guyëpi yösa, en gulú'u bö zidzaj, en gunné' guziú' luyú. Gudödi budó' zxu', en guró'ö guió'j bögui' yöla sunna.

Tunu nigula, en tuba' bëla zxön xitsiní'

12 Ní'iró bilá' lahui yehua' yubá tu le naca bë'da', buluf'i lonu tu nigula nácunu le naca ca gubidza, en zoa zxan ní'anu beo'. Dxía ícjanu tu le néquini oro ga dxíagacaba' chinnu böljaj bení'.

² Nigula ni chizóa soa bí'ido' queénu, en ribódxinu tu' rúdia' lé'ënu. Rígu'í rizáca'nu ruzóanu bí'ido' queénu. ³ Ní'iró ia'tú le naca bë' bilá' lahui yehua' yubá.

Bulu'í loba' tuba' bëla zxön xitsiní'. Ná-caba' xiná gui'is, ate' dxíagaca gadxi íc-jaba', en chi lúzuba', ate' dxía tu le néquini oro tu tu ícjabá' na'.

⁴ Len xibanba' gú'uyó'jba' tu cö' tsa tu tsonna cö' böljaj lúxiba, en gurú'unaba' léga-caba' luyú. Guzuíba' bëla zxön xitsiní' na' lonu nigula na' chizóa sóabi' bí'ido' queénu.

Zóaba' sina' gáguba'-bi' bí'ido' queénu na' ca gáljabi' na'. ⁵ Buzóanu-bi' tubi' bi'í bönni'do' ral-la' inná bé'ebi' yúgu'të yödzo len tu xiyaga guíë.

La' bucuítatë'ë-bi' Dios bí'ido' queénu na', en buchisë'-bi' ga ni' zoa cazë' Lë', rö'ë lataj lo ga na' rinná bë'ë.

⁶ Buzxúnajnu nigula na', zéajnu lu lataj cá'asö, ga ni' chinupé'ë

Dios lataj queénu. Ulu'gahué'-nu ni' idú ca chinnu gayuá' yu' tsónnalalaj dza.

⁷Gudödi gulaca læ ni, gúcada' gudil-la yehua' yubá. Gubáz lá'ayi lo læ Miguel, en yugu' gubáz lá'ayi dá'gaquié' læ' gula'díl-lalené'-ba' bëla zxön xitsiní' na'. Gula'dil-la bëla zxön na', en yugu' gubáz xihui' dá'gaca læba' ⁸pero biti' bila'deli' lu gudil-la na'. Que læ ni na' bítirö bidzöli xilátjagaca yehua' yubá. ⁹Caní guca, gula'rú'uné'-ba' bëla zxön xitsiní' na' ní'lö. Nácaba' bëla na' zóaba' dza ní'te, læba' tu' xihui'. Gula'rú'uné' tu' xihui' yödzölió, dzágagaca le gubáz xihui' na' dá'gaca le.

¹⁰Ní'irö biyönda' tu chi'i rufi zidzaj didza' yehua' yubá, rna: "Na'a chibidxín dza nulu'ë lahui yöl-la' rusölá nuné' Dios, en yöl-la' huáca queé', en le rinná bë'ë, enca' le rinná bë'ë Cristo, tu' chigula'rú'uné' ní'lö nu na' buzegui yugu' böchi' luzá'aru' didza'. Rëla, en tē dza buzegui légaquié' didza' lahué' Dios queéru'. ¹¹Yugu' böchi' luzá'aru' ni bulu'cul-lé' nu na', tu' bulu'guné' dxin xichöné' Bönni' na' náquié' Bö'cu' Zxíla'do' queé' Dios, en tu' bulu'guné' dxin didza' na' guluné' ba nalí queé'. Biti' gulufi ládxi'gaquié' yöl-la' na'bán quégaquié', pero gulátie'. ¹²Que læ ni na' gaca yöl-la' rudzeja yehua' yubá. ¡Bul'dzeja lib'ili', zóali' ni! ¡Bica' bayechi' lib'ili' zóali' yödzölió, en lu nísado', tu' chibötaj tu' xihui', en bidxín ga zóali'! Riléde'e tu' xihui' na' tu' chiréquite'e ia'tú chí'isö dē lataj que."

¹³Cate' gúquibe'eba' bëla zxön xitsiní' na' chigula'rú'uné'-ba' luyú, ní'irö yöjsóa régu'ba'-nu nigula na' buzóanu bi'i bónni'do' na' queénu. ¹⁴Ní'irö Dios bë'ë-nu nigula na' chopa xíliba' bisía' náca-gaca zxön para gaca sunu, en icuítanu ga na' zóaba' bëla zxön xitsiní' na', en idxinnu xilátjanu lu lataj cá'asö. Ní' ulu'gahué'-nu idú tsonna iz yu' gatsaj. ¹⁵Bëla zxön xitsiní' na' gúbaba' nisa

zile zaca' cúdzu'lönu, le guca ca tu nisa yegu, en gú'uniba' gua'tē nigula na'. ¹⁶Ní'irö luyú gúcalen nigula na'. Guyalaj luyú na', en güf'i nisa yegu na' gúbaba' bëla zxön xitsiní' na'. ¹⁷Ní'irö bëla zxön xitsiní' na' guléde'eba'-nu nigula na', ate' guyéajba' yöjtíl-lalenba' nupa nagá'ana-gaca queénu di'a dza queénu, nupa na' tun ca rna le gunná bë'ë Dios, en nazí lu nē'eguequi le nuné' Jesucristo ba nalí.

Chópaba' böa' sínia'

13 Guzuída' lu yuzxi ra' nísado', en bilé'eda' ribenba' rirúajba' lu nísado' tuba' böa' sínia' dxíagaca gadxi ícjaba', en chi lúzuba'. Dxíagaca lúzuba' chi le néquini oro, ate' láhuigaca ícjaba' da' tu la le naca xihui' le cabí rilé'e Dios dxi'a. ²Böa' sínia' na' bilé'eda'-ba' riná'aba' ca nácaba' tu bédxito', nacua' ní'aba' ca náca-gaca ní'aba' oso, ate' ruá'aba' naca ca naca ruá'aba' bédxi guixi'. Bëla zxön xitsiní' na' budódiba' lu na'aba' böa' sínia' ni yöl-la' huáca queéba', enca' xilátjaba' ga rinná bë'ëba', en yöl-la' unná bë' zxön queéba'. ³Dxía hué' tu ícjaba' böa' sínia' na', le naca le guti læba', pero buniti hué' na', ate' bulu'bani yúgu'tē bönachi yödzölió, en yöjdá'gaca böa' sínia' na'. ⁴Gula'yéaj ládxi'gaquié'-ba' bëla zxön xitsiní' na', tu' budódiba' yöl-la' unná bë' queéba' lu ná'aba' böa' sínia' na'. Gula'yéaj ládxi'gaquié'-ba' böa' sínia' na', en gula'nné': "¿Nuzxi caz naca zxön ca naca zxön böa' sínia' na', en nuzxi caz sequi' tíl-lalen læba'?"

⁵Guta' lu ná'aba' böa' sínia' na' bë'ëba' didza' ba zxön, en didza' xihui' le rinnëba' queé' Dios. Idú ca chopa-un beo' guta' lu ná'aba' yöl-la' unná bë'. ⁶Gusí loba' rinnëba' queé' Dios, en rinné' xihui'ba' que Lē' Dios, en que lataj lá'ayi queé', en quégaca nupa nacua' yehua' yubá. ⁷Guta' lu ná'aba' gudíl-lalenba' nupa néquiguequi quez queé'

Dios, en bucúl-laba' légaquië'. Guta' ca' lu ná'aba' gunná bé'eba' yúgu'të bönachi izá'a, bönachi yúgu'të yödzö, en bönachi tu'í yúgu'të didza' yúbölö, en bönachi idútë yödzölió. ⁸ Yúgu'të bönachi nacua' yödzölió gula'yéaj ládxi'gaca böa' sínia' na', nupa na' biti' nazúajgaca láguequi lu guichi que yöl-la' na'bán, guichi na' buzúajë' Bönni' na' náquië' Bö'cu' Zxíla'-do' queë' Dios cate' sí' guta' yödzölió. Buzóa cazë' Dios gútië' Bönni' na' ni'a quégaca bönachi queë'.

⁹ Channö nu riyöni, ral-la' uzé nagui.

¹⁰ Nupa nucu'ë Dios idzúngaca, ral-la' idzúngaca, ate' nupa nucu'ë Dios para nu guti léguequi len guíë tuchi', len guíë tuchi' ilátigaca. Que lë ni na', ral-la' ila'böza zxon ladxí' nupa néquiguequi queë' Dios, en ta'yéajlë' Lë'.

¹¹ Gudödi na' bilé'eda'-ba' ia'tuba' böa' sínia' gurenba' birúajba' lu yu. Dxíagaca chopa lúzuba' ca naca lúzuba' bö'cu' zxi-la', en ru'iba' didza' ca na' ru'iba' didza' bëla zxon xitsiní' na'. ¹² Dë lu ná'aba' böa' sínia' ni yúgu'të yöl-la' unná bë' queéba' böa' sínia' bidxinba' z'í'alö, cate' dzágaba' lëba'. Runba' böa' sínia' buropi ni ga ta'yéaj ládxi'gaca yúgu'të bönachi nacua' yödzölió böa' sínia' z'í'alö na', böa' na' buniti huë' le guti lëba'. ¹³ Böa' buropi na' runba' ca' le náagaca bë' ga ridxintë runba' ga ruhuóxaj guí' le za' lúzxiba, en ruhuóxaj luyú lógaca yúgu'të bönachi. ¹⁴ Rizí' yé'eba' bönachi nacua' yödzölió len le náagaca bë' dë lu ná'aba' runba' loba' böa' sínia' z'í'alö na'. Rinná bé'eba' bönachi nacua' yödzölió ilunë' tu budó' ca nácabá' böa' sínia' na' gúcaba' huë' que guíë tuchi', ate' nabanba'. ¹⁵ Dë lu ná'aba' runba' ga soa ibán budó' na' naca ca nácabá' böa' sínia' z'í'alö na', en güí'í didza' budó' ni, en gun ga nu guti yúgu'të nupa biti' ila'yéaj ládxi'gaca le. ¹⁶ Benba' ga gudá' yúgu'të bönachi tu le naca bë' dá'gaca lëba', nupa náagaca cá'asö, en nupa náagaca lo, nupa ta'lé'e

yöl-la' tsahui', en nupa náagaca yechi', nupa biti' nadó'ogaca, en nupa nadó'ogaca. Budá'aba' le lu ná'agaca ibëla o ra' xigágaca bönachi na'. ¹⁷ Cuntu nu gaca bi ga'u o bi guti' channö cabí da' nu na' lë na' naca bë', o channö cabí da' nu na' laba' böa' sínia' na', o le nabábaba' nuá'aba'. ¹⁸ Na'a riquínnu' yöl-la' réajni'i. Nu napa yöl-la' réajni'i ral-la' ulábatëz tsca le nabábaba' nuá'aba' böa' sínia' na', le naca ca le nababë' tu bönni', ate' le nabábaba' na' naca xopa gayuá' yu' tsónnalalaj yu' xopa.

Le tul-lë' tu gayuá' yu' tapa-un milë' bönni'

14 Gudödi ni' buyúa', en bilé'eda'-ne' Bönni' na' náquië' Bö'cu' Zxíla'-do' zuínë' lu guí'ado' nazí'i le Sión. Nacuá'lenë' Lë' tu gayuá' yu' tapa-un milë' bönni', da' ra' xigágaquië' Lë' Bönni' na' náquië' Bö'cu' Zxíla'-do', enca' Lë' Xuzë'. ² Nf'irö biyönda' tu le rigú'u bö yehua' yubá, le rinné zidzaj ca rinné tu yegu zxon, en ca rinné guziú'. Biyönda' le riyón cate' ta'guínnië' lë'e tu le rul-la zë zían du que. ³ Tul-lë' tu le rul-la cubi, nacu'ë ca dódilö lahui lataj lo ni', enca' ca dódilö lahui ga na' nacua' idapa nupa na' nabángaca len yugu' bönni' gula na'. Cúnturö nu gaca gul-la le rul-la ni, pero légacasë' tu gayuá' yu' tapa-un milë' bönni' ni, bönni' na' böá'uë' Cristo légaquië' ladaj bönachi yödzölió. ⁴ Náagacaquië' bönni' ni idú ladxí'. Biti' gula'cuá'lenë' nigula, tu' náagacaquië' idú bönni' ra'bán. Sójácalenë' Bönni' na' náquië' Bö'cu' Zxíla'-do' gátí'tës ga sa'yéajë'. Cristo caz böá'uë' légaquië' ládjagaca bönachi, ate' náagaca nupa bulu'dödi cuíngacaquië' z'í'alö queë' Dios, enca' queë' Bönni' na' náquië' Bö'cu' Zxíla'-do'. ⁵ Catu caz gula'z'í' yë'ë, ate' cuntu nu gaca bi inné quégaquië' ga na' nacu'ë ca dódilö lahui lataj lo ga rö'ë Dios.

**Didza' röjuá'gaquië'
tsonna gubáz lá'ayi**

⁶Ní'irö bilé'eda' ia'túë' gubáz lá'ayi, ridödë' lu bö'ös lúzxiba, en röju'ë didza' dxi'a zóatica'sö para gunë' libán que lógaca nupa nacua' yödzölió, bönachi idútë luyú, yúgu'të bönachi izá'a, en bönachi tu'í yúgu'të didza' izá'a, en bönachi yúgu'të yödzö. ⁷Ru'ë zidzaj didza', rnnë: "¡Gul'gádxí Dios, en guli'cu'ë yöl-la' ba tu' chizóa uchi'a usöröë' bönachi! ¡Guli'tséaj ládxë'ë Dios, nunë' lúzxiba, en luyú, en nísado', en gapa ralaj nisa!"

⁸Ia'túë' gubáz lá'ayi söjnáhuë' gubáz lá'ayi ni, en rnnë: "¡Chibudxi que yödzö Babilonia! ¡Chibudxi que yödzö zxon na'! Caní guca que, tu' gulún nupa nacua' ni' ga gula'z'í lu ná'agaquië' bön-ni' yúgu'të yödzö ilunë' ca ná'cagaca le ta'zé ládxí'gaquië' le ruá' dö'."

⁹Ia'túë' gubáz lá'ayi söjnáhuë' gubáz lá'ayi buropi ni, en ru'ë zidzaj didza', rnnë: "¡Channö nu tseaj ladxi'-ba' böa' sínia' na', enca' budó' queé'ba', en gü'í lataj ta' ra' xigué o lu në'e le naca bë' da' lëba', ¹⁰gunë' Dios nu ni xigua' lu yöl-la' rilé queë'! ¡Qui'í saca' nu na' lu guí', en lu lë na' ruzégui'da', lógaca gubáz lá'ayi, en lahuë' Bönni' na' náquië' Bö'cu' Zxíla'-do'! ¹¹Cuéntica'sö dzön que guí' ga ni' quí'í saca' nu na'. Rëla, en te dza qui'í saca', ate' catu caz gata' lataj ulu'z'í ládx-i'gaca nupa ila'yéaj ládxí'gaca-ba' böa' sínia' na', en budó' queé'ba'. Biti' ulu'z'í ládxí'gaca nupa iluf'í lataj ta' laba' légué-qui. ¹²Que lë ni na' nupa na' néquigüé-qui queë' Dios, en tun ca rnna le gunná bë'ë, en ta'yéajlë' Jesús, ral-la' ila'böza zxon ladxi'."

¹³Ní'irö biyönda' chi'í nu ru'í didza' yehua' yubá, en rë neda': "Buzúaj lu guichi lë ni: ¡Bica' bágaca nupa ilátigaca na'a si lo, nupa na' ta'yéajlë' Xanru'!"

Dios Bö' Lá'ayi rnnë: "¡Ca' gaca! ¡Ulu'z'í ládxí'gaquië' lu dxin gulunë', en ulu'z'í'ë xibé ca sa'yéaj le gulunë'!"

Tu'zi'ë le rulá' luyú

¹⁴Ní'irö buyúa', en bilé'eda' tu böaj lúzxiba chigufchido'os, ate' lu böaj na' rö'ë tu bönni' náquië' ca náquië' Bönni' Guljé' Bönachi, ate' dxía icjé' tu le néquini oro, ate' zönë' tu gufé tuchi' lu në'ë. ¹⁵Birúajé' tuë' gubáz lá'ayi lu yudo' rö'ö yehua' yubá, ate' bë'ë zidzaj didza', en gudxë' Nu na' rö'ö lu böaj na', gunné: "¡Bugún dxin guíë tuchi' quiu', en guchugu zxoá' xtila, tu' chibidxín dza nu uzí' le! ¡Chinabídx do que le dë yödzölió!"

¹⁶Ní'irö Nu na' rö'ö lu böaj na' bugún dxin guíë tuchi' idútë yödzölió, ate' buz-í'ë le rulá' luyú.

¹⁷Ní'irö birúajé' tu gubáz lá'ayi lu yudo' zoa yehua' yubá. Nu'ë ca' tu guíë tuchi'. ¹⁸Birúajé' ia'túë' gubáz lá'ayi ra' bucugu ni', dë lu në'ë inná bé'enë' guí', ate' bë'ë zidzaj didza', en bulidzë' gubáz lá'ayi z'í'alö na' nu'ë guíë tuchi', gunné: "¡Bugún dxin guíë tuchi' quiu', en butubi tu'xóa huéaj le ta'bía lubá uva ró'gaca yödzölió, tu' chiná le ta'bía lubá uva!"

¹⁹Ní'irö gubáz lá'ayi ni bugunë' dxin guíë tuchi' idútë yödzölió, en butubë' le ta'bía lubá uva ró'gaca luyú, ate' yöjchú'unë' le ta'bía lubá uva na' lu yeru zxon ga izí xisi. Yugu' lë ni ruluf'í ca gunë' Dios, gunë' xigua' bönachi nacua' yödzölió. ²⁰Bulu'libë' le ta'bía lubá uva na' lu lerui zoa ní'lö ra' yödzö, ate' lu lerui na' birúaj rön, en gurén ga bidxintë ruá'agacaba' böa', en gudödi rön na' idú tsa gaca sá'aru' idú chinnu dza.

**Yugu' gubáz lá'ayi nuá'gaquië'
gadxi yödzöhuë'**

15 Bilé'eda' ia'tú le nácada' bë' yehua' yubá, le run ga nu rubani. Bila'rúajé' gadxi gubáz lá'ayi, nuá'a-

gaquië' gadxi yödzhüé' röjsétegaca, le ugunë' dxin Dios, údxi gunë' xíguia' bönachi yödzhülió.

²Bilé'eda' ca' tu le naca ca tu nísado' le rëpi yösa bení' ca guió'j jara le nutsí' i guí'. Nupa na' bulu'xicja lu böa' sínia' na', en lu budó' queé'ba', en lu laba', zuígaca lu lë na' naca ca tu nísado', en nuá'agaquië' le tul-la, yugu' le bë'ë Dios queé'gaquië'.

³Tul-lë' le rul-la na' bil-lë' Moisés, bönni' huen dxin queé' Dios. Naca tu le rul-la queé' Bönni' na' náquië' Bö'cu' Zxí'la'do'. Ta'nnë':

¡Li', Xantu' Dios, zxóntë'ro nacu' Li'!

¡Zxóntë'ro naca yúgu'të le benu',
le tun ga rubánitu'!

¡Li' rinná bé'enu' yugu' yödzhö!

¡Idú dxí'ado', en idú tsahui' naca ca bi
runu'!

⁴¿Nuzxi caz cabí gadxi Li', Xantu'?

¿Nuzxi caz cabí cu'u Li' yöl-la' ba?

¡Tuzu' Li' nacu' lá'ayi!

¡Ila'dxín bönachi yúgu'të yödzhö,
en ila'yéaj ládxi'guequi Li'

tu' ta'lé'e naca tsahui' yúgu'të le runu'!

⁵Gudödi guca lë ni, buyúa', en bilé'eda' guyalaj yudo' yehua' yubá ga ni' dë lataj lá'ayi que le naca bë' zóalenë' Dios bönachi queé'. ⁶Bila'rúajë' gadxi gubáz lá'ayi lu lataj lá'ayi na', nuá'agaquië' gadxi yödzhüé' na'. Nácugaquië' lari' nazáca'da' le rëpi yösa bení', en núga'gaca luchú'ugaquië' le néquiguequini oro. ⁷Ní'irö tu nu nutsa' ladaj idapa nupa na' nabángaca, bë' que queé'gaquië' gadxi gubáz lá'ayi na' gadxi zxí'ga'do' néquiguequini oro, en yúdzugaca le rulu'fi yöl-la' rilé queé' Dios, Bönni' zoa cazë'. ⁸Lu lataj lá'ayi na' bidzá'a dzön, tu' zoa ni' yöl-la' bení', en yöl-la' huáca zxön queé' Dios. Cuntu nu sequi' tsaza lu lataj lá'ayi na' cate' gátsjarö gadxi yödzhüé' na' nuá'agaquië' gadxi gubáz lá'ayi na'.

Yugu' zxí'ga'do' yúdzugaca le rulu'fi yöl-la' rilé queé' Dios

16 Ní'irö biyönda' chí' i nu rufí zidzaj didza' lataj lá'ayi na', en rë gadxi gubáz lá'ayi na', rnna: "¡Guli't-séaj! ¡Guli'tsöjlálaj gadxi zxí'ga'do' na' lu yödzhülió, le yúdzugaca lë na' rulu'fi yöl-la' rilé queé' Dios!"

²Guyijë' gubáz lá'ayi zí'alö, en yöjlaljë' le yudzu zxí'ga'do' na' zönë' lu yödzhülió. Lë na' yudzu zxí'ga'do' na' ben ga gutasaj yudzu' ya'a le riláda' idütë le naca caz nupa na' da' léguequi le naca bë' dá'gaca böa' sínia' na', enca' nupa na' ta'yéaj ládxi'gaca budó' queé'ba'.

³Ní'irö guyijë' gubáz lá'ayi buropi, en yöjlaljë' le yudzu zxí'ga'do' na' zönë' lu nísado', ate' nisa na' böáca rön ca naca rön queé' tu bönni' nati, ate' gualati yúgu'të nupa nabángaca nacuá' lu nísado' na'.

⁴Guyijë' gubáz lá'ayi bunní, en yöjlaljë' le yudzu zxí'ga'do' na' zönë' gapa dë yegu, en gapa ralaj nisa, ate' gapa dë nisa na' bulu'huóaca rön.

⁵Ní'irö biyönda' ru'ë didza' gubáz lá'ayi na' dë lu në'ë rinná bé'enë' nisa na', rnnë': "¡Xantu' Dios Lá'ayi! ¡Zoa cazu', en guzóa cazu'! ¡Tshui' nacu' tu' richugu' caní queé'gaca bönachi ⁶tu' bulu'laljë' rön queé'gaca nupa néquiguequi quez quiu', en queé'gaca nupa gulu'fi didza' uláz quiu'! ¡Na'a, Li' runu' ga ilé'ajë' rön, tu' caní ral-la' gaca queé'gaquië'!"

⁷Ní'irö biyönda' rufí didza' tu nu zoa ra' bucugu yehua' yubá ni', rnna: "¡Ca' gaca, Xantu' Dios, napa cazu' yöl-la' unná bë'! ¡Idütë li, en tsahui' naca ca richugu' queé'gaca bönachi!"

⁸Guyijë' gubáz lá'ayi budapi na', en yöjlaljë' le yudzu zxí'ga'do' na' zönë' lu gubidza, ate' gubidza na', bë'ë Dios le lataj uzéguí'da' bönachi len guí' que. ⁹Gula'yéguí'da' yúgu'të bönachi tu

ruzégui'da' gubidza, pero biti' bulu'bf'i ládxi'gaca, en biti' gula'gú'u Dios yöl-la' ba. Gula'nné' z'i' queé' Dios, Bönni' dë lu në'ë inná bé'ené' yugu' lë ni tu'saca' zi' bönachi.

¹⁰ Guyijë' gubáz lá'ayi guyu' na', en yöjlaljë' le yudzu xzíga'do' zönë' lu xilataj böa' sínia' ga na' rinná bé'ëba', ate' guró'ö chul-la gapa rinná bé'ëba'. Ní'irö, tu' gula'gu'f'i gula'zaca' bönachi, guláguya'a lúdx'i'guequi, ¹¹ pero biti' bulu'bf'i ládxi'gaca para cabirö ilúngaca le ruá' dö' tunë'. Gula'nné' z'i' queé' Dios zoë' yehua' yubá tu' ta'gu'f'i ta'zaca', en tu' dxíagaca yudzu' ya'a na'.

¹² Guyijë' gubáz lá'ayi buzxopi na', en yöjlaljë' le yudzu xzíga'do' na' zönë' lu yegu zxön nazí'i le Eufrates, ate' gubidxi nisa yegu na' para ibá'a nöza ga ila'dödi nupa ta'nná bé', nupa ila'rúaj zaca' ga rilén gubidza.

¹³ Ní'irö bilé'eda' bëla zxön xitsiní' na', en böa' sínia' na', en bönni' ru'ë didza' uláz quegacaba'. Bila'rúaj tsonna bö' xihui' tun ditaj bönachi lu ruá'agaca nupa na'. Nalá'gaca ca nalá'gacaba' buludzu.

¹⁴ Nácagaca yonna bö' ni bö' que tu' xihui', bö' na' tun le nácagaca bé' le ilún ga ulu'bani bönachi. Yójaca bö' xihui' na' idú yödzölió, en yöjtúbígaca nupa ta'nná bé', para tsójáquië' lu gudil-la na' gaca lu dza zxön queé' Dios, Bönni' napa cazé' yöl-la' unná bé'. ¹⁵ Caní rnnë' Dios: "¡Buli'yútsöca'! Guída' tsárido'os ca ridxinë' tu bönni' gubán. Bica' ba nu zoa ban ladxi', en run chi'i le nacu nu na', en rúntica'sö dxí'a, para cabí gun bayudxi ta xiguídisö, en para cabí utuí' nu na' lahui' lógaca bönachi." ¹⁶ Yugu' bö' xihui' na' bulu'tubi yugu' bönni' ta'nná bé'ë, ate' bulu'dubë' tu lataj nazí'i le lu didza' hebreo: Armagedón.

¹⁷ Guyijë' gubáz lá'ayi igadxi na', en yöjlaljë' le yudzu xzíga'do' na' zönë' lu bö'ös, ate' bé' zidzaj didza' tu nu zoa lu

lataj lá'ayi zoa yehua' yubá ga dë lataj lo na', rna: "Chinaca."

¹⁸ Ní'irö guyëpi yösa, en guró'öda' bö, en gunné' guziú'. Gudódida' budó' xzu', le gudódida'rö ca gudódi tsanni ni nacua' bönachi yödzölió. ¹⁹ Birúaj tsonna có'ölö yödzö zxön na', ate' gula'guínnaj yödzö nacua' yödzölió. Yöjnené' Dios le naca xihui' gulún bönachi yödzö zxön na' nazí'i le Babilonia, ate' lu yöl-la' rilé queé' benë' xíguia' nupa nacua' ni'. ²⁰ Bila'gachi' yugu' luyú bidxi dzö'ö lu nísado', ate' bítirö gula'lá' yugu' gu'ado'. ²¹ Böxaj ca' guiój bögui' yöla sunna, le za' lúzxiba, en yöjsóa ícjagaca bönachi, ate' nál-li' tu tu guiój bögui' na' ca tu gayuá' guíë, ate' yúgu'të bönachi gula'nné' xihui' queé' Dios tu' nözi guiój bögui' na' tu' bulu'sáca'da' z'i' léguequi.

Dios richúguië' queénu nigula udá dzaga

17 Ní'irö bidxinë' tuë' gubáz lá'ayi ga zoa', nababë' gadxi gubáz lá'ayi na' gula'zönë' gadxi xzíga'do' na' néquiquequini oro. Bé'lenë' neda' didza', gunné': "Gudá ni, ate' uluí'ida' li' ca guné' Dios, gunë'-nu xíguia' nigula udá dzaga na', rö'önu lu nísado' zían. ² Gula'cua'len lënu nupa ta'nná bé' luyú yödzölió, en gulún le ruá' dö', ate' gula'zudxi nupa nacua' yödzölió ni, tu' gulunlen lënu le biti' naca dxí'a."

³ Dios Bö' Lá'ayi guzóalenë' neda', ate' gubáz lá'ayi na' guché'ë neda' tu lu lataj cá'asö, ate' bilé'eda'-nu tu nigula ni' dxíanu cúdzu'ba' tuba' böa' sínia', nácaba' xiná gu'ido'os. Dxiagaca gadxi ícjaba', en chi lúzuba', en dá'gaca ca' lëba' le ta'nné' xihui' queé' Dios. ⁴ Nigula na' dxíanu lëba' nácunu lari' xiná chul-la, en lari' xiná gu'ido'os. Nazí'i biquitaj queénu le néquiquequini oro, en yugu' guiój nazaca', en yugu' bugá. Lu ná'anu rö'ö tu xzíga'do' néquini oro, en yudzu le nácagaca xihui', en le ruá' dö' runnu.

⁵Ra' xigánu dá'gaca ca lënu, le tu'luf'i tu le nagachi', en ta'nná caní: "Yödzö Babilonia Le Naca Lo", en "Xiná'agacanu Nigula Udá Dzaga", en "Xiná'agaca Le Xihui' Dzö'ö Yödzölió." ⁶Gúquibe'eda' nazúdxinu nigula na' tu' bennu ga gulaj rön quegaca nupa néquiquequi queé' Dios, en quegaca nupa na' zoa nu bëti léguequi tu' gulún ba nalí queé' Jesús. Cate' bilé'eda'-nu, bubánide'eda'. ⁷Gudxé' gubáz lá'ayi na' neda', gunné': "¿Bizx que rubániu'?' Uzéajni'ida' lí lë na' nagachi', le ruluf'i ca naca nigula ni, enca' le ruluf'i ca naca böa' sínia' na' dxíanu-ba', böa' na' dxíagaca gadxi ícjaba', en chi lúzuba'. ⁸Böa' sínia' na' bilé'enu' guzóaba' zí'aló, pero biti' zóaba' na'a. Böa' ni chizóa irúajba' lataj chul-la, ate' tséajba' ga nítiba' tsaz. Ulu'bánide'e nupa nacua' luyú cabí nazúajgaca láguequi lu guichi que yöl-la' na'bán, le buzúajjé' Dios dza ni'te quez cate' sí' gata' yödzölió. Cate' ila'lé'eni böa' sínia' na' guzóaba' zí'atéló, pero biti' zóaba' na'a, ulu'bani tu' nubanba'.

⁹Lë ni naca tu le uzéajni'i nu gaca tséajni'i: Gadxi ícjaba' na' tu'luf'i gadxi guf'ado' gapa ró'önu nigula na'. ¹⁰Lës-ca' caní gadxi ícjaba' na' tu'luf'i gadxé' bönni' ta'nná bëë. Gáyu'ë bönni' ni chigudödi quegaquié'. Tué' bönni' ni rinná bëë na'a, ate' ia'túé' biti' ridxíninë', pero cate' gufdë', inná bëë tu chí'ido'osö. ¹¹Böa' sínia' na' guzóaba', pero biti' zóaba' na'a, ruluf'i tu bönni' izxunu', inná bëë. Nuné' tsözxón bönni' gadxi na', ate' tödi ni nítie' tsaz.

¹²'Chi lúzuba' na' bilé'enu' tu'luf'i chié' bönni' ila'nná bëë. Biti' ta'zíninë' yöl-la' unná bë', pero ila'zi'ë yöl-la' unná bë' tu chí'ido'osö, en ila'nná bëë tsözxón len böa' sínia' na'. ¹³Chié' bönni' ni, lébisö nácaquié', ate' ulu'dödë' yöl-la' unná bë' quegaquié', en le nazí' lu ná'agaquié' lu ná'aba' böa' sínia' na'. ¹⁴Ila'díl-lalenë' Bönni' na' náquié' Bö'cu' Zxíla'do', pero

Lë ucul-lë' légaquié', tu' náquié' Xángaca yúgu'të nupa náca-gaca xan, en náquié' Bönni' rinná bé'enë' yúgu'të nupa ta'nná bë'. Nupa nacua'len Lë', bulidzë' Dios léguequi, en guróé' léguequi, ate' tsaz dá'gaca Lë'."

¹⁵Gubáz lá'ayi na' gudxé' ca' neda', gunné': "Yugu' nísado' na' bilé'enu' gapa ni' ró'önu nigula udá dzaga na', tu'luf'i bönachi yugu' yödzö, en yugu' bönachi izá'a, en bönachi tu'f'i yugu' didza' yúbölö, en bönachi yugu' luyú. ¹⁶Chi lúzuba' böa' sínia' na' bilé'enu', en tu'luf'i chié' bönni', biti' ila'lé'enë'-nu nigula udá dzaga na' dxí'a, ate' ulu'cá'anë'-nu cá'asö, en xiguídísö. Ilahuë' xipéla'nu, en ulu'zégui'ë-nu len gu'. ¹⁷Dios uchíz-ié' icja ládxi'do'gaquié' chié' bönni' na' le gun ga ilunë' ca ré'ëni quézinë' Lë', ate' ilácagaquié' tuz, en ulu'dödë' yöl-la' unná bë' quegaquié' lu ná'aba' böa' sínia' na' para gaca ca rnna xtídzë'ë. ¹⁸Nigula na' bilé'enu'-nu ruluf'i yödzö zxón na' rinná be'e nupa ta'nná bë' yödzölió ni."

Riguinnaj yödzö Babilonia

18 Gudödi na' bilé'eda'-në' ia'túé' gubáz lá'ayi ruhuötjé' rirúajjé' yehua' yubá, en dë lu në'ë yöl-la' unná bë' zxón, ate' guyëpi yösa bení luyú ni'a que yöl-la' bení queé' gubáz lá'ayi na'. ²Bë'ë zidzaj didza' gubáz lá'ayi na', gunné':

¡Chibiguínnaj! ¡Chibiguínnaj Babilonia, yödzö zxón na'!

¡Chibóaca xilataj tu' xihui', en xilátjagaca bö' xihui' tun ditaj bönachi!

¡Yugu' biguínni xitsiní', en yugu' biguínni xihui' tu'zóaba' xilátajgacaba' ni'!

³Caní guca que yödzö na' ni'a que le gulún bönachi nacua' ni'.

Guluné' ga gulún bönachi yúgu'të yödzö ca náca-gaca le ta'zësö ladxi' le ruá' dö'.

Nupa ta'nná bē' luyú yödžölió gulunlen légaquiē' le ruá' dö',
ate' guta' yöl-la' tsahui' quégaquiē' bön-
ni' to'o tuti' nacu'ē yödžölió
tu' guyánda' yugu' le nazaca' gula'zē
ladxi' bönachi ni'.

⁴ Ní'irö biyönda' ru'fi didza' ia'tú nu
zoa yehua' yubá, rnaa:
Guli'rúaj lu yödžö na', lib'ili' néquili'
quia'
para cabí gunli' dul-la' tsözxón len
légaquiē',
en para cabí quí'i sáca'li' le gaca
quégaquiē'.

⁵ Nayánda' dul-la' nabága'gaquiē',
en chinayasa nadxín caz lúxiba,
pero Dios röjnenē' le ruá' dö' núnagaquiē'.
⁶ Buli'bf'i quégaquiē' ca na' gulunē'
queéli'.

Buli'bf'i quégaquiē' chopa cö' tsca le
gulunē'.

Buli'bf'i quégaquiē' chopa cö' tsca le
naca xihui' gulunē' queéli'.

⁷ Guli'gún ga ila'guf'i ila'záquiē', en
ila'bödxi yéché'ē
tsca guca yöl-la' ba, en yöl-la' zxön gu-
lu'fi cúngaquiē'.

Ta'zá' ládxi'gaquiē', ta'nné':

Ró'ötu' ni, rinná bé'ētu'.

Biti' nácatu' uzēbi, en catu caz cödxi
yéchi'tu'.

⁸ Que lē ni na', tu dzasö ila'dxín qué-
gaquiē' le ila'guf'i ila'záquiē',
yöl-la' guti, en yöl-la' ribödxi yechi', en
yöl-la' ridún.

Iléguiē' lu guf', tu' napa cazē' yöl-la'
huáca zxön Xanru' Dios.

Lē cazē' usiúdxē' quégaquiē'.

⁹ Ní'irö gunné': "Ila'bödxi nupa ta'nná
bē' luyú yödžölió, en gulún le ruá' dö'
tsözxón len légaquiē', en bulu'z'í' xibé le
nequi quégaquiē'. Ila'bödxe', en ila'bödxi
yéché'ē cate' ila'lé'enē' dzön que yödžö
zxön na' régui. ¹⁰ Zi'tu' z'í'tu'sö ila'cu'ē
tu' iládxinē' ca gaca xíguia' le gaca que
yödžö na', ate' ila'nné': ¡Bica' bayechi'

Babilonia, yödžö zxön ni, le gúcada' lo!
¡Tu dzasö guca xíguia' que!"

¹¹ Ní'irö gunné': "Ila'bödxe' ca' bönni'
to'o tuti' nacu'ē yödžölió, en ila'bödxi
yéché'ē ni'a que yödžö na' tu' cabirö soa
nu ga'u bi ilúti'ē ni'." ¹² Cúnturö nu ga'u
ni':

Le néquiguequini oro, en plata,
en yugu' guiój zaca', en yugu' bugá,
en yugu' lari' nazáca'da', en lari' xiná
chul-la,

en lari' dxí'ado', en lari' xiná gu'ido'os,

en yugu' yaga rilá' zxixi,

en le néquiguequini dxita nazáca'da',

en le néquiguequini yaga nazáca'da',

en le néquiguequini guíē cobre,

en le néquiguequini guíē,

en le néquiguequini guiój jara.

¹³ Cúnturö nu ga'u ni':

Canel, en yugu' le rilá' zxixi, en yalaj,
en le rilá' zxixi que mirra, en que yöj
olíbano,

en xisi uva nál-la, en le naca za,

en yiózja dxí'ado', en xzoa' xtla,

en yugu' búrrodo', en yugu' bö'cu' zxila',

en yugu' böa', en yugu' carreta,

en yugu' bönni' huen dxin, en ia'bal-la
bönachi.

¹⁴ Nupa na' to'o tuti' ilē légaquiē',
ila'nná:

Nadúagaca le guzē ládxi'li'.

Chigudödi quégaca yöl-la' tsahui',

en le nácgaca lachi queéli',

ate' bíti'rö idžólili' léguequi.

¹⁵ Ní'irö gunné': "Ila'bödxe' bönni' to'o
tuti' na', tu' guta' quégaquiē' yöl-la'
tsahui' tu' gulúti'ē lu yödžö na', ate'
ila'cu'ē zi'tu' z'í'tu'sö tu' iládxinē' ca
gaca xíguia' le gaca que yödžö na', en
ila'bödxi yéché'ē." ¹⁶ Ila'nné':

¡Bica' bayechi' yödžö ni guca zxön!

Guca ca tu nigula náccunu lari'
nazáca'da',

en lari' xiná chul-la, en lari' xiná
gu'ido'os,

en naz'i biquitaj queénu le néquiguequini oro
en le néquiguequini guió'j zaca', en yugu' bugá.

¹⁷ Tu dzasó guniti yöl-la' tsahui' que yödzo ni.

Ní'iró gunné': "Yúgu'té bönni' xan barco, en nupa nacua' lé'egaca barco na', en nupa tu'sá' yugu' barco na', en nupa tun dxin lu nísado', ila'cu'è zi'tu' zí-tu'sò." ¹⁸ Cate' ila'lé'ené' dzón que yödzo na' régui, ila'bödxé', en ila'nné': "¿Bízx-iló yödzo guca zxón ca naca yödzo ni?"

¹⁹ Ní'iró gunné':

Ulu'dxfé' bëchtó ícjagaquié'.
Ila'bödxé', en ila'bödxí yeché'è, ila'nné'.
¡Bica' bayechi' yödzo ni guca zxón!
Yöl-la' tsahui' que yödzo ni ben ga guta'
yöl-la' tsahui'
quégaca yúgu'té nupa nácagaca xan
barco lu nísado'.

Tu dzasó guniti yödzo ni.

²⁰ Buli'dzeja ca gaca que yödzo ni, lib'ili' zóali' yehua' yubá,
enca' lib'ili' néquili' queé' Dios,
lib'ili', bönni' gubáz queé',
en lib'ili', bönni' ru'ili' didza' uláz queé'.
Buli'dzeja, tu' chiguchúguié' Dios que yödzo ni
ni'a que bi gulún queéli' nupa nacua' lu yödzo ni.

²¹ Ní'iró tué' gubáz lá'ayi nál-la buchisé' tu guió'j zxón le naca ca tu guichi riyétu, ate' gurú'uné' le lu nísado', gunné':

La' canisó gaca que yödzo Babilonia,
tu' iguinnaj yödzo na' guca lo,
ate' bíti'ró nu udzöli le.

²² Bíti'ró nu yöni lu yödzo na' nupa ta'guinni lé'e le rul-la,
en caléga nupa tu'cödxí gui
en caléga nupa tu'cödxí lúzuba' böa'
bèdxi.

Bíti'ró udzöli bönni' huen dxin ni',
en bíti'ró yöni bö rigú'u le rutu ni'.

²³ Bíti'ró uzení' nitú guí' lu yödzo na',
en bití' yöni chí'è bönni' rutsaga në'è ni',
en caléga chí'ibi' bí'i nigula rutsaga ná'abi'.

Caní gaca sal-la' nácali' lo, lib'ili' rá'uli',
en rúti'li' lu yödzo ni,
en guzxí' yé'eli' bönachi iduté yödzo'lió
len yöl-la' gudzá' queéli'.

²⁴ Lu yödzo ni gulaj xichóngaquei' bönni'
gulu'è didza' uláz queé' Dios,
en xichóngaca nupa néquiguequi queé'
Dios,
enca' xichóngaca yúgu'té bönachi
yödzo'lió,
tu' bëtigaca nupa nacua' yödzo ni
léguequi.

19 Gudödi lé ni biyönda' tu'i zidzaj
didza' bönachi zían nacua' yehua'
yubá, ta'nná:

¡Yöl-la' ba Dios! ¡Yöl-la' rusölá runé',
ate' yöl-la' zxón, en yöl-la' unná bë' napé'
Dios queéru'!

² ¡Naca iduté li, en tsahui' ca rusiúdxé'!
¡Guchúguié' que yödzo na' naca ca tu
nigula udá dzaga,
en quégaca bönachi lu yödzo na' ila'niti
tsaz!

¡Gulún ditaj bönachi yödzo'lió tu' nözi le
ruá' dö' guluné'!

¡Dios buzí' lèbè' légaquié'
tu' gulútié' yugu' huen dxin queé'!

³ Leyúbölö gula'nné': "¡Yöl-la' ba Dios!
¡Cuéntica'só dzón ga régui yödzo na'!"

⁴ Idapa uru'è bönni' gula ni' bulu'tsaga
lógaquié' lu yu tsözxón len idapa nupa
ni' nabángaca, en ta'yéaj ládxi'gaquié'
Dios, Bönni' rö'è lataj lo queé'. Gula'n-
né': "¡Ca' gaca! ¡Yöl-la' ba Dios!"

⁵ Ní'iró biyönda' ru'í didza' tu nu zoa
lataj lo na', rnna:

¡Guli'cu'è Dios queéru' yöl-la' ba
yúgu'téli' runli' xichiné', lib'ili' na' rádx-
ili' Lé',

nácali' bönachi cá'asó, en bönachi lo!

**Laní que yöl-la' rutsaga na' queë'
Bönni' náquië' Bö'cu' Zxíla'do'**

⁶ Biyönda' ca' nu ru'í zidzaj didza', le biyón ca riyón cate' tu'í didza' bönachi zían, en biyón ca' ca riyón ga ridödi tu yegu zxön, o ca riyón cate' rinné guziú', ate' rna:

¡Yöl-la' ba Dios tu' risí lahuë' rinná bë'ë!
¡Napa cazë' yöl-la' huáca!

⁷ ¡Ral-la' udzeja ládxi'ru', en uz'íru' xibé',

en cú'uru'-në' yöl-la' ba
tu' chibidxín dza laní que yöl-la' rutsaga na'

queë' Bönni' na' náquië' Bö'cu' Zxíla'do'!
¡Si' lu në'ë Cristo nupa néquiquequi queë'!

¡Chinabá'a queébi' bi'i utsaga ná'aleni' Lë'!

¡Nácabi' le rulu'í nupa na' néquiquequi queë'!

⁸ ¡Dios ru'ë-bi' lataj gácubi' lari' nazáca'da'

le naca idú, en rëpi yösa bení!

Lari' nazáca'da' na' rulu'í le naca tsahui' núngaca nupa néquiquequi queë' Dios.

⁹ Ní'irö gubáz lá'ayi na' gudxë' neda', gunné': "Buzúaj lu guichi didza' ni: ¡Bica' bágaca nupa na' nulidzë' Dios légaquië' para ila'cu'ë laní que yöl-la' rutsaga na' queë' Bönni' náquië' Bö'cu' Zxíla'do'!"

Gudxë' ca' neda': "¡Yugu' didza' idütë li ni ru'ë didza' Dios caz'!"

¹⁰ Buzóa zxiba' xini'ë gubáz lá'ayi na' para tseaj ládxa'a lë', pero gudxë' neda': "¡Biti' gunu' caní! Neda' ca' naca' huen dxin queë' Dios ca nacu' li', en ca náca-gaquië' böchi' luzó'o nazí' lu ná'agaquië' le naca idütë li ca naca queë' Jesús. ¡Guyéaj ládxi'ë Dios!"

Nupa tu'í didza' uláz queë' Dios, tu'í didza' le naca idütë li ca naca queë' Jesús.

Bönni' dxíë'-ba' böa' chiguichi

¹¹ Ní'irö bilé'eda' nayalaj lúzxiba, ate' bulu'í loba' tuba' böa' chiguichi, ate' lë' Bönni' dxíë'-ba', Nu Run Ca Rnna, enca' Nu Ru'í Didza' Le Nácate'. Caní lë' tu' ruchi'a rusöröë' ca naca le naca idütë li, enca' caní tsejë' gudil-la. ¹² Rëpi yösa bení guioj lahuë', le nácagaca ca guí', en dxíagaca icjé' zían le néquiquequi oro. Nazúaj lahuë' tu le lë', le cuntu nu nözi, pero tuzë' Lë' nózinë'. ¹³ Nácue' tu lari' në'aj rön, en lë' ca' "Nu Naca Xtídzë'ë Dios." ¹⁴ Röjnógaquië' Lë' ni'a në'ë guizxi yu nacu'ë yehua' yubá, dxíagaquië'-ba' böa' chiguichi, en nácugaquië' lari' nazáca'da', le naca chiguíchido'os, en biti' naca bösaj. ¹⁵ Rirúaj ru'ë le naca ca tu guíë tuchi' le gúninë' zi' bönachi yugu' yödzö. Inná bé'enë' légaquië' len tu xiyaga guíë, en gunë' légaquië' xíguia', le gaca quégaquië' ca raca que le ribía lubá uva, zoa nu rulibi léguequi, tu' riléde'enë' Dios, Bönni' napa cazë' yöl-la' unná bë'. ¹⁶ Nazúaj lu lari' nácue', enca' lu xigatsjé' ca lë', "Bönni' Rinná Bé'enë' Nupa Ta'nná Bë'", enca' "Bönni' Náquië' Xángaca Nupa Nácagaca Xan."

¹⁷ Ní'irö bilé'eda'-në' tuë' gubáz lá'ayi zuñë' lu gubidza, ate' bë'ë zidzaj didza', en gudxë'-ba' böa' ta'daba' lúzxiba, rn-në': "¡Guli'dá, buli'dubi ga ni gáguli' laní zxön queë' Dios! ¹⁸ Gáguli' xipéla-gaca nupa ta'nná bë', en xipéla'gaca nupa ta'nná be'e bönni' röjáquië' gudilla, en xipéla'gaca nupa nál-lagaca, en xipéla'gacaba' böa', en xipéla'gaca nupa ta'bía légacaba', en xipéla'gaca yúgu'të bönachi, nupa biti' nadó'ogaca, en nupa nadó'ogaca, nupa nácagaca cá'asö, en nupa nácagaca lo."

¹⁹ Ní'irö bilé'eda'-ba' böa' sínia' na', enca' yugu' bönni' ta'nná bë'ë yödzölió, en bönni' röjáquië' gudil-la guizxi yu quégaquië', nudúbigaquië' para ilún-lenë' gudil-la Bönni' dxíë'-ba' böa' chigu-

ichi, dzágagaca Lë' ni'a në'ë guixzi yu.
²⁰ Bidzunba' böa' sínia' na', enca' bönni' na' bē'ë didza' uláz queéba', bönni' na' benē' yugu' le nácada' bē' loba', en guxzí' yē'enē' nupa ni' gulu'íi lataj nu uzúaj láhuiguequi lē na' naca bē' dá'gaca lēba', en gula'yéaj ládxi'gaca budó' queéba'. Böa' sínia' na', enca' bönni' na' bē'ë didza' uláz queéba', gula'rú'unē' léguequi nabángacasö ca' ga rö'ö guí' zxön le réguilen lē na' ruzégui'da'. ²¹ Bönni' na' dxíē'-ba' böa' chiguíich bētiē' yúgu'tē nupa na' gudá'gaca léguequi len guíē tuchi' na' rirúaj ru'ē, atē' bulu'huóljaba' yúgu'tēba' böa' na' ta'daba' lúzxiba, tu' guláguba' xipéla'guequi.

Chi gayuá' iz

20 Gudödi lē ni bilé'eda' ruhuójtjē' tu gubáz lá'ayi, zē'ë yehua' yubá, en zönē' zxf'ini guíē que lataj chul-la, atē' nu'ē tu du guíē yödx. ² Guzxönē'-ba' bëla zxön xitsiní' na', nácaba' bëla guzóaba' dza ni'te, bëla na' lēba' Tu' Xihui', enca' Satanás, atē' béguē'ē-ba', en bucá'anē'-ba' caní chi gayuá' iz. ³ Yöjchú'unē'-ba' lataj chul-la, en busayjē' lataj na', atē' budé'ē tu le riguela' le rusayaj lataj na' para cabirö si' yē'eba' bönachi yugu' yödzo ga izá'arö chi gayuá' iz na', atē' tödi ni' ral-la' yédxiba' tu chf'ido'.

⁴ Nf'irö bilé'eda' yugu' lataj gapa ta'bó' nupa ta'nná bē', atē' nupa bila'deli' ulu'chi'a ulu'söró le raca ta'bó' yugu' lataj na'. Bilé'eda' ca' yugu' bö' gulaca caz bönachi bulu'rixē' yénguequi yugu' bönni' biti' nácagaquiē' tsahui' tu' gulún ba nalí queē' Jesús, en tu' gulún libán que xtídzē'ē Dios. Yugu' bönachi ni biti' gula'yéaj ládxi'gaca böa' sínia' na', en budó' queéba', en biti' gulu'íi lataj nu uzúaj ra' xigáguequi, o lu né'eguequi lē na' naca bē' nu da' lēba'. Bulu'bán nupa ni lu yöl-la' guti, atē' gula'nná bē'len Cristo chi gayuá' iz, ⁵ pero ia'zícá'rö bönachi nátigaca biti' bulu'bán.

Cate' izá'arö chi gayuá' iz na' ulu'bán. Yöl-la' rubán lu yöl-la' guti guca ni naca le raca zí'alö. ⁶ ¡Bica' ba, en bica' lá'ayi nupa ta'deli' yöl-la' rubán na' raca zí'alö! ¡Yöl-la' guti le raca burópilö biti' bi gaca gun quéguequi, pero ilácagaca bixúz queē' Dios, enca' queē' Cristo, atē' ila'nná bē'len Lē' chi gayuá' iz na'!

⁷ Cate' izá'a chi gayuá' iz na', ulu'sané' Satanás ga na' nadzún. ⁸ Urúaj Satanás, en tsöjzxi' yē'e bönachi yugu' yödzo nacuá' idapa la'a yödzoilió. Si' yē'e ca' bönachi yödzo Gog, en yödzö Magog, atē' utubi léguequi lu gudil-la. Tsca nácagaca nupa ni, nácagaca ca naca yuzxi rö'ö tu ra' yegu zxön. ⁹ Guixzi yusö gula'dödē' idútē luyú, atē' gula'cu'ē lé'ajlō lataj ga na' nacuá' bönachi néquiguequi queē' Cristo, le naca yödzo na' nadxí'inē' Dios. Nf'irö benē' Dios ga böxaj gu' le birúaj yehua' yubá, le buzegui' légaquiē'. ¹⁰ Tu' xihui' na' nazí' yē'e légaquiē', yöjchú'unagaquiē' le ga rö'ö guí' zxön que lē na' ruzégui'da', ga na' chizóaba' böa' sínia' na', enca' bönni' na' bē'ë didza' uláz queéba'. Ila'gu'íi ila'zaca' ni' rēla, en te dza yúgu'tē iz zá'gaca.

Ta'dxín bönachi lahuē' Dios ga rö'ë ruchi'a rusöröē'

¹¹ Nf'irö bilé'eda' tu lataj lo chigu-ichi, en bilé'eda' ca' Nu rö'ö ruchi'a rusöröē' lataj na'. Lahui' lo Nu ni gula'nítitē yödzoilió, en lúzxiba, atē' bítirö budzöli xilátjaguequi. ¹² Bilé'eda' ca' nupa chinátigaca, nupa nácagaca lo, en nupa nácagaca cá'asö, zuíguequinē' lahuē' Dios. Gula'yálag guichi, en guyalaj ca' ia'tú guichi ga na' nazúajgaca lá-gaca nupa nadéli'gaca yöl-la' na'bán idú. Buchi'a busöröē' Dios nupa na' chinátigaca tsca naca le nazúaj yugu' lu guichi na', lē na' gulúngaca. ¹³ Lu nísado' bulu'rúaj nupa chinátigaca, nacuá' lu nísado'. Lu yöl-la' guti, en lu lataj chul-la bulu'rúaj nupa chinátigaca, gula'cuá'

gapa ni', ate' buchi'a busöröé' Dios tu tu tsca naca le gulúngaca. ¹⁴Ní'irö yöjt-sázagaca yöl-la' guti, en lataj chul-la ga ni' rö'ö guí' zxon le naca lataj que yöl-la' guti le raca burópilö. ¹⁵Nupa biti' nazúa-jgaca lu guichi quégaca nupa nadéli'gaca yöl-la' na'bán idú yöjtsázagaca lataj na'.

Tu lúzxiba cubi, en tu luyú cubi

21 Gudödi na' bilé'eda' tu lúzx-iba cubi, en tu luyú cubi, tu' chigudödi quégaca lúzxiba na', en luyú na' gula'cuá' z'falö. Bítirö dè nísado'. ²Neda', Juan, bilé'eda' yödzö lá'ayi na', le naca Jerusalén cubi, ruhuötaj, rirúaj yehua' yubá ga zoé' Dios, en chinabá'a que ca nabá'a queébi' bi'i nigula chizóa utsaga ná'alenbi' tu bönni'. ³Biyönda' ruí' didza' nu rnna yehua' yubá: "¡Buli'yútsöca! ¡Ga zoé' Dios zóalen bönachi! ¡Sóalené' léguequi, ate' léguequi iláca-gaca bönachi queé'! ¡Dios caz sóalené' léguequi, en gáquié' Dios quéguequi! ⁴Dios uzxié' nisa ribödxi zoa guió'j lóguequi. Cúnturö nu gati, en cúnturö nu cödxí, en cúnturö nu cödxí yechi', en cúnturö nu qui' saca', tu' chigudödi quégaca lè na' gulaca z'falö."

⁵Ní'irö Nu na' rö'ö lataj lo ni' gunná: "¡Buyútsöca! ¡Yúgu'té ruúna' cubi!"

Gudxi ca' neda': "¡Buzúaj lu guichi lè ni, tu' naca idúté li didza' ni, en naca löza!"

⁶Ní'irö gudxi neda': "¡Chinaca caz! ¡Neda' naca' Nu zoa z'atélö, enca' Nu röjsete ca naca le risí lo, en le ruúdx-itè! ¡Nu ribidxi nisa, neda' guna' ga guí'aj nisa na' runna yöl-la' na'bán! ⁷Nupa ila'deli' lu le raca yödzölió, gaca quéguequi yúgu'té lè ni. Neda' gaca' Dios quéguequi, ate' léguequi iláca-gaca zxi'ini caza', ⁸pero nupa tadxi, en nupa biti' ta'yéajlè' neda', en nupa náca-gaca xihui', en nupa tuti bönachi, en nupa tun le biti' naca tsahui', en nupa náca-gaca udzá', en nupa ta'yéaj ládxi'gaca

budó' guió'j budó' yaga, en yúgu'té nupa ta'zi' yé', chizóa riböza xilátjaguequi lu guí', ga ni' rö'ö guí' zxon que lè na' ruzégui'da', lè na' naca yöl-la' guti le raca burópilö."

Yödzö Jerusalén le naca cubi

⁹Ní'irö tué' gubáz lá'ayi nababé' gadxé' gubáz lá'ayi ni' gula'zöné' gadxi zxi'ga'do' yúdxugaca gadxi yödzöhué' yöjsétegaca, bidé' ga zoa'. Gudxé' neda': "¡Gudá ni! ¡Ulu'ida' li' bi'i nigula na' si' utsaga ná'alenbi' Bönni' na' náquié' Bö'cu' Zxi'la'do!"

¹⁰Guzóalené' Dios Bö' Lá'ayi neda', ate' guché'è gubáz lá'ayi na' neda' tu lu guí'a sibi, en buluf'iné' neda' yödzö lá'ayi Jerusalén, ruhuötaj, rirúaj yehua' yubá ga zoé' Dios. ¹¹Yödzö ni répi yösa bení' tu' zóalen le yöl-la' bení' queé' Dios. Répi yösa bení' ca répi yösa bení' tu guió'j nazáca'da' ca naca guió'j guí'do'os nazí'i le jasje. Naca yödzö na' yení'ido' ca naca guió'j jara. ¹²Zoa tu zö'ö zxon, en sibi idú gásibi'ilö yödzö na'. L'é zö'ö na' nacué' chinnu gapa nu riyaza. Ra' gapa nu riyaza na' nacué'é chinnué' gubáz lá'ayi tapa chí'è. Tu tu ga nu riyaza na' nazúaj tu tu lágaca idxinnu cö' di'a dza zxi'ini xi'sóé' Israel. ¹³L'é zö'ö le ruyú saca' ga rilén gubidza nacué' tsonna gapa nu riyaza, en saca' ga za' bö' ziaga nacué' tsonna gapa nu riyaza, en saca' tsólá'a ga ridödi gubidza beo' ziaga nacué' tsonna gapa nu riyaza, en saca' ga ribía gubidza nacué' ca' tsonna gapa nu riyaza. ¹⁴Zxan zö'ö que yödzö na' nacué' chinnu xilibi zö'ö, ate' lé'egaca xilibi zö'ö na' nazúa-jgaca lágaquié' idxinnuté' bönni' gubáz queé' Bönni' na' náquié' Bö'cu' Zxi'la'do'.

¹⁵Gubáz lá'ayi na' ruí'ilené' neda' didza' zöné' tu yaga urixi le néquini oro para urixé' tsca naca yödzö na', en tsca náca-gaca gapa nu riyaza, en tsca naca zö'ö que. ¹⁶Yödzö na', lédi'i náca-gaca idapa la'a. Lédi'i naca yöl-la' tunna que,

en yöl-la' blaga' que. Len yaga na' burixë' tsca naca yödzo na', naca idú tsca gaca nu sa' idú chinnu dza, ate' lédi'i naca yöl-la' tunna que, en yöl-la' xitsá' que, en yöl-la' bölága' que. ¹⁷Burixë' ca' yöl-la' yödx que zö'ö na', naca tu gayuá' yu' tapa-un dxita, tsca naca dxita que na' bönachi, læ na' rurixinë' gubáz lá'ayi na'.

¹⁸Zö'ö na' néquini guió'j jaspe, ate' yödzo na' néquini órotëz, le naca yení'ido' ca naca guió'j jara. ¹⁹Yugu' xilibi zö'ö que yödzo na' nazí'gaca biquitaj guió'j nazáca'da'gaca.

Xilibi zö'ö zí'aló néquini guió'j jaspe.

Le buropi néquini guió'j zafiro.

Le bunni néquini guió'j ágata.

Le budapi néquini guió'j esmeralda.

²⁰Le guyu' néquini guió'j ónice.

Le buzxopi néquini guió'j cornalina.

Le igadxi néquini guió'j crisólito.

Le izxunu' néquini guió'j berilo.

Le igá néquini guió'j topacio.

Le idxí néquini guió'j crisoprasa.

Le idxinéaj néquini guió'j jacinto.

Le idxinnu néquini guió'j amatista.

²¹Chinnu gapa nu riyaza na' ta'yáy-jani chinnu bugá. Tu tu ga nu riyaza na' riyáyjani tuz bugá. Luyú la' nöza lo que yödzo na' néquini órotëz, le naca yení'ido' ca naca guió'j jara.

²²Biti' bilé'eda' tu yudo' lu yödzo na', tu' náquië' Xanru' Dios yudo' que, napa cazë' idütë yöl-la' unná bë', en læsca' caní náquië' Bönni' náquië' Bö'cu' Zxíla'-do', náquië' yudo' que yödzo na'. ²³Biti' run bayudxi tsení'gaca gubidza, en beo' lu yödzo na', tu' uzení' yöl-la' bení' queë' Dios lu yödzo na', ate' læsca' Bönni' náquië' Bö'cu' Zxíla'-do' náquië' le uzení' ni'. ²⁴Bönachi yugu' yödzo, nupa nulágaca, ila'dá lu bení' que yödzo na', ate' yugu' bönni' ta'nná bë'ë yödzo'lió idiguá'agaquië' yöl-la' tsahui' quégaquië' lu yödzo na'. ²⁵Catu caz tsáyajgaca gapa nu riyaza lu yödzo na' lahui' dza, ate' lataj na' catu caz gaca rëla. ²⁶Bönachi

yugu' yödzo idiguá'agaquië' ni' le náca-gaca lesaca', en yöl-la' tsahui' quégaquië'. ²⁷Tu le ruá' dö' biti' ca' tsaza ni', en calëga tu le naca xihui', en calëga nu rizí' yë', pero tsázagacasó ni' nupa nazúajgaca láguequi lu guichi queë' Bönni' náquië' Bö'cu' Zxíla'-do', ga na' nazúajgaca lágaca nupa nadéli'gaca yöl-la' na'bán.

22 Ní'irö gubáz lá'ayi na' buluf'inë' neda' tu yegu yení'ido', le naca nisa yegu le runna yöl-la' na'bán. Rëpi yösa bení' yegu na' ca rëpi yösa bení' guió'j jara. Rirúaj yegu na' lu lataj lo ga rö'ë Dios, en ga rö'ë ca' Bönni' náquië' Bö'cu' Zxíla'-do'. ²Rizá' yegu ni gatsaj láhui'lö nöza lo que yödzo na'. Tsölá'a huéaj ra' yegu na' rö'ö tu yaga le runna yöl-la' na'bán, ate' ta'bía chinnu luzuí tu iz. Tu tu beo' ta'bía yaga na'. Xilágui'-gaca yaga na' nacagaca le tu'un bönachi yugu' yödzo. ³Biti' soa ni' nitú le dxía dö'. Soa lu yödzo na' lataj lo ga rö'ë Dios, enca' ga rö'ë Bönni' náquië' Bö'cu' Zxíla'-do', ate' yugu' huen dxin queë' ila'yéaj ládxi'gaquië' Lë'. ⁴Ila'lé'enë' lahuë' Lë', ate' le nazí'i Lë' nazúaj ra' xigágaquië'. ⁵Biti' gaca rëla ni', ate' nupa nacua' ni' biti' ila'quínna tu le cu'u bení', en calëga bení' que gubidza, tu' gáquië' Xanru' Dios bení' quégaquië'. Nupa nacua' ni' ila'nná bë'tica'só.

Chizóa huödë' Cristo

⁶Ní'irö gubáz lá'ayi na' gudxë' neda', gunné': "Didza' ni naca idütë li, en naca löza. Xanru' Dios, Nu ruchiza Bö' Lá'ayi icja ládxi'do'gaquië' yugu' bönni' tu'ë didza' uláz queë', chigusól-lë'ë gubáz lá'ayi queë' para uluf'inë' yugu' huen dxin queë' le ral-la' gátatë. ⁷Caní rnnë' Jesucristo: ¡Chizóa huöda'! ¡Bica' ba nu run ca rnna didza' ruá'a uláz queë' Dios, le nazúaj lu guichi ni!"

⁸Neda', Juan, biyönda', en bilé'eda' yugu' læ ni. Gudödi biyönda', en bilé'eda'

yugu' lë ni, buzóa zxiba' xini'ë gubáz lá'ayi na' buluí'inë' neda' yugu' lë ni para guna' lë' zxon. ⁹Ní'irö lë' gudxë' neda': "Biti' gunu' caní, tu' naca' neda' huen dxin queë' Dios ca nacu' li', en ca náca-gaquië' böchi' luzó'o na' tu'ë didza' uláz queë' Dios, enca' ca náca-gaca yúgu'të nupa tun ca rna le nazúaj lu guichi ni. ¡Ben zxon Dios!"

¹⁰Gudxë' ca' neda': "Biti' ucachu'u xtídzë'ë Dios ni, didza' ruá'a uláz queë', en nazúaj lu guichi ni, tu' chizóa ilaca yugu' lë ni. ¹¹Nu ruá' dö' guá'tica'sö dö'. Nu run le cabí naca tsahui' gúntica'sö le cabí naca tsahui'. Nu run dx-i'a, gúntica'sö dxi'a, ate' nu nequi quez queë' Dios, guéquitica'sö quez queë'." ¹²Rnnë' Jesús: "¡Chizóa huöda'! Nu'a lu na'a le nadéli'gaca bönachi, ate' ubi'a que queë'güequi tsca naca le gulúngaca. ¹³Neda' naca' Nu zoa zí'atëlö, enca' Nu röjsete, ca naca le risí lo, en le ruúdx-itë. Naca' ca' Nu run ga risí lo, en Nu rusiúdxí."

¹⁴Ní'irö gunné': "¡Bica' ba nupa n-yari le nácugaca, en tun le naca dxi'a! ¡Nazí'guequi lataj ilahuë' le ribía yaga le runna yöl-la' na'bán, en gaca ila'yaza gapa nu riyaza lu yödzö na'! ¹⁵Nupa náca-gaca xihui', en nupa náca-gaca udzá', en nupa tun le ruá' dö', en nupa tuti bönachi, en nupa ta'yéaj ládxi'gaca budó' guíó'j budó' yaga, en nupa ta'yaza ládxi'-

gaca ta'zí' yë' ila'cuá' ní'ilö ra' yödzö na'. ¹⁶Neda', Jesús, gusól-la'a gubáz lá'ayi quia', ate' buluí'inë' libí'ili' yugu' lë ni, libí'ili' na' dzágali' yugu' cö' bönachi quia'. Neda' naca' dí'a dza queë' David, enca' zxi'ini xi'sóë'. Naca' ca' bölj hui sila."

¹⁷Tu'ë didza' Dios Bö' Lá'ayi, enca' bi'i nigula utsaga ná'aleni'-në' Bönni' náquië' Bö'cu' Zxí'la'do, ta'nnë': "¡Gudá!" Nu riyöni didza' ni ral-la' inná: "¡Gudá!"

¡Nu ribidxi nisa, en nu rizé ladxí' le, ral-la' guídi, en gu'aj nisa le runna yöl-la' na'bán!

¹⁸Neda', Juan, ruzéajni'ida' nupa ta'yöni didza' ni ruá'a uláz queë' Dios, en nazúaj lu guichi ni, rnnía': Channö nu udá' lë'e didza' ni, Dios ubi'ë que nu na'. Gunë' lë' xíguia' ca naca le nazúajgaca lu guichi ni. ¹⁹Lësca' caní, channö nu cúa bíti'tës didza' ni ruá'a uláz queë' Dios, en nazúaj lu guichi ni, Dios ugúë' ca' xilataj nu na' lu guichi ga nazúajgaca lágaca nupa nadéli'gaca yöl-la' na'bán idú, enca' lu yödzö lá'ayi, ca na' nazúaj qué'guequi lu guichi ni.

²⁰Xanru', Nu run ba nalí qué'guequi lë ni rnnë': "¡Ön! ¡Huödatea'!"

¡Ca' gaca! ¡Gudá, Xantu' Jesús!

²¹Rinábida'-në' Xanru' Jesucristo uzá' ládxi'ë queéli' yúgu'téli'. ¡Ca' gaca!